


Yompor Po'ñoñ ñeñċ attō Yepartseshar

Jesucristo e'ñe etserra a'pocaterriay

Yomprosho



New Testament in Yanasha' (PE:ame:Yanasha')

Yompōr Po'ñoñ ñeññ attō Yepartseshar Jesucristo e'ñe etserra a'pōctaterrnay Yompōresho

New Testament in Yanesha' (PE:ame:Yanesha')

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

fa985bb4-fad0-5968-9ee4-626b89cba24f

Contents

SAN MATEO	1
SAN MARCOS	127
SAN LUCAS	202
SAN JUAN	336
HECHOS	417
ROMANOS	520
1 CORINTIOS	577
2 CORINTIOS	632
GÁLATAS	667
EFESIOS	686
FILIPENSES	706
COLOSENSES	719
1 TESALONICENSES	731
2 TESALONICENSES	741
1 TIMOTEO	747
2 TIMOTEO	762
TITO	773
FILEMÓN	780
HEBREOS	783
SANTIAGO	826
1 PEDRO	840
2 PEDRO	854
1 JUAN	862
2 JUAN	874
3 JUAN	876
JUDAS	878
APOCALIPSIS	883

COHUEN ÑOÑETS ÑEÑT QUELLCA' SAN MATEO

Arrpa' all aquellcaret allohuen pa'so'chñechno ñeñt pa'tañneshañ pen Jesús

(Lc. 3.23-38)

¹ Arrpa' all aquellcaret Jesucristo pa'tañneshañ e'ñe pa'so'chñechnohuenet. Jesucristopa' David po'mreneñ, e'ñe Abrahamoteñ. Allohuen añ so'chñetspa' ñeñtara mereñtsorecmuet.

² Abrahampa' chemere'tana Isaac. Isaacña' chemere'tana Jacob. Jacobña' chemere'tana Judá epuet ñaña pa'mo'nasheñechno.

³ Judaña' chemere'tana Fares epuet ñaña Zara. Ñet pachoretpa' añ pa'so'cheñ Tamar. Faresña' chemere'tana Esrom. Esromña' chemere'tana Aram.

⁴ Aramña' chemere'tana Aminadab. Aminadabña' chemere'tana Naasón. Naasónña' chemere'tana Salmón.

⁵ Salmónña' chemere'tana Booz. Ña pachorpa' añ pa'so'cheñ Rahab. Boozña' chemere'tana Obed. Ña pachorpa' añ pa'so'cheñ Rut. Obedña' chemere'tana Isái.

⁶ Isáiña' chemere'tana David ñeñt añcha'tarettatset. Davidña' chemere'tana Salomón. Ñeñtpa' arrot Urías puetaporot.

⁷ Salomónña' chemere'tana Roboam. Roboamña' chemere'tana Abías. Abíasña' chemere'tana Asa.

⁸ Asaña' chemere'tana Josafat. Josafatña' chemere'tana Joram. Joramña' chemere'tana Uzías.

⁹ Uzíasña' chemere'tana Jotam. Jotamña' chemere'tana Acaz. Acazña' chemere'tana Ezequías.

¹⁰ Ezequíasña' chemere'tana Manasés. Manasésña' chemere'tana Amón. Amónña' chemere'tana Josías.

¹¹ Josíasña' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo ačhapatarettet allañar all anetso ñeñt pa'so'cheñ Babilonia.

¹² Allempo huacherret Babiloniotpa' Jeconíasña' chemere'tuerrana Salatiel. Salatielña' chemere'tana Zorobabel.

¹³ Zorobabelña' chemere'tana Abiud. Abiudña' chemere'tana Eliaquim. Eliaquimña' chemere'tana Azor.

¹⁴ Azorña' chemere'tana Sadoc. Sadocña' chemere'tana Aquim. Aquimña' chemere'tana Eliud.

15 Eliudña'pa' chemere'tana Eleazar. Eleazarña'pa' chemere'tana Matán. Matánña'pa' chemere'tana Jacob.

16 Jacobña'pa' chemere'tana José ñeñtepa'tcha' puerrollar pa' María. Maríaña'pa' cheyore'tana Jesús, ñeñtara ñeñt Cristotats.

17 Allempoteñ corre't Abraham tarremphua allempo corre't ñaña David, ñeñña allponsheña chemere'shatnomuetspa' allo'tsenca'ye charrasheña puechenet pa'tatssheña. Ñaña allempoteñ corre't David tarremphua allempo achapataretet Babilonio, ñeñtpa'cho'ña allo'tsenerrerr charrasheña puechena pa'tatssheña ñeñt allponsheña chemerasha'terrtserr allempo. Ñaña allempoteñ achapataretet Babilonio tarremphua allempo eñalleta Cristo, ñeñtpa'cho'ña allo'tsenerrerr charrasheña puechenet pa'tatssheñet ñeñt allponsheña chemerasha'tnerrtserr tarremphua allempo eñalleta ñaña Cristo.

Arrpa' atto eñalleta Jesucristo

(Lc. 2.1-7)

18 Te'pa' o'ch neserrpare'tatas atto allempo eñalleta Jesús. Allempoña María ñeñtcha' pachor pa' Jesús'pa' aña'ye o'patenaya José ño'ch yore'. Ama yoreña'pa' Maríaña'pa' ahuepa't achomenta Parets Puecamquëño't.

19 Joséña ñeñtcha' puerrollar pa'pa' ñaña'pa' e'ñe cohuen acheñer ñeñto'marña ñapa' ama mueno o'ch pencach. Ñaña'pa' atet cotape'ch o'ch ser e'ñe a'nahuota.

20 Allempoña atet cotape'chenpa' machayo'to' orrtoña Yompor po'mllaño'teñer. Ñeñt orrtoya puechopoñopa' atet otos:

—José Davidna'tare, amach pa'llpatsto; pocte'ca'ye o'ch peyore María ñeñtcha' petapor pe'pa' tarro'mar ñapa' o'ca'ye achomenta Parets Puecamquëño't.

21 Te'pa' eñalletatan'cha' asheñorr, ñeñña'pa' peso'chcha' Jesús tarro'mar ñapa' ñeñtcha' a'queshpaterre' pa'cheñer po'chñarotet. Arrpa' allohua ñeñt atet och mellaño'teñ.

22 Ñeñtpa' tarro'mar atet pa' attoch etsota ñeñt atet eñorana'tane't Isaiás ñeñt a'mtahuete't Yompor po'ñoñ, ñeñtpa' atet ote't:

23 Ñeñña shopshesha'pa' amach a'p'llaretote'ye' achomento; cheyore'tanach asheñorr, ñeñña'pa' sochet'cha' Emanuel.

Ñeñt ña so'chñetspa' atet oten: Te'ña Parets'pa' e'ñe parro'tseney.

24 Allempoña José oyerr ñemoť, atet och Yompor po'mllañoťeńerpa' ñaña'pa' atetcho' pa. Yoran María ñeńťcha' puetapor pa'.

25 Tarraña ñapa' ama a'płleńe tarrempohua allempoch emare'tua; ñeńťña asheńorrpa' soch JESÚS.

2

Atto eńotańnesha'pa' huačha'tet o'ch enteńeta' Jesús allempo eńalleta

1 Allempo eńalleta Jesús all Beléńo, e'ńe alla Judeopa' añ añcha'tarettatset Herodes. O'ña eńalletuapa' eńotańnesha'ña huačha'tet allot huena atsrretpa' o' čhačha'tet Jerusaléńo.

2 Ñetńapa' atet otyesoset:

—¿Erro'tsena'tña ñeńť eńalletatsa ñeńťcha' pa'mńcha'tareťer pa' judionesha'? Yapa' yeńoteń o' eńalleta tarro'mar yapa' o' yentoń po'rantor allot huena atsrret; yapa' ñeńťecopña yehuena o'ch yeconcorpana'teńa'.

3 Allempoña añcha'tareť Herodes e'man atet ñońetspa' ñaña'pa' ñeńťa na' pueyočhro ama eńmato pueyočhro. Allo-huen jerusaléńo'marnesha'pa'čho'ña ama esesha' eńmatatseto ñamet pueyočhreto.

4 Allempońapa' agotatan añcha'tareťnesha' ñeńťara judioneshet; o'ch apčhet allohuen cornanesha' ñeńť atarr sherba'yets judioneshacop. O'ch apčhet ñańa ñeńť atarr etsotayene' ñońets ñeńť atet anareť judioneshacop. Allña a'płto'tyesanet:

—¿Erra't otete'tña allcha' eńalletańa ñeńťcha' Cristoterrets?

5 Ñetńapa' atet ochet:

—Arr anetso Beléńo allara Judeo tarro'mar quellcopa' atet anuaret, atet quellquēť ñeńť a'mıtayeť Yompor po'ńoń. Ñeńťpa' Yomporńa atet otatset:

6 Ań Beléń ñeńť judana'tarnesha' po'patseń, e'ńe po'ńočh ñeńť anetser ñeńť atarr asherben entyeńet allohuen ñeńť añcha'tareťetyetsa allo'marnesha'. Tarro'mar all Beléńo allcha' eńalleterra ñańa ñeńťcha' atarr añcha'tareťterrtsa ñeńťcha' cohuańperre' allohuen neyochreshačhno ñeńťara israelnesha'.

7 Allempoña otuoset atetpa' Herodesńapa' e'ńe a'nahua agotateran ñańa po'potantań eńotańnesha' ñeńť čhačha'tats allempo Jerusaléńo. Allña'pa' e'ńe acořa a'płto'tare'tyesapanet:

—Rantopa' ¿e'ńe'tña esempoteńña seńch ñeńť sorrtoya ñenmať?

8 Allempoña eńotatosetpa' ñaña'pa' otanet:

—Te'pa' o'ch ahues Beléño, e'ñech acoṓa se'nyesos ñeñt cheshatoll. Ñerra'm o'ch señchpa' o'ch sotuerren allochñapa' napa'cho'ña o'ch ahuen o'ch neconcorpana'teña' naña.

⁹ Ñetñapa' allempo e'mhuanmuet atet otanet añcha'taretpa' allempoñapa' ahuanmuet. Rantoña ñeñt entnenet allot huena atsrretpa' ta'netsa allenet senet, attotapa' o' chap e'ñe allo'tsen cheshatoll. O'ña chap allo'tsen cheshatollpa' o' muechecosa e'ñe alla ento e'ñe pocto.

¹⁰ Allempoña enterreterr rantopa' atarr nanac coshet.

¹¹ Allempoñapa' o' be'tososet pocollo, allña entoset cheshatoll epuet pachor María. Concorpana'tosyetpa' ma'yochosyet. Torañpesyesoset po'tsapotpa' aposet e'ñe atta oro, aposet tsach puese' ñeñt atarr eñmosať. Aposet ñaña eñmosať puerets.

¹² Allempoña ñetpa' eñotatanet Yompor puechopoño allochñapa' attoch ama oñerreto Herodesesho'mar. Allempo puerrerrret pa'nyetopa' aña coterret po'poñ toñ.

Allempo cheshatoll Jesúsapa' anmet Egipto allcha' a'queshpachet

¹³ Puerraçherrtsetpa' Yomporña po'mllañoñeñerpa' alla orterranerr José puechopoñoť. Ñeñtpa' atet otererr:

—Petantaye'cha o'ch pa'yech cheshatoll pachore'na, orraye'chap all anetso Egipto allcha' seyçhosa. Esemposhuañenñapa' o'ch alla noterrperr atetcha' peṓa. Herodes po'ñoçhpa' e'natancha' añ cheshatoll attoch muetsatach.

¹⁴ Allempoña o' tantapa' anman cheshatoll, pachore'na yeta tsapo, ahuanmuet Egipto.

¹⁵ Allñapa' alleneta attotañapa' o' rromuen Herodes. Attoña etsota Yompor po'ñoñ atet ote't ñeñt a'mtaye't po'ñoñ; ñeñtpa' Yompor atet otatse't: “Egiptoťcha' nagotater Nechemer.”

Allempo Herodespa' mueñan ñeñtcha' muetsue' allohuen asheñorroťollesha'

¹⁶ Ñehua, allempoña Herodespa' o' eñoch čha sheca'neñ eñotañnesha'pa' ñañaapa' ñeñta atarr atsrre'mate'. Atto atsrre'ma nanacpa' allempoñapa' mueñan ñeñtcha' muetsue' allohuen asheñorroťollesha' ñeñt Beléño'tsa'yen ñaña ñeñt allohuen allampaño'tsa'yen Beléño. Allohuen asheñorroťollesha' ñeñt echene' epa po'charña ama't ñaña allohuen ñeñt eñalleyetsa chenta' e'ñe poctacma muetsanatu. Ñehua, ñeñt atet eñotatos eñotañnesha'pa' ñañaapa' atet cotape'ch ahuo'te' epa char eñalletuaña ñeñt cheshatoller.

¹⁷ Attoña etsota ñeñt atet ote't Jeremías ñeñt a'mtaye't Yompor po'ñoñ ahuať; ñeñtpa' atet ote't:

18 Ñeñt anetser Ramopa' atarrcha' e'morrterra yahueñets, atarr gogatstena; allpa' Raquelca'ye ya'na'tene' puechoyoresha'; ama mueno o'ch esesha' emya'te' tarro'mar puechoyoresha'pa' ama eñallmeñe, o' e'ñe muetsanatuet.

19 Allempoña rroma Herodespa' Yomporña po'millañoñerpa' alla orrterranerr José puechopoño all Egipto.

²⁰ Allñapa' otererr:

—Te'ñapa' o'ch petanterra, o'ch alla paner cheshatoll pachore'na o'ch alla pepuerrerra israelnesha' pa'nyo; o'ca'ye colla'huaña ñeñt o'pataye't añ cheshatoller ñeñto'ch muetsayeñ.

²¹ Ate't otuepa' ñañapa' allenta tantena o' alla anerran cheshatoll pachore'na alla ahuerret israelnesha' pa'nyo.

²² Allempo ahuerretpa' ñetñapa' e'mare'tueret añ añcha'tarettertsa Judeo ñeñt Herodesoñ puechemer ñeñt sochetsa Arquelao. Ñeñto'marña mecha'tenet serrtset all. Puechopoñoñapa' alla eñotatererr ñeñto'marña allempopa' alla serr Galileo.

²³ Cherr Galileopa' ahuerri paterr anetso ñeñt pa'so'cheñ Nazaret. Allñapa' alla ye'cha'huerra. Atto'tca'yeña etsotaña ñeñt atet otyese't ñeñt a'mta'yesaye't Yompor po'ñoñ; ñetpa' atet otyesete't ñeñtcha' Cristoterretsapa' "oteñetcha' nazareto'marnesha'."

3

Allempo orrta Juan ñeñt serrpare'tosets all amayo
(Mr. 1.1-8; Lc. 3.1-9, 15-17; Jn. 1.19-28)

1 Allempoñapa' orrta Juan ñeñt apatose' acheñenesha' Yomporecop. Ñañapa' arr serrpare'tatosanet amayo e'ñe alla Judeo.

² Allñapa' atet otosanet:

—Te'pa' o'ch soctape'cherr ello cohuen Yomporecop tarro'mar o' chapmoch allempoch ayochreshatterra Yompor ñeñt pue'ntaño'tsen.

³ Ñehua, añmapa' ñocopca'ye eñose'tña Isaías ñeñt a'mtaye't ahuat Yompor po'ñoñ. Allempopa' atet ote't:

E'morrterrach puešheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt'pa' atet'cha' otterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pacharretyesoñ pa'te'p'." Arrpa' allohua ñeñt atet aquellcare't ahuatoteñ Cristocop.

⁴ Ñeñña Juanpa' camello pue'ch apomotaret' ñeññ pa'shtam pen. Allo chanena ñeñtpa' pa'rrom. Allñaapa' rra'yesane't ahuañchenclla* ñeñña puerrar pe't epuet pets po'moñ.

⁵ Allempoña jerusaléño'marnesha'pa' chocma hua'cha'tyenet ñesho ñaña allohuen judeo'marnesha'. Hua'cha'tyeññaña ñaña allohuen jordanaso'marnesha'.

⁶ Allña ñetpa' a'meta'yesoset po'chñaret, Juanñaapa' apatyepapanet Yomporecop. Ñeñña oñ all apatyepapanet añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeñfaretta ñeñfet judioneshet. Ñetpa' tarro'mar hua'chenet añ muenenet o'ch apatapanet Juan. Juanña serrpare'tatapanetpa' otapanet:

—Sapa' ama cohuenayayso atarr ashcarña'es, cha sotena ñerra'mrrate' shechpa sompor sepen. Po'ño'chca' ama eseshaye' sotenaye e'ñech sapataretteño'ta o'ch sequestherra allochña'pa' amach coñchatuerrso Yomporecop allempoch yoro'chtatuer tsapatonet.

⁸ Napa' añcha'ña notapas o'ch sorrtatyes ñeññ e'ñe cohuen enten Yomporecop ñeññ atet pena ñeññ po'ño'ch o' cotape'cherran ello cohuen Yomporecop.

⁹ Sapa' cha soteneñ seyo'chro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet soctape'chatsto tarro'mar ñeñtpa' ama esoye' enteñe Yomporecop. Tarro'mar o'ch notas ñerra'm Yomporecop muenetseñ ama't añ mapue' ñeññ senten arr o'ch a'pnasereñ Abraham po'm'reneñ.

¹⁰ Ñeñño'marña napa' o'ch notas ñerra'm amach soctape'cherro cohuen Yomporecop o' mameshamerra o'ch chaponasa attoch coñchaterres Yomporecop. O'ch netma'ntatasa atet ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeññ allohuen tsache'chno ñeññ ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatuere't.

¹¹ Elloña Juanpa' atet oterraneterr:

—Ñeñ'es cotape'cherre' cohuen Yomporecop napa' ama't e'ñe po'ño'ch napatensoñ Yomporecop, napa' e'ñeca'ye oño'chaya napatenes. Tarraña Cristo ñeñtcha' huapatsa chenta'pa' ñapa' añcha'ca'ye chorratossa Parets Puecamquëñ ñeññ atet ñerra'm tso'. Ñapa' ñeññ atarr ahuamencatesha' nañapa' ama tama ahuamencateyayno. Ñapa' ñeñña

* 3:4 Ñeññ ahuañchencllapa' arrapo' enteñ palestino'marnesha'.

atarr sherbets, nañapa' ama es nesherbena attoch ama't po'sapatapa' o'ch nanmoñ.

¹² Ñapa' atarr ahuaencat ñapa' ñach acrerre' allohuen acheñenesha'. Ñapa' añ toma'ntena ñeñt orrene' puehoshnat alloch shoshnan po'trigo o'ch e'ñe pue'llomirochayaña. Ñeñtña pue'llomerpa' o'ch a'yapa'che' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña. Ñeñt'pa' allohua atet serrpare'tatanet Juan.

Allempo apataretta Jesús Yomporecop

(Mr. 1.9-11; Lc. 3.21-22)

¹³ Allempo huapa Jesús Galileo't, chap Jordanaso allo'tsen Juan, ñapa' añ muenen o'ch apata' Juan Yomporecop.

¹⁴ Juanñapa' eñoratsa cha mueneñeñ o'ch emman Jesús. Ñeñt'pa' atet ota'p:

—Ama pocteyaye o'ch napatapa' p'a, añña poctetsa p'achña napatose'. Papa' eso'maruachñaca'ye p'onña nesho, p'aca'yeña ñeñte'p atarr sherbets.

¹⁵ Jesúsñapa' atet otererr:

—Papatapno'tach Juanacha' tarro'mar atetca'ye poctetsa o'ch yetsota allohuen ñeñt poctetsa Partsocop.

Allempoña Juanpa' e'ñe pocte' eñch,

¹⁶ allempoñapa' apatapan Jesús. E'ne apatue'pa' o' cha'nerrña Jesús oñot, enetñapa' ahuepa't atorare'tta. Allo'tña e'ñe sohua'nma Parets Puecamquëñ, Jesúsñapa' e'ñe atet enta'p ñerra'mrrate' ye'p o' sohua'nma entot, e'ñe chap ñesho.

¹⁷ Allempoñapa' cha e'morrtatsa ñaña ñoñets entot atet eñorena Yompor. Ñeñtña ñoñetspa' atet oten:

—Añmapa' ñeñtña Nechemer ñeñt atarr nemorrentena. Ña atarr nanac nocshatene'.

4

Allempo oneñt'pa' topatenan Jesús, mueneñ o'ch atet p'atan Jesús ñeñt ama pocteye' enteno Yompor

(Mr. 1.12-13; Lc. 4.1-13)

¹ Allempoña Parets Puecamquëñpa' anman Jesús all amayo. Ñeñt'pa' añecop atet p'a attochña allpa' o'ch huapoña oneñe't, tarro'mar ñapa' añ mueneñ o'ch atet p'atyees ñeñt ama pocteye' enteno Yompor.

² Allñapa' ama rreno e'ñe añña torrena attoch etsotuan ora allohuen ñeñt cohuentetsa Pomporecop. Ñeñto'marña ama't o' pa'tatsoch charramatpa' ama't coñe'tapa' ama es rreno yeto ama't ñaña tsapo. O'ña pa'tatsoch charramatuapa' cho cheporratsa.

³ Allempoñapa' huapoña oneñeñ. Atto topatosan Jesúsapa' atet otos:

—Pa ñerra'm po'ñochte' Parets Puechemereppa' o'ch pot: Añ mapue' puenasepa' pan.

⁴ Jesúsñaapa' atet otaḗ:

—Napa' ama nemno o'ch atet neḗa tarro'mar Yompor po'ñoñ ñeñt anuaret ahuatoteñ ñeñtpa' atet oteneý: “Allohueneý acheñeneshohueneypa' ama e'ñe rreñtsa ñapueḗ yocrrañ yepeno. Añe'naña yocrrañ yepen yecamquēñecop ñeñt allohuen allpon oteneý Yompor.”

⁵ Allempoña oneñeñpa' o' aneñ all Jerusaléño, ñeñt anetserpa' anaret Partsocop. Allñaapa' a'tapatos nanac eno allohuanen Parets pa'paquëll.

⁶ Allñaapa' otuererr:

—Papa' ñerra'm po'ñochte' Parets Puechemereḗ te'pa' ḗpomacha arrot tarro'mar amach ḗa'tserrpo tarro'mar Parets po'ñoñ ñeñt anuaret ñeñtpa' ama'tña atet oten:

Yomporpa' o'ch mueñonaḗ po'millañoḗeñnaneshar ñeñtcha' pecuañpsapue'. Ñetcha' ḗagapapuet, o'ch enatapapet attoch amach ḗa'tserrḗatca'toso mapyo.

⁷ Allempoña Jesúsapa' alla otererr:

—Añpa'cho'ña anuaret Yompor po'ñoño: “Amach ya'llocchame'tatsche Yompor ñeñt Yepartseshar yepen.”

⁸ Allempoña oneñeñpa' o' alla anerranerr Jesús all atarr aspeno e'ñe a'noso. Allotña gatyuesuererr allohuen ñeñt allpon all añcha'taretetyena pa'namen acheñenesha' ñeñt yecha'yetsa erraḗaren añe patsro, gatyuesuererr all atarr cohuentatyeñet.

⁹ Oneñeññaapa' alla otuererr:

—Ñerra'm na pema'yocheñoḗen o'ch peconcorpana'tna, napa' napaḗcha' ora allohuen ñeñt cohuen pentyen arr.

¹⁰ Jesúsñaapa' alla otererr:

—Te'pa' o'ch orrerreḗ oneñeñe. Napa' ama nemno o'ch atet neḗa tarro'mar Yompor po'ñoñ ñeñt anuaret ñeñtpa' atet oteneý: “Añach ñapueḗ yema'yochena Yompor ñeñt Yepartse-shar yepen, e'ñech ñapña yesherbe'.”

¹¹ Allempoña oneñeñ topatuahuan Jesúsapa' o' ahuer o' quechpa'ner. Allempoñapa' cha'cha'toña Yompor po'millañoḗeñnaneshar; ñetñaapa' e'ñe cohuen sherḗoset Jesús all. Arrpa' allohua huañ atto oneñeñpa' topatenan Jesús allempo.

*Allempo e'ñe ñenmañ torrena Jesús Partsocop all Galileo
(Mr. 1.14-15; Lc. 4.14-15)*

12 Allempoña Jesús e'mare'tan Juan o' yottam̄pset, ñaña'pa' allenta ahuerr Galileo.

13 Cherr Galileopa' ama a'pohuerro anetso Nazareto, arraña serr Capernaumo, allña ye'cha'huerra. Ñeñt̄ Capernaumpa' e'ñe sa'patop̄ño'tsen, allara ñeñt̄ otenet Zabolónnanesha' pa'netser ñaña Neftalenesha' pa'netser.

14 Ñeñt̄pa' allña ye'cha'huerra allochñapa' attoch etsota Isaías po'ñoñ ñeñt̄ a'mtaye't Yompor po'ñoñ; ñeñt̄ ñapa' atet ote't ñeñt̄e anetsrecop:

15 Ñeñt̄ Zabolónnanesha' pa'netsro ñaña Neftalenesha' pa'netsro ñeñt̄ all sa'patop̄ño all Jordanas yom̄ta'n, allara Galileo all ye'cha'yena pa'namen acheñenesha' ñeñt̄ ama judioneshayayeto.

16 Ñeñt̄ acheñenesharpa' ñetpa' aña ye'cha'yenet ñeñt̄ ama cohuenaye' enteno Yompor; ñetpa' 'cha ottenet ñerra'm checmeto'tseneta. Tarraña te'ñapa' o' enteret ñeñt̄cha' e'ñe cohuen a'puetarsam̄perrahuet poctap̄ñet. Ñetña ama't aña o'patyesahuetañe't rromueñets ñeñt̄ara chenquēñets, te'ñapa' ama't ñocpuetpa' o' a'puetarsam̄psaretterret e'ñe cohuen. Arrpa' allohua atet nane't Isaías po'ñoñ.

17 Allempo 'cherr Jesús Galileo allempoña e'ñe ñenma't serpare'tatuerranet all. Ñeñt̄pa' atet otuerranet:

—Te'pa' o'ch soctape'cherr ello cohuen Yomprecop tarro'mar te'pa' o' 'cherrmoch allempoch ayochreshatterra Yompor ñeñt̄ pue'ntaño'tsen.

Atto Jesús'pa' 'chore'tosan pa'tatssheña ñeñt̄ e'ñe caca torrenet rromuet

(Mr. 1.16-20; Lc. 5.1-11)

18 Allempo Jesús'pa' chopeñe'chyen all sa'patop̄ño'mar; ñeñt̄ña sa'ppa' añ pa'so'cheñ Galileas. Allña'pa' entosan acheñ epsheña; ñeñt̄ña puesheñarrpa' añ pa'so'cheñ Simón ñeñt̄ara sochetsa Pedro epuet pa'mo'nasheñ Andrés. Ñetña'pa' ter-rayetset e'ñe alla sa'po tarro'mar ñetpa' e'ñe ñeñt̄a po'taruas penet.

19 Jesúsñapa' atet otosanet:

—Te'ñapa' o'ch notas, socta'n na attoch neyochresha' neperres. Ñeñt̄ atet sepena ahuatoteñ e'ne' cac te'ñapa' o'ch ney'chatterres attoch se'nerr ñaña acheñ ñeñt̄cha' same'ñaterra.

20 Ñetña'pa' allorocma na'nmuert po'terrayapa' o' cotet Jesús.

21 Allempoña meterrerr allotpa' entuerranerr po'poñ acheñ epsheña; ñeñt̄ña puesheñarrpa' añ pa'so'cheñ

Jacobo* epuet pa'mo'nasheñ Juan; ñeñtpa' Zebedeo puechemerasha'. Ñetñapa' po'noñto'tsa'yenet; allo'tsen ñaña pomporet all a'cohuenetyenet po'terraya. Jesúsñapa' chore'tuerraneterrpa' atet otuerraneterr ñamet:

—Te'pa' o'ch socta'n saña.

²² Ñetpa'cho'ña e'ñe allorocma na'nmuet po'noñt ñaña pomporet o' cotet ñamet Jesús attoch pueyochresha' perranet ñamet.

Allempo Jesúsapa' yečhatenan shonte' acheñenesha'

(Lc. 6.17-19)

²³ Allempoñapa' chopeñe'chyes Jesús errapa' Galileo'mar. Yečhatyesosan judionesha' e'ñe ñet po'prahuet. Allñapa' serrpare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prama'yenahuet, ñaña' e'ñe a'crratyesuosanet.

²⁴ Atteñapa' e'mare'tuet errapa' ama't Sirio'mar. Huapatyesoñet allohuen ñeñt mueročhtatyen atsnañets. Huapatyesoñet ñeñt osyen pa'namen atsnañets ñaña ñeñt at-serrpañachno. Huapatyesoñet ñaña ñeñt chorra'yena oneñt ñaña ñeñt oñañachno ñaña echarrañachno. Allohuenetpa' ñaña' e'ñe a'crratyesuerranet.

²⁵ Shonte' acheñenesha' ñeñt cota'yese'. Cota'yese galileo'marnesha', ñaña decapoliso'marnesha' ñaña jerusaléño'marnesha', ñaña judeo'marnesha'; ama't ñeñt yečheta Jordanaso yom'ta'npa' o' e'ñe cota'yese.

5

Allempo Jesúsapa' serrpare'tatosanet all aspento

¹ Allempoña entan shonte' acheñenesha' ñeñt cotene', Jesúsñapa' ahuo' aspento. Allña anorrospa' huacha'toña allohuen pueyochreshachno.

² Ñaña' yečhatapanetpa' atet otapan acheñenesha' ñeñt po'ñočh atarr cosheñtso'tsa'yenet:

Acheñenesha' ñeñt po'ñočh atarr cosheñtso'tsa'yenet

(Lc. 6.20-23)

³ —Nanac cosheñtso'tsa'yen allohuen ñeñt ama esoye' asherbenaye' entyetso pueyočhreto Yomporecop tarro'mar ñetpa' o'patterretcha' Yompor po'cohuenña atto ayochreshattena pue'ntañot.

⁴ 'Nanac cosheñtso'tsa'yen allohuen ñeñt lleca'yetsa Yomporecop tarro'mar ñetpa' coshaterranetcha' Yompor.

* 4:21 Jacobopa' ñeñtara ñeñt sochenet Santiago.

5 'Nanac cosheñtso'tsa'yen allohuen ñeñt ama añeye' e'neneto ñeñt e'ñe ñocpueta tarro'mar ñetpa' o'pataterranetcha' Yompor allohuanen pats.

6 'Nanac cosheñtso'tsa'yen allohuen ñeñt nanac muenene' o'ch e'ñe orrtatyenet ñeñt e'ñe pocte' enten Yompor. Ñetpa' e'ñe atet mueneñet ñerra'mrrate' cho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

7 'Nanac cosheñtso'tsa'yen allohuen ñeñt nanac cohuen muerannetsa tarro'mar elloña Yomporpa' atarrcha' muererranet ñet.

8 'Nanac cosheñtso'tsa'yen allohuen ñeñt e'ñe pueyo'chretopa' ama eñalle sosya'tsañ ama't coñe'ta tarro'mar ñetpa' enteretcha' Parets.

9 'Nanac cosheñtso'tsa'yen allohuen ñeñt chocma amo'tstanna'tatenahuet tarro'mar ñetpa' po'ño'chcha' Yompor puechemer perranet.

10 'Nanac cosheñtso'tsa'yen allohuen ñeñt e'moñe'tyenet atto ñetpa' e'ñe pocte' es pa'yenet Yomporecop. Nanac cosheñtso'tsa'yenet tarro'mar ñetpa' o'paterretcha' Yompor po'cohuenña atto ayochreshattena pue'ntañot.

11 'Sapa'cho'ña nanac cosheñtso'tsa'yenes ñerra'm esempo erro'tuanen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tampesyenset.

12 Chocmuepa'chña socsha tarro'mar shonte' ñeñt o'patatensa Yompor pue'ntañot; ñeñtcha'ña atarr socshatterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt a'mta'yesaye't Yompor po'ñoñ.

Acheñenesha' ñeñt sherbets Yomporecop arr patsro ñetpa' atet atma'ntatarettenet ñerra'm pos ñaña puetare'

(Mr: 9.50; Lc. 14.34-35)

13 'Sapa' ñeñtes name'ñenaya añ netma'ntatensa atet ñerra'm pos ñeñt atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach erro'tenot ellopa' ya'poserrtatere. Allempopa' o'huañcha' es sherba' acheñeneshacop; añecpach sherberr o'ch yehuapore'ch a'yo allcha' atmama'ch acheñenesha'.

14 'Ñaña añ netma'ntatensa puetare' elloña ñeñtña atarr sherbene' acheñenesha' arr patsro. Sapa' chocmach cohuen es sorrtyen. Atetcha' sepena ñerra'mrrate' paterr anets ñeñt e'ñe a'noso'tsen aspeno. Ñeñtña anetserpa' chocmach cohuen orrtena allemateñ, amach erro'tenot ma'natacheto.

15 Ñaña ñerra'm esempo ya'llchaten lampareña' ñeñt'pa' ama tarrecpaye' ya'llchateñe o'ch ye'rramañpes coyño.

Ñeñtapa' añecopña ya'huortateñ o'ch yene' enonet attoch e'ñe choyo'tamipesuan allohuen ñeñt pocollo'tsa'yen.

16 Sapa' attecmeupa'chña sorratyen ñeñt cohuen enten Yompor. Allochñapa' po'potantañpa'cho'ña e'ñech cohuenare' entennaset atet es sorratyen cohuen. Attochña ñetpa'cho'ña cohuentatapreternasetcha' Seyomporer ñeñt pue'ntaño'tsen.

Atto Jesúsapa' yeçhatosanet atarr sherben Yompor po'ñoñ ñeñt atet anaret ahuatoteñ

17 Jesúsñapa' atet oterraneterr:

—Amach soctape'chatsto napa' añecopñe' nohuapa o'ch nehuapore'taterr Yompor po'ñoñ ñeñt ahuatoteñ atet anaret atet ñerra'm Moisés po'ñoñ ñaña añ po'ñoñ ñeñt quellca'yese't ñeñt a'mta'yese't Yompor po'ñoñ. Napa' ama añecpaye' nohuapo o'ch nehuapore'tach, napa' e'ñechca'yeña netsotatuer.

18 E'ñe po'ño'ch notenes: Ama ahupore'tpahuoyaye Yompor po'ñoñ ñeñt atet anaret ahuatoteñ, ama't tayoteñ tarrempohuach esempohuañencha' chenca'huerra pats ñaña enet. Ama't patrra ñoñets ñeñt atet anaretpa' amach chenquerro ama't e'ñe patrra quellec puehempotollohuenpa' amach chenquerro ama't tayoteñ tarrempohuach esempohuañencha' e'ñe etsotuer ñeñt atet oten ahuatoteñ.

19 Ñeñto'marña ñerra'm esesha' o'huañ e'ñeye' ame'ña'po' entan ama't patrratolla ñoñets ñeñt atet anaret ahuatoteñ ñaña ñerra'm attach yeçhatan po'potantañ, ñeñtña acheñerpa' amach tama sherbeno Yomporecop ñeñt atto ayochreshattena ña pue'ntaño't. Tarraña ñerra'm esesha'chña e'ñe etsoterre' ñaña ñerra'm e'ñech atet yeçhatan po'potantañ, ñeñtña acheñerpa' ñeñtcha'ña atarr sherberrets Yomporecop attoch ayochreshatterra ña.

20 Napa' o'ch notas, po'ño'chca'ye sa atet e'ñe pocte' es sorratyen, ellochña señtana'tuerepa'ch atet es cohuen orrtatyeneñ fariseonesha' ñaña añ ñeñt atarr etsotayenayeñ ñoñets ñeñt atet anaret. Ñerra'm amach señtana'tuerranetopa' amach erroteno't so'pataprechoña Yompor po'cohuenña atto ayochreshattena ña pue'ntaño't. Attoña ama't ahuatapa' amach seçherro all añcha'tareñtena pue'ntaño.

Atto Jesúsapa' yeçhatosanet ama e'moñe'tanna'tpahuoyaye (Lc. 12.57-59)

21 Jesúsñapa' alla yerpaterraneterr ñeñt atet anarettete't ahuatoteñ ñoñets, ñeñtapa' atet oterraneterr:

—Sa ahuatoteñpa' se'marte'ña atet otarettete't ahuať
acheñenesha'. Ñeñtpa' atet otarettete't: “Amach muetsatsteto
acheñ. Ñerra'm esesha' muetsene' acheñpa' ñapa'cho'ña
muetseretcha' tarro'mar ñeñtoťcha'ña o'patateret
coñcheñets.”

²² Elloña na te'pa' o'ch noterres, ama't ñeñť atťa
e'moñe'tene' pamo'tspa' ñapa'cho'ña ñeñtoťach o'patateret
coñcheñets. Ñaña ñerra'm esesha' atarr sosyoť sochatse'teñet
pamo'ts ñeñtpa'cho'ña ñeñtoťach o'patateret coñcheñets
allo'tsa'yen añcha'taretnesha'chno allecma a'pocťatenet
ñoñets. Ñaña ñerra'm esesha' puepencare'teñoť atarr
sosyoť sochatse'teñet pamo'ts ñeñtpa'cho'ña acheñerpa' añ
o'patenaya tso' ñeñť parrarets errañaren.

²³ Ñeñto'marña napa' o'ch notas: Ñerra'm esempo ĉho es
papun Yomporecop allecma sherbeñet Yompor allñapa'taya
o'peyerposya pamo'tsñapa' ĉha patsrre'mateñ,

²⁴ pañapa' ñeñťcha' pāp Yomporpa' pena'ner alla. O'ch
ahuerreṑ, pemo'nasheñña ñanom pamo'tsterra'. Allem-
pochña pepuerrerra allecma sherbeñet Yompor allempochña
paphuer Yompor ñeñť pō'patateña.

²⁵ Ñaña ñerra'm esempo esesha' setmantene' o'ch anmaset
añcha'tareťesho allcha' sa'pocťaterra' señoñ, sañapa' e'ñech
allorocma samo'tstera ñeñť se'moñe'tene' tayepa'tñapa' ama
seĉhena' añcha'tareťesho. Chosachña amo'tsterraya ñeñť
setmantene'te't atťot pomataterret añcha'tareťesho ñaña'pa'
o'ch pomuensa' guardiyesho ñeñťcha' seyottamṑse'.

²⁶ Po'ñoĉhca'ye o'ch notas, ñerra'm ĉoch yottamṑsasetpa'
allenasachca'ye o'pono allotpa' amachca'ye ahuen
ĉha'nmaterrseto. Esemphuañencha' ĉoch seĉha'nmaterret
ñerra'm esempoch e'ñe setsa'tuerra ora allohuen ñeñť
allpon quelle muenenet. Ama't e'ñe eptalla centavoťollña
ñerra'm ama setsa'tueña'pa' amachca'ye ĉha'nmaterrseto
allot. Ñeñto'marña notenes o'ch e'ñe cohuen samo'tstera
ñeñť se'moñe'tene' tayepa'tñapa' ama ĉhennasa' ñeñť atarr
yoroĉhen senten socop.

*Atto Jesús'pa' yeĉhatosanet ama achtapret'pahuoyaye
taporets*

²⁷ Ñaña sapa' ahuatoteñ se'marte'ña atet otarettete't
acheñenesha': “Amach chetapretatsteto taporets.”

²⁸ Elloña na te'pa' o'ch noterres, ñerra'm esesha' cohue'ne'
coyanesha' pueye'cheñoť, o'ca'ye ochña'tet pueyoĉhreto.

²⁹ Ñeñto'marña notenes: Ñerra'm seclle' pātyenes ñeñť
ama pocťeye' enteno Yompor, añ pocťetsa o'ch sequeĉhpuerr
ñeñť seye'ĉhena seclloyot. Ñeñtpa' e'ñe atet ñerra'mrrate'

čho serroten seclle' o'ch sehuapore'ch, ama't ñeñt seclle' secohuenrote'tsen ñeñt atarr sesherbene'. Añña ama tama yoročhenayaye socop o'ch sa'ypo'ñer e'ne tayecma ñeñt soctape'chatene' sosya'tsañ. Añcha'ña atarr yoročhen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñtpa' añ toma'ntena atet ñerra'mrrate' o'ya'chencaterr pa'terr yechets ama't yecle' ama't yot, te't esempohuañen ora yechtso-huenpa' huapore'terryet coñcha'puetso.

30 Attecma ñaña ñerra'm sotpa' p̄atyenes ñeñt ama pocteye' enteno Yompor añ poctetsa o'ch sequečpuerr ñeñt atet čhocma p̄atse'tatyenes sot. Ñeñtpa' e'ñe atet ñerra'mrrate' čho sepechen sotpa' o'ch sehuapore'ch, ama't ñeñt secohuenrote'tsen sot ñeñt atarr sesherbene'. Ñeñtpa' o'ch alla noterrser. Añña ama tama yoročhenayaye socop o'ch sa'ypo'ñer e'ñe tayecma ñeñt soctape'chatene' sosya'tsañ. Añcha'ña atarr yoročhen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso.

*Atto Jesús pa' yečhatosanet ama asanna' tpa huoyaye
(Mt. 19.9; Mr. 10.11-12; Lc. 16.18)*

31 Ñaña te'pa' o'ch noterrser po'poñ: Sapa' ahuatoteñpa' señoteñe'tña atet otarettete't: "Ñerra'm esesha' serre' puetaporpa' apa'nmepa'ña papell all aquellcare't attoch quečpuerran puetapor."

32 Elloña na te'pa' o'ch noterres: Ñerra'm ama añecpaye' quečpuerrano puetapor atto ama čhoye' aguēnana po'psheñeñ yacma, ñerra'm attota serran puetapor, ñaña'pa' ochña'taterrancha' puetaporeshe'mañ po'psheñesho't; ñeñtpa' ama cohuenaye' enteñe Yompor. Ñaña ñerra'm esesha'ña yorerre' ñeñt asaretpa' ñeñtña yacmarpa' čhach chetapretenan po'psheñeñ puetapor; ñeñtpa'čo'ña ama cohuenaye' enteñe Yompor.

*Atto Jesús pa' yečhatosanet amach natsteto po'ñoñ Parets
pa'so'chño*

33 Ñaña te'pa' o'ch noterrser po'poñ: Sa ahuatoteñpa' se'mare'tña ñeñt atet otarettete't: "Amach e'ñe orrena na'yeneto po'ñoñet Parets pa'so'chño tarro'mar ñerra'm erratsen nene' po'ñoñ Parets pa'so'chño ñeñtpa' atarr huomenc ñoñets amach atta puesatscheto, čhocmachña e'ñe a'poctatyenet ñeñt atet o' nohuetña po'ñoñet Parets pa'so'chño." Ñeñtpa' atetca'ye otarettete'tña ahuatoteñ.

34 Tarraña elloña na te'pa' o'ch noterres: Ama't e'ñe erratsena pa'so'chño'pa' amach senatsto señoñ. Amach

sotatsto o'ch sena' señoñ Yompor pue'ntañ pa'so'chño; ñeñtpa' ama tama huomencaye' senteñe ñeñtecop atet senen señoñ. Tarro'mar napa' o'ch notas ama't pue'ntañpa' ñeñt po'conañ pen Parets ñeñto'marña attera atarr huomenc ñerra'm Pamo'mte'.

³⁵ Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñtpa'cho'ña attera atarr huomenc tarro'mar ñeñtpa' ñeñtña nen Parets pa'tconet. Ñaña amach sotatsto o'ch sena' señoñ Jerusalén pa'so'chño tarro'mar ñeñtpa'cho'ña attecma atarr huomenc tarro'mar ñeñtpa'cho'ña ñeñt pa'netser pen Parets.

³⁶ Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñtpa'cho'ña ama soyaye seye'chcatar. Ama't e'ñe pue'parra sechpa' amate' errotent sello'tacheña sa. Ñaña ñerra'm esempo sello'tenpa' amach errotent alla sa'quelluetatereña sa.

³⁷ Ama't errotena sepa'yesa'chpa' atetcha' sotanna'tyesa: Ñeñtpa' atetcha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet sepa'yenapa' ñeñtpa' oneñe'eshota huena.

*Atto Jesús pa' ye'chatosanet ama atsa'tatpahuoyaye atto e'moñe'tenyet
(Lc. 6.29-30)*

³⁸ 'O'ch alla noterrser po'poñ: Ñaña sapa' ahua'otoeñ se'mare'tña ñeñt atet otete't: "Ñerra'm esesha' pochocle'che' pamo'ts, semoñseño't ñeñt apochocle'charetpa' sepo'chocle'ch ñaña ñeñt pochocle'chene' pamo'ts. Ñaña ñerra'm esesha' pue'moñe'teño'tan a'cayam'psan pamo'ts pa'spa' semoñseño'tpa' sa'cayam'pes ñaña pa's ñeñt a'cayam'pene' pamo'ts pa's." Ñeñtpa' atetca'ye otarettete'tña ahua't.

³⁹ Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet ñerra'm esempo esesha' pue'moñe'teño'tetas o'ch tacllaset setsa'po secohuenrot, sañapa' poctepa'chña señch tacllerrserrepa' ñaña po'pshem'taño't.

⁴⁰ Ñaña ñerra'm esempo esesha' muenene' o'ch temantaset attoch puerrata'm'psaset seshtam, sañapa' poctepa'chña señch puerrata'm'psasetepa' seshtam ñeñt muenenet ama't ñaña po'pmañ seshtam allo sepmatena.

⁴¹ Ñaña ñerra'm esesha' sanmatsre'tatene' e'ñe atta paterr kilómetro, sañapa' poctepa'chña señch o'ch sanmatsre'ch ama't epa kilómetro.

42 Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

Atto Jesúsapa' ye'chatosanet amorrentpo'ch yeñch ñeñt ye'moñe'tyene'
(Lc. 6.27-28, 32-36)

43 'Ñaña sapa' se'marte'ña atet otete't ahuat: "Mueryetcha' pamo'tset ñeñt muerenahuet. Tarraña ñeñt e'moñe'tenahuetpa' ñetpa'cho'ña o'ch e'moñe'chet ñamet." Ñeñtpa' atetca'ye otete't ama't ahuatoteñ.

44 Tarraña naña te'pa' elloña o'ch noterres: Semueryach ama't ñeñt se'moñe'tene'. Ñaña ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt errof sepene'pa' sañapa' añcha' atet sepoñ ñeñt atarr cohuen enten ña. Ñaña ñeñt sa'muerochtatene' sañapa' o'ch sema'yocham'pesya.

45 Attochña sapa' eñotenset po'ño'ch puechemer penes Yompor ñeñt pue'ntaño'tsen tarro'mar sapa' añ sorrtatyen cohuen ama't e'ñe allohuenacop e'ñe atet pena Sompompa' e'ñe cohuenare' es orrtatyen ama't allohuenacop. Atet ñapa' chocma huapata'muenane't po'puetarenña allohuenacop ama't atsrre'mña'ecop ñaña ñeñt cohuenacop acheñer. Ñaña ñapa' chocma huatateñ añecop ñeñt e'ñe pocte' es pets ama't ñaña añecop ñeñt ama pocteye' es pa'yetso.

46 Ñeñto'marña notenes: Ñerra'm añña e'ñe semorrentena ñeñt semorrentenaya saña ñeñtpa' amach e'ñeye' sorrtatenoña ñeñt e'ñe po'ño'ch cohuentetsa, attoña Yomporpa' amach es apuerrso ñeñtcha' atarr socshatterre'. Tarro'mar ñeñt ama ame'ñenayo Yompor, ñetpa' añña morrentenet ñeñt e'ñe morrentenahuet ñamet. Sapa' e'ñeca'ye seño'teñ e'ñe atet pena ñeñt puehquëño'te'na cobrenan acheñenesha' shonte' quelle. Añña atarr cohuentetsa ama't ñeñt ama yemorrentenayepa' o'ch yemorrencha e'ñe cohuen.

47 Ñaña ñerra'm e'ñe añña cohuen saguën ñeñt e'ñe samo'ts sepen, ñeñtpa' amach erro'teno't senñtanoña ñeñt ama ame'ñetso, tarro'mar ñetpa' e'ñe añña cohuen aguënet ñeñt e'ñe pamo'ts penet.

48 Ñeñto'marña napa' notenes: Sapa' e'ñepa'chña cohuenare' es sorrtatyen allohuenacop e'ñe atet pena Sompompa' ñeñt pue'ntaño'tsen e'ñe cohuenare' es orrtatyenña ña.

6

Atto Jesúsapa' yečhatosanet amach pommo'cheñoŕe'na es cohuen orrtatatsteto

¹ Jesúsña'pa' atet oterraneterr:

—E'ñech señoŕa, amachña e'ñe sommo'cheñoŕe'naña es sorrtatyeno cohuen Yomporecop attoch acheñenesha'pa' o'ch entenset sapa' atarro' cohuen acheñeseñ. Tarro'mar ñerra'm ñeñŕepa'na es sorrtatyen cohuen, Yomporña ñeñŕ pue'ntaño'tsenpa' amach es apuerrsoña sa ñeñŕcha' atarr socshaterre'.

² Ñerra'm esempo es sapueñ huocchañnesha'pa' e'ñechña a'nahua sapuenanet. Sommo'cheñoŕpa' amach sotatsto entasepa' allohuen acheñenesha' attoch e'ñe cohuen entasetañ. Tarro'mar ñeñŕpa' ommoñañenesha' atet petsa. Ñeñŕ ommoñañenesha'pa' ñerra'm esempo es apueñet huocchañnesha'chnopa' o'ch orrtachet allo'tsa'yen allohuen acheñenesha' all puerahuo'mar ama't ñaña toño'mar; attochña allohuen acheñenesha'pa' e'ñech cohuen entenanetañ. Tarraña napa' o'ch notas, ñeñŕ atet petsapa' Yomporña'pa' amach es apuerraneto ñeñŕcha' atarr coshaterrahuet. Tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'tareŕterret.

³ Tarraña sapa' ñerra'm esempo es sapueñ huocchañnesha'chno amach esesha' sotaŕsa'tatsto ama't ñeñŕ e'ñe parro seyemtannena.

⁴ E'ñechña a'nahua es cohuen seŕpa'yen, allochña'pa' Sompor ñeñŕña entene' allohuen ñeñŕ a'nahua es seŕpa'yen, ñachña sapuerre' ñeñŕcha' ello atarr socshaterre'.

*Atto Jesúsapa' yečhatosanet e'ñech cohuen ma'yochet
(Lc. 11.2-4)*

⁵ Jesúsña'pa' atet oterraneterr:

—Ñaña ñerra'm esempo sema'yochena sapa' amach atet seŕpatsto atet pena ommoñañenesha'. Ñetpa' añeŕpaña ma'yochenet attoch acheñenesha'pa' e'ñech cohuen entenanetañ. Ñeñŕo'marña allempo ma'yochenetpa' arrach tomyesoset all shontena acheñenesha' puerahuo'mar amapa' all etsape'tyena toñ allecma huachena shonte' acheñenesha' attochña allohuen acheñenesha'pa' e'ñech cohuen entenanetañ. Tarraña napa' po'ño'chpa' o'ch notas: Ñeñŕ atet ommo'chetsa Yomporña'pa' amach apuerraneto ñeñŕcha' coshaterrahuet tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'tareŕterret.

⁶ Sañapa' ñerra'm esempo sema'yochenapa' o'ch sebe'tosyes so'ponro čochña seyottam̄psa attochña sapa' amach sommo'cheñoña sema'yocheñoña Sompör, ñeñtpa' e'ñech ñapuef allo'tsenes epas. Allochñapa' Sompör ñeñt e'ñe ñapña sentene' ñachña sapuerre' ñeñtcha' ello atarr socshaterre'.

⁷ 'Sa ñerra'm čho sema'yochenapa' amach atta nanac señosatsto atarr aton e'ñe orrena ñeñt atet pena po'poñ acheñenesha' ñeñt ama ame'ñenayo ñeñt ya Yeyompörer. Ñetpa' atarr tematen ma'yochenetaña' tarraña ñeñtach alla oterrete't. Čate' otenapuetañ ñerra'm atarr tematen eñosetpa' e'ñe'e' cohuen entenanet Yompör attoch e'ñe cohuen e'mñnotenat.

⁸ Sañapa' amach atet sepatsto atet penet ñet tarro'mar sapa' ama't ama es senamuena' sema'yocheñoñ, Sompörña e'ñe eñotuennas ñeñt sepallta'yena.

⁹ Sañapa' atetcha'ña cohuen sema'yochaña sa:

Yompore Partso ñeñteř pe'ntaño'tsen, yentapepa'ch pa atarr Partsoř.

¹⁰ Čapuepa'ch Nompore allempoch atarr pa'yochreshatterra arr patsro. Yetsotonapepa'ch arr patsro ñeñt atet pemnen pa Nompore ñeñt atet penet ñaña all pe'ntaño.

¹¹ Čocmuepa'ch Nompore pa'pueney ñaña yocrram̄ ñeñt allpon yepallta'yena pate'tets ye't.

¹² Peřretna'huonayepa'ch Nompore allohuen yo'chñar ñeñt ama pocteye' pentapretenye atto Nompore yapa'čho'ña yeřretnannena ñerra'm esempo erro't yeřannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña čoch Nompore pa'ypo'ñataterrey allohuen sosya'tsañečno. Tarro'mar e'ñe pa Nompore ayochreshattetsa ñeñteř atarr Partseshatets, e'ñe pa'pta ñeñteř Nompore aye'čočhtatarettetsa e'ñe er-rponañohuen. Ñeñtach nenamař; ñeñtpa' attepa'ch Nompore.

¹⁴ 'Ñerra'm sa čocma seřretnannena atto erro't seřannena' sapa'čho'ña čocmach peretnerresña Sompör ñeñt pue'ntaño'tsen.

¹⁵ Tarraña ñerra'm ama čho seřretnannenopa' Sompörpa'čho'ña amach peretnerrnasoña saña so'chñar.

Atto Jesús'pa' yečhatosanet ñeñt e'ñech po'ñočh tore'teñets Yomporecöp

¹⁶ Jesús'ña' atet oterraneterr:

—Ñaña ñerra'm esempo semneñ sema'yocheñoñ Yompor o'ch sequeçhpa' serrar ñeñtpa' e'ñe pocte'. Tarraña ñeñtpa' ama añecpayaye attoch entas acheñenesha' ñerra'm çha sellca'huen. Tarro'mar ñeñtpa' ommoñatenesha'ña atet petsa. Ñetpa' ñerra'm esempo queçhpuenet puerrar Yomporecop ñetpa' attach atsocloyayenet allochñapa' attoch eñotenanet acheñenesha' ñetpa' Yomporecop' atet penet. Tarraña na po'ñoçhpa' o'ch notas: Ñeñ atet ommo'chetsa puetore'teñoñ Yomporñapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneschach cohuentatenahuet. Ñetpa' e'ñech alla atsa'taretterret.

¹⁷ Tarraña sa ñerra'm esempo e'ñe sema'yocheñoñ Yompor o'ch sequeçhpa' serrar sapa' atterachña sorrtena e'ñech cohuen satsam'o'tyena ñaña se'paclle'chyena.

¹⁸ Allochña acheñenesha'pa' amach çha eñotaseto sapa' çho sequeçhpuen serrar ma'yochaya Yompor. Sapa' e'ñech ñapña Sompor sentene' ñeñt pue'ntaño'tsen. Allochñapa' Sompor ñeñt e'ñe ñapña sentene' ñachña sapuerre' ñeñtcha' ello atarr socshatterre'.

Atto ñeñtcha' seshonterr ñeñt atarr sherbets arrca'ye se-shonteñ all Yompor pue'ntaño

(Lc. 12.33-34)

¹⁹ Jesúsapa' alla oterrerr:

—Ñaña amach seshonta'yesatsto checmañats aña patsro ñeñtcha' atarr semorrentena. Ñeñtpa' atarr aponñpere'chña atarr aptsaña. Ama't eñetpa' o'ch be'tosanñpsonasapa' o'ch yoratsre'tamñpesuas.

²⁰ Yompor pue'ntañoçhña seshonta'yesña ñeñt e'ñe po'ñoçh sherbets. Ñeñtpa' ama aponñpere'chño ñaña ama aptsaña. Allpa' ama't eñetapa' ama be'teno attoch yoratsre'tamñpesuas.

²¹ Tarro'mar ñerra'm all Yompor pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyoçhro ñeñtña'pa' ama es sherbenoña Yomporecop.

Atto yecle'pa' añ toma'ntena ñeñt po'lampareñ pen allo-huen yechets

(Lc. 11.34-36)

²²⁻²³ Jesúsñapa' alla oterranneterr:

—Yecle'pa' añ toma'ntena atet ñerra'm ñeñt po'lampareñ pen ora yechets. Ñerra'm e'ñe cohuen huomech yecle'pa' e'ñech cohuen entateney puetare'. Allochñapa' attoch

e'ñe cohuen torratyenana allemeñ yechets tarro'mar e'ñe cohuen a'puetarsam̄psarettenet. Tarraña yecle'ña ñerra'm ama e'ñe cohuen huom̄cheyayepa' amach e'ñe cohuenaye' entatenye puetare' attochña amach eshcaye' torratyenano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyo'cher. Ñerra'm e'ñe cohuen yoctape'chyen yeyo'chro, ama aña es ye'nyeno ñeñt e'ñe yocpa, attoña chennayaña e'ñe ora allohuen Yompor poctaṗña ñeñt po'cohuenña pen. Attoña ora yoctaṗña' e'ñech a'puetarsam̄psarettena Yomporeshot. Tarraña ñerra'm ama cohuenaye' yoctape'cheno yeyo'chro, ñerra'm aña ye'nyen ñeñt e'ñe yocpa ñeñtṗa' amach errotenot a'puetarsam̄penyeña ñeñt yoctaṗña yepen. Ñeñtña yoctaṗña yepenpa' atarrcha' a'checmetam̄pennay yeyo'cher.

Amach aña yema'yochratsto ñeñt e'ñe yocpa attoch yegana aton quelle; ñeñt atetṗa' amach errotenot yema'yochroña ñaña Yomporecop

(Lc. 16.13)

²⁴ 'Ñeñtṗa' atetcha' yetma'ntacha: Ama't puesheñarro'teyapa' amach errotenot e'ñe cohuen yetaru-asona epsheño'mar yamo'mtayecop. Tarro'mar ñerra'm atet yepapa' puesheñarr e'ñech cohuen yemorrenteño't yocsheñeshocmañen yesherbeñ, po'psheñeñña' amach e'ñeye' yemorrenteño; chach yottena ñerra'm cha yetsena'teñ. Ñeñto'marña ñeñtṗa' amach cohuenaye' yesherbeñe. Ñerra'm aña e'ñe sema'yochrena ñeñt e'ñe socpa attoch segana aton quelle, ñeñt atetṗa' amach errotenot sema'yochroña ñaña ñeñtecop atarr sherbets Yomporecop.

Atto Yomporpa' ñach e'ñe cohuen cohuan̄pene' ñeñt puechemerasha' pen

(Lc. 12.22-31)

²⁵ 'Ñeñto'marña te'pa' o'ch noterrser: Amach aña sellcatsto ñeñt atto yocrena arr patsro. Ama't seyo'chrapa' amach sotatsto, esuachca' yerrerrerrte' tsapa'onef, esuachca' yorrte'. Ñaña amach aña sellcatsto ñeñt e'ñe sechtsocpa. Amach sotatsto, esuachca' yechorrate'. Tarro'mar Yompor ña yapuene' yo'rrerrña allo yocrena ñeñtña atarr nanac sherbets. Ñeñto'mar yeñoteñ ña yapuene' ñaña yerrar ñeñtña ñocoppa' ama esoye' enteñe. Ñaña ña yechcatene' ye'chets ñeñt atarr sherbets. Ñeñto'mar yeñoteñ ña yapuene' ñaña ama't ñeñt yechorra'yena ñeñtña ñocop ama esoye' enteñe.

²⁶ Senteñte' atto correna otñesha'chno ñeñt anom'cha'tyetsa entonef. Ñetṗa' ama choye'nare'tatse'teneto ñaña ama choye'

apcha'yeneto puerrar ñeñtcha' rra'yenet. Ñetpa' ama es echenaye allcha' es año'tyenet. Ama't atto correnet Somporña ñeñt pue'ntaño'tsenpa' e'ñe yechcatyesuanet ñeñtcha' puerrar pa'yenet. Elloña sa Yomporpa' atarr morrentensa sa; ello semtaneñ ñeñt atto atarr morrentenana otneshačno.

²⁷ Ñaña amach sellcatsto attoch amach serromo tarro'mar ama't sellquëñañ attoch atarr atomat socrra arr patsro, tarraña ama't e'ñe puesheñarrofesapa' amate' errotenot so'chtatoña socreña ama't e'ñe pamtarra.

²⁸ 'Eso'mare'tcha'ña sellca'yesaña attoch sepashta. Senteñe' atet yechquëna rorechno ñeñt chopyets ñota allemeñ. Ñetpa' ama choye' taruasa'yeneto ama't mamesha ama choye' taneneto ñeñt chorra'yenet atto e'ñe cohuen orretyenet.

²⁹ Tarraña napa' o'ch notas: Ama't añcha'taret Salomón atto e'ñe a'cohuentate't ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror.

³⁰ Ñaña ñeñt ror pue'chorpa' ñeñtara ta'te' ñeñt chopyets allemeñ ñeñt sentyen te' tarraña ñeñtpa' mamecpa. Ama't cohuen chopyleneñ te'pa' tsapa'oneñña'pa' o'ch etomamperetpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño.

³¹ Ñeñto'marña notenes: Amach atarr sellca'yesatsto. Amach sotatsto: "Esuachca'ye yerra'te'. Esuachca'ye yorrite'." Amach sotatsto: "Esuachca'ye yehorrate'."

³² Tarro'mar allohuen acheñenesha' arr patsro ñeñt ama ame'ña'yetso, ñetpa' ñeñtña e'ñe paterr e'nenet. Ñehua, Somporña ñeñt pue'ntaño'tsen ñapa' e'ñe entuenes ñeñt allpon pa'namen sepallta'yena arr patsro.

³³ Sapa' añcha'ña e'ñe ñanom sema'yoçhrena Yomporecop attoch atarr ayochreshattena ña. Ñaña añcha'ña sema'yoçhrena ñeñt e'ñe pocte' enten ña, allochñapa' ñachña sapa'yene' ñeñt allpon sepallta'yena saña.

³⁴ Amach e'ñe tayecma sellca'yesatsto ñeñtcha' setantye-soya tsapa'oneñ. Tarro'mar ama't e'ñe tayoteñpa' chocma eñall ñeñt allcatañetyetsa ama't e'ñe pate'tets yet.

7

*E'ñe attotapa' amach yotteñe'channa'tatsto
(Lc. 6.37-38, 41-42)*

¹ Jesúsapa' atet oterraneterr:

—Sapa' e'ñe attotapa' amach sottene'chatsche po'psheñeñ allochñapa' amach otteñe'cherrso saña Yompor.

2 Tarro'mar ñerra'm atet sotteñe'chyeñ po'potantañ, Yomporpa'cho'ña e'ñech attecma otteñe'cherres saña. Ñerra'm errponochcha' sotteñe'chyeñ po'potantañpa' sapa'cho'ña e'ñech allponoch otteñe'cherres saña Yompor.

3-5 Amach atet sentatsche po'potantañ ñerra'm ñetpa' ama cohuenaye' es peneto, ama't sapa' ama sentenoña ñeñt atet sepa'yena sa ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno sañapa' amach sotatscheña po'potantañ: "Napa' o'ch noctape'chatuerres e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch sentoñ po'psheñeñ pa'clloyo'tsen puepachña ama't sa seclloyopa' allo'tsen tsach; ñeñtñapa' ama senteñe. Ñerra'm atetpa' amach errotenot socheña po'psheñeñ napa' o'ch nechterrnañ peclloyot pepachña tarro'mar añ tsach ñeñt seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyot.

6 Jesúsapa' atet oterraneterr po'poñ:

—Ñeñt ama quechpuenaye pachñareñ ñaña patpareñ amach alla seserrpare'taterranete'te Parets po'cohuenña. Tarro'mar ñetpa' atta penet ñerra'mrrate' ochec. Ñehua, ochec ñerra'm esempo ama'tcha' atarr cohuen ya'ppa' ya'nach rrema'pes chach achota'teypa' o'ch shetsay. Ñaña ama't atet ñerra'm chañcho ñerra'm esempo es yena' ñesho ama'tcha' atarr cohuen yenten ya, yeser, chañchoñapa' attach a'nmama'tam'psey tarro'mar chañchopa' ama esoye' entenano ama't ñeñt atarr cohuen.

*Chocmach es yenamueñ Yompor ñaña chocmach ye'neñ
(Lc. 11.9-13; 6.31)*

7 Jesúsapa' alla ye'chaterraneterr po'poñ, ñeñtpa' atet oterraneterr:

—E'ñe senamueño't, Yomporñapa' apascha'. Se'name'teño'tpa' señchcha'; se'chore'teño't, Yomporñapa' e'ñe pue'mñoteño'tespa' e'ñech cohuen toram'psapas.

8 Tarro'mar ñeñt es enamare'tetspa' ñetña es aguëtset; ñaña ñeñt es e'name'tets ñetñapa' chocmach eñchet ñaña erra'tsen ñeñt chore'tyene' ñetñapa' e'ñe e'mñnotenatet Yompor.

9-11 Yompor ñeñt pue'ntaño'tsen chocmach e'ñe cohuenare' es apa'yeney ñerra'm esempo es yenamueñ. Ñapa' amach añña apuenye ñeñt ama cohuenaye' yenteno ya. Ama't sa ñeñtes

arromñates atet sepeñ samña sechemer, eñech cohuen es sapueñ ñerra'm esempo es enamuenes. Ateñ ñerra'm allempo pa'chporrñoñ es enamuenes, o'ch enamas mam* ñeñtcha' rra', sapa' ama't puesheñarrotesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarrotesapa' amach aña sapueñeña sechemer shechep ñeñt atarr amuerochtatañ. Ñeñto'marña sa ama't arromñates ama't ñaña atsrre'mñates sapa' eñe señoteñ apa'yese' sechemerasha' eñe cohuenare'. Añña ñeñt Seyomporer sepen samña ñeñt pue'ntaño'tsen elloña ñapa' eñe eñoteñ atto eñe cohuenare' es apa'yenes samña ñeñtes es enamueñe'.

12 Ñeñto'marña atet notenes: Ñerra'm erra'tsente' eñe cohuen senten ñeñt semnen sa ñeñtcha' atet ñonas po'psheñeñ, sapa'cho'ña eñech attecma sepanet samña. Tarro'mar ñeñtpa' atet oteneñ Yompor po'ñoñ ñeñt ahuatoteñ, ama't Moisés po'ñoñ ñeñt atet anareñ ama't ñaña ñeñt a'mta'yeseñt Yompor po'ñoñpa' eñe attecma otyesete't.

Atto Jesús pa' toma'ntaterraneterr ñerra'mrrate' yetarro tolo ye be'ten esheccha' ye'chap Yomporesho

(Lc. 13.24)

13 Jesúsñapa' atet toma'ntaterraneterr, ñeñtpa' atet otanet:

—Sebe'tos yetarro añeñoll tarro'mar ñeñt atarr yetarr, atarr toñ ñeñtpa' alla sen chenca'puetso. Shonte' acheñenesha'pa' eñe alla be'toscha'tyenet.

14 Ñeñtña añeñoll yetarr, añeñoll toñ ñeñtñapa' arr sen corra'puetso allña sapa' corretsasach. Eñe puesheña'ttsa entene'ña ñeñt toñer.

Ñeñtpa' añ toma'ntena attoch yocter Cristo, choch yesuanemña ñeñt ama cohuenaye' entapretenye.

Allohuen acheñ ñeñt eñe po'ño'ch cohuen acheñer, ñetñapa' añcha' orrtatyenet ñeñt eñe cohuenare'

(Lc. 6.43-44)

15 Jesúsñapa' atet oterraneterr:

—Sapa' seña'tach tarro'mar huaponasach ñeñtcha' aycha'natatsa ñetpa' a'mteneto' Yompor po'ñoñ. Ñetpa' puehquëñotetpa' ottenetañ atet ñerra'm atarr cohuen acheñret eñech attetañ ñerra'mrrate' carrnero ñeñt ama erroñ apañeyaye ama't mamesha. Tarraña ñetpa' atta shequënet tarro'mar eñe po'ño'ch ñetpa' eñe attet ñerra'mrrate' ma'yarr ñeñt añach e'nyen ñeñt eñe ñocpa. Attotcha'ña eñe a'chenca'tuerran acheñenesha'.

* 7:9-11 Ñehua, Jesús añ toma'ntatanet pan ñeñt puerrar penet all pa'nyo.

16-20 Tarraña sapa' attotcha'ña e'ñe sechme'tyesanet. Tarro'mar allohuen acheñenesha' ñeñt e'ñe po'ñoçh cohuen acheñeneshar, ñetpa' añcha'ña orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye, ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntacha. Ora allohuen ñeñt e'ñe cohuenare' narmetsocheçhno'pue'merpa'çho'ña e'ñech cohuenare'. Ama't parrochapa' amach me'toña ñeñt ama cohuenayaye. Añña po'pchañeçhno narmetsocheçhno ñeñt ama cohuenayaye, pue'merpa'çho'ña amach cohuenayaye. Ñeñtpa'çho'ña ama't parrochapa' amach me'tenoña e'ñe cohuen. Ñaña yapa' e'ñe yeñoteñ ama't errotenapa' ama arroteye' yetoquënoña llo'm ajçot. Ñaña ama't errotenapa' ama arroteye' yetoquënoña ap rrenagachot.† Ñeñto'marña attoña yeñoteñ erra'tsente' ñeñt e'ñe cohuenare' narmetsoch, ñaña ñeñt ama cohuenayaye; pue'meroña yechme'teñ. Ñaña allohuen narmetsocheçhno ñeñt ama cohuenaye' me'tyetsopa' a'mata'tueretcha' saprotueretcha' tso.

Atto amach allohuenacmaye' çhapueto all añcha'tarettena Yompor pue'ntaño

(Lc. 13.25-27)

²¹ Jesúsñapa' atet oterraneterr:

—Ñeñt notyenayeñ: “Papa' po'ñoçh na'yochreshater nepeneþ”, tarraña amach allohuenacmaye' çhapueto all añcha'tarettena Nompor Parets ñeñt pue'ntaño'tsen. Añach çhapyerrets all ñeñt e'ñe po'ñoçh atet pene' ñeñt atet muenen Nompor ñeñt pue'ntaño'tsen.

²² Allempopa' shonte'ch acheñenesha' ñeñtcha' notyerrayeñ: “Po'ñoçh Ayochreshate e'ñe peso'chñopa' çhocmaca'ye ya'mtonape'tña peñoñ. Ñaña yeçhore'teñoþep peso'chñopa' çhocmaca'ye yequeçhpatache'tña shonte' oneñeþeçhno. Ñaña yeçhore'teñoþ peso'chñopa' epaye'ca'ye yorrtatyese'tña partsoteñets.”

²³ Naña allempopa' na'meta'huerranetcha', notyerranetcha': “Ama't ahuatapa' ama nentarso, ama neyochreshayayso. Te'pa' orrerres, sapa' aña setsoten ñeñt ama cohuenaye' nenteno.”

Atto Jesús toma'ntatana acheñ ñeñt e'ñe eñotene' ñeñt po'ñoçh sherbets ñaña ñeñt ama eñotenaye ñeñt sherbets

(Lc. 6.47-49; Mr. 1.22)

† 7:16-20 Ñehua, Jesús añ toma'ntatanet uva ñaña higo ñeñt puenaremñ penet all pa'nyo.

24 Jesúsñapa' atet oterraneterr:

—Allohuen ñerra'm erra'tsencha' e'mñotene' neñoñ ñeñt atet e'ñe cohuen neyčhatenanet, ñerra'm ñetña e'ñech atet penet, ñetñapa' e'ñech eñoteñet ñeñt e'ñe po'ñočh sherbets. Ñeñt acheñer ñeñt atet petsapa' ñapa' e'ñe atet ñerra'mrrate' puesheñarr yacma ñeñt atarr es eñotets. Ñaña' tomatan pa'paquëll, e'ñe echarr pe'.

25 E'ñe tomatue'pa' huata huomenc, apellchena oñ, orrnota, pocollña' orrnotam̄psa. Ama a'matam̄pse tarro'mar quell-pachpa' e'ñe echarr atomatare't.

26 Tarraña po'potantaña ñeñt e'mñotene' neñoñ ñetña ñerra'm amach atteye' peneto ñeñt notenanet, ñetñapa' e'ñech atteta ñerra'mrrate' puesheñarr yacma ñeñt ama es eñoteno. Ñapa'cho'ña tomataneñcha'ña pa'paquëll, tarraña amach echarroye' pe.

27 E'ñe tomatue'pa' huata huomenc, apellchena oñ, orrnota, pocollña' orrnotam̄psatsapa' čhepa'tcha' mata'nerretspa' e'ñe muellotsetuerra.

28 Allempo serrpare'tatuanet Jesús, acheñenesha'ñapa' epaye' cohuanrrorteñet ñeñt atet yečhatenanet ña.

29 Tarro'mar ñapa' atarr cohuen yečhatenanet ñerra'mrrate' ñeñt allsensarettetsa Partseshot. Judionesha' pa'micha'tareternesha' ñeñt atarr etsotayenayeñ ñoñets ñeñt atet anare't, ñetñapa' ama e'ñeye' atteye' yečhateneto.

8

*Atto Jesús a'crraterran puesheñarr yacma ñeñt aptsarñat
(Mr. 1.40-45; Lc. 5.12-16)*

1 Allempoña err Jesús aspentotpa' co'a'huanererr acheñenesha' nanac shonte'.

2 Allña' huapoña puesheñarr ñeñt osen puetsarñats ñeñt otenet lepra. Chap Jesúseshopa' allenta concorposana Jesúsapa' atet otos:

—Ayochreshate ñerra'm pa muenats pa'pa' ñeñte'p atarr ahuamencatesha' pa'crrataye'cherren allochña' attoch e'ñe cohuen entuerren acheñenesha'.

3 Jesúsña anretapa' allenta a'p̄lle', atet och:

—Napa' nemneñca'ye, metuerrepa'ña peptsarña allochña' attoch e'ñe cohuen entuerre'p allohuen acheñenesha'.

Yacmañapa' allorocmuepa'tcha' metuerña pueptsarña'pa' čha cohuenterrtsa.

4 Jesúsñapa' alla otererr:

—Te' atto o' na'crraterre'p̄pa' po'ñočh ama't e'ñe puesheñarrapa' amach potapsa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñerecop ñeñcha' a'crrataretterrtsapa'

te'ñapa' o'ch es ñanom ñeñtcha' ñapos all ñeñt Yomporecop allochñapa' attoch e'ñe cohuen enterreþ allohuen acheñenesha'.

Atto Jesús a'crraterran puesheñarr capitán pueñañra; ñeñtpa' romo'marnesha'
(Lc. 7.1-10)

⁵ Allempoña cherr Jesús Capernaumopa' allñapa' huapoña puesheñarr solltar po'caþtaner, ñeñtñapa' romo'marnesha' ama judioneshayaye. Ñañaapa' atarr otare'tosan Jesús,

⁶ ñeñtpa' atet otos:

—Nomporcha' nepaclopa' atarr pa'nattenapa neñañra. Alla ñanena po'mayo nanac mueroçhtena cha echartena.

⁷ Jesúsñapa' atet och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teñoþpa' atet och:

—Na Nomporcha'pa' ama cohuenayayno attoch pebe'tosapo'tañpesna nepaclo. Arroçach þot: “Ama'tpa' correrrepa' peñañra”, neñañrañapa' acrrerroche'ch.

⁹ Tarro'mar napa' ñeñten ñeñt atet petsa ñeñt atet otenen ñeñt neyechenaya na. Napa'cho'ña eñall ñeñt neyechena naña ñeñt nesolltarer nepen. Ñerra'm puesheñarr solltar noteñ: “Papa' o'ch ahueþ a'yo”, ñañaapa' o'chcho' ahuo'. Ñaña po'psheñeñ solltar ñerra'm noch: “Papa' aþon arr”, ñañaapa' o'chcho' huapa. Ñaña po'psheñeñ na'taruasañer ñerra'm noch: “Papa' arrcha' petaruasa'muen”, ñapa' allcha'cho' taruasa'muen. Ñeñto'marña napa' neñoteneþ ñerra'm erroten þotenpa' e'ñechca'ye atet pena.

¹⁰ Allempo e'man Jesús ñeñt atet oten capitán, ñañaapa' atet otan allohuen acheñenesha' ñeñt co'ta'nene':

—Ñapa' atarrca'ye yemtenna, ama't ñapa' amaca'ye judioneshayaye. Napa' po'ñoçh o'ch notas: Ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya.

¹¹ Ñeñto'marña te'pa' o'ch notas: Shonte'ch acheñenesha' ñeñt ama judioneshayaye ñeñtcha'ña e'ñe neyemterraya. Allochñapa' esempohuañenpa' ñetñapa' allenñateñcha' e'ñe huaçha'tuerret ñeñtcha' anorrçha'tyesuerrets all e'ñe Yomporecho all añcha'tarettena ña pue'ntaño. Allcha'ña rrallme'chapreteret yatañneshaçhno Abraham, ñaña Isaac ñaña Jacob.

¹² Shonteñña judionesha' ñetcha'ña çapatsetañ all añcha'tarettena Yompor, tarraña ñetñapa' amach çapueto all tarro'mar ñetpa' ama naye' yemteneto. Ñetñapa' allach

ahuapore'taretterret a'yoŧ checmeto. Allña'pa' allcha'yahuanrrortterret, panmueñoŧet atserrpa' rraso'tyesosetcha' pa's.

¹³ Allempoña Jesús'pa' alla otterranerr capitán:

—Te'pa' o'ch ahuerreŧ pepaclo, e'ñe atto atarr peyemtenapa' attetepa'ch p̄ocop.

Pueñañraña'pa' e'ñe allempocma correrra.

Allempo a'crratosan Jesús Simón Pedro pa'so'mue

(Mr. 1.29-31; Lc. 4.38-39)

¹⁴ Alloñña'pa' chap Jesús Pedro pa'paclo. Allña'pa' entosñañ pa'so'mue alla p̄anena po'mayo čha atsna'ten, čha hueraten.

¹⁵ Jesúsña'pa' allenta a'p̄llosñañ potpa' čha metuerretsña po'urateña. Allenta tantapa' o' yema'tallme'čhaŧa.

Allempo Jesús'pa' a'crraterran shonte' pa'namen atснаñečhno

(Mr. 1.32-34; Lc. 4.40-41)

¹⁶ Ñeñte yetrocma allempo ellerrenpa' huacha'tateññañeterr shonte' ñeñ čorra'yena oneñeŧ. Jesúsña'pa' e'ñe po'ñoñoŧa quečhpaturranet oneñeŧ ñeñ čorra'yenahuet. Ñaña allohuen ñeñŧ atsna'tyetspa' o' a'crratyapanet.

¹⁷ Ñeñtpa' tarro'mar atet p̄a allochña'pa' attoch etsota Isaías po'ñoñ ñeñŧ a'm̄taye't Yompor po'ñoñ; ñapa' atet ote't: “Ñapa' ñach yahuanman̄perre' ñeñŧ yemueročhtatyene', ñapa' ñach ahuanerre' allohuen ñeñŧ ya'tserrpa'yene'.”

Allempo Jesús'pa' yečhatan ñeñŧ muenene' o'ch coter

(Lc. 9.57-62)

¹⁸ Po'pocheño allempo Jesús'pa' entapuenanerr shonte' acheñenesha' čha emchorra'hueñerr, ñaña'pa' atet otan pueyochresha':

—Te'pa' o'ch ahuan̄p̄sey yom̄ta'n.

¹⁹ Allña'pa' huapoña puesheñarr ñeñŧ atarr etsotene' ñoñets ñeñŧ atet anareŧ. Ñaña'pa' atet otos:

—Na te'pa' Maestrocha' nemneñ o'ch noctare'tyeseŧ ama't errohuanencha' pechopeñe'chyas.

²⁰ Jesúsña'pa' atet och:

—Te'pa' napa' peñotench'a' ama't nepacllapa' ama necheñe allcha' neyčhenañ. Ro'queŧpa' čhocma eñall pa'pon allecma yečhena.* Otečhnopa'čho'ña čhocma eñall pa'ma' allecma yečha'yenet. Tarraña naña Ñeñten Acheñetosetspa' ama eñalle ñeñŧ e'ñe nepaquell nepen allcha' nep̄anena.

* 8:20 Ñehua, Jesús añ toma'ntacha zorra ñeñŧ berrotets all pa'nyo.

21 Po'pocheño Jesús pa' atet otenanerr po'psheñeñ pueyochresha':

—Te'pa' o'ch pōcta'n attoch e'ñe po'ño'ch neyochresha' neperreḗ.

Tarraña ñeññña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho o'chña nepampa'huera' apaña' allempochña nohuerrapa' o'ch noctaḗ.

22 Tarraña Jesús pa' atet otererr:

—Acheñenesha' ñeññ ama yerpa'penaye Yompor, ñetña pa' pampanna'tetepa' parro arromña'etcmuet. Tarraña pōcoppa' ñeññeḗ o' peyerpuera Yompor añ pōctetsa o'ch pōcta'n attoch po'ño'ch e'ñe neyochresha' neperreḗ.

Allempo a'mchecherran Jesús huomenquēsha' ñaña sa'p ñeññ emo'yarertetsa

(Mr. 4.35-41; Lc. 8.22-25)

23 Allempoña Jesús pa' a'tapos noñto pueyochresha'ñapa' cota'huanmet, ahuanñpset rro'cha'sonet atarr sa'po.

24 Allña pa' machayotepa'tcha' huomenquēshatañpesnomuet. Emo'yare'ña čha esha'tena noñto, atteña oñña pa' chorramoch noñto. Jesúsñapa' čha muen.

25 Atteña pueyochresha'ñapa' ponemñyet Jesús all muen pa' opueret atet ochet:

—¡Pa'qeshpātaye'chey Ayochreshate po'ño'chuachca'ye yoclla'huerrate'!

26 Ñaña pa' atet otanet:

—Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoñoña a'mtsoññietuerran huomenquēsha' ama't ñaña emo'yare'pa' o' e'ñe a'mtsoññietuer. Attoña ñetpa' o' alla e'ñe cohuen muecheftañperret.

27 Atta cohuanrrorteñet ñetña pa' atet otanna'tyeset:

—Ta'mca'ye, añ acheñerpa' esona'tarte'ca'ye. Atarrepāt es a'mchechaten, ama't po'ñoñoñapa' a'mchechaterran huomenquēsha' ama't ñaña emo'yare' oñ.

Atto gadaro'marnesha' ñeññ chorrena oneñeñ ñetña pa' huapuet Jesúsesho

(Mr. 5.1-20; Lc. 8.26-39)

28 Allempoñapa' o' etsotaset yomñta'n all sechenet. Allpa' añ pa'ney pene' gadaro'marnesha'. Allña pa' huapoña ñaña epsheña acheñ tarraña ñetpa' añ chorrenahuet oneñeñ. Ñeñña pa' arroñ huenet allecma pampa'yeñet arromña'etchno.

Allenetñapa' ama eseshaye' setso tarro'mar ñeñt' chorra'yena oneñeñ ñetpa' atarr ancha'nochetyenet allenet.

²⁹ Allempoñapa' rranare'tapet Jesús, atet ochet:

—Eso'maruachca'ye, Parets Puechemerecha' pa'tsrre'moçhtana'tosey. Papa' añecopfe' pehuena o'ch pecoñchaterrey ama't ama çhena' allempoch ya'coñchatare'terra.

³⁰ Ñehua, allpa' a'yente'tsa'yen shonte' chañchoçhno all rratse'tyen.

³¹ Ñeñto'marña oneñeñeçhnopa' atet otare'tapet Jesús:

—Ñerra'm çhoch pequeçhpatosey acheña' arrña pemñaye'chosey chañchesho allochñapa' o'ch yechorra'yerr ñaña chañchoçhno.

³² Jesúsñapa' allenta otanet:

—Ama'tca'yepa' orrasca'ye.

Allempoña oneñeñeçhnopa' queçhpa'neret acheña' o' chorrereterr ñaña chañchoçhno. Chañchoña allempo chorrosya oneñeñeçhnopa' çhepa'tcha' matrra'tua allohuen ñegoneñ, shorçha'tuos allotpa' e'ñe ño'shrra'tuosa oño.

³³ Acheñenesha'ña ñeñt' cohuanñpene' chañcho, ñetñapa' allenta matrra'tet ñamet po'yorñoñ, ahuanmuet anetso. Allñapa' serrpare'tyesoset ora atet o' perra ñeñt' chorra'yese't oneñeñ.

³⁴ Allenepa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

—Te'pa' o'ch ahuerreñ arrot, yenyot.

9

Atto Jesúsapa' a'crraterran ñaña ñeñt' echarraña

(Mr. 2.1-12; Lc. 5.17-26)

¹ Allotña Jesúsapa' a'terr noñtopa' pechaterra, çherr anetso all a'puena.

² Allñapa' huapatañpsoñet echarraña, puehecnapena. Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Chochña neyochre pçosherra tarro'mar te' ñeñt' pçochñarpa' a'pretna'huare'terra.

³ Puesheña'tetsña ñeñt' etsotayenayeñ ñoñets ñeñt' atet anareñ ñetñapa' atta otatse'tyeset pueyoçhreto e'ñe ñagattseta, ñeñtpa' atet otet: “Añ acheñerpa' cha achmenan Yompor.”

⁴ Jesúsñapa' o' eñotanet ñeñt' atet otyenet ñocop, ñañaapa' atet otanet:

—Sapa' eso'mare'tcha'ña atet soçtape'chatse'tyesña seyoçhro.

⁵ Sapa' çhate' soten ñeñt' atet o' notue echarraña po'chñar o' a'pretna'huare'tta ñeñtpa' ama torrapahuoyaye. Sapa'

añña atarr torrapo' senten attoch na'crrater choncha'ña ote':
 "Petantena pechope'chnen."

⁶ Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añe patsro.

Ñeñto'marña Jesúsapa' atet oterranerr echarraña:

—Te'pa' o'ch petantena, pechta'nen pemue'pa' pechope'chnen, ahuenep' pepaclo.

⁷ E'ñe otue' atetpa' echarrañaña'pa' cha tantetsa allorocma, ahurr pa'paclo.

⁸ Acheñenesha'ña all ñeñt entene' ñetña'pa' cha yorenet, el-loñapa' alla cohuentaterrñañet Yompor. Atet otyenet:

—Yomporca'yeña o' llesenserran ñeñt ama't e'ñe acheña.

Allempo Jesúsapa' hua'ña'nman Mateo attoch pueyochresha' per

(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñtña'pa' añ pa'so'cheñ Mateo.* All anen allecma cobra'yenan acheñenesha' quelle ñeñt gobiernocop. Jesúsña'pa' atet otosan Mateo:

—Te'pa' o'ch p'octa'n attoch neyochresha' neperreñ.

Mateoñapa' cha tantnomtsapa' allenta cotan Jesús.

¹⁰ Allempoña chap ñaña allempoch rrallme'chen Jesús pocollo. Allña'pa' huacha'ta po'potantañ shonte' ñeñt po'taruas pene' o'ch cobra'yeñet acheñenesha' quelle ñeñt gobiernocop. Ñeñt'pa' atarr ashcañnesha' entyeñ allohuen acheñenesha'. Ñaña epuet po'potantañ ochñañenesha'chno ñetña'pa' all anorrcha'tyesoset all anen Jesús epuet pueyochresha'chno.

¹¹ Añña fariseonesha' ñeñt allo'tsa'yen ñetña allempo atet eñchetpa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenañña añ acheñeneshar ñeñt puehquëño'te'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

¹² Atto e'manet Jesús, ñaña'pa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetña'pa' chocma e'nenet ñeñt'cha' a'crraterrahuet.

¹³ Napa' ama añecpaye' nohuapo attoch ne'chore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch ne'chore'tos ñeñt atarr ochña' entyetsa. Allochña'pa' attoch o'ch cotape'cherret ello e'ñe cohuen

* 9:9 Mateopa' ñeñtara ñeñt sochenet Leví.

Yomporecop. Socoppa' añ poctetsa ñerra'm o'ch ahuerrespa' señotuerrepa' chña ñeñt atet ye'chateney añ Yompor po'ñoñ ñeñt atet anaret ahua'otoñ. Ñeñtpa' atet oteney Yompor: "Napa' ama e'ñe aña cohuen nenteno o'ch sapuenen sayara ñeñt semtsen nocop. Añe'naña atarr cohuen nenten o'ch semuereña allohuen samo'tsesha'."

Allempo Jesúsapa' eñotatanet atetcha' tore'tet Yomporecop ñeñt po'ño'ch sherbets

(Mr. 2.18-22; Lc. 5.33-39)

¹⁴ Allempoñapa' ñeñt pueyochresha' pen Juan ñeñt apataye't acheñenesha' ñetña huacha'toñet Jesúsapa' atet otoset:

—Yapa' tore'tetsay Yomporecop ñaña fariseone-sha'pa'cho'ña tore'tetset. Pañapa' ¿eso'mare'tña ama tore'tenoña peyochresha'?

¹⁵ Jesúsñapa' alla toma'ntatanet, atet otanet:

—Ñeñt ahua'ñare'techno all rrallme'chapreteñet ñeñt errete' sena'tetsa, ama pocteyaye o'ch yotamet amach es serra'yesatsto. Amach yellcatatstaneto tarro'mar atet coshapreteñet ñeñt sena'tetsa. Tarraña ñerra'm esempo machayo'ta sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquëño'tet que'chpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

¹⁶ Elloñapa' alla toma'ntaterraneterr ñeñt atet ye'chen judionesha' arr patsro, ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patse'chpa' ñeñtpa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tam'pespa' chach chellama'ta chach martse'tatanña shetamtso'she'm. Ñeñtña yelltenpa' allo'nach sen rrrartse'tats nanac.

¹⁷ Jesúsñapa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'teyapa' amach yeshatstoña vinos emasa mellasha'mañ orroto ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' chach a'ptsan orrot, vinosñapa' e'ñech shebhua, ñeñtña orrotpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orroto ñeñt aye'chcataret

† 9:14 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch ye'que'chpa' yerrar.

pa'rrom. Allochñapa' ama'tcha' chasa' vinospa' amach čha potsa'psoña vinos, ñeñtpa' allach yechen epo'mar.

Ñeñtpa' attoña Jesúsapa' eñotatanet ña poctapñña e'ñe etserra.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt a'plla'nmue' pa'shtam

(Mr. 5.21-43; Lc. 8.40-56)

¹⁸ Allempo atet eñorena Jesúsapa' huapa ñaña puesheñarr ñeñt añcha'tarettetsa judioneshacop, concorposñañapa' atet otos:

—Nesñeñpa' e'ñe errte' rromuets. Tarraña ama't o' rromañpa' te'pa' o'ch pocterren, ama't attapa' o'ch pa'pñleña' potot attoch o'ch alla correrra.

¹⁹ E'ñe otue'pa' allempoñapa' allenta co'ta'ner Jesús epuet pueyochresha'.

²⁰ Allñapa' co'ta'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto chocma yella'yena. Ñaña' allenta co'ta'nenan Jesús chenta' pa'che'ñoñ, allñapa' a'pñlerrñaña' pa'shtam pa'rrpe'mot.

²¹ Tarro'mar, ñapa' atet oten pueyočhro: “Ama't pa'shtama na'pñloñpa' ñeñt'ach na'crraterre'.”

²² Allempo atto a'pñlla'huoñ pa'shtampa' Jesúsña allenta puettallerra pa'che'ñone'tpa' entan coyanesha', ñeñtpa' atet och:

—Choña nesñeshacha' p'ocsherra tarro'mar atto atarr peyemtenna na, attoña te'pa' o' e'ñe na'crratnomuep.

Coyanesha'ñapa' allorocma correrra.

²³ Jesúsña allempo chap añcha'tare't pa'paclo allñapa' entosan ñeñt penclla'tam'pesyene' arromña't llequëñtsore'cho, entosan ñaña shonte' acheñenesha' all puellquëño'tet atarr ano'tatse'tyenet.

²⁴ Jesúsña' atet otosan acheñenesha':

—Sahuanerra arro't, añ shopshesha'pa' amaca'ye čhoye' rromueno, čhaca'ye muen.

Ñetñapa' pachm'are'teño'tetpa' atta che'tatsetyesapet tarro'mar ñetpa' e'ñeca'ye eñoteñet čhoca'ye rromuen.

²⁵ Allempoña čha'nma'cha'tatuosan ñeñt shontetsa all, ñaña' be'tosos o'pono. Allempoña Jesúsapa' rromota'tosan shopsheshañ potot ñaña'pa' čhepa'tcha' tanterrtsa.

²⁶ Allempoñapa' e'mare'tuet errap'aren anetso'mar Jesúsapa' o' tantaterran arromña't.

Atto Jesúsapa' a'crraterran epsheña aporo'yet

²⁷ Ahuerrerr Jesús allo'tpa' co'ta'neñ ñaña epsheña aporo'yet. Rranare'tneñet chenta' atet otneñet:

—Pemueraye'cherrya ñeñteḡ Davidna'tare.

²⁸ Chap Jesús pocollopa' all be'tosos allña rromuera'ña ñaña aporo'yet. Jesúsñapa' a'ḡto'tapanet:

—¿Seyemtenaḡe' napa' ahuamencaten attoḡcha' necuateres?

Ñetñapa' atet otoset:

—Yeyemtenḡaca'ye, Ayochreshaḡe.

²⁹ Allempoñapa' allenta a'ḡllacle'chanetpa' atet otanet:

—Atto atarr seyemtennapa' attetepa'ch socop.

³⁰ Allempocma e'ñe cohuen cohuerret. Jesúsñapa' atet otanet:

—Po'ñoḡh te'pa' o'ch notas: Amach esesha' sotaḡsa'tatsto, ama't e'ñe puesheñarra.

³¹ Elloña ñetñapa' ahuanmuet a'metare'tyeset Jesús. Er-
raḡparen allampaño'mar e'mare'tuet Jesús atet pena.

Atto Jesúsapa' a'crraterran ñaña ñeñḡ opanatets

³² Allempo ahuen epsheña aporo'yet allña Jesúseshopa' hua-
paterrñañeterr ñaña opan ñeñḡ chorrena oneñeḡ.

³³ Jesúsñapa' allenta queḡhpatan oneñeḡ ñeñḡ atto
opanatateñ, opanñapa' allenta eñorerra. Acheñenesha'ñapa'
cohuanrrorteñetpa' atet otyenet:

—Israelnesha'pa' ama't ahuaḡapa' ama puentarano ñeñḡ
atet pena te' Jesús.

³⁴ Fariseonesha'ñapa' puesasare'teñoḡetpa' atet otyeset:

—Oneñeḡte' pompor ahuamencat pene' attoḡ queḡhpatenan
oneñeḡeḡchno acheñenesha'.

Atto Jesúsapa' atarr muerenana allohuen acheñenesha'

³⁵ Alloḡñapa' asuahuanom Jesús allohuen anetso ama't
ñaña all ama tama eñalle acheñ. All yeḡchatyesosanet puer-
ahuo'mar. Serrpare'tatosanet ñeñḡ cohuen ñoñets atto ay-
ochreshattena Yompor. A'crratyesosan ñeñḡ osyen pa'namen
atsnañets ñaña ñeñḡ pa'namen atsotyenet.

³⁶ Allempo entosan shonte' acheñenesha'pa' ñaña'pa' nanac
muerenanet. Tarro'mar e'ñe atet enten Janet ñerra'mrrate'
carrnero ñeñḡ ama acuamḡsareteyaye; ñeñḡo'marña nanac
allpatatarettenet tarro'mar ama eñalle ñeñḡcha' ahuamencat
penahuet.

³⁷ Ñeñḡo'marña atet otan pueyochresha':

—Shonte' narmets ñeñḡ nanac ellomḡre'tets ñeñḡcha'
a'yapaḡhetañ. Tarraña ataruasañña ñeñḡcha' a'yapaḡhe'pa'
ama atarr atonayayeto.

³⁸ Te'pa' añcha'ña sanamoñ pamo'mte' mueñanepa'ña
ñeñḡcha' a'yapaḡherrets pa'mro.

Ñeñḡpa' atet toma'ntatanet Jesús atto atarr shonte'
acheñenesha' ñeñḡcha' ame'ñerḡsañ tarraña ñeñḡcha'

ame'ñaterrahuetpa' ama atarr atonayayeto. Añcha'ña yanam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar.

10

Allempo Jesús'pa' acran çharrasheña ñeñt puechetsa epsheña ñeñtcha' llesensa'

(Mr. 3.13-19; Lc. 6.12-16)

¹ Allempo çhapa'muen allempo Jesús agota'mueñan pueyochresha' çharrasheña ñeñt puechetsa epsheña. E'ñe apçha'huet ñeshopa' ñañapa' apanet llesens attoch queçhpatyeset oneñeñeçhno acheñenesha'. Ñaña llesensanet attoch a'çratyeset acheñenesha' ñeñt osyen allohuen pa'namen atsnañtsoçhno ñaña ñeñt pa'namen atsotyenet.

² Ñehua, ñetpa' arro'tsa'yenet pa'so'chñeçhno; allohuenetpa' çharrasheñet puechena epsheña ñeñt llesensa'. Ñeñt ñanom atarr sherbets ñeñt'pa' Simón ñeñt'ara sochetsa Pedro, allotpa' ñaña Andrés ñeñt e'ñe pa'mo'nasheñ; allotñapa' ñaña Jacobo ñeñt Zebedeo puechemer epuet pa'mo'nasheñ Juan.

³ Allotñapa' ñaña Felipe ñaña Bartolomé; allotñapa' ñaña Tomás ñaña Mateo ñeñt cobraye't acheñenesha' quelle ñeñt gobiernocop; allotñapa' Jacobo ñeñt Alfeo puechemer, allotpa' ñaña Tadeo.

⁴ Allotñapa' ñaña Simón ñeñt cananistanesha' ñeñt nanac torratse't pa'netsrecop, allotpa' ñaña Judas Iscariote ñeñtcha' pomuerre' tsapatonet Jesús.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta'

(Mr. 6.7-13; Lc. 9.1-6)

⁵ Ñeñtña çharrasheña puechena epsheña llesensanet attoch ahuanemyeset pa'namen anetso'mar, ñeñt'pa' atet otapanet:

—Amach arrenta setatsto all yeçha'yena ñeñt ama judione-shayaye. Ñaña amach arrenta setatsto samario'marnesha' pa'netsro all yeçha'yenet.

⁶ Arrcha'ña seta all yeçha'yena israelena'tarnesha'. Ñetpa' e'ñe atet nentenanet ñerra'mrrate' carrneroçhno ñeñt paya'tyetsa.

⁷ Allcha' soñemyespa' seserrpare'tatyesnomanetcha' atetcha' sotyenesnomanet: “Te'pa' o' çherr allempoch ayochreshattena Yompor ñeñt pue'ntaño'tsen.”

⁸ Ñaña alla oterranerr pueyochresha':

—Ñeñt atsna'tyetspa' sa'çratyesnomanetcha', ñeñt rromayetspa' setantatyesnomi'cha', ñeñt osyen puetsarñatspa' sa'çratyesnomi'cha' attoch e'ñe cohuen entuerranet

acheñenesha', sequečpatatyéscha' ñaña oneñetečno ñeñt chorra'yenaya acheñenesha'. Sapa' e'ñe atta aparetes huomencñats atto es cohuen sorrtatyen Yomporecop, ñeñto'marña sapa'cho'ña e'ñech atta sapa'yesanet saña, amach secobratstaneto ñeñt atet o' sepa'yesanet.

9 'Ñaña o'ch notas: Ñerra'm o'ch sahuanmapa' ama't puetallarrapa' amach sesha'tatsetnomo quelle. Ama't orotl-lellen, ama't huallatlellen, ama't cobretlellen amach sesha'tatsetnomo.

10 Ama't e'ñe coñe'ta amach es sanmatsto allcha' sechopene'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñtescha' torra'yetsapa' e'ñe pocte' rratyesapasetcha'.

11 'Ama't erra'tsena anetser ama't ñaña all ama tama eñalle acheñ ñerra'm erra sechapa'chpa' chochña ñanom sa'pto'tyesosanet erro'tsente' cohuen acheña' allcha'ña secháp. Allña'pa' allcha'ña sa'posa tarremphuach esempoch serrerr ñaña allot.

12 Ama't erra'tsena pocoller allcha' secháp, e'ñe sehuoncha'teño' o'ch senamatosanet Yompor pa'nateña.

13 Ñetña ñerra'm e'ñe cohuen acheñret, Yomporña'pa' a'natenanetcha'. Ñerra'm ama cohuenayaye acheñretpa' Yomporña'pa' o'ch alla apuerres sa pa'nateña.

14 Ñerra'm erra anetsro ñeñt allo'marnesha'ña ama cohuenaye' agapaseto tarro'mar ñetpa' amach mueneto o'ch e'mñotapaset ñeñt atet seserrpare'ten, sañapa' o'ch semterrrer ñaña allot. Ñerra'm allempo semterrrerña ñaña allot, ñeñtña setco'tsa'yen pañe'te' patspa' choch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor.

15 Po'ño'ch te'pa' o'ch notas: Esemphuañen allempoch acrare'tetuerra allohuen acheñenesha'pa' añ anetso'marnesha' ñeñtcha' ama cohuenaye' sagapaye te', ñetña'pa' nanaccha' a'coñchatare'terretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatare'terreto atet ñerra'm ñeñt anetso'marnesha' ñeñtcha' ama cohuenaye' sagapaye te'.

Allempo Jesús'pa' e'ñotatenan pueyochresha' chochmach eñall ñeñtcha' e'moñe'tahuet

16 'Ñaña sapa' ñerra'm o'ch ahues te'pa' seño'chcha' po'ño'ch chochmach eñall ñeñtcha' se'moñe'te' ama't sapa' amach cho erro't sepananeto ñet. Ñeñto'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allot'sa'yen ma'yarro'chno. Ñeñto'marña sapa' seño'ta'tach

atet ñerra'm shecheppa' atarr eñote'. Tarraña sapa' amach errof añaño atet ñerra'm yeppa' ama errof añañeyaye.

17 Ñeñto'marña notenes: Señota'tach tarro'mar acheñenesha'pa' errotuancha' perrset, sanmare'terrach añcha'taretesho allcha' otteñe'cherrset. Nalle'tyerrsetcha' all judionesha' po'prahuo'mar.

18 Po'ño'ch e'ñe no'marpa' rremanaterrsetcha' attoch muero'chtatyerrset, sanmare'terrach añcha'taretesho ñaña allo'tsa'yen ñeñt nanac añcha'tarete'chno allcha'ña sa'meta'yesosnancha' neñoñ. Ñaña arrcha' sa'meterrnan neñoñ allo'tsa'yen ñeñt ama judioneshayaye.

19 Ñaña allempoch sanmare'tetyesapa' ama't mameshapa' amach cha sellca'psatsto, amach sota'psa'tatsto: Errotuachca'ye notoste' añcha'taretesho ñerra'm o'ch a'pto'tare'tapuen. Tarro'mar allempopa' Somporca'ña Puecamquẽñ seño'tatyese'ña all.

20 Attoña amach e'ñe sochaya se'ñora'yese, añcha'ña Sompor Puecamquẽñ ñeñt'cha'ña se'ñoratyese'.

21 'Allempoch atet perrsetpa' ñeñt e'ñe semo'nasheñ sepen ñato' ñeñt'achca'ye sepomuere' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patpar'ño'tpa' o'paterranach pamo'mte' attoch muetsatater.

22 Shonte'ch acheñenesha' ñeñt'cha' se'moñe'terre' tarro'mar sapa' naca'ye e'ñe same'ñena. Ama't'cha' atarr muero'chtaterrsetpa' tarraña esesha'ch e'ñe ahuanta'huanmue' e'ñe pueyemte'noten na, ñeñt'cha'ña a'queshpatare'ttertsa.

23 Ñerra'm esempo e'moñe'terrset ñeñt anetsro allo'tsenes o'ch seyeta'mpsanetpa' o'ch sahanma po'poñ anetso. Allpa'cho'ña ñerra'm attecma e'moñe'terrseterrpa' o'ch seyeta'mperraneterr o'ch sahanerrerr ñaña po'poñ anetso. E'ñe po'ño'ch notenes: Amach e'ñe sepa'huenta' ora allohuen israelnesha' pa'netsropa' na Ñeñten Acheñetosets o'ch alla norrterra.

24 Ñaña o'ch noterrser: Ñeñt yochreshatspa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt pueyochresha'chno pen. Ñaña ñeñt ñañretsotyets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañresha'chno.

25 Ñeñt yochreshatso'chnopa' e'ñepa'chña pocte' entyeñet o'ch atet a'pare'tterret atet ñerra'm po'maestrotet. Ñaña ñeñt ñañretso'chnopa' e'ñepa'chña pocte' entyeñet ñaña o'ch atet a'pare'tterret atet ñerra'm pamo'mte'. Ñaña seño'chepa'ch

ñerra'm na puesochatse'teñōtetan otennet napa' oneñeto' pomporen ñeñt' otenet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tennet na, sapa'cho'ña ñeñtes nechemere-shachno nepen, elloña sapa' atarrcha' nanac sochatse'terrset saña.

Atto amach yemcha'tatsto ñeñtcha' muetse' yechets, añcha'ña yemcha'na't Yompor

(Lc. 12.2-9)

²⁶ 'Ama't atteñpa' tarraña sapa' amach semcha'tatstaneto tarro'mar yapa' yeñoteñ allohuen ñeñt' atto e'ñe a'nahua shecare'tyenet te', esempohuañenñapa' a'metam̄psaretterretcha'. Ama't allohuen ñeñt' e'ñe a'nasotyenet te'pa' esempohuañenñapa' e'ñech eñotatareñtetuerret.

²⁷ Ñeñto'marña ama't erra'tsena neserrpare'tatyenes te' e'ñe saptoche', esempoña sapa' e'ñech señotatuer ora allohuen acheñenesha'. Ama't erra'tsen ñeñt' atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrrate' enot seserrpare'ten shelletot.

²⁸ Amach aña semcha'tatsto ñeñtcha' semtse'. Tarro'mar añach muetsonaset sechets, secamquēññapa' amach errotenot muetsonaseto. Añcha'ña semcha'na't Yompor tarro'mar ñerra'm ña muenatspa' e'ñe ña po'huamencotpa' o'ch a'chencatonay ye'chets yecamquēñpa'cho'ña o'ch a'chencatonay coñcha'puetso all parraren tso'.

²⁹⁻³¹ 'Elloña te'pa' napa' o'ch notas: Chocmach seyemcha Yompor, po'ño'ch ñapa' ñach secuan̄pene'. Ama't otetollesha'pa'cho'ña chocma cohuan̄peñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñtpa' ama tsa'teyaye, e'ñe puetallarratolla centavo tsa'tena. Tarraña ama't atteñpa' ama't patrra otetoll amach rromo attoch shora'nom ñerra'm ama Sompom muenataye atet. Ñeñto'marña notenes: Ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotpahuo Jesucristo acheñesho'mar
(Lc. 12.8-9)

³² 'Elloña napa' o'ch noterrser: Allohuen ama't erra'tsencha' ñeñtcha' ama na'nasotenaye

acheñeneshesho, napa'cho'ña Ñeñten Acheñetosetspa' amach na'nasotueraneto naña Nomporesho all pue'ntaño.

³³ Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporesho all pue'ntaño.

*Atto Jesúsapa' orrtatosan e'ñe ño'mar elloptanna'teñets
(Lc. 12.51-53; 14.26-27)*

³⁴ 'Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñeneshah' arr patsro. Ñeñtpa' ama atteyaye. Añepa'naña nohuapa allochñapa' e'ñe no'marpa' acheñeneshah'ñapa' o'ch atta elloptanna'tyeset.

³⁵⁻³⁶ Ñehua, ñeñt noten te' ama't ñeñt e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñtcha' name'ñerraya, pamo'tseshetñapa' ñato' amach ame'ñerrneto. Ñeñto'marña notenes e'ñe no'marpa' ñato' puechemerpa' o'ch epatare'tenan pompör, ñaña ñato' puechoyorpa' o'ch epatare'tenan pachör, ñaña ñato' ñeñt pa'to'ñen pen o'ch epatare'tenan ñaña pa'so'mue.

³⁷ Tarraña ñerra'm erra'tsencha' nemorrenterrayañ ñerra'm ñetña pompora atarr morrentenet ñamet pachoret ñeñtña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñtcha' nemorrenterrayañ ñetpa'cho'ña ñerra'm puechemera atarr morrentenetpa' ñaña po'sñet ñeñtpa'cho'ña acheñerpa' ama e'ñeye' pocte' nenteñe attoch e'ñe neyochresha' neperranet.

³⁸ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocueta attoch coterrnet e'ñe poc-tacma, nañapa' amach pocte' nenteñe o'ch neyochresha' neperranet. Ñeñtpa' añ toma'ntena atet ñerra'mrrate' cho sechechen secorsoch alloch semueroçhta saña.

³⁹ Tarraña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeñt atet muenenet ñeñt e'ñe ñocueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

*Ñeñtcha' apuerrey Yompor attoch atarr coshaterrey
(Mr. 9.41)*

⁴⁰ Jesúsapa' alla oterranerr pueyochresha':

—Ñerra'm o'ch sahuanna, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellensene' na.

41 Ama't erra'tsena ñeñt e'ñe cohuen aguëne' ñeñt a'mtene' Yompor po'ñoñ tarro'mar ñapa' Yomporca'ye po'ñoñ a'mten, ñeñtña acheñer ñeñt e'ñe cohuen aguëne'pa' Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt a'mtene' po'ñoñ. Ñaña ama't erra'tsena ñeñt e'ñe cohuen aguëne' ñeñt e'ñe pocte' es orrtatyets Yomporecop tarro'mar ñapa' Yomporecopca'ye e'ñe pocte' es orrtatyen, Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt e'ñe pocte' es orrtatyets Yomporecop.

42 Ñaña añ ñeñt ama esoshe'maye' enteneto, erra'tsencha' apapue' ñeñtcha' orros tarro'mar ñapa' noca'ye neyochresha', ama't coñe'ta oñ apapet, napa' po'ñoñ o'ch notas, Yomporcha'ca'yeña apuerrahuetña ñeñtcha' atarr coshaterrahuet.

11

Juan ñeñt apatañtase'tpa' mueñan pueyochresha' Jesúsesho (Lc. 7.18-35)

1 Ye'chatuahuan Jesús pueyochresha' ñeñt çharrasheña ñeñt puechetsa epsheña atetcha' pa'yeset, allempoñapa' ahuo' ñaña Jesús allot ye'chatysets; serrpare'tatyesan acheñenesha' all pa'netsreto.

2 Añña Juanpa' allo'tsena all yottañpeñet. Allña'pa' o' e'mare'tan Cristo atet pa'yena, allenta mueñan pueyochresha' Jesúsesho.

3 Ñetña o' çhapuet allpa' atet otoset:

—Ñato' pate'ña ñeñte' e'ñe po'ñoñ Cristotets ñeñt atarr yecuen ahuatoteñ o'ch huapa. Ñerra'm amate' ñeñteyaypepa' o'ch e'ñe potey allochñapa' añcha' yecua' po'psheñeñ ñeñtcha' huapatsa ñeñt e'ñe Cristo.

4 Jesúsña'pa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyesuennana' arr ñaña ora allpon ñeñt atet se'myesuennana' arr.

5 O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necuatyesuerranet ñaña ñeñt checa'repayetspa' te'pa' o' e'ñe chope'chyesuerret cohuen, ñaña ñeñt a'ptsaresyen leprapa' te'ñapa' o' e'ñe a'cohuentataretetuerret ñamet, ñaña ñeñt paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atantataretetuerret, ñaña ama't ñeñt huocchañneshachno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

6 Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes, atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

7 Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñtpa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yama'tateñ mōrr.

8 Ñaña amaca' añecpaye' sete'teña all o'ch senteña' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña yentenña ñeñt atarr coçhnesha' chorra'yenaya shetamuets añcha'taretapahuo.

9 Sapa' añecopca'yeña sete'tña amayo o'ch senteña' all ñeñt po'ñoçh a'mtene' Yompōr po'ñoñ. Napa' o'ch notas: Juanpa' atto atarr sherbenan Yompōrpa' ello metana'tuan allohuen ñeñt atto a'mtenet Yompōr po'ñoñ.

10 Tarro'mar Juanpa' ñocōp eñose't Yompōr ahuañ. Ñehua, allempopa' atet otne't na ñeñt atetcha' pōsa Juan nocōp esempoch huapa, ñeñtpa' atet anaret ñoñets ahuañoteñ:

Papa' peñochepa'ch napa' o'ch nemñonap puesheñarr ñeñtcha' ñanom otatsa ñeñtcha' pa'cohuentatyese' pōcōp allcha' pōñmos.

11 Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese't ahuaña acheñenesha' Yompōrecōp. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompōr ñeñt pue'ntañotsen atto te'pa' ayochreshattena ña, ñeñtña acheñerpa' atarrca'ye sherben, ello metanenan atto atarr sherben Juan.

12-13 "Tarro'mar añña ñoñets, Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompōr po'ñoñ, ñetpa' ñeññaña serrpare'tete't attoch atarr ayochreshatterra Yompōr tarrempohua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyese't atet penaña Yompōr po'cohuenña attoch ayochreshatterra ña ñeñt pue'ntañotsen. Ama't atsrre'mñañnesha'pa' e'ñe ñeñña atarr muenet pueyochrocmañen.

14 Ñaña ñerra'm po'noch same'ñyañcha' Juanpa' ñaca'yeña Elíasoterrets ñeñt' atarr secuen ñeñt'cha' sehuerroya.

15 Allohuenes ñeñtes ne'mñotene' neñoñ, çhaponasepa'chña seyoçhro ñeñt' atet notenes.

16-19 Jesúsñapa' atet oterranerr acheñenesha':

—Ñehua, napa' o'ch neñotatas ñeñt' atet pena patantarr acheñenesha' ñeñt' yentyen te' ñeñt' ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt' apatañtase't ñapa' ama rrane'te ñeñt' yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' çha sotyese't cho'te' chorreña oneñet; ama't e'ñe mameshapa' ama pocteye' señche'te. Te'ñapa' o' norrterra naña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen naña atarro' arratsñaaten ñaña atarro' orrañaaten napa' año'chña e'ñe neyemuetyena ñeñt' atarr ochñaatenesha' ñaña ashcarñaateçhno ñeñt' atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt' po'ñoçh atarr sherbets ñocop. Ñaña allohueney ñeñtey e'ñe puechemeresha' pohueney ñeñtey co'tene' ña poçtaña yapa'cho'ña e'ñe yeñotuenña ñeñt' po'ñoçh atarr sherbets. Ñeñto'marña yorrtatyeññañ ñeñt' cohuen enten ña. Sañapa' ama't e'ñe mameshapa' ama acshatpahuoyayso, e'ñe attes ñerra'mrrate' cheshanesha' ñeñt' çhocma po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' sañapa' amaña seshe'rarampenye; allotpa' ama't o' yepoctorare'tua ñeñt' ya'chpeñtsoreçh allo yellcanrrortenapa' sañapa' amaña sellcapretenyo."

*Atto Jesúsapa' eños epo'mar anetsocop all ama ame'ñyeto
(Lc. 10.13-15)*

20 Allempoña Jesúsapa' çha muene' che'ptare'tyenan acheñenesha' all pa'netsreto all epaye' entatyenanet po'partsoña ahuañmo'cho'teñ. Ama't entatyenanetañ po'partsoña ñetñapa' ama es co'tape'chenaye ello cohuen Yomporecop, ñeñto'marña allpa' çha muene' che'ptare'tyesanet. Ñeñtpa' atet otyesanet:

21—Nanaccha' llequëñtso'tsa'yenes coraziño'marneshacha', nanaccha' llequëñtso'tsa'yenes samã betsaido'marneshacha'.

Tarro'mar ama't atarr norrtatyennaseñ nepartsoña sesho, sañapa' amaña soctape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuaťoteñte' cotape'cherretañ e'ñe cohuen Yomporecop. Ñetpa' attoch e'ñe orrtetañ cha llecatenanet po'chñaret, cotnashe'mach chorra'yesetañ, tsapñach epachshema'tyenetañ all anorrcha'tyenet puellquëñoťet.

22 Ñeñto'marña te'pa' notenes: Esempohuañen allempoch acrareťetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatareťterretoña allempo. Coraziño'marneshacha' ñaña betsaido'marneshacha' saña allempopa' atarrcha' a'coñchatareťes.

23 Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atťeye' perrsoña Yompor, allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, sañapa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuaťoteñ nepartsoña sodomo'marneshesho ñetpa' allorocmate' cotape'cherretañ cohuen Yomporecop. Allempopa' amate' a'poyatatareťterretañeña pa'netser. Orate' allo'tsenaraña.

24 Ñeñto'marña te'pa' notenes: Esempohuañen allempoch acrareťetuerra allohuen acheñenesha'pa' sodomo'marnesha' ñetpa' amach tama a'coñchatareťterretoña allempo. Capernaumo'marneshacha' saña allempopa' atarrcha' a'coñchatareťes.

Jesúspa' atet oten, e'ñe same'ñeñoťen na, napa' na'huañamperrescha' ñeñť atarr amuerochtatañ sentyen
(Lc. 10.21-22)

25 Allempoña Jesúspa' ma'yochenana Pompor, ñeñtpa' atet oten:

—Na Apacha' o'ch na'ye'chočhtatonap, p̄apa' p̄a ñeñťep̄ atarr ayochreshattetsa pe'ntaño ama't ñaña arr patsro. Na'ye'chočhtatonap tarro'mar ora añečno ñeñť pecohuenña pepen, ñeñtpa' ama arreye' pečhapateñe pueyočhro ñeñť atarr eñotañ entyetsa. Papa' aña pečhapaten pueyočhreto ñeñť ama eñotañeye' entyetso.

26 Tarro'mar Apa e'ñe pemuereñoť ñeñtpa' atetña e'ñe pocte' penten p̄a. Arrpa' allohua ñeñť atet ma'yochenana Pompor.

27 Jesúspa' alla o'terranerr acheñenesha':

—Nomp^{or} allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapñaña Nomp^{or} e'ñe eñotenen. Nomp^{or}pa'çho'ña ama po'ñoçh eseshaye' eñotenaye napñaña na ñeñten Puechemeren e'ñe neñoteñ Nomp^{or}, ñaña erra'tsencha' ñeñt e'ñe pocte' nenten na ñeñten Puechemeren ñeñtña'pa' o'ch neñotater Nomp^{or}.

²⁸⁻³⁰ Sehuaçha'ta nesho allohuenes ñeñtes nene' seyoçhro ñeñt atarr amuerochtatañ sentyen. E'ñe same'ñeñoften na, napa' na'huañañperrescha' ñeñt atarr amuerochtatañ sentyen. Napa' añcha'ña nenerrnas ñeñt amach çha muerochtaterro; ñeñtña sapa' e'ñech pocte' senteñ. Attochña sapa' señotenen napa' atarr nemuerensa ama atsrre'moçhen entñoeno ama't e'ñe puesheñarrocpa. Ama't e'ñe mamesha ama añeye' ne'nenos ñeñt e'ñe nocpa. Attochña e'ñe cohuen nocshatterres seyoçhro ama't e'ñe secamquëñohuen.

12

Allempo Jesús pueyochresha' taso'tamñpesyesnomuet trigo añe yetro allempocma amesen judionesha'

(Mr. 2.23-28; Lc. 6.1-5)

¹ Allempoña çherrerr pamtarr allempo çhocma amesen judionesha'. Allempoña Jesús^{pa}' arr oñem chetso'mar epuet pueyochresha'çhno. Allempo oñenet pueyochresha'ñapa' e'ñe pa'çhporrñoçteta' taso'tamñpesyesnomuet puechña'tets trigo o' rra'y esnomet.

² Fariseonesha'ña ñeñt entahuet atet pa'nmueta' ñetña'pa' allenta otyeset Jesús:

—Pecue'ñaca'yeña añ peyochresha' taso'tamñpesyesnomuet trigo; atet penet ñeñt ama pocteyaye o'ch atet ye'pa taru-asats añe yetro tarro'mar te'pa' añe yetro ñeñt atet anaret ahuatoteñ allempocmach yamesen.

³ Jesúsña'pa' atet otanet:

—Sapa' ama'trra selleyareña ñeñt atet pa' ahuat David allempo cheporra'nma epuet ñaña allohuen ñeñt co'tene'.

⁴ Ña allempo'pa' be'tosos Yomp^{or} pa'paclo allña'pa' rrosan pan ñeñt atma'ntataret atet ñerra'mrrate' ñeñt nenet all Part-socp. Ñehua, ñeñt panpa' ama pocteyayñe o'ch rros David ñaña ñeñt epuet. Ñeñt'pa' añach ñapue't rrene' cornaneshachno; ñeñt'pa' atet anuaret judioneshacop.

⁵ Ñaña ama't selleyareña ñoñets ñeñt atet anaret ñeñt Moisés po'ñoñ all oten atet pena ñaña cornaneshas' Parets pa'paclo. Ñehua, ñet puesherbeñoçteta' ama ameseneto

añe yetro allempocma yamesen. Ñetpa' ama't atet penetpa' Yomporñapa' e'ñe pocte' entenanet.

6 Napa' o'ch notas: Napa' ñeññen arro'tsenen nanac neshenben ello neñtaneñ ñeññ atet sherben Parets pa'paquell.

7 Ñehua, añ ñoñetspa' ñeññña atet ote't Yompor ahuat: "Napa' ama e'ñe aña cohuen nenteno o'ch sapuenen sayara ñeññ semtsen nocop. Añe'naña atarr cohuen nenten o'ch semuereña allohuen samo'tsesha'." Ñerra'm cho chennasañ seyoçhro ñeññ atet oteneñ Yompor, amach erro't sotatscheña ama't erra'tsena acheñer ñeññ e'ñe pocte' enten Yompor.

8 Ñeñño'marña te'pa' o'ch notas, na Ñeññen Acheñetosets ñeññen allsensareten, naca'yeña atet otets este' poctetsaña ñeññcha' atet ye'pa añe yetro allempocma yamesen.

Allempo Jesúsapa' a'crraterran ñeññ chelletsapot

(Mr. 3.1-6; Lc. 6.6-11)

9 Metuerrerr Jesús allotpa' be'tosuerrerr judionesha' po'prahuo.

10 Allñapa' allo'tsen puesheñarr yacma ñeññ cha chellena pot. Fariseonesha'ñapa' allenta a'p'to'chet:

—Añe yetro allempocma yamesenpa' ta'm ¿pocte'te' penteñ o'ch pa'crrateñer acheñ?

Tarro'mar atet a'p'to'teñet allochñapa' esheccha' otteñe'chet.

11 Ñañaapa' atet otanet:

—Sapa' ñerra'm cho shora'nen ama't puemocarra secarneror añe yetro allempocma yamesen, ama'tcha'ña allenta sechtere ama't ñeññe yetro allempo yamesen allohueney.

12 Ñehua, acheñpa' ellocaye metanenanña ñeññ atto sherben carrnero. Ñeñño'marña napa' notenes e'ñe pocte' o'ch atet ye'pa ñeññ cohuentetsa ama't añe yetro allempocma yamesen.

13 Allempoña Jesúsapa' atet otan yacma ñeññ chelletsapot:

—Te'pa' o'ch notap' petapuerr pot.

E'ñe otue'pa' ñañaapa' allente'pa'tcha' tapuerran pot, e'ñe allorocma cohuenterra pot e'ñe attecmaterr ñerra'm po'pshemñañot pot.

14 Fariseonesha'ña

cha'nmaçherretpa'

cotape'chatanna'tyesnerret, atarr o'pateñet Jesús attoch muetsatachet.

Atet ote't Yompor ahuat Jesúsocop

15 Jesúsña eñotanetpa' ahuer allot. Shonte' acheñeneshachno cota'huanereter. Allohuen ñeññ atсна'tyetspa' e'ñe a'crratyesseranet.

16 Atet otyesamet:

—Po'ñoçh amach esesha' sotaþsa'tatsto napa' na ñeñten Yompor Puechemeren.

17 Ñehua, ñeñtpa' atet þa allochñapa' attoch etsota Isaías po'ñoñ ñeñt a'mtaye't Yompor po'ñoñ, ñeñtpa' atet ote't Yompor Puechemerecop ñeñtcha' Cristoterrets:

18 Añmapa' ñeñtcha' atarr torrerretsa nocop, ñapa' ñeñt nenen ñeñtcha' atarr sherberrets. Ñapa' ñeñt atarr nemorrentena ñeñt e'ñe nocshatene'. Ñapa' ñach ahua-mencat neperr necamquëñoť, ñach eñotaterre' allohuen pa'namen acheñenesha' ama't ñeñt ama judione-shayaye. Añcha' eñotaterret ñeñt e'ñe cohuen ñoñets attochña e'ñe pocte' nentuerranet.

19 Ñapa' amach es otnare'tyerraneto ama't mameshapa' amach ama'toçhetyerro. Ama't mameshapa' amach che'çhame'tyerraneto ama't allecma chopeñe'chyen acheñenesha'.

20 Ama't ñeñt mueroçhetyetsapa' ñapa' e'ñech muererranet. Ñeñtpa' atetcha' netma'ntacha ñerra'mrrate' ama't puecharra cho'ne'ch tsopa'ne'pa' ñaña' amach çha a'meyatere. Ñaña ñerra'm lampareñ çha muene'mayen ñeñtpa'çho'ña amach emayatere. Ñapa' amach çha es añcha'noçhtana'tyerro, tarraña esempohuañenpa' e'ñech atta a'mchechatuerran ora allohuen ñeñt ama pocteye' enteno Yompor.

21 Ñeñto'marña allohuen pa'namen acheñenesha'çhno ñachña e'ñe yemuetuerret. Arrpa' allohua huañ atet ote't Yompor ñeñt quellquë't Isaías.

Atto puesheña'tets oteñet Jesús ñapa' oneñeto' po'hua mencot queçhpatenanña po'potantañ oneñeteçhno acheñenesha'

(Mr. 3.19-30; Lc. 11.14-23; 12.10)

22 Jesúsapa' alla huapaterrñañeterr puesheñarr yacma ñeñt aporo'yet ñeñt chorrena oneñet çha opanatateñ. Jesúsña'pa' a'çrrataþ, ñeñtña opanerpa' o' alla eñorrera, ñaña o' e'ñe cohuen cohuerr.

23 Allohuenña acheñenesha'pa' atarr cohuanrrorteñet, ñetña'pa' atet otyeset:

—Ñato' añte'ca'yeña David po'mreñeñ ñeñtcha' Cristotosets.

24 Fariseonesha'ña allempo e'mare'chetpa' ñetña'pa' atet otyeset:

—Atto queçhpatatyenan oneñeteçhno acheñenesha' añaca'ye ahua-mencat pene' Beelzebú ñeñt pompor pen allohuen oneñeteçhno.

25 Jesúsña'pa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor

po'huamencot quechpatatenan oneñetechno acheñenesha'. Ñeñto'marña ñapa' atet otanet:

—Ñerra'm puecheñarr amcha'taret elloptannena pa'cheñer e'ñe ñagattsetpa' e'ñech poctacma a'cllatanna'tuerret. Attecmach ñannerra ñeñt parro yeçhetsa paterr anetso, ñerra'm cho elloptannenet e'ñe ñagattsetpa' ñeñtña atto huomencatenetpa' ñeñtpa'cho'ña chachca'ye huañerrets. Attecmach ñannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' ñeñtña atto huomencatenetpa' ñeñtpa'cho'ña chachca'ye huañerrets.

²⁶ Attecmach ñanna'ta ñaña oneñet pueyochresha'chno ñerra'm oneñetechno e'moñe'tannenet, ñerra'm huapore'tannenet e'ñe ñagattseta amach errotenot allo'na atarr huomencatneneto. Po'ñoçh oneñetpa' amaca'ye huapore'tanneno.

²⁷ Sapa' atet sotenen napa' Beelzebo' po'huamencot nequechpateññañ e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch quechpatachet oneñetechno acheñenesha', ñetpa'cho'ña amaña Beelzebú po'huamencoteye' quechpateñetoña oneñetechno acheñenesha'. Ñetpa'cho'ña Yomporoña po'huamencot quechpateñetña oneñet. Ñeñtña o' eñotatas ñeñt atet sotenoñ ñeñtpa' amaca'ye po'ñoçh atteyaye.

²⁸ Po'ñoçhca'ye Yompor e'ñe Puecamquëñoñt ñeñtña ahuamencat nepene' attoñ nequechpateñña oneñetechno acheñenesha', ñeñtcha'ña señotate' te'pa' o' nechapatonas Yompor po'cohuenña ñeñt atto po'ñoçh atarr ayochreshatena ña.

²⁹ Ñehua, yapa' yeñoteñ ñeñt atarr ahuamencattetsa atto atarr ahuamencattena oneñet, ñaña'pa' e'ñe po'huamencot cohuamñpesyenan allohuen e'ñe cohuen ñeñt pa'paquëll pa'yen. Tarraña ñerra'm esempo o'ch huapoña ñeñt atarr ahuamencatesha' ñeñtcha' metanose'ña po'huamenc atet ñerra'm na Nompör, ñeñtcha'ña rromose' o'ch huancos, allochña'pa' o'ch be'tosos all ñeñt pa'paquëll pa'yen o'ch e'ñe puerratamñsos ñeñt allpon o'patyena ña.

³⁰ Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñtña acheñerpa' chaca'ye epatare'tennan ñeñt atet netorra'yena na. Ñeñtpa' o'ch netma'ntatasa atet: Ñerra'm esesha' ama na'yapachapretenaye ñeñt na'yapachen na, ñeñtña'pa' cha a'parratse'tamñpenen a'yenet.

³¹ Ñeñto'marña te'pa' o'ch notas: Allohuen pa'namen

sosya'tsañechno ñeñt ama pocteye' enteno Yompor ama't ñaña achmāre'tanna'teñets ñeñtpa' aṗretna'po' nenteñ.

32 Ñaña ñerra'm esesha' nesasene' na Ñeñten Acheñetosets ñeñtpa' aṗretna'po' nenteñ. Tarraña ñerra'm esesha' añ achmāre'teññañet Parets Puecamquēñ ñeñtñapa' amaca'ye aṗretna'pahuoye' nenteñe. Ñeñtpa' amach aṗretna'pahuoterro e'ñe tayoteñ errponohuañen.

Allohuen acheñ ñeñt e'ñe po'ñoçh cohuen acheñer, ñetñapa' añcha' orrtatyenet ñeñt e'ñe cohuenare'

(Lc. 6.43-45)

33 Ñehua, yeñoteñ allohuen acheñ ñeñt e'ñe po'ñoçh cohuen acheñer, ñetcha'ña orrtatenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye ñetñapa' añach orrtatenet ñeñt ama cohuenayaye. Ñeñtpa' atetcha' netma'ntaterrsa: Ora allohuen ñeñt e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeñt ama cohuenayayepa' pue'merpa'cho'ña amach e'ñe cohuenayaye. Ñeñto'marña attoña yeñoteñ erra'tsente' ñeñt e'ñe cohuenare' narmetsoch ñaña ñeñt ama cohuenayaye narmetsoch, pue'meroña e'ñe yechme'tenanet.

34-35 Sapa' ama cohuenayayso. Cha sottena ñerra'm shechpa e'ñe sompor sepen allohuenes. Ñeñto'marña amach errotenot señoso cohuen tarro'mar sapa' po'ñoçhpa' ama cohuenayayso. E'ñe atet atarr soctape'chatse'tyen seyoçhro ñeñt ama cohuenayaye, attoçca'yeña señosatse'tyen. Ama't erra'tsena acheñer ñeñt e'ñe po'ñoçh cohuen ñapa' añcha'ña orrtatyen ñeñt e'ñe cohuenare' coṭape'chen pueyoçhro tarro'mar pueyoçhroña all coṭape'chenan shonte' ñeñt e'ñe cohuentetsa. Tarraña po'poñ acheñer ñeñt po'ñoçh ama cohuenayaye, ñapa'cho'ña añach orrtatyen ñeñt atet coṭape'chen pueyoçhro ñeñt ama cohuenayaye tarro'mar pueyoçhroña all coṭape'chenan shonte' pa'namen sosya'tsañ. Tarro'mar ñerra'm shonte' yoctape'chen yeyoçhro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yoctape'chen ñaña yeyoçhro ñeñt ama cohuenayayepa' ñeñtpa'cho'ña e'ñech ñeñta yemnen o'ch yeserrpare'tyen.

36 Po'ñoçh napa' o'ch alla noterrser, esempohuañen allempoch acraretetuerra allohuen acheñenesha'pa' allohuen ñoñets ñeñt atta otatse'tyen acheñenesha' ñeñtñapa' a'metatatyeretcha'.

37 Tarro'mar ñerra'm e'ñe cohuenare' seserrpare'tyen te' Yomporñapa' e'ñech pocte' entuerrnas señoñ allempo.

Tarraña te'pa' ñerra'm čha señosatse'tyen ñeñtña señoñerpa' ñeñtchña secoñchaterre' allempo.

Atto Jesús'pa' otan acheñenesha' ñeñt ama cohuenaye' cotape'chetso ñetñapa' chocma e'nenet partsoteñets

(Mr. 8.12; Lc. 11.29-32)

³⁸ Allempoña allponsheña ñeñt atarr etsotayenayeñ ñoñets ñeñt atet anaret epuet ñaña allpon fariseonesha' ñetña e'ñe puehquëñoftpa' atet ochet Jesús:

—Yapa' Maestrocha' yemneñ o'ch porrtatonay pepartsoña ñeñtcha' yeñotate' p'apa' po'ñochte' Parets Puechemerep' ñeñtepte' Cristotosets.

³⁹ Ñaña'pa' atet otanet:

—Acheñenesha' ñeñt corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha' allempo a'mtane't Yompor po'ñoñ.

⁴⁰ Ñehua, yeñoteñ Jonás allempopa' allo'tsena cacacotmo ma'pamuet, ye'to ama't ñaña tsapo ñeñt añecmuen cac. Atetcha' neperra namña Ñeñten Acheñetosets, napa'cho'ña nema'pamuetcha' o'pono e'ñe allohuanen patso, ye'to ama't ñaña tsapo. Ñeñtcha'ña eñotaterrahuet atet penaña ñeñt huetsa Yomporeshot.

⁴¹ Tarro'mar ahua't allempo serrpare'tatane't Jonás nínivo'marnesha', ñetñapa' allempocma cotape'cherret e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch acraretuerra allohuen acheñenesha' ñeñtña nínivo'marnesha' ñeñt e'ñe cohuen cotape'cherrets Yomporecop ahua't, ñetpa'cho'ña orrterretcha', ñeñtcha'ña seño'taterre'ña sapa' ama't mameshapa' ama pocteyayeña ñeñt atet sepa'yese't tarro'mar ama soctape'cherro ello cohuen Yomporecop.

⁴² Ñaña te'pa' o'ch neyerpatasa ñeñt atet pa' ahua't puesheñarr coyanesha' ñeñt añcha'tarettatse't atarr bačhayo allohuanen pats sa'ponet. Ñeñtña coyanesha'pa' allotēñ on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten namña, ello nemtaneñ atto eñotañte't Salomón. Tarraña sañapa' amaña es sotapoteno. Ñeñto'mar esempohuañen allempoch acraretuerra allohuen acheñenesha', ñeñtña coyanesha'

ñeñt e'ñe cohuen e'mñnotatset ñapa'cho'ña orrterrach, ñeñtcha'ña señotaterre' sapa' ama pocteyayeña ñeñt atet sepa'yese't tarro'mar sapa' ama es same'ñe'te ama't e'ñe mamesha.

Atto Jesús pa' eñnotatanet ñato' oneñe'tpa' o'ch alla chorrerran-err acheñ allot'cha'nom ahuaña
(Lc. 11.24-26)

43-45 'Ellonetpa' o'ch alla neñnotaterriserr po'poñoneñ ñeñtcha' atet a'pare'terra acheñenesha' ñeñt te'pa' ama e'ñeye' cohuen cotape'cheneto Yomporecop. Ñehua, oneñe't ñerra'm esempo'cha'nom acheñenesesho't, ñeñtña oneñe'tpa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesurrerr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepacillo allot'ne'cha'nom ahuaña." Atetcha'cho' pa. O'ch alla ahuer allot'cha'nom ahuaña. Allña o'ch'cherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret, tarraña amach eseshaye' ye'chetso all. Allempoñapa' o'ch alla ahuer allo'tsa'yen pamo'tsesha'pa' o'ch enana' po'poñ can'cherrsheña oneñe'te'chno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chaprecha. Allohuenetpa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet p'atse'tyese't ñenmañ. Po'ño'chcha'ca'ye atet perraña acheñenesha' ñeñt te'pa' ama e'ñeye' cohuen cotape'cheneto Yomporecop.

Allempo huapoña Jesús pachor ñaña pa'mo'nasheñnesha'
(Mr. 3.31-35; Lc. 8.19-21)

46 Allempo atet eñorana'tenana acheñenesha'pa' o' huapa Jesús pachor epuet ñaña pa'mo'nasheñnesha'. O' chapuet allpa' ñetñapa' alla tom'chenet a'yo't. Añ muenenet ahuo'ch serrpare'tatoset.

47 Allempoña puesheñarrpa' atet otan Jesús:

—O'ca'ye huapaña pachor ñaña pemo'nasheñnesha'. Ñetpa' a'yo'te'tsa'yenet, mueneñet o'ch serrpare'tatospet.

48 Ñaña'pa' atet otan ñeñt otene':

—¿Ama't señoteñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen?

49 Allempoñapa' yochan pueyochresha'pa' atet otanet:

—Napa' añca'yeña ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñnesha' nepen.

⁵⁰ Ñehua, ama't erra'tsena ñeñtcha' e'ñe atet p̄ohuene' ñeñt atet muenen Nomp̄or ñeñt pue'ntañ'o'tsen ñeñtca'yeña e'ñe po'ño'ch nemo'nasheñ nepen ñeñtña no'ch nepen ñeñtña na-chor nepen.

13

All toma'ntatanet Jesús ñeñt a'parre'tene' puerets

(Mr. 4.1-9; Lc. 8.4-8)

¹ Ñeñte yetropa' cha'nerrerr Jesús pocolotpa' anorruerr sa'patop̄ño.

² Allñapa' emchorra'huererr shonte' acheñenesha' ñeñto'marña Jesúsapa' a'tap noñtopa' ahuañpes mame' allpononet allñapa' anorros noñto. Acheñenesha'ña allohuenetpa' alla tom'cha'tet sa'patop̄ño.

³ Allñapa' esocmañen ye'chatyenan acheñenesha' pa'namen toma'nteñtso'chno. Ñeñt ñanompa' atet otanet:

—Ñeñtña a'parrene' puerets ñañapa' ahua' allcha' a'parre'tyenana' puepuer.

⁴ All a'parre'tyeñ patanta'tetsñapa' alla chapyes toño'mar. Allñapa' huacha'tyesa o't e'ñe añyallmechuenana' puerets.

⁵ Po'poñe'chnoñapa' alla chapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ.

⁶ O'ña enome'ta'muen atsrretpa' alla a'uyatuer. Ama er'cha'tena' ñeñto'marña alla hueya'huerra.

⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerrañña narmets alla a'cllatuer.

⁸ Po'potantañe'chno ñeñtñapa' arr chapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' ñeñtñapa' atarr aton ellonire'tyes—puecha'tetspa' charroch charra' pue'llomer, po'pchañe'chnopa' pechapoch charra' pue'llomer, po'pchañe'chnopa' ma'poch charra' pue'llomer.

⁹ Allempoña Jesúsapa' alla oterraneterr:

—Ñeñtes po'ño'ch ne'nñotene', chaponasepa'ch seyo'chro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mr. 4.10-12; Lc. 8.9-10)

¹⁰ Allempoñapa' ponemñya pueyochresha'pa' atet otoset:

—¿Eso'mare'tña peserrpare'teño'tpa' atfa es petma'ntatyenanet?

¹¹ Jesúsñapa' atet oterraneterr:

—Sa te'pa' Yomporña o' muenaterres attoch señoterr ñeñt ama eñotpahuoyaye ama't ahuatoteñ ñeñt atet penaña Yompor po'cohuenña atto ayochreshattena ña pue'ntañ. Tarraña po'potantañechnoñapa' ñeñt atta es puecha'yetsa, ñocpuetñapa' amach errotenot eñoterrñañeto Yompor po'cohuenña.

¹² Esha'te' o' cherranet pueyoçhreto ama't e'ñe allpona Yompor po'ñoñ elloña Yomporpa' allo'nach eñotatnenanet nanac shonte'. Tarraña essha'ña ñerra'm ama chenaneo pueyoçhro tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyetañ pueyoçhro ñeñtñapa' chach puerratanperranet Yompor.

¹³ Ñeñto'marña ama't neserrpare'tatenanet toma'nteñtso, ñocpuetñapa' ama eñoteñetoña ñeñt atet netma'ntatenanet. Attoña ama't enteñetañ, ñetñapa' ama amnataretteneto o'ch es chapahuet pueyoçhreto. Ama't e'mueñetañ amaña chenaneoña pueyoçhreto ñeñt atet yeçhateney Yompor po'cohuenña.

¹⁴ Atet penet ñetpa' te'ñapa' po'ñoçh o' etsotua Isaías po'ñoñ ñeñt a'mtaye't Yompor po'ñoñ ahua't. Ñeñtpa' atet ote't Yompor:

Ama'tcha' po'ñoçh e'mueñetañ ama't e'ñe ahua'tapa' amach chapaneoña pueyoçhreto. Ñaña ama'tcha' cho e'ñe es entenetañpa' amach chapaneoña pueyoçhreto.

¹⁵ Tarro'mar ñeñt acheñeneshar te'ña ñet pueyoçhretopa' nanac echarretenet attoçhña amach es chenahueto pueyoçhreto. Te'ña ñetpa' amach mueneñeto o'ch es e'mñotet taye'to'te' es chenahueto pueyoçhreto. Te'ñapa' amach mueneñeto o'ch es entet taye'to'te' cherranet pueyoçhreto. Attoçhña amach es cotape'cherreto nocop ama't e'ñe mamesha attoçhña na'qeshpaterranetañ.

¹⁶ Allempoña Jesúsapa' alla o'terranerr pueyoçhresha':

—Saña po'ñoçhpa' atarr cosheñtso'tsenes sa tarro'mar atto o' senterrñañ Yompor po'cohuenña seclloyot te'ñapa' o' e'ñe cherrnasa seyoçhro. Ñaña atto se'muerrñañ Yompor po'ñoñ, te'ñapa' o' e'ñe cherrnasa seyoçhro.

¹⁷ Po'ñoçhca'ye notenes e'ñe ahua'toteñpa' shonte' ñeñt a'mta'yese't Yompor po'ñoñ ama't ñaña ñeñt e'ñe pocte' es pa'yestse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senter sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te'.

Tarraña allempo ñetpa' amaña eseshaye'ña e'muerrapayeña Yompor po'ñoñ.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mr. 4.13-20; Lc. 8.11-15)

¹⁸ Jesúsña'p' alla oterranerr pueyochresha':

—Ñeñto'marña te' sapa' se'mñnoten o'ch neñotatas ñeñt atet yeçhateney ñeñt atet o' netma'ntatua atet ñerra'mrrate' puesheñarr ñeñt a'parrene' puerets.

¹⁹ Ñehua, añ puerets ñeñt çhapyesets toño'mar, ñeñtpa' añ notenes acheñenesha' ñeñt e'mñnotenayeñ Yompor po'ñoñ ñeñt atto ayochreshattena ña. Ama't e'mñnotenetañ tarraña ama çhenaneto pueyoçhreto ñeñt po'ñoçh atet oteneñ Yompor. Ñeñto'mar allorocmach huapa oneñetpa' o'ch alla pueratam'perranet Yompor po'ñoñ e'ñe pueyoçhretoñ.

²⁰⁻²¹ Ñaña ñeñt çhapyesets mapuetromeso'mar ñeñtpa' añ notenes acheñenesha' ñerra'm esempo e'mñnoteññañet Yompor po'ñoñ e'ñech allorocma pocsheñesha' aguëññañetañ Yompor po'ñoñ. E'ñech cohuen amëñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puereçh. Tsapa'oneña ñerra'm o'ch huapanet topateñets ñeñtcha' mueroçhtatahuet tarro'mar ñetpa' o' amëñeretañ Yompor po'ñoñ, ñetña'p' allorocmach alla queçhpuerretña Yompor po'ñoñ.

²² Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñnotenayeñ Yompor po'ñoñ. Ama'tcha' çhapanetañ pueyoçhreto, tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocueta. Añach muenenet o'ch esocmañen es eçhyenet, tarraña ñeñtpa' çhaca'ye shequënanet. Attoña ñetpa' amach erro'tenot orrtatyesñañetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt çha a'cllaten ajma' ñeñto'marña amach erro'tenot me'teneto o'ch ellomñre'tyeset.

²³ Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñnotene' Yompor po'ñoñ, ñoñetspa' e'ñech cohuen çhenanet pueyoçhreto. Ñetña'p' ñeñtet po'ñoçh orrtatyenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr aton ellomñre'tyets—pate'tets çharroch çharra' pue'llomer, po'poñpa' peçapoch çharra' pue'llomer, po'poñpa' ma'poch çharra' pue'llomer.

Atto Jesús pa' toma'ntaterranet atet pena ñeñt a'parre'tene' ta'tllom̄ e'ñe all a'parraret cohuen trigo

24 Allempoña Jesús pa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto te' ayochreshattena ña pue'ntañot, ñeñtpa' atet pena ñerra'mrrate' puesheñarr yacma ñeñt a'parrene' cohuen puerets pa'mro.

25 E'ñe cohuen a'parre'tuepa' tarraña allempo manrrenet allohuenet, e'ñe't a'nahua huapa ñeñt e'moñe'tene'pa' allña pa' ahuo't a'parre'tyesuenana' ta'tllom̄ e'ñe all a'parraret cohuen trigo. Ahuo'tña a'parre'tueña'pa' o' ahuer a'nahua.

26 Narmetsña pa' o' cheparesua o' me'tyesuapa' allempoña pa' entet ñaña ta'te' o' chepares epuet trigo.

27 Allempoña pa' huacha'ta pamo'mte' pa'taruasañer, ñetña pa' atet otoset: “¿Ama't, Nompocha' cohuenaye' pa'parrenoña puerets pa'mro? Errotenotuñaca'ye o' chopña ñaña ta'te' all.”

28 Ñaña pa' atet otanet: “E'ñeca'ye cohuen na'parraña nepuer all. Ñeñt ne'moñe'tene'pa' ñeñt'e'ca'yeña o' atet pañpsen.” Pa'taruasañerña pa' atet ochet: “¿Ama't pemno o'ch ahuey o'ch ya'mare'tuerra'ña ta'te'?”

29 Ñaña pa' atet otanet: “Amachca'ye sa'mare'tatsche te't cha sa'marampennan netrigo.

30 Allepa' chepuepa' epuet. EsemPOCH pomella'hua trigopa' allempochña noch ñeñt'cha' a'yapache' trigo: Ñanomcha' añ sa'yapacha' ta'te' o'ch sehuancachmech attoch ya'poyatater. Sehuanca'huepa' choscha'ña a'yapache'ña ñaña trigo o'ch sañño'teña' allecma neshontateñ.”

Atto Jesús pa' toma'ntaterranet atet pena pue'llomer ñeñt otenet mostazllom̄

(Mr. 4.30-32; Lc. 13.18-19)

31 Allempoña Jesús pa' alla oterraneterr:

—Añ Yompor po'cohuenña ñeñt atto ayochreshattena ña pue'ntañot, ñanompa' e'ñech puesheña'ttsa ame'ña'yetsa. Allempoteñña pa' allo'nach sen atonetnomtsa ñeñt'cha' ame'ñerrtsa attochña e'ñe epa'huerra erracmañen Yompor po'cohuenña.

Ñeñtpa' añ toma'ntaterraneterr mostazllom̄:

—Ñeñtña pue'llom̄retollpa' puesheñarrña pa' o' anem̄ pa'mro allcha'nare'teña'.

32 Ñehua, e'ñe yeñoteñ mostazllom̄ ñeñtpa' atarrca'ye nanac añeñolleshallmerr, tarraña ñerra'm o'ch yenare'chpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ

narmetsočhno. Ñeñña narmetsocherpa' o'ch huačha'toña otečhno ñeñtcha' ama'tanatyesosets puetacro'mar.

*Atto Jesús'pa' toma'ntaterranet ñeñt atet pena chase'
(Lc. 13.20-21)*

³³Jesús'pa' alla serrpare'taterraneterr ellonet ñeñt atet pena Yompor po'cohuenna ñeñt atto atarr ayochreshattena ña pue'ntañoť. Ñeñt'pa' ama'tcha' añetolla ñeñtcha' ñanom orrtatsa tarraña e'ñe ña po'huamencoť mameťollapa' o'ch e'ñe epa'hua ora errařaren. Ñeñt'pa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñña chase'pa' ama'tcha' añetolla net, ama'tcha' aton harina' ñeñt ma'pa arroga, mameťollapa' o'ch e'ñe a'muesatuanña ama't atarr aton harina'.

*Jesús'pa' ora allpon ñeñt atet yečhatyenan acheñenesha'
ñeñt'pa' attoña pa'namenot es toma'ntatyenanet
(Mr. 4.33-34)*

³⁴Ora allpon ñeñt atet yečhatenan Jesús acheñenesha', ñeñt'pa' atto es toma'ntatyenanet. Allempopa' ama serrpare'tataneto e'ñe atta, čhocmaña serrpare'tatenanet toma'nteñtso.

³⁵Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atet'cha' yečhaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor yečcatan añ patser.

*Atto Jesús'pa' eñotaterranet ñeñt atma'ntataretetsa ta'tllom
epuet trigo*

³⁶Allotña Jesús'pa' sa'nman acheñenesha'pa' o' čherr pocollo. Allña huačha'toña pueyochresha'pa' atet otoset:

—Te'pa' o'ch řotey e'ñe eñotočhen ñeñt toma'ntena ta'te' ñeñt chepuets řa'mro.

³⁷Ñaña'pa' atet otanet:

—Ñeñt nare'tene' e'ñe cohuen pueretspa' ñeñt'pa' naca'ye Ñeñten Acheñetosets.

³⁸Ñeñt na'muer nepenpa' ñeñtca'yeña añe patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña čherrets all añcha'tarettena Yompor. Ñeñt ta'te'pa' ñeñtca'yeña oneñet pueyochresha'.

³⁹Ñeñt e'moñe'tene' ñeñt nare'tamřse' ta'te' ñeñtca'yeña oneñet pompor. EsemPOCH čherr allempoch pomella'huapa' ñeñt'pa' añ toma'ntena allempochña

mellapoterra. Ñeñtcha'ña a'yapaçherretspa' ñeñtca'yeña mellañoteñnanasha' ñeñtcha' huacha'ttsa entot.

⁴⁰ Ateť apçhenet ta'te' te' o'ch a'poyatachet tsopa' atetcha' perrñañetña oneñet pueyochreshačno allempoch mellapoterra.

⁴¹ Ñehua, na Ñeñten Acheñetosetspa' nach mueñerre' nemllañoteñnaneshar ñeñtcha' a'yapaçha'tuerre' allohuen ñeñt cotape'chatyenahuet sosey ñaña allohuen ñeñt e'ñe aña etsotayen patpareñ. Arrotcha' a'yapaçharetterra allo'tsa'yen ñaña Yompor pueyochreshačno, ama't e'ñe all ayochreshattena ña.

⁴² O'ch e'ñe a'yapaçharetetuerretpa' allempochña asaprrotarettet o'pono all huorten tso'. Allñapa' allcha' yahuanrrorteret, panmueñořet atserrpa' rraso'tyerretcha' pa's.

⁴³ Allempoña allohuen ñeñt e'ñe pocte' es pa'yets ñetñapa' poptetsetach e'ñech atet ñerra'm atsrret. E'ñech cohuen popuetyenet all añcha'tarettena ñeñt pompor penet. Allohuenes ñeñtes ne'mñotene' neñoñ çhaponasepa'chña seyoçhro ñeñt atet notenes.

Atto Jesúsapa' toma'ntaterraneterr shonte' quelle ñeñt e'potarettetsa patso

⁴⁴ Po'pocheño Jesúsapa' alla toma'ntaterranet po'poñoneť. Ñeñtpa' añ toma'ntatanet Yompor po'cohuenña atto atarr ayochreshattena ña, ñeñtñapa' atarr aye'choçhen. Ñeñtpa' atet toma'ntatanet ñerra'mrrate' shonte' quelle ñeñt e'potarettetsa e'ñe patso. Ñeñtña quelle puesheñarr yacmapa' machayořach entos. O'ña entuepa' o' alla pampa'ner ñañaapa' o' ahuerr e'ñe pocsheñesha' allenta pomhuahuerran ora ñeñt allpon eçhyen allochñapa' attoch echan quelle alloch rañterrana ñeñt patser allo'tsen quelle. Attochña ganam̃perrana atarr shonte' quelle ñeñt atarr ye'chena.

Atto Jesúsapa' toma'ntaterraneterr ñeñt atarr coçhnesha' serets

⁴⁵ Po'pocheñoapa' atet toma'ntaterraneterr:

—Yompor po'cohuenña atto atarr ayochreshattena ña ñeñtpa' atarr aye'choçhen atet ñerra'mrrate' ñeñt atarr coçhnesha' serets. Puesheñarrña ñeñt pomatsre'tyetsa ñeñtach atarr e'nyen ñeñtcha' rañta.

⁴⁶ Pamtarrñapa' entosan serets ñeñt atarr nanac coçhnesha' ñeñtñapa' atarr tsa'te'. Ñañaapa' allentach ahuerr o'ch pomhuahuerran ora ñeñt allpon eçhyen allochñapa' attoch echan quelle alloch rañterrana serets ñeñt atarr nanac coçhnesha'.

Atto Yompor po'cohuenña e'ñe atet pena ñerra'mrrate' añecmuen terraya

47 Jesús pa' alla toma'ntaterraneterr; ñeñt'pa' atet otanet:

—Yompor po'cohuenña atto atarr ayochreshattena pue'ntañof ñeñt'ña pa' e'ñe atet ñerra'mrrate' terraya añecmuen. O'ch terrayet sa'popa' o'ch e'ñe ap'cha'huan allohuen pa'namen cacachno.

48 Ñerra'm o'ch e'ñe chorra allempoñapa' o'ch chetañperet topñaso, o'ch anorrcha'tet allcha' acret ñeñt' e'ñe cohuenare' ñeñt'cha'ña esha'tanatet puecañtro. Ñeñt'ña ama cohue-nayayepa' o'ch saprochet.

49 Ñeñt'pa' atet'cha'ca'ye perraña allempoch mel-lapoterra. Cha'nma'cha'tcha' mellañoteñnesha' ñeñt'cha' ellopa'tetstaterre' ñeñt' atsrre'mñañnesha' ñaña ñeñt' e'ñe pocte' es pa'yets.

50 Ñeñt'ña atsrre'mñañnesha'pa' huapore'teretcha' o'pono all huorten tso'. Allña pa' allcha' yahuanrrorterret, pan-mueño'fet atserrpa' rraso'tyerretcha' pa's.

Attoch e'ñe cohuen yorrtatyen cotapñats ñeñt' ahuatoteñ atarr sherbets ñaña attoch e'ñe cohuen yorrtatyen cotapñats ñeñt' e'ñe etserra atarr sherbets

51 Allempoñapa' allenta a'p'to'tanet:

—¿Eñoto'chena't sentenña allohuen ñeñt' atet notyenes?

Ñetña pa' atet ochet:

—Eñoto'chenca'ye yenteñ.

52 Allempoñapa' atet otanet:

—Ñeñto'marña ama't allohuen erra'tsen ñeñt' atarr et-sotene' ñoñets ñeñt' atet anaret ahuatoteñ, ñerra'm elloña ay'chatarettet ñamet ñeñt' atet pena Yompor po'cohuenña atto atarr ayochreshattena ña, ñeñt'ña acheñer atarrcha' co-huen orrtatenan cotapñats ñeñt' ahuatoteñ, elloña cohuen-cha' orrtaterran ñaña ñeñt' e'ñe etserra cotapñats. E'ñech atet pena ñerra'mrrate' ñeñt' apaclatesha'. All año'tyenan ñeñt' atarr morrentena errotenopa' o'ch orrtatenan ñeñt' er-rite' año'ten all; errotenoñapa' o'ch orrtatyenan ñaña ñeñt' año'ten ahuatoteñ all pa'paclo.

Allempo serrpare'tatan Jesús acheñenesha' all Nazareto (Mr. 6.1-6; Lc. 4.16-30)

53 Serrpare'tatuanet Jesús ñeñt' atet toma'ntatyesanet, ñaña pa' ahuererr allot.

54 Cherr pa'nyo all Nazareto ye'chatuerraneterr all po'prahueto. Allña pa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt atet pa'yena. Esha'huañaca'yeña eñotatene'ña attot orrtatenan partsoteñets.

⁵⁵ Ñapa' aña puechemer ñeñt po'taruas pene' o'ch torrenana tsach attoch es yeçhcatyen pa'namen. Pachorpa' aña María. Pa'mo'nasheñpa'cho'ña aña Jacobo, José, Simón, Judas.

⁵⁶ Allohuen po'chanesha'pa' e'ñeca'ye yechme'tuenanet parro'marneshayarramche'. Ta'm ñaña'pa' errotenofte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt a'mtene' Yompor po'ñoñpa' çhocmaca'ye añcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñetña'pa' ama acua'penaye' enteñeto. Ama't ñaña ñeñt parro yeçhenet pa'pacleto, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

Allempo e'ñe cohuen es orrtatytes Jesús, Herodesña'pa' cha otapañ Juanañte' o' tanterra ñeñt apataye't acheñ Yomporecop (Mr. 6.14-29; Lc. 9.7-9)

¹ Allempoña añcha'taret Herodespa' e'mare'tenan atet pa'yena Jesús. Ñehua, Herodespa' all añcha'tarettena anetso Galileo.

² Allempoñapa' atet otan ñeñt sherbene':

—Añepa'tca'yeña Juanañ ñeñt apataye't acheñ Yomporecop; ta'mca'ye çhate'ca'ye tanterraña rromot. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huancachpa' allña yottanñpsach attoch coshatan Herodías ñeñt pa'mo'nasheñ Felipe puetapor.

⁴ Tarro'mar Juanañpa' ña otaye't Herodes:

—Amaca'ye pocteyaye o'ch peyoranñpes pemo'nasheñ puetapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet ñerra'mrrate' ñeñt a'mtene' Yompor po'ñoñ.

⁶ Allempoña coshame'tapreteñet Herodes allempo eñalletña allña'pa' o' tancsosa Herodías puechoyor.

⁷ Herodesña'pa' ñeñta atarr cohuen ent. Ñeñto'marña och:

—Na po'ñoçhpa' o'ch nena' neñoñ e'ñe Parets pa'so'chño, ama't es penamuenpa' napa' napařcha'.

⁸ Pachorñapa' allenta otare'ch e'ñe a'nahua:

—O'hua p̄ochte' am̄cha'taret: “Añcha' p̄apuen Juan poñ.”

Allempoña shopshesha'pa' atet otan Herodes:

—Napa' añ nemnen o'ch pepechennana' Juan poñ ñeñt apataye't acheñenesha', o'ch penon platopa' o'ch p̄aphuerren e'ñe arrma.

⁹ O'ña enamhuepa' am̄cha'taretñapa' čha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt hua'ñen ñeñt e'muene' atet oten ñeñto'marña otanet:

—Te'pa' o'ch sař Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yottam̄peñet.

¹¹ Allempoña o' huapaterrñañet poñ platopa' aphueret shopshesha'. Ñañaapa' anem̄ pachoresho o'ch apueña'.

¹² Allempoñapa' ahuanma Juanañ pueyochresha' o' aneret apecharet o'ch pampuereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesúspa' rratenan shonte' acheñenesha'; ñeñtña acheñenesha'pa' allo'tsen amnaroch mil

(Mr. 6.30-44; Lc. 9.10-17; Jn. 6.1-14)

¹³ Jesúsapa' allempo e'mare'tan Juanañ, ñañaapa' ahuañpes noñto o' sa'nman acheñenesha' o'ch ahuo' all ama acheñempañoayaye. Acheñenesha'ñapa' allempo e'mare'chet ñetñapa' allenta ahuanmuet ñamet. Allohuen anetsotpa' e'ñe ahuanmuet o'ch entereta' Jesús. Ñetñapa' alla oñmačha'tet patso'mar.

¹⁴ Allempoña sehuosa Jesús noñto'tpa' alla entuerraneterr o' alla shonta'huerrerr acheñenesha'. Ñañaapa' atarr nanac muera'huerraneterr. Allñapa' o' alla a'crratyesuerraneterr patsñañeñer.

¹⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañoayaye ñaña o'ca'ye ellerren. Te'pa' o'ch p̄och acheñenesha' ahuanemyerretetpa' anetso'mar allcha' rañta'yesserret puerraret ñeñtcha' rra'yesserret.

¹⁶ Jesúsñapa' otanet:

—Amachca'ye ahuanmatsterreto. Sachca'ye apa'yeshahuet ñeñtcha' rret.

¹⁷ Ñetñapa' atet ochet:

—Ya arrpa' amaca'ye es yechenoña ama't coñe'ta; yapa' e'ñeca'ye amnara pan yechen ñaña epatoll cac.

¹⁸ Allempoña Jesúsapa' atet otanet:

—Sanmon arrma o'ch sapuenna'.

¹⁹ Allempoñapa' otan acheñenesha':

—Te'pa' o'ch sanorrcha'tyes e'ñe all cohuen emmo'ratyen pasetma'.

Allempoña agapan ñeñt amnar pan ñaña epatoll cac, o' cohua' enonet, parasyoso'tam̄psan pan allostñapa' shota'tan pan, apanatyesan pueyochresha'. Ñetñapa' o' epatyeset allohuen acheñenesha'.

²⁰ E'ñe epa'huet, allempoña o' rrallme'chet allohuenet e'ñepa'tcha' yetrra'tuahuet. E'ñe yetuahuetpa' cha a'pchatyeset ñeñtñapa' a'yapa'cheret. Ñeñtña a'yapa'cherretpa' chepa'tcha' chorrats charra' puechena epa cañter e'ñe tamo'yare'.

²¹ Ñeñtña rrallme'chatspa' atarr shonte' acheñenesha'; ñato' allo'tsente' amnaroch mil ñeñt e'ñe yacmaneshoche'. El-lonetpa' allo'tsa'yen ñaña coyanesha'chno ñaña cheshane-sha'chno.

Atto Jesús'pa' e'ñe cohuen chope'chnen enot oño

(Mr: 6.45-52; Jn. 6.16-21)

²² Allempoña Jesús'pa' otan pueyochresha':

—Te'pa' o'ch sa'ta'cha't noñto o'ch sota sanom o'ch se'pchaterra yo't. Napa' o'ch neso'tnom̄ ora acheñenesha'.

²³ O'ña so'tuanmanetpa' ñaña'pahu' aspeno e'ñe ñapue't allña ma'yochosa. Ama't o' tsapuenpa' ñaña'pahu' allo'tsena ñapue't.

²⁴ Noñtñapa' ñeñt rro'chaso'tsenara sa'po, emo'yare'ñapa' cha anmape'char̄penanet, a'puerrame'tam̄penanet orno.

²⁵ Atteña allempoña puetarenmochpa' huenanet Jesús' cha chope'chnen enot oño.

²⁶ All chope'chnen allempoña entapueñ pueyochresha', ñetñapa' cha toratsetyeset pueyo'chret, atet otanna'tyeset:

—Choyeshe'matste'ca'ye huaponaya.

Pueyorño'tetpa' atta rrannartet.

²⁷ Jesús'ñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta señcha'tatstapno.

²⁸ Allempoña Pedropa' eñorana'cha ñeñt'pa' atet och:

—Ñerra'm po'ño'chte' p̄a Partseshacha', te'pa' o'ch p̄otosen, a'ponca'ye nesho, pechope'chnom p̄aña enot oño.

²⁹ Jesús'ñapa' allenta och:

—A'ponca'ye.

Ñaña'pahu' allenta sohua noñto'tpa' o' chope'chnom ñaña enot oño o'ch ahua' Jesúsesho.

³⁰ Chope'chnomtsapa' o' cohua'nman huomenquësha' ñeñt' cha emo'yartatenan sa'ppa' cha yore'ch. Cha yore'chpa' alla muene' esha'ta oño. Allñapa' rranare'ta atet otan Jesús:

—jĤa'queshp̄atosen Partshacha'!

³¹ Jesúsña tecma rremaĤpa' atet och:

—Papa' ama't e'ñeye' peyemtenno. Eso'mare't cha pe'charrtatenña peyoĤer.

³² E'ñe a'tacha'tatseta noñtopa' huomenquësha'ñapa' Ĥhepa'tcha' muetsoñeñterrtsa.

³³ Ñeñtña noñto'tsa'yenpa' allente'pa'tcha' concorpanrror-tana'tapetpa' atet otyeset:

—Po'ñoĤhepa't Ĥpapa' e'ñe Parets PuechemereĤ.

Allempo Jesús'pa' a'crratyesosan pa'namen atsnañeĤeĤno all Genesareto

(Mr. 6.53-56)

³⁴ Allempoña pechatamĤsetpa' arr etsotset all oteñet Genesareto.

³⁵ Ñeñtña ane'tañnesha' allpa' o' cheme'tapet Jesús. Atto cheme'tapetpa' ñetñapa' allenta mueñet acheñ, o'ch e'mare'tatenana' acheñnesha' allampaño'mar. Allotñapa' huapatyesoñet allohuen atsnañeĤeĤno.

³⁶ Ñeñtña atsnañeĤeĤnopa' o' enamyoset ama't poso'moĤa o'ch a'p̄lla'yesosñañet pa'shtam. Allpon ñeñt' a'p̄lla'yese' Jesús pa'shtam allponĤo' e'ñe corra'yesuerrtsa.

15

Atto Jesús'pa' eñotatenanet ama añeye' ya'sosyatenaye Partso-cop ñeñt' yerra'yen yenamot

(Mr. 7.1-23)

¹ Allempoña fariseonesha' ñaña ñeñt' atarr etsotayenayeñ ñoñets ñeñt' atet anaret judioneshacop ñetñapa' arroĤ huaĤa'tet JerusaléñoĤ. ChaĤa'tet Jesúseshopa' atet otyesoset:

² —Eso'mare'tña peyochresha'ñapa' queĤhpuerretña ñeñt' atet yeyĤe't ya ahuat yatañeshohuen. Ñeñto'mar o'huañ e'pota'tetña Partsocop allempo rrenet.

³ Ñaña'pa' atet otanet:

—Sapa'Ĥo'ña ñeñto'mare'trraña saĤpare'teññañña samña Yompor po'ñoñ ñeñt' atet anaret alloĤhñapa' e'ñech sañeña seyĤeña e'ñe setsotayen.

⁴ Ñehua, po'ñoĤca'ye yeñoteñ Yomporpa' atet otene'y: "SemorrenteñoĤpa' señcha'na'Ĥcha' sompor ñaña sachor." Elloña ñaña po'poñoneñ atet otene'y: "Ñerra'm esesha' sasare'tene' pompor ñaña pachor ñeñt'pa' muetsetepa'."

5 Tarraña sañapa' amaña atteye' sepeno tarro'mar sapa' čhaña atet sotyen:

—Ñerra'm esesha' atet otene' pompopor ñaña pachor: “Ñeñt nechen o'ch napapeña' tarraña amach napape te'pa' o'ch nene' Yomporecop”

6 ñeñtña acheñerpa' sañapa' atetcha' soteñ: “Pocoppa' ama pallteno o'ch es pañ pamo'mte'.” Sapa' attoca'yeña sehua-pore'teññaña Yompopor po'ñoñ allochñapa' e'ñech aña setsoten ñeñt e'ñe sañeña seycheña.

7 Sapa' atarrca'ye ommoñañeshas tarro'mar atarr sesh-care'ten amaña Yomporeye'ña sesherbena. Isaíaspa' e'ñe cohuen a'mtane't Yompopor po'ñoñ, saña te'pa' e'ñe atet sepena atet ote't; allempopa' atet ot Yompopor:

8 Ñeñt acheñenesharpa' e'ñe puenamota cohuentatennanetañ; pueyočhretoñapa' ama čhenaneto ñeñt cohuen nentena.

9 E'ñe orrena ma'yochennet, ñeñt atet yečhatannenetpa' ñeñtpa' e'ñe acheña naye't ahuat poctañña.

10 Allempoña Jesúsapa' čhore'tan acheñeneshas' ñeñt shontetsa, ñetñapa' atet otanet:

—Sañapa' e'ñepa'chña cohuen se'mñnoten allochñapa' attoch e'ñe cohuen čhaponasa seyočhro.

11 Ama añeye' ya'sosyatenaye Partsocop ñeñt yerra'yen yenamot. Añca'yeña ya'sosyatene' yeñoñ ñeñt čha'nets yenamot ñeñt atet yeñosatse'tyen.

12 Allñapa' atet oteña' pueyočhresha':

—¿Peñoteñe't fariseonesha'ñapa' allempo e'monapet peñoñ ñeñt atet potyenanet ñetñapa' čha'atsrre'muet?

13 Ñañaapa' atet toma'ntatanet ñeñtcha' atet aparetterra fariseonesha', ñeñtpa' atet otanet:

—Allohuen narmetsočhno ñeñt ama añeye' nare'taye Apa ñeñt pue'ntaño'tsen ñeñtñapa' a'mare'taretetuerrach.

14 Ñetpa' ottetepa'ta. Ñetpa' e'ñe atet penet ñerra'mrrate' puešeñarr ñeñt aporo'yetpa' ñapa' o'ch echa'nman po'psheñeñ ñeñt parro aporo'yetećmuet. Allempo atet penet ñerra'm arrotonta echa'nmanna'tnomuet epsheño'maret čhach shora'nmoset arrototo. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotentot yoctape'chache po'psheñeñ ñeñt ama eñotenaye ñeñt cohuen enten Yompopor.

15 Allempoña Pedropa' atet ot:

—Yapa' čhochña peserrpare'tatey e'ñe cohuen eñotočhen ñeñt atet petma'ntatena ñorra'.

16 Ñañaapa' atet otanet:

—Ama't sapa' cho'ña ama'tña señoña'.

17 Sapa' ama't chennasoña seyocho ñeñt yerra'yen yemoṭpa' alla sen yaṭo ñeñtpa' chocmach yener a'yo.

18 Añña ñeñt cha'nets yenamot ñeñt atto yeñosatse'tyen ñeñtpa' e'ñe yeyochrot huena ñeñtña chocma ya'sosyatene'ña Partsocop.

19 E'ñe yeyochrot huena cotapñats ñeñt ama't mameshapa' ama cohuenayaye, ñeñtpa' añ: muetsanna'teñets, chetapretanna'teñets, cañoresha'teñets, etatsre'tyeñets, toma'tamñsanna'teñets, sasare'teñets.

20 Ñeñt allohuen sosya'tsañechno ñeñt huetsa yeyochrot ñeñtña po'ñoçh ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeñtpa' amaña ñeñteye'ña ya'sosyatene'ña Partsocop.

Atto puesheñarr coyanesha' ñeñt ama judioneshayaye ñapa' atarr yemtapana Jesús

(Mr. 7.24-30)

21 Ahuerrerr Jesús alloṭpa' alla chap allampaño anets Tiro ñaña Sidón.

22 Allñaapa' o' huapa puesheñarr coyanesha' ñeñt allo'marnesha' ñeñt canano'marnesha'. Ñañaapa' allenta rranare'tospa' atet otos:

—Pemueraye'chosna, Nepapareshacha' p̄apa' ñeñteṭ Davidna'tareṭ. Na nacñe'terpa' atarr mueroçhtateñ oneñe't.

23 Jesúsñaapa' ama't mameshapa' ama eñorana'teño. Atteñaapa' o' ponemña pueyochresha' otoset:

—Pe'mñochnaca'ye tecma allochñaapa' o'ch ahuerri, çhaca'ye cota'neney perranare'tnomue'.

24 Ñañaapa' atet otanet:

—Napa' e'ñe añeçpa allsensareten ñeñt israelena'tarneshacop; ñetpa' e'ñe atet nentenanet ñerra'm carrneroçhno ñeñt paya'tyetsa.

25 Coyanesha'ña ñeñt ama israelena'tareyayepa' ñañaapa' allenta on e'ñe ñesho concorposñañaapa' atet otos:

—Choña Nepapareshacha' pebensamñsaye'cherrnan nacñe'ter.

26 Jesúsñaapa' toma'ntatana acheñenesha' ñeñt ama israelena'tarneshayaye ñeñto'marña atet och:

—Ama pocteyaye o'ch yeprratamñpes yacñeñar puerrar o'ch yehuapore'tamñpes allo'tsen ochec o'ch rre' ñaña ochec.

27 Coyanesha'ñaapa' atet otererr:

—Ama't atteñ Nepapareshacha' tarraña ama't ochepa'cho'ña rra'yenan ñeñt a'shore'tatyen pamo'mte' po'mesaṗna'cho.

²⁸ Allempoña Jesús'pa' atet otererr:

—Chepa't nesñeshacha' atarr nanac peyemtena ñeñtepñapa' attetepa'ch ṗocop atet pemnen ṗa.

Pacñe'terñapa' allorocma correrra.

Atto Jesús'pa' a'crraterranerr po'potantañ atsnañete'chno

²⁹ Ahuerrerr Jesús' alloṗpa' alla oñem sa'patoṗño'mar e'ñe Galileaso. Alloṗpa' ahua' aspeno allñapa' anorros.

³⁰ Allñapa' alla huacherrñañerr shonte' acheñenesha'. Huapatyerrñañeterr checa'repa'chno, manco'chno, aporo'yete'chno, opananeshachno ña'ña huapatoñet shonte' po'potantañe'chno. Ñeñtñapa' alla nanatyesosñañet pa'rrṗot. Ña'ña'pa' e'ñe a'crratyesuerranet.

³¹ Allña acheñenesha'pa' cha atarr cohuanr-orteñet allempo eñchet atto opana'chno cha eñora'yerrtsa, manco'chnopa'cho'ña cha cohuenetyerrtsa, checa'repa'chnopa'cho'ña cha chope'chyerrts, aporo'yete'chnopa'cho'ña cha e'ñe cohuen cohua'yerrts. Atet e'ñe cohuen eñchetpa' allohuenetñapa' cohuentateññañet israelnesha' Po'yomporer.

Allempo Jesús'pa' rratenan shonte' acheñenesha', ñeñtña acheñenesha'pa' allo'tsen pa'tatsoch mil

(Mr. 8.1-10)

³² Allempoña Jesús'pa' agotan pueyochresha'pa' atet otapanet:

—Napa' cha atarr nemuereña allohuen acheñenesha' ñeñt shontetsa arr. O' ma'pamtoset nesho ama eñallmeñeto ñeñtcha' rret. Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño.

³³ Pueyochresha'ñapa' atet otoset:

—Errahuachca'ye yentña allpon rreñets ñeñtcha' yerrach shonte' acheñ, arrpa' amayaca'ye.

³⁴ Jesús'ñapa' atet oterraneterr:

—Sapa' ¿errpona't sechenña pan?

Ñetñapa' otereterr:

—E'ñeca'ye canchrra ña'ña coñe't cacatollesha'.

³⁵ Allempoñapa' otan acheñenesha':

—Te'pa' sanorrcha'tyes patso.

³⁶ Allñapa' agapan ñeñt cancherr pan ña'ña cacatollesha'. Agaphuepa' o' parasyoso'tenanerr Pompor alloṗña'pa' o' shota'tan pan, shetse'tan ña'ña cac, apanatyesan

pueyochresha'. Ñetñapa' o' eptyeset ñamet allohuen
acheñenesha' e'ñe epa'huet.

³⁷ Allempoñapa' o' rrallme'chet allohuenet, e'ñe
yerra'tuahuet. O' e'ñe yetuahuetpa' cha a'pchatyaset
ñeñtñapa' a'yapa'cheret. Ñeñtña a'yapa'cherretpa' chepa'tcha'
chorrats cancherr cañter e'ñe tamo'yare'.

³⁸ Ñeñt rrallme'chats atarr aton acheñenesha' ñato'
allo'tsente' pa'tatsoch mil ñeñt e'ñe yacmaneshoche'.
Ellonetñapa' allo'tsa'yen ñaña coyanesha'chno ñaña
cheshaneshachno.

³⁹ Allempoña Jesús'pa' so'tnerran acheñenesha'pa' ahuerr,
a'tapos noñtopa' ahuanperr o'ch ahuo' anetso ñeñt
pa'so'cheñ Magdala.

16

*Atto fariseonesha' ñaña saduceonesha' enamoset Jesús gat-
apanetepa'to' po'partsoña*

(Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet
o'ch enteñeta' Jesús. Chacha'tet Jesúsesho ñetña
puesquënoñetpa' atet otyesoset:

—Yapa' añ yemnen o'ch pegatapuey pepartsoña
entot allochñapa' attoch yeñotosep po'ño'ch papa' Parets
Puechemerep.

Ñetpa' cha mueneñet o'ch topatoset Jesús.

² Ñaña'pa' aña yerpatapanet ñeñt atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet,
sañapa' chocmach atet sotyenesne't: "Tsapa'tpa' atarrcha'
char."

³ Aromtañañapa' ñerra'm esempo senta'muen enet cha tsa-
tatta'muena, sañapa' chocmach atet sotyesa'muene't: "Choch
huata'muena ñeñto'mar o' cha rrenarsa'muen." Sapa' atarr
señoteneñña ñeñt sentyen ento ñeñtña señotatene'. Tarraña
ñeñt atet norrtatyennas nepartsoteña eso'marte'ña ñeñtñapa'
amaña eñotatensoña ñeñt atet pennas Yompor te' o'ch orrta-
tonas po'cohuenña. Ñeñt'pa' attate' seshquën.

⁴ Acheñenesha' ñeñt corra'yetsa te' ñetñapa' ama cohuenaye'
cotape'chyeneto, ama añeye' cosheneto Yompor ñeñto'marña
ñetpa' e'ñe orrena otennet ahuo'ch norrtatanet nepartsoña.
Tarraña amach es norrtataneto. Napa' añach paterr
neñotatanet atet eñotatane't Jonás ahuat nínivo'marnesha'.

Jesúsñapa' sa'nerranetpa' ahuerr.

Atto Jesús toma'ntaterraneterr ñeñt po'chaser pen fariseonesha'

(Mr. 8.14-21)

⁵ Allempoña pechatrra'tet yomta'n o' chapuet all, pueyochresha'ñapa' o' yerpuerret ñetpa' ama anmueto pan ñeñtcha' rroset all.

⁶ Jesúsñapa' atet otapanet:

—E'ñech señota ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cotape'chysetpa' atet otanna'tyeset:

—Amaca'ye yanmoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

⁸ Jesúsña allempo eñotanet atet cotape'chyenet ñañaapa' atet otarraneterr:

—Eso'mare't sellquëñesha' sotanna'tyena año' eñalle ñeñtcha' serra'. Sapa' ama'tña e'ñeye' seymtenno.

⁹ Teme'ttsena'tña ama es sechenoyoña seyoçhro. Ama'tña seyerpuenoña allempo natontat amnar pan ñeñt nerratallme'chpa' allo'tsen amnaroch mil acheñenesha'. Ama't seyerpuenoña ñaña ñeñt allpon chorrarerrets cañtro ñeñt sapçherr allempo.

¹⁰ Ama't ñaña allempo natontaterrerr ñeñt cançherr pan ñeñtña nerratallme'cherrerrpa' allo'tsen pa'tatsoch mil acheñenesha'. Ñaña ñeñt allpon chorrarerrets cañtro ñeñt sapçherrerr allempo.

¹¹ Errotenoñuañaca'yeña ama señotenoña ñeñt atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñtapa' ama rreñtsoye' notenso.

¹² Allempoña ñetpa' o' chapanet pueyoçhreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' poctapña ñeñt atet yeçhatannenet ñeñt ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

Atto Pedropa' otan Jesús, p'apa' p'aña Yompor Puechemerep ñeñtep Cristotosets

(Mr. 8.27-30; Lc. 9.18-21)

¹³ Allempoña chap Jesús all Cesarea ñeñtara Filipino, allñapa' otosan pueyochresha':

—¿Erroñena't otyenenña allohuen acheñenesha', na Ñeñten Acheñetosets eseshante'?

¹⁴ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtatset' Yomporecop. Po'potantaññapa' atet otyenpet p'apa' Elíaso'po'te'; po'potantaññapa' atet otyenpet p'apa' Jeremíaso'po'te' amapa' añe'po'te' po'psheñeñ ñeñt' a'mtaye't Yompor po'ñoñ ahuat.

¹⁵ Allempoñapa' alla a'p'to'terraneterr:

—Sañapa' ¿errofena'tña sotenenña sa?

¹⁶ Simón Pedroñapa' eñoratsapa' atet och:

—Papa' ñeñtepca'ye atarr yecuen ama't ahuatoteñ; ñeñtepca'ye Parets Puechemerep' ñeñtep' Cristotsets. Ñeñtña Parets ama arromñañeshayaye.

¹⁷ Jesúsñapa' atet och:

—Nanac cosheñtso'tseneñ, Simóna ñeñtep' Jonás puechemerep' tarro'mar atto peñotenenpa' ñeñtpa' ama arromñañeshaye' peñotatenaye; naña Nompor peñotatene' ñeñt' pue'ntañ'o'tsen.

¹⁸ Napa'cho'ña te'pa' o'ch notap' p'ama, p'apa' añcha' nesocherre'p' Pedro. (Ñehua, añ so'chñets Pedropa' añ toma'ntena ñeñt' atarr es echarr atet ñerra'm mapue'.) Ñaña p'a e'ñe peyemteño'ten na, na po'ño'chpa' naña Cristotsets, ñeñtpa' allochca'yeña norrtaterrña allohuen ñeñt'cha' name'ñerraya ñeñt'cha' ap'cha'yerrtsa e'ñe na pame'ñeño'tet. Atarrcha' huomenc echarr ne'pa'yerranet allohuenet ñeñt'et'cha' ap'cha'yerrtsa pame'ñeño'tetan na attochña ñocpuetpa' amach eñalle ñeñt'cha' huapore'terrahuet, ama't ahuata. Ama't rromueñets po'huamencpa' amach erro'teno't metanerranetoña ñet po'huamenc.

¹⁹ Ñaña na te'pa' o'ch napuerre'p' llesens attoch p'a'poterrñañ Yompor po'cohuenña ñeñt' atto ayochreshatena ña pue'ntañ'o't; ñeñtpa' añ toma'ntena atet ñerra'mrrate' llave alloch petoramper allohuen ñeñt' muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñt'cha' pena'y'es arr patsropa' Yomporpa'cho'ña ñeñt' ento'tsen e'ñech attecma pocte' enterranet. Ñaña ñeñt'cha' ama pocteye' penteno ñeñt'cha' pena'y'es arr patsro, Yomporpa'cho'ña ñeñt' ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sota'psa'tatsto ama't puesheñarra napa' na ñeñten Cristotsets.

Atto Jesús'pa' eñotatan pueyochresha' ñapa' amsaretterrach (Mr. 8.31-9.1; Lc. 9.22-27)

21 Jesúsña e'ñe allempoteñpa' motetnomĩ eñotatyesnomue' pueyochresha' ñeñt atet anaret ñocop, ñapa' muerochtateretcha'; o'ch ahuo' Jerusaléño allñapa' allcha' muerochtateret. Añcha' erroñuanen perre' ñeñt pompornesha' pen allohuen judionesha' ñaña ñeñt pa'micha'tareternesha' pen allohuen po'cornaneshar ñaña ñeñt atarr etsotayenayeñ ñoñets ñeñt atet anaret judioneshacop. Allñapa' allcha' muetsatateret tarraña puema'pamtañoña Pomporpa' o'ch alla tantater.

22 Pedroñapa' allenta anem a'yenetpa' allñapa' atet otos:

—Arepa'chña Partseshacha' atteye' perrpeto ama't errponaña. Yomporepa'chña e'ñe pecuanpene'.

23 Ñañaapa' puetallsa a'yenet mame'pa' atet otan Pedro:

—Orraḡ a'yo neshot oneñeñe, ḡapa' e'ñe orrena pepatare'tenen; ḡapa' amaca'ye Yomporeye' atet ḡoctape'chatenaye, ñeñtḡa' acheñarramche' ḡoctaḡña.

24 Allempoña Jesúsapa' atet otan pueyochresha':

—Ñerra'm esesha' muenene' o'ch coterrnet na e'ñe po'ñoçh attoch neyochresha' neperranet, añ ḡoctetsa sehuanmuetepa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch allcha' muerochtet ñamet. Attochña coterrnet e'ñe po'ñoçh.

25 Tarro'mar ñerra'm esesha' e'ñe aña muenenet o'ch correna atomat attoch e'ñe coshenet arr patsro, ñetñapa' çhach a'chencatenet e'ñe ñañañeta. Tarraña ñerra'm esesha' e'ñe ḡocte' entene' o'ch es sohuanerret e'ñe ḡocreñohuenet nocop, ñeñtña acheñerpa' ñañaapa' corretsach ḡocsheñeshocmañen e'ñe tayoteñ errponañohuen.

26 Ama't errponenaḡaren esocmañen es yeyoratse'tyes ora allpon ñeñt yentyen aña patsro, tarraña ñerra'm ñeñtach e'ñe ya'chencaterre' yecamquëñohuen, ñeñtñaapa' ama't coñe'tapa' amach es sherberrye. Tarro'mar ama eñalle ḡo'ḡoñ ñeñt atarr sherbets, aña atarr nanac sherbets ñeñtcha' a'quesḡaterre' yecamquëñ. Tarro'mar yocoppa' ama es eñalle ñeñtcha' yepomuerr alloch alla yerañterra yecamquëñ.

27 Po'ñoçh napa' Ñeñten Acheñetosets o'ch nohuerra epan ñaña nemllañoñeñaneshar. E'ñech Nompore ḡo'cohuenñot nohuerra. Allempoçña netsa'terranet e'ñe puesheña'ttsocmuert erroñente' ḡa'yese't.

28 Po'ñoçhca' te'pa' o'ch notas, patanta'ttsos ñeñtes arro'tsa'yenes ama't ama serromhuena'pa' o' senterrñañ Yompore ḡo'cohuenña atto napa' Ñeñten Acheñetosetspa' atarrcha' na'yochreshatterra.

17

Allempo Jesúsapa' po'poñetañpsana pueyochresha'
(Mr. 9.2-13; Lc. 9.28-36)

¹ Allempo pechapmaterrerr; Jesúsñapa' ahuanerranerr pueyochresha'; añ anem Pedro ñaña Jacobo ñaña Juan ñeññ Jacobo pa'mo'nasheñ. Ñetpa' arr anmanet atarr aspen̄to e'ñe ñap̄tochayet.

² Allña Jesúsapa' machayōtepa'tcha' po'poñetañpsosanet. Pa'cloyotpa' čha pop̄tosa e'ñe atet ñerra'mrrate' atsrret̄ pop̄tetsa. E'ñe pa'shtamohuen atarr huallama'to pop̄tosa čha a'puetaresue a'yohuen.

³ Allñapa' machayōtepa'tcha' orrtanet Moisés ñaña Elías. Ñetñapa' alla serrpare'toset epuet Jesús.

⁴ Pedroña eñoratsapa' atet otan Jesús:

—Atarruaca'ye Partseshacha', cohueno'tseneyte' arr. Ama't pocte' penteñe napa' o'ch nātomatonas ma'ppahua querp̄chet —puepahuarra' p̄ocopcha', po'ppahueñpa' Moisésocopcha', po'ppahueñpa' Elíasocopcha'.

⁵ Allempo eñorena Pedropa' čha orrtosahuet os ñeññ atarr cohuen pop̄tetsa čhepa'tcha' a'pomañpsosanet. Čha e'morrtostsa ñoñets osōt; ñeññña ñoñetspa' Yompor otosahuet; ñeññpa' atet ot:

—Añmapa' ñeññ no Nechemer ñeññ atarr nemuerena ñeññña atarr nocshatene', ñeññcha'ña e'ñe cohuen se'mñnoterr.

⁶ Allempo atet e'muet ñoñets pueyochresha'ñapa' alla rrema'rrtet patso atarr nanac yoren̄et.

⁷ Jesúsñapa' allen̄ta ponerranetpa' a'p̄lla'huerranet, atet otanet:

—Setanterra, amach čha seyorenatsto.

⁸ Allempoña o' cohuerretpa' arepa'tcha' eseshaye' enterreto, ñap̄ta enteret Jesús.

⁹ Allempo onačerret aspen̄tōt Jesúsñapa' atet otnerranet:

—Te'pa' amach esesha' sotāpsa'tatsto ama't e'ñe puesheñarra ñeññ atet o' sentua. Tarrem̄pohuach allempoch netanterra rrom̄ot na Ñeññen Acheñ̄etosets, allempochña seserrpare'taterña allohuen acheñ̄enesha'.

¹⁰ Pueyochresha'ñapa' atet otnerr̄et:

—¿Eso'mare'tña otenña ñeññ atarr etsotene' ñoñets ñeññ atet anarēt, Elíaso'ch ñanom huer̄rtsa?

¹¹ Ñañañapa' atet otnerraneterr:

—Elías po'ñočhpa' ñachca'yeña huer̄rtsa, ñapa' e'ñechca'ye a'cohuentatuer ora allohuen.

¹² Tarraña napa' o'ch notas: Elíasapa' o'ca'ye huaphuerrañ arr tarraña amaca'ye eseshaye' cheme'tapuerraye ñeññapa'

čhaña erroťuanen řpaperet ñeñť atet muena'yenet ñet. E'ñech attecma perrnet nańa Ñeñten Acheñetosets.

¹³ Allempońapa' o' čhapanet pueyočhreto ñeñť otenanetpa' añepa'tca'ye Juanañ ñeñť apataye't acheñenesha' Yomporecop ñeñťepa'tca'yeńa Elíasoterrets.

Atto Jesúsapa' a'crraterran cheshachor ñeñť otetsa

(Mr. 9.14-29; Lc. 9.37-43)

¹⁴ Cherreterr all shontena acheñenesha' puesheñarrńa yacmapa' ponmapuerrana Jesús concorposńańa.

¹⁵ Atet otos:

—Pemueraye'chosnana, Ayochreshate, nacñe'ter čha otena, nanac mueročhtena. Epaye' coya'nmame'tateń tso, erroťenopa' o'ch coya'nmame'tach ñańa ońo.

¹⁶ Nanomhue peyochresheshopa' ñetńapa' ama erroťeye' peto attoch a'crrateret.

¹⁷ Jesúsńapa' atet ot:

—Sa ñeñtes acheñres ama't mamesha'pa' ama ayemtenaye' sentpenno; čhach po'poń sentuena seyočhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' atťotpa' o'ch same'ñerrna.

Allempońapa' atet otanet:

—Ama'tpa' sanmonca'ye chesha' arr.

¹⁸ Jesúsńapa' atet otapan oneñeť ñeñť otatene':

—Te'pa' po'ńočh o'ch notapř, pequečhpuer cheshachor.

Oneñeťńapa' allentepa'tcha' quečhpa'ner. Cheshachorńapa' allorocma correrra.

¹⁹ Allempońapa' poneńya pueyochresha', e'ńe ñapťochayetpa' atet otoset:

—Yańapa' ¿eso'mare'tńa ama eshcaye' yequečhpaterena oneñeť atto otatenan cheshachor?

²⁰ Ñańapa' atet otanet:

—Tarro'marca'ye amaca' e'ńeye' seyemtenno ñeñť atet notenes. Napa' o'ch notas, ñerra'm po'ńočh e'ńe na seyemtenañ napa' e'ńeca'ye na'pocťatenńa neńoń ñeñť atet notenes. Ama'tcha' allponatollota seyemtenna ñerra'mrrate' mostazllometoll sańapa' ama't erra'tsena senamuennonń ama't ñeñť atarr echarr sentenpa' nańapa' atetcha' nepennaseñ. O'ch netma'ntatasa atet ñerra'm o'ch sot: “Ań aspenetpa' rrote'tepa' a'yenet”, aspenetńapa' atetcha'čho'ńa pennasañ ñeñť e'ńe atet soteń. Ama't mameshapa' amach eńalleńa ñeñť torrapo' senten ñerra'm e'ńe po'ńočh na seyemtena.

²¹ Nehua, ñeñť atet oneñeťpa' amach erroťenoť yequečhpatacheńa acheń e'ńe atta. Chochńa yema'yochena ñańa yema'yochreńoť ama't yerrarpa' o'ch yequečhpue'mame'. Atťotcha'ńa yequečhpaterena oneñeť ñeñť atet.

*Jesús*pa' eñotateraneterr puepocheño ñapa' čhocmach muetseret

(Mr. 9.30-32; Lc. 9.43-45)

²² Allempo chopeñe'chyenet parro all Galileo'mar, Jesúsña allpa' eñotatan pueyochresha', ñeñtpa' atet otnomanet:

—Na Ñeñten Acheñetosetspa' pomuerrnetcha' attochña errotuanencha' perrnet.

²³ Atteñapa' o'ch muetsataterret tarraña poma'pamtañoñapa' o'ch alla netanterra. Ñetñapa' ñeñta atarr nanac lleca'rrtatesahuet.

*Atto Jesús*pa' tsa'ta impuesto añecop Parets pa'paclecop

²⁴ Allempoña Jesús epuet pueyochreshačhnopa' o' alla čhačerretter Capernaumo. Allñapa' huapanet ñeñt tsa'tatenaya acheñenesha' quelle ñeñt impuesto; ñeñtpa' Parets pa'paclecop. Ñetpa' atet otoset Pedro:

—Semaestropa' ¿ama't pomuenana'ña quelle impuesto añecop Parets pa'paclecop?

²⁵ Pedroña atet otanet:

—Chocmach tsa'ta.

Allempo čhap pocollopa' Pedroña' ama otenana'ña Jesús, ñañapa' ñanmacma otapan Pedro:

—¿Erročena't, Simóna, penteñña pa? Ñeñt añcha'taretečno ñeñt añe patsro'tsa'yen, ¿eseshatña cobrenetña quelle ñeñt impuestocop, ñato' añate' cobrenet ñeñt e'ñe ñet pamo'tsna'tarecmuet amapa' añte' cobrenet ñeñt ello'marnesha'?

²⁶ Pedroña atet otan Jesús:

—Añca'ye cobrenet ñeñt ello'marnesha'.

Jesúsña' atet och:

—Ñeñtepñapa' ñeñt e'ñe pamo'tsna'tarecmuetpa' ama'trra ñeñteye' cobreneto.

²⁷ Ama't poctēñ amach netsa'tatsto tarro'mar napa' ñeñten Puechemeren ñeñt pa'paquell pene' ñeñtecop tsa'tenet, tarraña attoch ama ya'tsre'matanetopa' e'ñeca'ye poctē' o'ch netsa'ta. O'ch ahuep oño o'ch pego'tena' all. Erra'tsencha' ñanom pechta' pegoroč ñeñtñapa' o'ch pečhete. Puenamopa' allcha'ca'ye pent puetallarr quelle. Ñeñtña quellepa' o'ch paner ñeñtñapa' alloch petsa'tanet nocop ama't ñañma pōcop.

18

All eñotateney ñeñt acheñer e'ñe po'ñočh atarr asherben enteñ Yompor

(Mr. 9.33-37; Lc. 9.46-48)

¹ Allempoña Jesús pa' a'p̄to'teña' pueyochresha', ñeñtpa' atet ochet:

—Ñeñtey allponey ñeñtcha' e'ñe pueyochresha' perr Yompor ñeñt pue'ntañotsen, yapa' añ yemnen te'pa' o'ch p̄otey, ¿erra'tsenoteyte'ñaca'yeña ñeñtey atarr sherbets ñeñtey atarr am̄cha'taretoyen entyenyet?

² Jesús ñapa' cheshatolla chore'tpa' tomach e'ñe allo'tsa'yenet.

³ Allempoñapa' atet otanet:

—Po'ñoçh napa' o'ch notas: Ñerra'm ama cho sequeçhpa'huerro sommo'cheña attoch o'ch atet sepena cohuen ñerra'mrrate' añ cheshatoll ñeñt ama eñotenana' o'ch ommo'chena, sañapa' amate' errotenoñ es so'paterroña atto atarr ayochresha'ttena Yompor pue'ntañof.

⁴ Ñeñt allpon ñeñtcha' e'ñe pueyochresha' perr Yompor ñeñtña acheñer atto o'huañ cohuen enta ñañeña ñeñtpa' o' e'ñe atet perra ñerra'm cheshatoll ñeñt ama eñotenana' pommo'cheña. Ñeñtñaapa' atarr nanac asherben enteñ Yompor.

⁵ Erra'tsenotes sa ñerra'm e'ñe same'ñeñoñen na e'ñe cohuen saguëñ ama't ñeñt ama asherbenaye' entyenetoto atet ñerra'm añ cheshatoll, na'naña e'ñe cohuen saguën.

Atto çhocmach huaponaya ñeñtcha' yetpatyene' o'ch atet p̄atyesey ñeñt ama pocteye' enteno Yompor

(Mr. 9.42-48; Lc. 17.1-2)

⁶ Ama't erra'tsena ñeñt ama pommo'cheñoñtey' ame'ñenno atet ñerra'm cheshatoll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet p̄atach ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet p̄atenana' po'psheñeñ, e'ñech allorocma o'ch çharachetañ mapue' añecmuen pa'çhnoço allpon ñerra'm puetse'tamets o'ch huapore'chet oño epo allcha' ño'shach mapue'.

⁷ Atarr llequëñets acheñeneshacop arr patsro ñerra'm esempo esesha'pa' o'ch atet p̄atyenanet ñeñt ama pocteye' enteno Yompor. Tarro'mar çhocmach huaponaya ñeñtcha' yetpatyene' o'ch atet p̄atey ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet p̄atyenanet ñamet ñeñt ama't mameshapa' ama pocteye' enteno Yompor.

8-9 'Ñaña o'ch noterrser: Ñerra'm sechets p̄atyenes ñeñt̄ ama pocteye' enteno Yompor atet ñerra'm sot, setac, seclle', añ poctetsa o'ch sequechpuerr ñeñt̄ chocma atet p̄atse'tatyenes sechets. Ñeñt̄pa' e'ñe atet ñerra'mrrate' e'ñe allorocma o' sepecherr sot, setac, o' serroterr seclle', o'ch sehuapore'ter. Añ cohuen socop ama't e'ñe sepo'yota'teñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt̄ ama ahuañaño ama't errponaña. Ñaña añ cohuen socop ama't e'ñe setcotpa' sepshem̄tatquēñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt̄ ama ahuañaño ama't errponaña. Ñaña añ cohuen socop ama't seclloyot sepshem̄tacllo'yeñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

Acheñ ñeñt̄ ama ame'ñetsopa' arrpa' all atma'ntatarettet atet ñerra'm carrnero ñeñt̄ chenquētsa
(Lc. 15.3-7)

10 Jesús pa' alla oterranerr pueyochresha':

—E'ñech señoťa, añepa'chña atarr asherben senten ñeñt̄ ama ommo'chetso ñeñt̄ atet petsa ñerra'm cheshatoll ñeñt̄ña pa' e'ñech pueñmañesha' yemtena. Tarro'marña te'pa' o'ch notas, ñeñt̄ ama pommo'cheñoťeye' name'ñenayo ñocpuetpa' eñalletca'yeña po'millañoťeñer ñeñt̄cha' cohuañpenahuet. Ñeñt̄ña po'millañoťeñretpa' chocma Yomporesho'tsenet allña e'ñe cohuen e'mñnotenatñña Yompor pue'ntaño.

11 Po'ñoch na Ñeñten Acheñetosets añecopña nohuapa attoch na'queshp̄atyesos acheñenesha' ñeñt̄ chenquētsa.

12 'Ñehua, ¿ama't atet senteñeña? Ama't erra'tsen acheñer ñeñt̄ echene' shonte' po'carrneror, charroch charra' echen tarraña ñerra'm puemocarrña machayota a'chencachpa' pamo'mte'ñapa' o'ch sa'nman allohuen po'potantañ ñeñt̄ o' noventa nuebaña all aspento o'ch ahuo' e'nerraya' puemocarr ñeñt̄ chenquētsa. Allcha' e'name'tyera'pa' attoťach enter.

13 Ñerra'm ña o'ch enterpa' ñeñt̄cha'ña atarr coshaterre'. Elloch metanan atto coshenana po'potantañ noventa nueve po'carrneror ñeñt̄ ama paya'tetso.

14 Atetca'ye penaña ñaña Sompor ñeñt pue'ntaño'tsen; ñapa'cho'ña amaca' mueno o'ch chenca ama't puesheñarrofolla acheñ.

*Attoch e'ñe cohuen yamo'tstera yemo'nasheñ
(Lc. 17.3)*

15 Jesúsñapa' alla otterranelerr; ñeñtapa' atet otanet:

—Ñerra'm erroten ñonas semo'nasheñpa' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm cho e'mñoterrespa' allempoñapa' o'ch amo'tsof senterra.

16 Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñtcha' sa'pocatatapreterre'. Atetcha' sepa allochñapa' ñeñtcha' eñosets epsheña amapa' ma'psheño'marescha' eñosets allempopa' e'ñech po'ñoch same'ña ñeñt ñoñets tarro'mar e'ñech attecma otenet.

17 Ñerra'mña atetña o' sephuerña' amach e'mñoterrropa' allempoñapa' o'ch soch allohuenet ñeñt chocma apchetsa pame'ñeñoñ Yompor. Cotape'chateretepa' ñamet. Ñerra'm o'ch cotape'chatuet allohuenetña', ama't ñetña amach e'mñoterranetopa' sañapa' e'ñech atta senter ñerra'm po'poñ acheñer ñeñt ama semo'nasheñeyaye. E'ñech atet senteñ ñeñt acheñer ñeñt ama ame'ñetso, atet ñerra'mrrate' ñeñt puehquëñoñe'na cobra'yene' acheñenesha' quelle ñeñt gobiernocop.

18 'Ñehua, te' po'ñochpa' o'ch alla noterrser: Ñerra'm errotench'a' e'ñe pocte' sent ñeñtcha' sena'yes arr patsro, Yomporpa'cho'ña ñeñt ento'tsen e'ñech attecma e'ñech pocte' enterranet. Ñaña ñeñtcha' ama pocteye' senteno ñeñtcha' sena'yes arr patsro, Yomporpa'cho'ña ñeñt ento'tsen e'ñech attecma amach pocteye' enterraneto.

19 'Ñaña o'ch alla noterrser: Po'ñoch ñerra'm epsheñas arr patsro o'ch e'ñe sa'poctatue epsheño'mares ñeñtcha' senamuennan Nompor ñeñt pue'ntaño'tsen ñapa' ama't erra'tsena senamueñ chocmach e'ñe atet pennas.

20 Tarro'mar ñerra'm erro'tsen ama't e'ñe epsheña amapa' ma'psheña ñeñt apchetsa e'ñe pame'ñeñoñetan na, ñaña allpa' allo'tsenench'a' e'ñe ñesheto.

21 Allempoña Pedropa' a'p'to'tenana' Jesús, ñeñtapa' atet otos:
—Partseshacha', ñerra'm chocma epaye' erroñ penen namo'ts, ta'm ¿errponoche'tcha'ña neñretne' ñato' e'ñech cançhrocha neñretne'?

22 Jesúsñapa' atet och:

—Napa' ama notenpe e'ñech cançhrocha peñretne', añña noteneñ atonochcha' peñretne' —ama't cançhrochcha'

čharra', ñaña po'poñ cančherr, allponochcha' sepretne'ña samo'ts.

Atto Jesús pa' eñotatanet ñerra'm amach e'ñe cohuen yepretnannenopa' Yomporpa'cho'ña amach peretnerrye yaña

²³ Jesús pa' atet otarraneterr:

—Ñeñto'marña Yompor po'cohuenña ñeñt atto ayochreshattena ña pue'ntañot ñeñtpa' atet ñerra'mrrate' puesheñarr añcha'taret. Ñeñtña pa' añcha' muenen o'ch a'pocatyesan atto teba'yeñ allohuen pa'taruasañrečno.

²⁴ Allempoña all e'ñe a'pocatyesanetpa' allña pa' huapatoñet puesheñarr pa'cheñer ñeñt tebene' patoner quelle ñeñt allpon tebenpa' ñeñt oteñet shonte' millones.

²⁵ Ñaña pa' ama echenano allpon quelle alloch tsa'terra ñeñt allpon teben. Po'patronarña pa' atet otanet: “Te'pa' o'ch sepomuer epuet puetapor epuet ñaña puechemerasha' ñaña o'ch sepomhuerrñañ errponte' echyen allochña pa' ama't allapa' o'ch tsa'terrna atto tebenen.”

²⁶ Allempoña pa' allenta concorpana'cha pa'taruasañer ñeñt tebene', ñeñtpa' atet otare'ch: “Amach nompocha' pema'yore'tatsetno, netsa'tuerrpach acoña.”

²⁷ Po'patronarña pa' alla morrentera allenta a'rroyer allem-pocma e'sshohuerrñañ all quellquëññañet ñeñt allpon teben.

²⁸ Ñeñtña pa'taruasañerpa' o' cha'nerr entuerran po'psheñeñ ñeñt parro ataruasatarettenet ñeñt tebene' ñaña, ñeñtpa' e'ñe coñe'ta quelle. Ñaña pa' cha rrema'huerre'pa' allenta mueñoche' atet otuer: “Petsa'terrnañaca'ye ñeñt allpon petebenen.”

²⁹ A'rroyerpa' ñaña pa' allenta concorpana'tana ñaña ñeñt o' mueñocho'tue. Allña pa' atet och: “Amach pema'yore'tatsetno, netsa'terrpach acoña allpon ñeñt netebeneñ.”

³⁰ Ñaña pa' ama't mameshapa' ama pocteye' eñche, ñeñtpa' anemñ allcha' yottamñsach. Allña pa' allach esempohuach e'ñe tsa'tuerra ñeñt allpon teben.

³¹ Añña po'potantañečnoña ñeñt parro ataruasatarettenetpa' ñetña pa' ama't mameshapa' ama pocteye' eñcheto ñeñt atet pa' ñeñt e'ñe atta e'sshohuaretterrtsa ñeñt allpon tebane't po'patronar. Allempoña ñetpa' allenta ahuanmuet po'patronaresho. Allña pa' a'metamñperet.

³² Allempoña pa' o' alla agotater po'patronar. O' cherr po'patronareshopa' atet otapuer: “Pa na'taruasañre, ama't mamesha ama cohueneshayaype. Paña pa' atta potare'ten napa' ahuo'ch nepretnerreñ ñaña pa' e'ñe atta ne'sshohuerrnañ ñeñt allpon petebenen.

33 Ama't e'ñe pocten ðapa'cho'ña o'ch pemueryañ ñeñt' parro petaruasen. Ate't nepena na e'ñe cohuen nemuer-errpa."

34 Allempoña po'patronarpa' e'ñe patsrre'mueñesha' pomuer, o' apuer ñeñt'cha' coñchate' esempohuañen allcha'ña e'ñe tsa'tuerrana ñeñt' allpon teben.

35 'Sapa'cho'ña e'ñe puesheña'ttsosña ñerra'm amach sepretnere samo'tspa' e'ñech attecma perres samña Nompore ñeñt' pue'ntaño'tsen. Chocmuepa'ch e'ñe cohuen sepretnannenaña sa e'ñe seyo'chrocmañen.

19

*Atto Jesúsapa' ye'chatosanet ama asanna'tpahuoyaye
(Mr. 10.1-12; Lc. 16.18)*

1 Serrpare'tuanerr Jesúsapa' err Galileo't. Arr çherr Judeo, ñeñt'ña Judeapa' e'ñe alla Jordanaso yom'ta'n.

2 Co'ta'huanererr shonte' acheñenesha' allña'pa' a'crratyessuerraneterr allohuenet patsnañe'teret.

3 Allña'pa' o' alla hua'çherrñañerr ñaña fariseonesha'. Ñetpa' añ muenenet e'ñe pue'shquëño'tetpa' o'ch eñorachet ñeñt' ama cohuenayaye. Attoña ñetpa' atet otoset:

—Ta'm ¿pocte'te' o'ch yeser yetapor ñerra'm esempo er-rotenot?

4 Jesúsapa' atet otapanet:

—Ama't selleyareña atet oten Yompor po'ñoñ ñeñt' aque'llcare't ahuatoteñ. Ñehua, allpa' atet oten, Yomporpa' e'ñe ahuatoten allempoteñ es ye'chcatyes allempo ye'chcatan ñaña asheñorr, ye'chcatan ñaña peno.

5 Allempo Yomporpa' atet ot: “Ñeñto'marña yacmapa' ñerra'm esempo'ch sena'ta, coyanesha'pa' o'ch echan puer-rollar, añ pocte' o'huañcha' tama yemteñet pamo'mte' allochña'pa' yacmapa' attochña e'ñe parrocmat epuet puetapor. Attoña epsheño'maretpa' e'ñech patrra po'chets penet.”

6 Attotcha'ña o'huañcha' puesheña'tetstet, allochña'pa' o'ch e'ñe puesheñarratet. Ñeñt' atto Parets e'ñe patrratatan yacma epuet puetapor amach çha ellopa' alla sannerreto.

7 Ñetña'pa' atet otereterr:

—Ñerra'm po'ño'ch atetpa' ¿eso'mare'tña nanña Moisés ñoñets all oteney o'ch ya'p yetapor papell aque'llcare't attoch yesannerra, allempoña'pa' e'ñech pocte' o'ch yeser?

8 Ñaña'pa' atet oterraneterr:

—Sapa' ama es sechenoyo seyočhro ñeñto'marca'yeña Moiséspa' muenatas o'ch sese' setapor. Ama't atet muenataseñpa' tarraña Yompor e'ñe ahuatoteñpa' amaca'yeña atteye' oteno.

⁹ Na te'pa' o'ch notas: Ñerra'm esesha' serre' puetapor, puetaporñapa' ñerra'm ama cho aguënano po'psheñeñ yacma, ñeñt e'ñe atta serre' puetapor, ñaña'pa' chach ochña'tamperrana puetaporeshe'mañ ñerra'm o'ch alla yorerranerr po'poñ coyanesha'. Ñeñtpa' ama pocteye' enteñe Yompor. Ñaña ñeñtcha' yorerre' coyanesha' asaret, ñeñtña yacmarpa' chach chetapreten taporets. Ñeñtpa'cho'ña ama pocteye' enteñe Yompor.

¹⁰ Pueyochresha'ñapa' atet ochet:

—Ñerra'm amate' asapahuo yetapor ama't ahuatapa' amate' tama pocteyayeña yocop o'ch yeyore coyanesha' ñeñtcha' yetapor ye'pa'.

¹¹ Ñaña'pa' atet otanet:

—Tarraña atetpa'cho'ña e'ñeca'ye poctet tarraña ama allohuenacmaye' chennasoña seyočhro atet tarro'mar ama allohuenacmaye' seyčhenona atet. Ñeñtpa' aña eñotene' ñeñt atet cotape'chaten Yompor.

¹² Nehua, atet ñerra'm puesheña'tets yacma ñeñt atta eñalletenet e'ñech atta yečquënet po'chets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' choch acaparettenet ñeñto'marña amach mueneñeto coyanesha'. Ellonetpa'cho'ña eñall ñaña po'potantañ yacmanesha', ñetñapa' añecpach ama mueneñeto coyanesha' esheccha' e'ñech aña ma'yočhrenet Yomporecop attoch atarr ayochreshattena ña pue'ntañot. Ñeñt atet cotape'chenet Yomporecop ñeñtpa' e'ñe pocte'. Attepa'chña pet ñerra'm Yompor cotape'chatenahuet atet.

Atto Jesús'pa' bensare'tam'psapan cheshanesha' ñeñt huapatoñet

(Mr. 10.13-16; Lc. 18.15-17)

¹³ Allempoñapa' huacha'tachet ñaña shonte' cheshatollesha' Jesúsesho. Ñetpa' añecopña huacha'tachet o'ch a'p'lla'yesapanet Jesús attoch bensare'tam'psapanet. Jesúsña pueyochresha' allempo entapan ñeñt huacha'tate' cheshaneshachno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama annatarettapueto.

¹⁴ Tarraña Jesúsñapa' atet otanet:

—Pocte'ña'cho' semnachñaca'yeña cheshanesha' onosetepa' e'ñe nesho. Amachca'ye cha sepatare'tatstapaneto tarro'mar

allohuen ñeñt atarr neyemtenaya na e'ñe attet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañot.

¹⁵ Allempoña Jesús^{pa'} a'plla'yeshapan cheshaneshá' allohuenet e'ñe pueheña'ttset. Allempoña^{pa'} ahuerr allot.

Atto pueheñarr ñeñt huepueshameñ ñeñt atarr ec'llayoret ñaña^{pa'} eñorana'tosana Jesús
(Mr. 10.17-31; Lc. 18.18-30)

¹⁶ Allempoña^{pa'} huapa pueheñarr yacma Jesúsesho, ñeñt^{pa'} ora huepueshameñ. Ñaña^{pa'} atet otos:

—Maestro, p^{pa'} atarr cohuen acheñreþ, te'pa' o'ch p^{otapuen} ¿erroteña'tcha'ña nepaña na e'ñe cohuen attochña napa' corretsanach e'ñe tayoteñ ama't errponañohuen?

¹⁷ Jesúsñapa' atet otap:

—Eso'mare't p^{otenenña} napa' atarro' cohuen acheñren. Arr arromñaatenesha' ama't e'ñe pueheñarrapa' ama eñalleña ñeñt e'ñe cohuen acheñer. Ñaptaña Yompor ñeñt e'ñe po'ñoçh cohuen. Ñerra'm añte' pemnen attoch p^{apa'} corretsaþach e'ñe tayoteñ ama't errponañohuen añ poctetsa p^{ocop} o'ch e'ñe peþohuon ñeñt atet oten Yompor.

¹⁸ Huepuesha'ñapa' alla a'p^{to}tererr:

—¿Erra'tsen^{te'ña} ñoñets ñeñtcha' atet nepohua?

Jesúsñapa' atet otererr:

—Ñeñt^{pa'} añca'ye, amach pemtsatsto acheñ, amach pechtapretatsto taporets, amach petyesatsto, amach petoma'tamþsatsche p^{amo'ts} e'ñe atfa.

¹⁹ Ñaña e'ñe pemorrenteñoþpa' pemcha'na'chcha' p^{ompor} ñaña p^{achor}. Ñaña añcha' atarr cohuen pemorrenta p^{amo'ts} e'ñe atet atarr pemorrentena e'ñe pañeña.

²⁰ Huepuesha'ñapa' alla oterranerr Jesús:

—E'ñe cheshoteñ ora añechnopa' napa' e'ñeca'ye netsotueñ. Ta'm ¿erra'tsenmeñte'ña ñeñt nepalltena?

²¹ Jesúsñapa' atet otererr:

—Ñerra'm añ pemnen o'ch e'ñe petsotua ñeñt pepalltenmeñ te'pa' añcha'ña atet peperra, o'ch ahuerreþpa' o'ch pepomhuerr ora allpon ñeñt pechyen o'ch p^{apa'yera'} huochañeshachno ñeñt atarr es pallta'yetsa, attochña p^{apa'} pecherrcha' ñeñt atarr nanac sherbets Yompor pue'ntañot. Allempochña pehuerrapa' o'ch p^{oc}terren attoch e'ñe neyochresha' neperreþ e'ñe poctacma.

²² O'ña e'mhuan huepuesha' ñeñt atet och Jesús^{pa'} ñaña^{pa'} puellquëshesha' ahuerr tarro'mar ñapa' shonte' esocmañen echyen.

²³ Jesúsñapa' atet otan pueyochresha':

—Po'ñoçh napa' o'ch notas: Ñeñt atarr eçllayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña pue'ntañõ.

²⁴ Ñeñtpa' atetcha' netma'ntacha. Yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añetollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁵ Pueyochresha'ña allempo e'met Jesús atet oten, ñetñapa' çha muene' lleca'rrtetpa' atet otanna'tyenet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁶ Allempoña Jesúsapa' atta cohua'yesanetpa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁷ Allempoña Pedropa' atet och:

—Partseshacha', po'ñoçh yapa' o' e'ñe yesuanom ora allohuen attoch e'ñe yocterreþ. Yapa' ¿eso'tcha'ña apuerreyña Yompor?

²⁸ Jesúsapa' atet otanet:

—Po'ñoçh notenes, allempoch etserraterr pats allempoch nanorruerr neconañõ allcha' necohuenetuerra nepartsoteñoñ na Ñeñten Acheñetosets sapa'çho'ña allcha' sanorriesuerr seconañeçhno e'ñe puesheña'ttsos çharra' puechena epa seconañ ñeñtes noctene'. Sa ñeñtes noctene' allcha' sanorriesos allotcha'ña sa'mcha'taretterraña añecop ñeñt çharra' puechena epa Israel po'mrenñenesha'.

²⁹ Jesúsapa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' poçhanesha' ñato' pompor, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñtcha' sehuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharrochcha' çharra' alla agapyerret. Elloña tsapaonetpa' o'ch aguërret ñeñt alloch ñetpa' corretsetach beñecpuen pocsheñeshocmañen.

* **19:24** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

³⁰ Te'pa' señoche'pa'ch, eñall shonte' acheñ ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesús'pa' toma'ntaterraneterr e'ñech allponeshacma atsa'taretta allohuen ataruasañe'chno pamtarr yet

¹ 'Yompor po'cohuenña ñeñt atto ayochreshattena ña pue'ntañot, ñeñt'pa' añ toma'ntena ñeñt atet pena puesheñarr ane'tañ. Ñaña'pa' ahuatecma ahua'muen e'nyenaya' acheñ ñeñt'cha' taruasat pa'mro o'ch toteññañeta' puenarenñ.

² Ñeñt allpon entospa' atet otosanet: "Ama't semno o'ch setaruasena' na'mro. Pamta'tetspa' netsa'tasach allpon quelle ñeñt paterr denario."* Ñetña'pa' e'ñe pocte' eñchet allenta mueñanet pa'mro, allcha' totoset narmetsmo.

³ O'ña enome'ta'muenpa' o' alla ahuerterr allecma shontena acheñenesha' ñeñt e'nyene' taruas. Allña'pa' entuerranerr tama allpónsheña, ñetpa' ama es otteneto.

⁴ Ñaña'pa' atet otosanet: "Sapa'cho'ña ñerra'm semne'pa' o'ch setaruasa' na'mro; napa' netsa'tasach allpon ñeñt poctetsa." Ñetpa'cho'ña allenta ahuanmuet pa'mro allcha' totoset ñamet narmetsmo.

⁵ Allempo chap poctopa' alla ahuerterr ane'tañ, alla entuerranerr po'potantañ acheñ. Ñetpa'cho'ña attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro allcha' totoset ñamet narmets. O'ña ellerrenmochpa' o' alla ahuerterr; allña'pa' entuerranerr po'potantañ acheñ. Ñetpa'cho'ña e'ñe attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro.

⁶ Atteña o' ellerrenpa' o' alla ahuerterr; allña'pa' entuerranerr po'potantañ acheñ, ñetpa'cho'ña ama es otteneto. Ñetpa'cho'ña atet otuerraneterr: "Sapa' ¿eso'mare'tña atta sellapene't tom'cha'tyesetsña arrma? Amaña es sotteno."

⁷ Ñetña'pa' atet ochet: "Yapa' amaca'yeña eseshaye' yetaruasatenaye ñeñto'marca'ye ama es yotteno." Ñaña'pa' atet otanet: "Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeñt poctetsa."

* **20:2** Denariopa' quelle ñeñt allpon tsa'tenet pamtarr ñeñt taruasets all pa'nyo.

8 O'ña puenaso'tenpa' ane'taññapa' o'tosan ñeñt' cohuañpene' allohuen pa'taruasañer: "Te'pa' o'ch peçhore'ter ataruasañnesha', o'ch petsa'tyesapuerranet e'ñe puesheña'ttsocmuet. Añcha' ñanom petsa'tapuerra ñeñt' taruasosets chenta' alloteñach pãmo'tech tsa'tyesapuerrahuet attotach petsa'tuanet ora allohuenet ama't ñeñt' aromtañohuen."

9 Ñeñt'ña taruasosets ellerronet ñetñapa' o' huachherret. E'ñe allponeshacma atsa'taretetyesapuerret ñeñt' paterr denario.

10 Atteña allempo o' huacherra ñaña ñeñt' taruasosets ahua'tecma, ñetñapa' çha otenapuetañ ñato' atoncha' atsa'tarettapuerret. Tarraña ñetpa'cho'ña e'ñe puesheña'ttsocmuetpa' e'ñe allponeshacma atsa'tarettapuerret ñeñt' paterr denario.

11 Allempo agapetpa' ñetñapa' çha po'poñ entet, çha e'moñe'tueret ane'tañ.

12 Ñeñto'marña atet ochet: "Añenesha' ñeñt' huapatsa chenta'pa' ñetñapa' mamesha taruasoset. E'ñe allponeshacma petsa'tapuerranet ñeñt' e'ñe allpon petsa'tapuerrya yaña. Ama't yapa' o' yellapen ya'ñetse' yetaruas, nanac etay atsrret all yetaruasen. Eso'mare'tña e'ñe allponeshacma petsa'tapuerrya ñeñt' allpon petsa'tapuera ñaña ñeñt' taruasosets mame'."

13 Allempo atet otuer ataruasañ, ane'taññapa' atet och: "Ama, masheñcha', çhoye' neshquënpe, e'ñe allpona netsa'tenpa' ñeñt' allpon ya'pocata'muen aromtaña.

14 Te'pa' pãnerr peçllayor, orrerreþ. Napa' e'ñe pocte' nenteñ na allponcha' netsa'cha' ñeñt' huapatsa chenta' allpon netsa'tasa saña.

15 Sapa' ama't pocteye' senteñe allpon ñeñt' e'ñe nocma napa' e'ñech atet nepe' ñeñt' atet nemnen na. Ñato' tarro'marte' çha muene' se'moñe'tenenña' napa' atarrca'ye amuerañan."

16 Ñeñto'mar te'pa' o'ch noterrser: Ñeñt' ama esoye' senteno sa te' tarraña ñetña allempopa' atarrcha' asherben enterranet Yompor. Ñeñt'ña atarr asherben sentyen te', ñetña allempopa' amach tama asherbenaye' enterraneto Yompor. Ñeñto'mar te'pa' o'ch alla noterrser: Ama't shonteña ñaña ñeñt' ahua'ñareñ ñeñt'cha' neyochresha' neperreñ, tarraña ñetpa' e'ñe puesheña'ttseta ñeñt'cha' e'ñe pocte' nenterr na ñeñt'cha'ña e'ñe neyochresha' neperr pocmacma.

Allempo Jesús'pa' alla eñotaterraneterr ñapa' çhocmach amt-saretterra

(Mr. 10.32-34; Lc. 18.31-34)

17 Jesús pa' ahuenerr Jerusaléñoneñ pueyochreshohuen. O' ahuanenan pueyochresha' a'yenteye' allñapa' atet otnenanet:

18 —Te' po'ñoçh o' ahueney Jerusaléño, allcha' pomataterret na Ñeñten Acheñetosets. Añcha' nerrmaterre' ñeñt pa'mcha'tareternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anareñ. Ñetñapa' atetcha' otyesnet na'mtsaretterrepa'to',

19 o'ch pomuerrnet po'poñ acheñesho ñeñt ama judioneshayaye. Ñetña pueche'tatseteñoçetanpa' allcha'ña achmāre'terrnet, ashterrnetcha', attoçcha'ña o'ch corso'tamperret, tarraña poma'pamtañoçh alla netanterra.

Ñeñt pachor pen Jacobo ñaña Juan, ñañaapa' enamuenan Jesús attoch anorrcha'tyesuerr puechyoresha' Jesúsesho

(Mr. 10.35-45)

20 Allempoñapa' ponmosya ñeñt pachor pen Jacobo ñaña Juan ñeñt Zebedeo puechemeresha'. Huapa epuet epsheño'mar puechoyor, ñañaapa' concorpana'tosana Jesús attoch es enamos.

21 Jesúsñapa' atet otaṽ:

—¿Eso'tña pemnen?

Ñapa' atet otos:

—Napa' añ nemnen te'pa' o'ch pemnatapon añ nechoyor epsheño'mar o'ch anorruerret pesho allcha' ṽa'mcha'tareterra e'ñe pecohuenño. Puesheñarrpa' anorrosepa'ch pecohuenroṽ, po'psheñeñña' anorrosepa'ch pe'chcoṽterroṽ, allcha' cohuentapreterret.

22 Jesúsñapa' atet otanet:

—Sapa' amaca'ye señoṽeñe ñeñt po'ñoçh senamuenen. Añca'yeña senamuenen attoch semueroçhtapreterrna saña. Ta'm ¿e'ñeṽe' po'ñoçh poçte' senteñ o'ch semueroçhterra saña tarro'mar napa' çhocmach na'mueroçhtatareterra?

Ñeñt mueroçhteñetspa' Jesús pa' atet toma'ntatanet ñerra'mrate' atarr pesherr es yorren orrañtso ñaña atto yapatareṽtena e'ñe atet ñerra'mrate' çho ya'mtsareterra Yomporecop. Ñetñapa' atet ochet:

—Yapa'çho'ña atetcha'ca'ye yepe'.

23 Ñañaapa' alla oṽerraneterr:

—Ñehua, po'ñoçhpa' sa'mueroçhtatareterrach saña attescha' ñerra'm na, sa'mtsareterrach saña. Tarraña añña attoch sanorryesos nesho necohuenroṽ ñaña ne'chcoṽterroṽ allcha' secohuentapreterrna ñeñt pa' amachca'ye naye' semnaterraye. Añcha'ña anorryesuerrets all ñeñt e'ñe o'patatenna Nompör.

24 Añña po'potantañ pueyochresha' ñeñt' ċharrasheña allempo e'met ñeñt' atet enamuen Jacobo epuet pa'mo'nasheñ Juan, ñetñapa' ama pocteye' eñcheto ċha muene' e'moñe'chet.

25 Allempoña Jesús pa' alla ċhore'terranet allohuen e'ñe ñesho ñeñt'pa' atet otanet:

—Sapa' señoñe' ñeñt' atet pena po'poñ acheñenesha' ñeñt' ama judioneshayaye. Ñet ñeñt' pa'mċha'tareter penet e'ñech pa'mċha'noċhteñocmañen pomnaren pa'yenan allohuen pueyochreshaċhno.

26 Sapa' arepa'ċhña atteye' sepanna'tatsto e'ñe sommo'cheñoñ. Socoppa' añña poctetsa o'ch atet sepena. Ñerra'm erra'tsenotes ñeñtes atarr añcha'taretuyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt' atet pena ñeñt' atta atarr taruaset po'potantañecop.

27 Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrena po'potantañecop atet ñerra'mrate' acheñ ñeñt' atarr taruaset e'ñe atta.

28 Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrate' napa' atarr añcha'taret sentenen. Napa' añecopña nehuapa allochñapa' nachña sesherbose'ña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet

(Mr. 10.46-52; Lc. 18.35-43)

29 Allotñapa' alla meterreterr Jericótpa' co'ta'huanererr shonte' acheñenesha'.

30 Allcha' oñmuetpa' allñapa' ahuepa't anorros epsheña aporo'yet e'ñe toñetoþño. Ñetña eñotatarettet añ huetsa Jesús. Ñeñtña aporo'yetpa' allenta rranare'tapet Jesús, ñeñt'pa' atet otapet:

—Pemueraye'chnomya, Ayochreshate, þapa' ñeñteþ Davidna'tareþ.

31 Acheñenesha'ñapa' ċha muene' che'ptare'tnometña aporo'yet, atet otoset:

—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, þapa' ñeñteþ Davidna'tareþ.

32 Jesúsñapa' alla tomos o' ċhore'tanetpa' atet otanet:

—¿Eso'tña semnen ñeñtcha' atet neřoses?

³³ Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

³⁴ Jesúsñapa' allenta muerosanet attoña ñapa' a'pñlacle'chosanet. A'pñlacle'chuanetpa' aporo'yetñapa' allorocma enterret e'ñe cohuen. E'ñe cohuerrtsetpa' čha co'a'nmuert ñamet Jesús.

21

Allempo čhap Jesús Jerusaléno

(Mr. 11.1-11; Lc. 19.28-40; Jn. 12.12-19)

¹ Atteñapa' o' čhačha'tet allame'tets Jerusaléno. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé. O'ña čhampochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch sečhap a'yenteye' e'ñe allara anetso. Allñapa' allcha' sentos ashen all huanquëñet epuet ña'ña puechoyor ñeñt rre'ptor. Ñeñtña ashenpa' o'ch sepyamřsospa' o'ch sanerrnan.

³ Ñerra'm esesha' erroř sotapue' sañapa' atetcha' sotosanet: “Yepartsesharca'ye muenene'ña añ ashen. Mameshapa' o'ch alla apuerrsa'.”

⁴ Ñeñtpa' tarro'mar atet pa' allochñapa' attoch etsota añ po'ñoñ ñeñt a'mtaye't ahuat Yompor po'ñoñ. Ñeñtpa' Yompor eñorataye't atet:

⁵ Atetcha' soch sióno'marnesha' ñeñtara jerusaléno'marnesha': “Secue'tach, te'chca'yeña huaponasaña ñeñtcha' Sa'mcha'tareter seperr. Atto huena ñapa' amaca'ye pommo'cheñoŕeye' čhapoña all, ñeñto'marña ama't rre'ptorechora ashenpa' ñeñtachca'ye monta'na.” Arrpa' allohua huañ añ po'ñoñ ñeñt a'mtaye't ahuat Yompor po'ñoñ.

⁶ Allempoña pueyochresha'ña ñeñt mueñapa' ñetñapa' allenta ahuanmuert all anetso. E'ñe atet otapanet Jesús, ñetñapa' e'ñečo' atet řoset.

⁷ Allempoñapa' huapaterrñañet ashen epuet ña'ña puechoyor. Ñetñapa' nohuerret pa'shtam ashnache'ño'pa' montatueret Jesús.

⁸ Shonte' acheñenesha' ñetñapa' to'tma'tyesoñet pa'shtam toño allcha' oñem Jesús. Po'potantañečhnoñapa' tsorrm'o're'tyeset tsach pue'mo'rer allo topanetyeset toñ.

9 Allohuen acheñenesha' ñeñt otachetsa ñaña ñeñt cota'huanene' chenta' ñetñapa' puerrannarteño'tetpa' atet atarr cohuentatyenesneññañetpa' atet otenet:

—¡Acsherrapo'ch allohuene! ¡Aye'chochtaterrapo'ch Jesús ñeñt añcha'taret David po'mreneñ! ¡Aye'chochtaterrapo'ch Jesús ñeñt llesensen Yompor! ¡Ya'ye'chochtaterrñañepa'ch Yompor Parets ñeñt pue'ntaño'tsen!

10 Atteñapa' o' chap Jesús Jerusaléno. Chap allpa' allohuen anetso'marnesha' epaye' cohuanrrortapet. Ñetñapa' atet otyeset:

—¿Esesha'te'ña añ acheñer?

11 Acheñenesha' ñeñt cota'nene'pa' ñetñapa' atet otoset:

—Añca'yeña Jesús ñeñt a'mtene' Yompor po'ñoñ. Ñapa' Galileotca'ye huena allara anetso Nazareto.

Atto Jesús'pa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)

12 Allotña Jesús'pa' be'tosos Parets pa'pacillo. Allñapa' mueño'tuosan allohuen ñeñt pomatsre'tetsa all ñaña allohuen ñeñt rañta'yetsa. E'ñe cha'nma'cha'tatosanet allot, a'coye'tam'psosanet po'mesa'chno allecma cam'yatyenet po'çllayoret, a'coye'tuosan ñaña allecma anorryen ñeñt pomuene' yepe'chno.

13 Allempoñapa' atet otosanet:

—Yompor po'ñoñ ñeñt atet anuaret ahuatoteñ allñapa' atetca'ye oten Yompor: “Añ ñeñt nepaquëll nepenpa' añec'pac'a'yeña sherben allecmach ma'yochennet.” Tarraña sañapa' e'ñe atet sepeññañña Yompor pa'paquëll ñerra'mrrate' eñet ñeñt epotyetsa mapuetpono.

14 Allña Parets pa'pacillo'pa' hua'cha'toña aporo'yete'chno ñaña ñeñt checa'repayets. Ñaña'pa' e'ñe a'crraty'esapanet.

15 Añña ñeñt pa'm'cha'tare'ternesha' pen allohuen judionesha' po'cornaneshar epuet ñaña ñeñt atarr etsotayenayeñ ñoñets ñeñt atet anaret, ñetñapa' entoñet ñeñt atarr co'chnesha' atet orrtatyen Jesús ñeñt ama't eseshapa' ama puentareto. Ñaña e'mueññañet cheshanesha' all Parets pa'pacillo puerranarotetpa' atet otyenet:

—¡Aye'chochtaterrapo'ch Jesús ñeñt añcha'taret David po'mreneñ!

Ñetña atet entetpa' ñeñt'epa'tcha' atarr atsrre'matahuet.

16 Allempoñapa' atet ochet Jesús:

—¿Ama't pe'muenoña atet otachre'tapa' cheshanesha'?

Jesúsñapa' otanet:

—Ne'mueñca'ye. Sañapa' ama't selleyareña Yompor po'ñoñ. All anaret ñoñetspa' ñeñtña atet oten:

Ama't cheshatollesha' e'ñe puenamotet e'ñech cohuen pe'ñoratos ačhotachre'teñtso. Ama't ñeñt ora momuenmeñ pe'morrtatoscha' e'ñe cohuen p̄ocop.

17 O'ña yerpatuerranet añ ñoñets ñeñt atet anaret ahuatoteñ ñocop, allempoña sa'nerranet ñeñte anetsrotpa' o' alla ahuer-rerr Betanio. Allpa' allecma ommuena.

Allempo Jesús'pa' eñora higohecop amach eñalletatsto pue'mer

(Mr. 11.12-14, 20-26)

18 Tsapañ puetaren alla ahua'muenerr Jesús anetso Jerusaléño. Toñoñapa' čha cheporra'nma.

19 Allñapa' entnoman higoch toñetopño'tsen. Ponmosya ama entoñe pue'mer, pasopanrepa'tcha' entosñañ. Jesúsña čhepa'tcha' eñorostsa higohecop, ñeñt'pa' atet otos:

—¡Arepach eñalleterro pue'mer ama't e'ñe ahua'ta!

E'ñe otue'pa' allorocmuepa'tcha' hueya'huaña pasopaner.

20 Pueyochresha'ñapa' e'ñe enteñet o' hueya'huaña higoch-pan. Ñetñapa' atta cohuanrrorteñet, atet otanna'tet:

—Errotenotuañaca'yeña o' a'uyatachña e'ñe mamecmate'.

21 Jesúsña atet otanet:

—Po'ñočha'ye o'ch notas: Ñerra'm seyemteña Yompor, ama čhoye' se'charrtateno seyocher, amach añayaya atet seño atet nepa' higoch. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspen-tecop, “Añ aspenetpa' rrote'tepa'ch arroñ, arrepa'chña esha'tosa sa'po allcha' e'ñe chencosa”, aspenetñapa' atetcha'čo' p̄onasa.

22 Ama't allohuen erra'tsencha' es senamñ Yompor e'ñe sema'yocheñoñ, ñerra'm čo senamueñ e'ñe seyemteñocmañen, ñeñtñapa' sagañcha'.

Atto allsensarettena Jesús

(Mr. 11.27-33; Lc. 20.1-8)

23 Allempoña Jesús'pa' o' alla čherrerr Jerusaléño, allñapa' be'tosuerrerr Parets pa'paclo. Allñapa' yečhatuerranerr acheñenesha'. Atto yečhatenan acheñenesha'pa' allempoña huačha'toña ñaña ñeñt pa'mičha'tareternesha' pen allohuen judionesha' po'cornaneshar epuet puesheña'tets ñeñt pom-pornesha' pen allohuen judionesha'. Ñetñapa' atet otoset:

—Ñehua, yapa' añecop yohuena yemneñ o'ch p̄otey ¿erroñe't apuenpetña llesens? ¿Esesha'tña p̄apueñe'ña llesens attot p̄orrtatyenña ñeñt čhocma attecma pepa'yena?

24 Jesúsña'pa' atet otapanet:

—Ñehua, napa'cho'ña nemneñ o'ch na'p'to'tapas saña ama't patrra ñoñets. Ñerra'm sanaposencha'pa' napa'cho'ña attochña notapas nanña allot apuennetña llesens ñeñto'mar atet nepena.

²⁵ Sapa'cho'ña o'ch sotosen, ahuañmo'cha allempo apate't Juanañ Yomporecop, ñapa' ¿eseshatña llesense' ñato' Yompor amapa' acheñaate' apue'ña llesens? Nemnen o'ch sotosen ñeñt atet soctape'chen sa.

Ñetña'pa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm cha yoch Yomporeshotca'ye apetña llesens, ñapa' chate'ca'ye otey: “Ñehua, sañapa' eso'mare'tña ama se'mñocheña ahuaña allempo serpare'tatosan acheñenesha'.”

²⁶ Elloña ñerra'm cha yoch acheñeshoña apet llesenspa' acheñenesha'ñapa' chate' e'moñe'tyet, tarro'mar ñetpa' e'ñe cohuen eñchete't Juanañ, chocma otyeñet ñapa' ñeñca'yeña a'mtose' Yompor po'ñoñ.

Ñeñto'marña ñetpa' mecha'teñet acheñenesha'.

²⁷ Ñeñto'marña ñetpa' atet ochet Jesús:

—Ta'm yapa' amaca'yeña yeñoñe; errotte' huapaña Juanañ, errotte' apetña ñaña llesens.

Allempoña Jesús'pa' atet oterraneterr:

—Napa'cho'ña te'pa' amach notaso saña allot apareten nanña llesens attot atet ne'pa'yena.

Atto Jesús'pa' toma'ntaterraneterr puesheñarr yacma atet penaña epsheña puechemer

²⁸⁻³² Jesús'ñapa' alla oterranerr judionesha' pa'micha'tareternesha':

—Ahuañmo'cha allempo huapa Juanañ, ñapa' añecop huapa attoch ñach sey'chaterre' allohuen ñeñt e'ñe pocte' enten Yompor. Tarraña sañapa' ama same'ñyo. Aña e'ñe cohuen ame'ñapaya ñeñt atarr ochñañenesha'chno atet ñerra'm añ ñeñt po'taruas pa'yene' e'ñe puehquëñoñet cobra'yeñet acheñenesha'chno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoresha'èchno. Allempo sentanet atto ñetpa' cotape'cherret ello cohuen Yomporecop, sañapa' amaña eseshas cotape'cherrayeña cohuen Yomporecop attoch o'ch same'ñera saña. Ñeñtña te'pa' o'ch netma'ntacha. Ñehua, puesheñarr yacma eñall epsheña puechemer. Ñaña'pa' atet otenana' puesheñarr puechemer: “Te'pa' nechemere, o'ch ahua'muenep' ya'mro allcha' petaruasa'muen.”* Ñaña'pa' ellonta otapan pompor: “Amaca'ye

* 21:28-32 Ñeñt po'taruas penet ñetpa'toteneta' uva.

nemno, amachca'ye neto." Tarraña elloñapa' cotape'cherran cohuen allempoñapa' ahuo' pompor pa'mro taruasats. Allempoña pomporpa' ahuo' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: "Te' nechemere, o'ch ahua'muenep̄ ya'mro allcha' petaruasa'muen p̄aña." Ñañaapa' e'ñe cohuen otapan pompor: "Ñehua, apacha' o'ch ahuen o'ch netaruasa'muen ya'mro." Tarraña ñañaapa' ama't atet otañpa' ama to.

Jesúsñapa' alla oterraneterr:

—Te'pa' o'ch na'p̄to'tas sa, ñeñt̄ epsheña puechemer, ¿erra'tsenat̄ sentenña sa ñeñt̄ e'ñe po'ño'ch atet petsa ñeñt̄ atet muenen pompor?

Judionesha'ña pa'm̄cha'tareternesha'pa' ñetñapa' atet ochet:

—Añca'ye ñeñt̄ ñanom, ñeñt̄ otapue' ñapa' año'ch to taruasats tarraña elloñapa' allenta ahuo' taruasats pa'mro. Ñeñt̄ca'yeña etsotene'ña ñeñt̄ atet muenen pompor.

Jesúsñapa' atet oterraneterr:

—Ñeñto'marña te'pa' o'ch notas: Ñeñt̄ puehquẽño'e'na cobra'yene' acheñenesha'chno ñaña ñeñt̄ atarr ecañoreshate'chno, ñetñapa' po'ño'ch allenta aguërret Yompor po'cohuenña ñeñt̄ atto ayochreshattena ña. Sañapa' amaña allentaye' saguereña sam̄a tarro'mar sapa' chaña atarr se'charrtatenña seyo'cher.

Atet atma'ntatarettena ñeñt̄ ataruasañe'chno ñeñt̄ ama cohuenayaye

(Mr. 12.1-12; Lc. 20.9-19)

³³ Jesúsñapa' alla oterranerr judionesha' pa'm̄cha'tareternesha':

—Te'ñapa' se'm̄ñotencha', napa' o'ch netma'ntatasa po'poñ. Eñall pueheñarr ane'tañ, ñañaapa' nare'tanatatanoman shonte' uvach; pa'muerñapa' e'ñe ora uvachmatatue. E'ñe concha'tampesue allotñapa' eñan ñaña allcha' a'pecho'toñet uvas po'ñer. Allñapa' tomatatanoman torrepo' allotcha' cohuañp̄soñet pa'muer.

"Tomatuepa' na'nman ñeñt̄cha' taruasatats ñeñt̄cha' coyerrahuet allpon ñerra'm esempoch toteñet. O'ña nare'tanatatupepa' o' ahuo' po'poñ anetso ba'chayo.

³⁴ Chap allempo yen uvachllom̄pa' ñañaapa' mueñerran po'psheñe'chno pa'taruasañer ñetcha' enamuerrtseta' uvachllom̄ po'psheñeñ pa'taruasañesho ñeñt̄ cohuañpene' uvachma'.

³⁵ Allempoña chen̄et allpa' enamosan ñeñt̄ allpon o'patena pamo'mte', arepa'tcha'ña es apapuenayeña uvachllom̄, elloña ñeñt̄apa' cha rremapoñet pa'taruasañer, cha nalle'tapueñet

puesheñarr, čha muetsapet po'psheñeñ, po'psheñeñpa'cho'ña čha rrolle'tapoñet.

36 Allempoña ñeñt' pamo'mte' pen uvachma'pa' o' alla mueñerranerr po'psheñeñčno pa'taruasañer shonte'. Allempo čhapuet ñamet allpa' attecma errotuanen a'pare'tapuet ñamet.

37 'Allempoña ñeñt' pamo'mte' penetpa' ñaña'pa' atet ot: "Te'pa' o'ch nemñe all ñeñt' e'ñe na nechemer. Ñato'rraña ñeñt'pa' mecha'na'tapetcha'."

38 Ñeñt'pa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetña'pa' atet otanna'tyeset: "Añmapa' ñeñt'ca'yeña puechemer ñeñt'cha' o'paterraya pompor puenareñ esempo. Ñapa'cho'ña te'pa' o'chca'ye yemtsa'ñ allochña'pa' yachca'yeña e'ñe o'paterrayaña pompor puenareñ. Te'pa' o'ch ahuey o'ch yemtsa'ñ ñaña."

39 Allempoña'pa' o' rromapet o' chetare'tnomet narmetsmo't a'yenet, allña muetsapetña ñaña. Arrpa' allohua atet toma'ntata Jesús e'ñe ñañeña.

40 Allempoña Jesús'pa' atet o'terraneterr:

—Ñehua, ñerra'm esempoch huerra ñeñt' pamo'mte' pen ataruasañechnopa' ¿señoteñe'tña ñetpa' atet'cha' a'pare'tterret'?

41 Judionesha'ña pa'm'cha'tare'ternesha'pa' atet o'terreterr:

—Ñerra'm huerrachpa' ñeñt'ña ama matsre'mño'pa' e'ñech a'cllatuerranet pamo'mte', nanaccha' coñchatuerranet; narmetsmo'ña'pa' elloch nerranerr po'potantañ ñeñt'cha' taruasert'serr all uvachmo. Nerranerr'cha' ñeñt'cha' e'ñe po'ño'ch apuerre' pue'mer ñerra'm esempoch yen.

42 Allempoña Jesús'pa' atet o'terraneterr:

—Sapa' ama't ahuatapa' ama'tña selleyareña ñeñt' atet anuaret Yompor po'ñoñ ahuatoteñ. Tarro'mar ñeñt'pa' atet oten nocop, na atma'ntataret mapue'. Ñeñt'pa' atet oten:

Añ mapue' ñeñt' ama pocteye' entyeno ñeñt' tomatyene' pocoll, ñeñt'ña te'pa' o' anaretterra ñeñt'cha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeñt'pa' Yomporca'yeña atet p'atene', ñeñto'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañeña.

43 Ñeñto'marña sa ñeñtes judioneshaspa' te'ña Yomporpa' puerrata'mperrescha' po'cohuenña ñeñt' atto ayochreshattena ña. Añcha'ña apuerr ellonet po'potantañ acheñenesha' ñeñt' ama judioneshayaye ñeñt'cha' po'ño'ch

orrtaterre' e'ñe ña po'cohuenña atto atarr ayochreshattena ña.

⁴⁴ Allohuen erra'tsencha' atetsa añ mapyo ñeñña mapue'pa' e'ñech a'yosatse'tuanet. Ñaña ñerra'm eseshesho shora'nom ñeñ mapyerpa' e'ñech a'peptse'tuosanet.

Attoña Jesús'pa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguërraye, ñeñña acheñerpa' chocmach huapoña ñeñtcha' atarr muerochtaterahuet.

⁴⁵ Allempo atet e'myes ñeñ pa'mcha'tareternesha' pen allohuen judionesha' po'cornaneshar ñaña fariseonesha', ñeñ atet toma'ntatenanet Jesús, ñetña allempopa' chapanet pueyoçhreto ñocpuetepa't serrpare'tenña Jesús.

⁴⁶ Ñetña'pa' mueneñetañ o'ch rremuetañ tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ñoçh ñeñ a'ñtene' Yompor po'ñoñ.

22

Atto atma'ntatarettena puesheñarr amcha'taret puetare'tatan shonte' rreñets ñeñtcha' rret allempoch sena'ta puechemer

¹ Jesúsñapa' alla toma'ntaterraneterrpa' atet oterraneterr:

² —Yompor po'cohuenña ñeñ atto ayochreshattena ña pue'ntañot ñeñtpa' o'ch netma'ntacha atet ñerra'mrrate' puesheñarr amcha'taret. Ñeñña amcha'taretpa' o' puetare'tatan shonte' rreñets ñeñtcha' nanac rret allempoch sena'ta puechemer.

³ O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñ ahua'ñaref o'ch rrapreteneta' rreñets. O'ña otyesuarettetpa' ñetña'pa' arepa'tcha' eseshaye' sechatso o'ch ahuet all.

⁴ Po'pocheño'pa' o' alla mueñerranerr po'potantañ pa'taruasañrenesha'. Ama seneta'pa' atet otapanet: “Sotoscha' acheñenesha' ñeñ ahua'ñaref: ‘Amcha'taretca'ye sagotatene', atetca'ye oten: Rreñetspa' o' e'ñe na'potatue. Huacsheçhno ñaña besereçhno ñeñ ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña'.”

⁵ Ahua'ñareñnesha'ñapa' arepa'tcha' a'cua'psenaye' eñchetoña ñeñ hua'ñenahuet. Ñeñtapa' ahuanemyeset ñopa'tets. Puesheñarrpa' ahuo' pa'mro, po'psheñeña' ahuo' pomatsre'tatsa.

6 Po'potantañña'pa' ñeñña'pa' o' rremapoñetña pa'taruasañrenesha'pa' erro'uanen pet, atteñapa' o' muetsanatuē.

7 Amicha'taretña'pa' ñeñña' atarr atsrre'mate'. Allempoñapa' o' mueñan ñaña po'solltar-renesha' ñeñña' a'cclatenaya' ñeññ' amtsañechno, ñeñña' a'poyatatuēnaya' ñaña pa'netser.

8 Alloña amicha'taretpa' atet oterranerr po'potantañ pa'taruasañrenesha': "Rreñtochnoña po'ñochna' epaye'ca'ye. Tarraña ñeñña' ahua'ñaretpa' ñetpa' amaca'ye cohuenaye' nentenaneto.

9 Te'pa' orras samā allo'tsen toñechno tarro'mar allpa' shonte' chopeñe'chyen acheñenesha'. Allohuen errponcha' sentyes o'ch sotyesapanet onetepa' arr o'ch rrapretenneta' rreñets ñeññ' shonte' na'potaten."

10 Allempoña alla ahuanerrerr pa'taruasañrenesha', ñetña'pa' añ co'a'yeset toñ. Ñeññ' allpon pocta'yeset toño'mar e'ñe sechatyesuahuet, ama't atsrre'mñatechno ñaña ñeññ' cohuen acheñ. Atteñapa' o' cha shontosa ñeññ' hua'ñenet. Allña pocollo all sena'tena puechemerpa' e'ñe quechcosa ñeññ' ahua'ñareñ.

11 'Amicha'taretña'pa' allenta be'tos o'ch entapan ñeññ' hua'ñatyen ñeñña' rrallme'chosets all. Allña'pa' entan puesheñarr yacma. Ñaña'pa' ama añeye' chorreno shetamuets emarr ñeññecma chorrenet all atto coshapreteñet ñeññ' sena'tetsa.

12 Amicha'taretña'pa' atet och: "Eso'mare'tña masheñe pebe'tenña arr amaca'ye añeye' pechorreno shetamuets emarr attoch p'ochshaprecha ñeññ' sena'tetsa." Ñaña'pa' ama eñoro.

13 Allempoña amicha'taretpa' otan pa'taruasañrenesha': "Sehuancoñ pa'tac ñaña potpa' chosa huapore'terre' a'yo't checmetot. Allña'pa' allcha' yahuanrrorterret, panmueño'tet atserrpa' rraso'tyerretcha' pa's."

14 Tarro'mar ama't shonteñña ñeññ' ahua'ñaretpa' tarraña puesheña'ttsaña ñeññ' e'ñe cohuen a'crareñ.

*Atto a'pto'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)*

15 Allempoña fariseonesha'pa' ahuanerra. Ñetña'pa' cha atarr co'tape'chatanna'teneta'. Ñetpa' aña atarr e'nenet attoch e'ñe puehquēño'tetpa' ama't parrochapa' o'ch eñorachet Jesús ñeññ' ama pocteyaye. Allochña'pa' attotcha'ña otteñe'chet.

16 Ñetña'pa' e'ñe a'nahua mueñet ñet pueyochresha' epuet ñaña puesheña'tets Herodes pueyochresha'. Ñetña' chapuet Jesúseshopa' e'ñe puehquēño'tet atet otoset:

—Maestrocha' yapa' yeñoteneþ þapa' ama peshquëno ama't mamesha ñaña ñeñt atto peychaten Yompor poctapña ñeñtpa'cho'ña e'ne cohuenacma, ama shequëñtsoyaye ama't mamesha. Ñaña þapa' ama aña ñapueþ pemorrenteno ñeñt atarr añcha'na'tpo' entyen allohuen acheñenesha'. Allohuen acheñ e'ne cohuen pentueñ.

17 Ñeñto'marña te'pa' yapa' yemneñ o'ch peñotatapuey erra'tsente'ña e'ne po'ñoçh cohuentetsa. ¿Pocte'te' penteñña þa o'ch yetsa'ta impuestos añecop ñeñt añcha'tarettetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha añcha'tareþ romo'marnesha' ñeñt ama judioneshayaye.

18 Jesúsña'pa' eñotapanet ñeñt atet coþape'chyenetañ ñocop, ñaña'pa' atet otanet:

—Sapa' atarr ashcarñaþes, eso'mare'tña semneñña o'ch se-shcare'tenen.

19 Ñehua, ama't atteseñpa' segatenca'ye puetallarr quelle ñeñt alloch setsa'ta impuestos.

Allempoñapa' gachet puetallarr quelle ñeñt otenet denario.

20 Ñaña'pa' atet oterraneterr:

—Ñehua, sapa' o'ch soten, ¿esesha't sentenña ñeñt atma'ntarettetsa all? ¿Esesha't pa'so'cheñ aquellcarettetsa all?

21 Ñetña'pa' atet ochet:

—Añcha'tareþca'ye atma'ntarettetsaña all, ñaña ñoca'yeña pa'so'cheñ ñeñt aquellcarettetsa all.

Jesúsña'pa' alla oterraneterr:

—Ñeñteþña'pa' añ poctetsa o'ch yaþ añcha'tareþ ñeñt ño ñeñt atet poctetsa gobiernocop, tarraña ellonetña ñeñt Yomporo o'ch yaþ ñaña ñeñt atet poctetsa ñocop.

22 Ñetña atet e'mueñet Jesús atet anapuenanetpa' atta cohuanrrorteñet tarro'mar Jesús'pa' atarrca'ye cohuen anapuenanet. Atteña'pa' queþpa'huaneretpa' ahuanerret.

Atto a'þto'chet Jesús, ñerra'm po'ñoçhte' atanterrapo' rromot, ta'm, allempopa' errotencia'ña yeperra
(Mr. 12.18-27; Lc. 20.27-40)

23 Ñeñte yetrocma huacha'toña ñaña patantarr ñeñt saduceoneshatets. Ñehua, ñeñt saduceoneshatets ñetña'pa' ellonet echenet poctapña ñeñto'marña ñetpa' atet otenet amate' errotenot yetanterroña rromot ama't errponaña. Ñetña'pa' atet otoset Jesús:

24 —Añ Maestrocha' ñeñtca'yeña atet otye'tña Moisés ñeñt poctetsa ñeñtcha' atet yepa. Ñerra'm esempo rroma

yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletterraña ñeñcha' puechemer perr pa'mo'nasheñeñ. Ñeñtpa' atetca'ye quellca'nmonayña ahuat Moisés.

²⁵ Ñehua, te'pa' eñall cancherrsheña yamo'ts ñeñ e'ñe poc-tacma pa'mo'nasheñecmuet. Ñeñt puesheñarr popo'naretpa' o'yoran coyanesha' ñeñt puetapor pa'. E'ñe allponmatatsapa' o'rroma, atta sa'nman puetapor ama chemere'tnomo. Allempoña ñeñt po'rrocho'merpa' o'yorreran pa'mo'nasheñeñ puetapor.

²⁶ E'ñe allponmatatsapa' ñapa'cho'ña o'rromuerrerr ñaña, ñeñtpa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorreranerr ñaña po'norrar. E'ñe allponmaterrtsapa' ñapa'cho'ña o'rromuerrerr ñaña, ñeñtpa'cho'ña ama chemere'tnerrerro o' atta rromuerrerr. E'ñe attecma pohuet cancherrsheño'maretpa' e'ñe pueyoruarochetña ñeñtara puesheñarr coyanesha'. Allohuenetpa' e'ñe attecma pet rromayestset ama't puesheñarrofetapa' amaca'yeña chemere'tnomueto.

²⁷ Allempoñapa' cho'rromatsña ñaña coyanesha'.

²⁸ Te'ña ñerra'm po'ñochte' atanterrapo' rromotpa' añña coyanesha'ñapa' allempopa' ¿essha'tcha'ña e'ñe ñapue't puetapor perre' tarro'mar allohuenet cancherrsheño'maretpa' e'ñeca'ye pueyoruarochet?

²⁹ Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyo'chro ñeñt e'ñe po'ño'ch atet ye'chateney Yompör po'ñoñ ñeñt atet anuaret ahuatoteñ. Ñaña aña sepantatene' tarro'mar sapa' ama sepocetññañe Yompör po'huamenc.

³⁰ Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñcha' yorrerahuet. Tarro'mar allempopa' e'ñech attet ñerra'm Yompör po'm'llaño'teññaneshar ñeñt pue'ntaño'tsa'yen.

³¹ Sapa' ama'tña selleyare ñeñt atet ote't ahuat Yompör e'ñe socop attoch seño'ch po'ño'chpa' ama't ñeñt o' colla'huapa' ñetñapa' corretseta.

³² Ñehua, ñeñtpa' atet otene' Yompör: “Napa' na ñeñten Po'yompörer pen Abraham ñaña Isaac ñaña Jacob ama't ñetpa' o'rromhuet ahuatoteñ.” Ñehua, yapa' yeñoteñ Yompörpa' ama aye'e' Po'yompörer penaye ñeñt rromuets e'ñe poc-tacma, ñapa' añca'yeña Po'yompörer pene' acheñ ñeñt

corretsetach. Attoña Yomporpa' e'ñe allame'ttsa entenanet allohuen ñetñapa' e'ñe bettetseta.

³³ Allempoña allohuen acheñenesha' ñeñt e'muene' Jesús atto emma'huan saduceonesha', ñetñapa' atet otanna'tyeset:

—¡Errofoñoña'yeña atarr es eñoten, atto atarr cohuen yeçhatyeny!

Añmapa' ñeñt ñoñets ñeñt atarr sherbets, e'ñe metana'tueñan allohuen po'poñechno ñoñets

(Mr. 12.28-34)

³⁴ Ñaña allempo fariseonesha' e'mare'chet atto Jesús emma'huan saduceonesha' ñetñapa' apçhanna'tet parro.

³⁵ Allempoña puesheñarrofet ñeñt atarr etsotene' ñoñets ñeñt atet anaret ñaña'pa' otenana' Jesús. Ñeñtpa' tarro'marña atet a'p'to'tos ñetpa' çhoca'ye mueneñet o'ch topachet Jesús.

³⁶ Ñeñtpa' atet otos:

—Maestrocha' çerra'tsena't ñoñtsor ñeñt atet anaret ñeñt atarr sherbets ñeñt ello metana'tueñe' ora allohuen po'poñechno ñoñets ñeñt e'ñe atarr attecma anaret?

³⁷ Jesúsña'pa' atet otaḗ:

—Añca'yeña ñeñt ello atarr sherbets, ñeñt ñoñetspa' atet oten: “Atarrepa'ch yemorrenteña Yeyomporer ñeñt Yepartseshar yepen e'ñe ora yeyoçhrocmañen. Ñaña e'ñe yecamquëñoñ yemorreñchach, ama't ñaña ora yocḗpañohuen.”

³⁸ Ñeñtpa' ñeñtca'ye ñoñets ñeñt po'ñoçh atarr sherbets, ñeñtpa' elloca'yeña metana'tueñan po'poñechno ñoñtsoçhno.

³⁹ Allotpa' po'poñ ñoñets ñeñt atarr sherbets ñeñtpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

⁴⁰ Añ epo'mar ñoñets ñeñtña e'ñe etsotatuene' allohuen po'poñechno ñoñtsoçhno ñeñt atet ana'yese't, ñaña allohuen Yompor po'ñoñ ñeñt a'mta'yese't ahuat.

Atto Cristo ñeñt Po'partseshar pe't David ahuat, elloñapa' o' alla po'mreñeñ per

(Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apçhenet e'ñe ñoçayet,

⁴² Jesúsña allpa' atet otanet:

—Sapa' çerrofena't sotenña sa añecop ñeñtcha' Cristotosets? çEsesha't soten ñeñtcha' po'mreñeñ perre'ña ñeñtcha' Cristotosets?

Ñetñapa' atet ochet:

—Davidcha'ca'ye po'mreñeñoñ huapaña ñeñtcha' Cristotosets.

⁴³ Ñaña'pa' alla oterraneterr:

—Ñerra'm po'ñoçhcha' David po'mñreneñ perre'pa' sapa' ama't señoeteñaña Davidpa' allempo eñorache't Parets Puecamquëñ ñapa' atetca'ye ote't po'mñrenñecop ñeñfara ñeñfcha' Cristoterrets: "Napa' ñeñfca'yeña Nepartseshar nepen." David allempopa' atetca'ye eñose'tña añecop ñeñfcha' Cristoterrets:

⁴⁴ Yompor Paretspa' atet otennan ñeñf e'ñe Nepartseshar nepen na (ñeñfara ñeñfcha' Cristoterrets): "Te'pa' o'ch ñanorruerr arr necohuenro't allcha' pecohuentapreterrna. Attochña ama't ñeñf pe'moñe'tene' napa' o'ch e'ñe name'ñatuerranet allochñapa' o'ch atet perret ñeñf pemnen ña."

⁴⁵ Ñeñfpa' atetca'ye ote'tña David, ñeñfcha' Cristoterretspa' ñeñfca'yeña Po'partseshar pe'tña ama't allempoteñ. Ñehua, ama't señoeteñaña Cristo ñeñf Po'partseshar pe't Davidpa' ñeñfña te'pa' o' alla po'mñreneñ per ñaña.

⁴⁶ Ñetñapa' ama't puesheñarro'tetapa' ama eseshaye' anapuenaye' entaye. Ñeñto'marña allempoteñpa' ama't puesheñarro'tetapa' ama eseshaye' a'p'to'tenaye' enterraye.

23

Atto Jesúsapa' a'metare'tenan fariseonesha' ñeñf atet yeçhenet ñetpa' ñeñfpa' ama cohuenaye' entapretenaneto Yompor

(Mr. 12.38-40; Lc. 11.37-54; 20.45-47)

¹ Allempoña Jesúsapa' alla serrpare'taterran allohuen acheñenesha' ñaña e'ñe ña pueyochresha'chno. Ñeñfpa' atet atanet:

² —Añña fariseonesha' epuet ñaña ñeñf atarr etsotayene' ñoñets ñeñf atet anaret, ñetpa' añecpa anarettenet ñetcha' señoatatene' ñoñets ñeñf atet nonase't Moisés ahuat.

³ Ñeñto'marña socoppa' e'ñe pocte' o'ch señoahuena ñeñf atet otenset, amachña çhaña satpare'teñe. Tarraña sapa' amachña atet sepatsto ñeñf atet patse'tyenet ñet. Tarro'mar ama't atarr cohuen serrpare'tenetañpa' amaca'yeña e'ñeye' atet peneto ñeñf atet serrpare'tatenset.

⁴ Ñetpa' çhaca'ye atarr atontatennasetña ñoñets ñeñfcha' e'ñe atet señoahueneñ ñetpa' ñeñfca'yeña nennaset ñeñf atarr torrapo' sentyen. Ñeñfpa' atetcha' netma'ntacha ñetpa' çhaca'ye ottenet ñerra'mrrate' añ huanquënnaset ñeñf atarr eñerr se'muen attoch sechechnom. Tarraña ñet ama't mameshapa' amaña anmapretenseto, ama't potapo'tetapa' ama echantapretnenseto ñeñf chechatnenset.

⁵ Fariseonesha' allohuen ñeñf atet etsotayeneñpa' ñeñfpa' e'ñe pommo'cheño'feta atet penet allochñapa'

acheñenesha'ñapa' e'ñech cohuen entyeñet ñeñt atto atarr torra'yenetañ Yomporecop. Tarraña ñeñtpa' e'ñeca'ye orrena. Ñaña ñetpa' chaca'ye ateshatomuertatenet poreñ allñapa' all quellquëññañetañ Yompor po'ñoñ ama't ñeñtpa'cho'ña alloca'yeña huancato'tenet. Tarraña ñeñtpa' e'ñe añecpa atet penet attoch acheñenesha'pa' e'ñech cohuen entenamet. Tarraña ñeñtpa' e'ñe orrena atet penet ñeñt atto ommo'chenet. Ñaña ñetpa' añe'naca'yeña allpocha'ptatenet ñeñt chera'rretenet pa'shtamueto pa'rrpe'monet. Tarraña ñeñtpa'cho'ña e'ñe añecpa atet penet e'ñe pommo'cheñotet.

6 Ñaña ñetpa' ñerra'm cho rrallme'chapretenetpa' añaca'ye atarr muenenet o'ch anorrcha'tyenet allecma anorryen ñeñt atarr amcha'na'tpo' entyen allohuen acheñenesha'. Ñaña ñetpa' e'ñe attecma penet ama't all judionesha' po'prahuo.

7 Ñaña ñetpa' e'ñe pommo'cheñotet añe'naña atarr muenenet acheñenesha'pa' o'ch huomcha'tyesapanet pue'mcha'nañotet ñerra'm esempo chopeñe'chyenet toño'mar allecma shontena acheñenesha'. Ñaña pommo'cheñotetpa' añe'naña atarr muenenet o'ch otanet acheñenesha' ñetpa' e'ño' partsesharerochet.

8 'Tarraña saye'ña neyochreshacha' ñato'tña semnena'ña o'ch otas acheñenesha' sapa' e'ño' partseshareroches. Ñaña sa allohuenespa' e'ñechña semo'nasheñecma sepanna, tarro'mar sa allohuenacpaspapa' naptaca'yeña Separtseshar sepenen na ñeñten Cristotosets.

9 Ñaña arr patsro ama't puesheñarra amach seyomporer sepatstaneto. Tarro'mar sapa' e'ñeca'ye patrraña Sompor ñeñt pue'ntaño'tsen.

10 Ñaña sapa' amach semnatsche ama't puesheñarra e'ñe puechore'teñotetaspapa' o'ch otaset: Na'yochreterneshacha'. Tarro'mar sa allohuenacpaspapa' naptaca'yeña Sa'yochreshater sepenen na ñeñten Cristotosets.

11 Tarro'mar ñeñt po'ñoch cohuen amcha'tarettetsa sesho ñeñtpa' ñeñtca'yeña atarr torretsaña po'potantañecop attoch orrtatanet ñeñt atarr sherbets ñocpuet.

12 Tarro'mar allohuen ñeñt e'ñe cohuen entetsa e'ñe pommo'cheñot ñeñña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te' ñeñña tsapatonetpa' atarrcha' cohuen enteret.

13 'Atarr nanac llequëntso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheñote'na atarr seshcare'tyen. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña

chocma sepatare'teñña po'potantañ ñeñt e'nene' Yompor po'cohuenña. Cha sa'npanpeñña acheñenesha' attoch ñetpa'cho'ña amach enterrñañeto Yompor po'cohuenña ñeñt atto atarr ayochreshattena ña pue'ntañõ.

14 'Atarr nanac llequëñtso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret judioneshacop, tarro'mar sapa' sommo'cheño'te'na seshcare'tyen. Ama't rretorrnanasha'pa' ñeñte'naña seprratam'pesyenña pa'paquëll. Elloña e'ñe sommo'cheño'tpa' aña atarr semnen o'ch atet sepena ñerra'm atarr cohuen acheñres ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchatare'tterra.

15 'Atarr nanac llequëñtso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret tarro'mar sapa' sommo'cheño'te'na atarr seshcare'tyen. Sapa' chocma sechopeñe'chyen erracmañen patso'mar, sepchatyena ama't ñaña sapo'mar. Ñeñtpa' añecpa atet sepena attoch same'ñatyasya ama't e'ñe puesheña'ttsa e'ñe sa soctapña ñeñtes judioneshas. Ñeñt allpon same'ñatyenapa' ñetñapa' aña seychatyenanet ñeñt ama cohuenayaye ñeñt e'ñe atet sepena saña. Ñeñto'mar ñetpa'cho'ña ello atarr nanac o'patatare'ttenet coñcheñets, e'ñe epoche'ttsocma so'patatenanet coñcheñets.

16 'Atarr nanac llequëñtso'tsenes tarro'mar ama't ñeñt ama sechenoyo seyo'chro sañapa' ñeñtara seychateñña po'potantañe'chno. Ñeñtpa' e'ñe atet sepena ñerra'mrrate' aporo'yete'cmas echa'nmannetsa. Ama't seychateneñ ñeñt po'ño'chpa' amaca'ye atteyaye. Ñeñtpa' atet soteneñ: "Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten año' esoyaye ama pallteno o'ch e'ñe po'ño'ch a'poc'atatan po'ñoñ." Tarraña po'poñpa' atet soteneñ: "Ñerra'mña añ oro pa'so'chño yena' yeñoñ ñeñt Parets pa'pac'lo'tsen allempoña po'ño'chpa' chocmach e'ñe ya'poc'at yeñoñ."

17 Sapa' atarr otatsña'tes, ama aña'ye'ña sechenoyoña seyo'chro ñeñt cohuen enten Yompor. Chaca'ye sottena ñerra'mrrate' aporo'yete'cmas. Ama't seño'te'ñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'pac'lo, ñeñtña oropa' aña'ye e'ñe cohuen a'poc'ataye't Partsocop ñeñtara Partsopo'.

18 Ñaña po'poñpa' atet soteneñ: "Ñerra'm esesha' nene' po'ñoñ e'ñe altar pa'so'chño allecma neñet ñeñt amtsarettetsa Yomporecop, ñeñtpa'cho'ña cha soten año' esoyaye, ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ pa'so'chño yena' yeñoñ ñeñt amtsarettetsa Yomporecop ñeñt nenet altarro enot, allempoña po'ño'chpa' chocmach e'ñe ya'pocatat yeñoñ." Tarraña ama't atet sotatse'tyeneñpa' ñeñtpa' amaca'ye po'ño'choyaye.

19 Sapa' ama añeye' sechenoyoña seyo'chro ñeñt cohuen enten Yompor. Cha sottena ñerra'mrrate' aporo'yetcemas. Ama't señoñeña altarpa'cho'ña atarrca'ye sherben. E'ñe attecma sherben ñerra'mrrate' ñeñt amtsarettetsa Yomporecop ñeñt nenet all altarro enot. Tarro'mar altarpa' ñeñtca'yeña a'pocatatene'ña Yomporecop ñeñt nenet all.

20 Ñeñto'marña yeñoñeñ ñerra'm esempo yenen yeñoñ altar pa'so'chño, ama e'ñe ñapña altar pa'so'chño yenenoña yeñoñ; añoñuena'yeña yenenña yeñoñ e'ñe pa'so'chño allohuen ñeñt na'yenet all, allecma sherba'yenet Yompor.

21 Ñaña ñerra'm esempo yenen yeñoñ Partsopo' pa'so'chño, ama e'ñe ñapña Partsopo' pa'so'chño yenenoña yeñoñ. Yompore'naca'yeña pa'so'chño yenenña yeñoñ tarro'mar ñapa' e'ñeca'ye ño pa'paquell.

22 Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'conañe'naca'ye pa'so'chño yenenña yeñoñ tarro'mar enetpa' Yomporca'ye po'conañ pene' tarro'mar allpa' allo'tsenca'yeña Yompor.

23 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayeyñ ñoñets ñeñt atet anaret judioneshacop tarro'mar sapa' sommo'cheño'fe'na atarr seshcare'tyen. Ora allohuen ñeñt senaremñ sepen ama't chocma sapueñeñ Yompor allpon ñeñt pocetsa ñocop —mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñtpa' attoch e'ñe cohuen es sepa'yeññañ po'potantañ. Ñeñña sapa' chaña sepseñ. Ñaña attoch semueranna'ta ñeñtpa'cho'ña sañapa' chaca'yeña sepseñ. Ñaña attoch po'ño'ch e'ñe cohuen same'ñañañtena Yomporecop ñeñtpa'cho'ña sañapa' chaca'yeña sepseñ. Sapa' e'ñe ñeññaña sepalltena. Ñaña atto chocma es sapa'yen Yomporecop ñeñtpa'cho'ña chocmach atet sepena amach cha sepsatstere.

24 Sapa' ama't ama choye' chennaso seyo'chro ñeñña atarr semneñ o'ch sey'chach po'potantañ acheñenesha'. Ñeñtpa' e'ñe atet sepena ñerra'mrrate' aporo'yetcemas

echa'nmannetsa. Añ ñoñets ñeñt atet anaret socop ñeñt setseten e'ñe so'na socta'ña ama't ñeñtpa' atarr coñe'tot sherben Yomporecop, sañapa' ñeñtaca'ye atarr semneñ o'ch seyçhateñ po'potantañ. Tarraña añ ñoñtsor ñeñt atarr nanac sherbets Yomporecop, saña ñeñtpa' ama çhennasoña seyoçhro ama't e'ñe mamesha. Ñeñtpa' o'ch netma'ntacha atet ñerra'mrrate' ñeñt atarr es añetoll allpon ñerra'm çhopo'yetoll saña ñeñtpa' çhaca'yeña seyorasoteñ tarraña ñeñtña atarr añecmuen allpon ñerra'm huaquësh* sapa' ñeñtña sañyen e'ñe atta.

25 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe se'pame'teneña setaza enotpa' o'ponotñapa' ama se'parro'teñe. Seplatopa'çho'ña enota e'ñe se'pata'teñ o'ponotñapa' ama se'pata'teñe. E'ñe atet sepena saña. E'ñe sa'cohuentatena ñeñt eno'mar ñeñt atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'pono seyoçhropa' amaca'yeña sa'cohuentateñe, allñapa' e'ñe chorren shonte' sosya'tsañeçhno ñeñt atto e'ñe seshquëño'te'na çhocma es seprratam'pesyen, atarr es seye'chapretannena, ñeñtñapa' e'ñeca'ye socpa.

26 Ñeñtes fariseoneshas, sapa' ama añeye' seçhenoyoña seyoçhro ñeñt cohuen enten Yompor. Chaca'ye sottena ñerra'mrrate' e'ñe aporo'yetecmas. Socoppa' añca'yeña poctetsa, ñanomcha'ña o'ponot se'pame'tña setaza, seplatopa'çho'ña ñanomcha'ña o'ponot se'patach. Allochñapa' o'ch e'ñe cohuenta emoshento'mar.

27 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe attes ñerra'm apampaña ñeñt a'huallama'ttam'penet. Enotpa' e'ñech cohuen orrtenañ. O'ponotñapa' e'ñech chorren arromña'tap ñaña pa'namen ñeñt nanac sosey.

28 Sapa'çho'ña e'ñerramche' attesña saña. Po'ñoçhca'ye ñeñt atet sorrtatyen acheñenesha'ñapa' e'ñe atet entenset ñerra'mrrate' sapa' e'ñe cohuenare' es sepa'yen. Tarraña o'ponoña seyoçhropa' e'ñe añña shontetsa alloch sommo'chyena, atarr seshcare'tanna'tyena, pa'namen sorrtatyen ñeñt ama't mamesha ama cohuenaye' entapretenso Yompor.

29 'Atarr nanac llequëntso'tsenes fariseoneshacha' ñaña sa

* 23:24 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

ñeñtes e'ñe etsotayenayeñ ñoñets ñeñt atet anaret judionesha-cop tarro'mar sa te'pa' satomaten enot ñeñt atarr cohuen senten sa all pampa'yesete't ñeñt a'mta'yesaye't Yompore po'ñoñ. Ñaña aña'na sa'cohuentamipesyen all pampa'yesete't ñeñt acheñenesha ñeñt e'ñe pocte' es pa'yesete't.

30 Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atto ñetpa' muetsanachete't ñeñt a'mta'yesaye't Yompore po'ñoñ, yañapa' amate' eso'mar yemtsapretaneto."

31 Ñeñt atet sotyeneña' te'ña e'ñe sa señoño'pa' o' sa'metanpsa e'ñe sañaña po'ño'ch sapa' po'mñrenñesca'ye ñeñt muetsanataye't ahuat ñeñt a'mta'yesaye't Yompore po'ñoñ.

32 Ñeño'marña sa te'pa' ñeñtaca'yeña e'ñe setsoteññañ satañneshañ ñeñt allpon sosya'tsañe'chno ñeñt e'ñe mo'tetnomnas ahuatoteñ e'ñe sa satañneshañ.

33 'Sapa' ama cohuenayayso atarr ashcarñates, cha sottena ñerra'mrrate' shechpa sompor sepen. Sapa' errotenuachñaca'yeña sequeshperrate'. Sapa' añaca'ye so'patenaya coñcheñets ñeñt parrare' tso' all o'pono.

34 Ñeño'marña te' napa' o'ch nemñernnas ñeñtcha' a'mta'yerre' neñoñ, ñaña ñeñt atarr eñotañ nepa'yen, ñaña ñeñt atarr etsotayene' neñoñ ñeñt atet anaret ahuatoteñ.

Tarraña saña ñeñt'pa' chachca'yeña semtsanatuerrnan ñeñt patanta'tets, po'potantañña' e'ñech secorso'tamipesuerrnan. Po'potantañña sapa' chach senalle'tyesuerrnan e'ñe all sa seprahuo'mar. Atarr se'moñe'tenanet ñeño'marña chocma soctare'tenanet anetsot o'ch sa'yetatuanet ñetña'pa' o'ch ahuanemyeset po'poñ anetsomar.

35 Attoca'yeña ora allohuen ñeñt e'ñe pocte' es pa'yestse't ñeñt amtsanatyaretatse't ashataretetyesete't po'rras, sañapa' allempoteñ e'ñe sa'yohuarettena ama't teme'ttsen, sa ñeñtes corretsa te', ama't allempoteñ amtsaretta Abel ñeñt ama es ye'chcatetso ama't coñe'ta tarremphua allempo semtser ñaña Zacarías ñeñt Berequías puechemer. Ñeñtña sapa' alla semtser Parets po'ponro puecha'petarot allo'tsen altar allotecma sherbete't Yompore. Ama't allohuen ñeñt amtsanatyaretatse't allempo sañapa' e'ñe allempoteñ sa'yohuaretterra.

36 Po'ño'chca'ye notenes, acheñenesha' ñeñt corretsa te' ñetña'pa' atsa'tataretterretcha' e'ñe ora allpon atserrpatse'tyesonete't ñeñt e'ñe pocte' es pa'yestse't Yomporecop.

Atto Jesús'pa' puellquëñoñan jerusaléño'marnesha' atarr

ya'na'tosanet

(Lc. 13.34-35)

37 'Te'pa' e'ñe nellquëñoť o'ch notas sa ñeñtes jerusaléño'marneshas, ñeñtes muetsanatyese't ñeñť a'mta'yese't Yompor po'ñoň, sa ñeñtes rrollapechysesaye't ñeñť amñareťtatse't sesho, te'ña napa' o'ch notas: Napa' atarr atonoche'tats nemneñeñ o'ch na'yapa'cha'huerersoñ allohuenes nesho attoch e'ñe cohuen necuanmpensoñ. Nemneñeñ o'ch na'yapa'cha'huerres atet ñerra'mrrate' atollop a'yapa'chene' puechoyoesha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

38 Te'ñapa' all sey'chena sa, Yomporñapa' o'ch a'ypo'ñerres.

39 Tarro'mar te'pa' o'ch alla noterrser: Na po'pocheñopa' amach alla senterrne'te. Esemphuañeñña'p' senterrencha', allemponapa' atet'cha' soterren: "Aye'cho'chtatpahuempa'ch Jesucristo ñeñť huapatsa ñeñť llesensen Yeyomporer."

24

Atto Jesús'pa' eñotatanet e'ñech a'mata'taretetuerra Partsopo' all Jerusaléño

(Mr. 13.1-2; Lc. 21.5-6)

1 Jesús'ñapa' 'cha'nerrerr Parets pa'pacllot. Alla ahuenerr allemponapa' ponenña pueyochresha'. Ñet'ñapa' allenta cohuyeset ñeñť atarr co'chnesha'tyetsa allo orratarettena Partsopo'.

2 Allempo Jesús'pa' atet otanet:

—Ama't senteñeñ ora allohuen ñeñť co'chnesha' tarraña napa' o'ch notas: Po'ño'chca'ye 'cherrcha' allempoch e'ñe a'mata'taretetuerra. Ama't e'ñe puenñarra mapyetpa' amach a'puerroña all allo orratenet Partsopo' e'ñechca'ye poctacma a'coye'taretetuerra.

Atto Jesús'pa' eñotatanet shonte'ch entyerret pa'namen ñeñ'icha' eñotaterahuet o' 'cherrmoch allempoch mellapoterra

(Mr. 13.3-23; Lc. 21.7-24; 17.22-24)

3 Ñeñña otuanenanetpa' allenta ahuen Olivopno. All'ñapa' anorruen, pueyochresha'ñapa' o' alla hua'cherrñañeterr, e'ñe ñap'ochayet. Ñet'ñapa' atet otuereterr:

—Yapa' yemneñca'ye o'ch potey ¿esempo'tcha'ña atet perra? Ñaña ¿eso'tcha' yentyerrña ñeñ'icha' yeñotaterre' allempoch pehuerrmocha o'ch mellapoterra?

4 Jesús'ñapa' atet otanet:

—E'ñech seño'terra, alloch'ñapa' amach esesha' seshquërraye.

5 Tarro'mar shonte'ch orrterrtsa ñeñtcha' aycha'nataterre' neso'cheñ, ñeñtcha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'.

6 Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't e'ñe mamesha. Ñeñtpa' atetcha'ca'ye e'ñe po'ñoç perra. Tarraña allempopa' amach chena' allempoch e'ñe mellapoterra.

7 Pa'namen acheñ ñeñt e'ñe po'poñe'ttsoema mereñtsoretpa' ñetpa' quellaranna'terretcha'. Ñaña pa'namen anetso' añcha'tareteçhnopa' quellaterrancha' pueyochreneshachno. Orrterrach allemeñ muecheñets o'ch e'ñe chaporrñatsotyerr errañaren. Ñaña orrterrach pa'namen atsnañtsoçhno ñeñt atarr apatanna'tpo'. Pella'yerrach pats ora errañaren.

8 Ñeñt atet o' notuas te'pa' ñeñtña allempopa' ñeñtcha'ña ñanom mueroçhtaterrahuetña allempo.

9 'Allempoña sapa' pomuerrsetcha' attoch errotuanen perrset allcha'ña muetsatyerrset. Atarrcha' e'moñe'terres allohuen acheñeneshachno tarro'mar sapa' naca'yeña e'ñe same'ñena.

10 Ñaña shonte'ch acheñ allempo ñeñtcha' queçhpuerre' Yompör. E'ñe ñagattsetapa' e'moñe'tanna'terretcha' attotcha' pomatatanna'tyerret.

11 Ñaña allempopa' orretyerrach shonte' ñeñtcha' aycha'naterrtsa ñetpa' año' a'mtenet Yompör po'ñoñ. Tarraña po'ñoç amach Yomporeye' po'ñoñ a'mterreto, ñetpa' attachña shequëretña shonte' acheñenesha'.

12 Allempopa' atonterrach errañaren pa'namen sosya'tsañeçhno allochña atarr atpare'terrñañet Yompör po'ñoñ. Ñeñto'marña shonte' acheñpa' o'huañcha' allo'na morrentanna'tnenet.

13 Tarraña ama'tcha' errotuanen a'paretterret, esesha'ch e'ñe ahuanta'huanmue' ñeñtcha' ama nequeçhpuerriye, ñeñtñapa' ñeñtcha'ña a'qeshpataretterrtsa.

14 Ñaña allempopa' añ cohuen ñoñets atto ayochreshattena Yompör ñeñtcha'ña ñanom serrpare'tatyeretña acheñenesha' ora errañaren allohuanen añe patsro. Attochña eñotateretña ora allohuen pa'namen acheñenesha' ñeñt po'ñoç atet oteney Yompör. Allempochña po'ñoç mellapoterra.

15 'Ñehua, ahuañ Daniel ñeñt a'mtaye't Yompör po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yompörpa' ñeñtñapa' cherrcha' all ama't

ñeñt e'ñe Partsocpa anareteñ. Ñeñtpa' ñeñtachca'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetñapa' eñoteretepa'ch. Ñeñfo'marña ñerra'm esempoch senter o' chap all ñeñt e'ñe Partsocpa anaretpa'

16 allempoña ñeñt allpon Judeo'tsa'yen ñetñapa' allorocmuepa'ch yetrra'terret, ahuanerretepa'ña aspenfareronef.

17 Atet ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetñapa' sohuetepe'chña tecma tarraña amachña be'tosatsetnomuetoña po'ponreto attoch yoratsre'tnomuet.

18 Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet.

19 Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetollesha'chno. (Tarro'mar ñocpuetpa' atarr torrapo' attoch yetrra'tet ñamet.)

20 Ñaña Yomporcha'ña sema'yocha allochñapa' amach cha huapoto allempoch seyetañpesya ñaña amachca'ye añ yetro seyetatsto allempocma samesen.

21 Allempopa' orrterrach muerochteñets ñeñtcha' atarr muerochtaterre' allohuen acheñenesha'. Ñeñt ama't ahua'tapa' ama puemuerochtareto atet atarr nanac huomenc. Ama't allempoteñ e'ñe errte' aye'chcataretta añ patser ama puemuerochtareto atet. Allempoña ellopa' amach atet alla muerochterrete'te ama't errponaña.

22 Allempoch atarr amuerochtataretterret. Tarraña allempoña Yomporpa' ñach oterrets te'pa' allohuach. Ñerra'm amach oto allohuachpa' allempoña ama't puesheñarrapa' amach esesha' queshperrtso. Tarraña ñeñtña ame'ñenaya ña ñeñt acrenpa' ñocpuetñapa' oterrrcha' te'pa' allohuach.

23 Ñehua, allempoch orameñ muerochteñetspa' ñerra'm esesha' sote': "Arro'tsenca'yeña Cristo", amapa' o'ch otaset: "Tarro'tsenca'ye Cristo", sañapa' amach same'ñatstaneto.

24 Orreyerrachca'ye ñeñtcha' otyerrets ñapa' ño'ña Cristotets. Tarraña ñeñtpa' attachca'ye shecare'tyerranña acheñenesha'. Orreyerrach ñaña ñeñtcha' otyerrets ñapa' ño'ña a'mtene'ña Yompor po'ñoñ, tarraña ñeñtpa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñtcha' atet shecare'tyerrets, ñetñapa' orrtatyerretcha' ñeñt ama't ahua'ta acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'carnesharpa' mueneñetañcha' ñeñte'nachña shequërret.

²⁵Señochepa'ch ama't ama čhena' mueročhteñtso'papa' napa' o' e'ñe notuas sa.

²⁶Ñeñto'mar te'pa' notenes: Ñerra'm allempoch atet oterrset: "Tarro'tsenca'yeña Cristo a'yo all amayo", sañapa' ñato'tña sesena'ña all o'ch senteña'. Amapa' ñerra'm atetcha' oterrseterr: "Tarro'tsenca'ye Cristo o'pono pocollo", sañapa' ñato'tña sesena'ña all o'ch senteña'.

²⁷Tarro'mar ñerra'm esempo čherr allempoch nohuerra na Ñeñten Acheñetosets e'ñe allohuen acheñenesha'pa' entapuer-rnetcha' tarro'mar allempopa' atetcha' nepater ñerra'mrrate' meratste', o'ch meratsta huomencpa' e'ñech a'puetaresuan ora enet errañaren, ama't allot huena atsne' ama't e'ñe allohuanen emuena.

²⁸Ñeñtpa' e'ñechca'ye atet perraña ñeñt atet senten te' ñerra'm erro'tsen ñeñt rromuepa' allcha'ca'yeña shonterraña tse'm.

*Atetcha' perra allempoch huerra Cristo Ñeñt Acheñetosets
(Mr. 13.24-37; Lc. 21.25-33; 17.26-30, 34-36)*

²⁹O'chña huañerr ñeñt mueročhteñetspa' allempoñapa' e'ñech allorocma mayerr atsne'. Arrorrrpa'čo'ña o'huañcha' atsnom. Rantočhnopa'čo'ña shorča'terrcha' entoť. Ñaña ñeñt huomenc orra'yetsa ento te' allempoña ama't ñeñtpa' pella'yerrach.

³⁰Allempoñapa' orrterrach ento ñeñtcha' seño'taterre' naca'yeña o' nohuerra Ñeñten e'ñe Acheñetosets. Allempochña nanac llecanrrorterra allohuen pa'namen acheñeneshačhno ñeñt añe patsro'tsen. Entapuerrnetcha' na Ñeñten Acheñetosets o'ch nesuanmperra osoť e'ñe entoť. E'ñe nepartsoteñohuen e'ñech necohuentefñesha' nohuerra.

³¹Nemñercha' nemllañoťeñnaneschar ñetcha'ña poc-tora'nerrtset atarr huomenc. Ñetcha'ña a'yapačha'huerret allemateñ ñeñt acren Nompör nocop e'ñech pa'tatsshemto'marohuen allotecma orrnotena. E'ñech allemateñ a'yapačha'hueretcha' e'ñe allohuanen añ patsroť.

³²Ñaña te'pa' señochepa'ch ñeñt atet pena higoč. Ñehua, esempoch senteñ higoč o'ch emčachyen puetacretollesha' allotcha' o'ch alla tapna'tyerrerr pasopaner, sañapa' ñeñtcha'ña seño'tatene' o' čhenmoch allempoch huorateterrerr.

³³Attecmach perra ñerra'm esempoch sentyerr ñaña ñeñt allpono' notuas, sapa' ñeñtcha'ña seño'taterre' po'ñoč o'ca'ye čherrmoch allempoch e'ñe etsotuerra, o'ca'ye e'ñe allame'ttsamerra.

34 Napa' po'ñoçh o'ch notas, acheñenesha' ñeñt' e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añeçhno.

35 Esemphuañen añ enet ñeñt' senten te'pa' e'ñech chenca'huerra; patspa'çho'ña attecnoch perra e'ñech chenca'huerra. Tarraña naña neñoña' amach chenquerro ama't e'ñe ahuata.

36 'Tarraña ñeñt' yetroch nohuerrapa' ñeñt'ña' ama eseshaye' eñotenaye. Ama't erro'tsente' atsne' ama't erro'tsen tsapro ñeñt'pa' ama't mellañoñeñesha' ñeñt' pue'ntaño'tsa'yen ñetpa'çho'ña ama't puesheñarroñetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemeren napa'çho'ña te'pa' ama neñoteñe, ñaptaña Nompor Parets eñotene'.

37 'Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet petet' ahuat allempo corre't Noé.

38 Ñehua, allempopa' ama es puecha'yeneto aña e'ñe cotape'chete't atto atarr pa'namen muenenet ñeñt'cha' rra'yenet, orrare'tyesete't, sena'tanatyena yacmaneshaçhno, coyaneshaçhno'pa'çho'ña apanatyese't ñeñt' yoranatyesehuate't. Ñetña'pa' ñeñt' e'ñe cohuen entete't. Atteña'pa' çhap allempo be'tosos Noé po'huarcopahuo.

39 Ama es puecha'yese'te machayotepa'tcha' choña oñ eracmañen, attoña aña yanatuerranet oñ allohuenet. Attecnoch perra ñerra'm esempoch nohuerra na Ñeñten Acheñetosets. Machayotachca'ye nohuerra.

40 Ñaña allempopa' atet'cha'ca'ye perra; puesheña'tetspa' anmare'terrach; ama't ñeñt' e'ñe pamo'ts ãannenetañ ñeñt'ña' allach asa'nmare'terra. Ñato' allempopa' allo'tsencha' epsheña yacma pa'mro, puesheñarrña'pa' anmare'terrach po'psheñeñña'pa' allach asa'nmare'terra.

41 Amapa' ñato' allempo allo'tsencha' epsheña coyanesha' ñeñt' parro puetse'tets mapyo, ñeñt'pa'çho'ña puesheñarrpa' anmare'terrach po'psheñeñña'pa' allach asa'nmare'terra.

42 'Ñeñto'marña te'pa' o'ch notas: Chocmuepa'ch seño'sertenna tarro'mar sapa'çho'ña ama seño'tenno esempoch nohuerra na ñeñten e'ñe Separtseshar sepen.

43 Napa' e'ñech machayota nohuerra atet' pena eñe't allempo atta es sep'cha'yena machayotach huaponasa o'ch yoratsre'tensa'. Tarraña sa ñeñtes apaçlates seño'chepa'ch ñerra'm seño'teñeñ e'ñech esempo tsapro huaponasa eñe't, sapa' çhochña seño'sertenañ attoch amach semnacheña o'ch

toram̃psas sepaclo o'ch be'tosam̃psasa o'ch yoruennasa' ñeñt̃ allpon semorrentyena.

44 Ñeñto'mar notenes sapa'cho'ña chocmuepa'chña señose'rtenna tarro'mar allempoch atta es sep'cha'yenapa' allempochña nohuerra na Ñeñten Acheñetosets.

Atetcha' a'paretterra ataruasañ ñeñt̃ e'ñe cohuen etsotene' atet yecheña pamo'mte' ñaña atetcha' a'paretterra po'poñ ataruasañ ñeñt̃ ama etsotaye ñeñt̃ atet yecheña pamo'mte'

(Lc. 12.41-48)

45 Jesúsñapa' alla toma'ntaterraneterr po'poñoneñ, atet oterraneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt̃ atarr ame'ñañañtetsa ñaña e'ñech eñotenan ñeñt̃ atarr sherbets. Ñeñt̃ña yacmarpa' añ yechenaya pamo'mte' e'ñe alla pa'paclo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeñt̃ poctetsa puesheña'ttocop. Ñapa' attecmach penanet, chocmach apuenanet ñerra'm esempoch cherrerr allempo atet anareñ ñocop o'ch alla apa'yerraneterr po'pocheño. Ñapa' chocmach atet pena amach quechpuenaneto tarro'mar ñapa' e'ñe eñoteñ attoch e'ñe coshatenan pamo'mte'.

46 Ñeñt̃ña ataruasañpa' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama cho quechpuenano ñeñt̃ po'taruas apa'nem̃ ahuañmo'choteñ.

47 Po'ñoch o'ch notas, ñeñt̃ña yacmar atarrcha' coshatueñ pamo'mte'. Añcha' coshaterre' o'ch nohuer añcha'tareñ ñeñt̃cha' cohuañpsaprete' ñeñt̃ allpon echyen pamo'mte'.

48-49 Tarraña ñeñt̃ña ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allempoña ñapa' chach ashtapechyan ataruasañechno ñeñt̃cha' rratañ. Ñaña' ñerra'm attach allemeñ rrapretyen ñaña attach orrare'tapretyen allcha' atarr posa'tare'tyen, ñeñt̃ña ataruasañ atetpa' ama't mame-shapa' ama cohuenayaye.

50 Ñeñt̃ña ataruasañer ñerra'm ñapa' attach ottatse'tyena amach es pue'cha'yeno amach eñoteñe ñeñte yetroch huerra pamo'mte' ama't erro'tsencha' yetro huena.

51 Machayotachña huerra pamo'mte'pa' atarrcha' coñchatuer, allach mueñuer all ñeñt̃ o'patenaya allohuen ñeñt̃ po'ñoch ama ame'ñetso ñeñt̃ atta shecare'tyets. Allñapa' allcha' yahuanrrorterret panmueñoñet atserrpa' rraso'tyesosetcha' pa's.

25

All atma'ntatare'tta ñeñt atet pena çharrasheña shopshare'

¹ Jesúsña'papa' alla yeçhaterraneterr, ñeñtpa' atet otanet:

—AllemPOCH amícha'taretterra Yompor ñeñt pue'ntañ'o'tsen allemPOCH nohuerra na, ñeñña allemPOpa' atetcha' perra e'ñech atet ñerra'mrrate' çharrasheña shopshare' ñeñtcha' tatsa allcha' cohuoset allemPOCH huerranet ñeñt e'ñe errte' sena'tetsa. Ñetña'papa' anomyeset po'lampareñ alloch pocta-pueñet ñerra'm esemPOCH huerra.

²⁻⁴ Ñeñña amnarsheña ñetpa' atta es puecha'yenet ñeñto'marña ama anmuetoña po'poñ aceite' alloch a'huortaterret po'lampareñ allemPOCH huañ ñeñt anmanpset po'lamparñeño. Po'potantañ amnarsheña ñetpa' atarr eñotenet attoch eñose'rteñet e'ñe cohuen, ñeñto'marña ñet e'ñe ellonetpa' anomyeset aceite' puetellmō alloch a'huortaterret po'lampareñ ñerra'm esempo huañapset ñeñt po'lampareñeño'tsenet.

⁵ Allña ñetpa' cohueñet, ama ahuenaye' huerranetoña ñeñt sena'tetsa. Ñetña all machayo'ta moñe'tyesetpa' çhepa'tcha' manrra'tuatset.

⁶ O'ña ñarenen tsappa' allemPOñapa' machayo'ta e'muet rranarets, ñeñtña'papa' atet oten: “Tayaca'yeña huennasaña ñeñt sena'tetsa ñeñt atarr secuen. Secha'nomñaca'ye' o'ch sepocetñ.”

⁷ AllemPOñapa' allenta tantrra'tuaña allohuen shopshare' ñetña'papa' a'cohuenetyeset po'lampareñ.

⁸ Amnarsheñaña ñeñt ama yerpa'pesnomaye aceite' ñetña'papa' atet otare'chet po'potantañ amnarsheña ñeñt çhocma anmue' aceite': “Te'pa' o'ch socya'y yaña aceite' ñeñtcha' ya'huortatnom. Yapa' o' maya'huaña yelampareñ.”

⁹ Ñeñña e'ñe cohuen eñotene' eñose'rtatsapa' ñetña'papa' atet ochetña po'poñ amnarsheña ñeñt enamuenahuet aceite': “Amachca'ye yocyaso te't yehuañapen yaña. Sapa' arrña seta all pomueñet o'ch serañteña' saña socop.”

¹⁰ Ñet ahuanmatset o'ch rañteñeta'pa' ñeñña sena'tetsapa' e'ñe allorocma çhen. Ñeñña po'poñ amnarsheña ñeñt e'ñe po'ñoçh çhocma eñose'rtetsa, ñetña'papa' be'tosçha'tet parro epuet ñeñt sena'tetsa. Allña'papa' allcha' atarr coshame'tapreteret. Allña'papa' e'ñe echarr yottampset.

¹¹ Allña e'ñe o'chtatsapa' o' huaçherraña po'potantañ amnarsheña shopshare' ñeñt ahuanmatsa ñorra'. Ñetña'papa' atet otuerret: “Petorampsaye'chapuerrey Nepapareshacha'.”

¹² Ñaña'papa' atet otapueranet: “Te' napa' o'ch notapuerres, sa amaca'ye po'ñoçhaye' seyemtenno.”

13 Jesúsñapa' alla oterranerr ñeñt e'mñnotene':

—Ñeñto'marña na te'pa' o'ch notas: Sapa' chocmuepa'chña e'ñe cohuen señose'rtena, tarro'mar sapa' amaca'ye señoteñe erra'tsencha' yetñatsro allempoch nohuerra na Ñeñten Acheñetosets, ñaña erro'tsencha' yetro ama't ñeñtpa' ama señoteñe.

All atma'ntataretta ataruasañe'chno ñeñt aparettatsa puesheña'tets quelle ñeñt otenet talento

14 Jesúsñapa' alla ye'chaterraneterr po'poñ, ñeñtpa' atet oterraneterr:

—Allempoch añcha'taretterra Yompor ñeñt pue'ntañ'o'tsen allempoch nohuerra na, ñeñtña allempopa' e'ñech atet perra ñerra'mrrate' puesheñarr yacma o'ch ahuo' ñachayo. Ñeñtña yacmarpa' o'ch agotnoman pa'taruasañrensha'pa' o'ch apa'yesnomanet quelle ñeñt allpon echen; ñetñapa' o'ch cohuanpsoñet tarrempohuach esempohuañencha' huerra.

15 'Puesheñarrpa' apa'neñ amnarmeta talento, ñeñtpa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'çllayor. Po'psheñeñpa' apa'neñ epmeta talento, ñeñtpa' allpon quelle allpon ñerra'm epa mil. Po'psheñeñpa' apa'neñ puetatarr talento. Ñeñtpa'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeñt e'ñe allpona eñotyenet attoch ellonetpa' atontatet quelle. Ñeñta apa'yesuanmanetpa' ñañaapa' allenta ahuo' ñachayo.

16 Ñeñt agapue' amnar mil ñañaapa' allorocma ahuo' allcha' taruasatan quelle; attoña ellonetpa' o' alla ganerrerr po'poñ amnar mil quelle.

17 Atet pa' ñaña ñeñt agapue' epa mil. Ñapa'cho'ña ellonetpa' ganerrerr po'poñ epa mil quelle.

18 Tarraña añña ñeñt agapue' paterr mil ñañaapa' allenta aneñ allcha' pampueña'; attoca'yeña ñapa' cha e'potanña quelle.

19 'O'ña atomatpa' o' huerranetña po'patronaret, allenta agotatuerranet attoch entuerranet po'taruas erro'tente' taruasa'yeset e'ñe puesheña'ttset.

20 Ñeñtña agapue' amnar mil ñañaapa' huapapa' apapuenan po'patronar po'poñ amnar mil quelle, ñeñtpa' atet otapueñ: "Añña Nompocha' ñeñt p'apa'nmuen amnar mil quelle ahuaña, napa' elloca'ye neganerrerrña peçllayoro' po'poñ amnar mil quelle."

21 Po'patronarpa' atet och: "E'ñe pocte' neyochrecha'; p'apa' atarr cohuen pesherenen. Papa' e'ñe cohuen petsoton ñeñt atet notnomuep. Ama't allponatolla napa'nmañ ahuaña,

pañapa' atarro't cohuen pesherbato. Ñeñto'marña te'pa' o'ch nenuerreḡ p̄ach necuam̄psapreterre' ñeñt atarr aton. Te'ña papa' pebe'tos allcha' atarr p̄ocshapreterrna."

22 Allempoñapa' ñeñt agapue' ñaña epa mil, ñapa'cho' huapapa' apapuenan po'patronar po'poñ epa mil quelle. Ñapa'cho'ña atet otapueñ: "Nomporcha' ñeñt p̄apa'nmuenaña epa mil, napa'cho'ña elloca'ye neganerrerrña peçllayoroḡ po'poñ epa mil quelle."

23 Ñapa'cho'ña po'patronarpa' atet och: "E'ñe pocte'; p̄apa'cho'ña atarro't cohuen pesherbena. Papa'cho'ña e'ñe cohuen petsoton ñeñt atet notnomueḡ. Ama't allponatolla napa'nmaḡ ahuaña, pañapa' atarro't cohuen pesherbato. Ñeñto'marña te'pa' o'ch nenuerreḡ p̄aña p̄ach necuam̄psapreterre' ñeñt atarr aton. Papa'cho'ña te'pa' pebe'tos p̄aña allcha' atarr p̄ocshapreterrna."

24 Allempoñapa' huapa ñaña ñeñt agapue' paterr mil quelle. Ñañaapa' atet otapueñ: "Napa' neñoteneḡ Nomporcha'. Papa' amaca'ye matsrre'mñape; p̄apa' çhocmaca'ye peprratañpesyen ama't ñeñtpa' ama p̄oyaye ñaña çhocmaca'ye p̄ocsechatyenneña ñeñt ama p̄aye' nare'tatyenaye; çhocma es p̄a'yapaçha'yen ama't ñeñtpa' amaca'ye p̄aye' na'yenaye."

25 Ñeñto'marña napa' çha nem̄cha'teneḡ. Ñeñto'marña ñeñt p̄apa'nmuena ahuaña paterr mil quellepa' nañapa' çha nepamponaḡ. Te'ñaapa' o'ch alla napapuerreḡ ñeñt e'ñe p̄o."

26 Allempoña po'patronarpa' atet och: "Paña po'ñoçhpa' amaca'ye cohuenaye' pesherbenna ama't mamesha; atarrca'ye quellañtsoḡ. Ñerra'm e'ñe po'ñoçh peñotenoñ çhocma es neprratañpesyeneñ ñeñt ama noyaye; ñerra'm po'ñoçh çhocma nocsechatyeneñ ñeñt ama naye' nare'tatyenaye; ñerra'm po'ñoçh çhocma es na'yapaçha'yeneñ ñeñt ama naye' na'yenayñe, ñerra'm e'ñe po'ñoçh atet pentennoñpa'

27 eso'maruañaca'ye amaña bancoye' penennanoña neçllayor allochñapa' te'ña o' nehuerrapa' nagaphuerreñcha' ñaña allo atontatonet neçllayor."

28 Allempoñapa' atet otan ñeñt tom̄cha'tyets all: "Te'pa' çhosa puerratañperre'ña ñeñt paterr mil quelle o'ch sapuer ñeñt echene' çharra' mil quelle."

29 Ñeñto'marña te' napa' o'ch notas: Ñeñt es echets shonte' e'ñe puesherbateñoḡet pamo'mte', ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt echyetañ aprratañpsaretterretcha'.

30 Ñaña añ ataruasañer ñeñt ama nesherbena, te'ñaapa'

čhosaña huapore'te' a'yoť checmetoť. Allña'pa' allcha' yahuan-
rrortenet panmueñoťet atserrpa' rraso'tyesosetcha' pa's."

*Allempoch ellopa'tetstataretterra ñeñt toma'ntenaya car-
rneročno ñaña ñeñt toma'ntenaya cabračhno*

³¹ Allempoch nohuerra na Ñeñten Acheñetosets,
nohuerrach e'ñe nepartsoteñoñhuen epan allohuen
nemillañoťeñneshar. Allempopa' nanorruerrcha' neconaño
allcha'ña e'ñe nepartsotuerr e'ñe necohuenteñesha'.

³² Allempoña'pa' e'ñech nesho apčherra allohuen pa'namen
acheñ ñeñt yečha'yetsa arr patsro. Allempochña nel-
lopa'tetstaterranet e'ñe atet pena ñeñt pamo'mte' pen car-
rnero, ñaña'pa' o'ch ellopa'tetstatenan carrneročno ñaña
cabračno.

³³ Acheñenesha'ña ñeñt e'ñe cohuenpa' ñetña'pa' necohuen-
roťcha' nenuerranet ñeñt e'ñe atet ñerra'm carrneročno.
Ñaña ñeñtña ama cohuenayayepa' ñetña'pa' ne'chcoťerotach
nenuerranet ñeñt e'ñe atet ñerra'm cabračhno.

³⁴ Naña allempoch atarr na'mcha'taretterrapa', atetcha'
noter ñeñt necohuenronte'tsa'yen: "Sapa' sonačha't allo-
huenes tarro'mar Nompör o'ca'ye atarr bensare'tañperres.
Te'ña sapa' o'ch saguerr ñeñt o'patatensa ahuaťoťeñ. Ama't
allempoťeñ Nompörpa' errote' yečcatene' pats saña'pa' allempo-
ťeñ o'patatasa atťoch sa'mcha'tarettapretera.

³⁵ Tarro'mar napa' allempo nachporre'tpa' saca'yeña
nerratallme'chaye't. Allempo no'ñpa'te'tpa' saca'yeña
nonayesaye't. Allempo nečhapue't sesho all ama nentare
saña'pa' čhocma e'ñe cohuen sagapne't.

³⁶ Allempo nemuelle'tpa' saca'yeña nepashtaye't. Allempo
natsna'te'tpa' saña'pa' čhocma secuanmpesne't. Allempo yot-
tammpesnete'tpa' saca'yeña e'ñe cohuen nemo'taye't."

³⁷ Allempoña ñeñt e'ñe cohuen es nepa'yese'tpa' ñetña'pa'
atetcha' oťerrnet: "Ta'm Partseshacha', ¿esempo'tña yentape't
allempo p'achporre't allempo yerratallme'chape't? ¿Esem-
po'tña yentape't allempo p'o'ñpa'te't allempo yonape't?

³⁸ ¿Esem-po'tña yentape't allempo pečhapue't yesho all ama
pentare allempo e'ñe cohuen yagapape't? Ta'm ¿esempoťe'ña
yentape't allempo pemuelle't allempo yepashtape't?

³⁹ ¿Esem-po't yentape'tña allempo p'atsna'te't ñaña allempo
yottammpsapete't allempo yemo'tape't?"

⁴⁰ Allempoña na ñeñten Partseshanpa' atetcha' noterres:
"Te' napa' o'ch notas: Po'ñočhpa' allempo e'ñe cohuen atet
sepa'yeseñe't na nemo'nasheñnesha' na'naca'yeña e'ñe co-
huen atet sepen. Ama't puesheñarra ñeñt ama esoshe'maye'
entyese'te'acheñenesha' allempo, tarraña saña allempo'pa' atto

e'ñe cohuen es sepa'yasanete't, na'naca'yeña e'ñe cohuen atet sepen allempo."

⁴¹ 'Allempoña ñeñt ne'chcoteronte'tsenpa' atetcha' noteranet: "Sapa' orrerres arro't, sapa' aña so'patenaya ñeñt atarr yoro'chen. Te'ñapa' orras all huorten tso' erraparen ñeñt ama amayaño ama't errponaña. Ñeñtña tsorpa' añ o'patateñet oneñe'e'ñe pueyochreshohuen.

⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te.

⁴³ Allempo nechapue't sesho all ama nentare sapa' amaca'ye cohuenaye' sagapne'te. Allempo nemuelle'tpa' sapa' amaca'ye saye' nepashtaye'te. Allempo natsna'te't ama't ñaña allempo yottañpesnete'tpa' sañapa' amaca'ye semo'tne'te."

⁴⁴ Allempoña ñetpa' atetcha' oterrnet: "¿Esempohuañaca'ye, Partseshacha', yentape't allempo p'achporre't ñaña allempo po'ñpa'te't ñaña allempo pechapue't yesho all ama pentare ñaña allempo pemuelle't ñaña allempo p'atsna'te't, ñaña allempo yottañpsapete't? ¿Esempo'tña yentape't atet allempo yapa' ama't coñe'tapa' ama es yapape'te?"

⁴⁵ Allempoña napa' atetcha' noterranet: "Te'pa' o'ch notas: Po'ño'ch sa allempo ama a'cua'psenaye' sentone'te allohuen na nemo'nasheñnesha', na'naca'yeña atet sente'tña allempo."

⁴⁶ Allempoña acheñenesha' ñeñt ne'chcoteronte'tsen, ñetñapa' ahuanerretcha' allcha' coñcherret e'ñe errponohuañen. Añña ñeñt e'ñe cohuen es pa'yestse't ñetñapa' ahuanerretcha' Yomporesho allña ñetpa' corretsetach pocsheñeshocmañen errponañohuen.

26

Atto atarr o'pateñet Jesús o'ch muetsatateret
(Mr. 14.1-2; Lc. 22.1-2; Jn. 11.45-53)

¹ Jesúsñapa' allempo serrpare'tatuahuanet allohuen añ ñoñetspa' allempoñapa' atet otan pueyochresha':

² —Sapa' señoteñ o'ca'ye epomtañapa' o'ch çhapa'muen pascuapo. Allempoña na Ñeñten Acheñetosetspa' allempochña pomuerrnet attotcha'ña corso'tañpernet.

³ Allempoña allohuen judionesha' pa'mcha'tareternesha' ñetñapa' apçhet. Añ apçhatsa allohuen ñeñt judionesha' po'cornaneshar pa'mcha'tareternesha' epuet ñaña ñeñt atarr etsotayenayen ñoñets ñeñt atet anaret epuet ñaña ñeñt pompornesha' pen allohuen judionesha'. Ñetñapa' arr apçhenet cornesha' pa'paclo, ñeñtña cornesha'pa' ñaca'yeña atarr nanac pa'mcha'tareter penet, ñeñtapa' añ pa'so'cheñ Caifás.

⁴ Allña ñetpa' cotape'chatannenet, Jesús a atarr o'patenet. Ñetñapa' atet otanna'tyeset:

—Errotuachca'ye yepe'te' attoch yeshcach e'ñe a'nahua esheccha' yerrmach attotcha' yemtsatach.

⁵ Ñetña allempopa' alla otanna'tyerreterr:

—Tarraña te' pascuapo allempo shontena acheñenesha' amachca'ye yerrmatsche allañaca'ye cha yatsrre'moçhtateñ acheñenesha'.

Atto puesheñarr coyanesha'pa' shosan eñmosañ Jesús poño
(Mr. 14.3-9; Jn. 12.1-8)

⁶ Pamtarrña Jesús pa' Betanio'tsen all Simón pa'paclo, ñeñña Simónpa' ñeñt ose't puetsarñats.

⁷ Jesúsña pa' alla anen all rrallme'chen. Allña pa' huapoña puesheñarr coyanesha', huapatan eñmosañ ñeñt ama matsa'to; huapatanpes puetellmo ñeñña puetellm'pa' añ socheñet alabastro. Ñeñña eñmosañ pa' alla she' Jesús poño.

⁸ Pueyochreshachnoña ñetña eñchetpa' cha atsrre'muet, atet otyeset:

—Eso'mare'tña atta a'pertatosanña eñmosañ. Ñeñt eñmosañterpa' amaca'ye matsa'to.

⁹ Chochña'cho' pomoseñpa' ganañcha' shonte' quelle allempoña pa' apa'yesaneñcha' ñaña allohuen huocchañneshachno.

¹⁰ Jesúsña e'manetpa' ñaña pa' atet otanet:

—Eso'mare'tcha' cha muene' satsrre'moçhtana'tañña coyanesha'. Ñapa' atarrca'ye cohuen p'osen.

¹¹ Tarraña ama'tcha' cho pomosaneñ eñmosañ alloch es apa'yesaneñ huocchañneshachno, tarraña chocmachca'ye eñallña huocchañneshachno arr patsro. Ñaña pa' po'ñoçhpa' amachca'ye allo'na sentenno arr patsro.

¹² Ñeñt atto shosnan te' eñmosañ nechtso, ñeñpa' añeçpa'naca'ye sherben tarremphua allempoch a'yana'terrneterr ñeñtcha' epuet pampa'pesnet.

¹³ Po'ñoçhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpuenet.

Atto Judaspa' pomuerran Jesús
(Mr. 14.10-11; Lc. 22.3-6)

¹⁴ Allempoña pueyochresha' ñeñt charra' puechetsa epsheña, puesheñarrña ñeñt pa'so'cheñ Judas Iscariote, ñaña pa' allenta ahua' allo'tsa'yen ñeñt pa'm'cha'tareternesha' p'a'yen allohuen judionesha' po'cornaneshar.

¹⁵ Chap allpa' ñaña pa' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna?

Ñetñapa' atet ochet:

—O'chca'ye yapaḡ ma'poch čharratlla quelle.

¹⁶ Allempoña ñapa' aña e'ñe coťape'chyen erroťenotcha' pomuerranña Jesús.

Atto Jesús'pa' rrallme'chatnenan pueyochresha' attoch čhocmach yerpueret ñeñt yoten te' Santa Cena

(Mr. 14.12-25; Lc. 22.7-23; Jn. 13.21-30; 1Co. 11.23-26)

¹⁷ Allempoña čhapa'muen ñeñt yetñatsro allempoch rrerretterr pan ñeñt ama anareťeyaye chase'. Chapa'muen ñeñt yeterpa' Jesúsñapa' huačha'toña pueyochresha' ñetñapa' atet otoset:

—Te'pa' ¿erra't pemneñ allcha' ya'potonaḡ ñeñt'cha' perra' pascuapo?

¹⁸ Ñaña'pa' atet otanet:

—Te'pa' o'ch ahues anetso; o'ch sečhap allo'tsen puesheñarr acheñ. Ñeñt'pa' atet'cha' sotos: “Ñeñt'ña Maestro Jesús'pa' atet'ca'ye oten: ‘Te'pa' o' čhapmoch allempoch nerroma, te' pascuapopa' arrcha' nerra'nom pepaclo neyochreshohuen.’”

¹⁹ Atet otanet Jesús'pa' ñetñapa' atet'čo' pet. Allca'yeña añño'tosñañetña rreñets allcha' rrallme'chet.

²⁰ O'ña ellerrotenapa' Jesúsñapa' anorros allcha' rrallme'chatnenan pueyochresha' ñeñt čharrasheña puechena epsheña.

²¹ Allña rrallme'chetsetpa' Jesúsñapa' atet otanet:

—Po'ñočca'ye notenes: Puesheñarroťes sa ñeñtescha'ca'ye nepomuerre'.

²² Ñetñapa' čha atarr lleca'rrtet. A'ḡto'tyeset e'ñe puesheña'tset:

—Partseshacha' ta'm ¿amaťe' na nepomuerrmochape?

²³ Ñaña'pa' atet oterraneterr:

—Ñeñt netsapechapretene' nerrarpa' ñeñt'cha'ca'yeña nepomuerre'.

²⁴ Po'ñočca'ye te'pa' allo'na sen etsotnomtsa ñeñt atet anuaret Yompor po'ñoño nocop Ñeñten Acheñetosets; atťotcha' muetsaterrnet. Tarraña nocoppa' e'ñe poctē; añña po'ñoč acheñer ñeñt'cha' nepomuerre' ñocopñapa' atarr llequēñets. Añ acheñerpa' e'ñeca'ye poctēñ ñocop amachña'čo' eñalletatstañe.

²⁵ Judasña ñeñt'cha' pomuerre'pa' ñaña'pa' atet och:

—Maestrocha' ta'm ¿amaťe' na nepomuerrmochape?

Jesúsñapa' atet och:

—Pate'ca'ye atet'ca' ḡoten.

²⁶ All rrallme'chenet, Jesúsñapa' chetan pan parasyoso'tan Pompor. Parasyoso'tuepa' shota'tan panpa' apa'yesan puey-ochresha'. Ñeñtpa' atet otanet:

—Sagapyes o'ch serre' añmapa' ñeñtcha'ña nechets sepen.

²⁷ Alloñapa' chetan ñaña orramets parasyoso'tuerrerrpa' apa'yerraneterr. Ñeñtpa' atet oterraneterr:

—Sorr ñaña añ narmetsos allohuenes.

²⁸ Añpa' nerrasca'ye sepeñ ñeñtcha' ashatareftatsa shonte' acheñeshacop alloch apre'tnaretterret po'chñaret. Añ nerraspa' alloch e'ñe etserra a'poclaterra acheñesha' Apuesho.

²⁹ Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Apa.

*Atto Jesúsapa' eñotatan Pedro ñapa' chocmach a'nasocha
(Mr. 14.26-31; Lc. 22.31-34; Jn. 13.36-38)*

³⁰ Allempoña o' morrechuanmuet Yomporecoppa' ahuaneneter Olivopno.

³¹ Allñapa' atet otosanet Jesús:

—Añ tsaprocma sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: “O'ch nemtsater ñeñt cohuanmpene' carrnero, po'carrnerorñapa' chach matrra'tyesa allemeñ.”

³² Jesúsñapa' atet oterraneterr:

—Tarraña esempoch alla netanterra napa' nanomcha' otertsa Galileo.

³³ Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahuatapa' amach na'ypo'ñerrpe.

³⁴ Jesúsñapa' atet otererr:

—Po'ñoçhca'ye o'ch notañ, añe tsaprocma amach eñena' atoloppa' pañapa' o'ch ma'poch pa'nasotenna.

³⁵ Pedroñapa' alla otererr:

—Ama'tcha' yerromhuanen parropa' nañapa' ama't parrocha amach na'nasotapño.

Allohuen pueyochresha'pa' ñetpa'cho'ña e'ñe attecma otyeñetañ ñamet.

*Atto Jesúsapa' ma'yochuena all oteñet Getsemaní
(Mr. 14.32-42; Lc. 22.39-46)*

³⁶ Alloñapa' chap Jesús pueyochreshohuen all narmetsmo, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrcha'tos arrma, napa' o'ch nema'yochena' tarronteye'.

³⁷ Allñapa' aña anmos Pedro ñaña Zebedeo puechemere-sha', epsheña. Jesúsñapa' čha nanac llequëna, nanac all-patena.

³⁸ Allempoñapa' atet otosanet:

—Napa' čha chepočhenen nellquëña neyočhro, čha muene' nerromuen nellquëñoť. Sapa' allasaťach arr secuapretosnoťach.

³⁹ Ñañaapa' ahuo' a'yenteye' all rremosa patso atet ma'yochosa:

—Apa, ñerra'm errotenoťpa' arepa'chña pemnatatsche o'ch čhapona ñeñť atarr amueročhtatañ nenten.* Tarraña ñerra'm p̄ach muenats añepa'chña atet pepaton ñeñť pemnen p̄a, amachña añeyaye ñeñť nemnen na.

⁴⁰ O'ña atet ma'yochuapa' o' ahuerri allo'tsa'yen pueyochresha' ma'psheña. O' čherr allpa' alla entuerranet ñetñapa' čha atarr manrrenet. Allempoñapa' otuerran Pedro:

—Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha.

⁴¹ E'ñe seño'srteñoťpa' čhoña sema'yochosa allochñapa' attoch amach sañeña a'puerrataterro topateñets ñeñťcha' sehupoya atarr huomenc. Ñeñťpa' ama't atarr semneñeñ tarraña sechetsñapa' amaca'ye ahuamencateye' penso, ñeñťo'marña notenes čhocmach sema'yochena.

⁴² Jesúsñapa' alla ahuerri puepocheño o'ch ma'yocherrerr, ñeñťara atet otuerrerr:

—Ñerra'm Apacha' aña pemnaten o'ch čhapona ñeñťcha' atarr na'mueročhtate', ñerra'm ama errotenoť p̄a'huañatañperrno, ñeñťpa' e'ñe pocte'. Añepa'chña atet pepaton ñeñť pemnen p̄a.

⁴³ O'ña alla ma'yochuerrerrpa' allempoñapa' huerrerr alla entuerranerr pueyochresha' ñetñapa' o' alla manrretererr, čha nanac atserr moñe'tenet.

⁴⁴ Jesúsñapa' alla sa'nerraneterrpa' ahuerri ma'yochatsa poma'pocheño'hua. E'ñe attecma ma'yochuerrerr atet otua ñorra'.

⁴⁵ O'ña ma'yochuerrapa' allempoñapa' alla huerrerr pueyochreshesho, atet otuerraneterr:

—Ama't teme'ttsenpa' alla't semanrren; ama'tpa' alla sames. Te'pa' señoche'pa'ch o' čhap allempoch pomataterret na Ñeñten Acheñetosets attoťcha' erroťuanen perren ñeñť atarr ochñaťenesha'.

⁴⁶ Te'ñapa' setanterra o'ch ahuey o'ch yepocte'. Secue'ca'ye ñeñťcha' nepomue' ñeñťpa' alla'tsena.

* **26:39** Ñeñť amueročhtatañ ñeñťpa' po'ñoč arr atma'ntataret ñerra'mrrate' ñeñť atarr pesherr yorren orranťso.

*Allempo rromoset Jesús**(Mr. 14.43-50; Lc. 22.47-53; Jn. 18.2-11)*

47 All atet eñorena Jesús pa' čha huapatsa puesheñarr ñeñt pueyochresha' peneñ ñeñt a'pchenahueta epsheña, ñeñtñapa' añ Judas. Ñaña pa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'tsapa' añ mueñenahueta ñeñt pa'micha'tareternesha' pen allohuen judionesha' po'cornaneshar ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rremuenaya' Jesús.

48 Ñehua, Judas ñeñt pomuerre' Jesús pa' ñaña pa' atet otnoman acheñenesha' ñeñt anom attoch cheme'toset Jesús. Ñeñt pa' atet otnomanet:

—Erra'tsencha' nehuomicha'tos e'ñe netso'ttsapa'teño'tpa' ñeñtca'yeña Jesús. Saña pa' ñeñtcha'ña serrmos.

49 Allempoña huapapa' čha ponmosaya Jesús huomicha'tos e'ñe puetso'ttsapa'teñesha' atet otos:

—Tsapo, Maestrocha'.

50 Jesúsña pa' atet otaṗ:

—Eso'maruaña ca' masheñe, penña arr nesho.

Allempoña acheñenesha' pa' ponmosyet Jesús pa' rromoset e'ñe po'huamencocma.

51 Allempoña puesheñarr ñeñt epuet Jesús pa' ñaña pa' po'cchella cheta'pa' o'ch čhonto'tapanen cornesha' pueñañra, puetepa'tcha' tsorroñ. Ñeñt pa' año pueñañra ñeñt pa'micha'tareter pen allohuen judionesha' po'cornaneshar.

52 Allempoña Jesús pa' atet och:

—Penerr alla ṗocchell allecma peneñ. Allohuen ñeñt orrotetsa po'cchellopa' cochlochca'ye colla'huerret.

53 Papa' čhate' ṗotenapañ amate' errotenot es nenameña Nompot. Ama't peñoteñe ñerra'm čho nenanpa' ñapa' allorocmach mueñoneñ shonte' nanac po'millaño'teñaneshar ñeñtcha' nemoñsayañ,

54 tarraña ñerra'm atet neṗapa' amate' errotenot etsotoña ñeñt atet anuaret Yompot po'ñoño nocop. Allña oten ñeñt pa' atetcha'ca'ye perra.

55 Allempoña Jesús pa' atet otan acheñenesha':

—Eso'mare't sehuacha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrate' eñeñen? O' allponmatuanen nanorryan Parets pa'paclo'mar, all neyčhatyen, eso'mare'tña ama allempocmaña serrma'ne'te.

56 Ama'tpa' attepa'ca'ye perra allochñapa' attoch e'ñe et-sotuerra ñeñt allpon quellca'yese't nocop ñeñt a'mta'yesaye't Yompor po'ñoñ.

Allempoña allohuen pueyochresha'pa' allorocma a'ypo'ña'huanmet, ñetñapa' yetrra'tuet.

Allempo chapata'mueñet Jesús all apcha'muena allohuen judionesha' pa'mcha'tareternesha' ñeñt a'pocatyene' ñoñets ñocpuet

(Mr. 14.53-65; Lc. 22.54-55, 63-71; Jn. 18.12-14, 19-24)

57 Acheñenesha' ñeñt rromose' Jesús pa' ñetñapa' anmet allo'tsen Caifás ñeñt pa'mcha'tareter pen allohuen judionesha' po'cornaneshar. Allñapa' all apchenet parro allohuen ñeñt atarr etsotayenayeñ ñoñets ñeñt atet anaret epuet ñaña ñeñt pompornesha' pen allohuen judionesha'.

58 Pedroñapa' co'ta'nmanet tarraña ñapa' chenta' en a'yo't. E'ñe cornesha' po'pampohua allñapa' anorros epuet ñeñt guardianesha' allochñapa' esheccha' entan Jesús attoch errotuanencha' pet.

59 Cornaneshañña pa'mcha'tareternesha' ñaña ñeñt pompornesha' pen allohuen judionesha' ñaña allohuen ñeñt a'pocatyene' ñoñets ñocpuet ñetñapa' aña atarr e'nenet ñeñtcha' toma'tamipse' Jesús allochñapa' attoch muetsatachet.

60 Ama't shonte' huapatsañ ñeñtcha' toma'tamipsosayeñpa' añcha'taretnesha'ña ama't puesheñarrotetapa' ama eseshaye' entayeña attoch muetsatachet. Atteñapa' huapa ñaña epsheña ñeñtcha' toma'tamipse'.

61 Ñetñapa' atet otoset:

—Añ acheñer ahuañapa' atetca'ye oten: “Napa' atarr ahua-mencaten attoch na'materrñañ Parets pa'paquëll. Allotña poma'pamtañopa' o'ch alla natomater.” Ñapa' atetca'ye otña allempo.

62 Allempoñapa' cornesha' ñeñt nanac añcha'taret allenta tompa' atet otan Jesús:

—Pañapa' ¿ama'tcha'ña ñapananeto? ¿Erroñenote'tña ot-teñ'chenpet?

63 Jesúsñapa' ama eñoreno. Allempoña cornesha'pa' alla otererr:

—Te'pa' o'ch notap o'ch potey e'ñe Yompor pa'so'chño ñeñt ama arromñañeshayaye, papa' ¿pa'tña ñeñtep Parets Puechemerep, ñeñtepte' Cristotosets?

64 Jesúsñapa' atet och:

—Napa' po'ño'chca'ye ñeñten e'ñe atet poten. Elloña napa' o'chca'ye notas, o'ca'ye e'ñe chapmoch allempoch e'ñe senterren na Ñeñten Acheñetosets o'chca'ye alla nanorruerr Parets

po'cohuenroŧ allcha' nepartsotapretera. Ñaña po'pocheño o'ch sentapuerren o'ch nesuam̄perra oso Yompor pue'ntañ.

⁶⁵ Cornesha'ñapa' ñeñña e'mpa' allenta rrarre'tan pa'shtam e'ñe patsrre'mueñoŧ, ñeñtpa' atet ot:

—O'ca'ye čha achm̄are'tanña Yompor. Ñeñtepñapa' amach ye'natsche po'psheñeñ ñeñtcha' a'metam̄psose'. Te' ama't sapa' o'ca'ye se'm̄ atet achm̄are'tenan Yompor. ¿Erroŧena't senteñña sa?

⁶⁶ Ñetñapa' atet otyeset:

—Ña po'ñočhpa' atarrca'ye nanac achm̄are'tenan Yompor, pocte'ñačo' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyoŧ, čho'ña čhota'tyeset; po'potantañečhnoñapa' tacllapechyeset.

⁶⁸ Pachm̄are'teñoŧetpa' atet otyeset:

—Te'ña ñerra'm po'ñočhte' Cristoŧpa' eñoratenperrepa' Parets allochñapa' attoch p̄otey esesha'te'ña pečhota'tyene'.

Atto Pedropa' a' nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allñapa' huapoña coyanesha' ñeñt cornesha' pueñañra, ñaña' atet otosan Pedro:

—Paca'ye e'ñe coŧaye'ña Jesús ñeñt galileo'marnesha'.

⁷⁰ Pedroñapa' anapue'pa' čha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeñt atet p̄otenen.

⁷¹ Allempoña Pedropa' ahuerr; čherr allotecma be'tenet o'ch čhapuet o'pono pampo. Allñapa' entuererr po'psheñeñ coyanesha' ñeñt cornesha' pueñañra. Ñaña' atet otan ñeñt parro allo'tsa'yenet:

—Añ acheñerpa' ñeñtca'ye coŧene'ña Jesús ñeñt nazareto'marnesha'.

⁷² Pedroñapa' alla a'nasotererrpa' atet oterrerr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeñt p̄otenen.

⁷³ O'ña o'čtterrerrpa' huapoña ñaña ñeñt tomčha'tyets all, ñetpa'čho'ña atet otoset:

—Po'ñočhca'ye p̄apa' Jesúsca'ye pueyochreshaŧ. E'ñe atet peñen ñerra'mrrate' galileo'marnesha', ñeñto'marca'yeña o'yeyotaŧ.

⁷⁴ Allempoña Pedropa' e'ñe puehquëñoŧanetpa' atta otatse'tyerraneterr, ñeñtpa' atet otanet:

—Napa' e'ñe Yompor pa'so'chño notenes, ñerra'm amate' po'ñočhoye' notensopa' te'pa' nerromuepa'. Napa' po'ñočhca'ye ama nentareña añ yacmar.

Ñeñña otuanetpa' e'ñepa'tcha' allempocma eñenña atollop.

75 Allempoña Pedropa' alla yerpuerrana ñeñt atet oteñ Jesús: "Amach eñena' atollop ñaña'pa' o'ch ma'poch ña'nasotenna." Allempoña Pedro cha'nom allotpa' ahuo' a'yenet allña'pa' all atarr yahuosa huomenc.

27

Allempo chapata'mueñet Jesús allo'tsen añcha'taret Pilato (Mr. 15.1; Lc. 23.1-2; Jn. 18.28-32)

1 Tsapaña puetarenpa' ñeñña pa'mcha'tareternesha' pen allohuen judionesha' po'cornaneshar ñetña'pa' apcha'mueneterr parro epuet ñeñt pompornesha' pen judionesha'. Allña apchenetpa' ñetña allohuenetpa' cotape'chatanna'tet attotcha' muetsatateret Jesús.

2 Jesúsña'pa' o' huancota'tuet allempoña'pa' anma'mueñet allo'tsen añcha'taret Poncio Pilato (ñeñt nen gobierno Romot ñeñt añcha'tarettetsa allo'marneshacop). Allca'ye poma'mueñetña Jesús.

Atto tsomerra Judas e'ñe ñañeña

3 Judasña ñeñt pomue' Jesús'pa' allempoña ñapa' eñoch Jesús'pa' chochca'ye muetseret. Allempoña puellquëño'pa' ello alla cotape'cherran cohuen. Allempo atet cotape'cherrpa' ñaña'pa' alla pomuerran quelle ma'poch charratlla. Alla apuerrana' cornaneshap' pa'mcha'tareternesha' ñaña ñeñt pompornesha' pen allohuen judionesha'.

4 Allña'pa' atet otuerranet:

—Napa' o' cha norrtaterr ñeñt ama cohuenayaye, o'ca'ye cha nepomuer acheñ attoch muetseret ama't ñapa' ama't coñe'ta amaca'ye eñalleña po'chñar.

Ñetña'pa' atet anaprra'tet:

—Ñeñ'pa' amaca'ye errotenoña yocop, ñeñ'pa' pocpaca'ye.

5 Allempoña ñapa' atta huapore'terrana' quelle o'pono Parets pa'paclopa' o' alla ahuer, e'ñe puellquëño'pa' tsoña'huerra ñañeña.

6 Cornaneshap'ña'pa' o' alla cheterret quelle. Ñetña'pa' atet otanna'tyeset.

—Añ quellepa' alloca'ye atsa'taretta attoch shataterrñañet acheñ po'rras. Ñeño'marña te'pa' amate'ca'ye pocteyaye o'ch alla yenererr allecma apchenet quelle Parets pa'paclo.

7 Allempoña e'ñe ñagattsetapa' atet a'pochtachet o'ch raññoñet allo añ po'patseñ ñeñt ye'chcatyene' patsrro' allochña'pa' allcha' pampa'yeret ama't erra'tsena acheñer ñeñt ahupña ñerra'm esempo rromayenet allampaño.

⁸ Ñeñto'marña ñeñt patserpa' añ sochet Errasatsotnanen tarro'mar ñeñte quellayero rañtyet allo ashataretterra er-rasats. Ama't teme'ttsen ñeñt patser socheñet Errasatsotna-nen.

⁹ Attoca'yeña etsotaña atet ote't Jeremías ñeñt a'mítaye't Yompor po'ñoñ ahuañ, ñeñtpa' atetca'ye quellquë't Cristocop: "Cheterretcha' ñeñt ma'poch çharratlla quelle ñeñt allpon po'tsa' nen israelena'tarnesha' atto muetsatateret.

¹⁰ Ñeñtña quellepa' allochca'ye rañterrñañet po'patseñ ñeñt yeçhcatene' patsrro'. Atetca'ye otenenña Partsesha' o'ch atet neña."

Atto Jesúsapa' a'p'to'tare'teñ añcha'taret Pilato

(Mr. 15.2-5; Lc. 23.3-5; Jn. 18.33-38)

¹¹ Allempo çhapachet Jesús añcha'taret Pilatesho, allñapa' all añcha'taretñapa' allenta a'p'to'taþ:

—Papa' ¿þa'tña añcha'tarettetsaña judioneshacop?

Jesúsñapa' atet och:

—Napa' ñeñfenca'ye atet þoten.

¹² Ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetña allpa' atarr otteñe'chyesoset Jesús. Ñañaapa' ama't mameshapa' ama eñoreno, ama't parrocha ama anapuenaneto ñeñt atto a'metare'teñet.

¹³ Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

¹⁴ Ñañaapa' ama anapuenaneto ama't e'ñe parrocha. Ñeñto'marña añcha'taretpa' nanac cohuaña'teñ. Ama eñoteñeto eso'marñe' ama eñoreno ñocop.

Atto añcha'taret Pilatopa' otanet ama'tpa' çhosa muetse'ña Jesús

(Mr. 15.6-20; Lc. 23.13-25; Jn. 18.38-19.16)

¹⁵ Ñehua, ñetpa' atetca'ye yeçhenet. E'ñe pate'tets char allempoch çherrerr pascuapo, ñeñtña añcha'taret ñeñt nen gobierno Romotpa' ñañaapa' çhocmach a'rroyerran puesheñarr judioneshacop ñeñt ayottamþsarettetsa allempo, ñeñtara ñeñt pamo'ts penet ñet. O'ch apanet erra'tsençho' enamuenet ñeñt muenenet ñet. Ñeñtpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

¹⁶ Ñaña e'ñe allempopa' allo'tsen puesheñarr judionesha' ñeñt ayottamþsarettetsa ñeñtpa' añ pa'so'cheñ Barrabás. Allohuenetpa' e'ñe eñotueñet añecopña yottamþeñet ñapa' çhocma atpare'tane't añcha'taret ñeñt nen gobierno Romot.

17 Ñeñto'marña allempo ap'cha'hua allohuen acheñenesha'pa' am'cha'tareña Pilatopa' a'p'to'tapanet:

—¿Erra'tsena't semnenña ñeñt'cha' na'rroyonas, ñato' añcha' Barrabás amapa' Jesús ñeñt' otenet Cristo?

18 Ñehua, Pilatopa' eñotapan judionesha' pa'm'cha'tareternesha' ñetpa' e'ñe pue'moñe'tateñme'chatsa o' pomueret Jesús. Ñeñto'marña Pilatopa' añ muenen o'ch a'p'to'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

19 Ñaña tarro'mar allempo anorros po'conaño allcha' a'p'octatan ñoñets, puetaporñapa' oñmach po'ñoñ all oteñ: “Amach erroť peřatsche Jesús ñeñt' e'ñe cohuen acheñer tarro'mar ama't añ tsapro napa' o' nechopo'teñ; napa' ñeñt'ña atarr neyore'te'.”

20 Tarraña ñeñt' pa'm'cha'tareternesha' pen judionesha' po'cornaneshar ñaña ñeñt' pompornesha' pen allohuen judionesha' ñetñapa' añña atarr cotape'chatenet acheñenesha' attoch ñetpa' allohuenetpa' o'ch ochet Pilato:

—Añcha' p'a'rroyerrnay Barrabás, Jesúsñapa' pemtsat-achepa'ch.

21 Allempoña añcha'tareť Pilatopa' o' alla a'p'to'terraneterr:

—¿Erra'tsena'tña po'ñočh añ epsheño'mar semnen ñeñt'cha' na'rroyerrnas?

Ñetña anaprra'tetpa' atet ochet:

—Añcha'ca'ye p'a'rroyerrnay Barrabás.

22 Pilatoñapa' alla oterraneterr:

—Ñehua, añ Jesús ñeñt' otenet Cristopa' ¿erroťe'tcha'ña nepe'?

Allohuenetñapa' alla otereterr:

—¡Ñapa' pecorso'tam'psachñaca'ye!

23 Pilatoñapa' atet oterraneterr:

—Ñapa' ¿eso'tña pen ñeñt' ama't mameshapa' ama pocteye' sentapreteñe?

Ñetñapa' alla rrannarterretter huomen'c'pa' atet oterretter:

—Ñapa' ¡čho'pañaca'yeña corso'tam'psate'!

24 Pilatoñapa' e'ñe eñoteñ attoch ñapa' amach erroť pe, elloña acheñenesha'pa' čha atarr atsre'močhtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye' otteñe'chenaye, ñeñt'pa' atet oterraneterr:

—Napa' amach seyohuatsetno attoch rroma añ acheñer ñeñt' ama't coñe'ta ama čhoye' erroť es peno. Ñeñt'pa' ama nocpa'nayaye, ñeñt'pa' e'ñeca'ye sapte'c'pa.

25 Allohuenña acheñenesha'pa' ñetñapa' alla otereterr:

—Attoch rromapa' ama'tpa' yohua'yetepa'—ya ñaña ama't yemñrenñohuen.

²⁶ Allempoñapa' a'rroyerranet Barrabás, Jesúsñapa' ashtach allempoñapa' otan po'solltarneshar:

—Te'pa' o'ch secorso'tamñpeña'.

²⁷ Ñehua, solltarnesha'ña ama aneñeta' allcha' corso'tamñpsoset ñetñapa' arrña ñanom anmet Jesús amcha'taretepahuo. Allña agotachet allohuen po'potantañ solltarnesha' ñeññ allo'tsa'yen o'ch e'ñe apçhet Jesúsesho.

²⁸ Allñapa' pa'llocchame'teñoñet Jesúsapa' rrotamñpes pa'shtam, chorrachet shetamuets tsamamuen ñeññ pa'shtam pen ñeññ po'ñoçh amcha'tarettetsa.

²⁹ Pellta'toñet ñaña choyo'mets agreçhpa' ñeññña choyo'mñtachet ñeññ atet choyo'mñtena ñeññ po'ñoçh amcha'tarettetsa. Orrachet ñaña tsacheñ poto po'cohuenrot ñeññ atet orren ñeññ po'ñoçh amcha'tarettetsa. Allempoñapa' concorpa'yesyet. Pa'llocchame'teñoñetpa' e'ñe atet pçhachet ñerra'mrrate' ñeññ e'ñe po'ñoçh amcha'tarettetsa. Pachmñare'teñoñetpa' atet oteñet:

—Puetare' amcha'taretecha', atarruaca' cohuenepñe' pã ñeññepñ judionesha' pa'mcha'taretepeñ.

³⁰ Pueche'tatseteñoñet a'coshare'teñetpa' o' chetamñperetña ñaña tsacheñ potoçpa' alloña asto'tame'teñet poño.

³¹ O'ña achmñare'tuahuetpa' allempoñapa' rrotamñperet shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tamñpeñeta'.

Atto corso'tamñpsoset Jesús

(Mr. 15.21-32; Lc. 23.26-43; Jn. 19.17-27)

³² E'ñe ahuanmatsetpa' allña oñenetpa' o' poçtet puesheñarr yacma ñeññ cireneo'marnesha' ñeññpa' añ pa'so'cheñ Simón. Ñañaapa' allenta chechatnomet Jesús po'corsoch.

³³ Chapachet all socheñet Gólgota ñeññ yoten yeñoño Poñetallepno.

³⁴ O' çhapachet all Jesúsapa' aposetañ vinos ñeññpa' añ atsetareñ pueretso ñeññ atarr pesherr. Atta amñle'pa' ama mueno o'ch orr.

³⁵ Allempoña o' corso'tamñpesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Attoña etsoterra añ ñoñets ñeññ a'mñtaye't ahuat Yompor po'ñoñ. Ñehua, allempopa' e'ñe atet ñerra'mrrate' Cristo otatse't, ñeññpa' atet oten: “Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet neshtam puema'tets.”

36 Allempoña solltarnesha'pa' alla anorrcha'tet o'ch cohuam̃p̃set.

37 Ñehua, poñoť all corsocho all noñet tsachtall aquell-careť attochña eñoteñet ñeñtecop corso'tam̃peñet. Ñeñña quellecpa' atet oten: "Añ Jesús'pa' ñeñtca'yeña judionesha' Pa'm̃cha'tareťer."

38 Allñapa' corso'tam̃p̃set epuet ñaña epsheña eñet, puesheñarrpa' nosñañet po'cohuenrot, po'psheñeññapa' nosñañet pue'chcoťerot.

39 Ñeñña oñmachets allpa' ñetpa'cho'ña chocma achm̃are'tneñet. Pachm̃arñoťetpa' coño'coñtana'tyesneñet,

40 ñeñtpa' atet otyesneñet:

—Pa ñeñteř pommo'cheñoťpa' potatse'te't po'ch a'materrayeñ Parets pa'paquell, poma'pamtañocmo'ch alla paťomatereñ, te'ñapa' pa'queshp̃aterrañaca'ye e'ñe pañeña. Ñerra'm po'ñočhte' Parets Puechemereřpa' pesuerrañaca'yena tayecma corsochoť.

41 E'ñe attecma achm̃are'teñ, ñaña ñeñť pa'm̃cha'tareternesha' pen judionesha' po'cornaneshar ñaña ñeñť etsotayenayeñ ñoñets ñeñť atet anareť ñaña ñeñť pompornesha' pen allohuen judionesha', ama't allohuenet fariseoneshohuen. Ñetñapa' pachm̃are'teñoťpa' atet otatse'tyeñet:

42 —Te'ña pa'pa' o' pa'queshp̃atyes po'potantañ, pañapa' eso'mare'tcha'ña ama eshcaye' pa'queshp̃aterroña e'ñe pañeña.

E'ñe pachm̃are'teñoťetpa' atet otyereterř:

—Papa' ñeñteřo'ca'ye israelnesha' Pa'm̃cha'tareťereřpa' pesuerrañaca'ye corsochoť allochñapa' attoch yame'ñařa yaña.

43 Papa' pa' yemtenaya Yomporpa' te'ñapa' a'queshp̃aterrpepa'ñaca'ye ñerra'm po'ñočhte' e'ñe cohuen muerenřa. Papa' ñeñteř po'ñočh atet otets Yomporo' Puechemereř.

44 E'ñe attecma pe' ñaña eñet ñeñť epuet corso'tam̃peñet ñetpa'cho'ña atarr es otnare'chet alloť po'corsochoť.

Atto rroma Jesús all po'corsocho

(Mr. 15.33-41; Lc. 23.44-49; Jn. 19.28-30; Heb. 9.11-14)

45 O'ña chap poctopa' o'huañ atsnom o' e'ñe checmetua ora errařaren añe patsro, o'ña ellerrotenmochapa' o' alla puetarerr.

46 Allempoña ellerrotenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Elí, Elí, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

47 Puesheña'tetsña ñeññ tomchets all ñeññ e'mue' atet oten Jesús, ñetñapa' amaca'ye e'mueññañeto po'ñoñ ñeññ atet oten, ñeñño'marña ñetpa' cha otyeset:

—O' cha chore'tante' Elías ñeññ a'mtaye't ahuat Parets po'ñoñ.

48 Allempoñapa' mata puesheñarr ñeññ allo'tsen, e'chomosan chella'so ñeññ atsotso'tpo' o' ne' tsachpopa' alloña tsotso'tatosanña Jesús.

49 Po'potantañña' atet ochet ñeññ tsotso'tatene':

—Amach es p̄apatsche, te'pa' attachca'ye yecue' ñato'rraña huapa Elías ñach a'queshp̄atose'.

50 Allempoña Jesús'pa' o' alla rranerrerr huomencpa' rroma.

51 Allempoña besom allo yottam̄peññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrrarna'tyes mapuetačno.

52 Torna'tam̄pesyes apampaña. Shonte' ñeññ pueyochresha' pen Parets ñeññ o' colla'huañ, ñetñapa' ahuepa't e'ñe tanrra'tuerret.

53 Allempoña tanterra Jesús'pa' ñetpa'cho'ña o' sohuanerretña all apamparettete't o' alla ahuanerret anetso Jerusaléño ñeññ anaret Partsocop, allña'pa' shonte' acheñ ñeññ entapuerrahuet.

54 E'ñe allempo rroma Jesús, solltarnesha'ña epuet po'captaner ñeññ allpon cohuan̄pene' Jesús, ñetñapa' e'ñe enteñet ñeññ atet pa'yesa allempo, atto pella pats. Ñeñño'marña ñetpa' atarr yorenet. Allempoñapa' atet otet:

—Po'ñochuaca'ye añmapa' Partsepa'tca'ye Puechemer.

55 Allo'tsa'yen ñaña shonte' coyaneshačno, ñetñapa' a'yota cohuanrrorteñet. Ñetpa' ñetca'yeña co'ta'huanmue'ña Jesús Galileoteñ ñeññ sherba'yese't.

56 Ñeñtpa' María Magdalena ñaña po'psheñeñ María ñeññ Jacobo pachor ñaña José. Allo'tsen ñaña ñeññ pachor pen Zebedeo puechemerasha', ñaña po'potantañečno coyaneshačno.

Atto pampuet Jesús

(Mr. 15.42-47; Lc. 23.50-56; Jn. 19.38-42)

57-58 Atteñapa' o' ellerren. Puesheñarr ñeññ ec̄llayoret ñeññ pa'so'cheñ José ñeññ arimateo'marnesha' ñeññara Jesús pueyochresha' ñaña'pa' ahuos Pilateshopa' o'ch oteña' pocte'ch eñch ñach asuatose' Jesús ñeññ rromuets corsocho. Pilatopa' atet otan pa'cheñer:

—Te'pa' o'ch sa'rroyoñ arromñañ anerepa'.

O'ña ellerren Joséñapa' o' çherr corsocho,

⁵⁹ a'suatuerran Jesús corsochoť all rromuen. Allempoñapa' ep̄atse'ch shetamtso ñeñť e'ñe cohuen emarr. Allempoñapa' aneñ allcha' pampueña'.

⁶⁰ All e'ñe errte' eñatene' mapuetpon ñeñťpa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottam̄pesner ñeñť puepampuer p̄ach. O'ña yottam̄pesuanerpa' Joséñapa' ahuerr.

⁶¹ Allñapa' allo'tsen María Magdalena ñaña po'psheñeñ María. Ñetñapa' alla anorr̄cha'toset allame'tets all pampueñet.

Atto guardianesha'pa' cohuan̄peñet all pampuet Jesús

⁶² Met añ yeter allempo çhocmach añño'terreterr ñeñť tsapat̄ecop allempocma amesen judionesha'. Tsapatñapa' ñeñť pa'micha'tareternesha' pen judionesha' po'cornaneshar ñaña fariseonesha' ñetñapa' e'ñe alla shontenet parro all Pilatesho.

⁶³ Ñeñťpa' atet otoset:

—Nomp̄orcha' yapa' o'ca'ye yeyerpuera añ acheñer ñeñť atarr ashcañpa' allempo corre'tpa' atetca'ye otye't: "Napa' ama't puema'pamtañopa' netanterrachca'ye rromot̄."

⁶⁴ Te'pa' pemñaye'chñaca'ye ñeñťcha' nanac cohuan̄psose' puepampro e'ñe puema'pamtañohua, te't huapa pueyochresha'pa' çhate'ca'ye e'ñe a'nahua ereta'. Allempoña ñetpa' çhate' ochet acheñenesha' Jesúsapa' o'ca'ye tanterra rromot̄. Ellote'ña ñet allempopa' nanacte' shecare'teret acheñenesha'. Ellote' metanerret ñeñť atto shecare'tyesete't ahuaña acheñenesha'.

⁶⁵ Pilatoñapa' atet otapanet:

—Añca'yeña guardianesha', te'pa' orras parro, ñetpa' o'ch cohuan̄psoset, e'ñech echarr seřam̄psosñañ puepampuer, errot̄encha' e'ñe pocte' sent sa.

⁶⁶ Ñetñapa' ahuanmuet puepampro. Mapue' allo yottam̄peñetpa' e'ñe cohuen yomrraram̄psoset attochña eñoteret ñerra'm esesha'ch toram̄perre'. O'ña e'ñe cohuen p̄am̄pesuetpa' allempoñapa' na'neret guardia all ñeñťcha' cohuan̄p̄se'.

28

Atto tanterra Jesús

(Mr. 16.1-8; Lc. 24.1-12; Jn. 20.1-10)

¹ O'ña huañ yetñats allempocma amesenet allempoña taya puetaren temenc allempo mo'tta'muena yetñatspa' Maríaña

Magdalena ñaña po'psheñeñ María ñetñapa' ahuatecma ahuanma'muenet o'ch enta'mueñet Jesús puepampro.

² Allempoña machayotepa'tcha' pella pats huomenc; añ sohuatsa Yompor po'mllañoñeñer entoñ. O' sohuapa' a'rrote'tosan mapue' a'yenet ñeñña mapue'pa' allña anorros.

³ Ñaña' atarr nanac poptosa e'ñe atet orrtosa ñerra'mrrate' meratste'. Pa'shtamñapa' atarr nanac huallama't.

⁴ Guardianesha'ñapa' ñeñña atarr yore'tose'. Puemchañoñetpa' cha yonshema'tyeset cha ota'yese't e'ñe atet ñerra'm cho rromuenet.

⁵ Allempoña mellañoñeñpa' atet otapan coyanesha'čno:

—Amach cha seyorenatsto. Napa' neñotenes añca'ye semen o'ch senta'mueñ Jesús ñeñt corso'tamñset.

⁶ Amaca' arro'tsenaro arr, ñapa' atet otase'tpa' te'ñapa' o'ca'ye tanterra. Sonca'ye secueña' all panet amaca' eñalle.

⁷ Secua'huepa' orrerres sema'yoreñ o'ch soterrñaña' pueyochresha': "O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer."

⁸ Allempoñapa' puema'yoreñ ahuanerret puepamproñ. Ama't yorenetañpa' pocsheñesha' matrra'terret o'ch oteññañeta' pueyochresha'.

⁹ Mataçhetsetpa' Jesúsñapa' ahuepa'tcha' poctanet, huomcha'tapanet. Ñetñapa' allenta' ponenmyet, rromoset pa'rrpōt concorposñañet.

¹⁰ Allempoña Jesúsapa' atet otanet:

—Amach sencha'tatsetno. Orrerres sotennana' nemo'nasheñneshachno ahuanmuetepa' Galileo, allcha'ña e'ñe enternet.

Atto solltarnesha'pa' serrpare'tatyesan allohuen cornaneshachno ñeñ atet entet ñet

¹¹ Ahuanmatsetpa' puesheña'tetsña guardiapa' ahuanmuet ñamet anetso. Allña' serrpare'tatoset cornaneshapa'mcha'tareternesha' allohuen atet o' entuet.

¹² Ñetña allempo apçhenet epuet ñeñt pompornesha' pen judionesha' ñetñapa' cotape'chatanna'tet. O'ña cotape'chatanna'tuetpa' allempoñapa' apet solltarnesha' shonte' quelle.

¹³ Ñeñtpa' atet ochet solltarnesha':

—Te'pa' atetcha' sot: "Yaña tsapopa' muetsye'tpa' pueyochresha'ñapa' ahuo't huapuet a'nahua't ereta'ña arromñañt."

¹⁴ Ellopa' alla oterranerr solltarnesha':

—Ñerra'm añcha'taret cha e'mare'te' yapa' ya'pocatonascha' e'ñe cohuen ñesho attochña sapa' amach errot paseto.

15 Ñetña allempo agaphuet quellepa' atet otarettetpa' atetcho' pet. Ñeñto'marña ñet pueserrparñetpa' e'ñe allempoteñ epa'hua judioneshesho'mar.

Atto Jesús pa' otnerran pueyochresha'chno ñetpa' atetcha' pa'yerret

(Mr. 16.14-18; Lc. 24.36-49; Jn. 20.19-23)

16 Ñeñt'charra' puechena paterr pueyochresha'pa' ñetña pa' ahuanerret Galileo. Arr ahuanmuet all aspentó all otanet Jesús allcha' tet.

17 Allempo entosetpa' ñetña pa' cha concorpa'rreyesoset. Puesheña'tetsña pa' cha echarrtanet pueyo'chro.

18 Allempoña Jesús pa' ponmanet atet otapanet:

—Napa' apareten allohuen llesens a'ñe patsrecop ñaña Yomp'or pue'ntañecop.

19 Ñeñto'marña te'pa' orras o'ch sey'chatyes ora allohuen pa'namen acheñ attoch neyochresha' neperranet. O'ch sapatanet Yomp'or Parets pa'so'chño ñaña Yomp'or Puechemer pa'so'chño ñaña e'ñe Yomp'or Puecamquëñ pa'so'chño allochña pa' attochña e'ñe pueyochresha' perranet Yomp'or Parets.

20 Ñaña chocmach o'ch e'ñe sey'chatyesanet allochña pa' attoch e'ñe cohuen ame'ñerrnanet e'ñe ora ñeñt' allpon o' notuas. Ñaña señoche pa'ch napa' e'ñe pate'tets yet chocmach allo'tseney parro attoch chocma nebensare'tañpenes ama't tarrem'pohuach esempohuañen allempoch mellapoterra. Ñeñt'pa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN MARCOS

*Allempo orrta Juan ñeñt serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)*

1-2 Te' arr napa' o'ch nequellconas ñeñt e'ñe cohuen ñoñets alloch yequeshperra e'ñe yame'ñeñoña Jesucristo ñeñt Puechemer pen Yompor. Ñehua, ñeñt ñanom orrtatsa ñeñtpa' e'ñe atet o' perra e'ñe atet quellquë't Isaías ñeñt a'mtaye't ahuat Yompor po'ñoñ. Isaíaspa' ñapa' añca'ye quellquë't ñeñt atet Yomporpa' otan Puechemer ñeñtara Cristo, ñeñtpa' atet och:

Te'pa' peñoche'pa'ch napa' nemñerna'pcha' puesheñarr ñeñtcha' potam'perraya. E'ñe ña pueserrpare'teño'tpa' añño'terrna'pcha' allcha' p'oñmos p'ama esempo.

3 Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' otterranel: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pa'charretyesoñ pa'tep'." Arrpa' allohua ñeñt atet quellquë't Isaías.

4 E'ñe atet anuaret ahuatoteñpa' ñeñtña'pa' e'ñe'cho' atet perra allempo orrtosa Juan ñeñt apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñtpa' atet otosanet:

—Te'pa' o'ch soctape'cherr ello cohuen Yomporecop allochñapa' e'ñech cohuen sapataretterra e'ñe same'ñeño't Yompor. Attochña Yomporpa' o'ch peretna'huernas so'chñar.

5 Ñeño'marña shonte' acheñenesha' chocma huacha'tyenet ñesho o'ch e'mñoteñeta'. Allohuen ñeñt judeo'marnesha' ñama allohuen ñeñt jerusaléño'marnesha' chocma huacha'tyenet ñesho. Allña ñetpa' a'meta'yesoset po'chñaret, Juanña' apatyapanet Yomporecop. Ñeñtña oñ all apatyapanet añ pa'so'cheñ Jordanas.

6 Ñeñtña Juanpa' camello pue'ch apomotaret ñeñt pa'shtam pen. Allo chanena ñeñtpa' pa'rrom. Allña' rra'yesane't ahuañchenclla* ñeñta puerrar pe't epuet pets po'moñ.

7 Juanña'pa' atet serrpare'tatanet:

* 1:6 Ñeñt ahuañchencllapa' arrapo' enteñ palestino'marnesha'.

—Cristoña ñeñtcha' huapatsa chenta'pa' ñapa' atarrca'ye ahuamenca'tesha', nañapa' ama tama ahuamenca'teyayno. Ñapa' ñeñtña atarr sherbets, nañapa' ama es nesherbena attoch nemo'ca pa'rrpōt ama't po'sapatrechapa' o'ch nepyoñ.†

⁸ Ñaña napa' ama't napatensoñ Yomporecoppa' e'ñeca'ye oñochaya napatyenes. Tarraña Cristoña'pa' añcha'ca'ye choratossa Parets Puecamquëñ.

Allempo apataretta Jesús Yomporecop

(Mt. 3.13-17; Lc. 3.21-22)

⁹ Allempoña huapa Jesús Nazaretōt allara Galileo. Chap Juanesho allñapa' apatañ Juan oño Jordanaso.

¹⁰ E'ñe apatue'pa' o' cha'nerrña Jesús oño'pa' allenta entan enet atoraret. Allo'tña e'ñe sohua'nmaña Parets Puecamquëñ e'ñe atet entañ ñerra'mrrate' yeḡ o' sohua'nma entōt. E'ñe arr chap Jesúsesho.

¹¹ Allempoñapa' cha e'morrtatsa ñaña ñoñets entōt atet eñorena Yompor. Ñeñtña ñoñetspa' atet oten:

—Papa' ñeñteḡ Nechemereḡ ñeñteḡ atarr nemorrentena, ḡpa atarr nocshatene'.

Allempo oneñtēpa' topatenan Jesús, mueneñ o'ch atet ḡatan Jesús ñeñt ama pocteye' enteno Yompor

(Mt. 4.1-11; Lc. 4.1-13)

¹² Allempoña Parets Puecamquëñpa' allenta anman Jesús all amayo.

¹³ Pa'tatsoch charramat allo'tsena amayo; allñapa' allo'tsa'yen pa'namen berročno. Attoña allpa' o' huapoña oneñt mueneñ o'ch atet ḡatyēs ñeñt ama pocteye' enteno Pompor Parets. O'ña topatuahueña'pa' allempoñapa' hua'cha'toña ñaña Yompor po'millaño'teñnanesar; ñetña sherḡosetña Jesús all.

Allempo e'ñe ñenmañ torrena Jesús Partsocop all Galileo

(Mt. 4.12-17; Lc. 4.14-15)

¹⁴⁻¹⁵ Allempoña yottamḡset Juan allcha' muerochtachet, Jesúsñapa' allenta ahuerr Galileo. O'ña cherr all ñaña'pa' serrpare'tatuerranet ñeñt e'ñe cohuen ñoñets ñeñt huetsa Yomporeshōt alloch yequeshperra. Ñeñtñapa' atet otueranet:

—Te'ñapa' o' etsoterra yetñats, o' cherrmoch allempoch atarr ayochreshatterra Yompor. Socoppa' añ poctetsa o'ch soctape'cherr ello cohuen Yomporecop ñaña o'ch same'ñerra ñeñt e'ñe cohuen ñoñets allochca'yeña sequeshperra.

† 1:7 Ñeñt atet po'taruas pe't esclavos o'ch pueyamḡsan pamo'mte' po'sapatrech.

Atto Jesúsapa' chore'tosan pa'tatssheña ñeñt e'ñe caca torrenet rromuet

(Mt. 4.18-22; Lc. 5.1-11)

16 Allempo Jesúsapa' chopeñe'chyen all sa'patopño'mar; ñeñña sa'ppa' añ pa'so'cheñ Galileas. Allña'pa' entnoman Simón epuet pa'mo'nasheñ Andrés. Ñetña'pa' all terrayenet e'ñe all sa'po tarro'mar ñetpa' ñeñt po'taruas penet.

17 Jesúsña'pa' atet otosanet:

—Te'ña'pa' o'ch notas: Socta'n na attoch neyochresha' neperres. Ñeñt atet sepena ahuatoteñ e'ne' cac te'ña'pa' o'ch neyçhaterres attoch se'nerr ñaña acheñ ñeñtcha' same'ñaterra.

18 Ñetña'pa' allorocma na'nmuet po'terrayapa' o' cotet Jesús.

19 O'ña meterrerr a'yenteye'pa' allña'pa' entuerranerr ñaña Jacobo[‡] epuet pa'mo'nasheñ Juan; ñeñt'pa' Zebedeo puechemerasha'. Ñetña'pa' po'noñto'tsa'yenet all a'cohuenetyenet po'terraya.

20 Jesúsña'pa' chore'tuerraneterrpa' atet otuerraneterr ñamet:

—Te'pa' o'ch socta'n saña.

Ñetña'pa' allenta sa'nmet pomporet Zebedeo all po'noñto epuet ñaña pa'taruasañret. Ñetpa'cho'ña cotet Jesús attoch pueyochresha' perranet ñamet.

Allempo Jesúsapa' entap pueשהñarr yacma ñeñt chorrena oneñet

(Lc. 4.31-37)

21 Atteña'pa' ahuanmuet ñaña anetso Capernaumo. O'ña çhap añ yetñatsro allempocma amesen judionesha', allña Jesúsapa' be'tosos judionesha' po'prahuo, all yeçhatyesosanet.

22 Allempo serrpare'tatuanet Jesús, acheñenesha'ña'pa' epaye' cohuanrrorteñet ñeñt atet yeçhatenanet ña. Tarro'mar ñapa' atarr cohuen yeçhatenanet atet ñerra'mrrate' ñeñt allsensarettetsa Partseshot. Judionesha' pa'mcha'tareternesha' ñeñt atarr etsotayene' ñoñets ñeñt atet anareñ, ñetña'pa' ama e'ñeye' atteye' yeçhateneto.

23 Pueשהñarrña yacma ñeñt allo'tsen puerahuo, ñeñtña'pa' añ chorrenaya oneñet. Ñaña rranare'tapa' atet otapan Jesús:

24 —Eso'mare'tcha'ña erroñ peposey Jesús, pa' ñeñteñ nazareto'marnesha'. ¿Añecopfe' pehuena o'ch pa'chencaterrey? Napa' o' neñotapañ. Papa' atarr Partsoñ añ pellsensene' Pompore ñeñt atarr nanac Parets.

25 Tarraña Jesúsapa' ama muenache o'ch eñorana'cha. Ñaña'pa' atet och:

‡ 1:19 Jacobopa' ñeñfara ñeñt sochenet Santiago.

—Pemma, te'pa' choḡaña queḡpa'nerre'ña añ acheñer.

²⁶ Oneñeññapa' ḡha atanman yacmapa' alla o'shshe'ma. Oneñeññapa' ḡha rranare'tnoma allempo queḡpa'nerran acheñ.

²⁷ Acheñenesha'ñapa' ḡha atarr torats ḡpanet pueyoḡhret. Ñetñapa' atet otanna'tyeset:

—Ta'mca'ye, erroḡente'ca'yeña Jesús po'ñoñ; po'poñontepa'tca'ye yeḡhatyen. Ñeñtpa' erroḡente'ca'ye. E'ñe atet pena po'ñoñ atet ñerra'mrrate' ñeññ allsensarettetsa Yomporeshoḡ. ¡Ama't oneñeñ erroḡ otenpa' atetḡho' ḡpateñ, e'ñech ame'ñateña!

²⁸ E'ñe mamecmapa' o' e'ñe serrpare'tuahuet allampaño'mar Galileo atet ḡa'yena Jesús.

*Allempo a'crratosan Jesús Simón Pedro pa'so'mue
(Mt. 8.14-15; Lc. 4.38-39)*

²⁹ Allempoña ḡha'nmaḡherret puerahuoḡpa' arr ahuanmuet all yeḡhena Simón ñaña pa'mo'nasheñ Andrés. Allñapa' añ coḡa'nmue' Jacobo ñaña Juan.

³⁰ Allña Simón pa'so'muepa' ḡha atsna'ten, ḡha huoraten, alla ḡpanena po'mayo. Otapet Jesús:

—Simón pa'so'muepa' ḡha atsna'ten.

³¹ Allempoña Jesúsapa' ponmosana atsnañeḡpa' rremota'tos pototpa' ḡha echantose' ḡha metuerretsña atḡo huoraten. Allempoña o' metua po'urateñapa' allenta tanta o' agapapanet e'ñe cohuen o' yema'tapanet.

*Allempo Jesúsapa' a'crraterran shonte' pa'namen
atsnañeḡḡhno
(Mt. 8.16-17; Lc. 4.40-41)*

³² Ñeñte yetrocma allempo ellerren o' emuena atsrreḡpa' acheñenesha'ña huapatyesnenet Jesúsesho allohuen ñeññ at-sna'tyets ñaña ñeññ chorra'yena oneñeñ.

³³ Huaḡha'tyesoña allohuen anetso'marnesha', ñetñapa' alla shontoset alloḡecma be'tenet pocollo.

³⁴ Jesúsña allempopa' e'ñe a'crratyesuapanet, ama't shonte' pa'namen atsnañtsoḡhno ñeññ osyenahuet. Ama't ñaña shonte' acheñenesha' ñeññ chorra'yena oneñeñ ñeññpa'ḡho'ña e'ñe queḡhpatyesuapanet oneñeñ ñeññ chorra'yenahuet. Jesúsñapa' ama muenatano oneñeñ atḡoch eñorana'tnomet, ḡarro'mar ñetpa' e'ñe eñoteñet ñapa' ñeññca'ye Cristotets.

*Allempo Jesúsapa' serrpare'tatyesnoman acheñenesha'
erraparen Galileo'mar
(Lc. 4.42-44)*

35 Tsapañña e'ñe ahuatecma tanta'muena Jesús, ama e'ñe orretuena' cha'nma'muen ñeñte anetsrot ahuamuen all ama acheñempañooye allcha'ma'yocha'muena.

36 E'ñe o'chtatsapa' ahuamuen ñaña Simón ñaña po'psheñechno ñeñt epuet ta'muena. Ñetpa' o'ch e'nereta' Jesús.

37 Allempoña entosetpa' atet otoset:

—Papa' allohuen acheñenesha' chocmaca'ye e'nenpet.

38 Ñañaapa' otapanet:

—Te'pa' o'ch ahuey po'poñ anetso ñeñtara allampaño'mar allpa'cho'ña o'ch neserrpare'tatyeshomanet tarro'mar napa' ñeñtecopca'yeña nohuapa.

39 Allempoñapa' chopeñe'chyes Jesús erraḡaren Galileo'mar, serrpare'tatyeshanet e'ñe ñet po'prahueto. Ñaña ñeñt chorra'yena oneñeñ, ñañaapa' e'ñe quechpatyeshuanet.

*Atto Jesús a'crraterran pueheñarr yacma ñeñt aptsarñat
(Mt. 8.1-4; Lc. 5.12-16)*

40 Allempoñapa' huapoña ñaña pueheñarr yacma ñeñt osen puetsarñats ñeñt otenet lepra. Chap Jesúseshopa' concorpana'tosana Jesúsapa' atet otos:

—Ñerra'm ḡa muenatspa' ḡa ñeñteḡ atarr ahuamencateshaḡ ḡa'crrataye'cherren allochñapa' attoch e'ñe cohuen entuerren acheñenesha'.

41 Jesúsñapa' e'ñe cohuen muerapya ñeñto'marña anretapa' allenta a'ḡlle', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerreḡ allohuen acheñenesha'.

42 Yacmañapa' allorocmuepa'tcha' metuerña pueptsarña cha cohuenterrtsa.

43-44 Jesúsñapa' alla otererr:

—Te' atto o' na'crraterreḡpa' po'ñoch ama't e'ñe pueheñarrapa' amach ḡotaḡsa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñecop ñeñtcha' a'crratare'tterrtsapa' te'ñapa' o'ch es ḡanom ñeñtcha' ḡapos all ñeñt Yomporecop. Allochñapa' attoch e'ñe cohuen entuerreḡ allohuen acheñenesha'.

Attotca'yeña Jesúsapa' mueñe o'ch ahuo' corneshesho.

45 Ñañaapa' allempo ahuo'pa' e'ñe serrpare'tatyeshuanman allohuen acheñenesha' ñeñto'marña e'ñe ña pa'metare'teñoḡpa' o' erracmañen eñotuet ñeñt atet ḡa'yena Jesús. Ñeñto'marña Jesúsapa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempañooye.

Tarraña ama't atet penañ acheñenesha'ñapa' allemñateñ huača'teññañet ñeñt shontenoya ama't all.

2

*Atto Jesús a'crraterran ñaña ñeñt echarraña
(Mt. 9.1-8; Lc. 5.17-26)*

¹ O'ña met allponmat Jesúsñapa' o' alla çherrerr anetso Capernaumo. Acheñenesha'ñapa' e'mare'chet o' alla çherrerr pocollo.

² Allempoñapa' o' alla shonterrñañerr acheñenesha'. Atteñapa' o'huañ epuet o'pono pocollo. Ama't allot be'tenet pocolopa' o'huañ epuet. Jesúsña allpa' serrpare'tatapan acheñenesha' Yompor po'ñoñ.

³ Atteñapa' huapatam̄psoñet ñaña echarraña ñeñtñapa' pa'tatssheña ñeñt anmam̄pene' puechecnaṣoṭ.

⁴ Ñetpa' añ muenenetañ o'ch be'tososet o'ch e'ñe noset Jesúsesho, tarraña shonte' acheñenesha' ñeñto'marña ama eshcaye' abe'tosetoña atsnañeñ attoch çhapachet e'ñe Jesúsesho. Atteña a'tapatset enot pocollato, ñeñtña pocollpa' patsopo'. Ñetñapa' rrorosetña ñeñt pocollatar enot e'ñe ñeñtecoptaro'tsen Jesús all patsot. Allostña a'suatañpsosetña echarraña e'ñe puechecnape'na. Attoña çhapachet e'ñe rroçho allo'tsen Jesús.

⁵ Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, ṗa ṗo'chñarpa' o' aṗretna'huareterra.

⁶ Ñehua, allñapa' allo'tsa'yen ñaña puesheña'tets ñeñt atarr etsotayenayeñ ñoñets ñeñt atet anaret judioneshapoc. All anorrçha'tyenet ñetñapa' atet otatse'tyeset pueyoçhreto:

⁷ “Eso'mare'tña atet eñenña añ acheñer. Ñeñt atet otenpa' ñapa' çhaca'ye achm̄are'tenanña Yompor tarro'mar arr patropa' ama't e'ñe puesheñarra ama eñalleña ñeñt peretnene' ochñarets ñapña Yompor peretnene' ochñarets.”

⁸ Jesúsña pueyoçhropa' eñotanet ñeñt atet otyenet ñet pueyoçhreto ñocop. Allempoña Jesúsapa' atet otanet:

—Sapa' eso'mare'tcha'ña atet soçtape'chatse'tyesña seyoçhro.

⁹ Sapa' çhate' soten ñeñt atet o' notue echarraña po'chñar o' aṗretna'huareṭta, ñeñtapa' ama torrapahuoyaye. Sapa' añña atarr torrapo' senten attoch na'crrater, çhoncha'ña ote': “Petantena, peçhta'nen pemue'pa' o'ch peçhopedchenen.”

¹⁰ Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

¹¹ —Te'ña napa' o'ch notap̄: Petantena, pechta'nen pemue'pa' o'ch pechope'chnen, ahuenep̄ pepac̄llo.

¹² E'ñe otue' atetpa' echarrañañapa' čha tantetsa e'ñe allorocma, o' cheta'nenan po'mue'pa' čha'nen alloť. Allohuenña acheñenesha' e'ñe entueñet; ñetñapa' čha atarr cohuanrrortapueñet. Ñeñto'marña ñet allempopa' atarr cohuentatyeññañet Yompor. Ñetñapa' atet otyenet:

—Yapa' ama't ahuatapa' ama yentareña atet ñeñť atarr cohuen.

Allempo Jesúsapa' hua'ña'nman Leví attoch pueyochresha' per

(Mt. 9.9-13; Lc. 5.27-32)

¹³ Jesúsñapa' alla ahurrerr sa'patop̄ño. Allohuen acheñenesha'pa' alla huačherrñañeterr, ñaña'pa' yečhatyesapanet.

¹⁴ O'ña yečhatuanetpa' o' meterrerr Jesús alloť, allña oñenpa' entnoman ñaña Leví* ñeñť Alfeo puechemer. Ñaña'pa' alla anen allecma cobra'yenan acheñenesha' quelle ñeñť gobiernocop. Jesúsñapa' atet otosan Leví:

—Te'pa' o'ch p̄octa'n attoch neyochresha' neperreř.

E'ñe otue' Jesús atetpa' Levíñapa' čha tantnomtsapa' allenta cotan Jesús.

¹⁵ Allempoña čhap ñaña allempo Jesúsapa' alla rrallme'chen Leví pa'pac̄llo. All rrallme'chapreteñ shonte' acheñenesha' ñeñť po'taruas pa'yenet ñamet o'ch cobra'yenan acheñenesha' quelle ñeñť gobiernocop. Ñetpa' atarr ashcañnesha' entenamet acheñenesha'. Ñaña allo'tsa'yen shonte' po'potantañečno ñeñť atarr ochñañenesha' entyen acheñenesha'. Ñetñapa' all anorrčha'tyenet all anen Jesús epuet pueyochresha'. Tarro'mar shonte' acheñenesha' ñeñť cota'huanene' Jesús.

¹⁶ Añña fariseonesha' ñeñť allo'tsa'yen ñaña ñeñť etso-tayenayen ñoñets ñeñť atet anaret ñeñťareta judioneshet, ñetña allempo enteñet Jesús all rrallme'chapretenan ñeñť atarr ochñañenesha' ñetñapa' allenta otoñet pueyochresha':

—Eso'mare'tña ñeñť semaestror sepenpa' rrallme'chapretenaña añ acheñeneshar ñeñť puehquēñote'na cobra'yene' acheñenesha' ñaña epuet acheñenesha' ñeñť atarr ochñañeneshačno.

¹⁷ Atet e'manet Jesús, ñaña'pa' atet toma'ntatanet:

—Ñeñť e'ñe huomech entetsapa' ñetpa' ama e'neñetoña apartañ. Añña ñeñť atsna'tetspa' ñetñapa' čhocma e'nenet ñeñťcha' a'crraterrahuet. Napa' ama añecpaye' nohuapo

* 2:14 Levípa' ñeñťara ñeñť sochenet Mateo.

attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop.

Allempo Jesúsapa' eñotatanet atetcha' tore'tet Yomporecop ñeñt po'ñoçh sherbets

(Mt. 9.14-17; Lc. 5.33-39)

¹⁸ Parrochña allempo tore'tyena† Juan pueyochresha' Yomporecop ñaña fariseonesha' pueyochresha', puesheña'tetsña acheña' huacha'tet Jesúsesho, ñetñapa' atet otoset Jesús:

—Juan pueyochresha'pa' tore'tetset Yomporecop; fariseonesha' pueyochresha'pa'cho'ña tore'tetset ñamet Yomporecop. Paña peyochresha'pa' eso'mare'tña amaña tore'teneto.

¹⁹ Jesúsñapa' atet toma'ntatanetpa' ñeñtapa' atet otanet:

—Ñeñt ahua'ñareteçhno all rrallme'chapreteñet ñeñt e'ñe errete' sena'tetsa, ama pocteyaye o'ch yot Janet “amach es serra'yesatsto” tarro'mar ñeñtapa' atet coshapreteñet ñeñt sena'tetsa. Amachña çha tore'teno allempo allo'tsenmeñ parro ñeñt errete' sena'tetsa.

²⁰ Tarraña ñerra'm esempo machayoça sa'nerranet ñeñt sena'tetsa, ñeñtña parro yemuetyenapa' allempoña ñetpa' e'ñe puellquëñoçtet queçhpa'huerretcha' puerrar, amach arrenaye' enterreto. Ñeñtapa' attochña tore'terret allempo Yomporecop e'ñe po'ñoçh. Arrpa' allohua huañ ñeñt atet Jesús toma'ntata ña sena'tostsa.

²¹ Elloñapa' o' alla toma'ntaterraneterr ñeñt atet yeçhen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet yeçatsechpa' ñeñtapa' e'ñeçh orrena yellteñ tarro'mar ñeñt emarr lletamuetspa' ñerra'm esempo yatsama'tamçespa' çhach chellama'ta çhach martse'tatanña shetamtsoşe'm. Ñeñtña yelltenpa' allo'nach sen rrrartse'tats nanac.

Ñeñtapa' attoña Jesúsapa' eñotatanet ña poçtañña e'ñe etserra.

²² Jesúsñapa' alla toma'ntaterraneterr po'poñ ñeñt atet yeçhen judionesha' o'ch yeçcatenet pa'rrom orrot. Ñeñto'marña atet otanet:

—Ama't puesheñarrotçeyapa' amach yeshatstoña vinos emasa mellasha'mañ orroto ñeñt ayeçcataret pa'rrom. Tarro'mar ñerra'm atet yepe'pa' o'ch chasa'ña vinospa' çhach

† 2:18 Añ tore'teñetspa' añecop o'ch yetorra Yomporecop. Amach añecpayaye atomat, ñeñtapa' añecpa mameshacop o'ch yequeçhpa' yerrar.

a'ptsan orroṭ, vinosñapa' čhaṭe' e'ñe shebhua, ñeñña orroṭpa' ama't mameshapa' amach es sherberro. Añña ñerra'm emasa vinos arrcha' yeshe' emerra orroṭo ñeñ ayečcatareṭ pa'rrom.

Ñeñpa'cho'ña attoña Jesúsapa' eñotatanet ña poctaṭña e'ñe etserra.

Allempo Jesús pueyochresha' taso'tañpesyesnomuet trigo añe yetro allempocma amesen judionesha'

(Mt. 12.1-8; Lc. 6.1-5)

²³ Allempoña čherrerr pamṭarr allempo čhocma amesen judionesha'. Allempoña Jesúsapa' arr oñem chetso'mar epuet pueyochresha'čno. Allempo oñenet chetso'mar pueyochresha'ñapa' taso'tañpesyesnomuet puechña'tets trigo.

²⁴ Fariseonesha'ñapa' ñeñ entahuet ñetñapa' allenta otyeset Jesús:

—Pecue' eso'mare'tña peyochresha'ñapa' atet penet ñeñ ama pocteyaye o'ch atet yeṭa tarro'mar te'pa' añe yetropa' ñeñ atet anareṭ ahuatoteñ allempocmach yamesen.

²⁵ Jesúsñaapa' atet otanet:

—Sapa' ama'trra selleyareña ñeñ atet ṭa ahuat David allempo pallta'ṭsa ñeñtcha' rret allempo cheporra'nma epuet ñaña allohuen ñeñ cotene'.

²⁶ Ña allempopa' be'ṭosos Yompor pa'paclo, allñaapa' rrosan pan ñeñ atma'ntatareṭ atet ñerra'mrrate' ñeñ nenet all Part-socop. Ñehua, ñeñ panpa' ama pocteyayñe o'ch esesha' rre'. Ñeñpa' añach ñapueṭ rrene' cornaneshachno, ñeñpa' e'ñe atet anuareṭ judioneshacop. Ñeñña panpa' o' rros David, rratosan ñaña allohuen ñeñ epuet. Ñehua, ñeñpa' tarrempo atet pe't David allempo judionesha' po'cornanesharpa' añ pa'mcha'tareṭer pete't Abiatar.

²⁷ Jesúsña alla oterraneterr:

—Añ yetro allempo yamesen ñeñpa' añecop anareṭ acheñeneshacpay ñeñtcha' yesherbene'. Amaña añecpaye' anareteña yeṭñats ñeñtcha' yesherbena ya.

²⁸ Ñeñto'mar na Ñeñten Acheñetosets, ñeñten allsensareten, naca'yeña atet otets este' poctetsaña ñeñtcha' atet yeṭa añe yetro allempocma yamesen.

3

Allempo Jesúsapa' a'crraterran ñeñ chelleṭsa pot

(Mt. 12.9-14; Lc. 6.6-11)

¹ Po'pocheñoña Jesúsapa' alla be'ṭosuener judionesha' po'prahuo. Allñaapa' allo'tsen puesheñarr yacma ñeñ čha chellena pot.

² Fariseonesha'ña allpa' Jesús'a atarr cohua'nyenet attoch eñchet ñato'rraña a'crratenanerrcha' acheñ añe yetro allempocma amesenet. Ñerra'm o'ch a'crratenanerr ama't puesheñarra añe yetro allempo amesenet, allempoñapa' esheccha' a'metanipeñeta' añcha'taretsho.

³ Allempoña Jesús'pa' otan ñeñt' chellets'a pot:

—Apon, p'atomos arrma.

⁴ Jesús'ñapa' atet otanet:

—¿Erroñena'tña ñeñt' e'ñe pocte' senten ñeñt'cha' atet yeña añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yeñoñ ñeñt' ama cohuenayaye. ¿Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche' chachña yemtsatach?

Ñetñapa' ama't puesheñarroñetapa' ama eseshaye' anapaye.

⁵ Allempoña Jesús'pa' cohua'yesanet, ama't mamesha ama pocteye' entenaneto, atarr llecateñet tarro'mar ñetpa' ama mueneneto o'ch chapanet cohuen pueyochreto. Allempoña Jesús'pa' otan yacma ñeñt' chellets'a pot:

—Te'pa' o'ch notap', petapuerr p'ot.

E'ñe otue'pa' ñañapa' allentepa'tcha' tapuerranña pot, o' e'ñe cohuenterra pot.

⁶ Fariseonesha'ña' cha'nmaçherretpa' cotape'chatanna'tet epuet Herodes pueyochresha', ñetñapa' Jesús'a atarr o'patenet attoch muetsatachet.

Shonte' acheñenesha' ñeñt' huaçha'tatsa sa'patopño all enteñeta' Jesús

⁷⁻⁸ Allempoña Jesús'pa' ahuer sa'patopño'mar pueyochresha'na. Shonte' acheñ galileo'marnesha'pa' cota'huanmet ñamet. Ñaña shonte' po'potantañechno acheñenesha' ñetña allempo e'mare'teñet Jesús' ñapa' atarr cohuen orrtatyen ñetpa'cho'ña allenta huaçha'tyesoñet ñamet. Allenteñ anetso' huaçha'tyeset Judeo', Jerusaléno', Idumeo', Jordanas yomta'no', ñaña allo'marnesha' ñeñt' huetsa Tiro' ñaña Sidono'. Ñetpa' añ atarr muenenet o'ch enteñeta' Jesús.

⁹ Shonte' nanac acheñenesha', Attoch ama atarr quechcare'teñe Jesús' acheñenesha' ñeñt' shontetsa, ñañapa' otan pueyochresha':

—Chocmach sehuapaton noñt'.

¹⁰ Allempo Jesús'pa' a'crratyesan shonte' atsnaneñechno ñeñto'marña allohuen ñeñt' atsnatyets ñetña allempopa' atarr emchorreñet Jesús, añ atarr muenenet o'ch a'p'loset Jesús.

11 Añña oneñetečno ñeñt chorra'yenaya acheñ ñeñtpa'cho'ña allempo entoset Jesúsapa' allepa'tcha' rromañpsosyet pa'rrpõt, rranare'tyesosetpa' atet otoset:

—¡Pepa'tña Parets Puechemerep!

12 Jesúsñaapa' ama muenatano oneñetečno o'ch oteñet ñapa' po'ñoçh Parets Puechemer.

Allempo Jesúsapa' acran çharrasheña ñeñt puechetsa epsheña ñeñtcha' llesensa'

(Mt. 10.1-4; Lc. 6.12-16)

13 Allempoña Jesúsapa' ahuo' aspeno. Allotña agotatosan ñeñt e'ne cohuen enten ña ñeñtcha' pueyochresha' pa'. Ñeñt agotatenpa' ñetña allenta ahuanmuet ñesho. O'ña çhaçha'tuetpa'

14 ñañaapa' napanet ñeñtet çharrasheñet ñeñt puechetsa epsheña, ñetñaapa' ñeñtcha' e'ne parro chopeñe'chyen ñaña ñeñtcha' llesensen attoch serrpare'tyerret Yompor po'cohuenña.

15 Ñaña o'ch apuerranet llesens attoch queçhpatyeret oneñetečno acheñenesha'.

16 Ñeñt llesensa' ñeñtpa' añ pa'so'chñečno: Simón ñeñtara o' sochererr Pedro,

17 allotpa' ñaña Jacobo ñaña pa'mo'nasheñ Juan ñeñt Zebedeo puechemerasha'; ñetñaapa' o' socherraneterr Boanerges ñeñt yoten yeñoño Tecorena'tar.

18 Allotpa' ñaña Andrés, ñaña Felipe, ñaña Bartolomé, ñaña Mateo, ñaña Tomás, ñaña Jacobo ñeñt Alfeo puechemer, ñaña Tadeo, ñaña ñeñt po'psheñeñ Simón ñeñt cananistanesha' ñeñt atarr torrattse't pa'netsrecop.

19 Allotpa' ñaña Judas Iscariote ñeñtcha' pomuerre' tsapatonet Jesús.

Atto puesheña'tets oteñet Jesús ñapa' oneñeto' po'huamencot queçhpatenanña po'potantañ oneñetečno acheñenesha'

(Mt. 12.22-32; Lc. 11.14-23; 12.10)

Allempoña Jesúsapa' o' alla çherrerr pocollo pueyochresha'na.

20 Allñaapa' o' alla shonterrñañerr allohuen acheñenesha', ñeñto'marña allempopa' ama eshcaye' rreneto.

21 Allempo e'mare'ch Jesús pamo'tsesha' atet pa'yenapa' ñetñaapa' huaçha'tet o'ch ereta' Jesús tarro'mar ñetpa' otenapuetañ ñato' çho'e' o' mospaña Jesús.

22 Puesheña'tetsña ñeñt atarr etsotayenayeñ ñoñets ñeñt atet anaret ñetpa' Jerusaléño' huaçha'tet. Ñetñaapa' atet otyesoset Jesúsocop:

—Añ yacmarpa' añaca'ye chorrenaya Beelzebú ñeñt pompor pen allohuen oneñečhno; ñeñtca'yeña ahuañencat pene' attot quečhpatenanña oneñečhno acheñenesha'.

²³ Allempoña Jesús pa' chore'tan acheñenesha', allempoñapa' atet otapanet:

—O'ch notas, po'ñočh oneñetpa' amaca'ye huapore'tanneno.

²⁴ Ateñ ñerra'm paterr amcha'taret ñerra'm cho ellop-tannena pueyochresha' ñeñtña atto amcha'tarettena čhach huañerrets amach allo'na huomencatneno.

²⁵ Attecmach pannerra ñaña ñeñt e'ñe pamo'tsna'tarecmuet panneret ñerra'm cho elloptannenet e'ñe ñagattsetapa' ñeñtña atto huomencatenetpa' ñeñtpa'čo'ña čhachca'ye huañerrets.

²⁶ Attecmach pannerra ñaña oneñet pueyochreshačhno, ñerra'm oneñečhno e'mone'tannenet, ñerra'm tantanna'ta oneñečhnopapa' ñeñtña atto huomencatenetpa' ñetpa'čo'ña čhachca'ye huañerrets amach allo'na huomencatneneto. Ñeñto'marña po'ñočh oneñetpa' amate' errotenot huapore'tanna'teto e'ñe ñagattseta.

²⁷ Ñehua, yapa' yeñoteñ ñeñt atarr ahuañencattetsa atto atarr ahuañencattena oneñet, ñaña' e'ñe po'huamencoť cohuañpesyenan allohuen e'ñe cohuen ñeñt pa'paquell pa'yen. Tarraña ñerra'm esempo o'ch huapoña ñeñt atarr ahuañencatesha' ñeñtcha' metanose'ña po'huamenc atet ñerra'm na Nompör, ñeñtcha'ña rromose' o'ch huancos, allochñapa' o'ch be'tosos all ñeñt pa'paquell pa'yen o'ch e'ñe puerratampos ñeñt allpon o'patyena ña.

²⁸ Jesús pa' alla otarraneterr:

—Napa' o'ch notas, po'ñočh allohuen pa'namen sosya'tsañečhno ñeñt ama pocteye' enteno Yompör ama't ñaña achmāre'tanna'teñets ñeñtpa' apretna'po' nenteñ.

²⁹ Tarraña ñerra'm esesha' añ achmāre'teññañet Parets Puecamquēñ ñeñtñapa' amaca'ye apretna'pahuoye' nenteñe. Ñeñtña po'chñaretpa' amachca'ye apretna'pahuoterro e'ñe tayoteñ errponohuañen.

³⁰ Ñehua, ñeñtpa' atet otanet Jesús tarro'mar ñetpa' atet otyeñet Jesús, ñapa' año' chorrenaya oneñet ñeñto'ña ahuañencat pene'.

Allempo huapoña Jesús pachor ñaña pa'mo'nasheñnesha'
(Mt. 12.46-50; Lc. 8.19-21)

³¹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa' ñetñapa' alla tomča'toset a'yoť, allotña agotatoset Jesús.

³² Ñeñt̃ anorrcha'tyets epuet Jesús ñeñt̃ arrotam̃penaya, ñetñapa' atet ochet:

—O'ca'ye huapa p̃achor ñãma pemo'nasheñnesha'. Ñetpa' a'yote'tsa'yenet, p̃aca'ye e'nenet.

³³ Jesúsñapa' atet otanet:

—Ama't señothe ñeñt̃ e'ñe po'ñoçh nachor nepen ñãma ñeñt̃ e'ñe po'ñoçh nemo'nasheñ nepen.

³⁴ Allempoñapa' cohua'yesan acheñenesha' ñeñt̃ arrotam̃penaya all anorrchenet. Allempoñapa' atet oterraneterr:

—Napa' añca'yeña ñeñt̃ po'ñoçh nachor nepen ñãma ñeñt̃ po'ñoçh nemo'nasheñnesha' nepen.

³⁵ Ñehua, ama't erra'tsena ñeñt̃ e'ñe atet p̃ohuene' ñeñt̃ atet muenen Nomp̃or ñeñt̃ pue'ntaño'tsen ñeñt̃ca'yeña e'ñe po'ñoçh nemo'nasheñ nepen ñeñt̃ña noçh nepen ñeñt̃ña nachor nepen.

4

All toma'ntatanet Jesús ñeñt̃ a'parre'tene' puerets

(Mt. 13.1-9; Lc. 8.4-8)

¹ Jesúsñapa' alla yeçhaterranerr acheñenesha' e'ñe alla sa'patop̃ño. Allña emchorra'huererr shonte' acheñenesha'. Ñeñto'marña Jesúsapa' a'tap noñtopa' ahuañpes mame' allpononet allñapa' anorros noñto e'ñe all sa'po. Acheñenesha'ña allohuenetpa' e'ñe sa'patop̃ño'tsa'yenet all masto.

² Allñapa' esocmañen serrpare'tatenan acheñenesha' pa'namen toma'nteñtsoçhno. All yeçhatyenatpa' atet otanet:

³ —Se'mñoton añ ñeñt̃ atet notenes: Ñeñt̃ña a'parrene' puerets ñañapa' ahuo' allcha' a'parre'tyenana' puepuep.

⁴ All a'parre'tyeñ patanta'tetsñapa' alla çhapyes toño'mar. Allñapa' huacha'tyesa ot e'ñe aña'allme'chuenana' puerets.

⁵ Po'poñeçhnoñapa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ.

⁶ O'ña enome'ta'muen atsrretpa' alla a'uyatuer. Ama ercha'tena' ñeñto'marña alla hueya'huerra.

⁷ Po'potantañña pueretspa' alla çhapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cclatuer, ñeñto'marña ama elloñre'to.

⁸ Po'potantañeçhno ñeñt̃ñapa' arr çhapyes all e'ñe cohuen patso. Ñeñt̃ñapa' e'ñe cohuen chepares. Allempoña atesha'tuapa' o' elloñre'tyes. Atarr atonapa'tets elloñre'tyes—puecha'tetspa' ma'poch çharra' pue'llomer,

po'pchañechnoñapa' pechapoch çharra' pue'llomer,
po'pchañechnoñapa' çharroch çharra' pue'llomer.

⁹ Allempoña Jesús pa' alla oterraneterr:

—Ñeñtes po'ñoçh ne'mñotene', çhaponasepa'ch seyoçhro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mt. 13.10-17; Lc. 8.9-10)

¹⁰ Allempoña patmuerra acheñpa' o' ñapñaña Jesús epuet ñaña pueyoçhresha' ñaña pueשה' tets po'potantañ ñeñt allo'tsa'yen, ñetñapa' atet ochet Jesús:

—Ta'm ¿estē'ña petma'ntatenyaña ñorra'?

¹¹ Jesúsñapa' atet oterraneterr:

—Sa te'pa' Yomporña semnatene' attoch señoterr ñeñt ama eñotpahuoyaye ama't ahuatoteñ atet penaña Yompor po'cohuenña atto ayochreshattena ña. Tarraña po'potantañechno ñeñt atta es puecha'yetsa, ñocpuetpa' ama eñoteñeto ñeñt atet atma'ntataret ñoñets.

¹² Attoña ama't enteñetañ ñetñapa' amach errotenot es çhapahueto pueyoçhreto. Ama't e'mueñetañ amach çhenanetoña pueyoçhreto ñeñt atet yeçhateney Yompor po'cohuenña. Attoña amach cotape'cherreto ello cohuen Yomporcop attoch ñach peretnerrahuet po'chñaret.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Lc. 8.11-15)

¹³ Jesúsñapa' alla oterraneterr:

—Sapa' ama't mameshapa' are't señothenoña ñeñt o' netma'ntatuasa ñorra'. Ñerra'm ama çhennaso seyoçhro ñeñt o' netma'ntatuasa ñorra'pa' errotenotuachñaca'yeña çhaponasaña seyoçhro allohuen po'poñechno ñeñtcha' netma'ntaterr serr tsapaonet.

¹⁴ Allempoña Jesús pa' eñotatanet ñeñt atet o' toma'ntatuanet ñoñets ñocpuet, ñeñtpa' atet otanet:

—Ñeñt a'parre'tyene' puerets, ñeñtña pueretspa' añca'ye notenes Yompor po'ñoñ allempo serrpare'teñet.

¹⁵ Añ puerets ñeñt çhapyets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotueta'pa' allorocmach huapa oneñet o'ch alla puerratañperranet Yompor po'ñoñ ama't allpon ñeñt eñotetañ pueyoçhreto.

¹⁶⁻¹⁷ Ñaña ñeñt çhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguēññañetañ Yompor po'ñoñ. E'ñech cohuen ame'ñeretañ tarraña ñeñtpa'

mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puerech. Tsapatoneña ñerra'm o'ch huapanet topateñets ñeñtcha' muerochtatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla quechpuerrñañet Yompor po'ñoñ.

18 Ñaña po'poñechno puerets ñeñt chapyets ajmo'mar ñeñt'pa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ.

19 Ama'tcha' chapanetañ pueyoçhreto tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocueta. Añach muenenet o'ch esocmañen es echyenet tarraña ñeñt'pa' chaca'ye shequënanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach errotenot orrtatoñetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt cha ca'mateñ ajma' ñeñto'marña amach errotenot me'teneto o'ch ellonre'tyeset.

20 Ñaña añ puerets ñeñt chapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñoñetsñapa' e'ñech cohuen chenonet pueyoçhreto. Ñetñapa' ñeñtet po'ñoçh orrtatenet ñeñt atarr sherbets Yomporcop. Attoña ñetpa' e'ñe atet penet ñerra'm narmets ñeñt atarr me'tets—pate'tets ma'poch çharra' pue'llomer, po'poñpa' pechapoch çharra' pue'llomer, po'poñpa' çharroch çharra' pue'llomer.

*Arrpa' all toma'ntatanet lampareñ atto çhoyo'tampeney
(Lc. 8.16-18)*

21 Jesúsñapa' alla toma'ntaterraneterr, ñeñt'pa' atet oterraneterr:

—Ñerra'm esempo ya'llchaten lampareñ, ñeñt'pa' ama añecpaye' yehuapateñe o'ch alla ye'rramam'psos coyño. Ñaña ama añecpaye' ya'huortatenoña lampareñ o'ch yene' o'ponot yemayep'naçho. Añecopña ya'huortatenña lampareñ o'ch yene' enonet attoch çhoyo'tam'pesuan allohuen ñeñt allo'tsa'yen.

22 Tarro'mar allohuen pa'namen ñeñt ama eñotpahuoyaye ama't ahua'toteñ, te'ñapa' o'ch e'ñe orrtatare'tterra attochña o'ch e'ñe eñotatare'tetuerret e'ñe poctacma.

23 Ñeñtes po'ñoçh ne'mñotene' chaponasepa'ch seyoçhro ñeñt atet netma'ntatensa añ ñoñets.

24 Jesús'pa' alla oterraneterr:

—Sapa' señotenafe' e'ñete' po'ñoçh cohuen se'mñoteññañ Yompor po'ñoñ ñato'pa' amate'. Tarro'mar ñerra'm erro't

sepoñ po'psheññ ñeñt ama cohuenayaye Yomporñapa' attecmaç perres samã. Ñaña ñerra'm e'ñe cohuen sepenanet, Yomporñapa' e'ñech cohuen perres samã ama't ellonet o'ch apuerres ñeñt e'ñe cohuen.

²⁵ Tarro'mar esesha'te' çhena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama çhenaneto pueyoçhreto tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyetañ pueyoçhro ñeñtñapa' çhach puerratañperranet Yompor.

All toma'ntatanet puerets ñeñt e'ñe cohuen chepyets

²⁶ Jesús'pa' alla toma'ntaterraneterr, ñeñt'pa' atet oterraneterr:

—Yompor po'cohuenña ñeñt atto ayochreshattena ña, ñeñt'pa' atet pena ñerra'mrrate' puesheñarr acheñ ñeñt nare'tene' puepue. O'chña nare'tuepa' o'ch ahuerr pa'paclo.

²⁷ Allach allponmaterra' o'ch tsapuenpa' allach muene't, yetoñapa' çhocmach tanta'muene't, puepueñapa' atteñapa' o'ch chepua o'ch atesha'ta. Pamo'mte'ñapa' amach e'ñeye' eñoteñe erroteno'te'ña chepyen.

²⁸ Ñehua, yeñoteñ patspa' ñeñtca'ye a'chpatene' yepuer e'ñe ñoña. Choch ñanom çho'pe'chyes allempoñapa' o'ch atarrchet çhoch potsets attoch ellon're'tyes, attotachçho' e'ñe po'nuen.

²⁹ E'ñe errete' po'netspa' e'ñech allorocma mueñan ñeñtcha' tsorrenaya'. O'ca' çhen allempoch apçhenetña ñeñt narmetser.

Atto Jesús'pa' toma'ntaterranet atet pena pue'llomer ñeñt otenet mostazllom

(Mt. 13.31-32; Lc. 13.18-19)

³⁰ Jesús'ña ellonet'pa' atet oterraneterr:

—Añ Yompor po'cohuenña ñeñt atto ayochreshattena ña —ñanompa' e'ñech puesheña'ttsa ame'ña'yetsa, allempoteñña' allo'nach sen atonetnomtsa ñeñtcha' ame'ñerrtsa, attochña e'ñe epa'huerra erracmañen Yompor po'cohuenña. Ñeñtña te'pa' o'ch netma'ntatasa ñeñt atet pena ña.

³¹ Ñeñt'pa' atet pena ñerra'mrrate' añ pue'llomer ñeñt atarr añetolleshallmerr ñeñt otenet mostazllom. Ñeñtña pue'llom're'tollpa' o'ch nare'chet patso. Ñehua, e'ñe yeñoteñ mostazllom ñeñt'pa' atarrca'ye nanac añetolleshallmerr.

³² Tarraña ñerra'm o'ch nare'chetpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Puetacre'nach ateshatacrertatsa. Allña'pa' o'ch huaçha'toña oteçhno o'ch rrema'rartosa puetacro'mar po'mañero.

Jesús pa' ora allpon ñeñt atet yechatyenan acheñenesha' ñeñtpa' atto pa'namen es toma'ntatyananet
(Mt. 13.34-35)

33 Shonte' po'poñechno ñeñt alla toma'ntaterraneterr atto serrpare'tatenanet Yompor po'ñoñ. Attoña e'ñe allpona serrpare'tatanet ñeñtñapa' e'ñe cohuen eñotatanet pueyoçhreto.

34 Ama serrpare'tatenaneto atta, añña çhocma serrpare'tatenanet toma'nteñtso. Ellonetpa' çhocma e'ñe eñotoçhen serrpare'tatenan pueyoçhresha'.

Allempo a'mchecherran Jesús huomenquësha' ñaña sa'p ñeñt emo'yarertetsa
(Mt. 8.23-27; Lc. 8.22-25)

35 Ñeñte yetrocma e'ñe ellerronet Jesúsñapa' otan pueyoçhresha':

—Te'pa' o'ch ahuañpsey yomta'n.

36 Pueyoçhresha'na sohuanmet acheñenesha'. Ñeñtara noñto allo'tsen Jesús pa' alloña anmanñpeñet Jesús o'ch ahuañpset yomta'n. Allñapa' co'a'huanmanet po'pnañechno noñteçhno.

37 Allempo ahuañpset allñapa' machayotepa'tcha' huomenquëshatañpesnomuet. Emo'yare'ña çha esha'tena noñto atteña oññapa' choramoch noñto.

38 Jesúsñapa' alla muen puepopato alla ñotena. Pueyoçhresha'ña opueretpa' atet ochet:

—¡Maestro, amahuaca'ye pellquënyote' o'rramche' yoclla'huamocha!

39 Jesúsña tanterrapa' e'ñe po'ñoñoña a'mtsoññetueran huomenquësha'. Ñaña po'ñoñoña a'mtsoññeterran sa'p ñeñt emo'yartetsa, ñeñtpa' atet ot:

—¡Muechecherrepa', muetsoññeterrapa'!

E'ñe otue'pa' çha muechecherrtsaña huomenquësha'. Attoña ñetpa' o' alla mueçettamperret e'ñe cohuen.

40 Allempoña Jesús pa' atet otanet:

—Sapa' eso'mare'tña çha atarr seyoren. Eso'mare'tña ama e'ñeye' seyemtenno.

41 Ñetñapa' çha atarr nanac yorenet, atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare' oñ.

5

Atto gadaro'marnesha' ñeñt chorrena oneñeñpa' huapa Jesúsesho
(Mt. 8.28-34; Lc. 8.26-39)

¹ Allempoñapa' o' etsotoset yomta'n all sechenet. Allñapa' añ pa'ney pene' gadaro'marnesha'.

² Jesúsñapa' sehuosa all noñtot, allñapa' huapoña puesheñarr yacma tarraña ñapa' añ chorrenaya oneñet. Ñeñtpa' arroñ huapa allecma pampa'yeñet arromñañechno.

³⁻⁴ Ñehua, ñapa' alla yechna all pampueñet arromñañechno. Ama't puesheñarrapa' ama eseshaye' erroñ penaye attoch a'mchecheret. Ama't chocma huanquëñetañ asrerecho pa'tcoñ ñaña potot, ñañaapa' chach tsepe'tuerranña asrerech allo huanquëñet potot ñaña pa'tcoñ chach rrollapecheñ o'ch e'ñe tsepe'tatue. Ñeñto'marña ama't e'ñe eseshapa' ama eshaye' a'mchecheñeto.

⁵ Allñapa' ellapene'tcha' ñaña arepene'tcha' chopeñe'chysets apampaño'mar ñaña aspentarero'mar. Allñapa' allecma atarr ama'tochtena, tsoñse'tyena mapyo e'ñe ñañaña.

⁶ Tarraña allempo entapan Jesús a'yoteñ allentepa'tcha' matosa concorpana'tosana Jesús.

⁷⁻⁸ Allempoña Jesúsapa' atet otosan oneñet ñeñt chorrenaya ñeñt yacmar, atet otos:

—O'ch oneñeñe notosep te'ñapa' ipequechpa'ner añ acheñer!

Ñeñto'marña ñeñt chorrena oneñeñpa' rranosa huomencpa' atet otapan Jesús:

—Eso'maruachca'ye Jesúsocha' patsrre'mochtana'tosna, papa' ñeñtep Ñeñt nanac Parets Puechemerep. Te'pa' o'ch notapap e'ñe Parets pa'so'chño, amach cha pecoñchatatstosno.

⁹ Jesúsñapa' alla oterranerr ñeñt chorrena oneñet:

—Papa' ¿eso'tña peso'cheñ?

Ñañaapa' atet oterranerr Jesús:

—Napa' añ neso'cheñ Legión tarro'mar yapa' nanac patonrey.

¹⁰ Allempoña ñeñt chorrena oneñeñpa' ñañaapa' atet otare'tapan Jesús:

—Amach pemño'tatsterrye allapar baçhayo.

¹¹ Ñehua, allpa' a'yente'tsa'yen shonte' chañchochno ñeñt rratse'tyets aspentonet.

¹² Ñeñto'marña oneñeñechnopa' atet otare'tapet Jesús:

—Ñerra'm choc muene' erroten peposeypa' arrña pemñaye'chosey chañchesho allochñapa' o'ch yechorra'yerr ñaña chañchochno.

¹³ Jesúsñapa' allenta otanet:

—Ama'tca'yepa' orrasca'ye.

Allempoña oneñeñechnopa' quechpa'neret acheñ o' chorreterr ñaña chañchochno. Chañchoña allempo chorrosya oneñeñechnopa' chepa'tcha' matrra'tua ñegoneñ, shorcha'tuos

alloṭpa' e'ñe ño'shrra'tuosa oño. Ñeñña chañchochnopa' allo'tsente' epoch mil.

14 Acheñenesha'ña ñeñt cohuanṭpene' chañcho, ñetña'pa' allenta matrra'tet ñamet po'yorñoñ ahuanmuet anetso. Allña'pa' serrpare'tyesoset ñaña ora allohuen allampaño'mar. Acheñenesha'ña'pa' allenta ahuanmuet ahuo'ch enteñeta'.

15 O' chača'tet Jesúseshopa' allña'pa' entoset yacma ñeñt chorre't oneñe'techno alla anen ashtamaṭ, o' eñoterra, o' cohuenterra. Ñetña'pa' cha atarr mecha'na'toset.

16 Añña ñeñt entene' Jesús atto quechpaterran oneñe't acheñ, o' alla mueñererr chañchesho, ñetña'pa' allenta serrpare'tatiesapet ñeñt huača'ttsa anetsoṭ.

17 Allempoña acheñenesha' ñeñt yeçhetsa allpa' atet ochet Jesús:

—Te'pa' ahuerreṭ arroṭ yenyot.

18 Allempoña Jesús'pa' a'terr noñto o'ch ahuer, yacmaña ñeñt chorre't oneñe't ñaña'pa' allenta otan Jesús:

—Napa' nemneñca'ye te'pa' o'ch nocterreṭ.

19 Tarraña Jesúsña'pa' ama muenache atet och:

—Allaṭach, te'pa' o'ch ahuerreṭ pepaclo pamo'tsesho'mar o'ch peserrpare'tatuerranet ora allohuen atto Yomporpa' atarr yenposeṭ ñaña atto atarr muerospa.

20 Ñaña'pa' atet otue Jesús'pa' atetcho' ṭpa. Allenta ahuer serrpare'tyesnerrets ora anetso'mar ama't all oteñet Decapoliso atto Jesús'pa' atarr nanac yenpos. Allohuenña acheñenesha'pa' atta atarr cohuanrrorteñet.

Atto Jesús'pa' tantaterran Jairo po'señ ñaña all a'crratnoman puesheñarr coyanesha' ñeñt a'ṭlla'nmue' pa'shtam

(Mt. 9.18-26; Lc. 8.40-56)

21 Allempoña'pa' ahuanṭperrerr Jesús noñto, o' alla çherrerr añeñta'n alloṭ ta ahuaña. Allña'pa' o' alla emchorra'huererr shonte' acheñenesha' e'ñe all sa'patopño.

22 Allña'pa' huapoña puesheñarr añcha'tareṭ ñeñt'pa' añ pa'so'cheñ Jairo. Napa' ñeñt puesheñarr ñeñt añcha'tarettetsa judionesha' po'prahuo. Allempo entosan Jesús'pa' ñaña'pa' alla rromosa Jesús pa'rrṭot.

23 Allña'pa' atet otos:

—Nesñetollaña'cho' o' cha a'po'ntsena. Ñeñto'marña napa' nohuennaṭpa o'ch ṭocterren nepaclo. Ama't ṭotoṭapa' o'ch ṭpa'ṭleña' attoch ṭpa'crrater o'ch alla huomcherra.

24 Jesúsña'pa' allenta coṭa'ner, allenta coṭa'huanemñ ñaña shonte' acheñenesha' cha emchorratse'tnomet, cha to'mama'tneñet.

²⁵ Allñapa' coṭa'nmanet ñaña puesheñarr coyanesha' ñeñt' atсна'tets. Charra' puechena epa char ñeñt' atto čhocma yella'yena.

²⁶ Epaye' mueročhtateñ shonte' apartañečhno ñeñt' partenayeñ. Ama't o' a'gasta'huahuan ora allpon quelle echen atto partatena ñaña'pa' attera ama't mameshapa' ama čhoye' pasateñe. Elloña allo'na sen a'po'ntsa'nmatса.

²⁷ Ñeñt' coyanesha'pa' o' e'mare'tan Jesús ñeñt' atto čhocma a'crratyenan atснаñečhno. Ñeñto'marña allempo coṭa'huanemñ Jesús acheñenesha'pa' ñapa'čho'ña allenta coṭa'nman Jesús chenta' pa'che'ñoť. Attoña allpa' a'plla'nmoñ pa'shtam.

²⁸ Tarro'mar ñapa' atet coṭape'chen pueyočhro: "Ama't pa'shtama na'plla'ñpa' ñeñtachca' na'crraterre'."

²⁹ E'ñe a'plla'hue' pa'shtampa' allorocmuepa'tcha' maserrña po'rras. Ñapa' e'ñe eñotena po'čhtso o' metueña ñeñt' mueročhtatene'.

³⁰ Jesúsñapa' eñotnoñ e'ñe ña po'huamencoṭpa' o' a'crratnoman puesheñarr atснаñeť. Ñaña'pa' allenta puerraperra alla acheñeneseshonet' ñeñt' coṭa'huanene', allñapa' atet otanet:

—¿Esesha'tña o' a'plla'nmuenna neshtamoť?

³¹ Pueyochresha'ñapa' atet ochet:

—Pentente' shonte' acheñenesha' ñeñt' allotemeña peto'mama'tnene'. Eso'mare'tña pōtenña esesha'te' pa'pllene' peshtamoť.

³² Jesúsñapa' alla cohua'yesanet o'ch entan ñeñt' a'pllene' pa'shtamoť.

³³ Ñeñtña coyanesha'pa' ñapa' o' eñotnoma Jesúsca'yeña o' a'crratnoñ. Ñaña'pa' čha pa'shmuena po'yorñoť allempoñapa' concorposa Jesús pa'rrpōť. Allñapa' e'ñe a'meta'nman ora allpon ñeñt' po'ñočh atet coṭape'chen.

³⁴ Jesúsñapa' atet otapan coyanesha':

—Papa' nesñeshacha' atto atarr peyemtenna na, attoña te'pa' o' e'ñe na'crratnomuep. Te'ñapa' o'ch ahuerreṭ peñmañesha', tarro'mar amach alla mueročhtaterrperro atснаñets.

³⁵ Allempo eñorena atetpa' allñapa' huacha'ta ñeñt' huetsa añcha'tareť Jairo pa'pacloť. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na patsrre'močhtana'tatsche Maestro o'ch coťerreṭ pepaclo.

³⁶ Jesúsña ama't e'man atet otoset Jairo'pa' ñaña'pa' atet otan Jairo ñeñt' añcha'tareťtetsa judionesha' po'prahuo:

—Papa' amach čha pe'charrtatatsto peyočher, nachña e'ñe peyemta.

³⁷ Jesúsña'p' aña muenat Pedro ñaña Jacobo ñaña pa'mo'nasheñ Juan. Ñeñfach cota'nmue'.

³⁸ Allempoñapa' ahuanmuet amcha'taret Jairo pa'paclo. O'ña chacha'tet allpa', allña'pa' entoset shonte' acheñenesha' ñeñt' ano'tatse'tets, all yahuanrrortenet, atarr ya'na'teñet arromña'.

³⁹ Jesúsña'p' be'tosos pocollo, ñaña'pa' atet otosanet:

—Sapa' eso'mare'tña atarr sano'tatsen, cha atarr seyahuanrrortena. Añ shopshesha'pa' amaca'ye choye' rromueno, chaca'ye muen.

⁴⁰ Ñetña pachmare'teño'etpa' atta che'tatsetyesapet tarro'mar ñetpa' e'ñeca'ye eñotenet choca'ye rromuen. Allempoña Jesús'pa' cha'nma'cha'tatosan allohuen acheñenesha' pocolot. Ñaña'pa' be'tosos o'pono allo'tsen shopshesha' ñeñt' rromuets. Ñapa' aña muenatos arromña' puepapar ñaña pachor ñaña ñeñt' cota'huanene', ñeñña epuet be'toscha'toset allo'tsen arromña'.

⁴¹ Allempoña Jesús'pa' rromota'tosan shopsheshañ pototpa' atet otos e'ñe ña po'ñoño:

—Talita cumi—ñeñt' yoten ya yeñoño: O'ch nesñetolle notosep' te'pa' cho'pa tanterrrsa.

⁴² E'ñe otue' atetpa' allentepa'tcha' tanterra, cha chope'cherrets. Ñehua, ñeñt' shopshesharpa' charra' puechena epa po'charña. Allohuenetña'pa' cha atarr cohuanrrorteñet.

⁴³ Allempoña Jesús'pa' atet otanet:

—Po'ño'ch te'pa' amach esesha' seño'tatatsto ama't e'ñe puesheñarra.

Alla oterraneterr:

—Te'pa' serratallme'cherñaca'ye.

6

Allempo serrpare'tatan Jesús acheñenesha' all Nazareto
(Mt. 13.53-58; Lc. 4.16-30)

¹ Jesúsña ahuerrerr allotpa' o' alla cherrerr pa'nyo all Nazareto. Pueyochresha'ña'pa' alla cota'huanererr.

² Allña'pa' allempo cherr yet allempocma amesenet, ñaña'pa' arr ye'chatuerraneterr judionesha' po'prahuo. Shonte' acheñenesha' ñeñt' e'mñotapuerre' atet serrpare'tatuerranet all, ñetña'pa' nanac cohuanrrortapueret, allempoñapa' atet otyeset ñocop:

—Ñapa' errahuañaca'yeña eñotanña ora allohuen ñeñt' atet pa'yena. Esesha'huañaca'yeña eñotatene'ña attot orrtatenan partsoteñets. Errotuaca'yeña huenaña ñeñt' eñoteñtsor ñeñt' orrtatyen ña.

³ Ñapa' añaca'ye ñeñt' po'taruas pene' o'ch torrenana tsach attoch es yečcatyen pa'namen. Ñapa' añaca'ye María puechoyor. Pa'mo'nasheñpa'čho'ña añaca'ye Jacobo, José, Judas, ñaña Simón. Ñaña po'čhanesha'pa' e'ñeca'ye yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye entenaye.

⁴ Allempoña Jesús'pa' atet otanet:

—Ñeñt' a'mtene' Yompor po'ñoñpa' čhocmaca'ye añcha'na'tpo' entyeñña allohuen acheñenesha'; arrña pa'nyo allo'tsen e'ñe ña pamo'tsna'tarnesha' ñeñt' e'ñe pamo'tsna'tar penpa' ñetñapa' ama acua'penaye' enteñeto. Ama't ñaña ñeñt' parro yečchenet pa'pacleto, ñetpa'čho'ña ama acua'penaye' enteñeto.

⁵ Ama ame'ñeñeto ñeñto'marña allpa' ama atonocheye' orrtataneto po'partsoña. Allpa' aña orrtatyen attoch a'plla'yenan puesheña'tets atsnañet' allpa' attoca'yeña a'crratenanet.

⁶ Ñeñto'marña Jesús atarr cotape'chateñ pamo'tsesha' atto ñetpa' ama acua'penaye' enteñeto, ñapa' čha muene' llocateñet. Allempoña Jesús'pa' alla chopeñe'chyerrerr yečhatyerrtserr allemeñ anetso'mar.

Allempo Jesús'pa' llesensan pueyochresha' o'ch ahuanemye-set allcha' serrpare'tyeneta'

(Mt. 10.5-15; Lc. 9.1-6)

⁷ Allempo čhapa'muen allempo Jesús agota'muenan pueyochresha' čharrasheña ñeñt' puechetsa epsheña. E'ñe apčha'huet ñeshopa' ñaña'pa' apanet llesens attoch quečpatyeset oneñe'ččno atto chorra'yenana acheñenesha'čno. Attoña llesensanet ñetpa' o'ch ahuanemyeset e'ñe epsheña'ttsocmuet.

⁸⁻⁹ Ñaña atet otapanet:

—Ñerra'm o'ch sahanmapa' amach es sanmatsto ama't coñe'ta allcha' sechopeñe'chyes—ama't sebolsa, ama't ñeñt'cha' serra'yenom, ama't sečllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapat.

¹⁰ Alla oterraneterr:

—Ama't errach pocollro sečhap allach sommosa allponmat esempohuach ahuerrerr po'poñ anetso.

¹¹ Ñerra'm erra anetsro ñeñt' allo'marnesha'ña ama cohuenaye' agapaseto ñerra'm amach mueneto o'ch e'mñotapasetpa' o'ch semt'errerr ñaña allot. Ñerra'm allempo semt'errerr ñaña allot, ñeñt'ña setco'tsa'yen

pañe'te' patspa' čhoch sepa'shetca'tyesnomña setac. Attochña allo'marnesha'pa' o'ch señoatnomanet ñetpa' amaca'ye pocteye' entenanetoña Yompor. Po'ñočh o'ch notas: Esemphuañen allempoch acraretetuerra allohuen acheñenesha', añña anetso'marnesha' ñeñt ama sagapaye ñetñapa' atarrcha' a'coñchatare'tterret. Elloch metana'tueret ñeñt atto a'coñchatare'tterra sodomo'marnesha' ñaña gomorro'marnesha'.

12 E'ñe ñeñta otare'tetuetpa' ñetñapa' allenta ahuanmuet o'ch chopeñe'chyeset erracmañen anetso'mar. Allñapa' serrpare'tyesnomuet ñeñt poctetsa allohuenacop o'ch cotape'cherret ello cohuen Yomporecop.

13 Ñaña all chopeñe'chyeset erracmañenpa' ñetpa' allña quečpатыeset shonte' oneñe'tečno atto chorra'yenana acheñenesha'čno. Ñaña shonte' po'potantañečno acheñenesha' ñeñt atsna'tyets all, ñetñapa' a'yana'tyesoset atsnañe'tečno olivoso'yo* e'ñe a'crratyesoset.

Allempo e'ñe cohuen es orrtatyes Jesús, Herodesñapa' čha otapañ Juanañe' o' tanterra ñeñt apataye't acheñ Yomporecop (Mt. 14.1-12; Lc. 9.7-9)

14 Allempoña añcha'taret Herodes ñaña'pa' atet e'mare'tenan Jesús ñeñt atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñt atet pa'yena. Ñaña'pa' atet ot:

—Añepa'tca'yeña Juanañ ñeñt apataye't acheñ Partsocop. Ta'mca'ye čate' tanterraña rromot. Ñeñto'marepa'tca'yeña te'pa' orrtaterranña partsoteñets.

15 Po'potantaññapa' atet otyenet:

—Añepa'tca'yeña Elías ñeñt a'mtaye't Yompor po'ñoñ ahuat.

Po'potantaññapa' ñetpa'čho'ña atet otyenet:

—Añepa'tca'yeña ñeñt a'mtene' Yompor po'ñoñ, e'ñeca'ye atet ñerra'm ñeñt a'mtaye't Yompor po'ñoñ ahuat.

16 Herodesña allempo e'mare'ch ñaña'pa' atet ot:

—Añepa'tca'yeña Juanañ ñeñt nepechat ahuañmo'cha, čepa'ttramche' tanterraña rromot.

17 Ñehua, allempo Herodespa' ahuañmo'chacma rromatenana' Juanañ o' huancachpa' allña yottamñpsach attoch coshatan Herodías ñeñt pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor.

18 Juanañpa' ñaca'ye otaye't Herodes:

* 6:13 Olivo ñeñt tsach allot yoreñet puerets pue'merot.

—Amaca'ye pocteyaye o'ch peyoram'pes pemo'nasheñ pue'apor.

19 Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama erro't pe.

20 Tarro'mar Herodespa' mecha'na'tane't Juan, eñoche't ñapa' e'ñe pocte' es pa'yese't. Eñoche't ñapa' añe'pa'na atarr torrena Partsocop. Ñeñto'mare'naña e'ñe cohuen cohuan'psache't alloch'ña' amach muetseto. Allempo e'mñotenan Juan atto serrpare'te't atarr cohuen enteñeñ, tarraña ama e'ñeye' eñotenanoña ñeñ't atet cotape'chateñ Juan e'ñe cohuen.

21 Atte'ña'pa' čhapa'muen pam'tarr allempoch Herodías eñoteñ at'otcha' muetsaterran Juan. Ñeñ'tpa' tarrempo atet pa' allempo čhapa'muen Herodes pue'ñalletño ñeñ't puerrollar pen Herodías. Allempoña Herodespa' hua'ñatyesan acheñenesha' ñeñ'tcha' rrallme'chapretenaya'. Añ hua'ñatyese ñeñ't añcha'tarete'čno ñaña ñeñ't solltar po'ca'ptanrenesha' ñaña ñeñ't atarr e'čllayoretenesha' ñeñ't galileo'marnesha'.

22 Allempo rrallme'chetpa' allña be'tososña ñaña shopshe'sha' ñeñ't Herodías puechoyor. Ñaña'pa' allña tancsare'tosa. Herodesña'pa' ñeñ'ta atarr cohuen ent ama't ñaña ñeñ't ahua'ñarete'čno. Ñeñto'marña añcha'tare't Herodespa' atet otan shopshesha':

—Ama't erra'tsena penamuenenpa' napa' napa'čha'.

23 Ello'ña'pa' e'ñe Yompor pa'so'chño nan po'ñoñ, allempo'ña'p' alla otererr:

—Po'ño'chca'ye napa' ama't es penamuen napa' napa'čha' ama't puehmet nepatseñ all na'm'cha'tare'tena.

24 Allempoña shopshesha'pa' čha'nerr ahuer pachore'sho, atet otosan pachor:

—Ta'm ¿escha' nena'ña añcha'tare't?

Pachor'ña'pa' atet och:

—Añcha' penam' Juan poñ ñeñ't apataye't ahuaña acheñ.

25 Allempoña shopshesha'pa' materra alla añcha'tare't Herodesesho atet otuerran añcha'tare't:

—Napa' añ nemnen o'ch pepechennana' Juan poñ ñeñ't apataye't acheñenesha' o'ch penon platopa' o'ch pa'phuerren e'ñe arrma.

26 Allempo enamhue shopshesha' Juan poñ'pa' añcha'tare'tña'pa' čha lleca. Tarraña ama't lleca'ña'pa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñ't hua'ñen ñeñ't e'muene' atet oten ñeñto'marña čhocmach a'poctatan po'ñoñ atet otuan ñorra' shopshesha'.

27 Allempoña'pa' allenta otan po'solltarer:

—Te'pa' o'ch pepecheññaña' Juan poñ all neyottam̄psateñ; poññapa' pehuapater arrma.

²⁸ Solltarñapa' allenta ahuo' pechenana' Juan poñ, o' huapater plato, aphuerran shopshesha'. Shopshesha'ñapa' apuenana' ñaña pachor.

²⁹ Allempoña Juan pueyochresha'pa' o' e'mare'chet o' pecheret pa'yochreshateret Juanañ, allempoña ñet ahuanmuet all pecheret Juanañ allempoña ñetpa' ereta' apecharet o'ch pampueñeta'.

Allempo Jesús^{pa'} rratenan shonte' acheñenesha'; ñeñña acheñenesha'pa' allo'tsen amnaroch mil
(Mt. 14.13-21; Lc. 9.10-17; Jn. 6.1-14)

³⁰ Attoña' o' chacherr ñeññ llesensen Jesús. Ñetñapa' serrpare'tatueret Jesús allohuen ñeññ atet pa'yeset. Ser- rpare'tatueret ñaña atet ye'chatyeset acheñenesha' Yompor po'ñoñ.

³¹ Jesúsñapa' atet oterranerr pueyochresha':

—Te'pa' o'ch ahuey e'ñe yaptoche' all ama acheñempaño'yaye; sapa' allcha'ña samesuerr allponmat.

Ñeññ allempopa' atet otan Jesús pueyochresha' tarro'mar allempo shonte' acheñenesha' ñeññ hua'cha'tyetsa ñaña ñeññ chocma ahuanemyetsa ñeñño'mar ama't mameshapa' ama eshcaye' rreneto.

³² Allempoñapa' e'ñe ñap̄tochayet ahuanman̄pset noñto, o'ch ahuanmuet all ama acheñempaño'yaye all otenanet Jesús.

³³ Allempoña shonte' acheñenesha'pa' alla enterraneterr all oñmañpenet. Allempoña achme'tarettapuetpa' acheñenesha'ñapa' o' alla matra'terrerr allohuen ñeñte anetsoñ. Ñetñapa' patso'mara oñma'cha'tet ñanmacmueta ch'acha'tet all sechena Jesús pueyochreshohuen.

³⁴ Allempoña sehuosa Jesús allpa' alla enterraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet entuer- raneterr ñerra'mrrate' carrnero ñeññ ama acuan̄psareteyaye. Allempoña Jesús^{pa'} alla ye'chatuerraneterr pa'namen esocmañen ñeññ Yompor po'cohuenña.

³⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño'yaye ñaña o'ca'ye ellerren.

³⁶ Te'pa' o'ch p̄och acheñenesha' ahuanemyerretetpa' anetso'mar allcha' rañta'yuesuerret puerraret ñeñtcha' rra'yuesuerret tarro'mar arrpa' ama es eñalle.

³⁷ Tarraña Jesúsñapa' otan pueyochresha':

—Sachca'ye apa'yeshahuet ñeñtcha' rret.

Ñetñapa' atet ochet:

—¿Añe't pemnen o'ch ahuey o'ch yepomuena' shonte' quelle ñeñt doscientos denario† alloch yerañfena' pan ñeñtcha' yer-ratuerranet allohuenet?

³⁸ Jesúsñapa' atet oterraneterr:

—Ñehua, secua' pan, ¿errponfe' sechen?

Ñetña cohuet panpa' atet otereterr:

—E'ñeca'ye amnara pan eñall ñaña epatoll cac.

³⁹ Allempoña Jesúsapa' atet otan acheñenesha':

—Te'pa' o'ch sanorrcha'tyes e'ñe sopa'ttsocma e'ñe all co-huen emmo'ratyen pasetma'.

⁴⁰ Ñetñapa' atetcho' pet. Anorrcha'tyeset e'ñe ñopa'ttsocmuet—charrasheña'ttsocma charrapa'tets ñaña amnarsheña'ttsocma charrapa'tets ñeñt anorrcha'tyesets.

⁴¹ Allempoña Jesúsapa' agapan ñeñt amnar pan ñaña epatoll cac, cohua' enonet parasyoso'tamñsan pan. Allempoñapa' shota'tan panpa' apanatyesan pueyochresha', ñetñapa' epatyaset allohuen acheñenesha' ñeñt anorrcha'tyets all, e'ñe epa'huet. Ñaña shetse'tan cac attoch epatyesanet allohuenet.

⁴² Allempoñapa' o' rrallme'chet allohuenet e'ñepa'tcha' yetrra'tuahuet.

⁴³ E'ñe yetuahuetpa' elloña cha a'pchatyaset cac ñaña pan ñeñt ashota'tyesaref. Ñeñtña a'yapa'cherretpa' chepa'tcha' chorrerrets charra' puechena epa cañer.

⁴⁴ Ñeñtña rrallme'chats atarr shonte' acheñenesha' allo'tsen amnaroch mil ñeñt e'ñe yacmaneshoche'.

*Allempo Jesúsapa' e'ñe cohuen chope'chnen enot oño
(Mt. 14.22-27; Jn. 6.16-21)*

⁴⁵ Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch se'pchaterra yo' o'ch se'cherr anetso ñeñt pa'so'cheñ Betsaida.

Allempoña Jesúsapa' o' so'tnoman acheñenesha'.

⁴⁶ So'tuanmanetpa' ñaña' ahua' aspenfo, allcha' ma'yochosa.

⁴⁷ Atteñapa' o' tsapuen, ñapa' allo'tsenara e'ñe ñapuef aspenfo. Noñtapa'cho'ña ñeñta rrochaso'tsenara sa'po.

⁴⁸ Alloña entenan pueyochresha' ñeñt noñto'tsa'yen. Ñetñapa' e'ñe po'muerochenño'feta echotnenet oñ tarro'mar orrñoñapa' cha a'puerrame'tamñpanet. Atteña allempoña puetarenmochpa' huenanet Jesús cha chope'chnen enot oño. Ahua'ch metanenanetañ,

† 6:37 Denariopa' quelle ñeñt allpon tsa'tenet pam'tarr ñeñt taruaset all pa'nyo.

49 allempoña pueyochresha'pa' entapueñet čha chope'chnen enoť oño. Ñetñapa' čha otenapuetañ choyeshe'matste' huapanet. Cha rrannartet pueñchañoť.

50 Allohuenetpa' e'ñe entuapet nanac yore'tosanet. Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta señcha'tatstapno.

51 Allempoña Jesús'pa' a'tapos noñto allo'tsa'yen pueyochresha'. Huomenquësha'ñapa' čhepa'tcha' muetsoñeñterrtsa. Ñetñapa' čha atarr cohuanrrortapueñet.

52 Ama čhenaneto pueyočhreto ama't atto Jesús'pa' atontatan pan, amaca'ye es čhenahueto pueyočhreto.

Allempo Jesús'pa' a'crratyesosan pa'namen atsnañeťečhno all Genesareto
(Mt. 14.34-36)

53 Allempoña pechatamřsetpa' arr etsotset all oteñet Genesareto.

54 Allempo sohuačha'toset noñtoť, añña acheñenesha' ñeñť allo'tsa'yen, ñetñapa' cheme'tapet Jesús'pa'

55 allenta matrra'tyeset ora erracmañen all yečha'yena acheñenesha'. Attotca'yeña huapatamřpesyesoñetña atsnañeťečhno allemateñ. Ama't erra e'mare'teñet o' čhap all, allcha'čho' anmoñetña patsnañeťer puechechnape'na.

56 Ama't erra čhapyen all shontena acheñenesha' ñaña ñerra'm arr čhen all ama tama eñalle acheñ, ama't allecma oñen acheñenesha' ñetñapa' allcha'čho' na'yeneta' patsnañeťeret allcha' enamapet ama't poso'moťa o'ch a'płlaponet pa'shtam. Allpon ñeñť a'płla'yepue' Jesús pa'shtampa' allpončho' e'ñe corra'yesuerrtsa.

7

Atto Jesús'pa' eñotatenanet ama añeye' ya'sosyatenaye Partsocop ñeñť yerra'yen yenamot
(Mt. 15.1-20)

1 Allempoña allpa' huachha'toña fariseonesha' epuet ñaña puesheña'tets ñeñť huachetsa Jerusaléñoť ñeñť atarr etsotayenayeñ ñoñets ñeñť atet anaret judioneshacop.

2 Ñetña allpa' entosñañet Jesús pueyochresha' atta rra'yenet ama e'pota'tyeneto pot Partsocop allempoch rrallme'chet.

3 (Ñehua, allohuen fariseonesha' ama't ñaña allohuen judioneshha' ñetpa' atet yečhenet amach rreneta'pa' o'ch e'pota'tyeset Partsocop. Tarraña ñeñťpa' pa'tañeshaña yečhatnomahueto.

4 Ñaña po'poñ ellonetpa' atet yečhatanete't pa'tañneshañ ñerra'm esempo huerret allotecma pomatsre'tyenet, amach rreneta'pa' čhoch ñanom a'cohuentatenetañ Partsocop. Ñaña shonte' po'poñečno ñeñt e'ñe yečatyesanete't pa'tañneshañ. Ama't ñeñt porret pa'yenet ñaña po'pajochnetpa' čhochña e'ñe e'pame'tyeñetañ Partsocop, e'parro'tyenetañ ama't ñaña pa'srerrogachno Partsocop. Ama't ñaña all panrame'tyenet e'ñech e'pata'tueñetañ Partsocop.)

5 Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop ñetña allempo entosñañet Jesús pueyochresha' atta rra'yenet ama e'pota'teneto Partsocop ñeñto'marña ñetpa' atet otoset Jesús:

—Peyochreshachnoñapa' eso'mare'tña ama esesha' yečhenayeña ñeñt atet yeche't yatañneshañ. Ñetpa' atta rra'yenet ama e'pota'teneto Partsocop allempo rrenet.

6 Jesúsñapa' atet otanet:

—Sapa' atarruaca'ye ommoñañeshaste' tarro'mar atarr se-shcare'ten, amaña Yomporeye' sesherbena. Isaíaspa' e'ñe cohuen a'mítane't Yompor po'ñoñ, saña te'ñapa' e'ñe atet sepena atet ote't allempo atet ot Yompor:

Ñeñt acheñenesharpa' e'ñe puenamoña cohuentatennanetañ;
pueyočhretoñapa' ama čhenaneto ñeñt cohuen nenten
na.

7 E'ñe orrena ma'yochennet, ñeñt atet yečhatannenetpa' ñeñtpa' e'ñe acheña naye't ahua't počta'ña.

8 Jesúsapa' alla oterraneterr:

—Sapa' čhaca'ye sequečhpuenña ñeñt atet otene'y Yompor ñeñtcha' atet ye'pa'yen cohuen; sapa' añaca'yeña atarr set-sotayen ñeñt atet yečatyenomues sa'tañneshañ; ñeñta atet se'pa'yen orrotečno e'pame'tyese' ñaña sepajočno. Ñaña po'poñečno pa'namen sepatse'tyeneñ ñeñt soten Partsocopaño'.

9 Jesúsapa' alla oterraneterr:

—Sapa' añaca'ye atarr señoten attoch sehuapore'toñ Yompor po'ñoñ ñeñt atet otene'y ña ñeñtcha' atet ye'pa cohuen; ñeñto'marña sapa' e'ñe añ setsotayen ñeñt yečatyenomues satañneshañ.

10 Nehua, Moisésapa' atetca'ye ote't: “Semorrenteño'pa' señcha'na'chcha' sompor ñaña sachor.” Elloña ñaña po'poñonetpa' atet ote't Moisés: “Ñerra'm esesha' sasare'tene' pompor ñaña pachor ñeñtpa' muetsetepa'.”

11 Tarraña sañapa' atet sotyen ñerra'm esesha' atet otene' pompor ñaña pachor: “Ñeñt nechen o'ch napapeña' tarraña

amach napape te'pa' o'ch nene' Yomporecop ñeñt' otenet Corbán",

¹² ñeñtña acheñerpa' sañapa' atetcha' soteñ: "Pocoppa' ama pallteno o'ch es pañ pamo'mte'." Attoña sapa' ama semnateñe ñeñt' acheñer e'ñe ña puemorrenteño'tpa' o'ch es apuenan pompor ñaña pachor.

¹³ Attoca'yeña sehuapore'teññañña Yompor po'ñoñ allochñapa' e'ñech aña setsoten ñeñt' e'ñe sa seycheña. Ama't ellonetpa'cho'ña shonte' po'poñechno ñeñt' atet sepatse'tyena pa'namena'tt socma.

¹⁴ Allempoña Jesús'pa' chore'tan acheñenesha' ñeñt' shontetsa, ñetñapa' atet otanet:

—Sañapa' po'ñoñ allohuenes e'ñepa'chña cohuen se'mñoten allochñapa' attoch e'ñe cohuen chaponasa seyo'chro.

¹⁵ Ama aye' ya'sosyatenaye Partsocop ñeñt' yerra'yen. Añca'yeña ya'sosyatene' e'ñe ya yoc'tape'chatse'teñoñ ñeñt'pa' yeyo'chro'tca'ye huena.

¹⁶ Ñeñtes po'ñoñ ne'mñotene' chaponasepa'ch seyo'chro ñeñt' atet netma'ntatensa añ ñoñets.

¹⁷ Allempoña Jesús'pa' sa'nerran acheñenesha'pa' ñaña'pa' be'tosuerrerr pocollo allña pueyochresha'pa' atet otoset:

—¿Eso'tña petma'ntatyenyña ñorra'?

¹⁸ Jesús'ñapa' atet otanet:

—Sapa'cho'ña e'ñe'tña attecmas samña, ama es sechenoyo seyo'chro. Sapa' ama't señotenoña ñeñt' yerra'yen yenamot ñeñt'pa' amate' errotenot a'sosyatyeña Partsocop.

¹⁹ Tarro'mar ñeñt' yerra'yenpa' amaca'ye yeyo'chroye' cheno, yataca'ye chen. Ñeñt'pa' chocmachca'ye yener a'yo.

Ñehua, ñeñt'pa' atet eñotateney Jesús allohuen rreñto'chnopa' e'ñeca'ye cohuenacma e'ñe arrapahuocma.

²⁰ Jesús'ñapa' alla otarraneterr:

—Añña ñeñt' cha'nets yenamot ñeñt' atto yeñosatse'tyen ñeñt'pa' e'ñe yeyo'chro't huena ñeñtña chocma ya'sosyatene'ña Partsocop.

²¹ E'ñe yeyo'chro't huena cotapñats ñeñt' ama't mame-shapa' ama cohuenayaye, ñeñt'pa' añ: chetapretanna'teñets taporets, cañoresha'teñets, muetsanna'teñets,

²² etatsre'tyeñets, ye'chapretanna'teñets, atsrre'mueñets, shecare'tanna'teñets, ottatse'teñets, moparrñats, sasare'teñets, ommo'cheñets, otatse'teñets.

²³ Ñeñt' allohuen sosya'tsañechno ñeñt'pa' yeyo'chro'tca'yeña huena, ñeñtca'yeña ya'sosyatene'ña Partsocop.

Atto puesheñarr coyanesha' ñeñt ama judioneshayaye ñapa' atarr yemtapana Jesús

(Mt. 15.21-28)

²⁴ Allempoñapa' ahuererr Jesús allotpa' alla chap allampaño anets Tiro ñaña Sidón. Allempo chap all pocollopa' ñapa' mueneñeñ e'ño'ch a'nahua chapañ. Tarraña ama errotenot chapo a'nahua,

²⁵ tarro'mar e'ñe allempo chap cha e'mare'te' puesheñarr coyanesha' ñeñt achoyoret. Puechoyorñapa' penochor ñeñtñapa' cha chorreña oneñeñ. Ñeñtña coyanesha' huapapa' rromosa Jesús pa'rrpõt.

²⁶ Ñeñtña coyanesarpa' ama judioneshayaye, ñapa' po'poñ acheñ ñeñt sirofenicio'marnesha'. All rromosa Jesús pa'rrpõtpa' atet otos:

—Nepapare, pequechpatataye'chapon nechoyor oneñeñ.

²⁷ Jesúsñapa' atet toma'ntatana acheñenesha' ñeñt ama judioneshayaye ñeñto'marña atet och:

—Ñanomcha' ya yacñeñar ya'yeta' tarro'mar ama pocteyaye o'ch yeprratam̄pes yacñeñar puerrar o'ch yehuapore'tam̄pes allo'tsen ochec o'ch rre' ñaña ochec.

²⁸ Coyanesha'ñapa' atet otererr:

—Ama't atteñ nepapareshacha' tarraña ama't ochepa'cho'ña rra'yenan cheshanesha' puerrar ñeñt a'shore'tatyenet po'mesañna'cho.

²⁹ Allempoña Jesúsapa' atet otererr:

—E'ñe pocte' atet pe'ñorena; e'ñepa't pame'ñenna. Ñeñto'mar te'pa' o'ch ahuerreñ e'ñe peñmañesha', te'ña oneñetpa' o' quechpa'nerrnañ pechoyor.

³⁰ Allempoña coyanesha'pa' ahuer pa'paclo, o' cherrpa' alla entuerran puechoyor alla panena e'ñe cohuen po'mayo, oneñeñapa' o' quechpa'ner.

Allempo Jesúsapa' a'crraterran paquet ñeñt opanatets

³¹ Allempo puerrerra allot ñeñt allampañoñ Tiroñ, arr oñemhuanom anetso Sidón allot ñaña po'poñ anetso Decapolisoma' mar. Attoña o' alla ahuer sa'ponet all Galileyasoma'.

³² O' cherr allpa' huapaterrñañeterr puesheñarr yacma ñeñtñapa' paquet ñaña ama e'ñeye' cohuenaye' eñeno. Ñeñtña huapate'pa' atet otosan Jesús:

—Añecopca' nehuapateñ o'ch pa'pille' potoñ attoch correrra.

³³ Jesúsñapa' allenta anemñ ñapueñ a'yenet, allñapa' esho'tosan potañ paquet pueto; ñaña o' senmare'pa' o' alla a'p̄llerrñañer ñaña pueñeñ.

³⁴ Allempoña Jesús cohua' enonetpa' enara. Allempoñapa' atet ot e'ñe ña po'ñoño:

—Efata —ñeñt̃ yoten yeñoño: Pota'nerrepa' pet allochña'pa' o'ch pe'muerra e'ñe cohuen.

³⁵ E'ñe otue'pa' čha pota'nerrets puetpa' e'ñe cohuen e'muerra. Ama't ñeñt̃ echarrtatene' pueñeñpa' o' a'rroyer čha eñorerrtsa e'ñe cohuen.

³⁶ Jesúsña'pa' atet otanet:

—Te'pa' amach esesha' sota'psa'tatsto ama't e'ñe puesheñarra.

Ama't atet otanetañ elloña ñetpa' a'metare'teñet.

³⁷ Allña'pa' atarr nanac cohuanrrorteñet, atet otyenet:

—Jesús'pa' atarro'trra cohuenña ñeñt̃ allohuen atet es pa'yen. Ama't paquetnesha'pa' čhocma e'ñe cohuen e'matuenanet. Ama't ñaña opananeshachnopa' čhocma e'ñe cohuen eñoratyenanet.

8

*Allempo Jesús'pa' rratenan shonte' acheñenesha' ñeñt̃ña
acheñenesha'pa' allo'tsen pa'tatsoch mil*

(Mt. 15.32-39)

¹ Allempoña po'pocheño shonterrer acheñenesha' Jesúsesho. Allempopa'cho'ña ama eñalle ñeñt̃cha' rret. Ñeño'mar Jesús'pa' agotan pueyochresha'pa' atet otapanet:

² —Napa' čha atarr nemuereña allohuen acheñenesha' ñeñt̃ shontetsa arr. O' ma'pamtoset nesho ama eñallmeñeto ñeñt̃cha' rret.

³ Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño tarro'mar patanta'tetspa' atarr bačhayot huapyenet.

⁴ Pueyochresha'ña'pa' atet ochet:

—Errahuachca'ye yentña rreñets̃e' ñeñt̃cha' yerrach shonte' acheñ arpa' amayaca'ye.

⁵ Jesúsña'pa' atet oterraneterr:

—Sapa' ¿errpona't sechenña pan?

Ñetña'pa' atet otereterr:

—E'ñeca'ye cančhrra yechen.

⁶ Allempoña'pa' otan acheñenesha':

—Te'pa' sanorrča'tyes patso.

Allña'pa' agapan ñeñt̃ cančherr pan. Agaphuepa' o' parasyoso'tenanerr Pompor allotña'pa' o' shota'tan pan, apanatyesan pueyochresha'. Ñetña'pa' o' epatyaset ñamet allohuen acheñenesha' e'ñe epa'huet.

⁷ Apuanet panpa' eñall ñaña pate'tets cacatollesha'. Jesúsña'pa' alla parasyoso'tam'perranerr ñaña cacatollesha' allempoña'pa' oterranerr pueyochresha':

—Sepatyerraneterr ñaña cacatollesha'.

8 Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' čha a'pchatyaset ñeñtña'pa' a'yapačheret. Ñeñtña a'yapačherretpa' čhepa'tcha' chorrats cančherr cañfer e'ñe tamo'yare'.

9 Ñeñt rrallme'chats atarr aton acheñenesha' ñato' allo'tsente' pa'tatsoch mil acheñenesha'. Allempoña Jesús'pa' so'tnerran acheñenesha'pa' ahuerr,

10 a'tapos noñto pueyochreshohuen ahuanm̄pset o'ch ahuanmuet anetso ñeñt pa'so'cheñ Dalmanuta.

Atto fariseonesha' enamoset Jesús gatapanetepa'to' po'partsoña

(Mt. 16.1-4; Lc. 12.54-56)

11 Allempoña Jesús'pa' huačherrñañerr ñaña fariseonesha' ahuo'ch otnare'chet Jesús. Ñetña'pa' čha mueneñet o'ch topa'chet Jesús. Ñeñto'marña atet otoset:

—Yapa' añca'ye yemnen o'ch pegatapuey pepartsoña entot allochñapa' attoch yeñotosep̄ po'ñočh papa' Parets Puechemerep̄.

12 Jesúsñapa' allenta enara čha muene' po'poñ entanet pueyočhro ñeñto'marña atet otanet:

—Eso'marte'ca'ye acheñenesha' ñeñt corra'yetsa te' ñetña'pa' aña atarr e'nenet o'ch norrtatanet nepartsoña entot. Po'ñočhca'ye na te'pa' o'ch notas, ama't coñe'ta amach es negataneto.

13 Allempoña Jesús sohuanerranetpa' a'taphuerr noñtopa' ahuanm̄pes, pechaterra yom̄ta'n.

Atto Jesús toma'ntaterraneterr ñeñt po'chaser pen fariseonesha'

(Mt. 16.5-12)

14 Pueyochresha'ñapa' čha puesnomuet o'ch anmuet pocram̄, noñtopa' ama es eñalle ñeñtcha' rret, e'ñe pa'rra pan eñall.

15 Jesúsñapa' alla toma'ntaterraneterr, ñeñtñapa' atet otanet:

—E'ñech señota ñato't semeñe'teña'ña fariseonesha' ama't ñaña Herodes po'chaser allo tsetenet pan.

16 Ñetña cotape'chyasetpa' atet otanna'tyaset:

—Amaca'ye yechenoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

17 Jesúsña allempo eñotanet atet cotape'chyenet ñaña'pa' atet oterranneterr:

—Eso'mare't sellquëñesha' sotanna'tyena año' eñalle ñeñtcha' serra'. ¿Ama't seño'teñe? ¿Ama't čhennasoña seyočhro? Teme'ttsena't se'charrtatenña seyočher.

18 Sapa' ama't aclo'yetesep̄a' čhaca'ye sottena ñerra'mrrate' ama senteno. Ama't etatesep̄a' čhaca'ye

sottena ñerra'mrrate' ama se'mueno. Ama't mameshapa' are'tña es seyerpueno.

19 Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sapcha'huerrña ñeñt' ashota'tyesaret allempo e'ñe seyetua? ¿Errpona'tña cañter se'chorrerr?

Ñetñapa' atet ochet:

—Charra'ca'ye puechena epa cañter.

20 —Ñaña allempo neshota't cancherr pan pa'tatsoch mil acheñ ñeñt' rre' ¿errpona'tña sapcherrerrña ñeñt' ashota'tyesaret allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cancherrca'ye cañter ye'chorrerrerrña allempo.

21 Jesúsñapa' alla oterraneterr:

—Te'ñapa' ¿ama'tña o' chaponasña seyocho? Ñeñt' neñotatenes ñeñtpa' ama serrarecpaye' notenso.

Allempo Jesúsapa' a'crraterran aporo'yet all Betsaido

22 Allempoña chacha'tet anetso Betsaido, allñapa' huapaterñañeterr aporo'yet, ñeñtpa' atet otoset Jesús:

—Añecopca'ye yehuapateñña o'ch pa'p'llacle'chap' attoch pecuater.

23 Allempoña Jesúsapa' echa'nman aporo'yet pototpa' anem' a'yenet all ama eñalle pocoll. Allñapa' a'yacle'chos pa'snemo, attoña a'p'llacle'chos, allñapa' atet och:

—¿Ama't coñe'tapa' ama't o' pento?

24 Aporo'yetña cohua'yestsapa' allenta otan Jesús:

—O'ca'ye nent acheñ alla chopeñen tarraña e'ñe atet nentyenanet ñerra'mrrate' tsach tomcha'tyets.

25 Jesúsñapa' alla a'p'llacle'chererr, aporo'yetñapa' cohua'yerrtserrpa' chepa'tcha' e'ñe cohuenterrtsaña pa'clle'. E'ñe cohuen es entyesuahuer allohuen.

26 Allempoña Jesúsapa' atet och:

—Te'ña ñerra'm o'ch ahuerreḗ pepaclopa' tarraña amach poñmatsterroña anetso'mar, allochñapa' amach esesha' potapsa'tatsetnerro ama't e'ñe puesheñarra.

Atto Pedropa' otan Jesús, ḗapa' ḗaña Yompor Puechemereḗ ñeñteḗ Cristotosets

(Mt. 16.13-20; Lc. 9.18-21)

27 Allempoña ahuererr Jesús pueyochreshohuen. Arr sechenet all oteñet Cesarea ñeñtara Filipino allcha' chopeñe'chyeneta' all anetso'mar. Allña toñopa' a'ḗto'tnoman pueyochresha' ñeñtpa' atet otnomanet:

—¿Erroñena't otyenenña allohuen acheñenesha', napa' eseshante'?

²⁸ Ñetñapa' atet otyeset:

—Patantarr acheñenesha'pa' atetca'ye otyenpet ñapa' Juanañpo'te' ñeñfe'po' apatañtatset' Yomporecop. Po'potantaññapa' atet otyenpet ñapa' Elíasopo'te'; po'potantaññapa' atet otyenpet ñapa' añe'po'te' po'psheñeñ ñeñt a'mtaye't Yompor po'ñoñ ahuat.

²⁹ Allempoñapa' alla a'p'to'terraneterr:

—Sañapa' ¿erroñena'tña sotenenna sa?

Pedroña eñoratsapa' atet och:

—Papa' ñeñfe'pca'ye Cristotosets.

³⁰ Allempoñapa' otan pueyochresha':

—Amach esesha' sota'psa'tatsto ama't puesheñarra napa' na ñeñfen Cristotets.

Atto Jesúsapa' eñotatan pueyochresha' ñapa' amtsaretterrach (Mt. 16.21-28; Lc. 9.22-27)

³¹ Jesúsña e'ñe allempoteñpa' motetnomñ eñotatyenomue' pueyochresha' ñeñt atet anaret ñocop, ñeñtpa' atet otanet:

—Na Ñeñfen Acheñetosetspa' atet anaret nocop, nanaccha' na'muerochtataretterra. Amach esesha' pocteye' nenterraye—ama't ñeñt pompornesha' pen judionesha', ama't ñeñt pa'mcha'tareter pen judionesha' po'cornanesha', ama't ñaña ñeñt etsotayenayeñ ñoñets ñeñt atet anaret judioneshacop—ama't ñetpa' amach eseshaye' neyemterraye. Attochña napa' muetsataterrnetcha'. Tarraña poma'pamtañoch o'ch alla nentanterra.

³² Ñeñtpa' e'ñe eñotochen otnomanet ñapa' atetcha' a'paretterra. Pedroña'papa' allenta anemñ a'yenetpa' allñapa' atet otos:

—Arep'a'ch Partseshacha' atteye' perrpeto ama't errponaña.

³³ Jesúsña'papa' alla puerraperra cohuos pueyochresheshonet allñapa' atet otan Pedro:

—Orra'p a'yo neshot oneñe'fe; ñapa' amaca'ye Yomporeye' atet poctape'chatenaye; ñeñtpa' acheñarramche' pocta'pña.

³⁴ Allempoña Jesúsapa' agotan acheñenesha' ñaña pueyochresha' ñeñtpa' atet otanet:

—Ñerra'm esesha' muenene' o'ch coterrnet na e'ñe po'ño'ch attoch neyochresha' neperranet añ poctetsa sohuanmuete'pa'ña ñeñt atet muenenet e'ñe ñocpueta ama't e'ñe pocreñohuenet. Attochña ñetpa' o'ch e'ñe toma'nteret ñeñt chechnene' po'corsoch allcha' muerochtet ñamet. Attochña coterrnet e'ñe po'ño'ch.

³⁵ Tarro'mar ñerra'm esesha' e'ñe añña muenenet o'ch correnet atomat attoch e'ñe coshenet arr patsro, ñetñapa'

čhach a'chencatet ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocorreñohuenet nocop attoch epatuerret cohuen ñoñets ñeñt'pa' alloch sequeshperra, ñeñtña acheñerpa' ñañapa' corretsach e'ñe cohuen tayoteñ errponañohuen.

³⁶ Ama't errponenañaren esocmañen es yeyoratsetyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen, ñeñtñapa' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñt'cha' a'queshpaterre' yecamquëñ.

³⁷ Tarro'mar yocoppa' ama es eñalle ñeñt'cha' yepomuerr alloch alla yerañterra yecamquëñ.

³⁸ Tarraña ñerra'm erra'tsencha' nepenquënaya na te', neñoñpa'cho'ña čha apencočhen entennanet, napa'cho'ña nepenca'huerranetcha' esempoch nohuerra. Shonte' acheñenesha' ñeñt corra'yetsa te' arr patsro ñetñapa' atarr ochñañeneshet tarro'mar ñetpa' po'poña po'yomporer pa'yenet. Tarraña ñerra'm esesha'ch puepenquëñotetan na amach a'metenneto all, ñeñtña acheñerpa' napa'cho'ña čhach nepenca'huera ñerra'm esempoch nohuerra. Po'ñoč napa' Ñeñten Acheñetosetspa' nohuerrach e'ñe Nompopor'cohuenñoť epan ñaña po'millañoťeñnaneshar ñeñt e'ñe torra'yetsa Partsocop.

9

¹ Allempoña Jesús'pa' alla oterraneterr:

—Po'ñočca'ye te'pa' o'ch notas, patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarr'cha' ayochreshatterra ña e'ñe po'huamencot.

Allempo Jesús'pa' po'poñetañpsana pueyochresha'
(Mt. 17.1-13; Lc. 9.28-36)

² Allempo pechapmaterrerr, Jesús'ñapa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspento e'ñe ñapťochayet all aspento. Allña Jesús'pa' machayotepa'tcha' e'ñe po'poñetañpsosanet.

³ Pa'shtampa' čha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena.

⁴ Allñapa' machayotepa'tcha' orrtanet Elías ñaña Moisés. Ñetñapa' alla serrpare'toset epuet Jesús.

⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch yařomatonas ma'ppahua quęrpachet, puepahuarra' pćocopcha' po'ppahueñpa' Moisésocopcha', po'ppahueñpa' Elíasocopcha'.

6 Ñehua, Pedroña pueyorñot atfa muene' otatse't, ama eñocherrotencha' ot.

7 Allempo eñorena Pedropa' čha orrtosahuet os ñeñ atarr cohuen poptetsa čhepa'tcha' a'pomani'psosanet. Cha e'morrtostsa ñoñets osot; ñeñña ñoñetspa' Yompor otosahuet; ñeñpa' atet ot:

—Añmapa' ñeñ no Nechemer ñeñ atarr nemuerena, ñeñtcha'ña e'ñe cohuen se'mñoterr.

8 Allempoña o' cohua'yerretpa' arepa'tcha' eseshaye' enterreto, ñapća enteret Jesús.

9 Allempo onačherret aspenřot Jesúsña' atet otnerranet:

—Te'pa' amach esesha' sota'pa'satstato ama't e'ñe puesheñarra ñeñ atet o' sentua. Tarrempohuach allempoch netanterra na rromot na Ñeñten Acheñetosets, allempochña seserrpare'taterña allohuen acheñenesha'.

10 Ñetña atet otanet Jesús'pa' atet'cho' pet, ama a'meteññañeto po'ñoñ. Tarraña ñetña'pa' atfa a'řto'tanna'tyesnerret:

—Ta'm ¿esťe'ña oteneyña Jesús o'ch tanterra rromot?

11 Allempoña pueyochresha' atet otnerret:

—¿Eso'mare'tña otenña ñeñ atarr etsotene' ñoñets ñeñ atet anaret, Elíaso'ch ñanom huerřtsa?

12 Ñaña'pa' atet otnerraneterr:

—Elías po'ñočpa' ñachca'yeña huerřtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't señotenoña ñaña ñeñ atet anaret quellco e'ñe nocop. Ñeñ allpa' atetca' oten na Ñeñten Acheñetosets atarrcha' na'mueročhtatařterra, atarrcha' tsena'terrnet.

13 Tarraña napa' o'ch notas, Elías'pa' o'ca'ye huaphuerañ arr, ñeñpa' čhaña errořuanen řapueret ñeñ atet muena'yenet ñet. Atřoca'yeña etsoterraña ñaña ñeñ atet anaret quellco ñocop.

*Atto Jesús'pa' a'crraterran cheshachor ñeñ otaten oneñet
(Mt. 17.14-21; Lc. 9.37-43)*

14 Allempoña čhačherret allo'tsa'yen pueyochresha' allña'pa' alla entuereterr shonte' acheñenesha' ñeñ emchorrenaya po'potantañ pueyochresha'. Ñeñña etsotayenayeñ ñoñets ñeñ atet anare'tpa' alla entuerraneterr all es otnare'teññañet pueyochresha'.

15 Allempoña entapuer allohuen acheñenesha'pa' čha atarr cohuanrrortapueret, matrra'tet ñeshopa' huom'čha'tapueret.

16 Jesúsñapa' allenta otuerranet:

—Sapa' ¿errofena'tña sotanna'tyena?

17 Puesheñarrña ñeñt' allo'tsenpa' ñaña'pa' atet otař:

—Maestrocha' napa' o'ca'ye nohuapatonapeñña nechemer, čhaca'ye chorreña oneñt' čha opanatateñ.

18 Ñerra'm errofeno rremueña' čhachca'ye ata'tateñ patso, čhach amtan pa'po'pa' o'ch rraso'tan pa's, o'ch e'ñe echar-
rta. O' notuosnañña peyochresha' o'ch quečhpateret oneñt' ñesho'pa' tarraña ñetpa' amaca'ye eshcaye' quečhpateñeto.

19 Jesúsñapa' atet otanet:

—Sa ñeñtes acheñes ama't mameshapa' ama ayemtenaye' sentpenno. O' allponmatuanen allo'tsenen arr patsro, napa' atta atarr na'huantennas, atta necuenes ñato' atto'pa' o'ch same'ñerna.

Allempoña'pa' atet otanet:

—Ama'tpa' sanmonca'ye chesha' arr.

20 Allempoña anmoñet chesha'pa' oneñeñña'pa' entosan Jesús'pa' čhepa'tcha' otatosanña chesha'pa' alla ata patso, čha pomero'ta, amtan ñaña pa'po'.

21 Jesúsñapa' allenta otoñ pompor:

—¿Esempoteñe'tña atet perra?

Ñaña'pa' atet och:

—Cheshoteñca'ye atet perra.

22 O'te' epaye' ata'tater ama't tso ama't ñaña oño attoch muetsereñ. Paña te'pa' ñerra'm erroteno'pa' e'ñe pemuereño't pebensam'psaye'cherrnan nechemer allochñapa' attoch metuer atto mueročttena.

23 Jesúsñapa' atet och:

—Ñerra'm na peyemtena amaca'ye eñalleña ñeñt' torrapo' añecop ñeñt' e'ñe neyemtenaya na.

24 Allempoña ñeñt' pompor pen chesha'pa' rranapa' atet otererr:

—Napa' neyemtenpañca'ye, te'ñapa' peyenpa'n Ayochreshate attoch neyemterrpa e'ñe poctacma.

25 Allempoña Jesús'pa' entapan shonte' acheñenesha' ñeñt' matačhetsa ñeshone't, ñaña'pa' allenta otan oneñt':

—Pa oneñete, opanatatañeř, a'paquetatañeř, te'ñapa' o'ch notapř: Pequečhpa'ner cheshachor e'ñe tayecma, ama't erponaña amach alla pechorrere'te.

26 E'ñe otue' atet oneñeñña'pa' čhepa'tcha' rrana'nmatsa, alla otatnerranerr cheshachorpa' čho quečhpa'nmue' o' ahuerr.

Cheshachorpa' ama pelleno čha otta ñerra'mrrate' o' rroma. Acheñenesha'ñapa' atet otyes:

—Po'ñoč te'pa' o'ca'ye rroma.

²⁷ Jesúsñapa' allenta chete' pototpa' o' tantach, chesha'ñapa' čha terrets e'ñe cohuen.

²⁸ Allempoña Jesúsapa' ahuer pueyochreshohuen, o' be'tosča'tuerret pocollo, allpa' e'ñe ñap'ochayet, pueyochresha'ñapa' allenta otueret Jesús:

—Yapa' ¿eso'mare'tña ama eshcaye' yequečpatatereña oneñeť?

²⁹ Ñaña'pa' atet otanet:

—Ñeñť atet oneñeťpa' amach errotenot yequečpatatereña e'ñe atta. Chochña yema'yochena ñaña yema'yochreñot ama't yerrarpa' o'ch yequečpue' mame'. Attotča'ña yequečpatatereña oneñeť ñeñť atet.

Jesúsapa' eñotateraneterr puepocheño ñapa' čhocmach muet-seret

(Mt. 17.22-23; Lc. 9.43-45)

³⁰ Ahuanerreterr allotpa' arr oñemhuanerret Galileo'mar. Jesúsñapa' mueneñeñ a'nahuoto'ch metañ

³¹ tarro'mar ñapa' mueneñ o'ch yečhatnoman pueyochresha'. Ñeñťpa' atet otnomanet:

—Na Ñeñten Acheñetosetspa' pomataterretča' attočña errotuancha' perrnet. Atteñapa' o'ch muetsataterret tarraña poma'pamtañoñapa' o'ch alla netanterra.

³² Ñeñña ñoñets ñetñapa' ama't puesheñarrotetapa' ama eseshaye' eñotenaye' enteñeto ñeñto'marña ama a'p'to'tenaye' enteñeto.

All eñotateney ñeñť acheñer e'ñe po'ñoč atarr asherben enteñ Yompor

(Mt. 18.1-5; Lc. 9.46-48)

³³ Allempoña čhača'tet ñaña Capernaumo. Allempoña čhapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye tarro'mar ñetpa' añca'ye otanna'tyesnenetña toño:

—Yapa' erra'tsenoteyte'ñaca'yeña ñeñtey atarr sherbets, ñeñtey atarr añča'taretoyen enteney acheñenesha'.

³⁵ Jesúsñapa' all anorrospa' allenta čhore'tan allohuen pueyochreshačhnopa' atet otanet:

—Ñerra'm erra'tsenotes ñeñtes atarr añča'taretoyen entetsañ, ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñť atet pena ñeñť atta atarr taruaset po'potantañecop, ama't ñaña allohuenacop.

³⁶ Jesúsñapa' cheshatolla čhore'tpa'tomach e'ñe alla, allenta enachpa' atet otanet:

37 —Erra'tsenotes sa ñerra'm e'ñe cohuen saguëñ ama't ñeñt ama asherbenaye' entyeneto atet ñerra'm añ cheshatoll tarro'mar sapa' na same'ñena, na'naña e'ñe cohuen saguën. Elloña ñaña erra'tsenotes sa ñeñtes naguëne' na, ama e'ñe naptocheyey' saguëno, aña'naña saguënnan Nompoy ñeñt nellensene'.

Atto eñotateney ñeñt ama çhoye' yepatare'tenaye ñeñtña po'ñoçhpa' e'ñe parrocmayeyenpannena
(Lc. 9.49-50; Mt. 10.42)

38 Allempoña pueyochresha' ñeñt Juanpa' atet otan Jesús:

—Maestro, ya ahuaña'pa' atet yeñch puesheñarr yacma ñeñt queçhpatene' oneñet. E'ñe pueçhore'teñoñep ña peso'chño'pa' queçhpatan oneñet. Yaña'pa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' atet yoch:

—Amach atet pepatsto.

39 Jesúsña'pa' atet ot:

—Sapa' amachca'ye sepatare'tatsche tarro'mar ñerra'm erra'tsencha' orrtate' partsoteñets e'ñe na neso'chño, ñeñtña acheñer tsapatonetpa' amachca'ye muenere alla o'ch achmāre'terren.

40 Ñaña ñerra'm ama çho epatare'tenye yaña, ñeñtña po'ñoçhpa' e'ñeca'ye parrocmayeyenpannena.

41 Po'ñoçhca'ye notenes: Ama't erra'tsena acheñer ñeñtcha' sapue' ama't coñe'ta oñ tarro'mar sapa' e'ñe na neyochresha' nepenes, ñeñtña acheñerpa' çhocmach atsa'taretterra ñeñtcha' atarr coshaterre' ña.

Atto çhocmach huaponaya ñeñtcha' yetpatyene' o'ch atet patyese' ñeñt ama pocteye' enteno Yompoy
(Mt. 18.6-9; Lc. 17.1-2)

42 'Ama't erra'tsena ñeñt ama pommo'cheñoñeye' ame'ñenno atet ñerra'm cheshatoll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeñt ama pocteye' enteno Yompoy, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet patenana' po'psheñeñ, e'ñech allorocma çharachetañ mapue' añecmuen pa'çhnoño allpon ñerra'm puetse'tamets o'ch huapore'chet oño epo allcha' ño'shach mapue'.

43-48 Ñaña o'ch noterrser: Ñerra'm sechets patyenes ñeñt ama pocteye' enteno Yompoy atet ñerra'm sot, setac, seclle', añ poctetsa o'ch sequeçhpuerr ñeñt çhocma atet patse'tatyenes sechets. Ñeñtpa' e'ñe atet ñerra'mrrate' e'ñe allorocma o' sepecherr sot, setac, o' serrotterr

seclle', o'ch sehuapore'ter. Añ cohuen socop ama't e'ñe sepo'yotateñoñ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch secherr coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeññ allo'tsenpa' ama amayaño ama't errponaña. Ñaña añ cohuen socop ama't e'ñe setcotpa' sepshemtatqueñoñ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeññ allo'tsenpa' ama amayaño ama't errponaña. Ñaña añ cohuen socop ama't seclloyot sepshemtacllo'yeñoñ o'ch secherr all añcha'tarettena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'cho'ña ñeññ allo'tsenpa' ama amayaño ama't errponaña.

⁴⁹ Ñeññña Jesúsapa' atet toma'ntaterraneterr:

—Allohuen ñeññcha' cohuenterrtsapa' añcha'ca'ye a'cohuentatene' tso'; ñaña allohuen ayarrachno ñeññ amsaretetsa Yomporecoppa' añca'yeña a'cohuentatene' pos.

⁵⁰ Ñehua, yapa' yeñoteñ pospa' atarr cohuen sherbeney. Tarrña ñerra'm posña po'poserrteña huañerretspa' yapa' amate' errot yepe o'ch alla ya'poserrtater attoch alla sherberrey. Sapa' e'ñepa'chña cohuen sesherbannena e'ñech ates ñerra'm pospa' atarrcha' sherbeney. Attochña e'ñe cohuen sentannena e'ñech muechet seycha'yena.

10

*Atto Jesúsapa' yeçhatosanet ama asanna'tpahuoyaye
(Mt. 19.1-12; Lc. 16.18)*

¹ Allempoña Jesúsapa' err Capernaumotpa' ahuer anetso Judeo ñaña arre'na sen Jordanas yom'ta'n. Allñapa' alla shonterrñañerr acheñenesha', ñañaapa' yeçhaterraneterr Yompor po'ñoñ ñeññ chocma attecma penanet.

² Allñapa' o' alla huaçherrñañerr ñaña fariseonesha'. Ñetñapa' aña atarr e'nenet e'ñe pueshquëñotet po'ñoñotetpa' o'ch eñorachet ñeññ ama cohuenayaye. Ñeñto'marña ñetpa' atet otoset:

—Ta'm ¿pocete'te' o'ch yeser yetapor?

³ Ñañaapa' atet otapanet:

—Sapa' ¿ama't señotenoña Moisés po'ñoñ ñeñt atet nonase't?

4 Ñetñapa' atet ochet:

—Moisés po'ñoñpa' atetca'ye oten, čhoch yequellcoñ yetapor papell ñeñtcha' yař allempochña yeser.

5 Jesúsña' atet otanet:

—Tarraña sa seyočhropa' čhocmaca'ye po'poñ sentuena ñeñto'marca'yeña Moiséspa' atet quellconase't attoch sese' setapor.

6 Ama't atet muenataseña' tarraña Yomporpa' e'ñe ahuatoteñ allempoteñ es yečcatyes “allempo yečcatan ñaña asheñorr, yečcatan ñaña peno.”

7 Allempo Yomporpa' atet ot: “Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ pocte' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet puetapor.

8 Attoña epsheño'maretpa' e'ñech patrra po'chets penet.” Attochña' o'huañcha' puesheña'tetstet, allochñapa' o'ch e'ñe puesheñarratet.

9 Ñeñt atto Parets e'ñe patrratatan yacma epuet puetapor amach čha ellopa' alla sannerreto.

10 Allempo čačherret pocollo, allña pueyochresha'pa' atet otueret:

—¿Erroñente'ña ñeñt atet řoten ñorra' año' asanna'tpahuo?

11 Ñaña'papa' oterraneterr:

—Ñerra'm esesha' serre' puetapor o'ch alla yorerran po'psheñeñ ñeñtcha' puetapor perr, ñeñtña yacmapa' čhachca'ye ochña'tamřerrana puetaporeshe'mañ. Ñeñtpa' ama pocteye' enteñe Yompor.

12 Ñaña coyanesha' ñerra'm serran puerrollar o'ch yorer po'psheñeñ yacma ñeñtcha' puerrollar perr, ñeñtña coyanesarpa' čhachca'ye ochña'tamřerrana ñaña puerrollareshe'mañ. Ñeñtpa' čho'ña ama't mameshapa' ama pocteye' enteñe Yompor.

Atto Jesúsapa' bensare'tamřsapan cheshaneshas' ñeñt huapatoñet

(Mt. 19.13-15; Lc. 18.15-17)

13 Allempoñapa' huačha'tachet ñaña shonte' cheshatollesha' Jesúsesho. Ñetpa' añecopña huačha'tachet o'ch a'řlla'yesapanet Jesús. Jesúsña pueyochresha' allempo entapan ñeñt huačha'tate' cheshaneshachno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretta pueto.

14 Tarraña Jesúsña allempo entan pueyochresha' cha epatare'tapan cheshatollesha', ñaña' ama't mameshapa' ama pocteye' entaneto. Ñaña' atet otanet:

—Pocte'ña'cho' semnachñaca'yeña cheshanesha' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñ' atarr neyemtenaya na atet ñerra'mrrate' cheshatoll, ñetcha' o'patenetña Yompor po'cohuenña ñeñ' atto ayochreshattena ña.

15 Po'ño'chpa' o'ch notas, ñerra'm esesha' ama e'ñeye' pueyemteño'teye' aguëñña'neto Yompor po'cohuenña amach atet perreto ñerra'm cheshatoll e'ñech yemtenana ñeñ' cohuañpene', ñetña' amach o'patenetoña Yompor po'cohuenña atto atarr ayochreshattena ña.

16 Allempoña Jesús'pa' a'chono'tyesapan cheshanesha'pa' allña a'p'lla'yeshapanetña e'ñe ña potot attoña bensare'tam'psapanet.

Atto puesheñarr ñeñ' huepueshameñ ñeñ' atarr e'cllayoret ñaña' e'ñorana'tosana Jesús
(Mt. 19.16-30; Lc. 18.18-30)

17 Allempoña Jesús'pa' o'ch ahuenñerr allenet sechena. Al-
lentepa'tcha' huapa'muena puesheñarr yacma e'ñe mate-
nacma huapa. Alla concorpana'tosana Jesús'pa' atet otos:

—Maestro, p'apa' atarr cohuen acheñreþ, te'pa' o'ch p'otapuen ¿errofena'tcha' nepaña na ñeñ' e'ñe cohuen attochña napa' corretsanach e'ñe tayoteñ ama't errponañohuen?

18 Jesús'ña' atet otaþ:

Eso'mare't p'otenenña napa' atarro' cohuen acheñren. Arr
arromña'tenesha' ama't e'ñe puesheñarrapa' ama eñalleña ñeñ'
e'ñe cohuen acheñer. Ñapñaña Yompor ñeñ' e'ñe po'ño'ch
cohuen.

19 Papa' e'ñe peñotuen Yompor po'ñoñ all oteneñ ñeñ'cha'
atet yepena e'ñe cohuen, ñeñ' atet oteneñ: “Amach yech-
tapretyesatsto taporets, amach yemtsanna'tatsto, amach
yetyesatsto, amach yetoma'tam'psatsche yamo'ts e'ñe atta,
yeshquëño'pa' amach es yeprratam'psatsche po'psheñeñ,
ñaña yemorrenteño'pa' yem'cha'na'chcha' yompor ñaña ya-
chor.”

20 Ñeñ'ña a'p'to'tene'pa' atet otererr:

—Maestrocha' napa' e'ñeca'ye cheshoteñ ora añechnopa'
e'ñeca'ye netsotueñ.

21 Jesús'ña e'ñe puemorrenteño' cohue'pa' atet otererr:

—Eñallmeñca'ye paterr ñeñt pepalltena ñeñt ama atteye' pepeno. Te'pa' añcha'ña atet peña o'ch ahuerrep' o'ch pepomhuerr ora allpon ñeñt pechyen o'ch p̄apa'yera' huocchañneshachno ñeñt atarr es pallta'yetsa, attochña p̄apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄octerren attoch e'ñe neyochresha' neperrep' e'ñe poctacma.

22 O'ña e'mhuan ñeñt atet och Jesús'pa' ñañapa' cha atarr nanac lleca tarro'mar ñapa' shonte' esocmañen echyen. Ñeñto'mañña e'ñe puellquēñsha' ahuer.

23 Allempoña Jesús'pa' cohua'yesanetpa' atet otan pueyochresha':

—Ñeñt atarr eçllayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña.

24 Pueyochresha'ñapa' cha muene' yore'tanet ñeñt atet otenanet. Jesús'ñapa' alla oterraneterr:

—Nechemerneshacha' o'ch notas: Añ acheñer ñeñt añach e'ñe yemtena ñeñt allpon echyen arr patsro ñeñtña acheñerpa' atarrca'ye nanac echarr o'ch agapoñet Yompor po'cohuenña ñeñt atto ayochreshattena ña.

25 Ñehua, ñeñtpa' atetcha' netma'ntacha. Po'ñoçh yapa' yeñoteñ berr añecmuen allpon ñerra'm huaquēsh* atarrca'ye torrapo' o'ch esho'tosa añetollponatollo atet ñerra'mrrate' acossh puetatollo. Ñeñtpa' atetca'ye penaña acheñ ñeñt eçllayoret, ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

26 Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyeset:

—Tarraña ñerra'm atette'pa' amate' esesha' a'queshp̄ataretterrtso ama't puesheñarra tarro'mar yapa' yeñoteñca'ye huaquēshpa' amaca' esho'tenoña acshequeto.

27 Allempoña Jesús'pa' atta cohua'yesanetpa' atet oterraneterr:

—Sa arromñateneshaspa' amach es errotenaye' apen senteno. Tarraña Yomporpa' ama eñalleña ñocop ñeñt atarr torrapo' enten.

28 Allempoña Pedropa' atet och:

—Partseshacha' po'ñoçh yapa' o' e'ñe yesuanom ora allohuen attoch e'ñe yocterrep'.

29 Jesús'ñapa' alla oterraneterr:

* 10:25 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquēsh.

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompor, pachor ñato' puetapor, ñato' pacñeñar ñato' po'patseñ attochña napa' e'ñech cohuen sherberrnet pueserrpare'teñoťet cohuen ñoñets alloch a'queshpataretterra acheñenesha',

³⁰ elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña čharroch čharra'ch alla agapyerret, ama't e'ñe tayoteñ allempo correnet arr patsro—ama't ñeñtcha' pa'pacllačno perret ñaña ñeñtcha' pa'mo'nasheñneshačno perret, ñaña ñeñtcha' po'chaneshačno perret, ñaña ñeñtcha' pachorneshačno perret ñaña ñeñtcha' pacñeñarečno perret, ñaña ñeñtcha' po'patseñ perret. Tarraña ama'tcha' atet aparetterretañpa' čhocmach amuročhtataretterret pame'ñeñoťetan na. Elloña tsapatonetña ñetñapa' aguërretcha' ñeñt alloch corretsetach beñecpuen pocsheñeshocmañen.

³¹ Te'pa' señoche'pa'ch eñall shonte' acheñ ñeñt ama asherbenaye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

Allempo Jesús'pa' alla eñotaterraneterr ñapa' čhocmach amt-saretterra

(Mt. 20.17-19; Lc. 18.31-34)

³² Allempo ahuaneneterr ñaña Jerusaléñonet, all oñenet toño'mar Jesúsñapa' ña otetsa. Pueyochresha'ñapa' čha toratsetyesnenet pueyočhret, e'ñe puenča'nañoťa coteñ. Pueyochresha' ñeñt čharra' puechena epsheña ñeñtñapa' ahuanem Jesús ellonet, allñapa' eñotaterraneterr ñeñtcha' huapoya ñocop.

³³ Ñeñt'pa' atet otanet:

—Te'ña po'ñočhpa' o'ca'ye ahueney Jerusaléño. Allcha' pomataterrnet na Ñeñten Acheñetosets. Añcha' nerrmuerre' ñeñt pa'mča'tareternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret. Ñetñapa' atetcha' otyesnet na'mtsaretterrepa'to' o'ch pomuerrnet po'poñ acheñesho ñeñt ama judioneshayaye.

³⁴ Ñetña pueche'tatseteñoťetanpa' allcha'ña achmāre'terrnet, ashterrnetcha', a'coshare'terrnetcha' attotča'ña o'ch corso'tamperrnet, tarraña poma'pamtañočh alla netanterra.

Atto Jacobo ñaña Juan ñetpa' enamueñet Jesús attoch anorrcha'tyesuerret ñesho
(Mt. 20.20-28)

³⁵ Allempoñapa' atet oteña' Jacobo ñaña Juan ñeññ Zebedeo puechemerasha' ñeññpa' atet otoset:

—Maestrocha' yapa' añca'ye yemnen o'ch atet peña'y ñeññcha' yotañ.

³⁶ Ñañaapa' atet otanet:

—Sapa' ¿errofena'tña semnen atetcha' neñas?

³⁷ Ñetñapa' atet otereterr:

—Yapa' añca'ye yemnen te'pa' o'ch pemnatey o'ch yanorruerr pesho pecohuenño, puesheñarroñeypa' pecohuenrotcha' yanorryesuerr, po'psheñeñpa' pe'chcoterotcha' anorruerr allcha' yecohuentapreterrpa.

³⁸ Jesúsñapa' atet otanet:

—Sapa' amaca'ye señoteñe ñeññ po'ño'ch senamuenen. Añca'yeña senamuenen attoch semuero'chtapreterrna saña. Ta'm ¿e'ñete' po'ño'ch pocte' senteñ o'ch semuero'chterra saña tarro'mar napa' 'chocmach na'muero'chtataretterra?

Ñeññ muero'chteñetspa' Jesúsapa' atet toma'ntatanet ñerra'mrrate' atarr pesherr es yorren orrañtso ñaña atto yapatarettena e'ñe atet ñerra'mrrate' 'cho' ya'mtsaretterra Yomporecop.

³⁹ Ñetñapa' atet ochet:

—Yapa' 'cho'ña atetcha'ca'ye yeña.

Ñañaapa' alla otarraneterr:

—Ñehua, po'ño'chpa' sa'muero'chtataretterrach saña attescha' ñerra'm na, sa'mtsaretterrach saña.

⁴⁰ Tarraña añña attoch sanorryesuerr nesho necohuenrot ñaña ne'chcoterot allcha' secohuentapreterrna ñeññpa' amaca'ye naye' semnatenaye. Añcha'ña anorryesuerrrets all ñeññ e'ñe o'patatenna Nompör.

⁴¹ Añña po'potantañ pueyochresha' ñeññ 'charrasheña allempo e'met ñeññ atet enamuen Jacobo epuet pa'mo'nasheñ Juan, ñetñapa' ama pocteye' eñcheto 'cha muene' e'moñe'chet.

⁴² Allempoña Jesúsapa' alla 'chore'terranet allohuenet ñesho ñeññpa' atet otanet:

—Sapa' señoteñe' ñeññ atet pena po'poñ acheñenesha' ñeññ ama judioneshayaye. Ñet ñeññ pa'm'cha'tareter penet e'ñech pa'm'cha'no'chteñocmañen pomnaren pa'yanan allohuen pueyochresha'chno.

⁴³ Sapa' arepa'chña atteye' sepanna'tatsto e'ñe sommo'cheñoñ. Socoppa' añña poctetsa. Ñerra'm erra'tsenotes atarr añcha'taretoyen entetsañ ñeññes

acheñres socoppa' añ pochtetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruasetsets po'potantañecop.

⁴⁴ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ pochtetsa o'ch atet senterra ñerra'm ama esoyayso allochñapa' attochña e'ñech cohuen setorrena po'potantañecop ama't ñaña allohuenacop atet ñerra'mrrate' acheñ ñeñt atarr taruasetsets e'ñe atta.

⁴⁵ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrrate' napa' atarr añcha'taret sentenen. Napa' añecopña nehuapa allochñapa' nachña sesherbose'ña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesúsapa' a'crraterran puesheñarr aporo'yet ñeñtpa' añ pa'so'cheñ Bartimeo

(Mt. 20.29-34; Lc. 18.35-43)

⁴⁶ Allempoñapa' o' cha'cha'tet Jericó. Allempo meterrerr Jericó't epuet pueyochresha' ñaña shonte' acheñenesha' e'ñe allpona serreterrpa' allña e'ñe toñetopñopa' ahuepa't anorros puesheñarr aporo'yet ñeñt chocma enamare'tets quelle. Ñeñtpa' añ pa'so'cheñ Bartimeo ñeñtpa' Timeo puechemer.

⁴⁷ Ñaña'p' eñotatoset añ huetsa Jesús ñeñt nazareto'marnesha'. Ñeñña aporo'yetpa' allenta rranare'ch atet otapan Jesús:

—¡Pemueraye'chnomna Jesúsocha' nanña! Papa' ñeñtep Davidna'tarep.

⁴⁸ Acheñenesha'ñapa' cha muene' che'ptare'tnometña aporo'yetpa' atet otoset:

—O'hua pemma.

Aporo'yetñapa' ello alla rranare'terrerr atet oterrerr:

—¡Pemueraye'chnomnañaca'ye Ayochreshate! Papa' ñeñtep Davidna'tarep.

⁴⁹ Jesúsñapa' alla tomos atet otosan acheñenesha':

—Sechore'chñaca'ye onepa' arr.

Ñetña chore'chet aporo'yetpa' atet ochet:

—Te'pa' cho'pa cosherrtsa, ñapa' o'ca'ye agotosep. Petantnoma e'ñe tayecma.

⁵⁰ E'ñe atet otuetpa' cha tantatsa cha a'meyanmue' alloca'mañna'tenapa' allenta ahuo' Jesúsesho.

⁵¹ Jesúsñapa' atet otap:

—Papa' ¿eso'tña pemnen ñeñtcha' atet ne'posep?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenterrapa.

⁵² Jesúsñapa' alla otererr:

—Te'pa' ahuerreḗ e'ñe peñmañesha' tarro'mar atto atarr peyemtapna na ñeñtca'yeña o' e'ñe a'crraterreḗ.

E'ñepa'tcha' allorocma e'ñe cohuen enterra. E'ñe cohuerret-sapa' cha cota'nmue' ñaña Jesús allenet sen.

11

Allempo chap Jesús Jerusaléño

(Mt. 21.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé, po'poñpa'cho' allo'tsen anets ñeñtpa' añ pa'so'cheñ Betania. O'ña chapmochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch sechap a'yenteye' e'ñe allara anetso. Allñapa' allcha' sentos ashen rre'ptor all huanquēnet; ñeñtpa' ama't puesheñarra acheñ amaca'ye monteña'. Ñeñña ashenpa' o'ch sepyamḗsospa' o'ch sanerrnan.

³ Ñerra'm esesha' sotapue': "¿Eso'mare't sepyamḗpenña ashen?" sañapa' atetcha' sotosanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Allempoña ñetpa' allenta ahuanmuet. O'ña chapuet anet-sopa' all entoset ashen ehuanca'ret e'ñe opellrronḗta'note'tsen all ten e'ñe toñoḗ. Ñetñapa' pueyamḗsuset.

⁵ Allempoña puesheña'tets ñeñt tomcha'tyets allpa' atet otapanet:

—¿Eso't sottenña arr? ¿Eso'mare'tcha' sepyamḗsosña ashen?

⁶ Ñetña atet otapanet Jesúsapa' atetcho' otoset. Allempoñapa' atet otarettet:

—Ñeñtepñapa' sanerca'ye.

⁷ Allempoñapa' allenta anerretña ashen Jesúsesho. Nohuerret pa'shtam ashnache'ñopa' Jesúsñapa' allenta monta'nmana ashen.

⁸ Shonte' acheñenesha' ñetñapa' toḗma'tyesoñet pa'shtam toño allcha' oñem Jesús. Po'potantañechnoñapa' tsorrmore'tyeset tsach pue'mo'rer allo topanetyeset toñ.

⁹ Allohuen acheñenesha' ñeñt otachetsa ñaña ñeñt cota'huanene' chenta' ñetñapa' puerrannarteñoḗtetpa' atet atarr cohuentatyeseññañetpa' atet otenet:

—¡Acsherrapo'ch allohueney! ¡Aye'chochtaterrapo'ch Jesús ñeñt llesensen Yompor!

10 ¡Aye'chochtaterrapo'ch Jesús ñeñtcha' añcha'tareterrtsa! Te'pa' o'ca' huerraña yatañ David pa'mcha'tareteña. ¡Aye'chochtaterrapo'ch ñaña Yompor Parets ñeñt pue'ntañ'osen!

11 Atteñapa' chap Jesús Jerusaléñopa' allenta ahuos Parets pa'paclo, all be'tosos, cohua'yesosan ora allohuen ñeñt allo'tsa'yen. Cohua'yesueña'pa' o' cha'nerrpa' ahuo' anetso Betanio allohuen pueyochreshohuen ñeñt charra' puechena epsheña tarro'mar allempopa' o'ca'ye ellerren.

Allempo Jesúsapa' eñora higohecop amach eñalletatsto pue'mer

(Mt. 21.18-19)

12 Tsapañ allempo ona'cha'ta'muenet Betaniot, Jesúsñapa' cheporra'nma.

13 All oñenet Jesúsñapa' a'yoteñ entosan higoch ñeñt taya o' asopanre'terr. Ñañaapa' allenta ponemña o'ch enteña' ñato' e'merette'. O'ña chap allame'tetspa' pasopanrepa'tcha' entosñañ tarro'mar ama chena' allempo me'ten.

14 Jesúsña chepa'tcha' eñorosta higohecop, ñeñtpa' atet otos:

—Ama't errponañapa' amuepa'ch esesha' tsumuerraye añ higoch pue'mer.

Pueyochresha'ñapa' e'ñe e'mueñet atet eños higohecop.

Atto Jesúsapa' a'cohuentatosan Parets pa'paquëll

(Mt. 21.12-17; Lc. 19.45-48; Jn. 2.13-22)

15 Allempo entuanman Jesús higoch allempoñapa' o' alla cha'cheneterr Jerusaléño. Jesúsñapa' be'tosuener Parets pa'paclo, allñapa' allentepa'tcha' muevo'tuosan allohuen ñeñt pomatsre'tetsa all ñaña allohuen ñeñt rañta'yetsa. E'ñe cha'nma'cha'tatosanet allot, a'coye'tam'psosanet po'mesa'chno allecma canyatyenet po'çllayoret, a'coye'tuosan ñaña allecma anorryen ñeñt pomuene'yep'echno.

16 Allempo Jesúsapa' ama't puesheñarroña ama muenateraneto o'ch es oñmatet all Parets pa'paclo'mar.

17 Allempoña ye'chatosanetpa' ñapa' atet otosanet:

—Yompor po'ñoñ ñeñt atet anuaret ahuatoteñ allñapa' atetca'ye oten Yompor: “Añ ñeñt nepaquëll nepenpa' añe'pacaya'ña sherben allecmach ma'yochennet ama't allohuen pa'namen acheñenesha'.” Tarraña sañapa' e'ñe atet sepeññañña Yompor pa'paquëll ñerra'mrrate' eñeñ ñeñt e'potyetsa mapuetpono.

18 Añña ñeñt pa'mcha'tare'ternesha' pen allohuen judionesha' po'cornaneshar ñaña añ ñeñt atarr etsotayenayeñ

ñoñets ñeñt atet anaref, ñetñapa' allempo atet e'mare'tetpa' Jesúsepa'tcha' atarr o'patet o'ch muetsatachet. Tarraña allempopa' ama errof peto cha mecha'na'chet tarro'mar allohuen acheñenesha'pa' atarrca'ye cosheññañet ñeñt atet yechatenanet, nanac cohuen enteñet.

¹⁹ Allempoña o' ellerrenpa' onaçheneterr Jerusaléñoïpa' ahuaneneterr Betanio.

Arrpa' atto entuerret higoch o' e'ñe hueya'hua

(Mt. 21.20-22)

²⁰ Tsapaña ahuaecma alla oñma'mueneterr allo'tsen higoch. Entueneterrpa' o' e'ñe hueya'huenaña higoch e'ñe puerçhohuen.

²¹ Allempoña Pedro allenta yerpana atet eños ellerro Jesús higohecop, ñañaapa' allenta otosan Jesús:

—Maestro, pecua' añ higoch ñeñt potnom ellerro ama't esha'pa' amach tsumuerrñañeto pue'mer, te'ñapa' o' hueya'hua.

²² Jesúsñaapa' atet otnomanet:

—Sapa'çho'ña e'ñeñaca'yeña seyemteraña Yompor.

²³ Po'ñoçhca' na te'pa' o'ch notas: Ñerra'm ama çhoye' se'charrtateno seyoçher, ñerra'm po'ñoçh e'ñe seyemteña Yompor, ñachca'yeña atet pene'ña ñerra'm erroten es soten. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop “Añ aspenetpa' rrote'tepa'ch arrof, arrepa'chña esha'toso sa'po allcha' chencosa”, aspenetñaapa' atetcha'çho' pónasa.

²⁴ Ama't allohuen erra'tsencha' es senam sema'yocheñoť, ñerra'm çho senam e'ñe seyemteñocmañen, ñeñtñaapa' sagaçha'.

²⁵ Ñaña te'pa' o'ch notnomues: Ñerra'm sema'yocheñoť çho safen ñerra'm çho se'moñe'teñ po'psheñeñ çosach peretnerre' seyoçhro allorocma, allochñaapa' Sompor ñeñt ento'tsen peretnerrnascha' saña ñeñt atet sepatse'tyen ñeñt ama pocteye' enteno ña.

²⁶ Tarro'mar ñerra'm ama sepretnannenopa' Somporpa'çho'ña ñeñt ento'tsen amach peretnerrnaso saña ñeñt atet sepatse'tyen ñeñt ama pocteye' enteno ña.

Atto allsensarettena Jesús

(Mt. 21.23-27; Lc. 20.1-8)

²⁷ Allempoñaapa' alla chaçha'ta'mueneterr Jerusaléño. Jesúsñaapa' all chopeñe'chen Parets pa'paclo. Allñaapa' huaçha'toña ñaña shonte' añcha'taretnesha' ñeñt pa'mcha'taretnesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt

atef anaret ñaña po'potantañ ñeñt pompornesha' pa'yen allohuen judionesha'.

28 Ñetñapa' atef otoset Jesús:

—Ñehua, yapa' añecop yehuenta yemneñ o'ch potey ¿errofē't apuenpetña llesens? ¿Esesha'tña p̄apueñña llesens attot porrtatyenña ñeñt chocma attecma pepa'yena?

29 Jesúsñapa' atef otapanet:

—Ñehua, napa'cho'ña nemneñ o'ch na'p̄to'tapas saña ama't patrra ñoñets. Ñerra'm sanaposencha'pa' napa'cho'ña attochña notapas naña allot apuennetña llesens ñeñto'marña atef nepena.

30 Sapa'cho'ña o'ch sotosen ñeñt atef soctape'chen sa, ahuañmo'cha allempo apate't Juanañ Yomporecop, ñapa' ¿ese-sha'tña llesense' ñato' Yompor amapa' acheñaate' apue'ña llesens? Nemnen o'ch sotosen ñeñt atef soctape'chen sa.

31 Ñetñapa' e'ñe a'nahua otanna'tyeset:

—Ta'm errofcha'ca'ye yochte'. Ñerra'm cha yoch Yompore-shotca'ye apetña llesens, ñapa' chate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.”

32 Elloña amach yotatsche acheñeshoña apet llesens.

Ñehua, acheñenesha'ñapa' chate' e'moñe'chet añcha'taretnesha' tarro'mar acheñenesha'pa' e'ñe cohuen eñchete't Juanañ ñeñto'marña chocma otyeñet ñapa' ñeñtca'yeña po'ñoçh a'mtose' Yompor po'ñoñ.

33 Ñeñto'marña añcha'taretnesha'pa' atef ochet Jesús:

—Ta'm yapa' amaca'yeña yeñoteñe; errofē' huapaña Juanañ, errofē' apetña ñaña llesens.

Allempoña Jesúsapa' atef oterraneterr:

—Napa'cho'ña te'pa' amach notaso saña allot apareten naña attot atef nepa'yena.

12

Atef atma'ntatarettena ñeñt ataruasañechnopa' ama cohue-nayaye

(Mt. 21.33-46; Lc. 20.9-19)

1 Allempoña Jesúsapa' alla serrpare'taterranerr acheñenesha' toma'nteñtso, ñeñtapa' atef otanet:

—Eñall puesheñarr acheñ ñeñt nare'tanatatnomue' shonte' uvach; pa'muerñapa' e'ñe ora uvachmatatue. E'ñe concha'tampesue allotñapa' eñan ñaña allcha' a'pecho'toñet uva po'ñer. Allñapa' tomatatnoman torrepo' allotcha' cohuanp̄soñet pa'muer. Tomatuepa' na'nman ñeñtcha'

taruasatats ñeñtcha' coyerrahuet allpon ñerra'm esempoch toteñet.

'O'ña nare'tanatatuepa' o' ahuo' po'poñ anetso ñachayo.

² Chap allempo yen uvachllompa' ñaña'p' mueñerran po'psheñeñ pa'taruasañer o'ch enamuerra' uvachllom' po'psheñeñ pa'taruasañreneshesho ñeñt' cohuañpene' uvachma'.

³ Allempoña chen allpa' enamosan ñeñt' allpon o'patena ña, arepa'tcha'ña es apapuenayeña uvachllom', elloña ñeñtapa' cha rremapueññañet pa'taruasañerpa' o' nalle'tapueñet, o' alla mueño'teret e'ñe atfa.

⁴ Allempoña ñeñt' pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr ñaña allpa' ñapa'cho'ña cha rrolle'tapetpa' o' atserrp'apueñet poñopa' cha es otnatapueñet.

⁵ Allempo o' alla mueñerranerr po'psheñeñ pa'taruasañer. Ñeñtapa'cho'ña allempo chenerr ñaña allpa' ñaña'p' chepa'tcha' muetsapueñet. E'ñe attecma p'a'yeset po'potantañechno—patanta'tetspa' nalle'tapueñet, po'potantañechnoñapa' cha amtsanatarettapuenet.

⁶ Ñeñt' pamo'mte' penetpa' eñallmeñ ñaña puesheñarr ñeñt' e'ñe ño puechemer ñeñt' atarr morrentena. Allempoñapa' atet ot: "Te'pa' o'ch nemñe all ñeñt' e'ñe na nechemer. Ñato'rraña ñeñtapa' mecha'na'tapetcha'."

⁷ Ñeñtapa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarem' esempo. Ñapa'cho'ña te'pa' o'chca'ye yemtsaḡ allochñapa' yachca'yeña e'ñe o'paterrayaña pompor puenarem'. Te'pa' o'ch ahuey o'ch yemtsaḡ ñaña."

⁸ Allempoña o' rremapoñet ñaña puechemerpa' o'cho' muetsapet, huapore'teret alloḡ uvachmoḡ. Arrpa' allohua atet toma'ntata Jesús e'ñe ñañaña.

⁹ Jesúsñapa' atet oterranerr acheñenesha':

—Ñehua, te'pa' o'ch notas, ñeñt' pamo'mte' pen ataruasañechnopa' ama't señoñeña sa atetcha' p'ohuerranet. Ñerra'm esempoch huerranet, pamo'mtayetpa' a'cillatueranetcha', narmetsmañapa' o'ch apuerran po'potantañ.

¹⁰ Allempoña Jesúsapa' atet oterraneterr:

—Sapa' ama't ahuatapa' ama'tña selleyareña ñeñt' atet anua'reḡ Yompor po'ñoñ ahuatoteñ. Tarro'mar ñeñtapa' atet oten nocop, all atma'ntatareten mapue'. Ñeñtapa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

11 Ñeñt'pa' Yomporca'yeña atet patene' ñeñto'marña yapa' e'ñe cohuen yenteñ.

12 Ñeñt e'moñe'tene' Jesús ñetñapa' eñoteñet ñeñt'pa' ñetca'ye atma'ntatarettenet, ñeñt'pa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetñapa' quechpa'huaneret Jesús'pa' ahuanerret.

Atto a'pto'chet Jesús, pocte'te' o'ch tsa'tet impuesto
(Mt. 22.15-22; Lc. 20.20-26)

13 Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes pueyochresha', tarraña ñetpa' añecpa amñareñtenet attoch e'ñe puehquẽñoñet po'ñoñotetpa' o'ch eñoratoset ñeñt ama cohuenayaye. Allochñapa' attotcha'ña otteñe'chet.

14 Ñeñto'marña ñetpa' allempo chapuet ñeshopa' atet otoset:
—Maestrocha' yapa' yeñoteneñ papa' ama peshquẽno ama't mamesha ñaña ñeñt atto peychaten Yompor poctapña ñeñt'pa'cho'ña e'ñe cohuenacma, ama shequẽntsoyaye ama't mamesha. Papa' allohuen acheñpa' e'ñe cohuen pentueñ; ama aña ñapueñ pemorrenteno ñeñt atarr añcha'na'tpo' entyen allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ñoch cohuentetsa. ¿Pocte'te' penteñña pa' o'ch yetsa'ta impuestos añecop ñeñt añcha'taretetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha añcha'taret romo'marnesha' ñeñt ama judioneshayaye.

15 Jesúsñapa' eñotapanet ñetpa' chaca'ye shecare'teñet, ñaña'pa' atet otapanet:

—Sapa' eso'mare'tña semneñña o'ch seshcare'tosen. Ñehua, ama't atet setpatennoñpa' sorratatca'yeña puetallarr quelle o'ch necue'.

16 Ñetña apetpa' ñaña'pa' atet oterraneterr:

—Ñehua, sapa' o'ch soten, ¿esesha't sentenña ñeñt atma'ntatarettetsaña all? ¿Esesha't pa'so'cheñ aquell-carettetsa all?

Ñetñapa' atet ochet:

—Anícha'taretca'ye atma'ntaretetsaña all, ñoca'yeña pa'so'cheñ ñeñt aquellcaretetsa all.

17 Jesúsña'pa' alla otterraneterr:

—Ñeñtepña'pa' añ poctetsa o'ch yaḡ anícha'taret ñeñt ño ñeñt atet poctetsa gobiernocop, tarraña elloneña ñeñt Yomporo o'ch yaḡ ñaña ñeñt atet poctetsa ñocop.

Ñeñña shequēnayeñ atta cohuanrrorteñet tarro'mar Jesús'pa' atarrca'ye cohuen anapuenanet.

Atto a'pto'chet Jesús, ñerra'm po'ñochte' atanterrapo' rromot, ta'm, allempopa' errotenchañayeperra

(Mt. 22.23-33; Lc. 20.27-40)

18 Allempoña'pa' hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetña'pa' ellonet echenet poctapña ñeñto'mar atet otenet amate' errotentot yetanterroña rromot ama't errponaña. Ñetña'pa' atet otoset Jesús:

19 —Maestrocha' ahuat Moisés'pa' atet quellconay ñoñets ñeñt poctetsa ñeñtcha' atet yeḡa. Ñeñt'pa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerre'ña po'norrar allochña'pa' attoch eñalletterraña ñeñtcha' puechemer perr pa'mo'nasheñeñ. Ñeñt'pa' atetca'ye quellca'nmonayña Moisés ahuat.

20 Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor ḡa'. E'ñe allponmatatsapa' o' rromaña, yacma ama chemere'tnomo.

21 Allempoña ñeñt po'ro'cho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñt'pa'cho'ña ama chemere'tnerrerro o' atta rromuerrerr.

22 E'ñe attecma pohuet cancherrsheño'maretpa' e'ñe pueyoruarochet ñeñtara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarrofetapa' ama chemere'tnomueto. O' rromapesuaña cancherrsheño'mar puerrollaresha'pa' cho rromatsña ñaña coyanesha'.

23 Te'ña ñerra'm po'ñochte' yetantena rromotpa' añña coyanesha' allempoña'pa' zessha'tcha'ña puetapor perre'

tarro'mar allohuenet cancherrsheño'maretpa' e'ñe pueyoruarochet?

²⁴ Allempoña Jesús pa' atet oterraneterr:

—Sapa' ñeñto'marca'yeña čha atarr sepanteñ tarro'mar amaca'ye čhennasoña seyočhro ñeñt e'ñe po'ñočh atet yečhateney Yompor po'ñoñ ñeñt atet anuaret ahuatoteñ. Ñaña aña sepantatene' tarro'mar sapa' ama sepocteññañe Yompor po'huamenc.

²⁵ Tarro'mar esempohuañen allempoch tanterret po'pocheño, allempopa' ama't puesheñarro'teta amach sena'terreto, ama't coyanesha'pa'čho' amach eseshaye' apuerraye ñeñt'cha' yorerrahuet. Tarro'mar allempopa' e'ñech attet ñerra'm Yompor po'millaño'teññaneshar ñeñt pue'ntaño'tsa'yen.

²⁶ Sapa' ama'tña selleyareña ñeñt atet quellquë't ahuat Moisés attoch señočh ama't ñeñt o' colla'huapa' ñetñapa' corretseta. Ñehua, all aquellcare't tsachmo'r ñeñt e'ñe ñoña huortets. Allotñaca'yeña Yomporpa' eñorana'tanaña Moisés; ñeñt'pa' atetca' o'tña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

²⁷ Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma, ñapa' aña'yeña Po'yomporer pene' ačeñ ñeñt corretsach. Attoña Yomporpa' e'ñe allame'tsa entenanet allohuenet ñetñapa' bettetseta. Ñeñto'marca'yeña sapa' atarr sepanteñ.

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñečhno ñoñets

(Mt. 22.34-40)

²⁸ Allempoña huapoña ñaña puesheñarr ñeñt etsotene' ñoñets ñeñt atet anaret, ñaña'pa' e'mosan ñeñt atet a'p'to'tare'teñet Jesús. Ñaña'pa' e'mosan Jesús e'ñe cohuen anapuenanet. Ñeñto'marña ñapa'čho'ña allenta a'p'to'tos, ñeñt'pa' atet otos:

—¿Erra'tsena't ñoñtsor ñeñt atet anaret ñeñt atarr sherbets, ñeñt ello metana'tuene' ora allohuen po'poñečhno ñoñets ñeñt e'ñe parro attecma anuaret ahuatoteñ?

²⁹ Jesúsñapa' atet otaṗ:

—Ñeñt ñoñtsor ñeñt atarr sherbets ñeñt ello metana'tuene' po'poñečhno ñoñetspa' ñeñt'pa' atet oten: “Se'mñot israel- neshacha' attoch señočh: Ñeñt Yeyomporer yepenpa' ñapa' e'ñeca'ye pa'rra ñeñt Yepartseshar yepen.

30 Ñeñto'marña atarrepa'chña yemorrenteña Yeyomporer ñeñt Yepartseshar yepen e'ñe ora yeyochrocmañen. Ñaña e'ñe yecamquëñoŧ yemorreñchach, ñaña yocŧapñohuen, ama't ñaña e'ñe ora yehuamencohuen."

31 Alloŧpa' po'poñ ñoñets ñeñt atarr sherbets ñeñŧpa' atet oten: "Atarrcha'yemorrenteña yamo'ts e'ñe atet atarr yemorrentena yañeña." Añ epo'mar ñoñetspa' ñeñŧca'yeña atarr sherbets, ñeñŧña ello metana'tuene'ña po'poñechno ñoñets ñeñt atet anaret.

32 Allempoña ñeñt etsotene' ñoñets ñeñt atet anaret, ñaña'pa' atet oterranerr Jesús:

—Maestrocha' p̄apa' e'ñeca'ye po'ñoŧch atet p̄oten. Po'ñoŧch Yomporpa' e'ñeca'ye patr̄ra ama eñalleña po'poñ Yeyomporer patr̄raca'ye.

33 Ñerra'm ŧhoch yemorrenteña Yompor e'ñe yeyochrocmañen e'ñe yeñoteñohuen, ñaña e'ñe yecamquëñoŧ yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñŧca'yeña atarr nanac sherbets. Elloca'yeña metana'tuenan allohuen po'poñechno ama't ayarrachno ñeñt yemtsayen Yomporecop, ama't ñaña allohuen ñeñt yachamuen allo yesherbeñ Yompor.

34 Jesúsña'pa' atet eñch ñapa' atarr eñotenan ñeñt atarr sherbets Yomporecop, ñeñto'marña atet otererr:

—Papa' amaca'ye atarr atonaye' pepallteno attoch e'ñe p̄agaphuerrñañ Yompor po'cohuenña atto ayochreshattena ña.

Allempoña'pa' ama't puesheñarroŧetapa' ama eseshaye' a'p̄to'tenaye' enterrayeña Jesús.

Atto Cristo ñeñt Po'partseshar pe't David, elloña'pa' o' alla po'm̄reneñ per

(Mt. 22.41-46; Lc. 20.41-44)

35 Allempoña Jesús'pa' alla yeŧhaterraneterr all Parets pa'paclo. Ñeñŧpa' atet oterraneterr:

—Ñeñt atarr etsotayenayeñ ñoñets ñeñt atet anaret, ñetpa' eso'marte'ña otyenet ñeñŧcha' Cristotosets ñapa' aña po'm̄reneñ pene' David tarro'mar ñeñŧcha' Cristoterrets ama aña po'm̄reneñ pene' David tarro'mar ñapa' Po'partseshare'naña pe't David.

36 Tarro'mar ama't Davidpa' allempo eñorache't Parets Puecamquëñ, allempopa' atetca'ye eñose'tña añecop ñeñŧcha' Cristoterrets:

Yompor Parets atet otennan ñeñt Nepartseshar nepen na (ñeñŧara ñeñŧcha' Cristoterrets): "Te'pa' o'ch

panorruerr arr necohuenrot allcha' pecohuen-
tapreterrna. Attochña ama't ñeñt pe'moñe'tene' napa'
o'ch name'ñatuerranet allochñapa' o'ch atet perret ñeñt
pemnen pa."

37 Ñeñtpa' atetca'ye ote'tña David, ñeñtcha' Cristoterretspa'
ñeñtca'yeña Po'partseshar pe'tña ama't allempoteñ. Ñehua,
ama't señotheña Cristo ñeñt Po'partseshar pe't Davidpa'
ñeñtña te'pa' o' alla po'mrenñ per ñaña.

Ñeñto'marña Jesús allempo yechatenan shonte'
acheñenesha' ñetpa' e'ñe pocsheñesha' e'mñoteñet.

*Atto Jesús pa' a'metare'tenan ñeñt etsotayenayeñ ñoñets ñeñt
atet anaret, ñeñt atet yechenet ñetpa' ñeñtpa' ama cohuenaye'
entapretenaneto Yompor*

(Mt. 23.1-36; Lc. 11.37-54; 20.45-47)

38 All yechaterraneterr ñeñtpa' atet oterranneterr:

—Amach semeñe'tapretatsche ommoñañenesha' pocta'ña
ñeñfareta ñeñtet atarr etsotayenayeñ ñoñets ñeñt atet
anaret. Tarro'mar ñetpa' añe'ñaña atarr cohuen entenet o'ch
chorrenet atarrom shetamuets o'ch atta yorma'tatsetenet
pa'shtam. Ñaña pommo'cheño'tetpa' atarrcha' mueneñet
o'ch e'ñe puenñcha'na'teño't e'ñech cohuen huomñcha'tenanet
acheñenesha' all chopeñe'chyenet.

39 Ñaña ñetpa' añe'nach atarr muenenet o'ch
anorrcha'tyenet judionesha' po'prahuo allecma anorryen
ñeñt atarr añcha'na'tpo' entyen allohuen acheñenesha' ñaña
e'ñe attecma penet ñaña all rrallme'chapretenet.

40 Tarraña ñetñapa' rretorrnanesha'ñaña puer-
ratañpesyenetña pa'paquell. Elloña e'ñe pommo'cheño'tetpa'
aña atarr muenenet o'ch atet penet ñerra'mrrate' ñetpa'
atarr cohuen acheñret ñeñto'marña arr ma'yochyenet
all shontena acheñenesha'pa' amach tematenayaya
ma'yocheneto. Ñeñto'marña te' napa' o'ch notas ñeñt atet
petsa pommo'cheño't elloña atarrcha' a'coñcha'taretterret.

*Atto rretorrnanesha' ñeñt atarr huocchañetets ñapa'cho'ña
nosan quelle ñeñt Yomporcop*

(Lc. 21.1-4)

41 Allempo Jesús pa' alla anen a'yenteye' allecma na'yenet
quelle Parets pa'paclo. Allñapa' shonte' entenan acheñenesha'
ñeñt na'yene' quelle Partsocop, shonte' e'çllayoretenesha'
ñeñt na'yene' shonte' po'çllayor Partsocop.

42 Jesúsña allpa' atta cohuananet, huapa ñaña puesheñarr
rretorrnanesha' ñeñt atarr huocchañetets. Ñapa'cho'ña nosan

eptallatoll quellayetoll ñeñt cobretall, ñeñt quellayerpa' ama tsa'teno, ama es sherbeno.

⁴³ Allempoña Jesús pa' agotan pueyochresha' pa' atet otanet:

—Te'pa' o'ch notas, añ rretorrnanesha' ama't atarr huocchañpa' ñapa' po'ñoçha'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet.

⁴⁴ Tarro'mar allohuenet ñeñt na'yenet quellepa' añaca'ye na'yenet ñeñt a'pcha'tyenet, ñañapa' ama't atarr huocchañpa' e'ñe pomhuahuospan allohuen ñeñt eçhyen ñeñt muenataneñ attoch yoran alloch correna arr patsro.

13

Atto Jesús pa' eñotatanet e'ñech a'mata'taretetuerra Partsopo' (Mt. 24.1-2; Lc. 21.5-6)

¹ Allempo ÷ha'nerrerr Jesús Parets pa'pacloñt puesheñarrña pueyochresha' pa' atet och:

—Maestro, pecuaye'ch, atarruaca' coçhnesha'te' mapyet ñeñt allo orratyenet Partsopo', atarr coçhnesha'çhnote' Parets pa'pacleçhno.

² Jesúsñapa' atet och:

—Ama't sentyeñ te' ñeñt atarr coçhnesha'e' pocoleçhno tarraña esempopa' çherra' allempoch e'ñe a'mata'taretetuerra. Ama't e'ñe puenñarra mapyetpa' amach a'puerroña all allo orratenet Partsopo'.

Atto Jesús pa' eñotatanet shonte'ch entyerret pa'namen ñeñtcha' eñotaterrahuet o' çherrmoch allempoch mellapoterra (Mt. 24.3-28; Lc. 21.7-24; 17.22-24)

³ Allempoña ahuenerr Olivoñnopa' anorruenerr all, e'ñe alla yot Parets pa'pacloñt. Allempo anen all e'ñe ñaptoçhayet allpa' aña epuet Pedro ñaña Jacobo ñaña Juan ñaña Andrés. Ñetñapa' atet oteñet:

⁴ —Te'pa' yemneñ o'ch ptoey, ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet ptoeny te'?

⁵ Jesúsñapa' atet otanet:

—E'ñech señoterra allochñapa' amach esesha' seshquërraye.

⁶ Tarro'mar shonte'ch orrterrtsa ñeñtcha' ayçha'nataterre' neso'cheñ, ñeñtcha' otyerrets: “Napa' ñeñtencia'yeña Cristotets.” Ñetñapa' shonte'ch shequëret acheñenesha'.

⁷ 'Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetsoma'. Saña

allempopa' amach čha seyorenatsto ama't e'ñe mamesha. Ñeñtpa' atetcha'ca'ye e'ñe po'ñočh perra. Tarraña allempopa' amach čhena' allempoch e'ñe mellapoterra.

8 Pa'namen acheñ ñeñt e'ñe po'poñe'ttsocma mereñtsoretpa' ñetpa' quellaranna'terretcha'. Ñaña pa'namen anetsoť amčha'taretečhnopa' quellaraterrancha' pueyochreneshachno. Pella'yerrach pats ora errañaren. Orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña atpare'teñtsočhno attochña atarrcha' ama'točhtatanna'terret. Ñeñt atet o' notuas te'pa' ñeñtña allempopa' ñeñtcha'ña ñanom mueročhtaterrahuetña allempo.

9 'Sapa' señota'tach allempoch atet perrset. Sanmare'tterrach amčha'taretesho allcha' otteñe'cherrset. Sashtare'tterrach all judionesha' po'prahuo'mar. E'ñe same'ñeñoťen na sapa' čapaterrsetcha' amčha'taretneshesho'mar ñaña allo'tsa'yen ñeñt nanac amčha'taretnesha'; sapa' allcha' sa'metosnanña neñoñ.

10 Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora errañaren allohuanen añe patsró.

11 Ñaña allempoch sanmare'tetyesa allcha' otteñe'cherrset ama't mameshapa' amach čha sellca'psatsto, amach so-tapsa'tatsto erroťuachca'ye notoste' amčha'taretesho allempoch a'pťo'tare'tapuen. Allempopa' añcha'ña se'ñoratoťe' Parets Puecamquēñ. Attochña amach e'ñe sotaye' se'ñoroso, añcha'ña se'ñoratoťe' Parets Puecamquēñ.

12 Allempoch atet perrsetpa' ñeñt e'ñe semo'nasheñ sepen ñato' ñeñtchca'ye sepomuerrē' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparñoťpa' o'paterranach pamo'mte' attoch muetsatater.

13 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueročhtaterrsetpa' tarraña esesha'ch e'ñe ahuantahuanmue' e'ñe pueyemteñoťen na, ñeñtcha'ña a'queshpatarettertsa.

14 'Ñehua, ahuať Daniel ñeñt a'mťaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtñapa' čherrcha' all ama't ñeñt e'ñe Partsocpa anareteñ. Ñeñtpa' ñeñtchca'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa'

ñetñapa' eñoteretepa'ch. Ñeñto'marña ñerra'm esempoch senter o' cherr all ñeñt ama pocteyaye allempoña ñeñt allpon Judeo'tsa'yen ñetñapa' allorocmuepa'ch yetrra'terret, ahuanerretepa'ña aspentareronet.

15 Atet ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetñapa' sohuetepe'chña tecma tarraña amachña be'tosatsetnomuetoña po'ponreto attoch yoratsre'tnomuet.

16 Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet.

17 Allempopa' atarrcha' llequëñets añecop ñeñt achomenare' coyanesha' ñaña ñeñt allohuen emaretetollesha'chno. (Tarro'mar ñocpuetpa' atarr torrapo' attoch yetrra'tet ñamet.)

18 Ñaña Yomporcha'ña sema'yocha allochñapa' amach cha huapoto allempoch seyeta.

19 Allempopa' orrtarrach mueroçhteñets ñeñtcha' atarr mueroçhtaterre' allohuen acheñenesha'. Ñeñt ama't ahua'tapa' ama puemueroçhtareto atet atarr nanac huomenc, ama't allempoteñ e'ñe errete' ye'chcatyene' Yompor allohuen pa'namen ñeñt yentyen arr patsro. Allempoña ellopa' amach atet alla mueroçhterrete'te ama't errponaña.

20 Allempoch atarr amueroçhtataretterret. Tarraña allempoña Yomporpa' ñach oterrets "te'pa' allohuach." Ñerra'm amach oto allohuachpa' allempoña ama't puesheñarrapa' amach esesha' queshperrtso. Tarraña ñeñtña ame'ñenaya ña ñeñt acrenpa' ñocpuetñapa' oterrrcha' "te'pa' allohuach."

21 'Ñehua, allempoch orameñ mueroçhteñetspa' ñerra'm esesha' sote': "Secueña', arro'tsenca'yeña Cristo", amapa' o'ch otaset: "Secueña' tarro'tsenca'ye Cristo", sañapa' amach same'ñatstaneto.

22 Orretyerrachca'ye ñeñtcha' otyerrets ñapa' ño'ña Cristotets. Tarraña ñeñtpa' attachca'ye shecare'tyerranña acheñenesha'. Orretyerrach ñaña ñeñtcha' otyerrets ñapa' ño'ña a'mtene'ña Yompor po'ñoñ, tarraña ñeñtpa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñtcha' atet shecare'tyerrets, ñetñapa' orrtatyerretcha' ñeñt ama't ahua'ta acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'carnesharpa' mueneñetañcha' ñeñte'nachña shequëret.

23 Señochepe'ch ama't ama chena' mueroçhteñtsopopa' na allohuenpa' o' e'ñe notuas.

Atetcha' perra allempoch huerra Cristo ñeñt Acheñetsosets
(Mt. 24.29-35, 42-44; Lc. 21.25-36)

24 'O'chña huañerr ñeñt muerochteñetspa' allempoñapa' čhoch mayerrets ñaña atsne'. Arrorrpa'čo'ña o'huañcha' atsnom.

25 Rantočhnopa'čo'ña shorča'terrcha' entoť. Ñaña ñeñt huomenc orra'yetsa ento te' allempoña ama't ñeñtpa' pella'yerrach.

26 Allempoñapa' entapuerrnetcha' na Ñeñten Acheñetsosets o'ch nesuam̄perra osoť e'ñe nepartsoteñohuen e'ñe neco-huenteñesha'.

27 Nemñercha' nemllañoťeñneshar, ñetñapa' a'yapača'hueretcha' allemateñ ñeñt acren Nompoc nocop e'ñech pa'tatsshentō'marohuen allotecma orrnotena. E'ñech allemateñpa' a'yapača'hueretcha' e'ñe allohuanen añ patsrōť.

28 Ñaña te'pa' señoche'pa'ch ñeñt atet pena higoč. Ñehua, esempoch senteñ higoč o'ch emčachyen puetačretollesha' allotcha' o'ch alla tapna'tyerrerr pasopaner, sañapa' ñeñtaña señotatene'ña o'chenmoch allempoch huorateterrerr.

29 Attecmach perra ñerra'm esempoch sentyerr ñaña ñeñt allpono' notuas, sapa' ñeñtča'ña señotaterre' po'ñočh o'ca'ye čherrmoch allempoch e'ñe etsotuerra, o'ca'ye e'ñe allame'ttsamerra.

30 Napa' po'ñočh o'ch notas, acheñenesha' ñeñt e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añečno.

31 Eempohuañen añ enet ñeñt senten te'pa' e'ñech chenca'huerra; patspa'čo'ña attecmach perra e'ñech chenca'huerra. Tarraña ñaña neñoñpa' amach chenquerro ama't e'ñe ahuata.

32 'Tarraña ñeñt yetroch nohuerrapa' ñeñtñapa' ama eseshaye' eñotenaye. Ama't erro'tsente' atsne' ama't erro'tsen tsapro ñeñtpa' ama't mellañoťeñnesha' ñeñt pue'ntaño'tsa'yen ñetpa'čo'ña ama't puesheñarrotetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompoc Puechemeren napa'čo'ña te'pa' ama neñoteñe, ñaptaña Nompoc Parets eñotene'.

33 'Sapa' señota'tach ñaña čhocmach señošer'tenna ñaña čhocmach sema'yochena tarro'mar sapa' amaña señoteñe esempoch čherr ñeñteño allempoch nohuerra.

34 Ñeñtpa' e'ñe atet ñerra'mrrate' puesheñarr yacma ñerra'm esempo ta bačhayopa' o'ch na'nman pa'taruasañečno pa'paclo ñeñtča'apa'yenom taruas e'ñe puesheña'tsocmuet. Ñaña po'poñ pa'taruasañer ñeñtča'

cohuets yetarroġ ñapa' atetġha' otnomġ pamo'mte': "Papa' ħocmach peñose'retna."

³⁵ Ñeñto'marña te'pa' o'ch notas: Chocmuepa'ch seño'sertenna na ñeñfen Samo'mte' sepen ñeñfen sena'nmue' na nepaclo tarro'mar sapa'ġho'ña ama seño'tenno esempoch nohuerra. Ñato' ellerroneġha' nohuena, ñato' rroġh tsapo, ñato' puetarenmoch allempo eñen atollop, amapa' ñato' aromtañach nohuena.

³⁶ O'ch alla noterrser: Chocmuepa'ch seño'sertenna, ñerra'm machayoġa nohuerrapa' ñato'rraña alla nentuerres sapa' ġha atarr semanrren.

³⁷ Ñeñt atet notenes sa ñeñtpa' allohuenacpasca'ye, ñeñto'marña o'ch alla noterrser: Chocmuepa'ch seño'sertenna allohuenes.

14

*Atto atarr o'pateñet Jesús o'ch muetsatateret
(Mt. 26.1-5; Lc. 22.1-2; Jn. 11.45-53)*

¹ Epomtameñ palltena o'ch alla ġherrerr pascuapo allem-poch rrerranerr judionesha' pan ñeñt ama anareteyaye chase'. Ñeñtña pa'mġha'tareternesha' pen allohuen judionesha' po'cornaneshar epuet ñaña ñeñt etsotayenayeñ ñoñets ñeñt atet anareġ, ñetñapa' aña atarr e'nenet attoġh shequġt Jesús e'ñe a'nahua eshecġha' rremuetpa' o'ch muetsataġet.

² Ñetñapa' otanna'tyenet:

—Tarraña te' pascuapo allempo shontena acheñesha'pa' amachca'ye yerrmatsche allañaca'yeña ġha ya'tsrre'moġhtateñ acheñenesha'.

*Atto puesheñarr coyanesha'pa' shosan eñmosaġ Jesús poño
(Mt. 26.6-13; Jn. 12.1-8)*

³ Pamtarrña Jesúspa' Betanio'tsen all Simón pa'paclo, ñeñtña Simónpa' ñeñt ose't puetsarñats. Jesúsñapa' all anen all rrallme'chen. Allñapa' huapoña puesheñarr coyanesha', huapatan eñmosaġ ñeñtpa' e'ñe ñeñtoġhe' ñeñt otenet nardo puese' ñeñt ama matsa'to. Huapatanġpes puetellmġo ñeñtña puetellemġpa' añ soġheñet alabastro. Allempoña ñeñt coy-anesharpa' potamġpsosan eñmosaġ; ñeñtña eñmosaġpa' alla she' Jesús poño all rrallme'chen.

⁴ Puesheña'tetsñapa' ñeñtña ġha atsrre'matanet, atet otanna'tyeset:

—Eso'mare'tña atġa a'pertatosañña eñmosaġ.

⁵ Ñeñt eñmosaġerpa' amaca'ye matsa'to. Chochñaġho' pomoseñpa' ganañcha' shonte' quelle ġhachca'ye metananeñña

ñeñt trescientos denario. Allempoñapa' apa'yesaneñcha' ñaña allohuen huocchañneshachno.

Ñeñtpa' atet sasare'chet coyanesha'.

⁶ Allempoña Jesúsapa' atet otanet:

—Semnachñaca'yeña coyanesha' ñeñt atet penen. Eso'mare'tcha' cha muene' satsrre'mochtana'tapa. Ñapa' atarrca'ye cohuen pösen.

⁷ Tarraña ama'tcha' cho pomosaneñ eñmosañ alloch es apa'yesaneñ huocchañneshachno, tarraña chocmachca'ye eñallña huocchañneshachno arr patsro. Ñerra'm esempo semneñ o'ch e'ñe cohuen sorrtyesamet ñocpuet chocmach atet sepanet. Tarraña nañapa' po'ñoçhpa' amachca'ye allo'na senteno arr patsro.

⁸ Añ coyanesharpa' añca'ye apuenen ñeñt allpon echyen. Ñeñt atto shosnan te' eñmosañ nechtso, ñeñtpa' añeçpa'naca'ye sherben tarremphua allempoch a'yana'terrnaneterr ñeñtcha' epuet pampa'pesnet.

⁹ Po'ñoçhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpuenet.

Atto Judaspa' pomuerran Jesús

(Mt. 26.14-16; Lc. 22.3-6)

¹⁰ Allempoña pueyochresha' ñeñt charra' puechetsa epsheña, puesheñarrña ñeñt pa'so'cheñ Judas Iscariote, ñañaapa' allenta ahuo' allo'tsa'yen ñeñt pa'mcha'tareternesha' pa'yen allohuen judionesha' po'cornaneshar. Ñañaapa' añeçpa sen attoch pomataterran Jesús.

¹¹ Ñeñña atarr coshatenahuet. Ñetñaapa' allempocma a'pochtachet chochca'ye tsa'chetña Judas allpon quelle. Allempoña ñapa' aña e'ñe cotape'chyen errotentcha' pomuerraña Jesús.

Atto Jesúsapa' rrallme'chatnenan pueyochresha' attoch chocmach yerpueret ñeñt yoten te' Santa Cena

(Mt. 26.17-29; Lc. 22.7-23; Jn. 13.21-30; 1Co. 11.23-26)

¹² Allempoña çhapa'muen ñeñt yetñatsro allempoch rrerretterr pan ñeñt ama anareteyaye chase' allempoch muetserretterr ñaña carrnero; ñeñtpa' pascuapo. Chapa'muen ñeñt yeterpa' pueyochresha'ñaapa' atet ota'mueñet Jesús:

—Te'pa' çerra't pemneñ allcha' yeta'muena allcha' ya'potonap ñeñtcha' perra' pascuapo?

¹³ Allempoña ñeñt epsheña pueyochresha' ñeñtcha' mueña, Jesúsñaapa' atet otapanet:

—Te'pa' o'ch ahua'muenes anetso allcha' sepocte' puesheñarr yacma ñeñt anmam'pene' oñ porrto. Ñeñña acheñerpa' o'ch socta'ner.

14 Allcha' be'tosuerr allcha'ña sebe'tosos saña. Allña'pa' atetcha' sotos ñeñt apacllatesha': "Yemaestrorpa' atet oteney atetcha' yotosep̄: '¿Erro'tsena'tña pecuarto allcha' nerrallme'chos pascuapo epan neyochresha'?" "

15 Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña sañño'tosña ñeñtcha' yerra' pascuapo.

16 Allempo atet otuanet Jesús'pa' pueyochresha'ñapa' atetcho' pet, cha ahuanmatset. O'ña cha'cha'tet anetso, e'ñe atet otapanetpa' ñetñapa' e'ñecho' atet entoset. Allña añño'tosñañetña rreñets allcha' rrallme'chet ñeñte pascuapo.

17 Allempoña o' puenaso'tenpa' o' chap ñaña Jesús all epuet pueyochresha' ñeñt charrasheña puechena epsheña.

18 All anorrchenet all rrallme'choset, Jesúsñapa' atet otanet: —Po'ño'chca' notenes: Puesheñarrotes sa ñeñtescha'ca'ye nepomuerre'. E'ñe puesheñarr ñeñt e'ñe parro nerren ñeñtcha'ca'yeña nepomuerre'.

19 Ñetñapa' cha atarr lleca'rrtet. A'p̄to'tyeset e'ñe puesheña'ttset:

—Ta'm amate' na nepomuerrmochape.

20 Ñaña'pa' atet oterraneterr:

—E'ñe puesheñarrotes ñeñtes charrasheñas sepchena epsheña ñeñña netsapechapretene' nerrar, ñeñtcha'ca'ye nepomataterre'.

21 Po'ño'chca'ye te'pa' allo'na sen etsotnomtsa ñeñt atet anuaret Yompor po'ñoñ nocop na Ñeñten Acheñetosets; attotcha' muetsaterrnet. Tarraña nocoppa' e'ñe pocte'; añña po'ño'ch acheñer ñeñtcha' nepomuerre' ñocopñapa' atarr llequëñets. Añ acheñrecoppa' e'ñeca'ye poctet amachña'cho' e'ñalletatstañe.

22 All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shotat'tan panpa' apa'yesan pueyochresha'. Ñeñt'pa' atet otanet:

—Sagapyes, añmapa' ñeñtcha'ña nechets sepen.

23 Allo'tñapa' chetan ñaña orramets parasyoso'tuerrerrpa' apa'yerraneterr. Ñetña allohuenetpa' e'ñe orryesuahuet.

24 Jesúsñapa' atet oterraneterr:

—Añpa' nerrasca'ye sepeñ ñeñtcha' ashatarettatsa shonte' acheñenesacop. Añ nerraspa' alloch e'ñe etserra a'pocataerra acheñenesha' Apuesho.

²⁵ Na te'pa' o'ch notas: Amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Yompor.

Atto Jesús pa' eñotatan Pedro ñapa' chocmach a'nasocha
(Mt. 26.30-35; Lc. 22.31-34; Jn. 13.36-38)

²⁶ Allempoña o' morrechuanmuet Yomporecoppa' ahuaneneter Olivopno.

²⁷ Allña pa' atet otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: "O'ch nemtsater ñeñt cohuanmpene' carrnero, po'carrnerorña pa' chach matrra'tyesa allemeñ."

²⁸ Jesúsña pa' atet oterraneter:

—Tarraña esempoch alla netanterra napa' nanomcha' otertsa Galileo.

²⁹ Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahuatapa' amach na'ypo'ñerrpe.

³⁰ Jesúsña pa' atet otererr:

—Po'ñochca'ye o'ch notap, añe tsaprocmach ama't e'ñe epocha amach eñena' atollop pañapa' o'ch ma'poch pa' nasotenna.

³¹ Pedroña pa' alla otererr:

—Ama'tcha' yerromhuanen parro pa' naña po'ñochpa' ama't parrocha amach na' nasotaño.

Allohuen pueyochresha'pa' ñetpa'cho'ña e'ñe attecma otyenetañ ñamet.

Atto Jesús pa' ma'yochuena all oteñet Getsemaní
(Mt. 26.36-46; Lc. 22.39-46)

³² Alloñña pa' chap Jesús pueyochreshohuen all narmetsño, ñeñtpa' añ pa'so'cheñ Getsemaní. Allña pa' otosanet:

—Te' sapa' allach sanorrcha'tos arrma, napa' o'ch nema'yochena'.

³³ Allña pa' añ anmos Pedro ñaña Jacobo ñaña Juan. Jesúsña pa' ama't mameshapa' ama eñmateno pueyo'chro, cha nanac allpatena.

³⁴ Allempoña pa' atet otosanet:

—Napa' cha chepo'chenen nellquëña neyo'chro, cha muene' nerromuen nellquëño't. Sapa' allasa'tach arr secuapretosno'tach.

³⁵⁻³⁶ Ñaña pa' ahua' a'yenteye' all rremosa patso atet ma'yochosa:

—Apa, pocoppa' ama eñalle ñeñt ama erro'ten apen penteno; ñeñto'mar te'pa' notene'p amach pemnatatsche o'ch chapona

ñeñt atarr amuerochtatañ* nenten na. Tarraña ñerra'm pach muenatspa' añepa'chña atet pepaton ñeñt pemnen pa, amachña añeyaye ñeñt nemnen na.

³⁷ O'ña atet ma'yochuapa' o' ahuerri allo'tsa'yen pueyochresha' ma'psheña. O' cherr allpa' alla entuerranet ñetñapa' cha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acueyaye' penteno.

³⁸ E'ñe señose'rteño'pa' choña sema'yochosa allochñapa' attoch amach sañeña a'puerrataterro topateñets ñeñtcha' sehuapoya atarr huomenc. Ñeñt'pa' ama't atarr semneñeñ tarraña sechetsñapa' amaca'ye ahuamencateye' penso, ñeñto'marña notenes chocmach sema'yochena.

³⁹ Jesúsñapa' alla ahuerri puepocheño o'ch ma'yocherrerr, ñeñtara atet otuerrerr.

⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, cha nanac atserr moñe'tenet. Ama eñoteñeto errotencha'ña otapuerete't.

⁴¹ Jesúsñapa' alla ahuerri ma'yochatsa. O'ña ma'yochuerra'pa' allempoñapa' alla huerrerr poma'pocheño'hua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñt'pa'ta, señochepa'ch o' chap allempoch pomataterrnet na Ñeñten Acheñetosets attotcha' erro'tuanen perren ñeñt atarr ochña'fenesha'.

⁴² Te'ñapa' setanterra o'ch ahuey o'ch yepocte'. Secue'ca'ye ñeñtcha' nepomue' ñeñt'pa' alla'tsena.

Allempo rromoset Jesús

(Mt. 26.47-56; Lc. 22.47-53; Jn. 18.2-11)

⁴³ All atet eñorena Jesús'pa' cha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñañapa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'ttsapa' añ mueñenahuet ñeñt pa'mcha'tareternesha' pen allohuen judionesha' po'cornaneshar ñaña ñeñt etsotayenayeñ ñoñets ñeñt atet anaret ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rromuenaya' Jesús.

⁴⁴ Ñehua, Judas ñeñtcha' pomuerre' Jesús'pa' ñañapa' atet otnoman acheñenesha' ñeñt anom attoch cheme'toset Jesús. Ñeñt'pa' atet otnomanet:

* **14:35-36** Ñeñt amuerochtatañ ñeñt'pa' po'ño'ch ñeñt'pa' añ atma'ntataret ñerra'mrrate' ñeñt atarr pesherr yorren orramtsot.

—Erra'tsencha' nehuom̃cha'tos e'ñe netso'tstsapa'teñoŋpa' ñeñtca'yeña Jesús. Sañapa' ñeñtcha'ña serrmospa' o'ch sanem̃ e'ñe sehuamencocma.

⁴⁵ Allempoña huapapa' čha ponmosaya Jesús huom̃cha'tos e'ñe puetso'tstsapa'teñsha', atet otos:

—Tsapo, Maestrocha'.

⁴⁶ Allempoña acheñenesha'pa' ponmosyet Jesúsapa' rromoset e'ñe po'huamencocma.

⁴⁷ Allempoña puesheñarr ñeñt Jesús pueyochresha' ñañaapa' po'cchella cheta'pa' o'ch čhonto'tapanem̃ cornesha' pueñañra puetepa'tcha' tsorroñ. Ñeñtapa' año pueñañra ñeñt pa'mcha'tareter pen allohuen judionesha' po'cornaneshar.

⁴⁸ Allempoña Jesúsapa' atet otan acheñenesha':

—Eso'mare't sehuacha'tennanaña e'ñe occhelletareroches ñaña etsachperetareroches atoch serrma'n. Napa' ¿e'ñe't atet sentenen ñerra'mrrate' eñeñen?

⁴⁹ O' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaña serrma'ne'te. Ama'tpa' atepa'ca'ye perra allochñapa' atoch e'ñe etsotuerri ñeñt allpon quellca'yese't nocop ñeñt a'mta'yese't Yompor po'ñoñ.

⁵⁰ Allempoña allohuen pueyochresha'pa' allorocma a'ypo'ña' huanmet, ñetñapa' yetrra'tuet.

Atto a'yetachet puesheñarr huepuesha' allempo muene' rromuetañ ñaña

⁵¹ Ñehua, allempopa' allo'tsen ñaña puesheñarr huepuesha-chor ñeñt epuet ta Jesús. Ñañaapa' čha muelle'mquën atta eřamco'tnoma. Ñapa'čo'ña ahuo'ch rremuetañpa'

⁵² aña a'meyam̃pereta' allo eřamco'tena, huepuesha-chorñapa' muelle'mcoťa a'yetachet.

Allempo chapata'mueñet Jesús all apčha'muena allohuen judionesha' pa'mcha'tareternesha' ñeñt a'pocatyene' ñoñets (Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Acheñenesha'ña ñeñt rromose' Jesúsapa' ñetñapa' arr anmet allo'tsen ñeñt pa'mcha'tareter pen allohuen judionesha' po'cornaneshar. Allñapa' all apčha ñaña ama't allohuen cornaneshachno ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñaña allohuen ñeñt atarr etsotayenayeñ ñoñets ñeñt atet anaret judioneshacop. Ñetña allohuenet e'ñe all apčhenet.

⁵⁴ Pedropa' ñapa'čo'ña cote' tarraña ñapa' chenta' en a'yoť. Cornesha' po'pampopa' allñapa' anorros epuet ñeñt guardianesha' all a'torenet tso' all shotoset parro.

55-56 Cornanesha'ña pa'mcha'tareternesha' ñaña allohuen ñeñt' chocma a'pochtatyene' allohuen ñoñets ñeñt' judioneshacop, ñetña'pa' ñaña atarr e'nenet ñeñt'cha' a'metare'tamñpsose' Jesús allochña'pa' attoch muetsatachet. Ama't shonte' huapatsañ ñeñt'cha' toma'tamñpsosayeña'pa' amcha'taretnesha'ña ama't puesheñarrofetapa' ama eseshaye' entayeña attoch muetsatateret tarro'mar allohuenet ñeñt' toma'tamñpsosayeña'pa' ama e'ñe attecmaye' otosetoña Jesúsocop.

57 Allempoña tomcha'tos ñaña po'potantañ; ñetpa'cho'ña toma'tamñpsoset Jesús; ñetña'pa' atet otoset:

58 —Ya ahuaña'pa' ye'me'tca'yeña Jesús atetca'ye ote't: “Napa' o'chca'ye na'materrñañ añ Parets pa'paquell ñeñt'pa' acheñaca'ye pueyeçhcatar; tarraña poma'pamtañoñapa' napa' o'chca'ye alla na'tomater po'poñ ñeñt'pa' amachca'ye añeyaye ñeñt' yeçhcaten acheñ.”

59 Tarraña ama't atet toma'tamñpsyesosetaña'pa' ama e'ñe attecmaye' otoseto.

60 Allempoña cornesha' ñeñt' nanac amcha'taret allenta tompa' atet otan Jesús:

—Paña'pa' ¿ama'tcha'ña ñapananeto? ¿Erroñenote'tña oteñe'chenpet?

61 Jesúsña'pa' ama eñoreno, ama anapuenaneto. Allempoña cornesha'pa' alla otererr:

—Te'pa' o'ch notap, nemneñ o'ch pōten ñapa' ¿pa'tña ñeñtepte' Cristotosets? ¿Ñeñtepte' Parets Puechemerep, ñeñt' Parets chocma ya'ye'chochtateññañ?

62 Jesúsña'pa' atet och:

—Napa' ñeñtenca'ye. Elloña napa' o'chca'ye notas, senterrench'a' na Ñeñten Acheñetosets o'chca'ye alla nanorruerr Parets po'cohuenrot. Ñaña po'pocheño o'ch sentapuerren o'ch nesuanñperra osot Yompor pue'ntañot.

63 Cornesha'ña'pa' ñeñta e'mpa' allenta rrrarre'tan pa'shtam e'ñe patsrre'mueñoñ, ñeñt'pa' atet ot:

—Te'pa' amachca'ye ye'natsche po'psheñeñ ñeñt'cha' a'metamñpsose'.

64 Te' ama't sapa' o'ca'ye se'mñ atet achmñare'tenan Yompor. ¿Erroñena't senteñña sa?

Ñetña allohuenetpa' atet otyeset:

—Ña po'ñoçhpa' atarrca'ye nanac achmñare'tenan Yompor, pocte'ñaçho' te'pa' o'ch semtsatach.

65 Allempoña'pa' a'coshare'tyeset, huancacñe'chet pa'clloyotpa' çhota'tyeset. Pachmñare'teñoñet atet otyeñet:

—Te'ña eñoratenperrepa' Parets allochñapa' attoch p̄otey esha'te'ña peçhota'tyene'.

Ama't guardianesha' ñetpa'çho'ña o' çhota'chet.

Atto Pedropa' a' nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patso'tsen pampa'ollo. Allempoña allpa' huapa puesheñarr coyanesha' ñeñt sherbene' cornesha'.

⁶⁷ Ñaña' entosan Pedro all shotenana tso'. Cohuana'tospa' atet och:

—Paca'ye e'ñe cotaye'tña Jesús ñeñt nazareto'marnesha'.

⁶⁸ Pedroña anapue'pa' çha a' nasochapa' atet och:

—Napa' amaca'ye nentareña, ama't napa' amaca'ye neñoteñeña ñeñt atet p̄otenen.

Allempoña Pedropa' ahuerr, çherr allotecma be'tenet o'ch çhapuet o'pono pampo. Allempoña allenta eñen atollop.

⁶⁹ Allñapa' entuererr coyanesha' ñeñt cornesha' pueñaña. Ñaña' atet oterranerr ñeñt parro allo'tsa'yenet:

—Añ acheñerpa' ñeñtca'ye e'ñe parro yemtenet ahuaña.

⁷⁰ Pedroñapa' alla a' nasotererr. O'ña o'chterrerrpa' ñeñt tomçha'tyets all, ñetpa'çho'ña atet otereterr:

—Po'ñoçhca'ye p̄apa'çho'ña e'ñeca'ye parro seyemtena tarro'mar p̄apa'çho'ña galileo'marnesha'pca'ye ñeñto'mar e'ñe atet peñen ñerra'm ña.

⁷¹ Allempoña Pedropa' e'ñe puehquëñoñanetpa' atta otatse'tyerraneterr, ñeñt'pa' atet otanet:

—Napa' e'ñe Yompor pa'so'chño notenes, ñerra'm amate' po'ñoçhoye' notensopa' te'pa' nerromuepa'. Napa' po'ñoçhca'ye ama nentareña añ yacmar.

⁷² O'ña atet otuanetpa' e'ñepa'tcha' allempocma puepocheño eñeña atollop. Allempoña Pedropa' alla yerpuerrana ñeñt atet oteñ Jesús: “Ama't e'ñe epocha amach eñena' atollop p̄aña'pa' o'ch ma'poch p̄a' nasotenna.” Allempoña Pedropa' allenta atarr yahuena huomenc.

15

Allempo çhapata'mueñet Jesús allo'tsen añcha'taret Pilato
(Mt. 27.1-2, 11-14; Lc. 23.1-5; Jn. 18.28-38)

¹ Tsapa't o' taya puetarenpa' ñeñtña pa'micha'tareternesha' pen allohuen judionesha' po'cornaneshar ñetña'pa' apçha'mueneterr parro epuet ñeñt pompornesha' pen allohuen judionesha' ñaña añ ñeñt atarr etsotayenayeñ ñoñets ñeñt atet anaret epuet ñaña po'potantañ ñeñt po'taruas pene' o'ch a'pocatan ñoñets judioneshacop.

Ñetñapa' cotape' chatannetset, attoña o' e'ñe a'pocata'mueñet atetcha' pa'mueñet Jesús. Jesúsñapa' o' huancota'tuet allempoñapa' anma'mueñet allo'tsen amcha'taret Pilato (ñeñt' nen gobierno' Romoť ñeñt' amcha'tarettetsa allo'marneshacop).

² Pilatoña a'p'to'tapan Jesús'pa' atet och:

—Papa' ¿pa'tña amcha'tarettetsaña judioneshacop?

Jesúsñapa' atet och:

—Napa' ñeñtenca'ye atet p'toten.

³ Ñeñt' pa'mcha'tareternesha' pen allohuen judionesha' po'cornaneshar, ñetña allpa' shonte' pa'namenot otteñe'cha'mueñet Jesús.

⁴ Pilatoñapa' atet otererr:

—Papa' ¿are'tcha'ña panapaneto? ¿Ama't pe'muenanetoña ñetpa' pa'namenot a'metare'tampenpet?

⁵ Jesúsñapa' ama't e'ñe parrocha ama anapuenaneto. Ñeñto'marña Pilatopa' cha atarr cohuaña'tapan Jesús.

Atto amcha'taret Pilatopa' otanet, ama'tpa' chosa muetse'ña Jesús

(Mt. 27.15-31; Lc. 23.13-25; Jn. 18.38-19.16)

⁶ Ñehua, ñetpa' atetca'ye yechenet. E'ñe pate'tets char allem-poch cherrerr pascuapo, ñeñtña amcha'taret ñeñt' nen gobierno' Romoťpa' ñañapa' chocmach a'rroyerran puesheñarr judioneshacop ñeñt' ayottam'psarettetsa allempo, ñeñtara ñeñt' pamo'ts penet ñet. O'ch apamet erra'tsencho' enamuenet ñeñt' muenenet ñet. Ñeñt'pa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

⁷ Ñaña e'ñe allempopa' allo'tsen puesheñarr judionesha' ñeñt' ayottam'psarettetsa ñeñt'pa' añ pa'so'cheñ Barrabás. Ñehua, ñeñt' Barrabás ahuañmo'choteñ yottam'peñet epuet po'potantañ tarro'mar ñetpa' ñetca'ye yechatenetña acheñenesha' atpare'chetepa'to' amcha'taret ñeñt' nen gobierno' Romoť. E'ñe patpare'teñoťet o' muetset ñaña acheñ.

⁸ Allempoña acheñenesha'pa' cha'cha'tet Pilateshopa' ñetñapa' atet otoset:

—Te'pa' o'ch pa'rroyerrnay puesheñarr ñeñt' atet chocma peperrnaye't.

⁹ Pilatoñapa' atet otapanet:

—Sapa' ¿añe'tña semnen o'ch na'rroyerrnas ñeñt' amcha'tarettetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñotenan cornaneshachno pa'mcha'tareternesha'pa' ñetpa' e'ñeca'ye pue'moñe'tateñme'chatsa pomueñetña Jesús.

11 Tarraña ñeñt pa'mcha'tareternesha' pen judionesha' po'cornaneshar ñetña'pa' aña atarr cotape'chatenet acheñenesha' attoch ñetpa' allohuenetpa' o'ch ochet Pilato: "Añcha' pa'rroyernay Barrabás."

12 Allempoña Pilatopa' alla oterraneterr:

—Ñehua, añ ñeñt soten judionesha' pa'mcha'tareter, ñapa' ¿errofe'tcha'ña nepe'?

13 Ñetña puerranare'teñoftetpa' atet otyeset:

—Ñapa' ¡pecorso'tamñpsachñaca'ye!

14 Pilatoña'pa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetña'pa' alla rrannarterreterr huomencpa' atet oterreterr:

—Ñapa' ¡choñañaca'yeña corso'tamñpsate'!

15 Pilatoña'pa' añ atarr muenen o'ch coshatan acheñenesha' ñeñto'marña a'rroyerranet Barrabás ñeñt enamueñet. Allempoña ashtatan ñaña Jesús alloñapa' otan po'solltarneshar:

—Te'pa' o'ch secorso'tamñpeña'.

16 Ñehua, solltarnesha'ña ama aneñeta' allcha' corso'tamñpsoset arrña ñanom anmetña Jesús añcha'taretepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe apchet Jesúsesho.

17 Allña'pa' pa'llocchame'teñoftet Jesús chorrachet shetamuets tsamamueno' quelluemamtena ñeñt pa'shtam pen ñeñt po'ñoch añcha'tarettetsa. Pellta'toñet ñaña choyo'mets agrechpa' ñeñtña choyo'mtchet ñeñt atet choyo'mtena ñeñt po'ñoch añcha'tarettetsa.

18 Pachmare'teñoftetpa' atet oteñet:

—¡Puetare' añcha'taretecha' atarruaca' cohuenep̄te! pa' ñeñtep̄ judionesha' pa'mcha'taretereḡ.

19 Pueche'tatseteñoftet asto'tame'teñet tsachḡo poño, a'coshare'teñet, allempoña concorpana'teñet, ottenetañ ñerra'mrrate' cho' muechatse'teñet.

20 O'ña achmare'tuahuetpa' allempoña'pa' rrotam̄peret shetamuets tsamamuen chorrateret e'ñe ña pa'shtam. Allempoña'pa' anmet a'yo allcha' corso'tamñpeñeta'.

Atto corso'tamñpsoset Jesús

(Mt. 27.32-44; Lc. 23.26-43; Jn. 19.17-27)

21 E'ñe ahuanmatsetpa' allña oñenetpa' o' poctet puesheñarr yacma ñeñt cireneo'marnesha' ñeñt'pa' añ pa'so'cheñ Simón ñeñt errete' huerrtsa a'yoñ. Ñaña'pa' allenta chechatnomet po'corsoch. Ñeñtña Simónpa' ñeñt'pa' añ pompor pen Alejandro ñaña Rufo.

22 Chapachet all socheñet Gólgota ñeñt yoten yeñoño Poñetallepno.

23 O' chapachet allpa' Jesús'pa' aposetañ vinos ñeñt'pa' añ atsetaref pueretso ñeñt atarr pesherr ñeñt otenet mirra tarraña Jesús'pa' ama mueno o'ch orr.

24 Allempoña o' corso'tam'pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets.

25 O'ña enome'ta'muen atsne' allempoca'ye corso'tam'psa'mueñetña Jesús.

26 Ñehua, poño'tpa' all corsocho all noñet tsachtall aquellcaref attochña eñoteñet ñeñtecop corso'tam'peñet. Ñeñtña quellecpa' atet oten: "Añpa' ñeñtca'yeña judionesha' pa'mcha'tareter."

27 Allña corso'tam'pset epuet ñaña epsheña eñet, puesheñarrpa' nosñañet po'cohuenrot, po'psheñeñña'pa' nosñañet pue'chco'terot.

28 Attoca'yeña etsoterraña Yompor po'ñoñ ñeñt atet anuaref ahuatoteñ Cristocop; ñeñt'pa' atetca'ye oten: "Ñapa'cho'ña e'ñech attecma enteret ñerra'mrrate' ñeñt atet patse'tyene' ñeñt ama pocteyaye."

29 Ñeñtña oñmachets allpa' ñetpa'cho'ña chocma achmare'tneñet. Pachmarño'tetpa' coño'coñtana'tyesneñet, ñeñt'pa' atet otyesneñet:

—Pa ñeñtep pommo'cheño'tpa' potatse'te't po'ch a'materrayen Parets pa'paquell, poma'pamtañocmo'ch alla pa'omatereñ,

30 te'ñapa' pa'queshpatterrañaca'ye e'ñe pañeña, pesuer-rañaca'yeña tayecma corsocho't.

31 E'ñe attecma achmare'teñ ñaña ñeñt pa'mcha'tareternesha' pen judionesha' po'cornaneshar ñaña ñeñt etsotayenayen ñoñets ñeñt atet anaref. Ñetñapa' e'ñe parrocmachmare'teño'tpa' atet otatse'tyeñet:

—Te'ña papa' o' pa'queshpates po'potantañ, pañapa' eso'mare'tcha'ña te'pa' ama errotenot pa'queshpatterroña e'ñe pañeña.

32 E'ñe pachmare'teño'tetpa' atet otyereter:

—Papa' ñeñtepo'ca'ye Cristotostsañ, ñeñtepo'ca'ye israel-nesha' pa'mcha'tareterpeñ, pesuerrañaca'ye corsocho't al-lochñapa' attoch yame'ñaña yaña.

E'ñe attecma pe' ñaña eñet ñeñt epuet corso'tam'peñet, ñetpa'cho'ña atarr es otnare'chet allot po'corsocho't.

*Atto rroma Jesús all po'corsocho**(Mt. 27.45-56; Lc. 23.44-49; Jn. 19.28-30; Heb. 9.11-14)*

33 O'ña chap poctopa' o'huañ atsnom o' e'ñe checmetua ora errañaren a'ñe patsro, o'ña ellerrotenmochapa' o' alla puetarerí.

34 Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Eloi, Eloi, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

35 Puesheña'tetsña ñeñt tomchets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—Se'mueñe't o' cha chore'tante' Elías ñeñt a'mtaye't ahuat Parets po'ñoñ.

36 Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpopa' allotña tsotso'tatosanña Jesús. Ñaña'pa' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

37 Allempoña Jesús'pa' o' alla rranerrerr huomencpa' rroma.

38 Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoñeñ e'ñe sotatsohua.

39 Capitánña ñeñt romo'marnesha'pa' ñeñt tets allame'tets ñaña'pa' e'ñe entenan Jesús atto rroma, allempoña ñapa' atet ot:

—Po'ñochuaca'ye añ acheñerpa' Partsepa'tca'ye Puechemer.

40-41 Allo'tsa'yen ñaña shonte' coyanesha'chno, ñetñapa' a'yota cohuanrrortenet. Ñetpa' ñetca'yeña co'ta'huanmue'ña Jesús Galileoteñ ñeñt sherba'yesaye't. Ñeñtpa' María Magdalena ñaña po'psheñeñ María ñeñt Jacobo pachor ñaña José. Ñehua, ñeñt Jacobopa' puechoyomer peñ José. Allo'tsa'yen ñaña shonte' po'potantañ coyanesha'chno ñeñt co'ta'yesaye't Jesús Jerusaléño.

*Atto pampuet Jesús**(Mt. 27.57-61; Lc. 23.50-56; Jn. 19.38-42)*

42 Atteñapa' o' ellerren. Ñehua, ñeñt yetñatsropa' allempoca'ye chocma añño'tena judionesha' ñeñt tsapatcop allempoch ameserreterr.

43 Ñeñto'marña allempopa' Joséña ñeñt arimateo'marnesha'pa' ñaña'pa' ama puencha'ñoñeye' ahuoso Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt Josépa' atarr cohuen acheñ, atarr añcha'na'tpo' enteñ allohuen ñeñt parro a'poctatenet ñeñt llequëna allohuen judionesha'. Ñapa'cho'ña

ñeñt atarr cohuene' Yompor esempohuañencha' o'ch atarr ayochreshatterra.

⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñochte' o' rromaña e'ñe mamecma?

Allempoñapa' agotan soltar po'cañtanerpa' a'p'to'ch:

—¿Po'ñocha't o' rromaña Jesús?

⁴⁵ Capitánñapa' atet otos:

—Po'ñochca'ye o'ca'ye rroma.

Pilatoñapa' atet otan José:

—Ñeñtepñapa' pa'suater corsocho'tpa' pañerca'ye.

⁴⁶ Joséñapa' allenta rañtosana emarr shetamuets, cherr corsochopa' a'suaterranña Jesús corsocho't all rromuen. Ep'atse'ch shetamtso ñeñt e'ñe cohuen. Allempoñapa' anemñ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yottam'pesner ñeñt puepampuer pa'ch.

⁴⁷ All cohueñ María Magdalena ñaña po'psheñeñ María, José pachor. Ñetñapa' e'ñe enteñet all na'neret Jesús.

16

Atto tanterra Jesús

(Mt. 28.1-10; Lc. 24.1-12; Jn. 20.1-10)

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeñt Jacobo pachor, ñetñapa' rañta'yesnenet eñmosañ ñeñtcha' anma'muenet tsapa't Jesús puepampro alloch a'yana'tereta' ama't rromota.

² Tsapa't allempo mo'tta'muena yetñats temenc ñetñapa' e'ñe ahuatecma ahuanma'muenet Jesús puepampro. O' taya huapa'muena atsne'pa' allempo ahuanma'muenet.

³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeñt allo yottam'peñet attoch yebe'tos all puepampro esheccha' ya'yana'tera' eñmosaño.

⁴ Ñetña chapatseta all, cohuostseta entoset mapue' o' a'rrote'tarettena a'yenet, ama't ñeñt mapue'pa' añecmuen.

⁵ Ñetña allempo be'toset puepampro allñapa' all entoset puesheñarr huepuesha' all anen po'cohuenrot. Pa'shtamñapa' atarr huallama't, cha torats pañet pueyo'chret.

⁶ Ñeñtña mellaño'teñerpa' atet otapanet:

—Amach cha seyorenatsto. Napa' neñotenes aña'ye semen o'ch senta'mueñ Jesús ñeñt otenet nazareto'marnesha' ñeñt o' corso'tam'perret. Tarraña ña te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellaño'teññapa' alla otarraneterr:

—Te'pa' o'ch ahuerres o'ch sotuer Pedro ñaña po'potantañ pueyochresha', Jesús oten o'ch ota o'ch ahuer Galileo. Choscha'ña ahuanmatsa samña allochñapa' allcha' senter ñeñ atet otase't ahuaña.

⁸ Allempoña coyaneshachno atet otaretet all Jesús puepampro, ñetña cha'nmacherretpa' matenacma ahuanerret po'yorñoñetpa' cha yonshema'tyesnerret. Ponchañofet ama't e'ñe eseshapa' ama errotenaye' otenaye' entnerreto.

Allempo tanterra Jesúsapa' añ ñanom orrterra María Magdalena

(Jn. 20.11-18)

⁹ Ñehua, ahuatecma tanterra Jesús añe yetro allempo motta'muenerr yetñats temenc. Allempo tanterrapa' añ ñanom orrterra María Magdalena. Ñeñña Mariapa' cancherrsheña oneñeñ ñeñ chorraye't Jesúsñapa' e'ñe quechpatam̄psatuer.

¹⁰ Maríañapa' allenta ahuo' o'ch otenana' ñeñ epuet yemte't Jesús all puellquëñofet atarr yahuanrrortenet.

¹¹ Ñetña allempo e'mare'chet o' tanterra Jesús, Mariapa' o'ca'ye enter, ñetñapa' arepa'tcha' ame'ñyeto.

Allempo Jesúsapa' orrterrana ñaña epsheña pueyochresha'
(Lc. 24.13-35)

¹² Po'pocheño Jesúsapa' e'ñe po'poñoñ orrterrana epsheña pueyochresha' allempo chopeñe'chnenet allampaño'mar.

¹³ Ñetñapa' allenta puerrerret o'ch otueret po'potantañ, arepa'tcha'ña ame'ñareñtapuerreto ñeñ atet enteret ñamet Jesús.

Atto Jesúsapa' otnerran pueyochreshachno ñetpa' atetcha' pa'yerret

(Mt. 28.16-20; Lc. 24.36-49; Jn. 20.19-23)

¹⁴ Po'pocheño Jesúsapa' alla orrterrannerr pueyochresha' charrasheña ñeñ puechetsa paterr all rrallme'chenet. Ñañaapa' atet cotape'chatuenanetpa' atet otuenanet:

—Sapa' eso'mare'tña ama same'ñeñoña po'potantañ ñeñ sotene' napa' o'ca'ye netanterra tarro'mar ñetpa' choca'ye enternnet. Tarraña sapa' amaca'ye es sechenoyo seyo'chro.

¹⁵ Allempoña Jesúsapa' atet otnerraneterr:

—Te'pa' o'ch auyeses ora erraparen allohuanen añ patser, seserrpare'tach allohuen acheñenesha' añ cohuen ñoñets alloch a'queshpataretterret.

¹⁶ Allohuen ama't erra'tsena ñeñtcha' ame'ñerraya añ cohuen ñoñets ñaña ñeñt pame'ñeñoñetpa' apataretterretcha'

ñetñapa' a'queshp̄ataretterretcha'. Tarraña ñeñtcha' ama ame'ñerrtso, ñetñapa' amñareñterrach coñcheñtso.

17 Ñeñtcha' name'ñerraya ñocpuetpa' norrtaterranetcha' nepartsoña. Eñe na neso'chñoch quechpatyesetcha' oneñetechno, ñaña eñosyesetcha' po'poñe'ttsocma ñoñtso.

18 Ñaña ñerra'm eñe pototet chetetcha' shechep̄, tarraña amach erroť p̄aneto; ñaña ama'tcha' añ orret ñeñt amt-sañtetsa tarraña amach erroť p̄aneto. Ñaña ñerra'm esempoch a'p̄lla'yeñet atsnañeť, atsnañeťñapa' acrrerroche'ch.

Allempo a'terr Jesús pue'ntaño

(Lc. 24.50-53)

19 O'ña atet otuanerranet Partsesha' Jesúsapa' allenta a'tapater Pompor pue'ntaño, allñapa' anorruien eñe Pompor po'cohuenroť, all partsotapretuera.

20 Pueyochresha'ñapa' ahuanomyeset, ser-rpare'tyesnomuet errap̄aren. Partsesha' Jesúsapa' chocma torrapretenanet, orrtatenanet po'partsoña attoch acheñenesha' eñech eñotenanet ñeñt atet serrpare'tyenet, ñeñtapa' eñe po'ñoch Parets po'ñoñ. Ñeñtapa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN LUCAS

Ñehua, añpa' ñeñtca'yeyña e'ñe pa'moter penña serrparñats

1-4 Masheñe Teófilo, p̄apa' peñoteñ ahuañmo'chapa' pa'namen esocmañen ñeñt atet etsotayese't Jesús acheñeneshesho ñeñt e'ñe ñanom ame'ñaya ña, ama't teme'ttsen yocpa'naña ñeñtey o' yame'ñera yaña. Ñaña allempoteñ Jesús pa' orrtana pa'namen acheñenasha' ñeñt entyesaye't e'ñe allame'tets. Ñetñapa' e'ñe entuoñete't allohuen ñeñt atet p̄a'yese't. Ñetñapa' serrpare'tyesete't atet oten Yompor po'ñoñ. Attoña eñotaterryetña yaña. Ñeñt atet eñotatyenet ñetpa' shonte' acheñenasha' quellca'yeseña ñeñt atet p̄osa Cristo allempo huapa. Ñeñto'marña napa'cho'ña e'ñe pocte' nenteñ o'ch nequellconap̄ e'ñe ora allpon ñeñt atet orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñoche erro'tente'ña ñeñt e'ñe po'ñoche atet p̄a'yese't Jesús. Ñeñto'marña te' arrpa' o'ch e'ñe neñotap̄ ora allpon ñeñt o' etsotua allochñapa' attoch e'ñe peñotuer p̄aña ñeñt allpon ye'chatenpetpa' ñeñtpa' e'ñe po'ñoche atet. Ñehua, arrpa' atet o' etsotua.

Ñehua, te'pa' o'ch neserrpare'tatap̄ atto mellaño'teñpa' eñotatanet o'ch eñalleta Juan ñeñtcha' apatañtatsa Yomporcop

5 Ahuat allempo añ añcha'tarettatse't Herodes all anetso Judeo, eñall ñaña puesheñarr ñeñt judionesha' po'corneshar. Ñeñtpa' añ pa'so'cheñ Zacarías ñeñt chocma yemtenana po'potantañ cornaneshachno ñeñt otenet Abíasona'tar ñeñt torratse't Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshap̄nor ñeñt po'mñeneñ pen Aarón ñeñt corneshatatse't ahuat.

6 Ñetña epsheño'maretpa' Yomporñapa' e'ñe pocte' entenanet ñeñt atet penet ñet, e'ñe cohuen etsotueññañet ora po'ñoñ ñeñt atet anaret ahuatoteñ acheñeneshacop ñeñtcha' atet p̄ohuenet. Ñeñto'marña ama't puesheñarrapa' amach erro'tenot otaretteto, "ama pocteyaye ñeñt atet sepena."

7 Ñetpa' ama eñalleto ama't puesheñarra pacñe'ter tarro'mar Elisabetpa' ama achoyore'tañeyaye. Ama't ñaña puerrollar epsheño'maret o' atfa po'nme'tuenet.

8-9 Atteñapa' chap allempo torrena allohuen cornaneshachno ñeñt epuet parro yemtena Zacarías atto

corneshatenet Yomporecop. Ñehua, allempopa' allohuen ñeñt' corneshatats'e't Yomporecop, ñetñapa' añ yeçhete't ahua'ch yellsheñe'chenet allohuenet attoch eñochet po'suertot' erra'tsencha' puesheñarrer ñeñt'cha' be'tosets Yompor pa'paclo allcha' a'crratan ñeñt'cha' eñmosa'ttatsa Yomporecop. Allempoña pam'tarrpa' aña orrtatsa Zacarías ñeñt'cha' be'tosets Yompor pa'paclo allcha' a'crratan ñeñt'cha' eñmosa'ttatsa Yomporecop.

¹⁰ Ñehua, allempo çhap allempoch be'tosos puesheñarrer Yompor pa'paclo shonte' acheñenesha' ñetñapa' allach tom'cha'tet a'yot allcha' ma'yochrra'toset. Ama't allempo be'tosos Zacaríaspa' atterach ma'yochrra'tet a'yot.

¹¹ Ñehua, Zacarías allempo sherbenan Yompor o'pono, allñapa' machayotepa'tcha' orrtoña Yompor po'mllaño'teñer. Arr tomos altar po'cohuenrot', ñeñt' altarpa' allecma a'crratenet ñeñt' eñmosa'ttetsa Yomporecop, ñeñt'pa' atto sherbete't Yompor.

¹² Allempo orrtoña mellaño'teñ, Zacaríasñapa' atarr yoren, atarr nanac mecha'ch.

¹³ Mellaño'teññapa' atet otosan Zacarías:

—Zacarías, amach peyorenatsto tarro'mar Yomporpa' e'muennap' ñeñt' atet penamueñ pema'yocheño't. Ñeñto'marña te' petapor Elisabetpa' eñalletaterrancha' paterr asheñorr ñeñt' e'ñe po' pechemer, ñeñt'ñapa' pesoçhcha' Juan.

¹⁴ Papa' atarrcha' p'ocshena nanac. Shonte'ch acheñenesha' ñeñt'cha' nanac p'ocshapretaya atto o' eñalleta pechemer.

¹⁵ Ñapa' atarrcha' asherben enteñ Yompor. Ñapa' amach orrarña'teyaye, ama't vinosapa' amach orreñe. Ama't ña'ma pa'namen ñeñt' aposa'tpotetsapa' amach orreñe ama't mame-sha. Ñapa' e'ñech aña chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

¹⁶ Allempoña mellaño'teñpa' alla otererr:

—Ñapa' cohuencha' cotape'chaterran shonte' israelena'tarnesha' allochñapa' attoch cotape'cherret e'ñe cohuen Yomporecop ñeñt'cha' Po'partseshar perret.

¹⁷ Ñeñt'ña Juanpa' ñeñt'cha'ña ñanom orrtatsa Yomporecop. Ñapa' añcha' ahua'mencat' pene' Yompor Puecamquëñ atet pe't ahua't Elías ñeñt' a'mtaye't Yompor po'ñoñ. Allochñapa' attoch e'ñe cohuen amo'tstaterrana achemereteçhno pechemerasha'. Allochñapa' ama't ñeñt' atpare'tetsapa' o'ch ame'ñaterranet ñeñt' e'ñe pocte' es pets. Attochña cotape'chaterranet cohuen, allochñapa' attoch agapueret Partsesh'a' ñerra'm esempoch orrta.

18 Zacaríasñapa' ahuo' a'p̄to'tan mellañoṭeñ, ahuo' och:

—Ta', ¿erroṭenochña neñoch e'ñeṭe' po'ñoḥ o'ch eñalleta che-shatoll? Tarro'mar napa' o' nepo'nme'ten; netaporpa'cho'ña e'ñe attecmay o' atarr yepo'nme'tuen.

19 Mellañoṭeññapa' alla otererr:

—Napa' ñeñten Gabrieletets ñeñten sherbene' Yompor. Napa' ña nellsensene' attoch ne'ñorana'taṭpa o'ch neñotataṭ añ cohuen ñoñets.

20 Tarraña ṭapa' ama ṭame'ñenno ñeñṭ atet noteneṭ, ñeñto'marña te' ṭapa' o'ch ṭo'panat, amach eshec pe'ñorerro ṭayoteñ tarrempohuach allempoch eñalleta pechemer, allem-pochña pe'ñorerra. Tarro'mar po'ñoḥ etsoterrach ñeñṭ atet o' notuaṭ o'ch ḥap allempo onañchareṭ. Arrpa' allohua ñeñṭ atet ot mellañoṭeñ.

21 Atto' ellapes Zacarías o'ponopa' acheñenesha'ñapa' cohueñet a'yoṭ ama ḥa'nerro. Atto' cohueñetpa' otanna'tet:

—¿Eso'marte' amo' ḥa'nerroña Yompor pa'pacloṭ?

22 Allempoña ḥa'nerrpa' ama eshcaye' eñorana'tuerraneto. Ñeñapa' otyenet pueyoḥreto, ñato' ḥote' es orrtoya Yomporecop ñeñto'marte'ña atarr ellapes o'pono Yompor pa'paclo. Ñaña' ama eshcaye' eñorana'tuerraneto, potota eñotatuerranet ñeñṭ atet ent Yompor pa'paclo.

23 Allempoña o' ḥap allponmat ñeñṭ atto sherbenet Yompor pa'paclo, Zacaríasñapa' o' ahuer pa'paclo.

24 E'ñe allponmatatsapa' o' aḥomenta puetapor. Allempoteñña Elisabetpa' ama mueno o'ch orrterra acheñeneshesho. Ama't o' amnarnña arrorrpa' ñaña' ama orrteno. Ñaña' atet oten:

25 —Te'ñapa' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyen-net mueḥopeno'.

Atto mellañoṭeñpa' eñotatanet o'ch eñalleta Jesús

26 Allempoña o' pechapña arrorr aḥomenta Elisabet, Yomporña' o' alla mueñerranerr po'mllañoṭeñer ñeñtara Gabriel. Arr mueñe anetso Nazareto ñeñtara Galilea.

27 Allempoña ḥap Nazareto, allña' orrtosana puesheñarr shopshesha' ñeñṭ ama a'ṭllareteyaye. Ñehua, ñeñṭ shopshe-sha'pa' añ o'patenaya yacma ñeñṭpa' añ pa'so'cheñ José, ño'ch yore'. Ñeñṭña shopshesha' arroṭ eñalletña David po'mñrenñoṭ; ñeñṭpa' añ pa'so'cheñ María.

28 Mellañoṭeñña allempo ḥap e'ñe ñeshopa' atet otos:

—O'ch noḥa nehuomḥa'toseṭ. Yompor e'ñe pemuereñoṭeṭ ṭapa' atarrcha' coshaterreṭ, ñapa' e'ñe pesho'tsen. Yomporpa' atarr bensare'tamṭeneṭ.

Ello pem̄tana'tueñ allohuen ꝑacmanesha' atto ben-
sare'tam̄penanet ñet.

²⁹ Allempo e'man atet och mellañoñeñ, ñañaꝑa' čha
moññe'tacha, čha coťape'ch pueyočhro:

—Ta', ¿ešte' otenenña ñeñt atet huom̄cha'tenen?

³⁰ Mellañoñeññaꝑa' alla otererr:

—María, amach pem̄cha'tatsto, Yomporpa' atarr o' mor-
renterrpa.

³¹ Te'pa' ꝑačhomentach, pechyore'tcha' ñeñtꝑa'
asheñorrcha'. Ñeñtñapa' pesočha' JESÚS.

³² Ñeñtcha' nanac am̄cha'tarettatsa. Otyesetcha' ñapa' ña
Ñeñt Nanac Parets Puechemer. Pomporña ñeñtara Paretspa'
ñachña ne' am̄cha'taret atet am̄cha'tarettet ꝑa'tañ David.

³³ Atteña ñapa' am̄cha'tarettach Jacob po'm̄renñecop
ñeñtara israelnesha'. Ama't errponañapa' amach huañerro
ñeñt atto am̄cha'tarettena ña.

³⁴ Maríañapa' atet otapan mellañoñeñ:

—Ta'm ¿erroťenotcha'ña nechyore'tña? Napa' ama't
puesheñarra encanesha' amarramtso yoreña'.

³⁵ Mellañoñeññaꝑa' alla otererr:

—Paretscha'ca'ye Puecamquẽ pečhapoya. Ñeñt Nanac
Parets po'huamenčpa' a'pomam̄psoseꝑcha' atet ñerra'mrrate'
os ꝑa'pomam̄pene'. Ñeñto'marña cheshatoll ñeñtcha'
pe'ñalletatꝑa' ñapa' añach e'ñe ma'yočhrosa ñeñt atet muenen
Parets. Otyesetcha' ñapa' ña e'ñe Yompor Puechemer.

³⁶ Ñaña Elisabetña ñeñt ꝑamo'ts pepen, ñapa'čho'ña o'
totana asheñorroťoll, ama't o' po'nme'ten. Ñaña ama't oteñet
muečhoꝑpa' te'ñapa' o' pechapña arorr o' ačhomenta.

³⁷ Tarro'mar Yomporpa' ama eñalle ñocop ñeñt atarr
torrapo' enten.

³⁸ Allempoña Maríaꝑa' alla oterranerr mellañoñeñ:

—Ñehua, napa' e'ñe pocte' nenteñ o'ch nesherber Yepapar
ñeñt Nepartseshar nepen. Ñeñtꝑa' attetepa'ch nocop ñeñt
atet ꝑotenen.

Allempoña mellañoñeñpa' o' ahuerr.

Atto Maríaꝑa' emo'tenana' Elisabet ñeñt e'ñe pamo'ts pen

³⁹⁻⁴⁰ Maríañapa' allenta ahuo' poma'yorñecma o'ch
emo'tenana' Elisabet. All yečhenapa' all shonte' aspentarer
allara Judeo. Allempoña čhap anetso all sečenapa' be'tosos
Zacarías pa'paclo, huom̄cha'tosan Elisabet.

⁴¹ Ñañaꝑa' allempo e'mapan María ñeñt atet huom̄cha'tospa'
pue'mareťollña ñeñt ꝑa'to'tsenpa' allentepa'tcha' pella. Pa-
chorñaꝑa' e'ñe chorreña Parets Puecamquẽ.

42 Ñeñtña eñoratene', pocsheñeshocmañen eñorena huomencpa' atet otapan María:

—Papa' o' atarr coshaterreḡ Yepapar. Papa' o' e'ñe penñtana'tue ora allohuen yacmaneshačhno atto coshatenanet ñet Yepapar. Ñaña Yepaparpa' atarrcha' bensare'tamḡennaḡ pechoyoretoll.

43 Ama't na Yepaparpa' atarr coshatenen atto pemo'tenen ama't ñeñteḡ pachor pen ñeñtcha' Yepartseshar yeperr.

44 Tarro'mar e'ñe allempocma ne'maponḡ peñoñ atet pehuomñcha'tosen, ne'maretollpa' e'ñe pocsheñeshoḡpa' al-lentepa'tcha' pella nato.

45 Paña te'pa' atarr cosheñtso'tseneḡ tarro'mar ḡapa' e'ñe ḡame'ña'huoña ñeñt atet otuenḡa' Yepapar. Ñeñto'marña ñeñtḡa' e'ñech atet etsoterra ḡocop.

46 Maríañapa' alla otererr:

—Te'ñapa' e'ñech neyočhrocmañen na'ye'chočhtatoñ Yepapar.

47 Necamquēñohuen atarr nocsheña Yepapar ñeñt Ya'quesḡpatañer yepen.

48 Yepapar e'ñe puemuereñoŋen ñapa' entenen ama esoy-ayno, añana ñeñten torretsa ñocop. Tarraña te'pa' allohuen acheñenesha' ñeñtcha' mererrtsa arr patsro ñetñapa' atarrcha' coshapreterrnet atto Yepaparpa' o' atarr coshaterren na.

49 Tarro'mar ñapa' ñeñt atarr ahuamencattetsa attoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

50 Allohuen ñeñt añcha'na'tpo' entene' Yepapar, ñaña'apa' čhocmach atarr muererranet ama't tayoteñ errponañohuen ama't allpon allohuen acheñenesha' ñeñtcha' mererrtsa arr patsro.

51 Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñaña'apa' e'ñech pomnaren ḡohuerranet.

52 Ñaña ñeñt atarr ahuamencat entyetsa ñaña'apa' e'ñech a'suatanrrortatuerranet alloŋ añcha'tareñtenet. Tarraña ñeñt ama esoshe'maye' entyetsopa' ñetñapa' Yepaparcha' nohuerrahuet attotcha' añcha'na'tpo' enter allohuen acheñenesha'.

53 Ñaña ñeñt nanac es pallta'yetsa, ñetñapa' Yepaparcha' esocmañen aphuerrahuet. Tarraña ñeñt atarr esocmaneñ es echyets, ñetñapa' Yepaparcha' puerrataḡpesuerrahuet, amach es anerreto ama't coñe'ta.

54-55 Yepaparpa' añach chocma yenpuen israelena'tar ñeñt' pueyochresha' pen ña. Amach pueserrano ñeñt' atet otane't ahuat yamo'mtayñeneshañ ñeñt'cha' atet perranet ñaña allohuen ñeñt'cha' po'mñreneñ perret. E'ñe atet otane't ahuat Abraham po'mñrenñecop. Attoch chocma muerenanet ama't errponohuañen. Arrpa' allohua ñeñt' atet a'hotan María Yompor.

56 Allempoñapa' ñato' ma'pñate' arrorr alla a'pa Elisabetesho. Allotña Mariapa' ahuerr pa'paclo.

Arrpa' atto eñalleta Juan ñeñt' apatañtatse't Yomporecop

57 Allempoña chap allempoch emare'ten Elisabet. Ñeñtña pue'marpa' asheñorroñoll.

58 Allohuen acheñenesha' ñeñt' yeçheta all ñesho ñaña allohuen pamo'tsesha' ñetñapa' e'ñe coshaprechet. Tarro'mar eñoteñet Yomporpa' o' orrtatoñ atto ñapa' atarr muereña.

59 Allempoña o' posocmata'muen ñeñtña asheñorroñollpa' o' tsorratolle'ta'mueñet tarro'mar ñetpa' atetca'ye yeçhenet ñeñt'et judioneshet.* Allempopa' añ sochetañ Zacarías o'ch anmatoñetañ pompor pa'so'cheñ.

60 Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch Juan.

61 Allempoña acheñenesha'pa' atet ochet:

—¿Eso'mare't pemneñña o'ch pesoch Juan tarro'mar ama't puesheñarra pamo'tspa' ama eñalle ñeñt' socheta Juan?

62 Allempoña acheñenesha'pa' e'ñe pototeta a'p'to'toñet ematoll pompor escha' sochanña puechemeretoll.

63 Ñapa'cho'ña potota eñotatan acheñenesha' o'ch apet quellcatets allcha' quellcan ñeñt'cha' sochan puechemeretoll. Allempoñapa' apet quellcatets, allñapa' atet quellca': "Añcha' yesoch Juan." Acheñenesha'ñapa' atta cohuanrrorchet.

64 E'ñe allempocma Zacaríasñapa' allenta eñorrera. Al-lorocma aye'choçhtaterran Yompor.

65 Acheñenesha'ña ñeñt' yeçheta allpa' allohuenet atarr mecha'na'teñet Yompor. Ñetñapa' serrpare'tatanna'tyeset all aspentarero Judeo.

66 Ñaña ama't allohuen ñeñt' e'mare'tyese' ñetñapa' cotape'chyeset pueyoçhreto, atet otyenet:

* 1:59 Añ ñoñets "atsorraret", añ ñeñt' otets atet yeche't judionesha'. Ñeñt'pa' atet: Ñerra'm allempo eñalletena asheñorroñollesha' ñeñt' e'ñe judionesha'pa' añña pomporpa' o'ch tsorrateñet po'chtso. Ñehua, ñeñt' tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret asheñorroñollpa' all e'ñech poteretollo e'ñe po'ñoñ parrmatollo.

—Añ cheshatollpa' po'ñoçcha' atarr sherberran Yompor tsapatonet.

Tarro'mar Yomporpa' atarr muereña.

Atto Zacarías atarr açhotenan Yompor Parets

67 Cheshatollña pompor ñeñt Zacaríaspa' añ chorrenaya Parets Puecamquëñ ñeñña eñoraterre' Yomporecop ñeñcha' atet perra ama't esempo. Ñeñtpa' atet ot Zacarías:

68 —Aye'choçhtaterrapo'ch Yompor, ñeñtara ñeñt Po'partseshar pen allohuen israelnesha', tarro'mar te'ñapa' o' orrtaterrnay puemuereña ñeñcha' ya'qushpaterre' ñeñtey puechemer pen.

69 Ñapa' o' orrtatonay ñeñcha' a'qushpatañterrtsa ñeñt atarr ahuamencatesha' ñeñtara ñeñcha' eñalletatsa David po'mrenñoç, ñeñtara David ñeñt atarr sherbaye't ahuat Yompor.

70 Ñeñtpa' ahuatoteñ atet eñoratyesane't ñeñt a'mta'yese't po'ñoñ, ama't allohuen ñeñt e'ñe ma'yoçhra'yestse't Partsocop.

71 Ama't ñaña allohuen allpon ñeñt ye'moñe'tene' ñeñt añcha'noçhetyetsa yocop, ñachña ya'rroyataterre'.

72 Attochña etsotaterrnay ñeñt atet otane't ahuat yatañneshañ ñeñcha' atto çocma muererrya. Atteña ñapa' amach pueserrano ñeñt atet a'pocstat ahuatoteñ yocop tarro'mar ñeñtpa' e'ñe Partseshot a'pocstataretta.

73 Ñehua, añpa' atet pa' allempo Yomporpa' ahuat otan yatañ Abraham ñeñcha' atet perrnay e'ñe po'ñoçh.

74 Ñeñtpa' atet ote't Yompor yocop ama't ñeñt allpon ñeñt ye'moñe'tene' ñeñt añcha'noçhen yentyen ya, ñaña'pa' ñach ya'rroyataterre'. Allochña yapa' o'huañcha' yeñcha'nañoç yesherber Yompor.

75 Attoch yetsoñoñ ñeñt e'ñe pocte' enten Parets allochñapa' attochña pocte' enteney ñaña acheñenesha' atto e'ñe cohuen es yepa'yen e'ñech tarremphua esempohuach yocrena arr patsro.

76 Te'pa' o'ch nechemeretolle notaþ: Papa' oterrpetcha' ñeñtepo' ñeñcha' eñorana'tena ñeñt nanac Parets. Tarro'mar þapa' þanomcha' orrtatsa attoch þa'cohuentatyesoñ allcha' oñmos Partsesha'.

77 Ñeñtpa' attoch þoctape'chater acheñenesha' e'ñe cohuen allochña ñetpa' esheccha' aþretnare'tterret po'chñaret attoch a'qushpatare'tterret.

78 Te'pa' çapcha' allempoch Yompor e'ñe puemuereñoçey çapaterrnaycha' ñeñt huetsa entoç ñeñcha'

yoc̄tape'chaterre' e'ñe cohuen, ñeñtña cotapñatserpa' ñeñtcha' ya'puetarsam̄perre'.

79 Attochña a'puetarsam̄psaretterra allohuen acheñenesha' ñeñt̄ checmeto'tsa'yeneta, ñeñt̄ ama eñotenaye Yompor, ñetñapa' aña o'patenahuet rromueñets ñeñtara coñcheñets. Ñeñt̄ atto a'puetarsam̄psaretey ñeñtcha'ña yeñotatene' attoch e'ñe cohuen yocsheñeshocmañen yeychena arr patsro. Arrpa' allohua huañ atto Zacaríaspa' ačhotenan Yompor e'ñe pocsheñeshocmañen.

80 Añña cheshatoll Juanpa' allo'na sen atarretnomtsa. Puecamquẽñoĩpa' atarr ahuamencatetnena. Ñañaapa' alla yechena allapa' amayo tarremphua allempo orrta israe-lena'tarneshesho.

2

*Atto eñalleta Jesús
(Mt. 1.18-25)*

1 Allempopa' añ am̄cha'tarettatse't romo'marnesha' ñeñt̄pa' añ pa'so'cheñ Augusto. Ñañaapa' nenan po'ñoñ ñeñt̄pa' atet oten: Allohuen acheñenesha' errap̄aren añe patsropa' quellcatyesetepa' pa'so'cheñ.

2 Ñehua, allempo ñanom quellcatyeset pa'so'cheñpa', arrña anets Siriapa' añ am̄cha'tarettetsa ñeñt̄pa' añ pa'so'cheñ Cirenio ñeñt̄ pa'm̄cha'tareter pen allohuen judionesha'.

3 Ñehua, allohuenet ahuanerret pa'tañnesha' pa'netsro allochñaapa' allcha' quellcatyerreta' pa'so'cheñ.

4 Ñeñto'marña Josépa' on Nazaretot allara anets Galileo, o'ch ahuo' all pa'netser pe't pa'tañneshañ, ñeñt̄ña anetserpa' añ pa'so'cheñ Beléñ, allara Judeo, tarro'mar Beléño eñalleta ahua't pa'tañ David. Tarro'mar Josépa' Davidna'tarca'ye.

5 Allempoña Josépa' ahuo' epuet María o'ch quellcateneta' pa'so'cheñ. Maríaapa' José o'patenaya ño'ch yore'. Allempoña Maríaapa' ačhomenepa'to'.

6 Allempoña allo'tsa'yenet Beléño, Maríañapa' ahuepa't chen allempoch emare'ten.

7 Alla emare't, ñeñt̄ña pue'maretollpa' asheñorro'toll ñeñt̄ e'ñe po'moter pa'. Epe' po'ño'mopa' alla p̄ana'tolle'ch huacshepahuo allot̄ecma apueñet huaquesh puerrar. Ñehua, tarro'mar alla emare'tos huacshepahuoña' muetsopahuopa' ama esesha' epatso e'ñe poctacma eshepena acheñ ñeñt̄ manrra'tosets all.

Atto Yompor po'millaño'teñerpa' orrtana ñeñt̄ cohuan̄pene' po'carrneror

⁸ Allempo emare'ten María all Beléño ñeñte tsaprocma allampaño'tsen ñaña ñeñt cohuanmpene' po'carrneror pastemo.

⁹ Allñapa' machayotepa'tcha' orrtanet Yompor po'mllañoñeñer, čha poptana'tosanet. Ñeñtpa' Yompor po'cohuenña ñeñt čha a'puetarsam̄psosahuet. Ñetñapa' atarr nanac mecha'trra'tapet.

¹⁰ Mellañoñeññapa' otosanet:

—Amach señcha'tatsetno čhoña se'mñnoten na, o'ch neñotatoses ñeñtcha' atarr socshaterre' sa ama't ñaña allohuen erraparen acheñenesahacop.

¹¹ Te'pa' socop o' eñalleta ñeñtcha' Sa'queshpatañer seperr ñeñtpa' ñeñtcha' Cristotats ñeñt Yepartseshar yepen. Ñeñtña cheshatollpa' arr eñalleta David pa'netsro allara Beléño.

¹² Te'pa' o'ch noterrserr attoch señočh ñeñt cheshatoller. Ñeñtcha' sentos cheshatoll eparet po'ño'mo all panatolle'teñet huacshepahuo, ñeñtca'yeña Yompor Puechemer.

¹³ Allempoñapa' machayotepa'tcha' orrterrerr po'potantañ shonte' mellañoñeñnesha' ñeñt o' sohuačherrerr entof. Ñeñtña mellañoñeñnesha'pa' atarr aye'chočhtatosñañet Yompor.

¹⁴ Ateť otoset:

¡Aye'chočhtaterrapo'ch Yeyomporer ñeñt pue'ntaño'tsen!
Ama't ñaña acheñenesha' ñeñt añe patsro'tsen
cosha'rrtetepa' ñamet ñeñt coshaten Yompor.

¹⁵ Allempoña mellañoñeñnesha'pa' sohuanerret ñeñt cohuanmpene' po'carrneror, ñetñapa' o' ahuanerret pue'ntaño. Allempoña ñeñt cohueñe' po'carrnerorpa' allenta otanna'tyeset:

—Errotenuaca'yeña ñeñt otenya' Yompor. O'ch ahuey Beléño o'ch yenteña' ñeñt atet otenyeta'.

¹⁶ Allempoñapa' poma'yorñecma ahuanmuet, o'ña čhapuet Beléño'pa' all entoset María ñaña José ñaña cheshatoll all panatolle'tena huacshepahuo.

¹⁷⁻¹⁸ Allempo entoset ñetñapa' serrpare'toset ñeñt atet o' otuananeta' mellañoñeñ cheshatollecop. Allohuen ñeñt e'muene'pa' nanac cohuanrroretyeset, otanna'tyeset:

—Ta'm errotenofte'ñaca' o' serrpare'tosña atet.

¹⁹ Maríañapa' e'ñe ñeñta nen pueyočhro e'ñe ñeñta cotape'chen ñeñt allpon o' entua ahuañoñeñ.

²⁰ Allempoña ñeñt cohueñe' po'carrnerorpa' o' ahuanerret. Ateť otenaneta' mellañoñeñnesha'pa' ñetñapa' e'ñe po'ñočh entoset. Allpon ñeñt atet e'muet, ama't ñaña ñeñt atet entet, ñeñto'marña ñetpa' e'ñe pa'ye'chočhtateñeshet ahuanerret, attoña ñetpa' atarr cohuentatnerrñañet Yompor.

Atto anmet cheshatoll Jesús Parets pa'paclo attoch a'pocstateñeta' ñeñt Partsocop

21 Ñehua, allempoña o' posocmata'muen, ñeñt asheñorrofo'ollpa' o' tsorrata'atolle'chet, ñeñt'pa' atet ye'chenaña allohuen judionesha'. Allempo ñeñtña cheshatollpa' o' sochet JESÚS. Ñehua, ñeñt so'chñets ñeñt'pa' atet otenana' mellaño'feñ María ama't ahuañmo'choteñ allempo ama a'chomentena'.

22-24 Allempoña chap allempoch a'poc'atet ñeñt atet nane't Moisés po'ñoñ ñeñt'cha' atet ye'cha' judionesha'. Ñehua, ñeñtña ñoñetspa' atet oten: "Ñerra'm esempoch cheyore'ten coyanesha', ñerra'm asheñorr pue'maretoll ñeñt e'ñe po'moterpa' neñetepa' Partsocop." Ñaña po'poñ Moisés po'ñoñ ñeñt atet ne't, ñeñt'pa' atet oten: "Muetsatenetepa' epña arot amapa' epña yepe'cho'ye' ñeñt'cha' net Yomporecop." Ñeñto'marña allempo chap allempoch a'poc'atet Yomporecop ñeñt atet anaret po'ñoñ, ñeñtña cheshatollpa' allenta anmet Jerusaléno, allcha' a'poc'atet Yomporecop.

25-27 Allempoña chapuet Jerusaléno'pa' o' be'toset Parets pa'paclo attoch a'poc'ateteneta' ñeñt atet ye'chenet ñeñt atet oten ñoñets ñeñt anaret ahuatoteñ. Allñapa' huapa pue'sheñarr yacma añ pa'so'cheñ Simeón ñeñt'pa' jerusaléno'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt acheñerpa' atarr cohuen ñeñt atarr ma'yo'chrenaya ñeñt cohuentetsa Yomporecop. Ñapa' ñeñt atarr cohue'ne' esempoch huapa ñeñt'cha' a'rroyataterre' israelena'tarnesha' allochñapa' o'ch alla atarr cosherret. Atto chapoña Parets Puecamquëñ ñeñtña eñotatene' ñapa' amach rromuena'pa' enterrancha' Yomporecop Puechemer ñeñt Cristo ñeñt'cha' llesenserr esempo.

28 Huapsapa' allenta enatatolle'tosan cheshatoll, atarr aye'cho'chtatosan Yomporecop. Ñeñt'pa' atet otos:

29-30 Te'ña po'ño'ch Nompore ama't'cha' nerromapa' e'ñech nocsheñeshocmañen nerroma tarro'mar te'pa' po'ño'ch o' nenterrna'p ñeñt o' pemñerriy ñeñt'cha' ya'queshp'aterre' e'ñe atet potne't ahuañmo'choteñ na ñeñten atarr pesherbene'.

31 Ñeñtña o' porrtaterrriy allohuenacpay ñeñtey pa'nameney acheñeneshacpay añe patsro.

32 Ñapa' ñach sherberrets atet ñerra'mrrate' puetare' ñeñt'cha' a'puetarsam'perre' allohuen acheñenesha' ama't ñeñt ama israelena'tareyaye attoch ñetpa'cho'ña o'ch eñoteret ñeñt'cha' a'queshp'atañterrtsa e'ñe po'ño'ch.

Allochñapa' attotcha' e'ñe cohuen aye'chochtaternap̄
ñaña peyochreshachno ñeñtara israelena'tarnesha'.

33 Ñeñña pamo'mte' pen cheshatollpa' ñetñapa' atta co-
huana'teñet Simeón atet eñorana'tenanet pue'maretollet.

34 O' eñorana'tuanet pue'maretolletpa' allempoñapa' enam-
atanet ñamet ñocpuet Yompor pa'nateña. Allempoñapa' otoñ
pachor María, ñeñtpa' atet och:

—Peñoche'ch añ cheshatoll ñeñtpa' ñeñña onañche't
ahuat Yompor. Ñocoppa' shonte'ch israelena'tarnesha'
ñeñtcha' ama ame'ñerrayo ñeñtcha' chenquërrtsa. Tarraña
eñall ñaña shonte' po'potantañ ñeñtcha' ame'ñerraya ñeñtcha'
cohueno'tsenterrtsa. Tarro'mar Pomporpa' añecopña mueñer
allochñapa' ñach eñotaterrahuet ñapa' Pomprosho't huapa.
Tarraña shonte'ch acheñ ñeñtcha' achmāre'terre'.

35 Papa' ñeñtcha'ña atarr pellcaterre'ña pa. Atarrcha'
atserr pe'muerr pellquëña e'ñech atet pe'muerr puellquëña
atet ñerra'mrrate' cochllo patenpet peyoçhro. Elloña
puesheña'tetspa' eñotaterranetcha' erro'tente' ñeñt atet
cotape'chyenet pueyoçhreto.

36 Allñapa' allo'tsen ñaña puesheñarr coyanesha' ñeñtpa'
añ pa'so'cheñ Ana ñeñtecma a'mtene' Yompor po'ñoñ. Ñapa'
año' po'señ ñeñt sochetsa Fanuel, ñeñtpa' Aserna'tar.* Ñeñña
Anapa' o' atarr nanac po'nme'ten. Ñehua, allempo shop-
shena'pa' some'ta, e'ñe cançherr charohua yeçhañ epuet
puerrollarpa' o' rromapes.

37 Ñeñña rretornanesha'pa' atta correna ñapue't. O'
poscoch çharra' puechena pa'tats char allponmat correna
atta. Ñapa' e'ñe ellapene't sherbe' Yompor ama't ñaña
tsapome'tets. All Yompor pa'paclo'tpa' amach çha'нено. All
atarr ma'yochenana Yompor. Erro'teno e'ñe poema'yocheño't
Yomporpa' amach rreno ama't coñe'ta.

38 Ñapa'cho'ña allempocma huapa all o' çhapachet
cheshatoll Jesús. Ñaña'pa' ma'yochosa, atarr parasyoso'tenan
Yompor cheshatollecop. Ñeño'marña ñapa' atarr
serrpare'tatosan acheñenesha' ñeñt cheshatollecop tarro'mar
o' huapa ñeñt atarr cohuen allohuen acheñenesha' ñeñtcha'
a'qeshpātose' israelnesha' ñeñt pa'netser pene' Jerusalén.

Allempo alla puerrrerret anetso Nazareto

39 Allempoña o' a'pocstatuet ora allpon ñeñt atet anaret
Yompor po'ñoño ñeñtcha' e'ñe yeçha' judionesha' ñetñapa'
ahuanerret pa'nyeto Nazareto allara Galileo.

* 2:36 Ñeñña Aserpa' Jacob puechemer.

40 Cheshatollñapa' allo'na sen rrorranmats, allo'na sen huomencatnomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'paclo

41 Ñehua, ñeñt cheshachor pamo'mte' ñetpa' atet yeçhenet pate'tets char pascuapopa' çhocmach senet Jerusaléño o'ch coshapreteneta' pascua ñeñt atet yeçhena judionesha'.

42 Allempo çhap Jesús po'charña çharra' puechena epa ahuanerreterr Jerusaléño, ñetpa' atetca'ye yeçhenet.

43 O'ña huañ pascuapa' ñetñapa' o' ahuanerret. Ñeñtña cheshachor Jesúsapa' alla't a'pa Jerusaléño. Pomporña ñaña pachorpa' ama eñoteñeto o'te' alla a'pa.

44 Cha otapuetañ añte' cota'nen po'potantañ ñeñt parro onaçhenet. O'ña chope'cherret pamfarrpa' allempoñapa' o' yerpueret, e'name'tyereta' pamo'tseshesho'mar. E'name'tyereta' allo'tsen ñeñt e'ñe cheme'tyen pompor ñaña pachor.

45 O'ña e'name'tuet ama es enterrayepa' o' alla ahuerret Jerusaléño. Allpa'çho' e'name'tuereterr.

46 Poma'pamtañoñapa' alla entereta' Parets pa'paclo. All anen e'ñe parro maestronesha' ñeñt atarr eñotyene' Yompor po'ñoñ ñeñt atet anaret. Jesúsñapa' all e'ññotyenanet ñeñt atet serrpare'tyenetpa' o'chçho' a'p'to'tyerranet.

47 Ñeñto'marña allohuen ñeñt e'muene'pa' çha atarr cohuanrrorteñet, otyenet:

—Errotenoñuañaca'yeña atarr es eñoten ñeñto'mar atarr cohuen es anapyen.

48 Allempo enter pompor ñaña pachorpa' atta cohuaña'toset. Pachorñapa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'nameneþ?

49 Ñaña'pa' otapanet:

—Eso'mare'tña se'name'tenen. Ama't señotennaña napa' ñeñt poctetsa nocop o'ch netorreññaña ñeñt poctetsa Nom-porecop.

50 Ñetñapa' ama es eñotaye ñeñt atet otanet.

51 Allempoñapa' o' coterran pamo'mte' o' çhaçherret Nazareto, ñapa' e'ñe cohuen ame'ñenana pompor ñaña pachor. Pachorñapa' allohuen ñoñetspa' e'ñe eñotueñ pueyoçhro.

52 Jesúsñapa' allo'na sen rrorranmats atarretnomtsa. Allo'na nanac eñotañetnena. Pomporña Paretsapa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo
(Mt. 3.1-12; Mr. 1.1-8; Jn. 1.19-28)

¹ Ñehua, allempo čhap allempoch añcha'taretta ñaña ñeñt pa'so'cheñ Tiberio all Romo. Allempo čhap o' añcha'taretta čharra' puechena amnar char allempoña Judeopa' añ añcha'tarettatsa ñaña Poncio Pilato. Galileoñapa' añ añcha'tarettatsa Herodes. Pa'mo'nasheña Felipepa' ñapa' epa anetsocop añcha'taretta, ñeñtpa' arr añcha'taretta Iturea ñaña Traconite. Lisanasñapa' arr añcha'taretta Abilinio.

² Ñehua, allempopa' judionesha' añ po'corneshar penet Anás ñaña Caifás, ñeñt po'corneshar pen ora allohuen cornaneshachno. E'ñe ñeñte chararocma añcha'taretetyenet allemeñ anetso'mar e'ñe allempocma Yomporpa' eñorana'tana ñaña Juan ñeñt Zacarías puechemer ñeñt amayo'tsen.

³ Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet o'tyesnomanet:

—Te'pa' o'ch soctape'cherr e'ñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴ Ñeñtpa' añ serrpare'tatosanet attoch etsoterra ñoñets ñeñt anaret ñeñt atet eñose't ahuat Isaías ñeñt a'mtaye't Yompor po'ñoñ. Ñeñt Isaías po'ñoñ ñeñtpa' atet oten:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' o'terranet: “Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pačharretyesoñ pa'teñ.

⁵ All rrapatse'tyen patspa' o'ch e'ñe sa'muepñetyes, all pocmo'yaretyenapa' o'ch e'ñe sa'muepñetuahue, all terepe'parretyenapa' o'ch e'ñe sa'pačharretyes, all arrototyena toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha' ñeñt o' mueñerrnay Yompor ñeñtcha' ya'queshpaterre'.” Arrpa' allohua ñeñt atet aquellcare't ahuatoteñ Cristocop.

⁷ Allempoñapa' shonte' acheñenesha' huačha'tet Juanesho. Ñetpa' tarro'mar huačhenet añ muenenet o'ch apatapanet Juan Yomporecop. Juanña serrpare'tatapanetpa' otapanet:

—Sapa' ama cohuenayayso atarr ashcarñaes, čha sotena ñerra'mrrate' shechpa sompor sepen. Po'ñočca' ama

eseshaye' sotenaye e'ñech sapataretteñoña o'ch sequesh-perra allochñapa' amach coñchatuerrso Yompor allemPOCH yoroçhtatuer tsapatonet.

8 Napa' añcha'ña notapas o'ch sorratyses ñeñt e'ñe cohuenten Yompor ñeñt atet pena ñeñt po'ñoçh o' cotape'cherran ello cohuen Yomporecop. Sapa' çha soteneñ seyoçhro año' es sepallteno sapa' año' e'ñe seyemtena satañ Abraham. Tarraña napa' o'ch notas amach atet soçtape'chatsto tarro'mar ñeñtpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt senten arr o'ch a'pnasereñ Abraham po'mreñeñ.

9 Ñeñto'marña napa' o'ch notas ñerra'm amach soçtape'cherro cohuen Yomporecop o' mameshamña o'ch çhaponasa attoch coñchaterres Yompor. O'ch netma'ntatasa atet ñerra'mrrate' allemPO o'ch a'matamochet tsach. O' e'ñe onañchachet gach allcha' tet e'ñe allohua huañen puepallactar. Ñeñt allohuen tsacheçhno ñeñt ama cohuenaye' me'tetsopa' a'mata'tueretcha' saprrochetcha' all huorten tso' allcha' e'ñe a'poyatatueret.

10 Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poçtetsaña yocop attoch e'ñe yorrtatyses ñeñt cohuentetsa Yomporecop?

11 Ñaña'apa' anapanetpa' otanet:

—Ñerra'm eseshas echene' epma seshtam o'ch saḡ ñeñt ama echenaye ñeñtcha' chorrena. Ñaña ñerra'm eseshas echene' serrar o'ch saḡ ñeñt ama echenaye ñeñtcha' rrenet.

12 Allempoña huaçha'ta ñaña acheñenesha' ñeñt po'taruas pene' atto cobrenan acheñenesha' quelle ñeñt gobiernocop. Ñetpa'çho'ña añecop huenet Juanesho o'ch apatarettet Yomporecop. Ñetpa'çho'ña o' a'p'to'toset Juan, atet otoset:

—Yocop Nomporcha' ¿eso'tña poçtetsa attoch yorrtatyses yaña ñeñt cohuentetsa Yomporecop?

13 Ñaña'apa' anapanetpa' atet otanet:

—Ñeñt allpon quelle ñeñt e'ñe allpona enamuen gobiernopa' e'ñech allpona secobreñña acheñenesha', amachña allo'na atarr aton secobra'neñe acheñenesha' quelle ñeñt e'ñech socpa'na.

14 Allempoña patantarr guardianesha' ñeñt allo'tsa'yenpa' a'p'to'toset ñamet, ñetpa' atet otet:

—Yocoppa'çho'ña ¿eso'tña poçtetsa ñeñtcha' attoch yorrtatyses yaña ñeñt cohuentetsa Yomporecop?

Ñaña anapanetpa' atet otanet:

—Sapa' amach es seprratam̄psatsche acheñenesha' e'ñe se'mueñocma ñaña sa'metam̄peñoñ e'ñe seshquëñoñpa'cho'ña amach es seprratam̄psatsto e'ñe attota. Ñaña ñeññ allpon tsa'tenset gobierneshoñpa' e'ñepa'chña ñeñña cohuen socshena.

¹⁵ Acheñenesha'ñapa' atfa cohueñet, pueyoçhretoñapa' atfa cotape'chyenet cha otenapuetañ Juanpa' ñeññte'ña Cristotets ñeññ cohuenet ahuatoteñ ñeññcha' mueñerranet Yompor.

¹⁶ Juanñapa' atet otanet:

—Napa' ama añeyayno ñeññ Cristotets, tarro'mar napa' ama't napatensoñ Yomporecop e'ñe oñoçhaya napatenes. Tarraña Cristo ñeññcha' huapatsa chenta'pa' ñapa' añcha'ña chorratossa Parets Puecamquëñ ñeññ atet ñerra'm tso'. Ñapa' ñeññ atarr ahuamencatesha', nañapa' ama tama ahuamencateyayno. Ñapa' ñeññña atarr sherbets, nañapa' ama es nesherbena attoch ama't po'sapatreçhapa' o'ch nepyoñ.*

¹⁷ Ñapa' atarr ahuamencat, ñapa' ñach acrerre' allohuen acheñenesha'. Ñapa' añ toma'ntena ñeññ orrene' puehoshnat alloch shoshnan po'trigo o'ch e'ñe pue'llom̄roçhayaña. Ñeññña pue'llomerpa' o'ch a'yapaçhe' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeññña tso'pa' ama emaya'pahuo ama't errponaña.

¹⁸ Juanña allpa' atet serrpare'tatyenanet cohuen ñoñets ñeññ huetsa Yomporehoñ alloch yequeshperra. Ellonetñapa' shonte' pa'namen serrpare'tatan acheñenesha' ñeññ ama pocteye' enteno Yompor.

Allempo apataretta Jesús Yomporecop

(Mt. 3.13-17; Mr. 1.9-11)

¹⁹⁻²² Allempoña o' atarr apataretta shonte' acheñenesha' Yomporecoppa' cho apatarettatsa ñaña Jesús. E'ñe apataretetuatsapa' o' ma'yocha. Allempoña ma'yochenapa' enetñapa' ahuepa't atoraretta. Alotña e'ñe sohua'nma Parets Puecamquëñ e'ñe atet entapet ñerra'mrrate' yeñ o' sohua'nma entoñ. E'ñe arr chap Jesúsesho. Cha e'morrtatsa ñoñets entoñ atet eñorena Yompor. Ñeññña ñoñetspa' atet oten:

—Papa' ñeññep Nechemerep ñeññep atarr nemorrentena, pa atarr nanac nocshatene'.

Allempoña añcha'taret Herodespa' o' yottam̄psatan Juan tarro'mar Juanpa' eñotach ama pocteye' enteñe ñeññ atet patse'tyena. Ama't pa'mo'nasheñ Felipe puetaporpa' o'

* **3:16** Ñeññ atet po'taruas pe't ahuat esclavos o'ch pueyan pamo'mte' po'sapatreçh.

yoramper. Ama't shonte' pa'namen ñeñt atet p̄atse'tyena Herodespa' elloñapa' o'cho' yottam̄psaterranerr ñaña Juan.

Arrpa' all aquellcaret allohuen pa'so'chñečno ñeñt pa'tañneshañ pen Jesús

(Mt. 1.1-17)

²³ Ñehua, Jesúsapa' allempo orrta o' torra'mochana ñeñt po'taruas pen Pomporecop, allempoña po'charñapa' ñato' o'te' chap ma'poch charra' char. Acheñenesha'ñapa' aña pompor p̄ateñet ñeñt José. Ñehua, Josépa' Elí puechemer,

²⁴ Elípa' Matat puechemer, Matatpa' Leví puechemer, Levípa' Melqui puechemer, Melquipa' Jana puechemer, Janapa' José puechemer,

²⁵ Josépa' Matatías puechemer, Matatíaspa' Amós puechemer, Amósapa' Nahum puechemer, Nahumpa' Esli puechemer, Esliapa' Nagai puechemer,

²⁶ Nagaipa' Maat puechemer, Maatpa' Matatías puechemer, Matatíasapa' Semei puechemer, Semeipa' José puechemer, Josépa' Judá puechemer.

²⁷ Judápa' Joana puechemer, Joanapa' Resa puechemer, Resapa' Zorobabel puechemer, Zorobabelpa' Salatiel puechemer, Salatielpa' Neri puechemer,

²⁸ Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodampa' Er puechemer,

²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer,

³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer,

³¹ Eliaquimpa' Melea puechemer, Meleapa' Mainán puechemer, Mainánpa' Matata puechemer, Matatapa' Natán puechemer,

³² Natánpa' David puechemer, Davidpa' Isaí puechemer, Isaípa' Obed puechemer, Obedpa' Booz puechemer, Boozpa' Salmón puechemer, Salmónpa' Naasón puechemer,

³³ Naasónpa' Aminadab puechemer, Aminadabpa' Aram puechemer, Arampa' Esrom puechemer, Esrompa' Fares puechemer, Farespa' Judá puechemer,

³⁴ Judápa' Jacob puechemer, Jacobpa' Isaac puechemer, Isaacpa' Abraham puechemer, Abrahampa' Taré puechemer, Tarépa' Nacor puechemer,

³⁵ Nacorpa' Serug puechemer, Serugpa' Ragau puechemer, Ragaupa' Peleg puechemer, Pelegpa' Heber puechemer, Heberpa' Sala puechemer,

36 Salapa' Cainán puechemer, Cainánpa' Arfaxad puechemer, Arfaxadpa' Sem puechemer, Sempa' Noé puechemer, Noépa' Lamec puechemer,

37 Lamecpa' Matusalén puechemer, Matusalénpa' Enoc puechemer, Enocpa' Jared puechemer, Jaredpa' Mahalaleel puechemer, Mahalaleelpa' Cainán puechemer,

38 Cainánpa' Enós puechemer, Enós pa' Set puechemer, Setpa' Adán puechemer, Adánpa' Yompór puechemer.

4

Allempo oneñētpa' topatenan Jesús, mueneñ o'ch atet p̄atan Jesús ñeñt ama pocteye' enteno Yompór

(Mt. 4.1-11; Mr. 1.12-13)

1 Allempoña Jesús pa' o' err Jordanasot. Ñaña pa' añ e'ñe chorrenaya Parets Puecamquēñ ñeñtña anmue'ña all amayo.

2 Attoña allpa' o' huapoña oneñē, mueneñ o'ch atet p̄atyes ñeñt ama pocteye' enteno Pompor. Allña pa' ama rreno e'ñe añ torrena attoch etsotuan ora allohuen ñeñt cohuentetsa Pomporecop. Ñeñto'marña ama't o' pa'tatsoch çharramatpa' ama't coñe'tapa' ama es rreno. O'ña pa'tatsoch çharramatuapa' cho cheporratsa.

3 Allempoña oneñē atto topatosan Jesús pa' atet otos:

—Pa ñerra'm po'ñoçhte' Parets Puechemerep̄pa' o'ch p̄ot: Añ mapue' puenasepa' pan.

4 Jesúsña pa' atet otaḗ:

—Napa' ama nemno o'ch atet neḗa tarro'mar Yompór po'ñoñ ñeñt anuaret ahuatoteñ ñeñt pa' atet oteneý: “Allohueneý acheñenes hohueneý pa' ama e'ñe rreñtsa ñapueḗ yocrrañ yepeno. Añe'ñaña yocrrañ yepen yecamquēñecop ñeñt allohuen allpon oteneý Yompór.”

5 Allempoña oneñētpa' o' aneñ all atarr aspeno e'ñe a'noso. Alotña gatyuesuererr allohuen ñeñt allpon all añcha'taretetyena pa'namen acheñenesha' ñeñt yeçha'yetsa errap̄aren añe patsro. Alotña ama't mamesha cohuospa' e'ñe orre'tuena erracmañen.

6-7 Oneñētña pa' alla oterranerr Jesús:

—Ora allohuen ñeñt o' pentyesua ñeñt pa' e'ñe nocma tarro'mar ñeñt pa' na aparet. Ñerra'm esesha' nemnen o'ch naḗpa' napa' naḗcha'ca'ye. Ñeñto'mar te'pa' o'ch no-taḗ, ñerra'm na pema'yocheñoḗen o'ch peconcorpana'tna, napa' napaḗcha' ora all añcha'taretetyenet all atarr cohuentatyēnet, e'ñe ora allohuen ñeñt pa' e'ñech p̄ocma.

8 Jesúsña pa' alla otererr:

—Te'pa' o'ch orrerreḗ oneñēte. Napa' ama nemno o'ch atet neḗa tarro'mar Yompór po'ñoñ ñeñt anuaret ñeñt pa'

atet oteney: “Añach ñapueť yema’yochena Yeyomporer ñeñť Yepartseshar yepen, e’ñech ñapťa yesherbe’.”

⁹ Allempoña oneñeťpa’ o’ anerranerr Jesús Jerusaléño. Allñapa’ a’tapatos nanac eno allohuanen Parets pa’paquell. Allñapa’ otuererr:

—Papa’ ñerra’m po’ñochte’ Parets Puechemerep te’pa’ pómacha arroť tarro’mar amach pa’tserrpo

¹⁰ tarro’mar Parets po’ñoñ ñeñť anuaret ñeñťpa’ ama’tña atet oten:

Yomporpa’ o’ch mueñonap po’mllañoťeñrenesha’ ñeñťcha’ pecuampsapue’.

¹¹ Ñetcha’ pagapapuet o’ch enatapapet attoch amach pa’tserrpatca’toso mapyo.

¹² Allempoña Jesúsapa’ alla otererr:

—Añpa’cho’ña anuaret Yompor po’ñoño, ñeñťpa’ atet oten: “Amach ya’llocchame’tatsche Yeyomporer ñeñť Yepartseshar yepen.”

¹³ Allempoña oneñeť topatuahuan Jesús pa’namenotpa’ o’ ahuerr o’ cačpa’ner allponmat tarro’mar oneñeť chocma topach.

Allempo e’ñe ñenmať torrena Jesús Partsocop all Galileo (Mt. 4.12-17; Mr. 1.14-15)

¹⁴ Allempoña Jesúsapa’ o’ alla ahuerr Galileo. Ñapa’ añ atarr ahuamencat pene’ Parets Puecamquëñ. Erraparen Galileo’mar o’ e’ñe e’mare’tuet ñeñť atet pa’yena Jesús.

¹⁵ All apcha’yena judionesha’ po’prahuetopa’ ñañapa’ all yechatyenamet. Attoña allohuen acheñenesha’pa’ atarr cohuen enteñet.

Allempo serrpare’tatan Jesús acheñenesha’ all Nazareto (Mt. 13.53-58; Mr. 6.1-6)

¹⁶ Atteñapa’ o’ alla cherr Nazareto all yečache’t pompor allempo cheshena’. Pamtarrña allempo čhap yet allempo chocma amesen judionesha’, Jesúsñapa’ o’ ahuo’ judionesha’ po’prahuo, ñapa’cho’ atet yečhena. O’ čhap puerahuopa’ allñapa’ tomos allcha’ lleyatan acheñenesha’ Yompor po’ñoñ.

¹⁷ Allñapa’ añ apet libro ñeñť allo’tsen Isaías po’ñoñ ñeñť a’mıtaye’t Yompor po’ñoñ ahuat. Ñañapa’ toran libropa’ all entan ñoñets ñeñť atet aquellcareť ñocop, ñeñťñapa’ atet oten:

¹⁸ Napa’ añ nechorrenaya Nompor Puecamquëñ tarro’mar ña nellsense’ nach serrpare’taterre’ ora allohuen acheñenesha’ ñeñť atarr es palltetsa. Napa’ añcha’ neñotaterranet cohuen ñoñets ñeñťpa’ alloch qeshperret. Ñaña añecopña llesenserren attoch nach a’crratyerre’ allohuen ñeñť mueročhetyetsa

puellquëñof pueyoçhreto. Nach eñotaterre' ñaña ñeñt ayottam̄psaretetyetsa allochñapa' o'ch atoram̄psaretterret. Nach eñotaterre' ñaña ñeñt ama entetso allochñapa' o'ch enterret. Ñaña ñeñt amuerochtataretetyetsa nachña a'rroyataterrahuet.

¹⁹Ñaña napa' añecopña llesenserren nach eñotaterrahuet te'pa' o' chap allempo pocte' enteñ Yompor o'ch atarr ortaterranet puemuereña. Ñehua, arrpa' allohua ñeñt allpon lleyatanet Isaías po'ñoñ.

²⁰O' lleyatuanetpa' o' alla e'tam̄perran libro apuerran ñeñt sherbets all puerahuo. Allempoñapa' o' alla anorruerr. Allohuenña acheñenesha' ñeñt puerahuo'tsa'yen ñetñapa' atarr cohuanrrortetiet Jesús.

²¹Ñañaapa' atet otanet:

—Atto' o' se'mhua añ ñoñetspa' te'ñapa' o' e'ñe çherr attoch e'ñe etsoterra ñeñt atet aquellcaret ahuatoteñ.

²²Allohuenña acheñenesha'pa' e'ñe cohuen eñora'yenet Jesúsocop. Atarr coçhnesha' enteññañet po'ñoñ ñeñt atet serrpare'tatyenanet. Ñetñapa' atet otanna'tyenet:

—Errotenotuañaca'yeña atarr coçhnesha' serpare'tatyeny. Ñapa' añaca'ye José puechemer.

²³Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' cha semneñ o'ch soten añ ñoñets ñeñtecma muene' yotannena ama't ahuatoteñ: “Pa ñeñteþ a'crratañtetsa te'pa' o'ch þa'crrata e'ñe þañeña”, tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴Tarraña napa' po'ñoçh o'ch notas:

—Ñeñt a'ñtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto.

²⁵⁻²⁶Napa' po'ñoçh te'pa' añcha' neyerpatasa ñeñt atet pe't Elías ñeñt a'ñtaye't Yompor po'ñoñ ahuat. Ñehua, allempopa' o' ma'pa char ñaña po'poñ puehmet charpa' nanac chares ama't mameshapa' ama huateno ñeñto'marña orrta muecheñets erracmañen all anetso ñeñt Israel all yeche't Elías. Ñaña ama't shonteñ israelena'tar ñeñt rretorrnaneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretorrnanesha' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretorrnanesha', ñañaapa' ñeñta yenpos.

27 Elloña o'ch alla neyerpaterrser po'poñ ñeñt atet pe't ñaña Eliseo, ñapa'cho'ña ñeñt a'mtaye't Yompor po'ñoñ ahuat. Ñehua, allempopa' shonte' israelena'tarnesha' ñeñt osyen puetsarñats ñeñt otenet lepra all anetso Israel all yeche't Eliseo. Tarraña ama't atteñ ama't puesheñarrofapa' ama a'crratereña Eliseo e'ñe all Israelo. Ñapa' aña a'crraterr ñeñt po'poñena'tar acheñ ñeñtpa' añ pa'so'cheñ Naamán ñeñtpa' po'poñ anetso'marnesha'; ñeñt pa'netser penpa' añ pa'so'cheñ Siria.

28 Acheñenesha'ña allempo e'met ñeñt atet yerpatanet Jesús pa' ñeñtña atarr atsrre'matahuet allohuenet ñeñt puerahuo'tsa'yen.

29 Ñetña tantrra'tetpa' o' muevo'teret allot pa'netsretot. Cheta'neret, allotpa' arr anmet allohua huañen pocoll allot e'ñe atserettena allcha' huapore'chet attoch muetsatachet.

30 Tarraña ama't huapore'chetañ, Jesúsña' o' chope'chnerr ama't all shontena acheñenesha'. Ñaña pa' all cheta'tnerra rro'chopa' o' ahuerr.

Allempo Jesús pa' entap' puesheñarr yacma ñeñt chorrena oneñet
(Mr. 1.21-28)

31 Allempoña' o' alla ahuerrerr anetso Capernaumo al-lara Galilea. Pamtarrña allempo chap yetñats allempo amesen judionesha' ñaña pa' o' ahuo' po'prahueto. Allña pa' ye'chatyesosan acheñenesha'.

32 Ñeñt atet ye'chatenanet, acheñenesha'ña pa' atta cohuan-rrorteñet. Tarro'mar ñapa' atet ye'chatenanet ñerra'mrrate' ñeñt allsensarettetsa Partseshot.

33 Puesheñarrña yacma ñeñt allo'tsen puerahuo, ñeñtña pa' añ chorrenaya oneñet. Ñaña rranare'tapa' atet otapan Jesús:

34 —¿Eso'mare'tcha'ña erro't pe'posey Jesús, pa' ñeñte'p nazareto'marnesha'p? Añecop'te' pehuapa o'ch pa'chencaterrey. Napa' o' neñotapa'p. Papa' atarr Partso'p añ pellsensene' Pompor ñeñt atarr nanac Parets.

35 Tarraña Jesús pa' ama muenache o'ch eñorana'cha. Ñaña pa' atet och:

—Pemma, te'pa' cho'paña ca'chpa'nerre'ña añ acheñer.

Oneñetña pa' cha atanman yacmapa' alla o'shshe'ma e'ñe all shontena allohuen acheñenesha'. Allempoña' o' ca'chpa'ner e'ñe atta, ama erro't pa'nme.

36 Acheñenesha'ña pa' cha atarr toratspanet pueyo'chret. Ñetña pa' atet otanna'tyeset:

—Ta'mca'ye, erro'tente'ca'yeña Jesús po'ñoñ, atarropa't huomenc po'ñoñ pen. E'ñe atet ñerra'mrrate' ñeñt

allsensarettetsa ñeñt atarr ahuamencaŕesha'. Ama't oneñeť erroť otenpa' atetĉho' p'ateñ. Po'ñoĉhca'ye te'pa' o' ĉha'nerr oneñeť.

³⁷ Allempoña' erracmañen allampaño'mar serrpare'tyeset ñeñt atet pena Jesús.

Allempo a'crratosan Jesús Simón Pedro pa'so'mue

(Mt. 8.14-15; Mr. 1.29-31)

³⁸ Allempoña Jesús'pa' ĉha'nerr puerahuot o' ahuo' ñaña Simón pa'paclo. Allña Simón pa'so'muepa' ĉha atсна'ten, ĉha atarr nanac hueraten. Otapet Jesús:

—Te' yapa' yemneñ o'ĉ pa'crratos atsnañeť.

³⁹ Allempoña Jesús'pa' o' ponmosana atsnañeťpa' ĉha a'huañañpsose'ña po'urateña. Allempoña o' metua po'urateña'pa' allenta tanta o' agapapanet e'ñe cohuen o' yema'tapanet.

Allempo Jesús'pa' a'crraterran shonte' pa'namen atsnañeťeĉhno

(Mt. 8.16-17; Mr. 1.32-34)

⁴⁰ Ñeñte yetrocma allempo o' emuena atsne'pa' acheñenesha'ña allohuenet ñeñt atsna'tyets pamo'tsesha' ñetña'pa' o' huapatyesnenet atsnañeť e'ñe Jesúsesho. Ñaña'pa' na'yesapanet pot ñesheto puesheña'ttset, attoña a'crratyesapanet allohuenet.

⁴¹ Ñaña shonte' acheñenesha' caĉhpatatyesapanet oneñeť ñeñt puerranarot otnomue' Jesús:

—Papa' ñeñteĉ e'ñe po'ñoĉ Parets Puechemereĉ.

Tarraña Jesús'pa' a'mtsoñeñtanet, ama muenataneto o'ĉ eñorana'tnomet, tarro'mar ñetpa' e'ñe eñotnomet ñapa' ñeñt Cristotets.

Allempo Jesús'pa' serrpare'tatyesnoman acheñenesha' erraparen Galileo'mar

(Mr. 1.35-39)

⁴² Tsapa'tña o' puetarenpa' Jesúsña'pa' ahua'muen a'yo all ama acheñempaño'yaye. Acheñenesha'ña'pa' e'name'ta'mueñet. Atteña'pa' o' ĉhapa'muenet allo'tsen Jesús. Ñetña'pa' ama mueneñeto o'ĉ erra sa'nmanet.

⁴³ Ñaña'pa' atet otapanet:

—Napa' añ poctetsa nocop o'ĉ ahuen po'poñ anetso'mar, allpa'ĉho'ña o'ĉ neserrpare'tatyesnomanet ñeñt cohuen ñoñets, o'ĉ neñotatyesosonet Yompor po'cohuenña ñeñt attoĉ ayochreshattena ña, tarro'mar napa' ñeñtecopña llesenserren Nompor.

⁴⁴ Atteña'pa' o' serrpare'tatyesnoman acheñenesha' erraparen Galileo'mar all apĉha'yenet po'prahueto.

5

Atto Jesús rromatosanet shonte' cac
(Mt. 4.18-22; Mr. 1.16-20)

¹ Allempoña po'pocheño Jesúsñapa' e'ñe sa'patopño ten, ñeñña sa'ppa' añ pa'so'cheñ Genesaretas. Allñapa' hua'cha'toña shonte' acheñenesha' o' cha echta'tatse'tanna'toset. Attoña ama't Jesús'pa' o'cha echta'toset. Ñetpa' añ muenenet o'ch e'mñnotosñañet Yompor po'ñoñ.

² Jesúsñapa' all entosan epna noñ e'ñe all sohua'puetso. Ñeñña po'taruas pene' ñeñ rremuene' cacpa' ñetñapa' ama po'noñto'tsa'yeneto. Ñetpa' o' ahuanmuet a'yenet allcha'tsama'teneta' po'terraya.

³ Jesúsña allpa' a'tapos puenarr noñto, ñeñ Simón po'noñt. A'tapospa' otan Simón:

—Pechtamñpsen mame' rro'cha'sonet.

Jesúsña anorros noñtopa' allotña ye'chatosan allohuen acheñenesha'.

⁴ Allempoña serrpare'tatuanet, o' alla o'terranerr Simón:

—Te'pa' o'ch ahuep rro'cha'sonet epopa' o'ch alla peterrayerrerr, te'pa' perrma'ch shonte' cac.

⁵ Simónñapa' atet och:

—Yapa' o' Maestrocha' e'ñe yarepen torratsa terrayats e'ñe orrena ama't parra cac ama yermueñe. Te'ña paca' notene' o'ch alla neterrayerrerr ama'tpa' atetcha' ne'pa' o'ch alla neterrayerrerr.

⁶ Allempoñapa' atetcho' pet, o' alla terrayerreterr. Terrayañapa' shonte' rroman cac nanac aton, cha muene' rrarre'tatan terraya.

⁷ Atteñapa' agochet po'potantañ pamo'tset ñeñ po'noñto'tsa'yen o'ch huapuet ñeñcha' rromapretahuet cac. O'ña chapuet o' esha'tanatet cac noñto e'ñe epno'mar chorrars cac noñto, cha muene' esha'tatan noñt.

⁸ Allempoña atet eñch Simón Pedro ñañapa' poma'yorñecma ponmana Jesús, concorposa pa'rrpōt, all otos:

—Amach Partseshacha' allo'na peyemtatsenneno tarro'mar napa' ñeñten atarr ochñañen.

⁹ Atet otan Jesús pueyorño' tarro'mar eñoteñ ñeñ atto rreman shonte' cacpa' Parets atet patene'. Ama't allohuen ñaña ñeñ epuet taruasenetpa' atarr nanac yorenet.

¹⁰ Ama't ñaña Jacobo ñaña Juan ñeñ Zebedeo puechemersha' ñeñ parro taruasen Simón, atarr nanac yorenet. Allempoña Jesús'pa' atet o'terranerr Simón:

—Amach čha peyorenatsto. Ñeñt atet pepena ahuatoteñ e'ne' cac te'ñapa' atetcha' peperra e'nerre' ñaña acheñ ñeñtcha' pame'ñaterra.

¹¹ Allempoñapa' ahuañperret o'ch etsotuerret allecma et-sotenet. Ñetñapa' allempocma sohuanmuet allohuen ñeñt allpon echyenet. Allempoñapa' coteret Jesús attoch puey-ochresha' perranet.

Atto Jesús a'crraterran puešeñarr yacma ñeñt aptsarñat
(Mt. 8.1-4; Mr. 1.40-45)

¹² Allempo po'pocheño Jesúsñapa' alla čherrerr po'poñ anetso. Allñapa' huapoña puešeñarr yacma ñeñt osen puet-sarñats ñeñt otenet lepra, atarr apočtateñ. Entosan Jesúsapa' alla rromañposya. Allña rromuenapa' allotña enamosan Jesús, atet otos:

—Ayochreshate ñerra'm pa muenatspa' pa ñeñtep atarr ahuañencatesha' pa'crrataye'cherren allochñapa' attoch e'ñe cohuen entuerren acheñenesha'.

¹³ Jesúsña anretapa' allenta a'p'le', atet och:

—Napa' nemneñca'ye, metuerrepa'ña peptsarña attoch e'ñe cohuen enterrep allohuen acheñenesha'.

Yacmañapa' allorocma metuer pueptsarña.

¹⁴ Jesúsñapa' alla otererr:

—Te' atto o' na'crraterrep'pa' ama't e'ñe puešeñarrapa' amach p'otapsa'tatsche. Corneshachña pegatena' all pept-sarse't. Ate't nane't Moisés ñoñets añ acheñrecop ñeñtcha' a'crrataretterrtsapa' te'ñapa' o'ch es panom ñeñtcha' p'apos all ñeñt Yomporecop. Allochñapa' attoch e'ñe cohuen enterrep allohuen acheñenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñto'marña shonte' acheñenesha' huacha'toñet attoch e'ññoñet po'ñoñ ñaña attoch a'crratyesapanet allohuen pa'tsnañeferet.

¹⁶ Tarraña ñapa' errotenopa' o'ch ahuer a'yo all ama acheñempaño'yaye allcha' ma'yochena.

Atto Jesús a'crraterran ñaña ñeñt echarraña
(Mt. 9.1-8; Mr. 2.1-12)

¹⁷ Po'pocheño allempo Jesúsapa' all yečhaterranerr shonte' acheñenesha', allña allpononetpa' all anorrcha'tyen ñaña patantarr fariseonesha' ñaña ñeñt atarr etsotayenayeñ ñoñets ñeñt atet anaret judioneshacop. Ñetpa' pa'namen anetsot huacha'tyenet—Galileot ñaña Judeot ñaña Jerusaléño't. Jesúsñapa' atarr ahuañencat peñ Pompor, attoña a'crratyesan shonte' ñeñt atsna'tyets.

18 Atteña o' huapatoñet ñaña echarraña, huapatañpset puehecnaṗot. Ñetpa' añ muenenetañ o'ch be'toset o'ch e'ñe noset Jesúsesho.

19 Tarraña shonte' acheñenesha' ñeñto'marña ama esh-caye' abe'tosetona atснаñet attoch chapachet e'ñe Jesúsesho. Atteñapa' a'tapatoset enoṗ pocollato. Allñapa' o' a'rrote'toset pateṗrarr echet alloña a'suatañpset echarraña puehec-nape'na. Attoña chapachet e'ñe rrocho allo'tsen Jesús.

20 Jesúsñapa' eñotapanet ñetpa' atarr nanac yemteñet, ñeñto'marña atet otapan echarraña:

—Masheñcha' te'ña ṗa ṗo'chñarpa' o' aṗretna'huareta.

21 Otue' atetpa' añña fariseonesha' ñaña ñeñt atarr etsotayenayenñ ñoñets ñeñt atet anaret judioneshacop, ñetñapa' otatse'tet ñañeñeta:

—Esesha'huañaca'ye o' achmāre'tañña Yompor. Arr pat-sropa' ama't puesheñarra ama eñalleña ñeñt peretnene' ochñarets, ñaṗña Yompor peretnene' ochñarets.

22 Jesúsñapa' eñotanet ñeñt atet otenet ñocop, ñañapa' atet otanet:

—Sapa' eso'mare'tcha'ña atet soctape'chatse'tyesña seyoçhro.

23 Ñehua, sapa' çha soten ñeñt atet o' notue echarraña po'chñarpa' o' aṗretna'huareta, ñeñtpa' ama torrapahuoyaye. Sapa' añña atarr torrapo' senten attoch na'crrater çoncha'ña ote': "Petantena, pechope'chnen."

24 Ñehua, napa' o'ch neñotatas na Ñeñten Acheñetosets, napa' apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

—Te'ña napa' o'ch notaṗ: Petantena, peçhta'nen pemue' o'ch pechope'chnen, ahuenep pepaclo.

25 E'ñe otue' atetpa' echarrañañapa' çha tantetsa e'ñe allorocma. Allohuenña acheñenesha' e'ñe entueñet. O' çeta'nenan po'mue' pa'ye'choçtateñesha' Yompor o' ahuen pa'paclo.

26 Allohuenña acheñenesha'pa' çha atarr cohuanrror-tapueñet. Attoña ñetpa'çho'ña atarr cohuentatyeññañet Yompor. Allohuenetñapa' atarr nanac yorennet, atet otyenet:

—Te'pa' o' yenterr ñeñt ama't ahuaṗapa' ama yentareña ya ñeñt atarr cohuen.

Allempo Jesúsapa' hua'ña'nman Leví attoch pueyochresha' per

(Mt. 9.9-13; Mr. 2.13-17)

27 Allempoñapa' o' ahuererr Jesús. All oñempa' all entnoman puesheñarr ñeñt po'taruas pene' o'ch cobrenan acheñenesha' quelle ñeñt gobiernocop. Ñeñtñapa' añ

pa'so'cheñ Leví*. Alla anen allecma apchenet quelle ñeñt gobiernocop. Jesúsñapa' otosan Leví:

—Te'pa' p̄octa'n attoch neyochresha' neperreḡ.

28 E'ñe otue' atet Levíñapa' čha tantnomtsa o' coťan Jesús. Attoña ñapa' e'ñe sohuanman ñeñt allohuen pa'namen.

29 Allempoñapa' čhapa'muen ñaña pamtarr allempo Leví pa'paclopa' yečcatatan shonte' rreñets attoch coshame'tam̄pesyet Jesús. All rrallme'chapreteñ shonte' acheñenesha'. Allo'tsa'yen ñaña ñeñt parro yemtena Leví. Ñetpa'cho'ña ñeñtareta ñeñt po'taruas penet o'ch cobra'yēnet acheñenesha' quelle ñeñt gobiernocop, tarraña ñetpa' puehquēñoťe'na cobreñet acheñenesha' aton. Ñeñt rrallme'chapretene' Jesús.

30 Fariseonesha' ñaña ñeñt atarr etsotayenayeñ ñoñets ñeñt atet anaret, ñetñapa' sasare'teññañet Jesús pueyochresha'. Atteñapa' otaretet:

—Ta'm, eso'marte'ña serrallme'chapreteña añ acheñeneshar ñeñt puehquēñoťe'na cobra'yene' acheñenesha' aton quelle ñaña epas acheñenesha' ñeñt atarr ochñañeneshačhno.

31 Atet e'manet Jesús, ñañañapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñapa' čhocma añ e'nenet ñeñtcha' a'crraterrahuet.

32 Napa' ama añecpaye' nohuapo attoch nečhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch nečhore'tos ñeñt atarr ochñañ entyetsa. Allochñapa' attoch o'ch coťape'cherret ello e'ñe cohuen Yomporecop.

Allempo Jesúsapa' eñotatanet atetcha' tore'tet Yomporecop ñeñt e'ñe po'ñočh sherbets

(Mt. 9.14-17; Mr. 2.18-22)

33 Ñetñapa' alla otereterr Jesús:

—Ñeñt Juan pueyochresha'pa' čhocma tore'tenet Yomporecop,† čhocma ma'yochenet. Ñaña fariseonesha' pueyochresha'pa'cho'ña attecma penet. Tarraña paña peyochresha'pa' eso'mare'tña ama atteye' peneto. Ñetpa' atta es rratse'tyenet, atta es orryenet.

34 Jesúsñapa' alla toma'ntaterraneterrpa' atet otanet:

—Ñeñt ahua'ñareťečhno all rrallme'chapreteñet ñeñt e'ñe errete' sena'tetsa, ama pocteyaye o'ch yotanet “amach es

* 5:27 Levípa' ñeñtara ñeñt sochenet Mateo. † 5:33 Añ tore'teñetspa' añecop o'ch yetorra Yomporecop. Amach añecpayaye atomat, ñeñtapa' añecpa mameshacop o'ch yequečhpa'yerrar.

serra'yestatsto", tarro'mar ñeñt'pa' atet coshapreteñet ñeñt' sena'tetsa.

³⁵ Tarraña ñerra'm esempo machayota sa'nerranet ñeñt' sena'tetsa, ñeñt'ña parro yemuetyena allempoña ñet'pa' e'ñe puellquëño'tet cächpa'huerretcha' puerrar, amach arrenaye' enterreto. Ñeñt'pa' attochña to're'terret allempo Yomporecop e'ñe po'ño'ch. Arrpa' allohua huañ ñeñt' atet Jesús toma'ntata ña sena'totsa.

³⁶ Elloñapa' o' alla toma'ntaterraneterr ñeñt' atet ye'chen judionesha' arr patsro ñeñt'o'marña atet otanet:

—Ñehua, ñerra'm ye'chen epma yeshtam, paterr emarr ñaña po'poñ mellashañpa' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet ye'patsechpa' ñeñt'pa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohuenterro tarro'mar ñeñt' allo o' yellterpa' ama mellashañecmayaye, ñeñt'o'marña amach ñeñt'atere.

Ñeñt'pa' attoña Jesús'pa' eñotatanet ña po'çapña e'ñe etserra.

³⁷ Jesús'ña'p' alla toma'ntaterraneterr po'poñ ñeñt' atet ye'chena judionesha' o'ch ye'chcatenet pa'rrom orrot. Ñeñt'o'marña atet otanet:

—Ama't puesheñarro'teyapa' amach yeshtatstoña vinos emasa mellasha'mañ orroto ñeñt' aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' çhach a'ptsan orrot, vinos'ña'p' e'ñech shebhua, ñeñt'ña orrot'pa' ama't mamesha'pa' amach es sherberro.

³⁸ Añña ñerra'm emasa vinos, arrcha'ña yeshe' emerra orroto ñeñt' aye'chcataret pa'rrom. Alloch'ña'p' ama'tcha' chasa' vinospa' amach çha potsa'p'soña vinos ñeñt'pa' allach ye'chen epo'mar.

Ñeñt'pa'çho'ña attoña Jesús'pa' eñotatanet ña po'çapña e'ñe etserra.

³⁹ Po'poñone'tpa' alla toma'ntaterraneterr Jesús, ñeñt'pa' atet otarraneterr:

—Ñeñt' e'ñe ye'chenaya o'ch orran co'nes ñeñt' atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñt' atet ye'chena ahuatoteñpa' ñeñt' e'ñe cohuen enten.

6

Allempo Jesús pueyochresha' taso'tañpesyesnomuet trigo añe yetro allempocma amesen judionesha'
(Mt. 12.1-8; Mr. 2.23-28)

1 Allempoña çherrerr allempo çhocma amesen judionesha'. Allempoña Jesúsapa' arr oñem chetso'mar epuet pueyochreshačhno. Allempo oñenet chetso'mar pueyochresha'ñapa' taso'tam̄pesyesnomuet puechm̄ña'tets trigo a'she'challme'chyeshomet attoť rrocllome'chachet o' rra'yeshomet.

2 Ñeñña patanta'tets fariseonesha'pa' che'ptare'tanet, atet otarettet:

—Eso'mare'tña atet sepena ñeññ ama pocteyaye o'ch atet yeŷa tarro'mar te'pa' añe yetro ñeññ atet anaret ahuatoteñ allempocmach yamesen.

3 Jesúsñapa' otanet:

—Sapa' ama'trra selleyareña añ ñoñets all oten ñeññ atet Ʒa ahuat David allempo cheporra'nma epuet ñaña allohuen ñeññ coťene'.

4 Ña allempopa' be'tosos Yompor pa'paclo, allñapa' chetosan pan ñeññ atma'ntataret atet ñerra'mrrate' ñeññ nenet all Partsocop. Ñehua, ñeññ panpa' ama pocteyayñe o'ch esesha' rre'. Ñeññpa' añach ñapueť rrene' cornaneshachno; ñeññpa' e'ñe atet anuaret judioneshacop. Ñeñña panpa' o' chetos David, rros, rratosan ñaña allohuen ñeññ epuet.

5 Allempoña alla oterraneterr Jesús, ñeññpa' atet otanet:

—Ñeñño'marña te'pa' o'ch notas, na Ñeññen Acheñetosets ñeññen allsensareten, naca'ye atet otets este' poctetsaña ñeññcha' atet yeŷa añe yetro allempocma yamesen.

*Allempo Jesúsapa' a'crraterran ñeññ chelletsa pot
(Mt. 12.9-14; Mr. 3.1-6)*

6 Allempoñapa' çherrerr po'pocheño ñeññ yetñatsro allempocma amesenet. Jesúsñapa' be'tosuenerr judionesha' po'prahuo. Allñapa' yečhatyesuenanerr acheñenesha'. Allñapa' allo'tsen ñaña puesheñarr yacma ñeññ čha chellena pot po'cohuenrot.

7 Acheñenesha'ña ñeññ atarr etsotayenayeñ ñoñets ñeññ atet anaret epuet ñaña fariseonesha' ñetña allpa' Jesúsapa' atarr cohuana'tyenet attoch enteñeterr ñato'rraña o'ch a'crratenanerr acheñ añe yetro allempocma amesenet. Ñerra'm o'ch a'crratenanerr ama't puesheñarra acheñ añe yetro allempo amesenet, allempoñapa' eshecča' a'metam̄peñeta' añcha'tareťesho.

8 Jesúsñapa' eñotanet ñeññ atet cotape'chatse'tyenet pueyochreto. Ñañaapa' atet otan yacma ñeññ chelletsa pot:

—AƷon Ʒaťomos arma.

Yacmaña huapapa' o' tomos all rročo.

9 Jesúsñapa' atet otanet:

—Ñehua, napa' o'ch na'p̄to'tas: ¿Erra'tsena'tña ñeñt e'ñe pocte' senten ñeñtcha' atet ye'pa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yepon ñeñt ama pocteyaye. Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche chachña yemtsatach.

Ñetña'p̄ ama't puesheñarro'tetapa' ama eseshaye' anapuenaye entaye.

10 Ñaña'p̄ cohua'yesan allohuen ñeñt anorrchets all, allempoña' otan ñeñt chelletsa pot:

—Te'pa' o'ch nota'p̄: Petapuerr p̄ot.

E'ñe otue'pa' ñaña'p̄ allentepa'tcha' tapuerran pot, o' e'ñe cohuenterra pot.

11 Fariseonesha' ñapa' ñeñtña atarr atrre'matahuet. Allempoña' cotape'chatanna'tet, atarr o'pachet Jesús.

Allempo Jesús'p̄a' acran charrasheña ñeñt puechetsa epsheña ñeñtcha' llesensa'

(Mt. 10.1-4; Mr. 3.13-19)

12 Allempoña Jesús'p̄a' o' alla ahuerrerr a'yo aspeno allcha' ma'yochena'. Allña'p̄ arepen ma'yochaya Pompor.

13 Tsapa'tña puetarenpa' agota'muenan allohuen ñeñt pueyochresha'chno pen. Allempo cha'cha'tet ñeshopa' ñaña'p̄ o' acrapan ñeñt charrasheña ñeñt puechetsa epsheña ñeñtcha' llesensa' ñeñtcha' serrpare'tyetsa' allemeñ anetso'mar.

14 Ñeñt llesensa' ñeñt'pa' añechno: Simón ñeñt socherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé,

15 ñaña Mateo ñaña Tomás ñaña Jacobo ñeñt Alfeo puechemer, ñaña ñeñt po'psheñeñ Simón ñeñt cananistanesha' ñeñt atarr torratse't pa'netsrecop,

16 allotpa' ñaña Judas† ñeñt Jacobo pa'mo'nasheñ, allotpa' ñaña po'psheñeñ Judas Iscariote ñeñtcha' pomuerre' tsapatonet Jesús.

Allempo Jesús'p̄a' ye'chatenan shonte' acheñenesha'

(Mt. 4.23-25)

17 Allempoña huerra Jesús aspeno't epuet pueyochresha', tom'cha'tuerret all aspenet pacñe'tpener poño po'mopñero. Allña'p̄ o' cha'cha't shonte' po'potantañ acheñenesha' ñeñt pueyochresha' pen. Ñaña allo'tsa'yen shonte' acheñenesha' ñeñt huachetsa allemeñ anetso't —Judeo't ñaña Jerusaléno't, ñaña sa'patopño'marnesha' ñeñt huetsa Tiro't ñaña Sidóno't. Ñetpa' añecopña huachenet o'ch e'mñoteret ñamet Jesús

* **6:14** Jacobopa' ñeñfara ñeñt sochenet Santiago. † **6:16** Judaspa' ñeñfara sochenet Tadeo.

ñeñt atet serrpare'ten ñaña añecpa'ñaña hua'chenet attoch a'crratyesapanet Jesús patsñañēteret.

18 Ama't ñaña allohuen ñeñt muero'chtatyen oneñēñ ñaña'pa' e'ñe a'crratyesuapanet.

19 Allohuenña acheñenesha'pa' atarr mueneñet o'ch a'p'loset Jesús tarro'mar ñapa' ña atarr ahuamencatesha', e'ñe ña po'huamencot a'crratyen an allohuen acheñenesha'.

Atto atarr cosheñtso'tsa'yen patantarr ñaña atarr llequēñtso'tsa'yen po'potantañ

(Mt. 5.1-12)

20 Allempoña Jesús'pa' cohua'yesan ñeñt pueyochresha' pen, ñaña'pa' atet otanet:

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterrisach Yompor po'cohuenña atto atarr ayochreshattena ña.

21 'Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquēñoñ ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheñoñ.

22 'Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo pueasare'teño'tetas sochatse'tenset tarro'mar sapa' na same'ñena Ñeñten Acheñetsets.

23 Allempo atet penset ñeñt ama cohuenayaye, sañapa' socshepa'ch nanac ñaña señoche'pa'ch shonte' ñeñt o'patatensa Yompor pue'ntaño ñeñtcha'ña atarr socshaterre'. Ñehua, ñetpa' pa'tañneshañpa' attecma muero'chtatyesete't ñaña ñeñt a'nita'yesaye't Yompor po'ñoñ ahuat.

24 'Tarraña te'pa' o'ch notas sa ñeñtes atarr e'cllayoretes ñeñtes echene' ora allpon ñeñt e'ñe socpa. Sapa' ñeñtescha'ña atarr llequēñtso'tsa'yenes tarro'mar esempopa' huañerrcha' ñeñt socshatene'.

25 'Ñaña atarr llequēñtso'tsa'yenes ñeñtes atarr esocmañen es echyets allo e'ñe señmatena seyeteñoñ. Cherrcha' allempoch atarr sepallterra ñeñtcha' serrar seperr.

'Ñaña atarr llequēñtso'tsa'yenes sa ñeñtes te'pa' e'ñe socsheñnesha' seche'tatsetyena. Cherrcha'ña allempoch seyahuerra sellquēñoñ.

26 'Ñaña atarr llequēñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañneshañ

ahuaŧ, e'ñe cohuen eñosyeseŧ añ acheñreneshacop ñeñŧ ama't ama Yomporeye' po'ñoñ a'mta'yeseŧe.

Atto Jesúsŧa' yečhatosanet amorrentpo'ch yeñch ñeñŧ ye'moñe'tyene'

(Mt. 5.38-48; 7.12)

27 'Sa ñeñŧes ne'mñotene' o'ch notas ñeñŧcha' atet sepa e'ñe cohuen, semueryach ama't ñeñŧ se'moñe'tene'. O'ch atet sepe' e'ñe cohuen.

28 Ñaña ama't erra'tsen ñeñŧ sarrnomare'tenaya sañapa' o'ch senamaterrñañ Yompor pa'nateña. Ñaña ñeñŧ sesasare'tene' sañapa' o'ch sema'yochamñpenanet.

29 Nehua, atet ñerra'm esempo esesha' pue'moñe'teñoŧetas o'ch tacllaset setsa'po, sañapa' poctepa'chña señch tacllerrserrepa' ñaña po'pshemñtañoŧ. Ñaña ñerra'm esempo esesha' seprratamñse' seshtam, sañapa' poctepa'chña señch puerratamñpsasetepa' seshtam ñeñŧ muenenet ama't ñaña po'pmañ seshtam allo sepmatena.

30 Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñse' sañapa' amach alla senamatstere apuerrsetepa' alla.

31 Ñehua, ñerra'm erra'tsenté' e'ñe cohuen senten ñeñŧ semen sa ñeñŧcha' atet pñonas po'psheñeñ, sapa'cho'ña e'ñech attecma sepanet samña.

32 'Ñaña sa ñerra'm aña semorrentena ñeñŧ atarr semorrentenaya samña, ñeñŧpa' amach e'ñeye' sorrdatenoña ñeñŧ e'ñe po'ñoçh cohuentetsa, tarro'mar ñeñŧ ama ame'ñenayo Yompor ñetpa aña morrentenet ñeñŧ e'ñe morrentenahuet ñamet. Añña atarr cohuentetsa ama't ñeñŧ ama yemorrente-nayepa' o'ch yemorreñcha e'ñe cohuen.

33 Ñaña ñerra'm aña e'ñe cohuen seyepa'yen ñeñŧ seyepa'yene' samña, ñeñŧpa' ama e'ñeye' sorrdatenoña ñeñŧ e'ñe po'ñoçh cohuentetsa, tarro'mar ñeñŧ ama ame'ñenayo Yompor ñetpa' aña yenpa'yenet ñeñŧ yenpa'yenahuet ñamet.

34 Ñaña ñerra'm añecpa es sartanna'tyena attoch ellopa' o'ch alla apuerrset samña, ñeñŧ atet sepenapa' ama e'ñeye' sorrdatenoña ñeñŧ e'ñe po'ñoçh cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñŧ ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ.

35 Tarraña napa' o'ch notas, sapa' añe'nachña semorrentena ama't ñeñŧ se'moñe'tene'. Ñaña sapa' añe'nachña seyepuen ama't ñeñŧ ama seyepuenaye. Ñaña sapa' añe'nachña es saretyena ama't ñeñŧcha' ama sapuerraye.

Ñerra'm atetcha' sepa Yomporñapa' apuerrescha' ello ñeñtcha' atarr socshatuerre'. Ñapa' allempoch e'ñe puechemer perres, ñeñtara Yompor Ñeñt Nanac Parets. Tarro'mar ñapa' aña'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso.

³⁶ Sapa'cho'ña atarrepa'chña semueranna'ta e'ñe atet pena ñeñt Yeyomporer yepen atarr muerenya yaña.

E'ñe attotapa' amach yotteñe'channa'tatsto

(Mt. 7.1-5)

³⁷ 'Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso saña Yompor ama pocteyaye ñeñt atet sepa'yena saña. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso saña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres saña.

³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres saña. Shonte'ch nanac es apuerres, atet ñerra'mrate' cho es e'chorratenset soshaco atet ñerra'm chop e'chareñ. O'ch chorrappa' o'ch a'rrapuet esheccha' esha'tereterer po'poñ, ñerra'm o'ch chorrerrerra' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor nanac aton. Ñaña errponcha' sañ po'psheñeñ, sapa'cho'ña e'ñech allpon apuerres saña Yompor.

³⁹ Allempoña Jesúsapa' atet toma'ntaterraneterr, ñeñtpa' atet otanet:

—Ñeñt aporo'yetpa' ñapa' amach errotenot echa'nmano po'psheñeñ ñeñt parro aporo'yete cmuet. Tarro'mar ñerra'm atet penet, ñerra'm arrorotoña echa'nmanna'tnomuetpa' epsheño'maret chach shora'nmuert arroroto. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotenot yoctape'chache po'psheñeñ ñeñt ama eñotenaye ñeñt cohuen enten Yompor.

⁴⁰ Ñeñt aychatarettetsapa' ama't puesheñarra amach errotenot metanetoña ñeñt allpon eñoten ñeñt yechatene'. Ama't allempo e'ñe aychatarettapa' e'ñech allpona yecha' ñeñt allpon eñoten ñaña ñeñt yechate'.

⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno sañapa' amach sotatscheña po'potantañ: "Masheñcha' napa'

o'ch noctape'chaterreḡ e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyotsen puepachña ama't sa seclloyopa' allo'tsen tsach; ñeñtñapa' ama senteñe. Ñerra'm atetpa' amach errotenot socheña po'psheñeñ: "Masheñcha' napa' o'ch nechterraḡ pecloyot pepachña." Tarro'mar añ tsach ñeñt seclloyotsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrañ pa'psheñeñ puepachña pa'clloyot.

Allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'
(Mt. 7.17-20; 12.34-35)

43 Tarro'mar allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ño ch ama cohuenayaye ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntaterra: Ora allohuen ñeñt e'ñe cohuen narmetsoch, pue'merpa'cho'ña e'ñech cohuenare'. Añña po'pchañechno narmetsoch ñeñt ama cohuenayayepa' pue'merpa'cho'ña amach e'ñe cohuenayaye.

44 Ñeñto'marña attoña yeñoten erra'tsente' ñeñt e'ñe cohuenare' narmetsoch ñaña ñeñt ama cohuenayaye, pue'merotña e'ñe yechme'teñ. Ñaña yapa' e'ñe yeñoteñ ama arroteye' yetoquënoña llo'm ajchoḡ. Ñaña ama arroteye' yetoquënoña ap rrenagachot.‡

45 Ama't erra'tsena acheñer ñeñt e'ñe po'ño ch cohuen, ñapa' añcha'ña orrtaten ñeñt e'ñe cohuenare' cotape'chen pueyo chro tarro'mar pueyo chro allña shonte' cotape'chenan ñeñt cohuentetsa. Tarraña po'poñ acheñer ñeñt po'ño ch ama cohuenayaye, ñapa'cho'ña añach orrtaten ñeñt atet cotape'chen pueyo chro ñeñt ama cohuenayaye tarro'mar pueyo chro allña shonte' pa'namen cotape'chenan sosya'tsañ. Tarro'mar ñerra'm shonte' yocape'chen yeyo chro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yocape'chen ñaña yeyo chro ñeñt ama cohuenayayepa' ñeñtpa'cho'ña e'ñech ñeñta yemnen o'ch yeserrpare'teñ.

‡ 6:44 Ñehua, Jesús añ toma'ntatanet uva ñaña higo ñeñt puenareñ penet all pa'nyo.

Atto Jesús toma'ntatana acheñ ñeñt e'ñe eñotene' ñeñt po'ñoçh sherbets ñaña ñeñt ama eñotenaye ñeñt sherbets

(Mt. 7.24-27)

⁴⁶ 'Sapa' eso'maruañaca'yeña sotenen napa' Sa'yochreshatero' sepenen, sapa' amaca' çhoye' same'ñenno ñeñt atet o' notuas.

⁴⁷ Allohuen erra'tsencha' huapatsa nesho ñeñtcha' name'ñenaya na ñaña ñerra'm e'mñotennanet neñoñ ñeñt atet cohuen neyçhatenanet ñerra'm atet e'ñe penet, ñetñapa' atarrcha' eñotenet ñeñt e'ñe po'ñoçh sherbets.

⁴⁸ Ñeñt acheñer ñeñt atet petsa o'ch netma'ntacha atet ñerra'mrrate' puesheñarr yacma ñeñt atarr es eñotets ñeñt tomatene' pocoll ñeñt e'ñech echarr penan pa'paquell. Ñaña' atarrcha' o'pono eñan pats attoch e'ñe echarr ñan po'quellpach. Atteñapa' o' çhap allempo apellchena oñ, pocollñapa' ama a'mato apellche' tarro'mar quellpachpa' atarr huomenc atomataret.

⁴⁹ Tarraña po'potantañ ñeñt e'muene' neñoñ ñetña ñerra'm ama atteye' peneto ñeñt atet notenanet, ñetñapa' e'ñech attet ñerra'mrrate' puesheñarr yacma ñeñt ama es eñoto. Ñapa'çho'ña o' tomataneñ pa'paquell tarraña ñaña' ama atarr o'ponoye' eñanoña pats attoch e'ñe echarr ñan po'quellpach. Allempoñapa' apellcha oñ apellche'ñapa' çhepa'tcha' a'matamñpsos pa'paquell. Pocollñapa' e'ñe poctacma muello'tstosa.

7

Atto Jesús pa' a'crraterran capitán pa'taruasañer; ñeñt capitánpa' romo'marnesha'

(Mt. 8.5-13)

¹ Allempoña Jesús pa' serrpare'tatuerranerr allohuen acheñenesha' ñeñt e'mñotene', ñaña' ahuerrerr, o' çherrerr Capernaumo.

² Allñapa' allo'tsen puesheñarr yacma ñeñt solltar po'cap'taner, ñeñtpa' romo'marnesha', ama judioneshayaye. Ñeñña capitánpa' echenan puesheñarr pa'taruasañer çha atсна'ten atarr pa'na'tena, ñaña' atarr morrentenana pa'taruasañer.

³ Ñeñña capitánpa' allempo e'mare'tan Jesús o' alla çherr Capernaumo, ñaña' o' mueñan patantarr acheñ ñeñt pom-pornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer.

⁴⁻⁵ Allempoña çhapuet Jesúseshopa' ñetñapa' atet otoset:

—Ñeñt capitánpa' ñapa' atarr cohuen acheñ, ñapa' atarr morrentenya ya ñeñtey israelena'tarey, ama't yeprahuapa' o'

tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenana' capitán.

6 Allempoña' cota'nerranet Jesús. Chapmochet capitán pa'paclo, capitánña'papa' mueñerranerr po'potantañ acheñ ñeñt parro yemtena ñeñtcha' otapue' Jesús atet oten capitán:

—Yapa' atet otapuey capitán atto'ch yotapañ: “Amach Ayochreshate atsrre'moçhen nentatatstapape tarro'mar napa' ama cohuenayayno attoch pebe'tosapo'tamñesna nepaclo.

7 Napa' ama cohuenayayno ñeñto'marña aña nemñen po'psheñeñ ñeñtcha' nepoctatapañ, ñeñtcha' potap correrrepa' na'taruasañer, ñaña'papa' acrrerroche'ch.

8 Tarro'mar napa' ñeñten ñeñt atet petsa ñeñt atet otenen ñeñt neyechenaya. Ñaña napa'cho'ña eñall ñeñt neyechena naña ñeñt nesolltarer nepen. Ñerra'm puesheñarr solltar noteñ: Papa' o'ch ahuep a'yo, ñaña'papa' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña'papa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'papa' allcha'cho' taruasa'muen. Ñeñto'marña napa' neñoteneñ ñerra'm erroten potenpa' e'ñechca'ye atet pena.”

9 Allempo e'man Jesús ñeñt atet oten capitán, ñaña'papa' alla cohua'yesan allohuen acheñenesha' ñeñt cota'nene'. Ñaña'papa' atet otanet:

—Errotenotuañaca'yeña atarr yemtena, ñapa' amaca'ye judioneshayaye. Napa' o'ch notas, ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya. Ama'tpa' correrrepa' pa'taruasañer.

10 Allempoña ñeñt pocte' Jesús o' ahuanerret capitán pa'paclo. Ñetña'papa' entuerrñañet capitán pa'taruasañer o' e'ñe correrra.

Atto Jesús'pa' tantaterran arromñañ ñeñt rretorranesha' puechoyor

11 Allempo allponmaterrerr, Jesúsña'papa' ahuererrerr po'poñ anetso, ñeñt añets añ pa'so'cheñ Naín. Alla cota'huanererr pueyochresha' ñaña shonte' po'potantañ acheñenesha'.

12 O' chapmochet all allotecma be'tenet attoch chapuet anetso. Allostña'papa' cha'nmaçha'tos ñeñt anene' arromñañ, o'ch pampueñeta'. Arromñañña'papa' asheñorr ñeñt e'ñe po'patrorr pen pachor. Pachorña'papa' rretorranesha'. Shonte' acheñ ñeñt allo'marnesha' ñeñt llecapretenaya rretorranesha' all cota'neñet.

13 Partsesha'ña Jesús allempo entapan rreŧorrnanesha' puellcapreteñoŧpa' atarr muerosya. Ñaña'pa' atet otapan rreŧorrnanesha':

—Amach noċha peyahuatsto.

14 Allempoña ponmapana arromñaŧ, a'plata'tosñañ po'cajon. Ñeñña anene'pa' alla tomċha'toset. Jesúsña'pa' otan huepuesha' ñeñŧ rromuets:

—Napa' o'ch notaŧ: ¡Te'pa' o'ch petanterra!

15 E'ñe otue'pa' ñeñña arromñaŧpa' allenta tanterra ċha eñorerrtsa. Jesúsña'pa' o' alla apuerrñañ pachor.

16 Acheñenesha'ña'pa' atarr nanac yorennet. Po'yorñoŧetpa' atarr aye'ċoċhtateññañet Yompor. Ñetña'pa' atet otyenet:

—Te'pa' o' orrtonaya puesheñarr ñeñŧ atarr sherbets ñeñŧ a'mtene' Yompor po'ñoñ. Yomporpa' o' yerpuerrya ñeñŧey e'ñe pueyochreshay peney.

17 Attoña acheñenesha'ña'pa' epaye' serrpare'tyesuerret ñeñŧ atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeñŧ apatañtatse'tpa' mueñan pueyochresha' Jesúsesho (Mt. 11.2-19)

18 Añña Juan ñeñŧ ayottamŧsaret, ñaña'pa' ċhocma serrpare'tateñ pueyochresha' ñeñŧ atet pa'yena Jesús.

19 Atteña Juanña'pa' agotatan epsheña ñeñŧ pueyochresha' pen ñeñċha' mueña Jesúsesho ñeñċha' a'pŧo'tenaya' Jesús po'ñoċhte' ñapa' ñeñŧ Cristotets ñeñŧ atarr cohuenet ahuatoteñ, ñato' amate' ñeñŧeyayepa' añcha' cohuet po'psheñeñ ñeñċha' huapatsa.

20-21 Allempoña ñetpa' ahuanmuet. Allempo ċhapuet allo'tsen Jesús, Jesúsña'pa' añ torra'yena a'crratanatyese' shonte' acheñenesha' ñeñŧ atsna'tyets ñeñŧ pa'namen mueröchtatyenahuet. Ñaña ñeñŧ chorra'yena oneñeñ ñapa' o' e'ñe caċhpatatuerranet oneñeñ. Ñaña shonte' aporo'yeteċno ñaña'pa' o' alla e'ñe cohuatyesuerranet. Ñeñña Juan pueyochresha'pa' a'pŧo'toset Jesús, atet otoset:

—Juan ñeñŧ apatañtatse't Yomporecop yapa' ñeñña yemñene' o'ch yotenpa', ñato' pate'ña ñeñŧepte' e'ñe po'ñoċh Cristotets ñeñŧ atarr yecuen ahuatoteñ o'ch huapa; ñerra'm amate' ñeñŧeyayepa' o'ch e'ñe pŧotey alloċhña'pa' añcha' yecua' po'psheñeñ ñeñċha' huapatsa ñeñŧ e'ñe Cristo.

22 Jesúsña'pa' otapanet:

—Te'pa' o'ch ahuerres seserrpare'tatuercha' Juan ora allpon ñeñŧ atet sentyesuennana' arr ñaña ora allpon ñeñŧ atet se'myesuennana' arr. O'ch e'ñe seserrpare'tatuer ora ama't atto aporo'yeteċnopa' te'ña'pa' o' e'ñe

necuatyesuerranet, ñaña ñeñt checa'repayetspa'te'pa' o' e'ñe chope'chyesuerret, ñaña ñeñt osyen puetsarñats, te'pa' o' e'ñe a'cohuentataretetuerret ñamet, ñaña paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atantataretetuerret, ñaña ama't ñeñt huocchañneshachno te'ñapa' o' e'ñe neserrpare'tatuerranet añ cohuen ñoñets alloch queshperret ñamet.

23 Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes: Atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

24 Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñt'pa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr.

25 Ñaña amaca' añecpaye' sete'teña all o'ch sentena' ñeñt atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr cochnesha'tetsa pa'shtam. Yapa' yeñoteñ arrña yentenña ñeñt atarr cochnesha' chorra'yenaya shetamuets añcha'taretepahuo.

26 Sapa' añecopca'yeña sete'tña amayo o'ch sentena' all ñeñt po'ñoçh a'ñtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt atto a'ñtenet Yompor po'ñoñ.

27 Tarro'mar Juanpa' ñocop eñose't Yompor ahuañ. Ñehua, allempopa' atet otne't na ñeñt atet'cha' p'osa Juan nocop esempoch huapa, ñeñt'pa' atet anaret ñoñets ahuañoteñ:

Papa' peñoche'pa'ch napa' o'ch nemñonañ puesheñarr ñeñt'cha' ñanom otatsa ñeñt'cha' p'a'cohuentatyese' p'ocop allcha' p'oñmos.

28 Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese'ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochreshattena, ñeñtña acheñerpa' atarrca'ye sherben, ello metanenan atto atarr sherben Juan.

29 Allohuen acheñenesha' ama't ñaña ñeñt ashcañetyestse't atto atarr cobra'yese'te't quelle ñeñt gobiernocop ñeñt ap-

atyes Juan, ñetñapa' atto e'mñnotenetpa' otyeset: "E'ñe pocte' atet oteney Yompor."

³⁰ Tarraña fariseonesha' epuet ñaña ñeññ atarr etsotayenayenñ ñoñets ñeññ atet anaret judioneshacop, ñetñapa' ama't e'ñe mamesha ama pocteye' enteñeto ñeññ atet muenen Yompor ñocpuet, ñeñño'marña ñetpa' ama apataneto Juan Yomporecop allempo.

Partsesha'ñapa' atet oterranelerr:

³¹⁻³⁵ —Ñehua, napa' o'ch neñotatas ñeññ atet pena patantarr acheñenesha' ñeññ yentyen te' ñeññ ama't errotena ama acshatpoteneto. Ñeññpa' fariseonesha' atet petsa. Tarro'mar ama't allempo orrta Juan ñeññ apatañtase't ñapa' ama rrane'te ñeññ yocrrañ yepen allohueney, ama orrane'te ñeññecma yorren allohueney. Ñeñño'marña ñapa' cha sotyese't chote' chorreña oneñet, ama't e'ñe mameshapa' ama pocteye' señche'te. Te'ñapa' o' norrterra naña Ñeññen Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñañen ñaña atarro' orranñaten napa' año'chña e'ñe neyemuetyena ñeññ atarr ochñañenesha' ñaña ashcarñaatechno ñeññ atarr cobra'yene' acheñenesha' quelle. Tarraña ama't atet sepenñoñpa' Nomporna e'ñe eñotene' ñeññ po'ñoçh atarr sherbets ñocop. Ñaña allohueney ñeññey e'ñe puechemerasha' pohueney ñeññey cotene' ña poctañña yapa'cho'ña e'ñe yeñotuenña ñeññ po'ñoçh atarr sherbets. Ñeñño'marña yorrtatyeññañ ñeññ cohuen enten ña. Sañapa' ama't e'ñe mamesha ama acshatpahuoyayso, e'ñe attes ñerra'mrrate' cheshaneshha' ñeññ chocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñño'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o'yerequerca'hua allo yocshame'tenapa' sañapa' amaña seshe'rarampenye; allotpa' ama't o'yepoctorare'tua ñeññ ya'chpeñtsorecho allo yellcanrrortenapa' sañapa' amaña sellcapretenyo."

Allempo Jesúsapa' rrallme'chos fariseo pa'paclo ñeññ sochetsa Simón

³⁶ Allempoña Jesúsapa' o' huapoña ñaña puesheñarr fariseo o'ch otenana' Jesús rrallme'chapreteñepa' pa'paclo. Jesúsñapa' allenta coterran fariseo. Allempoña chapach pa'paclo anorrcha'toset parro allcha' rrallme'chapretos.

37 Puesheñarrña coyanesha' ñeñt allo'marnesha' ñeñt atarr ecañoreshat, ñaña'pa' o' e'mare'ch o' chap Jesús fariseo pa'paclo all rrallme'chen. Ñaña'pa' huapa, huapatan ñeñt atarr eñmosat ñeñt nanac tsa'te'; huapatanipes puetellño ñeñt otenet alabastro.

38 Allña'pa' pueya'chpeñesha' huapa, ponmosana Jesús pa'tco. All atarr yahuosa, puese'ña'pa' cha tsopsa'tos Jesús pa'tco. Allempoña chetosaña pue'chpa' alloña alla a'porrarra'tquër, tso'tsteca'tosan pa'tac, she'tatca'tos eñmosa'to.

39 Añña fariseo ñeñt hua'ñene' Jesús, ñaña'pa' eñchpa' atet ot pueyo'chro: Tarraña añ yacma ñerra'm po'ño'ch ñeñt a'mtenayen Yompor po'ño'ña'pa' eñotapaneñcha'ña añ coyanesha' ñeñt a'pllene'pa' atarr ecañoreshat, amach muenacheñe o'ch a'pllosñañ ama't pa'tca.

40 Jesúsña'pa' atet otan fariseo:

—Napa' nemneñ o'ch masheñe Simóna nota'p allpon ñoñets. Fariseoña'pa' atet och:

—E'ñe pocte' nenteñ Maestrocha' o'ch p'oten.

41 Jesúsña'pa' alla toma'ntacha, atet och:

—Napa' o'ch not, allo'tsen puesheñarr acheñ ñeñt artetsa quelle. Ñaña'pa' artana puesheñarr acheñ nanac shonte' quelle ñeñt otenet quinientos denario*; po'psheñeñña'pa' archa po'poñ quelle ñeñt ama tama atonayaye ñeñt otenet cincuenta denario.

42 Atfoña epsheño'maretpa' ama eshcaye' tsa'tuerreto ñeñt allpon teba'yenet tarro'mar ama echeneto alloch tsa'terret. Ñaña'pa' e'ñe atfa peretna'huerranet epsheño'maret, e'ñe attecma ama eseshaye' tsa'tertso. Te'ña masheñe Simóna o'ch na'p'to'ta'p, añ epsheño'mar ñeñt amorrentaret attoch peretnerranet allpon tebenet ¿erra'tsena't pentenña'pa' ñeñt atarr morrentenaya ñeñt peretnene', ñato' añte' acheñer ñeñt tebene' quinientos denario amapa' añte' ñeñt e'ñe cincuenta denario tebene'?

43 Simónña'pa' alla anapuerranerr Jesús, atet otererr:

—Ñehua, añte'ca'ye atarr morrentenaya ñeñt ap shonte' quelle, tarro'mar ñapa' shonte' o' atfa a'pretnare'tterra ñeñt allpon shonte' teben.

Jesúsña'pa' alla otererr:

—Atetca'ye masheñe.

44 Allempoña Jesús'pa' cohua' allente'tsen coyanesha' al-lotña'pa' alla oterranerr Simón:

* 7:41 Denariopa' quelle ñeñt allpon tsa'tenet pamtarr ñeñt taruasetts all pa'nyo.

—Pecue' añ coyanesha' ñeñt atet p̄osen. Allempo nečhap pepaclopa' p̄añaapa' ama es p̄apapno ama't oñapa' ama p̄apapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña p̄ueso'yo allempoñapa' alla a'porrarra'tquërren e'ñe ña pue'cho.

⁴⁵ Ñaña allempo nečhap pepaclopa' p̄añaapa' ama't pe-huom̄cha'teño'fapa' ama petso'ttsa'pa'tapno. Tarraña añ coyanesha' e'ñe allempo nečhap pepaclo ama at̄ta cačhposno allorocma tso'tsteca'tosen at̄toña orrtatosan puemorrenteña nocop.

⁴⁶ Papa' ama't coñe'tapa' ama es peshapono noño ama't olivoso'ya ñeñt ama tsa'teyaye. Tarraña ñañaapa' eñmosaño she'tatca'tosen ñeñt atarr tsa'te'.

⁴⁷ At̄toña te'pa' atarr orrtatosnan ñeñt at̄to morrentosna. Napa' neñoteññañ ama't shonte' po'chñar te'ñapa' o' e'ñe a'p̄retna'huare'tta. Tarraña po'psheñeñ ama't ama tama ochña'teyaye at̄toña a'p̄retna'huare'tta po'chñarpa' ñañaapa' ama e'ñeye' morrentapanoña ñeñt o' peretnerrñañ po'chñar.

⁴⁸ Allempoña Jesús'pa' otan coyanesha':

—Te'ña po'ño'chpa' o' e'ñe a'p̄retna'huare'tterra p̄o'chñar.

⁴⁹ Allempoñapa' ñeñt parro rrallme'chenet, ñetñapa' otanna'tyeset:

—Esha'huañaca'yeña añ yacmar at̄to peretnerraña ochñarets.

⁵⁰ Jesúsñapa' alla oterranerr coyanesha':

—Papa' at̄to atarr peyemtenna ñeñtña o' a'queshp̄aterre'p̄. Te'ñapa' o'ch ahuerre'p̄ e'ñe peñmañesha'.

8

At̄to coyanesha'chnopa' es apa'yese'te't Jesús ñeñt allpon echyenet

¹ Allempoñapa' chopeñe'cherrerr Jesús errap̄aren serrpare'tyesnomue' cohuen ñoñets at̄toch čhap allempo ayochreshat̄tena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñapa' co'ta'huanererr pueyochresha' čharrasheña ñeñt puechetsa epsheña.

² Allñapa' co'ta'huanem̄ ñaña patantarr coyanesha'chno ñeñt a'crratyesua Jesús ahuañmo'cha, p̄uesheña'tetspa' ñeñt cačhpatatyerr oneñe't ñeñt chorrahuete't, po'psheñe'chnopa' ñeñt a'crratyes ñeñt pa'namen atsnañtsor mueročhtatyesahuete't. P̄uesheñarr coyanesha' ñeñt'pa' añ pa'so'cheñ María Magdalena. Ñeñt Mariarpa' Jesúsñapa' puecačhpatataroñ cančherr oneñe't.

³ Ñehua, po'psheñeñ coyanesha' añ pa'so'cheñ Juana. Puerrollarñapa' añ pa'so'cheñ Chuza añ po'taruas pen atto sherbenan añcha'tareñ Herodes. Allotña po'psheñeñ coyanesha' ñeññ cota'nene' Jesús ñeññpa' añ pa'so'cheñ Susana. Ellopa' shonte' po'potantañ coyanesha'chno ñeññ es apa'yesaye't Jesús ñeññ allpon echenet ñet.

All toma'ntatanet Jesús ñeññ a'parre'tene' puerets
(Mt. 13.1-9; Mr. 4.1-9)

⁴ Allemateñ anetsot hua'cha'tyena acheñenesha' ñeññ cha'chets Jesúsesho. Allempoñapa' o' cha shontoset nanac, Jesúsñapa' serrpare'tatapanet, atet toma'ntatapanet:

⁵ —Ñeññña a'parrene' puerets ñaña'pa' ahua' allcha' a'parre'tyenana' puepue. All a'parre'tyeñ patanta'tetsñapa' alla chapyes toño'mar, ñeññña'pa' atta atmama'tyes acheñenesha'. Allña'pa' hua'cha'tyesa ñaña' ot e'ñe añyallme'chuenana' puerets.

⁶ Po'poñe'chnoñapa' alla chapyes mapuetromeso'mar. Ñeññña'pa' mameshapa' cheparesuañ, tarraña mameshapa' alla hueya'huerra tarro'mar all mapuetromesopa' ama eñalle ama't coñe'ta oñ ñeññcha' a'yamosam'pse' narmets ñeññ o' cheparesua all.

⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajña'pa' mameshapa' atesha'tua alla ca'matuerranña narmets alla a'cllatuer.

⁸ Po'potantañe'chno ñeññña'pa' arr chapyes all e'ñe cohuen patso. Ñeññña'pa' e'ñe cohuen chepares. Allempoña atesha'tuapa' atarr aton ellom're'tyes. Puecha'tetspa' charroch charra' pue'llomer.

Allempoña serrpare'tatuanet atetpa' o' alla o'terraneterr. E'ñe huomencocma eñorana'tanet, atet otanet:

—Ñeññes po'ño'ch ne'mñotene', chaponasepa'ch seyo'chro ñeññ atet netma'ntatensa añ ñoñets.

Atet otanet Jesús ñeññecop atet toma'ntatyenanet
(Mt. 13.10-17; Mr. 4.10-12)

⁹ Allempoña pueyochresha'pa' ochet Jesús:

—Ta'm ¿es'e'ña petma'ntatenya? Yañapa' ama yeñoteñe.

¹⁰ Jesúsñapa' alla o'terraneterr:

—Sa te'pa' Yomporña o' muenaterres attoch señoterr ñeññ ama eñot'pahuoyaye ama't ahuatoteñ atet penaña Yompor po'cohuenña atto atarr ayochreshattena ña. Tarraña po'potantañe'chnoña ñeññ atta es puecha'yetsa, ñocpuetpa' ama eñoteñeto ñeññ atet atma'ntatareñ ñoñets. Attoña ama't enteñetañ ñetña'pa' amach es chenahueto pueyo'chreto.

Ama't e'mueñetañ amaña çhenanetoña pueyoçhreto ñeñt atet yeçhateney Yompor po'cohuenña.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Mr. 4.13-20)

11 'Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet.

12 Añ puerets ñeñt çhapyesets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotuetpa' allorocmach huapa oneñet o'ch alla puerratañperranet Yompor po'ñoñ pueyoçhreto. Attoña amach mueneñeto o'ch ame'ñenet, attochña ñetpa' amach a'quespatareterreto.

13 Ñaña ñeñt çhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt chepuets mapyo amach eñalle puerech. Tsapañonetña ñerra'm o'ch huapanet topateñets, ñetñapa' o'ch alla caçhpuerrñañet Yompor po'ñoñ.

14 Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. Ama'tcha' çhapanetañ mame' pueyoçhreto, tarraña ñetpa' allo'nach senet aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet attoch allo e'ñe cosha'yenet. Attoña ñetpa' amach errotenot orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt cha ca'matuerr ajma' amach errotenot ellomre'tyeseto.

15 Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñetñapa' atto ame'ñeññañet Yompor po'ñoñ amach puesereto çhoch eñochet pueyoçhreto attoch e'ñe cohuen ma'yoçhroñet Yompor po'ñoñ. Chocmach orrtatyenet ñeñt atarr sherbets Yomporecop amachña cha caçhpueñeto. Attoña ñetpa' e'ñe atet penet ñerra'm narmets ñeñt atarr aton ellomre'tyets.

Arrpa' all toma'ntatanet lampareñ atto çhoyo'tampeney
(Mr. 4.21-25)

16 Jesúsapa' alla toma'ntaterraneterr po'poñonet; ñeñtpa' atet otanet:

—Ñerra'm esempo ya'llchaten lampareñ ñeñtpa' ama añecpaye' ya'huortateñe o'ch alla ye'rramamper coyño. Ñaña ama añecpayaye o'ch alla yener o'ponot yemayepnacho. Añecopña ya'huortatenña lampareñ o'ch yene' enonet attoch choyo'tam̄pesuan allohuen acheñ ñeñt be'toschets o'pono pocollo.

17 Tarro'mar allohuen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attoch e'ñech eñotataretterret e'ñe poctacma.

18 'Ñeñto'marña sapa' señotenafe' e'ñe'e' po'ño'ch cohuen se'mñoteññañ Yompor po'ñoñ ñato'pa' amate'. Esha'te' chena pueyo'chro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esha'ña ñerra'm ama chenaneo pueyo'chro tarro'mar ñetpa' ama po'ño'chaye' aguëññañeto Yompor po'ñoñ ama't allpon eñotenetañ pueyo'chro ñeñtña'pa' chach puerratañperranet Yompor.

Allempo huapoña Jesús pachor ñaña pa'mo'nasheñnesha'
(Mt. 12.46-50; Mr. 3.31-35)

19 Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' acheñnesha' ñeñt emchorrenaya Jesús. Ñeñto'marña ñetpa' ama eshcaye' entosetoña Jesús allame'tets.

20 Allempoña acheñnesha' ochet Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

21 Ñaña'pa' atet otanet:

—Allohuen ñeñt e'mñotene' Nompor po'ñoñ ñetña ñerra'm atet pohuenet ñeñt atet oteney, ñeñtña e'ñe po'ño'ch nachor nepen ñaña ñeñtña e'ñe nemo'nasheñ nepen.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mt. 8.23-27; Mr. 4.35-41)

22 Allempo cherrerr pamtarr Jesúsñapa' a'tapos noñto epuet ñaña pueyo'chresha'. Ñaña'pa' atet otanet:

—Te'pa' o'ch ahuañpsey yomta'n.

Allempoñapa' ahuañpset noñto.

23 Allempo ahuañpset Jesúsñapa' alla ma' noñto. All muenpa' machayota huomenquëshatañpesnomuet. Emo'yare'ñapa' cha esha'tena noñto, atteñapa' chorramoch oñ noñto cha muene' esha'tatan noñt.

24 Atteña pueyo'chresha'ñapa' poneniyet Jesús all muenpa' operet, atet ochet:

—Maestro, po'ño'chuachca'ye yoclla'huerrate'.

Jesúsña tanterrapa' e'ñe po'ñoñoña a'mtsoññetuerran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechettamperret.

²⁵ Allempoña Jesúsapa' otanet:

—Eso'mare'tña sapa' ama e'ñeye' seyemtenno.

Ñetñapa' čha atarr nanac yorenet. Atta cohuanrrorteñet ñetñapa' atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare'oñ.

Atto gadaro'marnesha' ñeñt chorrena oneñetpa' huapa Jesúsesho

(Mt. 8.28-34; Mr. 5.1-20)

²⁶ Allempoñapa' o' etsotaset yomta'n all senet. Allpa' añ pa'ney pene' gadaro'marnesha' alla yot Galileot.

²⁷⁻²⁹ Allña sohuosa Jesús noñto'pa' allñapa' huapoña puesheñarr yacma ñeñt allo'marnesha', tarraña ñapa' añ chorrenaya oneñet patoner. Ñeñtñapa' ahua'toteñ atta chopeñe'chyen muelle'mcot, ama shetamteno. Ñapa' alla yečhena all pampueñet aromña'fečno ama pocolloye' yečheno. Ñehua, oneñetpa' allempo rromuenan yacmapa' epaye' ottatse'tache't allempoteñ. Pamo'tsesha'ñapa' ahuo'ch rromuetpa' o'ch huanquëtañ attoch cohuanñpeñet. Ñaña'pa' čhach tsepe'tuanman allo huanquëññañet pot ñaña pa'tac oneñetñapa' ahuo'ch'cho' matach a'yo amayo. Allempoña entapan Jesúsapa' rrana'nma huomenc, mata Jesúsesho, rromosñaña allame'tets. Allempoña Jesúsapa' otosan oneñet ñeñt chorrenaya yacma:

—Te'pa' o'ch pecačpa'ner añ acheñer.

Ñeñtña chorrena oneñetpa' ñaña'pa' atet otapan Jesús:

—Eso'maruachca'ye Jesúsó pa'tsre'moçhtana'tosen, papa' ñeñte'p Ñeñt Nanac Parets Puechemere'p. Te'pa' notapa'pcha' amach pecoñchatatstosno.

³⁰ Jesúsñapa' alla oterranerr ñeñt chorrena oneñet:

—Papa' ¿eso'tña pesočhena?

Ñaña'pa' atet oterranerr Jesús:

—Napa' añ neso'cheñ Legión.

Ñehua, añ so'chñets ñeñt otenet shonte' nanac, tarro'mar ñeñt nanac patoner oneñet ñeñt chorrenaya.

³¹ Ñehua, oneñetfečnoñapa' atet otare'tapet Jesús:

—Amach arra pemñatstosye o'pono coñcha'puetso.

32 Ñehua, allpa' a'yente'tsa'yen shonte' chañchočno ñeñt' rratse'tyets aspentoneť. Ñeñto'marña oneñeťechnopa' atet' otare'tapet Jesús:

—Ñerra'm čhoch muene' erroten peposeypa' arrña pemñaye'chosey chañchesho allochnapa' o'ch yechorra'yerr' ñaña chañchočno.

Jesúsñapa' allenta otanet:

—Ama'tca'ye orrasca'ye.

33 Allempoña oneñeťechnopa' cačhpa'huaneret yacmapa', alla chorrereterr' ñaña chañchočno. Chañchoñapa' allempo chorrosya oneñeťechnopa' čhepa'tcha' matrra'tua allohuen ñegoneť shorčha'tuos alloťpa' e'ñe ño'shrra'tuosa oño.

34 Acheñenesha'ña ñeñt' cohuanpene' chañcho allempo eñchet atet' p'a chañcho o' shorčha'tua oño, ñetñapa' allenta matrra'tet' ñamet pueyorñoť ahuanmuet anetso. Allñapa' serrpare'tyesoset' ñaña ora allohuen allampaño'mar.

35 Acheñenesha'ñapa' allenta ahuanmuet ahuo'ch enteñeta'. O'čhača'tet Jesúseshopa' allñapa' entoset yacma ñeñt' chorre't' oneñeť. Alla anen allame'tets Jesús pa'tcot ashtamať. O' eñoterra o' cohuenterra. Ñetñapa' čha atarr mecha'na'toset.

36 Añña ñeñt' entene' Jesús atto cačhpatatenan oneñeť' acheñ, ñetñapa' allenta serrpare'tatapet' ñeñt' huača'ttsa anetsoť.

37 Allempoña allohuen acheñenesha' ñeñt' yeča'yetsa all' ñeñt' gadaro'marnesha' ñetñapa' pueyorñoťet atet' otoset Jesús:

—Te'pa' o'ch ahuerreř arroť.

Allempoña Jesúsapa' a'terr noñto o'ch ahuerr.

38 Yacmaña ñeñt' chorre't' oneñeť' ñaña'apa' allenta otan Jesús:

—Napa' nemneñca'ye te'pa' o'ch nocterreř.

Tarraña Jesúsñapa' ama muenache, atet' och:

39 —Allařach, te'pa' o'ch ahuerreř pepaclo p'amo'tsesho'mar o'ch peserrpare'tatuerranet ora allohuen atto Yompor atarr yenposeř.

Ñaña'apa' atet' otue Jesúsapa' atet'cho' p'a. Allenta ahuer' serrpare'tyesnerrets ora anetso'mar atto Jesúsapa' atarr nanac yenpos.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt' a'p'lla'nmue' pa'shtam

(Mt. 9.18-26; Mr. 5.21-43)

40 Allempoña alla čherr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra.

41 Allempoña allpa' huapoña puesheñarr amča'taret' añ pa'so'cheñ Jairo. Ñapa' ñeñt' puesheñarr ñeñt' amča'tareťtetsa

judionesha' po'prahuo. Ñaña'p' alla rromosa Jesús pa'tco'tpa' atet otosan Jesús:

—Napa' nemneñ o'ch p'oc'terren nepaclo,

42 tarro'mar neseñ ñeñt nepatrrorpa' cha atсна'ten o' a'po'ntsa'mocha.

Ñehua, ñeñt po'seña'p' allponte' echenan po'charña charra' puechena epa char.

43 Allempo cota'ner Jesús cota'huaner ñaña shonte' acheñenesha' cha emchorratse'tnomet, cha to'mama'tneñet. Allña'p' cota'nmanet ñaña puesheñarr coyanesha' ñeñt atсна'tets. Charra' puechena epa char ñeñt atto chocma yella'yena. Ama't epaye' partata o' a'gasta'huahuan po'çllayor atto parteñet amaña eseshaye' a'crraterraye.

44 Ñaña'p' all cota'nenan Jesús pa'che'ño't, allña'p' a'p'llerñaña' pa'shtam pa'rrpe'mot. E'ñe a'p'lla'hue' pa'shtampa' allorocma maserrña po'rras, o' metuer ñeñt atto mueroçhtena.

45 Jesúsña'p' atet otanet:

—¿Esesha'tña o' a'p'lla'nmuenna neshtamot?

Ama eseshaye' eñoratso. Pedroña ñaña ñeñt epuet yemtena, ñetña'p' atet ochet Jesús:

—Maestrocha' p'apa' penteñte' shonte' acheñenesha' ñeñt alotemeña peto'mama'tnene'. ¿Eso'mare'tña p'otenña esesha'te' p'a'p'llene' peshtamot?

46 Tarraña Jesús'p' atet o'terraneterr:

—Napa' neñoteñ po'ño'ch puesheñarr acheñ e'ñe puenenñot a'p'llenen neshtamot tarro'mar napa' neñotena napa' o' na'crrach e'ñe na nehuamenco't atto a'p'llenen.

47 Coyanesha'ña allempo ñapa' eñotena amach errotenot a'nasoto. Ñapa' cha pa'shmuena pueyorño't concorposa Jesús pa'rrp'ot. Allña'p' e'ñe a'meta'huosan ñapa' añecopña a'p'llenan Jesús pa'shtam attoch correrra e'ñe cohuen. Allña'p' atet otan allohuen acheñenesha':

—Na allempo na'p'illoñ Ayochreshat pa'shtampa' ñeñtña na'crraterre' allorocma.

48 Jesúsña'p' atet otan coyanesha':

—Papa' nesñeshacha' atto atarr peyemtena na attoña te'pa' o' e'ñe na'crratnomuep. Te'ña'p' o'ch ahuerre'p e'ñe peñmañesha'.

49 Allempo eñorena atet'pa' allña'p' huacha'ta ñeñt huetsa añcha'tare't Jairo pa'paclo't. Ñetña huapuetpa' atet otoset Jairo:

—Peseña'p' o'ca'ye rroma. Te'ña'p' amach allo'na p'a'tsrre'moçhtana'tatsche Maestro o'ch coterre'p pepaclo.

⁵⁰ Jesúsña ama't e'man atet otoset Jairo'pa' ñaña'pa' atet otan Jairo:

—Papa' amach čha pe'charrtatstosto peyočher, nachña e'ñe peyemta attoch correrraña peseñ.

⁵¹⁻⁵³ Allempoñapa' ahuanmuet Jairopahuo. Chapuet pocollo allña'pa' allo'tsa'yen shonte' acheñenesha' all yahuanrrortenet, ya'na'teñet arromñañ. Jesúsña'pa' otosanet:

—Amach atarr seyahuatsto. Añ shopshesha'pa' amaca'ye čhoje' rromueno čhaca'ye muen.

Ñetña pachmare'teño'etpa' atta che'tatsetyesapet tarro'mar ñetpa' e'ñeca'ye eñoteñet čhoca'ye rromuen. Allempoña Jesúsña'pa' ama muenatano allohuen acheñenesha' o'ch be'toset allo'tsen arromñañ. Ñapa' aña muenat Pedro ñaña Juan, ñaña Jacobo ñaña arromñañ puepapar ñaña pachor ñeñña epuet be'tosčha'toset allo'tsen arromñañ.

⁵⁴ Allempoña Jesús'pa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' čho'pa tanterrtsa.

⁵⁵ E'ñe otue' atetpa' allentepa'tcha' o'rrerrerra čha tanterrtsa. Jesúsña'pa' otanet:

—Te'pa' o'ch serratallme'cher.

⁵⁶ Puepaparña ñaña pachorpa' ñetña'pa' atta cohuanrrorteñet. Jesúsña'pa' atet otanet:

—Amach esesha' sota'psa'tatsto ama't puesheñarra ñeññ atet o' norrtatennasa' sepaclo.

9

Allempo Jesús'pa' llesensan pueyochresha' čharrasheña ñeññ puechetsa epsheña

(Mt. 10.5-15; Mr. 6.7-13)

¹ Allempo čhapa'muen allempo Jesús agota'mueanan pueyochresha' čharrasheña ñeññ puechetsa epsheña. E'ñe apčha'huet ñeshopa' ñaña'pa' atarr ahua'ncat pa'yesanet, attoña apamet ñaña llesens attoch cačhpatatyeret oneñet acheñenesha' ama't erra'tsena ñeññ atarr mueročhtatyenahuet. Ñaña ahua'ncat panet attoch a'crratyaset acheñenesha' ama't erra'tsena ñeññ osyenahuet.

² Attoña llesensanet attoch ahuanemyeset pa'namen anetso'mar serrpare'tyesnomuet Yompor po'cohuenña atto atarr ayochreshattena ña. Ñaña añe'pa'ña llesensanet attoch a'crratyaset acheñenesha'.

³ Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't secarra, ama't sebolso, ama't ñeñčha'

serra'yeshnom ama't sečllayora ama't e'ñe epma seshtampa' amach sanmatsche sechope'chpayo.

⁴ Alla oterraneterr:

—Ama't errach pocollro sečhap allach sommosa allponmat esempohuach ahuerrser po'poñ anetso.

⁵ Ñerra'm erra anetsro ñeñt allo'marnesha'ña ama cohuenaye' agapasetopa' o'ch semtterrerr ñaña allot. Ñerra'm allempo semtterrerrña ñaña allot ñeñtña setco'tsa'yen pañe'te' patspa' čhoch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor.

⁶ E'ñe ñeñta otaretetuetpa' ñetñapa' allenta ahuanmuet o'ch chopeñe'chyaset erracmañen anetso'mar. Allñapa' añ serpare'tyesnomuet cohuen ñoñets alloch yequeshperra. Ñaña all chopeñe'chyaset erracmañenpa' allña a'crratyesnomet ñeñt atsna'tyets.

Allempo e'ñe cohuen es orrtatyesh Jesús, Herodesñapa' čha otapañ Juanañe' o' tanterra ñeñt apataye't acheñ Yomporcop (Mt. 14.1-12; Mr. 6.14-29)

⁷ Amiča'taretña Herodespa' ñañaapa' atet e'mare'tenan Jesús ora ñeñt allpon atet pa'yena. Ñañaapa' čha atarr llequëna tarro'mar patanta'tets acheñenesha'pa' atet otyenet te'pa' o' orrtterra Juanañ, o' tanterra rromot. (Herodespa' añña atarr llecatene' tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyočhro atto acheñenesha' otenet ahuo' tanterra Juan rromot.

⁸ Po'potantaññaapa' atet otyenet:

—Elíasoñca'ye o' orrtterra.

Po'potantaññaapa' ñetpa'čho'ña atet otyenet:

—Añpa' ñeñca'ye a'mtaye't Yompor po'ñoñ ahuañ, te'ñapa' o' tanterra rromot.

⁹ Amiča'taretña Herodespa' atet ot:

—Napa' neñotena naca'ye pechate'ña Juan ahuaña. Eshsha'huañaca'yeña ñeñt orrtatene' ñeñt ama't ahuañapa' ama yentare ñeñt atet atarr ne'mare'ten.

Ñeñto'marña ñapa' atarr mueneñ o'ch entan ñeñt Jesúsotets ñeñt orrtatyene' ñeñt ama puentare acheñenesha'.

Allempo Jesúsapa' rratenan shonte' acheñenesha'; ñeñtña acheñenesha'pa' allo'tsen amnaroch mil

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyochresha' ñeñt llesensa'yesh ahuaña. Ñetñapa' o' čhačerret Jesúsesho, serpare'tatyeshuere Jesús allohuen allpon atet pa'yesh allemeñ anetso'mar. Allempoña Jesúsapa' ahuanman

pueyochresha' e'ñe ñap̄tochayet, çhapuet all ama acheñempaño yaye all allame'tets anetso, ñeñt̄ anetspa' añ pa'so'cheñ Betsaida.

11 Tarraña acheñenesha'ñapa' allempo e'mare'chet o' ahuanmuet all, ñetpa'çho'ña allenta ahuanmuet ñamet. Chaçha'tet Jesúsesho ñañapa' e'ñe cohuen agapanet. Allñapa' serrpare'tatyesapuerraneterr atet penaña Yompor po'cohuenña atto atarr ayochreshattena ña. Ñaña allpa' a'crratyesapuerranerr ñeñt̄ atsna'tyets.

12 Atteñapa' o' ellerren. Añña pueyochresha' çharrasheña ñeñt̄ puechetsa epsheña ñetñapa' oteñeta' Jesús:

—Te'pa' o'ch pemueñhuer acheñenesha' ahuanemyerretepa' anetso'mar allampaño allcha' mayesuerret allcha' entyesuerret puerrar ñeñt̄cha' rra'yuesuerret. Tarro'mar te'pa' arro'tseney all ama acheñempaño yaye.

13 Tarraña Jesúsñapa' otan pueyochresha':

—Sachca'ye apa'yegahuet ñeñt̄cha' rret.

Ñetñapa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato' yapa' o'ch ahuey anetso allcha' yerañt̄ena' rreñets ñeñt̄cha' yerrach allohuen shonte' acheñenesha'.

14 Ñehua, allo'tsen shonte' acheñenesha' amnarochte' mil yacmanesha'. Allempoña Jesúsapa' atet otan pueyochresha':

—Te'pa' o'ch soch acheñenesha' anorrçha'tyesetepa' e'ñe ñopa'ttsocmuet, e'ñech amnarochet'socma çharrapa'tets anorrçha'tyeset.

15 Pueyochresha'ñapa' atetçho' pet, anorrçha'tatyeset acheñenesha' allohuenet.

16 Allempoña Jesúsapa' agapan ñeñt̄ amnar pan ñaña epatoll cac, cohua' enonet parasyoso'tam̄psan pan. Allempoñapa' shota'tan pan, shetse'tan ñaña cac. Apatatyesan pueyochresha', ñetñapa' epatyeset allohuen acheñenesha' ñeñt̄ anorrçha'tyets all.

17 O'ña epa'huet allempoña o' rrallme'chet allohuenet, e'ñe yetra'tuahuet. O'ña yetuahuetpa' çha a'pchatyeset ñeñt̄ñapa' a'yapacheret. Ñeñt̄ña a'yapacherretepa' çhepa'tcha' chorrats çharra' puechena epa cañter e'ñe tamo'yare'.

Atto Pedropa' otan Jesús p̄apa' p̄aña Yompor Puechemerep̄ ñeñt̄ep̄ Cristotosets

(Mt. 16.13-19; Mr. 8.27-29)

18 Allempoña pamtarrpa' allo'tsen Jesús all ma'yochena e'ñe ñap̄tochayet pueyochresha' epuet allo'tsen. Allñapa' atet otan pueyochresha':

—¿Erroñena't otyenenña allohuen acheñenesha' napa' eseshante'?

¹⁹ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtatset' Yomporecop. Po'potantaññapa' atet otyenpet, p'apa' Elíasopo'te'. Po'potantaññapa' atet otyenpet p'apa' ñeñtepo' ñeñt a'mtaye't Yompor po'ñoñ ahuat. Te'ñapa' ahua' alla petanterra perromñoť.

²⁰ Allempoñapa' alla a'p'to'terraneterr:

—Sañapa' ¿erroñena't sotenenña sa?

Pedroñapa' eñoratsapa' atet och:

—Papa' ñeñtepca'ye Parets Puechemerep' ñeñtep' Cristotsets.

Atto Jesúsapa' eñotatan pueyochresha' ñapa' amtsaretterrach (Mt. 16.20-28; Mr. 8.30-9.1)

²¹ Jesúsñapa' alla oterraneterr:

—Ama't puesheñarroťa amach esesha' sotaþsa'tatsto napa' ñeñten Yompor Puechemeren ñeñten Cristotets. E'ñe po'ñoč notenes amach esesha' sotaþsa'tatsto.

²² Elloñapa' alla oterraneterr:

—Napa' Ñeñten Acheñetosets, atet anareť nocop, nanaccha' na'mueročhtatareťterra. Amach esesha' pocteye' nenteraye—ama't ñeñť pompornesha' pen allohuen judionesha', ama't ñeñť pa'm'cha'tareťernesha' pen allohuen judionesha' po'cornaneshar, ama't ñaña ñeñť etsotayenayeñ ñoñets ñeñť atet anareť judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pamtañopa' o'ch alla tantaterren Nompor.

²³ Elloñapa' alla oterraneterr allohuenet:

—Ñerra'm esesha' muenene' o'ch coťerrnet na e'ñe po'ñoč attoch neyochresha' neperranet, añ poctetsa sehuanmuetepa'ña ñeñť atet muenenet e'ñe ñocpueta. Attochña ñetpa' o'ch e'ñe toma'nteret ñeñť chechnene' po'corsoch ama't pate'tets yeť allcha' mueročhtet ñamet. Attochña coťerrnet e'ñe poctacma.

²⁴ Tarro'mar ñerra'm esesha' e'ñe añ muenenet o'ch correna atomat attoch e'ñe coshenet arr patsro, ñetñapa' čhach a'chencatet ñañeñeta. Tarraña ñerra'm esesha' e'ñe pocte' entene' o'ch sohuanmuet ñeñť atet muenenet ñeñť e'ñe ñocpueta arr patsro attochña ñetpa' añach ma'yočhret ñeñť cohuentetsa nocop, ñeñťña acheñerpa' corretsach pocsheñeshocmañen tayoteñ e'ñe errponañohuen.

²⁵ Ama't errponenaþaren esocmañen es yeyoratsetyes ora allpon ñeñť yentyen añe patsro, tarraña ñerra'm ñeñťach e'ñe

ya'chencaterre' yecamquëñohuen ñeññäpa' ama't coñe'tapa' amach es sherberrye.

26 Tarraña ñerra'm erra'tsencha' nepenquënaya na te' neñoñpa'cho'ña cha apencoçhen entennanet, napa'cho'ña nepenca'huerranetcha' esempoch nohuerra. Po'ñoçh napa' Ñeñten Acheñetosets nohuerrach e'ñe na necohuenñoť, ñeñtara Nompör po'cohuenña epan ñaña po'millañoťeñnaneshar ñeñť e'ñe torra'yetsa Partsocöp.

27 Po'ñoçhca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompör po'cohuenña atto atarr ayochreshatterra ña.

Allempo Jesús'pa' po'poñetañpána pueyochresha'
(Mt. 17.1-8; Mr. 9.2-8)

28 Allempo met allponmat ñato' po'psocmatño Jesús'pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspento allcha' ma'yochena' Jesús.

29 Allña ma'yochosapa' machayo'tepa'tcha' po'poñetañpsosanet. Pa'clloyo'tpa' cha po'poñ orrtosanet. Pa'shtamohuen atarr huallama'to poptosa.

30-31 Allña'pa' machayo'tepa'tcha' orrtanet Moisés ñaña Elías. Ñetpa'cho'ña atarr cohuen orretyenet. Allña'pa' serrpare'toset epuet Jesús. Ñetpa' añ serrpare'tenet atto o' çhapmoch attoch rroma Jesús o'ch ahuer pue'ntaño. Ñetpa' atet otyenet, archa' atet peret Jerusaléño.

32 Ñehua, Pedro ñaña ñeñť epuet allo'tsen, ñetña'pa' ama't atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeñť parro tomçhen.

33 O' ma'naterrmocha Moisés ñaña Elías attoch sa'neret Jesús. Pedroña'pa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch yatomatonas ma'ppahua quërpachet, puepahuarra'pa' pöcopcha', po'ppahueña'pa' Moisésocopcha', po'ppahueña'pa' Elíasocopcha'.

Pedropa' pueyorñoť atta muene' otatse't, ama eñocher rotencha' ot.

34 Allempo eñorena Pedropa' cha orrtosahuet os çhepa'tcha' a'pomamñpsosanet. Atto a'pomamñpsosanet oспа' ñetña'pa' atarr nanac yorenent.

35 Cha e'morrtostsa ñoñets osot; ñeññña ñoñetspa' Yompör otosahuet; ñeñťpa' atet ot:

—Añmapa' ñeñť no Nechemer ñeñť atarr nemuerena ñeñťcha' e'ñe cohuen se'mñoterr.

³⁶ Allempo o'huañ e'morrta ñoñetspa' o' e'ñe ñaptamerra Jesús. Pueyochresha'ña allempopa' atta a'nasoteñet. Ama't puesheñarrofetapa' ama otuerreto ñeñ atet o' entuahuet.

Atto Jesúsapa' a'crraterran cheshachor ñeñ otaten oneñet
(Mt. 17.14-21; Mr. 9.14-29)

³⁷ Tsapatña allempo huaçhenet aspentotpa' allñapa' shonte' acheñenesha' ñeñ huaçha'ttsa ñeñ pocterrahuet.

³⁸ Allo'tsen puesheñarr yacma ñaña'pa' atet otosan Jesús:

—Maestro, napa' atarr nemneñ o'ch pentennana' nacñeter. Napa' e'ñe ñeñfetollapa nepatrror.

³⁹ Ñapa' ñerra'm esempo rromueñ oneñetpa' çhach rranare'ta o'ch otachpa' o'ch ata'tach patso çhach amtan pa'po'. Attoña atarr atserrpatsetateñ. Ama mueno o'ch a'rroyer.

⁴⁰ Napa' o' notuosnañña peyochresha' o'ch caçhpatateret oneñet tarraña ñetñapa' ama erro't peto attoch caçhpatateret oneñet ñeñ atarr mueroçhtatene'.

⁴¹ Jesúsña'pa' atet ot:

—Sapa' ñeñtes acheñres ama't mameshapa' ama ayemtenaye' sentpenno, çhach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attotpa' o'ch same'ñerrna.

Allempoñapa' atet otan yacma ñeñ otene' o'ch a'crratoñ puechemer:

—Te'pa' o'ch ñanmon pechemer arr.

⁴² Allempo aneñ Jesúseshopa' oneñetñapa' alla rromuer-ranerr cheshachor o' alla otatererrr alla ata'tatererrr patso. Jesúsña'pa' atet otapan oneñet:

—Te'pa' po'ñoçh o'ch notañ, pecaçhpa'nerñaca'yeña añ cheshachor.

Allempo a'crrater Jesús o' alla apuerrñañ pompor.

⁴³ Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúsapa' eñotaterraneterr puepocheño ñapa' çhocmach muetseret
(Mt. 17.22-23; Mr. 9.30-32)

Atta epaye' cohuanrrorteñet atarr cohuen enteññañet po'partsoña, tarraña Jesúsña'pa' alla yerpaterranerr pueyochresha', ñeñpa' atet otanet:

⁴⁴ —Te'pa' se'mñoten e'ñe cohuen, amach sepsatsterrnano neñoñ ñeñ atet notenes te'. Na Ñeñten Acheñetosetspa' pomataterrnetcha' attoçhña erro'tuanencha' perrnet.

⁴⁵ Ñeñña ñoñetspa' ñetñapa' ama't puesheñarrofetapa' ama eshcaye' eñotenaye' enteñeto tarro'mar ama çhena' allempoch

čhapanet pueyočhreto. Ñetña pueyorñotetpa' ama eseshaye' a'p̄to'tenaye este' otenanetña atto eñorana'tenanet.

All eñotateney ñeññ acheñer e'ñe po'ñočh atarr asherben enten Yompor

(Mt. 18.1-5; Mr. 9.33-37)

⁴⁶ Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeññey atarr sherbets ñeññey atarr añcha'taretöyen enteney acheñenesha'.

⁴⁷ Jesúsñapa' e'ñe eñotenanet ñeññ atet cotape'chatse'tyenet ñet pueyočhreto atto e'ñe cohuen entyenet e'ñe ñañeñeta. Ñaña'pa' chesha'tolla chore'tpa' tomach e'ñe ñesho,

⁴⁸ allempoña'pa' atet otanet:

—Erra'tsenotes sa ñerra'm e'ñe cohuen saguëñ ama't ñeññ ama asherbenaye' enteneto atet ñerra'm añ chesha'toll tarro'mar sapa' na same'ñena, na'ñaña e'ñe cohuen saguëñ. Elloña ñaña erra'tsenotes sa ñeññes naguëne' na, ama e'ñe naptocheye' saguëno, añe'ñaña saguënnan Nompör ñeññ nellensene'. Tarro'mar ñerra'm erra'tsencha' pocte' entene' o'ch yenpuenan ama't ñeññ ama esoye' enteneto, ñetña'pa' atarrcha' po'ñočh asherben entenanet Yompor.

Atto eñotateney ñeññ ama čhoye' yepatare'tenaye ñeññña po'ñočhpa' e'ñe parrocmayeyenpanna

(Mr. 9.38-40)

⁴⁹ Allempoña pueyochresha' ñeññ Juanpa' atet otan Jesús:

—Maestro, ya ahuañapa' atet yeñch puešeñarr yacma ñeññ cačhpatatene' oneñeñ acheñ. E'ñe puečhore'teñotep̄ pa peso'chñopa' oneñe'pa' cačhpa'nerran acheñ. Yañapa' ama pocteye' yeñche tarro'mar ñapa' ama parroye' yeyemteno. Ñeñño'marña yapa' yoch:

—Amach atet pe'patsto.

⁵⁰ Jesúsñapa' atet otanet:

—Amachca'ye sepatare'tatsche tarro'mar ñerra'm ama čh epatare'tenye yamña ñeññña po'ñočhpa' e'ñeca'ye parrocmayeyenpanna.

Allempo Jesús'pa' cotape'chaterran cohuen pueyochresha' epsheña, ñeññpa' Jacobo ñaña Juan

⁵¹ Chapmoch allempoch o'ch alla ahuer Jesús pue'ntañopa' ñaña'pa' atarr sechena o'ch ahuer Jerusaléño. Ñeñño'marña mueñan pueyochresha' ñeññcha' otrra'tatsa

⁵² o'ch ahuet samario'marnesha' pa'netsro o'ch e'noset muets allcha' čhap ñaña Jesús allcha' amesnom epuet pueyochresha'.

53 Tarraña samario'marnesha'ñapa' ama mueneto o'ch agaparettet all pa'netsreto, tarro'mar ñetpa' eñoteñet arr sechenet o'ch ahuet Jerusaléño.*

54 Ñeñto'marña Jacobo ñaña Juan ñetñapa' atet ochet Jesús:
—Partseshacha' ¿ama't pocte' penteñe yapa' o'ch yenam huapuepa' tso' entot? allochñapa' ñeñtcha' a'poyatatuerrahuet ñeñtcha' e'ñe a'chencatuerrahuet ñeñt atet pe't Elías ñeñt a'mtaye't Yompor po'ñoñ ahuat.

55 Jesúsñapa' atta cohuanetpa' atet otanet:

—Ñeñt atet soctape'chatse'tyenpa' ama't mameshapa' ama pocteyaye. Ama't señoteñeña Yomporpa' ama atteye' cotape'chatenyehña Puecamquëñoç. Ñeñt semnen sapa' po'poña cotapñats.

56 Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'queshpatos allohuen acheñenesha'.

Allempoñapa' o' metaçha'tet allotpa' ahuanmuet po'poñ anetso.

*Allempo Jesúsapa' yeçhatan ñeñt muenene' o'ch coter
(Mt. 8.19-22)*

57 Po'pocheñoñapa' allempo oñemyenet toño'mar allñapa' poctanet puesheñarr yacmapa' ñañaapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' pechopeñe'chyes.

58 Jesúsñapa' atet och:

—Te'pa' napa' peñotencha' ama't nepacllapa' ama necheñe all neyçhenañ. Ro'quëppa' çhocma eñall pa'pon allecma yeçhena.† Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñt e'ñe nepaquëll nepen allcha' neþanena.

59 Po'pocheñoña Jesúsapa' atet oterranerr po'psheñeñ acheñ:

—Te'pa' o'ch þocta'n attoch po'ñoçh neyochresha' neperreþ.

Tarraña ñeñtña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctapñ.

60 Tarraña Jesúsapa' atet och:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñatecmuet. Tarraña þocoppa'

* 9:53 Ñehua, yapa' yeñoteñ samario'marnesha'pa' ama mueno o'ch amo'tstana jerusaléño'marnesha' ñeñfara judionesha'. † 9:58 Ñehua, Jesús añ toma'ntacha zorra ñeñt berrotets all pa'nyo.

ñeñteḡ o' peyerpuera Yompor añ poctetsa o'ch auyeseḡ ser-
rpare'tyese' Yompor po'cohuenña ñeñt atto atarr ayochre-
shattena ña.

⁶¹ Po'pocheño allempo serrpare'ten Jesús epuet ñeñt
ame'ñenaya, ñeñtña acheñerpa' atet otan Jesús:

—Napa' Ayochreshate po'ño'chcha'ca'ye noctañ. Te'pa' ato't
nasuerra' nepaclo attoch neso'tera' namo'tsesha'; allem-
pochña alla nohuerrerrpa' o'ch noctañ.

⁶² Jesúsñapa' atet och:

—Ñeñt ama e'ñeye' ma'yo'chrenaye attoch torrenet e'ñe
cohuen Yomporecop, ñeñtña acheñerpa' amach e'ñe cohue-
naye' sherbeno attoch e'ñe epatuan Yompor po'cohuenña
ñeñt atto atarr ayochreshattena ña. Ñeñt acheñerpa' atetcha'
netma'ntacha: Ñerra'm esesha' orrene' etamapets attoch eta-
man pats e'ñe cohuen pa'charr pa'mro, ñerra'm pa'che'ñonña
cohua'nom ama't mameshapa' amach etsotanoña etamapets
attoch e'ñe pa'charr etaman pats allcha' nare'tatset' pa'mro.

10

*Atto Jesúsapa' mueñan pueyochresha' ñeñt can'chroch
charrasheña ñeñtcha' otatsa*

¹ Allempoña Partsesha'pa' alla llesenserranerr po'potantañ
pueyochresha' can'chroch charrasheña ñeñtcha' otrra'tatsa
o'ch serrpare'tyesnomuet. Ñetpa' atetcha' pa'nmuet
e'ñech epsheña'tsocma tet. Arrcha' ta'yeset ora allohuen
anetso'mar ñaña ama't allampaño'mar; allochñapa' allcha'
oñem ñaña tsapatonet Jesús.

² Ama ahuaneneta' Jesúsñapa' atet otanet:

—Shonte' narmets ñeñt nanac ellom're'tets ñeñtcha'
a'yapa'chetañ. Tarraña ataruasañña ñeñtcha' a'yapa'che'pa'
ama atarr atonayaye. Te'pa' añcha'ña sanamoñ pamo'mte'
mueñanepa'ña ñeñtcha' a'yapa'cherrets pa'mro. Ñeñt'pa' atet
toma'ntatanet Jesús atto atarr shonte' acheñenesha' ñeñtcha'
ame'ñerrtsañ tarraña ñeñtcha' ame'ñaterrahuetpa' ama atarr
atonayaye. Añcha'ña yenam Yompor ñeñt Yamo'mte' yepen
mueñanepa'ña pa'taruasañer ñeñtcha' torra'yerrtsa ñocop
allemñ anetso'mar.

³ Ñaña sapa' ñerra'm o'ch ahues te'pa' seño'chcha' po'ño'ch
chocmach eñall ñeñtcha' se'moñe'te' ama't sapa' amach cho
errot sepenanetañe ñet. Ñeñto'marña notenes te'pa' o'ch
nemñas e'ñech attes ñerra'm carrnero o'ch ahuo' allo'tsen
ma'yarro'chno.

⁴ Ñaña amach sanmatsto quelle, ama't sebolsa, ama't
po'ptaña sesapatpa' amach sanmatsche. O'ch ahues

sema'yorñecma. Ama't esesha'ch sehuomñcha'tyesnom toño'marpa' amach alla so'chtatsto.

⁵ Allempoch seçhap ama't erra'tsena anetsro all sesen, ama't erra'tsena pocoll allcha' seçhappa' ñanomcha' atef seposa. E'ñe sehuomñcha'teñoñ ñeññ apacllatesha'pa' o'ch senamatosñañ Yompor pa'nateña. Ñerra'm ñetña po'ñoçh e'neññañet Yompor pa'nateña, Yomporñapa' a'natenanetcha'.

⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña.

⁷ Ñeñte pocollro allcha' e'ñe cohuen agapaset allach sa'posa. Ñeñt rrenet ñet ñeñtcha' rratapaset, ñeñtach serros samã. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro.

⁸ Ama't erra'tsena anetsro allcha' seçherrerr allcha' e'ñe cohuen aguërrseterr, ama't errofena rreñets apasetpa' ñeñtach serros.

⁹ Allñapa' sa'crratyesoscha' ñaña ñeññ atsna'tyets. Allcha' seserrpare'tatyesosanet, atetcha' sotos: "Te'pa' o' yeçhapatonas Yompor po'cohuenña ñeññ atto ayochreshattena ña. Aña palltetsa o'ch same'ñera attoch e'ñe çhaponasa seyoçhro."

¹⁰ Tarraña ñerra'm erra anetsro allcha' seçhap ñeññ allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señoatnomanet. Ñeñtpa' atetcha' sotnomanet:

¹¹ "Ama't pats ñeññ o' cheta yetco arr sa'netsro, te'ñapa' o'ch yepa'shetca'tyesnoma attoch señoçh sapa' ama't mameshapa' ama pocteye' entenso Yompor. Tarraña ama't atteñpa' te'pa' o'ch neñoatnomues Yompor po'cohuenña autsa çhaponasañ ñeññ atto ayochreshattena ña."

¹² Allempoña Jesúsapa' alla oterranerr pueyochresha' allempo ama seneta':

—Po'ñoçh te'pa' o'ch notas, esempohuañen allempoch a'craçetetuerra allohuen acheñenesha'pa' añ anetso'marnesha' ñeññ ama cohuenaye' sagapaye te', nanaccha' yoroçheno'tsenterret allempo. Ama't sodomo'marnesha'pa' amach tama yoroçheno'tsenterreto atef ñerra'm ñeññ anetso'marnesha' ñeññ ama cohuenaye' sagapaye te'.

Atto Jesúsapa' eños epo'mar anetsocop all ama ame'ñyeto (Mt. 11.20-24)

¹³ Allempoña Jesúsapa' alla oterrer:

—Nanaccha' llequëñtso'tsa'yenes coraziño'marneshacha'; nanaccha' llequëñtso'tsa'yenes samã betsaido'marneshacha'.

Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attochña e'ñe orrtetañ cha llecatenanet po'chñar, cotnashe'mach chorra'yesetañ, tsapñach epachshema'tyenetañ all anorrcha'tyenet puellquëñoñet.

14 Ñeñto'marña te'pa' notenes, esempohuañen allempoch a'craretetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'terreto allempo. Coraziño'marneshacha' ñaña betsaido'marneshacha' saña allempopa' atarrcha' coñchaterrset.

15 Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso.

16 Jesúsña allempo ama sena' pueyochresha' o'ch serpare'tyeneta' anetso'mar ñaña'pa' alla otterraneterr:

—Ñerra'm esesha'ch se'mñotapue' sa, na'naña e'mñotenet. Tarraña ñerra'm esesha'ch ama sagapaye sa, na'naña ama aguëneto. Ñaña ñerra'm esesha' ama mueno o'ch agapnet na, Nompore'naña ama mueneñeto o'ch agapet tarro'mar ñapa' ña nellsensene'.

Arrpa' allohua ñeñt atet otan pueyochreshachno ñeñt canchroch charrasheña. Allempoñapa' mueñanet allcha' serpare'tatyesnomuet.

Atto huaçherra Jesús pueyochresha' ñeñt canchroch charrasheña

17 E'ñe allponmatatsapa' o' alla huaçherra pueyochresha' ñeñt canchroch charrasheña. Ñetñapa' e'ñe pocsheñeshocmañen huaçhenet Jesúsesho. Atet serrpare'tatueñet:

—Partseshacha' ama't oneñe'fe'chnopa' e'ñe ye'cha'nma'cha'tatue e'ñe ye'chore'teño' ña peso'chño.

18 Ñaña'pa' otapuenanet:

—Napa' neñchca'ye oneñe' allempo aprratamñpsaretta po'huamenc. E'ñe attema't ñerra'm ñapa' o' cha'nmachet ento' atet pena meratste' huetsa ento' o'ch chap a'ne patsro.

19 Po'ño'chca'ye napa' atarr ahuamencat ne'pa'yesapas. Ama't allohuen ñeñt se'moñe'tyene' sañapa' ñeñtecopña nellsensa'yesas allochñapa' attoch e'ñe sa'mchechatyesuena' allohuen pa'namen, ama't shechpe'chno ñaña yellasochno,

e'ñe sa'tmama'teño'tpa' e'ñe sa'peptse'tatse'tueña'. Allochñapa' amach eñallettere'te ñeñ'tcha' semuerochtate' ama't patrra.

²⁰ Ama't atarr ahuamencateseñ atto o' sa'mchechatyesuahue oneñe'techno, amachña ñeñ'ta atarr socshatsto. Añcha'ña e'ñe socshena atto aquellca'yesaretes seso'cheñ Yomporesho ñeñ't pue'ntañ'o'tsen.

Atto Jesús'pa' atarr pocsheñsha' ma'yochena

(Mt. 11.25-27; 13.16-17)

²¹ E'ñe allempoña Jesús'pa' atarr coshateñ Parets Puecamquëñ. Ñeñ'to'marña ñapa' e'ñe pocsheñesho't ma'yochenana Pompor, ñeñ'tpa' atet oten:

—Na Apacha' o'ch na'ye'chochtatonap, papa' pa ñeñ'tep atarr ayochreshattetsa pe'ntañ'o ama't ñaña arr patsro. Na'ye'chochtatonap tarro'mar ora añechno ñeñ't pecohuenña pepen, ñeñ'tpa' ama arreye' pechapateñe pueyo'chro ñeñ't atarr eñotañ entyetsa. Papa' aña pechapaten pueyo'chreto ñeñ't ama eñotañeye' entetso. Tarro'mar Apa e'ñe pemuereño't ñeñ'tpa' atetña e'ñe pocte' penten pa. Arrpa' allohua ñeñ't atet ma'yochenana Pompor.

²² 'Nomp or allohuen po'cohuenña e'ñe eñotatuenen. Na ñeñ'ten Puechemerenpa' ama po'ño'ch eseshaye' neñotenaye, ñap'taña Nomp or eñotenen. Nomp orpa'cho'ña ama po'ño'ch eseshaye' eñotenaye, nap'taña na ñeñ'ten Puechemeren e'ñe neñoteñ Nomp or, ñaña erra'tsencha' ñeñ't e'ñe pocte' nenten na ñeñ'ten Puechemeren ñeñ'tñapa' o'ch neñotater Nomp or.

²³ Allempoñapa' alla cohueranerr pueyo'chresha'pa' atet otanet e'ñe ñocueta:

—Atarr cosheñ'tso'tsa'yenes sa tarro'mar e'ñe sa seclloyotpa' o' senterrñañ Yomp or po'cohuenña.

²⁴ Po'ño'chca'ye notenes e'ñe ahua'toteñpa' shonte' ñeñ't a'mta'yesaye't Yomp or po'ño'ñ ama't ñaña ñeñ't añcha'tarettatse't allempo, ñetñapa' atarr muenetañe't o'ch enterrñañetañ Yomp or po'cohuenña ñeñ't o' senterr sa te'. Tarraña allempo ñetpa' amaña eseshaye'ña enterrapaye Yomp or po'cohuenña. Ama't atarr muenetañe't o'ch e'mñoterrñañet Yomp or po'ño'ñ ñeñ't o' se'muerr sa te' tarraña allempo ñetpa' amaña eseshaye'ña e'muerrapayeña Yomp or po'ño'ñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñ't atarr etsotene' ñoñets ñeñ't atet anaret judioneshacop, ñaña tantapa' atet otan Jesús attoch eñoch erro'tente' ye'chaten ña, ñeñ'tpa' atet och:

—Maestrocha' ta', ¿erro'tena'tcha' ne'paña na e'ñe cohuen attoch napa' corretsanach e'ñe tayoteñ ama't errponañohuen?

26 Jesúsña anaḗpa' atet och:

—¿Erroḗena't otenña ñoñets ñeñt atet anaret ahuatoteñ?
¿Eso'tña ñoñtsor pelleyenña ḗa ñeñt anaret all?

27 Ñañaḗpa' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyoḗhrocmañen. Ñaña e'ñe yecamquēñoḗ yemorreñchach e'ñe yehuamencohuen, ama't ñaña ora yocḗaḗñohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

28 Jesúsñaḗpa' atet och:

—Atetca'ye e'ñe atet ḗoten. Ñerra'm atetcha' e'ñe peḗohuapa' ḗañaḗpa' corretsapach e'ñe tayoteñ ama't erponañohuen.

29 Ñeñtña acheñerpa' aña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'ḗto'terranerr Jesús:

—Ñehua, te'pa' o'ch ḗoten ¿esesha'tña ñeñt e'ñe po'ñoḗch namo'ts nepen?

30 Attoch eñotach ñeñt e'ñe po'ñoḗch amotsot entetsa ñeñt e'ñe pamo'ts ḗannena, Jesúsñaḗpa' atet toma'ntacha, ñeñtḗpa' atet serrpare'tach:

—Eñall puesheñarr judionesha' ñeñt huetsa Jerusaléñoḗ, ñapa' arr sen Jericó. Toñoñapa' alla rromaḗ eñet e'ñe pueratamḗsatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrḗapue'pa' ahuanerret.

31 Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñañaḗpa' ama't entospa' atta oñmatse'tamḗpesya a'yo'marpa' o' metane.

32 Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atta oñmatse'tamḗpesya a'yo'mar o' metane ñaña.

33 Allempoña tematerrerr o' huapa ñaña puesheñarr ñeñt ama judioneshayaye ñeñtḗpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserpenetpa' atarr muerosya.

34 Allenta ponmosya, shosñañ olivose* ñaña vino allo partosñañ all atserrpeñet.

Allempoñapa' huanquerrñañ all atserrpeñet. Tantaterpa' montacha pashanoropa' aneñ allcha' mos. Allñaḗpa' all cohuanḗpsos.

* 10:34 Olivo ñeñt tsach allot yoreñet puerets pue'merot.

³⁵ Tsapatña' cheta'muenan epa denario apa'muenan apacclatesha' atet ota'mueñ: "Te'pa' pecuanpescha', errponcha' pa'gasta' ello peçllayor, napa' netsa'tuerrpach esempoch nehuerra."

³⁶ Jesúsña'p' alla oterranerr ñeñt'acheñer:

—Ma'psheño'maretpa' p'apa' çerra'tsena'tña pentenña ñeñt' atarr amo'tsof entetsa ñeñt' e'ñe pamo'ts pene' ñeñt' rroma' eñe'?

³⁷ Ñeñt'ña acheñerpa' atet oterranerr Jesús:

—Añca'ye e'ñe pamo'ts pene' ñeñt' e'ñe puemuereño'f par-tatse'terre'.

Jesúsña'p' atet och:

—Te'pa' atetcha' peperra p'aña. O'ch ahuerreppa' atarrcha' pemorrentera ora allohuen acheñenesha'.

Allempo Jesús'pa' çhap pocollo all yeçhena Marta epuet pa'mo'nerr María

³⁸ All oñen Jesús'pa' o' çhap paterr anetso. Allña puesheñarr coyanesha' añ pa'so'cheñ Marta, ñaña'pa' e'ñe cohuen agapan Jesús pa'paclo.

³⁹ Ñeñt'ña Martapa' eñall ñaña pa'mo'nerr ñeñt'pa' añ pa'so'cheñ María. Maríaña'p' all anen Partsesha' Jesús pa'rrp'ot allot e'mñoteññañ ñeñt' atet serrpare'tatenanet.

⁴⁰ Pa'mo'nerrña Martapa' aña e'ñe ma'yochrena a'toram'pse' all puetare'tallme'chen. Ñaña'p' ponmana Jesús'pa' atet otos:

—Ayochreshate, amate' pocte' penteñe napta neptare'tallme'chen; nemo'nerrña'p' ama yenpuenno. Te'pa' o'ch poch a'toram'psapretnepa' nañar.

⁴¹ Jesúsña'p' atet och:

—Noçha Marta, shonte' pa'namen ñeñt' petorra'yena, p'apa' ñeñt'aña atarr pellcatene'.

⁴² Tarraña e'ñe patraña ñeñt' atarr sherbets; ñeñt'pa' atto e'ñe cohuen socshennana neñoñ. Pemo'nerr María'p' ñapa' ñeñt'ña atarr e'nen. Ñeñt'pa' ama't e'ñe esesha amach er-rotenot puerratan'pereto.

11

Atto Jesús'pa' yeçhatan pueyochresha' atetcha' ma'yochet (Mt. 6.9-15; 7.7-11)

¹ Po'pocheño Jesús'pa' alla ma'yocherrerr. O' ma'yochuapa' puesheñarrña pueyochresha'pa' atet och:

—Partseshacha' te'pa' o'ch peyçhatey ma'yochatsa atet pe't Juanañ, ñapa' çhocma yeçhatane't ña pueyochresha' atetcha' ma'yochet.

² Jesúsña'p' atet otanet:

—Ñehua, ñerra'm esempoch sema'yochena atetcha' sot:

Yompore Partso ñeñteḡ pe'ntaño'tsen, yentapepa'ch ḡa atarr Partsoḡ. Chapuepa'ch Nompore allempoch atarr ḡa'yochreshatterra arr patsro. Yetsotonapepa'ch arr patsro ñeñt' atet pemnen ḡa Nompore atet penet ñaña pe'ntaño.

³ Chocmuepa'ch Nompore ḡapueney ñaña yocrram' ñeñt' allpon yepallta'yena pate'tets yeḡ.

⁴ Peḡpretna'huonayepa'ch Nompore allohuen yo'chñar ñeñt' ama pocteye' pentapretenye, atto Nompore yapa'cho'ña yeḡpretnannena ñerra'm esempo erroḡ yeḡannena. Ñaña amach Nompore pemnatatsche sosya'tañ o'ch atarr topateney. Añcha'ña ḡoch Nompore ḡa'ypo'ñataterrey allohuen sosya'tsañeḡhno.

⁵ Elloñapa' alla yeḡhaterraneterr ñeñt' atto e'ñe yenamueñoḡ Yompor apueycha'. Ñeñt'pa' atet serrpare'taterraneterr toma'nteñtso.

—Ñerra'm eñall puesheñarr ñeñt' e'ñe cohuen yeyemtenaya, ama't rroḡh tsapo o'ch ahuey pa'paclo yeḡhore'teñoḡpa' atetcha' yotos: “Napa' masheñcha' añecop nohuena o'ch ḡapuen ama't coñe'ta rreñets,

⁶ tarro'mar o' ḡhap puesheñarr namo'ts ñeñt' huetsa baḡhayoḡ, napa' ama es necheno ama't coñe'ta alloch neyema'cha.”

⁷ Tarraña ñapa' po'ponroḡpa' ñato' ḡhach otapuey: “Amach ḡa'tsrre'moḡhtana'tatstosno tarro'mar o' e'ñe echarr neyottamḡpesuena, allohuen nacñeḡaretolleshohuenpa' o' yemanrra'tuen. Ñeñto'marña ama eshcaye' atantenno o'ch neḡha'nmonaḡa attoch es napap'.”

⁸ Tarraña napa' o'ch notas, ama't ñeñt' atarr yeyemtenaña' ñerra'm ama ḡha'nmaponayopa' yañapa' ñerra'm alla yenamuere'tpa' ḡha'nmaponayach attoch apapuey ama't erra'tsena ñeñt' atarr yenamueñ attoch amach alla ya'tsrre'moḡhtana'tneñe es enamare'te'.

⁹ Ñeñto'marña napa' o'ch notas: E'ñe senamueñoḡ, Yomporñaapa' apascha'. Se'name'teñoḡpa' señchcha', seḡhore'teñoḡ, Yomporñaapa' e'ñe pue'mñoteñoḡtespa' e'ñeḡ cohuen toramḡspas.

¹⁰ Tarro'mar ñeñt' es enamare'tetspa' ñetña es aguḡtset; ñaña erra'tsen ñeñt' es e'nyetspa' ñetñaapa' enteretcha', ñaña erra'tsen ñeñt' ḡhore'tyene' ñetñaapa' e'ñeḡ e'mñotenanet Yompor.

¹¹⁻¹³ 'Yompor ñeñt' pue'ntaño'tsen ḡhocmach e'ñe cohuenare' es apa'yeney ñerra'm esempo es yenamueñ.

Ñapa' amach aña apuenye ñeñt ama cohuenaye' yenteno ya. Ama't sa ñeñtes arromñates atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrñoñ es enamuenes, o'ch enamas mam* ñeñtcha' rra', sapa' ama't puesheñarrofesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarrofesapa' ama aña sapueñeña sechemer shecheñ ñeñt atarr amuerochtatañ. Amapa' ñerra'm pa'me' enamuenes sañapa' ama't puesheñarrofesapa' ama aña sapueñeña sechemer yellas. Ñeñto'marña sa ama't arromñates ama't ñaña atsrre'mñates sapa' e'ñe señoñeñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntañ'o'tsen elloña ñapa' e'ñe eñoteñ atto e'ñe cohuenare' es apa'yenes saña. Ama't Puecamquëñ ñeñt e'ñe cohuen Parets attoña e'ñe cohuen chorratensa allohuenes ñeñtes enamyene' ña.

Atto puesheña'tets oteñet Jesús ñapa' oneñeto' po'huamencot cachpatenanña po'potantañ oneñetechno acheñenesha'

(Mt. 12.22-30; Mr. 3.19-27)

14 Po'pocheño allo'tsen puesheñarr acheñ ñeñt chorrena oneñeñ, cha opanatateñ. Allempoña Jesúsapa' cachpatosan oneñeñ atto chorrenana acheñ. Atto cachpa'ner oneñeñ ñeñtña opanpa' o' alla eñorerra. Acheñenesha'ña allpa' atta cohuanrrorteñet, atarr cohuen enteñet.

15 Tarraña po'potantañechnoña acheñenesha'pa' ama't mameshapa' ama pocteye' eñcheto. Ñetñapa' atet otyeñet:

—Atto cachpatatanan oneñeñ acheñpa' añaca'ye ahuamencat pene' Beelzebú ñeñt pompor pen allohuen oneñetechno.

16 Po'potantañ acheñenesha' ñetñapa' cha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey pepartsoña entot allochñapa' attoch yeñotañ po'ñoñ papa' Parets Puechemereñ.

17 Jesúsñapa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor po'huamencot cachpatenanetña oneñetechno. Ñeñto'marña ñapa' atet otanet:

—Ñerra'm puesheñarr añcha'taret elloptannena pa'cheñer e'ñe ñagattsetapa' e'ñech poctacma a'cclatanna'tuerret. Attecmach ñannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cclatanna'tuerret.

* 11:11-13 Ñehua, Jesús añ toma'ntatanet pan ñeñt puerrar penet all pa'nyo.

18 Attecmach p̄annerra ñāma oneñēt pueyochreshāchno ñerra'm oneñētēchno e'moñe'tannenet e'ñe ñagattseta, ñetña atto huomencatenetpa' chach huañerrets amach allo'na huomencatneneto. Ñeñt̄pa' atet o' notuas tarro'mar sapa' cha sotenen napa' Beelzebo' po'huamencōt necāchpatateññāñ e'ñe ña pueyochresha' ñeñt̄ pompor pen allohuen oneñētēchno. Po'ñōch oneñēt̄pa' amaca'ye huapore'tanneno.

19 Sapa' atet sotenen napa' Beelzebo' po'huamencōt necāchpatateññāñ e'ñe ña pueyochresha', ñehua, te'pa' o'ch notas: Ñeñt̄ seyochresha' sepen sa ñeñt̄ eñotene' ñamet o'ch cāchpatachet oneñēt acheñenesha' ñetpa'cho'ña amaña Beezebú po'huamencoteye' cāchpatateñetoña oneñēt acheñenesha'. Ñetpa'cho'ña Yomporoña po'huamencōt cāchpatatenetña oneñēt. Ñeñt̄ña o' eñotatas ñeñt̄ atet sotenoñ ñeñt̄pa' amaca'ye po'ñōch atteyaye.

20 Po'ñōchca'ye Yompor po'huamencōt necāchpatateñña oneñētēchno acheñenesha' ñeñt̄cha'ña señotate' te'pa' o' nēchapatonas Yompor po'cohuenña ñeñt̄ atto po'ñōch atarr ayochreshattena ña.

21 'Ñeñt̄pa' o' e'ñe notuas atet tarro'mar yeñoteñ ñeñt̄ atarr ahuamencattetsa atto atarr ahuamencattena oneñēt, ñaña'pa' e'ñe po'huamencōt cohuañpesyenan allohuen e'ñe cohuen ñeñt̄ pa'paquell̄ p̄a'yen. Ñapa' po'huamencocmañen na'yenan ñeñt̄cha' e'ñe cohuañpene' all an̄cha'tarettena ña.

22 Tarraña ñerra'm esempo o'ch huapoña ñeñt̄ atarr ahua-mencatesha' ñeñt̄cha' ello metanose'ña po'huamenc atet ñerra'm na Nompor, ñeñt̄cha'ña e'ñe a'mchechatose'. Attoña e'ñe puerratam̄psosñañ ñeñt̄ allpon moñenaya ñeñt̄ atarr yemuetyena ña. Allochñapa' o'ch be'tosos all ñeñt̄ pa'paquell̄ p̄a'yen o'ch e'ñe puerratam̄peshuos ñeñt̄ allpon o'patyena ña.

23 'Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñt̄ña acheñerpa' chaca'ye epatare'tennan ñeñt̄ atet netorra'yena na. Ñeñt̄pa' o'ch netma'ntatasa atet: Ñerra'm esesha' ama na'yapāchapretenaye ñeñt̄ na'yapāchen na, ñeñt̄ña'pa' cha a'parratse'tam̄penen a'yenet.

*Atto Jesús'pa' eñotatanet ñato' oneñēt̄pa' o'ch alla chorrerran-err acheñ allot̄ cha'nom ahuaña
(Mt. 12.43-45)*

24 'Ellonet̄pa' o'ch alla neñotaterserr po'poñonēt: Oneñēt̄ ñerra'm esempo cha'nom acheñeshōt, ñeñt̄ña oneñēt̄pa' o'ch auyes errañaren ama't amayo'mar e'nyese' po'psheñeñ allcha' yēcherrerr allcha' e'ñe amesuerrerr cohuen. Tarraña

ñerra'm amach erra eñchepa' atteñapa' o'ch ot: "Napa' o'ch alla ahuerren nepacillo allot necha'nom ahuaña."

²⁵ Atetcha'cho' pa. O'ch alla ahuer allot cha'nom ahuaña. Allña o'ch cherrpa' eñech cohuen entuerran pa'paquell, eñech cohuen atarrapo'tuareġ, eñech cohuen año'tyesareġ.

²⁶ Allempoñapa' o'ch alla ahuerr allo'tsa'yen pamo'tsesha'pa' o'ch enana' po'poñ cancherrsheña oneñetechno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch yechaprecha. Allohuenetñapa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet patse'tyese't ñenmaġ.

²⁷ Jesús allempo atet serrpare'tatenan acheñenesha'pa' puesheñarrña coyanesha'pa' machayoġepa'tcha' rrana, ñeñtpa' atet ot:

—Ama't ñeñt p̄achor pepen p̄apa' atarr cosheñtso'tsen tarro'mar ñapa' ñeñt pe'ñalletate' p̄a ñeñteġ atarr cohuen es peyeġcaten ñaña ñapa' e'ñe cohuen cohuan̄psaġ allempo chesatollenp̄a'.

²⁸ Jesúsñapa' atet och:

—Elloña allohuenetpa' atarr cosheñtso'tsa'yenet ñeñt pue'mñnoteñoġet Yompor po'ñoñ e'ñe atet p̄ohuenet.

Atto Jesús'pa' otan acheñenesha' ñeñt ama cohuenaye' cotape'chetso ñetñapa' chocma e'nenet partsoteñets

(Mt. 12.38-42; Mr. 8.12)

²⁹ Allempoña acheñenesha' emchorreñet Jesús, ñaña'pa' atet otanet:

—Acheñenesha' ñeñt corra'yetsa te' ñetñapa' ama cohuenaye' cotape'chyeneto. Tarro'mar ñetpa' aña e'nenet ahuo'ch norrtatanet nepartsoteña atto'chña eñotnet napa' po'ñocho'te' Parets Puechemeren ñeñfeno'te' Cristotsets. Tarraña amach es norrtataneto. Napa' añach paterr neñotatanet atet eñotatane't Jonás ahuaġ nínivo'marnesha' allempo a'mtane't Yompor po'ñoñ.

³⁰ Tarro'mar atto eñotatane't Jonás nínivo'marnesha' ahuaġ ñapa' Yomporeshoġ huena, napa'cho'ña te'pa' atetcha' neñotach naña acheñenesha' ñeñt corretsa te' napa'cho'ña Yomporeshoġ nohuena.

³¹⁻³² Tarro'mar ahuaġ allempo serrpare'tatane't Jonás nínivo'marnesha' ñetñapa' allempocma cotape'cherret ello e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soġtape'chenoña ello cohuen Yomporecop. Neñto'marña esempohuañen allempoch a'craretetuerra allohuen acheñenesha', ñeñtña nínivo'marnesha' ñeñt e'ñe

cohuen cotape'cherrets Yomporecop ahuať, ñetpa'cho'ña orrterretcha', ñeñtcha'ña señoťaterre'ña sapa' ama't mamesha ama pocteyayeña ñeñť atet sepa'yeseť tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeñť atet pa ahuať puesheñarr coyanesha' ñeñť amcha'tarettatset atarr bačhayo allohuanen pats sa'ponet. Ñeñťña coyanesha'pa' alloteñ on o'ch e'mñnotenana' Salomón pueserrpareñ ñeñť atet atarr eñotañteť. Te'ña arr e'ñe seshopa' allo'tsenen ñeñťen puesheñarrana ñeñťen atarr es neñoten ñaña, ello nemtaneñ atto eñotañteť Salomón. Tarraña sañapa' amaña es sotapoteno. Ñeñťo'marña esempohuañen allempoch a'crareťetuerra allohuen acheñenesha', ñeñťña coyanesha' ñeñť e'ñe cohuen e'mñnotatset ñapa'cho'ña orrterrach, ñeñťcha'ña señoťaterre' sapa' ama pocteyayeña ñeñť atet sepa'yeseť tarro'mar sapa' ama es sotapote'te ama't e'ñe mamesha.

Atto yecle'pa' añ toma'ntena ñeñť po'lampareñ pen allohuen yechets

(Mt. 5.15; 6.22-23)

³³ Jesúsapa' alla serrpare'taterraneterr, ñeñťpa' atet oterraneterr:

—Ñerra'm esempo ya'llchaten lampareñ, ñeñťpa' ama tarrecpaye' ya'huortateñe o'ch yene' o'pono e'ñe a'nareťo. Ñaña ama añecpaye' ya'llchateñe o'ch ye'rramam̄pes coyño. Ñeñťpa' añecopña ya'huortatenña lampareñ o'ch yene' enonet attochña e'ñech choyo'tam̄pesuan allohuen acheñenesha' ñeñť be'toschets all pocollo.

³⁴⁻³⁵ Yecle'pa' añ toma'ntena atet ñerra'm ñeñť po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entateney puetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsam̄psarettenet. Tarraña yecle'ña ñerra'm ama e'ñe cohuen huom̄cheyayepa' amach e'ñe cohuenaye' entateneye puetare' attochña amach eshcaye' torratyenano allemeñ yechets tarro'mar čha ottena ñerra'mrate' checmeto'tsa'yeneta. Attecma pena ñaña yeyočer. Ñerra'm e'ñe cohuen yoctape'chyen yeyočropa' attoña chennayaña yeyočhro e'ñe ora allohuen Yompor poctařña ñeñť po'cohuenna pen. Attoña ora yoctařña e'ñech a'puetarsam̄psareťtena Yomporeshoť. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyočhro, ñeñťpa' amach erroťenot a'puetarsam̄penyeña ñeñť yoctařña yepen. Ñeñťña yoctařña yepenpa' čhach a'checmetam̄pennay yeyočer.

36 Tarraña ñerra'm po'ñoçh e'ñe cohuen yocape'chen yeyoçhro, attoña çhennayaña yeyoçhro e'ñe ora allohuen Yompor poçta'ña attochña yeñoteñ orrtatyese' ñeñt e'ñe cohuen enten ña. Attoña e'ñech cohuen es ye'pa'yen atet ñerra'mrrate' lampareñ e'ñe cohuen çhoyo'tampeney attoch e'ñe cohuen es yentyen. Allempopa' o'huañcha' allo'na yecheçmetampesnen.

Atto Jesús'pa' a'metare'tenan fariseonesha' ñeñt atet yeçhenet ñetpa' ñeñt'pa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 20.45-47)

37 O' serrpare'tatuanet Jesús'pa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo çhap Jesús allpa' be'tosos anorros allcha' rrallme'chapretosan ñeñt hua'ñene'.

38 Ñeñtña fariseopa' entenan Jesús atto ñapa' ama e'pota'to ñeñt atet yeçhena judionesha'. Ñehua, ñetpa' atet yeçhenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet co'tape'ch Jesúsocop:

—Ta'm, eso'marte'ca'ye amaña e'pota'tenoña ñeñt atet poçtetsa Partsocop.

39 Partseshañña Jesús'pa' atet toma'ntatana ñeñt atet pena allohuen fariseonesha', ñeñt'pa' atet otan ñeñt hua'ñene':

—Ñeñtes fariseoneshas sapa' e'ñe se'pame'teneñña setaza eno'tpa' o'pono'tña'pa' ama se'parro'teñe. Seplatopa'çho'ña eno'ta e'ñe se'pata'teñ o'pono'tña'pa' ama se'pata'teñe. E'ñe atet sepena samña. E'ñe sa'cohuentatena ñeñt eno'mar ñeñt atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'pono't seyoçhropa' ama sa'cohuentateñe, allña'pa' e'ñe chorren shonte' sosya'tsañeçhno ñeñt atto e'ñe seshquëño't çhocma es seprratampesyen, seshonten pa'namen ñeñt ama poçteye' entapretenso Yompor.

40 Cha sottena ñerra'm erra'tsen puesheñarr acheñ ñeñt ama es eñoteno. Ama't seño'teñeña Yomporña ñeñt yeçhcatyene' allohuen ñeñt allpon yentyen arr patsro, ñeñt a'yote'tsa'yen yesho't ñeñtara Yompor ñeñt yeçhcate' ñaña yeyoçher alloch e'ñe cohuen yocape'chen o'pono yeyoçhro.

41 Ñerra'm o'ch po'ñoçh soçtape'cherr cohuen seyoçhro Yomporecop attochña e'ñe cohuen seyoçhrocmañen es sapa'yen attoch seyepa'yeyñ po'potantañ. Ñerra'm atet'cha' seperrapa' Yomporña'pa' e'ñech cohuenare' enterres.

42 'Atarr llequëntso'tsenes sa ñeñtes fariseoneshas tarro'mar ama atteye' sepeno ñeñt atet o' notuas. Ora

allohuen ñeñt̃ senarenñ sepen ama't chocma sapueñeñ Yompor allpon ñeñt̃ poctetsa ñocop —mentapan ñaña rudapan. Tarraña añña ñeñt̃ nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñt̃ atetpa' sañapa' ama soctape'cheñe ama't mamesha. Sapa' ñeñt̃ña sepalltena o'ch e'ñe atet se'pohua. Tarraña ñeñt̃ atto chocma es sapa'yen Yomporecop ñeñt̃pa'cho'ña amach seca'chpatsche.

43 'Atarr llequëñtso'tsa'yenes sa ñeñtes fariseoneshas tarro'mar sapa' e'ñe sommo'cheño't atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' añña atarr semnen o'ch sanorrcha'tyen judionesha' po'prahuo allecma anorryen ñeñt̃ atarr añcha'na'tpo' enten allohuen acheñenesha'. Ñaña sapa' añña atarr semnen allohuen acheñenesha'pa' o'ch huom'cha'tenset pueñcha'naño't ñerra'm esempo sechopeñe'chen toño'mar allecma chopeñe'chyen allohuen acheñenesha'.

44 'Atarr llequëñets socop, tarro'mar sapa' e'ñe attes ñerra'mrrate' apampaña ñeñt̃ amach orrteno eno't all apampare'ttena arromña't o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromña'tap all e'ñe chorren sosya'tsañ.

45 Allempoña puesheñarr ñeñt̃ atarr etsotenayeñ ñoñets ñeñt̃ atet anaret̃ judioneshacop, ñaña'apa' atet otan Jesús:

—Maestro, ñeñt̃ atet p̃oten ya'ñaña cha muene' pepencaten.

46 Jesúsña'apa' atet och:

—Sapa' ñeñtes atarr etsotenayeñ ñoñets ñeñt̃ atet anaret̃ judioneshacop, sapa'cho'ña atarr llequëñets socop, tarro'mar sapa' atarr es sena'yeññañ acheñenesha' ñeñt̃ atarr echarrare' entyenet ñet, po'ño'chpa' amach erroteno't e'ñe atet p̃ohueto. Sapa' ama't mameshapa' ama ayenpuenaye' sentpenaneto.

47 'Llequëñtsa ñaña socop tarro'mar sa te'pa' satomaten eno't ñeñt̃ atarr cohuen senten sa all pampa'yesete't ñeñt̃ a'mta'yesaye't Yompor po'ñoñ ahuat ñeñt̃ muetsanatyese't ñeñt̃ satañneshañ sepe't.

48 Sapa' e'ñe seño'teññañ sa'tañneshañ atto ñetpa' muetsanachete't ñeñt̃ a'mta'yesaye't Yompor po'ñoñ tarraña sapa'cho'ña ñeñt̃aña e'ñe pocte' senten saña ñeñto'mar te'pa' e'ñe sa'cohuentañpenanet all apampare'ttenet.

49 'Ama't Yompor ahuat, e'ñe pueño'teño'tpa' atet ote't: "Napa' o'ch nemñe acheñeneshesho ñeñt̃cha' a'mtene' neñoñ ñaña ñeñt̃ nellensarnesha' ne'pa'yen. Tarraña patantarrña

acheñenesha'ñapa' cha muetsanatanet, po'potantaññapa' cha cotare'tyeset."

⁵⁰ Attoña e'ñe allempoteñ ayeçhcataretta añ pats, ora allohuen ñeñt' a'mta'yesaye't Yompor po'ñoñ allpon ñeñt' amt-sanatyesearetatse't ashataretetyesete't po'rras, sañapa' allempoteñ e'ñe sa'yohuarettena teme'ttsen sa ñeñtes corretsa te'.

⁵¹ E'ñe allempoteñ muetseret Abel tarrempohua allempo muetseret ñaña Zacarías ñeñt'pa' alla semtser Parets po'ponro puecha'petaro't allo'tsen altar allotecma sherbete't Yompor. Po'ñoçhca'ye notenes añenesha' ñeñt' corretsa te' atarr ayohuarettenet.

⁵² 'Llequënts'a socop ñeñtescha' e'ñe etsotenayeñ ñoñets ñeñt' atet anaret judioneshacop tarro'mar sapa' cha seprrratampeñ acheñenesha' ñeñt' alloch enteret ñeñt' e'ñe po'ñoçh alloch queshperret. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña çhocma sepatare'teñña po'potantañ ñeñt' e'nene' Yompor po'cohuenña.

⁵³ Allempoña ñetpa' e'ñe pa'tsrre'mueño't atarr es a'p'to'tare'tyeset Jesús.

⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateño'tetpa' attoch otteñe'cheñet.

12

Atto Jesús'pa' yeçhatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt' huaçhenoya Jesús, shonte' nanac patoner. Cha che'muechoset Jesúsesho atta atmatca'tanna'tyesoset. Jesúsña ñanompa' alla serrpare'taterranerr pueyochresha', ñeñt'pa' atet otanet:

—E'ñech seño'ta ñato't semeñe'teña' fariseonesha' pocta'pña, tarraña ñeñt' pocta'pña penet ñetpa' ñeñt'pa' ommo'cheñts'a. Ñeñt'pa' mametollapa' o'ch epa'hua erraparen e'ñe atet pena ñerra'mrrate' chase' mametollapa' o'ch e'ñe es a'chasa'hua.

² Tarro'mar yapa' yeñoteñ allohuen ñeñt' allo e'ñe a'nahua shecare'tyenet te' esempohuañenñapa' a'metam'psaretterretcha'. Ama't allohuen ñeñt' e'ñe a'nasotyenet te'pa' esempohuañenñapa' e'ñech eñotatarefetuerret.

³ Ñeño'marña ama't erra'tsena seserrparen e'ñe a'nahua te' esempopa' seño'tatuercha' ora allohuen acheñenesha'. Ama't erra'tsena ñeñt' atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yemcha'tatsto ñeñtcha' muetse' yechets, añcha'ña yemcha'na't Yompor

(Mt. 10.28-31)

4 Te'pa' o'ch notas masheñeshacha', amach añña semcha'tatsto ñeñtcha' semtse'. Tarro'mar añach muetsonaset sechets, secamquëñña'pa' amach erroteno't muetsonaseto.

5 Añña'ña semcha'na't Yompor tarro'mar ñerra'm ñña muenats e'ñe ñña po'huamenco'tpa' o'ch a'chencatonay ye'chets, yecamquëñña'cho'ña o'ch mueñonay coñcheñtso all parraren tso'. E'ñe po'ño'ch notenes, Yomporcha'ña semcha'na'ten.

6-7 Elloña te'pa' napa' o'ch notas, chocmach seyemcha Yompor, po'ño'ch ñapa' ñach secuanñpene'. Ama't otetollesha'pa'cho'ña chocma cohuanñpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset, amnar otetollesha'pa' ñeñtcha'pa' ama tsa'teyaye, e'ñe eptallatolla centavo tsa'tena. Tarraña ama't atteñ Yomporña ama't patra otetollpa' ama pueseñe. Ñeñto'marña notenes, ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a' nasotpahuo Jesucristo acheñesho'mar

(Mt. 10.32-33; 12.32; 10.19-20)

8 Elloña napa' o'ch noterrser, allohuen ama't erra'tsencha' ñeñtcha' ama na' nasotenaye acheñeshesho, napa'cho'ña Ñeñten Acheñetosetspa' amach na' nasotuerraneto nanña Nomporesho allo'tsa'yen epuet po'mllaño'teñnaneshar.

9 Tarraña ñerra'm esesha' na' nasotenaya na arr patsro acheñeshesho, napa'cho'ña na' nasoterranetcha' Nomporesho allo'tsa'yen epuet po'mllaño'teñnaneshar.

10 'Ñerra'm esesha' nesesene' na Ñeñten Acheñetosets ñeñtcha' apretna'po' nenteñ. Tarraña ñerra'm esesha' añ achmāre'tenet Parets Puecamquëñ ñeñtña'pa' ama apretna'pahuoye' nenteñe.

11 Naña o'ch noterrser, ñerra'm esempoch anmaset judionesha' po'prahuo allcha' a'metare'tamñpsaset añcha'taretesho, sañapa' amach cha sellca'psatsto, amach cha sotapsa'tatsto: Errotuachca'ye notoste' attoch cohuen nanapos, esuachca'ye notte'.

12 Sapa' añcha'ña señoratosé Parets Puecamquëñ e'ñe allempo a'p'to'tare'tenset all.

Ñeñt e'ñe añña muenen o'ch esocmañen echyes, ñeñtcha'pa' atarr yoro'cheno'tsen

13 All che'muechen shonte' acheñenesha' Jesúsesho, puesheñarrñapa' atet otan Jesús:

—Maestro, te'pa' o'ch p̄oton nemo'nasheñ nepo'nar apuer-nepa'ñaca'yeña namña ñeñt̄ allpon o'patatnomna nomporeñ.

14 Tarraña Jesúsñapa' atet och:

—Masheñcha' napa' ama eseshaye' nenaye ñeñt̄encha' a'pocstatene' ñoñets attoch soten o'ch napa'yesas allpon o'patatyenset.

15 Alla oterraneterr Jesús:

—E'ñech señota sañeña, ama't seyoçhrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñt̄pa' ama añecpayaye alloch esocmañen es yechyerr ñeñt̄cha' atarr yocshatterre' tsapatonet.

16 Ñeñt̄pa' atet otanet toma'nteñt̄so:

—Eñall puesheñarr acheñ atarr nanac eçllayoret. Allña po'patsñopa' shonte' nanac aton a'yeçhcaten.

17 Ñeñt̄ña eçllayoret̄pa' atet cotape'chen pueyoçhropa' atet oten: “Errotuachca'ye ne'pa'ña, ñeñt̄ atarr nanac aton ne'totaten amaca'ye eñalleña allcha' e'ñe nañño'tue.”

18 Allempo atet cotape'chenpa' alla oterrrer: “Te'pa' o'ca' neñoçh atetcha'ca'ye ne'pa. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla na'tomaterr atarrpo' allcha' e'ñe nañño'tua allohuen ñeñt̄ allpon ne'totaten ama't ñaña allohuen ñeñt̄ allpon pa'namen esocmañen nechyen.

19 Allempoñapa' atetcha' not neyoçhro: Napa' ama es nepallteno ama't e'ñe mamesha. Ñeñt̄ allpon shonte' o' nañño'tuapa' atarrcha' atomat char amach es nepallterre'te. Te'pa' o'ch names e'ñe pocacma. Nellapene'tcha' rrats, nellapene'tcha' orrare'tats; ñeñt̄cha'ña e'ñe nocshatene'ña na.”

20 Tarraña ñeñt̄ acheñerpa' Yomporpa' atet och: “Papa' atarr otatsña'te'p̄, ama es peñoteno ama't mamesha. Te'pa' añe tsaprocmaçh o'ch perromuen. Ñeñt̄ña shonte' o' p̄añño'tuapa' te'ñapa' esesha'huachñaca'ye o'paterraya.”

21 Ñeñt̄o'mar yeñoteñ, ñeñt̄ añño'tene' shonte' esocmañen ñeñt̄ e'ñe ñocpa, ñeñt̄ña acheñer atetpa' ama echenanoña ñeñt̄ sherbets Yomporecop.

Atto Yomporpa' ñach e'ñe cohuen cohuan̄pene' ñeñt̄ puechemerasha' pen

(Mt. 6.25-34)

22 Allempoña Jesúsapa' alla oterranerr pueyoçhresha':

—Ñeñto'marña te'pa' o'ch noterrserri, amach aña sellcatsto ñeñt' atto yeychena arr patsro. Ama't seyoçhra amach sotatsto, esuachca'ye yerrerrerrte' tsapaonet. Ñaña amach aña sellcatsto ñeñt' e'ñe sechtsocpa, amach sotatsto, esuachca'ye yechorrate'.

²³ Tarro'mar Yomporpa' ña yapuene' yo'rrerrña allo yocrena ñeñña atarr nanac sherbets. Ñeñto'marña yeñoteñ ña yapuene' ñaña yerrar, ñeñña ñocoppa' ama esoye' enteñe. Ñaña ña yeçcatene' yechets ñeñt' atarr sherbets. Ñeñto'marña yeñoteñ ña yapuene' ñaña ama't ñeñt' yechorra'yena, ñeñña ñocop ama esoye' enteñe.

²⁴ Sentente' atto correna pa'namen otnesachno. Ñetpa' ama çhoye' nare'tatse'teneto ñaña ama çhoye' apçha'yeneto puerrar ñeñt'cha' rra'yenet. Ñetpa' ama es echenaye allcha' es aña'nyenet. Ama't atto correnetpa' Yomporña e'ñe yeçcatyesuanet ñeñt'cha' puerrar pa'yenet. Elloña sa Yomporpa' atarr morrentensa sa; ello señtaneñ ñeñt' atto atarr morrentenana otnesachno.

²⁵ Ñaña amach sellcatsto attoch amach serromo, tarro'mar ama't sellquënañ attoch atarr atomat socra arr patsro tarraña ama't e'ñe puesheñarrotesapa' amate' errotenot so'chtatoña socreña ama't e'ñe pamtarra.

²⁶ Ñehua, atto ama't e'ñe sellquëñoña sa ama errof es sepeno, ñeñt'epña'pa' amach pa'namena es sellca'yestatsto tarro'mar ñeñt'pa' e'ñech orrena es sellca'yena.

²⁷ Ñaña sentente' atet yeçquëna roreçhno. Ñetpa' ama çhoye' taruasa'yeneto ama't mamesha, ama çhoye' taneneto ñeñt' chorra'yenet atto e'ñe cohuen orreyenet. Tarraña napa' o'ch notas, ama't añcha'taret Salomón atto e'ñe a'cohuentate't ahuat, ama't ñapa' ama chorrane'teña ñeñt' atarr cohuen ñeñt' atet atarr cohuentena ror.

²⁸ Ñeñt' ror pue'chorpa' ñeñt'ara ta'te' ñeñt' chepyets allemeñ ñeñt' sentyen te' tarraña ñeñt'pa' mamecpa. Ama't cohuen chepyeneñ te'pa' tsapaonetña'pa' o'ch etomanperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt' e'ñe mamecpa, elloña sapa' atarr chorratyensañ saña; saña'pa' eso'marte'ña amaña e'ñeye' seyemteño.

²⁹ Amach e'ñe patrra se'нено ñeñt' atto serren ñaña ñeñt' atto es sorryen. Amach ñeññaña e'ñe paterr sellca'yestatsto.

³⁰ Tarro'mar allohuen acheñenesha' arr patsro ñeñt' ama ame'ña'yetso, ñetpa' ñeññaña e'ñe paterr e'nenet. Ñehua, Somporña ñeñt' pue'ntaño'tsen ñapa' e'ñe entuenes ñeñt' allpon pa'namen sepallta'yena arr patsro.

31 Sapa' añchaña eñe ñanom sema'yochrena Yomporecop attoch atarr ayochreshatterra ña allochñapa' ñachña sapa'yene' ñeñt allpon sepallta'yena samña.

Atto ñeñtcha' seshonterr ñeñt atarr sherbets arrcha'ca'ye seshonteñ all Yompor pue'ntaño

(Mt. 6.19-21)

32 Amach neyochreneshačnocha' es sellcatsto ama't ama atarr shonteyayso, Yomporña atarr cohuen secuanpene' atet ñerra'mrrate' eñe po'carrneror penes. Eñe pocsheñesho'tpa' apascha' attoch eñe cohuen socshapreterrñaña po'cohuenña attoch atarr ayochreshatterra.

33 Te'pa' o'ch sepomyen ñeñt allpon sechyen allochñapa' o'ch sapa'yenes ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt eñe po'ño'ch atarr sherbets Yomporecop. Ñeñtpa' ama atteyaye ñerra'mrrate' ñeñt secllayepo'rer sepen arr patsro, ñeñtpa' atarr amllasha'tña. Tarraña ñeñt seshonta'nen ñeñt atarr sherbets ñeñt ama ahuañaño, ñeñtpa' arr seshonteñ Yompor pue'ntaño. Allña ama't eñe'apa' amach čheno o'ch etatsre'tas ñaña ama't pom'papa' amach eñalle ñeñtcha' rrrere' ñeñt seshonten all.

34 Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ eñe ñeñta paterr senen seyo'chro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ eñe ñeñta paterr senen seyo'chro ñeñtñapa' ama es sherbenoña Yomporecop.

Atto čhocmach yeñose'rteña Yepartseshar Cristo esempoch huerra

35-36 Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt atarr ayochreshat. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyeset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch chore'tuenanetpa' ñetñapa' allorocmach toram'psapueñet attoch sherbapueñet.

37 Atarr cosheñtso'tsa'yen pueyochresha' ñerra'm esempoch huerret pamo'mte' allñapa' entuenanet čho atarr eñose'rteñet. Po'ño'chpa' napa' o'ch notas, ñachca'yefña sherba'huene'ña ñeñt pueyochresha' pen ña. O'ch chana'huenta ñaña'apa' o'ch anorr'cha'tatuenanet allcha' rrallme'chatuenanet.

38 Ñeñt'pa' atetcha' perranet ama't rroch tsapopa' o'ch huenanet amapa' o'ch puetarenmochpa' o'ch huenanet. Ñeñto'marña notenes, ñerra'm alla entuenanet cho atarr eñose'rteñet, ñeñña atarr eñose'retyenayapa' atarrcha' cosheñtso'tsa'yenet.

39 E'ñech machayota nohuerra atet pena eñet allempo atta es sepcha'yena machayotach huaponasa o'ch yoratsre'tensa'. Tarraña sa ñeñtes apaclates ñerra'm señoñeñ e'ñech esempo huaponasa eñet amach cha semanrra'teno attoch amach semnacheña o'ch toramñpsas sepacllo o'ch be'tosamñpsasa o'ch yoruennasa' ñeñt allpon semorrentyena.

40 Ñeñto'mar notenes, sapa'cho'ña chocmuepa'chña seño'srtenna tarro'mar ñerra'm allempo atta es sepcha'yenapa' allempochña nohuerra na Ñeñten Acheñetosets.

Atetcha' a'paretterra ataruasañ ñeñt e'ñe cohuen etsotene' atet yecheña pamo'mte' ñaña atetcha' a'paretterra po'poñ ataruasañ ñeñt ama etsotaye ñeñt atet yecheña pamo'mte'

(Mt. 24.45-51)

41 Allempoña Pedropa' atet a'p'to'ch:

—Partseshacha' ñeñt atet petma'ntatena te' ñeñt'pa' ¿eseshacpa'tña, ñato' yocpate' ñeñtey peyochreshay pepeney amapa' ñato' allohuenacpa'nate'?

42 Partsesha'ñapa' alla toma'ntaterraneterr po'poñoneñ, atet otterraneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt yechena ñeñt pamo'mte' pen all pa'paclo. Ñeñt'cha' po'taruas pene' chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttocop. Ñapa' attecnoch pena chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach ca'chpuere tarro'mar ñapa' eñoteñ attoch e'ñe coshatenan pamo'mte'.

43 Ñeñña ataruasañpa' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama cho ca'chpuenano ñeñt po'taruas apa'neñ ahuañmo'choteñ.

44 Po'ño'ch o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñt'cha' cohuanñpsaprete' ñeñt allpon echyen pamo'mte'.

45 Tarraña ñeñt ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa'

amach ahuen huerro, allempoña ñapa' chach ash-tapechyenan ataruasañechno ñeñtcha' rratañ ama't ñaña coyaneshohuen. Ñañaapa' attach allemeñ rrapretyen ñaña attach orrare'tapretyen allcha' atarr posa'tare'tyen.

⁴⁶ Ñeñña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguërran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret.

⁴⁸ Tarraña erra'tsencha' ataruasañer ñeñt ama eñotano ñeñt atet muenen pamo'mte' ama't ñetpa'cho'ña aña atet pa'yenet ñeñt ama cohuenayaye ama't e'ñe pocten attec mach ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt atet muenen pamo'mte'. Allohueney erra'tsenotey ñeñtey atarr aparetey attoch atarr yeñoterrñañ ñeñt atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbatoñ shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

Atto Jesús'pa' orrtatosan e'ñe ño'mar elloptanna'teñets
(Mt. 10.34-36)

⁴⁹ 'Te'pa' o'ch neñotaterr serr po'poñ. Napa' atto nohuena arr patsro o'ch norrtatos elloptanna'teñets ñeñt atarr huomenc atet ñerra'm tso' atarr atserretsa. Pocte' nenteñ o'ch orrtet e'ñe tayecma.

⁵⁰ Ñaña nocoppa' e'ñe atet anaret na'muerochtataretterrach e'ñe atarr huomenc atet ñerra'mrate' cho chorratenet ñeñtcha' atarr nemuerochtaterre'. Neñto'mar napa' ñeñña atarr nellcatene' te' atta atarr na'huanteñ esempoch e'ñech etsotuerra.

⁵¹ Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'ñaña nohuapa allochña'pa' e'ñe no'marpa' acheñenesha'ña'pa' o'ch atta elloptanna'tyeset.

⁵² Ñehua, ñeñt noten te' e'ñe tayoteñ ñato' all yeçhena amnarsheña puepahuarro pocolopa' ñato' ñetpa' o'ch

ellopa'tetstatet poctaḡña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet.

53 Ñato' e'ñe no'marpa' o'ch ellopa'tetstatenet poctaḡña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesús pa' orrtatosan ñeñtcha' eñotatahuet o' chapamet Yompor po'cohuenña

(Mt. 16.1-4; Mr. 8.11-13)

54 Allempoña Jesús pa' atet yerpatana acheñenesha' ñeñt atet otyenet ñet pa'nyeto:

—Sapa' ñerra'm esempo senten arr chorren os all emuena atsne', sañapa' chocmach atet sotyen: “Te'pa' chach huatena.” Atetcha'cho' ḡa, o'chcho' huatena.

55 Ñaña ñerra'm esempo senten huena mōrr topoḡot, ñeñtpa'cho'ña atetcha' sotyen: “Te'pa' o' charenmoch.” Atetcha'cho' ḡa, o'chcho' huoraterr huomenc.

56 Sapa' atarr señoteneñña ñeñt sentyen ento ñeñtña señotatene'; ama't ñaña ñeñt atet sentyen ñaña arr patsro ñeñtpa' e'ñe señotueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' seshqueñ.

Atto eñotatanet choyach amo'tsterraya e'ñe mamecma ñeñt ye'moñe'tene'

(Mt. 5.25-26)

57 'Elloña e'ñe soña señotepa'chña ñeñt pocte' enten Yompor socop ñeñtcha' atet seḡannena.

58 Ñato' o'ch netma'ntatasa atet ñerra'mrrate' esesha' setmantene' ñeñtcha' sanmue' añcha'taretesho allcha' sa'poctaterr señoñ. Añ pocetsa allempo ama sechena' añcha'taretesho o'ch ḡoch ñeñt petmantene': “O'ch ya'poctaterr yeñoñ e'ñe cohuen tayecma tayepa'tña ama yechena' añcha'taretesho.” Tarro'mar ñeñt petmantene' ñerra'm o'ch chapataḡ añcha'taretesho, añcha'tareñapa' chate' pomaḡ polickeyaneshesho, ñetñapa' chate' abe'tapet cárcelo allcha' muerochtaterrpet.

59 O'ch notas, ñerra'm čhoch yottam̄psasetpa' allasach o'pono, allotñapa' amach ahuen čha'nmaterrseto. Esemposhuañencha' čhoch seča'nmaterret ñerra'm allempoch e'ñe setsa'tuerra ora allohuen ñeññ allpon quelle muenenet. Ama't e'ñe eptalla centavotollña ñerra'm ama setsa'tueña' amachca'ye čha'nmaterrseto allot. Ñeñño'marña notenes o'ch e'ñe cohuen samo'tstera ñeññ se'moñe'tene' tayepa'tñapa' ama čhennasa' ñeññ atarr yoročhen senten socop.

13

Añ poctetsa yocop o'ch yoctape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetñapa' serrpare'tatoset Jesús atet entenet ñet; ñeññpa' atet otoset:

—Allponsheña ñeññ galileo'marnesha' allo'tsa'yenet allecma muetsatenet berr ñeññ Yomporecop. Allempoñapa' huapanet ñeññ mueñen añcha'taret Pilato ñetñapa' čha muetsanatosanet e'ñe all allempo muetsatenet berr ñeññ Yomporecop. Attoña ñetpa' allña atsetatse'tatarettet ñet po'rras epuet pueberrret po'rras.

² Jesúsñapa' atet otanet:

—Sapa' čhate' sotenapañ ñeññ galileo'marnesha' allempo atet ařarettet ñato' ñetpa' atarrte' nanac ochñařet ellote' metana'tueñet allohuen po'potantañ galileo'marnesha' po'chñaret. Čhate' sotenapañ ñeñño'marte'ña atet ařarettet ñeññ atarr sosey apencočhen.

³ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sečenca'huerrach e'ñe poctacma.

⁴ Ñaña ñeññ čharra' ñeññ puechetsa posocsheña ñeññ colla'huatsa ahuaña ñeññ a'tpetse't pocoll torrepo' allempo mata'nerr Jerusaléño e'ñe all oteñet Siloé. Ñehua, sapa' čhate' sotenapañ ñeññ a'cllatter torrepa' ñetpa' atarrte' atparñařet ellote' metana'tueñet allohuen po'potantañ ñeññ atto atpare'tena jerusaléño'marnesha'.

⁵ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sečenca'huerrach e'ñe poctacma.

Arrpa' all toma'ntatanet Jesús atet pena partech ñeññ ama me'tetso

⁶ Allempoña Jesúsapa' alla toma'ntaterraneterr po'pocheño, ñeññpa' atet oterraneterr:

—Puesheñarr acheñ all puenarem̃mopa' allña'pa' ahuañmo'chofeñ nare'tatenan ñaña puecharr partech.* Atteñapa' chap allempo huapa e'nosñañ pue'mer. Tarraña ama't puenarrapa' ama entosñañe pue'mer. Partayechpa' ama me'teno.

⁷ Allempoñapa' atet otan ñeññ cohuañpene' puenarem̃ma': "Te'pa' o' met ma'pa char chocma nohuena e'nene' partech pue'mer. Teme'ttsen ama't puenarra pue'merpa' ama nenteññañe. Te'pa' o'ch pa'mater tarro'mar e'ñe orrena quechcare'tennay yepatseñ atto ama yenare'teno po'poñ narmets all."

⁸ Tarraña ñeññ cohuañpene' narmetspa' atet otan pamo'mte': "Allach nompocha' añ char ñeññ o' huerrerrpa' napa' o'ch na'mueñtsetañpes pats o'ch nenoñ amar.

⁹ Ñato'rraña atet nepe'pa' o'ch cohuen me't tsapat charo. Tarraña ñerra'm ama me'topa' pocte'ña'cho' allempopa' o'ch pa'matater."

Atto Jesús'pa' a'crraterran coyanesha' ñeññ atta mo'quëtsa ama't añe yetro allem pocma amesenet

¹⁰ Allempo čhapa'muenerr allempo amesenet, Jesúsña'pa' yečhatenanet judionesha' po'prahueto.

¹¹ Allña'pa' allo'tsen puesheñarr coyanesha' ñeññ čha mo'quëna, ama eshcaye' pačharrteno. Ñeñtpa' oneñeñ atet patene'. Ahua'toteñ atta pena o' čharren char puechena posoc atta mo'quëna.

¹² Jesúsña'pa' all eñchpa' o' chore'tospa' atet och:

—Nočha te'pa' pasaterrepča' ñeññ atto atarr pemue-ročhtena.

¹³ Allempoñapa' a'płlamco'ch. A'płlamco'tue'pa' allorocma e'ñe cohuen pačharrterra. Ñaña'pa' atarr aye'chočhtaterran Yompor.

¹⁴ Allempoña ñeññ añcha'tarettetsa all judionesha' po'prahuo, ñapa' allempo entan atet o' a'crratan Jesús atснаñeñ, ñaña'pa' ñeñña atarr atsrre'mate'. Ama't mameshapa' ama pocteye' eñche o'ch a'crratan acheñ ñeñte yetro allempo amesenet. Ñeñto'marña ñapa' atet otan acheñenesha':

—Eñall pechapmat yet allempo pocte' o'ch yetaruasen. Ñeñtpa' pocte' o'ch sehuapa allempo attoch sa'crrater at-snañeñ. Tarraña añ yetro allempo yamesen amach sehuapat-sto a'crrate' atснаñeñ.

¹⁵ Partsesha'ña'pa' atet och:

* 13:6 Ñehua, Jesús añ toma'ntatanet higo ñeññ puenarem̃ penet all pa'nyo.

—Sapa' ñeñtes e'ñe sommo'cheño'pa' atarr seshcare'ten. Sapa'cho'ña ama't a'ñe yetro allempocma yamesen chocma setaruasen sam'a. Sepyam'peñ sehuacsher, sashanor allecma serrateñ o'ch sanem' ñaña o'ño allcha' sonayem' o'ño.

¹⁶ Añ coyanesha' ama't ñeñt' po'm'reneñ pen yatañ Abraham ama't çharra' puechena posoc char ñeñt' allponmat o' huanqu'er oneñe't, pocte'ca'ye o'ch ya'rroyatater ama't a'ñe yetro allempo yamesen.

¹⁷ Acheñenesha' allohuen ñeñt' e'mo'ñe'tene' ñetpa' ñeñt'ña atarr pencatahuet. Po'potantañña acheñenesha'chnopa' ñetñapa' atarr nanac coshenet. Atarr nanac cohuen entenet ñeñt' atet pa Jesús.

Atto Jesús'pa' toma'ntaterranet atet pena pue'llomer ñeñt' otenet mostazllom'
(Mt. 13.31-32; Mr. 4.30-32)

¹⁸ Ñeñto'marña allempopa' alla oterraneterr:

—Añ Yompor po'cohuenña ñeñt' atto ayochreshattena ña, ñanompa' e'ñech puesheña'ttsa ame'ña'yetsa, allempoteñña'pa' allo'nach sen atonetnomtsa ñeñt'cha' ame'ñerrtsa attochña e'ñe epa'huerra erracmañen Yompor po'cohuenña. Ñeñt'ña te'pa' o'ch netma'ntatasa ñeñt' atet pena ña.

¹⁹ Ñehua, ñeñt'pa' atet pena ñerra'mrrate' pue'llomer ñeñt' atarr añe'folleshallmerr ñeñt' otenet mostazllom'. Ñeñt' pue'llom'retollpa' puesheñarrña'pa' o' anem' pa'mro allcha' nare'teña'. E'ñe allponmatatsapa' o' chop, ñeñt'ña'pa' allo'na sen rrorranmats e'ñe cohuen atarrchetnom. Ñeñt'ña narmetsocherpa' o'ch hua'cha'toña ote'chno ñeñt'cha' ama'tanatyosets puetacro'mar.

Atto Jesús'pa' toma'ntaterranet ñeñt' atet pena chase'
(Mt. 13.33)

²⁰ Elloña alla oterraneterr:

—Po'poñone't o'ch netma'ntatasa ñeñt' atet pena Yompor po'cohuenña ñeñt' atto atarr ayochreshattena ña. Ñeñt'pa' ama'tcha' añe'folla ñeñt'cha' ñanom orrtatsa tarraña e'ñe ña po'huamenco'tpa' mametollapa' o'ch e'ñe epa'hua ora er-ra'paren.

²¹ Ñeñt'pa' añ toma'ntaterraneterr atet pena chase':

—Ñeñt' chase'pa' allo tsetenan coyanesha' harina' ñeñt' oñetsetstaten attoch a'chasatan harina' esheccha' e'ñe a'muesatue. Ñeñt'ña chase'pa' ama'tcha' añe'folla net, ama'tcha' aton harina' ñeñt' ma'pa' arroga, mametollapa' o'ch e'ñe a'muesatuanña ama't atarr aton harina'.

Atto Jesús pa' toma'ntaterraneterr ñerra'mrrate' yetarrofollo yebe'ten esheccha' yeçhap Yomporesho

(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe serrpare'tatyesnomanet. Allempo oñemyen allemeñ anetso'mar ñapa' arr sen Jerusaléño all sechena.

²³ All oñen toño pa' allempoña puesheñarrpa' a'p'to'tnom, atet och:

—Ayochreshate, ñeñtcha' allpon a'queshpataretterrtsapa' ta'm ñetpa' ¿puesheña'ttsetate' ñato' amapa' atarrcha' shonte'?

Jesúsña pa' atet och:

²⁴ —Sapa' añcha'ña e'ñe cohuen sema'yoçhrena ñeñt cohuen enten Yompor attochña sesuanom ñeñt ama cohuenaye' enteno ña. Ñeñtpa' o'ch netma'ntacha atet ñerra'mrrate' allcha' yebe'tos esheccha' yeçhap ñesho ñeñtpa' atarr añetoll, atarr torrapo' o'ch yebe'tos all. Ñaña o'ch notas esempo-huañen ama'tcha' shonte' acheñenesha' ñeñtcha' atarr muenatseñ o'ch be'terretañ all attoch çherretañ Yomporesho tarraña allempopa' amach eshec be'terreto attoch çherret all tarro'mar allempopa' o'ch huañerr atto atarr cohueney Yompor.

²⁵ Ñeñtpa' o'ch netma'ntacha atet ñerra'mrrate' esempo o'ch çhen ñeñt apaclatesha' ñaña pa' o'ch tantuena o'ch e'ñe echarr yottampesuena. Allempopa' ama't e'ñe eseshapa' amach eshec be'tosoña all. Allempoña ama'tcha' shonteseñ o'ch sehuaçha'ta all petotach sechorros allotcha' seçhore'tos apaclatesha'. Allña sapa' atetcha' sotos: “Ayochreshate petorampsapuey.” Ñapa' atetcha' otapas: “Napa' ama nenttarso, errofte' sehuenaña sa.”

²⁶ Sañapa' atetcha' sotererr: “Ama't parroçma yerrallme'chyese'teña ahuañmo'cha ñaña ama't ya ya'netsro'mar alleçma chopeñe'chyenet allca'yeña peyçhatyese't.”

²⁷ Tarraña ñapa' atetcha' oterrserr: “Te'pa' o'ch notas, napa' amaca'ye po'ñoçh nenttarso, errofte' sehuenaña sa. Te'pa' orrerres arroç neshoç allohuenes ñeñtes ma'yoçhrenaya ñeñt ama pocte' enteno Yompor.”

²⁸ O'ch ahues all ñeñt o'patatenset sa. Allña pa' allcha' seyahuanrrortosa, sanmueñoç atserrpa' serraso'tyesoscha' sas. Allotcha'ña sentosña satañeshachno—Abraham ñaña Isaac ñaña Jacob ñaña allohuen ñeñt a'mta'yeyaye't Yompor po'ñoñ. Ñetña pa' e'ñe Yomporesho'tsa'yenet all añcha'tarettena ña. Sañapa' cha'petotaña huapore'tenset.

29 Allñapa' allemñateñcha' huaçha'ta shonte' ñeñt' ama judioneshayaye ñeñt'cha' anorrçha'tyesosets all e'ñe Yompore-sho all añcha'tarettena ña allcha' rrallme'choset all e'ñe cohuentena Yompor.

30 Te'pa' señoçha' eñall acheñenesha' ñeñt' ama asherbenaye' senteno sa te' tarraña allempoña ñetpa' atarrcha' asherben enterranet Yompor. Ñaña eñall acheñenesha' ñeñt' atarr asherben sentyen sa te', tarraña allempoña ñetpa' amach asherbenaye' enterraneto Yompor.

Atto Jesúsapa' puellquëñoñtan jerusaléño'marnesha' atarr ya'na'tenanet

(Mt. 23.37-39)

31 E'ñe ñeñte yetrocma allempo huaçha'toña patantarr fariseonesha'. Ñetñapa' atet otoset Jesús:

—Te'pa' o'ch peyeta arroñ tarro'mar añcha'taret Herodespa' o'patenpa' ahuo'ch muetsatap.

32 Jesúsñapa' atet otapanet:

—O'ch ahuerrespa' atetcha' sotuer Herodes ñeñt' atarr eñotene' shequëñets: “Te'pa' o'ch peñoç, napa' atterach necaçhpatateññañ acheñenesha' po'neñeter ñaña atterach shonte' na'crratyes ñeñt' atсна'tyets. Atet nepena te', tsapatonetpa'çho'ña attecmaç nepena, o'chña tsapatonterrerrpa' o'ch e'ñe netsotatue allohuen.”

33 Nocoppa' añ poçtetsa çhocmaç nesen ama't te', ama't tsapatonetpa'çho'ña, ama't ñaña o'ch tsapatonterrerrpa' çhocmaç nesen. Attotach neçherr Jerusaléño, tarro'mar allpa' allecma çhocma muetsayesete't ñeñt' a'mta'yesyete't Yompor po'ñoñ.

34 Allempoña Jesús e'ñe puellquëñoñ judionesha'pa' atet eñorena ñocpuet, ñeñto'marña atet otanet:

—Sa jerusaléño'marneshacha' ñeñtes muetsanatyesyete't ñeñt' a'mta'yesyete't Yompor po'ñoñ, sa ñeñtes rrollapeçhyesyete't ñeñt' amñare't sesho. Atarr atonoche'tats nemneñeñ o'ch na'yapaçha'huerrsoñ allohuenes nesho attoç e'ñe cohuen necuañpensoñ. Nemneñeñ o'ch na'yapaçha'huerrses atet ñerra'mrate' atollop a'yapaçhene' pueçhoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

35 Te'ñapa' all seyçhena sa, Yomporñapa' o'ch a'ypo'ñerres. Tarro'mar te'pa' o'ch alla noterrser: Na po'pocheño'pa' amach alla senterrno te'. Esemphuañenñapa' senterrencha' allempoñapa' atetcha' soterren: “Aye'choçhtatpahuèpa'çh Jesucristo ñeñt' huapatsa ñeñt' llesensen Yeyomporer.”

14

Atto Jesúsapa' a'crraterran puesheñarr yacma ñeñt' cha ananen

¹ Allempoña çherrerr pamtarr allempo amesenet. Jesúsñapa' ahuo' allcha' rrallme'chapretenana' puesheñarr fariseo ñeñt' atarr añcha'tarettetsa. Chap all pa'paclopa' po'potantañña fariseonesha' ñetñapa' atarr cohuana'tyesapet Jesús.

² Allñapa' allo'tsen puesheñarr yacma ñeñt' cha ananen.

³ Jesúsñapa' all serrpare'tos epuet fariseonesha' ñaña ñeñt' allo'tsa'yen ñeñt' atarr etsotene' ñoñets ñeñt' atet anaret' judioneshacop. Ñaña'p'atta a'p'to'tosanet e'ñe po'tomña, allochñapa' o'ch eñoch ñato' errotencha' anapet. Ñeñt'pa' atet otosanet:

—¿Errotena'tña sotenna sa, ta'm pocte'te' o'ch na'crratos atsnañe't' a'ñe yetro allempo yamesen? ¿Atte't' otenna ñoñets ñeñt' atet anaret', ñato' ama'te'?

⁴ Fariseonesha'ñapa' ama eseshaye' anapuetso ama't' puesheñarroña. Allempoña Jesúsapa' a'p'llamco'tosan atsnañe't'. E'ñe a'p'llamco'tue'pa' cha corrrrtsa allenta mueñer pa'paclo.

⁵ Allempoña Jesúsapa' alla oterranerr fariseonesha':

—Sapa' ñerra'm sashanor amapa' sehuacs her shora'nets arroroto all chorren oñ, ama't'cha'ña sechtereña allo't' e'ñe allorocma ama't' a'ñe yetro allempocma yamesen.

⁶ Ñetñapa' ama errotenaye' otene'nte' enteñeto ama't' e'ñe puesheñarroña.

Atto ahua'ñarettet o'ch rrallme'chapreteñeta' ñeñt' sena'tetsa

⁷ Allempoña ñeñt' ahua'ñareñnesha' ñetñapa' aña atarr muenenet o'ch anorryesoset allecma anen ñeñt' atarr añcha'na'tpo' entyenet. Jesúsñapa' entapanet ñeñt' atet muenenet ñet o'ch cha ommo'chyoset. Allempoñapa' atet otapanet:

⁸—Ñerra'm esempo ahua'ñaretes o'ch serrallme'chapreteña' ñeñt' sena'tetsa, sommo'cheño'tpa' amach arra sanorratsetyososo allecma anen ñeñt' atarr añcha'na'tpo' entyenet. Ñeña chenta'pa' o'ch huapuet ñamet.

⁹ Ane'tañ ñeñt' sehua'ñene' allohuenes ñaña'p'apa' o'ch huapa pesho o'ch otap: “Te'pa' o'ch petanterra arrot, all p'anan te'pa' o' huapaña ñeñt' panorrrpue' pene' all p'anan ñeñt' atarr añcha'na'tpo' entyenet.” Paña allempopa' atarrcha' pepenquëño't petanterra o'ch ahuep' allcha' panorros allecma anorryen ñeñt' ama esoshe'maye' entyeneto.

10 Sapa' atetcha'ña sepa ñerra'm esempo hua'ñenset. Allempo sechap all hua'ñenset sapa' allach sanorros allecma anorrcha'tyen ñeñt ama esoshe'maye' entyeneto. Allña'pa' o'ch huapa ane'tañ, ñapa' atetcha' otosep: "Masheñcha' papa' arrcha' panorros allecma anen ñeñt atarr amcha'na'tpo' entyenet." Attochña allohuen ahua'ñareñnesha'pa' o'ch entapet papa' atarr amcha'na'tpo' entyenpet.

11 Tarro'mar allohuen ñeñt e'ñe cohuen entetsa e'ñe pommo'cheñot ñetña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapatonetpa' atarrcha' cohuen enteret.

12 Allempoña'pa' atet otan ane'tañ ñeñt hua'ñene':

—Ñerra'm esempoch porrtaten rreñets ñeñtcha' serra'muen aromtaña amapa' ellerronet amach e'ñe aña pehua'ñatsto ñeñt e'ñe parro peyemtena ñaña ñeñt pemo'nasheñ pepen ñaña po'potantañ ñeñt e'ñe pamo'tsesha' pepen ama't ñaña allo'marnesha' ñeñt atarr eçllayoretet. Tarro'mar ñerra'm ñeñt pehua'ñenpa' ñetpa'cho'ña tsapatonet o'ch alla hua'ñerrpet paña. Attoch tsa'terrpet.

13 Tarraña ñerra'm esempoch porrtat rreñets aña'nachña pehua'ña'yes ñeñt atarr huocchañetyets ñaña achocraña'chno ñaña ñeñt checa're'pa'chno ñaña aporo'yetechno.

14 Attochña papa' atarrcha' cosheñtso'tsenep tarro'mar ñetpa' amach errotentot alla tsa'terrpeto. Papa' esempo-huañencha'ña atsa'taretep allempoch atantataretterra allohuen ñeñt e'ñe pocte' es pa'yestse't.

Arrpa' all atma'ntatarettena ane'tañ ñeñt atarr aton yeçcatatene' rreñets

15 Allempo e'mueñet Jesús atet serrpare'tatuanet, puesheñarrña ñeñt parro anorrchenet ñeñt parro rrallme'chenet, ñaña'pa' atet otan Jesús:

—Atarrcha' cosheñtso'tseney allohueney ñeñteycha' rrallme'chapreterre' Yompor all amcha'tarettena pue'ntaño.

16 Jesúsña'pa' toma'ntaterraneterr, ñeñt'pa' atet oterraneterr:

—Eñall puesheñarr ane'tañ ñaña'pa' o'ch yeçcatatan atarr shonte' aton rreñets. Allempoña'pa' otyesan shonte' acheñenesha' ñeñtcha' rrallme'chapretenaya' esempoch e'ñe a'potatuan rreñets.

17 O'ña chap allempo e'ñe a'potatuan rreñetspa' ñaña'pa' mueñan pa'taruasañer ñeñtcha' hua'ña'yenaya' allohuen acheñenesha' ñeñt otarettatsa ahuaña. Ñeñtña pa'taruasañerpa' atet otosan acheñenesha':

—Te'pa' o'ca'ye e'ñe a'potaretetuaña rreñets sona'cha't o'ch serrallme'chapretena'.

18 Tarraña ñeñt ahuañaretechnopa' ñetña' ama esesha' tatso. Ñehua, ñeñt ñanom puesheñarrpa' atet ot: "Napa' te'pa' o'ca'ye neraña pats, o'chca'ye ahuen o'ch necua'yeña'. Potuercha' pamo'mte' peretnerrnepa', napa' amachca'ye neto."

19 Po'psheñeñpa'cho'ña atet ot: "Napa'cho'ña o'ca'ye neraña charrana toro po'yuntohuen e'ñe epna'ttsoema; o'chca'ye ahuen o'ch netpach taruasate'. Potuercha' pamo'mte' peretnerrnepa', napa' amachca'ye neto."

20 Po'psheñeñpa'cho'ña atet ot: "Napa' erntenca'ye sena'tetsa ñeñto'marña napa' amachca'ye eshec neto."

21 Ñeñña ataruasañer atet otyes acheñenesha'pa' ñaña'pa' ahurr pamo'mtayesho, serrpare'tatuerran pamo'mte' atet otyeset ñeñt hua'ña'yeseñ. Ane'tañña'pa' ñeñña atarr atsrre'mate'. Patsrre'mueño'pa' atet otterrannerr pa'taruasañer: "Te'pa' o'ch ahurrperr e'ñe tayecma ñaña all anetso allecma atarr chopeñe'chyen shonte' acheñenesha'. Allotcha'ña pehuapaterr huocchañnesha'chno ñaña achocraña'chno ñaña aporo'yetechno ñaña checa'repa'chno."

22 Pa'taruasañerña'pa' atetcho' perrerr. Allempo huerra atet otuerrannerr pamo'mte': "Nompocha' ñeñt atet potenpa' te'pa' o' e'ñe atet nepohua. Tarraña allcha' anorrcha'tyes ñeñtcha' rrallme'chosetspa' orameñ."

23 Pamo'mte'ña'pa' atet otererr: "Te'pa' o'ch alla ahurrperr allampaño'mar all shonte' toñechno allecma chopeñe'chyen acheñenesha'. Allña'pa' atarrcha' potare'tyes acheñenesha' onetepa' arr nepaclo attoch e'ñe chorra acheñenesha' arr nepaclo."

24 Po'ño'ch te' napa' o'ch notas, ñeñt ñanom nehua'ñatyeseñpa' ñetña te'ña'pa' ama't e'ñe puesheñarro'tetapa' amach rrallme'chapreterrneto attoch cosherret nesho."

Añ poctetsa o'ch e'ñe yesuanem ñeñt e'ñe yocpa attoch yocter Cristo e'ñe poctacma

25 All oñemyen Jesús'pa' shonte' acheñenesha' cota'huanene'. Ñaña'pa' cohua'nmanet allenet shontenetpa' atet otnomanet:

26 —Ñerra'm esesha' muene' o'ch coterrren e'ñe po'ño'ch, añ nemnen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't ñaña puetapor ñaña puechemeresha', pa'mo'nasheñnesha', po'chanesha'. Atto atarr morrentennet ello metaneñet atto atarr morrentenet ñañeñeta ñeñt atto correnet arr patsro. Ñerra'm erra'tsen ama atteye' nemorrentenayepa' ñaña'pa' amach erro'tenot neyochresha' neperraneto.

27 Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocpueta attoch coterrnet e'ñe poc-tacma, nañapa' amach errotenot neyochresha' neperraneto. Ñeñtpa' añ toma'ntena atet ñerra'mrrate' cho sechechen secorsoch allcha' semueroçhta saña.

28 Ñeñto'marña ñerra'm erra'tsenotes muenene' o'ch ney-ochresha' neperres, añ pocetsa çoch ñanom soctape'ch, e'ñe'e' pocte' senteñ o'ch sesuanom ora allohuen ñeñt atet notenes. Ñeñtpa' atetcha' netma'ntacha atet ñerra'mrrate' eseshas muenene' o'ch satomat sepaquëll atarrpo'pa' añ sepalltena çoch ñanom sanorr allcha' soctape'ch errponte' tsa'tena. Ñato' eñallfe' allpon quelle attoch mameshapa' o'ch sa'pue'.

29 Ñerra'm ama atet ñanom soctape'chenopa' ñato' o'ch satomatañ ñanom alloch echarr sorrat sepaquëll, ñerra'm çha sehuañapes quelle attoch sa'pañ sepaquëllpa' attach secaçpue'. Acheñenesha'ña ñeñt sentene'pa' çhach che'tatsetaset;

30 ñetñapa' atetcha' otyeset: "Añ acheñerpa' o' tomataneñña atarrpo' pa'paquëll, alla huañapes quellepa' ama esoye' a'patano pa'paquëll."

31 Ñeñtara cotapñatser o'ch alla netma'ntacha po'poñonef. Atet ñerra'mrrate' pueheñarr añcha'taret ñerra'm añ cotape'chen o'ch quellaratan po'solltarer epuet po'psheñeñ añcha'taret po'solltarer çoch ñanom anorr allcha' e'ñe cohuen cotape'ch. Allempopa' atetcha' ot: "Napa' e'ñeca' çharra' mila nechen nesolltarer; po'psheñeñña añcha'taretpa' echenan po'solltarer epoch çharra' mil. Ta'm, pocte'te' o'ch nemñe çharra' mil nesolltarer ñeñtcha' poctapue' epoch çharra' mil solltarnesha' ñeñtcha' yehuapoya. Ta'mca'ye a'mchechatuette'ca'ye—shonte'."

32 Allempoña o'ch atet cotape'chuapa' ñerra'm ama errof apenaye' eñchepa' allempo ama aponmare'tteneta' ñaña'pa' o'ch mueñan allponsheña ñeñtcha' atet otosahuet: "Yapa' añecop yen o'ch ya'pocstaterr ñoñets e'ñe cohuen e'ñe atta, amach yeçllaranna'tatsto."

33 Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeñt allpon sechen, nañapa' amach errotenot neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteñapa' o'huañcha' sherba'

(Mt. 5.13; Mr. 9.50)

34 'Ñehua, yapa' yeñoteñ pospa' atarr cohuen sherbe-nan allohuen acheñenesha' arr patsro. (Allohuen ñeñt

po'ño'ch neyochresha' nepen ñetñapa' atarr sherbenet attet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotent' ellopa' ya'poserrtatere.

³⁵ Attoña amach es sherberro ama't e'ñe coñe'ta. Ama't attoch yetnarratater allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyochro ñeñt' atet neyçhatenes.

15

Acheñ ñeñt' ama ame'ñetsopa' arrpa' all atma'ntatarettet atet ñerra'm carrnero ñeñt' chenquëtsa

(Mt. 18.10-14)

¹ Shonte' ñeñt' cobrets quelle gobiernocop ñeñtara ñeñt' atarr shecare'tyets ñaña shonte' ochñañenesha', ñetñapa' huaçha'tet Jesúsesho o'ch e'mñoteññañeta' ñeñt' atet serpare'tatenan allohuen acheñenesha'.

² Añña fariseonesha' ñaña ñeñt' atarr etsotayenayeñ ñoñets ñeñt' atet anaret judioneshacop, ñetñapa' ama't mameshapa' ama pocteye' enteñeto. Ñetñapa' atta sasare'teñet Jesúsapa' ñeñtpa' atet otanna'tyenet:

—Añ acheñer ama't ñeñt' atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreteñet.

³ Ñeñto'mar Jesúsapa' alla toma'ntaterraneterr; ñeñtpa' atet oterraneterr:

⁴ —Sapa' ñerra'm eseshas echene' shonte' secarrneror, çharroç çharra' sechen tarraña ñerra'm pomocarrña machayota sa'chencachpa' ama't atet sepeno. O'ch sesa'nom allohuen po'potantañ ñeñt' o' noventa nuebaña all amayo ama't atarr a'yopa' o'ch ahues e'nerraya' pomocarr ñeñt' chenquëtsa. Allcha' se'name'tyera'pa' attotach senter.

⁵ Allña senterpa' o'ch senatner, e'ñech socsheñeshocmañen saner.

⁶ O'chña seçhapater sepaçllopa' allñaapa' o'ch seçhore'tuer samo'tsesha' o'ch onaçha'tet. Allñaapa' o'ch sotuerr: “Te'pa' o'ch socshapreterrna necarrneror, te'pa' o' nenterrña ñeñt' na'chencaten.”

⁷ Ñeñto'marña te'pa' notenes: Yamo'mte' ñeñt' pue'taño'tsen attecmaç atarr nanac cosherrana ama't puesheñarra acheñ ñeñt' atarr ochñañ ñerra'm esempoch o'ch cotape'cherret ello e'ñe cohuen ñocop. Elloch metana'tuerran ñeñt' atto coshenana po'potantañ ñeñt' shonte' ñeñt' e'ñe pocte' es

pa'yenet ñocop ama't ñetpa' shontet atet ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatarettena puetallarr quelle ñeñt a'chencaten pamo'mte'

⁸ 'Ñeñtara cotapñats, te'pa' ñato' atetcha' netma'ntacha po'poñonet atet ñerra'm pueheñarr coyanesha' ñerra'm echenan çharratlla po'çllayor ñeñt atarr morrentena. Ñerra'm çho a'chencach puetallarrpa' ama'tcha' a'llchatanoña po'lampareñ attoch tarrapo'tenan pa'paquell allcha' e'name'tyerran puetallarr po'çllayor. Attocha'ña enter.

⁹ O'chña enterpa' allempoñapa' o'ch agotan pamo'tsesha' e'ñe pacmaneshoche', atetcha' otanet: "Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter."

¹⁰ Te'pa' o'ch noterrser, elloña atarrcha' nanac coshateret Yompor po'mllañoñeñreneshohuen ñerra'm esempo ama't pueheñarra acheñ ñeñt atarr ochña'tpa' o'ch cotape'cherret ello e'ñe cohuen Yomprecop.

Arrpa' all atma'ntatarettena pueheñarr yacma puechemer ñeñt atarr ottatsñaĩ

¹¹ Elloña Jesús'pa' alla toma'ntaterraneter, ñeñt'pa' atet oteraneter:

—Eñall pueheñarr acheñ echenan epsheña puechemer.

¹² Ñeñtña puechoyomer penpa' atet otan pompor: "Apacha' ñeñt ora allpon pechen te' napa' nemneñ o'ch papuen e'ñe tayecma ñeñt allpon po'patatenna." Allempoña pompor ora ñeñt allpon echyenpa' o' apa'yesan epsheño'mar puechemerasha' ñeñt allpon o'patatyenanet e'ñe pueheña'ttset.

¹³ E'ñe allponmatatsa ñeñtña puechoyomer penpa' o' e'ñe pomhuahuanman ora allohuen ñeñt allpon aþ pompor allo agapan shonte' quelle attoch ta bachayo po'poñ anetso. Allempoña çhap bachayopa' allña'pa' sosya'tsañeçhna atet pa'yesos. Attoña ama't shonte' po'çllayor ñeñt anem o' e'ñe a'gasta'huahue e'ñe pottatse'teñoĩ.

¹⁴ O' e'ñe a'gasta'huan ora po'çllayorpa' allempoña allpa' o' orrta muecheñets all ñeñte anetsro. Ñaña'pa' o'huañ erraye' entan puerrar ñeñt'cha' rren.

¹⁵ Allempoña ñapa' o' ahuo' allo'tsen ane'tañ all e'nyenan taruas. Ane'tañña'pa' aña aþ po'taruas o'ch auyesos a'yenet allcha' cohuanpesyesoñ po'chañchor.

16 Ña pa'chporrñoŧpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'cho'ña ñeññaña atarr muenen o'ch rros tarraña ama't chañcho ama eseshaye' apuenaye puerrar ñeñŧcha' rra'.

17 Atteñapa' machayoŧa çhapoña pueyoçhro, atet ot: "Apa pa'taruasañer ama't shontetpa' echyenet puerrar, ello puechare'tyena. Naña arrpa' o' nerromuerrmoch nachporrñoŧ.

18 Te'pa' o'ch ahuerren apuesho; te' napa' atetcha' notuer: Apache' napa' o' neŧohua ñeñŧ ama cohuenayaye Yomporecop ama't ñaña ŧocop.

19 Napa' ama cohuenayayno attoch pechemer peŧapuerren. Te' napa' aña pocetsta nocop ŧapa' ŧa'taruasañrach peŧapuerren."

20 O'ña atet cotape'chua ello e'ñe cohuen Yomporecoppa' allempoñapa' ahuen pomprosho.

'Ama't atarr ellaŧarmeñ allempo entapueñ pompor e'ñe puemuereñoŧ mata pocatapueñpa' a'chono'tapueñ, tso'tstsapa'tapueñ. Ñeñŧpa' atet huom'cha'tapuenan puechemer atto e'ñe cohuen agapapueñ.

21 Puechemerñapa' atet otueñ: "Apache' napa' o' neŧohua ñeñŧ ama cohuenayaye Yomporecop ama't ñaña ŧocop. Na te'pa' ama cohuenayayno attoch pechemer peŧapuerren."

22 Tarraña pomporñapa' e'ñe allorocma otan pueñañresha'chno: "O'ch sena' e'ñe tayecma shetamuets ñeñŧ atarr cohuen co'chnesha', o'ch sechorratapuennana nechemer. O'ch senatapueñ ñaña anillo potaŧo, o'ch senatapueñ ñaña sapatets pa'tco.

23 O'ch sennana' ñaña nehuacsher ñeñŧ atarr ne'soya'taten o'ch semtse o'ch yerrallme'ch o'ch yocshame'tam'ŧsapueña.

24 Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter." Allempoñapa' atarr nanac coshame'tam'ŧsapueñet.

25 'Ñehua, po'psheñeñ puechemer ñeñŧ popo'nar ñaña'pa' pa'mro'tsen allempo çhen puechoyomer. Allempoña err pa'mroŧ e'ñe ya'rrotterrtsa pocollopa' o' e'mhuerran cosham'ñats all requerquenet ñaña ashe'rarañ.

26 Allempoñapa' çhore'tuerran cheshachorpa' a'ŧto'tuer: "¿Eso'mare'tña coshame'tenet? ¿Eso'tña atarr coshame'tam'penet?"

27 Cheshachorñapa' atet otapuer: "O' huena pemo'nasheñ, ŧomporpa' o' muetsatan becer ñeñŧ se'soya'taten tarro'mar atarr coshapuenana puechemer. Ama çhoye' rromueno, e'ñe huomech agapapueñ."

28 Ñaña'pa' ñeñta atarr atsrre'matuerre' ama mueno o'ch be'tosuerr all o' chen pa'mo'nasheñ. Atteñapa' cha'nom pomporpa' allach otere't: "Pebe'tosuerr." Ñaña'pa' ama mueno o'ch be'tosuerr.

29 Ñaña'pa' atet otuerran pompor: "Napa' peñotenen o' shonte' char e'ñe cohuen name'ñenpa; napa' ama't parochapa' ama esempo natpare'tenpe. Tarraña ama't atet nepenpeñpa' ñaña'pa' ama't esempapa' ama p̄apuennoña ama't patrra cabra attoch nocshame'ta naña epan ñeñt̄ parro neyemuetyena na.

30 Te'ña o' huena ñeñt̄ pechemerma't pepen ama't ora o' a'gasta'huonaḡ peçllayor e'ñe puecañoresha'teño't, te'ña p̄apa' o' pemtsatapueñ becer ñeñt̄ ye'soya'taten."

31 Pomporña'pa' atet otererr: "Po'ño'ch nechemercha' p̄apa' chocma arro'tseney parro. Amahuaca'ye nechemercha' peñoteñe'te' ñeñt̄ allpon nechenpa' e'ñerramche' p̄ocma.

32 Ñeñto'marña te'pa' añ poctetsa o'ch yocshame'tam̄psapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

Atet atma'ntatarettena atet pena ñeñt̄ cohuaḡpsatsre'tene' pamo'mte'

1 Elloña Jesús'pa' alla toma'ntaterranerr pueyochresha', ñeñt̄pa' atet serrpare'taterraneterr:

—Eñall yacma puesheñarr ñeñt̄ atarr eçllayoret. Ñapa' echenan pa'cheñer ñeñt̄ po'taruas pene' o'ch cohuaḡpsan ora allpon ñeñt̄ echyen pamo'mte'. Ñaña ñach quellquene' po'potantañ ñeñt̄ allpon te'ba'yeññañet pamo'mte'. Atteña allempoña puesheña'tets acheñenesha'pa' a'metam̄peñeta' pamo'mtayesho, atet otoñet pamo'mte': "O'ca'ye atta a'chencatatsre'tapña ñeñt̄ penen ñeñt̄cha' pecuaḡpsatsre'tene'."

2 Allempoña pamo'mte' atet e'mare'chpa' allenta agotach. Allempoña huapapa' atet otaḡ: "Eso'maruañaca'yeña atet p̄a'chencatatsre'tenen. Te'pa' o'ch peñotatnomuen e'ñe ora allohuen ñeñt̄ allpon petaruasen tarro'mar te'pa' ama nemno o'ch allo'na pecuaḡpsatsre'tenen." O' atet otue pamo'mte', ñaña'pa' allenta ahuerr.

3 Allempoña pa'taruasañer ñap̄topa' atet cotape'chen: "Te'pa' amach allo'na netaruasa'нено namo'mtayesho; o'ca'ye mopa'tam̄perrenña allo neganena. Te'pa' errotenuachñaca'ye nepate'. Napa' ama necheno nehuamenc attoch namre't ñeñt̄cha' netaruas neperreñ, ñaña ama

nemno o'ch netaruas neḡa' o'ch atta nenamare'tyen quelle atet ḡa'yena po'psheññechno ñeñt po'taruas pene' o'ch enamare'tyeset quelle, tarro'mar na ñeñḡpa' atarr apenco'chen nenteñ."

⁴ Allempoña o' e'ñe cotape'chuepa' atet ot: "Te'ña po'ño'chpa' o'ca'ye neñoch atet'cha'ca'ye neḡa' attoch acheñenesha'pa' e'ñech cohuen agapnet pa'paclo tsapa'onet allempoch huañ neçllayor ñeñt allpon naguën te' netaruasot."

⁵ Allempoña atet cotape'chenpa' atet'cho' ḡa. Ñeñto'marña agotatan allohuen allponsheña ñeñt teḡa'yets pamo'mtayesho. E'ñe puesheña'ttsa ñanom a'ḡto'tyesap, atet otapanet: "Papa' çerrpona't petebeñña namo'mte'?"

⁶ Ñaña'pa' atet otos: "Napa' netebeñca'ye çharroch çharra' cilindro aceite'." Ñeñt patron pa'cheñerña' aḡ allo quellquëññañ ñeñt allpon teben ahuatoteñ. Allempoña'pa' atet otererr: "Te'pa' o'ch ḡanorr tecmapa' o'ch pe'sherrña ñeñt çharroch çharra' cilindro o'ch pequellquërr amnaroch çharra' o'ca'ye allponamaña ñeñt peteben."

⁷ Allempoña'pa' oterranerr ñaña po'psheñeñ: "Papa'cho'ña çerrpona't petebeñña namo'mte'?" Ñaña'pa' atet otos: "Napa' netebeñ çharroch çharra' arroga trigo." Ñeñt patron pa'cheñerña' aḡ ñaña allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña ḡanorr tecma o'ch pe'sherrña ñeñt çharroch çharra' arroga o'ch pequellquërr poscoch çharra'; te'pa' o'ca'ye allponamaña ñeñt allpon petebeñ namo'mte'."

⁸ Allempo pamo'mte' eñotan ñeñt pa'taruasañer atta shecare'teñ, ñaña'pa' atet oten: "Añ acheñer ama't puehquëñoḡpa' e'ñe eñoteñ o'ch entan ñeñt'cha' atarr sherberre' ñocop tsapa'onet." Po'ño'ch acheñenesha' arr patsro ñeñt ama ame'ñetso ñetña'pa' atarr eñoteñet attoch e'ñech aña e'nenet ñeñt'cha' atarr sherberrets ñocpuet tsapa'onet. Tarraña ñeñtña ame'ñetsapa' ama tama eñoteñeto, ama es cotape'cheneto o'ch e'nenet ñeñt'cha' atarr sherberrahuet ñamet tsapa'onet.

⁹ Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñḡpa' añecpuepa'chña sherbenes alloch seyenpueñ po'potantañ allochña'pa' attochña e'ñech cohuen muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña añecop ñeñt ama pocteye' enteno Yompor. Allochña'pa' eñallcha' socop ñeñt'cha' e'ñe cohuen sagüerre' e'ñe all Yomporepahuo esempoch secha'cherr

all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socrra'huerra Yomporepahuo ñeñtpa' ama ahuañaño.

10'Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt cohuen enten Yompor, ñaña'apa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñe ñocop, ñaña'apa' e'ñech eñoteny attoña ama'tcha' atarr aton yecheneñpa' atterach amach es yesherbateñe ñocop.

11 Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñe ñeñt cohuen enten Yompor allempopa' amach errotenot alla apuerryerroña ñeñt po'ño'ch atarr sherbets ñeñt apuency ña.

12 Ñaña ñerra'm ama es yesherbateññañe ñeñt po'psheñño atet ñerra'm ñeñt Yomporo, allempopa' amach errotenot apyeña ñaña ñeñt e'ñe yocop ñeñtcha' e'ñe cohuen yocshatene'.

13'Ñeñtpa' atetcha' netma'ntacha:

—Ama't puesheñarrofeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet ye'papa' puesheñarr e'ñech cohuen yemorrenteño't yocsheñeshocmañen yesherbeñ, po'psheñeñña'apa' amach e'ñeye' yemorrenteño; çhach yottena ñerra'm çha yetsena'teñ. Ñeñto'mar atetpa' amach cohuenaye' yesherbeñe. Ñerra'm aña e'ñe sema'yoçhrena ñeñt e'ñe socpa attoch segana aton quelle, ñeñt atetpa' amach errotenot sema'yoçhrona ñaña añecop ñeñt atarr sherbets Yomporecop.

14 Añña fariseonesha' ñeñt e'muene' Jesús ñeñt atet serrpare'tatenan acheñenesha', ñetña'apa' aña atarr ye'chapretenet quelle. Ñeñto'marña ñet allempopa' puesasare'teño'fet Jesús'pa' çha atarr che'tatseteñet.

15 Jesúsña'apa' atet otanet:

—Sapa' çha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporña'apa' e'ñe eñotennas seyoçher ñeñt atto sapa' atarr seshcare'tyeñ acheñenesha'. Tarraña ñeñt e'ñe ñañeñeta atarr cohuen entyetsat arr patsro, ñetña'apa' atarr tsena'tenanet Yompor.

Moisés po'ño'ñpa' ñeñt atet anaret ñeñtpa' ñeñtaña e'ñe yemete't tarremphua allempo orrterra Yompor po'cohuenña ñeñt atto ayochreshattena ña

16 Allempoña Jesúsapa' atet serrpare'taterranerr acheñenesha' po'poñonet:

—Añaña ñoñets Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yesaye't Yompor po'ñoñ, ñetpa' ñeñta e'ñe serrpare'tete't tarremphua allempo orrtosa Juan. Allempoteñ serrpare'tatosanet Juanpa' ñapa' añ serrpare'tatosanet atet penaña Yompor po'cohuenña atto atarr ayochreshattena ña, ñeñtara cohuen ñoñets alloch sequesh-perra. Ñaña allohuen acheñenesha' e'ñe pueyočhrocmañenet ñeñta atarr muenenet.

17 'Tarraña ama't atteñpa' ñeñt atet anaret Yompor po'ñoñ ama't patrpa' quellec puehempotollohuenpa' amach chenquerro. Tarro'mar Yompor po'ñoñpa' amach erroteno ya'huañatere ñeñt atto sherbeney. Patsña epuet enet ñeñtpa' huañerrcha'.

*Atto Jesúsapa' yečhatosanet ama asanna'tpahuoyaye
(Mt. 19.1-12; Mr. 10.1-12)*

18 'Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñtcha' puetapor perretpa' ñeñtñapa' čhach ochña'tam'perrana puetaporeshe'mañ; ñeñtpa' ama cohuenaye' enteñe Yompor. Ñaña ñeñtcha' yorerre' coyanesha' asaret, ñeñt yacmarpa' čhach chetapreten taporets; ñeñtpa'čho'ña ama cohuenaye' enteñe Yompor.

Atet ařaretta pueheñarr yacma ñeñt atarr ečllayoret; atet ařaretta ñaña po'psheñeñ yacma ñeñt atarr huocchañetets, ñeñtpa' añ pa'so'cheñ Lázaro

19 Elloña Jesúsapa' atet serrpare'tatanet:

—Eñall pueheñarr ñeñt atarr ečllayoret ñeñt chorrenaya shetamuets atarr cočhneshare' ñeñt atarr cohuen apomotyesarēt. Epaye' coshatse'tatyēñ ñeñt allpon echyen. E'ñe pocsheñoťpa' e'ñe ellapene't rrallme'chats.

20 Eñall ñaña pueheñarr ñeñt atarr huocchañetets ñeñtñapa' čha ora puetsaren, ñeñtpa' añ pa'so'cheñ Lázaro. Ñaña' allach ellapene't a'yot yetarrot allotecma be'ten ečllayoret pa'paclo.

21 Ñapa' añach atarr ye'chena o'ch rra'yesan ama't coñeťa'ttsa rreñets ñeñt a'shore'tatyen ečllayoret po'mesapnačo. Allña ochecpa' o'ch huapoña o'ch tso'na'teññaña' pueptsarña.

22 Atteña o' chap pam'tarr allempo rroma ñeñt huocchañeshar. O' rroma mellañoťeñnesha'ña huačha'tapa' o' aneret e'ñe Abrahamuesho, allña'pa' o' chapachet atarr

cosheñtso. Atteñapa' chap allempo rroma ñaña ñeñt atarr eçllayoreť, ñeñtñapa' pampueñeta'.

23 Ñañaapa' alla chap coñcha'puetso ñeñt o'patenaya ñeñt rromuets ñeñt ama ame'ñetso. Allñapa' atarr mueroçhtosa all coñchosa. Atteñapa' cohua' enoneťpa' allotña entosan Abraham allaparo'tsen ento. Allñapa' allo'tsen epuet Lázaro.

24 Ñeñtña eçllayoreť allenta chore'tan Abraham, ñeñtpa' atet och: "Nompore Abrahamama pemueraye'chna, pemñaye'chon Lázaro o'ch huapa arr attoch esha'tosan potať oño, ama't potaťotapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' nemueroçhtosa arr tso."

25 Abrahamñapa' atet och: "Nechemerñecha' te'pa' o'ch peyerposa ora allpon pa'namen ñeñt pecheseť ñeñt atarr coçhneshare' pentyeseť allempo pocrreť patso. Lázaroñapa' ama es eche'te ama't coñe'ta ñeñt atarr cohuen enten ñaña. Te'ña ñapa' o' atarr acshataretterra, pañapa' o' atarr pa'coñchataretterra.

26 Elloña te'pa' ama't e'ñe eseshapa' amach errotenoť chapamñsapeto allo'tseneť tarro'mar pa'apa' atsereto'tsenpa yomta'n. Sapa'cho'ña te'pa' ama't e'ñe puesheñarrofesapa' amach errotenoť seçhapanpesyo yaña. Amate' erroť yepere'te ñeñtpa' atet anaret attoch yello'tsentataretterra."

27 Allempoña eçllayoreťpa' atet oterranerr Abraham: "Tarraña ama't atteñ nomporepa' te'pa' o'ch notať o'ch pemñer Lázaro all patsro nompor pa'paclo.

28 Tarro'mar all napa' nechen amnarsheña nemo'nasheñ. Ñeñto'marña nemneñ o'ch ahuerri o'ch cotape'chaterraneta' e'ñe cohuen te't ñetpa'cho'ña esempopa' alla chapuet arr coñcha'puetso."

29 Abrahamñapa' alla otererr: "Ñetpa' echenet Yompor po'ñoñ ñeñt quellquēť Moisés ñaña allohuen ñeñt a'mñtayeť Yompor po'ñoñ ahuat. Te'pa' e'mñnoterrñañetepa' Yompor po'ñoñ ñeñt echenet."

30 Ñañaapa' atet oterranerr Abraham: "Ñato' amach e'mñnoterrñañeto Yompor po'ñoñ, tarraña nompore Abrahamama ñerra'm esesha' tanterrtsa rromot ñeñtcha' orrterrahuet allemponapa' po'ñoçh ñeñtcha'ña cotape'chaterrahuet ello e'ñe cohuen Yomporcop."

31 Abrahamñapa' alla otererr: "Ñerra'm amach e'mñnoterrñañeto Yompor po'ñoñ ñeñt atet quellquēť Moisés ñaña allohuen ñeñt a'mñtayeť Yompor po'ñoñ ahuat, te'ña ama't esesha'ch tanterrtsa rromotpa' amach eshec çhapanetoña pueyoçhreto attoch cotape'cherret ello e'ñe cohuen Yomporcop."

17

Atto čhocmach huaponaya ñeñicha' yetpatyene' o'ch atet p̄atyeseŷ ñeñĩ ama pocteye' enteno Yompor

(Mt. 18.6-7, 21-22; Mr. 9.42)

¹ Allempoña Jesúsŷpa' alla serrpare'taterranerr pueyochre-sha', ñeñĩpa' atet otanet:

—Chocmach huaponaya ñeñicha' yetpatyene' o'ch atet p̄ateŷ ñeñĩ ama pocteye' enteno Yompor. Tarraña napa' o'ch notas, atarrcha' yoročhenotsen ama't erra'tsena acheñer ñeñĩ orrtatene' ñeñicha' topatyene' po'psheñeñ ñeñĩ name'ñenaya o'ch atet p̄atyenanet ñamet ñeñĩ ama't mamesha ama pocteye' enteno Yompor.

² Ama't ñeñĩ e'ñe errte' name'ñenaya ñerra'm esesha' o'ch orrtatanet attoch o'ch atet p̄atachet ñeñĩ ama pocteye' enteno Yompor, ñeñĩña acheñerpa' atarrcha' yoročhenotsen tarro'mar ñapa' aña o'patenaya coñcheñets ñeñĩ atarr huomenc. Ama't ñocoppa' ama tama yoročhenayayñe ñerra'm ama atet p̄atenana' po'psheñeñ, e'ñech allorocma čharachetañ mapue' añecmuen pa'čhnoŷo allpon ñerra'm puetse'tamets o'ch huapore'chet oño epo allcha' ño'shach mapue'.

³ Ñeñto'marña sapa' e'ñech señoŷa, amach sorrtatatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erroŷ p̄onas sa ñeñĩ ama pocteye' enteno Yompor, socoppa' añ poctetsa o'ch soctape'chater e'ñe cohuen o'ch p̄oter ñeñĩ atet o' p̄ohuonaŷpa' ama't mameshapa' ama pocteye' enteñe Yompor. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen sepretner.

⁴ Ama'tcha' atonoche'tats atet penset, ama'tcha' pamtarrpa' cančhroche'tatscha' atet penset ñerra'm o'ch alla llequerrana ñeñĩ atet pennaset, ñerra'm ama't pamtarr cančhroche'tats o'ch alla oterret: "Napa' o' atet neponaŷ ñeñĩ ama pocteyaye tarraña te'ña ellopa' amach alla atet neperre'te", socoppa'čo'ña aña e'ñe poctetsa o'ch alla e'ñe cohuen sepretner ñeñĩ atet sepene'.

E'ñe yeyemteñoŷ Jesús ñeñĩa ahuamencat yepene' attoch es yorrtatyen ñocop

⁵ Allempo atet otarettenet aña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' peŷa'y allochñapa' e'ñech cohuen yeyemterra.

⁶ Partsesha'ñapa' alla oterraneterr:

—Ñerra'm po'ñoçh e'ñe na seyemtenañ napa' e'ñeca'ye na'pocstatañña neñoñ ñeñt atet notenes, ama'tcha' allponatolloña seyemtenna ñerra'mrrate' mostazllometoll, sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómo'rech: “Bera'nmuepa'ch arrot all ten, arropa'chña tomhuerrerr a'yo sa'po”, tsachñapa' atetcha'cho'ña pañ e'ñe atet soteñ.

Atto atma'ntatarettena ataruasañpa' añ pocstetsa ñocop e'ñech etsotenan ñeñt atet muenateñ pamo'mte'

7 Ellopa' alla toma'ntaterraneterr, ñeñtpa' atet oterraneferri:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuellen amapa' ñato' ellapene'tcha' cohuañpene' sayaraçhno ellerroneñña allemPOCH huerra po'taruasotpa' sañapa' ama't puesheñarrotesapa' amach sotapuerena señañra: “Te'pa' o'ch pebe'tosuerr o'ch yerrallme'chnen parro.”

8 Elloña ñeñtpa' o'chcho' alla sotapuererr: “Te'ñapa' o'ch peptare'tuerren ñeñtcha' nerra'nen, allotñapa' o'ch pa'cohuenetuerr peshtam attoch e'ñe cohuen pesherb'a'huerrren cho'pcha'ña naphuerre' nerrar ñeñtcha' nerra'nen. O'chña nerruanen napa' allemPOÑapa' cho'pcha'ña rrallme'chnets paña.”

9 Ama'tña sapa' atetca'ye sepena. Ñaña sa'taruasañer ñerra'm esempoch e'nuan ora po'taruas ñeñt seyecheña, sañapa' ama't puesheñarrotesapa' amach sotereña: “Parasyos o' pe'nuon netaruas.” Ama't ama atarr socshateñe ñeñtpa' e'ñe pocte' ñocop tarro'mar ñapa' allpona o' e'nua ñeñt allpon seyecheña.

10 Sapa'cho'ña Yompor pa'taruasañer sepene'. Ñaña ama't allemPOCH setsotuen ora allohuen ñeñt atet otenes Yompor atterepa'chña sentena ama atarr atonaye' sesherbeno. Aña setsoten ñeñt e'ñe pocstetsa allohuen añecop ñeñt pa'taruasañer pen Yompor.

Atto Jesús'pa' e'ñe po'ñoñña a'crratyepapan aptsarñateçhno ñeñt çharrasheña

11 Allempo sechena Jesús Jerusaléño arr oñem allohua temuena Samaria epuet Galilea.

12 Allempoñapa' çhap paterr anetso. Allñapa' huaçha'toña çharrasheña ñeñt osyen puetsarñats ñeñt otenet lepra. Ñeñtña aptsarñateçhno a'yota tomçha'tyesoset.

13 Ñetñapa' allotña rranare'tyesosetpa' atet ochet Jesús:

—Maestro Jesús'ocha' pemueraye'chosya yaña.

14 Jesúsñapa' allenta cohuosanetpa' atet otosanet:

—Te'pa' o'ch ahues o'ch segatyena' sañña judionesha' po'cornanesharesho attoch ñetpa' o'ch eñotaset te'pa' o' socrerra.

Atet otanet Jesús, ñetña ahuanmatsetpa' e'ñe allorocma acrra'yueserrochet.

15 Puesheñarrña allempo eñota o' correrrapa' alla puetallerapa' o' alla ahuer Jesúseshoneñ atarr nanac pocsheñesha' aye'chochtatnerran Yompor.

16 E'ñe pueparasyoso'teñesha' rromosa Jesús pa'rrpõt. Ñehua, ñeñt atet patsapa' ñeñtpa' ñeñña samario'marnesha'.

17 Allempoña Jesúsapa' atet otan acheñenesha' ñeñt allo'tsa'yen:

—Ama't çharrasheña ñeñt o' na'crratyesua te'. ¿Po'potantañña esconsheñapa'? Ñetñapa' ama es yerpa'pesnomayeña attoch aye'chochtatoñet Yompor.

18 E'ñe puesheñarraña ñeñt puerrerrtsa attoch atarr aye'chochtatan Yompor ama't ñapa' ama judioneshayaye.

19 Allempoña Jesúsapa' atet otan ñeñt a'crraterr:

—Te'ñapa' o'ch petanterra, e'ñech cohuen peserr tarro'mar papa' e'ñe peyemteñoten na o' pocrerra.

Atto fariseonesha'pa' a'p'to'chet Jesús: ¿Esempo'tcha' orrterraña Yompor po'cohuenña allempoch atarr ancha'taretterraña?

(Mt. 24.23-28, 36-41)

20 Parrochña fariseonesha'pa' a'p'to'chet Jesús:

—¿Esempo'tcha' orrterraña Yompor po'cohuenña allempoch atarr ancha'taretterraña?

Jesúsñapa' atet otanet:

—Yompor po'cohuenña atto ayochreshattena ñapa' ñeñtpa' ama atteyaye ñerra'mrrate' ñeñt es yentyen yecloyot.

21 Ñeñto'marña amach errotenot oteto: “Arrca'yeña ancha'tarettenaña Yompor”, amapa' “Tarroca'yeña ancha'tarettenaña Yompor.” Tarro'mar Yompor po'cohuenña ñeñt atto ayochreshattena ñapa' ñeñtpa' o'ca'ye motetnoma orrtatsa e'ñe sesho ama't seyoçhro.

22 Elloña ñapa' atet otarranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrtternasa ama't e'ñe pamtarra. Tarraña ama't e'ñe allempa amach senterno.

23 Saña allempopa' atetcha' otasetañ: “Te'pa' o' orrterraña Cristo allo'tsenca'ye”, amapa' “Tarro'tsenca'yeña Cristo.” Sañapa' amach setatstoña all, amach soctatscheña ñeñt sets all.

24 Tarro'mar ñerra'm esempo çherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet errañaren.

25 Ñehua, na te' ñeñt atet anaret nocop ñanompa' atarrcha' na'mueroçhtataretta, ama't namo'tsesha' ñeñt corretsa te'pa' amach eseshaye' naguënaye.

26 Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé.

27 Allempopa' ama es puecha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshaçhno, coyaneshaçhno'pa'cho'ña apanatyese't ñeñt yoranatyeshahue't. Ñetñapa' ñeñta e'ñe cohuen entete't. Atteñapa' çhap allempo be'tosos Noé po'huarcopahuo. Allempoñapa' huata, cho'pa oñ erracmañen, e'ñe a'cllatuan allohuen acheñenesha' errañaren.

28 Attecmach perreterr allempo corre't Lot, aña e'ñe cotape'chyerreterr shonte' rrallme'chyesete't ñaña shonte' orrare'tyesete't, atarr es rañta'yese't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyese't ñaña shonte' pocollaçhno. Ñetñapa' e'ñe ñeñta cohuen entete't.

29 Atteñapa' çhap allempo cha'nom Lot ñeñt anetsrot. E'ñe ñeñte yetrocma allempo cha'nom Lot allot, Yomporña pue'ntaño' a'shoranet tso' ñeñt shemashrepñeñeno' huorten, ñeñtña e'ñe a'cllatuerrahueter allempo.

30 Attecmach perreterr allempoch norretuerra na Ñeñten Acheñetosets.

31 Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' puesheñarr ñato' a'yote'tsenach pa'paclo't arepa'chña be'tosatsterro ama't e'ñe mamesha pa'paclo' attoch yoratsre'tnoma. Amapa' ñerra'm puesheñarr pa'mro'tsenpa' arepa'chña onatsterro.

32 Seyerpuepa'chña atet pa' ahuat Lot puetapor ñeñt atarr morrentnomaya ñeñt patso'marecpa.

33 Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

³⁴ 'Po'ñoçha'ye o'ch notas atetcha'ca'ye perra allempoch nohuerra, puesheña'tetspa' anmaretterretcha'; ama't ñeñt e'ñe pamo'ts pene', ñeñtña'pa' allach asa'nmare'terra. Atet ñerra'm tsapo all manrrenet epsheño'maret, puesheñarrpa' anmare'terrach, po'psheñeñña'pa' allach asa'nmare'terra.

³⁵ Amapa' ñato' allempopa' allo'tsencha' epsheña coyanesha' ñeñt parro puetse'tets mapyo ñeñtpa'cho'ña puesheñarrpa' anmare'terrach ñaña po'psheñeñña'pa' allach asa'nmare'terra.

³⁶ Amapa' ñato' allempopa' allo'tsencha' ñaña epsheña ñeñt e'ñe parro taruaset pa'mro. Puesheñarrña'pa' anmare'terrach, po'psheñeñña'pa' allach asa'nmare'terra.

³⁷ Allempoña pueyochresha'pa' a'p'to'chet, atet ochet:

—Parteshacha' ñeñtpa' ¿erra'tcha'ña atet perra?

Jesúsña'pa' atet otanet toma'nteñtso:

—Ñerra'm erro'tsencha' ñeñt rromue'pa' allcha'ña shontaña tse'm.

18

Atto atma'ntatarettena rretorranesha' ñeñt çhocma enamare'tene' juez attoch yenpue'

¹ Allempoña Jesús'pa' alla serrpare'taterraneterr toma'nteñtso attoch eñoçhet ñeñt poçtetsa yocop çhocmach yema'yochena amach yemuenme'chatsche ma'yochatsa.

² Ñeñto'marña allempopa' atet otanet:

—Pa'terr anetso allo'tsen puesheñarr juez ñeñt po'taruas pene' o'ch e'ñe cohuen a'poçtatan ñoñets acheñeneshacop ñerra'm esempo e'moñe'tannenet. Tarraña ñeñtña juezpa' atarr atsrre'mña'. Ama't Yomporpa' ama añcha'na'tpahuoye' enteñe ama't e'ñe mamesha. Acheñenesha'pa'cho'ña ama't puesheñarrapa' ama acua'penaye' entenaneto.

³ Ñeñtña anetsropa' all yeçhena ñaña puesheñarr rretorranesha'. Ñaña'pa' eñall po'psheñeñ ñeñt e'moñe'tene', çhocmach erro't peññañ ñeñt ama poçteyaye. Rretorranesha'ña'pa' çhocmach sene't juezesho. Allcha' çhocma atet otare'tenan juez: "Te'pa' nemneñ o'ch e'ñe cohuen peyenpa'n attoch pa'poçtaton cohuen ñoñets añecop ñeñt ne'moñe'tene'."

⁴ Juezña'pa' ama't allponmat ama mueno o'ch yenpue'. Tarraña rretorranesha' ñapa' çhocmach sen juezesho enamare'tene' attoch a'poçtatoñ ñoñets añecop ñeñt e'moñe'tene'. Atteña'pa' çhap allempo cotape'ch juezpa' atet ot: "Napa' po'ñoçh ama't Parets ama nencha'teñe;

acheñenesha'pa'cho'ña ama't mameshapa' ama acua'penaye' nentenaneto.

⁵ Tarraña añ rretornanesharpa' atarr atsrre'mochtana'tenen, epaye' huapame'tennana, o'ca'ye atarr a'mñechatna. Ñeñto'marña te'pa' o'ch neyenpue' allochñapa' amach alla huerrnane'te."

⁶ Allempoña Jesús pa' atet oterrerr:

—Ama't se'mueñeña ñeñt atet oten juez ñeñt atarr atsrre'mñañ. Te'pa' oten ahuo'ch a'pocatan rretornaneshacop ama't ñapa' ñeñt acheñer ñeñt atarr atsrre'mñañ.

⁷⁻⁸ Ñeñto'marña te'pa' o'ch noterrerr: Yomporpa' elloña nanaccha' cohuen a'pocatonay ñeñtey o' acrerrey ya ñeñteycha' e'ñe puechemer pen ñerra'm yapa' chocmach yeçhore'teñ ama't yeto ama't ñaña tsapo. Napa' po'ñoçh o'ch notas, Yomporñapa' amach atomato, choch ye'mñote'; ñapa' e'ñechca'ye allorocma e'mñotey o'ch e'ñe cohuen a'pocatonay ñeñt yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errponsheña'te'ña nentuerrña arr patsro ñeñt e'ñe cohuen name'ñenaya.

Atet ma'yochena fariseonesha' ñeñt e'ñe cohuen entetsa, all ma'yocha ñaña po'psheñeñ e'ñe puellquëñsha' ñeñt atarr ochña't entetsa

⁹ Po'pocheñoña Jesús pa' atet serrpare'tatan allpon acheñenesha' ñeñt e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñapa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesús pa' alla toma'ntatanet, ñeñtpa' atet otanet:

¹⁰ —Eñall epsheña acheñ ñeñt sets Parets pa'pacillo allcha' ma'yochoset. Puesheñarr ñeñtpa' fariseo ñeñt e'ñe ñañeña cohuen entetsa; po'psheñeññapa' ñeñt puehquëño'te'na cobra'yenan acheñenesha' quelle ñeñt gobiernocop.

¹¹ Ñeñtña fariseopa' tomos all ma'yochosañ, ñeñtpa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puer-ratam'psanna'tyenet, ama pocteye' es panna'tyeneto, atar-rcha' cheta'yeñet coyaneshachno ñeñt ama puetaporeyaye. Napa' ama atteye' Nompore nepeno. Napa' ama nesh-care'teno atet pena añ acheñer ñeñt puehquëño'te'na cobra'yene' acheñenesha' quelle gobiernocop.

¹² Napa' pate'tets semanapa' epochcha' neñore'tena Nompore pocop, ñaña ama't ora ñeñt allpon naguën chocma napuenep allpon pocetsa pocop ama't nediezmo Nompore.” Allohua huañ atet ma'yochena fariseo.

13 Po'psheñeñña ñeñt cobrets quelle ñaña'apa' alla tomos a'yoť. Ñapa' eñotena atarr ochñať ñeñto'marña ñapa' ama cohuoso enonet Yomporeshonet. Ña puellquẽñoťpa' nosan pot puesomapo. Ña puema'yocheñoť atet otos: "Nompore, te'pa' o'ch pemorrenterrna attoch e'ñe pe'pretna'huerrnan allohuen no'chñar tarro'mar napa' atarrca'ye ochñaaten."

14 Jesúsñapa' atet oterraneterr:

—Napa' o'ch notas, ñeñtña atet a'metene' po'chñar ñeñtña acheñerpa' e'ñe pocte' enteñ Yompor. Ñeñto'marña allempo ma'yochuapa' o' ahuerr pa'paclo e'ñe cohuen a'pretna'huaretterra po'chñar. Po'psheñeñña fariseo ñeñt ama a'metosaye po'chñar, Yomporñapa' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheñoť ñeñtña tsapaťonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapaťonetpa' atarrcha' cohuen enteret.

Atto Jesús'pa' bensare'tam'psapan cheshanasha' ñeñt huapaťoťnet

(Mt. 19.13-15; Mr. 10.13-16)

15 Ñaña allempopa' shonte' hua'cha'tachet cheshatollesha' Jesúsesho. Ñetpa' añecopña hua'cha'tachet o'ch a'p'lla'yesapanet Jesús attoch bensare'tam'psapanet. Jesúsña pueyochresha' allempo entapan ñeñt hua'cha'tate' cheshaneshachno, ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretta'pueto.

16 Tarraña Jesúsñapa' allenta chore'tapanet, atet otapanet:

—Pocte'ña'cho' semnachñaca'yeña cheshanasha' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañoť.

17 Po'ño'chpa' o'ch notas, ñerra'm esesha' ama e'ñeye' pueyemteñoťeye' aguẽññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuan'pene', ñetñapa' amach pueyochreshaye' perraneto Yompor atto atarr ayochreshattena ña.

Atto puesheñarr ñeñt huepueshameñ ñeñt atarr e'cllayoret ñaña'apa' eñorana'tosana Jesús

(Mt. 19.16-30; Mr. 10.17-31)

18 Po'pocheñoña puesheñarr ñeñt atarr añcha'tarettetsa a'p'ťo'tosan Jesús, atet otos:

—Maestro, p̄apa' atarr cohuen acheñreḡ, te'pa' o'ch p̄otapuen ḡerrot̄ena'tcha' neḡaña na e'ñe cohuen attochña napa' corretsanach e'ñe tayoteñ ama't errponañohuen?

19 Jesúsñapa' atet otaḡ:

—Eso'mare't p̄otenenña napa' atarro' cohuen acheñren. Arr arromñañenesha' ama't e'ñe p̄uesheñarrapa' ama eñalleña ñeñt̄ e'ñe cohuen acheñer. Ñap̄taña Yompor ñeñt̄ e'ñe po'ñoç cohuen.

20 Papa' e'ñe peñotuen Yompor po'ñoñ all oteneḡ ñeñt̄cha' atet yepena e'ñe cohuen; ñeñt̄pa' atet oteneḡ: “Amach yechtapretyesatsto ḡaporet̄s; amach yemtsanna'tatsto; amach yetyesatsto; amach yetoma'tam̄psatsche yamo'ts e'ñe at̄ta; ñaña yemorrenteñoḡpa' yem̄cha'na'chcha' yompor ñaña yachor.”

21 Ñeñt̄ña a'p̄to'tene'pa' atet otererr:

—Napa' e'ñeca'ye cheshoteñ ora añeçhnopa' e'ñeca'ye netsotueñ.

22 O'ña atet otua Jesúsñapa' alla otererr:

—Eñallmeñca'ye paterr ñeñt̄ pepalltena ñeñt̄ ama atteye' pepena'. Te'pa' añcha'ña atet peḡa o'ch e'ñe pepomhuerr ora allpon ñeñt̄ pechyen o'ch p̄apa'yera' huocchañneshaçhno ñeñt̄ atarr es pallta'yetsa attochña p̄apa' pecherrcha' ñeñt̄ atarr nanac sherbets Yompor pue'ntaño. Allempochña pehuerrapa' o'ch p̄oçterren attoch e'ñe neyochresha' neperreḡ e'ñe poçtacma.

23 O'ña e'mhuan ñeñt̄ atet och Jesúsapa' ñañaapa' cha atarr lleca tarro'mar ñapa' atarr eçllayoreḡ, shonte' pa'namen echyen.

24 Jesúsña eñch ñeñt̄ atet atarr llecapa' ñañaapa' puellcapreteñoḡpa' atet ot:

—Ñeñt̄ atarr eçllayoreḡpa' atarr nanac echarr attoch agapoñet Yompor po'cohuenña ñeñt̄ atto ayochreshattena ña.

25 Ñehua, ñeñt̄pa' atetcha' netma'ntacha. Po'ñoçh yapa' yeñoteñ berr añecmuen allpon ñerra'm huaquesh* atarrca'ye torrapo' o'ch esho'tosa añeḡollponatollo atet ñerra'mrrate' acosh puetatollo. Ñeñt̄pa' atetca'ye penaña acheñ ñeñt̄ eçllayoreḡ ello atarr torrapo' o'ch agapan ñaña Yompor po'cohuenña ñeñt̄ atto ayochreshattena ña (tarro'mar ñetpa' ama mueneñeto o'ch sehuanmuet ñeñt̄ atarr morrentenet ñet attoch pueyochresha' perranetañ Yompor).

26 Ñeñt̄ña e'muene' atet oten Jesús ñetñapa' atet ochet:

* 18:25 Ñehua, Jesús añ toma'ntatanet camello ñeñt̄ payara penet all pa'nyo, ñeñt̄ e'ñe allpon ñerra'mrrate' huaquesh.

—Tarraña ñerra'm atette'pa' amate' esesha' a'queshpatarettertsa ama't puesheñarra tarro'mar yapa' yeñoteñca'ye huaquëshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Partseshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yocterreř.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' pueťapor, pa'mo'nasheñnesha' ñato' pompor, pachor, ñato' ama't ñaña puechemeresha' attoch e'ñe cohuen sherbaterrñañet Yompor po'cohuenña atto ayochreshattena ña,

³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapatonetñapa' o'ch aguërret ñeñt alloch ñetpa' corretsetach beñecpuen.

Allempo Jesúsapa' alla eñotaterraneterr ñapa' çhocmach amt-saretterra

(Mt. 20.17-19; Mr. 10.32-34)

³¹ Ñeñt pueyochresha' ñeñt çharra' puechena epsheña, Jesúsñapa' ahuanmanet ellonet, allñapa' atet otosanet:

—Te' po'ñoçhpa' o'ch ahueney Jerusaléño. All ora allpon quellca'yesone't ñeñt a'mta'yesaye't Yompor po'ñoñ ahuat ñeñtcha' atet na'paretterra na Ñeñtencha' Acheñetosets, te'ñapa' o'ch e'ñe etsotuerra ñeñt atet anaret nocop.

³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achmãare'terrnet, o'ch atserrpãtse'terrnet, pue'moñe'teñoťetanpa' o'ch a'coshare'terrnet.

³³ O'ch nashtaretterra, attotcha'ña muetserrnet. Tarraña poma'pamtañoñapa' o'ch alla netanterra.

³⁴ Ama't atet otuanet, ñetñapa' ama eseshaye' eñotaye ñeñt atet serrpare'tatanet. Ama't puesheñarroťetapa' ama't mame-shapa' ama çhapanetoña pueyoçhreto ñeñt atet otenanet.

Atto Jesúsapa' cohuaterran puesheñarr aporo'yet ñeñt jericomarnesha'

(Mt. 20.29-34; Mr. 10.46-52)

³⁵ All oñenet o'ña çhampochet anetso Jericópa' allña e'ñe toñetoñña' all anen puesheñarr aporo'yet ñeñt çhocma enamuets quelle.

³⁶ Ñeñtña aporo'yetpa' o' e'mapan shonte' acheñenesha' ñeñt metachets all toño, ñaña'papa' allenta a'pto'tanet:

—¿Eso'mare't shonte' metachenña acheñenesha'?

³⁷ Ñetñapa' atet ochet:

—Añca'ye huetsa Jesús ñeñt nazareto'marnesha'.

³⁸ Ñaña'papa' allenta rrana huomencpa' atet otapan Jesús:

—Pemueraye'chnomna Jesúsocha' naña. Papa' ñeñteþ Davidna'tareþ.

³⁹ Acheñenesha' ñeñt otachetsa ñetñapa' cha muene' che'ptare'tnomet, atet otoset:

—O'hua pemma.

Aporo'yetñapa' elloña alla rranerrerr atet oterranerr Jesús:

—Ñeñteþ Davidna'tareþ, pemueraye'chnomnañaca'ye.

⁴⁰ Allempoña Jesús alla tomos otosan acheñenesha':

—Sanmon arr nesho.

O' huapapa' Jesúsñapa' atet otaþ:

⁴¹ —¿Eso'tña penmen ñeñtcha' atet neþoseþ?

Ñaña'papa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

⁴² Jesúsñapa' alla otererr:

—Pecuerrepa'ch, tarro'mar atto atarr peyemtapna na ñeñtca'yeña o' e'ñe a'crraterreþ.

⁴³ E'ñepa'tcha' allorocma e'ñe cohuen enterra. E'ñe cohuerrtsapa' cha co'a'nmue' ñaña Jesús, allenta atarr aye'chochtatnoman Yompor all co'a'nenan Jesús. Atto' enteñ allohuen acheñenesha' ñetpa'cho'ña e'ñe cohuen aye'chochtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesúsapa' chap all anetso Jericó, all oñmos anetso'mar.

² Allñapa' allo'tsen puesheñarr yacma ñeñt sochetsa Zaqueo ñeñt pa'ncha'tareter peñ allohuen ñeñt cobra'yene' acheñenesha' quelle gobiernocop. Ñaña'papa' atarr eçllayoret.

³ Zaqueoñapa' atarr mueneñ o'ch entapan ñeñt otenet Jesús. Ñehua, ñapa' amach errotenot entapano Jesús tarro'mar shonte' acheñ ñeñt emchorra'nenaya all oñen ñaña Zaqueopa' allponmetolla.

⁴ Ñeñto'marña ñapa' mata allenetcha' oñem, a'tapos tsacho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵ Allempoña chap Jesús e'ñe ñesho, cohuostsa enonetpa' alla entos, ñaña'papa' atet otos:

—Zaqueo, pesuerra tecma. Te' napa' e'ñe poctennana o'ch nechap pepacilo.

⁶ Ñaña'pa' allenta sohuerra tecma e'ñe pocsheñesha' agapař.

⁷ Allempoña acheñenesha' atet eñchet, ñetña'pa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'paclo ñeññ atarr nanac ochñañ.

⁸ Zaqueoñapa' allenta tomhuerrpa' atet otapan Partsesha':

—Te'pa' o'ch pe'mñotosen Ayochreshate. Ñeññ ora allpon nechyen, te'ñapa' o'ch napa'yer pueshmet huocchañneshačhno. Po'ño'ch allempo es neprratam̄pesyese't puesheña'tetspa' te'ñapa' pa'tatsoche'tatscha' napuerranet.

⁹ Jesúsñapa' atet otos:

—Te'ñapa' o' chapanet allohuenacop ñeññ yečhetsa añ pocollro alloch a'queshpataretterret. Ama't ñapa'cho'ña Abrahamca'ye po'mreñeñ.

¹⁰ Na Ñeññen Acheñetosets ñeñño'marña nohuapa añe patsro o'ch ne'nyesos acheñenesha' ñeññ chenquëtsa ñeññcha'ña na'queshpatyesos.

Arrpa' all atma'ntatarettena čharrasheña ñeññ aparettsata quelle e'ñe allponeshapa'ttsocma

¹¹ Acheñenesha' o' e'mñotenet shonte' ñeññ atet serrpare'tatanet Jesús ñeññ atet pena Yompor po'cohuenña, ñaña Jesús'pa' o' chapmoch Jerusaléño. Ñeñño'marña ñetña'pa' čha otenapuetañ allempocmach etsota allempopa' ñach añcha'tarettsata Yomporeshot arr patsro. Ñeñño'marña elloña ñapa' toma'ntatanet po'poñ.

¹² Ñeññpa' atet otanet:

—Eñall puesheñarr acheñ ñeññ e'ñe cohuen añcha'na'tpo' entyen allohuen acheñenesha' ama't e'ñe pamo'tseshohuen. Ñeññña acheñerpa' arr sechena ñachayo po'poñ anetso allotcha' apet llesens attoch esempoch huerrapa' o'ch añcha'taretetuerra all pa'nyo.

¹³ Allempo ama sena'pa' agotatnoman čharrasheña pa'taruasañer ñeññcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. EsemPOCH nehuerrapa' allempochña e'ñe neñotuernas e'ñe puesheña'ttsos errponte' quelle segana'yesa ñeññ nocop.”

¹⁴ Tarraña patantarr acheñenesha' ñeññ pa'nyo'marnesha', ñetña'pa' atarr e'moñe'teñet. Ñeñño'mar allempo ta ñeññ anet-sro, ñetña'pa' mueñet allponsheña ñeññcha' eñosets all sen o'ch oteñeta' allo'marnesha': “Yapa' ama yemno o'ch sene' añ acheñer o'ch añcha'taretta yocop.”

15 Tarraña ama't atet petañ ñocopñapa' chocmach apet llesens attoch huerra o'ch amcha'tarefetuerra all pa'nyo pamo'tseshacop. Allempoña cherrpa' agotatuerran pa'taruasañrenesha' ñeñt' apa'yesnom quelle ahuaña. Ñapa' añecopña agotatyesuerranet o'ch eñotuerranet errponte' quelle ganatyesñañet po'çllayor e'ñe puesheña'ttset.

16 Attoña apcha'huerranet ñeshopa' ñeñt' ñanom huapatsapa' atet otos: "Ayochreshate, ñeñt' allpon p'apa'nmuena ahuaña quelle, nañapa' ello neganatertraperr peçllayor çharroch."

17 Pamo'mte'ñapa' atet otuer: "E'ñe pocte', p'apa' atarr cohuen pesherbena. Ama't allponatolla napa'nmañ ahuaña, p'aña' atarr cohuen pesherbato. Ñeñto'marña te'pa' o'ch nenuerreñ çharracop anets allcha' pa'm'cha'tare'terra p'a."

18 Allempoñapa' o' huapa ñaña po'psheñeñ pa'taruasañerpa' ñapa'cho'ña atet otos: "Ayochreshate, na ñeñt' allpon p'apa'nmuena ahuaña quelle, nañapa' ello neganatertraperr peçllayor anmaroch."

19 Pamo'mte'ñapa' atet otuer: "E'ñe pocte', te'pa' o'ch nenuerreñ p'aña amnarecop anets allcha' p'a'm'cha'tare'terra p'aña."

20 Allempoñapa' huapa po'psheñeñ pa'taruasañer, ñapa'cho'ña atet otos: "Ayochreshate, arpa' ñeñta allponara ñeñt' e'ñe allpona p'apa'nmuena ahuaña quelle. Napa' alla nañño'tennañ e'ñe cohuen nepennañ pañello."

21 Napa' cha nem'cha'teneñ tarro'mar neñoteneñ p'apa' amaca'ye matsrre'mña'pe. Papa' chocmaca'ye pepratañpesyen ama't ñeñtpa' ama poyaye, ñaña chocmaca'ye petotatyeneña ñeñt' ama p'aye' nare'tatyenaye."

22 Pamo'mte'ñapa' atet otuer: "Paña po'ñoçhpa' amaca'ye cohuenaye' pesherbenna ama't e'ñe mamesha. E'ñe atet p'otenen napa' atarro' atsrre'mña'ten te'ñapa' po'ñoçh atetcha'ca'ye natsrre'moçhtana'tuerreñcha'. Ñerra'm po'ñoçh peñotennoñ napa' atarr atsrre'mña'teneñ, ñerra'm po'ñoçh chocma nepratañpesyeneñ ñeñt' ama noyaye, ñaña napa' ñerra'm po'ñoçh chocma netotatyeneñ ñeñt' ama naye' nare'tatyenaye,

23 ñerra'm po'ñoçh atet pentennoñpa', eso'maruañaca'yeña ama bancoye' penennanoña neçllayor allochñapa' te'ña o' nehuerrapa' nagapuerreñcha' neçllayor allo atontateñet."

24 Allempoña pamo'mte'pa' atet otan ñeñt' tom'cha'tyets all: "Te'pa' o'ch sepratañpesuer quelle, o'ch sapuer ñeñt' ganatene' çharroch neçllayor."

25 Ñetñapa' atet ochet: "Ayochreshate, ñapa' echenanca'yeña shonte' quelle ñeñt' ganena çharroch."

26 Pamo'mte'ñapa' atet oterraneterr: "Tarraña ama't atteñpa' te'pa' o'ch notas, ñeñt es echets shonte' e'ñe puesherbateño'tet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt echenetañ aprratam̄psaretterretcha'.

27 Ñaña te'pa' añña ñeñt ne'moñe'tene' ñeñt ama muene-naye o'ch na'mcha'tare'tta ñocpuet, te'ña sapa' o'ch sehuap-atanet attoch semtsanatosanet e'ñe arr nesho."

Allempo chap Jesús Jerusaléño

(Mt. 21.1-11; Mr. 11.1-11; Jn. 12.12-19)

28 Allempoñapa' ahuerrerr Jesús Jerusaléñoneñt.

29 Chapmochet aspento ñeñt pa'so'cheñ Olivopen allo'tsen anets ñeñt Betfagé ñaña Betania. O' chapmochet all Jesúsñapa'

30 atet otosan epsheña pueyochresha':

—Sapa' o'ch sota o'ch sechap a'yenteye' e'ñe allara anetso. O'ch sechap allpa' allcha' sentos ashen rre'ptor all huanquëñet; ñeñtpa' ama't puesheñarra acheñ ama monteña'. Ñeñtña ashenpa' o'ch sepyam̄psospa' o'ch sanerrnan arr.

31 Ñerra'm esesha'ch sotapue': "¿Eso'mare't sepyam̄peñña ashen?" sañapa' atetcha' sotosanet: "Yepartsesharca'ye muenene'ña añ ashen."

32 Allempoña ñeñt mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquëñet.

33 Allempo pueyam̄psosetpa' pamo'mte'ñapa' atet otapanet:

—¿Eso'mare'tcha'ña sepyam̄psosnayña yashanor?

34 Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

35 Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús.

36 Allempo monta'nma Jesús allenet sen, acheñenesha'ñapa' totma'tyesoñet pa'shtam toño allcha' oñem.

37 Atteñapa' o' chapmochet Jerusaléño. Allempo a'nososet Olivopno't shonte' acheñenesha' ñeñt ame'ñenaya Jesúsapa' ñetñapa' alloteñ e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'chochtatneññañet Yompor, tarro'mar atarr cohuen entnenet atto Jesúsapa' atarr orrtatenanet Pompor po'partsoña.

38 Ñetñapa' atet otyesnenet:

—¡Aye'chochtaterrapo'ch Am̄cha'taret Jesús ñeñt llesensen Yompor! ¡Cosherrretepa'ch ama't ñeñt pue'ntaño'tsen!

¡Aye'chochtaterrapo'ch ñaña Yompor Parets ñeñt̃ pue'ntaño'tsen!

³⁹ Fariseonesha'ña puesheña'tets ñeñt̃ allo'tsa'yen ñeñt̃ ama ame'ñenaye Jesús, ñetñapa' atet otapet Jesús:

—Maestro, peche'ptare'taye'chyesnomñaca'yeña peyochreshačno attoch amach allo'na atfa ačhotatsetnenpeto.

⁴⁰ Tarraña Jesúsñapa' atet otosanet:

—Napa' o'ch notas, ama'tcha' atet notatstanetañpa' muema'rrtetañcha', mapyečnoñapa' puerranare'teño'tetpa' načhotenayach.

⁴¹ Allempo o' e'ñe čhapmochet atto entosan anets Jerusalén, Jesúsñapa' atarr ya'na'tosan jerusaléño'marnesha'.

⁴² Allpa' atet eñorosa ñocpuet:

—Atarr nemneñeñ ama't e'ñe tayecma po'ñočh sapa'cho'ña o'te' seño'tereñ errotench'a' seperra attoch Yomporpa' o'ch a'qeshpaterrsoñ e'ñech socsheñesha' socrrerañ. Tarraña saña teme'ttsen ñeñt̃ñapa' ama't mameshapa' ama čhennaso seyochro.

⁴³ Tarro'mar napa' o'ch notas, po'ñočh o'ch čhap allempoch ñeñt̃ se'moñe'tene'pa' conča'tañperrnasetcha' sa'netser attoch e'ñe rročhtañperrset allenñateñ satepōtpa' huacha'tonasetcha', attoch amach erreneť seyeterro ama't e'ñe puesheñarroťesa.

⁴⁴ A'mata'tuerrnasetcha' ora allohuen sa'netser attoch sepacle'nachña e'ñe sa'tpetse'tuerre' allohuenes ama't sacñeřaretolleshohuen. Allo sorraten sepaquëll ama't patrpa' mapue'pa' amach a'puerro, tarro'mar sapa' ama semno o'ch saguërrñañ Yompor pue'muereña allempo mueneñeñ o'ch yenpuerrsoñ saña.

Atto Jesúsapa' a'cohuentatosan Parets pa'paquëll

(Mt. 21.12-17; Mr. 11.15-19; Jn. 2.13-22)

⁴⁵ Allempo čhap Jerusaléño Jesúsñapa' ahuos Parets pa'paclo. Be'tosospa' allotñapa' čha'nmačha'tatuosan ñeñt̃ pomatsre'tyetsa all.

⁴⁶ Allñapa' atet otosan ñeñt̃ pomatsre'tyetsa:

—Yompor po'ñoñ ñeñt̃ atet anuareť ahuatoteñ, allñapa' atet oten Yompor: “Añ ñeñt̃ nepaquëll nepenpa' añečpaca'yeña sherben allecmach ma'yochennet”; tarraña sañapa' atet sepeññañña Yompor pa'paquëll atet ñerra'mrrate' eñeť ñeñt̃ e'potyetsa mapuetpono'mar.

⁴⁷ Paťe'tets yeť Jesúsapa' čhocmach sene't Parets pa'paclo all yečhatenanete't Yompor po'ñoñ. Añña ñeñt̃ pa'mčha'tareťernesha' pen allohuen judionesha' po'cornaneshar ñaña añ ñeñt̃ atarr etsotayenayeñ ñoñets ñeñt̃ atet anareť ñaña po'potantañ ñeñt̃ añcha'tareťetyetsa

all anetso, ñetñapa' Jesúsá atarr o'patyenet attoch muetsatachet.

⁴⁸ Tarraña ñetpa' ama erroť peto tarro'mar allohuen acheñenesha'pa' atarr yemteññañet Jesús atto atarr cohuen serrpare'tatenanet Yompor po'ñoñ. Ñetpa' ñeñtña atarr cohuen entyenet.

20

Atto allsensarettena Jesús

(Mt. 21.23-27; Mr. 11.27-33)

¹ Po'pocheño pamtarr Jesúsñapa' alla yečhaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' huačha'toña shonte' ančha'tareñnesha'—ñeñť pa'mčha'tareternesha' pen allohuen judionesha' po'cornaneshar ñaña allponsheña ñeñť atarr etsotayenayeñ ñoñets ñeñť atet anaret ñaña po'potantañ ñeñť pompornesha' pa'yen allohuen judionesha'.

² Ñetñapa' atet otoset Jesús:

—Ñehua, yapa' añecop yehuena yemneñ o'ch pōtey ¿erroťe't apuenpetña llesens? ¿Esesha'tña p̄apueñe'ña llesens attot p̄orrtatyenña ñeñť čhocma attecma pepa'yena?

³ Jesúsñapa' atet otapanet:

—Ñehua, napa'čho'ña nemneñ o'ch na'p̄to'tapas saña ama't patrra ñoñets. Sapa'čho'ña o'ch sotosen,

⁴ ahuañmo'cha allempo apate't Juanañ Yomporecop ñeñťpa' ¿eseshatña llesense' ñato' Yompor amapa' acheñafe' apue'ña llesens? Nemnen o'ch sotosen ñeñť atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm erroťcha'ca'ye yochťe'. Ñerra'm čha yoch Yomporeshotca'ye apetña llesens, ñaña'pa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.”

⁶ Elloña ñerra'm čha yoch acheñeshoťa apet llesenspa' acheñenesha'ñapa' čhate' e'moñe'tyet. Pue'moñe'teñoťetaypa' čhate' rrollapechyet tarro'mar ñetpa' e'ñe cohuen eñchete't Juanañ, čhocma otyenet ñapa' ñeñťca'yeña a'mtose' Yompor po'ñoñ.

⁷ Ñeñťo'marña ñetpa' atet ochet Jesús:

—Ta'm yapa' amaca'yeña yeñoteñe; erroťte' huapaña Juan, erroťte' apetña ñaña llesens.

⁸ Allempoña Jesús'pa' atet o'terraneterr:

—Napa'čho'ña te'pa' amach notaso saña allot aparetenña naña llesens attot atet nepa'yena.

Atet atma'ntatarettena ñeñt ataruasañechno ñeñt ama co-huenayaye

(Mt. 21.33-44; Mr. 12.1-11)

⁹ Allempoña Jesús pa' alla serrpare'taterranerr acheñenesha' toma'nteñtso, Ñeñtpa' atet otanet:

—Eñall puesheñarr acheñ ñeñtña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeñtcha' taruasatats uvachmo ñeñtcha' coyerrahuet allpon ñerra'm esempoch toteñet. Allempoña ñapa' ahuo' ñachayo po'poñ anetso alla atomat.

¹⁰ Chap allempo yen uvachllompa' ñañaapa' mueñerran po'psheñeñ pa'taruasañer o'ch enamuerra' uvachllom po'psheñeñ pa'taruasañesho ñeñt cohuanmpene' uvachma'. Allempoña chen allpa' enamhuenan ñeñt allpon o'patena pamo'mtayet arepa'tcha'ña es apapuenayeña uvachllom, elloña ñeñtapa' cha nalle'tapueñet, o' alla mueño'teret e'ñe atta.

¹¹ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta.

¹² Allempo poma'pocheño o' alla mueñerranerr po'psheñeñ pa'taruasañer. Ñeñtpa'cho'ña allempo chenerr ñaña allpa' ñañaapa' cha atarr atserrpatse'tapetpa' o'cho' alla matateret.

¹³ 'Allempoña ñeñt pamo'mte' penetpa' atet ot: “Te'pa' errotuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñtpa' mecha'na'tapetcha'.”

¹⁴ Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: “Añmapa' ñeñtca'yeña puechemer ñeñtcha' o'paterraya pompor puenarem esempo. Ñapa'cho'ña te'pa' o'chca'ye yemtsa'p allochñapa' yachca'yeña e'ñe o'paterrayaña pompor puenarem.”

¹⁵ Allempoñapa' o' rromapet o' chetare'tnomet narmetsmo a'yo't, allña muetsapoñetña ñaña puechemer. Arrpa' allohua atet toma'ntata Jesús e'ñe ñañaña.

Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' atetcha' p'ohuerranet.

¹⁶ Ñerra'm esempoch huerranet, pamo'mtayetpa' a'cclatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñtpa' arepa'chña atteye' patsterro, Neyompor-re!

¹⁷ Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt anuaret ahuatoteñ, ñeñtpa' e'ñechca'ye po'ñoçh atet perra. Tarro'mar ñeñtpa' atet oten nocop, all atma'ntatareñen mapue'. Ñeñtpa' e'ñe atet anuaret Yompor po'ñoñ ahuatoteñ:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹⁸ Elloñapa' atet otanet:

—Allohuen ñeñt epoto'tetsa añ mapyopa' atarrcha' atserrpenanet, ñaña añ mapue'pa' ñerra'm eseshesho mata'nompa' e'ñech a'tpetse'tuosanet.

Atto a'pto'chet Jesús, pocte'te' o'ch tsa'tet impuesto

(Mt. 21.45-46; 22.15-22; Mr. 12.12-17)

¹⁹ Añña ñeñt atarr etsotayenayeñ ñoñets ñeñt atet anaret ñaña ñeñt pa'micha'tareñenesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntatareñtenet, ñeñtpa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús.

²⁰ Tarraña ñetpa' aña atarr e'nenet attoch ama't parrochapa' o'ch eñorachet ñeñt ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'taretesho ñeñt nen gobierno' Romot ñeñt añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt ottetsañ ñerra'mrrate' atarr cohuen acheñ, tarraña ñetpa' añecpa amñareñtet attoch e'ñe puehquẽñoñ po'ñoñotetpa' o'ch eñorachet ñeñt ama cohuenayaye.

²¹ Allempoña chapuet ñeshopa' atet otoset:

—Maestrocha' yapa' yeñoteneñ ñeñt atet peñen ñaña atto peychatyen Yompor poctapña ñeñtpa' e'ñe cohuenacma. Papa' allohuen acheñ e'ñe cohuen pentueñ; ama aña ñapueñ pemorrenteno ñeñt atarr añcha'na'tpo' entyen allohuen acheñenesha'.

²² Ñeñto'marña te'pa' yemneñ o'ch peñotatapuey erra'tsente'ña e'ñe po'ñoçh cohuentetsa. ¿Pocte'te' o'ch

yetsa'ta impuestos añecop ñeñt añcha'tarettetsa Romo, ñeñt ama judioneshayaye? Ñato' amate' pocteyaye yocop ñeñtey judioneshay o'ch yetsa'ta añcha'taref romo'marnesha' ñeñt ama judioneshayaye.

²³ Jesúsñapa' eñotanet ñeñt atet shecare'teñetañ, ñañaapa' atet otanet:

²⁴ —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, ¿essha't sentenña ñeñt atma'ntatarettetsa all? ¿Esesha't pa'so'cheñ ñeñt aquellcarettetsaña all?

Ñetñapa' atet ochet:

—Añcha'tarefca'ye atma'ntatarettetsaña all ñaña ñoca'yeña pa'so'cheñ ñeñt aquellcarettetsa all.

²⁵ Jesúsñapa' alla otterraneterr:

—Ñeñtepnapa' añ poctetsa o'ch yaþ añcha'taref ñeñt ño ñeñt atet poctetsa gobiernocop; tarraña ellonet ñeñt Yomporo o'ch yaþ ñaña ñeñt atet poctetsa ñocop.

²⁶ Attoña ama't puehquëñoñet atet otyenetpa' ama errotent eñoracheto ñeñt ama pocteyaye ama't ñaña gobiernocop tarro'mar allohuen acheñenesha' ñeñt allo'tsa'yen e'ñe cohuen enteñet atet anapuenanet Jesús. Ñeñtña ashcañnesha'pa' atfa cohuanrrorteñet tarro'mar atarr cohuen anapuenanet Jesús. Ñeñto'marña ñetpa' ama errotenaye' otenaye' entereterro.

Atto a'pto'chet Jesús, ñerra'm po'ñochte' atanterrapo' rromot, ta'm, allempopa' errotenchañña yeperra

(Mt. 22.23-33; Mr. 12.18-27)

²⁷ Allempoñapa' huachatoña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'mar atet otenet amate' errotent yetanterroña rromot ama't errponaña.

²⁸ Ñetñapa' atet otoset Jesús:

—Maestrocha' ahuat Moiséspa' atet quellconay ñoñets ñeñt poctetsa ñeñtcha' atet yeþa. Ñeñtpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa' añ poctetsa pa'mo'nasheñcha' alla yorerre'ña po'norrar allochñapa' attoch eñalletterraña ñeñtcha' puechemer perr pa'mo'nasheñ. Ñeñtpa' atetca'ye quellca'nmonayña Moisés ahuat.

²⁹ Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran

coyanesha' ñeñt pueťapor ƣa'. E'ñe allponmatatsapa' o' rromaña, yacma ama chemere'tnomo.

³⁰ Allempoña ñeñt po'roćho'merpa' o' yorerran pa'mo'nasheñeñ pueťapor. E'ñe allponmatatsapa' ñapa'ćho'ña o' rromuerrerr ñaña, ñeñtpa'ćho'ña ama chemere'tnomo.

³¹ Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'ćho'ña o' rromuerrerr ñaña, ñeñtpa'ćho'ña ama chemere'tnerrerro o' atta rromuerrerr. E'ñe attecma ƣohuet canćherrsheño'maretpa' e'ñe pueyoruaroćhet ñeñtara puesheñarr coyanesha'. E'ñe allohuenetpa' e'ñe attecma pet colla'huet ama't puesheñarroćetapa' ama chemere'tnomueto.

³² Allempoña o' rromaña ñaña coyanesha'.

³³ Te'ña ñerra'm po'ñoćhte' yetantena yerromñoćpa' añña coyanesha' allempopa' ƣeseshat'ćha'ña pueťapor perre' tarro'mar allohuenet canćherrsheño'maretpa' e'ñe pueyoruaroćhet?

³⁴ Allempoña Jesús otanet:

—Ñehua, atet yećhen acheñenesha' arr patsro, ćhocmach sena'tenet, coyanesha'pa'ćho'ña apueñet ñeñtćha' puerrollar ƣa'.

³⁵ Tarraña esempohuañen allempoch tanterret po'poćeño allohuen ñeñtćha' e'ñe pocte' entuerr Yompor alloćhña'pa' attoćh o'ćh alla correrret po'poćeño, ñetña allempopa' ama't puesheñarroćeta amach sena'terreto, ama't coyanesha'pa'ćho' amach eseshaye' apuerraye ñeñtćha' yorerrahuć.

³⁶ Tarro'mar allempopa' amach arromñaćterreto ama't ahuata attoćh e'ñech atet perret ñerra'm mellañoćeñnanesha'. Yomporña'pa' o'ćh e'ñe puećhemer perranet e'ñe poćtacman tarro'mar allempopa' o' tanterret rromoćpa' o'huañćha' arromñaćterret ama't errponaña.

³⁷ Elloña ama't Moisés atet eñotatane't acheñenesha' po'ñoćh ñeñt colla'huatsa allempo, ñetña'pa' corretseta. Ñehua, all aquellcare't tsachmo'r ñeñt e'ñe ñoća huortets. Alloćnaca'yeña Yomporpa' eñorana'tanaña Moisés; ñeñtpa' atetca' oćña Yompor allempo: "Napa' ñeñten Po'yomporer pen Abraham ñaña Isaac, ñaña Jacob."

³⁸ Jesúsña'pa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poćtacman ñapa' añca'yeña Po'yomporer pene' acheñ ñeñt corretsach. Yomporña'pa' e'ñe entenamet allohuenetpa' e'ñe corretseta.

39 Añña puesheña'tets ñeñt atarr etsotene' ñoñets ñeñt atet anaret, ñetñapa' atet ochet:

—E'ñe Maestrocha' e'ñe po'ñoçh atet pōten.

40 Ñeñto'mar allempoteñpa' ama't puesheñarrofetapa' ama eseshaye' a'pō'tenaye' enterraye.

Atto Cristo ñeñt Po'partseshar pe't David, elloñapa' o' alla po'mireneñ per

(Mt. 22.41-46; Mr. 12.35-37)

41 Allempoña Jesúsapa' atet otan ñeñt atarr etsotayenayeñ ñoñets ñeñt atet anaret:

—Eso'mare'tña otyenet ñeñtcha' Cristotosets ñapa' aña po'mireneñ pene' David tarro'mar ñeñtcha' Cristoterrets ama aña po'mireneñ peñe David tarro'mar ñapa' Po'partseshare'naña pe't David.

42 Tarro'mar ama't Davidpa' allempo quellquët all libro Salmo allempopa' atetca'ye eñose'tña añecop ñeñtcha' Cristoterrets:

Yompor Paretspa' atet otennan ñeñt Nepartseshar nepen na (ñeñtara ñeñtcha' Cristoterrets):
“Te'pa' o'ch ñanorruerr arr necohuenrot allcha' pecohuentapreterrna.

43 Attochña ama't ñeñt pe'moñe'tene' napa' o'ch name'ñatuerranet allochñapa' o'ch atet perret ñeñt pemnen ña.”

44 Ñeñtpa' atetca'ye ote'tña David ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't David ñeñtña te'pa' o' alla po'mireneñ per ñaña.

Atto Jesúsapa' a'metare'tenan ñeñt etsotayenayeñ ñoñets ñeñt atet anaret, ñeñt atet yeçhenet ñetpa' ñeñtpa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 11.37-54)

45 Elloña shonte' acheñenesha' ñeñt e'mño'tene' allempo atet otenan Jesús pueyochresha':

46 —Amach semeñe'tapretatsche ommoñañenesha' poçtañña ñeñtareta ñeñtet atarr etsotayenayeñ ñoñets ñeñt atet anaret. Tarro'mar ñetpa' aña'naña atarr cohuen entenet o'ch chorrenet atarrom shetamuets o'ch atta yorma'tatse'tenet pa'shtam. Ñaña pommo'cheñoftpa' atarrcha' mueneñet o'ch e'ñe puencha'na'teñoñ e'ñech cohuen huomcha'tenanet acheñenesha' all chopeñe'chyenet. Ñaña ñetpa' aña'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr

añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet.

⁴⁷ Tarraña ñetñapa' rretorrnanesha'naña puer-ratampesyenetña pa'paquëll. Elloña e'ñe pommo'cheñoftpa' añña atarr muenenet o'ch atet penet ñerra'mrrate' ñetpa' atarro' cohuen acheñret ñeñño'marña arrcha' ma'yochenet all shontena acheñenesha', amach tematenayaya ma'yocheneto. Ñeñño'marña te' napa' o'ch notas, ñeññ atet petsa pommo'cheñoftpa' elloña atarrcha' a'coñcha'taretterret.

21

Atto rretorrnanesha' ñeññ atarr huocchañetets ñapa'cho'ña nosan quelle ñeññ Yomporecop

(Mr. 12.41-44)

¹ Allempo allo'tsen Jesús Parets pa'paclo, ñañaapa' arrenet cohuen allecma nenet quelle Partsocop. Allñapa' entenan eçllayoreñenesha' ñeññ na'yene' shonte' po'çllayor Partsocop.

² Jesúsña allpa' atta cohuenanet, huapa ñaña puesheñarr rretorrnanesha' ñeññ atarr huocchañetets. Ñapa'cho'ña nosan eptallatoll quellayetoll ñeññ cobretall.

³ Jesúsñaapa' atet ot:

—Te'pa' o'ch notas, añ rretorrnanesha' ama't atarr huocchañ ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeññ na'yenet ñet.

⁴ Tarro'mar allohuenet ñeññ na'yenet quelle, añaca'ye na'yenet ñeññ a'pchatyenet, ñañaapa' ama't atarr huocchañpa' e'ñe pomhuahuospan allohuen ñeññ echyen ñeññ muenataneñ allo'ch yoran attoch correna arr patsro.

Atto Jesúsapa' eñotatanet e'ñech a'mata'taretetuerra Partsopo'

(Mt. 24.1-2; Mr. 13.1-2)

⁵ Allempoña puesheña'ttets ñetñapa' añña atarr serrpare'tyenet atto Parets pa'paquëllpa' atarr a'cohuentateñ. Mapyet ñeññ allo orratenet Partsopo' ñeññpa' atarr coçhneshare' aña'yesearet. Shonte' coçhneshare' ñaña allo'tsa'yen ñeññ pomyen acheñenesha' all Partsocop. Jesúsñaapa' atet otanet:

⁶ —Ora ñeññ allpon e'ñe coçhneshare' sentyen te' çherrcha' allempoch e'ñe a'mata'taretetuerra. Ama't puenñarra mapyetpa' amach a'puerroña all allo orratenet Partsopo'.

Atto Jesúsapa' eñotatanet shonte'ch entyerret pa'namen ñeññcha' eñotaterrahuet o' çherrmoch allempoch mellapoterra

(Mt. 24.3-28; Mr. 13.3-23)

⁷ Pueyochresha'ñaapa' a'pño'chet:

—Maestro, ñeñt'pa' ¿esempo'tcha'ña atet' perra? Ñaña allempopa' ¿eso'tcha'ña yentyerr ñeñt'cha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt' atet' p'oteny te'?

⁸ Jesúsñapa' otanet:

—E'ñech señoterra, allochñapa' amach esesha' seshquërraye. Tarro'mar shonte'ch orrterrtsa ñeñt'cha' ay'cha'nataterre' neso'cheñ, ñeñt'cha' otyerrets: “Napa' ñeñt'enca'yeña Cristotets; te'pa' o'ca'ye çherr allempoch norrterra na ñeñten Cristotets.” Tarraña sañapa' ñato'tña se'mñnotenaneta'.

⁹ Ñaña allempopa' o'ch se'mare'tyerr o' quellareñtsotyerr allemeñ anetso'mar ñaña o'ch se'mare'tyerr o' orrtierra ñaña atparñats errañaren, saña allempopa' amach cha seyorenatsto ama't e'ñe mamesha. Ñeñt'pa' atet'cha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsñapa' alla oterraneterr:

—Pa'namen acheñ ñeñt' e'ñe po'poñe'ttsoçma mereñtsoret ñetpa' quellaranna'terret'cha'. Ñaña pa'namen anetso't añicha'tareteçhnopa' quellaraterran'cha' pueyochrene-sha'çhno.

¹¹ Pella'yerrach pats huomenc ora errañaren, ñaña orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña pa'namen atsnañtsoçhno ñeñt' atarr apatanna'tpo'. Allempopa' atarr'cha' añicha'noçhterra ento't. Orrterrach ento' ñeñt' ama't ahua'tapa' ama puentareto ñeñt'cha'ña eñotaterrahuet o' e'ñe çherrmoch allempoch mellapoterra.

¹² 'Ñehua, allempoch ama orrtena' atet'pa' saña allempopa' rremanaterrset'cha' attoch mueroçhtaterrset, sanmare'tterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñofen na sapa' sanmare'tterrach añicha'taretneshesho'mar ñaña allo'tsa'yen ñeñt' nanac añicha'taretnesha'.

¹³ Tarraña allempopa' atarr'cha' cohuen attoch sa'metosnanña neñoñ.

¹⁴ Ñeñto'marña allempo sanmare'tetyesa allcha' otteñe'cherrset ama't mameshapa' amach sellca'psatsto, amach sota'psa'tatsto, errotuachca'ye notoste' añicha'taretesho allempoch a'p'to'tare'tapuen.

¹⁵ Tarro'mar allempopa' nachca'yeña se'ñoratose'ña all attoch e'ñe cohuen señotyesña atet'cha' sanapyesosanet. Allochñapa' ñeñt' se'moñe'tene'pa' amach errotenaye' otenaye'

entenseto. Ñaña amach errotenoŧ otaseto ñeñŧ atet soten sapa' ñeñŧpa' amaca' po'ñoçhaye' atet soteno.

16 Elloña allempoch atet perrsetpa' ñeñŧ e'ñe sompor sepen ñaña sachor ñato' ñeñŧachca'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñŧ e'ñe parro seyemtena ñeñŧachca'ye sepomuerre' tarro'mar ñetpa' ama parrocmaye' attecma soctape'cheno. Ñaña patanta'ttsospa' muetsatyerrsetcha'.

17 Shonte'ch acheñenesha' ñeñŧcha' se'moñe'terre' tarro'mar sapa' naca'ye e'ñe same'ñena.

18 Napa' atarrcha' necuanñpenes attoch amach errotenoŧ sechenquërro ama't e'ñe ahuata. Attoña ama't e'ñe pueparra sechpa' ñeñŧpa'çho'ña amach na'chencaterrnaso.

19 Tarraña ama'tcha' atarr mueroçhtaterrset çhocmachña e'ñe seyemteñoŧen napa' e'ñech sa'huanta'huanomña allohuen mueroçhteñets. Attochña sapa' corretsasach e'ñe po'ñoçh.

20 'Ñerra'm esempoch senterr añ anetser Jerusaléñpa' o'ch e'ñe rroçhtañpera solltarnesha' allempoña sapa' señochepe'ch o' çherrmoch attoch e'ñe a'mata'tareŧetueterra ñeñŧ anetser Jerusaléñ.

21 Allempoña ñeñŧ allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñŧ allpon anetso'tsa'yen Jerusaléño, ñetpa'çho'ña ahuanemyesetepa'ch ñamet allot. Ñaña ñeñŧ allpon allampaño'tsa'yen all arepa'chña tatsterretoña all Jerusaléño.

22 Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñŧ atet anuareŧtatse't atetcha' perra allempo.

23 Allempopa' atarrcha' llequëñets añecop ñeñŧ açhomenare' coyanesha' ñaña ñeñŧ allohuen emaretetolleshaçhno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra ñeñŧcha' atarr mueroçhtaterrahuet arr patsro. Atarrcha' a'coñchatareŧterra allohuen acheñenesha' allempo.

24 Ñaña allempo shonte' acheñpa' e'ñech muetsanatuerranet ñeñŧcha' quellarrerahuet. Po'potantañña' rremanatuerranetcha' ñeñŧ quellarenahuet o'ch anmareŧterret po'poñ anetso ñaçhoyo all yeçha'yena pa'namen acheñ. Acheñenesha' ñeñŧ ama judioneshayayepa' ñeñŧcha'ña e'ñe a'mtsoññetuerre'ña jerusaléño'marnesha', attoch e'ñe a'mama'tueretña ñeñŧ anetser Jerusaléñ.

Atetcha'ca'ye perra ñeñt allponmat onañchareñ ñeñt ama judioneshayaye o'ch añcha'nochterret all Jerusaléño.

Atetcha' perra allempoch huerra Cristo Ñeñt Acheñetosets (Mt. 24.29-35, 42-44; Mr. 13.24-37)

25 'Allempopa' orrterrach ento ñeñt ama't ahuařapa' ama sentare ñeñtcha'ña señoťaterre', ñeñt'pa' e'ñech atsnesho, orterra ñaña arrorresho ñaña rantočhnesho. Ñaña arr patsro ora allpon pa'namen acheñenesha' pueyorñoťetpa' atarrcha' nanac lleca'rrterret. Añcha' atarr yore'tame'terrahuet atfo ñeñt añecmuen sa'ppa' o'ch emo'yarterra, atarrcha' huomenc ma'moreterr allempo.

26 Acheñenesha' e'ñe pomčhañoťetpa' čhach muene' otanatyerret tarro'mar allempopa' o'ch eñoterret atarrcha' mueročhterret allohuenet arr patsro. Ñaña ñeñt huomenc orra'yetsa ento te', allempoña ama't ñeñt'pa' pella'yerrach.

27 Allempoñapa' entapuerrnetcha' na Ñeñten Acheñetosets o'ch nesuañperra oso e'ñe nepartsoteño huen e'ñe neco-huenteñesha'.

28 Ñerra'm esempoch senterr o' motetnerra orretyetsa ñeñt allpon o' notuas, allempoña sapa' e'ñech socsheñesha' secuan-rrorterr enonet tarro'mar allempo o'ch čherrmoch allempoch sa'qeshpatareťterra e'ñe poctacma.

29 Allempoña Jesúsapa' alla serrpare'taterraneterr toma'nteñtso, ñeñt'pa' atet oterraneterr:

—Señotentē' atet pena tsach, higoch.

30 O'ch senteñ allempo tapna'tyen pasopanerpa' sañapa' ñeñtaña señoťatene'ña o' čhenmoch allempoch huorateter-
rerr.

31 Attecmach perra ñerra'm esempoch sentyerr ñaña allpon ñeñt o' notuas sapa' ñeñtcha'ña señoťaterre' po'ñočh o'ca'ye čherrmoch allempoch e'ñe etsoterra allempoch añcha'tareťterra Yompor.

32 'Napa' po'ñočh o'ch notas, acheñenesha' ñeñt corretsa te' ñetpa' amach e'ñe rromhueneta'pa' allempocmach e'ñech etsoterra allohuen añečno.

33 Esemppopa' añ enet ñeñt sentenpa' e'ñech chenca'huerra; patspa'čho'ña attecmach perra e'ñech chenca'huerra. Tarraña naña neñoñpa' amach chenquërro ama't e'ñe errponaña.

34 'Tarraña te'pa' o'ch notas, sapa' čhocmachña e'ñe señoťnoma atfoch sapa' amach aña soctape'chatsto ñeñt sosya'tsañečno, posa'tare'teñets, ñaña atfo e'ñe cohuen socrena añ patsro. Tarro'mar ñerra'm ñeñta e'ñe soctape'chenpa' machayotach huaponasa añ yeter

35 atet ñerra'mrrate' tamell e'ñech machayota rreman ñeñtecop amencaret. Ñeñte yetarocmach çherrana ora allohuen ñeñt yeçha'yetsa aña patsro erraparen.

36 Añcha'ña sapa' çhocmachña señoşe'rtena ñaña añcha'ña senamuen Yompor attoch sa'huanta'huanom allohuen ñeñtcha' sehuapoya pa'namen mueroçhteñtsoçhno allochñapa' sañapa' e'ñech señañesha' satomhuerr nesho na Ñeñten Acheñetosets.

37 Chocma atet pe't Jesús, ellapene'tcha' yeçhatats Parets pa'paclo, ellerroneñtapa' o'ch ahuerr Olivoño ñapa' allca'ye e'ñe a'pue't.

38 Tsapat puetaren ahuatecmach huapa'muene't ñaña shonte' acheñenesha' ñeñt e'mñotyeyaye't all serrpare'tatanete't Yompor po'ñoñ all Parets pa'paclo.

22

Atto atarr o'pateñet Jesús o'ch muetsatateret

(Mt. 26.1-5, 14-16; Mr. 14.1-2, 10-11; Jn. 11.45-53)

1 Allempoña çhappmoch allempoch çherrerr pascuapo, allempoch rrerranerr judionesha' pan ñeñt ama anaretēyaye chase'.

2 Tarraña allohuen ñeñt pa'mcha'tareternesha' pen allohuen judionesha' po'cornaneshar ñaña allohuen ñeñt atarr etsotayenayen ñoñets ñeñt atet anaretet ñocpuet, ñetñapa' Jesús a atarr o'patenet o'ch muetsatachet tarraña ñetpa' aña mecha'na'tenet acheñenesha'.

3 Allempoña oneñetpa' chorrenana Judas ñeñtara ñeñt soçhetsa Iscariote. Ñehua, añ ñeñt Judaspa' Jesús pueyochresha' ñeñt parro yemtena po'potantañ ñeñt llesensen Jesús ñeñt allohuenet çharrasheñet puechenet epsheña.

4 Ñeñtña Judaspa' ahuo' allo'tsa'yen ñeñt pa'mcha'tareternesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeñt cohuanpene' Parets pa'paquell. Allempo çhap allpa' Judasñapa' serrpare'tos epuet ñeñt añcha'taretnesha'. Attoña eñotatosanet ñapa' mueneñca'ye o'ch poman Jesús attoch rromuet. Allempo ñetñapa' otanna'tyaset:

—Te'pa' errotuachñaca'ye yepe'te' attoch yerrmue'.

5 Allempoña ñeñt atarr añcha'taretnesha'pa' atarr coshenet, ñetñapa' a'pochtchet çhochca'ye tsa'chetña Judas allpon quelle.

6 Ñapa' e'ñe pocte' eñch. Allempoña ñapa' aña atarr e'nen errotentcha' pomanña Jesús e'ñe a'nahua attoch amach eñche allohuen acheñenesha'.

*Atto Jesúsapa' rrallme'chatnenan pueyochresha' attoch
 chocmach yerpueret ñeñt yoten te' Santa Cena*

(Mt. 26.17-29; Mr. 14.12-25; Jn. 13.21-30; 1Co. 11.23-26)

7 Allempoña čhapa'muen ñeñt yetñatsro allempoch
 rrerreterr pan ñeñt ama anareteyaye chase' allempoch
 muetserreterr ñaña carrnero; ñeñtpa' pascuapo.

8 Chapa'muen ñeñt yeterpa' Jesúsñapa' atet ota'muenan
 pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñtcha' yerra'
 pascuapo.

9 Ñetñapa' atet ochet:

—¿Erra'tña pocollro pemneñña allcha' ya'pota'ña rreñets?

10 Ñañaapa' atet oterraneterr:

—Te'pa' o'ch ahua'muenes anetso allcha' sepocte'
 puesheñarr yacma ñeñt anmanpene' oñ porrto. Ñeñtña
 acheñerpa' o'ch socta'ner; allcha' be'tosuerr pocollopa'
 allcha'ña sebe'tosos saña.

11 Allñapa' atetcha' sotos ñeñt apaclatesha': "Yemaestrorpa'
 atet oteney atetcha' yotosep: '¿Erro'tsena'tña pecuarto allcha'
 nerrallme'chos pascuapo epan neyochresha'?" "

12 Ñeñt apaclatesha'pa' gatapascha' eno po'cuarto ñeñt
 atarr a'yohuen e'ñe cohuen ařaret. Allcha'ña sañño'tosña
 ñeñtcha' yerra' pascuapo.

13 Allempo atet otuanet Jesúsapa' pueyochresha'ñapa'
 atetcho' pet, čha ahuanmatset. E'ñe atet otapanet, ñetñapa'
 e'ñečo' atet entoset. Allcha' añño'tosñañetña rreñets allcha'
 rrallme'chenet ñeñte pascuapo.

14 O'ña čhap allempoch rrallme'chet. Jesúsñapa' allña anor-
 ros epuet allohuen pueyochresha'.

15 Allñapa' atet otosan pueyochresha':

—Napa' atarr cohuen nenteñ o'ch yerrallme'chen parro añ
 pascuapo tayepa'tñapa' ama čhena' allempoch muetsatater-
 net.

16 Tarro'mar napa' o'ch notas, napa' po'pocheño amach
 alla nerrallme'cherre'te pascuapo. Esemphuañencha' et-
 soterra ñeñt po'ñočh toma'ntenaya pascuapo e'ñech allem-
 pocma añcha'taretetuerra Yompor. Allempoñapa' e'ñech par-
 rocma o'ch alla yocsherrerr.

17 Jesúsña allempopa' chetan orramets, parasyoso'tan pom-
 por, allempoñapa' atet otanet:

—Añ orrapo'pa' o'ch sagařpa' o'ch sepatanna'ta sa allo-
 huenes.

18 Te'pa' o'ch notas, tayoteñ napa' amach alla norrerre'te
 añ orrapo' ñeñt narmetsos tarremphuach allempoch ello
 norrererr esempohuañencha' añcha'taretetuerra Yompor.

19 Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñtapa' atet otanet:

—Añpa' ñeñtcha' nechets sepen ñeñtcha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueñoñen na o'ch serreñ.

20 Allempoña rrohuet o' chetan ñaña orramets, ñeñtapa'cho'ña atet oterraneterr Jesús:

—Añpa'cho'ña ñeñtcha' nerras sepen ñeñtcha' ashatarettatsa socop. Ñeñtapa' alloch na'pocatonas e'ñe cohuen etserra Nomporecho.

21 'Te'pa' o'ch señoche ñaña ñeñtcha' nepomuerre'pa' e'ñeca'ye parro yerrallme'chen.

22 Po'ñoche'ca'ye te'pa' allo'na sen etsotnomtsa ñeñt atet onañchareñ nocop, na Ñeñten Acheñetosets, attotcha' muet-saterrnet. Tarraña nocoppa' e'ñe pocte'; añña po'ñoche acheñer ñeñtcha' nepomuerre' ñocoppa' atarr llequëñets.

23 Allempoña atet otua Jesús, pueyochresha'ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochreshater.

Atto pommo'cheñoñetpa' otanna'tyenet erra'tsenoteyte'ña ñeñt ey atarr asherben enten allohuen acheñenesha'

24 Allempoña pueyochresha' e'ñe pommo'cheñoñetpa' atet otanna'tyenet e'ñe ñagattseta:

—Erra'tsenoteyte'ña ñeñt ey atarr asherben enten allohuen acheñenesha' ñato' na, ñato' pa.

25 Allempoña Jesúsapa' atet otanet:

—Sapa' señoche' ñeñt atet pena po'poñ acheñenesha' ñeñt ama judioneshayaye. Ñet ñeñt pa'micha'tareter penet e'ñech pa'micha'nochteñocmañen pomnaren pa'yenan allohuen pueyochreshachno. Tarraña ama't atet penetañ pommo'cheñoñpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro'sherba'yenanet.

26 Sapa' arepa'chña atteye' sepanna'tatsto e'ñe sommo'cheñoñ. Ñerra'm erra'tsenotes ñeñtes atarr añcha'taretoyen entetsa, ñeñtes acheñespa' socoppa' añ pocetsa o'ch atet senterra ñerra'm ama esoshe'mayayso atet ñerra'm ñeñt atarr huepuesha'. Ñaña ñerra'm erra'tsenotes ñeñtes muenene' o'ch atarr asherben entenset, ñeñtesña acheñespa' añ pocetsa o'ch atet senterra ñerra'm ama esoyayso, allochñapa' attoch e'ñe cohuen setorrena po'potantañecop.

27 Ñehua, yeñoteñ acheñenesha' arr patsro añca'ye atarr añcha'na'tpo' entenet ñeñt e'ñe cohueno anorrcha'tyets all rrallme'chenet, amaña añeye'ña añcha'na'tpoye' enteneto ñeñt puesherbeñoñ epatyene' rreñets ñeñt anorrchets ñeñt rrallme'chets. Tarraña napa' o'ch notas: Ñeñtecopca'yeña nohuapaña sesho attoch nema'yoçhrena torraya ñeñtcha' po'ñoçh atarr sherberrets socop.

28 Tarraña sañapa' ñeñtes atarr nellcapretenaya ñeñt atarr llequëñets nenten na.

29 Ñeñto'marña te'pa' o'ch nena'nerres sa ñeñtescha'ña nauer attoch sa'mcha'tarettapreterrna e'ñe atet pena Nompor o' na'n nanña ñeñtencha' añcha'tarettapreterraya.

30 Allcha' sanorrcha'tyesuerr e'ñe sa seconaño allcha' e'ñe sa'mcha'taretetyesuerra. E'ñe pueseña'ttsos añecopcha'ña sa'mcha'taretetyesuerra ñeñt mereñtsorecop israelena'tar ñeñt çharra' mereñtsor ñeñt puechetsa epsheña. Attoña allpa' o'ch na'mcha'taretterra e'ñe necohuenño e'ñech cohuen yeparrocmauerr, allña'pa' e'ñech yocsheñeshocmañen yerrallme'chuerr e'ñe parro.

Atto Jesús'pa' eñotatan Pedro ñapa' çhocmach a'nasocha (Mt. 26.31-35; Mr. 14.27-31; Jn. 13.36-38)

31 Simón, po'ñoçh te'pa' o'ch notaþ, oneñeþpa' atarrca'ye enamuenen na socop, añ muenen o'ch topatenes o'ch atet þatenes ñeñt atet cotape'chen ña ñeñt ama pocteye' enteno Yompor. O'ch atarr huomenc topatenes atet ñerra'm ñeñt shoshnene' po'trigror e'ñech huomenc pa'shmuenan puehoshnat.

32 Tarraña Simón o'ch notaþ, te'pa' napa' o' nema'yoçhua þocop attoch amach e'ñe poctacma a'huañañþsonapeña þa atto atarr peyemtenna. Tarraña ama'tcha' huaponaþañ topateñets ñeñt atarr huomenc, þaña allempopa' o'ch alla þoctape'cherr cohuen Yomporecop. Allempoñapa' o'ch alla e'ñe cohuen peyenpuer pemo'nasheñnesha' attoch ñetpa'çho'ña o'ch alla huomenc perret pueyoçher Yomporecop.

33 Pedroñapa' atet och:

—Partseshacha' napa' amach na'ypo'ñape, çhocmach noctaþ ama't errach anmapet; ñerra'm cárceloch anmapet allcha' mueroçhtatapet, napa'çho'ña nemnen allcha' yemueroçhta parro. Ama'tcha' çho muetsapetpa' yerromuepa' parro.

34 Jesús'ña'pa' atet otererr:

—Pedro, o'ch notañ, e'ñech añe tsaprocma amach eñena' atollop, ñañapa' o'ch ma'poch ña'nasotenna. Ñeñtpa' atetcha' ñoten, napa' año' pentarno.

Atto chapmoch allempoch atarr atserrparetterra Jesús ñeñt atarr topateñets enten

³⁵ Elloña Jesúsapa' yerpaterrana pueyochresha'; ñeñtpa' atet oterraneterr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't seçllayor ama't ñaña sesapat. Ñehua allempopa' ¿eñalle'tña ñeñt sepalltena?

Ñetñapa' atet ochet:

—Allempopa' amaca'ye cho es yepallto ama't e'ñe mame-sha.

³⁶ Jesúsñapa' alla oterraneterr:

—Tarraña te'pa' o'ch notas po'poñ, ñerra'm eseshaste' ñeñtes echene' seçllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell.

³⁷ Tarro'mar te'pa' o'ch alla noterserr: Te'pa' o'chca'ye e'ñe etsoterra ñeñt atet anuaret Yompor po'ñoñ nocop. Allca'yeña oten napa' erroñuanencha' perrnet atet ñerra'mrrate' napa' ñeñten amtsañen. Te'pa' ñeñtca'ye o' etsotmocha ñeñt e'ñe atet anaret nocop.

³⁸ Allempoña ñetñapa' atet otereterr:

—Partseshacha' yapa' yechenca'yeña epmeta cochell.

Jesúsñapa' atet otanet:

—Ñeñfachca'ye.

Atto Jesúsapa' ma'yochuena all oteñet Getsemani

(Mt. 26.36-46; Mr. 14.32-42)

³⁹ Allempoñapa' o' rrallme'chuanenet ñeñte pascuapo, Jesúsñapa' cha'nerrpa' ahuenerr Olivopno; ñapa' attecma pena chocmach sen all. Pueyochresha'ñapa' coña'huaneñet.

⁴⁰ Allempoña chenit allpa' Jesúsñapa' atet otuenan pueyochresha':

—Te'pa' arrcha' sema'yochuena attoch e'ñe sa'huinta' ñeñtcha' sehuapoya te' ñeñtcha' atarr huomenc setpate'.

⁴¹ Allempoña ñapa' ahuo' mame' a'yenteye'. Ñañapa' all concorpa'huena o' ma'yochuena.

⁴² Puema'yocheñoñ atet otuen:

—Apa, ñerra'm ñach pocte' ente' arepa'chña pemnatatsche o'ch chapona ñeñt atarr amuerochtatañ nenten.* Tarraña

* **22:42** Ñeñt amuerochtatañ ñeñtpa' po'ñoñ arr atma'ntataret ñerra'mrrate' ñeñt atarr pesherr yorren orranitso.

ñerra'm p̄ach muenats añcha'ña atet pepaton ñeñt̄ pemnen p̄a, amachña añeyaye ñeñt̄ nemnen na.

43 Allempoñapa' huapoña mellañoñeñ Yompor pue'ntañeñ ñeñt̄ña ahuamencat̄ p̄ose' attoch ahuantan puellquëña.

44 Ñapa' atarr nanac puellquëñesha' ma'yochena; puema'yochenoñpa' atarr nanac ñorra'ten. Po'ñorrañapa' čha huatena atet ñerra'mrrate' errasats tsoṣsa'tets patso.

45 Allempoña ma'yochuapa' tanterra, ahuerr pueyochreshesho. All entuerranet ñetñapa' čha atarr manrrenet ama't e'ñe puellquëñeshet.

46 Ñañaapa' atet otuerranet:

—Sapa' eso'mare'tña čha atarr semanrra'ten. Te'pa' o'ch se-tanterra'pa' čhoña sema'yochrra'ta attoch sa'huanta' ñeñt̄ča' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

47 All atet otyenan pueyochresha'pa' allempoñapa' huačha'toña shonte' acheñenesha'. Ñeñt̄ huačha'tatahuet ñeñt̄pa' ñeñt̄ sochetsa Judas ñeñt̄ara ñeñt̄ pueyochresha' peneñ ñeñt̄ čharrasheña ñeñt̄ a'pchenahuet epsheña. Ñañaapa' čha ponmosaya Jesús, puetso'tstsapa'teñoñ huom̄ča'tos.

48 Jesúsñaapa' atet otaṣ:

—E'ñe'tcha' petso'tstsapa'teñoñen pepomuerran na Ñeñten Acheñetosets.

49 Añña ñeñt̄ yemtenaya Jesús allempo atet eñchet o'ch rromoset Jesús, ñetñapa' atet ochet:

—Ayochreshate ¿amafe' pocto o'ch yemoñsaṣa yocchello?

50 Puesheñarrña pueyochresha' allenta chetan po'cchell ahuo'ch čhonto'tapan cornesha' pa'cheñer puetepa'tcha' tsorroñ po'cohuenrot. Ñeñt̄pa' año pa'cheñer ñeñt̄ pa'm̄ča'tareter pen allohuen judionesha' po'cornaneshar.

51 Jesúsña allempo entan pueyochresha' atet p̄apa' ñañaapa' otanet:

—Ñeñt̄epa'ta, amach atet sepatsto.

Allempoña ñeñt̄ tsorrqueta'tetpa' alla a'ṗllerrñañ puet o' alla orrater o' e'ñe correrra.

52 Ñeñt̄ huačha'toya ñeñt̄ča' rremose' Jesúspa' ñeñt̄pa' añca'ye ñeñt̄ pa'm̄ča'tareternesha' p̄a'yen allohuen judionesha' po'cornaneshar, ñaña ñeñt̄ judionesha' po'guardianeshar ñeñt̄ cohuan̄pene' Parets pa'paquell ñaña ñeñt̄ pompornesha' pen allohuen judionesha'. Allempo huačha'toñetpa' Jesúsñaapa' atet otapanet:

—Eso'mare't sehuacha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrrate' e'ñe'ten?

⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' chap allempo ñeñt' pocetsa socop ñeñto'mar te' o' chap allempoch oneñe'tpa' o'ch orrtatennas po'huamenc, ñeñt'pa' e'ñe atet ñerra'm checmete'.

Atto Pedropa' a' nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesús'pa' arr aneret añcha'taret pa'paclo ñeñt' pa'ñcha'tareter pen allohuen judionesha' po'cornaneshar. Pedroñapa' ñapa'cho'ña cote' tarraña ñapa' chenta' en a'yot.

⁵⁵ Petotña rroch pampopa' all a'torenet tso' all anorrcha'tyen acheñenesha' ñeñt' shotetsa. Pedroñapa' all anorros ñaña all shotosa.

⁵⁶ Allempoña huapa coyanesha' ñeñt' añcha'taret pueñaña. Entosan Pedro all shotenapa' alla cohuos, atet otos:

—Aña'cho'ña encanesharpa' ñeñt'ramtso yemtaye'tña Jesús.

⁵⁷ Tarraña Pedroña cha a'nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñt' yacmar:

—Napa' amarramche' erra neyemtenoña na epan ña.

⁵⁹ O' tama o'chterrerrpa' o' alla huerrerr po'psheñeñ, ñapa'cho'ña atet otuererr:

—Po'ñochca'ye añmapa' ñeñt'ca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

⁶⁰ Pedroñapa' alla oterranerr ñeñt' yacmar:

—Amarramche' neñoteñeña este'ña atarr potenen.

E'ñe allempo atet eñorena Pedro, e'ñepa'tcha' allempocma eñeña atollop.

⁶¹ Allempoña Partsesha' Jesús'pa' cohua' allente'tsen Pedro. Pedroñapa' allenta yerpurrana atet otneñ Partsesha': "Amach eñena' atollop ñeñte tsaprocma pañapa' o'ch ma'poch pa'nasotenna."

⁶² Allempoña Pedropa' ahuo' a'yo all e'ñe puellquëñesha' yahuosa huomenc.

Atto atarr achm̄are'teñet Jesús

(Mt. 26.67-68; Mr. 14.65)

⁶³ All yottam̄psateñet Jesús am̄cha'taret pa'paclo añña soll-tarnesha' ñeññ cohuam̄psachet ñetñapa' atarr achm̄are'teñet Jesús all cohuam̄peñet. Atarr čhota'teñet.

⁶⁴ Huancacalle'cheñet, pachm̄are'teñoñetpa' atet oteñet:

—Ñehua, te'ña eñoratenperrepa' Parets allochñapa' attoch p̄otey esesha'te'ña pečhota'tyene'.

⁶⁵ Elloña pachm̄are'teñoñetpa' pa'namen esocmañen otyeñet, sochatse'tyeñet.

Allempo čhapata'mueñet Jesús all ap̄cha'muena allohuen judionesha' pa'm̄cha'tareternesha' ñeññ a'p̄octatyene' ñoñets

(Mt. 26.59-66; Mr. 14.55-64; Jn. 18.19-24)

⁶⁶ Tsapaña allempo puetarenpa' ap̄cha'muena allohuen ñeññ pompornesha' pen judionesha' epuet ñaña ñeññ pa'm̄cha'tareternesha' pen allohuen judionesha' po'cornaneshar epuet ñaña ñeññ atarr etsotayenayeñ ñoñets ñeññ atet anaret. All ap̄cha'muena allohuen judionesha' pa'm̄cha'tareternesha' ñeññ a'p̄octatyene' ñoñets, all anma'mueñetña Jesús. Allñapa' a'p̄to'tare'tapet, atet otapet:

⁶⁷ —Yapa' te'pa' yemneñ o'ch p̄otosey ñerra'm po'ñočhte' p̄a ñeññep̄ Cristotets.

Jesúsñapa' atet otosanet:

—Ama't notatstas na po'ñočh ñeññen Cristotets sañapa' amachca'ye p̄octeye' sentno attoch same'ña'na.

⁶⁸ Ñaña napa'čo'ña ama't o'ch es na'p̄to'tas saña sañapa' amachca'ye sanapnoña naña. Tarro'mar sapa' amachca'ye semno sa'rroyerren.

⁶⁹ Tarraña te'pa' ama'tcha' atet sepa'noñ te'ñapa' o' e'ñe čhap allempoch o'ch alla nanorruerr Nomp̄or po'cohuenroñ ñeññ atarr ahuamencattetsa, ama't na Ñeññen Acheñetosets.

⁷⁰ Allempoña allohuenet atet oteñet:

—Ñeññep̄ñapa' ¿p̄a'trraña Puechemer penña Yompor?

Jesúsñapa' atet oterraneterr:

—E'ñeca'ye po'ñočh ñeññ atet sotenen sa.

⁷¹ Allempoña ñetpa' atet otanna'tyeset:

—Te' yapa' ama yemneñe po'potantañ ñeññcha' a'metare'tam̄p̄sose' tarro'mar te' yapa' allohueney e'ñe ye'mhuen ñeññ atet otena añ acheñer, ñapa' Yomporo' Puechemer. Ñapa' čhaca'ye atarr achm̄are'tenan Yompor.

23

Allempo čhapata'mueñet Jesús allo'tsen am̄cha'taret Pilato
(Mt. 27.1-2, 11-14; Mr. 15.1-5; Jn. 18.28-38)

¹ Allempoña allohuenet tantrra'tuet, e'ñe parrocmá anmet Jesús allo'tsen amícha'taret Pilato (ñeñt nēn gobiernō Romōt ñeñt amícha'tarettsa allo'marneshacop).

² Allñapa' atarr otteñe'choset, toma'tamīpesyesoset, ñeñtpa' atet otyesoset:

—Ya añ acheñer chocma yenteñ yechatyenan yamo'tseshachno judionesha' ñeñt ama't mameshapa' ama cohuenayaye, ñaña atet oteney año'ch yetsa'tatsto impuesto ñeñt romo'marneshacop ñeñt nēn amícha'taret Romōt. Ama't ñapa' atet otena ñapa' ño' Cristotets ño' atarr amícha'tarettsa arr.

³ Allempoña amícha'taret Pilatopa' a'p̄to'tapan Jesús:

—Papa' ¿p̄a'tña judionesha' pa'mícha'taretereḡ?

Jesúsñapa' atet och:

—Atetca'ye atet p̄otenen.

⁴ Añña ñeñt pa'mícha'tareternesha' pen allohuen judionesha' po'cornaneshar ñaña acheñenesha'chno, ñetñapa' atet otanet Pilato:

—Ñehua, napa' amaca'yeña nentoñeña ñeñt atto ama pocteye' es penoña añ acheñer.

⁵ Judionesha'ña pa'mícha'tareternesha'pa' alla otereterr Pilato:

—Tarraña yañapa' chocmaña yenteñ ñeñt atet yechatyenan acheñenesha' attoch atpare'tatenanet gobiernō. E'ñe Galileoteñ atet pena, ama't te'pa' o' chap ñaña arr Judeo e'ñe attecma o' yechatuerrerr ñeñt ama cohuenaye' yenteno ya.

Allempo chapata'mueñet Jesús allo'tsen ñaña amícha'taret Herodes

⁶ Atto' e'mñnotenā judionesha' atet otyenet e'ñe Galileoteñ yechaten, allempoña Pilatopa' atet a'p̄to'tanet:

—Jesúsapa' ñapa' ¿galileo'marnesha'tña?

⁷ Allempoña eñotachet ñapa' po'ño'chca'ye galileo'marnesha' allempoña Pilatopa' atet cotape'ch ñeñtpa' Herodesocpaca'ye tarro'mar ñapa' ñeñt amícha'tarettsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo chap Jerusaléño all emo'ten.

⁸ Herodesñapa' e'ñe pocsheñesha' agapanēñ Jesús tarro'mar ahuañoteñ atarr mueneñ o'ch eñch tarro'mar ñapa' atet e'mare'tenan Jesús ñeñt atet p̄a'yena. Ñapa' añecopña atarr mueneñ o'ch orrtatoñ ñaña ñeñt atet p̄a'yena orrtatyese' ñeñt ama puentareto.

⁹ Atarr es a'p̄to'tare'tapaneñña Jesús tarraña ñapa' ama anapanoña Herodes ama't e'ñe parrocha.

¹⁰ All tomícha'toset ñaña allohuen amícha'taretnesha' ñeñt pa'mícha'tareternesha' pen allohuen judionesha'

po'cornaneshar ñaña allo'tsen ñeñt atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr.

11 Allempo Herodes ñaña allohuen po'solltarneshar ñetpa'cho'ña puerrapsoñet ñamet. Achñare'chet all che'tatseteñet. Pueche'tatseteñoñet chorrachet añcha'taret pa'shtam ñeñt atarr cohuen. Allempoña Herodespa' o' alla mueño'ter Pilatesho.

12 Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'chapa' cha e'moñe'tannenet.

Atto añcha'taret Pilatopa' otanet ama'tpa' chosa muetse' Jesús

(Mt. 27.15-26; Mr. 15.6-15; Jn. 18.39-19.16)

13 Allempoña Pilatopa' alla apchaterran ora allohuen judionesha' pa'mcha'tareternesha' ñeñt po'cornaneshar pa'mcha'tareternesha' ñaña po'potantañ judionesha' pa'mcha'tareternesha' ama't ñaña allohuen acheñenesha'.

14 Pilatoña'p' alla otapuerraneterr:

—Añ acheñer ñeñt sehuapatennan ñeñt soten sa ahuo' yechatyesan acheñenesha' ñeñt ama cohuenaye' senteno sa, te'ña napa' o' na'p'to'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt atet sotyen atto' pena ñeñt ama cohuenayaye.

15 Ama't ñaña Herodespa' ama entoñeña ñeñt ama pocteye' yechateno, ñeñto'marña o' alla mueñer nesho. Po'ño'chpa' amaca'ye eñalleña ñeñt atet pen ñeñt ama cohuenaye' yenteno allohueney atto'tcha' yemtsatach.

16 Ñeñto'marña na te'pa' attachca'ye necoñchach mame'pa' o'ch alla na'rroyer.

17-19 Tarraña allohuen judionesha' puerrannarteñoñet atet ochet Pilato:

—Pemtsatachñaca'ye, añcha'ña pa'rroyerrnay Barrabás.

Ñehua, ñeñt Barrabás ahuañmo'choteñ yottampeñet tarro'mar ña yechatene' acheñenesha' atpare'chetepa' añcha'taret ñeñt nen gobierno' Romot. E'ñe patpare'teñoñ o' muetsan acheñ. Ñehua, ñetpa' atet yechenet. Pate'tets pascuapo ñeñt añcha'taret ñeñt nen gobierno' Romotpa' o'ch a'rroyerrñañet judionesha' puesheñarr pamo'ts ñeñt ayottam'psarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'.

20 Ñeñto'marña Pilatopa' atarr mueneñeñ o'ch a'rroyerranet Jesús, ñeñto'marña alla a'p'to'terranerr allohuen acheñenesha'.

21 Tarraña ñetñapa' ama't mameshapa' amaña pocteye' enteñeto. Elloña ñeñtapa' rrannartet allohuenet, atet oterete't:

—¡Pecorso'tam̄psach! ¡Pecorso'tam̄psachñaca'ye!

22 Poma'pocheño Pilatopa' alla oterraneterr:

—¿Eso'mare'tña semneñña o'ch necorso'tam̄psach? Napa' amaca'ye nenteññañeña ñeñt atto ama pocteye' es peno attoch yemtsatach. Ñeñto'marña napa' attachca'ye, necoñchach mame' allempopa' o'ch alla na'rroyer.

23 Tarraña ñetpa' ama cañpueñeto otare'tet. Elloña ñetpa' e'ñe puerrannarteño'tet atarr enamueñet attoch corso'tam̄psach.

24 Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet neponas ñeñt atet atarr semnen sa.

25 Ñeñto'mar allempo a'rroyanet Barrabás ñeñt enamueñet ama't ñeñt patparño't yottam̄peñet ñama puentseño't acheñ. Tarraña Jesúsñapa' o' apanet attoch muetset ñeñt atarr muenenet ñet.

Atto corso'tam̄psoset Jesús

(Mt. 27.32-44; Mr. 15.21-32; Jn. 19.17-27)

26 Allempo anmet Jesús a'yo allcha' corso'tam̄psoset. Allña oñenetpa' allñapa' poctet puesheñarr yacma ñeñt cireneo'marnesha' ñeñtapa' añ pa'so'cheñ Simón ñeñt errte' huerrtsa a'yo't. Ñeñtña rremapetpa' o' chechatnomet Jesús po'corsoch ñeñtña anmue'ña chenta'.

27 Allñapa' co'ta'huanem̄ shonte' acheñenesha', shonte' coyanesha'chno ñeñt atarr ya'na'tnene' Jesús chenta', atarr goga-retyesnenet puellquëño'tet.

28 Tarraña Jesús'pa' allenta cohua'nmanet, atet otnomanet:

—No'chanesha ñeñtes jerusaléño'marneshas, amach atarr seya'na'tatsteno na. E'ñe socpa atarr seyahuena sacñefare'tolleshohuen.

29 Tarro'mar esempopa' çhocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetñapa' e'ñech cohuen entare'tterret allempo tarro'mar ñetpa' ama eñalleto puechoyoreshet ñeñtcha' atarr mueroçhterrtsa. Ñeñto'marña allempopa' otyerrcha' allohuen acheñenesha': "O' atarr cosheñtso'tsenterra mueçho'pñanesha', ama't allohuen ñeñt ama achoyore'tñe, ama't allohuen ñeñt ama es moma'yeneto."

30 Tarro'mar allempo puemueroçchteño'tet e'ñe puellquëño'tetpa' atarrcha' ya'ñameterret. Pueya'ñameteño'tetpa' e'ñech pocte' entyerret ñegata'mperre'tepa'to' attoch

pampuerranet e'ñe poctacma. Allochñapa' o'huañcha' allo'na atarr nanac mueroçhtenet.

³¹ Tarro'mar te'pa' atto mueroçhtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amueroçhtatare'terra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tam̃psoset.

³² All aneñet ñaña epsheña ñeñt amtsañ ñeñtcha' epuet corso'tam̃psoset.

³³ Allempoña çhapachet all oteñet Poñetalleño, allña corso'tam̃psosetña epuet ñaña epsheña ñeñt amtsañ, puesheñarr nosñañet po'cohuenrot, po'psheñeñña' nosñañet pue'chco'terot.

³⁴ E'ñe allempo corso'tam̃psosetpa' Jesúsñapa' atet ma'yocham̃psosana ñeñt e'moñe'tene', ñeñtpa' atet ot:

—Nomporcha' te'pa' pepretnanetepa'ch tarro'mar ñetpa' po'ñoçhpa' ama eñoteneto ñeñt atet yeçcatenet, ñeñt ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets.

³⁵ Acheñenesha'ñapa' atta cohuanrrorteñet all tomçhenet a'yenet. Pa'mcha'tare'terneshet ñetñapa' atarr es otnare'teñet, atet otatse'tyeñet.

—Te'ña papa' o' pa'queshp̃atyes po'potantañ, te'ñapa' pa'queshp̃aterra e'ñe pañeña ñerra'm po'ñoçhte' ñeñtep̃ acren Yompor ñeñtcha' Cristotosets.

³⁶ Solltarnesha'pa'çho'ña atarr achm̃are'teñet, che'tatseteñet. Pueche'tatseteñoçtetpa' ponemyetpa' aposet vinos ñeñt atarr chella'se'.

³⁷ Pachm̃are'teñoçtetpa' atet otyeñet:

—Ñerra'm pa po'ñoçhte' ñeñtep̃ pa'mcha'tareter pen judionesha', te'ñapa' pa'queshp̃aterra pañeña.

³⁸ Nehua, poñoç all corsocho all noñet tsachtall aquellcare't ñeñtña quellecpa' atet oten: “Añpa' ñeñtca'ye judionesha' Pa'mcha'tareter.” Ñeñtña quellecpa' ñeñt anare't ma'po'mar ñoñets —griegach, latinaçh ñaña hebreyach, e'ñe attecma oten.

³⁹ Puesheñarrña amtsañ ñeñt parro corso'tam̃peñet, ñapa'çho'ña achm̃are'ch. Potnare'teñoçtetpa' atet oteñ:

—Ñerra'm po'ñoçhte' Cristoçpa' pa'queshp̃aterra pañeña, yapa'çho'ña o'ch pa'queshp̃aterrey.

40 Po'psheñeñ amtsaña' che'ptare'ch.
Pueche'ptare'teño'pa' atet och:

Papa' eso'mare'tña ama pemcha'na'teñeña Yompor, ama't parro amuerochtatare'tey.

41 Tarraña yocoppa' e'ñeca'ye pocte' yemuerochtena tarro'mar ñeñ'pa' añ tsa'tatenyet ñeñ' allpon yeye'chcatyen ñeñ' ama cohuenayaye ama't e'ñe mamesha. Tarraña añ acheñer ñeñ' parro muerochtatenyet ñapa' ama es yechcateno ama't mamesha ñeñ' ama pocteyaye.

42 Allempoña ñapa' atet otan Jesús:

—Napa' peyerpa'huerrno'tach allcha' pa'm'cha'taretetuerra.

43 Jesúsñapa' atet och:

—Napa' po'ño'chca'ye notañ, e'ñe tayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

44-45 Allempoña chap pocto atsne'pa' o'huañ atsnom, o' e'ñe checmetua errañaren añe patsro. O'ña ellerrotnenmochapa' o' alla puetarerr. Allempoña ñeñ' besom allo yottañpeññañet Parets pa'paquell po'ponro ahuepa't rrrarra'nom e'ñe poc-tacma, o' e'ñe ellopa'tetsta.

46 Allempoña Jesús'pa' rrana. Puerranarotpa' atet ot:

—Nompurcha' te'pa' o' nepomuerra e'ñe pocop e'ñe necamquëñohuen.

E'ñe ñeñña otuapa' o' rroma.

47 Solltar po'ca'ptáner ñeñ' romo'marnesha' ñeñ' corso'tañpse', allempo atet ent atet o' pa, ñaña'pa' allenta aye'chochtatan Yomporpa' ñapa' atet ot:

—Añ yacmarpa' po'ño'chuaca'ye e'ñe attota o' yemtsatater, amaca'yeña eñalleña attoch yemtsataterëñ.

48 Ñaña allohuen acheñenesha' ñeñ' allo'tsa'yen ñeñ' ente' ñeñ' atet o' pach o' yoro'chtach, ñetña'pa' puellquëñesha' na'yenesnerret pot puesomapo ahuanerret.

49 Allohuen ñeñ' atarr yemtaye't Jesús ahuaño'teñ ñaña allohuen coyaneshachno ñeñ' co'ta'huanmue' Galileot ahuaño'teñ, ñetña'pa' alla tom'cha'tyenet a'yenet allot atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

50 Eñall puesheñarr yacma ñeñ'tara judionesha' ñeñ' e'ñe cohuen acheñ e'ñe pocte' es pa'yen, ñeñ'pa' añ pa'so'cheñ José ñeñ' arimateo'marnesha'. Ñapa'cho'ña puesheñarr ñeñ' pa'm'cha'tareter pen allohuen judionesha' ñeñ' parrocmá

čhocmach apčhenet epuet po'potantañ ańcha'taretnesha' attoch a'pochtatenet ñeńt llequëna allohuen judionesha'.

51 Ñehua, ña ahuaña allempo apčhenet parro po'potantañ ańcha'taretnesha' atto o'pateñet Jesús o'ch muetsatachet, ñaña'p' ama't mameshapa' ama pocteye' eńche. Tarro'mar ñapa' ñeńt atarr cohuene' Yompor esempohuañencha' o'ch atarr ayochresha'terra.

52 Ñeńtña Josépa' o' ahuo' Pilatesho o'ch oteña' pocte'ch eńch ñach a'suatose' Jesús ñeńt rromuets corsocho.

53 Pilatoñapa' e'ñe pocte' eńch, ñeńto'marña ñapa' a'suater corsocho't allempoñapa' epatse'ch shetamtso ñeńt e'ñe cohuen, allempoñapa' aneń allcha' pampueña'. All eñare't ma-puetpon all ama apampare'ttena' po'poñ arromña't, allca'yeña nenana'ña Jesús.

54 Ñehua, allempo pampuet Jesús'pa' ñeńtpa' ańe yetro allempo čhocma ańño'tena judionesha' ñeńt tsapa'tecop allempoch ameserreterr. Ñehua, allempo pampa'huet Jesús'pa' o' ellerren, ñeńto'mar judionesha'pa' o' mottan ñeńt tsapa'tecop allempoch amesa'muenet e'ñe poctacma.

55 Ñeńtña coyanesha'čhno ñeńt atarr yemtenaya Jesús ñeńt cota'huanmue' ahuaño'teń Galileot, ñetñapa' cota'huanmet all pampueñeta' attoch eńchet allcha' neret Jesús.

56 Allempoña ñet ona'cherret allotpa' o' čha'cherret pocollo, ñetñapa' allohuenetpa' yorayesuerret ñeńt atarr eñmosa'tečhno alloch a'yana'tereta' Jesús ora po'chtsohuen attoch e'ñe cohuen eñmosa'tatereta'. Ñeńtpa' e'ñeca'ye atet yečhenaña judionesha'. Ñetpa' alla ańño'tuaneñetña eñmosa'tečhno tarro'mar tsapa'tpa' amach serreto puepampro tarro'mar tsapa'tcha' čhapa'muen ñeńte yetro allempo čhocma amesen judionesha' ñeńt atet anare'ttenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

1 Allempo o' huañ yetñats allempo amesenet, allempo motta'muena yetñats temenc coyanesha'čhnoñapa' e'ñe ahua'tecma ahuanma'muenet all pampueñet Jesús. Anma'mueññañet eñmosa'tečhno ñeńt o'patateñet alloch a'yana'toset. Allña'pa' cota'nma'muenanet po'potantañ coyanesha'čhno.

2 O'ña čha'ča'ta'muenet allpa' mapue'ña ñeńt allo mopamñset Jesús ñeńt puepampuer p'achet ama atteraye' entoseto ñeńt atet pamñset po'poñ ellerro. Entoset mapue' o' a'rrote'tare'ttena' a'yenet.

3 Allempoña ñetpa' esho'trra'toset mapuetpono ñeñt̃ puepampuer p̃achet amaña esesha' entosayeña arromñañ̃ all net.

4 Ñetña'pa' cha muene' yoruoset ama eñoteñeto erro'tcha'ña p̃oset. E'ñe allempo atet̃ co'tape'chyenet ahuepa'tcha' orrtapanet epsheña yacma alla tom'cha'toset e'ñe allo'tsa'yenet, atarr cohuen popuetyenet pa'shtamuet.

5 Ñetña pueyorño'tetpa' atta mo'crra'tyeset patso. Pom'chaño'tet ama eshcaye' cohua'p̃seto allenet̃ ten. Ñeñt̃ña yacma epsheña'pa' atet̃ otosanet:

—Ñeñt̃ ama arromñañ̃eshayaye, eso'mare'tña se'ne'ne'teñña arr allecma nannena arromñañ̃enesha'.

6 Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeñt̃ atet̃ otase't̃ ama't ahuañmo'cho'teñ̃ allempo Galileo'tsenmeñ̃.

7 Ñeñt̃pa' atetca'ye otase't̃ ñapa' ña Ñeñt̃ Acheñetosets chocmach pomueret attoch erro'tuanen per po'poñ̃ acheñ̃ ñeñt̃ atarr ochñañ̃enesha' attoch corso'tam̃peret, tarraña poma'pamtañoñ̃apa' chocmach tanterra.

8 Allempoña ñetpa'cho'ña allenta yerpueret atet̃ otanete't̃ ahuañmo'cho'teñ̃ Jesús.

9 Allempoña coyanesha'chnopa' ona'cherret puepampro't̃, cha'cherret pocolopa' serrpare'tatueret Jesús puellsensarnesha' ñeñt̃ charrasheña ñeñt̃ puesheñarraña o' puecherra ñaña po'potantañ̃echno ñeñt̃ pueyochresha' pen. Coyanesha'chnoñ̃apa' serrpare'tueret allohuen ñeñt̃ atet̃ enta'muenet Jesús puepampro.

10 Ñeñt̃ serrpare'tatenaya' Jesús puellsensarnesha' ñeñt̃pa' añ̃ María Magdalena ñaña Juana ñaña po'psheñeñ̃ María ñeñt̃ Jacobo pachor ñaña po'poñ̃echno coyanesha'chno.

11 Tarraña Jesús puellsensarnesha' allempo serrpare'tatosanet coyanesha'chno ñeñt̃ atet̃ entua'muenet, ñetña'pa' ama't mameshapa' ama ame'ñyetoña coyanesha'chno, cha otenapuetañ̃ at̃tate' otatse'tyen coyanesha'chno.

12 Tarraña Pedroñapa' allenta ta e'ñe matenacma. O'ña chap ñaña puepampropa' mo'cosa, cohuos o'pononet̃ all net. Ñapa'cho'ña ama entose, shetamtsa entos allo e'patse'chet̃ alla o'shshe'ma'yena a'yenet̃. Ñapa'cho'ña ahuer̃ pocollo ama eñoteñe ñato' erro'tsente'.

Atto Jesús'pa' rremuerrana' epsheña pueyochresha' toño allempo senet Emaúso

(Mr. 16.12-13)

13 Ñeñte yetrocma epsheña pueyochresha' ñetña'pa' arr senet anetso ñeñt̃ pa'so'cheñ̃ Emaús. Ñehua, ñeñt̃

pa'so'cheñ anets Emaúspa' Jerusaléño'teñpa' allo'tsente' čharra' puechena paterr kilómetro čhoycha' čhapats anets Emaúso.

14 Ñetñapa' e'ñe pueserrparñesha' senet, añ ser-
rpare'tyesnenet ñeñt allpon atet o' pōhua.

15 All senet e'ñe pueserrpare'teñeshetpa' ana-
panna'tyesnenet Jesúsñapa' alla rremuerraneta'.
Allempoñapa' chope'chnomuet e'ñe parro o' ahuanmuet
anetsonet.

16 Tarraña ama't entapetañña Jesúsapa' ñetñapa' čha ottenet
ñerra'mrrate' ama amnataretteneto attoch cheme'tapet, ama
essha' cheme'taye.

17 Jesúsñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña čha atarr
sellca'nena?

18 Puesheñarrña ñeñt sochetsa Cleofas, ñañapa' och:

—¿Ama't peñoteñeña allohuen ñeñt Jerusaléño'tsen
ahuaño'teñ o' e'ñe e'mare'tuet ñeñt atet o' metua all? Papa'
¿paptate'ña ñeñteř taya čhapats all Jerusaléño ñeñteř ama
eñotosaye ñeñt atet o' pōhuerret Jerusaléño?

19 Ñañapa' atet otnomanet:

—¿Eso'tña ñeñt atet o' pōhuerretña all?

Ñetñapa' alla otnereterr:

—Añca'ye yeserrpare'tnen Jesús ñeñt nazareto'marnesha'
ñeñt a'mtene' Yompor po'ñoñ ahuaña. Po'huamencot or-
rtatennay po'partsoña ñeñt ama't ahuaña yapa' ama yentare.
Ñaña atet yečhatyese't ñeñtpa' atarr cohuen. Ñeñtpa' e'ñe
pocte' entapreteñ Yompor; acheñenesha'pa'čho'ña e'ñe pocte'
enteñet.

20 Tarraña ya'mcha'tareternesha' ñaña ñeñt
pa'mcha'tareternesha' pen allohuen judionesha'
po'cornaneshar, ñetñapa' o' pomueret Jesús attočca'yeña o'
muetsatateret, ñeñto'marña o' corso'tamperet.

21 Tarraña yapa' ñeñtca'yeña atarr yemneneñ ñato' ñach
ya'rroyatatosayeñña allohueney ñeñtey israelena'tarey
(atto añcha'nočhtana'tenya romo'marnesha' ya ya'netsro).
Tarraña te'ñapa' čhaña o' muetseret. Te'pa' o'ca'ye
ma'pamta'muen.

22-23 Ñaña te'ña coyaneshačhnoña ñeñt parro yeyemtena,
ñetñapa' ahuačecma ahuanma'muenet o'ch enta'mueñet
puepampro ñetñapa' año' eseshaye' entosayeña puepampro
all neretañ. Allempoña huačherret puepampro't atet
serrpare'tatuerryet, allñapa' año' orrtahuet mellaño'teñ
ñeñto'ña otahuet Jesúsapa' o'ca'ye tanterra o' alla betterra.
Ñeñto'marña yapa' ñeñtña atarr yeyore'tene'.

24 Allempoña ñaña allponsheña ñeñt̃ parro yeyemtena, ñetpa'cho'ña allenta ahuanmuet ñamet puepampro. E'ñe atet otuerrey coyaneshachno, ñetpa'cho'ña ama eseshaye' entosaye.

25 Jesúsñapa' alla otrerraneterr:

—Sapa' ama es sechenoyoña seyoçhro, atarr se'charrtaten seyoçher attoch e'ñe same'ña'huaña ora ñeñt̃ atet eñosyesete't Cristocop allohuen ñeñt̃ a'mta'yesaye't Yompor po'ñoñ ahuatoteñ.

26 Ama't señotheña ñeñt̃cha' Cristotatspa' atetca'ye anareña ñocop ñapa' atarrcha'ca'ye amue-roçhtataretetanena çoch rromats. Elloñapa' o'ch alla çherr esempo allempoña e'ñe cohuen a'cohuentataretterra.

27 Allempoña Jesúsapa' o' yerpatnerraneterr ora allohuen ñeñt̃ atet anaret añecop ñeñt̃cha' Cristotats. E'ñe Moisés po'ñoñoñeñ yerpatnomanet ñaña po'potantañeçhno po'ñoñ ñeñt̃ eñosyestse't Cristocop, ñeñt̃ara ñeñt̃ a'mta'yesaye't Yompor po'ñoñ ahuat.

28 Allempoña'pa' çhappochet anetso all sechenet. Jesúsñapa' çha otetnena ñerra'm ñapa' amtoche'ch.

29 Ñetña alla puepateñoñetpa' atet ochet:

—Allachca'ye yeçhap arr parro o'ca'ye tsapuenmoch.

Allempoña Jesúsapa' be'tosos allcha' çhapuet.

30 Allempoña anorrçha'toset allcha' rrallme'choset. Jesúsñapa' chetosan pan, parasyoso'tam̃psosan pan, shota'tospa' apa'yesosanet.

31 Allempo atet posa, pueyochresha'ña epsheñapa' çha e'ñe cheme'toset aña' ñeñt̃epa'tca'yeña Jesús. E'ñe allorocma ñetpa' o' amnataretterret attoch e'ñe cheme'teret. E'ñe cheme'teretpa' allepa'tcha' ma'natañperranet.

32 Allempoña ñetpa' atet otanna'tyeset:

—Ñeñto'marepa'tca'yeña atarr nanac coshatosey ñorra' ama't çha yellquëna yeyoçhro allempo serrpare'tatnomuey toño all yerpatnomya Yompor po'ñoñ ñeñt̃ atet ana'yesaret e'ñe ñocop.

33 Ñetña e'ñe allorocma tantrra'teretpa' o' alla ahuanerret Jerusaléño. Allñapa' o' çherret allo'tsa'yen po'potantañ puellsensarnesha' ñeñt̃ o' çharrasheñaña puechena puesheñarr. Allo'tsen ñaña po'potantañeçhno.

34 Allña ñetpa' atet otueret po'potantañ:

—Po'ñoçhca'ye o' tanterraña Yepartseshar. Ellonetña'pa' orrterrana ñaña Simón.

35 Allempoña ñetpa' serrpare'tueret ñeñt̃ atet enteret toño ñaña all shota'tosan pan, attoña ñetpa' allña e'ñe cheme'tosetña Jesús.

Atto Jesús'pa' orrterrana allohuen pueyochresha'
(Mt. 28.16-20; Mr. 16.14-18; Jn. 20.19-23)

36 Ñeñña atarr otatsetyenetpa' Jesúsñapa' čhepa'tcha' tomhuets e'ñe all chorren allohuen pueyochreshačhno. Alla huomčha'tuenanet, puehuomčha'tueñoťanetpa' atet otuenanet:

—Te'pa' čhosaña e'ñe cosherrtsa seyočhro.

37 Tarraña ñetñapa' čha atarr yore'tuenanet, čha atarr mecha'trra'tet, čha otenapuetañ choyeshe'matste' orrterranet.

38 Jesúsñapa' atet otuenanet:

—Eso'mare'tña sañapa' čhaña seyoren. Eso'mare'tña sañapa' čhaña atarr se'charrtatenña seyočher.

39 Te'pa' o'ch secuapuennan not ama't ñaña netac attoch e'ñe señoťapuerren naca'ye. Sa'pllapuennan nechets, secua'yepapuennan nechets allochñapa' o'ch e'ñe señoťapuenen. Napa' ñeñten echtsofen, choyeshe'matspa' amaca'yeña echtsoťeyayeto ñaña amaca'ye anpaťeyaye atet o' sentapuenen napa' echtsofenca'ye ñaña anpaťenca'ye.

40 Allempoñapa' gatuenanet pot ñaña pa'tac.

41 Ñetñapa' atta cohuanrrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñočhte' Jesús. Atta echarrtatenet pueyočher tarraña Jesúsñapa' atet oterraneterr:

—¿Arrpa' ama't secheno ama't coñe'ta rreñets?

42 Ñetñapa' aña apapueñet pasheřarr cac achmareť ñaña pets pocoyem' all nenan po'moñ.

43 Ñeñña agaphuenpa' o' rrohueñ all chorrenet attoña ñetpa' entapueñet.

44 Allempoñapa' atet oterraneterr:

—Ñeñť atet notase't allempo orameñ allo'tseney e'ñe parro, ora allohuen ñeñť atet anareť ahuatoteñ Yompor po'ñoño nocop, ñeñña te'pa' o' e'ñe etsotuerra—e'ñe Moisésoteñ po'ñoñ ñeñť atet anareť ama't ñaña ora allohuen ñeñť quellca'yese'ñe'ť ñeñť a'mta'yese'ñe'ť Yompor po'ñoñ, ama't ñaña ñeñť aquellcareťtatse't libro Salmos, te'pa' ñeñña o' e'ñe etsotuerra ñeñť atet ana'yese'ñe'ť nocop ahuatoteñ.

45 Allempoñapa' o' čapatamet pueyočhreto allohuen ñoñťsočhno ñeñť quellca'yese'ñe'ť nocop.

46 Jesúsñapa' alla oterraneterr:

—Po'ñočhpa' allohuen ñoñets ñeñť quellca'yese'ñe'ť atetca'ye oten ñeñťcha' Cristosetspa' čhocmach po'ñočh rromos, tarraña poma'pamtañoñapa' o'ch alla tanterra.

47 Attochña serrpare'teret Cristo e'ñe Jerusaléñoťeñ errařaren ora allemeñ allohuanen acheñenesesho'mar.

Attočha'ña acheñenesha'pa' o'ch cotape'cherret ello e'ñe cohuen Yomporecop alloch'ña'pa' attoch'ña o'ch e'ñe aṗretna'huaretterret allohuenet po'ch'ñaret.

⁴⁸ Jesús'ña'pa' atet oterranneterr:

—Te'ña sapa' o'ch sa'poterrnan ora ñeñ' allpon atet sentyesne't ama't teme'ttsen.

⁴⁹ Ñaña sa te'pa' ellonet o'ch atet notnerres, po'ñočca'ye napa' nemño'huerrnascha' Yompor Puecamquēñ ento't ñeñ'cha' e'ñe sechorra'yesaya e'ñe puesheña'ttsos ñeñ' atet oten Yompor ñeñ'cha' e'ñe apa'yerres. Tarraña sa'ña'pa' allasach anetso Jerusaléño, esempohuach chorratasa Parets Puecamquēñ ñeñ'cha'ña ahuamencat sepa'yesose' ñeñ'cha' apuerres Yompor pue'ntañof.

Allempo a'terr Jesús pue'ntañof

(Mr. 16.19-20)

⁵⁰ Allempoña Jesús err Jerusaléño'f, ahuanerran pueyochreshačhno a'yo anetso Betanio. All'ña'pa' echantosan potpa' bensare'tam'pesyesosanet.

⁵¹ E'ñe puebensare'tam'peño'fanetpa' all'ña'pa' a'tenoche' pue'ntañof o' sohuanenan'ña pueyochreshačhno.

⁵² Ñeña allempo atet entapueret Jesús ahuerr pue'ntañopa' pa'ye'chočhtateñesha' ma'yochnerretpa' ahuanerret Jerusaléño e'ñe pocsheñeshocmañenet.

⁵³ Ñeña allempopa' ellapenete't Parets pa'paclo all atarr aye'chočhtateñ'ña'ñet Yompor. Ñeñ'pa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN JUAN

Ñeñt̃ Po'ñoñ pen Parets ñeñt̃ña acheñetosets ñeñtara ñeñt̃ Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pompor Parets. Ñaña'pa' ñeñtara ñeñt̃cha' Po'ñoñ pa' Parets tarro'mar ñach eñotaterre' acheñenesha' atet oteñ Yompor Parets. Tarraña ñapa'cho'ña e'ñe attecma partsoten atet partsoten Pompor ñeñt̃ atarr nanac Parets.

² Allempo errte' ayeçcatare'tta pats, ñaña'pa' e'ñe parro allo'tsen epuet Pompor Parets.

³ Ñeñto'marña allohuen esocmañen ñeñt̃ eñall, ñapa' ña e'ñe yeçcatue' ñeñt̃ atet muenet epuet Pompor. Ñeñt̃ allpon eñallpa' ama eñalle ñeñt̃ ama yeçcato ña, ama't esotolla, ñocma pueyeçcatar.

⁴ Ñaña'pa' añepa't ñeñt̃ alloch e'ñe yocrrena. Ñeñt̃ña alloch e'ñe yocrrenapa' ñeñt̃cha' yeñotaterre' allohuen ñeñt̃ cohuen enten Pompor Parets. Ñeñto'mar ñapa' atet pena ñerra'mrrate' puetare' tarro'mar ñapa' ñach a'puetarsamperre' allohuen yocpa'ña.

⁵ Ama't atet pena sosya'tsañeçhno añe patsro ñerra'mrrate' checmete', ñaña'pa' e'ñe a'puetaresuos. Checmete'ña'pa' ama't ahuatapa' amach errotenot a'cheçmetamperano ñeñt̃ puetarñatser ñeñt̃ Yompor po'cohuenña.

⁶ Ama't allempo ama orrtena' Cristo ñeñt̃cha' puetarñatsotosets arr patsro, ñanempa' añ orrtatsa puesheñarr yacma ñeñt̃pa' añ pa'so'cheñ Juan; ñapa' Yompor llesense'.

⁷ Ñapa' añecop huapa ñach a'potose' attoch huapa Cristo arr patsro ñeñt̃cha' a'puetarsamperre' allohuen yocpa'ña. Attoña ña po'ñoñotpa' ame'ñatosana acheñenesha'.

⁸ Tarraña Juanpa' ama añeyaye ñeñt̃cha' puetarñatsotosets arr patsro; ñapa' añecpa huapa attoch a'potosan ñeñt̃cha' a'puetarsampsañtosta.

⁹ Allempoña çhap añe patsro ñeñt̃ puetarñatsotosets tarro'mar añ puetarñatser ñeñt̃ e'ñe po'ñoçh ñeñt̃cha' a'puetarsampsose' allohuen acheñenesha' pocpa'ña, ñeñt̃pa' allensa, o'ch orrtosa añe patsro.

¹⁰ Ama't añ patspa' ño pueyeçcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye.

11 Ama't arr çhapañ e'ñe ña pamo'tseshesho, pamo'tsesha'ñapa' arepa'tcha' cohuenaye' agapapeto.

12 Tarraña puesheña'tets ñeñt e'ñe cohuen agapyesapue', ama't allohuen ñeñtcha' ame'ñerraya ña, ñetñapa' apuerranet llesens attoch e'ñe puechemer perranet Yompor Parets.

13 Ñeñt atto puechemer perrey Yompor ñeñt'pa' ama atteyaye atet ye'ñalletena ya ñeñtey arromña'ey. Tarro'mar ñeñt atto ye'ñalletena arr patsropa' ñeñt'pa' atet anaretey ya ñeñtey arromña'ey. Ñaña atto puechemer o' perrey Yompor, ñeñt'pa' ama año'eyaye ñeñt atet cotape'chateney po'psheñeñ acheñ pocta'ña. Yapa' año'ña o' puechemer perrey Yompor atto o' muenaterrey e'ñe ña pocta'ña.

14 Cristoña ñeñt Po'ñoñ pen Yompor o' acheñetos arr patsro, o' yeychañ e'ñe parro mame' aña patsro. Ñapa' atarr amuerañtosa. Ñaña atto ye'chatosey Yompor po'ñoñ ñeñtña ñoñetspa' e'ñe po'ño'ch atet, ama shequëñtsoyaye ama't mamesha. Ñaña yapa' çhocma yentoñe't po'cohuenña. Ñeñtña po'cohuenñapa' atet ñerra'm Pompor ñeñt po'patrro' pene' ña.

15 Allempoña Juan puerranarot'pa' a'po'tan Cristo, ñeñt'pa' atet eñora ñocop:

—Añmapa' ñeñtca'yeña notase't ahuaña, ñeñtcha' huapatsa chenta' ñapa' atarr ahua'encatesha', nañapa' ama tama ahua'encateyayno, tarro'mar ñapa' ahua'toteñ eñalla. Ama't allempo ne'ñalleta na, ñaña' eñalla. Ñeñt'pa' allohua atet ot Juan ñenma't Cristocop.

16 Ñapa' atarr amuerañtosa ñeñto'marña allohueneypa' atarr bensare'tañpeney. Allo'na sen yebensare'tañpesnene'.

17 Ñoñets ñeñt atet anare't ahua'toteñpa' ñeñt quellconay Moisés ahua't. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeñt e'ñe po'ño'ch Yompor po'ñoñ alloch yequeshperra.

18 Yompor Parets'pa' ama't ahua'tapa' ama eseshaye' puentare. Po'patrro'ña ñeñt Cristotsets ñeñt'pa'çho'ña Parets ñeñt e'ñe parro attecmu'et; ñapa' ña yeñotaterre'ña atet penaña Pompor Parets.

Juan ñeñt apatañtetsa Yomporcop, ñapa' atarr cohuentatosan Jesucristo

(Mt. 3.11-12; Mr. 1.7-8; Lc. 3.15-17)

19 Allempo judionesha' pa'm'cha'tare'ternesha' ñetñapa' mueñet acheñ Jerusaléño' ñeñtcha' ahuanmatsa Juanesho. Añ mueñet judionesha' po'cornaneshar ñaña levitanesha' ñeñt po'taruas pene' o'ch torrenet Parets pa'paclo. Ñetpa'

añecop amñarettet ñetcha' a'p̄to'toset Juan ñapa' esesha'te'ña. O'ña chapuet ñeshopa' atet otoset:

—Papa' ¿eseshape'tña, ama't añeyaype ñeñtep̄cha' Cristoterrets?

²⁰ Juanñapa' ama a'nasoto; atto a'metapa' ñapa' atet otapanet:

—Napa' amaca'ye añeyayno ñeñtcha' Cristoterrets.

²¹ Ñetñapa' alla otereterr:

—Ñeñtepnapa' ¿eseshape'tña, ama't añeyaype Elías ñeñt a'mtaye't ahuat Yompor po'ñoñ?

Ñaña' atet oterraneterr:

—Amaca'ye ñeñteyayno.

Ñetñapa' alla a'p̄to'tereterr:

—Amapa' ñato' ¿añepte' ñeñtep̄cha' a'mterre' Yompor po'ñoñ ñeñt yecuen?

Ñaña' alla oterraneterr:

—Amaca'ye ñeñteyayno.

²² Ñetñapa' alla otereterr:

—Ñeñtepnapa' ¿eseshape'tña pa? Yapa' yemneñca'ye o'ch potey allochñapa' o'ch yotera' ñeñt yemñene'. ¿Errofena'tcha'ña poteyña pocop?

²³ Ñaña' atet oterraneterr:

—Napa' nocopca'ye eñose'tña Isaías ñeñt a'mtaye't Yompor po'ñoñ ahuat. Allempopa' atetca' ote't:

E'morrterrach puesheñarr po'ñoñ all amayo allcha' serppare'taterranña achenesha'. Puerranarotpa' añcha' toma'ntaterranet toñ ñapa' atetcha'ca'ye oterranet: “Sa'cohuenetyes toñ allcha' oñmos Partsesha' o'ch e'ñe sa'pa'charretyesoñ pa'tep̄.”

²⁴ Ñehua, ñeñt amñarettatsa Juanesho, ñetpa' añca'ye mueñenahuet ñeñt fariseonesha' ñeñtara judionesha' pa'mcha'tareternesha'.

²⁵ Ñetñapa' alla otereterr Juan:

—Arep'a't Cristoyaypepa' eso'maruañaca'yeña p̄patenña Yomporecop, arepa't Elíasoyaype, arepa't añeyaype ñeñtcha' a'mterre' Yompor po'ñoñ.

²⁶ Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o' chap sesho po'psheñeñ ñeñt ello atarr sherbets, tarraña sapa' amaca'ye señoteñeña sa.

²⁷ Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatrechapa' o'ch nepyanpes.

28 Ñehua, allpa' atetca'ye penet all oteñet Betábara allara Jordanaso yomta'n tarro'mar Juanpa' allca'ye apatyenanña acheñenesha' Yomporecop.

Jesuspa' ñeñt atma'ntataret carrnero ñeñt amtsarettatse't ochñartsocop

29 Tsapaña Juan allempo entapan Jesús ñeshoneñ en, ñaña'apa' atet otan acheñenesha':

—Añca'yeña ñeñt o' llesenserr Yompor ñeñtcha' Po'carrneror pen, ñach yahuanmamperre' yo'chñar allohueney ñeñtey añe patsro'tsa'yeney, tarro'mar ñach rromuerrets yo'chñarecop atetcha' perra atet amtsarettena carrnero ochñartsocop.

30 Añmapa' ñeñtca'yeña notase't ahuaña: “Ñeñtcha' huapatsa chenta'pa' ñapa' atarr ahuamencatesha', nañapa' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña'apa' eñalla.”

31 Ama't na ahuañmo'chapa' ama neñoteñe esesha'te'ña ñeñtcha' huapatsa chenta' ñeñtcha' Cristoterrets. Tarraña napa' añe'cpaña nohuena nach apatyenomue' acheñenesha' oño, attochña norrtaterrñañ israelena'tarneshacop ñeñt po'ño'ch Puechemer pen Yompor.

32 Allempoña Juanpa' eñotatan acheñenesha' ñapa' atet otanet:

—Na ahuaña allempo napataþ Jesús'pa' Yomporña Puecamquëñ e'ñe atet nentaþ ñerra'mrrate' yeþ o' sohua'nma entoþ, chap e'ñe Jesúsesho.

33 Ama't allempo napa' ama neñoteñe ñeñt'te'ña Yompor Puechemer tarraña Yompor ñeñt o' llesenserren attoch napatyes acheñenesha' oño, ñapa' atetca'ye otenen: “Esempoch pent o' sohua'nma Necamquëñ o'ch chap e'ñe ñesho ñeñtcha' chorrosaya, ñapa' ñeñtcha'ca'yeña chorraterrahuetaña Parets Puecamquëñ.”

34 Na po'ño'chpa' o'ca'ye neñch ñeñto'mar te'pa' neñotatenes ñeñtca'yeña Yompor Puechemer.

Ñeñt ñanom pueyochresha' pa' Jesús

35 Tsapaña'apa' po'pocheño all ten Juan epuet epsheña pueyochresha'.

36 Cohuanan Jesús all chopeñe'chen a'yenet, alla oterraneterr:

—Añca'yeña ñeñt Po'carrneror pen Yompor.

37 Ñeñtña epsheña pueyochresha' allempo e'met atet oteñ Juan, ñetña'apa' allenta co'a'nmet Jesús.

38 Puetallesnomtsaña Jesús'pa' entapanet co'a'neñet chenta' ñaña'apa' atet otapanet:

—¿Eso'tña semnen?

Ñetñapa' atet ochet:

—Maestro, ¿erra'tña pečhap?

³⁹ Ñaña' atet otanet:

—Socterrenca'ye o'ch senteña'.

Ñetñapa' allenta cota'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' mañamena o'ch ellerren.

⁴⁰ Ñehua, ñeñña epsheño'maret ñeñ e'mue' atet oten Juan ñeñ cote' Jesús, puesheñarr ñeñpa' Andrés ñeñ Simón Pedro pa'mo'nasheñ.

⁴¹ Andrésñapa' allorocma ahuerr e'nerraya' Simón; o'ña enterapa' atet otuerr:

—Yapa' o'ca'ye yenter Mesías. (Ñehua, ñeñña ñoñets Mesías aña'ye otenet ñeñcha' Cristoterrets.)

⁴² Andrésñapa' allenta anerran pa'mo'nasheñ Simón Jesúsesho. Jesúsñapa' cohuapue'pa' atet otař:

—Pa'tña Simón, ñeñteř puechemer pen Jonás. Te'pa' ne-socherreřcha' Cefas (ñeñtara so'chñets ñeñ otenet griegačo Pedro).

Atto Jesús'pa' chore'tan Felipe ñaña Natanael atoch puey-ochresha' perranet

⁴³ Tsapa'tña Jesús'pa' sechena o'ch ahuerr Galileo. Allña entuenan Felipe ñaña'pa' atet otueñ:

—Ama't pemno o'ch pōctenen.

⁴⁴ Ñehua, Felipepa'cho'ña galileo'marnesha', ña pa'netserpa' añ pa'so'cheñ Betsaida ñeñtara ñaña Andrés pa'netser ñaña Pedro.

⁴⁵ Felipeñapa' entuenan Natanaelpa' atet otueñ:

—Yapa' o'ca'ye yenter ñeñ ñocop quellquē't Moisés all ortatan ñoñets ñeñ atet anaret, ñaña ñocop quellquē't ñeñ a'mta'yesaye't Yompor po'ñoñ. Añepa'tca'ye Jesús ñeñ huetsa Nazareto' ñeñ José puechemer.

⁴⁶ Natanaelñapa' atet otapan Felipe:

—Nazareto'pa' ama't ahuařapa' amaca'ye huenoña ñeñ e'ñe cohuen acheñ.

Felipeñapa' atet otererr:

—Po'ñočh orraca'ye o'ch penteña'.

⁴⁷ Natanaelpa' allenta ahuo' o'ch entenana' Jesús. Jesúsñapa' entapan Natanaelpa' ñaña'pa' atet eñora ñocop:

—Aña'yeña po'ñočh puesheñarr israelnesha' ñapa' amaca'ye shequēno ama't mamesha.

⁴⁸ Natanaelñapa' atet otosan Jesús:

—Napa' ¿errofenote'tña peñotenen? Amaca'ye pentarno.

Jesúsñapa' atet otererr:

—Allempo ama a'sechenpa' Felipe nesho, allempo papa' alla panen mañto higocho nañapa' nenteneþca'ye.

⁴⁹ Natanaelña' atet otererr:

—Maestrocha' pepa'tña Yompor Puechemereþ. Pepa'tña Ancha'taret ñeñt atarr cohuen allohuen israelnesha'.

⁵⁰ Jesúsña' otererr:

—Napa' o' notaþ napa' nenteneþ allempo panen mañto higocho, ñeñto'marte'ña o' þame'ña'na. Te'ñapa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesúsña' alla otererr:

—Po'ñoçhca' notenes, senterrcha' enet atoraret ñaña Yompor po'mllañoñeñrenesha' a'tachenet ñaña sohuaçhenet e'ñe nesho, na Ñeñten Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo çherr Jesús Galileo, allña anetso Caná atarr coshaprechet puesheñarr yacma ñeñt sena'tetsa. Jesúsña pachorpa' allo'tsen.

² Jesúsña epuet pueyochresha'pa' ñetpa'çho'ña ahua'ñarettet allcha' rrallme'chapreteneta'.

³ Allña' çha huañaþset vinos. Jesúsña' atet och pachor:

—Te'pa' ama eñalle vinos, o'çha huañaþset.

⁴ Jesúsña' atet otan pachor:

—Achocha' eso'mare'tña atet þotenenña na. Nocoppa' amaca'ye çhena' allempoch es norrtatyes.

⁵ Tarraña ama't atet otaña' pachorña' atet otan ñeñt sherbets all:

—Ñerra'm errotencha' otas nechoyorpa' sañapa' e'ñech atet seþa.

⁶ Ñehua, allpa' allo'tsen pechapña orrot mapyerñ. Ñeñtña orroteçhnopa' tama ateshamerr; pueña'ttso orrotpa' ñato' sente' oñ epa galon amapa' ma'pate' galon sets oñ attoch chorreresua. Ñeñt orroteçhnopa' allecma nenet oñ alloña a'cohuentatena judionesha' Partsocop ñeñt atet anarettenet ñocpuet.

⁷ Allña' atet otan Jesús ñeñt sherbets all:

—Te'pa' o'ch se'chorrayes oñ orroto.

Ñetña' atetçho' pet e'ñe e'chorraresuahuet oñ.

⁸ Allempoña o' e'chorraresuetpa' Jesúsña' atet oterraneterr:

—Te'ñapa' o'ch seshe' coñe'tpa' o'ch sanemñ allo'tsen ane'tañ.

Ñetña' atetçho' pet.

⁹ Allempoña ane'tañpa' allenta amllan oñ ñeñt a'pnasaret vinos ñaña'pa' ama eñoche errotte' o' huapatetña vinos. Aña eñotene' ñeñt sherbenahuet all ñeñt etasote' oñ. Allempoña amlla'huan vinospa' ñaña'pa' allenta agotan ñeñt sena'tetsa.

¹⁰ Ñeñtpa' atet och:

—Ñerra'm cho yorrrpa' añcha'ña ñanom yorrtat ñeñt e'ñe cohuen vinos. O'chña yonuahue ahua'ñare' e'ñe cohuen vinospa' allempochña yapanet ñaña ñeñt ama e'ñe cohue-nayaye. Tarraña ñaña'pa' amaña atteye' pepeno. Ñeñtpa' cha'tña ñaña'tuaña vinos ñeñt e'ñe cohuen tayaño' porrtach. (Ane'tañña'pa' atet otan ñeñt sena'tetsa tarro'mar ñapa' ama eñoteñe.)

¹¹ All ñanom entatanet Jesús po'partsoñapa' ñeñtpa' arr Cano allara Galileo. Atfoca'yeña orrtatanetña Jesús po'partsoteña. Allempoña pueyochresha'pa' o' eñoche po'ñoche'pa't ñapa' Parets atfoña e'ñe ame'ñyet.

¹² Allempoña Jesús'pa' ahua' Capernaumo pachore'na ñaña pa'mo'nasheñechno, ñaña allohuen pueyochresha'. Allña'pa' alla allponmateneta'.

Atto Jesús'pa' a'cohuentatosan Parets pa'paquëll
(Mt. 21.12-13; Mr. 11.15-18; Lc. 19.45-46)

¹³ Allempoña chapmoch pascuapo allempoch alla cosher-rer judionesha'. Jesúsña'pa' ahuer Jerusalem.

¹⁴ Allña Parets pa'paclopa' entuenan ñeñt pomuene' po'huacsher, ñaña carrnero, ñaña yeþ; ñaña ñeñt canya'yenahuet po'çllayoretpa' ñetpa'cho'ña alla anorrchenet.

¹⁵ Allña'pa' pellta'tosan apech pashtarech. E'ñe matatu-osan allohuen ñeñt pomatsre'tyetsa Parets pa'paclo, e'ñe ahuanerret po'huacsher ñaña po'carrneroret. Ñaña ñeñt canya'yenahuet po'çllayoretpa' e'ñe yo'patsetam'pesuosanet po'çllayoret patso. E'ñe a'coye'tam'pesuosanet all na'yenet po'çllayoret.

¹⁶ Allpa' atet otosan ñeñt pomuene' yeþ:

—Te'pa' sahaner añ arro. Amach atet sepatstono Nompor pa'paquëll atet ñerra'mrrate' ñeñt e'ñe pocollenochaya allecma pomatsre'tyenet.

¹⁷ Allempoña pueyochresha'pa' allenta yerpuet ñoñets ñeñt anaret ahuatoteñ ñocop, ñeñtpa' atet oten: “Napa' atarrcha' nempa'tonaþ pepaquëll ama'tcha' ñeño'mare'na muetserr-netañ.”

¹⁸ Allempoña judionesha' pa'm'cha'tareternesha'pa' atet ochet:

—Añña porrtatosnay peparatsoña allochñapa' attochña yeñotaḗ po'ñoçhpa' ḗapa' allsensareteḗte', te'ñapa' atto' peḗosnayte' añeçhno.

¹⁹ Jesúsñapa' atet oterraneterr:

—Sapa' ama'tcha' sa'matoñ añ Parets pa'paquëllpa' poma'pamtañoña napa' o'ch alla naḗomater.

²⁰ Judionesha'ñapa' alla otereterr:

—Añ atto e'nuoñet Parets pa'paquëllpa' atarr atomat atorrareḗta e'ñe pa'tatsoch çharrohua char puechena pechap. Ta', ḗaña'pa' çpo'ñoçhcha' e'ñeçh poma'pamtañoçma yeḗpa' o'ch alla ḗatomatuer?

²¹ Ñehua, Jesúsapa' añeḗa't otanet ña po'çhets ñeñḗeḗa't pa'paquëll pen Parets.

²² Ñehua, çhap allempo muetseret Jesús allempoña tanterrapa' pueyochreshaçhnoña'pa' allenta yerpuerret ñeñḗ atet ote't Jesús allempo. Ñeñḗo'marña allempo Jesús pueyochreshaçhnopa' atarr yemterrñañet Yompor po'ñoñ ñeñḗ anuaret ahuatoteñ, ama't ñaña Jesús po'ñoñ atarr ame'ñeret.

Jesúsapa' e'ñe eñotueney allohueney ñeñḗ atet yocḗape'chyen yeyoçhro

²³ Allempoña allo'tsen Jesús Jerusaléño, all coshapretenet pascuapo shonte' acheñenesha' enteññañet ñeñḗ atto orrtatenanet po'partsoña all, ñeñḗo'marña allpa' shonte' ame'ñaya.

²⁴ Tarraña Jesúsapa' ama yemtanete'te ñet, tarro'mar ñapa' eñotanete't atet allohueney acheñey çhocma yocḗape'chyen ñeñḗ yemnen ya.

²⁵ Ñapa' ama e'nenano ama't puesheñarra ñeñḗcha' ote' ñeñḗ atet yocḗape'chyen allohueney acheñey. Tarro'mar ñapa' çhocma eñoteney atet yocḗape'chyen allohueney acheñey.

3

Allempo Nicodemopa' huapa Jesúsesho

¹ Allempopa' eñall puesheñarr yacma ñeñḗ fariseo ñeñḗ soçheta Nicodemo. Ñeñḗña'pa' puesheñarr ñeñḗ añcha'tarettetsa judioneshacop.

² Ñaña'pa' huapa Jesúsesho tsapopa' atet otos:

—Maestrocha' yeñoteneḗ ḗapa' añ pellsensene' Yompor attoch peyçhatosey cohuen tarro'mar yapa' yeñoteñ añach orrtatyene' partsoteñets ñeñḗ ahuamencat pen Yompor.

³ Jesúsñapa' atet otaḗ:

—E'ñe po'ñoçh notapḗ, esesha'ch ama eñalleterrtso ello ñetña'pa' amach errotenot pueyochresha' perraneto Yompor.

⁴ Nicodemoña'pa' atet otererr:

—Amate' errotenot ye'ñalletterroña po'pocheñoña o'ca'ye yepo'nme'ten. Errotenotuate'ñaca'yecherrerrña yachor pa'to atotcha' ye'ñalletterr po'pocheño.

⁵ Jesúsñapa' atet otererr:

—E'ñe po'ñoçh noteneþ, erra'tsencha' ama eñallettertso oñoñ ñaña Yompor Puecamquëñoñ, amate' errotenot pueyochresha' perraneto Yompor ñeñto'marña amach eshec o'patapreteretoña Yompor po'cohuenña ñeñt atto ayochreshattena ña.

⁶ Ñeñt atto eñalletena arromñañenesha'pa' ñeñtpa' arromñaña. Tarraña ñeñtcha' eñallettertsa Parets Puecamquëñoñ, ñeñtpa' ñeñtña camuecñetsotets ñeñtñapa' ama arromñañeshayaye.

⁷ Ñeñt atet noteneþ, “allohuenespa' añ sepalltena o'ch se'ñalletterr ello”, ðapa' amach cha pe'charrtatsto peyoçhro, amach cha þotatsto año'te' errotenot pe'ñalletterroña ello po'pocheño.

⁸ Ñeñtpa' e'ñe atet pena ñerra'mrrate' mör. Morrpa' erra muene'pa' allcha' möraren. Pe'muente' atet ma'moreten, ama peñoteñe errotte'ña huena ñaña errate'ña sen. Atetcha' perra ñaña allohuen erra'tsencha' eñallettertsa Yompor Puecamquëñoñ.

⁹ Nicodemoña' alla a'þto'tererr:

—Ñeñtpa' ¿errotena'tña añ?

¹⁰ Jesúsñapa' atet otererr:

—Papa' ama't añepeñ israelnesha' po'maestror, ama't peñotenoña añ.

¹¹ E'ñe po'ñoçh noteneþ: Allohueney ya ñeñt yeñotenpa' ñeñtcha'ña yeserrpare'ten ñaña ñeñt yentyenpa' ñeñtcha'ña ya'poten tarraña sapa' ama çhennasoña seyoçhro añ ñeñt ya'poten.

¹² Ñerra'm aña notenes ñeñt atet yeyçhena añe patsro, saña ñerra'm ama same'ñennopa' errotenotuate'ñaca'ye notasña ñaña ento'mar ñeñt Yomporecop.

¹³ 'Ama eñalle ama't puesheñarra ñeñtcha' a'tapuets ento ñaña ñeñtcha' sohuerrtsa ñeñtara entot. Napña na Ñeñten Acheñetosets ñeñten sohuatsa entot, napña nentar Nompor pue'ntaño tarro'mar napa' ñeñt na'netser nepen.

¹⁴ Ñehua, ahuat Moiséspa' yechcatan ñeñt atma'ntataret shecheþ all amayo, ñeñtñapa' huanquë' tsachopa' o' echantamþes enoneþ. Atto Moisés echantamþsan shecheþ all amayopa', napa'çho'ña ñeñt poctetsa nocop atetcha' pernet naña, corsoçotcha' echantamþsaren.

15 Allochñapa' allohuen ama't erra'tsena ñeñtcha' name'ñerraya na, ñetñapa' amach chenquërreto, e'ñech corretseta pocsheñeshocmañen e'ñe tayoteñ errponañohuen.

Atto atarr morrentenya Yompor allohueney acheñeneshay

16 'Atto atarr morrentenya Yompor allohueney acheñeneshay arr patsro ñeñto'marña apuey Puechemer ñeñt po'patrorr pen, allochñapa' allohuen ñerra'm esesha' ame'ñerraya ña amach chenquërreto, ñetñapa' corretsetach pocsheñeshocmañen e'ñe tayoteñ errponañohuen.

17 Yomporpa' amaca'ye añecpaye' mueñanoña Puechemer arr patsro attoch mueñosan acheñenesha' coñcheñtso. Ñapa' añecopña mueñe attoch ñach a'queshpátose'ña acheñenesha' arr patsro.

18 'Erra'tsencha' ame'ñerraya ña ñetñapa' amach amñareñterreto coñcheñtso. Tarraña ñeñtcha' ama ame'ñerrayo ñocpuetñapa' anarettet attoch amñareñterret coñcheñtso tarro'mar ñetpa' ama ame'ñoñeto Yompor Puechemer ñeñt po'patrorr pen.

19 Ñañaapa' o' huapa arr patsro attoch yeçhatosey ñeñt e'ñe cohuen enten Yompor, attoña a'puetarsam̄psosnay yocpañña. Tarraña shonte' acheñenesha' ñetñapa' ama mueneto o'ch a'puetarsam̄psarettet poçtapñet. Ñetpa' añña muenenet checmete' tarro'mar amaca'ye masosyaye' cotape'chyeneto. Ñeñto'marña ñetpa' attotcha'ña amñareñterret coñcheñtso.

20 Allohuen ñeñt ama masosyaye' cotape'chyeneto ñetpa' ama cohuenaye' enteñetoña Cristo ñeñt a'puetarsam̄pene' allohueney yocpañña. Ñeñto'marña ama eneto allo'tsen ñeñt a'puetarsam̄psañtetsa taye'to'te' orrtatarettet poçtapñet ñeñt ama masosyo.

21 Añña ñeñt e'ñe atet pene' ñeñt po'ñoçh cohuen enten Yompor, ñetpa' e'ñe pocte' enteñet o'ch onet allo'tsen ñeñt a'puetarsam̄psañtetsa tarro'mar ñetpa' añ muenenet o'ch eñotateret po'potantañ ñetpa' Yompor ahuamencañ penahuet ñeñto'marña ñetpa' añ orrtatyenet ñeñt cohuen enten Yompor.

Allempo Juan ñeñt apatañtetsa Yomporecop, ñapa' alla cohuentaterranerr Jesús

22 Allempoña Jesúsapa' ahuerrerr Judeo epuet pueyochresha'. Allñapa' alla allponmat epuet pueyochresha'. Allña Jesúsapa' apatyesan acheñenesha' Yomporecop.

23 Ñaña allempo Juanpa'çho'ña arr apatyenan acheñenesha' all oteñet Enón e'ñe alla allame'tets Salimo, tarro'mar allpa' shonte' oñeçhno. Acheñenesha'pa'çho'ña shonte' huaçha'tyeset attoch apataretetyeset Yomporecop.

24 Ñehua, allempopa' ama yottanñpeñeta' Juan.

25 Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' poctetsaña attoch ya'cohuentataretta Partsocop, añte' ñeñt atto apatyen Juan amapa' ñato' añte' atto apatyen Jesús.

26 Ñeñto'marña ahuanmuet Juaneshopa' ñetñapa' atet ototet:

—Maestrocha' ñeñt epaḥ ahuaña yonñta'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

27 Juanñapa' atet otapanet:

—Ama't puesheñarrotēyapa' ama ahuamencateyayye ñerra'm ama Yompor ahuamencat yeḡaye.

28 Sapa' ama't señoteñe ñeñt atet notuanmas ahuaña, napa' ama añeyayno ñeñtencha' Cristoterrets. Napa' atta mueñan nanom attoch nota.

29 Jesús'pa' e'ñech atet netma'ntacha atet ñerra'mrrate' yacma ñeñt sena'tetsa. Ñehua, ñeñt sena'tetsa ñeñtñaca'yeña aguēne'ña coyanesha' ñeñtcha' puetapor ḡa'. Tarraña ñeñtña pueyempa' ñeñt parro epuet ten ñerra'm añ e'm pueyem po'ñoñ ñeñt sena'tetsapa' ñaña'pa' atarrcha' coshapretana pueyem. Ñeñto'marña na te'pa' atarr nocshapreteña Jesús.

30 Jesús'pa' e'ñe pocte' allo'nepa'ñaca'yeña enteñet po'ñoḥpa' ñaca'yeña atarr sherbets. Nañapa' e'ñe pocte' allo'nepa'ña entennet napa' ama e'ñeye' nesherbena. Arrpa' allohua atet ot Juan Cristocop.

Atto yeñoteñ ñeñt huetsa entot Yomporeshot ñeñtca'yeña atarr sherbets

31 Ñehua, yeñoteñ ñeñt huetsa entot Yomporeshot eñchetepa' ñapa' atarrca'ye añcha'taret. Tarraña ñeñt patso'marnesha' ñeñt'pa' alla eñorena patso'mar. Ñeñt huetsa entot Yomporeshot eñchetepa' ñapa' atarrca'ye añcha'taret.

32 Tarro'mar allohuen ñeñt entyen Pomporesho ñaña ñeñt allpon e'myen all, ñapa' ñeñtca'yeña serrpare'tateney, tarraña ama't puesheñarrotēyapa' ama eseshaye' ḥapahuetoña pueyochreto ñeñt atet otenanet.

33 Ñeñt ḥapa pueyochro ñeñt atet serrpare'tatenanet ñeñt huapatsa Yomporeshot ñetñapa' atet otet: Yomporpa' e'ñete' po'ñoḥ atet oten Puechemerecop.

34 Tarro'mar ñeñt llesensa' Yomporpa' Yomporo po'ñoño eñorena tarro'mar Yomporpa' ama atparetayaya chorratanetoña Puecamquēñ.

³⁵ Yomporpa' atarrca'ye nanac muerenanaña Puechemer. Ñeñto'marña aphuahueñ allohuen allpon eñall allochñapa' ñach pomnaren penahuet.

³⁶ Esesha'ch ame'ñenaya Yompor Puechemer ñetpa' corretsetach pocsheñeshocmañen tayoteñ ama't errponañohuen. Añña ñeñt atpare'tene' Yompor Puechemer ñetpa' amach enterreto ñeñt correñtsor. Ñetñapa' chachca'ye coñchaterranet Yompor.

4

Allempo Jesús'pa' serrpare't epuet coyanesha' samario'marnesha'

¹⁻³ Allempoña Jesús'pa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporcop. Ñehua, ama ñaye' apatenahueto, aña apatenahueto pueyochresha'. Ñeñto'marña allempo e'mare'ch fariseonesha' ñeñtara judionesha' pa'mñcha'tareternesha'. Jesúsña allempo eñoch atto fariseonesha' o' eñochet ña atarr nanac ayochreshatta, ñaña'pa' allenta quechpa'nerran Judea, o' alla ahuerr Galileo.

⁴ Toññapa' e'ñe arr oñen Samario'mar, ñeñto'marña all oñerrña Jesús.

⁵ O'ña chap Samariopa' allotñapa' o' ahuen paterr anetso ñeñt'pa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeñt apa'nman puechemer José ahuat.

⁶ Allñapa' all poten oñ ñeñt po'ñeñ pe't Jacob. Jesúsñapa' nanac tsanom puechope'cheñoñ ñeñto'marña anorros e'ñe allame'tets apco'sato. Allempopa' e'ñe pocto'tsen atsne'.

⁷⁻⁸ Allñapa' machayota huapa puesheñarr coyanesha' ñeñt samario'marnesha' ñeñtcha' etenaya' oñ. Jesúsñapa' atet otaḗ:

—Napa' nemneñ o'ch ḗaposen oñ.

Ñehua, allempopa' pueyochrenesha'ñapa' o' ahuanmuet anetso o'ch rañteneta' ñeñtcha' rret.

⁹ Coyanesha'ña samario'marnesha'pa' atet otos:

—Papa' judioneshaḗpa' eso'mare'tcha'ña penamapuenña oñ o'ch napaḗ. Papa' peñotenen napa' ñeñten samario'marneshan.

(Ñeñto'marña atet otos tarro'mar judionesha'pa' ama amo'tstanneneto epuet samario'marnesha'.)

¹⁰ Jesúsñapa' atet otererr:

—Ñerra'm peñoteñeñ ñeñt e'ñe atta apueney Yompor, ñaña ñerra'm peñotenoñ na ñeñten ḗotene' ḗapuen oñ, ḗapa' o'ch

penamuennoñ na nañapa' o'ch napospeñ oñ cohuen alloch e'ñe p̄ocrañ.

Ñeñt̄ oteñ o'ch aḡ cohuen oñ, añ oteñ Yompor po'cohuenña, tarraña coyanesha'ñapa' ama eñoche,

¹¹ ñeñto'marña atet̄ otererr:

—Ama Ayochreshate pecheno alloch pet oñ. Oñpa' nanacramtso o'pono'tsen. Errotuamtsoch peyoraña oñ ñeñt̄ e'ñe cohuen alloch e'ñe yocra.

¹² Ahuat̄ yatañ Jacoboñ ñeñt̄ yapa'nmue' añ oñ ñapa' ñeñt̄ orre't̄ ñaña puechemerneshañ ñaña po'hucsherneshañ. Papa' añeḡhuate'ca'ye ñeñteḡ ello metanene' yatañ Jacoboñ atto añcha'tarette't̄ ña.

¹³ Jesúsñapa' atet̄ otererr:

—Allohuen ñeñt̄ orrene' añ oñpa' elloch alla oñpa'terreterr.

¹⁴ Tarraña ñerra'm esesha' orre' oñ ñeñt̄cha' napanet na ama't ahuaḡapa' amach oñpa'terreto. Ñeñt̄cha' napanet na oñ, e'ñe pueyočhretopa' puenasanetcha' atet̄ ñerra'mrrate' allot̄ poten oñ, amach huañerro ama't ahuaḡa. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeñteḡñapa' Ayochreshate ḡapuen ñeñt̄ oñer allochñapa' amach alla no'ñpa'terro allochñapa' amach alla nohuerre'te eterrayerr arr oñ.

¹⁶ Jesúsñapa' atet̄ otererr:

—Te'pa' orrerreḡ, o'ch peçhore'tera' perrollar, allempochña alla pehuerra arr.

¹⁷ Coyanesha'ñapa' atet̄ otererr:

—Napa' amarramtso arrollareteno.

Jesúsñapa' atet̄ otererr:

—E'ñe po'ñočh atet̄ ḡoten año' arrollareḡeyaype.

¹⁸ Tarro'mar amnarsheña perrollareshe'mañ ñeñt̄ puey-oruareḡ. Ñaña ñeñt̄ peyorene' te'pa'çho'ña ama perrollareyaye. Ñeñt̄pa' e'ñe po'ñočh atet̄ ḡoten.

¹⁹ Allempoña e'man atet̄ oteñpa' coyanesha'ñapa' atet̄ otererr:

—Ayochreshate, te'ña po'ñočhpa' o' neñotaḡ ḡapa' añeḡepa't̄ ñeñteḡ a'ñtene' Yepapar po'ñoñ.

²⁰ Yatañneshañ samario'marnesha'pa' ñetpa' concorpuete't̄ ma'yochatset arr añ aspen'tero. Tarraña sa ñeñtes judioneshaspa' sapa' čha soten aña paterr poctetsa Jerusaléño'chña yeconcorpuena' allohueney.

²¹ Jesúsñapa' alla otererr:

—Nočheshacha' ḡame'ñona ñeñt̄ atet̄ noteneḡ tarro'mar te'pa' o' çhap ñerra'm esempoch sema'yocheña Yompor, ama

sepallteno o'ch seconcorpueña Apa añ aspentero ama't ñaña Jerusaléño.

²² Saña ñeñtes samario'marneshas aña semchatse'tyen ñeñt ama señoteno. Yaña ñeñtey judioneshay añ yeconcorpana'tena ñeñt e'ñe po'ñoç yeñoten, tarro'mar judionesha'pa' ñetpa' o' orrtateret ñeñtcha' a'queshpatañtertsa.

²³ Tarro'mar te'pa' o' çhap ñeñtcha' e'ñe po'ñoç aye'choçhtaterre' Yompor, arrcha'ca'ye aye'choçhtatoñet e'ñe ñet pueyoçhreto. Ñeñtcha' atet aye'choçhtaterrñañet ñeñtña e'ñe po'ñoç atet muenen Yompor.

²⁴ Yompor Paretspa' ñapa' ña camuecñetsotets amaca'ye entpahuoyaye. Ñeñto'marña ñeñtcha' e'ñe po'ñoç aye'choçhtaterre' ña, arrcha'ca'ye aye'choçhtatoñet e'ñe ñet pueyoçhreto, ñeñtpa'cho'ña amaca'ye entpahuoyaye. Tarro'mar ñeñtcha' atet aye'choçhtaterrñañet ñeñtña po'ñoç atet muenen Yompor.

²⁵ Coyanesha'ñapa' alla otererr:

—Napa' neñoteñ añ Mesíaspa' huapach ñeñtara ñeñt yoten Cristo. Ñerra'm ña huapatsapa' e'ñech serrpare'tatuerrey ora allohuen ñeñt esocmañen eñall.

²⁶ Jesúsñapa' alla otererr:

—Napa' naca'ye ñeñten peserrpare'tatene'.

²⁷ E'ñe allempo atet otenpa' pueyochresha'ñapa' huaçherret. Ñetñapa' atta cohuanrroretueret all serrpare'tatenan coyanesha'. Tarraña ñetpa' ama't puesheñarroçapa' ama eseshaye' otuerraye ¿eso'tña pemnen? Ama't puesheñarroçetapa' ama otuereto ¿eso'mare't peserrparenña epaḥ coyanesha'?

²⁸ Coyanesha'ñapa' alla na'nerran porretpa' o' ahuer all pa'netsro. Allñapa' otuerran pamo'tsesha':

²⁹ —Te'pa' socterren o'ch senteña' puesheñarr encanesha' ñeñt o' serrpare'tatuosen ora allpon ñeñt atet nepa'yesara. Ñato' ñeñte'ña Cristotets ñeñt atarr yecuen o'ch huapa.

³⁰ Ñetñapa' allenta onaçha'tet anetsotpa' o' ahuanmuet Jesúsesho.

³¹ Allempo ama çhaçheneta' ñesho pueyochresha'ñapa' atet otyeñet:

—Maestro ma'mate'tach rreñets.

³² Tarraña ñapa' atet otanet:

—Napa' nechenca'ye ñeñt nerrar nepen ñeñtña sapa' amaca'ye señoteñe.

³³ Pueyochresha'ñapa' atet otanna'tyeset:

—Amate' esesha' huapatoyeña puerrar.

³⁴ Jesúsñapa' alla otarraneterr:

—Añca'yeña nerrar nepen o'ch neña atet muenen Nomporeññ nellsensene', tarro'mar ñeñtpa' attochña e'ñe netsotuoñ po'taruas.

³⁵ Ama't sotenña sa: "Palltenmeñ pa'tatsmā arorr o'ch e'ñe ya'yapa'cha'hua yenarem." Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeññ onachets, o'ca'ye chap allempoch ame'ñerrnet. Te' ñetpa' e'ñeca'ye atet nentenamet ñerra'm yenarempa' o' pomella'huen o'ca'ye chap allempoch yap'cha'hue.

³⁶ Ñeññ ap'chets nocop ñeñtpa' atsa'tarettetcha' ñeññcha'ña atarr coshaterrahuet. Ñaña allohuen ñeññ ame'ñatenet ñetñapa' napanetcha' alloch e'ñe correrret tayoteñ ama't erponañohuen. Ñeñto'marña añ ñeññ nare'tets ñaña ñeññ ap'chets nocoppa' e'ñech parrocmā coshapretannenet, ama't ñeññ ñanom epatue' neñoñ ñaña ñeññcha' torratta chenta' ñeññ nocop.

³⁷ Tarro'mar ñeñtpa' e'ñe po'ño'ch atet yepena ñeññ atet oten añ ñoñets ñeññ chocma yotanna'tyena ya: "Puesheñarrpa' o'ch nare'tatse'tyes, po'psheñeñña' ñeññcha' ap'cha'yesets."

³⁸ Ñaña sapa'cho'ña o'ch nemñas samā o'ch same'ñatera acheñenesha' ama't ama sanmaye' ñanom torratto all nocop, po'psheñeñña ñeññ ñanom torrattse't all. Tarraña te'pa' sach ame'ñaterrahuet attoch setorrapretera ñeññ ñanom torrattse't all nocop. Te'pa' sach ap'cherrets all ama't ama saye' nare'tatse'ttse'te all. Ama't po'psheñeñ nare'tatse'ttse't, te'ñapa' sach taruasapreterrahuet all.

³⁹ Coyanesha'pa' e'ñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesús'pa' o' serrpare'tatos ora allpon ñeññ atet puepa'yasara.

⁴⁰ Ñeñto'marña samario'marnesha' allempo hua'cha'tet ñeshopa' atarr nanac a'patare'tapet Jesús a'posanetepa'to' all pa'netsreto. Ñaña'pa' e'ñe epomta a'posa all.

⁴¹ Po'potantañe'chnopa' shonte' ñeññ ame'ñapaya atto serrpare'tatosanet Jesús all pa'netsreto.

⁴² Ñetñapa' atet oteñet coyanesha':

—Te'ñapa' ama e'ñe pa' peñoño'teye' yame'ñeno. Te'pa' e'ñe ya e'muene' yamā allohueney. Ñeñto'marña te' yapa' o' yeño'ch po'ño'ch ñapa' ñach ya'queshpaterre' allohueney ñeññey añe patsro'tseney.

Puesheñarr yacma ñeññ sherbene' am'cha'tare't ñeññña puechemer a'crraterrña Jesús

⁴³ Allempoña epomta'muen Samario Jesús'ñapa' o' alla ahuen Galileo all pa'ney peñ ña.

44 Tarro'mar e'ñe po'ñoçh atet eñorena Jesús ñocop, ñeñtpa' atet ot: Ñeñña a'mítene' Yompor po'ñoñ pa'nyo'marnesha'ñapa' ama't mameshapa' ama mecha'na'teñeto.

45 Allempoña çherrerr Jesús Galileo allohuenña galileo'marnesha'pa' e'ñe cohuen agapapueñet tarro'mar ñetpa' e'ñe entuoñet allohuen ñeñt atet pa'yesos Jerusaléño allempo entapreteneta' pascua all. Ñetpa'çho'ña allempopa' all ahuanmuet ñamet o'ch entapreteneta' pascua.

46 Jesúsñapa' alla ahuererr po'pocheño Cano e'ñe allara Galileo all e'ñe ñanem a'pnasenana' oñ vinos. Allña'pa' allo'tsen puesheñarr ñeñt sherbene' añcha'taret. Ñaña puechemerpa' cha atsna'ten all anetso Capernaumo.

47 Allempoña e'mare'tan Jesús o' huapa Judeot o' çhenerr Galileo, ñaña'pa' allenta ahuo' o'ch enteña' attoch oteña' coterepa' pa'paclo attoch a'crraterrñaña' puechemer, o' rromamoch.

48 Jesúsñapa' atet och:

—Ñerra'm ama nentatasñe nepartsoña ñaña ñeñt ama sentarepa' amate' same'ñennañe.

49 Ñeñña sherbene' añcha'taretpa' o' alla otererr:

—O'ch Ayochreshate poçterren tayepa'tña'pa' ama rromuena' nacñe'ter.

50 Jesúsñapa' atet otererr:

—Te'pa' ahuerreþ, pechemerpa' o'ca'ye alla correrra.

Yacmañapa' e'ñe ame'ñana Jesús po'ñoñ ñeñt atet och, ñaña'pa' allenta ahuer.

51 Allempoña ahuen toñoñapa' poçtenan pueñañresha'. Ñetña'pa' atet otapueñet:

—Pacñe'terpa' o'ca'ye correna.

52 Ñaña'pa' allenta otapanet:

—¿Esempo'tña pasateñ?

Ñetña'pa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

53 Allempoña pomporpa' o' yerepya ñaña'pa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñña ame'ñate' ama't ñaña allohuen pamo'tsesha' ñeñt parro pa'paclo'tsa'yenet e'ñe ame'ña'huet ñamet.

54 Arrpa' atto puepocheño Jesús'pa' entatanet po'partsoña allempo huapa Judeot o' alla çherrerr Galileo.

5

Atto Jesús'pa' a'crraterran puesheñarr atsnañe't all Betesdaso

1 Allempoña o' alla çherrerr allempoch alla cosherrerr allohuen judionesha' ñeñt atet anaretet ñocpuet. Jesúsñapa' alla ahurrerr ñaña Jerusaléno.

2 All Jerusaléno e'ñe allame'tets allotecma a'be'teñet carrnero allñapa' allo'tsen oñ apco'sattaret ñeñt sochen hebreonesha' po'ñoño Betesda. Ñeñtñapa' eñall amnar puecha'petar.

3 Allña puecha'petarotpa' shonte' atsnañeñnesha' ñeñt pena'rrartetsa all —ñeñt aporo'yeteçhno ñaña ñeñt che'ca'repaçhno ñaña ñeñt echarretyetsa. Ñetñapa' añ cohuenet ñerra'm esempoch pelle'llchena oñ.

4 Tarro'mar ñerra'm esempoch pelle'llchena ñeñt oñerpa' mellañoño'ch sohuetsa all o'ch pelle'llchatosan oñ. Ñerra'm esesha' ñanom esha'totsa all oño allempo pelle'llchena ñeñtña atsnañeñterpa' acrrerroyo'ch, ama't erra'tsena atsnañtsor rromuenahuat.

5 Allñapa' allo'tsen puesheñarr yacma ñeñt ma'poch çharra' puechena posoc char atsna'ten.

6 Allempoña entos Jesús alla ñanena ñaña' eñotos shonte' char atsna'ten ñeñto'marña atet otos:

—¿Ama't pemno o'ch pocrerra?

7 Atsnañeñtñapa' atet otan Jesús:

—Amaca'ye Ayochreshate eñalle ñeñtcha' nesha'te' oño allempo pelle'llchena. Napa' o'ch taya ahuen po'psheñeññapa' ahuo'tcha' esha'tosa ñanom.

8 Jesúsñapa' atet otererr:

—Te'pa' o'ch notosep: Petantena, pechta'nen allo pemuen, pechope'chen tayecma.

9 Yacmañapa' allorocmuepa'tcha' correna, ñaña' allenta chetenan allo muenpa' allenta chope'chnen. Ñehua, ñeñtña yetropa' allempo amesen judionesha'.

10 Ñeñto'marña judionesha'pa' atet ochet ñeñt o' correna:

—Te' añe yetro allempocma yamesen. Amaca'ye pocteyaye o'ch ñanen pemue'.

11 Tarraña ñapa' atet otanet:

—Ñeñt o' a'crratosenpa' atetca' otosen: “Pechta'nen pemue'pa' pechope'chnen.”

12 Ñetñapa' allenta a'pto'chet:

—¿Esesha'tña potoseña, “O'ch pechta'nen pemue'pa' o'ch pechope'chen”?

13 Tarraña ñeñt a'crratere'terrtsapa' ama eñoteñe esesha'te'ña a'crraterre' tarro'mar Jesúsapa' ama allo'tsenaro, ñapa' o' ahurr a'nahua, tarro'mar all shontosa acheñenesha' ñeñtcha' entenaya'.

14 O'ña atarr o'chetpa' Jesúsñapa' alla enterran ñeñt' a'crraterr ñorra' e'ñe alla Parets pa'paclo. Allñapa' atet oter:

—Te'pa' o' pocrerra. Te'ñapa' amach alla p'o'chña'tatsterrerro ñato'rraña alla nanac pemueroçtterrerr.

15 Yacmañapa' o' ahuerr, atet otuerran judionesha':

—Jesúsepa'tca'yeña ñeñt' na'crraterre'.

16 Atet pena Jesús aña yetro allempo amesen judionesha' ñeñto'marña ñetpa' o'pateñet Jesús.

17 Jesúsñapa' atet otanet:

—Nompör e'ñe teme'ttsen atarr torrena ñeñto'marña napa'cho'ña atarr nemneñ o'ch neorra naña.

18 Ñeñto'marña judionesha' pa'm'cha'tareternesha'pa' ello atarr nanac o'pateñet o'ch muetset, tarro'mar ñetpa' atet otye-set:

—Ñapa' ama ñap'faye' aña yeter o' puesuero allempocma yamesen, ñapa' aña'naña oten e'ño' Pompör penan Parets, ñapa' affaca'ye mueneñ o'ch Partsocoptartena.

Atto atarr ahuamencattena Jesús ñeñt' Yompor Puechemer

19 Jesúsñapa' atet oterraneterr:

—E'ñe po'ñoçh notenes, na ñeñten Puechemer pen Yompor amate' errotent' es neñoña e'ñe nota. Napa' añña atet neña'yen atet nenteññañ Apa, tarro'mar ñeñt' atet pen Apapa' napa'cho'ña ñeñten Puechemerenpa' atetcha' es neña'yen naña.

20 Apapa' atarr muerenna tarro'mar napa' e'ñeca'ye po'ñoçh Puechemeren, ñeñto'marña gatyenen ora allohuen ñeñt' atet pa'yen ña. Elloña ñapa' añ gatyenen ñeñt' nanac torrapotyets ñeñt' atet etsotayen ña; ñeñtpa' añecop atet pennan attoña sapa' atarrcha' secuanrrortenen.

21 Ñehua, yeñoteñ Apapa' tantaterran arromñañenesha'pa' apuerranet allochña ñetpa' corretsetach. Napa'cho'ña e'ñeca'ye atet nepenaña naña ñeñten Puechemeren. Ñerra'm erra'tsencha' nemna' na o'ch napanet allochña ñetpa' corretsetach atetcha'ca'ye napuerranet.

22 Apapa' ama't puesheñarrapa' amach a'metanperraneto errotentcha' entyesuerranet. Naña apuen llesens ñeñten Puechemeren nachña a'metanperrahuet errotentcha' nentyesuerranet e'ñe puesheña'ttset.

23 Allochñapa' attochña allohuenet mecha'na'tennetcha' naña ñeñten Puechemeren e'ñe atet mecha'na'tennanet Nompör Parets. Ñerra'm esesha' ama nen'cha'na'tenaye na ñeñten Puechemeren, Nompore'naca'yeña ama mecha'na'teneto ñeñt' nellensene'.

24 'Napa' e'ñe po'ñoçh atet notenes: Ñerra'm esesha' e'mñote' neñoñ ñaña ñerra'm yemterrnanet Nompör ñeñt'

nellsensene' ñetñapa' corretsetach pocsheñeshocmañen tayoteñ errponañohuen. Amach a'coñchatareñterreto ama't errponaña. Tarro'marña ñetpa' o' metanerretña ñeñt e'ñe po'ñoçh rromueñets, o' çherret allña ñetpa' corretsetach tayoten errponañohuen.

²⁵ E'ñe po'ñoçh o'ch noterrser: O' çherrmoch allempoch atet perra, ñeñt arromñañenesha'pa' ñetñapa' e'muerrnanetcha' neñoñ ñeñten Yompor Puechemeren. Ñeñtcha' e'mñoterre' na neñoñ ñetñapa' corretsetach.

²⁶ Ñehua, Apapa' e'ñe ñoña correna, ña napuene'ña attoch napa'çho'ña corretsanach naña ñeñten Puechemeren.

²⁷ Ñaña ña napuene'ña llesens attoch nemñe patanta'tets acheñenesha' coñcheñtso, po'potantañña' amach nemñerraneto coñcheñtso. Atetca'ye allsensareñña na Ñeñten e'ñe Acheñetosets.

²⁸ Ñeñt atet o' notuaspa' amach çha semoññe'tatsche tarro'mar esempopa' çherrcha' ama't ñeñt puepam-pro'tsa'yenpa' e'muerrnanetcha' neñoñ.

²⁹ Cha'nmaçherretcha' allot apamparettete't. Ñeñt atet pa'yesaye't e'ñe cohuen ñeñt poctetsa ñetñapa' añecopcha' tanterret attoch ello alla correrret. Ñeñña pa'yesaye't ñeñt ama pocteyaye ñetñapa' añecpach tanterret attoch ello alla amñareñterret coñcheñtso.

Atto Jesús eñotatanet ñapa' Yomporeshot aparetta llesens

³⁰ 'Amate' errotenot es nepa'yesoña e'ñe nota. Atet eñotatenen Nomporpa' attochña nemñe patanta'tets acheñenesha' coñcheñtso, po'potantañña' amach. Ñaña errotencha' nentyesuerranetpa' ñeñtpa' e'ñe pocte' tarro'mar ama e'ñe na nemnenñoteye' es nepa'yeno. Nomporña puenenñot es nepa'yen tarro'mar ña nellsensene'.

³¹ Ñerra'm e'ñe nañeña a'potetsa, ñeñt atto na'potenapa' amate' es sherbeno.

³² Eñallña po'psheñeñ ñeñt e'ñe no Nompor ñeñtña na'potene'ña na. Ñaña neñoteñ ñerra'm ña na'pote'pa' ñeñt atto a'potenen ñeñtña e'ñe po'ñoçh sherbets.

³³ Ñaña sa ahuañmo'chapa' semñe acheñ Juanesho ñeñt a'p'to'tose' nocop. Juanña atto a'potanpa' ñeñtña e'ñe po'ñoçh atet.

³⁴ Napa' ama e'ñe nocpa ne'нено ñeñt na'pote'; añecpa'naña notenes sa ñato' sapa' same'ñoñafe' Juan po'ñoñ atto a'potan na, allochñapa' attoch sequeshperra same'ñeñoñen.

³⁵ Juanpa' e'ñe atet pe't ñerra'mrrate' lampareñ corretsa, attoña çhoyo'te't. Sañapa' sa muenatset' o'ch socshame'ta mame' all a'puetarsañpsas.

36 Tarraña atet na'poten napa' ñeñña nanac sherbets. Ello metanenan ñeñ atet a'potan na Juan. Allohuen es neña'yen ñeñ atet yehenna Apa o'ch e'ñe netsotoñ, añ netsotateña' ñeñña o' eñotatanet napa' Apa nellsensene'.

37 Ñaña Apa ñeñ nellsensene' ñapa'cho'ña ñaca'yeña na'potene'. Sapa' ama't ahuatapa' ama se'maroneña po'ñoñ atet e'morrtena, ñaña ama sentareña atet orrtena ña.

38 Sapa' ama't po'ñoñapa' ama chennasoña seyocho tarro'mar na ñeñten llesensen Apa, sañapa' ama same'ñenno.

39 Sapa' añcha' setorra'yesa Yompor po'ñoñ ñeñ atet anuaret ahuatoteñ tarro'mar sapa' chate' sotenapañ e'ñe ñoñtsochayo'apa' sapa' corretsasate' errponohuañen. Tarraña Yompor po'ñoñ ñeñ anuaret ahuatoteñ ñeñpa' naca'yeña a'pote't.

40 Sañapa' amaña semnoña o'ch same'ñerrna attochña e'ñe socrrerañ.

41 "Tarraña napa' ama aye' ne'nenno attoch aye'chochtatennan acheñenesha'.

42 Tarro'mar napa' neñotenes sapa' ama't mameshapa' ama semorrenteño Yompor ama't seyocho.

43 Napa' atto nohuapa Nomporña nellsensene' tarraña sapa' amaña same'ñenno. Ñerra'm esesha'chña huapatsañ ñeñ e'ñe ñoña huena saña ñeñpa' atarrte' same'ñyañ.

44 Sapa' tarro'marña ama same'ñenno sapa' añaca'ye se'nen o'ch e'ñe sañeña aye'chochtatannetsa, amaca'yeña aye'ña se'nenno attoch e'ñe cohuen entas ñapue't Yompor.

45 Amach soctape'chatsche ñato' nach sottene'cherre' esempohuañen Apuesho. Tarraña eñallca'yeña po'psheñeñ ñeñcha' sottene'cherre' ñeñpa' añca'ye Moisés, sañapa' ñeñña atarr nanac seyemtena.

46 Ñerra'm po'ñoñ same'ñeñañ Moiséspa' napa'cho'ña same'ñennañcha' tarro'mar ñapa' nocopca'ye quellconas.

47 Tarraña ñerra'm ama same'ñeñaña ñeñ atet quellconase't ña, ñeñto'marña napa'cho'ña amach errotenot same'ñoñoña naña neñoñ.

6

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Mr. 6.30-44; Lc. 9.10-17)

1 Allempoña Jesúsapa' ahuo' yom'ta'n sa'p Galileaso, ñeñtara sa'p otenet Tiberias.

2 Allña' cota'neñ shonte' acheñenesha' tarro'mar ñetpa' o' entuoñet po'partsoña atto a'crratyerran allohuen ñeñ at-sna'tyets.

³ O'ña čhap yomta'n Jesúsñapa' ahuos aspeno, allña anorros epuet pueyochresha'.

⁴ Allempopa' o' čhappoch pascuapo allempoch alla coshererr judionesha'.

⁵ Jesúsña cohuatsa a'yopa' entapan shonte' acheñenesha' ñeñt onachets ñeshonef. Allempoñapa' atet otan Felipe:

—Errahuachca' yerañtaña pante' ñeñtcha' rros acheñenesha' ñeñt o' huačha'ta.

⁶ Ñehua, Jesúsapa' e'ñe po'tomña atet ot tarro'mar ñapa' eñoteñ atetcha' pa.

⁷ Felipeñapa' atet och:

—Ama't epoch čharroch čharra' denario* alloch yerañta panpa' ama't pueshmetatollapa' amate' rra'yeseo.

⁸ Pueyochresha'ña Andrés ñeñt pa'mo'nasheñ Simóm Pedropa' ñaña' atet och:

⁹ —Arr puesheñarr huepueshachorpa' echenanca'ye amnar pan ñeñt cebada ñaña epa cac. Attapa' amate' yepataneto, acheñpa' shonte'ca'ye.

¹⁰ Jesúsñapa' atet otanet:

—Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetñapa' anorrcha'tet. Yacmanesha'pa' ñato' amnarochte' mil eñall.

¹¹ Jesúsñapa' chetan panpa' parasyoso'tañpes, allempoñapa' apan pueyochresha'. Pueyochresha'ñapa' epatyaset allohuen acheñenesha' ñeñt anorrchets all. Attecma pa allempo apa'yesanet ñaña cac. Allohuenetpa' e'ñe agaphuahuet ñeñt allpon muena'yeseo.

¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsñapa' atet oterranerr pueyochresha':

—Te'pa' o'ch sa'yapačherr ñeñt shotna'tyets ñeñt sa'pchatyes allochñapa' amach es pertatso.

¹³ Allempoña a'yapačherret ñeñt shota'tatyeseo čhepa'tcha' chorrats čharra' puechena epa cañter ñeñt a'pchatet all rratanet amnar pan cebada.

¹⁴ Atto orrtatanet po'partsoña acheñenesha'ñapa' atet otyeseo:

—Añña po'ñočhpa' ñeñtca'ye a'mtene' Yompor po'ñoñ ñeñt atarr yecuen o'ch huapa aña patsro.

¹⁵ Jesúsñapa' eñotanet ñetpa' añ muenenet o'ch huapoñetpa' o'ch rromoset o'ch noset ñeñtcha' pa'mcha'tareter pet. Ñeñto'marña Jesúsapa' a'nahua ahuer all aspeno e'ñe ñapuef.

* 6:7 Denariopa' quelle ñeñt allpon tsa'tenet pamtarr ñeñt taruaset all pa'nyo.

Atto Jesús pa' e'ñe cohuen chope'chnen enot oño

(Mt. 14.22-27; Mr. 6.45-52)

¹⁶ Allempoña ellerren pueyochrenesha'ñapa' ahuanerret sa'patoño.

¹⁷ A'tacha'tuerret po'noñtopa' o'ch ahuanperret yomta'n, Capernaumet. Allñapa' alla checmetam̄pset. Jesúsñapa' ama huerra' all allo'tsa'yenet.

¹⁸ Allñapa' orrnotam̄pesnomuet, sa'pñapa' cha emo'yarerta.

¹⁹ Ñetñapa' echotnomuet sa'p amnar amapa' pechapte' kilómetro allñapa' machayotepa'tcha' entapet Jesús chope'chnen enot oño. O' allame'ttsa'ña pan noñt. Ñetñapa' chepa'tcha' mecha'tapet.

²⁰ Tarraña ñapa' atet otosanet:

—Naca'ye o' nohuapa, amach atta semcha'tatstapno.

²¹ Ñetñapa' mueneñetañ o'ch agapapet noñtoť, eñotostsetpa' o' chapña noñt yomta'n all sechenet.

Allempo acheñenesha'pa' e'nereta' Jesús

²² Tsapatña acheñenesha' ñeñt alla a'patsa yomta'n ñetpa' eñoteñet e'ñe patrra noñt allo a'tacha't Jesús pueyochresha' ñaña Jesús pa' enteñet amaca' a'tapo noñto epuet pueyochresha' e'ñe ñaptochayeta ahuanmuet.

²³ Tarraña noñtečnoña' chocma huačhena Tiberiasot, o' chapuet allame'tets all rret ellerro pan ñeñt parasyoso'tam̄pes Partsesha' Jesús.

²⁴ Allempoña acheñenesha' ñeñt allo'tsen ñetñapa' o'huañ eñchet Jesús pueyochreshohuen. Ñetpa'cho'ña allenta a'tacha'tet ñamet noñto, ahuanm̄pset Capernaumet, o'ch e'nereta' Jesús.

Jesús pa' ña yocrram̄ yepen yecamquēñecop alloch e'ñe yocrrana

²⁵ Allempoña entoset yomta'npa' atet otoset:

—Maestro, ¿esempo'tña pecherrña pa arrma?

²⁶ Jesúsñapa' atet otapanet:

—Na po'ño'chpa' o'ch notapas, sapa' amaca'ye añecpaye' se'nenno atto o' norrtatonas nepartsaña. Sapa' añecpaca'yeña se'nenen atto o' nerratuas pan o' e'ñe seyetua.

²⁷ Te'pa' o'ch notas, sapa' amach aña sema'yočhratsto yocrram̄ ñeñt e'nuapo'. Añcha'ña sema'yočhra socrram̄ ñeñt ama e'nuapahuoyaye; ñeñña alloch sapa' corretsasach socsheñeshocmañen e'ñe tayoteñ ama't errponañohuen. Ñeñña socrram̄pa' nach sapuerre' Ñeñten Acheñetosets tarro'mar Apapa' o' llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' ye'paña ñeñt cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetñapa' atet otereterr:

—Errotenoñuachca' pegateyña pepartsoña ñeñtcha' yentpa' attocha' yame'ñaña. Papa' esuañaca' petsoten.

³¹ Ya yatañneshañpa' rra'yese't ñeñt maná all amayo atetca'ye anua'ret Yompor po'ñoñ ahua'toteñ: “Rratyesanete't pan ñeñt apanete't Yompor pue'ntañot.”

³² Jesúsñapa' alla oterraneterr:

—E'ñe po'ño'ch o'ch notas: Ama Moisésoye' apahuete'teña pan ñeñt huetsa ento't. Naca'ye Nompor sapuene'ña ñeñt e'ñe po'ño'ch socrrañ sepen. Añ socrrañpa' ento'tña huena.

³³ Naña socrrañ sepen ñeñten o' apuerres Nompor, napa'cho'ña ento't nohuapa Yomporeshot allochñapa' acheñenesha'ña arr patsropa' ñetñapa' corretsetach.

³⁴ Ñetñapa' atet otereterr:

—Ayochreshate yapa'cho'ña chocmach p'apuey ñeñt corramets.

³⁵ Jesúsñapa' alla oterraneterr:

—Napa' na corramtsotets alloch e'ñe socrra. Esha'ch huapatsa nesho ñetña ama't ahua'tapa' amach alla cheporrerrete'te. Esha'ch name'ñerraya na ñetña ama't ahua'tapa' amach alla oñpa'terre'te. Ñehua, ñeñt'pa' añ notenes, esha'ch name'ñerraya na ñetñapa' chocmach e'ñe cosherret pueyo'chreto, ama't ahua'tapa' amach alla es e'nerrete'te.

³⁶ Tarraña napa' o' notuas: Sapa' o' sentnoñ amaña same'ñenno.

³⁷ Allohuen acheñenesha' ñeñt o'patatenna Apapa' ñetñapa' ame'ñerrnetcha'. Esha'ch name'ñerraya ñetñapa' amach alla nehuapore'terraneto.

³⁸ Tarro'mar napa' ama añecpaye' nohuapoña ento't attoch o'ch aña atet ne'pos ñeñt nemnen na. Napa' añecopña nohuapa o'ch atet neperr ñeñt atet muenen Nompor ñeñt nellsenserre'.

³⁹ Ñeñt'pa' atet muenen Nompor ñeñt nellsenserre': Amachña cha na'chencatereña acheñenesha' ñeñt ora allpon o'patatenna na, chocña ello netantaterrñañ esempohuañen.

⁴⁰ Añmapa' ñeñtña muenen Nompor: Erra'tsencha' neñoterre' ñerra'm ame'ñerrnetcha' na ñeñten Yompor Puechemeren, ñetñapa' corretsetach pocsheñeshocmañen tayoteñ ama't errponañohuen. Ñetñapa' chocmach netantaterranet esempohuañen.

⁴¹ Atto Jesús'pa' otenanet, “Napa' na corramtsotets ñeñten huapatsa ento't”, judionesha'ña'pocua'nteño'tet otatse'tyeñet.

42 Ñeñtpa' atet otyeset:

—Añmapa' añaca'ye Jesús, José puechemer, ñeñt pompor ñaña pachor e'ñeca'ye yechme'teñ. Te'ñapa' eso'mare'tña oten ñapa' entoto' huapa.

43 Jesúsñapa' atet otanet:

—Sapa' amach atta sotatse'tanna'tyesatsto.

44 Ama't eseshapa' amach errotenot ame'ñerneto ñerra'm Nompom ñeñt nellensene' ñerra'm ña ama cotape'chaterrahueto cohuen. Ñetñapa' netantaterranetcha' esempohuañen.

45 Atet quellquë't ñeñt a'mtaye't Yompor po'ñoñ ahuat, po'quellcopa' atet anuaret: "Allohuenetpa' Yomporcha'ña eñotaterrahueto." Allohuen ñeñtcha' e'mñoterre' Nompom attoch cohuen cotape'chaterranet, ñetñapa' nachña ame'ñerret.

46 'Ama't eseshapa' ama puentareto Apa. Naptaña na ñeñten huapatsa Yomporeshot nentarca'yeña Apa.

47 E'ñe po'ñoñ notenes: Esha'ch name'ñerraya ñetñapa' corretsetach pocsheñeshocmañen tayoteñ e'ñe errponañohuen.

48 Napa' na corramtsotets alloch e'ñe socra.

49 Satañneshañpa' ama't rra'yesete't ñeñt maná all amayo, ñetñapa' o' colla'huenet.

50 Tarraña ñeñten sotene' te' ñeñtña e'ñe po'ñoñ socram ñeñten huapatsa entot allochñapa' esesha'ch rre'pa' ñetñapa' corretsetach tayoteñ e'ñe errponañohuen.

51 E'ñe po'ñoñ napa' na ñeñten corramtsotets alloch e'ñe socra ñeñten huapatsa entot. Ñerra'm esesha' rre' añ corrametspa' ñetñapa' corretsetach tayoteñ e'ñe errponañohuen. Añ corramets ñeñtcha' nepomuerr na acheñeshacop arr patsro alloch e'ñe correnet, ñeñtpa' añca'ye nechets.

52 Judionesha'ñapa' ñeñto'mara'cho' es otanna'tyeset. Ñetñapa' atet otyeset:

—Errotenotuachñaca' apueyña e'ñe ña po'chets ñeñtcha' yerra'.

53 Jesúsñapa' alla oterraneterr:

—Po'ñoñ o'ch notas, ñerra'm ama serrerrnano nechets Ñeñten Acheñetosets, ñerra'm ama sorrerrnano ñaña nerras, sapa' amate' errotenot socroña sa.

54 Ñerra'm esesha' rrene' nechets ñaña ñerra'm orrennanet nerras, ñetñapa' corretsetach tayoten e'ñe errponañohuen, tarro'mar nañapa' netantaterranetcha' esempohuañen.

55 Tarro'mar nechets ñeñt e'ñe po'ñoñ corramtsotets; ñerraspa'cho'ña ñeñt e'ñe po'ñoñ orrapo'.

⁵⁶ Ñeñtcha' rrene' nechets ñaña ñerra'm orrennanet nerras ñetñapa' e'ñech parrocmatennet na, napa'cho'ña e'ñech neparrocmatennet ñet.

⁵⁷ Apa ñeñt nellensene' ñapa' ama arromñañeshayaye, ñaca'yeña napuene'ña atto napa'cho'ña corretsanach. Ateñ nepena naña, allohuen ñeñt pocrrañ nepene' napa'cho'ña añ napuennet attoch ñetpa'cho'ña corretsetach ñamet.

⁵⁸ Na ñeñten socrrañ sepen ñeñten huapatsa entot. Ama atteyayno ñerra'mrrate' pan ñeñt rre't satañneshañ ahuat. Ñetpa' o' colla'huenet. Esha'ch e'ñe pocrrañ nepene' ñetñapa' corretsetach tayoteñ e'ñe errponañohuen.

⁵⁹ Arrpa' allohua ñeñt atet yeçhatenan acheñnesha' judionesha' po'prahuo all Capernaumo.

Jesús po'ñoñ ñeñtpa' alloch yocrrena tayoteñ errponañohuen

⁶⁰ Allempoña atet e'mueñet atet oten, shonte' pueyochreshačhno'pa' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

⁶¹ Jesúsapa' e'ñe pueyočhro eñotanet čha otatse'tyen pueyochreshačhno, ñeñfo'marña atet oterraneterr:

—Ñeñt atet notenespa' are't pocteye' senteñe.

⁶² Ta'm, ¿errotena'tcha' sotña ñerra'm po'ñočh sentennoñ na Ñeñten Acheñetsosets o'ch alla na'terreñ ento allot nohuapa ahuat?

⁶³ Yecamquëñ alloña e'ñe po'ñočh yocrrena. Yechetspa' ama't coñetapa' ama sherbeno. Neñoñ ñeñt neserpare'tatenespa' e'ñe po'ñočh secamquëñecop ñeñtña po'ñočh alloch e'ñe socrra.

⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'.

⁶⁵ Jesúsapa' alla oterraneterr:

—Ñeñfo'marña napa' notase't, amach esesha' name'ñerrayo ñerra'm ama Apa cofape'chaterrahueto attoch coferrnet.

⁶⁶ Allempoteñña shonte' Jesús pueyochreshačhno pueracherret ñesho'pa' o'huañ chopeñe'chenet parro.

⁶⁷ Allempoña Jesúsapa' atet otan pueyochresha' ñeñt çharrasheña puechena epa:

—Sapa'cho' ¿semneñe't o'ch sepurrerra samña?

⁶⁸ Simón Pedroñapa' atet och:

—Partseshacha', esesha'huate'ñaca'ye yoc'ta'. Paptaca'ye pechenña ñoñets attochña yapa' corretsayach tayoteñ errponañohuen.

⁶⁹ Yapa' o'ca'ye yame'ñaña. Yapa' yeñotene'p papa' pepa'tca'ye Cristotets, ñeñte'p Yompor Puechemere'p.

⁷⁰ Jesúsña atet otanet:

—Napa' naca'yeña sa'crrer'eña sa, çharrasheñas sepchena epa. Ñeñña puesheñarrpa' ñeñtpa' oneñeñena'tar.

⁷¹ Ñehua, Judasocop atet eñora. Ñeññ Judaspa' ñeññ Simón Iscariote puechemer. Ama't ñeññ a'pchenahuetañ epa puey-ochresha', puesheñarrpa' ñeññcha' pomuerre'.

7

Ama't ñeññ pa'mo'nasheñnesha' pen Jesúsapa' ñetpa' ama eseshaye' ame'ñenayo

¹ Allempoña Jesúsapa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' cha o'pateñet o'ch muetset.

² Allempopa' o' çherrmocherr allempoch cosherrerr judionesha'; ñeññcha' cosherreterr añ pa'so'cheñ Manatpuetsopop', ñeññ atet yeçhenet ñet.

³ Allempoña Jesúsapa' atet och pa'mo'nasheñnesha':

—Te'pa' orrerrepe' arroñ, ahuerrepe' alla Judeo allochñapa' peyochreneshachno ñeññ allo'tsa'yen o'ch porrtatuerranet ñamet peparsoña ñeññ atet pepa'yena te' arma.

⁴ Ñehua, ñerra'm yemneñ o'ch yorrta allohuenacoppa' ama't puesheñarrofe'yapa' amachña a'nahua es ye'pa'yeno. Ñerra'm po'ño'ch porrtatyen peparsoña arrpa' porrtachñaca'ye ñaña allohuen acheñeneshapop' añ patsro.

⁵ Ama't pa'mo'nasheñnesha'pa'cho'ña tarro'mar atet ochet ñetpa'cho'ña amaca'ye ame'ñeñeto.

⁶ Jesúsñaapa' atet otanet:

—Allempo ñeññ poctetsa nocop o'ch norrrta allohuenacoppa' amaca'ye e'ñeye' çhena'. Tarraña socoppa' e'ñeca'ye pocte' çhocmaca'ye eñall.

⁷ Tarro'mar acheñenesha'ña añ patsropa' amachca'ye errotent' e'moñe'tasoña sa, tarraña napa' çhocma e'moñe'tyennet tarro'mar napa' aña'ye neñotatyenanet ñeññ atet p'atse'tyenet ñeññ ama pocteyaye.

⁸ Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' çhena' allempoch e'ñe pocta'huona.

⁹ Atet otuanetpa' ñapa' alla a'pa mame' Galileo.

Allempo Jesús coshapretena' ñeññ otenet Manatpuetsopop'

¹⁰ Allempoña pa'mo'nasheñechnopa' ñetñaapa' ahuanmuet coshapretatset. O'ña tama o'chetpa' ahuo' ñaña, tarraña ñapa' ama orrtenaneto, a'nahua cota'nenanet chenta'.

11 Judionesha'ña all coshenetpa' ñetñapa' e'neñet atet otyenet:

—Ta'mca'ye ¿erro'tsente'ña Jesús?

12 Allña acheñenesha'pa' shonte' eñosyenet ñocop. Patanta'tetspa' atet otyenet: “Ñapa' e'ñe cohuen acheñer”; po'potantañechnopa' atet otyenet: “Amaca'ye cohuenayaye, ataca'ye shecare'tyenan acheñenesha'.”

13 Ñetpa' atarr mecha'teñet judionesha' ñeñto'marña a'nahua atet otanna'tyenet.

14 O'ña patma'nma atto coshenet Jesúsñapa' be'tosos Parets pa'paclo, yeçhatosanet all.

15 Allñapa' epaye' cohuanrrorch judionesha'. Ñetñapa' atet otyeset:

—Ta', erro'tente'ca'yeña añ, ama't ama ayçhatarete quel-lecpa' atarropa't es eñotyen.

16 Jesúsñapa' otanet:

—Ñeñt atto neyçhatyenes ñeñtpa' amaca'ye noyaye noctañña, ñeñtpa' Yomporoña poctañña ñeñt nellensene'.

17 Ñerra'm esesha'ña muene' o'ch atet pet ñeñt muenen Yompor ñetñapa' eñochetcha' neyçhateñpa' Yomporo amaca'ye no'taye' neñeno.

18 Ñerra'm esesha' e'ñe ñofo'ta eñenpa' ñetñapa' añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeñt llesensene' ñapa' ñeñtña eñetsña ñoñtso e'ñe po'ño'ch ama shequëñtsoyaye.

19 'Ama't apasoña Moisés ñoñets ñeñt atet anaret. Tarraña ama't apaseñ, sañapa' ama't e'ñe puesheñarrofesapa' ama se'pohuenoña ñeñt atet oten añ ñoñets, ñeñte'pñapa' eso'mare'tña te'pa' semneñña o'ch semtsan.

20 Acheñenesha'ñapa' atet otereterr:

—Papa' çhate' chorrenpa oneñeñ. Amarramche' esesha' po'patenayeña o'ch muetsapet.

21 Jesúsñapa' alla oterraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroretñoñ tarraña sañapa' ama pocteye' senteñe.

22 Moiséspa' apa'nmas ñeñtcha' seyçha' attoch setsorrannena. Ñehua, po'ño'ch ñeñtpa' ama ñanom Moisésoye' sapaye, ñeñtpa' satañneshañe'naña seyçhatnomue' ahua'toñeñ. Ñeñto'marña sapa' çhocmach setsorrateñ asheñorrofo'll ñerra'm o'ch posocmata'muen ama't añ yetro allempocma yamesen çhocmaña setsorrateñña asheñorrofo'll.

23 Atto sapa' setsorrateñ asheñorrofo'll ama't añ yetro allempocma yamesen attoch amach sa'pueno ñoñets ñeñt

atet anaret Moisésot, ñeñtepñapa' eso'maruañaca'yeña se'moñe'tenenña na allempo e'ñe na'crraten puesheñarr acheñ añ yetro allempocma yamesen.

24 Ñerra'm esempo senteñ po'psheñeñ ñeñt atet penpa' amachña ñeñtota sottene'chatsche año' cohuenaye' es yeçcateno. Chochña ñanom señoç errotente'ña ñeñt po'ñoç atet pena.

Atto Jesúsapa' eñotatanet ñapa' Yompoeshot huapa

25 Patanta'tets jerusaléño'marnesha'pa' atet otyenet:

—Ta'm amate' aneyayeña ñeñt o'patenet o'ch muetset.

26 Ñapa'cho'ña allo'tsenepa't arr, atta ama es pueçheno eñosets, amaña erroteye'ña oteñeto. Ñato' tarro'marte'ña ama't añcha'tareñnesha'pa' o'ca'ye eñotuet po'ñoç ñapa' ñeñtca'ye Cristotets.

27 Tarraña aña' yeñoteña'ye allot huena. Tarraña es-empoch huapa ñeñtcha' e'ñe po'ñoç Cristotats ñapa' amach eseshaye' eñotapaye errotcha' huapa.

28 Jesúsña allempo yeçhaten Parets pa'paclo, ñapa' puerranarot atet otanet:

—Sapa' sechme'tennoñte', señotennoñte'ña na errotte' no-huapa. Tarraña napa' ama notaye' nohuapo, eñallña ñeñt nellsense'; ñapa' e'ñe po'ñoç ñerra'm errot ot, ama puenesho po'ñoñ. Ñeñtña sapa' ama señotheña sa.

29 Nañapa' e'ñe neñoteñ, ñeshotca'ye nohuapa. Ñapa' ñeñtca'yeña nellsenserre'.

30 Allempocma atarr mueneñet o'ch rromuetañ tarraña ama esesha' rromaye. Tarro'mar ama çhena' allempo ñeñt poctetsa ñocop attoch rromuet.

31 Shonte' acheñenesha' ñeñt ame'ñaya. Ñetña'pa' atet otyenet:

—Añte'ca'yeña po'ñoç Cristo ñeñt yecuen o'ch huapa. Yapa' o'ca'ye orrtatosnay po'partsoña, amate' errotentot huapo po'psheñeñ ñeñtcha' ello metanose' po'partsoteña ñeñt atet entatyeney añ yacmar.

Allempo fariseonesha'pa' mueñet guardianesha' ñeñtcha' rromuenayañ Jesús

32 Fariseonesha'ña'pa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñto'mar ñet ñaña ñeñt pa'mcha'tareñnesha' pen allohuen judionesha' po'cornaneshar, ñetña'pa' mueñet guardianesha' ñeñtcha' rromuenayañ Jesús.

33 Jesúsña'pa' alla oterraneterr:

—O' mameshamña e'ñe parro'tseney. O'chña mamerrerrpa' o'ch alla ahuerren allo'tsen ñeñt nellsensene'.

³⁴ Allempoña ama'tcha' se' name'terrenpa' amach senter-rno. Allcha' neserr napa' sañapa' amate' erro'tenot se'chapo.

³⁵ Judionesha'ñapa' atet otanna'tyeset:

—Ta', ¿errach taña añma ñeñto'mar amach yentere? Ñato' arrcha' ta griegoneshesho all parratse'tyen yamo'tsesha' o'ch ye'chatenana' griegonesha' all.

³⁶ Ta', ¿este'ña añma ñeñto'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach erro'tenot se'chapo”?

Allohuen ñeñt ame'ñenaya Jesús, Parets Puecamquëño'pa' e'ñe pueñmateño'tet pueyo'chreto atet penet ñerra'mrrate' allot poten oñ ñeñt atarr cohuen

³⁷ O' e'ñe huañmoch all coshena judionesha'. Añe yetro allempo nanac coshenet, Jesúsñapa' tomos all, puerranarot atet otosanet:

—Erra'tsente' acheñer oñpa'tets e'ñe pueyo'chreto, onetepa' nesho orretepa'.

³⁸ Ñeñt name'ñenaya na e'ñe pueñmateño'tet pueyo'chretopa' atet pena ñerra'mrrate' allot poten oñ aton ñeñt atarr cohuen, tarro'mar ñeñtpa' atet oten Yompor po'ñoñ ñeñt anuaret ahua'toteñ.

³⁹ Nehua, añ ñoñetspa' añecop serrpare'ten Yompor Puecamquëñecop ñeñtcha' chorrerraya allohuen ñeñtcha' ame'ñerraya ña. Tarraña allempopa' ama aparetteneta' Yompor Puecamquëñ, tarro'mar Jesúsapa' ama chena' allempoch alla ahuer Yompor pue'ntaño allcha' e'ñe cohuentaterrñañet.

Allempo acheñenesha'pa' ellopa'tetstatenet pocta'ña Jesúsocop

⁴⁰ Allempo e'mhuet ñeñt atet oten Jesús, patantarrña acheñenesha'pa' atet otyeset:

—Po'ño'ch añmapa' ñeñfte'ca'ye a'mtene'ña Yompor po'ñoñ ñeñt chocma yecuen.

⁴¹ Po'potantañpa' atet otyeset:

—Añmapa' ñeñfte'ca'yeña Cristotets ñeñt chocma yecuen.

Po'potantañapa' atet otyenet:

—Ñeñtcha' Cristoterretspa' amate' arro'ta huapo Galileot.

⁴² Ama't otenoña Yompor po'ñoñ ñeñt anuaret, Davidcha' po'mrenño't huapaña ñeñtcha' Cristoterrets; arrotcha' huapa anetso't ñeñt Beléñ ñeñt pa'netser pe't David.

⁴³ Ñeñto'marña allohuen acheñenesha'pa' ellopa'tetstatenet pocta'ña Jesúsocop.

44 Patanta'tetsñapa' atarr mueneñet o'ch rromuet, țarraña ama esesha' rromaye.

Atto judionesha' pa'mcha'tareternesha' ama ame'ñeñeto Jesús

45 Guardianesha'ñapa' puerraçherret allo'tsen ñeññ pa'mcha'tareternesha' pen allohuen judionesha' po'cornaneshar epuet ñaña fariseonesha'. Ñetñapa' atet otarettapuerret:

—Eso'maruañaca'yeña amaña sehuapatere.

46 Guardianesha'ñapa' atet otuerret:

—Ama't eseshapa' ama pueñosarõña atarr cohuen atet eñen ña.

47 Fariseonesha'ñapa' atet oterraneterr:

—Tarro'marte' ama sehuapatere sapa'çho'ña çho'te'ca'ye shecapas samãa.

48 Ama't ñaña patantarr amcha'taretnesha'pa' ama't o'çha ame'nyeto ñamet. Ama't ñaña patantarr fariseonesha'pa'çho'ña o'te'ca'ye çha ame'nyet.

49 Tarraña ñeññ acheñeneshar ñeññ ama eñotenaye ñoñets ñeññ atet anareñ ñetñapa' a'cmarefet.

50 Ñeñña puesheñarr fariseo ñeññ Nicodemo ñeññ tatsa ahuaña Jesúsesho, ñañaapa' atet otan pamo'tsesha' fariseonesha':

51 —Ñoñets ñeññ atet anareñ yocoppa' atet oteneý, amach errotenot yecoñchache ama't puesheñarra acheñ e'ñe attõta. Chochña ñanom ye'mñoch attoch yeñoch este' otatse'tyen ñeññ atarr sosey yenten esheccha'ña yecoñchach.

52 Ñetñapa' atet ochet:

—Eso'maruachca' pemoñesyaña galileo'marnesha', ñato' papa' galileo'marnesha'pte'. Papa' amarramche' galileo'marneshayaype. Te'pa' pelleya'yes Yompor po'ñoñ allochñapa' o'ch peñoch Galileotpa' ama't puesheñarrapa' amach huapõña ñeññcha' a'mtene' Yompor po'ñoñ.

Allempo puesheñarr coyanesha' huapachet Jesúsesho ñeññ chetapretene' pacma puerrollar

53 Allempõña allohuenet ahuanemyerret pa'pacletto.

8

¹ Jesúsñapa' ahuerr Olivo'pno.

² Tsapatña po'pocheño e'ñe ahuatecma alla çhenerr Parets pa'paclo. Shonte' acheñenesha' alla huacheneterr ñesho. Ñañaapa' anorros allña yeçhatenaneterr.

³ Ñeñña etsotayenayeñ ñoñets ñeññ atet anaret judionesha-cop ñaña fariseonesha' ñetñapa' huapatoñet puesheñarr coy-anesha' ñeññ rromuet all eñchet chetapretenan po'psheñeñ pacma puerrollar. Nosñañet e'ñe rrocho.

⁴ Allñapa' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar.

⁵ Moisés po'ñoñ ñeññ atet anaret ñeññpa' atet oteneý, añpa' choch yarrolle'ch. Te'ña papa' ¿erroñe'tcha'ña poteyña pa'?

⁶ Ñeññpa' tarro'mara atet otoset ñato'rraña eñorachet ñeññ ama pocteyaye allochñapa' attoch a'metanpeñeta'. Jesúsñapa' allenta mo'capa' o' quellcan pats potaño.

⁷ Ñetñapa' alla a'pñto'tereterr. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'querrerr o' alla quellquerranerr pats potaño.

⁹ Ñetñapa' o' e'met atet otanet Jesúsapa' e'ñe acoñoteñ ahuanemhuerret e'ñe puesheña'ttset. Añ ñanam ahuanerrtsa po'nmenesha'chno, attotapa' o' ñapñaña Jesús epuet coyanesha'.

¹⁰ Jesúsña echanterrrrpa' atet otan coyanesha':

—Nocheshacha' ¿erro'tsa'yeneta'tña? Ama't puesheñarroñeta ñetpa' are'tcha'ña coñchatape.

¹¹ Ñañaapa' atet otan Jesús:

—Ama Ayochreshate eseshaye' necoñchataye.

Jesúsñapa' alla otererr:

—Napa'cho'ña amach necoñchatape. Te'ña ñerra'm ahuerreppa' amach allo'na atet pepa'nenno ñeññ ama't mamesha ama pocteyaye.

Jesúsapa' ña a'puetarsam̄pene' acheñenesha' poctapñña añe patsro

¹² Jesúsña po'pocheñopa' serrpare'taterranerr acheñenesha', ñeññpa' atet oterraneterr:

—Napa' na ñeññen a'puetarsam̄pene' acheñenesha' poctapñña añe patsro. Esha'ch nocterre' o'huañcha' allo'na cotape'chatnenanet poctapñña ñeññ atarr sosya'tsañ; ñeññpa' checmeta chopeñe'chyenet. Ñetñapa' Yomporcha' po'cohuenño correrret ñeññara ñeññ puetarets.

¹³ Fariseonesha'ñapa' atet ochet:

—Papa' pañeña a'potetsa ñeñño'marña atto pa'potenapa' ama sherbeno.

¹⁴ Jesúsñapa' oterraneterr:

—Tarraña ama't nañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñaña

neñoteñ allcha' neserr. Sañapa' ama señothenno alloť nohuapa ñeñťo'marña ama señoťeñe allcha' neserr.

15 Sa sotatseñpa' e'ñe orrena atet sepena, aromñaťeneshasa atet petsa. Napa' ama't puesheñarrapa' ama notatse'tenaneto e'ñe atťa.

16 Tarraña ñerra'm esempo na'metenanet ñeñť atet nentapretyenanet ñeñťpa' e'ñe po'ñoťh atet tarro'mar napa' ama napťeye' es neña'yeno, napa' őhocmaña epan Apa ñeñť nellensene'.

17 Ñoñets ñeñť atet anaret ñeñť sechen sa, ñeñťpa' atet oten: Ñerra'm epsheña a'potene' e'ñe attecma ñeñťpa' e'ñeca'ye po'ñoťh otenet.

18 Napa' ñeñť atet na'potena na, Apaña ñeñť nellensene' ñaca'yeña na'potene'ña nocop.

19 Ñetñapa' atet otereterr:

—¿Erro'tsena'tña pa Pompor?

Jesúsñapa' atet oterraneterr:

—Ama't napa' ama señothenno, Apapa'čo' ama señoťeñe. Ñerra'm señothennoñ na Nompore'nate' señoťeneñ.

20 Allempopa' atet otanet Jesús all allecma año'tenet quelle ñeñť Yomporecop allempo yeťhatanet allara Parets pa'paclo. Tarraña ama't puesheñarra ama eseshaye' rromaye tarro'mar ama őhena' allempoch ñeñť poťtetsa ñocop o'ch rromuet.

Allempo Jesús otanet allcha' serr ñapa' aचेñenesha'ñapa' amach errotent őhapueto e'ñe allempocma

21 Allempoña Jesúsapa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñareťes serromhua. Allcha' neserrpa' sañapa' amach seťhapo.

22 Judionesha'ñapa' atet otanna'tyeset:

—Ta'm ñapa' o'ch muetsa ñañeña, ¿ñeñťo'marťe' atet oten allcha' serrpa' yañapa' año'ch yeťhapo?

23 Ñañaapa' alla oterraneterr:

—Sapa' alla ayeťhcañas arr patsro. Nañapa' ento'marneshan. Sapa' patso'marneshasa, nañapa' ama patso'marneshayayno.

24 Napa' o' notas sapa' orach ochñareťes serromhua tarro'mar ñerra'm amach same'ñerrno na ñeñťen peretnene' ochñareťes, po'ñoťh sapa' orach ochñareťes serromhua.

25 Ñetñapa' atet otereterr:

—Papa' po'ñoťh ¿eseshape'tña?

Jesúsñapa' alla oterraneterr:

—Napa' ñeñťenca'ye po'ñoťh őhocma sotene'.

26 Atarr nanac palltena chocmach notenes atet sepena sa, shonte'ch neños añecop atet nentyen. Tarraña ñeñt nellsensene' ñapa' e'ñe po'ñoçh atet oten ña. Napa' añca'yeña ne'ñoreññaña acheñenesha' arr patsro ñeñt atet ne'mueññañ Apa.

27 Ñetñapa' ama esesha' chapahueto pueyoçhreto ñeñt atet otenanet Pomporecop ñeñt atarr Parets.

28 Jesúsñapa' alla oterraneterr:

—Ñerra'm esepoch sapa' sechantam̄psen eno corsocho na Ñeñten Acheñetosetspa' allempochña chaponasa seyoçhro napa' ñeñten e'ñe po'ñoçh chocma sotene'. Chaponasach ñaña napa' ama es nepeno e'ñe nota, añña ne'ñorena atet yeçhatenen Apa.

29 Ñeñt nellsensene' ñapa' e'ñe parro'tsenen. Ama a'montsenno, tarro'mar napa' e'ñe chocma atet nepena ñeñt muenen ña.

30 Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yompor ñetñapa' atarr cohueno'tsa'yenet; ñeñña ama puechemer peno Yompor; ñetñapa' po'chñara taruasatenahuet e'ñe atta

31 Allempoña Jesúsapa' atet otan judionesha' ñeñt ame'ñenaya ña:

—Ñerra'm chocma soçtape'chon neñoñ po'ñoçhpa' ney-ochresha'ch nepenes.

32 Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñña ñoñets po'ñoçhpa' toram̄perrescha' e'ñeçh cohueno'tsenes.

33 Ñetñapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarroçeyapa' ama ehuanca'reteye attoch esesha' yetaruasate' e'ñe atta. Eso'marte' pañapa' p̄teneyña atoram̄psareteyo'ch.

34 Jesúsñapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquēnahuet, ñetñapa' po'chñara taruasatenahuet e'ñe atta.

35 Ñeñt ataruasatare' e'ñe atta amach chocmaye' yeçherro e'ñe parro'epuet pamo'mte'. Tarraña na ñeñten Puechemeren chocma e'ñe neyçhena epan Namomte' errponañohuen.

36 Ñeñto'marña na ñeñten Puechemeren ñerra'm na setoram̄perre' sapa' atoram̄psaretescha' e'ñe po'ñoçh, amach alla taruasaterrse'te so'chñar.

37 Na po'ñoçhpa' neñotenes sapa' po'mrenñeseñ Abrahampa' tarraña sapa' añña semnen o'ch semtsan.

Tarro'mar neñoñpa' ama't mameshapa' ama çhennaso sa seyoçhro.

³⁸ Napa' añ neñeñ ñeñt atet nentapreteñ Apa. Sapa'cho'ña aña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñapa' atet oterraneterr:

—Sapa' ñerra'm po'ñoçh Abraham po'mrenñeseñ soctape'cheneñte' atet e'ñe cohuen cotape'che't Abraham.

⁴⁰ Tarraña sa te'pa' cha so'patenna o'ch semtsan na ñeñten seserrpare'tatene' ñoñets ñeñt e'ñe po'ñoçh ñeñt atet ne'mueññañ Yompor. Abrahampa' amaca' atteye' pe'te.

⁴¹ Sapa' e'ñe aña soctape'chen atet pena sompor.

Ñetñapa' alla otereterr:

—Yapa' amaca'ye ellapnashoteye' ye'ñallete. E'ñe ñapña Yompor yepañ ñeñtara Parets.

⁴² Jesúsñapa' alla oterraneterr:

—Ñerra'm po'ñoçh Sompor sepeñeñ Parets atarrte' semorrentennañ na tarro'mar napa' Partseshotca'ye nohuapa o' neçhap arr. Napa' amaca'ye notaye' nohuapo, napa' Yomporña nellense'.

⁴³ Eso'mare'tña sapa' ama çhennasoña seyoçhro ñeñt notenes. Ñato' tarro'marte'ña ama semno o'ch se'mñnoten ñeñt atet notenes.

⁴⁴ Sapa' oneñetaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuatoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñoçh tarro'mar ñoñets ñeñt e'ñe po'ñoçhpa' amaca'ye atanenoña ña pueyoçhro. Ñerra'm cho eñorenapa', shequëñtsach eñorena tarro'mar ñapa' e'ñe shequëñtsa eñoten. Po'ñoçh sequëñtspa' pomporca' penanña oneñet.

⁴⁵ Tarro'mar napa' añ notenes ñeñt e'ñe po'ñoçh sañapa' amaña same'ñenno.

⁴⁶ Ama't puesheñarrotesa sa, napa' amach errotent sotno napa' eñallo' no'chñar. Atto napa' añ notenes ñeñt e'ñe po'ñoçh eso'mare'tña sañapa' ama same'ñenno.

⁴⁷ Erra'tsente' Yomporena'tarpa' ñetñapa' çhochca'ye e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyayso.

Allempo Cristopa' atet otanet: Allempo ama eñalleteña' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñoçh atet yoteneþ, þapa' samario'marneshaþ, oneñeña pechorrenaya.

49 Jesúsñapa' oterraneterr:

—Napa' ama çhoye' chorrenno oneñeñ. Napa' atarr nanac nemicha'na'teñ Nompör Paretš. Sañapa' ama semicha'na'tenno na.

50 Napa' ama añeye' ne'nenno attoch necohuentata nañeña. Eñallña ñeññ necohuentatene' na. Ña eñoretša atet es entyen arr patsro.

51 Po'ñoçhca' notenes: Ñerra'm esesha' e'ñe cotape'cherre' neñoñpa' ñetña ama't ahuatapa' amach e'ñe poctacma rromuerreto.

52 Judionesha'ñapa' alla otereterr:

—Te'ña po'ñoçh yapa' o' yeñotaþ þapa' çha chorrenþa oneñeñ. Ama't Abrahampa' o' rromuen ñaña ñeññ a'mta'yese't Yompör po'ñoñ ñeññpa'çho'ña o' colla'huenet. Te'ña þapa' atet þotene'y esesho'ch cotape'cherre' peñoñpa' ama't ahuatapa' año'ch rromuerreto.

53 Papa' çhate' þotenapañ ellote' penñtaneñ atto amcha'tare'te't Abraham ama't ñapa' o'ca'ye rromuen. Ñeññ a'mta'yese't Yompör po'ñoñpa' ñetpa'çho'ña o' colla'huenet. Papa' çhate' þotenapañ amate' arromñañeshayaype.

54 Jesúsapa' atet oterraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nompörpa' ña necohuentatene' ñeññara ñeññ soteneñ Seyompör-ro' sepeñ saña.

55 Sapa' amaca'ye seño'teñe țarraña napa' neño'teñca'ye. Ñerra'm na otetseñ ama neño'teñe napa'çho'ña atteneñte' ñerra'm sa, çhate' neshcare'tensoñ. Napa' e'ñe po'ñoçh neño'teñ ñeñño'mar çhocma noctape'cheññañ po'ñoñ.

56 Abraham ñeññ sa satañpa' atarr nanac cosha allempo eñoçh o' çhap allempo ñeññ poctetsa nocop o'ch nohuapa arr patsro. Allempoña eñoçh napa' o' neçhap arr patsro atarr nanac cosha.

57 Judionesha'ñapa' alla otereterr:

—Papa' ama peçhena' amnaroch çharra' pecharña þaña'apa' eso'mare'tña þotene'ña þapa' pentero' Abraham, ñeññpa' ahuatramche' corre't.

58 Jesúsñapa' alla oterraneterr:

—Po'ñoçhca' napa' o'ch notas: Ama eñalletena'ña Abraham, nañapa' eñallana.

59 Ñetñapa' allenta çhetet mapue'pa' o'ch rrolle'çhetañ țarraña Jesúsña a'nahua çha'nerr Paretš pa'paclo'tpa' o' ahuerr o' sohuanerranet.

9

Allempo Jesús pa' a'crraterran puesheñarr aporo'yet ñeñtatta eñalletña

¹ All oñen Jesús pa' allña entnoman puesheñarr yacma aporo'yet. Ñeñtña aporo'yet pa' atta eñalletña.

² Pueyochresha'ñapa' allenta a'pto'chet:

—Maestro, ¿essha'tña ochña'tats ñato' ña amapa' pamo'mte'te' ñeñto'mar eñalletña atet aporo'yet?

³ Jesús ñapa' atet otanet:

—Amaca'ye po'chñarofeyaye ama't ñaña pamo'mte'; ñeñtpa' añecopña allochñapa' o'ch norrtatoñ Yompor po'partsoña ñesho.

⁴ Ñeñt poctetsa o'ch norrtatoñ po'partsoña ñeñt nellsense' tayepa'tñapa' puetarmeñ. Ñerra'm o'ch checmetenpa' amach eshcaye' yetaruaso.

⁵ Tayepa'tña añe patsro'tsenmeñenpa' na ñeñten a'puetarsam'pene' acheñenesha' pocta'pña añe patsro.

⁶ Allempoña atet otuapa' allenta a'chonon pa'snom patso o' a'cha'cha'tach. Ñeñtña cha'cha'te'pa' alloña a'yac'le'chanña aporo'yet.

⁷ O'ña a'yac'le'chuepa' atet och:

—Te'pa' orrap' oño all apco'sattatareto ñeñtpa' añ pa'so'cheñ Siloés. Allcha' pe'pac'le'cha. (Ñehua, añca'ye otenetña Siloés ñeñt oñ ahua'ñaref.)

Ñaña'pa' allenta ahuo' oño allcha' e'pac'le'chena'. E'pac'le'chuatsapa' e'ñe errtsapa' allentepa'tcha' cohuenterraña pa'clle' e'ñe cohuen enterra.

⁸ Pamo'tsesha'ña ñaña po'poñe'chno acheñ ñeñt e'ñe cheme'tene' all allempo enamaren quelle, ñetñapa' atet otyeset:

—Añpa' ¿ama't añeyayeña ñeñt anorrtse't ñeñt enamare'tatse't quelle?

⁹ Patantarr acheñenesha'pa' atet otyenet:

—Ñeñtca'ye.

Po'potantañe'chnopa' atet otyenet:

—Amaca'ye ñeñteyaye, attaca' ñeñtema'ttena.

Aporo'yetñapa' atet otanet:

—Napa' ñeñtenca'ye.

¹⁰ Ñetñapa' atet otyeset:

—¿Erro'teno'te'tña o' pecuerr?

¹¹ Ñaña'pa' atet oterraneterr:

—Añ yacmar ñeñt otenet Jesús ñaca'ye a'cha'cha'te'ña pa'snomo patspa' alloca'yeña a'yac'le'chen. Allempoñapa' oten nepac'le'chenepa'to' oño Siloés. Nañapa' allña

ne'paclle'chena'. E'ñe e'paclle'chuatsanpa' allentepa'tcha' necuerr.

12 Ñetñapa' alla otereterr:

—¿Erro'tsena'tña ñeñt yacmar?

Ñaña' ot:

—Ta'm, amaca'ye neñoteñe.

Atto fariseonesha'pa' a'pto'tare'tenan aporo'yet ñeñt a'crraterr Jesús

13 Allempoña ñeñt poro'ye'chatse'tpa' anmet allo'tsen fariseonesha'.

14 Ñehua, allempo a'cha'cha'tan Jesús pa'snomo pats allo a'yaclle'chan aporo'yet ñeñt cohuaterre' allempopa' añ yetro allempo amesenet.

15 Fariseonesha'ñapa' ello alla otereterr:

—¿Erro'fenote'tña o' cohuaterpet?

Ñaña'pa' atet otosanet:

—Añoca'ye a'yaclle'cherrnet senmatso ñeñt a'cha'cha'taret epuet pats o'ña ne'paclle'cherrapa' allenta necuerr.

16 Patantarrña fariseonesha'pa' atet otyeset:

—Ñeñt yacmarpa' amate'ca'ye Partseshoteye' huapo ñeñto'mar ama esoye' entenanoña ñeñt anaret paterr yet allempocma yamesen.

Po'potantañña'pa' atet otyeset:

—Ta', elloña ñerra'm ochñañ acheñ amate' erro'tenot orrtatonayeña partsoteñets.

Attoña e'ñe all ellopa'tetstatet pocta'pña ñocop.

17 Ellopa' alla otereterr ñeñt poro'ye'chatse't:

—¿Erro'fena't p'otenña p'a añecop ñeñt o' cohuaterrep'?

Ñaña'pa' atet ot:

—Ñapa' ñeñtca'ye a'mtene' Yompor po'ñoñ.

18 Judionesha'ñapa' atet otyeset:

—Ñapa' amaca'ye po'ño'ch aporo'yeyeyaye, e'ñeca'ye cohuen entena.

Allempoñapa' chore'toñet pamo'mte' ñeñt o' cohuerr.

19 Ñetñapa' atet otapoñet pamo'mte':

—Añpa' ¿añe'tña sacñe'ter ñeñt sotyese't ahuo' eñalletaña sacñe'ter aporo'yet? Te'ñapa' ¿erro'fenote'tña o' cohuerr?

20 Pamo'mte'ñapa' atet otosanet:

—Po'ño'ch añca'yeña yacñe'ter ñeñt atta eñalletatsa aporo'yet.

21 Atto o' cohuerrpa' yapa' amaca'yeña yeñoteñe. Ta', esha'te' o' cohuater, yapa' ama yeñoteñe. Sa'pto'ch e'ñe ña, ñapa' o'ca'ye atta po'napen, ño'fachca'ye eñora.

Judionesha'ña allempopa' atet otyeset:

—Po'ño'che'pa'tca'ye aporo'yet o' cohuerr.

22 Ñehua, pamo'mte' atet otanet tarro'mar ñetpa' mecha'teñet judionesha'. Ñehua, judionesha' ñetpa' atet a'pocatenet ñerra'm esesha' otets: Jesúsapa' ñeñtca'ye Cristotets, ñeñtña atet otetspa' o'ch mueño'chet ñet po'prahuot.

23 Ñeñto'marña pamo'mte'pa' atet otanet:

—Ñapa' o'ca'ye atta po'napen, ñoñachca'ye eñora.

24 Puepocheñopa' alla chore'tereter ñeñt poro'ye'chatse't atet otapet:

—Te' p'apa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

25 Ñaña'pa' atet oterraneterr:

—Ta', ñato' ochñañeñte' napa' ama neñoteñe. Napa' añaca'ye neñoten napa' aporo'yeten te'ñapa' o' cohuen necuerr.

26 Ñetñapa' alla otereterr:

—¿Erroñe'tña perrep? ¿Erroñenote'tña o' cohua'terrep?

27 Ñaña'pa' oterraneterr:

—Ama'tña napa' o'ca'ye notuas sañapa' are'tña seño'teñe. ¿Eso'mare'tña semneñ o'ch alla noterrser? Ñato' ¿añecopte' semneñ o'ch yochresha'tasa samña?

28 Ñetña allenta otnare'chetpa' atet otereterr:

—Papa' pueyochresha' peneñ ñeñt yacmar, yañapa' Moisésca'ye pueyochreshay.

29 Yapa' yeñoteñ Paretspa' eñorana'tana Moisés, tarraña ñeñt yacmarpa' ama yeñoteñe erroñte'ña huapa.

30 Ñeñt poro'ye'chatse'tpa' atet oterraneterr:

—Erroñenotuaca'ye ama seño'teñete'ña erroñte' huapaña ama't napa' o'ca'ye e'ñe cohuen cohua'terren.

31 Yapa' yeñoteñ ñeñt ochñañ acheñpa' amaca'ye e'mñoteñe Yompor, tarraña ñerra'm ya yeñcha'na'teñoñ Yompor atet yepena ñeñt muenen ñapa' chocmach e'mñoteney.

32 Ya ama't ahua'tapa' ama ye'mareña esesha'pa' o' cohua'terranña ñeñt atta eñalletña aporo'yet.

33 Ñerra'm ñapa' ama Yomporeshot huapañe amate' erroñenot cohua'terñoñe.

34 Ñetñapa' alla otereterr:

—Papa' pe'ñalleta e'ñe ochñañartsoñ. Te'ñapa' cha pemneñ o'ch pey'chatey ya.

Allenta mueño'chet e'ñe ñet po'prahuot.

Ñeñt ama ame'ñetso Jesúsña'pa' atet entenanet ñerra'm aporo'yet

35 Jesúsña'pa' o' e'mare'ch ñeñt aporo'yettatse'tpa' o' mueño'chet. Allempoña enter Jesúsapa' atet oter:

—¿Pame'ñeña't ñeñt Yompor Puechemer?

³⁶ Ñaña'pa' atet och:

—Ayochreshate, ¿eseshatña ñeñt Yompor Puechemer ñeñtcha' name'ña?

³⁷ Jesúsña'pa' atet otererr:

—Ñeñt pecuen, ñeñten atet p̄otene', naca'ye.

³⁸ Ñaña'pa' allenta concorpa ñeshopa' atet otererr:

—Name'ñerrpach Partseshacha'.

³⁹ Jesúsña'pa' alla otererr:

—Napa' añecopña nohuapa arr patsro allochña'pa' attoch acrareterra acheñenesha' errotentcha' nentyesanet, allochña'pa' ñeñt ama entetsopa' o'ch e'ñe cohuen enterra. Ñeñtña entetsaña'pa' o'ch alla aporo'yetterra.

Ñeñt'pa' añ toma'ntata, ñeñt atarr ochña'ñ entetsa ñerra'm ame'ñerrana Jesús, ñetpa' cherranetcha' Yompor po'cohuenña pueyo'chreto. Ñeñtña ama ochña'teye' entetsañe ñeñto'marña ñetpa' amach ame'ñereto Jesús, ñetña'pa' amach cherraneto Yompor po'cohuenña pueyo'chreto.

⁴⁰ Patanta'tetsña fariseonesha' ñeñt allame'ttso'tsa'yenet ñesho, ñetña'pa' e'mueñet ñeñt atet oten Jesús. Ñetpa' atet ochet:

—Ta'm yapa' ¿ama'te' aporo'yete'ye' pentenye?

⁴¹ Jesúsña'pa' atet otanet:

—Ñerra'm po'ño'ch sa aporo'yet sentenañ amate' eñallmeñeña so'chñar. Tarraña sapa' atet soten, sapa' año' aporo'yete'yayso, e'ño' cohuen secuen, ñeñto'marña te'pa' o'ch notas, so'chñarpa' chocma eñall.

10

Atto Jesús'pa' añ toma'ntatanet all yottañpeñet carrnero

¹ Allempoña Jesús'pa' alla ye'chaterraneterr, ñeñt'pa' atet toma'ntaterraneterr:

—Po'ño'chca' notenes: All yottañpeñet carrnero ñerra'm esesha' ama be'tetso allotecma be'tenet ñerra'm po'pshem'tañofa a'tenet, ñeñtña po'ño'chpa' eñetca'ye ñeñt aprratam̄psañtetsa.

² Tarraña ñerra'm esesha' be'tets e'ñe allotecma be'tenet ñeñtña po'ño'chpa' ñeñt cohuan̄pene' carrnero.

³ Ñeñt cohuan̄pene' yetarrpa' ñerra'm esempo huacherra ñeñt cohuan̄pene' carrnero ñapa' chocmach toram̄psapuerranet. Carrneropa' e'ñe eñoteññañet pamo'mte' po'ñoñ. Ñaña'pa' o'ch chore'tyesan po'carrneror pa'so'chña'pa' o'ch cha'nma'cha'tatan po'carrneror.

4 Allempoña čha'nmatue allohuen a'yoŕpa' ñañaŕa' o'ch ota. Po'carrnerorñapa' allentach coŕa'huanemñ chenta'. Ñetñapa' e'ñe cheme'teññañet pamo'mte' po'ñoñ.

5 Tarraña ahuaŕñaŕa' ama coŕeñe, čhach matañpesya tarro'mar ama eñotenano ahuaŕña po'ñoñ.

6 Ñeñŕpa' atet oterranerr fariseonesha' toma'nteñtso tarraña ñetñapa' ama eñotoñeto ñeññ otenanet.

Atto Jesúsŕa' añ toma'ntena ñeññ e'ñe cohuen cohuañpene' po'carrneror

7 Alloŕñaŕa' alla oterraneterr Jesús:

—Po'ñočhca' notenes: Napa' na yetarrotets alloŕcha' be'ten carrnero.

8 Allohuen ashcañnesha' ñeññ huapyestse't allempo ama nohuena' na, ñetpa' eñeŕareret ñeññet aprratañŕsañtetsa, tarraña ñetpa' ama e'ññotenanetoña carrnero.

9 Napa' na yetarrotets. Ñerra'm esesha'ch be'tets nesho ñeñŕpa' qeshŕerrach, be'terretcha' ñaña čha'nerretcha' enterretcha' e'ñe cohuen puerrar.

Ñehua, ñeñŕpa' añ otenanet: Ñerra'm esesha'ch ame'ñaya ña ñetñapa' qeshŕerretcha'. Ñachña cohuañŕerrahuet e'ñe cohuen amach es pallterreto.

10 Jesúsñapa' alla oterraneterr:

—Eñeŕpa' amaca'ye huenoña e'ñe atta, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa attochña sapa' corretsasach socsheñeshocmañen e'ñe ŕayoteñ errponañohuen.

11 Napa' na ñeññen cohuen cohuañpene' carrnero. Ñeññ e'ñe cohuen cohuañpene' carrnero ñapa' e'ñe ñañaña a'rroyerŕsa o'ch rroma po'carrnerorecop.

12 Tarraña po'ŕsheñeñ ñeññ atsa'tarettatsa attoch cohuañpenan carrnero ñeñŕpa' ama pamo'mtayeyaye; ñañaŕa' ñerra'm entapan ma'yarrpa' čhach mata o'ch sa'nmanña carrnero. Ma'yarrñaŕa' o'ch rroma'yesosan carrnero, patantarrña carrneropa' o'ch atta a'ŕarratse'tach.

13 Ñeññ atta atsa'tarettetsapa' po'ñočhpa' ama lleca'penanoña carrnero ama't mamesha. Ñeñto'marña čhach sa'nmanña carrnero.

14 Napa' na ñeññen cohuen cohuañpene' carrnero. Napa' e'ñe nechme'teñ ñeññ necarrneror. Ñeññña nopa' e'ñe cheme'tenen naña.

15 Atet pena Apa e'ñe eñotenen, nañapa' e'ñe neñoteñ naña Apa. Napa' e'ñe nañeña o'ch na'rroyerra attoch nerroma necarrnerorecop.

16 Eñall po'poñečhño ñeññcha' necarrneror neperr, ñetpa' ama parrocmateneto arr allo'tsen ñeññ necarrneror nepen

te'. Añ poctetsa o'ch nerraneta' attoch e'mñnoterrnanet neñoñ, allochñapa' o'ch e'ñe parrocmaterret. Puesheñarrana ñeñfencha' cohuanñperrahuet.

17 'Apapa' ello atarr morrentenna tarro'mar napa' na'rroyena nañeña o'ch nerroma acheñeneshacop, elloñapa' o'ch alla netanterra.

18 Ama't eseshapa' amach puerratañpesnoña nocreña, napa' na ñeñfen a'rroyetsa e'ñe nañeña. Napa' anareten attoch na'rroya o'ch nerroma; anareten ñaña attoch ellopa' o'ch alla netanterra. Ñeñtpa' Apaña notene' atetcha' neña. Arrpa' allohua atet toma'ntatenanet allohuen ñeñfcha' ame'ñerraya ñeñña po'carrneror pen ñeñfcha' atarr cohuen cohuanpen.

19 Ñeñt atto serrpare'tatenanet Jesús, allña judionesha'pa' ellopa'tetstatenet poctañña Jesúsocop.

20 Shonte' acheñenesha' ñeñt atet otyesets:

—Añmapa' chaca'ye chorreña oneñet, chaca'ye mospuena. Eso'mare'tña se'mñoteñ.

21 Po'potantañechnoñapa' ñetpa' atet otyenet:

Ñerra'm cho chorreña oneñetpa' amate' errotent eñosoña atet e'ñe cohuen. Oneñetpa' amate' errotent cohuaterrañoña aporo'yet.

Allempo judionesha'pa' achmare'teñet Jesús

22 Allempoñapa' cherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquell ñocop. Allempo alla cosherreterrapa' allempopa' huapo.

23 Jesúsñapa' alla chopeñen Parets pa'pacillo all oteñet Salomón puecha'petaro.

24 Allñapa' arrotañpesya judionesha'pa' atet ochet:

—Esempohuachñaca'ye pe'nuaña ñeñt atto pe-moñne'tatenya. Ñerra'm po'ñochte' pa Cristotetspa' poteyñaca'ye e'ñe po'ñoçh.

25 Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteñoñ Apa atet es neña'yen. Ñeñt norrtatyenpa' ñeñfcha'ña señotate' napa' ñeñfen Cristotets.

26 Tarraña sapa' ama same'ñenno tarro'mar sapa' ama necarrneroreyayso ñeñt atet o' notuas.

27 Ñeñt po'ñoçh necarrnerorpa' e'mñnotennanet neñoñ, nañapa' neñnotenat. Ñetñapa' cotennet.

28 Nañapa' napuerranetcha' attochña ñetpa' corretsetach tayoteñ errponañohuen, ñetñapa' ama't ahuatapa' amach

chenquërreto. Ama't eseshapa' amach puerraterrnetoña e'ñe na notot.

²⁹ Nomporporpa' ña napuene'ña ñeñt name'ñenaya. Ñapa' atarr ahuamencatesha'. Ña po'huamencpa' ama eseshaye' metanayae. Ama't eseshapa' amate' errotenot puerratam̄psetoña Nompore'ñe ña potot.

³⁰ Napa' e'ñe parro attecman epan ña.

³¹ Ñeñto'marña allempo judionesha' ñetpa' chetet mapue' allo'ch rrolle'chet.

³² Jesúsñapa' atet oterraneterr:

—Shonte' cochnesha' norrtatyesonas Nompore' huamencot. ¿Erra'tsenote'tña añ ñeñt e'ñe cochnesharot sapa' semneñ o'ch sarrolla'n?

³³ Judionesha'ñapa' atet otereterr:

—Ama porrtateño'teye' cochnesha' yemneñe o'ch yarroлле'taḡ. Yapa' añecopña yemneñ o'ch yarroлле'taḡ atto ḡapa' atarr ḡachm̄are'teñ Parets. Papa' acheño'taca'ye pemneñ o'ch pepartsocoptarta.

³⁴ Jesúsñapa' alla oterraneterr:

—Ñoñets ñeñt atet anaret ahuatoteñ socop allpa' atetca'ye anuaret añecop ñeñt e'ñe ñenma't a'pote' Yompore' po'ñoñ, ñeñtpa' atet otanete't Yompore: “Sapa' atetcha' entenes acheñenesha' ñerra'mrate' yompores.”

³⁵ Yompore' po'ñoñ ñeñt anuaret ahuatoteñ ama puenesho. Atet otanete't ñetpa' yomporo'ch entenanet acheñenesha',

³⁶ naña ñeñten o' nerren Yompore' ñeñten o' mueñerren arr patsro, sapa' achñarña'tach sepenen tarro'marotña napa' noten Yompore' Puechemeren.

³⁷ Ñerra'm amate' aye' norrtateno Yompore' po'partsoña ñeñteḡapa' amach same'ñatsetno.

³⁸ Tarraña atto po'ño'ch norrtateññañ po'partsoña ama't ñeñtpa' same'ña, ama't napa' ama ame'ño'yen sentenno. Attochña po'ño'ch ḡhaponasa seyo'chro atto Apapa' e'ñe parrocmatenna, napa'cho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' ḡha a'qeshḡachet.

⁴⁰ Allempoña Jesús'pa' ahuerr yom̄ta'n Jordanaso all e'ñe ñenma't apatyese't Juan Yomporecop. Allña'pa' alla a'pa.

⁴¹ Shonte' hua'cha'tyests a ñeshopa' ñetña'pa' atet otyesoset:

—Juanpa' ama't coñe'ta ama orrtatano partsoteñets, tarraña allohuen allpon otyesye't Juan añecop ñeñtcha' Cristoterrets ñeñtña te'pa' e'ñe po'ño'ch atet pena.

⁴² Allña'pa' shonte' acheñenesha' ñeñt ame'ñaya Jesús.

11

Allempo rroma Lázaro

1 Allempo atsna'ten puesheñarr yacma ñeñtpa' añ pa'so'cheñ Lázaro ñeñt yeçheta anetso Betania epuet epsheño'mar po'ch, puesheñarrpa' María, po'psheñeñpa' Marta.

2 Ñehua, ñeñtña Mariápa' ña a'yatcate'ña Partsesha' eñmosafo pa'tco allempoña e'ñe ña pue'chopa' alloña a'porrarra'tquër, ña po'se Lázaropa' cha atsna'ten.

3 Po'chanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeñt atarr pemorrentenapa' cha atsna'ten.

4 Jesúsña e'mare'chpa' ñapa' atet otapanet:

—Ña amaca'ye añecpaye' atsna'teno o'ch rroma, tarrecpa atet pena allcha' norrtatoñ Yompor po'partsoña, allochñapa' o'ch cohuentatennanet na ñeñten Yompor Puechemeren.

5 Jesúsapa' ama't atarr morrentenanañ Marta ñaña pa'mo'nerr ñaña Lázaro,

6 tarraña allempoña e'mare'tan Lázaropa' cha atsna'ten, ñapa' amaña allorocmaye' to, ñapa' alla epomterr e'ñe all allo'tsen.

7 Allempoña epomta'muenpa' atet ota'muenan pueyochresha':

—Te'pa' o'ch ahuerrey alla Judeo allo'tsen Lázaro.

8 Pueyochresha'ñapa' atet ochet:

—Maestrocha' allpa' chaca'ye o'patenpa judionesha' o'ch rolle'tapet attoch muetsapet. Ta'm, ¿paña te'pa' o'ch alla pesechenerr o'ch alla ahuerperr?

9 Jesúsñapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yechope'ch yeto amach yepoto'teno tarro'mar e'ñe yenten puetare' añe patsro.

10 Añña ñerra'm yechope'ch tsapo yepoto'tena tarro'mar ama a'puetarsam̄psareteye. (Atto Jesúsapa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama chena' allempo ñeñt poctetsa ñocop attoch muetsset.)

11 Allempo otua atetpa' o' alla oterranerr pueyochresha':

—Lázaro ñeñtey e'ñe parrocoma atarr yemorrentannena ña te'pa' chaca'ye muen, ñeñto'marña te' napa' o'ch ahuen o'ch alla nopuera'.

12 Allempoña pueyochresha' ñetñapa' atet otereterr:

—Ñerra'm Partseshacha' chate' e'ñe cohuen muenpa' ñeñtepñapa' correrrach.

13 Ñehua, Jesús'pa' añ otenanet atto Lázaroñ'pa' čhoca'ye rromuen; ñetñapa' čha otenapuetañ añte' otenanet ñeñt atto čhocma e'ñe yemuen beñatotey.

14 Allempoña Jesús'pa' alla otterraneterr attoch e'ñe eñochet:
—Te'pa' po'ñočhca'ye o' rroma Lázaroñ.

15 Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa' attoch e'ñe cohuen same'ñerrna. Ama'tpa' te'pa' o'ch ahuey Lázaroñesho, o'ch yenteña'.

16 Tomásña ñeñt otenet Epanesha' ñapa' atet otan po'potantañ ñeñt parro yochreshatsocmuet:

—Ama'tpa' ahuanmapo'ch yerromuepa' yaña epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

17 Allempoña čhap Jesús all, ñapa' eñotos o'ca'ye pa'tatsmat pampa'huet.

18 Ñehua, Betania allame'ttsaña Jerusalén —o' ma'pama kilómetro attoch yečhap Jerusaléno.

19 Allñapa' shonte' judionesha' ñeñt huačheta allo'tsen Marta epuet pa'mo'nerr María ñeñt'cha' emya'tenahuet atto ya'na'teñet po'sayañet Lázaroñ ñeñt o' rromuerr.

20 Allempoña Martapa' e'mare'tan Jesús o' huena ñaña'pa' alenta ahuo' o'ch poctenan Jesús. Maríañapa' allo'tsena pocollo all anen.

21 Martaña allempo poctenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña nesayañ.

22 Ama't te'pa' napa' neñoteneḡ ñerra'm erra'tsencha' penam̃ Yepapar, ñapa' čhocmach atet ḡonaḡ.

23 Jesúsñapa' atet och:

—Po'ñočhpa' tanterrach pesayañ.

24 Martañapa' atet otererr:

—Po'ñočh napa' neñoteñ tanterrach esempohuañen allempoch atantatareḡey allohueney.

25 Jesúsñapa' atet otererr:

—Napa' na ñeñten e'ñe po'ñočh atantatañen, napa' ñeñten alloch e'ñe socrena. Erra'tsencha' name'ñenaya na ama'tcha' rromuenetañpa' ñetpa' ellochña alla correrret.

26 Ama't ñama allohuen ñeñt corra'yetsa te' erra'tsencha' name'ñerraya na ñetñapa' corretsetach tayoteñ e'ñe errponañohuen. Papa' ¿ḡame'ñenna't ñeñt atet noteneḡ?

27 Martañapa' atet otererr:

—Partseshacha' napa' neñoteneḡ e'ñe po'ñočh ḡapa' ñeñteḡ Cristotsets, ḡapa' Yepapar Puechemereḡ, ḡa atarr yecuen ahuatoteñ o'ch pehuapa arr patsro.

Allempo Jesús yahuosa Lázaroñ puepampro

²⁸ Allempo atet otuepa' ñapa' allenta ahuerp pocollo, atet otuerran pa'mo'nerr María, ñeñtpa' atet och a'nahua:

—Te'pa' o' huena Maestro, o' agotatueneḡ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús.

³⁰ Ñehua, Jesúsapa' ama čhena' anetso, allo'tsenara all pocteñ Marta.

³¹ Judionesha'ña ñeñt allo'tsa'yen pocollo ñeñt emya'tene' ñetñapa' enteñet atantoche' María puema'yoreñ čha'nem ñetñapa' allenta cota'huanmet. Ñetpa' čha otenapuetañ ar-cha' ta po'sayañ puepampro o'ch ya'na'teña'.

³² Allempoña čhap María allo'tsen Jesús, all entospa' concorposa pa'rrpoḡ. Ñapa'čho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña nesayañ.

³³ Allempo entosan Jesús all atarr yahuena María ñaña judionesha' ñeñt cotose' ñetpa'čho'ña e'ñe parro attecma yahuanrrortenet, ñañaapa' pueyočhropa' atarr llecapretosanet ñeñto'marña čha enarosa.

³⁴ Ñañaapa' atet otapanet:

—¿Erra'tña sepampuer?

Ñetñapa' atet ochet:

—Ñehua, Ayochreshate o'ch ahuey o'ch penteña'.

³⁵ Allempoña Jesúsapa' yahuosa ñaña.

³⁶ Judionesha'ñapa' otyeset:

—Ñapa'čho' atarrepa'tca'ye morrenteña.

³⁷ Puesheña'tetsñapa' atet otyeset:

—Añmapa' ñeñtca'ye cohuaterre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreñña Lázaroñ.

Allempo Jesús tantaterran Lázaroñ

³⁸ Jesúsña e'ñe puellquēñoḡpa' enarerrerr. Allempoñapa' čhap puepampro all mapuetpono e'ñe all yottanñpeñet mapyo.

³⁹ Allñapa' atet otosanet Jesús:

—Te'pa' sa'rroḡe't mapue' a'yeneḡ.

Martaña ñeñt arromñaḡ po'čhpa' atet oterranerr Jesús:

—Partseshacha' o'te' čha poñaña' o' pa'tatsmat pampa'huet.

⁴⁰ Jesúsñapa' otererr:

—Ama'tña napa' o'ca'ye notuoseḡ ñerra'm pame'ña'nachpa' pentoñcha' Yompor po'partsoña.

41 Allempoñapa' a'rrote'tet mapue' a'yenet, Jesúsñapa' co-hua' enonet atet ot:

—Apa, neparasyoso'taḷ tarro'mar te' ḷapa' pe'mñotenen ñeñt atet nenamuenep̄.

42 Ñehua, napa' neñoteñ chocma pe'mñotenen. Añña acheñenesha' ñeñt tomcha'tets arr ñocpuet neparasyoso'teneḷ allochñapa' attoch eñotenpet ḷa ñeñteḷ nellsensene'.

43 Ñeñta otuapa' allempoñapa' rrana huomencpa' atet ot:

—¡Lázaroñe, te'pa' o'ch notaḷ petantena, pecha'nen!

44 Allempoñapa' chepa'tcha' cha'netsña Lázaro ñeñt o'rromhua, epota'tareḷ poto ñaña pa'rrp̄ot, ñaña pa'clloyotpa' e'tacle'chareḷ pañello. Jesúsñapa' atet oterraneterr:

—Te'pa' chosañaca'ye toram̄perre' esheccha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

45 Allempoña shonte' judionesha' ñeñt cotose' María ñeñt ente' Jesús atto orrtatosanet po'partsoña ñetpa'cho'ña e'ñe allempocma ame'ñeret ñamet Jesús.

46 Tarraña po'potantañechnoñapa' ahuanmuet fariseoneshesho ñetñapa' serrpare'tatoset fariseonesha' ñeñt atet o' ḷohua Jesús.

47 Allempoña fariseonesha' ñaña ñeñt pa'mcha'taretnesha' pen allohuen judionesha' po'cornaneshar, ñetñapa' apchachet allohuen ñeñt a'pocstatene' ñoñets judioneshacop. Ñetña allempopa' atet otyeset:

—Errotuachñaca' yepe'ña, ñeñt yacmarpa' chocmaca'ye orrtatyenonet partsoteñets.

48 Ñerra'm atta yequechpue' allohuenña acheñenesha'pa' chate' ame'ñyet ña, allempoña po'ñochpa' chate' huapa añcha'taretnesha' romo'marnesha' chate' puer-ratam̄psosyet Parets pa'paquell ama't ñeñt anareḷ Partsocop, ama't e'ñe ya ya'netserpa' chate' puerratam̄psosyet.

49 Puesheñarrñapa' ñeñt sochetsa Caifás allempopa' ñeñt pa'mcha'tareter pen allohuen judionesha' po'cornaneshar ñaña' atet otanet:

—Sapa' ama es señoteno, ama't coñe'ta.

50 Ama't pocte' senteñeña ñerra'm puesheñarr yacmapa' o'ch rroma allohuen acheñeneshacop, allochñapa' allohuen yamo'tsna'tarpa' amach chenca'huerreto.

51 Ñapa' ama ñoñaye' eñosoña atet. Ña allempopa' ñeñt pa'mcha'tareter pen allohuen judionesha' po'cornaneshar

ñeñto'marña ñapa' Parets eñosate'. Ñapa' añ a'potanet atto Jesús pa' ñach rromuerrets allohuen pamo'tsna'tarneshacop.

⁵² Amach e'ñe ñapña pamo'tsna'tarecpayaya rromoña Jesús, añeçpa'nachña rroma allohuenacop ama't erra'tsencha' puechemer perr Yompor arr patsro, ñachña parrocmataterrahuet.

⁵³ E'ñe allempoteñña atarr o'pateñet Jesús o'ch muetsatachet.

⁵⁴ Ñeñto'marña Jesús pa' o'huañ chopeñe'ch allo'tsa'yen judionesha' all Judeo. O' ahuo' amayarero'mar, çhap paterr anetso ñeñt pa'so'cheñ Efraín. Allña pa' alla a'posa epuet pueyochresha'.

⁵⁵ Allempoña o' çherrmoçherr pascuapo allempoch alla cosherrerr judionesha'. Allampaño'marnesha' ñeñt allo'tsa'yenet shontet ahuanmuet Jerusaléño. Ama çhena' pascuapo ñetpa' añecopña ahuanmuet attoch a'cohuentatset e'ñe ñetañeña Partsocop.

⁵⁶ Ñetña pa' Jesús a e'noset, a'pto'tanna'tyesoset allempo tomçha'toset Parets pa'paclo; allña pa' otanna'tyenet:

—¿Erroña't sotenña sa, ta'm huapachña Jesús, ñato' amach huapña arr?

⁵⁷ Ñehua, ñeñt pa'mçha'tareternesha' pen allohuen judionesha' po'cornaneshar ñaña fariseonesha' ñetpa' atet otyeset acheñenesha':

—Ñerra'm eseshascha' eñote' erro'tsente'ña Jesús pa' o'ch sotey ya allochña pa' o'ch yermach.

12

Atto puesheñarr coyanesha' pa' a'yatca'tosan Jesús eñmosaño (Mt. 26.6-13; Mr. 14.3-9)

¹ O' pechapmataña o'ch çhapa'muen pascuapo, Jesús pa' alla çherr Betanio. Allña pa' allo'tsen Lázaro ñeñt rromats ahuaña ñeñt alla tantaterr Jesús.

² Allña pa' all rrallme'chatneñet. Martaña pa' ña nenahuet rreñets. Lázaroña pa' ña rrets epuet Jesús ñaña po'potantañeçhno.

³ Allña Mariapa' chetan puenñarr eñmosañ ñeñt otenet nardo puese' e'ñe ñeñtoche' ñeñtña pa' atarr tsa'te'. Ñaña pa' alloña a'yatca'tan Jesús. E'ñe ña pue'chopa' alloña a'porrarratquër. Ñeñtña pa' ora eñmosañtatan pocollohuen.

⁴ Judas Iscariote ñeñt Simón puechemer ñeñtara pueyochreshar ñeñtcha' pomuerre' ñaña pa' atet ot:

⁵ —Eso'marte'ña añ eñmosañ pa' ama çhoye'ña yepome, çhochñaçho' yepomeña pa' yeganañcha' shonte' quelle

ñeñt̄ trescientos denario allempopa' yapa'yeseñcha' huocchañneshachno ñeñt̄ atarr es pallta'yetsa.

6 Ñapa' ama puellquëñofoye' huocchañneshachnocop atet oto. Ñapa' tarro'mara atet ot, ñapa' atarrca'ye eñet. Ñapa' e'ñe ñacma anmanpene' quellayepo'r ñeñt̄ allohuenacop, ñapa' allotña etenña quelle ñeñt̄ esha'tenet all.

7 Tarraña Jesúsñapa' atet otanet:

—Semnachñaca'yeña coyanesha' ñeñt̄ atet penen. Ñapa' añecop añño'tennan ahuatoteñ eñmosať tarremphua allem-poch a'yana'terrneterr ñeñt̄cha' epuet pampa'pesnet.

8 Tarraña ama'tcha' cho pomosaneñ eñmosať alloch es apa'yeseñ huocchañneshachno, tarraña chocmachca'ye eñallña huocchañneshachno arr patsro. Tarraña nañapa' po'ñoçpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

9 Shonte' judionesha' allempo e'mare'chet o' alla çherr Jesús all Betanio, ñetñapa' huaçha'tet. Ama e'ñe ñapťecpa Jesúsocop huaçha'teto o'ch enteñeta', añecpa'naña huaçha'tet o'ch enteñeta' ñaña Lázaro ñeñt̄ rromats ahuaña ñeñt̄ tantaterr Jesús.

10 Ñeñt̄ña pa'mcha'tareternesha' pen allohuen judionesha' po'cornaneshar ñetñapa' añe'na o'patenet Lázaro ña'nach muetset.

11 Tarro'mar allempo tanterra Lázaro shonte' judionesha' ñeñt̄ ame'ñaya Jesús ñeñt̄o'marña ñetpa' o' queçpa'hueretña ñet po'cornaneshar.

Allempo çhap Jesús Jerusaléño

(Mt. 21.1-11; Mr. 11.1-11; Lc. 19.28-40)

12 Tsapaña shonte' acheñenesha' ñeñt̄ shontetsa pascuacop Jerusaléño, ñetñapa' e'mare'teñet Jesús o' çhappoch ñaña Jerusaléño.

13 Ñetñapa' tсорro'tyesnomuet shequëpan ñeñt̄ anemyeset allo topanetyesnomuet toñ allcha' oñmos Jesús. Ñetñapa' puerranarshet ahuanmuet o'ch poctet Jesús ñeñt̄pa' atet otyesnomuet:

—¡Acsherrapo'ch allohueney! ¡Aye'choçtaterrapo'ch Jesús ñeñt̄ llesensen Yompor! ¡Aye'choçtaterrapo'ch Jesús ñeñt̄cha' Pa'mcha'tareter perr israelnesha'!

14 Ñehua, Jesúsñapa' all entnoman paterr ashnatollpa' alenta monta'nma allo. Ñeñt̄pa' añecop atet pa ñeñt̄ atet auareť ahuatoteñ e'ñe ñocop, ñeñt̄ñaapa' atet oten:

15 Amach çha semcha'tatsto síono'marneshacha' ñeñt̄arasa jerusaléño'marneshas. Secue'tach te'çca'yeña huaponasaña ñeñt̄cha' Sa'mcha'tareter seperr. Ñapa' añaca'ye monta'nena ashen rre'ptorechor.

16 Ñehua, ñeñt ñoñets allempoña pueyochresha'pa' ama çhapaneto pueyoçhreto. Tarraña tsapatonetña allempro roma Jesús, o' alla tanterra alla ahuerr pue'ntaño all atarr cohuentatapuer Pompor, ñetñapa' allempañña çherranetña pueyoçhreto te'ña po'ñoçhpa' o'ca'ye etsoterra e'ñe atet anuaret ñocop ama't ahuotoñeñ.

17 Acheñenesha' ñeñt allo'tsa'yen allempo çhore'tenan Lázaroñ puepamproñ atto tantater, ñetñapa' ñeñña a'poñayeset.

18 Ñeñto'mare'naña ahuanmaña shonte' acheñenesha' o'ch poctet tarro'mar ñetpa' o' e'mare'chet ñamet ñapa' orrtatenanet po'partsoña.

19 Allempoña fariseonesha'pa' atet otanna'tyeset:

—Señchfe'ca'ye'm yapa' amate' erroñ es yeño ama't coñe'ta. Secue' shonte'ca'ye ñaña acheñenesha' erraparenot o' e'ñe cota'huanmet.

Allempro griegonesha'pa' mueneñet o'ch eñchet Jesús

20 Patanta'tets griegonesha'pa' ahuanmuet ñamet o'ch coshapreteneta' pascua; ñetpa' añecop ahuanmuet o'ch concorposet all.

21 Ñetñapa' ponmosyet Felipe ñeñt betsaido'marnesha' ñeññara galileo'marnesha'. Ñeññapa' atet otoset:

—Nomporca' yapa' añca'ye yemnen o'ch yeserrpare'tos epay Jesús.

22 Felipeñapa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús.

23 Jesúsñapa' atet otapanet:

—Te'ña po'ñoçhpa' o' etsoterra allempoch na Ñeñten Acheñetosetspa' o'ch alla cohuentaterren Nompore.

24 Ñeñtpa' e'ñech po'ñoçh atet netma'ntatasa atet pena puerets. Ama't erra'tsena puertsor ama çho pampallme'cho patso allcha' puetsohua pa'tall ñeññach patrara pue'llomer. Tarraña ñerra'm çho pampallme'cha patso allcha' puetsa' pa'tall attoçhña chop. Ama't puellñarra pampallme'chatsa atarrcha' aton ellomñe'terr. Ñeñtpa' añ notenes e'ñe pocte' o'ch nerroma na ñeñten puesheñarrana attoçhña shonterra ñeññcha' name'ñerraya.

25 Ñeñto'marña notenes: Ñeñt atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeñña pocreña atarr morrentena, ñeñt atet petsapa' çhach a'chencatena e'ñe ñañeña. Tarraña ñeñt ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreñoñhuen, ñeñt atet petsa ñetñapa' corretsetach pocsheñeshocmañen tayoteñ e'ñe errponañhuen.

26 Ñerra'm esesha' muenats o'ch torrenet nocop, co'ta'netepa' attochña e'ñe neyochresha' neperranet. Tarro'mar ñerra'm erro'tsenencha' na ñeñt torretsa nocop ñetpa'cho'ña allo'tsenetcha' ñamet. E'ñe allohuen erra'tsencha' torrerrtsa nocop, Nomporna'pa' atarrcha' cohuentaterranet.

Allempo Jesús eñotatanet ñapa' choch muetseret

27 'Te' na neyo'chropa' cha atarr nellquëna. Tarraña ama't atteña' Nomporna napa' amach cha notatsche amach muenatano o'ch huapona ñeñt atarr amuero'chtatañ nenten. Ñeñt atetpa' amach notatsche tarro'marña napa' ñeñtecopca'yeña nohuapa nach amuero'chtatarettertsa. Añcha'ña noch Nomp-

28 —Te'pa' pepa'chña Apa aye'cho'chtatarettertsa.

Allempoña'pa' cha e'morrtatsa ñoñets entot, Yomporna'pa' atet ot:

—Napa' o' necohuentatua, elloña o'ch alla necohuentater-rerr nañeña.

29 Shonte' acheñenesha' ñeñt tom'chets all, ñetña atet e'mueñetpa' atet otyeset:

—Chote'ca'ye tecorena.

Po'potantañña'pa' atet otyeset:

—Añca'ye eñorana'tenaya Yompor po'mllaño'teñer.

30 Jesúsña'pa' atet oterraneterr:

—Ama nocpaye' huenoña añ ñoñets. Ñeñtpa' e'ñe socop huena.

31 Te'pa' o' anaretta allohuen acheñenesha' arr patsro ñeñt ama name'ñenaye ñetpa' amñare'tterretcha' coñcheñtso. Ñaña oneñeñ ñeñt pa'm'cha'tareter pen acheñenesha' arr patsro, te' ñocoppa' o' anaretta ahupore'tare'tterrach esempohuañen.

32 Na ñerra'm esempoch echantañperrnet corsocho allem-poña napa' ne'chore'tercha' allohuen pa'namen acheñ attoch ame'ñerrnet.

33 Ñapa' añecopña eñorana'tenanet attoch eñotatanet ñapa' corsochoch rromuerr.

34 Acheñenesha'ña'pa' atet otyeset:

—Yapa' yeñoteñ añ ñoñets ñeñt atet anaret ahuatoteñ, ñeñtpa' atet oten ñeñtcha' Cristoterrets ñapa' ama arromña'feshayaye ama't errponaña. Ta', ¿eso'marte' pañapa' p'oten ñeñte'p o' Acheñetosetspa' echantañpsarete'po'ch corsocho allcha' perromuerr? Ta', ¿esesha'te'ña ñeñt po'ño'ch Acheñetosets? amapa' ¿ñeñtarate' ñeñtcha' Cristoterrets?

35 Jesúsña'pa' atet oterraneterr:

—Mameshaña palltena arro'tsenmeñen na ñeñten a'puetarsañpsañtetsa. Soctape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsañperre'

soctapña allochñapa' attoch amach čha sechenca'huerro. Po'ñočh ñeñt ama ame'ñetso ñetpa' ama eñoteñeto attoch chenca'huerret. Ñeñto'marña ñetpa' e'ñe atet penet ñerra'mrrate' checmeta chope'chenet ama eñoteñeto errenetcha' tet.

³⁶ Na ñeñten sa'puetarsam'pene' soctapña'pa' te'pa' arro'tsenmeñen. Soctape'cherrnan neñoñ tayepa'tña'pa' arro'tsenmeñen. Allochñapa' o'ch seyečhquerra sa acheñes ñeñtescha' atarr cohuen orrtatyerre' ñeñt cohuen enten Yompor tarro'mar sapa' e'ñech puetaró socrrena.

Otua Jesús atetpa' ahuerr a'nahua; acheñenesha'ñapa' ama eñocheto errate' ahuerr.

*Atto judionesha'pa' ama ame'ñyeto Jesús ñeñtpa' añ etsoter-
rtsa ñoñets ñeñt anaretet ñocpuet*

³⁷ Jesús'pa' ama't shonte' orrtatyenenet po'partsoña tarraña amaña eseshaye' ame'ñenayoña ña.

³⁸ Ñeñtpa' attoca'yeña etsotaña Isaías po'ñoñ ñeñt a'mtaye't ahuat Yompor po'ñoñ. Ñeñtpa' atet ote't ñocop:

Amach Nomporcha' eseshaye' yame'ñayo ñeñtcha' atet yeser-
rpare't. Ama Nomporcha' eseshaye' poctenaye pa pe-
huamenc.

³⁹ Ñeñto'marña amate' errotenet ame'ñeto. Tarro'mar ellonet Isaías'pa' atet ote't:

⁴⁰ E'ñe patpare'teño'tet Yomporñapa' muenatanet o'ch echarttet pueyočhret. Attochña ñetpa' čhach ottenet ñerra'm aporo'yetet ñeñt ama es enteno. Ñeñto'marña ama muenatenaneto o'ch es entet taye'to'te' čhapanet pueyočhreto. Ñeñto'marña ama't mameshapa' amach es cotape'cheneto nocop attoch na'queshp'aterranetañ.

⁴¹ Isaías'pa' tarro'mar atet ote't ñapa' e'ñe entane't Cristo po'cohuenña ñeñto'marña eñose'tña ñocop.

⁴² Tarraña shonte' acheñenesha' ñeñt ame'ñaya Jesús ama't ñaña añcha'taretečhno. Tarraña ñetpa' mecha'chete't fariseonesha' ñeñto'marña ama a'metete'te. Añ mecha'tenet taye'to'te' mueño'tanet judionesha' po'prahuot.

⁴³ Tarro'mar ñeñt ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña mueneneto o'ch e'ñe cohuen entanet Paret.

*Atto Jesús po'ñoñ ñeñtcha'ña otteñe'cherre' acheñenesha' es-
empohuañen*

⁴⁴ Jesúsña rranapa' atet oterrerr:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nompor ñeñt nellsensene'.

45 Esesha' nentene' napa' añe'naña entenet ñaña Nompör ñeñt' nellensene'.

46 Napa' añecopña nohuapa arr patsro nach a'puetarsam'pene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt' checmeto'tsena ñetpa' ama eñoteñeto ñeñt' cohuen enten Yompor.

47 Ñerra'm esesha' e'mue' neñoñ tarraña ama't ama ame'ñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemños acheñenesha' coñcheñtso. Napa' añecopña nohuapa o'ch na'queshp'atos acheñenesha' arr patsro.

48 Esesha'chña nachmene' ñeñt'cha' ama ame'ñerraye neñoñ, ñocpuetñapa' eñall attoch amñare'tterret coñcheñtso. Ñeñt'ara añ ñoñets ñeñt' neñen na te'pa' ñeñt'cha'ña mueñaterrahuetña coñcheñtso esempohuañen.

49 Tarro'mar napa' ama e'ñe notaye' neñeno. Apaña ñeñt' nellensene' ñapa' ñaña notene' atetcha' notas ñaña atetcha' ne'ñorana'tasa.

50 Napa' neñoteñ ñeñt' atet otenen ña ñeñt'pa' ñeñt'cha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt' atet neñen napa' añca'ye neñen ñeñt' atet otenen Apa.

13

Allempo Jesús'pa' e'patca'tyesan pueyochresha'

1 Ama't ama čhena' pascuapo allempoch cosherrerr judionesha', Jesúsñapa' eñoteñ e'ñech ñeñt'eshaña allo'tsen arr patsro o'ch ahuerri Pomprosho. Ñapa' čhocma atarr morrentenana allohuen ñeñt' pueyochresha' pen arr patsro. Ñeñto'marña allempopa' e'ñe poctacma morrentuenanet.

2-4 Ñehua, Judas Iscariote ñeñt' Simón puechemer, oneñeñapa' ahuepa't cotape'chach pueyočhro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yomproshotca'ye huapa, elloñapa' o'ch alla ahuerri ñesho. Ñeñto'marña allempo rrallme'chneñet Jesúsña o' tompa' rrotana pa'terr pa'shtam ñeñt' nen enot o' chetan pa'terr e'shmoco'tametspa' o' chana allo.

5 Allotñapa' o' shan oñ huantejo alloña e'patca'tyesañña pueyochresha'. E'shmoco'tañtsoñapa' alloña a'porrarra'tcayerranet ñeñt' allo chanena.

6 Atteñapa' ponmana Simón Pedro, ñaña'apa' atet och:

—Partseshacha' amaca'ye pocteyaye o'ch pe'patca'tonña netac. Tarro'mar p̄apa' p̄a atarr sherbets, napa' amaca'ye esoyayno.

⁷ Jesúsñapa' atet och:

—Ñeñt atet nepenes te' sapa' amach señoche. Esemppopa' chaponasach seyoçhro.

⁸ Pedroñapa' atet otererr:

—Ama't ahuata napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntatap̄.

Jesúsñapa' atet otererr:

—Ñerra'm amach ne'patca'tapepa' amach errotenoç e'ñeye' peyemtenno.

⁹ Simónña Pedropa' atet otererr:

—Ñerra'm po'ñoçhte' atet Partseshacha' amachña ñap̄ta netac pe'patca'tono nota'nachña e'ñe ora noñohuen.

¹⁰ Jesúsñapa' atet otererr:

—Ñeñt o' apuapa' amaca'ye es pallteneto, añaca'yeña palltenet o'ch e'patca'chet. Atet sepena sa a'cohuentatuaretes sa soçtaṗñoç. Sapa' e'ñe cohuen a'cohuentatuareteseñ tarraña ama allohuenacmaye' a'cohuentatuareteso.

¹¹ Ñehua, Jesúsapa' e'ñe eñotenan ñeñtcha' pomuerre' ñeñto'marña atet otanet: “Ama allohuenacmaye' a'cohuentatuareteso.”

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoñapa' atet oterraneterr:

—Te'pa' o'ch neñotatas ñeñt neyçhatenes ñeñt atto ne'patca'tenes.

¹³ Ñehua, sapa' sotenen Maestro, ñaña sotenen Partse-sha'. E'ñe pocte' po'ñoç sotenen tarro'mar po'ñoçhpa' ñeñtenca'ye.

¹⁴ Atto na ne'patca'tas sa, ama't na ñeñten Separtse-shar sepen ñaña Semaestror sepenen, sapa'çho'ña ñeñt e'ñe poctetsa socop se'patca'tanna'tepa'ch saña. Ñehua, ñeñt po'ñoç notenes, ñeñtpa' atet: Amach sañeña atarr cohuen entetso, attoçhña e'ñe cohuen sesherbannena.

¹⁵ O' neñotatas atetcha' seṗa saña. Sapa'çho'ña attepa'ch seṗa atet o' nepohuas sa.

¹⁶ Po'ñoçhca'ye o'ch notas: Ñeñt ayochreshat ñerra'm ama esoye' enteno ñañaña ama't e'ñe mamesha, ñeñtña pueyochreshaçhno pen e'ñepa'ch attecmuet amach esoye' enteneto e'ñe ñañañeta. Ama't na ñeñten allsensareten ama esoye' nenteno ama't mamesha, ñeñtcha' nellensa'yes nanapa' amuepa'chña esoye' enteneto e'ñe ñañañeta.

17 Ñerra'm ñeñña sechاپoya seyočhropa' ñeññ atet neyčhatenes, sañapa' atarrcha' cosheñtso'tsenes ñerra'm e'ñe po'ñočh atet sephoua.

18 'Ama allohuenacpayaysoye' neñeno. Napa' neñotenes e'ñe puesheña'ttsospa' atet soctape'chyen seyočhro. Ama't neñotensoñ atteseñpa' tarraña e'ñe atta na'cerrerres allochñapa' attoch etsoterra Yompor po'ñoñ ñeññ atet anuaret nocop ahuatoteñ, ñeñtpa' atet oten: "Ñeññ parro yerrallme'chenpa' ñepa'tcha'ña tanterrtsa nocop."

19 E'ñe tayoteñpa' atet notenes ama't ama etsotena' allochñapa' esempoch etsoterra, sapa' same'ñach napa' ñeññen po'ñočh Cristotets.

20 Po'ñočhca'ye o'ch notas: Ñerra'm esesha' e'ñe cohuen aguëne' ñeññ nellensen na ñetpa' na'naca'yeña aguënet e'ñe cohuen. Ñaña ñeññ e'ñe cohuen naguëne' na, ñetpa' Nompore'naca'yeña aguënet ñeññ nellensene' na.

Allempo Jesúsapa' eñotatanet Judaspa' ñach pomuerre'
(Mt. 26.20-25; Mr. 14.17-21; Lc. 22.21-23)

21 Jesúsña allempo atet otuapa' pueyočhroñapa' čha lleca'huena. Allempoñapa' atet otanet:

—Po'ñočh te'pa' o'ch notas, puesheñarrotes sapa' ñeñtescha' nepomuerre'.

22 Pueyočhresha'ñapa' allenta cohuanna'tyeset. Amaña esesha' eñotaye erra'tsenacopte'ña eñen.

23 Puesheñarrña pueyočhresha' ñeññ atarr muerena Jesús, ñañaapa' e'ñe epuet Jesús anen all rrallme'chenet parro.

24 Ñeñño'marña Simón Pedropa' agotan ñeññ anets epuet Jesús, ñeñtpa' atet och:

—Ñehua, pa'p'to'ch yemaestror erra'tsenacopte'ña eñorena ñeñtcha' pomuerre'.

25 Ñañaapa' e'ñe allame'ttsa atet otan Jesús:

—Partseshacha' ¿erra'tsenacpa'tña pe'ñorena ñeñtcha' pepomuerre'?

26 Jesúsñapa' atet och:

—Ñeñtcha' nap añ pan ñeñtcha' ne'čhoma' ñeñtcha'ca'yeña nepomuerre'.

Allempoña e'čhoman panpa' apan Judas Iscariote ñeññ Simón puechemer.

27 Allempoña aphue panpa' allempocmuepa't chorrya oneñeñ. Jesúsñapa' atet och:

—Errotente' pepa'chpa' e'ñeñaca'yeña tayecma atet pepe'.

28 Pueyočhresha'ñapa' ama't puesheñarra ñeññet allo'tsa'yenet, ñetñapa' ama eseshaye' eñotaye esocopte' atet otenan Judas.

29 Puesheña'ttsetpa' čha otapuetañ Jesús'pa' ñato' añte' oteñ o'ch rañtenana' ñeñt muenenet allcha' coshapretet, tarro'mar Judaspa' ñaca'ye anmape'cham'pene'ña quellayepo'r. Amapa' ñato' añte' oteñ o'ch es apa'yesan huocchañneshačho.

30 Allempoña Judaspa' agapuan panpa' allenta čha'nerr. Allempopa' o' tsapuen.

Atet'cha' yepa ñeñt e'ñe etserra, yemueranna'tepa'ch

31 Allempoña Jesús čha'nompa' atet oterraneterr:

—Te'ña po'ñočpa' e'ñe čh'apmoch allempoch cohuentaterrnan Parets na Ñeñten Acheñetosets. Attoch'ña napa'čho'ña necohuentaterrñañcha' Nomp'or Parets.

32 Atto napa' necohuentaterrñañ Nomp'or Parets, ñapa'čho'ña cohuentaterrnancha' na, ñeñtpa' e'ñech mametolla o'ch e'ñe cohuentaterrnan.

33 Jesúsñapa' alla oterraneterr:

—Na'cñeñarneshacha' o' e'ñe coñe'tama pallta allo'tsenmeñencha' na e'ñe arr parro. Napa' o'ch ahuerren. Allempoña sapa' se'nerrna'ch. Atet noteñ ahuaña judionesha', allcha' neserr napa' sañapa' amach errotenot sečh'apo, te'pa'čho' sapa' e'ñe atet notenes.

34 Ñama o'ch notas atet'cha' sepannena ñeñt e'ñe etserra: Semueranna'tepa'ch. Atet nepenes sa atarr nemuerensa, sapa'čho'ña atarrepa'chña semuerannena.

35 Alloch'ñapa' e'ñe semorrentanna'teñočpa' eñotasetcha' sapa' sa e'ñe po'ñočh neyochreshas.

Atto Jesús'pa' eñotatan Pedro ñapa' čhocmach a'nasocha (Mt. 26.31-35; Mr. 14.27-31; Lc. 22.31-34)

36 Simónña Pedropa' atet och:

—Partseshacha' p'apa' ¿erra'tcha'ña peserr?

Jesúsñapa' atet och:

—Allcha' neserr napa' p'apa' amach errotenot pocta'noña na te'. Esempona po'ñočpa' ama't chenta seserrcha' saña.

37 Pedroña'pa' atet otererr:

—Partseshacha' ¿eso'mare'tcha'ña ama tayecma nocterrpe? Napa' e'ñe pocte' nenteñ yerromuepa' e'ñe parro.

38 Jesúsñapa' atet otererr:

—¿Po'ñočha't e'ñe pocte' penteñ o'ch yerroma parro? Po'ñočca'ye te' napa' o'ch notap: Amach eñena' atollop pañapa' o'ch ma'poch pa'nasotenna.

14

Jesús'pa' ña toñetets alloch yečherr Yomporesho

¹Jesús'pa' alla oterraneterr:

—Seyoçhropa' amach çha sellcatsto. Atto seyemteña Yompör napa'çho'ña çhoña seyemterrna.

² Nompör pa'netsro all pue'ntaño allpa' shonte' pocoll allcha' seyçha'huerra. Ñerra'm ama atteñepa' napa' amate' notasñe. Ñeñto'marña napa' o'ch ahuerren attoch nañño'tuerrnas allcha' seyçha'huerra.

³ Ñerra'm o'ch ahuerren napa' nañño'tuerrnascha' allcha' seyçha'huerra. Ellochña nohuerrerrpa' allempochña e'ñe nahuerrsa' nesho allochñapa' allo'tseneycha' e'ñe parro.

⁴ Sapa' e'ñe señoiteñ allcha' neserr ñaña e'ñe señoiteñ attoch seçherr samña all.

⁵ Tomásñapa' atet och:

—Ayochreshate yapa' amaca'ye yeñotenpe errachña peserr. Errotenotuachca'ye yeñoçhte' attoch yeçherr yaña.

⁶ Jesúsñapa' atet och:

—Napa' na toñetets ñeñten alloch seçherr Yomporesho, napa' na ñeñten sotene' ñeñt e'ñe po'ñoçh Yompör po'ñoñ, napa' na ñeñten alloch e'ñe socrena. Amach esesha' çherrtso Yomporesho ñerra'm ama nanom ame'ñerreto.

⁷ Ñerra'm o' señoterrnoñ na, Nompore'nate'ña señoiterreñ. Tayoteñña e'ñe po'ñoçhpa' o'ch señoiter tarro'mar te'pa' o' senter.

⁸ Felipeñapa' atet och:

—Partseshacha' pegatey ñeñt Apa, yapa' o' ñeñtamña yepallta o'ch yeñoçh.

⁹ Jesúsñapa' atet och:

—Felipe, ahuatoteñ napa' allo'tseney parro. Pañapa' ¿ama't peñotenno? Ñeñt puentaren napa' Apa'naca'yeña o' enterret. Eso'mare'tña potenen o'ch negatañ Apa.

¹⁰ Papa' ama'tña pame'ñenno napa' e'ñe neparrocmaten epan Apa, Apapa'çho'ña e'ñe parrocmatenna. Ñeñt atet notenespa' ama notaye' atet notenso. Apaña ñeñt neparrocmaten, ñapa' e'ñe etsotatennan ñeñt atet neña'yen.

¹¹ Same'ña'na ñeñt notenes, napa' e'ñe neparrocmaten epan Apa, Apapa'çho'ña e'ñe parrocmatenna. Ama't napa' ama ame'ña'poye' sentenno tarraña atto po'ñoçh norrtatyeññañ Nompör po'partsoña ama't ñeñtapa' same'ñyañaca'ye.

¹² Po'ñoçhca'ye o'ch notas, ñerra'm esesha' name'ñerraya ñetpa'çho'ña elloch atarr cohuen orrtatyerret ñeñt atet norrtatyen te'. Tarro'mar na te'pa' o'ch ahuerren Apuesho.

¹³ Ñerra'm escha' senamuen e'ñe na neso'chño e'ñe seyemteñoten na, napa' e'ñech atet nepennas. Attochña na ñeñten Yompör Puechemerenpa' necohuentateññañcha' Apa.

14 Ñerra'm es senamuen e'ñe neso'chño e'ñe seyemteñoŋen na, napa' e'ñech atet nepennas.

Atto Jesúsapa' otnerranet o'ch mueñuerranet Parets Puecamquëñ

15 'Ñerra'm sa po'ñoŋh semorrentennate'pa' o'ch same'ñerrnana neñoñ ñeñt atet notenes.

16 Napa' nenamonascha' Apa ñapa' apascha' po'psheñeñ ñeñtcha' soctape'chatterre' ñeñtcha'ña sechorrerraya errponañohuen.

17 Ñeñtña Yompor Puecamquëñ ñeñtcha'ña señoŋtaterre' ñeñt e'ñe po'ñoŋh Yompor poctapña. Ñeñtña ama ame'ñetso arr patsropa' ñetpa' amach errotenot chorrerranetoña Yompor Puecamquëñ tarro'mar ñetpa' ama enteñeto ñaña amach eñoŋeñeto. Tarraña sapa' o' señoŋter tarro'mar ñapa' allo'tsenes parro epas allcha' chorrerrsa.

18 Napa' amach cha nehuocchapotatnerrso. Ellochña alla nohuerrerr sesho.

19 O' mameshamerra palltenmeñ ñeñtña ama ame'ñetso arr patsro ñetña' amach eseshaye' nenterraye, tarraña sapa' chocmach senterren. Tarro'mar napa' corretsana, ñeñto'marña sapa'cho'ña corretsasach.

20 Allempoch chorrerrsa Yompor Puecamquëñ allempochña señoŋter napa' e'ñe po'ñoŋh neparrocmaten epan Apa, sañapa' separrocmaterrnach, nañapa' neparrocmatennasach.

21 Ñerra'm esesha' e'mñoterre' neñoñ ñaña e'ñech atet perret ñeñt atet notenanet ñetña' ñeñtet e'ñe po'ñoŋh nemorrenenaya. Ñeñtña nemorrenenaya napa' ñetña' Apach atarr morrenenahuet. Napa'cho'ña atarr nemorrenenanet, nañapa' neñoŋtaterrenetcha' e'ñe po'ñoŋh ñeñt atet nepena na.

22 Allempoña po'psheñeñ Judas ñeñt ama añeyaye Iscariote, ñaña' atet och:

—Partseshacha' yapa' ¿eso'mare'tcha'ña te'pa' o'ch peñoŋtatey ya ñeñt atet pepena amachña añeye'ña peñoŋtato ñeñt ama ame'ñetso arr patsro?

23 Jesúsña' atet oterranneterr:

—Ñerra'm esesha'ch nemorrenenaya na e'ñechña atet perret ñeñt atet notenanet. Apañapa' atarrcha' morrenenanet. Ñeshetoña' yeŋchapcha' attoch yeycherra ñet pueyoŋchreto.

24 Ñeñto'marña ñerra'm esesha' ama nemorrenenaya amach atet perreto ñeñt notenanet. Añ ñoñets ñeñt atet se'muennan ñeñtapa' ama noyaye neñoñ, ñeñtapa' Apoña po'ñoñ ñeñt nellensene'.

25 'Añmapa' tarro'mar atet notenes tayepa'tñapa' allo'tsenmeñen na arr e'ñe sesho.

26 Tarraña Parets Puecamquëñ ñeñtcha' soctape'chaterre', Apapa' mueñernascha' e'ñe na neso'chño e'ñe seyemteñoŋen na. Ñapa' ñeñtcha' señoŋaterre'ña seyočhro ora allohuen ñeñt'čocma neyčhatenes te'. Ñaña ñeñtcha' seyerpaterraya allohuen ñeñt' atet notyesase't.

27 'Nocshateña nena'nernnascha' alloch e'ñe socsherra seyočhro, napa' čochña atarr nocshatterres seyočhro. Ñeñt' atet nocshatenes na seyočhro ñeñt'pa' ama atteyaye ñerra'mrrate' añ patso'mar cosheñets. Ñeñto'marña seyočhropa' amach čha sellca'peno ama't mamesha, amach čha es señča'teno.

28 Te'pa' o' se'mhue atet o' notuas, na o'ch ahuerren, ellochña alla nohuerrerr sesho. Ñerra'm po'ñočh semorrentennañ o'te' socshañ tarro'mar napa' o'ch ahuerren Apusho. Tarro'mar ñapa' nanac ahuamencatesha', ello metanenen na.

29 Te'pa' ama't ama etsotena', napa' o' notuas, allochñapa' ñerra'm esempoch etsoterra, sañapa' same'ñerach.

30 'Te' e'ñe parro'tseneypa' o'huañcha' allo'na neñosnen shonte'tarro'mar o' huapmocha oneñet' ñeñt'pa'mičha'tareter pen acheñenesha' arr patsro. Tarraña ama't o' huapañpa' e'ñe ñoŋapa' amach erroŋ' pōsno.

31 Napa' añcha'ña atet neŋa ñeñt' atet otenen Apa. Attochña acheñenesha' arr patsropa' eñochetcha' na po'ñočhpa' e'ñe nemorrenteña Apa. Te'pa' satomčha't o'ch ahuey arrot.

15

Jesús'pa' toma'ntata ñapa' ña uvachrečhmo'retets

1 Jesúsñapa' alla yečhaterraneterr ñapa' añ toma'ntata ña uvachrečhmo'retets. Ñeñto'marña atet otanet:

—Napa' na atten ñerra'mrrate' ñeñt'en uvachrečhmo'retets ñeñt' e'ñe po'ñočh cohuen sherbets. Nomporñapa' ña amre'tene' ñeñt' uvachrečhmo'r.

2 Sa ñeñtes neyemtenaya na sapa' attes ñerra'mrrate' uvachmo'r puetaquër. Allohuen puetaquër erra'tsen ñeñt' ama me'tetso, Nomporñapa' čochña pecham̄psoñ puetaquër. Ñaña allohuen ñeñt' me'tetspa' čochña pechtacre'tyeset mamesha'tets attoch e'ñe cohuen e'shtacre'chet allochñapa' attoch atarrcha' nanac me'ten.

3 Ñeñt' atet neserrpare'tatenes ñeñt' neñoñpa' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen.

4 Te'pa' atfoña separrocmatenna atfoña napa'cho'ña neparrocmatennasa. Atet pena tsachtaquër ñerra'm ama parrocmateno pue'chorot amach me'to e'ñe ñoña, sapa'cho'ña ñerra'm ama separrocmatenno amach errotenot seme'toña saña e'ñe soña.

5 'Napa' na atfen ñerra'mrrate' uvachrechmo'r pue'chor, sapa' sa puetacres. Esha' neparrocmaterre' ñaña napa' e'ñech neparrocmatenonet, ñeñtcha'ña nanac me'tats. Ñerra'm a'yo'tsensa neshot amate' errotenot sorrtyesoña ñeñt cohuen enten Yompor.

6 Esha'ch ama neparrocmaterraye ahupore'tarecha' atet ñerra'mrrate' tsachtaquër ñeñt ama me'tetso chochña pecha'tam̄psetña puetaquër o'ch e'ñe porrarrque'chua allem-pochña a'yapachetpa' o'ch chamuet tso allcha' poyua.

7 'Ñerra'm separrocmaterrna ñerra'm chocma soctape'chennan neñoñ escha' senamuen napa' napascha'.

8 Atto nanac cohuen seme'tenpa' ñeñtpa' allochña sec-ohuentateñañ Nompor tarro'mar sapa' añcha' sorrtyen ñeñt cohuen enten ña. Ñaña sapa' attochña eñoterres acheñenesha' po'ñoçh ñeñtes neyochreshas.

9 Atto Apapa' atarr nanac muerenna na, napa'cho'ña atarr nanac nemuerensa saña. Chocmuepa'ch seyemtennana ñeñt atto napa' chocma nemorrentensa.

10 Ñerra'm same'ñennana neñoñ ñeñt atet notenes e'ñech señotenen napa' atarr nemorrentensa. Atet nepena na e'ñe name'ñeññaña Nompor po'ñoñ ñeñt atet otenen, ñeñto'marña napa' e'ñe neñoteñ ñapa' atarr morrentenna naña.

11 'Añmapa' tarro'mar atet notenes allochñapa' ñeñt nosheña napa' coshaterrescha' saña. Allochñapa' sapa' o'ch e'ñe socsherra e'ñe poctacma.

12 Añña ñeñt notenes: Atarrepa'ch semorrentannena allohuenes atet nepena naña atarr nemorrentensa saña.

13 Añmapa' ñeñtña e'ñe po'ñoçh morrenteñets, o'ch ya'rroya yañeña o'ch yerroma añecop ñeñt atarr yemorrentyena.

14 Ñerra'm e'ñe atet sephuen ñeñt atet notenes sañapa' ñeñtes e'ñe neyemtena.

15 Te'pa' o'huañ atteye' nentenes ñerra'mrrate' ñeñt ya'taruasañer yepen, tarro'mar ñeñt ya'taruasañer yepen ñapa' ama eñotenanoña ñeñt atet cotape'chen pamo'mte'. Tarraña na te'pa' e'ñe neyem nepenes tarro'mar ñeñt atet ne'mueññañ Apapa' sapa'cho'ña o' neñotaterres.

16 Sapa' ama saye' na'crraye, napa' naña sa'crrerña sa. Atfoña o' napuerresña llesens attoch seta me'tarsats attoch e'ñe cohuen es sorrtyen ñeñt cohuen enten Yompor.

Ñeñt'pa' ñeñt'cha' se'mer seperr ñeñt'ña se'merpa' amach ahuañañat'erro ama't ahua'ta. Allochñapa' ama't erra'tsena senamueñ Apa e'ñe na neso'chño e'ñe seyemteñoñen na, ñapa' apascha'.

¹⁷ Añca'yeña notenes: Chocmuepa'ch atarr cohuen semor-rentannaena.

Allempo Jesús'pa' eñotatan pueyochresha' chomach e'moñe'tenanet acheñenesha' arr patsro

¹⁸ Jesúsñapa' alla oterraneterr:

—Ñerra'm acheñenesha' añ patsro e'moñe'tenset sapa' señoche'pa'ch na e'ñe nanom e'moñe'tenet.

¹⁹ Ñerra'm sa e'ñe parro attecma'señ ñeñt' ama ame'ñetso arr patsro, ñetñapa' e'ñe' cohuen muerensetañ tarro'mar e'ñeca'ye ñeñt'ena'tarecma's. Tarraña sapa' ama e'ñe attecma'ye' separro'marneshacmateno atet pena allohuen acheñenesha' ñeñt' ama ame'ñetso arr patsro. Sañapa' o' na'crreres ellonet nocop. Ñeñto'marña acheñenesha' añ patsropa' o' e'moñe'taset saña.

²⁰ Seyerpach añ ñoñsor ñeñt' o' notuas: “Allohuen ñeñt' yochreshats errotentcha' perrñañet ñeñt' yochresha'tenahuet, ñetpa'cho'ña e'ñech attecma a'pare'terret ñamet.” Atto napa' cotare'tennet pue'moñe'teño'tetan, sapa'cho'ña pue'moñe'teño'tetasp'a' cotare'tasetcha' saña. Atto napa' ama ame'ñerrnaneto neñoñ, sapa'cho'ña amach ame'ñerrnaseto saña señoñ.

²¹ Ñeñt'pa' atetcha' perrset tarro'mar sapa' naca'ye same'ñena tarro'mar ama eseshaye' eñotenaye Yompor ñeñt' nellensene'.

²² 'Ñerra'm ama nohuapañe amach neser-ppare'tatosanetañe, amate' eñallñeña attoch neyohua'yesanet po'chñaro'tet. Ñeñto'mar te'pa' ama eñalle attoch a'nasotet po'chñaret.

²³ Ñeñto'marña ñerra'm esesha' ne'moñe'tene' na, Nompore'ña e'moñe'tennanet.

²⁴ Ñerra'm amach norrtatanetañe cohuenñats ñeñt' ama't ahua'ta po'psheññechnopa' ama orrtatanete'te e'ñe attotapa' amate' eñallñeña attoch neyohua'yesanet po'chñaro'tet. Tarraña te'ña ñetpa' ama't e'ñe entennetañpa' chaña e'moñe'tennet ñaña Nompore'na e'moñe'tennanet.

²⁵ Tarraña ñeñt'pa' tarro'mara atet penet allochñapa' attoch etsoterra ñoñets ñeñt' e'ñe atet anuaret ahua'toteñ, ñeñt'pa' atet oten nocop: “E'ñech attota e'moñe'terrnet.”

²⁶ 'Ñeñt'cha' soctape'chaterre' e'ñe cohuen seyo'chro ñeñt'cha' nemñohuerrnas Apueshot. Ñeñt'pa' ñeñt'ña Apa

Puecamquëñ ñeñtcha'ña seño taterre'ña ñeñt e'ñe po'ño ch
Yompor poctap'ña tarro'mar ñeñtpa' Apueshot huena.
Ñerra'm esempoch çhaponasa ñachña na'po'tose'.

²⁷ Sapa'cho'ña sa'potancha' tarro'mar e'ñe allempoteñ
netorrosa, sapa' e'ñe allempoteñ parro'tseney.

16

¹ Ñeñtpa' tarro'mar'ña o' atet notuas allochñapa' amach alla
ello sepurrerro.

² Tarro'mar esempopa' çhapcha' allempoch huapore'tas
judionesha' po'prahuot. Po'ño ch çhapcha' allempo esesha'pa'
ñato' o'ch muetsaset çhach otenapuetañ ñetpa' allote' sher-
beñetña Yompor.

³ Ñeñtpa' tarro'mar'cha' atet p'aset ñetpa' ama eseshaye'
eñotenaye Apa ama't napa' ama eñotenneto.

⁴ Añechnopa' o' notuas allochñapa' ñerra'm esempoch çhap,
sapa' seyerpuerrnanach ñeñt atet notase't.

Atto Parets Puecamquëñ ñach yoctape'chatyese' e'ñe cohuen

'Ahuañmo'cha añechnopa' ama notase'te tarro'mar allem-
poteñpa' e'ñe parro'cma allo'tseney.

⁵ Na te'pa' o'ch ahuerren allo'tsen ñeñt nellsense'. Saña
ama't puesheñarrot'esapa' amaña sa'p'to'tenno, errachña ne-
serr.

⁶ Te'ña ñeñt atet notenes saña seyoçhropa' çhaña atarr
sellquëna.

⁷ Te'pa' añ notenes ñeñt e'ñe po'ño ch. Socoppa' aña nanac
poctetsa napa' o'ch ahuerren. Tarro'mar ñerra'm amach
neserro amate' errotenot huaponasoña Yompor Puecamquëñ
ñeñtcha' soctape'chaterre' cohuen. Tarraña ñerra'm ne-
serrcha' napa' aña' nemñahuerrnas Yompor Puecamquëñ
ñeñtcha' soctape'chaterre' cohuen seyoçhro.

⁸ Ñerra'm esempoch huapa Yompor Puecamquëñ
acheñenesha'ña arr patsropa' ñachña çhapatahuetña
pueyoçhreto attoch eño chet ñet po'ño chepa't eñallet
po'chñaret. Ñaña aña'ña çhapatamet pueyoçhreto ñeñt
e'ñe pocte' entyen Yompor. Ñaña aña'ña çhapatamet
pueyoçhreto attoch ñetpa' eñoteretcha' po'ño chpa'
coñcheñtsach amñare'tterret ñeñt ama name'ñenayo na ñeñten
Yompor Puechemeren.

⁹ Yompor Puecamquëñpa' eñotaterrancha' acheñenesha'
po'ño ch ñetpa' ama pocteye' entenaneto Yompor tarro'mar
ama ame'ñenneto na ñeñten Yompor Puechemeren.

10 Ñaña ñach eñotaterrahuet ñeñt e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te.

11 Paretsña Puecamquëña' ñachña eñotaterrahuet po'ñoçpa' coñcheñtsach amñare'tterret ñeñt ama ame'ñetso tarro'mar oneñeñ ñeñt pa'mcha'tareter pen shonte' acheñenesha' arr patsro, ñocoppa' e'ñe po'ñoçh anuaret amñare'tterrach coñcheñtso.

12 'Shontemeñ ñeñtcha' notaseñ tarraña te' sapa' amate' errotenot çhaponaso seyoçhro.

13 Tarraña ñerra'm esempoch huaponasa Parets Puecamquëñ, ñeñtcha'ña señotaterre' ñeñt e'ñe po'ñoçh Yompor po'ñoñ tarro'mar ñapa' ñachca'ye señotatene' ñeñt e'ñe po'ñoçh Yompor po'ñoñ ñeñt ama shequëñtsoyaye. Ñapa' amaca'ye e'ñe ñoña eñeno. Añca'yeña eñen ñeñt atet e'muen Partsesho. Ñapa' añcha' serrpare'tatas ñeñtcha' atet perra tsapatonet.

14 Ñapa' nachca'ye cohuentaterre'; e'ñe eñotennan ñeñt atet nepena na, ñapa' ñeñtcha'ña eñotatyerres.

15 Ora allohuen ñeñt atet pena Apapa' napa'cho'ña e'ñe atet nepena namã. Ñeñto'marña napa' notenes eñotenan ñeñt atet nepena na, ñapa' ñeñtcha' señotatyerre'ña samã.

Ñeñtña sellquëñapa' puenaserrach socsheña

16 Jesúsña' atet oterraneterr:

—Te'pa' mameshamã o'huañcha' allo'na sentnenen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

17 Pueyochresha' ñapa' atet otanna'tyeset:

—¿Errofente'ña añ ñeñto'mar atet oteneý, mameshamapa' o'huaño'ch allo'na yentneñ tarraña mameshapa' ahuo'ch alla yentannerra? ¿Errofente'ña añ ñeñto'mar ñapa' atet oteneý, ñapa' ahuo'ch ahuer Pomproesho?

18 Alla otanna'tyenet:

—¿Eso'marte'ña atet oteneý, mameshamapa' o'huañcha' allo'na yentneñ? Amaca'yeña yeñoteñe este'ña oteneý.

19 Jesúsña eñotanet ñetpa' cho mueneñetañ o'ch a'pto'chet. Ñaña' otanet:

—¿Ñeñte'tña sotannena ñeñt atet notenes, o' mameshamã o'huañcha' allo'na sentnenen, tarraña mameshapa' o'ch alla yentannerra?

20 Po'ñoçhca'ye o'ch notas: Sapa' sellquëño'tpa' seyahuerrach. Acheñenesha'ña arr patsro ñeñt ama ame'ñetso ñetña'pa' çhach atarr coshet. Sapa' sellquërrach tarraña sellquëña sapa' puenaserrnasach socsheña.

21 Ñeñt̃pa' o'ch netma'ntatasa ñerra'mrrate' coyanesha' allempo cheññaña allempoch emare'ten, chach lleca tarro'mar o' chapoña allempoch atsotenana puechoyoretoll. Tarraña allempochña eñalletatuepa' o'ch alla atarr cosherra o'ch pueserranña atto atarr llecach pue'maretoll, elloñapa' atarrcha' cosherra tarro'mar o' eñalletatuan pue'maretoll arr patsro.

22 Jesúsña alla oterranerr pueyochresha':

—Te'ña sapa' nanac llequēntso'tsenes, tarraña elloñapa' o'ch alla yentannerra. Allempoña sapa' o'ch alla atarr socsherra seyochro. Ñeñña socsheñapa' ama't e'ñe puesheñarra amach errotenot puerratañperrseto.

23 'Allempopa' amach sepallteno o'ch alla es sa'p̃to'terrnerr. E'ñe po'ñoçh te'pa' o'ch notas: Ñerra'm es senamueñ Apa e'ñe na neso'chño e'ñe seyemteñoŋen na ñaña' apascha' ñeñt̃ senamueñ.

24 Sa teme'ttsenpa' ama es senamueno e'ñe seyemteñoŋen na e'ñe neso'chño. Te'ña ñerra'm senampa' sagaṗcha' allochña' o'ch socsha e'ñe poctacma.

Atto Jesucristo a'mchechatuerran allohuen ñeñt̃ e'moñe'tene' Yompor arr patsro

25 'Ñeñt̃ allpon neserrpare'tatyese't ñeñt̃pa' e'ñe toma'nteñtsoçhno notyese't. Tarraña chapcha' esempo allempopa' amach alla neserrpare'taterrserro toma'nteñtso. Allempopa' añcha' neserrpare'tatas Apacop ñeñt̃pa' amach toma'nteñtsoyaye, allochña' e'ñech señoŋue.

26 Allempopa' senamueñcha' Apa e'ñe seyemteñoŋen na e'ñe neso'chño. Allempopa' amach pallteno o'ch nema'yochañpensa Apuesho.

27 Apañapa' atarrcha' morrentensa atto sapa' semorrentenna, e'ñe seyemtenna atto napa' Apueshoŋ nohuapa.

28 Po'ñoçh napa' Apueshoŋ nohuapa, o' neçhap añe patsro. Elloñapa' o'ch alla nesa'nerr añ pats, o'ch alla ahuerren Apuesho.

29 Pueyochresha'ñapa' atet ochet:

—Te'ñapa' ama toma'nteñtsoye' peñeno ñeñt̃o'marña yapa' e'ñech yeñoŋue.

30 Te'pa' yeñoŋeneṗ ṗapa' ñeñt̃eṗ eñoŋuene' ora allohuen esocmañen. Ñeñt̃o'marña yapa' amaca'ye pallteno o'ch alla ya'p̃to'terrperr po'poñone't. Tarro'mar te'pa' yeñoŋeneṗ ṗapa' Partseshoŋ pehuapa.

31 Jesúsña' atet oterraneterr:

—Sapa' taya'tña o' same'ña'na.

³² Te'pa' o' e'ñe čhachmoch sa ama't puesheña'ttsospa' o' čhaponasañ čhach sematrra'tyesa allemeñ. Chach sahanomyesa allcha' semna'yesa sa. Nañapa' sa'ypo'ña'huanmuencha'. Tarraña napa' ama e'ñe napteryaye, epanña Apa.

³³ Ora allohuen añečhnopa' o' e'ñe notuas allochñapa' e'ñe seyemteñoŋen napa' čhocmach socshena seyočhro. Po'ñočh añ patsropa' čhocmach semueročhtena. Tarraña e'ñe seyočhro sapa' čhocmuepa'chña socshena tarro'mar napa' o' na'mchechatue allohuen ñeñt e'moñe'tene' Yompor añe patsroŋ.

17

Allempo Jesúsapa' ma'yochamŋpenana pueyochreshačhno

¹ Allempoña atet otuanet añečhno Jesúsapa' allenta cohua' enonetpa', ñeñtapa' atet otan Pompor puema'yocheñoŋ:

—Apacha' te'pa' o' čhapona allempoch etsota ñeñt nocop. Te'pa' pecohuentatonepa'ch na tarro'mar Pechemer pepenen allochña napa'čo'ña necohuentatonaŋcha' ŋama.

² Atto ŋapuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñt po'patatenna, naña ñetpa' napuenanetcha' alloch ñetpa' corretsetach pocsheñeshocmañen tayoteñ e'ñe errponañohuen.

³ Añmapa' ñeñtña alloch ñetpa' corretsetach tayoteñ e'ñe errponañohuen ñerra'm esempo eñoterrpet ŋa ñeñteŋ ŋapuet e'ñe po'ñočh Yomporeretets ñama ñerra'm eñoterrnet na ñeñten Jesucristo ŋa pellsensaren.

⁴ Napa' o' e'ñe necohuentatuonaŋ arr patsro. O' e'ñe netso-tuonaŋ ñama petaruas ñeñt atet ŋoten.

⁵ Te'ña Apacha', pecohuentaterrnanepa'ch e'ñe alla pesho e'ñe atet allempo atarr a'cohuentatareten pesho ahuat allempo ama eñalletena' añ pats.

⁶ Allohuen acheñ ñeñt neyochresha' peŋpatenen nañapa' añ neñotatenanet ñeñt atet pepena ŋa tarro'mar ñetpa' ñeñt e'ñe allpona po'patatna arr patsro. Ñetñapa' pepa'tña o'patenahuet ñeñtcha' neyochresha' peŋpaten naña. Te'ña ñetpa' e'ñe ame'ñernapet peñoñ.

⁷ Ñama ñetpa' e'ñe eñotueñet allohuen ñeñt atet ne'ñnorenanet ñama ñeñt es norrtatyenanetpa' ñeñtapa' e'ñe ora peshotecma huena.

⁸ Napa' añña ne'ñnorenanet ñeñt atet ŋotenen ŋa. Te'ña ñetpa' e'ñe cohuen ame'ñennet. Ñama e'ñe po'ñočh eñoteñet napa' e'ñe peshoŋ nohuapa, ŋa ñeñteŋ nellenserre'.

9 'Te'ña napa' o'ch nema'yocham̄pesnomanet ñet. Ama allohuenacpaye' acheñenesha' arr patsro nema'yochenpo, e'ñe añecpa nema'yochenpa ñeñt neyochresha' pepatenen tarro'mar ñetpa' ñeñtareta peyochresha' pepen paña.

10 Tarro'mar allohuen ñeñt e'ñe nocmapa' papa'cho'ña e'ñe pocma. Ñeñtña e'ñe pocmapa' napa'cho'ña e'ñe nocma. Ñetña te'pa' e'ñe cohuentatapretenet.

11 'Te'ña nocoppa' o' cherrmoch e'ñech ñeñteshaña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuam̄psepa'ch allohuen ñeñt neyochresha' pepatenen. Pehuamencotcha'ña pecuam̄psanet. Allochña ñetpa' o'ch e'ñe parrocmatet e'ñe atet yepena yaña.

12 Allempoteñ e'ñe parro'tseney poña pehuamencot necuam̄psanete't. Napa' chocma nemoñenanet. Ñeñto'marña ama't puesheñarrofeta ñetpa' ama na'chencataneto, ñapñaña chenca añ ñeñt o'patena chenquëñets. Ñeñtpa' attochña Apa etsoterra peñoñ ñeñt anuaret ahuatoteñ.

13 'Tarraña te' napa' o'ch ahuerren pesho. Napa' añecopña neñen añechno añ patsro attoch ñetpa' atarrcha' cosherret pueyo'chreto e'ñe atet nocshena na.

14 Napa' añ ne'ñorana'tenanet ñeñt e'ñe po peñoñ. Acheñenesha'ña ñeñt ama ame'ñetso añ patsro, ñetña' cha e'moñe'tenanet tarro'mar ñetpa' ama allo'na parro'marneshateneto ñeñt ama ame'ñetso, atet nepena naña ama neparro'marneshatenaneto.

15 Ama aye'e' nenamuenpe attoch pahuenaneta' añ patsro't, añña nenamuenep o'ch pecuam̄psanet. Amach pemnatatsche oneñe't o'ch alla a'puerrataterranet.

16 Ñetpa' ama allo'na parro'marneshateñeto ñeñt ama ame'ñetso arr patsro atet nepena naña ama neparro'marneshatenaneto.

17 Pame'ñeño'tet pa peñoñ pa'cohuentam̄psanetepa'ch e'ñe pocop. Pa peñoñpa' ñeñtña e'ñe po'ño'ch ama shequëñtsoyaye.

18 Atto pa pemñan na arr patsro, te'ña napa' o'ch nemñanet ñamet attoch serrpare'tatyaset acheñenesha' arr patsro.

19 Ñeñto'marña ñocpuet nañapa' o' na'rroyerra pocop, attochña ñetpa'cho'ña a'cohuentataretterretcha' Partsocop. Ñeñtpa' e'ñe po'ño'ch atet poteney pa peñoño't ama shequëñtsoyaye.

20 'Tarraña amach e'ñe añecpa nema'yoch ñeñt e'ñe neyochresha' nepen te', añecpa'nachña nema'yocham̄pesnoma allohuen ñeñtcha' name'ñerraya tsapatonet e'ñe neyochresha' po'ñoño't.

²¹ Allochña allohuenetpa' parrocmatetcha' atet pepena þa Apa e'ñe peparrocmatennana ñaña napa' e'ñe neparrocmatennaþa. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patsropa' ñetñaþa' eñoteretcha' þa ñeñteþ nellsenserre'.

²² Atet pepena þa pecohuentapretena napa'cho'ña e'ñe necohuentapretenanet ñet, attotcha'ña ñetpa' e'ñech parrocmatet atet yepena yaña e'ñe yeparrocmaten.

²³ Napa' neparrocmatenanet, þañaþa' peparrocmatenna. Allochña allohuenetpa' e'ñech parrocmatuenet e'ñe poc-tacma. Attoch acheñenesha' arr patsro ñetpa' eñoteretcha' þapa' þa nellsenserre'. Ñaña eñoteretepa'ch þapa' atarr pemorrentenanet e'ñe atet atarr pemorrentenna na.

²⁴ 'Apacha' allohuen ñeñt peyochresha'tatenna na, napa' añ nemnen erro'tsenencha' ñetpa'cho'ña allo'tsenacmayepa'chña e'ñe parro. Allochñaþa' attoch enterrnanet necohuenña allo o' alla pecohuentaterren na, tarro'mar þapa' pemorrentenna allempoteñ ama ayeçcatarettena' añ patser.

²⁵ Apa, þa ñeñteþ e'ñe pocte' es pets, acheñenesha' ñeñt ama ame'ñetso arr patsro ñetpa' ama eñotenpeto. Nañaþa' e'ñe po'ñoçh neñoteneþ. Añña ñeñt e'ñe neyemtenaya ñetñaþa' eñotenpet þapa' þa nellsensene'.

²⁶ Napa' naña e'ñe eñotatenahuet ñet ñeñt atet pepena þa. Ellopa' allach neñotaterraneterr. Allochñaþa' ñetpa'cho'ña e'ñech morrentanna'terret e'ñe atet pepena þa atarr pemor-rentenna na. Attochña napa' e'ñech neparrocmatenanet ñet. Ñeñtþa' allohuach nema'yochaþa Nompore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

¹ Jesúsña allempo ma'yochuanmapa' allenta ahuanman pueyochresha' o'ch ahuanmuet yomta'n amañesre'to. Ñeñt amañesre'te'pa' añ pa'so'cheñ Cedrón. Allña yomta'npa' allo'tsen narmetsma', all çhapña Jesús epuet pueyochresha'.

² Nehua, Judas ñeñtcha' pomuerre' Jesús ñapa' e'ñe puentarña all, tarro'mar ahuañmo'chofeñ Jesúsþa' allecma apçhatenan pueyochresha'.

³ Judasñaþa' allenta anman solltarnesha' ñaña guardianesha' ñeñt mueñen fariseonesha' ñaña ñeñt pa'mcha'tareternesha' pen allohuen judionesha' po'cornaneshar. Ñetñaþa' çaçha'tet all elamparñeñareret. Orra'yesnenet ñaña po'urare. Orra'yesnenet ñaña alloch quellaret.

⁴ Jesúsñapa' e'ñe eñoteñ ora ñeñtcha' chapoya allempo. Ñaña poctanetpa' atet otapanet:

—Sapa' ¿eseshatña se'nen?

⁵ Ñetñapa' atet otoset:

—Añca'ye ye'nen Jesús ñeñt nazareto'marnesha'.

Ñaña'pa' alla oterraneterr:

—Napa' añenca'ye.

Judas ñeñt pomue'pa' ñapa'cho'ña allo'tsen.

⁶ Allempo otenanet Jesús: “Napa' añenca'ye”, ñetñapa' o' cheterret pa'che'ñone'pa' allepa'tcha' a'trra'tet.

⁷ Elloñapa' alla oterraneterr:

—¿Eseshatña se'nen?

Ñetñapa' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsñapa' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ñapa' semnatanet ñetpa' o'ch ahuanerret.

⁹ Ñeñt'pa' tarro'mar atet ot allochñapa' attoch etsota Jesús po'ñoñ atet o' otuanom: “Ñeñt allpon neyochresha' pe'patenen napa' ama't pueשה'ñarrapa' amach na'chencache.”

¹⁰ Allempoña Simón Pedro ñeñt occhelletpa' ñaña'pa' po'cchella cheta'pa' o'ch chonto'tapanen cornesha' pueña'ña puetepa'tcha' tsorroñ. Ñeñt'pa' añ pa'so'cheñ Malco, ñeñt'pa' año pueña'ña ñeñt pa'm'cha'tareter pen allohuen judionesha' po'cornaneshar.

¹¹ Tarraña Jesús'pa' atet otan Pedro:

—Peshaterr p'occhell allecma peneñ. Pocte'ca'ye o'ch chapona ñeñt amuerochtatañ* tarro'mar ñeñt'pa' atet muenatenen Nompör.

Allempo anmet Jesús allo'tsen ñeñt pa'm'cha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'ca'ptáner ñaña judionesha' po'guardianeshar ñetñapa' rromoset Jesús'pa' o' huanquët.

¹³ Ñanompa' arr anmet allo'tsen Anás, tarro'mar ñapa' ñeñt Caifás pa'go'. Ñeñtña Caifás'pa' ña pa'm'cha'tareter pen allohuen judionesha' po'cornaneshar allempo ñeñte chararo.

¹⁴ Caifás'pa' ñapa' ñeñtña cotape'chataye't judionesha' allempoteñ o'pateñet Jesús, ñeñt'pa' atet otanete't: Añ

* **18:11** Ñeñt amuerochtatañ ñeñt'pa' po'ño'ch ñeñt'pa' añ atma'ntataret ñerra'mrate' ñeñt atarr pesherr yorren orran'tso.

pochtetsa puesheñarr ñeñt̃ acheñerpa' o'ch rroma allohuen
acheñeneshacop.

Atto Pedropa' a' nasotana Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ñaña po'psheñeñ pueyochresha' ñetñapa'
co'ta'nmet ñamet Jesús chenta'. Ñeñt̃ña puesheñarrpa'
e'ñe cheme'teñ cornesha' ñeñt̃ nanac am̃cha'tarettetsa
allemo. Ñapa'cho'ña o' be'tososet epuet Jesús all
aconcha'tam̃psarettena cornesha' po'pamp.

¹⁶ Pedroñapa' alla tomos a'yo't allot be'tenet. Po'psheñeñña
pueyochresha' ñeñt̃ e'ñe cheme'ten cornesha' ñeñt̃ nanac
am̃cha'tare't, ñaña'pa' cha'nerr a'yo't, allña'pa' eñosuerr epuet
coyanesha' ñeñt̃ cohuene' yetarr. Allempoñapa' errana' ñaña
Pedro.

¹⁷ Coyanesha'ña ñeñt̃ cohuene' yetarrpa' atet otapan Pedro:
—¿Ama't̃ pa'pa'cho'ña pueyochresha'te'ca' penepña añ
encaneshar?

Ñaña'pa' atet otos:

—Napa' amaca'ye pueyochreshayayno.

¹⁸ Ñeñt̃ña taruassets all epuet guardianesha' ñetñapa'
all tsoma'tenet quellmesha, a'huortatenet tarro'mar
allpa' nanac senteten. Allña tom̃chenet all shotenet.
Pedropa'cho'ña allo'tsen all shotena ñaña.

*Allempo Jesús'pa' a'p̃to'tare'teñ cornesha' ñeñt̃ nanac
am̃cha'tarettetsa*

(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeñt̃ nanac am̃cha'tarettetsa, ñapa' allenta
a'p̃to'tapan Jesús pueyochreshacop ñaña añecop ñeñt̃ atet
yechatyen.

²⁰ Jesúsñapa' atet otos:

—Napa' ama a'nahuayaya neserrpare'tateñe acheñenesha'
arr patsro. Chocma neychatyen judionesha' po'prahuo'mar
ñaña Parets pa'pacillo allecma shontena judionesha'. Ama't̃
parrochapa' ama esempo neñosoña a'nahua.

²¹ Eso'mare'tña ñañeña pa'p̃to'ten. Añcha'ña pa'p̃to'tyes
ñeñt̃ ne'maye't̃ erro'tente' neserrpare'tatiesanete't̃. Ñetpa'
eñoteñette'ña ñeñt̃ atet notyesanete't̃.

²² Allempoña atet otuanet Jesús'pa' puesheñarrña guardia
ñeñt̃ allame'ttso'tsenapa' ñaña'pa' allenta tacle', atet och:

—Amarramch' atteye' yanapueñeña cornesha' ñeñt̃ nanac
am̃cha'tare't.

²³ Jesúsñapa' atet och:

—Ñerra'm añte' neñen ñeñt' ama cohuenayayepa' p̄oten all ama cohuenaye' neñeno. Ñerra'm cohuenta' neñenpa' eso'marte'ña petacllenen.

24 Allempoña Anáspa' allenta mueñe e'ñe ehuancařet pa'ñachoresho Caifásesho. Ñeñt'ña Caifáspa' ñeñt' e'ñe pa'm̄cha'tareter pen allohuen judionesha' po'cornaneshar.

Allempo Pedropa' alla a'nasoterranerr Jesús

(Mt. 26.71-75; Mr. 14.69-72; Lc. 22.58-62)

25 Simón Pedroñapa' alla ten all shotena. Ñetñapa' atet ochet:

—Papa'cho'ña ¿ama't pueyochresha' penpe?

Ñañaapa' cha a'nasochapa' atet ot:

—Napa' amaca'ye.

26 Cornesha'ña ñeñt' nanac am̄cha'tareť puesheñarrña ñeñt' pa'taruasañer ñeñt' pamo'ts tsorrqueta't Simón Pedro, ñañaapa' atet och:

—Napa' ¿ama't p̄a nentoña narmetsmo? Papa' allo'tseneřca'ye.

27 Pedroñapa' alla a'nasotererr. E'ñe allempocmaña eñen atollop.

Allempo chapata'mueñet Jesús allo'tsen am̄cha'taret Pilato

(Mt. 27.1-2, 11-14; Mr. 15.1-5; Lc. 23.1-5)

28 Allempoña Jesúsapa' anereterr Caifáseshoť. E'ñe ahuatecma anma'mueñet am̄cha'tareť po'palaciopahuo. Ñeñt'ña am̄cha'tareťpa' ñeñt' nen gobierno' Romoť ñeñt' am̄cha'tareťtetsa allo'marneshacop. Allohuen judionesha' ñetñapa' ama be'tososeto am̄cha'tareť pa'paclo tarro'mar ñeñt' am̄cha'tareťpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo.

29 Ñeñto'marña Pilatopa' cha'nmanet a'yoť allo'tsa'yenet, atet otapanet:

—¿Erroťenoťe'tña sottene'cheñña añ acheñer?

30 Ñetñapa' atet otyesoset:

—Ñerra'm ama añ p̄a'yeno ñeñt' ama pocteyayepa' amate' erroťenoť o' yehuapacheñeña pesho.

31 Pilatoñapa' atet oterraneterr:

—Chosa sañeña anmue' sachña ente' erroťente' ñeñt' atet pena ñeñt' atet anareť ñoñets socop atťotcha' sottene'ch.

Judionesha'ñapa' atet otyeset:

—Yocop ñeñtey judioneshaypa' ama pocteyaye o'ch yemt-sach acheñ ama't puesheñarra.

32 Ñeñto'marña ñetpa' atet otyeset allochñaapa' atťoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma.

³³ Allempoña Pilatopa' alla be'terrerr pocollo. Ñaña' agotatan Jesús'papa' atet och:

—Papa' ¿pa't amcha'tarettetsaña judioneshapo?

³⁴ Jesúsña'papa' atet och:

—Aña' ¿e'ne't pōta pōtenña atet, ñato' esesha'te' pōtene'ña añ nocop?

³⁵ Pilatoña'papa' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'mcha'tareternesha' pen judionesha' po'cornaneshar ñetña te'pa' o' pomuerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

³⁶ Jesúsña'papa' atet otererr:

—Atto na'mcha'tarettena napa' ama añe patsroyaye. Ñerra'm añe patsrach na'mcha'tarettenaña' allempoña neyochreshachnopa' moñsa'netañcha', allempopa' amach pomnoñeña judionesha'. Tarraña atto na'mcha'tarettena napa' ama arro'marecpayaye.

³⁷ Pilatoña'papa' atet otererr:

—Ñeñtepña'pepa'tca'yeña amcha'taret.

Jesúsña'papa' atet otererr:

—Na po'ño'chpa' amcha'taretenca'ye e'ne atet pōtenen pa. Napa' ñeñto'marña ne'ñalletosa añe patsro attoch nach a'pōtose' ñeñt e'ne po'ño'ch Yompor pocta'ña. Allohuen ñeñt muenene' ñeñt e'ne po'ño'ch Yompor pocta'ña, ñetña'papa' e'mñotennet.

³⁸ Pilatoña'papa' alla otererr:

—¿Erra'tsena'tña ñoñets ñeñt e'ne po'ño'ch?

Atto amcha'taret Pilatopa' otanet ama'tpa' chosa muetse'ña Jesús

(Mt. 27.15-31; Mr. 15.6-20; Lc. 23.13-25)

Ñeñta otuapa' o' alla cha'nerrerr allo'tsa'yen judionesha'. Allña'papa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach.

³⁹ Tarraña atet seychenpa' e'ne pate'tets char allempoch cherrerr pascuapo naña'papa' chocmach na'rroyernnas puesheñarr socop ñeñt ayottam̄psarettetsa allempo, ñeñtara ñeñt samo'ts sepen. Te'pa' ¿añe't semnen o'ch na'rroyernnas ñeñt Sa'mcha'tareter sepen sa ñeñtes judioneshas?

⁴⁰ Allempoña ñetpa' puerrannarteño'tetpa' atet otyeset:

—Tarraña Jesús'papa' amach pa'rroyatsche, añcha'ña pa'rroyernay Barrabás.

Ñeñtña Barrabás'papa' ñeñt atarr aprratam̄psañtetsa.

19

¹ Allempoña Pilatopa' atet otan po'solltar-renesha':

—Te'pa' o'ch sanem Jesús allcha' sashte'.

² Solltarnesha'ña pa'llocchame'teñofoet Jesús'pa' pellta'toñet choyo'mets agrech ñeñña choyo'mtachtet ñeñ atet choyo'mtena ñeñ po'ño'ch amcha'tarettetsa. Chorrachet ñaña shetamuets ñeñ quelluemamueno tsamamtena ñeñ pa'shtam pen ñeñ po'ño'ch amcha'tarettetsa.

³ Pa'llocchame'teñofoetpa' e'ñe atet p'achet ñerra'mrrate' ñeñ po'ño'ch amcha'tarettetsa. Allña ponem'yetpa' pachmare'teñofoetpa' atet oteñet:

—Puetare' amcha'taretecha', atarruaca' cohuenep'te' pa' ñeñtep judionesha' pa'm'cha'taretere'p.

Allña'pa' taclapecheñet.

⁴ Pilatoñapa' alla cha'nerrerr allo'tsa'yen judionesha'. Allña'pa' atet oterraneterr:

—Secue', te'pa' o'ca'ye alla nehuapaternaserr Jesús allochña'pa' o'ch seño'ch napa' amaca'ye nenteññañeña ñeñ atto ama pocteye' es peno attoch yemtsatach.

⁵ Allempoña cha'nom ñaña Jesús achoyo'mtataret agrech ñeñ apellta'taret, achorratareta ñaña shetamuets ñeñ quelluemamueno tsamamtena. Pilatoñapa' atet oterraneterr:

—Secue' añca'yeña ñeñ yacmar.

⁶ Ñeñña pa'm'cha'tareternesha' pen allohuen judionesha' po'cornaneshar ñaña guardianesha' allempoña ñeñña eñchetpa' puerranarotetpa' atet otyeset:

—Ñapa' ¡pecorso'tam'psachñaca'ye!

Alla oterete't:

¡Pecorso'tam'psachñaca'ye!

Pilatoñapa' oterraneterr:

—Añca'ye seña', sañeña corso'tam'pse' tarro'mar napa' amaca'ye nenteññañeña ñeñ atto ama pocteye' es peno attoch yemtsatach.

⁷ Judionesha'ñapa' atet otereterr:

—Yapa' yechenca'ye paterr ñoñets ñeñ atet anaret. Ñeñña ñoñetspa' atet oteney añ poctetsa ñapa' chocmach rroma tarro'mar ñapa' pachmare'teño' oten ñapa' ño' Parets Puechemer.

⁸ Allempoña Pilato e'man atet ñoñetspa' cha yoruen.

⁹ Alla be'terrerr pocollo atet otuerranerr Jesús:

—Papa' ¿erro'marneshape'tña pa'?

Jesúsñapa' ama anape.

¹⁰ Pilatoñapa' alla otererr:

—Amahuachñaca'yeña p̄anapnote'. ¿Ama't peñoteñeña napa' allsensareten attoch na'rroyerrep̄, allsensareten ñaña attoch necorso'tam̄perrep̄?

¹¹ Jesúsñapa' atet otererr:

—Amach errotent̄ pepa'noñeña ñerra'm ama Yompor p̄apayñe llesens atet. Ñeñto'marña ñeñt̄ nepomue' peshopa' ñetpa' ello metanennapet p̄o'chñar.

¹² Elloña Pilato atarr mueneñeñ o'ch a'rroyerran Jesús tarraña judionesha'ñapa' puerranarotetpa' atet otyerreterr:

—Ñerra'm añ p̄a'rroyerrpa' p̄apa' ama pemno o'ch p̄a'mcha'tareter pepe' ñeñt̄ atarr am̄cha'tarettetsa Romo. Tarro'mar allohuen ñeñt̄ ñañeña netsa am̄cha'taretpa' chocma mueneñ o'ch atpare'teñet ñeñt̄ atarr am̄cha'tarettetsa Romo.

¹³ Pilatoña allempo e'man ñeñt̄ atet otenet allenta cha'nmaterran Jesús a'yoñ ñañaapa' anorruerr all po'conaño allecma a'poc̄tatenan ñoñets, ñeñt̄ otenet Mapyeten. Hebreyaçhopa' oteñet Gabata.

¹⁴ Allempopa' añe yetro allempo añño'tena judionesha' ñeñt̄ attecma penet pascuapo. O'ña chap̄ poc̄topa', Pilatoñaapa' atet oterranerr judionesha':

—Secue'ñaca'yeña añ ñeñt̄ sa'm̄cha'tareter sepen.

¹⁵ Ñetñapa' alla rrannarterreterrrpa' atet otyerreterr:

—¡Ñapa' chepa' rromats! ¡Pecorso'tam̄psachñaca'ye allcha' rroma!

Pilatoñaapa' atet oterraneterrr:

—Sapa' ¿at̄te't semnen o'ch necorso'tam̄psonas sa'm̄cha'tareter?

Ñeñt̄ña pa'm̄cha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'm̄cha'tareter, ñap̄ñaña ya'm̄cha'tarete yepen ñeñt̄ atarr am̄cha'tarettetsa Romo.

¹⁶ Allempoña Pilatopa' ap̄anet Jesús attoch corso'tam̄p̄set. Ñetñapa' anmet allcha' corso'tam̄peñeta'.

Atto corso'tam̄psoset Jesús

(Mt. 27.32-44; Mr. 15.21-32; Lc. 23.26-43)

¹⁷ Atto sen Jesús allpa' anenan po'corsoch. Chapachet all oteñet Poñetallep̄no, ñeñt̄ otenet hebreyaçho Gólgota.

¹⁸ Allña corso'tam̄psoset epuet ñaña epsheña acheñ. All corso'tam̄p̄setpa' rroçhtam̄psatoset epsheña.

¹⁹ Pilatoñaapa' quellcatan ñoñets ñeñt̄pa' atet ot: “Añmapa' Jesús ñeñt̄ nazareto'marnesha' ñeñt̄ Pa'm̄cha'tareter pen judionesha'.” Ñeñt̄ña ñoñetspa' e'ñe corsocho ne'.

20 Shonte' judionesha' ñeñt̃ lleya'yese' ñeñt̃ quelled tarro'mar all corso'tam̃psetpa' e'ñe allame'ttsa anetso. Ñeñt̃ña quelledpa' e'ñe mapo'mar ñoñets aquellcaretta — hebreyach, griegaçh ñaña latinaçh, e'ñe attecma oten.

21 Ñeñt̃ña pa'm̃cha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'm̃cha'tareter.”

22 Pilatoñaapa' atet otanet:

—Ñeñt̃ o' nequellcatuapa' o'ca'ye aquellca'huareta.

23 Allempoña corso'tam̃pesuet Jesús'pa' solltarnesha'ñapa' yoroñet ñeñt̃ chorrena. Apanna'tyeset puema'tets pa'tatssheño'maret. Ñeñt̃ña pa'shtampa' ama eñalle all seṗchena, ora apomotaret e'ñe patrra shetamuets e'ñe poñe'moteñ.

24 Atet otanna'tyeset:

—Amachca'ye yerrarratsche, çhochña yeyellsheñe'chatoñ pa'shtam yesuertot̃ attoch orrta erra'tsenoteycha' yore'.

Ñeñt̃pa' tarro'mar atet pohuet allochñapa' attoch etsoterra Yompor po'ñoñ ñeñt̃ atet anuaret̃ ahuañoteñ, ñeñt̃pa' atet oten: “Ñetpa' apanna'tyerretcha' ñeñt̃ nechorrena. Neshtamñapa' yellsheñe'chatonetcha' po'suertot̃ attoch orrta ñeñt̃cha' yore'.” Ñeñt̃pa' atet o' e'ñe perra solltarnesha'.

25 Allña e'ñe allame'tets Jesús po'corsochopa' all tomçhen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñt̃ Cleofas puetapor, ñaña María Magdalena.

26 Jesúsña entan pachor ñaña pueyochresha' ñeñt̃ nanac morrentena all tomçhenet allame'tets. Allñapa' atet otan pachor:

—Achocha' añca'yeña pechoyor.

27 Allempoñapa' atet otan ñeñt̃ pueyochresha':

—Añca'ye ñeñt̃cha' ṗachor peṗa'.

Allempoña ñapa' anerran Jesús pachor e'ñe ña pa'paclo allcha' cohuañpes.

Atto rroma Jesús all po'corsocho

(Mt. 27.45-56; Mr. 15.33-41; Lc. 23.44-49)

28 Allempoña Jesús'pa' o' eñoch o' etsotua ora allohuen ñeñt̃ ñocop, ñañaapa' atet ot:

—Cha no'ñpa'ten.

Ñeñt̃pa' tarro'mar atet ot allochñapa' attoch etsoterra Yompor po'ñoñ ñeñt̃ atet anuaret̃ ahuañoteñ.

29 Allñapa' allo'tsen pajo' all chorre' chase'. Allña e'çhomuetña ñeñt̃ atsotso'tpo'. O'ña tsotso'tatuet ñeñt̃ña'pa'

net tsachpo ñeñt otenet hisopochep alloña chapachet Jesús puenamo.

³⁰ Allempoña Jesús^{pa} agapan chase' ñaña^{pa} atet oterrerr:

—Te'ñapa' o' e'ñe etsotuerra allohuen ñeñt atet anaret nop.

Allempoña o' epapa' cha rromats.

Allempo puešeñarr solltarpa' enos po'panmeto puepotot

³¹ Allempopa' o' chap allempoch año'terrerr judionesha' tsapatēcop allempocma amesenet. Ñeñto'marña ñetpa' ama pocteye' eñcheto o'ch alla ellapen ñeñtcha' rromanatats corsocho añ yetro allempo amesenet. Ñeñtña yetro allempo amesenet o'ch alla atarr cosherreterr ñaña pascua. Ñeñto'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochñapa' o'ch anmaretterret corsochoť.

³² Allempoña ponenya solltarpa' cheno'tosan pa'tap ñeñt parro corso'tampeñet e'ñe epsheño'mar.

³³ Allempoña ponenmyet ñaña Jesús^{pa} ñaña^{pa} entoset o' rroma. Ñeñto'marña ñapa' ama chenam̄pseto pa'tap.

³⁴ Tarraña puešeñarrña solltarpa' chocma enos po'panmeto puepotot. Alotña atarr cha'nom po'rras ama't ñaña oñsasen.

³⁵ Ñeñtña ente'pa' ñapa' serrpare'tatanet atet ent. Ñapa' e'ñe eñoteñ e'ñe po'ñočh ñeñt atet oten. Ñeñto'marña yapa' yeñoteñ ñeñt atet serrpare'tenpa' e'ñe po'ñočh. Attochña sapa'cho'ña same'ñerach ñeñt atet oten ña.

³⁶ Ñeñtpa' atet pa attoch etsoterra Yompor po'ñoñ ñeñt anuaret ahuatoteñ, ñeñtpa' atet oten: “Ña ama't patrra puenepa' amach chenam̄pereto.”

³⁷ Ama't ñaña Yompor po'ñoñ ellonetpa' atet ote't ahuat: “Ñetpa' enteretcha' ñeñtcha' enerret.”

Atto pampuet Jesús

(Mt. 27.57-61; Mr. 15.42-47; Lc. 23.50-56)

³⁸ Allempoña José ñeñt arimateo'marnesha'pa' ñaña^{pa} ahuos Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt Josépa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet enamosan Pilato, Pilatoñapa' e'ñe pocte' eñch, ñeñto'marña alla ahuerri corsocho, cherr allpa' a'suatosan Jesús corsochoť all rromuen.

³⁹ Allñapa' huapa ñaña Nicodemo ñapa' añ huapatoñ eñmosať, atsetaret ñeñt otenet mirra epuet ñaña áloe. Allo'tsente' ma'poch charra' kilo. Ñehua, ñeñt Nicodemopa' ñeñtara ñeñt huapatsa ñanom Jesúsesho tsapo.

40 Ñetña anerretña Jesús rromue'. Allñapa' eḗatse'tueret shetamtsotomo epuet ñaña eñmosañ. Ñeñtpa' atet yečhena judionesha' ñerra'm čho pampueñet arromñañ.

41 E'ñe allame'tets all corso'tamḗset allñapa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo rroma. Ñeñt mapuetponpa' e'ñe etserra eñareñ, tarraña allpa' ama pampueñeta' ama't paḗrra arromñañ.

42 Allempopa' tarro'mara alla na'neret allame'tets tarro'mar allempopa' añ yetro allempoch añño'tena judionesha' tsapaḗecop allempocma amesenet.

20

Atto tanterra Jesús

(Mt. 28.1-10; Mr. 16.1-8; Lc. 24.1-12)

1 Allempo moḗtta'muenerr yetsñats temenc, Maríaña Magdalenapa' ahuatecma ahuamuen puepampro, allempopa' ama e'ñe puetaresuena'. Allñapa' amuepa'tcha' atteraye' entosanoña mapue' allo yottamḗset. Ama allo'tsenarayaye, atḗa amesareḗ a'yeneḗ mame'.

2 Ñeñña pa'che'ñera alla materra o' ahuerr allo'tsen Simón Pedro ñaña po'psheñeñ pueyochresha' ñeñt atarr morrentena Jesús. Maríañapa' atet otuerranet:

—O' anerrnayette' Yepartseshareñ puepamproḗ. Ama yeñoteñe, errate'ña neret.

3 Allempoña Pedro epuet po'psheñeñ pueyochresha' ñetñapa' allenta ahuanmuet ñamet puepampro o'ch enteñeta'.

4 Epsheño'maretpa' matrra'tet all. Po'psheñeñña pueyochresha'pa' ñaña'pa' ota, metanan Pedro. Ñaña'pa' ñanmacma čhap puepampro.

5 Epostsaña o'pononeḗ o'ch cohuos all net Jesús ama entose, aña entosñañ allo epet alla o'yerrmuena. Tarraña ama beḗtoso.

6 Allempoña čhap ñaña Simón Pedro ñeñt onets chenta'. Ñaña'pa' allenta beḗtosos puepampro ñapa'čho' aña entosñañ allo epet Jesús alla o'yerrmuena.

7 Añña allo huancoñet poñpa' ama parrocmaye' allo'tseno epuet allo epet. Ñeññapa' ñapueḗ a'tpuetena a'yeneḗ.

8 Allempoña'pa' beḗtosos ñaña po'poñ pueyochresha' ñeñt ñanom čhapats puepampro. Ñapa'čho'ña entos ama eñalle Jesús. Allempaña ame'ñya po'ñočhepa't o' tanterraña Jesús rromot.

9 Tarro'mar ñet allempopa' ama čhenanetoña ñeñt atet anuareḗ ahuatoteñ Jesúsocop all oten Jesús'pa' čhocmach tanterra po'rromñoḗ.

10 Allempoña pueyochresha'pa' ahuanerret pa'paclo.

Allempo tanterra Jesúsapa' añ ñanom orrterra María Magdalena

(Mr. 16.9-11)

11 Maríañapa' allo'tsenara a'yot allame'tets puepampro all nanac yahuena. Allña yahuenapa' o' epa, o' cohua' o'pononet puepampro all net Jesús.

12 Allñaapa' aña ent epsheña mellañoñeñ, pa'shtamuet atarr huallama'tareret. E'ñe ñopa'tets anorryenet puesheñarrpa' poñoñ anen, po'psheñeñña' pa'rrpot anen all panet ahuaña Jesús.

13 Ñetñapa' atet ochet María:

—¿Eso'mare't nochesha nanac peyahuena?

Ñañaapa' atet otanet:

—Ahuo't anerrnanette' Nepartseshareñ ama neñoteñe erate'ña o' net.

14 Ñeñña otuapa' puetallerra pa'che'ñoneñ allentepa'tcha' enterran ñaña Jesús e'ñe all. Tarraña ñapa' ama cheme'che.

15 Jesúsñapa' atet och:

—¿Eso'mare't nochesha atarr peyahuena? ¿Esesha'tña pe'nen?

Ñañaapa' cha otenapañ aña'e' ñeññ cohuañpene' narmetsma' all. Ñeñño'marña ñapa' atet och:

—Ayochreshate ñerra'm pãate' anmue'pa' pegaterren errate' peneña', ñachña erraya'.

16 Jesúsapa' atet otererr:

—¡María!

Ñaña puetallerrtserrpa' cha e'ñe cheme'terre' ñeñño'marña atet ot po'ñoño hebreyacho:

—¡Raboni! —ñeññ atet otenet ñet Maestro.

17 Jesúsapa' atet otererr:

—Amach cha perrmatsetno, napa' ama na'tena' Apuesho. Arrña orrañ masheñneshesho o'ch pōtenaneta' napa' o'ch na'terr Nomporeho ñeññ Neyomporer nepen ñeññara ñeññ Seyomporer sepen saña.

18 Maríaña Magdalenapa' ahuer serrpare'tatuerrñañ pueyochresha' ñeñña' atet otuerranet:

—Napa' o'rramtso nenta'mueñña Yepartseshar.

Serrpare'tatuerranet ñeññ atet och Jesús.

Atto Jesúsapa' orrterrana allohuen pueyochresha'

(Mt. 28.16-20; Mr. 16.14-18; Lc. 24.36-49)

19 Ñeñte yetrocma allempo motta'muena yetñats temenc, ellerroneña pueyochreshachnopa' apcha'nenet. Ñetpa' cha yore'tenanet judionesha' ñeñño'marña ñetpa' e'ñe echarr

yottam̄penet. Ama't atet̄ yottam̄penetañpa' Jesúsñapa' čhepa'tcha' be'tosuets. E'ñe rročo tomhuen allempoñapa' atet̄ otuenanet:

—Te'ña po'ñočhpa' čhosa cosherrtsa seyočhro.

²⁰ Allempoña atet̄ otuenanetpa' gatyuesuenanet pot ñaña all enaret̄ puepoto. Pueyochresha'ña atarr nanac coshapueñet allempo entapueñet Po'partsesharet.

²¹ Allempoña Jesúsapa' oterraneterr alla:

—Te'ña po'ñočhpa' čhosa e'ñe cosherrtsa seyočhro. Atto na mueñan Apa, napa'čo'ña te'pa' o'ch nemñas saña.

²² Allempoña otuenanet atet̄pa' allenta a'torahuenanet atet̄ oterraneterr:

—Te'ñapa' chorrasepa'ch Parets Puecamquëñ.

²³ Ñerra'm esesha' sepretnataten po'chñarpa' Yomporpa'čo'ña o' peretner. Ñerra'm esesha'ña ama sepretnataten po'chñarpa' Yomporpa'čo'ña ama peretneñe.

Allempo Tomásapa' entapuenan ñaña Jesús o' tanterra

²⁴ Pueyochresha'ña Tomás ñeñt̄ otenet Epanesha' ñañaapa' ama allo'tsenayaye all apchenet allempo huena Jesús.

²⁵ Ñapa' attaña serrpare'tater po'potantañ ñeñt̄ parro yochreshatsocmuet, ñeñt̄pa' atet̄ ochet:

—Yapa' o'ca'ye yenterña Yepartseshar.

Ñañaapa' čha otanet:

—Napa' ñerra'm amach nentoñe pot all patet clavo, ñerra'm amach čho na'p̄lloñe e'ñe na notot̄ all patet, amach čho neno not puepotoť all enetpa' amate' errotent̄ name'ñaso.

²⁶ Allempoña posocmaterrpa' pueyochresha'ñapa' alla apcherretterr o'pono. Allempopa' allo'tsen ñaña Tomás. Ama't yetarrpa' e'ñe echarr ayotetuaret̄ Jesúsñapa' all be'tosuener̄ tomhuenerr e'ñe allpa' alla otuenaneterr:

—Te'ña po'ñočhpa' čhosa cosherrtsa seyočhro.

²⁷ Allempoñapa' atet̄ otuenan Tomás:

—Pecuon not all pata'net, pa'p̄lle'ca'ye. Pa'p̄lla'n ñaña nepotot̄ all enanet. Amachña čha pe'charrtatatsto peyočher čhoña pame'ña.

²⁸ Allempoña Tomásapa' atet̄ och:

—¡Nepartseshare, te'ña po'ñočhpa' Neyomporer nepenep̄!

²⁹ Jesúsñapa' alla otererr:

—Papa' čho e'ñe penterren ñeñto'maraña te'pa' p̄ame'ñenna. Tarraña elloña añ atarr cosheñtso'tsen ñeñt̄ ama't ama čho entennopa' ame'ñennet.

Añ libropa' añecop anaret̄ ñeñt̄cha' yame'ñatene'

³⁰ Po'ñočh shonte' po'poñečhno ñeñt atet gatyesan Jesús pueyochresha' po'partsoña. Ñeñtpa' ama aquellcareteyaye añ libro.

³¹ Allpon ñeñt aquellcarettatsa arr libro ñeñtpa' añecop anaret ñeñtcha' same'ñate' po'ñočh Jesús pa' ñeñt Cristotets, ña po'ñočh Yompor Puechemer. Tarro'mar e'ñe same'ñeñoña Cristo sañapa' corretsasach tayoteñ e'ñe errponañohuen.

21

Allempo Jesús pa' orrterrana cančherrsheña pueyochresha'

¹ Allempoña Jesús pa' orrterrannerr pueyochresha' e'ñe sa'patoño Tiberiaso. Allpa' atet orrterrannet:

² Ñehua, allempo shontenet allpa' allo'tsen Simón Pedro ñaña Tomás ñeñt otenet Epanesha' ñaña Natanael ñeñt cano'marnesha' e'ñe allara Galileo. Ñaña allo'tsen Zebedeo puechemeresha' ñaña allo'tsen po'poñ epsheña pueyochresha'.

³ Simónña Pedropa' atet otanet:

—Napa' o'ch neterrayena'.

Po'potantañečhno pa'cho'ña atet ochet:

—Yapa'cho'ña o'ch yocha'.

Allempoñapa' ahuanmuet a'tačha'toset noñto. Tarraña ama't arepenetañ terrayatsetpa' amaña es rromueneto.

⁴ Allempoña o' puetarenmoch Jesúsña pa' tomhuen pueme'taro. Tarraña pueyochresha'cho'ña pa' ama esesha' cheme'tapaye.

⁵ Jesúsña pa' atet otosanet:

—Neyochreneshacha' ¿ama't eñalleña secacar ñeñtcha' serra'muen?

—Ñetña pa' atet ochet:

—Amaca'ye eñalle.

⁶ Ñaña pa' atet otanneterr:

—Sehuapore't seterraya noñt po'cohuenrot allpa' serrmue'chca'ye.

Atet otanetpa' atetcho' pet. Arepa'tcha' eshcaye' cheterreto po'terraya o' rromuet nanac aton cac — shonte'.

⁷ Allempoña pueyochresha' ñeñt atarr morrentena Jesús pa' ñaña pa' atet otan Pedro:

—¡Yepartsesharepa'tca'ye!

Simónña Pedropa' allempo eñotan Partseshepa't huetsa ñaña pa' puema'yoreñ chorrerrana pa'shtam tarro'mar ñapa' muelle'mcota terrayen. Ñaña pa' puema'yorñecma omacha oño pa' ahua' Jesúsesho.

8 Po'potantañeĉhnoña pueyochresha'pa' chenta' onaĉherret noñto. Ñato' cien metrote' allo'tsen attoch ĉherret toñña'so. Chetare'tnerret po'terraya e'ñe chorre' cac.

9 Allempo sohua'rretuerret patsopa' all entuerret quellmesh all huorten all achmare'ttena cac; allo'tsen ñaña pan.

10 Jesúsñapa' atet oterraneterr:

—Sacra' patantarr cac ñeññ serrmuen e'ñe errte'.

11 Allempoña Simón Pedropa' alla a'terr noñto, chetan terraya noñto' o' ne' masto, e'ñe chorre' atesha' cacaĉhno — allo'tsen ciento cincuenta tres ñeññ allpon rromuet cac. Tarraña ama't shonte' rromuet cacpa' ama rrarratano terraya.

12 Jesúsñapa' alla oterraneterr:

—Te'pa' sonaĉherr o'ch serra'muen.

Puemĉha'na'teñoĉet ama't puešeñarroĉeta ama esesha' otenaye: ¿Eshape'tña pa? tarro'mar eñoteñet po'ñoĉpa' Partsesha'ca'ye.

13 Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

14 Ñeñĉpa' allempo poma'pocheñoĉhua orrterrana pueyochresha' allempo tanterra rromot.

Allempo Jesúsapa' otenan Simón Pedro atarrte' morrenteña

15 Allempoña rrohua'muenet Jesúsñapa' atet otan Simón Pedro:

—Simón, Jonás puechemere, pa'pa' ¿atarrte' pemorrentenna, ellote' peñtana'tueñ añenesha'?

Ñaña'apa' atet otan Jesús:

—Po'ñoĉca'ye Partseshacha' peñotenen napa' nemorrentenpa.

Jesúsñapa' atet otererr:

—Ñeñĉepña'pa' e'ñech cohuen peserrpare'tatyas allohuen ñeññ name'ñenaya; ñetpa' e'ñe atet nentenanet ñerra'mrrate' necarrneroretollesha'.

16 Puepocheñoña'pa' alla otererr:

—Simón, Jonás puechemere, ¿po'ñoĉha't atarr pemorrentenna?

Ñaña'apa' alla otererr:

—Po'ñoĉ Partseshacha' e'ñe peñotenen napa' nemorrentenpa.

Ñaña'apa' alla otererr:

—Ñeñĉepña'pa' e'ñech cohuen pecuamĉson allohuen ñeññ name'ñenaya; ñet po'ñoĉpa' e'ñe atet nentenanet ñerra'mrrate' necarrneroreĉhno.

17 Poma'pocheñoña'pa' alla otererr:

—Simón, Jonás puechemere, ¿ama't e'ñe mamecpa pemor-
rentenno?

Pedroñapa' llequënana atto alla poma'pocheño otererr e'ñe
ñeñtara, ¿pemorrentenna't?, ñeñto'marña ñapa' otererr:

—Partseshacha' allohuenpa' e'ñepa't peñotueñ. E'ñe
peñotenen napa' nemorrentenpa.

Jesúsñapa' alla otererr:

—Ñeñtepñapa' e'ñech cohuen pecuam̃pson necar-
rnerorečno.

¹⁸ Po'ñoçhca'ye te'pa' o'ch notap̃, pa' allempo
huepueshenpa' pechorre't e'ñe po'ta, all peseche'tpa' all
pechopeñe'chyese't. Tarraña esempoch pepo'nme'tenpa'
pañapa' o'ch attaña peyopen peque' attochña o'ch
po'psheññaña pechorratenaya allempopa' anerrpetcha'
all ama pesecheno.

¹⁹ Ñeñtpa' tarrecop atet eñorana'tenanet allochñapa' attoch
eñochet errotentcha' rromuerr Pedro attotcha' cohuentater-
ran Yompor. Ñeñta otuepa' alla oterran Pedro:

—Papa' çhocmuepa'ch e'ñe poctenen.

Atto Jesús eños Juanacop ñeñt pueyochreshar atarr muerena

²⁰ Pedroñapa' puetallerrtsa entapan o' co'ta'neñ po'psheñeñ
pueyochresha' ñeñt atarr morrentena Jesús, ñeñt e'ñe anor-
rtse't epuet ahuañmo'cha allempo rrallme'chete't ñeñtara
pueyochresha' ñeñt otaye't ahuaña: “Partseshacha' ¿er-
ra'tsenacpa'tña pe'ñorena ñeñtcha' pepomuerre'?”

²¹ Allempoña entap̃ Pedro, ñaña'pa' allenta otan Jesús:

—Partseshacha' ñocoppa' ¿ama't eñalleña ñeñtcha' huapoya
ña?

²² Jesúsñapa' atet otererr:

—Ñerra'm na muenate' ñapa' allach a'pa esempohuañenña
nohuerrapa' ñeñtpa' e'ñe pocte' ñocop, ñeñtpa' ama
poçpayaye. Pocoppa' añ poctetsa çhocmuepa'ch poctenen.

²³ Ñeñto'marña epa'hua añ ñoñets errap̃aren allo'tsa'yen
masheñnesha', ñeñto'marña ñetpa' atet otanna'tyenet, ñeñt
pueyochresha'pa' año'ch rromuerr ama't errponaña.
Tarraña Jesús'pa' ama atteye' oteno amach rromuerr.
Ñapa' aña oteñ: “Ñerra'm na muenate' ñapa' allach a'pa
esempohuañenña nohuerrapa' ñeñtpa' e'ñe pocte' ñocop,
amaña po'psheññecpayaye.”

²⁴ Napa' ñeñten pueyochreshan ñeñten atet eñotatets atet
ñeñtarana quellquë' añ. Te'ña ya allohueney yeñoteñ ñeñt
atet na'po'tapa' ñeñtpa' e'ñe po'ñoçh atet.

²⁵ Shonteñ po'ñoñečno ñeñt atet pa'yesa Jesús. Ñerra'm
e'ñech yequellca'hueñ ora allohuen ñeñt atet pa'yese't Jesús

eñalleñte' shonte' nanac libros. Napa' noten shonteñte' nanac librospa' e'ñech epa'huañ ora errařaren aÑe patsro ñerra'm allponcha' yequellcañ libros. Ñeñtpa' attetepa'ch Nompore. Allohua.

ATET PA'YESA JESÚS PUEYOCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcoṭpa' o'ch neserpare'taterrperr po'pocheño. Ahuaña ñeñt nequellconap̄ all neñotataṭ ora allpon atet pe't Jesús allempo añe patsro'tsenmeñ. Ñaña ora allpon yeçhate't Jesús, ñeñtpa'çho' o' notuaṭ nequellcoṭ.

² Tarraña allempoteñ a'terr pue'ntañopa' palltena o'ch notap̄ ñaña. Te' añ nequellcoṭpa' o'ch notap̄. Tarraña ama't allempo ama a'terra' Jesúspa' añña ñeñt pueyochresha'pa' o' otuanet atetcha' pet. E'ñe Parets Puecamquëñoṭpa' o' llesensa'huanerran pueyochresha' ñeñt acra' ña.

³ Ama't pomueroçhteñoṭ o' rromua ahuaña, allempoñapa' o' orrterrana pueyochresha' e'ñe beṭnatot. Ñeñto'marña ñetpa' eñochet e'ñe po'ñoçh añpa' ñeñtara Jesús ñeñt rromats ahuaña. Tarro'mar pa'tatsoch çharramatnerr atto orrtame'tnerranet mamesha'tets. Ñaña çhocma eñçhete't allame'tets. Allempoña ñapa' a'poṭanet atet penaña Parets po'cohuenna atto ayochreshaṭtena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arroṭ, allasach arma Jerusaléño. O'ch secueñ esempoch çhaponasa ñeñt Parets Puecamquëñ. Tarro'mar Paretpa' o' otuas o'ch mueñonas Puecamquëñ. Ñeñto'mar napa' o' na'poṭuonas Parets po'ñoñ ahuaña.

⁵ Allempopa' añña ñeñt notuas: Juanañpa' añoñña apate't oño, tarraña na tsapaṭonetpa' añcha'ña nechorratasa Parets Puecamquëñ. Añpa' allohua atet ot Jesús.

⁶ Po'pocheño all apçhenet aspento pa'so'cheñ Olivopen. Pueyochresha'ñapa' atet a'ṭto'chet Jesús:

—Te'pa' Partseshacha' ñato' pocte' penteñ o'ch p̄apaterrey ñeñtey israelneshay yepatseñ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñt socoppa' ama pocteyaye o'ch señoçh. Añña Yompor po'partsoteñoṭ e'ñe eñotueñ. Ñapa' o' ne' allempoch etsotuerra ora allohuen añeçhno.

⁸ Jesúsapa' alla otnerraneterr:

—Añña pocte' o'ch señoch, ñerra'm esempoch huaponasa Parets Puecamquëñ sesho, ñach ahuamencat sepose'. Allempopa' sa'potoncha' neñoñ errañaren—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntañ

⁹ Ñeñña otuanenanetpa' allempoñapa' a'tenochayo' enonet. Añña pueyochresha' pocuanrrorteño'etpa' o' ma'natena oso. O'huañ orrta, ama't mamesha.

¹⁰ Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tomcha'toset e'ñe parro. Pa'shtamuetpa' nanaco' huallama'tareret.

¹¹ Ñetñapa' atet otosanet:

—Esuañaca' galileo'marneshacha' secuanrrortenña enonet. Añ Jesús ñeñt' o' a'terr entopa' huerrerrcha' po'pocheño atet senteñ o' ahuerr ento.

¹² Allempoña o' a'ten Jesús pa' añña pueyochresha' pa' o' ahuanerret alla Jerusaléño. O' onaçherret Olivopnot allot a'terr Jesús. Tarro'mar ñeñt' aspenet Olivopenpa' alame'ttso'tsena Jerusaléno't, Olivopnotpa' ñato' allo'tsente' paterr kilómetro attoch yeçhap Jerusaléño.

¹³ O'ña çhaçherret anetso Jerusaléño all pocollo allecma a'puenetpa' o' be'toscha'tuerret, a'tapuet eno all tama a'yohuen ba't. Allñapa' apçhet allohuenet. Ñeñt' apçhatsa ñeñt'pa' añeçhno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñt' Alfeo puechemer, ñaña Simón ñeñt' cananistanesha' ñeñt' atarr torratset pa'netsrecop, ñaña allo'tsen Judas ñeñt' Jacobo pa'mo'nasheñ.

¹⁴ Allña apçhenetpa' e'ñe ñeñña nete't pueyoçhro cohuen ñoñets. Allo'tpa' e'ñe poma'yoçhreño'et cohuenpa' çhocma ma'yoçhete't. Allo'tsen ñaña coyaneshaçhno, ama't Jesús pachor María, ñaña pa'mo'nasheñnesha' allo'tsenet ñamet.

Atet pa Jesús puellsensarnesha' allempo net Matías ñeñt'cha' epuet a'potoñet Yompor po'ñoñ

¹⁵ Parrochña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñneshacha' notas: Po'ñoçh o' etsotua Yompor po'ñoñ ñeñt' anaret ahuatoteñ. Tarro'mar Parets Puecamquëño't eñose't David. Ama't ahuatpa' ote't David

* 1:13 Jacobopa' ñeñt'ara ñeñt' sochenet Santiago.

atetcha' p̄a Judasoñ ñeñt̄ anmue' ñeñt̄ rromue' Jesús. Ñehua, pocte'ñacho' o'ch etsota Yompor po'ñoñ.

17 Judasoñpa' ahuaña allempo allo'tseney e'ñe parro ñapa'cho'ña acreñña Jesús o'ch pueyochresha' pe'.

18-19 Ñehua, Judasoñpa' tsa'chet allpon quelle atto poman Jesús. Tarraña ñeñt̄ quellepa' allo rañtet pats. Tarraña allempo shora'nom Judasoñ chap patsopa' potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñt̄ rañtet Judasoñ po'çllayoro'tpa' o' sochet Acéldama. Añ ñoñets ñeñt̄ otenet Acéldama ya yeñoño yoteñ Errasatsotnanen.

20 Añña ñeñt̄ quellquë't ahua't David ñeñt̄pa' anuaretta añ libro Salmos. Añña ñeñt̄ atet oteney:

All yeçhena, puenasepa'ch amara't, all amach eseshaye' yeçhatstatso. Ñeñt̄ po'taruas p̄a' attoch sherðaneñ Yomporpa' tarraña ñeñt̄pa' apanepa'ch po'psheñeñ. Atet oten añ libro Salmos.

21-22 Alla oterraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñt̄cha' parro ya'po'ta atto Jesús'pa' o' tanterra. O'ch ye'ner puesheñarr ñeñt̄ çhocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt̄ çhocma yoc'taye't ama't allempoteñ Juanañpa' apatapan Jesús tarremphua allempo a'terr Jesús.

23 Allempoñapa' o' neñet epsheña, puesheñarr añ pa'so'cheñ José Justo, ñeñt̄ara José oteñet ña'ma Barsabás. Po'psheñeñpa' añ pa'so'cheñ Matías.

24 Allempoñapa' o' ma'yochet. Puema'yocheño'tetpa' atet otet:

—Yompore, ñeñte'p̄ entene' allohueney yeyo'cher. Te'pa' o'ch peñotatey erra'tsente' pemnen p̄a ñeñt̄cha' ello alla sherberrets p̄ocop atet ñerra'm pellsensar.

25 Judasoñpa' o' sa'nmuey o' ahua' all ñeñt̄ o'patatare'ttena ña e'ñe ña po'chñarof̄.

26 Allempoñapa' yellsheñe'chet e'ñe ñet po'suertot attoch eñochet erra'tsente' muenenña Yompor ñeñt̄cha' alla sherberrayerr. Allempoña yellsheñe'chenet añ orrtatsa Matías ñeñt̄epa't muenenña Yompor. Allempoteñ Matías'pa' ahua' aguëñ po'poñeçhno ñeñt̄ çharrasheña puechetsa paterr ñeñt̄ puellsensar Jesús.

2

Allempo çhapanet Parets Puecamquëñ

1 Allempoñapa' o' meterterr allponmat amnaroch çharramat, o' çhap allempo coshena judionesha' ñeñt otenet Pentecostepo. Allempoña ñetpa' alla apçherreterr e'ñe parro ñeñtet ame'ñetset.

2 Allempoñapa' machayota e'mapuet atet ñerra'm huomenquësha' ma'more'tos entot. Allohuenet ñeñt allo'tsa'yen pocollo e'ñe e'mhuet.

3 Añña ñeñtet apçhetsetpa' o' huapanet atet ñerra'm tso'. Huapapa' çha chapa'rrtosa po'huorter ñesheto. Chapyesanet e'ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto.

4 Añña ñeñt çhapyesahuet e'ñe puesheña'ttsocmuetpa' añepa't Parets Puecamquëñ ñeñtcha' chorrahuet. Allempoñapa' allorocma eñosyaset po'poñ ñoñtso ñeñt ama eñosete'te ahuaña. Añña Parets Puecamquëñpa' ahuo' eñoratyesanet po'poñe'ttsohma attoch serrpare'tachet pa'namen acheñ e'ñe ñet po'ñoñeto.

5 Allempo Jerusaléñopa' allo'tsa'yen shonte' judionesha' ñeñt huachetsa pa'namen anetsot. Ñetpa' cohuen cotape'chete't Partsocop.

6 Allempoña e'marettet çha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt ano'tatssets. Chapuet all ano'tatsenetpa' o' entoset ñeñt ame'ñetsapa' año eñosyenet e'ñe ñet po'ñoñeto. Allempoñapa' atta cohuanrrortoset.

7 Pumoññe'teñotetpa' atet otyeset:

—Ta', errotenote'ca' e'myennayetña yeñoñ. Yapa' yeñnotenatet ñetpa' galileo'marnesheta.

8 Ama't po'poñ ñeñt yenyomar ñoñetspa' e'mueñet. Allohueneypa' o' e'ñe ye'myes atet eñosyenet e'ñe cohuen yeñoño.

9 Allempopa' alla otanna'tyerreterr:

—Yapa' yeñen po'poñe'ttsohma ñoñets tarro'mar yapa' pa'namen anetsot yehuena. Allot anetsrot yehuapyena ñeñtpa' pa'namen pa'so'chñeçhno—ama't Partiot ñaña Mediot ñaña Elamot ñaña Mesopotamiot, Judeot, Capadociot, Pontot, Asiot,

10 Frigiot, Panfiliot, Egiptot ñaña Africo'marot, alla alame'tets Cireneo. Ñaña ñeñt huetsa Romot ñeñt çocma a'puetsa arr.

11 Ama't ñaña judionesha' shonte', ñaña ama't ñeñt ame'ñaten judionesha'. Ñaña ñeñt huetsa Cretot ñaña Arabiot. Ya te'pa' o' e'ñe ye'myes e'ñe yocma yeñoño atet aye'chochtateññañet Parets po'cohuenña e'ñe yeñoño.

12 Otanna'tyerreterr alla:

—Ta'm, ñetpa' errotenette'ca'yete'. Yapa' ama't ahuatapa' ama yentareña galileo'marnesha'pa' o'ch eñosyesña e'ñe cohuen yeñoño. Ta', esocopte'.

13 Añña po'potantañ acheñenesha'pa' o' achmāre'tanet atet otarettet:

—Tarro'mar ottenetña' choca'ye posa'tyenet.

Atto Pedropa' serrpare'tatan acheñenesha'

14 Añña Pedropa' tanta o' tom e'ñe alla epuet po'poñechno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléño, te' o'ch notas: Se'mñnoten o'ch neñotatas atfof atet yepena ya.

15 Yapa' ama yeposañoñeye' o' yo'notaþsa'mueno atet soteney sa, tarro'mar ama choye' o' yarepeno orrats.

16 Añña ñeñt sentyen te' ñeñtpa' añ o' etsota ñeñt atet ote't Joel ñeñt a'mtaye't Yompor po'ñoñ ahuat. Añña ñeñt quellquë't ahuat Joel:

17 Añ atet oteney Yompor: Allempoch mellapoterrmocha, atetcha' perra, o'ch nenanet Necamquëñ pueyoçhreto, allohuen aromñañenesha' o'ch nechorratanet Necamquëñ. Añña pemreneña' ñetcha' a'poterret neñoñ ñeñtcha' neñotatuanet, ama't ñaña coyaneshaçhno a'poterrnancha' neñoñ. Añña ñeñt hupueshare' chocmach es norrtatyesanet ñeñtcha' entyesonet neshot. Añña ñeñt po'nmeneshare'pa' es norrtatyesanetcha' pueçhopoñeto.

18 Ama't allohuen ñeñt nesherbene', ñaña ama't coyaneshaçhno nenuanetcha' Necamquëñ pueyoçhreto attoch a'potonet neñoñ.

19 Allempoña enopa' o'ch nentatyesanet ñeñt ama't ahuatapa' ama puentareto. Patsopa'cho'ña o'ch norrtatyesanet ñeñtcha' eñotaterrahuet. Quellareñtsoþpa' norrtatcha' errasats. Puetomamþsanna'teñoñet pa'netserpa' orterrach tso' erracmañen, chepoterrcha' amos ñaña erraþaren.

20 Ama't ñeñt yeçhoyo'tamþene' te' allempopa' puenaserrach checmete'. Arrorrpa'cho'ña allempopa' tsama'tterrach atet ñerra'mrrate' errasats. Atetcha' yoroçhterra allempoch huerrmocha Yompor.

21 Allempopa' ama't erra'tsena chore'te' Yompor pueyoçhrocmañen attoch a'queshpachpa', Yomporñapa' a'queshpatanetcha'. Arrpa' allohua atet quellquë't ahuat Joel.

22 Añpa' ñeñtara alla oterraneterr Pedro:

—O'ch masheñe judioneshacha' noterrser: Sapa' señoñeñ ahuañapa' orrte't Jesús ñeñt nazareto'marnesha'. Ñapa' chocma orrtatonase't po'partsoteña, ñaña chocma orrtatyesonase't ñeñt ama sentare ñeñtcha' señoñate' ñapa'cho'ña nanac Parets. Pompom apuene'ña po'partsoña attoch señoñeñ Puechemer ña nanac Parets.

²³ Añña ñeñtara Jesús sañapa' o' sepomhuer attoch corso'tam'pset. Sañapa' o' sa'p po'poñ acheñenesha' ñeñt at'pare'tene' Yompom attoch ñetpa' o'ch muetset. Ate't o' se'pohua, Yompompa' ahuatoteñ eñotuase't atet'cha' se'pa, tarro'mar atet muene't ña.

²⁴ Tarraña ama't rromuapa' Pompompa' o' alla tantater. Tarro'mar amate' erroteno te'pa' alla a'po rromue'.

²⁵ Ama't atet ote't David ahuat, atet ñerra'm Jesús eñorats'e't. Ate't ote't:

Napa' neñoñeñ Nompom chocma allo'tsenen parro epan. Ñach nanac ahuamenca't nepe' attoch amach neñcha'to.

²⁶ Ñeño'to'marña nanac nocshena neyo'chro, nocsheñeshocma neñen. Ama't nerromapa' neñoñeñ amach alla na'po rromue'.

²⁷ Napa' neñoñeñ amach a'ypo'ñono necamqu'eñ alla o'pono. Nompompa' amach mueno o'ch puetsohua alla nechets tarro'mar ñapa' entenen e'ñe cohuenare' es nepen ñocop.

²⁸ Añcha'ña o'ch entaterren attoch yocrrerra e'ñe cohuen. Poparrocmateño't epan ñapa' ñach nocshaterre' nanac. Allohua atet ote't David ahuat atet ñerra'm Jesús eñostse't.

²⁹ Allempopa' alla otterraneter Pedro:

—O'ch masheñeshacha' noterrser, añ poctetsa e'ñe eñotochen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeño'to'mar yeñoñeñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te'te Jesúsocop.

³⁰⁻³¹ Tarro'mar David ñapa' ña a'ñtaye't ahuat Yompom po'ñoñ. Ñapa' e'ñe eñotue't atet'cha' pa' ñeñtcha' Cristotats allempoch chap añe patsro. Ñeño'to'mar ama't ahuatoteñpa' eñose't atet'cha' tanterra ñeñtcha' Cristotats. Pompompa' amach a'ypo'ñano Puechemer o'pono. Amach muenatoñe o'ch puetsohua po'chets. Yompompa' ama't ahuatpa' atet otan David o'ch noñ puesheñarr po'mrenño't ñeñtcha' añcha'tare'tatsa esempo. Davidpa' eñotane't Yompom ñapa' ama pueno po'ñoñ.

³² Te'ña yapa' o' yeñch Yompompa' o' tantaterran Puechemer Jesús.

33 Te'ña ñapa' e'ñe allo'tsen epuet Pompor Parets all part-soten ento. Pomporpa' o' e'ñe aphue Puecamquëñ. Te'ñapa' añ ñeñtara Puecamquëñ o' chorratya yañña atet otnerrey ahuaña. Ñeñto'marña o' orrtonaya atet sentyes ñorra', ñaña atet se'myes cohuen ñoñets e'ñe sa señoño.

34 Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allotpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets):
 “Te'pa' o'ch ñanorruerr arr necohuenrot allcha' pecohuentapreterrna.

35 Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ña.” Añpa' allohua atet ote't David ahuat.

36 Allempoñapa' alla oterranelterr Pedro:

—Sapa' israelena'tares. Ñeñto'marña señochepe'ch e'ñe eñotochen atto Yompor Parets o' nan Puechemer Jesús. Ñapa' ña Partseshatets, ñeñtara Cristotats. Añ ñeñt Jesús sañapa' o' secorso'tamñsach. Añpa' ñeñta allohua serrpare'tatanet Pedro.

37 Allempoñapa' ñeñt matrra'tatsa allpa' o' çhapanet pueyoçhro añ ñoñets. Nanac llecanrrortet. Ate't ochet Pedro ñaña po'potantañeçhno Jesús puellsensar. E'ñe puellquëñoçet atet otet:

—Masheñeshacha', errotenuachca'ye yeperraña te'.

38 Pedroñapa' atet otanet:

—Te'pa' aña poctetsa ñeñtcha' seperra allohuenes. Te' sellquëñoç o'ch soçtape'cherr ello cohuen Yomporecop. Allochñapa' Yomporpa' peretna'huernascha' so'chñar. E'ñe same'ñeñoç Jesucristo añ pocte'te' o'ch sapataretterra Partso-cop. Allochñapa' Paretspa' chorraterrrsach Puecamquëñ.

39 Ñeñtpa' pocte' atetcha' seña, tarro'mar atet otnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtey o' hua'ñerrey Yeyomporer Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ellaçaro'tsa'yenet.

40 Allempoñapa' o' alla serrpare'taterranelterr attoch otanet pa'namen ñoñets. Attoch coçape'chatanetpa' atet otanet:

—Amach soçtape'chatsto atet coçape'chen po'poñ acheñenesha' ñeñt ama ame'ñetso. Attotcha' sequeshperrach.

41 Allempoña allohuen ñeñt ame'ñaya Pedro atet otanetpa' o' apatarettet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa.

42 Allempoteñ ñeñt ame'ñatsapa' e'ñe ma'yočhrenet atet yečhatanete't Jesús puellsensar. Nanac cohuen entanna'tete't allecma apčhete't parro. Pueyerpueñoŋet Jesús o' toma'ntatet pan atet ñerra'm Jesús po'chets. Nanac ma'yočhete't e'ñe parro.

Atet corre't ahuat ñeñt ame'ñatse't

43 Ñeñt Jesús puellsensarpa' orrtatanete't shonte' pa'namen ñeñt ama puentareto, orrtatanete't partsoteñets attoch eñochet añmapa' Partsepa't. Ñeñto'marña allohuen acheñenesha'pa' nanac mecha'na'tete't.

44 Ñeñt ame'ñatsapa' čhocma apčhete't parro, pocsheñoŋ apanna'tyesete't ñeñt es palltatse't.

45 O'ch venda'yesete't ñeñt echyenet ñaña allpon ñeñt o'patyesete't ñeñtpa'čo'ña venda'yesete't. Allpon gana'yesete'tpa' o'ch apanna'tyesete't ñerra'm esesha' es palltatse't.

46 Pate'tets yetpa' o'ch ahuanenet e'ñe parro Parets pa'paclo. Erroŋenopa' pueyerpueñoŋet Jesús o'ch toma'ntachete't pan atet ñerra'm Jesús po'chets. Ñaña čhocmach rrallme'chapretanna'tete't pa'pacleto. E'ñe pocsheñeshet pueyočhretopa' čhocmach rrallme'chete't. Allempopa' nanac amuerañterret.

47 Ñaña čhocmach aye'čočhtatoñete't Yompor. Allohuen acheñenesha'pa' e'ñe cohuen entapretanete't ñeñt atet pete't. Pate'tets yet Yomporo'tpa' čhocmach ame'ñachete't po'poñečno acheñenesha'. Atteñapa' o' čha shonta ñeñtča' a'qeshpatarettatsa.

3

Atto Pedropa' a'crraterran ñeñt echarrtetsa

1 Pamtarrpa' čhap allempocma ma'yochenet Parets pa'paclo, atet ñerra'm allempopa' ñato' o' ellerrenmoch. Pedroñapa' ahuo' Parets pa'paclo epuet Juan, o'ch ma'yochoset all.

2 O'ña čhapuet allpa' a'taposet Parets pa'paclo. Allempoña a'tapmochet allpa', allempocma huapachet ñaña puesheñarr ñeñt echarrtetsa pa'tcoŋ, ama eshcaye' chope'cheno. Allempoteñ eñalleta ama chope'cheno. Čhocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet allotecma be'tosete't ñeñt otete't

Ama Macohueno. Allñapa' allcha' enamare'tyenan quelle ñeñt be'tostse't Parets pa'paclo.

³ Ñeñtña echarrtetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñañaapa' enamapanet quelle.

⁴ Pedroñapa' alla o'chet cohue' epuet Juan. Allempoña Pedropa' atet otan ñeñt ama chope'chetso:

—Ñehua, pecua'y alla.

⁵ Ñeñtña echarrtetsapa' alla e'ñe cohuanet, ñapa' otapañte' o'ch apet quelle.

⁶ Tarraña Pedroñapa' atet och:

—Napa' ama necheno quelle, tarraña ñeñt nechenpa' ñeñtcha'ña napañ. O'ch notañ, e'ñe po'partsoteño't Jesucristo ñeñt nazareto'marnesha' o'ch notañ, pechope'cherrepa'.

⁷ Pedroñapa' chete' potot po'cohuenrotpa' o' echañch. Allempocma corra'huena pa'tco't, ama't all meya'nen yetacpa' o' corra'huena poctacma.

⁸ Corra'huetsa pa'tco'tpa' pocsheño'tpa' omacha enonet, o'ten e'ñe cohuen. Allempoñapa' chopeñe'chen. Ama't all chopeñe'chen omachme'tetsa all aye'chochtatenan Yompor. Atteñapa' be'tos Parets pa'paclo epuet Pedro ñaña Juan.

⁹ Allohuen acheñenesha' ñeñt allo'tsa'yen, ñetpa'cho' enteñet atto pa'ye'chochtateñesha' Yompor all chopeñe'chen.

¹⁰ Ñetpa' cheme'teñet añmapa' ñeñtara ñeñt anorrtse't allotecma be'tosete't Parets pa'paclo, ñeñt otenet Ama Macohueno, allecma enamare'te't quelle. Ñetñapa' atta cohuanr-rorteñet.

Atto Pedropa' serrpare'tatan acheñenesha' Parets pa'paclo

¹¹ Añña ñeñt correrrtsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorño'tetpa' matrra'tet allo'tsen Pedro ñaña Juan ñaña ñeñt a'crraterr Pedro.

¹² Allempoña cha'cha'tet all tomchenetpa', añña Pedropa' otapanet, atet ot:

O'ch masheñe israelneshacha' notas, eso'marte' secuanrrorteny. Chate' sotenapañ e'ñe'e' ya yehuamenco't yechope'chater, amapa' chate' sotenapañ e'ñe'e' ya, ya'cohuentateño't yechope'chater. Añmapa' ama atteyaye.

¹³ Añcha'ña o'ch notas: Añmapa' Yompor orrtatene' ñeñt o' sentua. Añña Yomporpa' ñeñtara Po'yomporer pe't ama't Abraham ñaña Isaac ñaña Jacob, ñaña allohuen yatañneshañ. Yomporpa' e'ñe pocte' eñch o'ch cohuentatan Puechemer Jesús. Ñeñto'marña o' orrtatonas ñeñt o' sentua. Tarraña sa ñeñtara Jesúsapa' o' sepomhue. Ama't allempo

Pilatopa' pocte' enteñeñ o'ch a'rroyereñ, tarraña sañapa' cha sa' nasotañpesya allohuenes.

14 Ama't ñeñt nanac Parets, ñaña ama't ñeñt e'ñe pocte' es pets, sañapa' cha sa' nasotañpesya. Allempo Pilatopa' ama't mueneñ o'ch a'rroyer, sañapa' aña sanamñ ñeñt amtsañ ñeñtcha' a'rroyonaset.

15 Ñañaapa' chaña semtsach ñeñt alloch e'ñe yocrra. Tarraña ama't muetsetañpa' añaña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra.

16 Ya yeyemteñoñ e'ñe Jesús o' correrra ñeñt ama chope'chetso ñorra'. Ama't sapa' señoñeñ atto ahuañapa' ama chope'che'te. Tarraña te'pa' o' senter o' chopeñe'cherr. Yapa' o' yame'ñera Jesús ñeñt o' a'crratateran ñeñt echarrtatset' ahuaña. Te'ña ama't sapa' o' sentuer allohuenes.

17 Te'ña masheñneshacha' napa' neñotenes ahuaña sapa' ama es sechapoyo seyoçhro allempo semtsach Jesús. Ama't ñeñt sa'mcha'tareternesha' ama es chapahueto pueyoçhreto ñamet.

18 Tarraña ñeñt atet sepoñhua te'pa' o' etsoterra Yompor po'ñoñ. Tarro'mar allohuen ñeñt a'mtaye't Yompor po'ñoñpa' attecma otete't, ñeñtcha' Cristotats Partsocoppa' mueroçhtachetcha' esempo. Ñeñto'marña te'pa' o' etsota Yompor po'ñoñ ñeñt aquellcaret.

19 Ñeñto'marña te'pa' añ poctetsa e'ñe sa sellquëñoñpa' o'ch soctape'cherr ello cohuen Yomporecop. O'ch sesuanom ñeñt ahuañoteñ soctañña. Attotcha' Yomporpa' e'shohuerrnascha' so'chñar.

20 Attochña separrocmateñoñ epas Yomporpa' socsherrach seyoçhro. Ñaña Yomporpa' o'ch alla mueñerrnaserr Cristo Jesús ñeñt anarettatsa ñaña socop.

21 Tarraña te'pa' e'ñe pocte' allach pue'ntañ tarremphua esempohuañencha' a'poctataretetua ora allohuen ñeñt atet eñose't Yompor ahuañ. Ama't ahuañ Yomporpa' eñorana'tane't acheñ ñeñt e'ñe pocte' ente't Parets ñeñtcha' a'mte' po'ñoñ, ñeñtcha' etsoterrtsa esempohuañen.

22 Añmapa' ñeñt atet ote't ahuañ Moisés: "Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'taroñpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa çhocmach se'mñoter errotencha' oterres.

23 Tarraña ñerra'm esesha' amach e'mñoterraye ñeñtcha' orrterrtsa, ñeñtña acheñerpa' ahuo'ch a'chencataretterrach. Pamo'tsesha'ña israelnesha'pa' amach allo'na entneñeto."

Añpa' allohua atet ote't Moisés ahuat.

²⁴ Alla oterrerr Pedro:

—Ama't allohuen ñeñt a'mtaye't Yompor po'ñoñ ahuatpa', eñose'te't ñeñt o' etsotueria te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñose'te't ñeñt o' etsotueria te'.

²⁵ Añña ñeñt a'mtaye't Yompor po'ñoñ ahuatpa' ñeñtara samo'tsna'tar sepe't ama't sa. Atet Yompor a'pocatan ñoñets ahuat satañneshacoppa' añ ñeñtara ñoñets attecma a'pocatareta ñaña socop. Atet ñerra'm ahuat atet otan Yompor sato' Abraham: “Ñeñt puesheñarro't penrenño'tpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'.”

²⁶ Yomporpa' o' orrtatonay Puechemer o' mueñonay ñeñtey judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen, ñaña allempoteñ o' yeque'chpa'huerr ñeñt ama pocyaye Yomporecop.

4

Allempo anmet Pedro ñaña Juan allo'tsa'yen a'mcha'taretnesha'

¹ Allempoña serrpare'tatenanet Pedro epuet Juanpa' machayota huacha'toña a'mcha'taretnesha'. O' huapa cornanesha', huapa ñaña guardia pa'mcha'tareter ñeñt cohuañpene' Parets pa'paquell. O' huapoña ñaña saduceonesha' ñeñt otets e'ñe ñet pocapñño'tpa' amach errotenot yetanterro.

² O' huacha'tetpa' cha e'moñe'toset, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeño'tpa' yetanter-rach.

³ Pa'tsrre'mueño'tetpa' o' armare'ttet epsheño'maret, abe'tare'ttet cárcelo. Allempopa' o' ellerren ñeñto'marña tsapa'tach a'p'to'tyesare'ttet errotenotte' serrpare'tenet atet.

⁴ Tarraña ama't atet a'pare'ttetpa' añña ñeñt e'mue' atet serrpare'tatanetpa' shonte' ame'ñyet. Allempoña ñeñt ame'ñetsa ahuaño'huenpa' o' chap allempo amnaroch mil ñeñt ame'ñatsa.

⁵ Tsapañña'pa' o' ap'cha añcha'taretnesha' ama't ñaña ñeñt pompornesha' penet ama't ñaña ñeñt etsotene' ñoñets ñeñt atet anare't. Ñeñt'pa' arr ap'chet e'ñe alla Jerusaléño.

⁶ Allempopa' allo'tsen ñaña cornesha' ñeñt nanac añcha'tare't ñeñt pa'so'cheñ Anás. Allo'tsen ñaña Caifás, ñaña Juan, ñaña Alejandro ñaña po'poñe'chno

añcha'taretnesha' ñeñt e'ñe pamo'tsna'tarecma cornesha' ñeñt nanac añcha'taret.

⁷ Allempoña e'ñe ap'cha'huetpa' huapachet Pedro ñaña Juan e'ñe all ap'chena añcha'taretnesha'. Allempoñapa' a'p'to'tarettet epsheño'maret. Ateť otanet añcha'taret:

—Sapa' ¿esesho'tña po'huamencoť o' sa'crraterña acheñ? ¿Esesha'tña sapuene'ña llesens attoť atet sepena?

⁸ Allempoña Pedro e'ñe ahuamencat puepeñoť Parets Puecamquēñpa' atet otanet:

—Añcha'taretneshacha' ñaña ñeñtes pompornesha' penet, te'pa' o'ch notas:

⁹ Sapa' atto sa'p'to'teney errotenette' o' yeġa ya cohuen añecop ñeñt muerochtetsa, ñaña atto sa'p'to'teney errotenotte' o' ya'crrater,

¹⁰ ñehua, te'pa' o'ch se'mñnoten attoch neñotatas sa ama't ñaña allohuen israelnesha'. E'ñe añ Jesucristo ñeñt nazareto'marnesha', ñeñtña ña po'huamencoť te'pa' arr ten e'ñe huomech, ñeñt ahuaña ċha echarrtena. Añ ñeñtara Jesús sañapa' ċhaña secorso'tanġpes attoch rroma. Tarraña Pomporpa' o' tantater ama't rroma.

¹¹ Sapa' ċha sottena atet ñerra'm acheñ ñeñt tomatene' pocoll. Ñeñtña acheñ ñeñt tomatene' pocollpa' ċha huapore'tan mapue' ñeñt nanac sherbets, tarro'mar ama es ċhapahueto pueyoċhro. Tarraña Jesúsapa' ama't atteñ ñerra'm mapue' ñeñt ahupore'taret ñeñtara Jesús ñeñtña nanac sherbets atet ñerra'm mapue' alloch orratet pocoll nanac echarr.

¹² Po'psheñeñpa' ama eñalle alloch yequeshperra, tarro'mar ama eñalle po'psheñeñ ñeñt anaret ñeñtċha' yeċhore't attoch o'ch a'queshġatey. Ama't ora erracmañen añe patsro ama eñalle attoch yequeshperra, ñap'taña Jesús. Ñeñtapa' allohua atet otanet Pedro.

¹³ Añña Pedro ñaña Juanpa' ama puenċha'nañoteye' eñoseto. Ama't mameshapa' ama mecha'teneto. Allempoña añcha'tareteċhnopa' o' eñochet ama puenċha'nañoteye' eñenetopa' ñetpa' atet otet:

—Errotenotuaca'ye eñenetña atet. Yapa' yeñotenanet ñetpa' ama ayċhataretto attoch eñotet quelled huomenc. Ñetpa' atteta ñerra'm po'potantañ acheñenesha' ñeñt ama tama es eñotetso. Errotenotuañaca'ye eñenetña atet ñerra'm ayċhataretet.

Allempoñapa' o' ċhapanet pueyoċhro atto Pedro ñaña Juanpa' ahuaña ċhocma chopeñe'ċe't epuet Jesús.

¹⁴ Añña ñeñt correrrtsapa' ñapa'ċho' e'ñe alla ten alame'tets. Ñeñto'marña añcha'taretnesha'pa' ama errotenoť ċe'ptare'taneto.

15 Allempoñapa' mueñerranet a'yenet. Allempoña añcha'tareñnesha'pa' serrpare'tatanna'tet e'ñe ñañeñeta.

16 Ateť otanna'tyeset:

—Errotenuachñaca' yeñanetña te'te'. Ama't arr ora Jerusaléñopa' o' e'ñe eñotuarettet atto ñetpa' orrtatet ñeñt ama't yapa' ama yentare. Ñeñto'marña te' yapa' amach erroteno ya'nasochoña', e'ñe po'ñočh atet.

17 Tarraña ama'tcha' ama erroť yeñanetopa' te'pa' añ poctetsa o'ch yeche'ptare'tyesanet o'ch yotanet amach allo'na serrpare'tnenetoña ñeñt atet pena Jesús. Tarro'mar yapa' ama yemno allohuen acheñenesha' o'ch e'mare'taretetuet ñeñt atet penet te' ñet arr. O'ch yotanet ama't puesheñarra acheñ amach serrpare'tatatscheto.

18 Allempoñapa' alla agotaretterret. Ateť otareťtapuerret e'ñe eche'čharro, atet otet:

—Te'pa' amach seserrpare'tatatsto ñeñt atet pena Jesús, ama't e'ñe mamesha. Ñaña amach seyčhatatsto ama't mamesha atet yečhate't Jesús ahuaña.

19 Allempoña Pedro ñaña Juanpa' atet otanet:

—Ñehua, te'pa' o'ch soctape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor.

20 Yapa' amach errotenoť yemmo. Añña pocte' čhocmach ya'pota ñeñt o' yentua ñaña ñeñt o' ye'mua.

21 Allempoñapa' atta che'ptare'tuapuenanet po'pocheño, allotñapa' a'rroyareñtenet. Añcha'tareñnesha'pa' ama't mueneñetañ o'ch castiganetañpa' tarraña ama erroteno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'chočhtatoñet Yompor añecop ñeñt o' entuet atto Yompor orrtatanet po'partsoña.

22 Tarro'mar añ yacma ñeñt o' correrrapa' ñapa' o' pa'tatsoch čharra' po'charña.

Ñeñt ame'ñetsapa' atet pet allempo enamet Yompor po'huamenc

23 Allempoña a'rroyeret Pedro ñaña Juanpa' ahuanmuet allo'tsen ñeñt parro ame'ñenet. Allempoña čhapuet allpa' serrpare'tatosanet atet otanet ñeñt pa'mcha'tareñnesha' pen allohuen judionesha' po'cornaneshar ñaña ñeñt pompornesha' penet.

24 Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yochenoťpa' atet otet:

—Yompore, ñeñteř nanac Partsoř, řa ñeñteř yečhcatue' enet ñaña ama't añ pats, ñaña ora erracmañen sa'p řa

yeĥcatue', ñańa ama't ora esocmańen ñeńt yentyen e'ńe alla e'ńe p̄ocma peyeĥcatuar.

²⁵ Ahuať yatań Davidpa' nanac sherĥape't. E'ńe Pecamquẽñoť pe'ńorache't, ñeńto'mar atet ote't ña ahuať:

Errotenote' atsrre'muenańa po'poń acheńenesha' ñeńt ama ame'ńetso. Errotenote' o'pateńetńa ama't Parets, ñeńtpa' e'ńe orrena atet penet.

²⁶ Ñeńt ańcha'tarettetsa arr patsro ñetpa' apĥet attoch o'pachet Yompor, o'pachet ñańa ñeńt llesensa' ñeńtara Cristo. Ańpa' allohua atet ote't David ahuať.

²⁷⁻²⁸ Alla ma'yochereterr Yompor, atet oterreterr:

—Ñeńto'marńa te'pa' po'ńoch o' etsota atto arr Jerusalẽno o' apĥet attoch o'patonapet Pechemer Jesús ama't ñeńt e'ńe cohuen Parets penten p̄a, ñeńtńa Jesús ñeńt e'ńe cohuen pesherĥaye't ñeńt e'ńe p̄o pellsensar. Atet ahuaťoteń e'ńe peńotuanete't ñetpa' o'ch etsotaterrnapet peńoń atet ñerra'm Herodes, ñańa Poncio Pilato, ñańa po'pońeĥno acheń ñeńt ama ame'ńetso, ama't ñańa israelnesha'. Tarrańa ñeńt atet o'pachetpa' te'pa' o' etsotuerra peńoń.

²⁹ Ama't te'pa' Yompore peńoteny ñetpa' nanac mueneńet o'ch yore'tame'tyetyama. Te'pa' o'ch yenamař ahua-mencat pepa'yepa'ch ñeńtey torretsa p̄ocop attoch amach yeńcha'tatsto. E'ńepa'ch huomencocma yeserrpare'tonař peńoń.

³⁰ Porrtatonayepa'ch pehuamenc attoch corra'huerra ñeńt atсна'tyets. E'ńe yeĥore'teńoť Jesús porrtatonayepa'ch pepartsońa, ñańa ñeńt ama yentare porrtatanetcha' attoch eńochet p̄apa' ñeńteř nanac Partsoř —e'ńe yeĥore'teńoť Pechemer Jesús, ñeńt e'ńe cohuen Parets penten p̄a, ñeńt e'ńe cohuen pesherbene'. Ańpa' allohua atet ma'yochet.

³¹ Allempońa ma'yochuetpa' allńa apĥenetpa' o' pella ora all anorrĥenet. Allempocma allohuenetpa' o' chorraret Parets Puecamquẽń, attoch e'ńe huomencocma o'ch serpare'tońet Yompor po'ńoń.

Atto es apanna'tyesete't pame'ńeńoťet Yompor

³² Allempoteńńa ñet ñeńtet ame'ńatsete'tpa' o' parrocmatuet e'ńe cohuen. E'ńe parra coťařńats anmuete't pueyoĥhreto ñeńt amuerańtetsa. Ama eseshaye' otatse'te ñeńtpa' ñapťetach es o'patet, ańńa ĥocma apanna'tyesete't ñerra'm esesha' es palltatse't.

³³ Jesús puellsensarnesha'pa' e'ńe po'huamencocmańen a'potońete't atto tanterra Yepartseshar Jesús. Yomporpa' nanac mueranete't, ñańa nanac ahua-mencat p̄anete't.

³⁴ E'ñe ñeshetopa' ama esesha' es palltatse'te. Añña ñeñt allpon echyesete't po'patseñ, amapa' pa'paquëllpa' o'ch venda'yesete't. Ñeñña allpon gana'yesete'tpa' o'ch huapachet

³⁵ allo'tsen allsensaret. Allotñapa' o'ch aposet ñeñt allsensaret. Allsensaretñapa' o'ch apa'yesan ñeñt es palltatse't.

³⁶ Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeñtara levitana'tar. Añña ñeñt allsensaretnesha'pa' o' socheret José Bernabé. Añña so'chñets Bernabépa' ñeñt otets yeñoño amuerañana'tar.

³⁷ Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt ganapa' o' aposan ñeñt allsensaretnesha'.

5

Atet pa Ananías epuet puetapor Safira

¹ Tarraña eñall po'psheñeñ ñeñt atet patse't po'poñ, ñeñtpa' añ pa'so'cheñ Ananías epuet puetapor ñeñt pa'so'cheñ Safira. Añña Ananíaspa' o' vendan allpon po'patseñpa'

² o' huapatan quelle, aposan ñeñt allsensaret. Tarraña ama oraye' huapatuano quelle chach shequënet. Tarro'mar ñet epuet puetaporpa' atet a'pochtachet o'ch yoret allpon quelle e'ñe ñocpuet.

³ Allempoña aposan allsensaret ñeñt o' allponañña quellepa', Pedroñapa' atet och:

—Eso'mare't pemnateñ oneñe't o'ch cotape'chatap' po'poñ peyo'chro. Papa' pemneñeñ o'ch peshquëñ ama't Parets Puecamquëñ atto papa' ahuo't peyorañ allpon quelle.

⁴ Ñeñt pepatseñpa' e'ñe po'ño'ch ñeñtpa' po. Tarraña ñerra'm ama pa muenatsñe o'ch pevendeñpa' ñeñtpa' e'ñe poctañ. Ñaña ama'tcha' pevendeñpa' ñerra'm ama pa muenatsñe o'ch papyeñ ora allpon quelle ñeñt pagappa', ñeñt e'ñe poctañ ñaña. ¿Erro'tenote'ña poctape'chña atet peyo'chro? Ama yapteye' pemnenñe o'ch peshca'yeñ, Yompore'ñaña pemneñeñ o'ch peshquëñ ñaña.

⁵ Allempoña Ananíaspa' ñeñta e'muapa' ataco'roche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc.

⁶ Añña yacmanesha' ñeñt po'nare'pa' o' huapuetpa' ñetñapa' epatse'chet ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar.

⁸ Allempo huapa Pedroñapa' o' a'pto'tap':

—Ñehua, ¿poten, ¿po'ñochte' allpona quelle sagap allempo sevenda'hua sepatseñ?

Puetaporña' atet och:

—Allponaca'ye quelle ñeñt yagap.

⁹ Pedroña' atet otererr:

—Tarraña sapa' ahuo't sa'pochtach epaḥ perrollareñ atetcha' seḥa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'toscha'tuerrmoch ñeñt o' pampa'huennaḥa' errte' perrollareñ. Papa'cho' attecmapa' anmapetcha' a'yo.

¹⁰ E'ñe allempocma puetaporpa'cho'ña o' tacho'ra ñaña e'ñe alla Pedresho, o' rroma ñaña. Allempo be'toscha'tuerr ñeñt anmue' puerrollareñ, allña'pa' entuerrñañet puetaporpa'cho'ña o' rroma. Ñapa'cho'ña anmetpa' o' pampueñeta' a'yo epuet puerrollareñ.

¹¹ Atarr mecha'na'tet allohuenet ñeñt pame'ñeño' apchetsa, ama't allohuen ñeñt e'mare'te'pa' cha yorenet nanac. Añpa' ñeñta allohua atet ḥa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt Jesús puellsensarpa' nanac orrtatete't Yompor po'partsoña, ama't ñeñt acheñenesha'pa' ama puentare attoch eñochet añmapa' Partsepa't. Añña ñeñt parro ame'ñenetpa' arr apchenet all ochete't Salomón Popellrraro.

¹³ Po'potantañ acheñenesha' ama't e'ñe pocte' eñchete't ñeñt ame'ñetsapa', allempoña ñet pueñchaño'etpa' ama apcherreto parro.

¹⁴ Allempoña'pa' allo'na atonetnena po'poñe'chno acheñenesha' ñeñt o' ame'ña. Shonte' o' ame'ñana Yompor, ama't coyanesha'chno ñaña yacmanesha'chno.

¹⁵ Añña ñeñt atsna'tyetspa' o' anmet a'yenet allecma chopeñe'chenet. Allña'pa' o' ḥanrra'tyesoset topantso, ñaña puesheña'tetspa' ñato' ora po'maye'na. Tarro'mar anmare'tetyeset allecma chopeñe'chenet allochña'pa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret.

¹⁶ Ñaña ama't allampaño't Jerusaléño'tpa' huapatoñ acheñenesha' atsnañe'fchno ñaña ama't ñeñt chorrena oneñet. Allochña'pa' allohuenetpa' o'ch corra'huerret.

Allempo Pedro ñaña Juanpa' abe'tarettet cárcelo

¹⁷ Allempoña'pa' ñeñt cornesha' ñeñt nanac añcha'taretpa' e'moñe'tan allohuen ñeñt ame'ñetsa. Ñaña allohuen ñeñt parro e'ñe attecmuet coḥape'chenet ñeñt otenet

saduceonesha'pa' o' e'moñe'chet ñeñt ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeñt ame'ñetsa.

18 Allempoña allsensaretnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'.

19 Tarraña ama't abe'tarettetpa' tsapoñapa' o' huapanet Yompor po'mllañoñeñer ñeñt huetsa pue'ntañot o' toram̄perranet, o' chapaterranet a'yenetpa' atet otanet:

20 —Añ poctetsa o'ch ahues Parets pa'paclopa' o'ch satomos all o'ch seserrpare'tach allohuen acheñenesha' ora atet yocrrena etserra cohuen Partsocop.

21 Allempoña ñeñta e'mhuetpa' e'ñe ahuatecma ahua'muenet Parets pa'paclo, o' be'toscha'toset, allña yečhata'muenet.

Añña ñeñt cornesha' ñeñt nanac am̄cha'taretpa' o' čhapa'muen ñaña ellonet allotcha' agotatan am̄cha'taretnesha'. O'ch čhapa'muen ñaña allohuen ñeñt cotene'. Allotcha' agotatan allohuen am̄cha'taretnesha' ñeñt čhocma a'poctatyene' ñoñets ñeñt pompornesha' penet israelena'tarnesha'. O'ña čhača'tuetpa' o' serrpare'tatanna'tet attoch a'poctachet atetcha' pet. Allempoñapa' o' agotachet ñeñt abe'tatenet cárcelo.

22 Tarraña allempoña čhap cárcelo ñeñt mueñenetpa' ama es entosetoña cárcelo. O' puerrrerretpa' atet otueret am̄cha'taretnesha':

23 —Yapa' allempo yečhap cárcelopa' o' yentos cárcel e'ñe poctacma echarr ayottam̄psaret, ñaña ñeñt cohuan̄pene'pa' alla tomčhenet allot be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

24 Allempoña ñeñta e'mua am̄cha'taretnesha' ñeñt po'captáner penet ñeñt cohuan̄pene' Parets pa'paquell ñaña ñeñt pa'm̄cha'tareternesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' čha'nmačhenette'. Te'pa' errotuancha' pette' tsapañonet.

25 Allempoñapa' huapa puesheñarr atet otosanet:

—Añña ñeñt sabe'tat ellerro cárcelopa' te'ñapa' alla tomčhenet Parets pa'paclo yečhatetset all.

26 Allempoña añña capitán ñaña ñeñtcha' yenpue'pa' o' ahuanmuet allo'tsen allsensaretnesha'. O'ña čhapuetpa' o' ahuananeta' e'ñe cohuenacma. Tarraña ama errof paneto tarro'mar capitánpa' čha mecha'tenan acheñenesha'. Ñato' čho'te' rrolle'chet.

27 O'ña čapaterranetpa' nosanet e'ñe allo'tsa'yen ñeñt' chocma a'pocatyene' ñoñets. Añña cornesha' ñeñt' nanac añcha'taretpa' atet otanet:

28 —Ahuañapa' ama't e'ñe eche'čharro yotuas amach seserppare'tatsterrero ñeñt' pocatapña Jesús. Tarraña sapa' ahuo't alla seserppare'tatuerrerr ñeñt' so soctapña. Ama't allohuen ñeñt' yečhetsa arr Jerusaléño o' alla seserppare'tatuererr. Te'ñapa' allo' seyohuerryerr ahuo' yemtsach añ Jesús.

29 Allempoñapa' otanet Pedro ñaña ñeñt' epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña.

30 Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeñt'ara Yompor ñeñt' Po'yomporer pete't ñaña ahuat yatañeshañ.

31 Te'ña Pomporpa' o' nanac ahuamencat pe', e'ñe po'cohuenrotpa' all partsoten. Allochñapa' attoch cotape'chaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñto'marña Yomporpa' nan Jesús ñeñt'cha' Ya'qeshpatañer yepen.

32 Ñeñto'marña te'ña yapa' ya'poteññañ atet pena Yompor. Yompor Puecamquëñpa'cho'ña ñeñt' eñotatets. Ñeñt'ara Puecamquëñ ñeñt' nennay yeyo'chro, allohueney ñeñt'ey ame'ñenaya ña. Añpa' allohua atet otanet Pedro.

33 Allempoña ñeñta e'mhuet ñeñt' atet ot Pedropa' añña añcha'taretnesha' nanac atsrre'matanet, atarr mueneñetañ ahuo'ch muetsuet ñeñt' allsensaretnesha'.

34 Allempoñapa' añña puesheñarr fariseo ñeñt' e'ñe parro a'pocatyene' ñoñetspa' o' tomos attoch eños. Ñeñt' tomosetspa' añ pa'so'cheñ Gamaliel, ñapa' ña ñeñt' yečhatets ñoñets ñeñt' atet anaret, tarro'mar ñeñt' po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet.

35 Ñeñt' epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pocach ñeñt' atet'cha' yeñanet.

36 Sapa' ama't seyerpueñoña atto ahuaña o' orrta puesheñarr ñeñt' pa'so'cheñ Teudas. Ñapa' atarr muene't o'ch ayochreshatta. Shonto' acheñenesha' ñato' allo'tseno'te' cuatrocientos ñeñt' ame'ñata. Allempoñapa' allponmaterrerrpa' o' muetsset. Ñeñt'ña pueyochresha'pa' o' ahuanomyerret ñopa'ttsocmuet. Allempoñapa' o'huañ es cotape'chet.

37 Allempoña allponmaterrerrpa' orrta ñaña po'psheñeñ ñeñt pa'so'cheñ Judas ñeñt galileo'marnesha'. Ñapa' tarrempo orrta allempo quellcatyenet pa'so'chñečno amcha'taretesho. Ñapa'cho'ña tama yochresha'tana allpon acheñenesha'. Allponmaterrerrpa' ñapa'cho'ña o' chenca. Añña ñeñt pueyochresha'pa' o' parratse'tuerret.

38 Ñeñto'marña te'pa' o'ch notas, o'ch sa'rroyer ñeñt serpare'tene' ñeñt atet pena Jesús. Amach errot sepatstaneto, tarro'mar ñerra'm e'ñe ñoto'teta pocta'ño't atet penetpa' ñeñtpa' mameshapa' o'ch huañerr.

39 Tarraña ñerra'm pocta'ño'tpa' Yomporeshot huenapa' amach errotenet sehuapore'tache. Ñato' sapa' cha se'moñe'teññañ ama't Yompor pocta'ña. Añpa' ñeñt atet otan Gamaliel amcha'taretnesha'.

40 Atet co'tape'chatanet Gamalielpa' e'ñe pocte' eñchet. Allempoñapa' alla agotaterran allsensaretnesha'. Allempoña hua'cherretpa' o' nalle'tatanet amcha'taretnesha'. O' nalle'tatuanet amcha'taretnesha'pa' allotña'pa' otarettet ñaña e'ñe eche'charro:

—Te'pa' amach seserrpare'tatsterrerro ñeñt atet pena Jesús. Allempoñapa' a'rroyare'ttenet.

41 Allempoñapa' o' ahuanenet, o' sa'neñet ñeñt chocma a'poctatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch muerochtet ñocop.

42 Allempoteñ pate'tets yetpa' chocmach ye'chatete't Parets pa'paclo ama't ñaña e'ñe alla pa'pacletto. Nanac serpare'tete't atto Jesús'pa' ña Cristotats.

6

Arrpa' allempo net cancherrsheña ñeñtcha' epatyehuet rreñets

1 Allempoteñña'pa' allo'na sen atonetnomtsa ñeñt ame'ñetsa. Tarraña e'ñe allempopa' o' sope'channa'tet. Ñehua, tarro'mar allempopa' atet pete't. Pate'tets yet Jesús pueyochresha'pa' o'ch apa'yesan allohuen rretorrnanesha' rreñets ñeñt pallta'yesatse't rreñets. Ñeñt e'muene' griega'chpa' ñetpa' atet otyeset:

—Ñeñt yamo'ts rretorrnanesha'pa' ñetpa' ama allponeshacmaye' rreñets agapueto allpon agapyes ñeñt e'muene' hebrea'ch. Yamo'ts rretorrnanesha'pa' coñe'ta agapyeset. Ñeñtña rretorrnanesha' ñeñt e'muene' hebrea'chpa' shonte' rreñets agapyeset. Atto'ña sope'channa'tet.

² Allempoñapa' ñeñt' çharrasheña puechena epa ñeñtara Jesús puellsensarpa' ñetñapa' agotatué allohuen ñeñt' ame'ñetsa. O'ña apçha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'yes allohuen rretorrnanesha' rreñets.

³ Añña pocte' masheñeshacha', o'ch se'ñ cançherrsheña ñeñtara ñeñtey ame'ñetsa arr parro—erra'tsente' cohuen acheñ senten ñaña ñeñt' chorrena Parets Puecamquëñ ñaña ñeñt' atarr eñotene' ñeñt' cohuentetsa Yomprecop. Añ ñeñtara cançherrsheña ñeñt'cha' po'taruas pet attoch epatye-set ñeñt' pallta'yetsa rreñets.

⁴ Allochñapa' yapa' añach yema'yochra ma'yochatsa ñaña o'ch ya'potoñ Yompor po'ñoñ. Ñeñtach paterr yetorrrena. Atet otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt' nanac ame'ñetsa ñeñt' e'ñe chorrena Parets Puecamquëñ. Alloçpa' neñet ñaña Felipe, ñaña Prócoro ñaña Nicanor ñaña Tímón ñaña Parmenas ñaña Nicolás ñeñt' antioquio'marnesha' ñeñt' ahuatoteñ ame'ñate't judionesha'.

⁶ Añña ñeñt' cançherrsheña acheñpa' o' ahupatarettet allo'tsen Jesús puellsensarnesha'. Añña allsensareñnesha'pa' allenta ma'yochamñpesyet, o' net pot ñesheto, atet otarettet ñeñt'cha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeñt' ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereñoçpa' nanac amueraña. E'ñe Parets po'huamencoçpa' orrtatanet ñeñt' ama puentareto atto eñochet añmapa' po'ñoç Parets po'huamencoç orrtena.

⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apçhenet po'prahuo. Ñaña po'potantañ judionesha' ñeñt' huetsa Cireneo't ñaña Alejandrío't ñaña Cilicio't ñaña Asioçpa'—ora allohuenetpa' e'ñe parroçma achmñare'toñet Esteban po'ñoñ.

¹⁰ Tarraña Estebanpa' nanac es eñot atto serrpare'ten. Ñetpa' ama errotent' anapeto. Estebanpa' añ chorraye't Parets Puecamquëñ, ñeñto'marña ama errotent' anapete'te.

¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeññ atsa'taretpa' atet otet:

—Yapa' o' ye'm Esteban añ achmāre'ten Moisés po'ñoñ ama't ñaña Yomporpa' achmeñ. Atet toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeññ pompornesha' pen judionesha', huapa ñaña ñeññ etsotene' Moisés po'ñoñ. Huapapa' o' rromueñeta' Esteban o' anmet añcha'taretneshesho allecma a'pocatenet ñoñets.

¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' chocma achmāre'tenan Parets pa'paquell ñaña chocma achmāre'tenan Moisés po'ñoñ.

¹⁴ Alla oterretterr ñeññ atsa'tare't:

—Yapa' o' ye'm Esteban atet oten añ Jesús ñeññ nazareto'marnesha'pa' o'ch a'matam̄psey Parets pa'paquellpa' o'ch huapore'tatonay atet ye'chatye't Moisés.

¹⁵ Allempoñapa' allohuenet ñeññ allo'tsa'yen o' cohuanr-rorchet Esteban. Tarraña o' eñchet e'ñe cohuen orrtena pa'cloyot atet orrtena ñerra'mrrate' Yompor po'mllañoteñer ñeññ huetsa entot.

7

Atto Estebanpa' serrpare'tatan añcha'taretnesha'

¹ Allempoñapa' añña cornesha' ñeññ nanac añcha'taretpa' a'p̄to'tan Esteban, atet och:

—¿Po'ño'cha't atet?

² Estebanñapa' atet och:

—Ñehua, masheñneshacha' allohuenes nomporneshacha' o'ch se'mñoten, o'ch notas ñeññ atet pa'yese't ahuat yatañneshañ. Ahuatpa' Yompor ñeññ nanac Paretspa' orrtane't yatañ Abraham all anetso Mesopotamia. Allempopa' ama chena' Haráno allcha' ye'cherra.

³ Allempo orrtana Abrahampa' atet och ñeññcha' atet p̄a: “Te'pa' o'ch ahuep̄ arro't o'ch pesa'nom añ peney, o'ch pesa'ne'm ñaña p̄amo'tsesha', o'ch ahuep̄ allcha' notaḗ.” Atet och Yompor, atet'cho' p̄a yatañ Abraham.

⁴ Allempoñapa' a'ypo'ña'nman all ye'che't all ye'chanate't ñaña caldeo'marnesha' atto chap allo'tsen anets Harán all ye'cherra. Allempo o' rroma pomporeñpa' Yomporpa' o' alla anererr arrma Canaáno all yey'chena ya te'.

⁵ Tarraña allempo chap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch aḗ añ pats, e'ñe ñocop, ama't

puechemerecop, ñaña po'mñrenñecop. Tarraña allempopa' yatañ Abrahampa' ama chemere'tena'.

6 Allempocma Yomporpa' o' eñotatan Abraham attoch esempo po'mñreneña' ahuanmuetcha' arrot, chapuetcha' po'poñ anetso Egipto all ama pa'nyempañooyaye, allcha' yecha'huerret, allña'pa' muerochtatapanetcha' allo'marnesha' acheñ. Ñaña añ eñotatan Abraham attoch ataruasatarettach e'ñe atta po'mñreneñ, e'ñe cuatrocientos char amuerochtatarettet.

7 Tarraña Yomporpa' o' eñotatan Abraham ñaña po'poñ. Ahuo't och Yompor: "Tarraña napa' netsa'taterach ñeñcha' muerochtate' penñreneñ. Allempoñapa' huaçherretcha' alla arr Canaáno allcha' ma'yocherrnet."

8 Ñaña allempo Yomporpa' ahuo't otan Abraham po'poñ ñeñcha' atet yecha' judionesha' allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñ atet otan Abraham: "Añ pocte' o'ch setsorre allohuen asheñorrofollesha'." Ñeñto'mar allempo chemere't Abrahampa' puechemeretoll ñeñ soch Isaacpa' ahuo't tsorreñ. Po'psocmatño'pa' o' tsorre. Isaacña'pa' allempo o' po'npa' o' chemere'tana Jacob. Jacobña'pa' chemere'tana çharrasheña puechena epa ñeñtara yatañneshañ yepen ya ñeñtey israe-lena'tarey.

9 'Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñña agapue'pa' o' anem ñachayo all anets Egipto.

10 Tarraña Yompor ña a'nataya. Yomporpa' o' a'pocstatuoñ ora allohuen atto muerochtachete't. Añña ñeñt añcha'tarettatse't Egiptopa' e'ñe cohuen entane't José. Añ ñeñt añcha'tarettatse't Egipto ñeñtpa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'tare't Faraónpa' o' nan José ñeñcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñcha' yechenahuet.

11 'Allempoñapa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'çho'ña nanac cheporrare'tet. Pa'chporrño'tetpa' nanac muerochtete't. Yatañneshañpa' ama echete'te pocrramet ama't coñe'ta.

12 Allempoñapa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemeresha'

ñeñtara yatañneshañ yepen ya. Ñetpa' o' ahuanmuet Egipto o'ch rañteneta' rreñets.

¹³ Rañta'hueneta' rreñetspa' o' puerraçherret. Atomatpa' o' huañaperret pocrampa' o' alla ahuanerretterr Egipto. Allempoña çhaçherretterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheññapa' o' amanet añcha'taretesho attoch cheme'tatanet.

¹⁴ Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cançhroch çarra' puechena amnarsheña pamo'tsesha' ñetñapa' ahuanmuet Egipto allo'tsen José.

¹⁵ Allempoñapa' çhaçha'tet Egipto. O' met allpon charpa' o' rroma yatañ Jacoboñ all Egipto. Meterrerr allpon charpa' o' colla'hua ñaña puechemereshañ ñeñtara yatañneshañ yepen. Colla'huetpa' alla apamparettet all Egipto.

¹⁶ Ñehua, meterrerr allpon charpa' o' ahuanmaretterret puenpa'ts anetso Sicño allcha' apamparetterret ello puenpa'ts. All apamparetterretpa' ñeñtpa' ñeñtara pats ñeñt o' rañta'hua Abrahamañ ahuañ. Añña patspa' ñeñto' vendoñ Hamor puechemereshañ ahuañ all Sicño.

¹⁷ Alla otarraneterr Esteban, atet ot:

—Allponerrerr charpa' çhappmoch allempo o'ch etsota atet Yomporpa' otane't ahuañ Abraham allempo huomenc nane't po'ñoñ. Ñetpa' allempo nanac merete't all Egipto.

¹⁸ Atteñapa' o' met shonte' charpa' o' orrta po'poñ añcha'taret Egipto ñeñt ama puentarano José, tarro'mar Josépa' ahuañoteñ o' rroma.

¹⁹ Añña añcha'taretpa' nanac mueroçhtatyesonay yatañneshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añecpo'ch atet peñet attoch muetsatachet puechemeretoll. Allochñapa' amach nanac mereto.

²⁰ E'ñe allempopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pña arorr all pa'paclo.

²¹ Allempoñapa' o' çhap allempo amach erroteno cohueñeto pa'paclo a'nahua. Allempopa' a'ypo'ñet a'yenet. Añña añcha'taret Faraón po'señpa' ahua' huapa all neñet ahua' entos, nanac amuroçhen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyor e'ñe ño.

²² Ñeñto'marña Moiséspa' ayçhataretta ora allpon ñeñt atet eñotyese't egipto'marnesha'. Nanac eñotañte't ñerra'm

allempto eñose ʔ, nanac eñotañte ʔ ñerra'm allempto es ʔa'yese ʔ.

23 'Allempto ʔhap pa'tatsoch ʔcharra' po'charña Moiséspa' nanac yerpane ʔ pamo'tsesha' ñeñfara israelena'tarnesha'. Atarr seche ʔ o'ch abchenaneta'. Allempoña parrochpa' o' ahuo' allo'tsa'yen pamo'tsesha'.

24 O'ña ʔhap allpa' all entosan puesheñarr egipto'marnesha' nanac coñchatenan puesheñarr israelena'tar. Ñañaapa' o' moñsosana pamo'ts. O' ʔhote huomencpa' ʔha rroma. Atto chemnatanaña pamo'ts.

25 Añña Moiséspa' otapañ pamo'tsesha'pa' e'ñech cohuen entapet. Otapañ o'te' eñochet Yompor mueñe' attoch a'queshpatan pamo'tsesha'. Tarraña ñetpa' ama eseshaye' pocte' entaye.

26 Tarro'mar tsapañapa' alla ahuenerr, allempopa' o' entuenanerr epsheña pamo'tsesha' ʔho' orrotenet e'ñe ñañañeta. Ñañaapa' mueneñ o'ch amo'tstaterranet, atet otanet: "Esuañaca' masheñneshacha' sottenña arr. Añña pocte' e'ñech semo'nasheñ sepannena."

27 Ñeñ ʔchetene' pamo'tspa' o' a'mchech Moiséspa' ñañaapa' atet ot: "Esesha'huañaca' penene'ña ʔa añcha'tare ʔ arr yocop. Esesha'huañaca' ʔotene' o'ch ʔa'tsrre'moçhta arr.

28 Ñato' añte' pemnen o'ch pemtsan naña atet pepe' muetse' egipto'marnesha' ellerro."

29 Allempoña o' e'man añ ñoñets Moisésñaapa' o' yeta pueñchaño ʔ. O' ahuo' a'yo allo'tsen pats pa'so'cheñ Madián. O' ye ʔha'huerra allapa. Allñaapa' all sena'tapa' o' chemere't epsheña.

30 O' alla oterraneterr Esteban, atet ot:

—Allempoñapa' o' meterrerr pa'tatsoch ʔcharra' char. Parrochpa' amarato'tsen Moisés allame'tets aspento Sinaí ʔno. Allñaapa' entosan tsachmatoll all ñoña huorten. E'ñe huorto ʔtso'pa' allo ʔrrtoña Parets po'mllañoteñer.

31 Ñeñ entos Moiséspa' atet ot: "¿Ešte' huortetsña tarro?" E'ñe ʔhapatsa allame'tets o'ch enteña'pa' o' e'man ñoñets. Partsepa't eñets, atet och:

32 "Napa' ñeñten Po'yomporer pen ama't ʔatañneshañ ñeñfara Abraham ñaña Isaac ñaña Jacob." Moiséspa' ʔha yoren. Pueñchaño ʔpa' ama cohuan huorte'.

33 Yomporñaapa' atet otererr: "Pueñcha'na'teño ʔpa' perrote't pesapat tarro'mar all ʔatenpa' ñeñ ʔpa' ʔho' nanac Parets tarro'mar allo'tsenen na."

34 O' alla otererr Yompor: "Napa' nenteñ atto mueroçhtatennanet ñeñ nechemeresha' nepen ñeñfara israelena'tar. Napa' ne'muenanet atet yahuanrrortenet.

Ñeñto'marña te'pa' o' nohuapa o'ch na'queshpatanet. Te'ñapa' o'ch nemñaḗ ḗa Egipto." Añpa' ñeñta atet otan Yompor Moisés.

35 'Añña Yompor po'mllañoḗeñer ñeñḗ orrtetsa all huorten tsachmopa' ñeñña eñotate' Moisés atet muenen Yompor. Ñeñto'mar yeñoteñ Yomporpa' ahuo't llesensan Moisés o' alla mueñer pamo'tseshesho ñeñḗcha' amcha'tarettatsa ñocpuet ñaña ñeñḗcha' a'queshpatahuet allot amuerochtataretteteḗ. Añ ñeñtara Moisés ñeñḗ ama pocteye' ento ahuaña pamo'ts ñeñḗ otet ahuaña: "Esesha'huañaca' penene' ḗa amcha'tareḗ arr yocop. Esesha'huañaca' ḗotene' o'ch ḗa'tsrre'mochta arr."

36 Añ ñeñtara Moisés ñeñḗ anerrahuet Egiptot. Ñeñtara Moiséspa' orrtatanet ñeñḗ ama puentareto all Egipto. Ñaña sa'pot ñeñḗ Tsasasen all orrtatanet ñeñḗ ama puentareto, atto eñotatanet añmapa' ñeñḗ atet pena Parets. Ñaña all chopeñe'chen amarato'mar pa'tatsoch ḗcharra' char Moiséspa' all orrtatyesanet ñeñḗ ama puentareto. Añpa' ñeñḗ eñotatanet atet penaña Parets.

37 Añ ñeñtara Moisés ahuatpa' o' otan israelnesh'a' atet: "Yomporpa' orrtaterrnascha' puesheñarr ñeñḗcha' a'mterre' Parets po'ñoñ, ñeñtara ñeñḗ e'ñe samo'ts sepen e'ñech attecma orrtaterr e'ñe atet orrtatenen naña. Ñeñḗcha'ña ḗhocma se'mñoterrña sa."

38 Ama't allempo yatañneshañ chopeñe'cheteḗ amaratareropa' añña Moisés allo'tseneta parro ama't allpa' ḗhocmach apḗcheteḗ Yomporcop. Ñapa' allo'tsena aspenḗo Sinaíḗno allempo orrtoña Yompor po'mllañoḗeñer ñeñḗ eñorana'taya ñaña o' yeḗhach ñoñets alloch e'ñe yocrra Partsocop. Ñeñña ñoñets allempo puerrerra Moisés aspenḗotpa' o' yeḗchatuerran ñaña pamo'tsesha'.

39 'Tarraña ama't atet peḗ Moiséspa' yatañneshañpa' ama muenete'ḗe o'ch ame'ñyet Moisés. Ama eseshaye' pocteye' entaye'ḗe. E'ñe pueyoḗhretopa' atarro' mueneteḗ o'ch alla puerreret Egipto.

40 Ama't allempo aspenḗo'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeḗcatonay ñeñḗcha' yeyoser yeperr ñeñḗcha' yanerre' alla Egipto. Añ Moisés ñeñḗ yanmue' Egiptotpa' yapa' ama yeñoteñe, ta', ¿er- raḗe' o' ahuo'?"

41 Allempoñapa' o' yeḗcatanet ñeñḗ atet ñerra'mrrate' añ ayeḗcatareḗ oro. O' muetset carrnero o' neññañeta' e'ñe ñesho. Nanac cohuen entet ñeñḗ yeḗcatet e'ñe potot.

42 Allempoña Yomporpa' o' a'ypo'ña'nmanet, o' muenatanet attoch muechatse'tet ñeñḗ yeḗhoyo'tamḗpene' ama't arorr ñaña ranto. O' pet atet quellquēḗ ñeñḗ a'mḗtayeḗ Yompor

po'ñoñ ahuat. Añmapa' ñeñt quellquë't ahuat, atet ñerra'm Yomporec.

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeñtpa' ama neshoye' sehuapache. Ama't ora añ pa'tatsoch çharra' char all sechopeñe'chen amarañero atet es sepa'yen.

43 Añ seyomporec sepen po'poñ, ñeñt ayeçcataret ñeñt soten allo' yeçhena seyoser ñeñt sesochen Moloc. Amapa' atet ñerra'm ayeçcataret rantoma't ñeñt soten añmapa' seyosro' ñeñt sesochen ñaña Refán. Shonte' ayeçcatareteçhno ñeñt seconcorpana'tena. Ñeñto'marña te'pa' o'ch nemñas nanac allapa', all Babilonio. Añpa' allohua ñeñt atet quellquë't ahuat ñeñt a'mtaye't Yomporec po'ñoñ.

44 O' alla otterraneterr Esteban, atet ot:

—Ahuat yatañneshaña' allempo chopeñe'çhete't amarañeropa' anmuete't pocoll shetamtsopo' allecma apçhete't Yomporec. O'ponopa' all nete't mapuettall allo' aquellcare't ñoñets ñeñt pocetsa Yomporec. Añ pocoll shetamtsopo' Moiséspa' ña yeçcataye't e'ñe atet oche't Yomporec po'mllañoñeñer e'ñe atet gache't Yomporec.

45 Allempo rromanom Moisés puechope'çhpayopa' o' na'nmet Josué ñeñtcha' anmue' yatañneshañ. Apa'nmet ñaña shetamtsopo' ñeñtña' çhapachet allo'tseno' pats ñeñt otanete't Yomporec ahuatoteñ o'ch apanet. Po'poñ aheñenesha' ñeñt yeçheta allpa' Yomporec o' muevo'tuerranet atoch yatañneshaña' o'ch yeçha'huerret all. Allempopa' o' çapatet all shetamtsopo' allecma apçhenet Yomporec. Shetamtsopahuopa' allecma apçhete't tarremphua allempo orra David.

46 Allempo orra Davidpa' ñapa' e'ñe cohuen enteñ Yomporec. Ñaña' o' enaman Yomporec pocte'te' enteñ o'ch yeçcatoñ pa'paquëll ñeñt e'ñe cohuen echarr. Mueneñ o'ch yeçcatan Yomporec pa'paquëll, ñeñfara Po'yomporec pe't ñaña pa'tañ Jacoboñ.

47 Tarraña ama't mueneñeñ ñapa' Yomporec ama mueno. Añña muenatoñ puechemer Salomón, ñach tomate' pa'paquëll.

48 Tarraña Ñeñt nanac Paretspa' ama yeçheno pocollo ñeñt yeyeçcaten ya, arromñañey. Ama't atet ote't ñeñt a'mtaye't Yomporec po'ñoñ, atet ñerra'm Yomporec eñets, atet oten:

49 Napa' nanac Partson. Napa' nenten enet atet ñerra'm neconañ, patsña' nenteñ atet ñerra'm allcha' nenen netac. Errotenohuachñaca' seyeçcatonña pocoll

allcha' ney'cha. Ama nepallteno allcha' ney'cha, atet oten Yompor.

⁵⁰ Napa' nehuamencoť neye'chcatua ora allohuen ñeñ' sentyen. Añpa' allohua atet ot Yompor.

⁵¹ Alla oterraneterr Esteban:

—Sapa' nanac se'charrena, seyo'chropa' ama soctape'cheno atet ñerra'm Yomporena'tares. Ama semno o'ch se'mñotoñ Yompor po'ñoñ. Chocma satpare'teññañ Parets Puecamquëñ. Atet pe't satañneshañ ahuat te'pa' atet'cho' sepena saña.

⁵² Ama't allohuen ñeñ' a'mtaye't Yompor po'ñoñ ahuat satañneshañña' cha muero'chtatyesanete't. Ama't ahuat allempo ama orrtena' Jesús'pa' ñeñ' a'potaye't atto esempohuañen o'ch huapa Cristo ñeñ' e'ñe pocte' es pets, ñeñ'pa'cho'ña satañneshañpa' cha muetse. Te'pa'cho'ña añ Cristo ñeñ' e'ñe pocte' es pets'pa' ahuo' sepon' saña attoch semtsach.

⁵³ Alla oterraneterr Esteban:

—Ama't Parets po'mllaño'teñer ñeñ' seño'tate' ñeñ' poctetsa Yomporecop sañapa' satpare'toñ Yompor po'ñoñ. Añmapa' allohua ñeñ' atet serrpare'tatanet Esteban.

Allempo muetset Esteban

⁵⁴ Allempoña ñeña e'mhuet atet ot Esteban'pa' nanac atsrre'matanet. Pa'tsrre'mueño'tetpa' cha rraso'tyeset pa's.

⁵⁵ Allempo Esteban'pa' e'ñe chorreña Parets Puecamquëñ. Ñaña'pa' o' cohua' enonet, allña'pa' all entan Yompor po'cohuenña. Entan Jesús e'ñe po'partsoteño' all ten Pompor po'cohuenrot.

⁵⁶ Allempoña'pa' oterrer Esteban:

—Napa' o' nent enet atorare't. O' nent ñaña allo'tsen Ñeñ' Acheñetosets, po'partsoteño'pa' all ten Parets po'cohuenrot.

⁵⁷ Acheñenesha'ña pa'tsrre'mueño'tetpa' rranare'tet. Puerranare'teño'tetpa' mopaqueta'tyeset, o' matrra'tet ñesho attoch o'ch rromuet.

⁵⁸ O' rromuetpa' o' anmet a'yenet all ama eñalle pocoll allcha' rrolle'chet. Ñeñ'cha' rrolle'te'pa' o' rrorrra'tyeset pa'shtam, o' na'yaset e'ñe allo'tsen puesheñarr yacma ñeñ' huepueshameñ ñeñ' pa'so'cheñ Saulo.

⁵⁹ Allempoña'pa' rrolle'chet. Rrolle'chetpa' Estebanña'pa' o' ma'yochapa', atet ot:

—Nepartseshare Jesús'o, pagaponcha' necamquëñ.

⁶⁰ Allempoña'pa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoña'pa' ñeña otuapa' o' muechecha, o' rroma.

8

Allempo Saulopa' nanac mueneñ ahuo'ch a'cllatuan ñeñt ame'ñetsa

1-2 Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquēneshetpa' o' huapuet, o'ch eñeta' arromña' attoch pampueñeta'. Nanac ya'na'teñet Estebanañ. Allempoteñ nanac muerochtachete't ñeñt pame'ñeñofet Cristopa' apçhete't Jerusaléno. Ñeñto'marña shonte' acheñenesha' ñeñt yetrra'tatsa po'poñ añetso'mar. O' parratse'tuet allemeña—Judeo'mar ñaña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra.

3 Sauloñapa' nanac mueneñ o'ch a'cllatuan allohuen ñeñt ame'ñetsa. O'ch be'tosam̄psanet pa'pacletopa' o'ch rromanet, o'chçho' chetare'tnerranet. O'chçho' be'tosuerrerr ñaña po'ppauñopa' o'chçho' rroma'huerraneterr, o'chçho' chetare'tnerraneterr, o'ch anmanet cárcelo allcha' abe'tatuanet. Ama't coyaneshaçhno e'ñe abe'tatuanete't cárcelo.

Atto Felipepa' serrpare'tatanete't Samario

4 Añña ñeñt yetrra'tatsa Jerusaléno'tpa' all çhapyeset, erra ta'yenetpa' allcha' serrpare'teññañet Yompor po'ñoñ.

5 Ate't ñerra'm Felipe. Ñapa' o' ahuo', o' çhap anetso ñeñt pa'so'cheñ Samaria. Allña'pa' all serrpare'tatosanet aña'pa't Cristotats ñeñtara Jesús.

6 Felipepa' orrtatanet ñeñt ama puentareto. Ate't eñchetpa' o' eñochet aña' po'ñoçh Parets po'huamenc orrtaten. Ñeñto'marña allohuen acheñenesha'pa' e'mñoteñet e'ñe cohuen atet otanet.

7 Shonte' acheñ ñeñt chorra'yese't oneñe't allempopa' e'ñe queçhpatyesueretña oneñe't atto chorrenana acheñ. Allempo queçhpatyesueret oneñe'tña'pa' o'ch rranare'tnoma. Ñaña shonte' acheñ ñeñt echarreyestse'tpa' o' corra'huerrret. Ama't ñeñt checare'payestse'tpa' o' a'crratyesuaherranet Felipe.

8 Ñeñto'marña nanac coshyete't Samario.

9 Allempopa' allo'tsen puesheñarr ñeñt achyo'tañ ahuaña ñeñt'pa' añ pa'so'cheñ Simón. Allohuenet samario'marnesha' ama't ahuatoteña' cohuanrrortoñete't atet orrtate't ñeñt ama puentareto. Ñapa' o'ch shequēnanet. Ñetña'pa' çha otena-puetañ ñapa' nanacte' po'ñoçh ahuamencat, atet oten ña.

* 8:1-2 Saulopa' ñeñtara Pablo.

¹⁰ Allohuen acheñpa' e'mñochete't atet ote't ahuaña—ama't ñeñt amcha'tarettetsa ñaña ñeñt ama esoshe'mayaye acheñ. Ochete't:

—Po'ñoç añ acheñpa' ñeñt Partsocoptartetsa.

¹¹ Ñeñto'marña acheñenesha'pa' nanac ame'ñyete't. Ama't ahua'toteñ cohuanrrortoñete't atet orrtate't ñeñt ama puentareto.

¹² Tarraña allempo serrpare'tatanet Felipe cohuen ñoñets o' ame'ñatanet allohuen—yacmaneshaçhno ñaña allohuenet coyaneshohuen. Serrpare'tatanet atet penaña Yompor po'cohuenña ñeñt atto atarr ayochreshattena ña, ñaña atet pena Jesús ñeñt Cristotats. O' ame'ñatuanet allempoñapa' apatarettet Yomporecop.

¹³ Ama't achyo'tañ ñeñt sochetsa Simónpa' o' ame'ñerra ñaña. Ñapa'çho'ña apataretta Yomporecop. Apatarettetuapa' allempoteñña' yemterrana Felipe errohuanen çopeñe'chen. All orrtatanet Felipe ñeñt ama puentareto attoch eñoçet añmapa' ñeñt po'ñoç huetsa Partseshot. Simónña'pa' o'ç entan atetpa' atetçha' ot:

—Errotenotuañaca' atet penate'.

¹⁴ Allempoña Jesús puellsensarnesha'pa' e'mare'çhet Jerusaléñoç shonte' samario'marnesha' ame'ñeññañet Yompor po'ñoñpa' o' mueñet Pedro ñaña Juan all Samario.

¹⁵ Allempo çhap Pedro ñaña Juan Samariopa' ma'yochamïpsosyet samario'marnesha' ñeñt ame'ñetsa. Enamet Yompor chorratanetepa' Parets Puecamquëñ.

¹⁶ Tarro'mar allempopa' ama chorrenaneta' Parets Puecamquëñ. O'ña apatarettetuet pame'ñeñoçet Yepartseshar Jesús.

¹⁷ Allempoña Pedro ñaña Juanpa' o' net pot ñesheto ñeñt ame'ñetsa. Nohuet pot ñeshetopa' Yomporña Puecamquëñpa' ahuepa't chorraret.

¹⁸⁻¹⁹ Añña Simón ñeñt achyo'tañtetsa ahuaña o' çhapoña pueyoçhropa' atet ot:

—Añeçpuepa't nenet pot attoch chorraret Parets Puecamquëñ.

Allempoñapa' atet otanet Simón:

—Llesenscha' nomporneshacha' o'ç nenanet naña not attoch chorraret Parets Puecamquëñ. O'ç napas quelle attoch sapuen llesens.

²⁰ Pedroña'pa' atet och:

—Peçllayorpa' chenquëpa' alla, allotpa' pechenquëpa' ðaña tarro'mar ðapa' ðotenapañ o'ç perañoña Parets Puecamquëñ. Ñeñtpa' amach errotenot petsa'cho. Añña Yomporpa' o'ç apuey e'ñe atta.

21 Ama pocteyaye o'ch ðagap ða llesens tarro'mar Yomporpa' ama pocteye' entennape peyo'cher.

22 Te'pa' aña poctetsa o'ch ðoctape'cherr ello cohuen, o'ch peque'chpuerr añ sosya'tsañ o'ch penamuer Yompor peretneñets. Ñato' Yomporpa' o'ch peretnerrna' atto ðoctape'chen sosya'tsañ.

23 Pedropa' alla otererr:

—Napa' neñotene' nanac sosey ðoctape'chen peyo'chro, cha ðottena atet ñerra'm ðo'chñarpa' huanquene'.

24 Simónña'pa' alla otererr:

—O'ch sanamon Yompor nocop attoch amach es netantoyo atet sotenen. Aña' allohua atet pena Simón.

25 Pedro ñaña Juanpa' nanac a'poñoñet Yompor po'ñoñ all Samario. Serrpare'tueneta'pa' alla ahuanerret Jerusaléño. All oñenet samario'marpa' ñeñt ye'chetsa toño'marpa' e'ñe acopoteñ serrpare'tatyesianeret.

Allempo Felipepa' ame'ñatana etiopo'marnesha'

26 Allempoña añ Felipepa' orroña Yompor po'mllañoñeñer atet otos:

—O'ch çhapmoch poctopa' o'ch ahue' a'yo, o'ch pe'chap amarato allo'tsen toñ ñeñt sets Jerusaléño' attoch ye'chap anetso añ pa'so'cheñ Gaza.

27 Ñaña'pa' atet och Yompor po'mllañoñeñerpa' atet'cho' ða. Allempoña'pa' o' ahuo'. O' çhap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñt'pa' ñeñt añcha'taret aña po'taruas pen o'ch cohuan'penan ora allpon quelle ñeñt gobiernocop alla pa'nyo. Pa'neypa' añ pa'so'cheñ Etiopía. Ñeñt nanac añcha'tarettetsa all pa'nyopa' añ pa'so'cheñ Candace ñeñt'pa' coyanesha'. Añ yacma ñeñt entos Felipepa' ñeñt'pa' acaparet acheñ. Aña etiopo'marnesha'pa' errte' asuena' Jerusaléño allempo entos Felipe. Tarro'mar ta all o'ch ma'yochenana' Yompor.

28 Allempoña o' alla puerrerra pa'nyo. Ñapa' alla anen po'carro. Ñeñña carropa' cahualla matatene'. All anenpa' all lleyen an Yompor po'ñoñ ñeñtara ñoñets lleyen ñeñt quellqu'e't ahua't Isaiás ñeñt a'mtaye't Yompor po'ñoñ.

29 Aña Paret's Puecamqu'eñpa' eñotatan Felipe, ñeñña ote':

—O'ch penteña' ñeñt anets tarro e'ñe all carro.

30 Felipeña'pa' o' mata. Matapa' çhap allame'tetspa' o' e'mosan çho' lleyen an Yompor po'ñoñ ñeñtara ñoñets ñeñt quellqu'e't Isaiás ñeñt a'mtaye't Yompor po'ñoñ ahua't. E'mos Felipepa' atet otos:

—¿Eñoto'chena't penteñ ñeñt atet oten ñeñt pelleyen?

31 Ñaña'pa' atet och:

—Errotenohuate'ca'ye neñochna' amaca'ye eñalle ñeñtcha' neñotate'. Ñato' o'ch pa'tap pa o'ch yanorr parro.

32 O' a'tap Felipepa' o' cohuos all lleyen. Añ lleyen Yompor po'ñoño ñeñt'pa' añ ñoñets ñeñt' quellquë't Isaiás:

Atetcha' pa ña atet ñerra'm carrnero. Ñehua, carrneropa' o'ch yanem' allcha' yemtsepa' amach ama'toçhto. Amapa' ñerra'm yetsorroñ pue'chpa' amach ama'toçhto. Atetcha' pa ña, amach es oto.

33 Nanac mueroçhtachet, ama pocteye' ñeñt' atet poñet. Ama erroteno o'ch yotua ora allohuen ñeñt' atet sosey pa'yes pamo'tsna'tarnesha'. O' muetsetpa', o'huañ corra añe patsro. Añpa' allohua atet quellquë't Isaiás.

34 Allempoña ñeñt' etiopo'marnesha'pa' o' a'pto'ch Felipe:

—Ñehua, poten, ¿eseshocpa'tña eñen arr Isaiás, ñato' ñocpa'te' amapa' po'psheññecopte'?

35 Allempoña Felipepa' o' serrpare'tach cohuen ñoñets atet pena Jesús. Eñotach añ ñeñt'ara Isaiás po'ñoñpa' eñen Jesúsocop. Allempoñapa' o' eñotach ñaña po'poñ Yompor po'ñoñ ñeñt'ara ñeñt' atet pena Jesús.

36 Allña allenet matam'penetpa' o' entoset oñ, atet ot etiopo'marnesha':

—Ta'm, ¿pocte'te'te' o'ch napatare'tta Partsocop?

37 Felipeñapa' atet och:

—Ñehua, ñerra'm po'ñoçh pame'ñena peyoçhrocmañenpa' e'ñe pocte' o'ch papatare'tta Partsocop.

Etiopo'marnesha'ñapa' atet ot:

—Napa' po'ñoçh name'ñena. Te'pa' neñoteñ Jesucristo ñeñt'pa' ñeñt' Yompor Puechemer.

38 Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe.

39 O' cha'nerret oño'pa' Yompor Puecamquëññapa' o' anman Felipe a'yo. Allña' machayo'ta ma'nata alla. Ñeñt' etiopo'marnesha'pa' ama enterrano Felipe. Allempopa' o' ahuer' etiopo'marnesha' e'ñe pocsheñesha'. Añpa' allohua ñeñt' atet pa etiopo'marnesha'.

40 All anetso Azotopa' all orrterraña Felipe. Allña'pa' serrpare'tatosanet cohuen ñoñets alloch yequeshpa. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

*Allempo Saulopa' cotape'cherr ello cohuen Yomporcop
(Hch. 22.6-16; 26.12-18)*

1 Allempoña Saulopa' nanac e'moñe'tenan ñeñt ame'ñenaya Yepartseshar Jesús. Pa'tsrre'mueñoŕpa' atet ot:

—Napa' o'ch na'cllatueña' ñeñt ame'ñenaya Jesús.

Ñeño'marña o' ahuo' allo'tsen ñeñt nanac añcha'taret cor-nesha' e'ñe all Jerusaléño.

2 Chap allo'tsenpa' o' enamos orden attoch a'cllatuan ñeñt ame'ñetsa. O' enam orden ñeñtcha' anom a'yo anetso Damasco allecma ap'chenet judionesha' po'prahuo. O'ch chap allpa' o'ch aposan ñeñt añcha'tarettetsa puerahuo. Attoch apet all llesens attoch rromanatan acheñ ñeñt cotene' Jesús poctaŕña. Ama't coyanesha'chno ñaña yacmanesha'chno o'ch rromanatanet o'ch huancatanet o'ch anmaretterret Jerusaléño. Atet cotape'chña Saulo.

3 Allempoña agapuan orden allempoñapa' o' ahuo'. O' chap allame'tets Damascopa' machayota ñeñt nanac poptetsa entoŕpa' o' choyo'tamŕpes e'ñe ñesho.

4 O' choyo'tamŕpespa' ñañaŕpa' alla rromopra patso. Chap patsopa' e'man ñoñets ñeñt atet oten:

—Esomare't Saule pemueroçhtatennanña ñeñt name'ñenaya.

5 Sauloñapa' atet ot:

—¿Eshape't Ayochreshate eñets?

Ñeñt eñetspa' alla otererr:

—Napa' ñeñten Jesúsén, ñeñtara ñeñten pemueroçhtaten. Añpa' ñañeña mueroçhtatetsa. Tarro'mar cha pottena ñerra'mrrate' ashen ñeñt e'ñe patpare'teñoŕ ñañeñachña atserrŕatetsa.

6 Sauloñapa' po'yorñoŕpa' cha pa'shmuena allempoñapa' atet ot:

—Partseshacha' te'pa' ¿erroŕena't penmen ñeñtcha' atet nepena?

Partsesha'ña Jesúsŕpa' atet otererr:

—Te'ñapa' o'ch petanta, ahueŕ Damasco. Allcha'ña otapet ñeñtcha' atet peŕa.

7 Ñeñt parro epuet sen Saulo ñetñapa' atta cohuanrrortenet. Pocuarrorteñoŕetpa' ama erroŕ oteto. Ñetpa'cho'ña e'muet ñeñt e'morrtatsa tarraña ama es enteto.

8 Allempoña Saulopa' o' tanta. Tantapa' o'ch cohua'yespa' ama ento. Ñeño'marña atta echa'nmet pototpa' o' anmet Damasco.

9 O' chap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

10 Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñañaŕpa' añ pa'so'cheñ

Ananías. Añña Ananíaspa' Yepartseshar Jesús orrtoña atet ñerra'm puechopoñoť o' chore'chpa' atet och:

—¡Ananías!

Ananíasña anaġpa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notapġ atetcha' peġa. O'ch ahueġ allo'tsen toñ ñeññ nanac paġharr allcha' pentos Judas pa'paquell. Peġhap all pa'paclopa' o'ch pa'pťo'tos erro'tsente'ña ñeññ Saulo ñeññ tarso'marnesha'.

Alla otererr Yepartseshar:

—O'ch notapġ ñaña, añ ñeññtara Saulo e'ñe te'pa' allo'tsen ma'yochetsa.

¹² Napa' o' norrtatuoñ ñeññ o' entua neshoť. O' entuan atet ñerra'mrrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuerr.

¹³ Ananíasñaapa' alla anapuererr:

—Partseshacha' napa' o' ne'mare'ch atet o' ġa añ ñeññtara Saulo. Shonte' acheñ o' e'mare'tatnet atto ñapa' nanac muerochtatenan ñeññ ġame'ñenaya Jerusaléño.

¹⁴ Te'pa' ñapa' echenan orden o'ch huancatyeseý allohueneý ñeñteý ġame'ñenaya, o'ch anmateý cárcelo. Ñeññ pa'mġcha'tareťnesha' pen allohuen judionesha' po'cornanesharpa' o' apť Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahueġ all, ñeññ atet o' notuaġ. Te'pa' o' nene' Saulo ñeññtcha' na'potene' neñoñ amġcha'tareťneshesho. Ama't po'poñeġhno acheñeneshopa' ñapa' a'poťoncha' neñoñ. Ñaña ama't israelena'tarneshopa' o'ch a'poťon neñoñ.

¹⁶ Ñaña o'ch neñotach Saulo ñapa' o'ch muerochta nanac nocop, tarro'mar te'pa' o'ch ame'ña'na na. Añpa' allohua ñeññ atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' beťosos pocollo allo'tsen Saulo. O' ponomsyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeññca'ye ġorrtoya allempo ġoñen toño. Te'pa' añ ñeññtara Yepartseshar Jesús o' mueñan na o'ch non attoch alla pecuerr, ñaña attoch chorraġa Parets Puecamquēñ.

¹⁸ Ñeñña otuapa' allorocma rrata'nom pa'clloyoť ñeññ atet ñerra'mrrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apatareťta Yomporecop.

19 O' apatareřetuapa' o' rrallme'cherr. O' alla ċherr po'huamenc. Allempoñapa' allponmaterrerr alla Damascopa' o' serrpare't epuet ñeñt ame'ñetsa.

Allempo Saulopa' e'ñe ñenmañ serrpare'terr all Damasco

20 Ñaña Saulopa' ċhocma sen judionesha' po'prahuo allcha' serrpare'tatenanet atet pena Jesús. Otanet añ Jesúsapa' po'ñoċh ñeñtpa' ñeñña Parets Puechemer.

21 Allohuenet ñeñt e'muene'pa' otyeset:

—Ta', errotenuañaca'yeña te' ñeñt yacmar. Añmapa' ñeñtca'ye mueroċhtataye't ahuaña ñeñt ame'ñenaya Jesús all Jerusaléno. Ñeñto'marña te'pa' huena arr, mueneñ o'ċh rromanatenana' ñeñt ame'ñetsa o'ċh anmarettet cornaneshesho ñeñt pa'mċha'tareternesha' pen allohuen judionesha' po'cornaneshar.

22 Saulopa' allo'na sen huomenc pã'nmue' pueyoċher attoch serrpare'tan Yompor po'ñoñ. Nanac serrpare'tatanet atto po'ñoċh Jesúsapa' ñeñtara Cristotats. Ama't judionesha' ñeñt yeċhetsa Damascopa' ama erroteno anapeto.

Allempo Saulopa' a'yetater judionesha'

23 Atteña o' allponmatpa' añña judionesha'pa' o'pachet o'ċh muetset.

24 Saulopa' e'mare'ċh o' o'pachet, o'ċh cohuet attoch o'ċh muetset. Arr cohuet allotecma be'tenet all aconċha'tam̃psareř ora anets. Ellapenete't cohuame'tet ñaña arepenete't.

25 Tarraña ñeñt pueyochresha' Saulopa' o' anmet tsapo allo'tsen pocoll e'ñe all aconċha'tam̃psareř anets, allñapa' e'ñall ventana allo't a'suatañperet atarret cañtroř.

Allempo Saulopa' puerrerra alla Jerusaléno

26 Allempoñapa' ahuer Jerusalem. Ċherr Jerusaléno'pa' atarr mueneñ o'ċh entenana' ñeñt ame'ñetsa. Ñeñña ame'ñetsapa' ama mueneto o'ċh entenaneta' tarro'mar nanac mecha'teñet, otenapuetañ atto'te' shequënanet o' ame'ña.

27 Añña puesheñarr ñeñt pa'so'cheñ Bernabépa' ñaña'pa' o' anem̃ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasonet. Yepartsesharepa't epuet serrpare't. Ñaña'pa' ama mecha'to ñeñto'mar atarr serrpare't Damasco atet pena Jesús.

28 Allempoteñña'pa' e'ñe pocte' eñċhet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ.

29 Ċhocmach serrpare'ten epuet judionesha' ñeñt e'muene' griegaċhpa' tarraña amach pocteye' enteñeto. Allempoñapa' o'pachet ñaña all o'ċh muetset.

³⁰ Allempoña ñeñt̃ parro ame'ñenetpa' anmet Saulo po'poñ anetso Cesareo. Alloṭpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

³¹ Atteñapa' o' muetsoñeñtuerra ñeñt̃ amuerochtatañ. All Judeo ñaña Galileo ñaña Samariopa' o'huañ amuerochtatarettet atet peteṭ ahuaña. Allohuen ñeñt̃ ame'ñetsa allo'na senet huomenc p̃a'nmuēt pueyočhret. Atteñapa' o' shonta'nma ñeñt̃ ame'ñetsa. Pame'ñeñoṭetpa' allo'na senet mecha'na'tnomuet Yompor. Ñaña allo'na Parets Puecamquēñpa' nanac coshatenanet.

³² Atteña Pedropa' čhocmach ta'yena emo'tyese' ñeñt̃ ame'ñetsa. Parrochpa' o' čhap allo'tsen ñeñt̃ ame'ñetsa all anetso pa'so'cheñ Lida.

³³ Allñapa' entosan puesheñarr yacma añ pa'so'cheñ Eneas. Ñapa' ahuaṭoteñ echarrtena alla p̃anena o' posoc char.

³⁴ O' entos Pedropa' atet otos:

—O'ch Eneaso notaṭ, Jesucristopa' o'ch a'crraterreṭ. Te'ñapa' o'ch petanta o'ch p̃añño'ten pemue'.

Allorocma correna, o' tantena.

³⁵ Allohuen ñeñt̃ yečhetsa Lido ñaña Sarónopa' allempoña eñchetpa' čha puesuerret ñeñt̃ ahuaṭ poctaṭñet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt̃ ame'ñetsa añ pa'so'cheñ Tabita, añ ñeñtara so'chñets Tabita ñeñt̃ otenet griegačo Dorcas. Ñapa' arr yečhena anetso ñeñt̃ pa'so'cheñ Jope e'ñe alla allame'tets Lido. Ñaña'nanac amueraña, čhocmach yenpuenan ñeñt̃ huocchañetyets.

³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yečhenet ñet. Apatuetpa' o' p̃anet enonet all tama a'yohuen ḃat.

³⁸ Allempoña ñeñt̃ ame'ñetsa allpa' o' e'mare'chet Pedro allame'tto'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña čhapuet Pedreshopa'

³⁹ Pedroñapa' o' coterranet. Chap allpa' o' anmet all cuarto eno allo'tsen arromñat̃. All tomčhen shonte' rretorrnanesha' ñeñt̃ llecanrortetsa. Allñapa' all gatanna'tyenet ñeñt̃ chorra'yenet ñeñt̃ sepechyesanet ahuaña Tabitañ.

⁴⁰ Pedroñapa' mueñuanet allohuenet a'yeneṭ. O' mueñuanet a'yeneṭpa' o' concorposa, o' ma'yocha. Ma'yochuapa' o' puetallsa arromñañeshonetpa' atet och:

—O'ch Tabita notaṭ, petanterra.

Allempoñapa' acuerroche'. O' enterran Pedropa' čha anerrets.

⁴¹ Pedroñapa' cheter pototpa' echanter attoch terr. Allempoñapa' o' chore'terran ñeñt ame'ñetsa ñaña rretornaneshachno. O' be'tosča'terretpa' o' gaterranet o' tanterra ñeñt rromats.

⁴² Allohuenet ñeñt yečhetsa all Jopopa' o' e'mare'chet atet pena Pedro. Ñeñto'marña shonte' acheñ o' ame'ñeret Yepart-seshar Jesús.

⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet pa capitán Cornelio epuet Pedro

¹ Eñall puesheñarr capitán, añ soche't Cornelio. Ñañaapa' allo'tsen anetso añ pa'so'cheñ Cesarea. Allñaapa' ña mueñanatene' čharroch čharra' guardianesha' ñeñt oteñet Guardia Italiana.

² Añña Cornelioñapa' nanac cohuen cotape'che't Partsocop, ñaña nanac mecha'na'teñ. Ama't ñeñt yečhetsa e'ñe parro ñetpa'čo'ña cotape'chete't cohuen Partsocop. Ñapa' nanac amueraña, shonte' es apa'yesane't ñeñt es palltatse't. Ñaña čhocmach ma'yochenana Paret.

³ Atta yečhena ama't ahuatoteñ. Parrochpa' o' coya'nen atsne'pa' orrtoña ñeñt Yompor po'mllaño'teñer. Orrtoña atet ñerra'm puečhopoño't, tarraña ama čhoye' čhopo'teñe. Tarraña o' orrtoñapa' e'ñe cohuen eñch. O' huapapa' atet otos:

—¡Cornelio!

⁴ Ñañaapa' pueñcha'naño'tpa' atta cohue', allotñaapa' atet otaḥ:

—¿Eso'tña Partseshacha' pemnen?

Mellaño'teññaapa' alla otererr:

—Pema'yocheño't te'pa' o' yerpaḥa Yompor. E'ñe pocte' entennaḥ atto es pa'pa'yeñ ñeñt es palltetsa.

⁵ Te'ñapa' añ pocte' o'ch pemñe acheñ Jopo o'ch paḥotach puesheñarr añ pa'so'cheñ Simón, ñeñtara oteñet Pedro.

⁶ Ñapa' all a'puena po'psheñeñ Simón pa'paclo. Te'pa' ñachña poterre' ñeñtča' atet peperra. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquellpa' ontapo'tsen. Añpa' allohua atet ot Yompor po'mllaño'teñer.

⁷ Ñeñta otuapa' o' ahuerr. Ahuerrpa' Cornelioñapa' chore'tan epsheña ñeñt taruaset e'ñe alla pocollo, chore'tan

ñaña puesheñarr po'solltarer ñeñtpa' aña po'taruas penet attoch cohuanpeñet po'caṭtánret. Añpa' ñeññ cohuen cotape'chets Partsocop ñaña.

8 Alloṭpa' o' serrpare'tatanet ora atfo orrtoña Yompor po'millañoṭeñer. Ñeñña serrpare'tatuanetpa' o' mueñanet Jopo. Allempoñapa' ahuanmuet.

9 Tsapañña' o' ḥapmochet Jopo. O' ḥapmochetpa' Pedroña e'ñe alla pocollopa' o' a'tap eno allcha' ma'yochosa. Allempopa' ḥapmoch pocto.

10 O' ḥapmoch poctopa' cheporra Pedro. Atarro' mueneñeñ o'ch rra'pa' tarraña ama potena'ña rreñets. Alla cohuenpa' o' huapoña ñeññ atet ñerra'm ḥo' es ḥopo'ten.

11 Entoñapa' o' entan ñeññ atet ñerra'm atarr shetamuets. Enoṭpa' ḥa sohuanpesnena, aḥaramṑsaret pa'tats po'toṑñe'marot. Añña ñeññ aḥaramṑsaretpa' sohua'netsa patsonet e'ñe ñeshoneñ.

12 Allña shetamtso e'ñe o'ponopa' allo'tsa'yen shonte' pa'namen berroḥno, ama't po'poñ berroḥno ñeññ ama arrapoye' eñche'te judionesha'. Ñaña allo'tsa'yen pa'namen sheḥpeḥno ñaña pa'namen oteḥno.

13 O' ḥap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

14 Pedroñapa' atet ot:

—Ama Nomporcha', nerreñe. Napa' ama't ahuaṭapa' ama nerrare ñeññ ama arrapahuoyaye atet yeyḥena ya ñeññey judioneshay.

15 Allempoñapa' o' alla oterrerr ñeññ eñets, atet ot:

—Ñeññ o' a'cohuentatua Yomporpa' ṑapa' amach ṑotatsto añmapa' ama cohuenayaye.

16 Añpa' e'ñe ma'pocha e'ñpa' allempoñapa' o' alla a'terr enoneñ, o' alla chenquerra.

17 Allempoñapa' Pedropa' nanac moññe'tacha, o' cotape'ḥpa' atet ot:

—Esuañaca' otenenña ñeññ o' nentua.

Ñeññ nanac moññe'tenapa' allempocma ḥap ñaña ñeññ mueñen Cornelio. Ñetpa' o' a'ṑto'tnomuet errate' yehenaña Simón. Allempoña entoñet Simón pa'paquellpa', o' ḥapuet allot be'tenetpa'

18 o' ḥore'toset atet otoset:

—¿Arre't a'puenaña ñeññ sochetsa Simón ñeññara ñeññ otenet Pedro?

19 Pedroñapa' e'ñe alla enopa' ama't orameñ moññe'tenana ñeññ o' entuapa' añña Parets Puecamquēñpa' atet och:

—O' ḥap ma'psheña acheñ ñeññ pe'nene'.

²⁰ Te'pa' o'ch pesuerra tayecma o'ch p̄octerranet. Amach pen̄cha'tatsto. Napa' na mueñenahuet at̄to huapuet arr. Añpa' at̄et ot Parets Puecamqueñ.

²¹ Ñeñña otuepa' Pedroñapa' asuerroche' patso. O' chap allo'tsen añ ma'psheña at̄et otapanet:

—Napa' naña ñeñten se'nen. ¿Esocpa'tña sehuena?

²² Ñetñapa' at̄et ochet:

—Yapa' añ yemñene' capitán Cornelio. Capitánpa' oten p̄onepa'to'. Ñapa' orrtoña Parets po'mllañoñeñer at̄et och: "Pagotach Pedro onepa'. Ñaña pocte' o'ch pe'mñoñeñ ñeñcha' at̄et otaḗ." At̄et och Parets po'mllañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen cotape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

²³ Allempoña Pedropa' at̄et otapanet:

—Ñehua, sebe'tos allach sa'pa, tsapa'tachña ahuey parro.

Allñapa' alla moset, tsapa'tñapa' ahuanenet. Po'potantaña'cho'ña ñeñt̄ ame'ñetsa e'ñe alla Jopopa' o' cota'huanmuet ñamet.

²⁴ Tsapa'tñapa' o' chapuet Cesareo. Cornelioñapa' alla cohuenan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt̄ epuet yemtena. Ñetñapa' all cohueñet e'ñe parro.

²⁵ O' huapa Pedro. O' huapapa' Cornelioñapa' o' tantnoma at̄toch o'ch poctaḗ. O' concorposñaña o'ch ma'yochaḗya.

²⁶ Tarraña Pedroñapa' o' cheterpa' at̄et och:

—Petanterra, amach pema'yochatsetno. Napa'cho'ña aromña'fena.

²⁷ O' tanterrapa' serrpare'tatanna'tet mame'pa' allo'tñapa' o' be'toscha'tet pocollo. Allñapa' o' entosan shonte' acheñ ñeñt̄ o' cha'cha't.

²⁸ Allempoñapa' otanet Pedro:

—Sapa' señoñeñ ya judioneshaypa' ama pocteye' yenteñe o'ch yeyemcha po'poñ acheñ ñeñt̄ ama judioneshayaye. Tarro'mar yapa' at̄et yeychena amach yeya'rrotatsche acheñ ñeñt̄ ama judioneshayaye. Tarraña te' Yomporpa' o' ye'chatuan amach yentatsche po'psheñeñ at̄et ñerra'mrrate' ñeñt̄ ama cohuenayaye.

²⁹ Ñeñto'marña te'pa' o' nohuapa arr tayecma allempo ago-tatennet. Te'ñapa' o'ch na'p̄to'taḗ ¿esocop̄te' p̄agotatenen?

³⁰ Allempoñapa' Cornelioñapa' at̄et ot:

—Ahuaña o' taya pa'tatsmat met, napa' alla nema'yochena, ñaña nema'yocheñoñ o' neque'chpa' nerrar mame'. Ñeñt̄ at̄tecma nepena allempocma nema'yochena nepacillo at̄et

ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeññ nanac cohuen poptetsa.

³¹ Ñaña'pa' otosen: "Cornelio, pema'yocheñoñ te'pa' e'muenep̄ Yompor. E'ñe pocte' entennañ atto es papa'yeñ ñeññ es palltetsa. Ñeñño'marña te'pa' o' yerpaña.

³² Te'ña'pa' o'ch pemñe acheñ Jopo o'ch pagotach puesheñarr ñeññ pa'so'cheñ Simón ñeññara ñeññ otenet Pedro. Ñapa' alla a'puena po'psheñeñ Simón pa'paclo. Ñach huapatsapa' ñapa' serrpare'tatosep̄cha'. Ñehua, ñeññ Simón all a'puena Pedro ñeññca'ye a'cohuenetyene'ña pa'rrom. Pa'paquëllpa' ontapo'tsen." Aña'pa' allohua atet oten ñeññ norrtoya.

³³ Ñeñño'marña nagotateneñ. Te'pa' e'ñe pocte' o' pehuapa. Te'pa' Yompor eñoteny ñeññey arro'tsa'yeney yemneñ o'ch ye'mñotañ o'ch peserrpare'tatey errponte' Yompor yeçhateneñ.

Allempo Pedropa' serrpare'tatosanet Cornelio pa'paclo

³⁴ Pedroña'pa' alla oterrerr:

—Po'ñoçh te'pa' o' neñoçh tarro'mar o' çhapona neyoçhro, ama ñap̄ta judionesha' morrentenoña Yompor.

³⁵ Aña'pa' ama't erra'tsen pa'namen acheñ, eñallcha'ña puesheña'tets ñeññcha' mecha'na'tene' Yompor ñaña ñeññcha' e'ñe cohuen es pets Yomporecop. Ñeññpa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' señoñe'ña Yomporpa' o' mueñoñay Puechemer Jesucristo, ñeññey judioneshacpay. Añ ñeññara Jesús'pa' o' a'pocatuonay e'ñe cohuen Partsocop attoch cosheñso'tseneycha'. Te'ña'pa' ñach Yepartseshar yeperr allohueney. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'çhete't Galileo allempo apate't Juanañ.

³⁸ Alla oterrerr Pedro:

—Señoñe' Yomporpa' o' nan Puechemer Jesús ñeññ nazareto'marnesha'. O' chorracha Parets Puecamquëñ ñaña nanac ahuamenca't pe'. Allo'tpa' all chopeñe'chyese'tpa' nanac amuerañte't. A'crratyese't allohuen ñeññ mueroçhtatyese't oneñe't, tarro'mar Pomporpa' nanac yenpue't.

³⁹ Alla oterrerr Pedro:

—Yapa' o' yentuoñ ora allpon atet pa'yese't all yeçhena judionesha' ñaña all Jerusaléño. Yapa' o' yentue ñeñño'marña te'pa' o' ya'potoñ ñeññ atet pa'yese't. Allo'tña'pa' o' corso'tam̄pset tsacho, atto muetset.

40 Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop.

41 Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'pofoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

42 Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'pofoñ atto yeñoçh Yomporpa' o' nan Puechemer Jesús ñach acre' allohuen acheñenesha' —errotench'a' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huen.

43 Alla oterrerr Pedro:

—Ñeñt ama't ahuat ñeñt a'mtaye't Yompor po'ñoñpa' ñeñtara Jesús a'potete't. Ama't ahuat ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorr Janet Parets Puecamquëñ ñeñt ama judioneshayaye

44 Ama't allempo serrpare'ten Pedropa' añña Parets Puecamquëñpa' ahuepa't chorr Janet allohuenet ñeñtet e'mñote'.

45 Añña judionesha' ñeñt ame'ñetsa ñeñt parro huapa Pedro, ñetñapa' atfa cohuanrrortenet, o' otet:

—Erroteno'uate'ca'ye chorr Janet ñamet Parets Puecamquëñ e'ñe atto'a, ñetpa' amaca'ye judioneshayayeto. Atet otet ñet.

46 Tarraña po'ñoçhpa' ahuepa't chorr Janet ñamet Parets Puecamquëñ tarro'mar ñetpa'cho'ña ahuepa't eñosyaset po'poñ ñoñtso. E'ñe po'poñ ñoñtso aye'choçhtachet Yompor. Atto e'manet judionesha'. Allempoñapa' atet ot Pedro:

47 —Ama't pocte' senteñe o'ch apatare'ttet Partsocop. Tarro'mar o' chorr Janet Parets Puecamquëñ e'ñe atet ñerra'm ya.

48 Allempoñapa' ot Janet Pedro:

—Te'pa' e'ñe pocte' same'ñeñoñ Jesucristo o'ch sapatare'tta.

Allempoña apatare'ttetuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerr Janet Jerusaléño

1 O' allponmat Jesúsña puellsensarnesha' o' e'mare'chet atto po'poñ acheñ ñeñt ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñeçhno acheñ ñeñt ame'ñetsa all Judeo.

2 Allempoña ahuerr Pedro. Allempo çherr Jerusaléño'pa' judionesha' ñeñt ame'ñetsa allpa' o' che'ptare'tapueret Pedro.

³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha perrallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa;

⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es ye'chopo'ten. Entoñapa' o' nent ñeñt atet ñerra'mrrate' shetamuets. Enotpa' cha sohua'nena a'charampsaret e'ñe pa'tats po'to'pñe'marot. Añña ñeñt a'charampsaretpa' sohua'netsa patsonet e'ñe neshonet.

⁶ Napa' o' necue'pa' allña o'ponopa' nent pa'namen berro'chno ñaña ñeñt puetsato'mar, ama't po'poñ berro'chno ñeñt ama arrapahuoye' yenteno ya ñeñtey judioneshay. Nent ñaña pa'namen shechpe'chno, ama't ñaña pa'namen ote'chno.

⁷ Allempoñapa' ne'm ñoñets, atet oten: “Pedro o'ch pemtsa añ berr o'ch perre'.”

⁸ Tarraña napa' not: “Ama Nomporka' nerreñe. Napa' ama't ahua'tapa' ama nerrare ñeñt ama arrapahuoyaye atet yey'chena ya judioneshay.”

⁹ Allempoñapa' alla otterrerr ñeñt eñets ento't, atet ot: “Ñeñt o' a'cohuentatua Yomporpa' pa'pa' amach potatsto añmapa' ama cohuenayaye.”

¹⁰ Añpa' e'ñe ma'pocha ne'mpa' allempoñapa' o' alla a'terr enonet o' alla chenquerra—ora.

¹¹ Allempocma o' chap ñaña ma'psheña acheñ. Chapuet all pocollo all nommuena. Añ ma'psheña acheñpa' arro't mueñonet Cesareot.

¹² Añña Yompor Puecamquëñña' oten o'ch nocterranet. Oten amach ne'mcha'tatsto. Añ pechapsheña ñeñt arro'tsen te' o' yahuanma parro. Allempoñapa' ye'chap pa'pacillo ñeñt nagotatene'.

¹³ Allempoña o' ye'chap pa'pacillopa' ñaña'pa' o' serrpare'tatapuey atto' orrtoña Yompor po'millañoñeñer. Orrtoña'pa' atet otos: “Añ pocte' o'ch pemñe acheñ Jopo o'ch pagotach puesheñarr añ pa'so'cheñ Simón ñeñtara ñeñt otenet Pedro.

¹⁴ Añña Pedropa' ñeñtcha' peñotate' attoch pequeshperra ñaña allohuen pa'mo'tsesha'.” Atet oten Yompor po'millañoñeñer.

¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquëñpa' ahuepa't chorranet. O' chorranet ñet e'ñe attecma chorra'ya ahuaña yaña.

16 Allempoñapa' o' neyerepya atet otey ahuaña Yepartseshar Jesús: "Juanaña' e'ñe oñochaya apate't tarraña na añcha'ña nechorratasa Parets Puecamquëñ."

17 Ñehua, Yomporpa' e'ñe pocte' enteñ o'ch chorranet ñet e'ñe attecma atet chorra'ya ya allempo yame'ña Yepartseshar Jesucristo. Ñehua, ñerra'm e'ñe pocte' enteñ Yomporpa' nañapa' errotenuate'ca'ye neche'ptare'chña Yompor.

18 Ñeña otuapa' allempoñapa' alla moma'huet allohuenet. Allempoñapa' o' aye'chochtatoñet Yompor, atet otet:

—Ama't po'poñ acheñ ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñt atet pa Pedro ñaña Cornelio.

Atto epa'hua Yompor po'ñoñ errañaren

19 Allempo muetset Estebanpa' allempoteña orrta muerochteñets. Nanac muerochtachete't ñeñt ame'ñetsa. Ñeño'marña yetrra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar, po'potantañapa' ahuanmuet Chipro, po'potantaña' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña ña serrpare'tatnomuet ñapuet judionesha'.

20 Tarraña puesheña'tets chipro'marnesha' ñaña cireneo'marnesha' ñeñt ame'ñetsapa' o' chapuet Antioquío. Allña' ña serrpare'tatoset ñeñt griegonesha'. Añ serrpare'tet ñeñt atet pena Yepartseshar Jesús.

21 Yomporpa' nanac ahuamencat panet. Ñeño'marña shonte' acheñ ame'ñachet Yepartseshar Jesús, o' a'ypo'ña'huerret ñeñt ahua't poctapñet.

22 Añña ñeñt ame'ñetsa Jerusaléñopa' o' e'mare'chet atto shonte' ame'ñetsa Antioquío. Ñeño'marña mueñet Bernabé Antioquío, o'ch yenpuenaneta'.

23 Allempo chap Bernabé allpa' entosan po'ñoch o' orrta Yompor puemuerña all. Ñeño'marña nanac coshosa. O' cotape'chatosanet, atet otanet:

—Amach sequechpatstere Yompor po'ñoñ. Huomenccha' sepa' seyocher.

24 Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeño'marña shonte' ame'ñatana acheñenesha' attoch coteret Yepartseshar.

25 Allempoña ahua' Bernabé. O' chap Tarso allcha' e'nerrana' Saulo. Allña entsopa' a'secher o'ch aner Antioquío.

26 Epsheño'maret alla a'puet paterr char Antioquío. Allña' nanac ye'chachete't ñeñt a'pchatse't all pame'ñeñotet Yompor.

Shonte' acheñ ame'ñatsa all. All Antioquíopa' añ asocharettet ñeñt ame'ñetsa "Cristona'tarnesha'." Ñanom arr Antioquí asocharettet atet.

²⁷ Allempoña Jerusaléño'pa' allo'tsen puesheña'tets ñeñt a'mtene' Yompor po'ñoñ. Parrochpa' ona'cha'tet. Chapuet Antioquíopa'

²⁸ añña ñeñt pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo errañaren patso. Añpa' allohua ñeñt atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo añcha'taretta Claudiopa' allempo'ña orrta muecheñets.

²⁹ Ñeñto'marña allohuen ñeñt ame'ñetsa Antioquíopa' o' a'pochtachet o'ch mueñet ñeñt'cha' yenpue' pa'mo'nasheñesha' ñeñt ye'chetsa Judeo.

³⁰ Allpon echyenetpa' allpon apa'yeset. Atet a'pochtachetpa' atet'cho' pet. O' apueñet Bernabé ñaña Saulo, ñetñapa' anmet Jerusaléño, allñapa' aposet ñeñt pompornesha' pen ñeñt ame'ñetsa Jerusaléño.

12

Allempo añcha'taret Herodes muetsaterran Jacobo, yotamñpsatan ñaña Pedro

¹ Allempopa' añña añcha'taret Herodespa' rromatan puesheña'tets ñeñt ame'ñetsa attoch muero'chtachet.

² Rromuet Jacobo o' muetset. Añ Jacoboñpa' ñeñtara ñeñt Juan pa'mo'nasheñ. Atto muetsetpa' 'cho pechoñet poñ.

³ Ñeñtña muetse'pa' nanac coshatan judionesha' ñeñt ama ame'ñetso. Allempoña añcha'taretpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrerretterr pan ñeñt ama a'chasareteyayepa' o' alla rromaterranerr ñaña Pedro.

⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeñt'cha' cohuanñpse'. Ñanompa' o'ch neñet pa'tatssheña solltarnesha' ñeñt'cha' cohuanñpene'. Allotpa' o'chña muenme'cheñetpa' o'ch huena po'potantañ pa'tatssheña ñeñt'cha' cohuanñpene' ñaña. Ñeñtña çharra' puechena pechap solltarpa' attach penet, çhach camyannenet. Añ cotape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'.

⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yochamñpeñet Pedro.

Atto Yompor po'mllañoñeñerpa' çha'nmaterran Pedro cárcelot

⁶ Atteñapa' allponmat o' chap allempoch tsapatcha' Herodespa' o'ch orrtata'muenan Pedro allo'tsa'yen acheñenesha'. Tsapoña Pedropa' all muenpa' all rrochtampeñ epsheña guardia all rromanpeñet allo ehuncaret cadeno epo'mar pueçot. Ñaña a'yotpa' all cohuanpeñ po'potantañ solltar e'ñe allot be'tenet.

⁷ Atteñapa' machayota puetaresua e'ñe alla o'pono. Orrtoña Yompor po'millañoñeñer. Añña mellañoñeñpa' o' a'pñlan Pedro pueçotpa' o' opuepa' atet och:

—Petanta tecma.

Añña cadena allo' huanquëñetpa' cha pueya'nets e'ñe ñoña.

⁸ Añña mellañoñeñpa' atet och:

—Pechana'pena peshtam, o'ch penen ñaña pesapat.

Atet och mellañoñeñpa' atto'cho' pa. Allempoñapa' alla otererr:

—Te'pa' pechorrena ñaña peshtam ñeñt penen enot. Allempoñapa' o'ch pöctenen.

⁹ Allempoñapa' o' cha'nen coña'nenan mellañoñeñ. Pedroñapa' cha otenapañ attate' çhopo'teñ, tarraña ama çhoye' çhopo'teñe. Allempoñapa' o' ahuanenet.

¹⁰ Ahuanenetpa' o' metenet all cohuen puesheñarr guardia. Ahuerretterr allponpa' o' meterretterr all cohuen po'psheñeñ guardia. Allempoñapa' o' çhenet allot e'ñe cha'nenet allecma chopeñe'chen acheñenesha'. Chenet yetarropa' ñeñña yetarropa' asret nanac echarr. O' çhenet e'ñe allpa' añña yetarropa' o' tora'nom e'ñe ñoña. Tora'nenpa' ñetñapa' o' cha'nenet. Chenet a'yotpa' allñapa' all chope'chnomuet e'ñe parro mame'pa' allotñapa' o' ahuerña Yompor po'millañoñeñer allotñapa' o' ñapñamena Pedro.

¹¹ Allempoñapa' çhapoña Pedro pueyoçhro, atet ot:

—Po'ñoçhepa't ama çhoye' neçhopo'teñe. Yomporepa't mueñene' po'millañoñeñer attoch a'quespñaten. Te'pa' Herodespa' amach erroç pa'no. Judionesha'pa'çho'ña e'ñe orrena o'patenna.

¹² O' çhapoña pueyoçhro tematenñapa' o' chap allo'tsen María pa'paquëll. Añña María'pa' ñeñt pachor Juan Marcos. Chap all pa'pacñlopa' allñapa' allo'tsa'yen shonte' acheñ all ma'yochenet o'pono.

¹³ O' chap allot be'tenetpa' çhore'tosanet. O'ponoñapa' cha'nom puesheñarr shopshesha' añ pa'so'cheñ Rode.

¹⁴ Huapapa' o' cheme'tan Pedro po'ñoñ. Pocsheñesha' mterra o'pono o'ch oterrana' acheñenesha' ñeñt o'pono'tsa'yen. Tarraña ama torampsano Pedro. Cherr o'ponopa' atet otanet:

—Pedrepa't o' huena, allo'tsena a'yot.

15 Ñetñapa' čha otet:

—Amate'ca'ye ñeñfeyaye, atta p̄otyen čhate' pemospuena.

Ñaña'apa' alla oterrerr:

—Po'ñochca'ye Pedro.

Ñetñapa' oterreterr:

—Amate' Pedroyaye. Ñato' añte' Yompor po'mllañoñeñer ñeñtcha' cohuanp̄se' Pedro.

16 Atteñapa' Pedroñapa' alla čhore'terraneterr yetarroť. Allempoñapa' toram̄pset. Toram̄psetpa' añepa't Pedro. Allempoñapa' atta cohuanrrortet.

17 Pedroñapa' o' echantan pot attoch o'ch muetsoñeñtet allochñapa' o'ch serrpare'tatuenanet. Allempoña o' muetsoñeñtuetpa' atet otanet atto Yomporpa' o' čha'nmater cárceloť. Otanet ñaña:

—O'ch soteña' Jacobo ñaña po'potantañ masheñnesha' atto čha'nmaterren Yompor po'mllañoñeñer.

Allempoñapa' alla ahuer Pedro.

18 Atteñapa' o' puetaren. Arrña cárcelo solltarnesha'ñapa' puenm̄chañoťetpa' otanna'tyaset:

—Erroťenoťuañaca'ye čha'nenña Pedro. Errahuañaca'ye o' ahuen.

19 Atteñapa' o' e'nater Herodespa' ama esesha' entaye. O' alla a'p̄to'tare'tereter solltarnesha' ñeñt cohue' cárcel ama esesha' entaye erroťenote' o' ahuen. Allempoña Herodesñapa' o' mueño'tuan solltarnesha' a'yo allcha' muetsanatatuanet. O' allponmat Herodesñapa' o'čho' ahuo' Judeoť o'ch ahuo' Cesareo allñapa' allach allponmatena'.

20 Allempoña Herodesñapa' nanac e'moñe'tenan tiro'marnesha' ñaña sidóno'marnesha'. Ñeñto'marña o'huañ apanet rreñets ñeñt nanac palltenet pa'nyeto. Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt palltenet. Ñeñto'marña huacha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñaña'apa' o' a'poc̄tat Janet attoch ñetpa' serrpare'tet epuet añcha'tareť.

21 Chap allempo'ch serrpare'tet epuet añcha'tareťpa' Herodesñapa' o' chorrana nanac cočhnesha' pa'shtampa' anorros po'conañopa' eñosos. O' eños atet ñerra'm ñeñt añcha'tareť nanac.

22 O'ña eñosua acheñenesha'ñapa' o' rrannartetpa' atet otye-set:

—Ama acheñenocheye' eñetso, Partsepa't eñets.

23 E'ñepa'tcha' allempocma huapoña Yompor po'mllañoñeñer o' atsna'tatosan Herodes. O' atsna'tpa' e'ñe

rrohue pueñpa' o' rroma. Tarro'mar Herodespa' mueneñ o'ch Partsocoptarta. Acheñenesha'ñapa' o' aye'chochtatoñet atet ñerra'm Parets. Amaña čhoye' otaneto eñallña paterr Yompor. Añpa' allohua atet pe't Herodesoñ.

²⁴ Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

²⁵ Añña Bernabé epuet Saulopa' o' asueneta' Jerusaléño, pomhueneta' quelle. Pomhueneta' quellepa' o' puerračherret Jerusaléño. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

¹ Ñeñt pame'ñeñoñet apčhatse't Antioquíopa' allo'tsen puesheña'tets acheñ ñeñt a'mtene' Parets po'ñoñ, ñaña allo'tsen ñeñt nanac cohuen yečhatatse't Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt añcha'tarettetsa all Galileo, ñaña allo'tsen Saulo.

² Allempo čhocma cohuentatoñete't Yompor, ñaña errotenopa' čhoch tore'tete't.* Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëñoñpa' ahuanmuet Seleucio. Seleucioñapa' ahuanñset boto, o' čhapuet Chipro.

⁵ Allña pueblo all čhapuetpa' añ pa'so'cheñ Salamina. Chapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenpahuet.

⁶ Atteñapa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allñapa' entoset puesheñarr judionesha' ñeñtpa' achyo'tañ añ pa'so'cheñ Barjesús. Ñaña' nanac serrpare'taten, tarraña ama Yomporeye' po'ñoñ a'mteno.

⁷ Ñaña'pa' čhocma yemtenana ñeñt añcha'tarettetsa atet ñerra'm gobierno' ñeñt allo'tsen. Añña añcha'taretpa' añ

* **13:2** Añ tore'teñetspa' añecop o'ch yetorra Yomporecop. Amach añecpayaye atomat, ñeñpa' añecpa mameshacop o'ch yequečhpa' yerran.

pa'so'cheñ Sergio Paulo, ñeñtpa' nanac es eñot. Añña añcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet.

⁸ Tarraña ñeñt achyo'tañpa' ama muenatano añcha'taret o'ch ame'ña. Ñaña' mueneñ o'ch a'mche'ttanet attoch amach ame'ñacheto añcha'taret. Añ ñeñt achyo'tañpa' ñeñtara oteñet ñaña Elimas.

⁹ Allempoña Saulopa' o' huomenc cohuenan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña' e'ñe chorreña Parets Puecamquëñ.

¹⁰ O' cohuan achyo'tañpa' atet och:

—Papa' nanac peshquëñ acheñ, nanac peye'chcaten ñeñt ama cohuenayaye. Aña p'ompor pepen oneñet. Nanac pe'moñe'teñ ñeñt poctetsa Yomporecop. Esemphuachñaca' peuna'ña atto p'oten ama cohuenaye Yompor po'ñoñ. Añpa' ñeñtña po'ño'ch ñeñt cohuentetsa.

¹¹ Te'ña Yomporpa' o'ch tsa'tatapa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

¹² O' entan añcha'taret atetpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

Allempo ñanom asena' Pablo Asio

¹³ Allempoña Pablo ñaña ñeñt cotene'pa' o' ahuañpset boto o' chapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusalem.

¹⁴ Allempoña Pablo ñaña Bernabépa' ahuanerretter, o' chapuet anetso ñeñt pa'so'cheñ ñaña Antioquía ñeñt allara Pisidio. Allempopa' o' chapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allña' anorrcha'toset ñamet.

¹⁵ Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'mtaye't ahua't Yompor po'ñoñ. Allempoña o' lleya'huetpa' añña ñeñt añcha'tarettetsa puerahuopa' atet otanet:

—Eshaste' masheñshare echene' ñoñets attoch soctape'chateypa' ñato' o'ch seserrpare'tatey.

¹⁶ Allempoña Pablopa' o' tomospa' echantan pot attoch muetsoñeñtuet atet otanet:

—Masheñsha judioneshacha' ñaña allohuenes ñeñtes mecha'na'tene' Yompor, se'mñoten, o'ch notas:

¹⁷ Yapa' israelena'tarey ahua't Yomporpa' e'ñe pocte' entane't yatañeshañ. Nanac a'mratanet allempo a'puete't

Egipto. E'ñe Yompor po'huamencotpa' o' ahuanerranet Egiptot.

18 Ama't atomat char allempo chopeñe'chete't amaratareropa' chocma cohuañpsanet e'ñe cohuen, ñato' pa'tatsoch charra' char'te' cohuañpsanet.

19 Allempoña cha'cherret alla Canaáno Yomporpa' o' huapore'tatuerran can'cherr po'poñe'ttsochma acheñ ñeñt ye'cha'yestse't all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet.

20 Allempoteñ ñato' cuatrocientos cincuenta char'te' o' nanet ñeñt'cha' añcha'tare'ttatsa ñocpuet. Atteñapa' o' chap allempo orrta ñeñt a'mtaye't Yompor po'ñoñ ahuat, añ pa'so'cheñ Samuel.

21 Allempoña acheñenesha'pa' enamet Yompor o'ch apanet puesheñarr rey ñeñt'cha' nanac añcha'tare'ttatsa. O' nanet añ pa'so'cheñ Saúl ñeñt Cis puechemer ñeñtara pamo'tsna'tar Benjamín. Añña Saúlpa' o' añcha'tare'tta pa'tatsoch charra' char.

22 Allempoña Yomporpa' o' puerratañper attoch o'huañ añcha'tare'tta Saúlpa' o' alla nerran po'psheñeñ ñeñt pa'so'cheñ David ñeñtara Isaí† puechemer. Añ Davidpa' e'ñe pocte' eñch Yompor ñeñto'marña atet ot ñocop: "Davidpa' e'ñe attecma cotape'chen atet noctape'chen na neyo'chro. Ñeñto'mar neñoteñ ñapa' o'ch ame'ña'na na e'ñe poctacma."

23 Alla oterraneterr Pablo:

—Ñeñt puesheñarr David po'mñrenño't Yomporpa' o' orrtatonay yocop ñeñtey israelena'tarey ñeñt'cha' ya'qeshpaterre'. Añ pa'so'cheñ Jesús. Te'pa' o' etsota atet otye't Yompor ahuat.

24 Tarraña ama chena' allempoch serrpare'tos Jesús pa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yocape'cherr ello cohuen etserra allempoñapa' o'ch yapatare'tta Partsoch. Atet serrpare'tatey allohueney ñeñtey israelena'tarey.

25 O' e'nuamochan ñeñt po'taruas pa'pa' Juanañña'pa' atet otanet: "Ñapa' ama añeyayno ñeñt soten ñeñt'cha' Cristo'tats. Ñapa' te'pa' ñeñtña nocta'nene' chenta'. Napa' ama esoshe'mano attoch ama't po'sapatre'chapa' o'ch nepyoñ."

26 Alla oterraneterr Pablo:

—Sapa'cho'ña masheñeshacha' pamo'tsna'tarecmas penes Abraham. Ñaña arro'tsa'yen puesheña'tets acheñ ñeñt mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yeqeshperra allohueney.

† 13:22 Isaípa' ñeñtara ñeñt sochenet Jesé.

27 Ama't o' čhap ñeñt Cristotatspa' añña ñeñt jerusaléño'marnesha', ñaña ñeñt pa'mcha'tareternesha' penet, ñetñapa' ama esesha' eñotaye. Ama čapaneto pueyočhreto atet ote't ahuat ñeñt a'mtaye't Yompor po'ñoñ ñeñt čhocma lleyenet añ yetro allem pocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetsset.

28 Ñapa' ama't ama eñalle po'chñar atta otteñe'chet attoch muetsachet. E'ñe attota enamet Pilato muetsachepa'to'.

29 Allempoña o' etsotatuoñet ora allpon atet aquellcare't ahuatoteñ ñocoppa' o' a'suachet corsocho'tpa' o' net mapuet-pono.

30 Tarraña Yomporpa' o' tantater ama't o' rromua.

31 Allempoña tantaterpa' allponmat orrtame'tnerrana ñeñt ñanom co'a'nmue' Galileot allem po on Jerusaléño. Te'pa' ñetpa' o' a'potoñet atto tanterra Jesús, o' a'potoñet allohuen acheñeneshesho.

32 'Yapa'cho'ña te'pa' o'ch yeserrpare'tatas sam'a añ ñeñfara cohuen ñoñets. Ama't ahuat Yomporpa' otane't yatañneshañ atetcha' pa esempo

33 te'ñapa' o'cho' etsota yocop ñeñtey yatañneshañ po'mrenñey. O' etsota po'ñoñ allem po tantaterran Puechemer Jesús, tarro'mar atet oteney ñeñt Salmos 2, atet Yompor otan Puechemer: "Papa' Nechemerep, te'ñapa' o'ch neñotach acheñenesha' po'ñočh pa'pa' Nechemer nepenep."

34 Ama't ahuat Yomporpa' ote't o'ch tantaterpa' amach alla rromuerre'te. Ñeñtpa' atet oteney añ ñoñets ñeñt ahuatoteñ aquellcare't: "Po'ñočh o'ch na'natapa' pa'ña atet na'nacha David."

35 Ñaña po'poñ capítulo Salmos all oten atet: "Yomporpa' amach muenatano Puechemer ñeñt nanac Parets o'ch puetsohua po'chets."

36 Añ ñoñetspa' yeñoteñ ama añecpayaye David tarro'mar yeñoteñ David allem po e'nuan allpon atet muenach Yompor pamo'tsna'tarecoppa' allem poñapa' o' rroma. Allem po rromapa' o' pampuet allo'tsen pa'tañneshañ, po'chetspa' o' puetsohua epuet.

37 Tarraña Jesús po'chetspa' ama puetso ama't coñe'ta tarro'mar Pomporpa' o' tantater.

38 Ñeñto'marña añ poctetsa o'ch masheñneshacha' señočh añ Jesús ñeñt atet pena. Ñach ye'pretnerre' yo'chñar. Ñeñto'mar te'pa' o' neserrpare'tatas.

39 Añ Moisés po'ñoñ ñeñt anaret ahuatoteñpa' amach er-roteno't ye'pretnaterro allo yo'chñar. Tarraña te'pa' añña

yame'ñeñoť Jesús'pa' añepa't alloch e'ñe aḗretna'huare'tterra yo'chñar.

⁴⁰ Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñť atet ote't ñeñť a'mtaye't ahuat Yompor po'ñoñ. Atet otete't ahuat:

⁴¹ Se'mñot ñeñtes achmāre'tets, te't secuanrrorteñoťa sechenca'huerra. Te'pa' allempo ora socrenmeñpa' napa' o'ch norrtatonas ñeñť ama sentare. Tarraña ñato' sapa' amach same'ñyo ama'tcha' serrpare'tataset. Añpa' allohua huañ atet serrpare'tatanet Pablo.

⁴² Allempoña čha'nmačherret acheñenesha'ñapa' atet ochet Pablo huapuepa'to' po'poñ semana o'ch serrpare'taterraneterr po'pocheño añ yetro allempocma amesenet.

⁴³ Allempo ahuanerretpa' shonte' judionesha' o' cota'huaneret Pablo ñaña Bernabé. Ñaña o' cota'huaner shonte' ñeñť ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' cotape'chatanet attoch čhocma o'ch cotape'choñet Yompor pomuereña.

⁴⁴ Po'poñ semana o' čherrerr allempo amesenet. Huačhenerr shonte' acheñenesha' o'ch e'mñnoteneterr Yompor po'ñoñ. Autsa ora allohuen acheñenesha' ñeñť yečheta all e'ñe huača'tuet.

⁴⁵ Allempoña judionesha' ñeñť ama ame'ñetsopa' o' eñchet shonte' acheñ huača'tatsapa', puesope'cheñoťetpa' o' cohuana'chet Pablo. Ñeñť atet oten Pablopa' ñetñapa' o'ch otenet ama atteyaye. Nanac achmāre'chet.

⁴⁶ Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erroť yeḗaso. Te'pa' añach yeserrpare'tat ñeñť ama judioneshayaye.

⁴⁷ Tarro'mar atet oteney Yompor po'ñoñoť, arr oteney atet: Napa' o'ch nenas sa atet ñerra'm puetare', sach a'puetarsamḗsats. O'ch sa'puetarsamḗsoñ po'poñ acheñ poctapña ñeñť ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch qeshperret.

⁴⁸ Allempoña ñeñťa e'mhuet añ ñoñetspa' añña ñeñť ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñť o' anaretta attoch ñetpa' corretsetach tayoteñ e'ñe errponañohuen.

⁴⁹ Atteñapa' o' epa'hua Yompor po'ñoñ erracmañen.

⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt atet cotape'ch coyanesha'chno ñeñt cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt añcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé.

⁵¹ Ahuanenepa' o' pa'shetca'tnenet po'patser pa'tcoť attoch eñoch judionesha' ama pocteye' entaretteto ñeñt atet o' p̄ohuet, te'ñapa' amach alla huacherrete'te. Allempoñapa' ahuanmuet ñaña Iconio.

⁵² Tarraña ñeñt o' ame'ña'hua all Antioquíopa', ñetñapa' nanac coshenet, ñaña o' chorr Janet Parets Puecamquẽ.

14

Allempo chapuet ñaña anetso pa'so'cheñ Iconio

¹ Allempoña chapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha'— ama't judionesha' ñaña ama't ñeñt griegonesha'.

² Añña judionesha' ñeñt atpare'tene' Yompor po'ñoñ ñetñapa' toma'tam̄pset Pablo ñaña Bernabé. Nanac sasare'teñet taye'to' acheñenesha' ñeñt ama judioneshayayepa' cohuen enteññañet atto serrpare'ten.

³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt acheñenesha' ama puentareto ñeñtña eñotatahuet po'ño'ch atto serrpare'tenetpa' añmapa' Yompor pomuereñoť huapanet añ ñoñets. Yomporpa' nanac ahua-mencat p̄ Janet.

⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama. Ñetñapa' añña ame'ñatahuet judionesha'. Ñeñto'marña ama patraye' cotape'chenoña acheñenesha' all.

⁵ Atteñapa' o'pacha shonte' judionesha' ama't ñaña ñeñt ama judioneshayaye ñaña ñeñt añcha'tarete'chnopa' o'pacha o'ch rromuet huomencpa' o'ch rrolle'chet.

⁶ O' e'mare'chet cha o'patare'ttenetpa' añña Pablo ñaña Bernabépa' o' yeterretpa' ahuanmuet ñaña Listro. Chapuet Listropa' cha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar.

7 All chopeñe'chnenetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Litra

8 Allempo Listro'tsenetpa' allña'pa' allo'tsen puesheñarr acheñ, cha echartena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña'pa' alla anen.

9 Allña anenpa' alla e'mñotenan atet serrpare'ten Pablo. Pabloña'pa' cohue' allapa' o' eñoch añ acheñpa' o' yemtana Yompor ñapa' o'ch a'crrater.

10 Ñeñto'marña Pablo'pa' atet och huomenc:

—O'ch notap, o'ch p'aten.

Ahuepa'tcha' tanta allempocma allorocma cha chope'chnets.

11 Allempo eñch allohuen acheñenesha'pa' cha rrannartet. Pocsheñoetpa' atet otet:

—¡Partsepa't! Ñeñt Parets yepen ñeñtepa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt Licaona'ch.

12 Añña Bernabé'pa' o' sochet, atet otet:

—Añepa't ñeñt yeyomporer Júpiter.

Pabloña'pa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio.

13 Ñehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñtpa' e'ñe ñehuapo't anaret allempopa' o'ch taya yerrota'nmos pa'netsreto. Ñeñt corneshatets puerahuopa' o' huapa. Huapatan huaquësh, huapatan ñaña shonte'ror. Mueneñ o'ch muetset huaquësh Pablocop ñaña Bernabé'cop tarro'mar chocma muetsete't huaquësh po'yompor-recop. Ñaña tarro'mar atet muenen acheñenesha'. Ñetpa' cha otenapuetañ Pablo ñaña Bernabé'pa' añte' ñeñt po'yomporer penet.

14 Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puellquëñoetpa' o' rrrarre'tet pa'shtampa' o' matrra'tet allo'tsa'yen acheñenesha'. O' rrannaretnomuet, puerranarotetpa'

15 atet otet:

—Eso'marte'ca'ye masheñeshacha' atet sepena. Yapa'cho' arromña'teya attey ñerra'm sa. Ñeñto'marña o' yeserrpare'tatas cohuen ñoñets attotcha' seque'chpuerr ñeñt atet sepena ñeñt e'ñe orrena. Te'pa' añña poctetsa o'ch same'ñera Yompor ñeñt ama arromña'teshayaye, ñeñtara Yompor ñeñt ye'chcate' enet ñaña pats ñaña ñeñt añecmuen

sa'p. Ñaña ora allohuen ñeñt' yentyen ento ñaña ñeñt' yentyen patsopa' ña yeħcatue' ñaña ñeñt' sapo'tsen ña yeħcatue'.

¹⁶ Alla otterraneterr Pablo:

—Ahuat Yomporpa' muenatan acheñenesha' o'ch pa'yeset ñeñt' atet muena'yenet e'ñe ñañeñeta.

¹⁷ Tarraña ama a'ypo'ñano acheñenesha'. Chocma apanete't attoch eñochet po'ñoħ eñall Yompor. Chocma mueranete't ñeñto'marña chocma huatache't ñocpuet atto't yeħcanete't puenarmet, atto eñalletete't puerraret atto coshete't. Añpa' ñeñta ñeñt' atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenafaneto.

¹⁹ O' atomatpa' huaħa'ta puesheña'tets judionesha' ñeñt' huetsa Antioquío't ñaña Iconio't. Cotape'chatoset acheñenesha' po'poñ. E'moñe'tachet Pablo. Atteñapa' rrolle'chet Pablo. Rrolle'tuetpa' ċha otapuetañ o'te' rroma. Chetare'tnomet pueblot a'yenet.

²⁰ Ñeñtña ame'ñatsapa' alla arrotanpeñet alla cohueñetpa' ñaña' ahuepa'tcha' alla tanterra, o' alla ahuerterr pueblo. Tsapatñapa' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerreterr Yompor po'ñoñ ñaña all. Shonte' acheñ ñeñt' allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquío.

²² Ora allohuanen ta'yeset yenpuet ñeñt' ame'ñetsa attotcha' huomenc pet pueyoħer. O' cotape'chatanet ñaña attoch chocma yemchet Yompor ama't esempo huapanet muerochteñets. Tarro'mar e'ñe yemueroħteño't yeħapcha' all añcha'tarettena Yompor.

²³ O' na'yeset puesheña'tets acheñ ñeñt'cha' pompor pa'yes ñeñt' pame'ñeño't apcha'yetsa. Puetore'teño'tetpa' o' ma'yochañpesyet ñeñt'cha' pompornesha' pa'yeset, atet ochet:

—Yomporepa'ch seyenpue', ñeñtara Yompor ñeñt' o' same'ña'huerra.

Atet pa'yeset ora allohuen anetso all ame'ña'yesa acheñenesha'.

Allempo ċhaħerret alla Antioquío allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Ĥerret anetso ñeñt' pa'so'cheñ Perge.

²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio.

²⁶ Chapuet Ataliopa' allotñapa' ahuañpset boto, o' alla ċhaħerret Antioquío ñeñtara anets allot ahuaña ñeñt'

ame'ñetsa all ma'yochanñpsapanet attoch yenpanet Yompor esheccha' etsotoñet po'taruas. Te'ñapa' o' e'nuet.

²⁷ O' chacherret allpa' apchachet allohuen ñeññ ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pochtatanet, añe'na serrpare'tatet ñeññ ama judioneshayaye, añecop attoch ame'ñerret ñamet.

²⁸ Alla atomatet parro epuet ñeññ ame'ñetsa.

15

Allempo a'pochtachet Jerusaléño ñeññcha' atet pet

¹ Atteñapa' chap ñaña acheñ ñeññ huetsa Judeot. Chapuetpa' o' yeçhatoset ñeññ ame'ñetsa all, atet otosanet:

—Te'pa' añña sepalltena attoch sequeshperra o'ch setsorranna'ta ñeññes asheñorres atet yeyçhena ya allempoteñ atet yeçhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñoçhaye' añ palltetso o'ch yetsorranna'ta ñeññey asheñorrey.

Ñetñapa' alla nanac es otanna'tet. Ama a'pochtacheto. Ñeñño'marña allempopa' o' net Pablo ñaña Bernabé ñaña po'poñeçhno acheñ attoch ñetpa' o'ch ahuanmuet Jerusaléño o'ch enteñeta' Jesús puellsensarnesha' ñaña ñeññ pompornesha' pen ñeññ ame'ñetsa all. Añecop tet attoch o'ch a'p'to'teneta' erra'tsente' pocte' ñeññcha' atet pet.

³ O' so'tuanma ñeññ ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmuetpa' all serrpare'tyesnomuet. Añ serrpare'tyesnomuet atto o' ame'ña ñeññ ama judioneshayaye. Pame'ñeñoçetpa' o' a'ypo'ña'huerret ñeññ ahuañ poctapñet. Ñeññña nanac coshate'ña allohuen ñeññ ame'ñetsa.

⁴ O' chapuet Jerusaléño'pa' e'ñe cohuen agapanet Jesús puellsensarnesha' ñaña ñeññ pompornesha' pen ñeññ ame'ñetsa all. Ñaña allohuen ñeññ ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet yenpanet Yompor.

⁵ Tarraña patantarr fariseonesha' ñeññ ame'ñetsapa' o' tantapa' atet ot:

—Acheñ ñeññ ama't ama judioneshayaye, añ palltetsa o'ch atorrareña allohuen asheñornesha', ñaña allohuenetpa' otarettetepa' añ palltetsa o'ch ame'ñeññañet ñaña Moisés po'ñoñ ñeññ atet anaret ahuañoteñ.

6 Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apchet attoch a'pochtchet este' pochtetsa ñeñtcha' atet pet.

7 Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' señoteñe'tña masheñneshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet.

8 Ñehua, Yomporpa' entennay yeyo'cher. Ñapa' eñoteñ ama't añ ñeñt ama judioneshayaye o' ame'ñyet pueyo'chreto. Ñeñto'marña o' chorratanet Puecamquëñ attecma atet chorrenya yaña. Attoña eñotatey e'ñe pocte' entenamet ñamet.

9 Ñeñto'mar yeñoteñ ama yaptayaya morrentenyo Yompor. Añña ama't ñetpa' morrentenanet ama't ñeñt ama judioneshayaye. Pame'ñeño'tetpa' ahuo't e'shohuerranet po'chñar ñeñt pueyo'chro'tsa'yenet.

10 Te'ñapa' eso'mare'tña ama pocteye' senteñe ñeñt atet o' pohua Yompor. Añecop ñeñt ame'ñetsapa' eso'mare'tña semneñ o'ch senamet ñeñt nanac torrapo' entenet. Ama't ya judioneshaypa' amach erro'teno o'ch yetsotua allohuen ñeñt atet anaret. Ama't yatañneshañpa'cho'ña ama etsotete'te.

11 Añcha'ña yeñot e'ñe Yepartseshar Jesús pomuereño'tpa' o'ch yequeshpa, attecma'ch qeshpet ñamet.

12 Ñeñta e'm allohuen ñeñt ap'chatsa allpa' alla moma'rrtet. Atto e'mño'chet. Bernabé ñaña Pablopa' ña nanac serrpare'tatahuet. Añ serrpare'tatanet atto Yomporpa' nanac ahuamencat panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet añmapa' po'ño'ch Yomporesho't huena.

13 O' serrpare'tuetpa' allempoñapa' atet ot ñaña Jacobo.

—O'ch masheñneshacha' se'mñoten naña.

14 Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'cho'chtatoñet Yompor pa'so'cheñ ñamet.

15 Po'ño'ch te'pa' o' etsota ñeñt atet oteneñ ñeñt a'mtaye't Yompor po'ñoñ ahua't. Añpa' ñeñt atet quellquë't ahua't atet ñerra'm Yompor otatse't:

16 Allempo o'ch meten shonte' charpa' napa' o'ch alla norrtaterr puesheñarr ñeñt David po'mrenño't ñeñtcha' ahuamencattatsa atet ahuamencatte't ahua't pa'tañ

David. Tarro'mar shonte' char ama't puesheñarrapa' ama orrteno David po'nrenñoñ ñeññ nanac ahuamencañ.

17 Añecopcha' norrtater allochñapa' ama't po'poñechno acheñenesha' ama't ñeññ ama judioneshayaye o'ch ame'ña'hueret ñamet Yompor, ñaña allohuen erra'tsencha' muenats.

18 Atet ot Yompor ñeññara ñeññ eñotatey ahuatoteñ ñeññcha' atet pa. Añpa' allohua ot ñeññ a'mñtaye't Yompor po'ñoñ ahuat.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeññ ama judioneshayaye ñeññ o' puesuerran ñeññ ahuat pocta'ña attoch ame'ñeret Yompor.

20 Te'pa' añña pocte' o'ch yequellcanet ñeññcha' ama pñatsteto ñeññpa' añ: Amach rratsteto po'chets ñeññ muetsenet aye'chcataretcop ñeññ po'yomporer pen ñeññ ama judioneshayaye ñeññara ñeññ ama ame'ñetso. Ñaña o'ch yot Janet amach chetapretatsteto taporets. Ñaña o'ch yot Janet amach rratsteto ñeññ muetsenet ñeññ atta a'pañare't, ñaña amach rratsteto ñeññ ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeññach atet yequellcanet. Tarro'mar ahuatoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judionesha'pa' chocma lleyeññañet Moisés po'ñoñ all po'prahueto. Añpa' allohua atet ot Janet Jacobo.

22 Allempoñapa' o' a'pochtachet o'ch net puesheña'tets ñeññ e'ñe allo'marnesha' ñeññcha' mueñet Antioquío, o'ch coteret Pablo ñaña Bernabé. Atetpa' e'ñe pocte' eñch allohuen—Jesús puellsensarnesha' ñaña ñeññ pompornesha' penet, ama't ñaña allohuen ñeññ ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeññ ame'ñetsa.

23 Ñetpa' o' anmuet, ñeññ atet oten carta:

“Masheñeshacha' ñeññes ye'chetsa anetso Antioquío ñaña Sirio ñaña Cilicio: Allohueney ñeññey ame'ñetsa o'ch yehuomñcha'tas sa añ yecartot —ñeññey Jesús puellsensarneshay ñaña ñeññey pompornesha' pen ñeññ ame'ñetsa arr. O'ch yehuomñcha'tas sa ñeññes ame'ñetsa samña ñaña ama't ñeññes ama judioneshayayso.

24 O'ch yotas, yapa' o' ye'mare'ch o' chap sesho puesheña'tets acheñ arro't ñeññ muenets o'ch a'mñechatasa.

Ñetñapa' o' nanac moññe'tatasa soctapñña. Tarraña teñapa' o'ch yotas, añ acheñpa' ama yaye' mueñenaye.

25 Ñeñto'mar pocte' yenteñ allohueney o'ch yene' epsheña acheñ ñeñtcha' yemñonas epuet Bernabé ñaña Pablo ñeñt nanac yemuerena.

26 Tarro'mar nanac yemorrentenanet ahuañapa' all serrpare'teneta' autsañ muene' amtsanataretetuet all. Tarro'mar e'ñe puemorrenteño'tet Yepartseshar Jesucristo atet a'parettet.

27 Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr.

28 Parets Puecamquëñpa' o' eñotatey ñeñt e'ñe pocte' yenten ñeñtcha' yenonas. Amach aña yenonaso ñeñt nanac torrapo'. Te'pa' añ palltetsa ñeñtcha' atet se'pa.

29 Amach serratsto po'chets ñeñt muetsenet aye'chcataretcop ñeñt po'yomporer penet. Ñaña amach serratsto ñeñt muetsenet ñeñt atta a'pam'aret. Ñaña amach serratsto es po'r'ras. Ñaña amach sechtapretatsto taporets. Ñerra'm amach atet se'po ñeñt'pa' e'ñech pocte'. Añpa' ñeñt'ach yotas. Yomporepa'ch sa'nataya." Añpa' allohua huañ ñeñt atet oten carta.

30 Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquíó. Cha'cherret Antioquíopa' o' ap'chatuet allohuen acheñenesha'pa' o' aposanet añ carta.

31 Ñeñt ap'chatsapa' o' lleyet añ carta. Lleya'huetpa' nanac coshatanet ñeñt atet actape'chatarettet cartot.

32 Añña Judas ñaña Silas, ñetpa'cho'ña nanac a'potoñet Yompor po'ñoñ ñamet. Ñetpa'cho'ña a'mtenet Yompor po'ñoñ. Nanac serrpare'tatet. O' cotape'chachet e'ñe cohuen ñeñt ame'ñetsa allochñapa' huomen'ccha' pet pueyo'cher.

33 O' allponmatet allpa' allempoñapa' secherret allot amñare'ttet ahuaña. Ñeñt ame'ñatsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

34 Tarraña Silaspa' mueneñ o'ch a'pa all, Judaspa' o'ch ahuerr.

35 Añña Pablo ñaña Bernabé allponmaterret Antioquíó. Ye'chatapretereta' epuet po'poñe'chno ñeñt ye'chatets all. Serpare'tapretereta' Yompor poñoñ epuet po'poñe'chno.

Allempo puepocheño ahuerrerr Pablo serrpare'tats allemeñ anetso'mar

36 Atteñapa' o' atomat Pabloñapa' otan Bernabé:

—O'ch ahuerrey, o'ch yaßchera' ñeñt ame'ñetsa ora allohuen anetso all yeserrpare'toñ Yompor po'ñoñ ahuaña attoch yeñoch errotenette'ña te'.

³⁷ Bernabéñapa' aña e'ñe pocte' ent o'ch coña'ner Juan Marcos.

³⁸ Tarraña Pablopa' ama pocteye' eñche tarro'mar ahuaña allempo chapuet Panfilio, Juan Marcospa' cha sa'nerranet, o'puerrerra. Ama allo'na yenpuenaneto all serrpare'tyeset.

³⁹ Ama erroteno a'pochtacheto, cha sa'nmanerret. Bernabépa' aña aner Marcos. O' ahuañpset boto, chaçherret Chipro.

⁴⁰ Pabloñapa' aña e'ñe pocte' ent o'ch anerran Silas. Ñeñt ame'ñetsa allpa' o' so'tneret, e'ñe cohuen otneret:

—Yompor e'ñe pomuereño'tpa' a'natyepa'ch.

Allemponñapa' ahuanenet.

⁴¹ Asueneta' Sirio'mar ñaña Cilicio'mar. Alloñapa' yenpuet allohuen ñeñt pame'ñeño't apçhetsa parro. O' yenpuet añecop attoch huomenccha' pet pueyoçher.

16

Allempo Timoteopa' cota'nerran Pablo ñaña Silas

¹ Pablo ñaña Silaspa' asuerreta' anetso añ pa'so'cheñ Derbe. Alloñapa' ahuanerret alla Listro. Allñapa' allo'tsen puesheñarr acheñ ñeñt ame'ñetsa añ pa'so'cheñ Timoteo. Ñeñt Timoteopa' añ pachor pen judionesha' ñeñt ame'ñetsa. Pomporñapa' ama judioneshayaye aña griegonesha'.

² Ñeñt ame'ñetsa Listro ñaña Iconiopa' nanac cohuen enteñet Timoteo.

³ Ñeño'marña e'ñe pocte' eñch Pablo o'ch cota'nerranet Timoteo. Tarraña ato'tña anemhueta' allcha' tsorreñet atet yeçhena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eñotuet ñeñt Timoteo pomporpa' ñeñt ama judioneshayaye aña griegonesha'.

⁴ All oñomyeset allemeñ añetsopa' otuosanet añ ñoñets atet a'pochtat Jesús puellsensarnesha' ñaña ñeñt pompornesha' penet Jerusaléno. Añ eñotatuosanet ñeñtcha' atet pet.

⁵ Atteñapa' allohuen ñeñt ame'ñetsapa' e'ñe pame'ñeño'tet allo'na senet huomenc pa'nmuert pueyoçher. Pate'tets yetpa' allo'na sen atonetnomtsa ñeñt ame'ñetsa.

Allempo Pablopa' entan macedonio'marnesha' atet ñerra'm cho çhopo'teñ

⁶ Allemponñapa' arr asuerreta' ñaña Frigio'mar ñaña Galacio'mar tarro'mar Parets Puecamquëñpa' ama muenataneto o'ch serrpare'toñet Yompor po'ñoñ all Asio'mar.

⁷ Allempoñapa' ahuanmuet ñaña tenonet, chapmochet Misio ñaña arr sechet Bitinio'mar, tarraña Jesús Puecamquëña' ama muenataneto.

⁸ Atteñapa' metuet Misio'mar o' cha'cha'tet Troaso.

⁹ Cha'cha'tet Troaso tsapoñapa' añña Pablopa' orrtoña atet ñerra'm cho es ye'chopo'ten. Atet ñerra'm pue'chopoño'pa' o' entan puesheñarr acheñ macedonio'marnesha' alla ten, atet otare'ch: "O'ch sona'cha't arr Macedonio, o'ch seyenpuenya'."

¹⁰ Allempoña errte' orretuoña macedonio'marnesha'pa' yañapa'* o' yesecha o'ch ahuey Macedonio, tarro'mar yoten po'ño'chte' chore'teney Yompor allochñapa' o'ch yeserrpare'teññaña' po'ñoñ all Macedonio.

Allempo chap Pablo ñaña Silas Filiposo

¹¹ Allempoña Troaso'tpa' año ahuanpsey boto. E'ñe pa'charra yepe' o'ch ye'chap anetso añ pa'so'cheñ Samotracia. Allñapa' all yetso'tnoma. Yahuanerrerr allo'tpa' tsapatñapa' o' ye'chap ñaña anetso Neápoliso. Allñapa' all yetso'tuerrerr.

¹² Yahuanerrerr allo'tpa' o' ye'chap ñaña anetso añ pa'so'cheñ Filipos allpa'cho' all yetso'tosa. Añ anets Filipospa' nanac atarr anets. Po'poñe'chno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt romo'marnesha'. Yapa' alla ya'llponmatoes all.

¹³ Allempoña chap allempo amesen judionesha'pa' yañapa' yahuanma anetso't a'yo. O' ye'chap ontapo all ye'nen ñato' allcha' ma'yochet. Yaña allpa' yentos puesheña'tets coyane-sha'chno all anorr'chenet. Yañapa' o'cho' yanorr'cha'tos yaña. Allempoña yapa' yeserrpare'tatanet Yompor po'ñoñ.

¹⁴ Puesheñarr coyanesha' ñeñt allo'tsen añ pa'so'cheñ Lidia ñeñt huetsa anetso't añ pa'so'cheñ Tiatira. Ñaña'pa' añña po'taruas pen atto vendenan shetamuets yetso'rorromamuen. Ñaña'pa' ame'ñenana Parets. Allempoña e'mñotan Pablo ñeñt atet serrpare'ten añña Yomporpa' o' chapatoñ pueyo'chro ñeñt atet serrpare'ten Pablo.

¹⁵ Lidiaña pame'ñeño'pa' allenta apataretta, ñaña o' apataretta ñeñt parro ye'chenet pocollo. Ñaña'pa' o'cho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepacllo ñato' allcha' sommosa.

Ñaña'pa' otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo allecma ma'yochenet toñoñapa' yentnom' puesheñarr shopshesha' ñeñt chorrena oneñe'. Añña oneñe'tpa' ñach eñoratene' shopshesha'

* **16:10** Ñehua, e'ñe allempocmapa' o' cota'nmanet ñaña Lucas, ñeñtara ñeñt quellquë' añ ñoñets.

ñeñto'marña ñerra'm erroten otanetpa' atto'ch'cho' pa. Amach pueno po'ñoñ ama't mamesha. Añña shopshesha'pa' eñall ñeñt pamo'mte' pen po'poñechno acheñ. Ñetñapa' nanaccha' ganatenanet quelle atto eñotañtena.

17 Ñañaapa' chocmach cota'nomye't epay Pablo. O'ch cota'nmueypa' o'ch rranare'tnoma chenta'pa' atetcha' ot:

—Añ encaneshachnopa' añ sherbenet Yepapar Ñeñt Nanac Parets. Arrpa' añecop huenet attoch o'ch serrpare'tataset attoch sequeshperra.

18 Atteñapa' ama't atomatpa' attecnoch pena. Atteñapa' o' a'mñechatana Pablo. Pabloñapa' allenta puetallsapa' o' otan oneñe't:

—Te'pa' e'ñe po'huamencot Jesucristopa' o'ch notap, pequechpa'ner shopshesha'.

Allempocmuepa'tcha' quechpa'nerran shopshesha'.

19 Añña pamo'mtaynesha'pa' cotape'chetpa' otet:

—Te'pa' llequëñtsa, o' huañerr allo yeganena quelle.

Allempoña pa'tsrre'mueño'tetpa' o' rromuet Pablo ñaña Silaspa' anmare'ttet e'ñe po'huamencocma, o' achapatarettet allo'tsa'yen añcha'taretnesha' allecma a'pocatenet ñoñets.

20 Allempoña achapatarettet allo'tsa'yen guardia pa'mcha'tareternesha'pa' o' otoset:

—Añmapa' ñeñt judionesha'. Nanac atsrre'mochtenet arr ya'netsro.

21 Ñetpa' ye'chatenyet atet ye'chenet ñet ñeñt'pa' ama pocteye' yenteñe ya. Yapa' romo'marneshaypa' ama cohuen yenteñe o'ch atet ye'pa.

22 Allohuen acheñenesha'pa' nanac atsrre'mateñet. Ñeñtña guardia pa'mcha'tareternesha'pa' atet otan pueyochresha':

—Te'pa' o'ch serrotanetpa' o'ch senallanet.

23 Allempoñapa' o' nallet Pablo ñaña Silas nanac huomenc. Allempoña o' anallaretetuetpa' o' abe'tarettet ñaña cárcelo; atet ochet ñeñt cohuañpene' cárcel:

—O'ch secuañpsanet e'ñe huomenc.

24 Allempoña atet otaretetuetpa' añña ñeñt cohuañpene' cárcelpa' o' abe'tanet nanac o'pono. Allñapa' nanac echarr pañpsanet ñaña o' arrmatañpsarettet pa'tcot tablat e'ñe echarr.

25-26 Atteñapa' o' ma'yocha Pablo ñaña Silas. Ñaña o' morrechet, puemorrecheño'tetpa' nanac aye'chochtateññañet Yompor. Añña po'poñechno acheñ ñeñt abe'taret ñaña allpa' ñetñapa' o' e'mñotanet. Allempoña chap rroch tsappa' machayotepa'tcha' pella pats nanac huomenc, ama't allo' tomatenet echarr cárcelepopa' cha pa'shma huomenc. Puepelleño' pats huomencpa' o' torna'tua ora allpon all

ayottam̄psarettenet. Ñaña ora allpon allo huanquëñet
acheñpa' o' pueyna'tuen.

²⁷ Allempoña ahuo't e'mansa ñeñt cohuan̄pene'
cárcelepopa' ahuo't entan o' torna'tuen allo ayot-
tam̄psarettenetpa' o' chetan po'cchell o'ch muetsa ñañeña.
Ñapa' cho' otapañ ñeñt ayottam̄psaretpa' o'te' yetuena.

²⁸ Añña Pablopa' o' chore'ch huomencpa' atet och:

—Amach erroť peťatsto ama't mamesha. Yapa'
allo'tsa'yenya allohueny.

²⁹ Allempoñapa' ñña enamnom lampareñpa' mata allo'tsen
Pablo ñaña Silas. Puen̄chañoťpa' cha pa'shmuena ñaña e'ñe
puen̄cha'na'teñoťpa' o' concorposa e'ñe ñesheto.

³⁰ O' cha'nma'cha'tatanetpa' atet otanet:

—Nomporneshacha' ¿este'ña pocte' te' ñeñtcha' atet neťa
attoch nequeshperra ñaña?

³¹ Ñetñapa' atet ochet:

—Añ pocte' o'ch pame'ñera Yepartseshar Jesucristo, al-
lochñapa' attoch pequeshperra. Ñaña attoch queshperra ñeñt
parro peychena pepaclo.

³² Allempoña ñeñt cohuan̄pene' cárcelepopa' o'
a'secherranet pa'paclo, allñapa' serrpare'tachet Yompor
po'ñon, ñaña allohuen ñeñt pa'paclo'tsen o' e'mñotet ñamet.

³³ Allempocma ñeñte tsaprocma o' e'pana'tyerranet all at-
serrparettet. Allempoñapa' o' apatareťta ña, ñaña allohuen
ñeñt pa'paclo'tsa'yenpa'cho'ña o' apatareťtet ñamet.

³⁴ A'tapatanet pa'paclopa' rratanet. Pame'ñeñoť Yompor
atarr nanac cosha. Ñaña allohuen ñeñt pa'paclo'tsenpa'
atarr coshet ñamet.

³⁵ Tsapať puetarenpa' añña guardia pa'm̄cha'tareťernesha'
o' mueñet puesheñarr guardia, ñeñtcha' otosets:

—O'ch sa'rroyer Pablo ñaña Silas.

³⁶ Ñeñt cohuan̄pene' cárcelpa' atet otan Pablo:

—Oten añcha'tareť secha'nerrepa'to'. Te'ñapa' orrerres,
Yompor'e'pach sa'nataya.

³⁷ Tarraña Pabloñapa' atet otanet:

—Yapa' romanona'tarey yaña. Ñeñt ñoñets anaret
Romotpa' oten ama pocteyaye o'ch yecoñchach acheñ ñerra'm
ama yeñoteña' po'ño'chte' eñall atto otteñe'cheñet acheñ.
Tarraña añña añcha'tareťnesha' ama e'nano ñeñt e'ñe
po'ño'ch atet yepena. Atta nallatyet allo'tsa'yen shonte'
acheñenesha' allotñapa' o'cho' atta yottam̄psatyet arr cárcelo.
Te'ña ñetpa' mueneñet o'ch cha'nmaterryet e'ñe a'nahua.
Ñeñtpa' ama pocteyaye atet. Te'pa' o'ch sotuer añcha'tareť
huapuetepa' arr cha'nmaterryetepa' e'ñe ñet.

38 Añña guardiapa' otuerran pa'mñcha'tarefernesha' atef oten Pablo. Ñetñapa' čha yorenet allempo e'mare'chet ñetpa'čho'ña romanona'taret ñamet.

39 Allempoña huačha'tetpa' enamaretterret peretneñets. Allempoña čha'nmatenanetpa' atef otanet:

—Te'pa' orrerres, sahanerra bačhayo.

40 Allempoña čha'nenet cárcelotpa' ahuanerret o'ch alla abchereta' Lidia. Allempoñapa' serrpare'tuerret parro ñeñt ame'ñetsa, cotape'chatuanerret cohuen, allempoñapa' ahuanerret allot.

17

Allempo čhap Pablo ñaña Silas Tesalónico

1 Allempoña ahuanerret allotpa' ahuanmuet anetso Anfípoliso, allotñapa' ahuanmuet ñaña anetso Apolonio. Allotñapa' o' čhapuet ñaña anetso ñeñt pa'so'cheñ Tesalónica. Allñapa' allo'tsen judionesha' po'prahua'.

2 Pabloñapa' o' be'tosos ñeñt attecma pena. Allñapa' serrpare'tatosanet Yompor po'ñoñ. Allñapa' ma'panerr semana. Allempoña čhen yet allempo amesenetpa' o'chčho' serrpare'tatanet Yompor po'ñoñ ñeñt atef aquellcaret.

3 Allpa' añ yečhatanet atef anare'tta ñeñtča' Cristotats ñerra'm esempoch huapa añ patsropa' nanaccha' muerochtachet. Tarraña o'ch muerochtatuetpa' elloch alla tanterra ama'tcha' rroma. Atef otanet:

—Te'ñapa' o'ch notas, añ Jesús ñeñtara ñeñt o' neserrpare'tatuaspa' ñeñtña Cristotets.

4 Puesheña'tetspa' pocte' eñchet o' ame'nyet Jesús ñeñto'mar ñetpa' yemteñet Pablo ñaña Silas. Ñaña shonte' griegonesha' ñeñt ahuatoteñ cohuen cotape'čets Partsocoppa' o' ame'ñeñet Jesús. Ñaña shonte' coyaneshachno ñeñt e'ñe cohuen entyen acheñenesha' ñetpa'čho'ña o' ame'ñerret ñamet.

5 Judionesha'ña ñeñt ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñto'marña puesope'cheño'tetpa' o' e'moñe'chet. Ñeñto'marña a'sechet puesheña'tets acheñ ñeñt ama tama es sherbetso ñeñt atta ellapetset anorrets all shontena acheñenesha'. A'sechet o'ch apčhachet shonte' acheñ attoch e'moñe'tachet Pablo. Ñetña pa'tsrre'mueño'tetpa' ahuanmuet Jasón pa'paclo all a'posa Pablo ñaña Silas. O'pachet errotentopa' o'te' čha'nmačha'tet a'yot attoch acheñenesha'pa' o'ch rromuet.

6 Allempoña čhačha'tet Jasón pa'paclopa' tarraña ama entaretteto. Ñapña rromuet Jasón ñaña

po'poñečno acheñenesha' ñeñt ame'ñetsa. Ñetaña anmarettatset añcha'taretsho. Pa'tsrre'mueño'tetpa' nanac ama'to'chetnomuet attota'cho' chapuet allo'tsen añcha'taretshesha'. Allña'pa' atet otoset:

—O' chap acheñ ñeñt muenene' o'ch a'po'poñeterrnay yocta'ña. Atto' pohuanmuet ama't po'poñ anetso'mar, te'pa' o' chapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet.

⁷ Ñetpa' ama pocteye' enteñeto atto añcha'taret o'ch nan ñoñets all anetso Romo. Ñetpa' ñaña otenet eñallo' po'poñ añcha'taret ñeñt nanac ahuamencat ñeñt'pa' año' pa'so'cheñ Jesús.

⁸ Acheñenesha'ñapa' ñeñta e'muetpa' nanac atsrre'muet ñaña ama't añcha'taretshesha'.

⁹ Allempoña Jasón ñaña po'poñečno acheñpa' o' ay-oram'psaretet allpon po'çllayoret. Allotpa' otaretet:

—Añ quellepa' allach yapuerres ato't ahuerra' Pablo ñaña Silas.

Allempoñapa' a'rroyeret Jasón ñaña po'poñečno acheñ.

Allempo chap Pablo ñaña Silas anetso Bereo

¹⁰ Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñare'ttenet a'nahua. O' chapuet Bereopa' be'tos'cha'toset judionesha' po'prahuo.

¹¹ Añña judionesha' ñeñt Bereo'tsa'yenpa' ñetñapa' e'ñe cohuen cotape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aque'llcare't ahuatoteñ. Tarro'mar ñetpa' mueneñet o'ch eñochet ñato' po'ño'chte' atet serrpare'ten Pablo ñaña Silas. Pate'tets yetpa' attecma pete't.

¹² Ñeñto'marña shonte' acheñenesha' ñeñt ame'ñatsa. Shonte' ñaña coyanesha'čno ñeñt griegonesha' ñeñt nanac sherbetspa' o' ame'ñenet ñamet. Ñaña po'potantañ shonte' yacmanesha' o' ame'ñenet.

¹³ Añña judionesha' ñeñt ye'chetsa Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña hua'cha'tet ñamet all attoch atsrre'matachet acheñenesha' o'ch e'moñe'tachet Pablo.

¹⁴ Añña acheñenesha' ñeñt o' ame'ñapa' o' mueñet Pablo tepa'to' ontapo allo'tsen sa'p atarr. Añña Silas ñaña Timo'teopa' alla a'pa Bereo.

15 Puesheña'tets acheñpa' o' coťa'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo chap Pablo ñaña Silas Atenso

16 Pabloñapa' alla cohuanet Atenso. Allña cohuanetpa' shonte' entosan ayečcataretečno all Atenso, ñeñt po'yomporer pa'yen acheñenesha'. Ñaña' nanac llecachet.

17 Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñečno acheñ ñeñt cohuen cotape'chets Partsocop. Pate'tets yetpa' o'chcho' ahuo' all shontena acheñenesha' pueblo allña'pa' o'chcho' serrpare'tet parro ñeñt allo'tsa'yen.

18 Parrochpa' aña huapatsa ñeñt ame'ñenaya Epicuro pocta'ña, allotpa' o' huapa ñaña ñeñt ame'ñenaya po'poñ cotapñats ñeñt otenet estoico. Ñetñapa' atet otet:

—¿Este'ca'ye cotape'chenña añ acheñ ñeñt atta nanac eñets? Po'potantañña'pa' atet otet:

—Ñato' añte' muenen o'ch yečhatey po'poñ po'yomporer ñeñt ama yentare ya.

Tarro'mar Pablo'pa' añ serrpare'tatenanet atet pena Jesús ñaña ama't atto tanterra Jesús.

19 Ñetñapa' o' anmet Pablo all oteñet Areópago allecma apčhena eñotañnesha'. Allña'pa' otoset:

—Ñehua, te'pa' o'ch pōtey este'ña pōctape'chen pa. Yapa' te'pa' yemneñ o'ch yeñoch.

20 Tarro'mar ñeñt peserrpare'tenpa' ama ye'mare. Yapa' yemneñ o'ch yeñoch este' nanac pōten.

21 Ñehua, allohuen atenso'marnesha' ñerra'm añ serrpare'tats ñeñt ama puentaretopa' ellapenetcha' e'mñotet. Ñeñtach paterr ma'yočhret. Ñaña ñeñt yeča'huerra Atensopa' ñeñt huapyetsa po'poñ anetsotpa' te'pa' atta penet ñamet.

22 Allempoña Pablo'pa' tomos rrocho all oteñet Areópagopa' atet otanet:

—Atenso'marneshacha' napa' neñotenes sapa' aña atarr sema'yočhrena ñeñt seyomporer sepa'yen.

23 All nasuanempa' shonte' nentyesnom ñeñt sema'yočhyena ñeñt seyomporer sepen. Paterr allecma sema'yochenapa' napa' nent all oten añ ñoñets: “Añpa' añecop Yompor ñeñt ama yeñotena'.” Ñeñt sema'yochena ñeñt ama señotena'pa' ñeñtara Yompor te'pa' ñeñtcha'ña neserrpare'tatas.

24 'Añ ñeñtara Yompor ñeñt yečcate' añ pats. Ñaña yečcatan allohuen ñeñt yentyen añe patsro. Ña Pamo'mte' pen enet ñaña pats. Ñeñto'marña ya ñeñtey arromñaŕeypa' ama pallteno o'ch yeyečcatoñ allcha' yeča.

25 Ñaña ama pallteno o'ch es yaŕ. Ñocop ama es palltetso. Elloña ñaña yapuene' allohueney atto yocrrena, apueneŕ ñaña atto yo'rrenna. Ñapa' apueneŕ ora esocmañen.

26 'Ora allpon pa'namen acheñ ñeñt yeča'yetsa añe patsro Yomporpa' ña yečcatue' e'ñe puesheñarrofa acheñ. Ñapa' o' nohuanet e'ñech allempohua corra'yeset. Ñaña o' na'yesuanet e'ñech erra yeča'yeset añe patsro.

27 Tarro'mar Yomporpa' yečcatan pa'namen acheñ tarro'mar añ cotape'ch allochñapa' allohuen acheñpa' ñerra'm e'ñe acopa e'neretpa' po'ñočpa' enteretcha'. Ñapa' allame'ttso'tsenate' yeshot.

28 Tarro'mar e'ñe ñeshoť te'pa' yocrrena ñaña e'ñe ñeshoťpa' yečope'chen, ñaña e'ñe ñeshoťpa' ye'ñalleta. Ama't atet quellquět ahuat puesheñarr samo'ts sa ñeñt etsotayeť ñoñets. Añmapa' ñeñt quellquět samo'ts ahuat: "Te'ña po'ñoč Yomporpa' puechemerasha' peney."

29 Alla oterrerr Pablo:

—Ñehua, ñerra'm po'ñoč Yompor puechemerasha' peney ya, ama pocteyaye o'ch yoch Yomporpa' arroť ayečcataret orot, amapa' arroť ayečcataret asretot, amapa' arroť ayečcataret mapyot. Añmapa' ñeñt ayečcataretpa' e'ñe ya yoctaññoťa ayečcataret, atet es yetma'ntatena ya.

30 Ahuat acheñpa' ama't ama eñotenano ñeñt cohuentetsa Yomporecop, Yomporpa' amach erroť ñaneto. Tarraña te'ñapa' oteney yoctape'cherrepa' ello cohuen Yomporecop, allohueney acheñey ñeñtey corra'yetsa añe patsro.

31 Yomporpa' tarro'mar mueneñ o'ch yoctape'cherr etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acerre' allohuen acheñ ñeñt e'ñe po'ñoč atet peteť. Acrancha' ñeñt cohuen acheñ ñaña ama't ñeñt ama cohueno acheñ. Ñeñto'marña te'pa' o' eñotatuay Jesús pa' ñach acrerrets tarro'mar Pomporpa' o' tantater ama't o' rromua ñaña Jesús pa' e'ñe pocte' es pen. Te'pa' o' eñotatuay allohueney acheñey.

32 Allempoña serrpare'tan Pablo attoch yetanterra ellopa' añña puesheña'tets acheñpa' o' achmāre'chet. Tarraña po'potantañña' atet otet:

—Ñehua, ñato' esempochña ye'mñoterrperr po'pocheño.

33 Allempoñapa' ahuer Pablo.

³⁴ Tarraña puesheña'tetspa'yemchet Pablo ñaña o'ame'ñet. Añña puesheñarr ñeñt' ame'ñatsa añ pa'so'cheñ Dionisio ñeñtara ñeñt' añcha'tarettetsa ñeñt' a'pocstatene' ñoñets all oteñet Areópago. Ñapa' o' ame'ña, ñaña po'psheñeñ coyanesha' ñeñt' pa'so'cheñ Dámaris. Ñaña po'poñechno acheñ o' ame'ñet ñamet.

18

Allempo chap Pablo Corinto

¹ Allempo ahuo' ñaña anetso all oteñet Corinto.

² Chap Corintopa' entosan puesheñarr judionesha' añ pa'so'cheñ Aquila. Ñapa' errte' huetsa Italiot epuet puetapor ñeñt' pa'so'cheñ Priscila. Año'mar huenet Italiot tarro'mar añcha'tareñ Claudiopa' o' nan paterr ñoñets all Italio. Ñeñtpa' atet ot: Allohuen judionesha'pa' ahuanerretepa'to' Romot. Aquilapa' arr eñalletña Ponto. Pabloñapa' ahuo' o'ch ente-nana' Aquila epuet puetapor.

³ Ñetpa' ñeñña po'taruas penet atto yeñcatenet shetamt-sopo'. Pabloñapa' alla a'pa epuet attoch taruaset parro.

⁴ Pate'tets semana allempo chen yet allempo amesenet Pabloñapa' o'chcho' ahuo' judionesha' po'prahuo. Allñapa' allcha' serrpare't epuet judionesha' ñaña ñeñt' ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedonioñ. Allempopa' añ nanac torrena Pablo serrpare'te'. Ñapa' añ eñotatenan judionesha' Jesúsapa' ñeñtaraca'ye Cristoterrets ñeñt' atarr cohuenet ahuañoteñ.

⁶ Judionesha'ñapa' nanac e'moñe'chet Pablo, o' achñare'chet. Allempoña Pablopa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñt' ama judioneshayaye.

⁷ Allempoñapa' ahuer. Chap añ ñeñt' pa'so'cheñ Justo pa'paclo ñeñt' ame'ñenaya Yompor. Pa'paquëllpa' allame'ttso'tsen allo'tsen judionesha' po'prahua'.

⁸ Ñeñt' añcha'tarettetsa judionesha' po'prahuo ñeñtpa' añ pa'so'cheñ Crispo. Crispopa' o' ame'ñerrana Yepartse-shar Cristo ñaña allohuen ñeñt' pa'paclo'tsen. Shonte' corinto'marnesha' e'mñotoñet Yompor po'ñoñ, o' ame'ñerret ñaña o' apatarettet Yomporecop.

⁹ Atteñapa' orrtoña Pablo atet ñerra'm cho es yeñhopo'ten. Yomporpa' ahuo't otan Pablo:

—Amach pem̄cha'tatsto, čhocmach peserrpare't, amach at̄ta pemam̄tetatsto.

¹⁰ Napa' o'ch necuan̄peneṣ at̄toch amach esesha' erroṣ es peṣaye. Tarro'mar napa' nechen shonte' acheñ añ anetsroṣ ñeñt̄cha' name'ñaya.

¹¹ Allñapa' allena alla paterr char ñaña meterrerr pechap̄ña arrorr. Allpa' nanac yečhatanet Yompor po'ñoñ.

¹² Allempoña am̄cha'taretta Galión e'ñe alla Acayopa' judionesha'ña o' apčhetpa', o'pachet Pablo. Allempoña o' rromuetpa' anmet am̄cha'taretsho allecma a'poc̄tatenet ñoñets.

¹³ Chapuet allpa' atet otoset:

—Añ acheñpa' ñaña yečhatenan acheñenesha' at̄to'ch ame'ñyet Yompor, tarraña ñeñt̄pa' ama at̄teyaye atet oteney Moisés po'ñoñ ñeñt̄ atet anaret̄.

¹⁴ Ahuo'ch eñoseñ Pablopa' Galiónñapa' atet otanet:

—O'ch notas ñeñtes judioneshas, ñerra'm añ acheñ añte' o' p̄ohua ñeñt̄ ama cohuenopa' amapa' atet ñerra'm čho muetsenan acheñ, ñehua, pocte' napa' o'ch ne'm̄ñotas at̄to sotteñe'cheñ.

¹⁵ Tarraña ñerra'm amate' at̄teyaye, ñapa' e'ñe socpa— atet seyčhaten sa ñeñtes judioneshas, amapa' esesha'te' same'ñena, amapa' ñeñt̄ atet oten ñoñets ñeñt̄ atet anaret̄ socop. Ñeñto'marña napa' notenes ñeñt̄pa' socpa. Ñeñto'marña napa' amach neñoso añecop ñeñt̄ e'ñe socpa.

¹⁶ Allempoñapa' o' čha'nmača'taterranet.

¹⁷ Allempoña acheñenesha' ñaña rromuet Sóstenes. Sóstenespa' ñeñt̄ am̄cha'taret̄tetsa judionesha' po'prahuo. O' rromuetpa' o' nalle'chet e'ñe alla allame'tets am̄cha'taretsho. Am̄cha'taret̄ Galiónpa' ama cohua'ṣsaneto.

Allempo čherrerr Pablo Antioquíu

¹⁸ O' atomaterrerr Pablo alla Corinto allempoñapa' o' so'tnerran ñeñt̄ ame'ñetsa. Ñaña coterre' Priscila ñaña Aquila. Alloṣpa' año ahuan̄ṣset boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata at̄toch eñochet o' etsotuan po'ñoñ ña ñeñt̄ atet otan ahuaña Yompor ñeñt̄cha' atet ṣa Yomporcop.

¹⁹ Allempoña čhapuet Efesopa' allñapa' o' sa'nerran Aquila ñaña Priscila. Ñañaapa' o' ahuo' judionesha' po'prahuo allcha' serrpare'tet parro judionesha'.

²⁰ Allñapa' otare'chet Pablo a'puepa'to' alla atomat, tarraña Pablopa' amo' mueno.

²¹ Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt̄ anaret̄ Partsocop allempoch

alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuam̃perrerr boto.

²² Allempoñapa' arr etsotam̃psosa Cesareo. Cesareoñapa' asuanom Jerusaléño allcha' abechnoman ñeñt ame'ñetsa all. Allempoñapa' o' alla ahuerr Antioquíu.

Allempo poma'pocheño ahuerrerr Pablo serrpare'tats allemeñ anetso'mar

²³ Antioquíopa' alla allponmatnerr, alloñapa' o' ahuerrerr. Arr asuanerr Galacio'mar allotpa' ahuerr Frigio'mar. Ñeñt ame'ña'yetsa allpa' o' yenpanet attoch huomenc perret pueyoçher.

Allempo Apolos atarr cohuen serrpare'tatosanet all anetso Efeso

²⁴ Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandriot. Ñaña'pa' o' çhap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcaret ahuatoteñ.

²⁵ Ñapa' ayçhataret ñeñt atetcha' perra Yepartseshar ñeñtara ñeñt Cristotats. Ñapa' e'ne po'ñoçh serrpare't huomenc, yeçhatanet ñeñtcha' atet perra Jesús. Añaña ama e'ne eñotueno ora atet pena Jesús. Aña eñoten atet yeçhate't Juanañ ñaña atet apate't Juanañ.

²⁶ Ñapa' serrpare'te't huomenc judionesha' po'prahuo. Allempoña e'm̃ Priscila ñaña Aquila, ñetñapa' anmet ellonet allcha' eñotachet e'ne ora ñeñt atet pa Yompor ñeññaña palltena o'ch eñoch e'ne poctacma.

²⁷ Allempoñapa' secha Apolos Acayo. Añaña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ne cohuen. Allempoña o' çhap all Acayopa' nanac yenpan ñeñt ame'ñenaya cohuen ñoñets all.

²⁸ O' eñotatanet po'ñoçh Jesús'pa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñoñ ñeñt aquellcaret ahuatoteñ o' gatyesanet atto Jesús o' etsotatuan ñeñt aquellcaret ahuatoteñ. Ñeñt allo'tsa'yen allohuen acheñpa' e'ne po'huamencocma yeçhatanet. Allempoña ama't puesheñarra judionesha'pa' ama erro't otenaye' enteto.

19

Allempo çherrerr Pablo Efeso

¹ Allempo Corinto'tsenmeñ Apolos, Pabloñapa' alla chopeñe'chen aspentarero. Atteñapa' o' alla çherr Efeso.

Allña'pa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ.

² Pabloña'pa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetña'pa' o' anapuet:

—Yapa' ama ye'mareña ñato' eñall'e' Parets Puecamquëñ.

³ Pabloña'pa' alla oterrerr:

—¿Erroñeno'te'tña sapataretta?

Ñetña'pa' atet otet:

—Yapa' yame'ñeño't atet otye't Juanañ attoña yapataretta.

⁴ Pabloña'pa' alla oterrerr:

—Añoña apaten Juanañ atto o' cotape'cherret ello cohuen Yomporecop alloña'pa' o'ch apatarettet attoch ame'ñeret ñeñtcha' huapatsa chenta'. Añoña ñeñt huapatsa chenta'pa' añepa't Jesús.

⁵ E'muet atetpa' apataretterret pame'ñeño'tet Yepartseshar Jesús.

⁶ Allempoña Pablopa' o' a'p'llanet potot. Allempoña'pa' ahuepa't chorraret Parets Puecamquëñ. Allempoña'pa' o' eñosyeset po'poñ ñoñtso, o' a'potoñet atto eñorana'tanet Yompor.

⁷ Ñeñt eñosyesets po'poñ ñoñtsopa' allo'tsen ñato' charrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'ch'cho' be'tosos judionesha' po'prahuo o'ch'cho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'ch'cho' ye'chatanet allochña'pa' o'ch ame'ñatanet. Atteña'pa' o' ma'pña arorr.

⁹ Tarraña puecheña'tets acheña'pa' nanac atpare'chete't ama ame'nyeto atet serrpare'tatanet Pablo. Patpare'teño'tetpa' ama't all shontena acheñenesha'pa' o' sasare'toñet Jesús poctapña. Allempoña'pa' ahuer Pablo. Ñeñtña ame'ñetsapa' o' coteret. O' ahuanmuet allo'tsen Tiranno pue'scuela. Allña'pa' pate'tets yetpa' añoña Pablopa' o'ch'cho' serrpare'tatanet pue'scuelpahuo.

¹⁰ Atteña'pa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye.

¹¹ Yomporpa' nanac ahuamenca't pan Pablo. Ñeño't-marña nanac orrtatanet Yompor po'partsoña ñeñt ama puentareto.

¹² Atteña'pa' añoña acheñenesha'pa' o'ch'cho' anerret ñeñt es a'p'lla'yen Pablo, atet ñerra'm es pañell amapa' pañoshe'm.

O'chcho' anmet allo'tsen ñeñt atсна'tets. O'ch chapachet allpa' o'chcho' correrraña atснаñeñ. Ama't po'neñeferetpa' o'chcho' quechpa'nerranet.

13-14 E'ñe allempopa' allo'tsen puesheña'tets judionesha' ñeñt achyo'tañnesha' ñeñt chocma chopeñe'chets erracmañen. Ñehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac añcha'taret añ pa'so'cheñ Esceva. Allo'tsen cancherrsheña puechemerasha'. Ñetpa'cho'ña o' topachet ahuo'ch quechpatachet ñamet acheñenesha' po'neñefer e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñeñpa' otoñet po'neñefer:

—Napa' o'ch notaḡ, e'ñe pa'so'chño Jesús ñeñt serrpare'ten Pablo o'ch pequechpa'ner añ acheñer.

15 Allempoña atet ochet oneñeñpa' ahuepa'tcha' eñoraña, oneñeñpa' atet ot:

—Jesús pa' neñoteññañ po'huamenc, Pablo pa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

16 Allempoña acheñ ñeñt chorrena oneñeñpa' omachana'tanet, orrotet parro epuet achyo'tañnesha'. Oneñeñpa' nanac atserrḡatse'tanet allohuenet. Muelle'mcot atserrḡatse'tuanet o' matrra'tuet pocollot.

17 Añña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt ama judioneshayaye. Atarr yore'tanet. Allempoñapa' añcha'na'tpo' enteñet Yepartseshar Jesús.

18 Shonte' acheñ ñeñt ame'ñetset allempoñapa' huapyeset, o' a'meña'yesoset atto achyo'tyeseteḡ.

19 Patantarrpa' o' huapatyeset po'libro ñeñt allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch charra' mil poçllayoret. Ñeñt allpon tsa'tena allohuen libro.

20 Ñeñto'marña atarr añcha'na'tpo' entoñet Yompor po'ñoñ. Atarr ame'ñet.

21 Allempoña e'ñe Yompor Puecamquëñotpa' o' secherrerr Pablo o'ch ahuererr Macedonio ñaña Acayo, allotña o'ch asuanerrpa' o'ch ahuer ñaña Jerusaléño. Allotña pa' atet ot Pablo:

—Te'pa' aña palltetsa o'ch ahuen ñaña Romo.

22 O' mueñan epsheña acheñ ñeñt yenpuene' ñeñtcha' ñanom tatsa Macedonio. Añña ñeñt epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

23 Allempopa' o' atsrre'ma puesheña'tets acheñ. Añ atsrre'matahuet atto' pena ñeñt ame'ñetsa.

24 Allo'tsen puesheñarr añ pa'so'cheñ Demetrio ñeñt ñanom e'moñe'te' ñeñt ame'ñetsa. Ñapa' añ po'taruas pen o'ch yeçcatyesan pocollatollesha' añ toma'ntatena pocoll ñeñt allecma muechatse'tenet ñeñt po'yachorer penet ñeñt otenet yachor Diana. Añ pocollatollesha'pa' arroto' ayeçcataretta asertalloť. Shonte' acheñ ñeñtara po'taruas penet, Demetrio ña apahuete't po'taruas atet. Shonte' quelle ganete't po'taruasot.

25 Atteñapa' Demetriopa' o' apçhatuan allohuen pa'taruasañer ñaña po'psheññeçhno, ñetpa'cho'ña ñeñtara po'taruas penet. Apçhatuanetpa' atet otanet:

—Masheñeshacha' sapa' señoñeñ añ yetaruas ñeñtapa' alloch yegana shonte' quelle.

26 Te'pa' señoñeñ ñaña añ ñeñt otenet Pablopa' ahuo't otuan acheñenesha' añ ñeñt yeyoser ñeñt yeyeçcaten yapa' ñapa' oten amo' Partsoyaye. Ñapa' o' coťape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt yapuenanet ñeñtcha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora errařaren Asio'mar.

27 Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñtapa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt puerahuo'tsen. Ñato' allempopa' ama't yachor Dianapa' o'huañcha' añcha'na'tpo' eñchet, ama't ñaña ora allohuen asio'marnesha' ñeñt po'yachorer pene'.

28 Ñeñta e'm allohuen acheñenesha'pa' nanac atsrre'matanet. Pa'tsrre'mueñoťetpa' o' rranare'tyeset, alla oterrete't:

—¡Paretsña'cho' yachor Diana!

29 Shonte' acheñ nanac ama'toçhtenet allohuenet. O' rromuet Gayo ñaña Aristarco ñeñt macedonio'marnesha' ñeñt parro chopeñe'chen Pablo. O' matrra'tet allo'tsen pocoll atarppo' allecma apçhena acheñenesha'.

30 Pabloñapa' mueneñeñ o'ch be'tos ñaña all ama'toçhtenetpa' tarraña añña ñeñt ame'ñetsapa' ama muenacheto.

31 Ñaña puesheña'tets ñeñt añcha'tareťtetsa all Asio ñeñt muerenaya Pablopa' o' mueñoñet ñoñets attoch amach tatsto all apçhenet te't muetseñet.

³² Allña apchenetpa' atfa rranare'tyenet. Puesheña'tetspa' atet otyeset atet cotape'chyenet ñet, po'potantañña' atet otyeset po'poñ ñeññ atet cotape'chyenet ñamet. Allohuenet ama't ama eñotueñeto esocopte'ña apchenet, tarraña atfaña nanac ama'toçhtenet.

³³ Puesheña'tets judionesha' o' cheta'nmet Alejandro o' huapachet attoch eñosachet. Ñaña' o' echantosán pot attoch o'ch muetsoñeñtet añecop attoch o'ch a'pocatan ñoñets judioneshacop.

³⁴ Tarraña allempo acheñenesha' ñeññ ama judioneshayaye o' eñchet Alejandro ñapa' judionesha' ñetña'p' alla rranare'terret. Atarr tematen rrannartenet. O'chcho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

³⁵ Allempoñapa' puesheñarr añcha'taret ñeññ taruasetsets gobiernocoppa' o' emma'huanet, atet otanet:

—Masheñeshacha', o'ch notas ñeñtes yeçhetsa arr Efeso. Ama't allohuen acheñenesha' errañaren e'ñe eñotueñet efeso'marneshaypa' yapa' ñeñtey cohuanmpene' yachor Diana ñeññ puerahuo'tsen, ñeññara yachor Diana ñeññ nanac Parets, ñeññ sohuatsa entot.

³⁶ Ñeññpa' yeñotueñ allohueney acheñey. Amate' errotenot yoto ama atteyaye. Ñeñño'marña e'ñe pocte' o'ch semtsoñeña. Amachña cha sama'toçhtatsto.

³⁷ O' alla oterraneterr añcha'taret, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuot ñaña ama achmãare'teñeto yachor.

³⁸ Ñeñño'marña te'pa' o'ch notas, ñerra'm mueneñ Demetrio ñaña pa'taruasañreçhno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atoraret allcha' a'pocatatet ñoñets. Ñeññcha' a'pocotate' ñoñetspa' allo'tsena.

³⁹ Tarraña ñerra'm este' semnen o'ch sa'pocatat po'poñpa' ñeññpa' añ pocte' o'ch sa'pocatach allecma apçhena ñeññ nanac añcha'tareteçhno.

⁴⁰ Ñato' temanta'yet ya tarro'mar yapa' e'ñe attota yama'toçhtena.

⁴¹ Ñeñña otuanetpa' o' mueñhuerranet. Allempoñapa' ahuanomhuerret.

20

Allempo çherrerr Pablo alla Macedonio

¹ Allempoña o' muetsoñeñtuerret Pabloña' agotatuan ñeññ ame'ñetsa. O' cotape'chatnenanet e'ñe cohuen. Allempoña

e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio.

²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' çherr Grecio ñeñtara all oteñet Acayo. Allpa' alla a'pohuerra ma'pñia arrorr. Autsaño' tamñsatsañ ñaña Sirio botopa' tarraña o' e'mare'ch allpa' cha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr).

⁴ Allempoña ahuer Macedoniopa' allpon acheñ o' coteret. Ñeñtpa' ñeñtara añechno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ cote're'.

⁵⁻⁶ Arr cha'cha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuañpsey botopa' pa'mnarmatñoñapa' o' ye'chap yaña Troaso. Allñapa' allo'tsa'yen ñeñt otatsa ahuaña. Allñapa' alla ya'posa cançherrmat.

Allempo Pablopa' emo'tnom anetso Troaso

⁷ Allempoña çhap allempo mo'tta'muena yeññats temenpa' yap'cha allohueney ñeñtey ame'ñetsa. Yeyerpueño' Yepartse-shar Jesús'pa' o' yerra' pan ñeñt ashota'tare' ñeñt atet anare't Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapa't.

Ñeñto'marña ama't o' rro'ch tsapuenpa' alla serrpare'tatenanet.

⁸ Allña yap'chena pocollo enopa' nanac a'yohuen ba't. Allpa' shonte' lampareñ ñeñt corra'yetsa.

⁹ Allñapa' allo'tsen puesheñarr huepuesha' añ pa'so'cheñ Eutico. Ñaña'pa' alla anen ventano't. Atto nanac serrpare'ten Pablopa' Euticoñapa' ahuo't alla ma' anatot. Ahuo't alla ma'pa' machayota shora'nom patso. Ma'pa' piso allo't shora'nom. Allempoña echantose'tpa' o' rroma.

¹⁰ Allempoña sohuerra ñaña Pablo. O' huapa o' mo'capa' a'chono'tos allempoñapa' otanet:

—Amach sellcatsto, Yomporpa' o'ch alla tantater.

* **20:5-6** Lucas ñeñt quellquë' añ ñoñets ñapa' cota'nman ñaña Pablo.

11-12 Añña huepuesha'ña ñeñt' o' shora'nemuapa' o' alla aneret e'ñe huomech. Allempoña allohuenetpa' atarrep'a'tcha' coshet. Allempoñapa' o' alla a'terr Pablo. Allñapa' o' rrallme'chet. O'ña rrallme'chuetpa' o'huañ tematen all serrpare'tatannenet. Atteñapa' o' puetarespenet. O'ña puetaresuenpa' o' ahuen Pablo.

Allempo ahuanerret Troasot arr cha'cha'tet anetso Mileto

13 Allempoña yapa' o' yahuanma o'ch yota o'ch yerrma' añecmuen noñt' ñeñt' otenet bote o'ch ahuañpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch chap Asóno. Alloñapa' o'ch a'tap ñaña boto, tarro'mar atet o' ya'pocstat epay Pablo ahuañacma.

14 Atteñapa' o' ye'chap Asóno. Allñapa' all yentanna'ta epay Pablo. Alloñapa' a'tap ñaña boto, alloñapa' ahuañpsey parro. Atteñapa' o' ye'chap Mitileneo.

15 Mitileneoñapa' o' alla ahuañperryerr boto. Tsapatñapa' a'yo'mara yoñem Quío. Alloñña tsapatenerpa' alla yetsotosa Samsó. Yen'terrerr Samsotpa' alla yamesuerrerr Trogilio. Alloñña tsapatenerpa' alla yetsotuerrerr Mileto.

16 Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch ye'chap tecma Jerusaléño añecop o'ch yen-tapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

17 Ñeñto'marña allempo Mileto'tseneypa' Pabloñapa' agotatan ñeñt' pompornesha' pen ñeñt' ame'ñetsa Efeso, onetepa' Mileto all o' ye'chap ya.

18 Allempoña o' hua'cha'tet Pabloñapa' o' serrpare'tatanet, atet otanet:

—Sapa' se'notenen atet o' ne'pohuanma sesho, ama't ahua'otoñ allempo ñanom ne'chap Asio all sey'chena.

19 Sapa' se'notenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt' e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuero'chteño'tpa' chocma netorrena Yomporecop.

20 Se'notenen ñaña napa' o' neserrpare'tatuas ora allohuen ñeñt' pocetsa socop. Ama es na'nasotam'psaso ama't coñe'ta. Napa' o' ney'chatuas allohuenes parro allempo sap'chena ñaña o' ney'chatyesnomues e'ñe sepaclo'mar.

21 O' neserrpare'tatuas añ pocte' o'ch soctape'cherr ello cohuen Yomporecop ñaña añ pocte' o'ch same'ñera Yepartseshar Jesucristo. Ñeñtpa' atet' o' notuas allohuenes ñeñtes judioneshas ñaña ama't ñeñtes griegoneshas.

22 Te'pa' o'ch ahuerren Jerusaléño, tarro'mar o' sechaterren Yompor Puecamquëñ. Tarraña o'ch ne'cherr Jerusaléñopa' ama neñoteña' ñeñtcha' allohuen nehuapoya all.

23 Aña neñoten o' eñotaten Parets Puecamquëñ ñeñtcha' atet' pa'net o'ch yottam'pesnetpa' o'ch muerochtatnet. Ora allpon anetso attec'mach pa'net.

24 Tarraña ama't atet'pa' napa' ama neñcha'teno. Ama'tcha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuoñ ora allohuen ñeñt atet' llesensa'n Yepartseshar Jesús. Ñeñt atet' llesensa'n Yepartseshar Jesús'pa' ñeñtpa' attoch neserrpare'tach acheñenesha' ñeñt cohuen ñoñets atto Yompor pomuereño'tpa' a'queshpaterreycha'.

25 O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno.

26 Ñeñto'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatam'psase'te tarro'mar napa' chocma neserrpare'tatase't attoch amach sechenquërrro.

27 O' neserrpare'tatuas ora allohuen atet' cotape'chateney Yompor. Ama es na' nasotam'psaso ama't coñe'ta.

28 Allempoñapa' alla oterraneterr ñeñt pompornesha' penet:

—Te'pa' seño'ta'tach. Te'pa' añ pocte' o'ch secuam'peñ cohuen allohuen ñeñt ame'ñenaya Yompor. Atet'cha' sepa atet' ñerra'm ñeñt cohuan'pene' po'carrneror. Sapa'cho'ña atet'cha' sepa saña o'ch secuam'peñ ñeñt ame'ñetsa. Ñeñtcha' setaruas sepa' atet' llesensenes Parets Puecamquëño't. Tarro'mar Yepartseshar Jesús'pa' o' rroma ñocpuet ñamet.

29 Napa' neñoteñ allempoch ama allo'tsennopa' o'ch huaponasa ñeñtcha' seshquë', ñapa' mueneñcha' o'ch a'psatas Yompor po'ñoñ. Atet'cha' huapuet atet' ñerra'm ma'yarrpa' ñerra'm huapapa' o'ch a'chencatuan allohuen carrnero.

30 Ama't e'ñe sagattsapa' orrtetcha' ñeñtcha' seshquë', ñeñt ama Yomporeyaye po'ñoñpa' ñeñtpa' serrpare'tatasetcha'. Tarro'mar ñetpa' mueneñtcha' o'ch ame'ñatuaset e'ñe ñet pocta'ña.

31 O' alla oterraneterr Pablo:

—Te'pa' seño'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't yeto, ama't ñaña tsapo. Ama't neya'chpeñsha' chocma noctape'chatase't.

32 'Te' Yomporpa' cohuanpsasepa'ch. Yomporepa'chña po'ñoñ seño'tate' pueuereña. Yomporepa'chña po'ñoñ sey'chate' attoch huomenc sepa' seyo'cher. Yomporepa'chña po'ñoñ sa'queshpaterre' atet ñerra'm ñeñt allohuen ñeñt pame'ñeño'tet o' a'cohuentatuare'tterret.

33 Ñaña napa' ama neye'chapreto po'psheñeñ po'çllayor, amapa' pa'shtam ama neye'chapreto.

34 Sapa' seño'tenen ñeñt allpon nepalltenapa' e'ñe notot netaruasa' atto nechen ñeñt nepallta'yena. Ñaña e'ñe na netaruaso'tpa' es napa'yeñ ñaña ñeñt noctene'.

35 E'ñe na netaruaso'tpa' chocma neñotatenes ñeñt poctetsa o'ch yetaruasa' attoch es yechyes alloch yeyenpue' ñaña po'psheñeñ ñeñt es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: "Nanac yocshena ñerra'm esempo es yapa'yeñ po'psheññe'chno, añña ama tama yocsheno ñerra'm esempo po'psheñeñpa' o'ch es apueney ya."

36 Ñeñña otuapa' o' concorpa o' ma'yochatnenanet.

37 Añña acheñenesha'pa' pomorrenteño'tet Pablopa' o' yahuanrrortet. A'chono'chetpa' o' tso'tsapa'chet.

38 Atarr llequët nanac. Atet o' otanet Pablo ñeñtña nanac llecatahuet tarro'mar ñapa' otanet "amach senterrno arr pat-sro." Allempoñapa' o' cota'neñet Pablo arrohua allo'tsen bote.

21

Allempo o'ch alla çherrerr Pablo Jerusaléño

1 Allempoña o' yesa'nenanetpa' o' ahuanperryerr boto. Allo'tñapa' pa'charra yepe'pa' o' ye'chap Coso. Tsapatñapa' arr ye'chap Rodaso. Allo'tñapa' arr yetsotosa Pátaro.

2 Pátaroñapa' o' yentos po'poñ bote ñeñtcha' tatsa Fenicio. Yañapa' o'cho' ya'tapos allo'tñapa' ahuanperryerr boto.

3 Allempoña yetanpena sa'popa' yentnom coñe't pats ñeñt pa'so'cheñ Chipre, e'ñe arro't yentnom ye'chco'terot. Atteñapa' o'cho' yemtanpes boto, arr yesechena Sirio. Allempoñapa' arr yetsotosa all oteñet Tiro, tarro'mar allpa' o'ch a'suatatsre'tet botot.

4 Yañapa' o' yesua attoch yentnom ñeñt ame'ñetsa all. Allñapa' alla ya'posa cançherrmat. Ñeñtña ame'ñetsa allpa', ñetñapa' ochet Pablo:

—Amach petatsto Jerusaléño.

Tarro'mar Parets Puecamquëñpa' ahuo't eñotatanet atetcha' pet Pablo all Jerusaléno.

⁵ Tarraña allempoña o' met cancherrmatpa' o' alla yahuanerrerr. Allempoña allohuen yacmanesha'pa' cota'nemyet puebloŧ a'yeneŧ, ñaña puetaporeshohuenet ñaña puechemerneshet. Allñapa' all yeconcorposa ontapopa' o' yema'yochosa all.

⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetñapa' o' ahuanerret pa'paclo.

⁷ Allempoña o' yener Tiroŧpa' arr yetsotuenerr Tolemaido. Allñapa' all yehuoñcha'tnom ñeñt ame'ñetsa. Allñapa' all yepatrranom yeŧ.

⁸ Tsapañña o' yahuanenerr, allempoñapa' arr yeŧhap Cesareo. Allñapa' o' yebe'tosos Felipe pa'paclo, allpa' allcha' yommosa. Añ Felipepa' ñeñt serrpare'tene' cohuen ñoñets. Ñaña ñeñtara Felipe ñeñt net ahuaña ñach epatyeshahuet rreñets epuet po'psheññechno pechapsheña.

⁹ Añ ñeñtara Felipepa' echenan pa'tatssheña po'sñesha'. Ñetpa' ama arrollareŧeto. Ñetñapa' nanac a'poteññañet ñamet Yompor po'ñoñ.

¹⁰ Allempoña ya'llponmotos allpa' o' huapa ñeñt a'mtene' Yompor po'ñoñ añ pa'so'cheñ Agabo. Ñapa' Judeoŧ huapa.

¹¹ Allempo huapapa' o' pueyosan Pablo po'chanar. Añña chanaretspa' Agabo ñañaña huancatatsa e'ñe potot ñaña pa'tcoŧ. O' huanca'huapa' atet otan Pablo:

—Ñeñtapa' atet oten Parets Puecamquëñ, ñeñteŧ echene' añ chanaretspa' judionesha' ñeñt Jerusaléno'tsa'yenpa' atetcha' huancapet atet nehuanca te' ñañaña. Ehuancareŧcha' o'ch pomapet allo'tsen acheñenesha' ñeñt ama judioneshayayeto.

¹² Ñeñtña atet ye'mpa' yotare'ch Pablo:

—Amach petatsterro Jerusaléno.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet.

¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléno, attoch nerroma e'ñe neserrpare'teñoŧ Yepartseshar Jesús po'ñoñ.

¹⁴ Pabloñapa' ama e'mñoty. Allempoña ama errot yepapa' o'huañ erroŧ yoch, aña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoñapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléno.

16 Añña puesheña'tets cesareo'marnesha' ñeñt ame'ñetsapa' allenta co'ta'nenyet, arr nehuerryeta' all ye'chena Mnasón ñeñtara ñeñt chipro'marnesha'. Ñaña'pa' ahuatoteñ ame'ña'hua. Pa'pacloñapa' all ya'posa.

Allempo Pablo' emo'tuerr Jacobo ñeñt Jesús pa'mo'nasheñ

17 Allempoña o' ye'cherr Jerusaléñopa' añña ñeñt ame'ñetsa allpa' e'ñe pocsheñesha' agapyet.

18 Tsapaña puetarenpa' yahuanma parrocmá Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet.

19 Pabloñapa' o' huomñcha'tosanet allohuenet. Huomñcha'tuanetpa' allempoñapa' serrpare'tatuerranet e'ñe ora allpon Yompor po'huamenco't o' etsotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

20 Ñeñta e'mhuetpa' nanac aye'chochtatoñet Yompor. Tarraña allempoñapa' atet ochet:

—Tarraña masheñe, ahuo't peño'ch te'pa' shonte' mil judionesha' o' ame'ñenet ñamet. Ñetpa' e'ñe huomenco' otenet añ palltetsa allohueney ñeñtey judioneshay o'ch ye'pohua atet otye't Moisés.

21 Ñetpa' o' e'mare'tonapet peñoñ añe'no' peychaten judionesha' ñeñt ye'cha'yetsa po'poñ anetso all ye'cha'yena ñeñt ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch patsteto atet yey'chena ahuatoteñ.

22 Allempoñapa' alla otereterr Pablo:

—Ñehua, te'pa' ¿errote'tcha'ña ye'pañña te' tarro'mar po'ño'chpa' o'ch e'mare'tapet o' pe'cherr arr?

23 Ñehua, te'pa' o'ch pe'mñotey o'ch yota'p ñeñt'cha' atet pe'pa. Ñehua, arrpa' arro'tsen pa'tatssheña ñeñt netset ñetañeña ñeñt'cha' atet pet Yomporecop, ñeñt atet yey'chena ya ñeñtey judioneshay.

24 Te'pa' añña pocte' ñeñt'cha' atet pe'pa. O'ch panemñ añ pa'tatssheña e'ñe epaspa' o'ch sa'cohuentatena' ñeñt atet anaret Yomporecop ñeñt atet yey'chena ya ñeñtey judioneshay. Ñaña añ pa'tatssheñapa' o'ch petsa'tanet attoch shopena'tatet, ñaña ora ñeñt palltetsapa' o'ch petsa'tanet. Allochñapa' allohuen judionesha' o'ch eño'chet po'ño'chpa' ama atteyaye ñeñt atet e'mare'tet pocop, tarro'mar allempopa'

o'ch eñotapet p̄apa'cho'ña o' pepohua ñeñt̄ atet̄ oteney Moisés po'ñoñot̄.

²⁵ Tarraña añecop ñeñt̄ ama judioneshayaye ñeñt̄ o' ame'ñapa' yapa' o' yemñanet carta, o' yotuanet cartot̄ ñeñt̄ pocte' yenten ñocpuet ñeñt̄cha' atet̄ pet. Ñeñt̄pa' añechno: Amach rratsteto po'chets ñeñt̄ muetsenet ayečcataretecop ñeñt̄ po'yomporer penet. Ñaña o' yotuanet amach rratsteto es po'rras, ñaña amach rratsteto ñeñt̄ muetsenet ñeñt̄ atta a'pañaret̄. Ñaña o' yotuanet amach chetapretatsteto taporets. Ñeñta yot Janet ycartot̄.

Allempo rromapueret Pablo all Parets pa'paclo

²⁶ Allempoña Pablopa' o' anman añ pa'tatssheña. Tsapañapa' o' a'cohuentatet e'ñe parro, ñeñt̄ atet̄ yečhena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partsocop carrnero puesheña'ttso cmuet, ñeñt̄pa' atet̄ pena judionesha' Yomporcop.

²⁷ Tarraña o' taya čhampoch cančhermat allempoch o'ch a'cohuentatuetpa' añña judionesha' ñeñt̄ huetsa Asiotpa' o' eñchet Pablo all Parets pa'paclo. Ñet̄ña'pa' o' atsrre'matachet acheñenesha' attoch o'ch e'moñe'chet Pablo. Allempoñapa' o'ch rromuet Pablo.

²⁸ Pa'tsrre'mueñotetpa' o' rranare'tyeset, otyeset:

—Masheñnesha judioneshacha' o'ch seyepa'y. Te'pa' o' yenter añ acheñ ñeñt̄ ye'moñe'tene' ñeñtey judioneshay ñeñt̄ara ñeñt̄ o' puesuerran Moisés po'ñoñ ñaña ñeñt̄ o' a'sosyatuan Parets pa'paquell. Te'pa' o' erracmañen atet̄ o' yečhatyesuan acheñenesha'. Elloña te'pa' o' abe'tatan ñaña acheñ ñeñt̄ ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquell.

²⁹ Tarro'mar atet̄ otet̄ o' eñchet Pablo epuet Tróximo all chopeñe'chen epuet Jerusaléno. Tróximo ñeñt̄pa' efeso'marnesha', ama judioneshayaye. Ñetpa' cho' otenapuetañ ñato' Pablopa' o'te' abe'tatan Tróximo all Parets pa'paclo ñeñt̄ ama pocteye' enteno judionesha'.

³⁰ Allempoñapa' allohuen acheñenesha'pa' o' atsrre'muetpa' matrra'tet̄ allo'tsen Pablo o' rromuetpa' o' cheta'nmet a'yenet Parets pa'paclo. Allorocma yotetuet Parets pa'paclo.

³¹ O' muetsamochet Pablopa' añña ñeñt̄ solltarnesha' pa'm̄cha'tareterpa' o' e'manet atet̄ nanac ama'točhtena allohuen acheñenesha' all Jerusaléno.

³² Ñaña'pa' o' anman allpon solltarnesha' ñaña allpon capitánnesha'pa' o' matrra'tet̄ allo'tsa'yen acheñenesha'.

Allempoña acheñenesha'pa' o' entapan solltarnesha' epuet pa'nicha'tareterpa' o'huañ čhota'chet Pablo.

³³ Allempoña čhap anicha'taretpa' o' rromatan Pablopa' o' huanquët epa cadeno. Allempoñapa' a'p̄to'tanet:

—¿Eso'tña pa'so'cheñ añ acheñer?

Ñaña o' a'p̄to'tanet:

—¿Esťe'ña o' p̄ohua ña?

³⁴ O' anapyeset po'poñe'ttsocma. Puesheña'tets acheñpa' otyeset atet cotape'chet ñet, po'potantaññapa' atet otet po'poñ ñeñ atet cotape'chenet ñamet. Nanac ama'točhtenet ñeñto'marña ama eñocheto e'ñe po'ñočh ñeñ atet o' p̄ohua Pablo. Ñeñto'marña anicha'taretpa' anmatan Pablo pocollo all shontena solltarnesha'.

³⁵ Allempoña o' čhapuet allot a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueñoťpa' muetseñet.

³⁶ Tarro'mar acheñenesha'pa' o' coťa'huanmet. Puer-ranare'teñoť otyesnomuet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñť e'moñe'tene'

³⁷ A'tapachet pocollopa' Pabloñapa' otosan solltarnesha' pa'nicha'tareter, eños griegačho, ot:

—Te' napa' nemneñ o'ch notap̄ paterr ñoñets.

Anicha'tareťñapa' och:

—¿Po'ñočha't pe'muen griegačh?

³⁸ Alla otererr anicha'taret:

—Papa' ¿ama't añeyaype egipto'marnesha' ñeñť atsrre'mate' ahuaña acheñenesha' atto ñetpa' atpare'chet gobierno', ñeñťara ñeñť ahuanmue' pa'tatsoch mil amtsañnesha' a'yo amaraťo?

³⁹ Pabloñapa' alla otererr:

—Napa' amaca'ye ñeñťeyayno, napa' judioneshan ñeñťen tarso'marneshan, ñeñťara anets nanac atarr ñeñť allara Cilia. Napa' o'ch notare'tap̄ attoch pemnaten o'ch neños acheñeneshacop.

⁴⁰ Allempoñapa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñťuetpa' Pabloñapa' o' eños hebreyachho, atet otanet:

22

1 —Masheñneshacha' ñaña nomporneshacha', o'ch se'nñoten ñeñťcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muetsoñeñtuet poctacma. Pabloñapa' alla oterraneterr:

³ —Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléño. Ñeñt neyčhate' napa' ñeñtpa' Gamaliel. E'ñe ña pueyčhateñoftenpa' netsotuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa yatañneshañ. Nanac nema'yochra ñeñt Yomporecop ñeñt atet sepena te' sa.

⁴ Napa'cho'ña ahuañmo'chapa' nanac nemueročhtache't ñeñt cotene' Jesús poctapña. Napa' o'ch nerrmanatanet, allotñapa' o'chcho' nehuancatanet, ñaña o'chcho' nabe'tatanet ñaña cárcelo. Ñaña nemtsatatue't—yacmanesha' ama't ñaña coyaneshačno.

⁵ Ama't cornesha' ñeñt nanac añcha'taretpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtpa' alloch mueñanet attoch o'ch nerrmanatue ñeñt ame'ñaye't Jesús. Ehuancaretetpa' o'ch nahuanmanet Jerusaléño allcha' yecoñchatuanet.

Allempo Pablopa' serrpare'tatanet atto ello cotape'cherran cohuen Yomporecop

(Hch. 9.1-19; 26.12-18)

⁶ Atteñapa' o'cho' ahuen Damasco. Allempoña nečhappmoch Damascopa' allempo o' chapmoch pocto. Ñeñtña nanac poptetsa ento'tpa' machayotepa'tcha' čhoyo'tamñpsapuen.

⁷ Allempoña čhoyo'tamñpsen e'ñe neshopa' nañapa' alla nerrmopra patso. Allempoña nečhap patsopa' ne'm ñoñets ñeñt atet oten: “¿Eso'mare't Saule, pemueročhtatennañña ñeñt name'ñenaya?”

⁸ Nañapa' o' not: “¿Eseshape't Ayochreshate eñets?” Ñeñt eñetspa' alla oterrnerr. “Napa' ñeñten Jesús en ñeñten nazareto'marneshan, narramche'ña atarr pemueročhtaten.”

⁹ Ñeñtña allo'tsenen e'ñe parropa' ñetpa'cho'ña entetca'yeña ñeñt nečhoyo'te' ñeñtñapa' čha yore'tanet tarraña ñetñapa' ama eñochetoña ñeñt atet notaretta.

¹⁰ Nañapa' o' alla noterrerr: “¿Este' Partseshacha' poctetsa ñeñtcha' atet nepa'?” Partsesha'ña Jesús pa' alla oterrnerr: “Te'ñapa' o'ch petanta o'ch ahuep Damasco. Allcha'ña otapet allohuen ñeñt anaret ñeñtcha' atet pepa.”

¹¹ Allempoñapa' o'huañ nenta tarro'mar o' rrechaten ñeñt po'ptetsa ñeñt nečhoyo'tamñpse'. Ñeñtña noctene' ñetñapa' echa'nomnet notot. Attoña čhapatnet Damasco.

12-13 'Yečhap Damascopa' allempoñapa' huapa puesheñarr añ pa'so'cheñ Ananías. Añña Ananíaspa' nanac ame'ñenana ora allohuen ñoñets ñeñt atet anaret yocop ñeñey judioneshacpay ñeñtcha' atet yeḡa. Añña judionesha' ñeñt yečha'yetsa Damascopa' nanac cohuen enteñet Ananías. Ñañaapa' huapa neshopa' allenta ponmosnapa' otosen: "Te'pa' masheñe Saule pecuerrepa'ch." Nañapa' allorocmuepa'tcha' necuerr, allempoñapa' neñch Ananías.

14 O' alla oterrerr Ananías: "Añ Yompor ñeñt Po'yomporer pe't yatañneshañ, ñaca'yeña ḡa'crrer'ña ḡa ama't ahuatoteñ añecop o'ch peñotuerrñañ atet muenen ña. O' muenataḡ ñaña o'ch penterrñañ ḡama Puechemer ñeñt e'ñe pocte' es pets. Ñaña o' muenataḡ o'ch pe'mñotoñ e'ñe ña po'ñoñ ñeñt atet o' otuaḡ.

15 Te'pa' ñeñtpa' atetcha' peḡa, o'ch ḡa'potoñ Jesús po'ñoñ erracmañen ñeñt atet o' pentua ñaña ñeñt atet o' pe'mua.

16 Te'pa' añ palltetsa o'ch petanta, e'ñe ḡame'ñeñot Yepartseshar Jesúsapa' o'ch ḡapataretterra, attochña e'shohuaretterra ḡo'chñar." Neñtpa' allohua atet oten Ananías.

Atto Pablopa' eñotatanet ñapa' ña serrpare'tatene' ñeñt ama judioneshayaye

17 O' alla oterranneterr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allñaapa' orrtona atet ñerra'm čho es yečhopo'ten.

18 Allempoña o' orrtona Yepartsesharpa' atet oten: "Tayecma o'ch ahuerreḡ arrot Jerusaléñoñ, tarro'mar arrpa' amach esesha' pe'mñotaye allempoch ḡa'poton neñoñ."

19 Nañapa' alla notererr: "Partseshacha' ama't atetpa' allohuen acheñenesha'pa' e'ñe eñotuennet atet o' nepohua. Eñotuennet atto napa' nebe'tose't judionesha' po'prahuo atto nenalle'tache't ñeñt ḡame'ñenaya, ñaña atto nabe'tatanete't cárcelo.

20 Ama't allempo muetset Estebanañ ñeñt ḡa'poḡaye't peñoñpa' napa'čho'ña allempopa' e'ñe pocte' neñch muetsetepa'. Napa' allña necuamḡsanet pa'shtam ñeñt rrolle'te'. All necuapretpa' napa'čho'ña e'ñe pocte' neñch attepa'ña pet."

21 O' alla oterrerr Yepartseshar: "Ama't atetpa' te'pa' o'ch ahueḡ o'ch nemñaḡ allapa' allo'tsa'yen acheñenesha' ñeñt ama judioneshayayeto."

Allempo solltarnesha' pa'mcha'tareterpa' abe'tatan Pablo o'pono

22 Ñeñta otua Pablopa' añña acheñenesha' ñeñta e'muetpa' o'huan e'mñochet. O' alla rrannarterreterr, atet otet:

—¡Semtseñaca'ye! Ama pocteyaye o'ch corra ñeñ atet acheñ arr patsro.

23 Pa'tsrre'mueño'tetpa' alla rrannarterreterpa', o' gogo'tyeset pa'shtam enonet, allotpa' a'rrotsetyeset ñaña patspa' o' huapore'tyeset enonet.

24 Allempoñapa' añña ñeñ solltarnesha' pa'mcha'tareterpa' o' abe'tatan Pablo o'pono. O'ch ashtet attotcha' a'meta'huan ñeñ atet o' p'ohua. Ñapa' mueneñ o'ch eñoch esocopte' nanac ama'tochtenet ñocop.

25 Allempoñapa' o' huanquët Pablo attoch ashtet. Huanca'huet Pabloñapa' otan capitán ñeñ tets allame'tets:

—Ta', ¿pocte't senteñ o'ch sashte' acheñ ñeñ romanona'tar, ñaña ama señoña' ñeñ atet pena? Ñoñets ñeñ atet anare't Romotpa' ta', ¿pocte'te'?

26 Ñeñta e'm capitánpa' o' ahuo' allo'tsen pa'mcha'tareterpa' atet otos:

—¿Errótena't p'octape'cheññañ añ acheñer? Añpa' romanona'tarca'ye.

27 Añña ñeñ solltarnesha' pa'mcha'tareterpa' o' huapapa' atet otosan Pablo:

—¿Po'ñocha't romanona'tarep'?

Pabloñapa' o' anañ:

—Napa' ñeñtenca'ye.

28 Ñeñña añcha'taretpa' alla oterranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' attot ne'ñalleta, tarro'mar na nomporpa' romanona'tar.

29 Añña solltarnesha' ñeñ autsa ashtayeñ Pablopa', al-lorocmo' alla cheta'yerret a'yenet. Ñeñ pa'mcha'tareterpa' ñapa'cho'ña cha yoren, tarro'mar o' chapoña pueyo'chro o' huanca'huet acheñ ñeñ romanona'tar.

Allempo eños Pablo allo'tsa'yen ñeñ chocma a'pocatyene' ñoñets

30 Tsapaña puetarenpa' añña añcha'taretpa' o' agotatan cornanesha' ñeñ pa'mcha'tareternesha' pen allohuen judionesha' po'cornaneshar, ñaña o' agotatan ñeñ chocma a'pocatyene' ñoñets judioneshacop. Allempoña ap'chetpa' o' pueyan'peret Pablo allo huanquëtpa' o' anmet allo'tsa'yen añcha'taretnesha'. O' chapachetpa' o' tomatoset e'ñe al-lame'tets. Añña añcha'tare't romanonesha'pa' mueneñ o'ch eñoch e'ñe po'ño'ch esocopte' otteñe'cheñ judionesha'.

23

1 Pabloñapa' o' cohua'yesan allohuen ñeñt' chocma a'pocatyene' ñoñets. Allempoñapa' atet otanet:

—Masheñeshacha', napa' chocma nocrrena cohuen Yomporecop, ama't ahuatoteñ ama't ñaña teme'ttsen. Yomporpa' entennante' e'ñe cohuen neyoçher.

2 Añña cornesha' Ananías ñeñtara ñeñt' nanac añcha'taretpa' atet otan ñeñt' tets e'ñe allame'tets Pableshe, atet otanet:

—Chosañaca'ye asnama'te'.

3 Allempoña Pablopa' otan añcha'taret, atet och:

—Yomporpa' tsa'tatuerrpepa'ch, tarro'mar ama't porrtenañ e'ñe cohuenpa' peyoçhropa' ama masosyape. Ñaña ñeñto'marña anaretep pa arr attoch papa' peñotaten ñato' çhate' nepena ñeñt' ama pocteyaye ñeñt' atet oteney ñoñets ñeñt' atet anaret. Tarraña pañapa' o' atta pasnama'taten. Tarraña ñeñtpa' ama pocteyaye ñeñt' atet oteney ñoñets ñeñt' atet anaret.

4 Añña ñeñt' tomçha'tets allame'tetspa' o' che'ptare'chet Pablopa' atet ochet:

—Papa' atarro't cohuen penteñña o'ch pesochatse'ch cornesha' ñeñt' nanac añcha'taret ñeñt' nen Yompor.

5 Pabloñapa' anapanetpa' atet otanet:

—Napa' ama masheñeshacha' neñoteñe añmapa' ñeñt' te' cornesha' ñeñt' nanac añcha'taret. Ñerra'm neñoteñeñpa' amach nochñe atet, tarro'mar anaret Yompor po'ñoño atet: “Ama asochatse'tpahuo acheñ ñeñt' añcha'tarettetsa socop.”

6 Allempoñapa' o' cotape'ch Pablo. Añña ñeñt' chocma a'pocatyene' ñoñets patantarrñapa' saduceonesha', po'potantañña' fariseonesha'. Allempoña Pablopa' o' eñoç atetpa' allempoñapa' o' eños huomencpa', atet otanet:

—Masheñeshacha', napa'çho'ña fariseoneshan. Natañneshañpa'çho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantattereycha' esempohuañen.

7 Ñeñta otua Pablopa' allempoñapa' ama pañraye' cotape'cheto ñeñt' actape'chatañnesha'. Añña ñeñt' fariseonesha' ñetpa'çho'ña cotape'chet paterr, po'potantañña ñeñt' saduceonesha'pa', ñetpa'çho'ña o' cotape'chet po'poñ. Amaña pañraye' cotape'cheto.

8 Ama pañraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'millañoñeñer ñeñt' huetsa entoñ, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñoçh ñerra'm

yerrromapa' yetanterrach. Ñaña ñetpa' otenet po'ñoçh eñall Yompor po'mllañoñeñer ñeññ huetsa entot, ñaña po'ñoçh eñall yecamquëñ.

⁹ Allempoñapa' ñetañeño' nanac ama'toçhtet. Atteñapa' puesheña'tets fariseonesha' ñeññ nanac etsotene' ñoñets ñeññ atet anaret o'tomosetpa' eñosotet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñoçhpa' ñato' orrtoña Yompor po'mllañoñeñer ñeññ huetsa entot amapa' ñato' es ñeññ camquëñets ñato' ñeññ orrtenoya. Ñeñño'marña yapa' amachña çha yepatare'tatsche Yompor ñerra'm ñate' atet muenatene'.

¹⁰ Allempo nanac ama'toçhtenetpa' añña solltarnesha' pa'mcha'tareterpa' o' co'tape'ch, atet ot:

—Ñato' o'ch rraquët Pablo.

Ñeñño'mar o' çhore'tan po'poñ solltarnesha' o'ch huapuet o'ch chetereta' Pablo allotpa' o'ch aneret pocollo all shontena solltarnesha'.

¹¹ Tsapatña tsapopa' o' alla orrteññañerr Pablo Yepartse-shar, atet otos:

—Amach pellcatsto, tarro'mar Romopa'çho'ña all palltena o'ch pa'poton neñoñ atet o' pa'potuon arr Jerusaléño.

Allempo judionesha'pa' atarr o'pachet Pablo o'ch muetset

¹² Tsapatña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'pochtachet, atet otet:

—Yapa' amach yerroña' ñerra'm amach o' yemtso Pablo ñaña amach es yorro. Atteña ñerra'm amach attetopa' ama'tpa' esepa' yetantoya.

¹³ Ñeñña o'patenayapa' ñato' metente' pa'tatso't çharrasheña.

¹⁴ Allempoña o' a'pochtatueta' ahuanmuet ñaña allo'tsa'yen cornanesha' ñeññ pa'mcha'tareternesha' pen allohuen judionesha' po'cornaneshar ñaña allo'tsa'yen ñeññ pompornesha' penet. O' çhapuet allpa' atet otoset:

—Yapa' o' ya'pochtatueta' atet: Yapa' yoten ñerra'm amach o' yemtso Pablopa' amach yerro. O' ya'pochtata' ñaña atet: Atteña ñerra'm amach attetopa' ama'tpa' esepa' yetantoya.

¹⁵ Alla oterreterr:

—Ñehua, te'pa' o'ch yotas ñeññcha' atet sepa. O'ch soteña' ñaña ñeññ çhocma a'pochtatyene' ñoñets allotpa' e'ñe parrocmapa' o'ch semña ñoñets allo'tsen solltarnesha' pa'mcha'tareter, o'ch soch huapachetepa' Pablo sesho attoch o'ch señoñoñ este' o' pohua. Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch yerrmañ.

16 Añña Pablo pa'ñachorpa' o' e'mare'ch čha o'pateññañet pa'go'pa' o' ahuo' solltarnesha' pa'paclopa' o' otenana' pa'go' Pablo.

17 Allotña Pablopa' o' čhore'tan puesheñarr capitán, atet och:

—Añ huepuesha'pa' o'ch p'anemñ allo'tsen p'a'mcha'tareter tarro'mar ñapa' atarr mueneñ o'ch es a'metena'.

18 Capitánñapa' o'čo'ña anman huepuesha' allo'tsen pa'mcha'tareter. Allempoña čhappa' atet otosan pa'mcha'tareter:

—Añ Pablo ñeñt ehuancaretpa' ahuo't čhore'ten allotpa' oten ahuo'ch nanemñ añ huepuesha' pesho tarro'mar ñapa' nanac mueneñ o'ch es a'metena' pesho.

19 Añña amcha'taretpa' o' echa'nman huepuesha' pototpa' o' anemñ a'yenetpa' atet otos:

—Ñehua, o'ch p'oten este' pemnen o'ch p'oten.

20 Huepuesha'ñapa' atet och:

—Añña judionesha'pa' o' a'pochtachet attoch o'ch enamapet o'ch pemñe Pablo tsapať allo'tsa'yen ñeñt čhocma a'pochtatyene' ñoñets. Ñaña o'ch otapet añeco'ch pemñe atto'ch eñochet e'ñe po'ñočh este' o' p'ohua.

21 Tarraña amach p'ame'ñatstaneto errotench'a' otospet tarro'mar metente' pa'tatsot čharrasheña judionesha' ñeñtcha' camroya toño ñeñtcha' rromapue' go'. Ñetpa' o' a'pochtachet amach rrerreto ñaña amach es orreto ñerra'm amo'ch muetseto go'. Ñaña o' a'pochtachet ñerra'm amo'ch attetopa' ama'tpa' esepa'to' tantahuet. Te'pa' aña palltetsa ñeñtcha' atet p'otanet.

22 Amcha'tareñapa' atet otan huepuesha':

—Tarraña amach esesha' p'otatsto p'apa' o' p'otuenna'.

Ñeñta otuepa' allempoñapa' o' mueñer.

Allempo čhapachet Pablo allo'tsen gobernador Félix

23-24 Allempoña amcha'taretpa' agotatan epsheña po'cap'táner. Allempoña o' čhapueta'pa' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt montenaya cahuall, allotpa' ñaña doscientos ñeñt orrene' muetsamets alloch quellaret. Allotpa' o'ch sanem paťerr cahuall amapa' epa alloch monta'nma Pablo. Allotña'pa' o'ch sahuanna Cesareo attoch sečhapach cohuen Pablo allo'tsen gobernador Félix.

25 Allotpa' quellcan ñaña carta ñeñt'pa' atet ot:

26 “Gobernador Félix ñeñte'p nanac cohuenep amcha'taret, na Claudio Lisiaspa' o'ch nehuomcha'ta'p añ necartoť.

27 Añ yacmapa' ahuo't rromue' judionesha' o'ch muetsetañpa' nañapa' o' neñocheñapa' romanona'tar. Nañapa' nehuapa epan nesolltarnesharpa' o' na'rroyatatos.

28 Napa' nemneñ o'ch neñocheñ esocopte' nanac otteñe'cheñet, ñeñto'marña napa' o' nanemñ allo'tsa'yen ñeñt chocma a'pocatyene' ñoñets ñeñt atet ye'chenet ñet.

29 Tarraña napa' neñotoñ ñeñtecop otteñe'cheñet, tarro'mar ñetpa' otenet ama atteye' peno atet anarefet ñocpuet. Ñeñtecpaña otteñe'cheñet tarraña ama añecpayaye attoch o'ch yemtsach amapa' o'ch yeyottamñpsach.

30 Allempoña napa' o' ne'mare'ch judionesha'pa' cha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt otteñe'chene' arrpa', te'pa' a'meteñetepa' pesho esocopte' otteñe'cheñet. Te'pa' ñeñtach notañ." Allohua huañ po'carta.

31 Allempo atet otanet pa'mñcha'tareterpa' añña solltarnesha'pa' e'ñe a'nahua anmet Pablo tsapocma. Allotñapa' o' chapuet all anetso pa'so'cheñ Antípatris.

32 Tsapatña añña solltarnesha' ñeñt chope'chets pa'tcopa' allo'ta puerra'cherret Antípatrisoñ. Allotpa' añña anmue'ña Pablo Cesareohua ñeñt montetsa cahuallo.

33 Allempoña chapuet Cesareopa' o' aposet gobernador carta. Ñaña o' chapachet Pablo e'ñe ñesho.

34 Allempoña gobernadorpa' o' lleya'huan cartapa' a'p'to'tan Pablo:

—¿Erra'tsena'tña anetsroñ pehuapa?

Ñaña'pa' atet och:

—Arroñ nehuapa Ciliciot.

Allempoña gobernadorpa' o' eñoch allot huapa

35 allempoña'pa' otan Pablo:

—Te'pa' allach ya'pocachña' ato't hua'cha'ta' ñeñt potteñe'chene'.

Allempoña'pa' o' mueñan po'solltarneshar cohuanñpssetepa' Pablo allara añcha'tareñ Herodes po'palaciopahuo.

24

Allempo judionesha'pa' otteñe'choset Pablo allo'tsen añcha'tareñ Félix

1 Pa'mnarmatñoñapa' huapa ñeñt pa'mñcha'tareter pen allohuen judionesha' po'cornaneshar, ñeñt'pa' añ pa'so'cheñ Ananías. O' huapa ñaña allponsheña ñeñt pompornesha' penet. Allotpa' huapa ñaña puesheñarr ñeñt pa'so'cheñ Tértulo ñeñt'pa' ñeñt'cha' eñosapretahuet. Allempoña

huapuetpa' o' ahuanmuet allo'tsen gobernador attoch otteñe'choset Pablo.

² Allempoñapa' huapachet ñaña Pablopa' o' chore'chet ñanom Tértulo attoch eños ñanom. Ñañaapa' añeepa eños attoch otteñe'chet Pablo. Ñanompa' o' eños e'ñe cohuen gobernadoro-cop ñeñt Félix, atet ot:

³—Pa gobernadoro, nanac cohuen yenteneþ tarro'mar e'ñe þotot yocrena e'ne cohuen ama eñalle attoch yeçllaranna'ta. Ñaña þapa' o' þa'pocatonay e'ñe cohuen ñeñt yepalltena arr yenyo. Ñeñto'mar ya te'pa' yemneñ o'ch yeparasyoso't þocop attoch çhocma peyenpueney cohuen.

⁴Te'pa' attoch amach alla nellapso eñosetspa' napa' nemneñ e'ñe pemorrenteño'þa' o'ch pe'mñoten mame' ñeñtcha' notaþ.

⁵Yapa' yeñoteñ añ yacmapa' nanac atsrre'moçhtena, nanac moñne'tatyenana ora allohuen judionesha' atto te'pa' ama patrraye' cotape'cheneto. Ñaña añmapa' ñeñt pompor pen allohuen ñeñt cotene' poctaþña ñeñt huapatsa Nazaretot.

⁶Elloña te'pa' mueneñeñ o'ch a'sosyatuanenñ ñaña Parets pa'paquell, tarraña yañapa' o' yerrmue'. Ñaña yapa' yemneñeñ o'ch ya'pocacheñ atet anaret yocoppa'

⁷ tarraña o' huapa añcha'tareþ Lisias epuet po'solltarnesharpa' e'ñe po'huamencocma o' puer-ratañpenyeta'.

⁸Alloñapa' atet otey ñeñtey otteñe'chene' yehuapuepa'to' pesho. Te'pa' þachña a'þto'tare'te' attoch peñoç þaña ora allohuen attot yotteñe'cheñ. Añpa' allohua atet eños Tértulo ñeñt eñosapretahuet.

⁹Judionesha'pa'çho'ña atet otet:

—Po'ñoçhca'ye atet.

¹⁰Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñsha' o'ch neños pesho e'ñe nocop, tarro'mar napa' neñoteneþ o' shonte' char atto þa'mcha'tarettena arr yenyo.

¹¹E'ñe taya o' met çharramat puechena epomuet atto o' nema'yochuena' Parets pa'paclo all Jerusaléño. Ama't esha' þa'þto'tpa' atetcha' otapet.

¹²Tarraña allempo ñetpa' ama entneto o' esesha' notnare't, ñaña ama na'tsrre'moçhtana'che acheñenesha'. Ñaña ama na'tsrre'moçhto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'.

¹³Ñeñto'marña te'pa' amate' erroten eñotatapeto añmapa' ñeñt e'ñe po'ñoçh attota otteñe'chennet.

14 Napa' te'pa' añach na'meta' pesho, napa' name'ñena ñeñt e'ñe alloch yequeshperra. Po'ñoçh napa' añ name'ñena ñeñtara Yompor ñeñt Po'yomporer pe't yatañneshañ. Ñaña añ name'ñena ora allohuen ñoñets ñeñt atet anaret judione-shacop. Ñaña añ name'ñena ñeñt atet quellquë't ahuat ñeñt a'mtaye't Yompor po'ñoñ.

15 Ñaña napa' añ name'ñena ñeñt attoch esempohuañen Yomporpa' tantaterranacha' allohuen acheñ—ñeñt e'ñe cohuen acheñ ñaña ama't ñeñt ama cohuenayaye acheñ. Ñetpa'çho'ña ñeñtara ame'ñenet.

16 Ñeñto'marña napa' çhocma nema'yoçhrena attoch Yomporpa' enten e'ñe cohuen, ñaña attoch acheñenesha'pa'çho'ña o'ch entennet e'ñe cohuen ñamet.

17 'Napa' shonte' char çhocma nechopeñen errapañen anetso'mar. Te'pa' o' taya nohuerra arr attoch napa'yesuer namo'tsesha' quelle ñeñt huocchañneshaçhno. Añ quellepa' ñeñtara apa'yesen ñeñt ame'ñenaya Yompor. Napa'çho'ña eñalleñ ñeñtcha' nepomañ Yomporecop.

18 O' taya çhappmochañ allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñto'mar ama tama esesha' ama'toçhtetso.

19 Tarraña e'ñe allempopa' o' çhaçha't ñaña judionesha' ñeñt huachetsa Asioť. Ta', te'ñapa' eso'marte'ña ama ñetaye'ña huapatseto arr attoch ñerra'm po'ñoçh mueneñet o'ch otteñe'chnet na.

20 Tarraña te'pa' ama huapuesto ñetpa' ñehua, te'pa' otetepa' ñeñt huacha'tatsa te'. A'metetepa' ñerra'm po'ñoçhte' este' nepanta' allempo natomos allo'tsa'yen ñeñt çhocma a'pocatyene' ñoñets.

21 Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanerrach esempo. Ñehua, ñato' ñeñtecpate' otteñe'chennetña te'.

22 Ñeñta otua Pablopa' añña Félixpa' ama mueno o'ch alla serrpare'terreterr, tarro'mar ñapa' o' eñotmoch atet ame'ñena ñeñt cotene' Cristo. Ñeñto'marña atet otanet:

—Ñehua, te'pa' ñeñtach yot. EsemPOCHña huapa ñaña añcha'taret Lisiaspa' allemPOCHña ya'pocatat ñoñets.

23 AllemPOña atet oterran po'captáner:

—Te'pa' allach secuanpererr Pablo. Amach tama sa'montsatsche. Ñaña çhocmach semnach ñeñt yemtenaya o'ch es aþ ñeñt palltena.

24 Allponmaterrerrpa' o' huerra Félix Cesareo epuet puetapor ñeñt pa'so'cheñ Drusila, ñeñtpa' judionesha'. O'ña çherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotenete' ame'ñenana Jesucristo.

25 Allempoña çhap Pablopa' o' serrpare'tatanet cohuen ñeñt atet yepena ya ñeñtey ame'ñetsa. Ñaña atet otanet añcha' yema'yochra attoch e'ñe pocte' es yeþa'yen, ñaña amach yeþatsto ñeñt ama cohuenayaye tarro'mar Yomporpa' tsa'tatuerryach allempoch acerrran allohuen acheñenesha'. Ñeña otua Pablopa' añña Félixpa' çha yoren. Allempopa' alla oter:

—Te'pa' orrerreþ, esempochña e'ñe pocta'huerrnanerrpa' o'ch alla neçhore'taterrper.

26 Félixña'p'atta cohuenan Pablo ñato' o'ch aþ quelle añecop attoch a'rroyer. Ñeño'mar errotenopa' o'chçho'ña agotach attoch serrpare'tet epuet.

27 Atteña'p' o' met epa charpa' o' cañyerra gobernador, huapa po'psheñ añcha'tareñ añ pa'so'cheñ Porcio Festo. Ñaña'p' nanac mueneñ o'ch coshatan judionesha' ñeño'marña ama a'rroyerrano Pablo, atet ot:

—Allepa' preso.

25

Allempo çhapachet Pablo allo'tsen añcha'tareñ Festo

1 Allempoña añcha'tareña Festo all Cesareopa' poma'pamtañoña'p' o' ahuo' Jerusaléño.

2 O' çhap Jerusaléno'p' añña cornanesha' ñeñt nanac añcha'tareñnesha' ñaña epuet ñeñt nanac sherbets judioneshacoppa', o' serrpare'tatapet Festo atto otteñe'cheñet Pablo.

3 Ñetpa' atet ochet Festo agotatanepa'to' Pablo attoch huapa Jerusaléño, tarro'mar ñetpa' ahuañacma a'pocstatuet o'ch cohuet Pablo toño attoch muetsapueret all.

4 Festeña'p' atet otanet:

—Pablopa' allo'tsena all yottampeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren.

5 Te'pa' ñeñt nanac añcha'tareñtetsa socoppa' cota'nerrnetepa' allochña'p' otteñe'cheñetepa' Pablo all, ñerra'm po'ñoçhte' eñall alloch otteñe'chet.

6 Festeña'p' alla a'pa Jerusaléño allponmat. Ñato' po'psocmatño amapa' po'çharramatño'p' o' ahuerren Cesareo. Cherr Cesareopa' tsapaña e'ñe ahuatecmapa' o' anorros allecma a'pocstatenet ñoñets. Allotña agotatan Pablo.

⁷ Allempoña huapachet Pablopa', añña judionesha' ñeñt' huača'tatsa allpa' čha arrotam̄pesyet. Allempoñapa' otteñe'choset. Shonte' esocmañen nanac sosey toma'tam̄pesyesoset Pablo, tarraña ama errotenoť eñotacheto am̄cha'tareť Festo attoch otoset e'ñe po'ñočh.

⁸ Pabloñapa' o' eños ñaña ñocop atet ot:

—Napa' ama čho nachm̄are'teno ñoñets ñeñt' atet anaret judioneshacop. Ñaña napa' ama čho na'sosyateññañe Parets pa'paquëll. Ñaña napa' ama čho natpare'teno ñoñets ñeñt' nen am̄cha'tareť Romoť.

⁹ Tarraña Festopa' nanac mueneñ o'ch coshatan judionesha', ñeñto'marña otan Pablo:

—¿Pocte't penteñ o'ch ahuep̄ Jerusaléño allñapa' allcha' nentonať atto po'ñočhte' alloch otteñe'chapet?

¹⁰⁻¹¹ Pabloñapa' alla anapuerrerr, atet ot:

—Napa' añña pocte' nenten o'ch a'pocaton am̄cha'tareť ñoñets ñeñt' romo'marnesha', tarro'mar amate' errotenoť neto Jerusaléño, tarro'mar ama erroť nepeñeña judionesha', ama't p̄apa' peñotueñ. Ñeñto'mar aña pocte' nenten o'ch a'pocaton am̄cha'tareť ñoñets ñeñt' romo'marnesha'. Te'pa' arro'tsenen pesho ñeñtep̄ eñets epať am̄cha'tareť romo'marnesha' ñeñt' pocte' nenten na, ñach a'pocate'ña ñoñets nocop. Tarraña ñerra'm po'ñočhte' añ o' nepohua ñeñt' ama pocteyaye amapa' atet ñerra'm alloch muetsanet ñeñtpa' e'ñe pocte' muetsanetepa'. Tarro'mar ama nemno o'ch na'queshp̄ata nañeña. Tarraña ñerra'm e'ñe attotapa' ama pocteyaye o'ch pepomuen judioneshesho. Ñeñto'mar napa' nemneñ o'ch a'pocaton am̄cha'tareť ñoñets ñeñt' romo'marnesha' e'ñe ñapueť.

¹² Allempoña Festopa' o' serrpare'tet epuet ñeñt' parro cotape'chatannenet. Allempoñapa' atet otan Pablo:

—Te'pa' nanac am̄cha'tareťesho pesechenapa' ama'tpa' allcha'ca'ye peta.

Atto eños Pablo allempo huapa am̄cha'tareť Agripa

¹³ O' allponmatteredrpa' huapa am̄cha'tareť Agripa epuet po'čh Berenice. O' chapuet Cesareo all emo'teñeta' am̄cha'tareť Festo.

¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñt' na'nom Félix ahuaña all yottam̄peñet.

¹⁵ Allempoña napa' Jerusaléño'tsenenpa', añña cornaneshash' ñeñt' pa'm̄cha'tareťernesha' pen allohuen judionesha' po'cornaneshar, ñaña po'potantañ ñeñt' pompornesha' penet,

ñetñapa' o' serrpare'tatnet attot otteñe'cheñet Pablo, ñaña otnet napa' nemtsachepa'to' Pablo.

16 Nañapa' atet notanet: "Ñeñt ñoñets anaret Romotpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet attot otteñe'cheñet."

17 Ñeñto'marña allempo hua'cha'ta judionesha' nesho, allempoña na tsapatñapa' o' nanorros allecma ya'poctaten ñoñets. Allempoña napa' o' nagotach Pablo.

18 Añña ñeñt hua'cha'tatsapa' allenta tom'cha'toset attoch o'ch alla otteñe'chueñeterr Pablo, tarraña amaña añeye' a'meta'yeseto atto ñeñt poctetsa o'ch yemtsach acheñ.

19 Aña a'meta'yeset ñeñt e'ñe ñocpueta atet ye'chenet ñet judioneshet. Ñaña aña a'meta'yeset ñeñt poctapña puesheñarr ñeñt pa'so'cheñ Jesús, tarraña ñeñtpa' o' rroma, tarraña Pablopa' cha oten ñeñtpa' o' tanterra.

20 Ñeñto'marña napa' ama tama neñoche attoch na'poctat ñoñets ñocpuet. Ñeñto'marña atet noch Pablo po'tomña: "¿Pocte'te' penteñ o'ch ahuep Jerusalem allcha' ya'poctatena' ñoñets?"

21 Tarraña Pablopa' ama mueno. Ñapa' aña muena' allach arr, allotcha'ña esempopa' entateñetepa'to' añcha'taret Augusto all Romo. Ñeñto'marña napa' not: "Te'pa' allepa' arrma, esempochña napa' o'ch nemñe añcha'taretesho Romo."

22 Allempoña añcha'taret Agripapa' atet otan Festo:

—Napa' atarr nemneñ o'ch ne'm ñaña erro'tente' serrpare'ten Pablo.

Allempoña Festopa' atet och:

—Tsapat'cha'ña pe'mñota'mueñ.

23 Tsapatñapa' huapa'muena añcha'taret Agripa epuet ñaña po'ch Berenice. Ñetñapa' cha cohuenetyesoset. Allempoñapa' be'tos'cha'toset allecma serrpare'tatannena añcha'taretnesha'. O' be'tos'cha'tet epuet ñaña solltarnesha' pa'm'cha'taretarnesha' ñaña po'po'ne'chno acheñenesha' ñeñt nanac sherbets all anetso. Allempoña Festopa' o' agotatenanerr Pablo.

24 Allempoña huapa Pablopa' Festoñapa' eñoratsapa' atet ot:

—Añcha'tarete Agripa, ñaña allohuenes ñeñtes arro'tsa'yenes: Te'pa' o' sentue añ yacma ñeñt nanac e'moñe'ten allohuen judionesha'. Ñetpa' o' otteñe'chuet e'ñe nesho allempo Jerusalem'tsenen ñaña arrpa' o' otteñe'chueñeta' allempo ne'cherr ñaña arr. Ama't arrpa' o' che'chame'tueñeta', atet otyeset: "Chosa muetse', tarro'mar añ acheñerpa' ama pocteyaye o'ch alla corra."

25 Tarraña allempoña napa' na'p̄to'tare'chpa' ama nentoñeña ñeñt̄ atto pocte' o'ch nemtsach. Ñaña e'ñe ña muenats o'ch entateñeta' am̄cha'taret Augusto all Romo ñeñto'marña napa' pocte' nenteñ o'ch nemñe all.

26 Tarraña napa' ama neñoteñe ñeñt̄cha' atet nequellcoñ ya'm̄cha'tareter ñocop tarro'mar ama eñalle errotentcha' yotteñe'cheñ. Ñeñto'marña te'pa' o' neçhore'tach arr all se-shontena te'.

Alloñña Festopa' atet otan am̄cha'taret Agripa:

—Te'pa' p̄ach ñanom a'p̄to'tare'te' attoch napa' o'ch neñoch errotentcha' nequellca' carta am̄cha'taretecop.

27 Napa' noctape'cheñ ama pocteyaye o'ch yemñe acheñ ehuncaret ñerra'm ama eñalle errotent o'ch yotteñe'cheñ.

26

1 Allempoña am̄cha'taret Agripapa' atet otan Pablo:

—Ñehua, te'pa' pocte' nenteñ o'ch peños p̄aña p̄ocop.

Allempoña Pablo e'ñe puehuom̄cha'teño'pa' o' echantan pot, allempoñapa' eños ñocop, atet ot:

2 —Te'pa' nocshena am̄cha'tarete Agripa tarro'mar eñall attotcha' neños pesho nocop, añecop tarro'mar çha otteñe'chenen judionesha'.

3 Napa' nocshena tarro'mar te'pa' o' peñoch p̄aña atet yeyçhena ya ñeñtey judioneshay. Ñaña o' peñoch attot ama patrraye' yoctape'chyeno. Ñeñto'marña te'pa' o'ch nenamañ attoch pe'm̄ñoten cohuen.

Atet atarr cotape'che't Pablo allempo ama ame'ñerra'

4 'Allohuen judionesha'pa' eñotuennet atet nocrrēt̄ ahuat, ama't allempoteñ ne'ñalleta nenyoy, ñaña ama't allempo cheshenna' allempo yeyche't̄ Jerusaléno epan namo'tsna'tarnesha'.

5 Ama't ahuatoteñpa' eñotuanete't̄ napa' fariseoneshan ñeñtara ñeñt̄ nanac etsotene' cotap̄ñats nanac echarr allo yoctape'chen Partsocop. Ñeñt̄ atet entnete't̄ atet nocrrē'tpa', atetcha'ñacho' a'meta'netañ.

6 Ñeñto'mar te'pa' arro'tsenen attoch sa'p̄to'tare'ten, atto napa' name'ñena ñerra'm yerromapa' Yomporpa' tantaterr-eycha' esempohuañen. Añmapa' ñeñtara atet otane't̄ ahuat Yompor yatañneshañ.

7 Ama't çharrasheña puechena epa ñeñtara ñeñt̄ yatañneshañ yepen ñeñt̄ chemere'tyesahueta', ñeñt̄ña po'm̄renñetpa' e'ñe ame'ña'huenet ñeñt̄ atet o' notuas. Ñeñto'marña ñet te'pa' nanac ma'yoçhrenet Yomporecop—yeto ama't ñaña tsapo. Tarraña ama't atet penetañ allohuen

judionesha'pa' te'ñapa' e'moñe'tennet ama't napa' ñeñtara name'ñena atet ame'ñenet ñamet. Attoña amcha'tarete Agripa otteñe'chennetña te'.

⁸ ¿Eso'marte' sapa' soten amach errotentot tantaterrano Yompor arromñañnesha'?

Atto Pablopa' atarr muerochtatane't ñeñt ame'ñenaya Cristo

⁹ 'Napa'cho'ña ahuañmo'chapa' notenapañ ñato' ñeñt'e' poctetsa o'ch yemuerochtach ñeñt cotene' Jesús pocta'ña ñeñtara Jesús ñeñt nazareto'marnesha'.

¹⁰ Ñeñto'marña napa' nanac nemuerochtatyese't acheñ Jerusaléño ñeñt ame'ñaye't Jesús pocta'ña. Shonte' acheñ ñeñt nabe'tate't cárcelo, tarro'mar cornanesha' ñeñt pa'mcha'tareternesha' pen allohuen judionesha' po'cornaneshar, ñetñapa' o' apnet orden ñeñtecop. Ñaña allempo otyese't amcha'tareñnesha' ahuo'ch muetsachet ñeñt ame'ñenaya Jesús pocta'ñapa', napa'cho'ña o'chcho' not, pocte'ña'cho' muetsetepa'.

¹¹ Chocma nemuerochtatanete't ama't judionesha' po'prahuo'mar, ñaña nanaccha' nemne't o'ch nachñare'tach ñeñt ame'ñatse't. Nanac natsrre'mueño'pa' noctare'tanete't erracmañen anetso'mar.

Allempo Pablopa' ello serrpare'taterraneterr atto ello cotape'cherran cohuen Yomporecop

(Hch. 9.1-19; 22.6-16)

¹² Alla oterraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeñt apuen ñeñt pa'mcha'tareternesha' pen allohuen judionesha' po'cornaneshar.

¹³ Ñaña amcha'tarete te'pa' o'ch notap ñeñt atet norroya allempo. Allempoña o' yechapmoch Damasco allempopa' o' chap pocto. Ñeñtña nanac poptetsa entotpa' machayotepa'tcha' choyo'tamñsapuen ama't ñeñt epan nesen. Atet poptenapa' metanenan atsne'.

¹⁴ Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebreyacho ñeñt'pa' atet oten: “Eso'mare't Saule pemuerochtatennanña ñeñt name'ñenaya. Añpa' pañeña muerochtatetsa. Tarro'mar cha pottena ñerra'mrrate' ashen ñeñt e'ñe patpare'teñoñ ñañeñachña atserrpatetsa.” Añpa' atet oten ñeñt norroya.

¹⁵ Nañapa' not: “¿Esheshape'tña Ayochreshate eñets?” Nañapa' alla otnerrerr: “Napa' ñeñten Jesús en ñeñtara pemuerochtaten.

¹⁶ Te'pa' petanterra alla, ñeñto'mar te'pa' o' norrrta pesho attoch o'ch nenañ ða, ðach torratsa nocop, ñaña ðach a'pote' ñeñt o' pentua te' ñaña ñeñtcha' neñotatañ allempoch norrrter-rerr pesho.

¹⁷ Te'pa' o'ch nemñañ allo'tsa'yen ñeñt ama judioneshayayeto, tarraña napa' çhocmach necuamþsañ ñerra'm esempo o'pataña judionesha' ñaña ama't ñeñt ama judioneshayaye.

¹⁸ Tarro'marcha' nemñañ allo'tsa'yen ñeñt ama judioneshayayeña' allochñapa' attoch peserrpare'tatuanet attoch çhapanet pueyoçhro, attoch o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahuamencañ ðanet oneñeñt, añcha'ña ahuamencañ penahuet Yompor. Allochñapa' o'ch ame'ña'huerrnet na, allempoñapa' neþretna'huerranetcha' po'chñar, attoch o'ch parrocmatuerret e'ñe attecma atet ñerra'm ñeñt o' na'cohuentatua."

Atto Pablopa' ama atpare'tenano ñeñt atet gateñ Partsessa' Jesús

¹⁹ Alla oterraneterr Pablo:

—Ñeñto'marña añcha'tarete Agripa te' napa' ama natpare'teñe Jesús ñeñtara ñeñt norrtoya entot.

²⁰ Ñanompa' o' neserrpare'tatanet Damasco attoch cotape'cherret ello cohuen Yomporecop. Allochñapa' o'ch ða'yenet ñeñt cohuentetsa Yomporecop, attoch yeñoç po'ñoç o' cotape'cherret etserra. Attecma neserrpare'tatanet ama't Jerusaléno, ñaña ora erracmañen Judeo'mar, ama't ñaña allo'tsa'yen ñeñt ama judioneshayaye.

²¹ Attoña judionesha'pa' o' rroma'net Parets pa'paclo o'ch muetsanetañ.

²² Tarraña Yomporpa' ahuo't a'natna nanac atto teme'ttsen nocrrena, attoch neserrpare'tach allohuen acheñenesha' —ama't ñeñt ama esoshe'mayaye, ñaña ama't ñeñt añcha'taretnesha'. Tarraña ama añeye' neyçhatenaneto ñeñt ama cohuenayaye. Añña attecma neyçhatenanet atet serrpare'te't ama't ñeñt a'ntaye't Yompor po'ñoñ ahuat. Ñeñtpa' ama't Moiséspa' atet ote't ñeñtcha' atet perra esempo.

²³ Ñeñtara serrpare'tatanete't ahuo'ch huapa Cristo añ patropa' nanaco'ch mueroçhtachet, allotpa' ahuo'ch rroma, tarraña ñapa' tanerrach. Atto'chña tanterra ñanompa' o'ch a'puetarsamþsanet pueyoçher allohuen judionesha', ñaña ama't po'poñeçhno acheñ.

Allempo Pablopa' atarr mueneñ o'ch ame'ñatana añcha'taret Agripa

²⁴ Allempoña atet eñen Pablo ñocoppa', Festoñaapa' atet och e'ñe huomenco:

—Chate' Pablo pemospuena tarro'mar nanac es p'octape'chenpa' ñato' ñeñite' o' mospaterreḡ.

²⁵ Pabloñaapa' atet och:

—Ama Ayochreshate Festo čhoye' nemospueno. Añña neserrpare'tatenes ñeñ e'ñe po'ñočh.

²⁶ Ama't añcha'tareḡ Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñ atet nepena, ñaña tarro'mar ama a'nahua es neḡa'yeno.

²⁷ Añcha'tareḡ Agripa, ḡpapa' ḡpame'ñeña't ñeñ a'mtayeḡt ahuat Yompor po'ñoñ? Napa' neñoteneḡ ḡpapa' ḡpame'ñeña.

²⁸ Allempoña Agripapa' atet otan Pablo:

—Cha't ḡotenapañ tayecmapa' o'ch ḡpame'ñatna Cristo.

²⁹ Pabloñaapa' alla otererr: Ama't tayecma amapa' tsapatonetpa' napa' atarr nemneñ Yomporpa' o'ch ame'ñaterrḡa, ñaña ama't allohuenes ñeñtes ne'mñotene'te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehuancaḡeḡayaso.

³⁰ Allempoñaapa' o' tomčha'terret allohuenet—añcha'tareḡ Agripa, ñaña gobernador Festo, ñaña Berenice ñaña allohuen ñeñ allo'tsa'yen.

³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárcelo.

³² Allempoña añcha'tareḡ Agripa otan Festo:

—Amach ña muenetsñe o'ch a'p'octatenana' ñoñets añcha'tareḡesho Romopa' yapa' o'te' ya'rroyereñ e'ñe tayecma.

27

Allempo anmet Pablo Romo

¹ Allempoña o' a'p'octatuet o'ch mueñet Pablo anetso Romo allara Italiapa' o' anmet allo'tsen capitán ñeñ pa'so'cheñ Julio, ñeñ po'caḡtaner penet ñeñ emchorrenaya añcha'tareḡ Augusto. Ñaña o' anmet po'poñečhno ñeñ ayottamḡsareḡečhno o' apueñeta' Julio, allñaapa' ñach cohuanḡpesnomahuet.

² Allempopa' allo'tsen ñaña Aristarco ñeñ macedonio'marnesha' ñeñ huetsa Tesalónicoḡ. Ñeñtcha' parro yocta'neñ Pablo.* Allempoñaapa' o'cho' yebe'toscha't

* **27:2** Lucas ñeñ quellqué' añ ñoñets ñapa' cota'nman ñaña Pablo.

boto ñeñt huetsa anetsoť Adramitioť, ñeñtña botepa' o'ch etsotyeshnoma allemehña sohua'puetso'mar ora Asio'mar. Allempoñapa' o'cho' ahuañpsey boto.

³ Tsapañapa' arr yetsotosa all oteñet Sidóno. Allña capitán Juliopa' morrentnomana Pablo ñeñto'mar o' muenach o'ch emo'tnoman pamo'tsesha', ñeñt ye'cha'yetsa all Sidóno, attoch ñetpa' o'ch apapet Pablo ñeñt palltena.

⁴ Allempoña ahuañperryerra' nanac yorrno-tañpesnoma. Morrrpa' ama muenatye o'ch yemet attoch o'ch ahuey e'ñe pa'charr all oñenet, ñeñto'marña yepotesañpesuanma coñe't pats ñeñt pa'so'cheñ Chipre. Tarro'mar yepotesuanma attoch ñeñt patspa' o'ch a'npanpsey mōrr.

⁵ Allempoñapa' arr yoñemuanom allame'tets Cilicio'mar, ñaña allame'tets Panfilio'mar. Allempoñapa' ye'chap ñaña Miro all yetsotosa, allara ñeñt pa'netser Licia.

⁶ Allña capitán Juliopa' entosan po'poñ bote ñeñt huetsa Alejandriot ñeñtcha' tatsa Italio. Ñaña allempopa' otey ahuo'ch ya'ta'cha't all.

⁷ Allempoña o' allponmat ahuañpsey e'ñe aco'papa' e'ñe yemuro'chenñoña yemet ñaña Gnidot. Allo'tpa'cho'ña ama muenaterryerro mōrr o'ch ahuaryerr e'ñe pa'charr, ñeñto'marña yepotesañpesuanerrerr coñe't pats ñeñt pa'so'cheñ Creta attoch ñeñt patspa' o'ch a'npanpsey mōrr. Allña' allpono'mar yoñom allecma etsotenet ñeñt pa'so'cheñ Salmón.

⁸ Yemuro'chenñoña yemetua ñaña allot e'ñe aco'pa. Atteñapa' ye'chap ñaña all oteñet Cohuen Sohua'puetso. Allo'tpa' e'ñe allame'ttsa anetso Lasea.

⁹ Yemuro'chtame'teño'pa' o' ya'llponmatnom ñeñto'mar allempopa' o' 'chen allempo nanac añcha'no'chtana o'ch ahuañpsey sapo'mar. Ñaña o' met allempo anaret judione-shacop allempocma ahuantenet pa'chporrña Yomporecop, ñeñto'marña yapa' o' ye'noch o' 'chen allempo nanac orrnotena sapo'mar. Ñeñto'marña Pablo' o' yerpatanet,

¹⁰ atet otanet:

—Masheñeshacha', napa' noctape'chen arepoña es yehuapoya toño allempoch ahuañperryerr. Napa' noctape'cheñ ñato' o'ch yechencatsre'tnoma, ama't ñaña yebotepa' 'chach chenca; ama't yapa'cho'ña arepoña 'cha yechenca.

¹¹ Tarraña capitánñapa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'ñyeto atet otanet Pablo.

12 Ñaña all Sohua'puetso Cohuenpa', ama tama cohue-nayaye o'ch allaya allempo čhen orrnoteñtsopo. Ñaña al-lohuenetpa' o' e'ñe pocte' entuet o'ch ahuañperryerr al-lot. Arro'chña yečhap sohua'puetso all oteñet Fenice, țarraña allara anetso Creta. O' sechet Sohua'puetso Feniceo țarro'mar allpa' ama tama orrnoteno. Allñapa' allach ya'posa țarremphua o'ch metuen orrnoteñtsopo.

Allempo huomenquëshatañpesnomuet sapo'mar

13 Allempoñapa' o' huapa mōrr po'pshemñtañot, țarraña ñeñtpa' mamesha mōrraren. Allempoñapa' otyeset:

—Te'pa' pocte' o'ch ahuaryerr.

Allempoñapa' o'čho' cheterret ñeñt rremuene' botepa' o'čho' ahuañperryerr. Alloñapa' e'ñe to'pñña'so'mara yoñmañpes allara anetso Creta.

14 Tarraña e'ñe o'chtapa' ahuepa'tcha' huapa ñaña mōrr onnañot allente'tsen anets Creta. Allempoñapa' o'čho' yorrno-tañpesnoma nanac huomenc.

15 Botepa' ama eshcaye' to allenet anmañpenyet allempoña ama erroť yepepa' o' anmañpsey orrno a'yenet.

16 Orrnoñapa' o' čhapatey po'pshemñtañot allo'tsen coñe't rročpe'chañ añ pa'so'cheñ Clauda. O' čhapatey allotemñta'n ama tama hueno mōrr. Allña e'ñe yemueročhenñoña yechant noñt ñeñt cheta'nen atarr bote. Alloťpa' yesha'ch atarr boto.

17 Allempoña o' yesha'tua noñtpa' ñetñapa' huancatse'tet atarr bote attoch amach tare'che orrno. Ñaña ñetpa' añ mecha'tet ñato' botepa' o'ch čhap muelle'sato allo'tsen mueñ ñeñt ama echarroyaye ñeñt otenet Sirte. Ñeñto'marña o' pueyhuet enot shetamuets ñeñt chope'chatene' bote attoch botepa' amach erreneť to.

18 Allempoñapa' ahuepa'tcha' yorrnotañpes nanac huomenc. Tsapañña' chetanatet cargapa' saprochet sa'po.

19 Poma'pamtañoñapa' o' saprotet ñaña ñeñt allpon echyen bote.

20 Allempopa' allponmat ama orrterro atsne' ama't ñaña rantočno, ama't mamesha. Nanac yorrnotañpsa. Atteñapa' yot:

—Te'pa' amach erroťeno yequeshperro.

21 Ñaña allponmat ama es yerro. Allempoña Pablopa' tompa' ot:

—Ñerra'm amach masheñeshacha' satpa'noñe atet notaseñ, amach yonñe Cretoť, te'pa' amate' es yeyore'tenayñe ñaña allempopa' amate' yechencatsre'tañe.

22 Tarraña te'pa' o'ch notas, amach sellcatsto tarro'mar yapa' yequeshpach allohueneý. Añachña chencatsre'tatsa bote.

23 Napa' neñoteñ tarro'mar tsapopa' orrtona mellañoñeñ ñeñt huetsa Yomporeshot ñeñtara Yompor ñeñt puechemer nepene', ñaña ñeñtara ñocop netorrena.

24 Ñeñt norrtoyapa' atet oten: "Amach Pablo pellcatsto tarro'mar pechapcha' allo'tsen añcha'taret all Romo. E'ñe potpa' Yomporpa' o'ch a'natana allohuen ñeñt epaþ sechope'chamþen boto."

25 Ñeñto'marña notenes amach sellcatsto. Tarro'mar napa' neyemteña Yompor, ñerra'm erroten otenpa' atetcha' þa.

26 Tarraña ama't atetpa' chocmach yepotañpsa allempo o'ch yechapmoch patso. Añpa' allohua atet otanet Pablo.

27 Allempoña o' met çharramat puechena pa'tatsmat, atta yetañpena sa'po ñeñt otenet Adria. Allempopa'cho'ña yor-rnotañpesnoma. Allempo çhap rroçh tsapopa' añña ñeñt taruaset botopa' atet otet:

—Ñato' o' yechapmoch allo'tsen pats.

28 Allempoñapa' o' topaso'tet sa'p. Allempoñapa' ahuo't eñochet allo'tsen ma'poch çharra' puechena pechap metro. Allempoñapa' o'cho' ahuerrierr allpononetpa' allpa'cho'ña o'cho' topaso'tuereterr. Allña'pa' otet allo'tsen epoch çharra' puechena cançherr metro. Allempoñapa' añ mecha'tet taye'to' yeto'mañpsa mapyo.

29 Allempoñapa' o'cho' a'shore'tet puequë'nare'tot pa'tatsmaga ñeñtcha' rremue' bote. Allempoña a'shore'tuetpa' o' cohuet ato't puetarena'.

30 Añña ñeñt taruaset botopa' a'suaterret e'ñe a'nahua noñt tarro'mar ñetpa' añ muenenet o'ch caçpa'nmuert alla bote. Ama't ahuepa't a'suaterret noñt pa' ñetpa' çha ottenet ñerra'mrate' po'poñ a'shore'tenet ñeñtcha' rromue' bote poñe'magot.

31 Allempoña Pablopa' eñot Janet atet cotape'chen ñeñt taruaset botopa' atet otan capitán ñaña po'poñeçhno solltarne-sha' atet otanet:

—Ñerra'm ama alla a'pueto botopa' sapa' amate' errotenot sequeshperro ama't pueשהñarrotesa.

32 Allempoña solltarnesha'pa' o' tsorramþset noñt pochar attoch ahuo' a'yeneþ.

33 E'ñe puetaresuanetsapa' añña Pablopa' atet otanet allo-huenet:

—Te'pa' o'ch serra'muen tarro'mar o' çharramat puechena pa'tatsmat sema'yochreñot po'poñpa' ama semueno, ama es serreno.

³⁴ Ñeñto'marña o' nota'muenes serra'muen attoch çherr sehuamenc, tarro'mar amach eseshas chencatso, ama't puesheñarrotesa.

³⁵ Ñeñta otuanet o' chetan panpa' o' ma'yocha e'ñe alla all shontena acheñenesha'. Allotpa' shotan panpa' o' rre'.

³⁶ Allempoñapa' o' ye'chatanetpa' o' rret ñamet.

³⁷ Ñeñtey boto'tseney allohueneypa' allo'tsen doscientos setenta seis acheñenesha'.

³⁸ Allempoña ocha'huanet puerrarpa' alla saproteneterr trigopo'r oño attoch o'huañcha' tama eñerrta bote.

Allempo tarampsanet sa'p po'bote

³⁹ Allempoña e'ñe puetaresuenpa' o' entet pats, tarraña ama puentareto ñeñt pats, tarraña allempo o' entet ñaña a'yohuen mueyapo's allñapa' a'yohuen ñaña pueme'tar. Allempoñapa' cotape'chetpa' otet:

—Ñato' yeçhapcha' all allochñapa' allcha' yetsotosa cohuen.

⁴⁰ Allotñapa' tsorro'tet ñaña ñeñt rromuene' botepa' o' a'ypo'ña' nmet alla sa'po. Allempoñapa' o' pueyamperet allo huanquët ahuaña bote puepopaþ. Allempoñapa' echantet ñaña poñe'magoť shetamuets attoch mörppa' o'ch matatan bote. Allempoñapa' o'cho' ahuañpsey pueme'taronet.

⁴¹ Allempoñapa' o' çhap bote all epchacra'stena sa'p all nanac epopa' rroçhoñapa' çha muelle'sattena. Chap all botepa' çha açhtosa poñe'magoť, ama erroť yepere. Arroñña puequë'nare'tot nanac emo'yarertena sa'p. Po'huamencpa' o' tarampsey yebote.

⁴² Allempoña solltarnesha'pa' mueneñ o'ch muetsanatuan ñeñt ayottampsaret taye'to' ñerra'm paťetpa' ahuo'te' yetet.

⁴³ Tarraña capitánpa' nanac mueneñ o'ch a'queshpatan Pablo ñeñto'marña ama muenataneto o'ch muetsanachet. Ateť otanet:

—Ñerra'm esesha'te' eñotene' paťatsapa' o'ch sepata sanom attoch seþchata yomta'n.

⁴⁴ Allotñapa' samña ñeñtes ama eñotenaye paťatsapa' ñato' o'ch sanemyes tabla amapa' po'poñeçhno ñeñt echyen bote, allochñapa' attoch seþchata samña.

Allempoñapa' o'cho' pechatuet allohuenet.

28

Allempo çhapuet coñe't pats pa'so'cheñ Malta

¹ Allempoña o' yequeshpahua allohueneypa' allempoñapa' otyet añ coñe't patspa' año' pa'so'cheñ Malta.

² Añña acheñenesha' ñeñt yeçhetsa allpa' nanac muerapyet ñeñto'marña a'toronayet tso' allcha' yeshotosa, tarro'mar

allempopa' čha huatena o' yesnate't. Tarraña e'ñe cohuen agapapuey allohuen acheñenesha'.

³ Pabloñapa' allenta tsella'tpechospa' o' a'tamo'ye' tso. Allempoñapa' machayota čha'nom shecheþ e'ñe tsoť. Ahuo't atserr e'man tso'pa' o' čha'nompa', čha ačhan Pablo pototpa' alla a'sope'ch.

⁴ Acheñenesha' ñeñť yečhetsy allpa' eñchet Pablo čha a'sope'cheñ shecheþ pototpa' atet otanna'tyeset:

—Añ acheñpa' amtsañte'ca'ye ñeñťo'mar te'pa' ama't o' queshpa'hua sa'potpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra shecheþñapa' o' shora'nerr tso, amaña erroteye' pe ama't mamesha.

⁶ Allempoña acheñenesha'pa' atťa cohueñet Pablo ñato' machayotach añecmuenta potpa' o'ch řaco'ra rromue'. Allempoñapa' o' cohua'huet o'chet ama es atsoto, allempoñapa' o' cotape'cherret po'poñ, atet otet:

—Añpa' po'ñočh Paretste'.

⁷ Ñeñťña ane'tañtetsy allpa' añ pa'so'cheñ Publio. All yečhap yapa' allotpa' allame'ttsa all yečhena Publio, allpa' allo'tsen po'patseñ. Ñapa' o' agapapuey e'ñe cohuen ñeñťo'mar allpa' yema'pamuetnom pa'paclo.

⁸ E'ñe allempopa' añña Publio pomporpa' čha atsna'ten, nanac huoraten ñaña čha chemotse'ten, ama achñeno. Allempoña Pablopa' o' ahuo' o'ch enteña'. Allempoña čhap Pablopa' ñaña'pa' ma'yochañpsosya. Allempoña Pablopa' o' a'płlana'čhpa' añña ñeñť atsna'tetspa' allenta correna.

⁹ Allempoña e'mare'ch allohuen acheñenesha' atet o' pōsa Pablopa' huapyesa acheñenesha' ñeñť atsna'tyets. Ñetpa'čho'ña e'ñe a'crratyesuanet Pablo.

¹⁰ Ñeñťo'marña acheñenesha'pa' shonte' regala'yesyet pa'namen. Ñaña allempo ahuañperryerr botopa' nonayet allpon ñeñť yepalltena.

¹¹ Allempoña o' met ma'pma arrorrpa' o' alla ahuañperryerr po'pnañ boto. Ñeñťña botepa' ñeñť cohueñe' o'ch metuen allempo orrnoteñtsopoten. Añ botepa' ñeñť huapatsa ahuaña Alejandriot. Ñaña añ botepa' echenan poñe'magoť acheñma't ñeñť epuesha' ñeñť toma'ntatenet po'yosret; ñeñťpa' añ pa'so'cheñ Cástor; po'psheñeñpa' añ pa'so'cheñ Pólux.

¹² Allempopa' arr yetstnoma all oteñet Siracusa. Allña'pa' alla yema'pamuetnom.

¹³ Allotpa' allampaño'mara yocdato'pñe'ch pats, atteñapa' yečhap all oteñet Regio. Allpa'čho' all yetstnoma. Tsapañapa' o' mōrrarenerr mamesha'tets. Morrpa'

arroġ huena yecha'ñeñta'not. Allempoñapa' o'ċho' alla ahuañpenyerr. Allotñapa' e'ñe puepomtañocma yeċhap all oteñet Puteoli. Allpa' all yetsotosa.

14 Allñapa' yentos ñeñt ame'ñetsa. Ñetpa' a'patapyet all yeċhenet, ñeñto'marña yapa' alla yecanċherrmatnom ñesheto. Attotapa' o'ċho' yeya'rrota ñaña Romo.

15 Añña ñeñt ame'ñetsa all Romopa' ahuo't e'mare'tyete o' yeċhap allampañoapa' allenta't onāċha'tet o'ċh poctapyet. Puesheña'tetspa' o' ċhapuet all oteñet Foro ñeñtara Apio. Po'potantaññaapa' alla't ċhapyeset rrocho all oteñet Ma'ppahua Pocoll. Allñapa' all pocta'yete. Allñapa' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo.

16 Allempoña o' yeċhap Romopa' atet otapet Pablo yeċhosepa'to' ellonet, tarraña ċhocma net solltar ñeñtċha' cohuañpse'.

Allempo Pablopa' serrpare'tatosanet allempo ċhap anetso Romo

17 Poma' pamtañoñaapa' añña ñeñt añċha'tarettetsa judioneshacop allpa' Pabloñaapa' agotatanet allohuenet. Allempoña o' e'ñe apċha'huetpa' Pabloñaapa' atet otanet:

—Masheñeshacha', ama't napa' ama erroġ nepeñeña judionesha' ñaña ama ċho nehuapore'tateno ñeñt atet yeċhe't yatañneshañpa' te'ña judionesha'pa' o' atta rroma'net all Jerusaléño, o' pomnet allo'tsen romanonesha'.

18 Ñetpa' a'pito'tare'tnet, tarraña amaña entoneto atto alloch muetsatnet, ñeñto'mar ñetpa' mueneñetañ o'ċh a'rroyernetañ.

19 Tarraña judionesha'pa' ama pocteye' eñċheto o'ċh a'rroyernet. Ñeñto'marña napa' nesecha o'ċh entatenneta' añċha'tareġ arr Romo. Tarraña napa' ama ċho notteñe'cheñe namo'tsna'tar.

20 Ñeñto'marña te'pa' o' nagotatuas allochñapa' o'ċh neserrpare'tatuas ñeñt atet pennet. Ñaña napa' name'ñena atto ñerra'm yerromapa' Yomporpa' o'ċh tantaterrey esempohuañen. Ñeñto'marña te'pa' o' sentuan napa' ehucareten, tarraña ama't allohuen judionesha'pa' attecma ame'ñenetañ.

21 Ñetñapa' atet ochet Pablo:

—Tarraña yapa' ama yaguëna' carta Judeot ñeñt atet otenet pōcop. Ñaña ñeñt ame'ñetsa ama't huapyenet arrpa' ama esesha' erroġ otetso pōcop ñeñt ama cohuenayaye.

22 Yapa' aña yeñoten po'ñoċh ċhocma e'moñe'teñet erracmañen ñeñt cotene' Jesús pocta'pña. Ñeñto'marña yapa'ċho'ña

yemneñ te'pa' o'ch ye'mñotaḗ yaña errotenete' ḗoctape'chen ḗa.

²³ Allempoñapa' a'pochtachet allempoch huačha'tet allo'tsen Pablo allempo'ch serrpare'tatanet. Allempoña o'čhap allempoch huačha'tetpa' allempopa' shonte' acheñ huačha'tatsa Pableshe. Allempoña Pablopa' e'ñe ellapen serrpare'tatahuet; a'poťanet atet pena Yompor po'cohuenña ñeñť atto ayochreshattena ña. Ñaña lleyatyesanet Moisés po'ñoñ all oten atetcha' ḗa ñeñťcha' Cristotats. Ñaña lleyatyesanet po'ñoñ ñeñť a'mťaye't ahuat Yompor po'ñoñ all oten ñaña atetcha' ḗa ñeñťcha' Cristotats. Ñapa' nanac mueneñ o'ch ame'ñatanet atto Jesúsapa' po'ñočh ñeñť Cristotats.

²⁴ E'ñe allempopa' ame'ña'yesyet puesheña'tets, țarraña po'potantañpa' ama es ame'ñatso.

²⁵ Atteñapa' ñañeñeta achmāre'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ñočh atet ote't Isaías ahuat allempo Parets Puecamquēñoťpa' otan satañneshañ:

²⁶ O'ch soteña' judionesha' añ ñoñets: Ama'tcha' čhocma e'mñotenetpa' ama't ahuatapa' amach čhapaneto pueyočhreto. Ñaña ama'tcha' čho es entuetpa' amach čhapaneto pueyočhreto.

²⁷ Alloťpa' o'ch sotenaneta', te'pa' pueyočhretopa' nanac echarrtenet attoch amach es čhapanet pueyočhreto. Te'pa' amach mueneto o'ch es e'mñotet țaye'to' čhapanet pueyočhreto. Te'pa' amach mueneto o'ch es entet țaye'to' čhapanet pueyočhreto. Attetach amach es coťape'cherreto nocop ama't mamesha attoch na'queshḗaterranet. Añpa' allohua atet ote't Isaías ñeñť a'mťaye't Yompor po'ñoñ ahuat.

²⁸ Allempopa' alla otterraneterr Pablo:

—Te'pa' o'ch neñotatas añ, țayoteñ Yompor po'ñoñpa' o'ch yeserrpare'tach po'poñ acheñ ñeñť ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeñoťetpa' queshperretča'.

²⁹ Ñeñťa otuanet Pablopa' añña judionesha'pa' e'ñe pachmāre'tanna'teñoťetpa' o' ahuanerret.

³⁰ E'ñe epa char all yečha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñť huapyestse't.

³¹ Ñaña e'ñe cohuen serrpare'tatanete't atet pena Yompor po'cohuenña atto ayochreshattena ña, ñaña yečhatanete't atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑT QUELLCAN ROMO' MARNESHA' ROMANOS

Atto Pablopá' quellcanet carta añecop ñeñt ame'ñetsa netso Romo

¹ Masheñeshacha' ñaña nochaneshacha' ñeñtes allohuenes yeçheta anetso ñeñt añ pa'so'cheñ Roma ñeñtes Yomporpa' ahuo't nanac muererra, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablon sequellquene'ña añ carta, ñeñten nanac torretsa Jesucristocop tarro'mar ñeñtecopña llesenserrenña Yompor, nach ma'yochrerraya serrpare'tyene' añ cohuen ñoñets ñeñt huetsa Yomporeshot alloch po'ñoçh yequeshperra.

² Añ cohuen ñoñetspa' ñeñtara ñoñsor ñeñt ama't ahua't Yomporpa' e'ñe eñotatuane't ñeñt a'mta'yese't po'ñoñ ñeñtcha' atet perrnay te' añeño. Ñeñto'marña ñetpa' quellca'yese't ñeñt atet otanete't Parets.

³ Ñaña añ cohuen ñoñets alloch yequeshperra, ñeñtpa' añ serrpare'ten Jesucristo ñeñt Puechemer pen Yompor. Tarraña allempo acheñetos arr patsropa' ñapa' e'ñe David po'mrenño't eñalleta, ñeñtara David ñeñt añcha'tarettatse't ahua't.

⁴ Tarraña Parets Puecamqueno'tpa' nanac ahua-mencattache't añecop ñeñt cohuenetyetsa Partsocop. Ñaña chemerrña allempo Pomporpa' ahuo't tantater po'rromño'tpa' allempoña e'ñe eñotuare'tta ñapa' po'ñoçh Yompor Puechemer ñeñtara Jesucristo ñeñt Yepartseshar yepen.

⁵ Ñaña yame'ñeño't ñeñtara Jesucristo, Pomporña e'ñe puemuereno'teypa' ahuo't apuey llesens, allochña' yach ame'ñatyenahuet ama't erraparen allohuen anetso'mar. Attochña e'ñe cosha'yehñañet Yompor Puechemer.

⁶ Atet ñerra'm sa ñeñtes yeçheta Romo, sapa'cho'ña ahuo't sa'hua'ñare'terra attoch soçter Jesucristo.

⁷ Te'pa' e'ñe nehuomcha'teño'tes sa, napa' o'ch notas: Yomporpa'chña sebensare'tañpene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyoçhro allohuenes.

Atto Pablopá' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteñoť Jesucristopa' chocma neparasyoso'teñ Yompor allohuenacpas, tarro'mar ora allemeñ anetso'marpa' chocma serpare'tyenet atto sapa' ahuo' e'ñe cohuen same'ñena.

⁹ Yomporpa' e'ñe eñotenen, napa' chocma nema'yochena socop. Ñaña añ Yomporpa' ñeñña nanac nesherven, e'ñe neyočhrocmañen neserrpare'tateñoť po'ñoñ, ñeñť atet pernay Jesucristo ñeñtara ñeñť Puechemer pen ña.

¹⁰ Napa' chocma nenamueñ Yompor attoch ama't esempopa' o'ch nabchensa' ñerra'm ñach muenats.

¹¹ Napa' atarr nemneñ o'ch nabchensa', o'ch neyčhatensa' attoch Parets Puecamquëñoťpa' allote' sesen huomenctatsa ñocop.

¹² Ñehua, añ noten, e'ñe yame'ñeñoť parropa' e'ñe pocte' o'ch yeyčhatanna'ta ñeñť cohuentetsa Yomporecop attoch yeyenpanna e'ñe yame'ñeñoť Yompor.

¹³ Ñaña te'pa' o'ch masheñeshacha' ñaña nočhaneshacha' notas, ama't ahuañmo'choteñ nesechenañ o'ch nabchensa' tarraña teme'ttsenpa' ama erroť nepeñe. Napa' añecop nesechena ñaña attoch seshopa'čo'ña o'te' name'ñateña' acheñenesha' atet neña'yena po'poñ anetso'mar.

¹⁴ Tarro'mar ñeñť poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñť nanac ayčhatareťtetsa amapa' ñaña acheñenesha' ñeñť ama ayčhatareťeyaye, ama't ñaña acheñenesha' ñeñť nanac es eñotenet amapa' ñaña ñeñť ama es eñotetso.

¹⁵ Ñeñťo'marña e'ñe nocsheñeshocmañen nemneñ o'ch neserrpare'tatas saña añ cohuen ñoñets alloch yequeshperra ñeñtes yečhetsa anetso Romo.

E'ñe añ yame'ñeñoť ñeñť cohuen ñoñets, ñeñťpa' allochña Yomporpa' a'queshpaterrey

¹⁶ Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeñťpa' ñeñña Yompor po'huamenc alloch a'queshpaterrey allohueney ñeñťey ame'ñenaya ña, ñeñťey judioneshay e'ñe yanom allotpa' ñaña ñeñť ama judioneshayaye.

¹⁷ Ñaña añ ñeñtara cohuen ñoñetspa' eñotateney, e'ñe yeyemteñoťa Jesucristopa' Pomporñapa' e'ñech pocte' enteney, allochña'p' allo'nach yesen e'ñe yemtenaya ña. Tarro'mar añpa' ñeñtara anuareť ahuaťoteñ e'ñe Yompor po'ñoño allohuenacpay, ñeñť otets atet: Ñeñťey ame'ñenaya

Yomporpa' e'ñech pocte' entuene y ñaña e'ñe yeyemteñoť
ñapa' yañapa' corretsayach, ama't tayoten errponohuañen.

Atto allohuen acheñenesha' atpare' chete't Yompor

18 Tarro'mar yapa' yeñoteñ Yompor ñeñť pue'ntaño'tsen
e'ñe po'yorochenño'tsa'yena allohuen acheñenesha' ñeñť ama
pocteye' es peneto ñocop, ñeñť sosya'tsañach eñotyenet. Ñaña
e'ñe atet puepatse'teñoťetpa' ñeñťaña ama muenatenahueto
o'ch orrtanet Yompor po'cohuenña ñeñť e'ñe po'ñočh.

19 Ñehua, ama't sosya'tsañach eñotyenetpa' tarraña ñetpa' e'ñe
eñotueñet ñaña atet penaña Yompor, tarro'mar ñapa' ñaña
eñotatenahuet e'ñe pueyočhreto ñeñť atet penaña ña.

20 Ama't yeñoteñ Yomporpa' ama entpahuoyaye tarraña
yenteññañ pueyečcatarot po'partsoña ñaña allotña
yenteññañña po'huomenc atarr. Ama't ahuatoteñ allempo
e'ñe errte' yečcatene' pats, allotēña yenteññañña po'ñočh
po'partsoteña ñeñťña' errponohuañen. Ñeñťo'marña
acheñenesha' ñeñť yečhene' sosya'tsañpa' amate' errotenot
oteto amo' eñoteñetoña ñeñť atet penaña Yompor
po'partsoteña.

21 Ñaña ama't eñoteñetañ ñeñť atet penaña Yomporpa'
tarraña ama mecha'na'teñetoña Parets, ñaña ama
coshateñeto ñeñť ora añecop. Attoña o'huañcha' cotape'chenet
ñeñť sherbets Partsocop. Ñeñťo'marña pueyočhretopa'
o'huañcha' eñoteñet ñeñť cohuentetsa Yomporecop; atet
ñerra'm pueyočhretpa' nanac a'checmetam̄psaret.

22 Ama't otenetañ atarro' es eñotenet, tarraña po'ñočh ñetpa'
ahuo't atta allo'na otatsñaťetnenet.

23 O'huañcha' cosheñet ñeñť po'ñočh Parets ñeñť ama ar-
romñaťeshayaye. Añachña e'ñe coshenet ñeñť yečcatyenet
ñet. Tarraña ñetpa' e'ñe arromñaťoťa atet es yečcatyenet atet
ñerra'm acheñma't ñaña otma't, ñaña po'yallopma't ñaña es
berrma't. Ñetñapa' ñeñťach e'ñe ma'yochyenet ñeñťo'ña e'ñe
po'yomporer penet.

*Atto acheñenesha' allo'na senet muenatse'tyese' ñeñť nanac
sosey enten Yompor*

24-25 Attoña o'huañcha' ame'ñeñet ñeñť po'ñočh Parets,
añachña ame'ñenet ñeñť ama po'ñočhoyaye. O'huañcha'
ma'yochēñet ñeñť e'ñe Yompora', añachña ma'yochēññañet
ñeñť e'ñe ña pueyečcatuar. Ñaña o'huañcha' sherbeñet
ñeñť e'ñe Yompora', añachña sherbeññañet ñeñť e'ñe
ña pueyečcatar. Tarraña Yomporepa'chña ñapueť
aye'chočhtatarettatsa tayoteñ ama't errponohuañen. Ñeñťpa'
atetepa'ch. Tarraña atto a'ypo'ñeñet Yomporpa' ñapa'cho'ña

e'ñe pa'ypo'ñeñoñanet ña'ñapa' ahuo't muenatyesanet o'ch allo'na senet muenatse'tyeset ñeññ nanac sosey enten Yompor. Ñeññ atto muenatse'tyenet atto o'ch agapannenet, ñeñño'tpa' nanaccha' apenco'chen ye'chenet.

26 Ñeñño'marña Yompor e'ñe pa'ypo'ñeñoñanetpa' ahuo't muenatanet o'ch allo'na senet muenatse'tyestset ñeññ nanac apenco'chen enten ña. Attoña ama't coyanesha'pa' o'huañcha' aguënan puerrollar atto ñeññ e'ñe pocte' atet anareteyeñ. Ñagattsetach muenannetset o'ch agapanna'tyenet ñeññ e'ñe parro pacmacmuet. Ama't ñeññpa' ama atteye' anareteye.

27 Ña'ña ama't yacmapa' attec'mach penet. O'huañcha' aguënan puetapor atto ñeññ e'ñe pocte' atet anareteyeñ. Añachña atarr muenen o'ch aguënan pacma e'ñe ñagattsa pacmacma, ama't ñeññpa' ama atteye' anareteye. Ñeññ atet p'annenet yacma parro yacmacmapa' ñeññpa' nanac apenco'chen enteñ Yompor. Ñañeñetach coñchatetset ñeññ atet p'atse'tyenet.

28 Attoña ama't mamesha o'huañcha' mueneñet o'ch yerpa'pesyet Yompor. Ñeñño'marña Yomporña'pa' pa'ypo'ñeñoñanetpa' ahuo't muenatanet o'ch cotape'chatse'tyeset ñeññ ama pocteye' enteno ña. Añachña p'atse'tyenet ñeññ ama a'pahuoyaye.

29 Añachña nenet pueyo'chreto ñeññ esocmañen ñeññ ama't mameshapa' ama pocteyaye ñeññara pa'namen sosya'tsañe'chno. Ñeññpa' añe'chno: agapanneñets ñeññ ama puerrollareyaye ña'ña ñeññ ama puetaporeyaye, ña'ña cotape'chatse'tyeñets ñeññ ama cohuenayaye, ña'ña ye'chatse'tyeñets, ña'ña ye'moñe'tanneño'tpa' o'ch erro't ye'poñ po'psheñeñ, ña'ña yeye'chapreteño'tpa' o'ch ye'moñe'ch po'psheñeñ, ña'ña muetsanna'teñets, eñoseñe'cheñets, ña'ña shecanna'teñets, ña'ña atsrre'mo'chen entanna'tueñets, ña'ña a'metam'psare'tanna'teñets,

30 ña'ña sasare'tanna'teñets, ama't Yomporpa' ello e'moñe'teñet, ña'ña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ellopa' ommo'chenetcha'. Añach e'nyenet ñeññ ama cohuenayaye, attotcha'ña ama ame'ñeñeto ama't pomporet ama't ña'ña pachoret.

31 Amach chenanelo pueyo'chreto ñeññ cohuentetsa Yomporecop, amach a'poc'tateneto po'ñoñ ñeññ atet otenet. Amach es amorrentenaye' enteneto ama't mamesha, amach es a'pretne'nyaye' enteneto ama't mamesha, ña'ña amach es amuerenaye' enteneto ama't memesha.

32 Ñeñt̄ p̄atse'tyetsa atetpa' ama't eñoteñetañ e'ñe Yomporeshot̄ anaretetua ama't coñcheñets añecop ñeñt̄ p̄atse'tyetsa atetpa' tarraña ñetñapa' ñeñtarach atet p̄atse'tyesnenet. Ama't pamo'tseshetpa' ñerra'm e'ñe attecma p̄ohuenet ñametpa' chemerrña allempopa' ñeñtach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

1 Ñeñto'mar te'pa' o'ch notas allohuenes ñeñtes judioneshas, ñato' sapa' chate' sotenapañ sapa'cho'ña año'te' atteye' seycheno sosya'tsañ atet pena po'potantañ. Tarraña amate' errotenot̄ soto atet tarro'mar allohueneypa' e'ñe attecma yepena. Ñerra'm cha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tsenoteya ñeñtey atet otets.

2 Tarraña ama't atetpa' yeñoteñ Yomporpa' chocmach tsa'taterrana allohuen ñeñt̄ atet es p̄atse'tyets, errotencha' e'ñe pocte' ent ña.

3 Sapa' chate' sotenapañ sap̄tate' atarr morrentensa Yompor, amachña tsa'taterrso sa, ama't sapa'cho'ña attecma sepatse'tyen sosya'tsañ ñeñt̄ atet pena po'potantañ, tarraña sapa' cha sotenanet ñetpa' amo' cohuenayayeto.

4 Amapa' sapa' chate' sotenapañ Yompor puemuereñot̄ nanacpa' amach tsa'taterrso tarro'mar teme'ttsen ama erro't penso, at̄ta cohuenes. Ama't seño'teñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes.

5 Tarraña ñerra'm at̄ta se'charrtena seyo'chro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney errotencha' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe eñotueret ñeñt̄cha' e'ñe atet tsa'tatuerrya e'ñe puesheña'ttsoy, ñeñt̄pa' e'ñech pocte'.

6 Ñaña tsa'tuerryach allohueney ñeñtey corra'yetsa arr patsro erro'tente' ye'pa'yena e'ñe ñocop.

7 Ñerra'm chocma yoc̄tape'chen e'ñe cohuen Yomporecop, ñaña ñerra'm chocma yoc̄teññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt̄ alloch yocrrerra errponohuañen, allempoña po'ño'chpa' aphuerreycha' attoch yapa' corretsayach yoc̄sheñeshocmañen tayoten e'ñe errponañohuen.

⁸Tarraña ñerra'm yapa' aña cohuen yenten ñeñt yemnen ya, Yomporña po'ñoññapa' ñerra'm cha yatpare'teñ, aña yocten ñeñt ama cohuenayaye Yomporecoppa' ñaña po'yoroçhenñoç po'ñoçhpa' çhocmach tsa'tatuerrya.

⁹A'coñchatareñterrach allohuen ñeñt coñene' ñeñt ama cohuenayaye arr patsro, amueroçhtatareñterretcha' allohuenet ñeñt atet petset, ama't ñanom atet ñerra'm judionesha' allotpa' ñaña ñeñt ama judioneshayaye.

¹⁰Tarraña allohuen ñeñt coñene' ñeñt cohuentetsa Yomporecop arr patsropa' Yomporñapa' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyoçhreto. Atetcha' perran allohuen ñeñt e'ñe cohuen corra'yetsa, ama't ñanom atet ñerra'm judionesha' allotpa' ñaña ñeñt ama judioneshayaye.

¹¹Tarro'mar Yomporpa' ama ñapña judionesha' morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñapña coñchatenano ñeñt ama judioneshayaye, ñapa' ama't judionesha'pa' e'ñech coñchatuer.

¹²Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ coñenet ñeñt ama cohuenayayepa' elloña ñetpa' chenca'huerretcha', tarraña ñetpa' amach aye'e' a'chencaterrahueto Moisés po'ñoñ. Tarraña judionesha'ñapa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahuet ñeñfara Moisés po'ñoñ.

¹³Tarro'mar Yomporpa' ama pocteye' entenano ñeñt atta e'muene' orrena po'ñoñ all serrpare'teññañet. Añña poctey enten Yompor, o'ch atet penet ñeñt e'ñe atet oten po'ñoñ.

¹⁴Ñehua, o'ch yoctape'ch ñeñt atet pena acheñenesha' ñeñt ama judioneshayaye, añenesha' ñeñt ama echenaye Yompor po'ñoñ. Ñetpa' ama't ama echeneto Yompor po'ñoñpa' errotenopa' e'ñe pueyoçhretot poctape'cheñoçetpa' ahuo'tcha' atet pa'yenet ñeñt e'ñe cohuentetsa Yomporecop, ñeñt e'ñe atet o' anuareñtetua Yompor po'ñoño ñeñt atet poctetsa ñocop. Ama't ama echeneto Yompor po'ñoñ ñeñt atet aquellcaretpa' tarraña pueyoçhretoñapa' e'ñe eñoteñet erra'tsente' ñeñt cohuentetsa.

¹⁵Ñeñt atet pa'yene' ñeñt cohuentetsa, yapa' yeñoteñ pueyoçhretoña eñoteñet ñeñt atet cohuentetsa, ñeñfara ñeñt atet oten Yompor po'ñoñ ñeñt o' anareñtetua. Ñehua, o'ch yetma'ntacha atet ñerra'mrate' Yompor po'ñoñpa' e'ñech pueyoçhreto aquellcareñtena. Tarro'mar e'ñe ñet

pueyočhretoŧpa' eñotenet ñerra'm esempopa' o'ch pōhuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen.

16 Tarro'mar yeñoteñ esempohuañen Yomporpa' eñotatuerreycha' ñeñt ora allpon ya' nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtpa' e'ñe atet ñeñt o' notuas ñeñtara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñoietpa' nanac ayohuarettenet

17 Te'pa' o'ch alla neserrpare'taterrser ñeñtes judioneshas. Ñehua, sapa' čha soten sapa' judioneshaso' ñaña aña atarr seyemtena ñeñt nonaset Moisés, ñaña atarr sommo'chena tarro'mar sapa' soteneñ e'ño' puechemer penes Yompor.

18 Ñaña soteneñ e'ño' señoetueñ ñeñt atet muenen ña. Ñaña po'ñoñ ñeñt atet anaretpa' ñeñto'ña seyčhatene' ñeñt atarr cohuentetsa Yomporecop.

19 Ñeñto'marña sapa' soteneñ, po'ñočh atarro' es señoten, attoch seyčhateñ po'potantañ ñeñt ama es eñoteneto. Čha sottena ñerra'm ñeñteso' echa'nene' ñeñt ama entetso, amapa' ñerra'm ñeñteso' čhoyo'tam̄pene' ñeñt chopeñe'chets checmeto.

20 Ñaña sapa' čhate' sotenapañ po'ñočh atarrte' cohuen seyčhateñ po'potantañ ñeñt ama eñotenaye ñeñt cohuentetsa, ñeñt atet petsa ñerra'mrrate' cheshatollesha' ñeñt ama eñotenana' ñeñt cohuentetsa. Ñaña sapa' soteneñ po'ñočo' esocmañeno' señoetuahuen, ora ama't allpon ñeñt po'ñočhotets, tarro'mar sapa' secheññaño' Yompor po'ñoñ ñeñto'ña esocmañen señoetatene'.

21 Ñehua, te'pa' o'ch notas, sapa' ama't o' atarr seyčhateñ po'potantañpa' tarraña amaña seyčhatenoña e'ñe sañeña ñeñt cohuentetsa Yomporecop. Ñaña sapa' ama't o' atarr seserrpare'ten atto ama etanna'tpahuo, tarraña sañapa' čhocma setanna'tyena.

22 Ñaña sapa' ama't seserrpareneñ atto amo' achtapret-pahuo taporets, tarraña elloña sapa' čhocma sapretannena setapor. Ñaña sapa' ama't setsena'teneñ ñeñt ayečhcataret, tarraña sañapa' ahuo't seyorayesña puerahuot ñeñt atarr cočhnesha' ñeñt allo arca'tam̄penet ñeñt po'yoser penet. Ñeñt atet etetspa' ñeñtpa'čo'ña attecma enteñ Yompor ama ařapahuoyaye atet.

23 Ñaña sapa' nanac sommo'chena tarro'mar sapa' secheññaño' Yompor po'ñoñ ñeñt atet anaret ama't

ahuatoteñ. Tarraña ama't atteñpa' amaña atteye'ña sepeno ñeñt atet oteney añ ñoñets ñeñtcha' atet sepa. Yomporñapa' cha sottatateñ ñerra'mrrate' ñapa' ama es eñotpeno ama't mamesha.

²⁴ Ama't atet oten Yompor po'ñoñ ñeñt atet anuaret ahuatoteñ, ñeñtpa' atet oten: "Ama't ñeñt ama judioneshayayepa' achmāre'teñet Yompor e'ñe sesharmorot, e'ñe sepatse'tyeñoñ ñeñt ama't mameshapa' ama pocteye' enteneto ama't ñame'ttseta."

Atto ñeñt po'ñoñ puechemer pen Yompor

²⁵ Po'ñoñña ñerra'm añ semnen o'ch setsoteññañ Moisés po'ñoñ ñeñt atet anuaretpa' añ poctetsañ o'ch setsorranena, tarro'mar ñeñtpa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt atet oteney ñeñtcha' atet yeppa' ama't atto o'sa'tsorraretetuapa' ñeñtpa' e'ñe orrena, attecma ñerra'm ama atsorrareteyayye.

²⁶ Ñeñto'marña yeñoteñ ñaña, ama't ñeñt ama atsorrareteyayepa' ñerra'm añ atet penet ñeñt atet oteney Yompor po'ñoñtpa' ama't ama atsorrareteyayye, Yomporñapa' atetcha' enteney ñerra'm e'ñe puechemer peney po'ñoñ. Attecmach enteney ñerra'mrrate' ñeñt atsorrarete, tarraña e'ñech puechemer perrey po'ñoñ.

²⁷ Ñeñto'marña yeñoteñ ama't ñeñt atta corretsa atet eñalleta, ama atsorrareteyaye, ñerra'm añ atet penet po'ñoñ ñeñt atet oteney Yompor po'ñoñtpa' ñetñapa' pencaterrsetcha', tarro'mar ñetpa' ello metanennaset ñeñt allpon cohuen o' sephua Yomporecop. Tarro'mar sapa' satpare'teññañ po'ñoñ ñeñt atet anaret. Metanenset sa, ama't sapa' secheññañeñ Yompor po'ñoñ ahuatoteñ, ñaña ama't sapa' e'ñe atsorruareteseñ.

²⁸⁻²⁹ Ñeñt e'ñe po'ñoñ puechemer pen Yomporpa' ama ñapñayaye ñeñt eñalletetsa judionesheshot. Añña po'ñoñ e'ñe puechemer pen ñeñt e'ñech cohuen cotape'chenet pueyoçhreto ñocop. Ñaña tsorranneñets e'ñe atta yechtsopa' ama esoyaye Yomporecop. Añña sherbets Yomporecop atto cohuen es yoctape'chen e'ñe yeyoçhrot. Ñaña ñeñtpa' huena e'ñe Parets Puecamquëñoñ, ama añoñeye' hueno o'ch e'ñe yeppa'yesua ñeñt aquellca'yesarete eshecchña puechemer perrey Yompor. Ñerra'm atetcha' yoctape'cherr cohuen yeyoçhro Yomporecoppa' attochña Yomporpa' e'ñech pocte' entuerrey, ama'tcha' acheñenesha'pa' ama pocteye' entenyeto.

3

¹ Te'ña sapa' chate' sotenapañ judionesha'pa' amate' atarr sherbeno amapa' chate' sotenapañ ñeñt' atto tsorrannenetpa' amate' es sherbeno. Tarraña ñeñtpa' ama atteyaye. Po'ñoçhca'ye atarr sherba'yen judionesha'.

² Ñehua, o'ch yot ñanom ñeñt' atto sherbenet. Ñetña aparetet Yompor po'ñoñ ñanom atto ñetcha' a'potenet ñeñtara ñoñets.

³⁻⁴ Tarraña ama allohuenacmaye' ame'ñeneto ñeñt' atet oteney Yompor po'ñoñoñ. Tarraña ama't atet pohuanenetpa' amate' errotent' a'psateretoña Yompor ñeñt' atet oteney po'ñoñoñ, ama't mamesha. Ñapa' chocmach a'pocatuonay po'ñoñ ñeñt' atet o' otueney. Ama't allohuen erra'tsen acheñerpa' ama'tcha' ama a'pocatuonay ñeñt' atet eñorenepa' tarraña señoche'pa'ch, Yompora e'ñe ñapta, ama puenesho po'ñoñ. Ama't atet oteney Yompor po'ñoñ ñeñt' atet aquellca'huaret' ahuatoteñ, ñeñtpa' all atet oteney:

Allohuen acheñenesha'pa' eñotetepa'ña atto Yomporpa' ama puenesho po'ñoñ, ñaña ñerra'm esesha' atta otatse'tyets atto Yomporpa' año' pocteye' es peno, tarraña eñochetepa'ña Yomporña e'ñe pocte' es pets.

⁵ Ñeño'mar napa' o'ch notas, e'ñe ya yepeñoñ ñeñt' ama cohuenayaye, attoña yorrtateññañ Yompor ñapa' ñaña e'ñe cohuenare' es pa'yets. Ñehua, ñerra'm yo'chñaroñ atet yeyenpapreteñ Yompor orrtate' po'cohuenña'pa' sañapa' chate' sotenapañ, Yomporpa' amate' pocteyayeña o'ch tsa'taterrya yo'chñaro'mar. Ñehua, aña'pa' atta notenes atet tarro'mar ñeñtpa' atet eñosatse'tyen acheñenesha'.

⁶ Po'ñoçh yeñoteñ e'ñe pocte' atetcha' tsa'taterrya Yompor. Tarro'mar ñerra'm ama pocteyaye ñeñt' atet pena Yomporpa' ñeñt'epña'pa' amate'cho' errotent' eñoteñe ñaña atetcha' entyeyesuerrey allohueney esempohuañen.

⁷ Ñaña yaña ñerra'm esempo yeñosatse'tyen es ñeñt' ama atteyayepa' attoña yorrtateññañ Yompor ñapa' ñaña e'ñe po'ñoçhare' ñeñt' atet es otyen. Ama't e'ñe yeñosatse'teño'tpa' nanaccha' yecohuentateññañ Yompor. Ñehua, ñato' sapa' chate' atet soten, ñerra'm atet yeyenpapreteñ orrtate' Yompor po'cohuenña, amate' pocteyayeña o'ch attera enteney Yompor ñerra'm ñeñtey atarr sosey es pa'yets.

⁸ Sapa' aña sotatse'tyen, ama'tpa' a'papo'ch ñeñt' ama cohuentetsonña allochña'pa' e'ñe atto'tpa' o'ch yorrtaten ñeñt' cohuentetsa. Puesheña'tets acheñ e'ñe pueyllatate'teñme'chatset neñoña'pa' otyenet, ñeñt'ña'cho' atarr otenña Pablo. Tarraña Yomporcha'ña tsa'taterrahuet

ñeñt atet otatse'tyenet. Ñaña ñeñtpa' e'ñe pocte' atsa'tataretterretpa'chña.

Atto allohueney ñeñtey acheñey chocma ochñañecmay

9 Ñehua, sapa' chate' sotenapañ yapa' po'ñochte' Yomporpa' enteney ñeñtey judioneshay e'ñe cohuenare' es yepa'yen. Ñaña chate' sotenapañ po'potantañ ñeñt ama judioneshayayepa' ñetñapa' amo' atteye' entenaneto Yompor. Tarraña ama't mameshapa' ama atteyaye. Tarro'mar napa' o' neñotatuanmas atto ama't allohueney ñeñtey acheñey chocma ochñañecmay ama't ñeñtey judioneshay. Ama't ñaña ñeñt ama judioneshayayepa' e'ñe attecmay ochñañecmay.

10 Ama't Yompor po'ñoñ ñeñt atet aquellca'huaret ahuatoteña' e'ñe atecma oteney, ñeñtpa' atet oten:

Ama't puesheñarrofeypa' ama eñallyeña ñeñtey e'ñe pocte' pene' ñeñt poctetsa Yomporecop.

11 Ñaña ama't puesheñarrofeya ama chennayo yeyochro attoch yeñotoñ Yompor po'cohuenña. Amachña añeye' ye'нено ñeñt atet muenen Yompor, ama't puesheñarrofeya.

12 Ama't allohueney ahuo't yesa'neñ Yompor, ama't mamesha o'huañ yesherba' ñocop, ama't allohueney. Ama't puesheñarrofeya ama eñallyeña ñeñtey e'ñe cohuen es pets Yomporecop.

13 Atto e'ñe ya yeñosatse'teñoť sosya'tsañechno yeñyañña' cha ottena ñerra'mrrate' apampaña ñeñt atoram̄psaret. Atto yeñen yenamotpa' nanaccha' yeshcannena. Atto yeshquēñ yamo'ts yenamotpa' chach yottena ñerra'mrrate' shechep̄ amtsañep̄ atserr yepene' puenamot.

14 Ñaña ñetpa' añach eñotenet parrnomarña, ñaña chach chemama'tannenet.

15 Ñaña pa'tsrre'mueñoťetpa' machayotach muetseñet acheñ.

16 Pottatse'teñoťetpa' chach nanac muerochtatyeñet acheñenesha', nanaccha' llecateyeñet.

17 Ama't ahuatoteña' ama añeye' yecheneto attoch e'ñe muetsoññoťpa' cohuen yemtannenet.

18 Ñaña ama't mameshapa' amach am̄cha'na'tpahuoye' enteñeto Yompor. Arrpa' allohua ñeñt notenes e'ñe Yompor po'ñoñoť ñeñt atet aquellca'huaret ahuatoteñ.

19 Ñaña yapa' yeñoteñ ñeñt atet otyen Yompor po'ñoñ ñeñt aquellca'huaret ahuatoteña' añecopña oten ñeñt echene' po'ñoñ, amaña añecpayaye ñeñt ama echaye'te po'ñoñ allempo. (Atet ñerra'm judionesha'pa' ama't ahuatoteñ

echeññañet Yompor po'ñoñ, ñeñtara ñoñets ñeñt o' notu-anmas ñorra' arr.) Ñeñto'marña ama't puesheñarroñesa sa ama't ñeñtes judioneshaspa' amate' errotenot soto, sapa' e'ño' cohuen entenes Yompor. Attoña yeñoteñ ama't allohueney ñeñtey corretsa añe patsropa' ama pocteye' entenye Yompor ñeñt atet yeña'yena.

²⁰ Tarro'mar yeñoteñ e'ñe yetsotateñoña añ ñoñets ñeñt atet anaret ahuatoteñpa' amach errotenot ama't puesheñarroñeya e'ñe ya'pocatoña yañeña attoch e'ñe pocte' enteney Yompor. Añecpaña sherbeney añ ñoñets ñeñt atet anaret, ñeñtcha' yeñotate' po'ñoñch yapa' nanac ochñañ enteney Yompor.

Atto Yomporpa' e'ñech pocte' entueney, e'ñe yeyemteñoña Jesucristo

²¹ Tarraña te'ña Yomporpa' o' eñotatey atto ellonetpa' eñall po'poñ attoch pocte' entueney Yompor, ñeñtpa' ama añeyaye o'ch yetsotatuen ora ñoñets ñeñt atet anaret ahuatoteñ. Tarraña Yompor po'ñoñ ñeñt anuaret ama't ahuatoteñpa' ñeñtarecpa eñen añecop.

²² Attochña Yomporpa' e'ñech pocte' entenanet ama't allohuen erra'tsencha' yemtenaya Puechemer ñeñtara Jesucristo. Ama't allohueney attecnoch e'ñe pocte' entueney, e'ñe yeyemteñoña Jesucristo.

²³ Tarro'mar allohueney attecnoch e'ñe yo'chña'tuen. Ama yetsoteññañe Yompor po'cohuenña ñeñt e'ñe atet muenen ña.

²⁴ Ñeñt attoch e'ñe pocte' enteney Yomporpa' ñeñtpa' atet: E'ñe puemuereñotey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñañ. Ñeñtpa' e'ñe atta apuey Yompor, ama eso yetsa'teño ama't coñe'ta.

²⁵ Ñaña Yomporpa' ahuo't orrtatan Puechemer Cristo ñeñtcha' rromosets añe patsro, o'ch ashataretta po'rras e'ñe yocop. Allochña'pa' e'ñech e'shohuaretterra yo'chñañ ñerra'm yeyemterach ña. Ñaña ahuo't atet pa Yompor attoch yeñoñch, ñapa' e'ñe pocte' atet pe't ahuat, tarro'mar acheñenesha' ñeñt corratse't ahuatpa' Yomporpa' atta ahuantenanet po'chñañ, ama ahuenaye' atsa'tatarettuerrito po'chñañ. (Tarro'mar ñapa' e'ñe eñoteñ, Cristochña tsa'tuerrahuet po'chñañet ñamet ñeñt allpon ame'ñaye't ña ahuat.)

²⁶ Ñaña ahuo't atet pa Yompor allochña'pa' attoch yeñoñch ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoñ Jesús.

Atto e'ñe yeña'yeñoña yañeña ñeñt cohuen yenten ya, Yomporña'pa' amach cohuenaye' entenye

27 Ñehua, atto e'ñe yeyemteñoña Cristo Yomporñapa' e'ñech pocte' enteney, ñeñto'marña o'huañcha' eñalleta ñeñt allo yommo'chena e'ñe yañeña, ñeñt e'ñe yetsotateñoñ. Tarro'mar e'ñe yepa'yeñoña yañeña ñeñt e'ñe cohuen yenten ya, Yomporñapa' amach pocteye' entenye.

28 Ñeñto'marña te'pa' e'ñe po'ñoñch yeñoteñ e'ñe yeyemteñoña Cristopa' e'ñech pocte' enteney Yompor ama't ama yetsoteno ñoñets ñeñt atet anaret ahuatoteñ.

29 Ñehua, o'ch noterrser masheñnesha judioneshacha', ñato' sapa' chate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñt ama judioneshayaye. Tarraña napa' o'ch notas, ama't ñeñt ama judioneshayayepa' ñetpa'cho'ña Po'yomporer peñet.

30 Tarro'mar e'ñe patrra Yompor. Ñaña ama't erra'tsena judionesha' ñeñtcha' ame'ñerraya Cristopa' Yomporñapa' e'ñech pocte' entenanet. Ñaña attecma ama't erra'tsena ñeñt ama judioneshayaye ñeñtcha' yemterraya Cristo, ñetpa'cho'ña e'ñech pocte' entenanet Yompor.

31 Ñato' sa te'pa' chate' sotenapañ yeyemteñoñ Cristo, te'pa' Yompor po'ñoñ ñeñt atet anaret ahuatoteñpa' o'ch yehua-pore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñto'marña Yompor po'ñoñpa' atarr sherbeney.

4

Atto Yompor ahuatpa' e'ñe pocte' entane't Abraham

1-2 Ñehua, te'pa' o'ch neyerpatasa ñeñt atet pe't ahuat yatañ Abraham. Ñapa' ama añoñeye' pocte' eñche'teña Yompor e'ñe ñañaña puetsotateñoñ ñeñt cohuen ente't ña. Ñeñto'mar yatañ Abrahampa' ama eñalle ama't mamesha attoch ommo'chena ama't Yomporesho.

3 Tarro'mar yeñoteñ ñeñt atet oten Yompor po'ñoñ ñeñt aquellca'huaret ahuatoteñ. Ñeñtpa' atet oten: "Abrahampa' e'ñe atta yemtane't ñeñt atet ochet Yompor, ñeñto'mar allem-poteñña Yomporpa' e'ñe pocte' eñche't e'ñe atta."

4-5 Ñeñto'marña yeñoteñ yapa'cho'ña ama añoñeye' e'ñe pocte' entenye Yompor e'ñe yetorreñoñ ñeñt cohuen yenten yañeña. Añoñcha'ña e'ñech pocte' enteney Yompor e'ñe atta, ñerra'm esempo yapa' o'ch e'ñe yeyemtera ñeñt atet oteney; allochñapa' attoch e'ñech pocte' entueney ya ñeñtey ochña'tey. Tarro'mar e'ñe pocte' enteney e'ñe atta, ama es yetorreñoñeye' ñeñt cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyey yetaruasotpa' ama

yoteno e'ñe atfa apuenyet quelle, yetaruasotña tsa'tenyet. Tarraña attoch pocte' enterrey Yomporpa' ama atteyaye. Ñapa' e'ñe atfa pocte' enteney, ama e'ñe ya yetorreñoŕeye' ñeñt cohuen yenten ya attoch pocte' enteney Yompor.

⁶ Ñaña ama't yatañ Davidpa' ñeñtcepaña eñose't ahuat. Ñapa' atet ote't nanac cosheñtso'tseney ñeñtŕey e'ñe pocte' enteney Yompor e'ñe atfa, ñeñtŕpa' ama añaŕeyaye o'ch es cohuen yepa'yes e'ñe yañeña.

⁷ Ñeñtŕpa' atet ote't David:

Nanac cosheñtso'tseney ñeñtŕey o' aŕretna'huaretterra yo'chñar, ñeñtŕey amach allo'na yerpuernaye'te Yompor yo'chñar.

⁸ Ñaña nanac cosheñtso'tseney ñeñtŕey Yomporpa' amach allo'na otteñe'chneye yo'chñaro'mar. Arrpa' allohua ñeñt atet ot ahuat yatañ David.

⁹ Ñaña añ cosheñetspa' yeñoteñ ama ñapŕtecpayaya ñeñt judioneshacop ñeñtara ñeñt atsorraretnesha'. Añe CPA'naña ñeñt ama judioneshayaye ñeñt ama atsorrareteyayeto. Ñehua, ñeñtŕpa' attoña yeñoteñ. O' notuanmas atto Abrahampa' e'ñe atfa yemtane't ñeñt atet oche't Yompor, ñeñto'marña Yomporpa' e'ñe pocte' eñche't e'ñe atfa.

¹⁰ Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atsorrarettena', tarro'mar allempopa' ama orrtena' atteñats.

¹¹ Tarraña elloñapa' ahuo't tsorratena Abraham; ñeñtŕpa' ñeñtcha' eñotaterrahuet po'ñoçh Yomporpa' o' pocte' entenan Abraham e'ñe pueyemteñoŕa, ama't allempo ama atsorrarettena'. Ñeñto'marña atet ŕa ahuat attoch pompor ŕohueret ama't ñaña allohuenet ñeñt ama atsorrareteyaye; tarraña ama't ama atsorrareteyayeto, e'ñe pueyemteñoŕeta Yomporpa' e'ñech pocte' entenamet e'ñe atfa.

¹² Ñaña ñeñto'mar atet ŕa attoch pompor ŕohuer allohuen ñeñt atsorrare't, tarraña añach ñapuet pompor perre' ñeñt po'ñoçh yemtenaya Yompor. Tarro'mar ama añe CPaye' pompor peñeto atto atsorrare'ttenet, añecopña pompor peñet e'ñe pueyemteñoŕeta Yompor ñeñt e'ñe atet pete't pompor et Abraham, ama't allempo ama atsorrarettena'.

¹³ Yapa' yeñoteñ ahuat Yomporpa' ahuo't otan Abraham o'ch apuer erracmañen pats allohuen puechemereshohuen esempohuañen. Ñaña atet otan Yompor Abrahampa' ama puetsotateñoŕeye' añ ñoñets ñeñt atet anare't ocheña Yompor. Añña e'ñe pueyemteñoŕa Yompor atet och, tarro'mar Yomporpa' e'ñe pocte' eñch.

14 Ñerra'm po'ñoçh yetsotateñoña añ ñoñets ñeñt atet anaret aphuerryeñ añ patspa' yapa' e'ñe'e' orrena yeyemteñañ Yompor; tarro'mar ñerra'm atteña' Yomporpa' amate' a'pocatanñeña po'ñoñ ñeñt atet otan ahuať Abraham.

15 Ñaña ñerra'm añ yocten añ ñoñets ñeñt atet anaretpa' nanaccha' a'coñchatareyey ñerra'm ama yetsotueno ora allpon ñoñets. Ñaña ñerra'm ama eñallñe añ ñoñets ñeñt atet anaretpa' amate' errotent coñchatyeto tarro'mar amate' eñallñe ñoñets ñeñtcha' ya'pote' ñeñt ochñartsotets.

Attoch a'naterrya Yomporpa' ñeñtpa' e'ñech yeyemteñoña ña

16 Ñeñto'marña yeñoteñ attoch a'naterrya Yompor ñeñt atet otahuapa' ñeñt po'ñoçhpa' e'ñech yeyemteñoña ña attochña e'ñe pueyuereñoŕey e'ñech a'natuerrya allohueney. Amach ñapťayaya judionesha' ñeñt cotene' añ ñoñtsor ñeñt atet anaret, añecpa'naña allohueney ñeñteycha' yemterraya Yompor e'ñe atfecoptar atet pe't ahuať yatañ Abraham. Tarro'mar ñapa' po'ñoçh yatañ yepen allohueney.

17 Ama't Yompor po'ñoño ñeñt atet anuařeť ahuaťoteña' all orrtena ñeñt atet Yomporpa' otan ahuať Abraham, ñeñtpa' atet ochet: "Shonte' pa'namen acheña' ñetña' pomporcha' p̄ohuerrpet. Aña' e'ñe na atet o' neponaŕ." Ñeñto'mar yeñoteñ Abraham e'ñe pueyemteñoť Yomporpa' atet eñchet Yompor ñapa' pomporcha' per shonte' pa'namen acheñ. Ñeñtña' ñeñtara Yompor ñeñt nanac ahuañencat ñeñt eñotene' o'ch tantaterran ama't ñeñt rromuets, ñaña ñeñt eñotene' e'ñe po'ñoñoťpa' o'ch orrtatan ama't ñeñt ama eñalle te'.

18-19 Allempo Yomporpa' atet otan Abraham "peshotpa' merenach shonte' pa'namen acheñ ñeñtcha' p̄omporterraya" allempo Abrahampa' o' nanac po'nme'ten—čharroch čharra charte' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña pueťapor Sarapa'cho'ña o' nanac po'nme'ten, amate' errotent cheyore'terro, tarraña Abrahampa' ama quechpuenano atto yemtenana ñeñt atet otue Yompor. E'ñe pueyemteñoť Yomporpa' allo'na sen cohuene' Yompor o'ch aŕ ama't paťra puechemer.

20 Ama echarrteno pueyočhro ama't mamesha añecop ñeñt atet o' otue Yompor. Allo'na sen yemuetnomaya Yompor ñeñt nanac ahuañencat pene'. E'ñe pueyemteñoťan Yompor, ñapa' čhocmach otaŕsa'tyesanete't Yomporpa' ñapťa atarr ahuañencat.

21 Tarro'mar eñochet e'ñe Yompor po'huamencot, po'ñoçhpa' o'ch aþ ama't patrra puechemer ñeñt atet o' otue.

22 Ñeñto'marña Abraham e'ñe pueyemteñoñan Yompor Yomporñapa' e'ñe pocte' eñche't.

23 Tarraña añ ñoñetspa' ama ñaptecpayaye Abrahamacop anarete.

24-25 Yocpa'naña anarette't allohueney ñeñtey yemtenaya Yompor, atto ñapa' a'rroyonay Puechemer ñeñt Jesús ñeñtcha' rromats e'ñe ya yo'chñarecop, ñeñtara Jesús ñeñt Yepartseshar yepen, ñaña atto Yomporpa' tantaterran Puechemer po'rromñoñ, attoch yeñoch yo'chñarpa' o' e'ñe atsa'taretetua. Ñeñto'marña te'pa' e'ñe yeyemteñoñ Yompor ñeñt atto a'pocatonay, yapa'cho'ña e'ñech pocte' enteney yaña.

5

Atto e'ñeyeyemteñoñ Yompor, e'ñech pocte' enteney, atarrcha' cosheñtso'tseney

1 Ñeñto'marña te'pa' yeñoteñ e'ñe yeyemteñoña Jesucristo, Yomporñapa' e'ñe pocte' enteney, o'huañcha' yoroçheno'tseney Yomporeshot, tarro'mar Yepartseshar Jesucristopa' ahuo't a'pocatuerrnay yo'chñar Yomporesho.

2 E'ñe attotña Cristopa' çhapterrey Yompor puemuereño attoch çhocma bensare'tampeney; ñeñtpa' e'ñe yeyemteñoñ Cristo. Ñaña yapa' e'ñech yocsheñsha' yecueñ esempo-huañencha' e'ñe poctacma yecohuentapretera Yompor.

3 Ñaña ama't yemuerochteñoñ o'ch yocshena tarro'mar yeñoteñ e'ñe yemuerochteñoñpa' allempoña yoctape'chen attoch ahuamencat þa'y Yompor attochña ya'huanten allohuen ñeñt echarr yentyen.

4 Ñaña attotña ya'huanten allohuen ñeñt echarr yentyenpa' yapa' yeñoteñ Yomporñapa' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteñoñ o'ch yecuerr ñeñt o'patatenya Yompor.

5 Ñaña e'ñe yecueñoñ ñeñt o'patatenya Yompor ñapa' çhocmach a'pocatanen po'ñoñ ñeñt atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquëñ ñeñtcha' yeçhetsa yeyoçhro ñeñtcha'ña yeñotatene' atto Yomporpa' nanac morrentenya.

6 Yapa' yeñoteñ nanac morrentenya Yompor tarro'mar ahuatpa' ama es yoctape'chpeno ama't mamesha Yomporecop attoch yequeshperrañ. Tarraña Yomporñapa' e'ñe allempocmapa' ahuo't mueñan Puechemer Cristo

añe patsro ñeñtcha' rromosets e'ñe yocop ñeñtey ama es cotape'chetso cohuen ama't mamesha Yomporecop.

⁷Ñehua, yapa' arromñañeypa' yeñoteñ atarr torrapo' attoch yerroma po'psheññecop, ama't añ acheññecop ñeñt atarr cohuen. Tarraña errotenopa' ama tama torrapahuoye' yenteno o'ch yerroma añ acheññecop ñeñt atarr amueraña.

⁸Tarraña yapa' ama't allempo ora yeḡatse'tyen sosya'tsañpa' e'ñe allempocmaña Cristopa' ahuo't rroma yocop. Attoña Yomporpa' eñotaterrey yapa' nanac morrentenya.

⁹Ñeñto'marña te'pa' e'ñe pocte' enteney Yompor tarro'mar Cristopa' ahuo't rroma yocop. Elloña attotña a'queshpatey allochñapa' amach a'coñchatareḡeye ama't errponaña.

¹⁰Ama't allempo ora ye'moñe'teñ Yomporpa' Puechemerña po'rromñoḡpa' ahuo't e'ñe yamo'tstannerra epay Pompor. Elloña te'pa' atto correna Cristopa' attoña yapa'cho'ña a'queshpaterreycha'.

¹¹Elloña te'pa' e'ñe yocsheña Yompor tarro'mar Puechemer ñeñtara Yepartseshar Jesucristopa' ahuo't amo'tstaterrya e'ñe ña Pompor.

Atto yamo'mte' Adánpa' ñapa' ḡha a'chencatey; Yamo'mte'ña Cristopa' ñaña ya'queshpaterre'

¹²Ahuat puesheñarr yacma ñeñt pa'so'cheñ Adánpa' ahuo't orrtatan atpare'teñets añe patsro Yomporecop. Ñeñto'marña allempoteñ allohueney ñeñtey acheñeypa' e'ñe attecma yeḡohua. Ñaña allempopa' ahuo't anareḡta attoch yo'chñarḡpa' o'ch yerroma. Ñeñto'marña allohueney ñeñtey acheñeypa' o'patuaya rromueñets tarro'mar allohueneypa' ñeñta yeñot ñeñt atet pa ñanom yamo'mte' Adán.

¹³Ñaña allempoteñ correḡ Adán, acheñenesha' arr patropa' ñeñta eñotet ñeñt atet atpare'tan Adán Yompor. Tarraña allempopa' ama eñalletena' ñoñets ñeñt atet anareḡ alloch a'coñchatareḡterret.

¹⁴Tarraña attera o'patenanet rromueñets e'ñe allempoteñ correḡ Adán ñeñta attera ñaña tarrempohua allempo correḡ ñaña Moisés ñeñt nahuet ñoñets. Ama't ama atpare'teññañeto Yompor po'ñoñ e'ñe atet atpare'teḡ Adán, tarraña attera o'patenanet rromueñets. (Ñeñto'mar yeñoteñ Adán po'chñarḡpa' ahuo't anareḡta attoch o'patuaya allohueney rromueñets.) Ñeñña yamo'mte' Adánpa' aña o'patatuaya ñeñt ama cohuenayaye, tarraña Yamo'mte'ña Cristopa' allempo huapapa' ñapa' añña o'patatosya ñeñt e'ñe cohuenare'.

15 Tarro'mar e'ñe patparñesharrmorof Adánpa' ama atteyaye ñerra'm ñeñt atet atarr muerenya Cristo. Tarro'mar e'ñe puesheñarra po'chñarof o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt yemuererraya. Attoña Yomporpa' orrtatonay puemuereña yocop alloña nanac cohuen es apatuene y e'ñe atta allohueney pa'namen ñeñtey acheñey.

16 Ñaña ñeñt atet muererrya Yompor, ñeñtpa' ama atteyaye ñerra'm ñeñt atet o'patuaya ochñarets ama't e'ñe puesheñarrofa. Tarro'mar ñeñt atet pa Adán ama't parrochapa' ñeñtaña yo'patatuenaya coñcheñets. Tarraña ñeñt atet a'queshpaterrey Yomporpa' ñeñtpa' atet pa. Ama't shonteñ yo'chñarpa' ñañaapa' e'ñech pocte' enteney e'ñe atta tarro'mar ñeñtpa' o' a'pocatuonay Cristo.

17 Ñaña atto e'ñe puesheñarrofa po'chñarof o'patenya rromueñets, tarraña elloña nanac muererrya Yompor attoña a'rroyerrnay Puechemer ñeñtara Jesucristo ñeñt o' a'pocatuerrnay yo'chñar Yomporesho attochña yapa' corretsayach.

18 Ñeñto'marña yeñoteñ atto e'ñe puesheñarrofa po'chñarof ahuo't o'patatyet coñcheñets, attecma ñaña puesheñarr ñeñt Jesucristopa' ahuo't pohua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen.

19 Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharrmorof Yomporñaapa' e'ñe ochñafoche' entueney ama't shonte' pa'namena'ttsoctmay ñeñtey acheñey. Tarraña puesheñarr ñeñt Cristo ñeñt e'ñe cohuen ame'ñenaya Yompor, ñeñtñaapa' alloch e'ñe pocte' enteney Yompor, ama't shontey pa'namena'ttsoctmay ñeñtey acheñey.

20 Ñaña allempo chap allempoch anare'tta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet apapahuo elloña allempopa' ñetpa' o' eñoterret atarr atparña'tterret. Tarraña ama't atto nanac yatpare'tena elloña Yomporpa' nanac muererrya.

21 Attoña e'ñe yepatse'tyeñoñ ñeñt ama cohuenayayepa' ahuo't anare'tta rromueñets ñeñtcha' yo'patenaya ñeñtñaapa' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen tayoteñ errponohuañen.

Atto ñeñt toma'ntena allempo yapataretta Cristocop

¹ Te'pa' e'ñe yeñoteñ ama't atet yeḡatse'tyese't ñeñt ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yotaḡsa'tatsto "ñeñteḡpa' o'ch allo'na yeḡatse'tyesnena ñeñt sosya'tsañ tarro'mar Yomporpa' nanquēpa't muerenana ñeñt ḡatse'tyene' ñeñt ama cohuenayaye ñaña ellopa' o'chcho' alla muererrya."

² Tarraña amach erroteno't allo'na yeseno ḡatse'tyesnomue' ñeñt ama cohuenayaye tarro'mar o' ya'ypo'ñerr yo'chñar allempoteñ o' yaguēr Cristo.

³ Ama't señoñeña ñeñt toma'ntena allempo yapataretta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñtey apatarettetsa e'ñe yame'ñeño't Cristo Jesús.

⁴ Allempo yapatarettapa' e'ñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer e'ñe po'huamenco't ñeñt atarr cohuen, yapa'cho'ña ñeñtara po'huamencaro'tña e'ñe cohuen o' etserrataterrnay yoctaḡña, ñeñtcha' atet yocrrena.

⁵ Tarro'mar e'ñe yeparrocmateño't epay Cristo o' yerromaprecha. (Attochña ya'ypo'ñerr ñeñt ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrerra e'ñe cohuen ñocop.

⁶ Tarro'mar yeñoteñ ñeñtey acheñey ñeñt yeyo'chro'tsen ñeñt yoctape'chataye't sosya'tsañ ahua't ñeñtapa' o' a'mchechatare'tetuerra atet ñerra'mrrate' acorso'tamḡsaretta epuet Cristo. Attochña o'huañcha' co'tape'chatse'tatnenedy yo'chñarañeña. Amach allo'na taruasatnenedy yo'chñar.

⁷ Ñato' o'ch yetma'ntacha atet pena arromña't. Ñehua, yapa' yeñoteñ ñerra'm esesha' rromatspa' amach erroteno't allo'na co'tape'chyesnenano sosya'tsañ. Yapa'cho'ña atetcha' yentena ñerra'mrrate' cho yerromuen, amach erroteno't allo'na yoctape'chyesneno ñeñt sosya'tsañ enten Yompor.

⁸ Ñaña atto o' yerromaprecha Cristo, yapa' yeñoteñ ñaña e'ñe yeparrocmateño't Cristopa' alloña corretsayach, atet pena ñapa' e'ñe corretsa.

⁹ Tarro'mar yapa' yeñoteñ Cristopa' o' tanterra po'rromño't, amach alla rromuerre'te. Amach erroteno't alla o'patere'te rromueñets.

¹⁰ Tarro'mar ñapa' atto rroma yo'chñarecoppa' ñeñtapa' e'ñe parrocha rroma ama't allohuenacop. Ñaña atto correna te'

ñeñtpa' e'ñe ora Pomporecpa.

11 Yapa'cho'ña attecmeupa'ch yentena yaña yañeña. E'ñe yerromapreteñoō Cristo Jesús'pa' o'ch ya'ypo'ñerr yo'chñar ñeñto'marña amach errotentō alla taruasaterryerro yo'chñar. Ñaña te'pa' e'ñe yeparrocmateñoō Yepartseshar Cristopa' o'ch yocrraprecha e'ñe cohuen Yomporecop.

*Attoch amach semnatatsche so'chñar o'ch alla taruasater-
rnaserr sa'rromñaitechets*

12 Ñeñto'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñaitechets. Allochñapa' amach allo'na sepatse'tyesneno ñeñt atet muenatse'tatyenes sechets.

13 Amach semnatatsche sechets o'ch ña torrena ñeñt ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñt e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen tarraña te'pa' o'ch alla yocrrerra cohuen Yomporecop.

14 Tarro'mar te'pa' amach errotentō allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama añeye' yeyemteno ñoñets ñeñt atet anaret ñeñtcha' atet yeḡohua esheccha' cohuen enteney Yompor.

15 Te'pa' yeñoteñ ama añeye' yeyemteno ñoñets ñeñt atet anaret. Añña yeyemtena Yompor puemuereñoō e'ñe yenueny. Tarraña ama't atteñpa' ama pocteyaye o'ch allo'na yesen patse'tyerrayerr ñeñt ama cohuenaye' enteno Yompor ama't mamesha.

16 Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñtcha' yetaruasatene' añe patsro, ñeñtpa' po'ñoōh ñeñtcha' yepatronar yepen, ñaña e'ñech pauner yentatena attochña ñeñtach yame'ñena ñeñt yepatronar yepen. Ñaña attecmach yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeñtpa' tsa'taterryach rromueñtso ñeñtara coñcheñtso. Tarraña ñerra'm añ yame'ñena Yompor ñeñt atet otene y po'ñoñot, ñeñtpa' alloch yorrtatyen e'ñe cohuen ñeñt e'ñe atet muenen ña.

17 Ñaña sapa' ahuatpa' ña setaruasataye't so'chñar, tarraña te'ñapa' e'ñe seyoōhrocmañen o' same'ñera ora ñeñt atet pena Yompor pa'poteñ ñeñtara ñeñt serrpare'tatase't. Ñeñto'marña te'pa' napa' atarr nocshena, atarr neparasyoso'teñ Yompor socop.

18 Ñaña te'pa' o'huañcha' taruasaterrser so'chñar. Añcha'ña setaruasaterre' Yompor erra'tsente' muenen ña.

19 Ñehua, Yompor poctaḗñoḗpa' atet netma'ntatensa atto yocrrena acheñey arr patsro allochñapa' cohuencha' çhaponasa seyoçhro Yompor poctaḗña. Ñeñt notenes po'ñoçhpa' ñeñt'pa' atet sepe't ahua't e'ñe pocte' sente't e'ñe ora sechtsohuen allo'na sete't ḗatse'tnomue' sosya'tsañ ñeñt ama cohuenaye' enteno Yompor. Te'pa'çho'ña atfecmuepa'ch e'ñe pocte' senteñ ora sechtsohuen o'ch sepomuerra Yomporecop, allochñapa' attoch sa'cohuentatare'tterra e'ñe cohuen Partsocop ñeñt e'ñe atet muenen ña.

20 Ñehua, ahua't allempo ña setaruasataye't so'chñarpa' ama añeye' soctape'che te ñeñt e'ñe cohuen enten Yompor.

21 Tarraña ñeñt atet seḗatse'tyese't sosya'tsañ ahua'tpa' ama es sherbase'te ama't mamesha, ñeñtara ama't te'pa' pencna'ntatenes. Yapa' yeñoteñ ñeñt'pa' allach tsa'taterryañ rromueñtso, ñeñtara coñcheñtso.

22 Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentatare'tterra e'ñe cohuen ñocop añe patsro. Allochñapa' attochña aphuerrey allochña yapa' corretsayach yocsheñeshocmañen tayoteñ errponañohuen.

23 Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateño't epay Yepartseshar Cristo Jesús'pa' Yomporñapa' aphuerreycha' e'ñe atta allochña yapa' corretsayach yocsheñeshocmañen tayoteñ errponañohuen.

7

Atto o'huañ ancha'noçhtana'tenya añ ñoñets ñeñt atet anaret ahua't Moisésesho't

1 Te'pa' o'ch masheñeshacha' ñaña noçhaneshacha' netma'ntatasa po'poñ coḗaḗñats. Ñehua, sapa' o' e'ñe seño'tueñ atet pena ñoñets ñeñt atet anaret arr patsro ñeñt'cha' atet yepena. Sapa' señoten añ ñoñetspa' sherben tarremphuach allempo yocrrena añe patsro. Tarraña ñerra'm esempo yerromapa' añ ñoñetspa' amach erro'teno't allo'na yame'ña'neño. O'huañcha' yame'ñeña.

2-3 Atet ñerra'mrrate' ñeñt oteney paterr ñoñets ñeñt atet anaret. Ñeñt'pa' atet oteney: Coyanasha' arrollare'tañpa' amach satstano puerrollar allempo correna añe patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñt'cha' puerrollar perrpa' ñeñt'pa' ama

pocteyaye tarro'mar ñeñtpa' o'chña'tampeñets enteñ Yompor. Tarraña ñerra'm esempo ch rromapes puerrollarpa' allem-poñapa' o'huañcha' ameñatacha añ ñoñets ñeñt atet anaret puerrollarecop. Ñaña ñerra'm allempo yorer po'psheñeñ ñeñtcha' puerrollar perrpa' allempo ñeñtpa' e'ñe pocte' tarro'mar allempo, ñeñtpa' ama o'chña'tampeñtsoye' enteñe Yompor.

⁴ Ñeñto'marña o'ch masheñnesha ñaña nochanesha notas, yapa'cho'ña o'huañcha' amcha'nochtana'tenya añ ñoñets ñeñt atet anaret ahuat Moiséseshoñ, tarro'mar ñeñtey o'yameñerrapa' o'yerromapretera Cristo. Ñeñto'marña te'pa' e'ñe pocte' o'ch yo'patera po'psheñeñ. Ñaña ñeñt o'yo'pattera te', ñeñtpa' Cristo ñeñtara ñeñt tanterrtsa rromot. Allochñapa' attoch yorrtatyen ñeñt e'ñe cohuen atet muenen Yompor.

⁵ Tarro'mar ahuat allempo e'ñe yañeña yoctañña ora yoctenpa' ama't yeñoteneñ añ ñoñets ñeñt atet anaretpa' attera muenateney o'ch allo'na taruasatneney yo'chñar. Attoña allach chapatterryeñ rromueñtso attoch e'ñe yechenca'huerrañ.

⁶ Tarraña te'pa' e'ñe yerromapreteñoñ Cristo añ ñoñets ñeñt atet anaretpa' o'huañ amcha'nochtana'tenya atet ñerra'm ahuat. Ñeñto'marña te'pa' e'ñe cohuen yocrrena Yomporecop. Te'pa' ama añecpayaye ñeñt atet yepe't ahuat attoch e'ñe ya'muerochtame'teñoñ yetsotatuan ñeñt atet otye't ñoñets ñeñt atet anaret. Añecopña yocrrena e'ñe cohuen Yomporecop tarro'mar te' Parets Puecamquëñpa' o' etserrataterrnay yoctañña.

Atto yo'chñarpa' atarr mopa'teney; amach muenatenye o'ch atet yepohua ñeñt atet oteney ñoñets ñeñt atet anaret

⁷ Ñehua, ñato' sapa' chate' sotenapañ napa' noteneste' Yompor po'ñoñ ñeñt atet anaretpa' ñeñtpa' amate' cohue-nayaye. Tarraña ñeñtpa' ama atteye' notenso ama't mame-sha. Atet napa' ñerra'm ama eñallñeña añ ñoñets ñeñt atet anaret, napa' amate' chaponañeña neyoçhro ñeñt ama pocteye' enteno Yompor. Atet ñerra'm ama eñallñeña añ ñoñets ñeñt yotene' "amach yeye'chapretanna'tatsto", napa' amate' chaponañeña neyoçhro ñeñt ama pocteye' enteno Yompor ñerra'm esempo es yeye'chapretannena.

⁸ Tarraña allempo chapona neyoçhro po'ñoçh atet oteney ñoñets ñeñt atet anaret ama es aye'chapretanna'tpahuo, no'chñar ñeñt neyoçhro'tsenpa' elloña nanaccha' es ye'chatse'tatyenen. Ñerra'm ama neñotenñe añ ñoñets ñeñt yotene' ama es aye'chapretanna'tpahuo, ñerra'mañpa' amate'

neñotenñe ñeñt atet neye'chapreteña po'psheñeñ ñeñt'pa' ñeñtña po'ñoçh no'chñar entapretenen Yompor.

9 Ahuať napa' allempo ama neñotena' ñoñets ñeñt atet anaret, nañapa' nanac cosheñtso'tsennoñ allempo. Tarraña allempoña neñoter ñeñt atet oteney ñeñt'cha' atet yeña cohuen ñaña ñeñt ama atet ařapahuopa' allempoteñña napa' neñotena po'ñoçhpa' shonte' no'chñar ñeñt neyoçhro'tsen. Allempoteñña napa' atarr nellquerra nanac. Neñoteñ aña no'patenaya rromueñets ñeñtara coñcheñets.

10 Ñaña añ ñeñtara ñoñets ñeñt atet anaret allo'ch yoccrenañ e'ñe cohuenpa' tarraña arepa't atteyaye, naña no'chñar allo natpare'ten ñoñets ñeñt atet anaret ñeñtach nanmayeñ rromueñtso.

11-12 Tarro'mar allempoteñ neñoterr añ ñoñets ñeñt atet anaret'pa' no'chñar ñeñt neyoçhro'tsenpa' elloña nanac cotape'chatse'tatenen sosey. Ama't nanac cohueneñ Parets po'ñoñ ñeñt atet anareteñ, ñaña atet oteney Parets ñeñt'cha' atet yeña' cohuen, ñaña ñeñt'cha' ama atet ařapahuoyaye, ñeñt'pa' e'ñe cohuen, pocten. Tarraña na no'chñarpa' ama muenatenno o'ch cohuen es neña', ñeñt'pa' atepa't sheca'ne't. Napa' ama erroť nepeno, neñoteñ aña no'patenaya rromueñets ñeñtara coñcheñets.

13 Te'ña sapa' çhate' sotenapañ añ ñoñets ñeñt e'ñe otets cohuenpa' ñeñt'epa'tña yo'patatenaya rromueñets. Tarraña ñeñt'pa' ama atteyaye. Añña ñeñt yo'patatenaya rromueñets, ñeñt'pa' yo'chñar. Ñaña Yompor po'ñoñ ñeñt atet anaret ñeñt e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt huomenc yepene' yeyoçhro

14 Yapa' yeñoteñ añ ñoñets ñeñt atet anaret'pa' Partseshot e'ñe cohuen anareteñ, tarraña atet ñerra'm napa' arromña'otoa atet nepena, çhocmach neřatse'tyen ñeñt ama cohuenaye' enteno Yompor. E'ñe atet nepena ñerra'mrrate' aña netaru-asatene' no'chñar.

15 Ama neñoteñe eso'marte'ña atet nepena, tarro'mar ama't ñeñt'cha' atet o' nepohuapa' ama't napa' amach e'ñe pocteye' nenteñe. Tarro'mar ama't nemneñeñ añte' atet nepohua ñeñt e'ñe cohuen enten Yompor, tarraña arepa'tña atteye' nepeno. Añepa't atet nepen ñeñt ama nemnenñe, ñeñt po'ñoçh ama cohuenaye' enteno Yompor.

16 Ñaña esempo o'ch nepohua ñeñt ama cohuenayaye, ñeñt ama't napa' ama nemnenñe, nañapa' neñoteñ attotña o' natpare'tua ñoñets ñeñt atet anaret ñeñt e'ñe cohuen.

17 Ñeñto'marña neñoteñ ñerra'm esempo o' atet neṑohua ñeñt ama't napa' netsena'ten, ñeñtpa' neñoteñ ama e'ñe naye' atet petso. Añña atet neṑatene' no'chñar ñeñt allo'tsenara neyoçhro.

18 Napa' neñotena e'ñe atta eñalletñan, neyoçhroñapa' ama eñalle attoch cohuen enten Yompor, ama't coñe'ta. Ama't nemneñeñ o'ch atet neṑañ ñeñt e'ñe cohuen enten Yompor, tarraña ama erroṑ nepeñe atet ṑatsa ñeñt atet cohuentetsa.

19 Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neṑohua ñeñt e'ñe cohuen enten Yompor, tarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohue-naye' enteno Yompor.

20 Ñeñto'marña neñoteñ, ñerra'm esempo o' atet neṑohua ñeñt ama't napa' ama nemnenñe, ñeñtpa' neñoteñ ama e'ñe naye' atet petso. Añña atet neṑatene' no'chñar ñeñt allo'tsenara neyoçhro.

21 Ñeñto'marña te'pa' neñotena ñerra'm esempo yemneñeñ o'te' atet yeṑañ ñeñt e'ñe cohuen enten Yompor, tarraña yo'chñar ñeñt yeyoçhro'tsenpa' çhocmach coṑape'chateney ñeñt ama cohuenaye' enteno Yompor.

22 Tarraña atto Yompor o' coṑape'chaterrey cohuen yeyoçhropa' ñeñtpa' alloch e'ñe yocsheññaña po'ñoñ.

23 Tarraña ama't atetpa' yapa' yeñotena eñall po'poñ ñeñt huomenc yepene' yeyoçhro ñeñt çhocmach e'moñe'tenan ñeñt atet yoçtape'chen cohuen Yomporecop. Ñaña yo'chñar ñeñt huomenc yepene' yeyoçhropa' ñeñtña nanac mopa'tene' yechets.

24 ¡Ee-say! Nanac llequëñtso'tseney ya. Esha'huachca' ya'huañañperre'te' yo'chñar ñeñt nanac yemuerochtatene' ñeñtcha' yanerre'te' rromueñtso.

25 Nanac neparasyoso'teñ Yompor tarro'mar neñoteññañ Puechemer ñeñt Yepartseshar Jesucristo ñepa'tña e'ñe ya'huañañperre' yo'chñar. Ñeñto'marña e'ñe yeyoçhropa' yemneñeñ o'ch yoçtape'cherrñañeñ Yompor po'ñoñ, tarraña yo'chñarñapa' ñeññaña çhocmach yetaruasatene' e'ñe yechtso.

8

Atto Parets Puecamquëñpa' ñeñtña huomenc yepene' yeyoçhro

1 Ñeñto'marña te'pa' yeñoteñ amach a'coñchatareñeñeñ ama't puesheñarroñeya ñeñtey o' yeparrocmaterna Cristo Jesús. Ñehua, ñeñtey o' yeparrocmaterna Cristo, ñeñtpa' añ,

atto o' cotape'chaterrey Parets Puecamquëñ, amaña aÑeye' yoctape'chatenaye yo'chñar ñeñt' yeyoçhro'tsen.

² Tarro'mar te'pa' atet ñerra'm napa' e'ñe neparrocmateñoñ Cristopa' añña Parets Puecamquëñpa' ñeñtña huomenc nepene' neyoçhro, allochña napa' corretsanach tayoteñ ama't ñaña errponohuañen. Attoña o' a'huañañperren atto no'chñarpa' ñeñtña huomenc neḡaye't neyoçhro, ñeñtcha' nanmayerñ rromueñtso, ñeñtara coñcheñets.

³ Ñehua, añ ñoñets ñeñt' atet anaret ñeñtcha' yetsotateneñpa' amach errotenot' a'queshḡaterrye, tarro'mar ya arromñaatey yo'chñarpa' ama muenatenye o'ch atet yeḡohua ora ñeñt' atet oteneý añ ñoñets. Tarro'mar añ ñoñetspa' ama eñalle attoch huomenc ḡonay yeyoçher esheccha' yetsotue ora allpon ñeñt' atet oteneý ñeñtcha' atet yeḡohueneñ. Tarraña atto Yomporpa' ahuo't a'pocatuonay yo'chñar ñeñt'pa' atet ḡa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromñaatey, ñeñtey ochñaatey. Allochñapa' ñach rromosets yo'chñarecop; allochñapa' attoch tsa'tuonaya yo'chñar. Attochña a'huañañperrey atto yo'chñara ñeñtña huomenc yepene' yeyoçhro.

⁴ Atet o' ḡonay Yompor attoch te' yapa' o'ch atet yeḡa cohuen ñeñt' atet oteneý Yompor po'ñoñ, allohueneý ñeñtey atet petsa atet cotape'chateney Parets Puecamquëñ, ñeñtey o'huañ atet yeḡatse'tyesa ñeñt' atet cotape'chatse'tateney yo'chñar ñeñt' yeyoçhro'tsen.

⁵ Tarro'mar ñeñt' atet petsa ñeñt' atet cotape'chatenanet sosya'tsañ ñeñt' pueyoçhro'tsenetpa' añachña e'nenet ñeñt' atet muenatse'tatenanet po'chets. Tarraña ñeñt' atet petsa ñeñt' atet cotape'chatenanet Parets Puecamquëñpa' añchaña e'mñotenet ñeñt' atet muenatenanet Parets Puecamquëñ.

⁶ Tarro'mar ñerra'm añach ye'nen ñeñt' atet muenatse'tateney yechetspa' ñeñt'pa' ñeñtchaña yanerre' rromueñtso ñeñtara coñcheñtso. Tarraña ñerra'm añ ye'mñoten ñeñt' atet cotape'chateney Parets Puecamquëñpa' ñeñt'pa' ñeñtchaña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt' muenatse'tateney yechetspa' amach errotenot' yame'ñeroña Yompor

⁷⁻⁸ Tarro'mar ñerra'm añach ye'nen ñeñt' atet muenatse'tateney yechetspa' ñeñt'pa' atet yepena ñerra'mrrate' cha ye'moñe'teñ Yompor, ñeñto'marña çhach yatpare'teññañ po'ñoñ. Amach errotenot' yame'ñeroña Yompor ñerra'm añach

ye'nen ñeñt atet muenatse'tateney yechets. Ñaña ñerra'm attach yepenapa' amach errotent' yocshacheña Yompor.

9 Tarraña sapa' ama añeye' soctape'chatenaye sechets; añña soctape'chatene' Parets Puecamquëñ ñerra'm po'ñoçh Puecamquëñpa' o' yeçherra seyoçhro. Tarraña ñerra'm eshas ama echenaye Cristo Puecamquëñ seyoçhropa' ñeñtesña po'ñoçhpa' ama puechemereyayso Yompor.

10 Ñehua, ya arromña'teypa' çhocmach yerroma arr patsro ochñartso'marecop. Tarraña ñerra'm Cristo yeçhena yeyoçhro yecamquëño'pa' çhocmach yocrra tarro'mar Yomporpa' e'ñe pocte' enteney.

11 Yapa' yeñoteñ Yomporpa' ahuo't tantaterran Puechemer ñeñt Cristo Jesús po'rromño't. Ñaña ñerra'm Yompor Puecamquëñ yeçhena ya yeyoçhro, ama't arromña'teypa' yapa'çho'ña tantatuerreya' yerromño't. Parets Puecamquëño'ña'pa' yocrra'huerrach, ñeñfara Puecamquëñ ñeñt yeçhetsa te' yeyoçhro.

12 Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt atet cotape'chateney Parets Puecamquëñ, ama pocteyaye o'ch atet yepena ñeñt atet cotape'chateney yechets.

13 Tarro'mar ñerra'm allo'na yocrra'nena ñeñt atet cotape'chateney yechetspa' ñerra'm yerromapa' yeçhenca'huerrach yo'chñaro't, tarraña ñerra'm Parets Puecamquëño't o'ch ya'ypo'ñerr ñeñt atet patse'tateney yechetspa' yañapa' corretsayach.

Atto ñeñtey e'mñotene' ñeñt atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor

14 Tarro'mar allohueney ñeñtey e'mñotene' ñeñt atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor.

15 Ñeñto'marña amach alla yemcha'terrerro atet ñerra'mrrate' ñeñt ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña amach yemcha'naño'feye' yema'yocheño'pa' o'ch yeçhore'ch, o'ch yoch: "Apa."

16 Tarro'mar ñeñfara Parets Puecamquëñ ñeñtña yeñotatene' yeyoçhro po'ñoçhpa' o' puechemer perrey Yompor.

17 Ñaña yapa' yeñoteñ atto o' puechemer perrey Yomporpa' yapa'çho'ña yagapapretercha' Cristo ora ñeñt allpon o'patatenya Yompor. Ñerra'm çho yemueroçhta

Cristo'marecop te', atet pe't ña atarr muerochte't ahuat año patsro, esempohuañen yapa'cho'ña yecohuentapreterach.

Atto ama't yemuerochetuanena año patsro, ñeñtpa' ama esoye'yenteñe

18 Ama't yemuerochetuanena año patsro, ñeñtpa' ama esoye'yenteñe. Tarro'mar neñoteñ esempohuañenpa' ellochña nanac yecohuentapretera Cristo.

19 Ama't ora allpon ñeñt yentyen arr patsro ñeñt yechcatua Yomporpa' ñetpa'cho'ña elloña atarr cohueñet esempohuañencha' Yomporpa' orrtatuerreycha' ñeñtey o' puechemerasha' perrey, attoch allempochña o'ch yecohuentapretera Cristo.

20 Tarro'mar ahuat allempo atpare'te't Adán, Yomporña' ahuo't a'huañatan atto atarr sherbañ nanac ñeñt ora allpon pueyechcatar. Allempoñapa' o'huañ tama sherba'. Tarraña pueyechcatarpa' ama erro't po, tarro'mar atet muenen Yompor. Tarraña ama't atet panetañpa' elloña te'pa' chocma cohueñet attoch esempohuañen Yomporpa' o'ch alla a'cohuentatuerranet.

21 Tarro'mar ora allpon ñeñt yentyen año patsropa' atet anaretet ñamet chocmach mellasha'tuet, allempoñapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyechcatarpa' ñetpa'cho'ña o'ch alla a'cohuentataretetuerret ñamet.

22 Yapa' yeñoteñ ora allpon ñeñt yentyen año patsropa' chocma mueroche'tyenet ama't teme'ttsen, tarro'mar ama a'cohuentatuare'tterra'. Nanac lecanrroreyenet atet ñerra'mrate' coyanesha' ñerra'm o' chap allempoch cheyore'ten nanaccha' atsotenana pue'mar. Nanac llequëñtso'tsen tarremphuach allempoch eñalletatuan pue'mar. Allempoñapa' nanaccha' cosheñtso'tsen, tarro'mar o' eñalletatuan pue'maretoll. Atetcha' perraña ñaña Yompor pueyechcatare'chno, nanaccha' cosha'rrterret esempohuañencha' allempoch a'cohuentataretetuerret.

23 Ama ñapñayaya Yompor pueyechcatar muerochtetso. Yapa'cho'ña chocma yemuerochetyena arr patsro, amach e'ñeye' yeñmateno yeyochro. Tarraña ama't atetpa' o' yechen Parets Puecamquëñ ñeñt yechetsa yeyochro ñeñt ñanom apueney Yompor, allotñapa' orameñ ñaña ñeñt o'patatenya pa'namen. Ñeñto'marña yeñoteñ esempohuañenpa' aphuerreycha' ora allpon ñeñt o'patatenya. Ñeñto'marña yecueñ esempohuañen Yomporpa' o'ch orrtatuerrnay ñaña atto yapa' o' puechemerasha' perrey. Allempoña ya yechetspa' a'po'poñetuerrnaycha' attochña yecohuentapretera Cristo.

24 Allempoteñ o' yaguërrñañ Yompor Puechemer ñeñt̃ Cristo yapa' yeyemteññaña ñeñt̃ o'patatenya ñeñt̃cha' atet̃ perrnay esempohuañen. Ñeñto'marña allempoteñ o' ya'queshpataretterra čhocmach yecueñ esempohuañen allempoch a'po'poñetuerrnay yechets attochña yecohuentapretera Cristo. Po'ñočhpa' ama a'po'poñetuerrnaya' yechets, ñeñto'marña teme'ttsen yecueñ. Ñerra'm o' a'po'poñetuerrnayeñ yechetspa' allempoñapa' amate' palltenañe o'ch yeyemteññaña ñeñt̃ atet̃ muenateney ña.

25 Tarraña ñerra'm čhocma yeyemteña Yompor ñeñt̃ atet̃ oteney yeñoteñ atet̃cha'ña perrnay esempohuañen. Ñehua, ama't ama orrtena', te'pa' yeyemteñoť ñapa' e'ñepa'chña yocsheñeshocmañen yecueñ. Amachña čha yemuenme'chatsche.

Atto enamuenay Parets Puecamquëñ Yomporeshot

26 Ñaña attecma Yompor Puecamquëñ ñach yeyenpuene' ñerra'm esempo ama erroť es apen yenteno. Ñehua, atet̃ ñerra'mrrate' allempo yellquëñesha' yema'yochena ñato' ama yeñoteñe escha'ña yenamña Yompor ñeñt̃ e'ñe pocte' enten ña. Allempoña Parets Puecamquëñpa' ñachña enamats yocop e'ñe puellcapreteñoťey ya, e'ñech pue'narña'teñoť, amach čhoye' eñoreno attoña enamatenay Yompor yocop.

27 Tarraña Yomporpa' cohuennay allohueney ñeñt̃ atet̃ yoctape'chen yeyočhro, ñeñto'marña ñapa' eñoteñ ñeñt̃ atet̃ enamuenay Puecamquëñ, tarro'mar Puecamquëñpa' añach enamuenay ñeñt̃ e'ñe pocte' enten Yompor yocop ñeñt̃ey o' pueyochresha' perrey Parets.

Ñeñt̃ey e'ñe eñotuaye't̃ ahuat̃ Yomporpa' ñapa' atarr cočhnesha' o'patatenya

28 Ñaña ama't es yehuapoya, yapa' yeñoteñ Yomporpa' ñach a'pocstatene' yocop, allohueney ñeñt̃ey morrentenaya ña, ñeñt̃ey acrareťey o'ch atet̃ yepeññañ ñeñt̃ atet̃ muenen ña.

29 Tarro'mar allohueney ñeñt̃ey e'ñe eñotuaye't̃ Yompor ahuat̃, ñeñt̃eycha' ame'ñerraya esempo, ñaña'pa' cotape'che't̃ ahuat̃ yocop ñeñt̃cha' atet̃ muenatey, allochña'pa' yach cotape'cherrets cohuen attochña yeyečhquërra e'ñe ora atet̃ ñerra'm Puechemer ñeñt̃ Cristotets. Allochña'pa' allohueney yepo'narcha' yepeñ Cristo ama't shontey ñeñt̃ey ame'ñetsa.

30 Ñehua, allohuen ñeñt̃ atet̃ cotape'che't̃ Yompor yocop ahuat̃pa' allempoña ahuo't̃ chap allempoch čhore'terrey o'ch yame'ñera. Allochña ñeñt̃ey ačhore'tareťeypa' ñaña'pa' oten yocop e'ño' pocte' enteney e'ñe yeyemteñoť Cristo. Allochña'pa' allohueney ñeñt̃ey e'ñe pocte' enteney,

Yomporñapa' oten yocop yecohuentapretero'ch Cristo esempohuañen.

³¹ Ñeñto'mar te'pa' o'ch notas, Yomporpa' atarr cohuen morrentenya. Ñaña yapa' yeñoteñ atto nanac morrentenya Yomporpa' ama't eseshapa' amach erroteno't a'huañañperetoña atto morrentenya.

³² E'ñe puemorrenteño'fey ya ama't e'ñe ña Puechemerpa' ama mopa'tam'pesye, elloña a'rroyonay Puechemer ñach rromosets yocop allohuenacpay. Atto atarr morrentenya attoña yapa' yeñoteñ elloña attecma esocmañencha' apa'yeney e'ñe allempoteñ apuerrey ñaña Puechemer Cristo.

³³ Ñeñtey acrerr Yompor ñeñteycha' puechemer perr; ama't esesha' muenenayeñ o'ch otteñe'chenyetañ, tarraña ñeñtpa' ama esoye' yenteñe yocop, tarro'mar Yomporpa' oten e'ño' pocte' enteney. Amach erroteno't esesha' yetsa'taterrayo yo'chñar,

³⁴ tarro'mar Cristo Jesús'pa' ña rromats yo'chñarecop, elloña ñaña tanterrtsa po'rromño't, ñaña te'pa' ña partsotapretenaya Pompor po'cohuenro't; alloteñña ñapa' eñorena yocop Pomporesho attoch es e'ñe a'pocstatennay.

³⁵ Atarr nanac morrentenya Cristo. Ama't eseshapa' amach erroteno't puerratañpesyetoña atto nanac morrentenya Cristo. Ñaña ama't erroteno'tsenya amach huañerroña atto nanac morrentenya Cristo. Ama'tcha' añ ye'chapoya muero'chteñets, ama'tcha' nanac llequëñtso'tseney, ama'tcha' ñerra'm esempo pue'moñe'teño'fetay cotare'tenyet, ama'tcha' ñerra'm esempo yepallta'yena ñeñtcha' yerren, ama'tcha' ñerra'm esempo yepallta'yena ñeñtcha' yechorrena, ama't ñerra'm esempo añcha'no'cheno'tseney, ama'tcha' ñaña allempoch muetsayet, amach erroteno't puerratañpesyetoña atto nanac morrentenya Cristo.

³⁶ Atetcha' perryetña ya esempo e'ñe atet anaret Yompor po'ñoño ñeñt aquellca'huaret ahuatoteñ. All anuaret ñeñt atto puesheñarr ñeñt ame'ñatse'tpa' otane't Yompor, ñeñtpa' e'ñe atet ot:

E'ñe yame'ñeño'fep' papa' yellapene'tcha' e'ñe autsa yemt-sanate' ñeñt ye'moñe'tene'. Ñetpa' e'ñe amtsen entenyet e'ñe atet ñerra'm carrnero ñeñt 'chocmach aneñet allcha' muetsanachet.

³⁷ Ama't yemuero'chetuahuapa' elloña nanaccha' ahuamenca't perrey Cristo ñeñt nanac amorrentña yenten.

³⁸ Ñeñto'marña napa' neñoteñ, ñeñtey ame'ñenaya Cristo Jesús ñeñt Yepartseshar yepenpa' ama't erroteno'tsenya amach erroteno't huañerroña ñeñt atto nanac morrentenya Yompor. Ama't allempoch yerroma, ama't allempo ñaña

yocrrenmeñpa' chocmachña morrentenya. Ama't Yompor po'mllañoñeñaneshar ñeñt huetsa pue'ntañotpa' amach errotenot puerratañpesyetoña ñeñt atto morrentenya. Ama't ora allpon ñeñt añcha'noçhetyetsa, ama't ñaña ora allpon ñeñt añcha'taretetyetsa arr patsropa' ñetpa'cho'ña amach errotenot puerratañpesyetoña ñeñt atto Yomporpa' nanac morrentenya. Ama't ñeñtcha' yehuapoya te' ama't ñaña ñeñtcha' yehuapoya tsapaonet, ñeñtpa'cho'ña amach errotenot a'huañam pesyetoña atto Yomporpa' atarr morrentenya.

³⁹ Ama't errponenañaren yetuanena atarr eno, amapa' ñaña o'pono patso ama't ñaña oño o'pono, allpa'cho'ña amach errotenot yesa'nmoña atto Yomporpa' nanac morrentenya. Ama't ora allpon ñeñt yeçhcatua Yompor añe patsropa' ñetpa'cho'ña amach errotenot a'huañam pesyetoña ñeñt atto nanac morrentenya Yompor, allohueney ñeñtey ame'ñenaya Puechemer ñeñt Cristo Jesús ñeñt Yepartseshar yepen.

9

Atto Pablopa' atarr llequënana pamo'tsna'tarnesha' ñeñt israelneshar ñeñt acrañ Yompor ñeñtcha' pueyochresha' pañ

¹ Ñaña ñeñtcha' notas te'pa' ñeñtpa' e'ñe po'ñoçh atet, ama çhoye' neshquënso, tarro'mar napa' o' name'ñera Cristo. Ñaña Parets Puecamquëñ ñeñt yeçhetsa neyoçhro, ñeñtña e'ñe eñotenen ñeñtcha' atet notas ñeñtpa' e'ñe po'ñoçh atet.

²⁻³ Napa' atarr nanac nellquëña nemo'nasheñneshar ñeñtara judionesha' tarro'mar ñetpa' shontetañpa' ama ame'ñeñeto Cristo. Ñeñtña nenen neyoçhro atto atarr nellquënanet. Ñerra'm errotenot na'qeshpatanet o'te' na'qeshpaterranetañ. Ama't pocte' nenteñeñ o'ch na'cmareñtañ nañeña attoch nechenquërra allochñapa' amach nentere Cristo, ñerra'm atet neñapa' ñetpa' ñato' o'te' na'qeshpaterranetañ. Tarraña ama't atet neñatstañpa' amach errotenot na'qeshpaterraneto.

⁴ Ñaña namo'tsesha' judionesha' ñeñtara israelena'tarnesha' ñeñt acrañ Yompor ahuat ñeñtcha' puechemereshar pañ, ñaña ñetpa' chocma entoñetañe't Yompor po'partsoña ahuat. Ñaña ñet Yomporpa' chocma a'pocatanetañe't ahuat attoch chocmach a'natenanet. Ñaña ñetpa' apanetañe't Yompor po'ñoñ ahuat, ñeñtña eñotatahuete't ñeñt atet pocte' enten Yompor. Ñaña ñeñtara judionesha' ñeñt eñotaye't attoch nanac e'ñe coçhneshot sherbeñetañ Yompor pa'paclo. Ñaña ñeñtara judionesha'

Yompor ahuatpa' ahuo't otanetañ ñeñtcha' atet apuerranet esempohuañen.

⁵ Ñaña ñeñt ñanom yamo'mtayñeneshañ* yepe't ñeñt nanac sherbaye't Yompor ahuatpa' ñetpa' ñeñtara judionesha' pamo'tsna'tarneshañ. Ñaña ama't judiona'tareshotpa' ahuo't eñalletosa Cristo arr patsro ñeñtara ñeñt nanac Partotets ñeñt pomnaren pene' allohuen esocmañen. Ya'ye'chochtatoñepa'ch tayoteñ ama't errponohuañen. Ñeñtapa' attetepa'ch Nompore.

⁶ Tarraña ama't allohuen judionesha'ña ama'tcha' ama ame'ñereto Cristopa' Yomporñapa' amach errotenot huañerroña po'ñoñ ñeñt atet otanete't ahuat; ñeñtapa' chocmach etsota ñeñt atet otanet, tarro'mar ñapa' ama puenesho po'ñoñ. Ñaña allohuen ñeñt israelena'tarpa' ama allohuenacmaye' Yomporena'tareyayeto.

⁷ Ñaña ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeñt Isaac po'mrenña", ñeñt atet otan Yompor Abraham ahuat.

⁸ Ñeñto'marña yeñoteñ allohuen Abraham po'mreneñpa' ama allohuenacmaye' po'noch puechemer penaneto Yompor. Añachña puechemer pen ñeñt yemtenaya Yompor ñeñt atet otenanet.

⁹ Ñehua, yapa' yeñoteñ atet ahuat Yomporpa' otan Abraham ñeñtcha' aþ, ñeñtapa' atet ot: "Tsapat charo atet ñerra'm te' añempo, o'ch nohuerra allemponapa' petapor Sarapa' cheyore'tcha' ñeñtapa' asheñorrcha' ñeñtcha' Isaacatats." Arrpa' allohua ñeñt atet Yomporpa' otan Abraham.

¹⁰⁻¹³ Elloña te'pa' o'ch alla neyerpaterrrserr atto yatañ Isaacpa' ahuo't yoran Rebeca ñeñtcha' puetapor þa'. Ñaña allempo Rebecapa' totana Isaac puechemer ñeñt epuesha' Yomporñapa' otan Rebeca, atet och: "Ñeñtcha' eñalletatsa ñanom pechoyorpa' añcha' pomnaren pene' ñeñtcha' eñalletatsa chenta'." Arrpa' allohua ñeñt atet Yomporpa' otan Rebeca. Ñaña allempo ama eñalletena' puechoyoresha' Yomporñapa' ahuo't ye'choña paterr puechoyor ñeñt muenen ña, ama't allempopa' ama es yeçcateneta' ama't ñeñt cohuen enten Yompor amapa' ñeñt ama cohuenayaye. E'ñe atta ahuo't ye'chana puesheñarr ñeñt muenen ña; cheshatollpa' ama pueyeçcateñofoye' cohuen ye'chyofña Yompor, tarro'mar cheshatollesha'pa' ama es yeçcateneta' ama't coñe'ta. Attoña ahuo't etsota Yompor po'ñoñ ñeñt

* 9:5 Pablo otatse't yamo'mtayneshañ tarro'mar ñapa' judionesha'.

atef aquellca'huaret ahuatoteñ, ñeñtpa' atef oten Yompor: "Jacobpa' atarr nemorrenteña, pa'mo'nasheñña Esaúpa' ama tama nemorrenteño." Atef pa' attoch yeñocho Paretspa' ña acrañtetsa ñapuef añecop ñeñ e'ñe ye'chena ña.

Atto Yomporpa' e'ñe pocte' entan o'ch puechemer pan ñaña ñeñ ama judioneshayaye

¹⁴ Te'ña ñato' sapa' chate' sotenapañ ñeñ atef ote't Yompor, ñeñtpa' amate' pocteyaye. Tarraña o'ch notas ñeñtpa' e'ñe pocte' atef ote't Yompor.

¹⁵ Tarro'mar yapa' yeñoteñ atef Yomporpa' otan ahuať Moisés, ñeñtpa' atef och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorrentena."

¹⁶ Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtpa' e'ñe pocte'. Ñeñtpa' ama añoŕeyaye ñeñ atef yemnen ya acheñey, ñaña ama ya'muerochtame'teñoŕa ye'chenyoña Yompor. E'ñechña pueuereñoŕa ye'chenana erra'tsen muenen ña.

¹⁷ Ñaña yeñoteñ ñeñ atef Yomporpa' otan ahuať ñeñ añcha'tarettatse't Egipto. Ñeñtpa' atef otan añcha'taret Faraón: "Na pene', ñeñteŕ añcha'tarettetsa, attoch peshoch norrtat nehuamenc acheñenesesho. Attochña ñetpa' o'ch serrpare'tyesonet erracmañen atto na ñeñten nanac ahua-mencattetsa."

¹⁸ Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch echarrtenet pueyočhreto, ñachña muenatenahuet.

¹⁹ Te'ña ñato' sapa' chate' sotenapañ: "Ñerra'm Yompor ñach yemnatene' ñeñ e'ñe atef muenen ñapa', yapa' amach erroť yepe, ñeñto'marña amate' pocteyaye o'ch enteney yapa' amo' cohuenayayye, ñerra'm ña yemnatatene' o'ch es atef yeŕa." Ñato' sapa' atŕate' soctape'chatse'tyen seyočhro.

²⁰⁻²¹ Tarraña masheñneshacha' ñaña nočhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atef: Ñato' esesha'pa' o'ch yečcatan coyemñ ñeñ patsrro'. Ñeñ e'ñe atef muenen ña, ñapa' ñeñtcha' atef yečcat. Ñato' o'ch yečcatan eprroga coyemñ, puerrogarrpa' atarrcha' cohuen, e'ñech cohuenoť sherbenan pamo'mte'. Alloťñaŕa' ñeñ a'pchat patspa' o'ch alla yečcaterranerr po'prroguēñ puecoyemñ. Ñato' ñeñtpa' amach tama cohuenaye' pe, tarro'mar ñeñ yečcate'pa' ama mueno o'ch orrtach acheñenesesho. Tarraña coyemŕa'

ñerra'm eñoreña'pa' amach sasare'tanoña pamo'mte', amach oche: "Eso'marte' peye'caten atet, ama cohuenaye' pe'pa'no." Tarro'mar ñerra'm pamo'mte' muenets atet'cha' pan puecoyem, coyemñapa' amach erro't es po. Ñeñto'marña yeñoteñ Yomporpa' ama't erro'ten muena' o'ch atet ponay, ñeñtpa' e'ñe pocte' ñocop, tarro'mar Parets añecoppa' ña otets ñapue't. Ñaña yapa' amach yesasare'che, tarro'mar Paretspa' ama asasare'tpahuoyaye.

²² Ama't atteñpa' elloña Yompor ahuatpa' atarr ahuantane't atto nanac atpare'che't ñeñt o'pate't chenqueñets. Ñerra'm ña muenatseñ e'ñe pocteñ attoch tsa'taterranetañ e'ñe allem-pocma po'yoro'chenño't. Attochña entatanetañ po'huamenc tarraña ama atteye' paneto, attaña ahuantanete't po'chñaret.

²³ Allochñapa' attoch esempopa' chap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuat Yomporpa' cotape'chonaye't yecohuentapretero'ch es-empohuañen.

²⁴ Ate't ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapue't chore'tenoña Yompor ñeñt'cha' ame'ñaya. Allohueneyña te'pa' o' chore'terrey o'ch e'ñe yame'ña'huera.

²⁵ Ama't atet ote'teña Yompor ahuat, allempo otan Os-eas ñach serrpare'te' ñeñt atet och Yompor, ñeñtpa' atet ot Yompor:

Ama't ñeñt ama nechemereyaye te'pa' tsapatonetñapa' e'ñech nechemer ne'pohuerranet. Ama't po'poñ acheñ ñeñt ama nemorrenteno te'pa' tsapatonetñapa' e'ñech nemorrentuerranet ñamet.

²⁶ Ama't e'ñe all ahuat Yomporpa' otanete't: "Sapa' ama nechemereyayso", te'ña allpa' o'ch eñotueret, te'ñapa' e'ño' puechemerasha' o' pohuerranet Yompor, ñeñt Yompor ñeñt ama arromñateshayaye ama't ahuata.

²⁷ Elloña Isaías ñeñt a'mtaye't Yompor po'ñoñ ahuatpa' ñapa'cho'ña atet eñose't, ñeñt'cha' atet perra israelena'tarnesha', ñeñtpa' atet ot: "Israelena'tarnesha'pa' merenach nanac shonte' atet ñerra'mrrate' atet yenteññañ ontap po'mñer nanac shonte'. Tarraña ama't'cha' shontetañpa' amachña allohuenacmaye' a'queshpataretterreto; patanta'ttsachña ñeñt'cha' a'queshpataretterrtsa.

²⁸ Tarro'mar Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuenta'nenaneto po'chñar."

²⁹ Ñeñtpa' e'ñech atet perra ñeñt atet ote't Isaías, ñeñtpa' atet ot:

Ñeñt̄ nanac Paretspa' ahuo't a'queshp̄aterrey ama't
puesheña'ttso'teya. Ñerra'm ama atet p̄a'yeñepa'
allohueneypa' e'ñech yocla'huerrañ e'ñe poctacma,
atet p̄anet ahua't allempo a'cllatuaretta allohuenet
ñeñt̄ ye'chatse't̄ añetso Sodomoma ñaña Gomorro.

Arrpa' atto Yomporpa' ama pocteye' entenano judionesha'

³⁰ Ñeñto'marña te'pa' yeñoteñ acheñenesha' ñeñt̄ ama ju-
dioneshayaye ama't ama e'neñeto attoch e'ñe pocte' entanet
Yomporpa' ñetñapa' ahuepa't enteret ñeñt̄ e'ñe atto pocte'
enteneypa' Yompor allohueneypa' ñeñt̄pa' ñeñt̄ña atto yeyemteña
ñeñt̄ atet oteney Yompor.

³¹ Tarraña judionesha' ama't e'neñetañ attoch pocte' ente-
nanet Yomporpa' tarraña ñetñapa' ama entereto, tarro'mar
aña e'ñe yemtenet o'ch e'ñe etsotuetañ ora allpon ñoñets ñeñt̄
atet anarettenet; tarraña ama es etsotuenaye ora allohuen.

³²⁻³³ Yeñoteñ ama enterreto attoch pocte' entenanet
Yompor, tarro'mar ama yemteñeto Yompor ñeñt̄ atet
otenanet. Ñetpa' aña e'ñe yemtenet o'ch ye'chatyenet ñeñt̄
e'ñe cohuen entenet ñet. Ñeñt̄pa' e'ñe atet p̄ohuet ñeñt̄ atet
oten Yompor po'ñoñ, ñeñt̄ anua'ret ahua'toteñ, ñeñt̄pa' atet ot
Yompor ahua't:

Napa' o'ch nemñanet puesheñarr ñeñt̄cha' atarr sherber-
rets all añetso ñeñt̄ pa'so'cheñ Sión ñeñt̄ara Jerusalén.
Tarraña ñetpa' chach tsena'chet. Puetsena'teño'tetpa'
o'huañ yemtenanet ñeñt̄ atet noctape'chatanetañ.
Tarraña ama't erra'tsena ñeñt̄cha' ame'ñerraya ñapa'
ñetñapa' ellopa' amach alla es e'nerrete'te.

Ñeñt̄pa' atet toma'ntachet ahua't: Cristopa' ñach anarettatsa
arr patso atet ñerra'mrrate' mapue' ñeñt̄ atarrcha' sherben.
Tarraña judionesha'ñapa' ama asherbenaye' eñcheto ama't
mamesha, cha ottet ñerra'mrrate' atta epoto'tatse'tyeset ñesho
ñeñt̄ atma'ntataret mapue'.

10

¹ O'ch masheñeshacha' ñaña nochaneshacha' notas,
napa' neyo'chrocmañen nemneñ namo'tsesha' ñeñt̄ara
israelena'tarpa' o'te' qeshp̄a'huerrret ñamet. Ñeñto'marña
ñocpuetpa' chocma nema'yochanñipenanet Yompor.

² Napa' neñotenanetañ e'ñe po'ño'ch mueneñetañ o'ch
e'ñe sherberet Yompor, tarraña ama't atet muenenetañpa'
po'ño'chpa' ama chenaneñoña pueyo'chreto ñeñt̄ po'ño'ch atet
muenen Yompor.

³ Po'ño'chpa' ama chenaneñoña pueyo'chreto ñeñt̄ atet muen-
nen Yompor atetcha' ye'pa' attoch pocte' enteneypa' ama't e'ñe

allohueney. Ñetpa' otenapuetañ e'ñe pueyečcateñoŧet ñeñŧ
 cohuen entenet ñetpa' Yomporñapa' pocte'te' entapretenanet.
 Elloña ñetpa' ama mueneñeto o'ch yemterrñañet ñeñŧ atet
 oteney Yompor, ñeñŧcha' attoch e'ñe po'ñočh pocte' enterrey
 ña.

4 Tarro'mar te'pa' o' huapa Cristo ñaña atet oteney
 Yompor ñerra'm yame'ñerrñaña Puechemer ñeñŧ Cristotetspa'
 attochña e'ñech pocte' enterreyña, ama't erra'tsena ñeñŧcha'
 ame'ñerraya. Allochñapa' o'huañcha' aña yeyemtena o'ch atet
 yepohuen e'ñe cohuen ora allpon ñoñets ñeñŧ atet anaret
 attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

5 Ama't Moiséspa' atet ote't ahuat: "Ñerra'm yepohuenach
 e'ñe poctacma ñeñŧ atet anaretpa' esheccha'ña corretsayach
 errponohuañen."

6 Tarraña attoch po'ñočh pocte' enteney Yompor
 ñeñŧpa' e'ñech yeyemteñoŧ ña ñeñŧ atet oteney: "Amach
 yoctape'chatsto yeyočhro, ñato' este' yepalltena tarro'mar
 ama yepallteno o'ch ahuey ento attoch ya'suater Cristo arr
 patsro.

7 Amaña yepallteno o'ch ahuey ñaña arromñaťneshesho
 ñeñŧ o'pono'tsa'yen patso o'ch yetantatera' Cristo tarro'mar
 ñapa' ahuatoteñ o' tanterra, ama arromñaťesho'tsenayaye."

8 Tarro'mar Yompor po'ñoñpa' atet oten: "Añ cohuen
 ñoñets alloch yequeshperra, ñeñŧpa' ama torrapahuoyaye
 attoch yenter, tarro'mar ñeñŧpa' e'ñe yesho'tsen. Ñaña
 ama echarroyaye attoch ye'ñoroña, tarro'mar ñeñŧpa' e'ñe
 yeyočhro'tsen." Ñeñŧpa' ñeñŧara ñoñets ñeñŧ o' neser-
 pare'tatas atet añ poctetsa o'ch yame'ñera Cristo.

9 Tarro'mar ñerra'm čho ye'ñorena atto Jesúsapa' Yepartse-
 shar yepeñ, ñaña ñerra'm e'ñe yeyočhrocmañen yame'ñeña
 atto Yomporpa' ahuo't tantater po'rromñoťpa', allochñapa'
 yapa'čho'ña a'qeshpatareteycha'.

10 Tarro'mar ñerra'm yame'ñera Cristo yeyočhrocmañen,
 Pomporñapa' e'ñech pocte' enteney, ñaña ñerra'm čhochña
 ye'ñorena atto o' yame'ñera Cristo, attochña yapa'
 a'qeshpatareteycha'.

11 Ñaña Yompor po'ñoñ ñeñŧ aquellca'huaret ahuatoteñ,
 ñeñŧpa' atet oten: "Ama't erra'tsena ñeñŧcha' ame'ñerraya
 Yomporpa' ñetña ellopa' amach alla es e'nerrete'te."

12 Tarro'mar ama judioneshayaya ñapueť ame'ñenayoña
 Yompor. Ama't ñeñŧ ama judioneshayaye, ñetpa'čho'ña

attecma ame'ñeñet Yompor. Tarro'mar e'ñe patrra Yepart-seshar ñeñt e'ñe allohuenacpay. Shonte'ch esocmañen apa'yesuay ama't eseshaycha' ñeñtey enamuene'.

13 Tarro'mar atet oten Yompor po'ñoñ: "Allo-huenoteypa' ama't erra'tsenoteta chore'te' Yompor pueyočhrocmañen attoch a'queshpataretterretpa' Yomporñapa' a'queshpatterranetcha'."

14 Tarraña amach errotenot ye'chore'cheña Cristo ñerra'm ama cho yeyemteño. Ñaña amate' errotenot yeyemteroña ñerra'm ama es ye'mare'tperro Cristocop. Ñaña amach errotenot ye'mare'che ñerra'm ama eñalle ñeñtcha' a'pote' po'ñoñ.

15 Ñaña amach errotenot a'poteññañetoña Yompor po'ñoñ, ñerra'm ama ña llesensenahueto. "Nanac cosheñtso'tseney ñerra'm esempo huapa ñeñtcha' a'poťose' cohuen ñoñets ñeñt huetsa Yomporeshot alloch yocsherra e'ñe cohuen yeyo'chro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

16 Tarraña ama't ñeñt pue'maran Yompor po'ñoñ amaña allohuenacmaye' ame'ñereto añ cohuen ñoñets ñeñt huetsa Yomporeshot. Ama't atet ote't Isaías ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserppare'tatuanet." Arrpa' allohua ñeñt atet ote't Isaías ahuat.

17 Tarraña ama't atteñpa' elloña napa' o'ch notas, e'ñe yeserppare'teñoť Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteñoťetpa' o'ch ame'ñeret Cristo.

18 Ñato' sapa' čhate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshot. Tarraña napa' o'ch notas, po'ño'chca'ye pue'maret tarro'mar atet oten Yompor po'ñoñ:

Ñeñt a'potene' Yompor po'ñoñpa' o' eñotatyaset erracmañen arr patsro, o' epa'huamocha Yompor po'ñoñ errařaren.

19 Te'ña sapa' ñato' čhate' sotenapañ judionesha' ñeñtara israelena'tarpa' ñato' amate' čhenaneto pueyočhreto ñeñt atet cotape'chen Yompor. Tarraña napa' o'ch notas, po'ño'chca'ye eñoteñetañ Yomporñapa' o'ch ame'ñaterrana ñaña po'poñ acheñ ñeñt ama judioneshayaye. Nehua, ñanompa' o'ch neyperpaterrsa ñeñt atet ote't Moisés. Moisés ahuatpa' ahuo't quellcanet añ ñoñets ñeñt atet och Yompor, ñeñtpa' atet ot Yompor:

Napa' o'ch name'ñatera po'poñ acheñenesha' ñeñt sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es

eñoteneto. Tarraña napa' o'ch name'ñatueranet ñetpa' sañapa' e'ñe sempa'teñoftenpa' o'ch se'moñe'terranet, tarro'mar allempo ñetpa' o'ch nechemerasha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahuat.

²⁰ Allotpa' ñaña Isaías ahuat ñañaapa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñtpa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetñapa' o' enterrnet. Ama't ama eseshaye' na'p'to'tenaye errotente'ña na ñeñt atet nepena, tarraña nañapa' o'ch neñotaterranet ñeñt atet nepena.

²¹ Ñaña ellonet Isaíaspa' serrpare'te't atetcha' perra judionesha' ñeñt atet eñorena Yompor ñocpuet, ñeñtpa' atet ot Yompor: “Napa' nellapene'tcha' chore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, chachña po'poñ entuennet allohuenet.”

11

Atto judionesha'pa' a'ypo'ñareñtenetañ, tarraña ama poctacmaye' a'ypo'ñenanetoña Yompor

¹ Tarraña ama't atteñ, napa' o'ch notas, po'ño'ch Yomporpa' ama e'ñe poctacmo' a'ypo'ña'huerrano pueyochresha'chno, ñeñtaret ñeñtet israelena'tarnesha'. Ate't ñerra'm na, napa'cho'ña israelena'taren tarro'mar napa' po'ñrenñen Abrahamañ ñeñtara Benjamíñeñ mereñtsoren.

² Yomporpa' ama a'ypo'ña'huerrano pueyochresha'chno. Ñetpa' e'ñe eñotuanete't ahuat ñeñt'cha' pueyochrenesha'chno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquellca'huaret Yompor po'ñoño ama't ahuatoteñ. Sapa' ama't seyerpuenoña ñeñt atet pe't Elías ahuat. Ñapa' ahuo't otteñe'chan israelnesha' e'ñe poema'yocheñoñ Yompor.

³ Ñeñtpa' atet otan Yompor ahuat: “Nompore, namo'tsesha' ñeñtara israelena'tarpa' epaye' muetsanatennapet ñeñt pa'm'tene' peñoñ. Ama't ñaña Nompore ñeñt altar ñeñt allot yesherbenpeñpa' o' e'ñe tore'tatuonapet. Ama't napa' o' e'ñe naptaña ñeñten pame'ñenaya. Ama't te' Nompore napa'cho'ña o'patennet ahuo'ch muetsanet naña.” Arrpa' allohua ñeñt atet otteñe'chane't Elías pamo'tsesha' Yomporesho ahuat.

⁴ Arrñapa' atto eñorana'tana Yompor Elías ñeñtpa' atet och: "Amaca' p̄ap̄tayaya ñeñteṗ name'ñenaya, elloña eñallmeñ cančhroch mil israelena'tarnesha' ñeñ name'ñenaya ñeñ ama concorpana'tenana' ma'yochaya ñeñ ayečcataret ñeñ sochenet Baal. Ñetñapa' nenenanet ellonet nocop." Arrpa' allohua ñeñ atet neyerpatensa atet ote't ahuat Yompor allempo eñorana'tana Elías.

⁵ Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña' ama't puesheña'ttsapa' ahuo't ye'cherranet allochñapa' attochña e'ñe puemuereñoñanetpa' o'ch a'queshṗaterranet.

⁶ Tarraña e'ñe puemuereñoñanet ahuo't a'queshṗatanet. Amaña añoṯeyaye atto cohuen es yečcatyenet ñet. Tarro'mar ñeñ cohuen yečcatyenet ñerra'm allo a'queshṗatenetañpa' Yomporña puemuereña' amate' a'queshṗatañeye' yenteñe.

⁷ Ñeñ'o'marña yeñoteñ, israelena'tarpa' ama allohuenacmaye' enterreto ñeñ e'nenet. Ñehua, ñeñ e'nenetpa' ñeñtpa' attoch e'ñe pocte' enterranet Yompor. Puesheña'ttsa enterre' ñeñ ye'chena Yompor. Tarraña po'potantañña' ama entereto ñeñ atet muenen Yompor ñeñ attoch e'ñe pocte' entuerrey tarro'mar ñetpa' čhocma echarrenanet pueyočhreto o'ch pet ñeñ atet muenen Yompor.

⁸ Ñetñapa' o' e'ñe atet p̄ohuet ñeñ e'ñe atet anuaret Yompor po'ñoño ama't ahuatoteñ. Ñeñtpa' atet oten: "Yomporpa' ñach ama muenatahueto o'ch es čchapahuet pueyočhreto. Ama'tcha' čho es entenetañ ñeñ atet pena Yomporpa' amach čchenaneto pueyočhreto ñeñ atet muenen Yompor. Ñaña ama'tcha' e'mñoteññañetañ Yompor po'ñoñpa' amach čchapaneto pueyočhreto ama't ahuata ñeñ atet muenen Yompor. Ama't teme'ttsenpa' attecma penet." Arrpa' allohua ñeñ atet ote't Isaiás ñeñtcha' atet perra judionesha'.

⁹ Elloña Davidpa'čo'ña ñapa' atet ote't ahuat, ñeñtpa' atet ot:

Judionesha'pa' nanac a'nateña Yompor. Shonte' esocmañen echenet ñeñ alloch rrallme'chapretannenet. Tarraña ñeñtpa' čha shequēnanet tarro'mar ñetpa' otenapuetañ Yomporpa' e'ñeṯe' pocte' entenanet. Tarraña ñeñtpa' ama atteyaye. Ñeñtpa' ñeñtcha'ña a'chencaterrahuet. Attoch e'ñe tsa'tatuerranet.

¹⁰ Ellopa' alla oterrerr David ñocpuet, ñeñtpa' atet ot:

Arepa'ch es čchapahueto pueyočhreto ñeñ atet muenen Yompor, attetach ñerra'mrrate' aporo'yet ñeñ amach enteno. Chocmuepa'ch amueročhtatarettenet e'ñech

at̄tet ñerra'mrrate' eñerr a'mo'ca'nenahuet ñeñt̄ nanac amuerochtatañ.

Atto Yomporpa' a'ypo'ñaneñ judionesha', ñeñtpa' añecop attoch a'queshpaterran ñaña ñeñt̄ ama judioneshayaye

11 Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe patpare'teñoŋet ñetpa' attoña Yomporpa' ahuo't ame'ñaterrana po'poñ acheñ ñeñt̄ ama judioneshayaye attoch a'queshpaterranet ñamet. Attochña judionesha'pa'cho'ña e'ñe puempa'teñoŋet Yomporpa' ñato' o'ch alla ame'ñeret Yompor e'ñe cohuen.

12 Atto atpare'tenan judionesha' Yomporpa' po'poñechnoña acheñenesha' arr patsropa' ahuo't çhapanet attoch ame'ñeret ñamet Yompor. Ñehua, atto ama't patpare'teñoŋetpa' yenpueñet po'poñ acheñ ñeñt̄ ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueñoŋetpa' nanaccha' yenpueret po'poñ acheñ ñeñt̄ ama judioneshayaye.

13 Ñeñtpa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt̄ atet llesensenen Yompor.

14 Tarro'mar allochñapa' attoch name'ñatera ñeñt̄ ama't ama judioneshayaye. Attochña ñato' judionesha' ñeñt̄ e'ñe namo'tsna'taranetpa' e'ñe puempa'teñoŋet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'queshpataretterret ñamet, ama't puesheña'ttsoŋa.

15 Tarro'mar ñeñt̄ atto Yomporpa' ahuo't a'ypo'ñan judionesha', ñeñtpa' añecop attoch amo'tsterrana po'poñechno acheñenesha' arr patsro ñeñt̄ ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' çhach otterret ñerra'mrrate' rromot o'tantuerret.

16 Tarro'mar atto ñeñt̄ ñanom judioneshatatset̄ ahuaŋtpa' ñetpa' anarettete't̄ Partsocop, allochñapa' po'mrenñenesha'pa'cho'ña ñetpa' acraretterretcha' ñamet e'ñe attecma. Ñato' o'ch yetma'ntacha atet pete't̄ ahuaŋ pocrram̄ ñeñt̄ nete't̄ Partsocop. Ñeñt̄ ñenmaŋ pocrrametpa' ahuo'ch yoreñet coñe't̄ ñeñt̄ nanac cohuen ñeñt̄cha' nenet Yomporcop. Ñaña atto ñeñt̄ ñanom pocrram̄ yorenet Partsocoppa' ñeñtpa' e'ñe cohuen, añña allot̄ yoret pocrrametpa' ñeñt̄ña pocrramet orapa' e'ñech

cohuenare'. Ñaña ñato' o'ch yetma'ntacha po'poñ ñeñt atet pena tsachrech. Ñehua, ñerra'm erra'tsen tsach ñerra'm puerchochno e'ñe cohuenare' puetacrechnopach'ho'ña e'ñech cohuenare'.

17 Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' attet ñerra'mrrate' olivoch ñeñt e'ñe cohuenarmets. Tarraña ñato' ñeñt allpon puetaquerpa' ahuo't pecha'tam̄pset ahuo't huapore'chet. Allochñapa' attoch a'tapa'llateret epuet ñeñt puetsato'mar olivochtaquer ñeñt ama narmetsoyaye. Sa ñeñtes ama judioneshayaysopa' sapa' aña puetaquer sepene' ñeñt puetsato'mar olivochtaquer. Te'ñapa' o' a'tapa'llataterret olivochtacro allot apecha'taret ñeñt ahupore'taret. Allochñapa' attochña sapa'cho'ña o'ch separrocmaterr epas ñeñt ame'ñenaya Yompor, ñaña attoch sagapapreter Yompor pa'nateña ñeñt atet otane't Yompor judionesha' pa'tañeshañ ahua't.

18 Tarraña ama't atteñpa' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt toma'ntenaya olivochtaquer ñeñt ahupore'taret, tarro'mar sapa' señochepe'ch allotca'yeña hueña sa sehuamenc tsachrechot ñeñt atma'ntataret judionesha' pa'tañeshañ ahua't. Ama atteyayso ñerra'm ñeñt e'ñe puetacres o'ch ahuamencat sepoñ puerech, tarro'mar ama atteyaye, puerechña e'ñe ahuamencat sepene'ña sa.

19 Ñeñtes ama judioneshayayso, sapa' chate' sotenapañ so'te'ña nanac sherbets ñeñto'maro' Yomporpa' ahuo't pecha'tam̄psan judionesha' olivochtacro't allochñapa' atto'ch sapa' o'ch e'ñe separrocmaterr.

20 Tarraña napa' o'ch notas, ama't po'ño'ch o' a'ypo'ñare'ta judionesha' añecopña a'ypo'ñare'terret e'ñe patpare'teño'tet Yompor. Ñehua, te'ña sapa' e'ñe seyemteño'ta Yompor o' separrocmaterr sa. Ñeñto'marña o'ch notas, amach sommo'chatsto, e'ñepa'chña sencha'na'teño't same'ñeña Yompor.

21 Tarro'mar atto Yomporpa' ahuo't huapore'tan olivochtaquer ñeñt e'ñe puetacra ñeñt toma'ntenaya judionesha' ñeñt ama ame'ñenayo ña, sapa'cho'ña ñerra'm attach sepena sam̄apa' ahupore'tarettescha' sam̄a.

22 Señochepe'ch po'ño'ch Yomporpa' atarr cohuen amueraña. Tarraña ama't amuerañañpa' ama allocchama'metsoyaye,

tarro'mar ñapa' chocmach tsa'taterrana ñeñt' ama ame'ñenayo ña. Ñerra'm chocmach seyemteña atto nanac muerensa ñaña' e'ñech cohuen entenes. Ñerra'm amach atet se'papa' sapa'cho'ña ahuapore'taretescha' atet ñerra'm tsachtaquër.

²³ Ñaña ama't judionesha' ñeñt' a'ypo'ñareftetsapa' ñerra'm o'ch alla ame'ña'hueret Yompor, ñaña' o'ch alla parrocmataterranet po'pocheño. Tarro'mar Yomporpa' nanac ahuamencat, ña po'huamencotpa' o'ch alla parrocmatateranet po'pocheño.

²⁴ Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmataterres, ama't sapa' atet entenes ñerra'mrrate' nanac allaparo'tsenes atet pena ñeñt' puetsato'mar olivoch. Ñaña sapa' apechtacre'charetés po'pchaño, ñaña' ahuo't a'parrocmaterres olivochtacro ñeñt' narmets olivoch ama't sapa' ama e'ñe puetacreyayso ñeñt' narmets olivoch. Atto pocte' eñch Yompor ñeñt' atet p'onas sa, elloña judionesha'pa' nanaccha' cohuen enterranet o'ch alla parrocmataterranet, o'ch alla puetaquër p'aterranet olivoch ñeñt' e'ñe ño puetaquër.

Atto judionesha'pa' a'queshp'ataretterretcha' ñamet esempohuañen

²⁵ Te'pa' o'ch masheñneshacha' ñaña no'chaneshacha' neñotatas ñeñt' ahuatoteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño'ch allochñapa' attoch amach sota'psa'tatsto sapa' atarro' es seño'ten. Ñeñt' atet atpare'tena patantarr israelena'tarpa' ñeñt'pa' mamecpa atet muenatenanet Yompor tarrempho'ch allempoch e'ñe etsotua attoch ame'ña'huerra allpon acheñenesha' ñeñt' ama judioneshayaye.

²⁶ Allempochña allohuen israelena'tarnesha'pa' a'queshp'ataretterretcha' ñamet. O'ch etsoterra e'ñe atet aquellca'huaret Yompor po'ñoñ ahuatoteñ, ñeñt'pa' atet ote't Yompor:

Ñeñt'cha' a'queshp'aterrahuetpa' huapach. Arro'tcha' huapa ñeñt' anetserpa' añ pa'so'cheñ Sión. Ñeñto'marña pamo'tsna'tarcha' p'osan israelena'tarnesha'. O'ch huapapa' a'huaña'mperrancha' Jacoboñ po'm'reneñ* ñeñt' atto nanac atpare'teñet Yompor.

²⁷ Allempochña nahuanman'perranet po'chñaretpa' allempochña etsoterra ñeñt' atet notanete't ahuat' ñeñt'cha' atet

* **11:26** Ñeñt' otenet israelena'tarnesha', ñaña sióno'marnesha', ñaña Jacob po'm'reneñ, ñaña jerusaléño'marnesha' ñetpa' ñeñtareta judioneshet.

neperranet esempo. Arrpa' allohua ñeñt atet ot Yompor ahuat.

²⁸ Tarraña te' Yomporpa' atet entenanet ñerra'mrrate' ñeñt e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt alloch po'ñoñch yequeshperra. Tarro'mar atet pena allochñapa' o'ch sa'queshpataretterra saña ñeñtes ama judioneshayayso. Tarro'mar Yomporpa' ahuatoteñ acrane't judionesha' ñeñtcha' atarr morrentena tarro'mar ñeñt pa'tañneshañ pete'tpa' ña a'crahuete't ahuat ñeñtcha' atarr morrentena.

²⁹ Tarro'mar Yomporpa' ama puenesho po'ñoñ. Atet otanete't ahuat ñeñtcha' o'pataterranetpa' e'ñech etsotuerra. Ñaña atet otanete't ñeñtcha' atet chore'terranet attoch e'ñe ame'ña'hueretpa' ñeñtpa'cho'ña e'ñech etsotuerra.

³⁰ Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa saña.

³¹ Ñaña te'pa' atto judionesha' attecma atpare'teñet Yompor atet satpare'che't saña ahuat, ñetpa'cho'ña muererranetcha' atet muerensa saña te'.

³² Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

Atto Yomporpa' ama eñotpahuoyaye ñeñt e'ñe atet cotape'chen ña

³³ Yomporpa' puemorrenteño'tpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromñateypa' amate' errotenot yeñotuoñeña ñeñt atet penaña ña. Ñaña ama't mameshapa' amate' errotenot chaponayoña ya yeyo'chro ñeñt ora allpon ñeñt atet cotape'chyen ña.

³⁴ "Tarro'mar yapa' ama't puesheñarro'teya amate' errotenot yeñotuoña ora ñeñt atet cotape'chen Yompor. Ñaña yapa' ama't puesheñarro'teya amate' errotenot yoctape'chacheña Parets.

³⁵ Ñaña yapa' ama't puesheñarro'teyapa' amate' errotenot yetsa'choña Yompor attoch aphuerrey ñeñt yemnen ya."

³⁶ Tarro'mar ama't allohuen ñeñt allpon es eñalletyetsa e'ñe Yomporeshotecma huena, e'ñe ña po'huamencot eñalletena, ñaña e'ñe ñocop ye'chcatue. E'ñepa'ch ya'ye'chochtateññañ tayoteñ ama't errponañohuen. Ñeñtpa' attetepa'ch Nompore.

12

Atto añ poctetsa o'ch e'ñe yaphuer Yompor yechets

1 Ñeñto'marña te'pa' o'ch masheñneshacha' ñaña nochaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer Yompor yechets. O'ch yaphuer allohuen yechets atet ñerra'mrrate' ñeñt muetsete't ahuat Yomporecop ñeñtcha' nenet ñocop. Tarraña ya yechets e'ñech betnatot yaphuer Yompor tarro'mar ñeñt'pa' e'ñech ñocpa, ñeñtcha' nanac coshatene' ña. Attochña e'ñech yeyochrocmañen cohuen yocter Yompor.

2 Allochñapa' amach allo'na atet es yepatse'tyesneno ñeñt atet yeychen ya añe patsro, ellochña yoctape'cherr etserra attoch etserrataterrnay Yompor yoctapña. Attochña e'ñe cohuen señoche' erra'tsente'ña muenen Yompor ñeñt e'ñe cohuen enten ña, ñaña ñeñtcha'ña coshatene' e'ñe poctacma.

Atto Yomporpa' ama pocteye' entenye o'ch yot yañeña yo'ña nanac sherbets

3 Yompor puemuereñoñenpa' ahuo't llesensenen attoch nach torretsas ñocop. Ñeñto'marña te'pa' notenes ñeñt atet muenen Yompor. Ama't puesheñarrofesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherven atto puesheña'ttsos Yomporpa' ahuo't apa'yesas attoch e'ñe seyemteño't setorra'yesa ñocop.

4 Ñato' o'ch yetma'ntacha ñeñt atet pena yechets. Ñehua, yechetspa' ama e'ñe patrrayaya, atet ñerra'm yecle' ñaña yot ñaña yetac. Ñaña ama e'ñe patrrayaye sherbenye, e'ñe po'poñe'ttsocma sherbeney. Tarraña ama't po'poñe'ttsocma sherbeneypa' e'ñe yocma yechets yepohueñ, tarro'mar e'ñe patrra yechets atet petsa.

5 Ñaña attecma yepena allohueney ñeñtey ame'ñenaya Cristo. Ama't shonteyeñ ñaña ama'tcha' po'poñe'ttsocma yetorra'yesa ñocoppa' ñaña'pa' e'ñech patrra enteney, atet ñerra'mrrate' e'ñe po'chets peney. Attochña e'ñech yeparroc-maten e'ñe puesheña'ttsoy epay Cristo. Attoña e'ñe yeparroc-mateño't Cristopa' o'ch yeparrocmatuahua allohueney ñeñtey ame'ñenaya Cristo.

6 E'ñech po'poñe'ttsocma yetorra'yena Yomporecop, tarro'mar ñapa' ahuo't apa'yese' e'ñe po'poñe'ttsocma ñeñtcha' atet yesherbe' e'ñe cohuen. Ñehua, ñerra'm añ apueney alloch ya'potoñ po'ñoñpa' ya'potepa'ch errponcha' yemtatenya.

7 Amapa' ñerra'm añ apueney attoch yesherbe' po'psheññechno e'ñepa'chña cohuen yeshervenyanet. Amapa' ñerra'm añ apueney attoch yeychateñ po'psheññechno e'ñepa'chña cohuen yeychatyenyanet.

⁸ Amapa' ñerra'm añ yeñoten attoch yoctape'chatyesanet ñeñt' cohuentetsa Yomporecop, e'ñepa'chña cohuen yoctape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeñt' es pallta'yetsapa' e'ñepa'chña yeñmañeshocmañen es yapa'yenanet, amachña čha yempa'tana'tatsche. Amapa' ñerra'm añ yeñoten attoch ya'mcha'tarettena, e'ñepa'chña yocsheñeshocmañen ya'mcha'tarettena, amachña čha yemuenme'chatsche. Amapa' ñerra'm añ yeñoten attoch yeyenpue' ñeñt' mueročhtetsa, e'ñepa'chña yocsheñesha' yeyenpuenanet.

Atetcha' pa'yesa ñeñt' pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñt' ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeñt' e'ñe cohuen enten Yomporpa' amach čha ya'ypo'ñatsche.

¹⁰ Ñaña añ poctetsa amorrentanna'tpo'ch yentannena allohueney atet ñerra'm po'ñočh e'ñe yemo'nasheñ yeñannena. O'ch atet yeñch po'psheñeñ ñapa' atarr sherben, amachña yañeña nanac asherben entetso.

¹¹ Amach čha sečllana'tatsto torraya ñeñt' cohuen enten Yompor. Añcha'ña e'ñech seyočhrocmañen sesherbe' Yepart-seshar atto ahuamencat penes Parets Puecamquëñ.

¹² Ñaña e'ñepa'ch socshena tarro'mar yapa' e'ñe yeyemteñoť yecuenña ñeñt' o'patatenya Yompor. Ñaña ñerra'm esempo huaponasa mueročhteñets e'ñepa'chña sa'huante'. Ñaña čhocmuepa'chña sema'yocheña Yompor.

¹³ Ñaña ñeñt' pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñt' pallta'yenet. Ñaña e'ñepa'chña cohuen sagapannena sepaclo.

¹⁴ Ñaña añ poctetsa o'ch senamoñ Yompor attoch a'natana ñeñt' se'moñe'tene'. Amachña čha sarrnomare'tatscho.

¹⁵ Ñaña ñerra'm esempo esesha' atarr coshetsa, sapa'cho'ña socshapretanetepa'ch. Ñaña ñerra'm esempo esesha' yahuetsa puellquëñoť, sapa'cho'ña sellcapretanetepa'ch.

¹⁶ Amachña čha atsrre'močen sentanna'teno. Ñaña amach aña se'natsto attoch sommo'chena. Añcha'ña pocte' senten o'ch seyemteña ñeñt' ama esoshe'maye' entyeneto. Ñaña amach sentatsto sañeña, so'ña e'ñe sapueť atarro' es señoten.

¹⁷ Ñaña ñerra'm po'psheñeñ erroten paspa' sapa' amach setsa'tatatsche ama't coñe'ta. Sapa' añcha'ña e'ñe sema'yočhra ñeñt' čhocma sepena ñeñt' cohuen enten allohuen acheñenesha'.

18 E'ñe puesheña'ttsospa' čhochña se'nyes ñeñtcha' atet sepa'yey ñeñt pocte' enten allohuen acheñenesha'; attochña e'ñe cohuen sentannena. Allochñapa' o'ch socrrena e'ñe cohuen muechet e'ñe sagattsa ñeñt parro'marneshas.

19 Te' o'ch masheñeshacha' ñaña nočhaneshacha' e'ñe nemorrenteñoťespa' o'ch notas, ñerra'm esempo po'psheñeñ erroť p̄aspa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt̄pa' atet oten Yompor po'ñoñ ñeñt̄ anuaret̄ ahuatoteñ. Allempo atet otanete't̄ Yompor, ñeñt̄pa' atet ot: "Napa' naña ñeñten atsa'tatañen, napa' nach tsa'tatuerrahuet." Arrpa' allohua ñeñt̄ atet ote't̄ Yompor.

20 Añcha'ña atet sepoñ ñeñt̄ se'moñe'tene' ñeñt̄ e'ñe atet oteney Yompor po'ñoñ. Ñehua, ñeñt̄pa' atet oten: "Ñeñt̄ se'moñe'tene' ñerra'm esempo cheporrenapa' sañapa' sapepa'ch ñeñtcha' rra'. Ñaña ñerra'm esempo oñpa'ten sañapa' sapepa'ch ñeñtcha' orr. Ñerra'm atetcha' sepe'pa' ñaña'apa' o'ch penquēna nanac. Atarrcha' atserr e'man atto penquēna. Allempoñapa' ñato' e'ñe puepenquēñoťpa' ñeñtcha'ña cotape'chaterre' cohuen."

21 Ñeñto'marña notas, ñerra'm esempo po'psheñeñ erroť p̄aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt̄ e'ñe cohuentetsa. Ñerra'm atet yepenapa' e'ñe yepenot̄ cohuenpa' o'ch ya'huañat ñeñt̄ ama cohueñayaye.

13

Atto añ poctetsa o'ch yame'ñeña ñeñt̄ añcha'taretetyetsa añe patsro allochñapa' attoch yocrrena e'ñe cohuen muechet

1 Ñaña añ poctetsa e'ñe puesheña'ttsoypa' o'ch yame'ñya ñeñt̄ añcha'taretetyetsa ñeñt̄ pueyochresha' pen gobierno'. Tarro'mar amach eñallñeña ñeñtcha' añcha'taretetyetsa ñerra'm ama Yompor muenatenahueto o'ch atet pet. Tarro'mar ñeñt̄ añcha'taretetyetsa arr patsropa' ñetpa' Yompor muenatenahueto o'ch atet pet.

2 Ñeñto'marña yeñoteñ ñerra'm esesha' atpare'tene' ñeñt̄ añcha'taretetsa arr patsro ñapa' añe'na atpare'ten Yompor, tarro'mar Yomporpa' ña muenatenahueto o'ch añcha'taretetyenet arr patsro. Ñaña ñeñt̄ atpare'tene' ñeñt̄ añcha'taretetsa arr patsro ñapa' e'ñe ñañeña patpare'teñoť atsa'tatarettach.

3 Ñaña ñerra'm čocma ye'pa'yen ñeñt̄ cohuen enten añcha'taretpa' amach añcha'nočhenaye' yenteñeña ñeñt̄ añcha'taretetsa, tarro'mar e'ñe attotapa' amach erroť pa'ye.

Tarraña ñeñt atpare'tene' ñeñt atet muenen añcha'taretpa' ñetñapa' atarrcha' añcha'nochen enteñetña añcha'taret tarro'mar añcha'taretpa' chocmach tsa'taterranaña ñeñt atpare'tene' ña. Ñehua, ñerra'm ama semno o'ch añcha'nochen señch añcha'taretpa' e'ñechña cohuen es sepa'yen, attochña añcha'taretpa' e'ñech cohuen entenes, amach erroť paso ama't mamesha.

4 Tarro'mar ñeñt añcha'tarettetsa arr patsropa' añ torrenet ñeñt atet muenatenanet Yompor, allochñapa' attoch a'pocatenet esheccha' e'ñe cohuen yocrrena arr patsro. Tarraña ñerra'm añ atet sepen ñeñt ama cohuenayayepa' pocte'ñačo'ña allochñapa' attoch semcha'teñ añcha'taret, tarro'mar ñapa' ama orrena añcha'taretteno, chocmach tsa'tatana ñeñt atpare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeñt atet pene' ñeñt ama cohuenayaye.

5 Ñeñto'marña añ pocte' o'ch yame'ñya ñeñt añcha'tarettetsa arr patsro, allochñapa' attoch amach tsa'taterrye Yompor e'ñe ya yatparñoť. Elloña ñeñt atet yame'ñena, tarro'mar e'ñe yeyo'chropa' yeñotena ñeñtpa' e'ñe pocte' o'ch e'ñe yame'ñena.

6 Ñeñto'marña ñaña añ poctetsa o'ch yetsa'ta impuesto, ñeñt atet anaret ñoñets ñeñt cobrenyet añcha'tareteshoť tarro'mar ñeñt añcha'taretetyetsa añ patsro, ñeñtpa' atet muenatenanet Yompor ñeñtcha' atet torrenet ñeñt po'taruas penet.

7 Chocmach setsa'ta allohuen ñeñt atet anaret ñoñets atto cobrenyet atet ñerra'm allpon quelle ñeñt enamueney añcha'taretnesha' atet ñerra'm impuesto'chno, chocmach setsa'cha. Ñaña acheñ ñeñt añcha'na'tpo' entenetpa' chocmuepa'ch semcha'na'tueñ. Ñaña acheñ ñeñt atarr amorrentaretpa' chocmuepa'ch semorrentueña.

8 Amach esesha' setebatsto, ama't puesheñarra. Añcha'ña sepa ñeñt poctetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeñt atet anaret ñeñtcha' atet yepenat e'ñe cohuen.

9 Atet ñerra'm paterr ñoñets ñeñt atet anaret ñeñtpa' atet oten: "Amach sechtapretanna'tatsto setapor." Po'poñ ñoñetspa' ñeñtpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tam'psatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñechno ñoñets ñeñt atet ye'chateney. Allohuen añ ñoñets

ama't po'poñe'ttsoema atet yečhatenyeñ, tarraña po'ñočpa' e'ñe patra oteney, ñeñtpa' atet oteney: "Atarrepa'chña yemorrenteña yamo'ts e'ñe atet atarr yemorrentena yañeña." Ñerra'm čocma yemorrenteña yamo'tspa' allempoña po'ñočpa' yetsotuach ora allohuen ñeñt atet yečhatyeney po'poñe'ttsoema ñoñets ñeñt atet anaret.

¹⁰ Tarro'mar ñerra'm po'ñoč čocma yemorrenteña yamo'tspa' amach yemno o'ch errot yeřanet te't čha yellcatenanet. Añečno atetpa' ama morrenteñtsoyaye. Ñeñto'marña yeñoteñ ñerra'm po'ñoč čocma yemorrenteña yamo'tspa' ñeñtpa' attochña e'ñe yetsotua ora allohuen ñoñets ñeñt atet anaret ahuatoteñ Yomporešot.

¹¹ Atetča' seřohua ñeñt atet o' notuas, tarro'mar yeñoteñ o' čhappmoch allempoch huerra Cristo, ñeñto'mar socoppa' añ poctetsa o'ch alla setanterra Cristocop amachña sečllañoča es seřa'yeno atet ñerra'm čha semuen. Tarro'mar ahuañmo'cha allempo ñanom yame'ñera Cristopa' allempo atarr atomat palltenmeñ attoch ya'qeshřatare'tterra. Tarraña te'pa' ama atarr atomatmeñeyaye. O' mameshamerra attoch ya'qeshřatare'tterra.

¹² Arr patsropa' eñall shonte' sosya'tsañečno. Ñato' o'ch yetma'ntacha atet ñerra'mrrate' yapa' checmeta yeyčhena. Tarraña te'pa' e'ñe atet pena ñerra'mrrate' o' metuamoch checmete' o' puetarenmoch, tarro'mar yapa' yeñoteñ o' čhappmoch allempoch huerra Cristo. Ñeñto'marña añ poctetsa o'ch yesuanom allohuen ñeñt ama cohuenayaye ñeñt atet atma'ntatare't checmete'. Añcha'ña atet yeřa'yen ñeñt cohuen enten Yompor ñeñt atet atma'ntatare't puetare'. Attochña yetorrena Yomporecop atet ñerra'mrrate' čho yečllarena ñocop.

¹³ Añepa'chña yeřa'yen cohuen ñeñt atet penet yeto, ñeñt ama apencočhenayaye ñeñtpa' ama atteyaye ñerra'm ñeñt atet penet tsapo. Amach yocřapretatsto all nanac coshena aposañeččno, e'ñe porrare'teñořet all atarr pa'namen coshatse'tyenet. Ñaña amach yechta'yesatsto coyaneshaččno, amach atet yeřatsto ñeñt pa'namen sosya'tsañečno. Amach ye'natsto atsrre'močen, ñaña amach ye'moñe'tanna'tatsto e'ñe yesope'cheñoť.

¹⁴ Añcha'ña ahuamencat sepene' Yepartseshar Jesucristo, allochñapa' attoch amach semnatatsto sečets o'ch muenatse'tatas ñeñt ama cohuenayaye.

14

Atto eñall ñeñt epuoye' ame'ñenayañ Cristo tarro'mar ama

huomencaye' penano pueyočher Yomporecop

¹ Ñaña te'pa' o'ch notas po'poñ ñeñtcha' atet sepa. Ñerra'm eñall sesho achein ñeñt ame'ñetsañ tarraña ñapa' ama huomencaye' penano pueyočher Yomporecop tarro'mar ama e'ñe eñoteñe po'ñočh atet yeyemteña Cristo, sañapa' o'ch sagaḡ e'ñe cohuen attochña e'ñech parrocmá seyemteña Cristo. Tarraña amach añeḡpa sagape attoch sapa' o'ch sotnare'ch tarro'mar ñapa' po'poñonet cotape'chyen.

² Atet ñato' eñall achein ñeñt ama huomencaye' penano pueyočher Yomporecop tarro'mar ama e'ñe eñoteñe ñeñt atet po'ñočh yeyemteña Cristo; ñeñto'marña ñapa' čhach oten ama pocteyaye o'ch yerra'yes berr po'chets, añach paḡerr yerren narmetsočhno. Elloña po'psheññečhno e'ñe pueyemteñotet Cristo ñetña'pa' otenet e'ñe pocte' o'ch yerra'yes ama't erra'tsena rreñets.

³ Ñeñtey pa'namen es rra'yetspa' amuepa'ch yentatsche ñeñt tore'tetsa ñapa' ama es eñoto. Ñaña ñeñt es tore'tetsapa' amuepa'ch otatsetye ya ñeñtey pa'namen es rra'yets ama pocteyaye o'ch yerratse'tyes pa'namen ñeñt ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey.

⁴ Ñeñto'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñt atet penet. Tarro'mar ñetpa' Ayochreshatecpuet tarro'mar ñapa' ñaña ñapueḡ otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat Cristopa' čhocmach e'ñe pocte' entenan pueyochresha' tarro'mar ñapa' ñach ahuamencat paḡhuet pueyočhro.

⁵ Ñaña ñato' eñall achein ñeñt ama e'ñe eñotenaye ñeñt atet e'ñe po'ñočh yeyemteña Cristo, ñeñto'marña ñetpa' čha otenet añ poctetsa o'ch yonañcha'yen pate'tets yet ñeñtcha' atet yetsoḡayes attochña e'ñe pocte' enteney Yompor. Ñaña ñato' po'psheññečhno ñeñt atet ñerra'm yapa' otenet ama yepallteno o'ch yonañcha'yen pate'tets yet ñeñtcha' atet yetsoḡayes tarro'mar allpon yetpa' Yomporecma pueyečhcatuar. Tarraña puesheña'ttsoypa' yeñoche'pa'ch ñeñt e'ñe pocte' yentyen ya e'ñe yeyočhro ñeñtcha' atet yeḡpa.

⁶ Tarro'mar ñerra'm esesha' onañcha'yene' yet ñeñtcha' atet etsotayes, ñapa' atet oten ñeñt'pa' atet yame'ñeña ya Yompor. Attecmá yepena yaña ñeñtey ama onañcha'yenaye yet, yapa'čho'ña atet yame'ñeña Yompor. Ñaña ñeñtey pa'namen es rra'yetspa' yapa'čho'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecmá

pena ñaña ñeñt es tore'tetsa, ñetpa'cho'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

7 Tarro'mar ama e'ñe ya yemneññoŕeye' atet es yeŕa'yeno aña patsro. Atto yocrrena aña patsropa' ñeñt'pa' ama e'ñe yaptecpayaye, ñaña allempoch yerromapa' ñeñt'pa'cho'ña ama yemneññoŕeye' yerromueno.

8 Tarro'mar atto yocrrena allponmat aña patsro ñeñt'pa' añecop attoch yesherbeñ Yepartseshar. Ñaña allempo yerromuenpa' ñeñt'pa' tarro'mar atet muenateney Yepartseshar. Ñeñto'marña yapa' yoten allempo yocrrena aña patsro ñeñt'pa' ama yaptecpaye' yocrreno, ñeñt'pa' Yepartsesharecop. Ñaña allempo yerromuen, ñeñt'pa'cho'ña ama yaptecpayaye, ñeñt'pa'cho'ña Yepartsesharecop. Ñeñto'marña ñeñt'pa' chocma atet pena tarro'mar ñapa' e'ñe o'paterrya ñaña e'ñe ñocpay.

9 Tarro'mar Cristopa' ñeñtecop rroma, elloñapa' alla corrrera attochña ñapa' ñach yamo'mte' yepen allohueney. Ama't allempo yocrrenmeñ, ama't ñaña allempo yerromuen, atterach yamo'mte' yepeñ, tarro'mar ñapa' pueñotuaran atet peney rromueñets ñaña atto yocrrena ñeñtey arromñaŕey.

10 Ñeñto'marña amach yotatsche yemo'nasheñ ñeñt atet pena ñapa' ñeñt'pa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotentcha' entyerrey esempohuañen allempoch yapcherra allohueney ñesho.

11 Tarro'mar Yompor po'ñoñ ñeñt anuaret ahuatoteñpa' ñeñt allpa' Yompor otatset atet:

Napa' na ñeñten ama arromñaŕeshayayno ñaña ama puenesho neñoñ. Po'ñochpa' atetcha' perra esempohuañen. Ora allohuen acheñenesha'pa' concorpanrrorterrnetcha'. Allñapa' otuerrnetcha':
 "Pa Yomporẽ ñeñteŕ atarr Partsoŕ."

12 Attoña yeñoteñ allohueney puesheña'ttsoy Yomporpa' a'metaterreycha' ñeñt atet o' yeŕpohuahuaena arr patsro.

Atto ama pocteyaye e'ñe atet yepeñot ya o'ch alla ya'puerratater yemo'nasheñ

13 Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yeŕa'yena ya tarro'mar ñeñt atet yeŕa'yena yapa' ñato'rraña chate' ya'puerratater yemo'nasheñ ñerra'm ñapa' ama pocteye' entenano ñeñt atet yeŕa'yen ya.

14 Napa' e'ñe neyemteñoť Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñť allohuen rreñetspa' e'ñe ñocoppa' ama pocteyaye o'ch rrenan ñeñť rreñets.

15 Ama't e'ñe pocteni o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoťpa' ñato' o'ch yeye'chateña allempoñapa' o'ch rre' ñaña, ñaña'pa' chach enteñ ñeñťpa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoť ama't e'ñe cohueñeñpa' o'te' yequechpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequechpatater yemo'nasheñ Yompor. Ñaña ñerra'm atet yepeñ yemo'nasheñpa' po'ño'chpa' ama yemorrenteño, ñeñťara yemo'nasheñer ama't Cristopa' ñocpa'na rroma.

16 Ñeñto'marña notenes, ama't pocteni ñeñť atet pe'pa'yena, tarraña ñerra'm yemo'nasheñpa' ama pocteye' enteñe, ñaña'pa' ñeñtoťach sasare'teney. Ñehua, ama't e'ñe pocteni o'ch atet yepenañ, tarraña amach atet yepatsche.

17 Tarro'mar ñerra'm añ yocteniñañ Yompor po'cohuenña atto pueyochresha' peney, ñeñť atto es yerra'yen amapa' atto es yeťore'tyena, ñeñťpa' ama esoyayeña Yomporecop. Añña ñeñť nanac sherbets attoch yocteniñañ Yompor po'cohuenña, ñeñťpa' atto e'ñe pocte' es ye'pannena añe patsro, ñaña atto e'ñe cohuen yentannena attochña yocrena e'ñe cohuen muechet, ñaña attochña Parets Puecamqueñpa' chocmach coshateney yeyo'chro.

18 Ñerra'm atetcha' yame'ñeña Cristo, Pomporñapa' e'ñech cohuen enteney, ama't allohuen acheñenesha'pa'cho'ña e'ñech cohuen enteneyet.

19 Ñeñto'marña napa' notenes, añepa'chña ye'nen ñeñť attoch e'ñe yeparrocmaterr allohueney ñaña attochña e'ñe cohuen yeyenpannena. Allochñapa' allo'nach e'ñe huomenc ye'panna'tnena yeyo'cher Yomporecop.

20 E'ñe ya yerreñoť po'chetspa' amach ya'huañatatsterrñañe po'psheñeñ ñeñť atet ame'ñenanañ Yompor. Ama't allohuen rreñto'cho'no cohuenacmañ ñeñťcha' yerra'yeneñ, tarraña ñerra'm yerreñoť o'ch alla ya'puerratater po'psheñeñ attoch o'huañcha' ame'ñenana Cristo, ñeñťepñapa' e'ñe pocte' amach yerratsto ñeñťcha' a'puerrataterre' po'psheñeñ, tarro'mar atetpa' ama cohuenaye' enteñe Yompor.

21 Ñeñto'marña notenes, ama't erra'tsena ñeñť atet yepeñoť po'psheñeñpa' o'ch alla ya'puerratater, ñeñťepñapa'

amach atet yeṓatsto, allochñapa' amach puerrerro ama't puesheñarra ñeñt ame'ñenaya Cristo. Atet ñerra'm allempo yerren berr po'chets ñaña allempo yorren co'nes,* ñerra'm atet yepeñoť o'ch alla ya'puerratater yemo'nasheñ, ñeñteṓapa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor.

22 Ñerra'm e'ñe ṓame'ñeñoť Yompor peñotena ñeñt atet peṓa'yena ñeñtṓa' e'ñe pocte' entapreteneṓ Yompor, tarraña ṓapa' e'ñech peyočhro ṓoctape'cheñ Yompor atet, amachña čha pe'matare'tatstoña allo. Nanac cosheñtso'tseney ñerra'm yeñotena po'ñočh e'ñe pocte' entapreteney Yompor ñeñt atet es yeṓa'yen, tarro'mar yeyočhropa' ama epuoye' es yeṓa'yeno.

23 Tarraña ñerra'm esesha' ñeñt epuoye' es rra'yenpa' ñocoppa' ama pocteyaye o'ch rren, ñañaapa' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yeṓa'yeno, ñeñtṓa' ñeñta yo'chñar entennay Yompor.

15

Atto añcha'ña ye'nen ñeñt e'ñe pocte' enten yemo'nasheñ

1 Ñeñto'marña napa' notenes, ñeñtey e'ñe huomenc pene' yeyočher Yomporecop, ñeñtey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñt ama huomencaye' penaye pueyočher Yomporecop ñeñt čhocma epuoye' ame'ñenana Yompor. Ñeñtṓa' atetcha' yeyenpueñ, amachña añña atet es yeṓa'yeno ñeñt atet yemnen ya.

2 Añcha'ña ye'nen o'ch atet yepen ñeñt e'ñe pocte' enten yemo'nasheñ. Ñeñtṓa' atetcha' yeyenpueñ allochñapa' o'ch e'ñe huomenc ṓa'nman ñaña pueyočher Yomporecop, allochñapa' amach allo'na epuoye' ame'ñenano Yompor.

3 Amach añña atet es yeṓa'yeno ñeñt atet yemnen ya tarro'mar Cristopa' ama añña atet ṓa'yese'te ñeñt atet muene't e'ñe ñañaña. Añña ṓa'yese't ñeñt muenache't Pompor. Tarro'mar ñapa' ñeñtecopña mueročhte't ñeñt atet muenache't Pompor. Ñeñto'marña Cristopa' atet otane't Pompor, ñeñtṓa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñt atet aquellca'huaret ama't ahuatoteñ.

* 14:21 Ñehua, Pablo añ toma'ntatanet vino ñeñt poco'nes penet all pa'nyo.

4 Ñaña allohuen añ ñoñets ñeñt atet aquellca'huaret ahuatoteñ, ñeñtpa' yocpa'naña atet anaret. Allochñapa' attoch yapa'cho'ña o'ch yeçhaterryet ñeñt atet muenen Yompor. Allochñapa' attochña huomenc yepen yeyoçher Yomporecop. Ñaña añ ñoñets ñeñt atet aquellca'huaret ahuatoteñpa' nanaccha' coshaterrey allochñapa' atotcha'ña e'ñe yocsheñesha' yeyemteññaña Yompor ñeñt o'patatenya.

5 Yompor ñapa' ñeñt ahuamencat yepene' ñaña ñapa' ñeñtña yocshatene' yeyoçhro. Ñaña ñepa'chña e'ñe señoataterre', allochñapa' attoch e'ñe cohuen seyçherr ñeñt atet muenen Cristo Jesús, allochñapa' e'ñech cohuen sentannena.

6 Allochñapa' allohuenespa' e'ñech parrocmas a'ye'choçhtateññañ Yompor; ñeñtara Yepartseshar Jesucristo Pompor.

Atto ama't ñeñt ama judioneshayayepa' ahuo't aserrpare'tatarettet añ cohuen ñoñets alloch yequeshperra

7 Ñeñto'marña napa' notenes, e'ñech cohuen es sepanna'tyena allohuenes e'ñe atet cohuen o' perrey Cristo, allochñapa' attoch seyemteñoñ parro cohuencha' sa'cshapretarettena Yompor.

8 Ñaña te'pa' o'ch notas, Cristopa' ahuo't huapa arr patro attoch torrosa judioneshacop. Allochñapa' attoch allohuen acheñenesha'pa' o'ch çhapanet pueyoçhreto, Yomporpa' ama puenesho po'ñoñ. Ñeñt e'ñe atet otane't judionesha' pa'tañeshañ ahuatpa' ñeñtcha' atet muenaterranet esempo, ñeñtpa' çhocmachña e'ñe etsoterra poctacma.

9 Ñeñtecopña huapa ñaña attochña acheñenesha' ñeñt ama judioneshayaye ñetpa'cho'ña o'ch aye'choçhtatoñet ñamet Yompor tarro'mar Yomporpa' ahuo't muerenanet ñamet. Attoña etsoterra ñoñets ñeñt quellca'huet ahuat atet ñerra'mrrate' e'ñe Cristo ote' Pompor, ñeñtpa' atet ot:

Ñeñto'marña napa' o'ch na'ye'choçhtatonap allo'tsa'yen acheñenesha' ñeñt ama judioneshayaye, allñapa' na'çhoteneñcha' nemorreñesha'.

10 Ñaña po'poñ ñoñets ñeñt atet aquellca'huaret ahuatoteñ, ñeñtpa' atet oten:

Ñaña sa ñeñtes po'poñ acheñes ñeñtes ama judioneshayaysopa' socshepa'ch samña, atet coshena judionesha' ñeñt pueyochresha' pen Yompor.

11 Ñaña po'poñ ñoñets ñeñtpa' atet oten:

Ñeñtes ama judioneshayaysopa' sa'ye'choçhtatoñepa'ch Yompor, ama't allohuenes pa'namen acheñes sa'ye'choçhtatoñepa'ch Yompor.

12 Elloña Isaíaspa'cho'ña atet ote't ahuat:

Esempopa' orrterrach puesheñarr ñeñt' Isai* po'mreneñ.
Ñapa' orrterrach allochñapa' ñeñt'cha' pa'mcha'tareter
perr allohuen pa'namen acheñenesha', ñaña
allohuenet ñachña atarr yemterret. Arrpa' allohua
ñeñt' atet a'potete't Cristo ahuat.

13 Yomporpa' ñachña atarr ayemuetpoterrtsa. Ñaña
ñepa'chña socshatene' e'ñe poctacma. Allochñapa' amach
eñalle ama't coñe'ta ñeñt'cha' sellcatene' atto same'ñeña ña.
Allochñapa' Paretsña Puecamquëñpa' ñachña ahuamencat
sepene'. Attochña e'ñech socsheñesha' secuen ñeñt'
o'patatensa Yompor.

*Atto Pablopa' ahuo't llesenseñ Jesucristo attoch amach
puemcha'ño'teye' alla yerpaterraneto ñeñt' e'ñe pocte' enten
Yompor*

14 Ñaña te'pa' o'ch masheñesha ñaña noçhanesha notas,
napa' neñotenes sapa' atarr semorrentannena ñaña neñotenes
o' e'ñe çhaponasa seyoçhro ñeñt' atet muenatenes Yompor.
Allochñapa' attochña e'ñe cohuen soctape'chatannena
erra'tsente' cohuentetsa Yomporecop.

15 Tarraña ama't atetpa' ama nemcha'ño'teye' o' notuanmaso
pa'namen arr necarto't ñeñt' atet pocte' enten Yompor.
Attoña o' alla neyerpaterrrserr ñeñt' atet muenen Yompor.
Ñeñto'marña atet nepenes, tarro'mar e'ñe Yompor
puemuereño'tenpa'

16 ahuo't muenatenen nach torretsas Jesucristocop.
Erracmañen allemeñ anetso'mar netorrena, allo'tsa'yen
acheñenesha' ñeñt' ama judioneshayaye. Napa' na
a'potenahuet Yompor po'ñoñ ñeñt' po'ñoçh alloch
yequeshperra. O'ch name'ñatuera ñeñt' ama judioneshayaye,
allemponapa' attochña nehuapatanet Yomporesho atet
ñerra'mrrate' cho es yapueñ Yompor, ñaña'pa' ñeñt'cha'ña
atarr coshatene'. Alloñapa' Paretsña Puecamquëñña'pa'
ñachña a'cohuentatuerrahuet. Attochña e'ñe cohuen enteñet
Yompor.

17 Ñeñto'marña te'pa' e'ñe neyemteño't Cristopa' e'ñe pocte'
nenteñ o'ch e'ñe noçsheña ñeñt' allo netorrena Yomporecop.

18 Napa' aña paterr noten atto Cristopa' e'ñe ahuamencat
penen, ñeñto'marña çhocma name'ñateña ama't ñeñt' ama
judioneshayaye. Atto neserrpare'tatanet Yompor po'ñoñ,
ñetñapa' ahuo't e'ñe name'ñatuanet. Ñaña atto napa' e'ñe

* 15:12 Isaípa' ñeñt'ara Jesé. Ñehua, ñapa' ñeñt' puechemeran David ñeñt'
añcha'tarettatse't Jerusaléno.

cohuenare' es norrtatyen, ñetñapa' ahuo't e'ñe cohuen ame'ñeñet Yompor.

19 Ñaña ñetpa' añña ame'ñatahuet ñeññ atto e'ñe ahuamencat penen Cristo attoña norrtatanet Yompor po'partsoña ñeññ ama puentareto. Ñetpa' ñeññña eñotatuahuet, ñeññpa' po'ñoçh e'ñe Parets Puecamquëñoñ ñeññ e'ñe ahuamencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoñ Cristopa' o'ch yequeshperra. Ateñña neserrpare'tyesnom allemeñ anetso'mar e'ñe Jerusaléñoñeñ Ilírico'marohuen.

20 Napa' añña atarr nemnen o'ch neserrpare'tyen añ cohuen ñoñets erraparen ßachayo'mar all ama pue'mareto ñeññ Cristotets. Attochña napa' amach arra neseno serrpare'tats all o' serrpare'tatuahua po'psheñeñ.

21 Attochña etsoterra añ ñoñets ñeññ atet aquellca'huaret ahuañoten, ñeññpa' atet oten Cristocop:

Acheñenesha' ñeññ ama't ahuañapa' ama aserrpare'tataretteneto ñeññ atet pena ña, ñetñapa' enteretcha'. Ñeññtara acheñer ñeññ ama pue'marano ñeññ atet pena ña, ñetñapa' çherranetcha' pueyoçhreto ñeññ atet pena ña.

Atto Pablo' atarr sechena o'ch ahuo' anetso Romo o'ch emo'tenana' ñeññ ame'ñetsa all

22 Napa' shonte' neserrpare'tatyen erracmañen arr, ñeñño'marña ama eshcaye' neseno sesho. Ama't ahuañoñeñ atarr nesechenañ o'ch nabçhensa', ama erroñ nepeñe.

23 Tarraña na te'pa' o' ne'nua netaruas ñeññ atto neserrpare'tyen arro'mar allemeña. Ñaña napa' ahuañoteñ nesechena o'ch nabçhensa'.

24 Ñeñño'marña te'pa' e'ñe po'ñoçh nesechena o'ch ahuen sesho o'ch nabçhensa'. Allochñapa' o'ch yaßchanna'ta allponmat, allempoñapa' ñato' attoñpa' o'ch seyenpa'n attoch neçhap ñaña España.

25 Ñehua, te'pa' ñanomcha' Jerusaléño neta, attoch nanmanet allpon ofrenda masheñneshacop ñeññ ame'ñetsa all.

26 Tarro'mar allpon ñeññ ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeññcha' oñmachtet masheñnesha' Jerusaléño ñeññ nanac es pallta'yenet.

27 Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeññ Jerusaléño'tsa'yen ñeññ nanac es pallta'yenet. Napa'cho'ña e'ñe pocte' nenteñ tarro'marña ñeññ judionesha' ñetpa' ñetña serrpare'taterret ñanom ñeññ ama judioneshayaye Yompor po'ñoñ. Ñeññ atet aparettet ñetpa'

ñeñtpa' puecamquëñecop. Ñeñto'marña te'pa' e'ñe pocte', ñeñt ama judioneshayayepa' o'ch alla yenpuerran ñaña ñeñt judionesha' ñeñt poctetsa po'chtsocpuet alloch correnet arr patsro.

²⁸ Allempoch neçhap Jerusaléño o'ch napos masheñnesha' ofrenda. O'ch naphuerranet attochña e'ñe ne'nua ñeñt nataruas nepen. Allempoñapa' o'ch ahuen ñaña Español. Ñehua, amach neçhena' Españolpa' o'ch nemo'tnomues allponmat, allotcha' nem'terrerr sesho'tpa' allempochña o'ch ahuen Español.

²⁹ Ñaña neñoteñ ñerra'm esempoch neçhap sesho e'ñe neserrpare'tateño'es Cristo po'ñoñ, sapa' nanaccha' nocshaterres e'ñe nanac Yompor pa'nateño'f.

³⁰ Ñaña te'pa' o'ch masheñnesha notas, e'ñe seyemteño'f Yepartseshar Jesucristo, ñaña attoch apueney Parets Puecamquëñ alloch e'ñe yemorrentannena, sapa' çhocmach sema'yocham'pesna. Nanaccha' sema'yochapretna,

³¹ o'ch senamaton Yompor attoch cohuan'psen allochñapa' amach çha rromapno judionesha' ñeñt ama ame'ñetso all Judeo. Ñaña o'ch senamaton Yompor añecop judionesha' ñeñt ame'ñetsa Jerusaléño, attoch e'ñe cohuen entapretapnet ñeñtcha' nposanet.

³² Allochñapa' ñerra'm Yompor muenatspa' e'ñech nocsheñnesha' neçhap sesho. Allñapa' namesoste' e'ñe cohuen allponmat, ñaña e'ñe yabçhanna'teño'tpa' o'te' alla e'ñe nocsherra neyoçhro.

³³ Yomporepa'chña e'ñe cohuen sa'nataya allohuenes, ñeñtara Yompor ñeñt e'ñe cohuen yocshatene' yeyoçhro. Ñeñtpa' attetepa'ch Nompore.

16

Atto Pablo arr po'carto'tpa' e'ñe huom'cha'tuan ora allohuen ñeñt ame'ñenaya Cristo all anetso Romo

¹ Ñaña te'pa' añ necarto'tpa' nemneñ o'ch neñotatas ñeñt yoçh yepen ya arr ñeñtpa' añ pa'so'cheñ Febe. Ñapa' ña sherbets Yompor pa'pacillo allecma apçhenet Yomporecop añ anetso Cencreo.

² Ñapa' mueneñ ahuo'ch ahuo' sesho. Ñerra'm esempo çhap seshopa' o'ch saga'p cohuen, ñeñt atet poctetsa o'ch yagapan-nena e'ñe cohuen, ñeñtey ame'ñenaya Yepartseshar Cristo. Ñaña ñerra'm o'ch çhap sesho, ñerra'm escha' palltosa ama't erra'tsena, añ poctetsa sapa' o'ch seyenpueñ tarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necartot o'ch nehuomicha'ch noch Priscila puerrollare'na ñeñtara masheñ Aquila, ñeñt parro netorrena ahuañmo'cha Cristo Jesúsocop.

⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'queshp̄atnet na allempo muene' muetsaneñ ñeñt ne'moñe'tene'. Ñeñto'marña napa' atarr neparasyoso'tenanet ñaña ama naptayaya añña ñaña ñeñt allohuen ñeñt ama judioneshayaye, ñeñt e'ñe pame'ñeñotet apcha'yenet allemeñ anetso'mar, ñetpa'cho'ña atarr parasyoso'teñet noch Priscila ñaña masheñ Aquila, tarro'mar ñetpa' ahuo't a'queshp̄atnet, attot ellopa' o' alla neserrpare'tatererr ñeñt ama judioneshayaye.

⁵ Ñaña te'pa' o'ch nehuomicha'ch allohuen masheñnesha' ñeñt pame'ñeñotet chocma apchenet masheñ Aquila pa'paclo, all yeçhena epuet puetapor Priscila. Ñaña arr necartotpa' nemneñ o'ch nehuomicha'ch masheñ Epeneto ñeñt nanac nemorrentena. Ñapa' ña ñanom ame'ñenaya Cristo all anetso Acayo.

⁶ Allotpa' o'ch nehuomicha'ch ñaña noch María ñeñt nanac torretsa sesho parro.

⁷ Te'ñapa' o'ch nehuomicha'ch ñaña namo'ts ñeñtara masheñ Andrónico ñaña masheñ Junias, tarro'mar ñet ahuañmo'chapa' ñeñt parro ehucaretey. Ñetpa' ama't allsensareñnesha'pa' nanac asherben entarettet, tarro'mar ñetpa' ahuatoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

⁸ Allotpa' nemneñ o'ch nehuomicha'ch ñaña masheñ Amplias ñeñt atarr nemuerena e'ñe yame'ñeñot Yepartseshar parro.

⁹ Allotpa' ñaña masheñ Urbano, o'ch nehuomicha'ch ñaña ñeñt parro yetorrena ñeñt po'taruas pen Cristo Jesús. Allotpa' e'ñe nemorrenteño'pa' o'ch nehuomicha'ch ñaña masheñ Estaquis.

¹⁰ O'ch nehuomicha'ch ñaña masheñ Apeles ñeñt chocma ahuantene' allohuen pa'namen topateñets attoña e'ñe cohuen cotenan Cristo. Allotpa' ñaña o'ch nehuomicha'ch allohuen ñeñt pamo'ts pen Aristóbulo.

¹¹ Allotpa' ñaña namo'ts Herodión, allotpa' ñaña ñeñt pamo'tsesha' pen Narciso. Ñetpa' atarr ame'ñeñet Yepartse-shar.

¹² Te'ñapa' nemneñ o'ch nehuomicha'ch ñaña noch Trifena ñaña noch Trifosa. Ñetñapa' nanac torreññañet Yepartseshar

po'taruas, allotpa' noch Pérsida ñapa'cho'ña nanac yemor-
renteña atto nanac torrena ñaña Yepartsesharecop.

13 Ñaña arrpa' o'ch nehuom'cha'ch ñaña po'psheñeñ
masheñ Rufo ñeñt pame'ñeñoñ nanac asherben yenteñ
Yepartsesharecop. Ñaña pachore'na o'ch nehuom'cha'ch,
tarro'mar ñapa' e'ñe atet nenteñ ñerra'mrrate' ñeñt e'ñe
nachor nepen.

14 Te'ñapa' o'ch nehuom'cha'tererr po'potantañ
masheñnesha' ñeñt añ Asíncrito, ñaña Flegonte ñaña Hermas,
ñaña Patrobas, allotpa' ñaña Hermes, ñaña po'potantañ
masheñnesha' ñeñt parrompaño'tsa'yenet.

15 Te'pa' o'ch alla nehuom'cha'tererr ñeñt masheñ Filólogo
ñaña noch Julia, allotpa' ñaña masheñ Nereo epuet ñaña
po'ch, allotpa' ñaña Olimpas, ñaña ama't allohuenet
masheñnesha' ñeñt parrompaño'tsa'yenet.

16 E'ñe semorrentanna'teño'pa' atet'cha' se-
huom'cha'tanna'tena* ñeñt atet pochtetsa Partsocop. Ñaña
allohuenet masheñnesha' ñeñt ap'cha'yetsset allemeñ
anetso'mar e'ñe pame'ñeñoñet Cristo, ñetpa'cho'ña mueneñet
o'ch huom'cha'taset ñaña arr necartot.

*Atto Pablo arr po'cartotpa' o' alla cotape'chaterraneterr
po'pocheño*

17 O'ch masheñneshacha' ñaña nochaneshacha' noterrser
po'poñ añ necartot. Señotcha' añ acheñeneshar ñeñt muenene'
o'ch ellopa'tetstatonaset soctap'ña ñeñt atto same'ñeña Cristo,
tarro'mar ñetpa' mueneñet o'ch cotape'chataset ñeñt ama
attheyaye ñeñt atet o' yey'chatuas. Ñeñt acheñer atetpa'
o'ch sello'tsentach seshot, amach seyematstaneto ñeñt atet
yechatenet.

18 Tarro'mar ñetpa' ama a'ñeye' sherbeneto Yepartseshar Je-
sucristo. Aña cotape'chenet ñeñt atet muenenet ñet po'chets
atto correnet. Atto serrpare'tenet co'chnesha' ñoñets, ñeñt'pa'
atta shequëñet acheñenesha' ñeñt ama huomencaye' penaye
pueyo'cher.

19 Ñehua, allohueney yeñotenes sapa' o' same'ñera Cristo
ñeñto'marña napa' atarr nocshensa. Añña nemnen o'ch e'ñe
señot ñeñt e'ñe cohuentetsa Yomporecop. Allochñapa' amach
soctape'chatsto ñeñt ama cohuenayaye.

20 Allochñapa' Yomporpa' ahuencha' a'huañañp'sonas ñeñt
atto atarr shequënes oneñet, ñeñtara Yompor ñeñt e'ñe co-
huen yocshatene' yeyo'chro. Yepartsesharepa'chña Jesucristo
e'ñe sa'natenaya.

* 16:16 Po'ño'ch oteneý, "E'ñe semorrentanna'teño'ñ choch setso'ttsa'pa'tannena
ñerra'm esempo sehuom'cha'tanna'tena." Ñeñt'pa' atet yechete't ahuat.

²¹ Te'pa' o'ch alla neñotaterrser añ necartot, masheñ Timoteopa'cho'ña mueneñ o'ch huom'cha'tas ñaña, ñapa' ñeñt epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom'cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

²² Napa'cho'ña ñeñten sochetsa Tercio, e'ñe name'ñeño't Yepartseshar nemneñ o'ch nehuom'cha'tas añ masheñ Pablo po'cartot. Napa' ñeñten quellcaten masheñ Pablo.

²³ Masheñ Gayopa'cho'ña muenen o'ch huom'cha'tas ñaña. Na te'pa' e'ñe pa'paclo'tsenen ña, tarro'mar all nechap. Ñapa' atet otenanet chocmach ap'chenet allohuenet pa'paclo ñeñt ame'ñetsa arr. Ñaña masheñ Erasto mueneñ o'ch huom'cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom'cha'tas ñeñfara añ necartot.

²⁴ Yepartsesharepa'chña Jesucristo sa'nataya allohuenes. Ñeñtpa' attetepa'ch Nompore.

Atto all huañen Yompor po'ñoñ añ cartotpa' ya'ye'chochtatoñepa'ch ora allohueney

²⁵ Te'ñapa' ya'ye'chochtatoñepa'ch Yompor tarro'mar ñapa' ñach ahuamencat sepene', ñeñt e'ñe atet oten añ cohuen ñoñets alloch yequeshperra. Ñeñfara añ cohuen cotañats ñeñt neserrpare'tatenes ñeñt e'ñe atet pena Jesucristo ñeñt ahuatoteñ ama eñotpahuo.

²⁶ Tarraña te'pa' Yompor ñeñt ama arromñañeshayayepa' muenaterrey o'ch yeñoter ñeñt ama eñotpahuo ahuatoteñ. Ñehua, ñapa' ahuatpa' añ eñotate't ñeñt a'ñta'yesaye't po'ñoñ, ñetñapa' ahuo'ch quellquënet ñeñt atet eñotatenanet Yompor. Attochña yeñoter yaña, ama't ñaña allohuen pa'namen acheñenesha'; allochñapa' attoch e'ñe yame'ña'huerra ora eraparen, ñeñfey pa'namen acheñey.

²⁷ E'ñe puemuereno'fey Jesucristo aye'chochtatarettepa'ch Yompor errponohuañen, ñeñfara Yompor ñeñt ñapuet e'ñe eñotañtetsa. Ñeñtpa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑŦ QUELLCAN CORINTO' MARNESHA' 1 CORINTIOS

Atto Pablopá' quellcan carta añecop ñeñŦ ame'ñetsa anetso Corinto

¹⁻² Masheñeshacha' ñaãna noçhaneshacha' ñeñŦes allohuenes e'ñe same'ñeñoŦ Yompor çhocma sapçhena parro all anetso Corinto, ñeñŦes o' hua'ñerres Parets attoch pueyochresha' perres atto e'ñe separrocmateñoŦ epas Cristo Jesús pa' sañapa' sa'cohuentatareŦterra Partsocop. E'ñe parrocmá hua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeñŦ e'ñe pame'ñeñoŦ çhore'tene' Yepartseshar Jesucristo ama't errate' yeçha'yenet. ÑeñŦña Jesucristo ñeñŦ Yepartseshar yepen ora allohueney ñeñŦey ame'ñenaya. Na Pablón sequellquêne'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñŦecopña o' çhore'terren attoch nesherber.

³ Te'ña e'ñe nehuomñcha'teñoŦespa' o'ch notas: Yomporepa'chña sebensare'tamñene' ñeñŦara Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Arrpa' all parasyoso'tamñsanet

⁴⁻⁵ Te'pa' o'ch notas, napa' çhocma neparasyoso'teñ Yompor socop tarro'mar ña puemuereñoŦpa' atarr bensare'tamñenes. E'ñe separrocmateñoŦ Cristo Jesús pa' o' eñoŦaterres pa'namen coçhnesha' coŦaññats seyoçhro. ÑeñŦo'mar te'pa' ama't ora allpon señosyen e'ñe ñeshoŦpa' e'ñech cohuenare' señosyen. Ñaãna ama't allohuen cohuen coŦaññatspa' o' señoŦuer.

⁶ ÑeñŦ atet yotuanmas ñeñŦcha' atet ñonas Cristo, te'pa' atetçho' o' etsotatuonas.

⁷ ÑeñŦo'marña te'pa' ama es palltetso ñeñŦcha' apuerriserr po'poñ Yompor. Te'pa' aña palltetsa o'ch secuame'teñ esempohuañencha' huerra Yepartseshar Jesucristo.

⁸ ÑeñŦara Jesús ñeñŦcha' allo'na huomenc sepa'nene' seyoçher. AttoŦach çhap allempoch huerra Yepartseshar Jesucristo. Attoçhña allempopa' amach eñalle alloch otteñe'chareŦes ama't mamesha.

⁹ Tarro'mar Yomporpa' ama puenesho po'ñoñ, erroŦ otpa' atetcha' pa. ÑeñŦara Yompor ñeñŦ o' hua'ñerrey o'ch yeyemterrñaña Puechemer ñeñŦara Yepartseshar Jesucristo.

Arrpa' all yečhatanet attoch e'ñe patrpa cotapñats anmuet

10 Te'pa' o'ch masheñneshacha' ñaña nočhaneshacha' notas ñeñtcha' atet sepa, e'ñech patrpa soctape'ch allohuenes. Amach allo'na soctape'chyesatsto po'poñe'ttsoema. E'ñech patrpa cotapñats soctape'ch allohuenes; erra'tsen soctape'chpa' ñeñtach cohuen sent allohuenes. E'ñe patrpa soctapñotpa' o'ch separrocmatua allohuenes. E'ñe yame'ñeñoť Yepartseshar Jesucristo ñeñto'marña notenes ñeñtcha' atet sepa.

11 Tarro'mar ñeñť parro yečhena Cloépa' ñetpa' e'mare'tatnet atto' sepena. Ñeñtpa' atet otnet atto sa masheñneshacha' čhocma po'poñ sentanna'tyena.

12 Ñeñť notenespa' ñeñtpa' atet sepena: Puesheña'ttsospa' atet sotyen: "Napa' añcha' name'ña masheñ Pablo." Po'potantaññapa' ñeñtpa' atet otyenet: "Napa' añcha' name'ña masheñ Apolos." Po'potantaññapa' ñeñtpa' atet otyenet: "Napa' añcha' name'ña masheñ Pedro."* Po'poñečhnoñapa' atet otyenet: "Napa' añcha' name'ña Cristo."

13 Ñehua, ama't señoťeñeña, po'ñočhpa' ama eñalle attoch yellopa'tetstach Cristo. Po'ñočhpa' amaca'ye naye' corso'tamřseto ñeñť e'ñe socop attoch na'queshřatas. Ñaña ama naye' same'ñeñoť o' sapatare'tterroña Partsocop.

14 Napa' atarr neparasyoso'teñ Yompor tarro'mar napa' ama muenatno o'ch napatas ama't puesheñarroťesa Partsocop. Ñehua, napa' e'ñe epsheña napat Partsocop, ñeñtpa' masheñ Crispo ñaña masheñ Gayo.

15 Napa' e'ñe nocshena tarro'mar te'pa' amach erroťenoť sotno e'ño' na same'ñeñoť sapatare'tterra.

16 Ñehua, po'ñočh ellopa' napach masheñ Estéfanas epuet pamo'tsesha'. Ñerra'm eñallte' po'poñečhno ñeñť napatpa' tarraña ñeñtpa' ama neñoťeñe.

17 Napa' ama añečpaye' llesensa'noña Cristo o'ch napatyes Partsocop ñeñť allpon ame'ñetsa, añečpaña llesensa'n attoch o'ch neserrpare't cohuen ñoñets alloch yequeshperra. Ñaña ama añeye' cočhnesha' na neñoñ neserrpare'tatenso, tarro'mar ñerra'm añña neserrpare'tatenes cočhnesha' neñoñ name'ñatasapa' čhaťe' soten atto rroma Cristo corsochopa' ñeñtpa' amaca'ye es sherbeno attoch yame'ñera Cristo.

Añ ñoñets atto rroma Cristo corsocho, ñeñtña ñoñets Yomporo po'huamenc alloch a'queshřatyerran acheñenesha'

* 1:12 Añ Pedropa' ñeñtara otenet Cefas.

18 Po'ñoch ñerra'm esempo yeserrparen atto Cristo rroma corsocho e'ñe ya yo'chñarotpa' añña acheñenesha' ñeñt chenquëtsapa' çhach otenapuetañ attate' yotatse'tyen. Tarraña ya ñeñtey a'queshpatareteypa' añña ñoñets atto rroma Cristo corsochopa' ñeñtña ñoñetspa' yeñoteñ allotña huena Yompor po'huamenc attoch a'queshpatyerran acheñenesha'.

19 Tarro'mar añ ñoñetspa' e'ñe anuaret ama't ahuatoteñ, ñeñtpa' atet oten Yompor:

Ñeñt entetsa ñapa' nanaco' es eñoten patso'marecoppa' napa' o'ch na'huañampesuanet ñeñt pueñoteñ. Ñaña ama't ñeñt entetsa ñapa' nanaco' eñotañtenapa' napa' o'ch nehuapore'tampes atto es eñotatse'tyenet.

20 Ñehua, ama't señoteñeña, ama't ñeñt nanac es eñotatse'tyets arr patsro ama eñalleña ñeñt atarr asherben enten Yompor. Ñaña ñeñt atarr etsotayenayeñ ñoñets ñeñt atet anuaret ahuatoteñ ñaña ñeñt nanac eño'ñattetsañ añe patsro ama eñalleña ñeñt atarr asherben enten Yompor. Ñetpa' çhate' otenapuetañ atarrte' es eñotenet tarraña Yompor o' eñotatuay po'ñoch ñeñtpa' e'ñeca'ye orrena atet otatse'tyenet arr patsro.

21 Tarro'mar Yomporpa' e'ñe pueñoteñoñ ñapa' ama pocteye' enteñe e'ñe ya yocapñoöpa' o'ch yenter Yompor, ama't yapa' yoteneñ atarrte' es yeñoten. Añmapa' ñeñtña pocte' enten Yompor: ñeñtara cotapñats ñeñt atto rroma Jesucristo yocop ñeñt çhach enteñet ñerra'mrrate' atta yotatse'tyen, añ ñeñtara cotapñats ñeñtña muenen Yompor o'ch yeserrpare'toñ alloch a'queshpaterrey allohueney ñeñtey ame'ñenaya.

22 Ñerra'm esempo yeserrpare'tach judionesha' atto Cristo rroma yocop, ñetñapa' amach asherbenaye' entenetoña yocapña tarro'mar ñetpa' añach muenet yorrtatanetepa'to' Cristo po'partsoña. Ñaña ñerra'm esempo yeserrpare'tateñ ñeñt ama judioneshayeyeto atto Cristo rroma yocop ñetpa'cho'ña amach asherbenaye' entonayetoña yocapña tarro'mar ñetpa' añach muenet yorrtatanetepa'to' ñeñtcha' eñotatahuet e'ñete' po'ñoch atet yoten.

23 Tarraña yapa' añcha'ña yeserrpare'tatanet atto Cristo rroma corsocho yocop. Tarraña añña judionesha' puet-sena'teñoöetpa' amach cohuenaye' enteñeto. Ñaña ñeñt ama judioneshayaye ñetpa'cho'ña attach enteñet ñerra'mrrate' atta yotatse'tyen.

24 Tarraña acheñenesha' ñeñt o' ame'ñerra ñetpa' o' çhapanet pueyoçhreto po'ñoçhpa' Cristo e'ñe Pompor po'huamencotpa' o'ch a'queshpaterrey, ñaña e'ñe Pompor pueñoteñoöpa' o'ch a'queshpaterrey. Attecma o' çhapanet pueyoçhreto ñeñt o'

ameñerra ama't ñeñt judionesha' ñaña ama't ñeñt ama judioneshayaye.

25 Ñeñt ama ameñetsopa' ama't otenapuetañ Yompor poctaṗña' attate' otatse'tyen, tarraña ñeñtara poctaṗña e'ñe ña pueñoteñ ñeñña nanac sherbets. Acheña' ama't atarr es eñoteneña' tarraña poctaṗñetpa' ama tama sherbeno tarro'mar acheña' ama tama es eñoteneto. Ñaña ama't otenetañ Yompor po'huamencpa' ama a'ñshe'maye' orrtenopa' tarraña yocoppa' ello metanennay allohueney yehuamenc tarro'mar yapa' arromña'faya.

26 Ñehua, masheñeshacha' ñaña noçhaneshacha' soctape'ch allempo huañerres Cristo o'ch sameñera. Allempo ama't acheñenesha'pa' entasete't sapa' ama esoye' seño'te tarraña Yomporpa' o' huañerres, ñaña ama't ama sesherbeno, ñaña ama't ama añeyayso puechemeres añcha'taret. Ñehua, ñato' puesheña'ttospa' ñeñtes, tarraña ama allohuenacmaye' attecmaso.

27 Añña pocte' enten Yompor o'ch a'queshṗatan acheñ ñeñt acheñenesha'pa' çhach otenapuetañ ñeñtpa' amate' es eñoteno. Tarrecop pocte' enteñ Yompor allochña'pa' o'ch pencatan acheñenesha' ñeñt nanac es eñotatse'tyets. Añpa'çho'ña pocte' enteñ Yompor o'ch a'queshṗatan acheñ ñeñt acheñenesha'pa' çhach otenapuetañ ñeñtpa' amate' esoyaye. Tarrecop pocte' enteñ Yompor allochña'pa' o'ch pencatan acheñenesha' ñeñt çhach otenapañ ñetpa' atarrte' es sherbenet.

28 Añpa'çho'ña pocte' enteñ Yompor o'ch a'queshṗatan acheñenesha' ñeñt entenet ñeñt ama esoshe'mayaye ñaña ñeñt atsena'taret. Ñaña añ acheñer muenen Yompor ñeñt ama es echeno attoch sherba' ama't mamesha. Tarrecop mueneñ Yompor allochña'pa' ño'tetpa' o'ch huapore'tamṗsan acheñ poctaṗña ñeñt añña patso'mara. E'ñech orrena enteret acheñ poctaṗña.

29 Ñeñto'marña ya acheñeypa' ama't puesheñarrotēya ama pocteyaye o'ch e'ñe yañeña cohuen yentena tarro'mar Yomporpa' ama atteye' entenye.

30 Tarro'mar ñapña Yompor yapuene'ña attoch yapa' corretsayach. E'ñe yeparrocmateño't Cristo Jesús a'crrateney Pompopor. Ñaña Yomporpa' atto nan Puechemer Cristo ñach yeñotaterre' ñeñt cohuentetsa Yeyompor-recop, ñaña ñeñtara Cristo ñeñtcha' e'ñe cohuen a'poctatene' yocop attoch cohuen entueney Pompopor ñaña ñeñtara Cristo ñeñña a'cohuentaterrey Partsocop, ñaña ñeñtara Cristo ñeñt yetsa'terroya yo'chñar attoch yequeshperra.

31 Ñeñto'mar atet anuaretta Yompor po'ñoñ ahuat: "Ñerra'm eseshaycha' es aye'chochtatetspa' Yomporecpeupa'chña es ya'ye'chochtaten."

2

Arrpa' all yerpaterranet atet serrpare'tatenaneta' ahuaña ñeñt atto Jesucristo rroma yocop corsocho

1 O'ch notas masheñneshacha' ñaña nochaneshacha', ahuaña allempo nechap seshopa' neserrpare'tatoses cohuen allempo na'pothonas Yompor pocta'ña. Allempopa' ama cochneshoteye' neñoñoñ na'pothonaso Yompor po'ñoñ atet noñets cochnesha' entyen acheñenesha'. Ñaña ama cochneshoteye' noctaññoñ na'pothonaso Yompor pocta'ña atet ñerra'mrrate' acheñ ñeñt nanac eñotañ entueñ allohuen acheñenesha'.

2 Añña e'ñe patrra cota'ññats neserrpare'tatenes ñeñt atto Jesucristopa' rroma yocop corsocho. Tarro'mar allempopa' atet noten neyo'chro ñeñfach paterr o'ch neserrpare'tatanet.

3 Ama't allempopa' ama asherbenoteye' norrtoso sesho. Ñaña allempopa' atarr nem'cha'ten, cha neyoruos nellquëñoñ.

4 Ñaña ama ne'ñnoreño'teye' e'ñe cohuen neserrpare'tataso attoch same'ña'na e'ñe neñoño'ta ñeñt atet pena ñeñt chach otenapañ ñapa' nanacte' es eñoten. Añña e'ñe neserrpare'teño'ta norrtatonas ñeñt atet ñonay Parets Puecamquëñ e'ñe po'huamenco't Yompor.

5 Ñaña ya acheñeypa' ama't cochnesha'tatsta yocota'ññapa' tarraña napa' ama nemno e'ñe na neñoteño'tpa' o'ch name'ñatasa. Napa' añña nemnen o'ch name'ñatasa e'ñe Yompor po'huamenco't.

Yompor Puecamquëñpa' ñeññña es yeñotatene'

6 Tarraña ama't atetpa' esempopa' o'ch neserrpare'tach ñeñt o' ame'ñerra huomenc. O'ch neserrpare'tatanet e'ñe cochnesha' cota'ññats, ñeññara Yompor pocta'ña ñeñt atarr es eñotets. Tarraña añ cota'ññatspa' amach patso'mareyaye, ñaña amach añeyaye am'cha'tarete'chno pocta'ña ñeñt añe patsro'tsen. Tarro'mar ñetpa'cho'ña huañerretcha' esempo.

7 Yomporepa'chña pocta'ña ya'pota ñeñt atarr es eñotets, ñeññara ama't ahuatoteñpa' ama eñotpahuo pocta'ña. Tarraña ama't allempo ama aye'chcatarettena' patspa' ñeññapa' o' anaretetua attoch cohuencha' ya'queshpataretterra esempohuañen.

8 Añña am'cha'taretnesha' ñeñt añe patsro'tsa'yenpa' ama chapaneto Yompor pocta'ña. Ñerra'm chapanetañcha'

ahuaña pueyočhretopa' amate' corso'tamperetañaña
Yepartseshar ñeñt atarr nanac cohuen.

9 Tarro'mar atet anuaretta Yompor po'ñoñ ahuat, ñeñtpa'
atet oten:

Ama't ahuata ya ñeñtey arromñaateypa' ama yentare ñeñt
o'patatenya Yompor ñeñt cočhnesha'tetsa yocop, ñaña
ama ye'mare, ñaña ama čhaponaye'te yeyočhro ñeñt
o'patatenya Yompor ñeñteycha' morrenterraya ña.

10 Tarraña ñeñteyña ame'ñerraya ñeñtey allohueneypa' o'
eñotaterrey Yompor e'ñe ña Puecamquëñoť ñeñt chorratenya.
Po'ñočh yeñoteñ Yompor Puecamquëñpa' ña eñotueñe' allo-
huen Yompor počtařña ñaña ama't ñeñt ama eñotpahuoyaye.

11 Attecma yepena yaña ñeñtey acheñey. Amach errotenoť
po'psheñeñpa' eñotonay atet yocťape'chen ya yeyočhro, e'ñech
yapťa yeñoteñ. Attecma pena ñaña po'potantañ amach er-
rotenoť eñotano Yompor počtařña, e'ñech Yompora ñapueť
Puecamquëñ eñotene'.

12 Yapa' o' yagapoñ Yompor Puecamquëñ, amaña acheña
počtařña yaguërro ñeñt patso'marecpa. Ñeñtara Yompor
Puecamquëñ ñeñt čhapatene' yeyočhro ñaña ñeñt yeñotatene'
atto ña muerenya. E'ñe puemuereñoťey shonte' es apa'yeney.

13 Ñaña ñeñt ñoñets ñeñt yečhateney Yompor
Puecamquëñpa' ñeñtara ñoñets o'ch yeserrpare'tatas samña
ama't ñaña po'potantañečhno. Ñeñtpa' ama añeyaye ñoñets
ñeñt atet yečhatyen acheñenesha' ñeñt eñotañetyetsa. Ñaña
ñeñt ñoñets atto yečhateney Yompor Puecamquëñoťpa'
ñeñt yeyčhatenes samña ñeñtes o' chorrerrsa samña Yompor
Puecamquëñ.

14 Tarraña acheñenesha' ñeñt ama chorreña' Yompor
Puecamquëñpa' amach errotenoť čhapaneto Yompor
počtařña ñaña amach errotenoť agapoñeto ñeñtcha' apane-
tañ Yompor Puecamquëñoť. Ñerra'm yeserrpare'tatanet atto
es apueney Yompor Puecamquëñoťpa' ñetpa' čhach otyeset
atto' yotatse'tyen. Tarro'mar ñapťa čhenana pueyočhro ñeñt
chorrena Yompor Puecamquëñ.

15 Tarraña añña ñeñt chorrena Yompor Puecamquëñpa'
ñetpa' čhenanet pueyočhreto ora ñeñt atet pena Yompor.
Tarraña ñeñt ama chorreno Yompor Puecamquëñ, ñetñapa'
amach errotenoť čhapaneto pueyočhro esocopte' atet penaña
ñeñt chorrena Yompor Puecamquëñ.

16 E'ñe attecma oteney Yompor po'ñoñ ñeñt anuaret'
ahuatoteñ, ñeñtpa' atet oten: "Esesha'huate'ca' eñote'ña ñeñt
atet coťape'chen Yompor attoch ñetpa' o'ch coťape'chateret

ñamet Yompor.” Tarraña te’ña yapa’ attecma yoctape’chen atet cotape’chen Cristo.

3

Arrpa’ all ama patrraye’ cotape’cheno corinto’marnesha’

¹ Ñaña o’ch notas masheñneshacha’ ñaña nochaneshacha’ ama’t ahuañoñeñ noteneñ o’ch noctape’chatas e’ñe cohuen, atet noctape’chateñ acheñ ñeñt e’ñe chorrena Yompor Puecamquëñ. Tarraña amach errotent noctape’chataso tarro’mar sapa’ atta socrena atet muenatenes sechets. Cha sottena atet ñerra’m cheshatoll ñeñt ama eñotena’. Sapa’ ama e’ñe chennasa’ ñeñt cohuentetsa Cristocop. Ñeñto’mar teme’ttsen atta noctape’chatenes atet ñerra’m cheshatolleshasa.

² Ñeñto’marña ahuañoñeñ atta neñotatenes ñeñt ama torrapahuoyaye Yomporecop. Ñeñto’marña amach erroteno noctape’chaterrserro ello ñeñt nanac echarr cotapñats. Atta sottena ñerra’mrrate’ ematoll, napa’ attach nemomatenes semomos atet peñet ematoll, ñeñtara yoten cotapñats Yomporecop ñeñt ama echarro. Ñaña ama echarroye’ serrar napuenso, tarro’mar amate’ erroteno setsoto, ama’t teme’ttsenpa’ ama setsoteññañe Yompor poctapña ñeñt nanac echarr.

³ Tarro’mar teme’ttsen atta socrena atet muenatenes sechets. Po’ñoñ ñerra’m esempo es yeye’chapretannena, amapa’ ñerra’m cho ye’moñe’tannena, ñeñtpa’ atta yocrena atet muenateney yechets. Ñeñtpa’ ama’tña attera sorrteno atet pena acheñ ñeñt ama ame’ñenayo Cristo.

⁴ Tarro’mar ñerra’m cha yotyen: “Napa’ añcha’ name’ña Pablo”, po’psheñeññapa’ ñato’ oten: “Napa’ añcha’ name’ña Apolos.” Ñeñt atet sepena chachca’ye sottena ñerra’mrrate’ ñeñt ama Cristona’tareyaye.

Puesheña’ttsoypa’ añ yetorra’yena Yomporecop ñeñt atet yechyenyaya

⁵ Ñaña o’ch notas, yapa’ ama esoyayye ama’t Apolos, ama’t na, añayaca’ye ñeñtey torretsa Yomporecop. Yapa’ amñareñeya attoch o’ch yame’ñatasa. Puesheña’ttsoypa’ añ yetorra’yena Yomporecop ñeñt atet yechyenyaya.

⁶ Atet ñerra’m napa’ na ñanom same’ñate’ Yompor po’ñoñ. Alloñapa’ ahua’t huapa ñaña Apolos, ñapa’ ña seserrpare’tate’ attoch allo’na sesen huomenc pa’nmue’ seyocher. O’ch netma’ntacha atet: Napa’ atten ñerra’mrrate’ ñeñt nare’tets. Alloñapa’ o’ch huapa po’psheñeñ ñeñtcha’ she’tamo’re’tosets, Yomporñapa’ ñach a’chpate’ narmets.

⁷ Ñeñto'mar yeñoteñ ñeñt nare'tetspa' ama esoyaye, ama't ñaña ñeñt she'tamo're'tetspa' ama esoyaye. Añña Yompor ñeñtña es a'chpatets ñaña sherbets.

⁸ Ñeñto'marña yeñoteñ ñeñtfeý nare'tets ñaña ñeñtfeý she'tamo're'tetspa' e'ñe parrocmá ye'torrena Yomporecop. Elloña Yomporpa' apa'yerreycha' puesheña'ttsoy cohuen ñeñtcha' atarr yocshaterre'. Apa'yerreycha' erro'tente' ye'torra'yesnoma ñocop.

⁹ Yomporpa' enteney atet ñerra'mrrate' parro yetaruasen ñocop. Sapa' Yomporpa' entenes atet ñerra'm ña pa'mres, allcha' nanac torrena ña.

Ñaña Yomporpa' entenes atet ñerra'm pocoll o'ch tomatey ña.

¹⁰ Atet ñerra'm na, Yompor puemuereño'tpa' o' ye'chaten na o'ch neñoch e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atet ñerra'm Yomporpa' o' ye'chatenen attoch o'ch neñoch tomate' pocoll e'ñe huomenc. E'ñe neñoteño't o'ch na'tomat ñanom quellpach e'ñe echarr. Allo'tñapa' o'ch huapa po'psheñeñ ñeñtcha' allo'na ye'chatnomue'. Tarraña ñeñtcha' allo'na ye'chatnomue'pa' cotape'chepa' ñanom, pocte'te' atet peñ, ñato' amate'.

¹¹ Ñehua, añ quellpach ñeñt anare't ñanompa' ñeñt toma'ntenaya atet ñerra'm ya ñanompa' o'ch yame'ñera Jesucristo. Ñap'fach Cristo yame'ñerra. Ama eñalle po'poñ ñeñtcha' yame'ñerra, tarro'mar amach erro'teno't yame'ñyo po'poñ ñeñt ama Cristoyaye, añcha'ña ñeñtara Cristo ñeñt o' yotuanmas.

¹² Ñeñt o' yame'ñata Cristo, ñetpa' allo'nach yey'chatnenanet aco'pa attoch huomenc pa'nmu'et pueyo'cher. Ñehua, o'ch netma'ntacha atet: Ñerra'm cho yeye'chaten pocoll ñanemcha' quellpach ya'tomat. O'chña echarr ya'tomatua quellpachpa' allo'nachña yesen ye'chatnomue' pocoll. Erra'tsenpa' ñato' o'ch ye'chatenan oropo' pocoll ñeñt atarr nanac cohuen, ñato' po'psheñeñpa' o'ch ye'chatan asrepo' ñeñt nanac cohuen ñaña, po'psheñeñña'pa' o'ch ye'chatan cohuen mapyepo' ñeñt nanac tsa'te'. Tarraña ñato' po'psheñeñña'pa' o'ch tomatan tablapo' ñeñt ama tama cohuenayaye, ñato' po'psheñeñpa' aspanapo'ch, ñeñt'pa'cho'ña amach tama cohuenayaye, ñato' po'psheñeñpa' attach ye'chatan atet ñerra'mrrate' posho'llpo' ñeñt ama cohuenayaye ama't mamesha.

¹³⁻¹⁴ Esemphuañenña allempoch huerra Cristopa' entatuare'teycha' allohueney ñato' espo'te' yeye'chaty'es yepaqu'ell, ñato' oropo', ñato' tablapo' amapa' ñato' atet ñerra'm posho'llpo'. Ñehua, añcha'ña ye'notate' tso'. Yompor

poyorochenñoŕpa' o'ch etomanŕpesyesonay yepacllačno. Ñehua, yeñoteñ ñeñŕ oropo' amach poyo, asrepo'pa'cho'ña amach poyo, mapyepo'pa'cho'ña amach poyo. Tarro'mar ñeñŕpa' ama acraño, ñeñŕo'marña nanac sherben. Tarraña tablapo'pa' ñeñŕpa' poyuach, aspanapo'pa'cho'ña poyuach, posho'llpo'pa'cho'ña poyuach. Tarro'mar ñeñŕpa' ama es sherbeno, attochña eñotuarẽfeycha' e'ñe puesheña'ttsoy errotenŕe' yeyečcatyes, ñato' cohuenŕe' ñato' amate' cohuenayaye allempo es yetorra'yesnoma Cristocop. Ñerra'm esempo ch etomanŕpesyesonay yeyečcatar ñerra'm amach poyo yeyečcatar, allempochña yeño ch atto es yetorra'yesnoma Cristocoppa' ñeñŕpa' e'ñe cohuen. Ñeñŕo'marña allempopa' aphuerreycha' e'ñe puesheña'ttsoy ñeñŕcha' atarr yocshaterre'.

15 Tarraña ñerra'm yeyečcatarña čha poyuapa' o'ch yeño ch atto yetorra'yesnoma Cristocoppa' ama es sherbeno, čhach a'chencatonay yeyečcatar ñeñŕ Cristocpañ. Tarraña ama'tcha' a'chencatonay yeyečcatar, yaña yecamquẽnpa' queshperrach. Tarraña e'ñech yemuerochenñoŕa yequeshperra atet ñerra'm čho poyen pocoll yañapa' o'ch yequeshpa.

16 Te'pa' o'ch notas po'poñ: Sapa' ama't seño teñeña Paretspa' o' pa'paquẽll perres allohuenes ñeñŕes ame'ñetsa. Yeparrocmatueñoŕ allohueneypa' te'pa' e'ñe atet enterrey atet ñerra'm pa'paquẽll, allcha' yečhena Puecamquẽñ ña.

17 Tarraña ñerra'm esesha' alla soctape'chaterre' ñeñŕ ama cohuenaye' enteno Yompor ñeñŕña atet petsa čhach ottena ñerra'mrrate' čho a'matenan Parets pa'paquẽll. Ñerra'm esesha'ña a'matene' Parets pa'paquẽll ñeñŕña Yomporpa' čhocmach a'chencater. Tarro'mar Parets pa'paquẽllpa' ñeñŕpa' Partsocpa, saca'yeña o' pa'paquẽll perresña Parets ñeñŕ e'ñe ñocpa.

18 O'ch noterrser po'poñ: E'ñech seño ta sañeña. Ñerra'm eseshas otets, napa' atarr es neñoten añe patsro, añ pocte' o'huañepa'ch es eñotatse'tyes e'ñe patso'mara. Añña pocte' o'ch orrta atet ñerra'mrrate' ama es eñoteno. Añepa'chña eñot ñeñŕ huetsa Yomporshot.

19 Tarro'mar ñerra'm esempo ñeñŕey aheñey añe patsro ñerra'm čha yotenapañ yapa' atarrŕe' es yeñoten, Yomporña'pa' atet enteney ñerra'mrrate' čha yotatse'tyen. Ñeñŕpa' anuaret ñaña ahuatoteñ Yompor po'ñoño, ñeñŕpa' atet oten: "Ama't atto es eñotatse'tyenetpa' Yomporña'pa' o'ch eñotanet atta otatse'tyenet, ama't ñetpa' otenapuetañ nanacte' es eñotenet tarraña ñeñŕpa' shequẽñtsa."

20 Añ ñoñetspa'cho'ña anuaret ahuatoteñ, ñeñtpa' atet oten: "Ñeñt cha otenapañ nanacte' es eñotenpa' añña Yomporpa' eñotenanet ñeñt atet cotape'chenet ñetpa' e'ñe orrena."

21 Ñeñto'marña te'pa' o'ch alla noterrser: Amach ellocma sa'ye'chochtatanna'tyesatsto atet yocotape'chen ya ñeñtey arromña'ey. Tarro'mar allohuen ñeñt apuenes Yompor ñeñtcha' socotape'chate' cohuen.

22 Ama't na Pablonpa' Yompor o' na'n ñeñten allohuenacpas, ñaña ama't masheñ Apolos, ñaña ama't masheñ Pedro. Yomporpa' apueney allohuen ama't ñeñt yentyes añe patsro ñeñtcha' yeyenpue' ñeñt alloch yocsheña Yompor. Yocsheñepa'ch ama't allempo yocrrena, ñaña ama't allempoch yerroma, ñaña ama't ora allpon ñeñt eñall te' chocmuepa'ch coshateney. Ñaña ora allpon ñeñtcha' eñalletatsa tsapatonetpa' ñeñtpa'cho'ña coshatasepa'ch. Ama't allohuen ñeñt pa'namen esochno ñeñtpa' yocop ñeñtcha' yeyenpue'.

23 Elloña yapa' e'ñe pueyochresha' pohueney Cristo allohueney, Cristoñapa' Parets Puechemer pene'.

4

Atet pena ñeñt torretsa Cristocop

1 Ñeñto'marña te'pa' notenes, epsheño'marey na epan masheñ Apolos, añ pocte' o'ch senteney atet ñerra'm ñeñtey torretsa Cristocop. Ñaña añ pocte' o'ch senteney atet ñerra'm yapa' eyecharetey o'ch ya'potoñ Yompor po'cohuenña.

2 Ñehua, yeñoteñ ñerra'm erra'tseney eyechareteypa' añcha'ña atet yepena atet yechenyet.

3 Ñato' sapa' sentenente' napa' nepena atet eyechareten ñato' amate', ñeñtpa' ama añecpayaye ñeñt atet nellquëna na. Ama't acheñenesha' ñeñt añcha'taretetyetsa, ñerra'm errotente' entennet ñeñt atet nepenapa' ñeñtpa'cho'ña ama añeyaye ñeñt atet nellquëna na. Ama't napa'cho'ña ama neyemteno ñeñt atet nentena e'ñe nañeña.

4 Ñehua, e'ñe cohuenare' nenteñeñ allohuen ñeñt atet es nepa'yen, tarraña ñeñtpa' ama añeyaye alloch yeñoch e'ñete' cohuenare' es yepa'yen. Añña e'ñe pocte' nenten Yepartse-sharcha'ña otats e'ñete' pocte' entenen, amapa' ñato' amate'.

5 Ñeñto'marña notenes, amach sotatsto atet: añ acheñer nanac cohuen, po'psheñeñpa' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotatuerrrets ñeñt ya'nasotyena te'. Ñaña ñachña eñotatuerrrets ama't ñeñt atet

yemna'yen yeyo'chro. Errponeycha' ñeñt'ey cohuen entuerr Yomporpa' allponeycha'cho' aye'cho'chtatuerr.

6 O' notuas ñeñt' poctetsa ñeñt'cha' atet sentey ya epan masheñ Apolos. Masheñneshacha' ñaña no'chaneshacha' tarro'mar atet notenes, allochñapa' attoch seño'ch añ pocte' e'ñech attecma senteñ ama't allohuen acheñ, e'ñe atet oteney Yompor po'ñoñ ñeñt' atet anuaret' ahua'otoñ. Allochñapa' amach yommo'chatsche acheñ ñeñt' cohuen yenten e'ñe yañeña.

7 Sapa' atarr cohuen sentena sañeña tarraña amaña po'psheññeye' atarr eñotañ sentenaye ama't puesheñarra. Ama't allpon seño'tyenpa' amaca'ye e'ñe sotaye' es seño'tyeno; Yomporca'ye seño'tatene'. Po'ño'chpa' atto Yompor es eñotatenespa' eso'mare'tña sommo'chyenaña atet ñerra'm e'ñe so'a es seño'tyen.

8 Cha't sotenapañ o'te' nanac setsotoñ Yompor pocta'pña. Cha sottena atet ñerra'm ama es sepallteno ama't coñe'ta Yomporeshot. Yañapa' o'huañ acua'psenaye' senterrey. Sañapa' o' cha añcha'tare'toyen sorrtena. Ñehua, e'ñe pocte' sa'mcha'tare'tepa' tarro'mar ñerra'm po'ño'ch o'ch sa'mcha'tare'terrapa' ñato' attotpa' o'ch semnatey yaña o'ch ya'mcha'tare'tapre'terra.

9 Tarraña napa' noctape'chen ñato' ya ñeñt'ey allsen-sare'teypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' chach amtsen entenyet. Attach cohua'nyeney allohuen acheñenesha' arr patsro, ama't ñaña ñeñt' Yompor po'mllaño'teñneshar o'ch cohua'nyet ñamet.

10 E'ñe yame'ñeño' Cristopa' añña acheñenesha'pa' chach otenet yapa' amo' es yeñoteno, tarraña sapa' chaña atet sentena ñerra'mrrate' atarr nanac eñotañes. Ñaña yapa' chach otenyet amo' esoshe'mayayye, tarraña sañapa' atñaña ahua-menca'toyen sentena. Ñaña sapa' nanac añcha'na'tpo' entenset, yañapa' amach acua'psenaye' entenyeto.

11 Yañapa' teme'ttsen yemuero'chtana ama't yachporrño't, yo'ñpaño'te'na yemuero'chtana ñaña yemuelleño'te'na. Atta epaye' atserrpenyet, ñaña ama ye'cheno allcha'yey'cha.

12 E'ñe yetorreño't nanac yetaruasen e'ñe ya yotot. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'mo'ne'teño'tet cotare'tenyetpa' yañapa' attach ya'huantenanet.

13 Ñaña ñerra'm esempo sochatse'tenyetpa' yañapa' chach yamo'tstanet cohuen. Ñaña ama't teme'ttsen entenyet atet

ñerra'mrrate' es ahuapore'taret, ñeñt' ama es sherbetso ama't mamesha arr patsro.

14 Napa' ama añecpaye' nequellquënnaso añ ñoñets attoch o'ch nepencatas, añecopña nequellquënnas attoch noctape'chaterres e'ñe cohuen atet ñerra'm e'ñe nechemeres ñeñt' nanac nemuerara.

15 Na po'ñoçhpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñt' Yomporeshotpa' o' name'ñatasa Cristo Jesús, ñeñtpa' atet ñerra'm çho nechemere'tensa Cristocop. Ñeñto'marña te'pa' notenes, ama't eñall shonte' acheñ ñeñtcha' soctape'chaterre' ñeñt' cohuentetsa Cristocop, tarraña e'ñe patrra sompor sepen ñeñt' ñanom same'ñate', ñeñtpa' atet ñerra'm na.

16 Ñeñto'marña napa' notenes: Atet sentenen atet nepena na e'ñe cohuen, sapa'çho'ña atetcha' sepa samã.

17 Ñeñto'marña nemñonas masheñ Timoteo; ñapa'çho'ña nechemer nepen. Napa' nanac nemorrenteña, ñapa' çhocma ame'ñenana Yepartseshar. Napa' ñach seyerpate' Cristo poctapña ñeñtara cotapñats neyçhatyes erracmañen errate' pame'ñeñotet apçhenet Yomporecop.

18 Patanta'ttsospa' nanac sommo'chena atto es señotyen. Sapa' çha't sotenapañ ñato' napa' amach neçhapoña sesho.

19 Tarraña po'ñoçhcha' neçhap sesho ñerra'm Yomporcha' muenats. Ama't tayecmapa' pocte' o'ch ahuen ñerra'm ña muenats. Esemposh neçherrerra' allempochña neñotos ñeñt' ommo'chetsa, ñato' po'ñoçhte' ahuaencatet Yomporecop, amapa' ñato' attate' ommo'chenet.

20 Amaña e'ñe ñapta yeserrpare'teñoñ yorrtateññañeña Yompor po'cohuenña attoch atarr ayochreshattena ña; po'huamencote'nachña yorrtateññañ po'cohuenña.

21 Ñehua, te'pa' o'ch na'p'to'tas: ¿Errofena't semnen ñeñtcha' atet neposes allempoch neçhap sesho? Ñato' o'ch necoñchatoses, ñato' o'ch soctape'cherr cohuen tayecma attoch esemposh neçhappa' amach eñalle attoch o'ch necoñchatoses. Allempopa' ñato' ellochña çhach nemuerossa e'ñe cohuen.

5

Atto Pablopa' ama pocteye' entano atto puesheñarr corinto'marnesha' orrtatan ñeñt' ama pocteyaye tarraña pamo'tsesha'ñapa' ama erroteye' oteñeto

¹ Ñehua, te'pa' o'ch notas po'poñ. Tarro'mar atet otyenet, po'ñoch eñallo' sesho puesheñarr yacma ahua' yorerran pachoretso're'. Ñeñtpa' nanac ochña'teñets atet, tarro'mar ama't ñeñt ama ame'ñetsopa' ama pocteye' entenetoña atet.

² Tarraña sapa' chocmo' cohuen senten ñeñt atet sepena. Eso'mare'tña ama choye'ña llecatenso. Tarro'mar ñeñt ochña'tets atetpa' amach allo'na sentene attoch o'ch allo'na separrocmatnën epas.

³⁻⁴ Ama't napa' ama allo'tsenno parro, tarraña e'ñe neyerpueño'fespa' allo'tseney parro. Ama't ama allo'tsenno' napa' o'ch notas necarto' ñeñt pocte' nenten na, attecma ñerra'm allo'tseney parro. Napa' o' neño'ch ñeñt'cha' atet sepe' ñeñt ochña'tets atet. O'ch notas ñeñt'cha' atet sepe': O'ch sap'cha allohuenes e'ñe same'ñeño' Yepartseshar Jesús; napa'cho'ña e'ñe neyerpueño'fespa' allo'tseney'cha' parro. Allochñapa' e'ñe Yepartseshar Jesús po'huamencotpa'

⁵ o'ch sepon' ñeñt yacmar o'ch sapuer oneñe' attoch a'coñchatoñ po'chets. Allochñapa' puecamquëñpa' queshper-rach esempohuañencha' huerra Yepartseshar Jesús.

⁶ O'ch alla noterrser: Sapa' ama't sommo'chenañ atto e'ñe cohuenare' es sepeneñpa' tarraña ñeñtpa' ama pocteyaye, tarro'mar atta e'ñe semnateñ acheñ o'ch allo'na ochña'tnen. Ama't seño'teñe ñerra'm allo'na yemnatneñ o'ch ochña't ama't e'ñe puesheñarro'atapa' tsapatonetpa' o'ch pet allohuenet atet. Ñato' o'ch netma'ntacha atet: "Ñerra'm yena' coñe't chase' allempo yeye'chcaten pan, ama't e'ñe coñe'ta yena'pa' o'ch epa'hua ora, attoch e'ñe rropa'ptatuan ora pan."

⁷ Ñeño'marña o' notas o'ch sa'ypo'ñerr ñeñt ahua't soctapña ñeñt nanac sosey. Añcha'ña o'ch setserrataterr soctapña. Tarro'mar po'ño'ch etserra o' ye'hcaterres Yompor. O'ch netma'ntacha atet pete't ahua't allempo o'ch cherr pascuapo chocmach huapore'tuet allohuen pan ñeñt a'chasare't. O'ch ye'hcetet etserra pan ñeñt ama a'chasareteyaye. Ñaña pascuapopa' chocmach muetsete't carrnerotoll, tarraña te'pa' Cristoña o' amtsare'tta yocop.

⁸ Ñaña ahua't pascuapo añ coshatahuet'e't pan ñeñt ama a'chasareteyaye tarraña te'pa' añcha'ña yocshaterre' attoch o'ch ya'ypo'ña'huerr ñeñt ahua't yoctapña ñeñt allo yo'chña'tare'te't ñaña ñeñt nanac sosey Yomporecop. Añcha'ña o'ch yoctape'cherr etserra ñeñt e'ñe cohuenare' cotapñats Yomporecop ñeñtara cotapñats ñeñt e'ñe po'ño'ch cohuen.

⁹⁻¹⁰ Te'pa' o'ch notas po'poñ. Ahuaña po'poñ necar-to'tpa' atet notuas: Amach seyemtatscho ñeñt cheta'yene'

coyanesha' amach puetaporeyaye. Ñehua, allempo notas necartotpa' añecop noten ñeñt ame'ñetsa tarro'mar ñerra'm attera cheta'yenan coyanesha', amach seyemtatsche acheñ ñeñt atet petsa. Tarraña ama añecpaye' atet noteno ñeñt ama ame'ñetso ñeñt atet petsapa' amach seyemtatsche. Tarro'mar añe patsropa' chocmach yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama puetaporeyaye, ñaña atet ñerra'm ñeñt atarr es ye'chapretetsa, amapa' ñaña eñet, ñaña ñeñt ma'yochenaya ayečcataret. Ñerra'm ama yeyemtanelopa' amate' erroteno yocroña añe patsro.

¹¹ Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyanesha' ñeñt ama puetaporeyaye, amapa' ñeñt attera es ye'chapretyetsa, amapa' ñeñt attera ma'yochenaya ayečcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet pa'yetsapa' amach seyematstero, ñaña ama't attapa' amach serrallme'cherro epas.

¹² Ñehua, añecop atet o' notuas, tarro'mar yocoppa' ama pocteyaye o'ch yotteñe'cheñ ñeñt ama ame'ñetso. Yocoppa' añña e'ñe pocte' o'ch yotteñe'cheñ ñeñt pame'ñeñotet atterach es pantenet.

¹³ Yomporpa' ñachña otteñe'cherre' ñeñt ama ame'ñetso. Sapa' añña poctetsa socop sehuapore'ch ñeñt atterach sosya'tsañach orrtatyet.

6

Atto ama pocteyaye o'ch yetmantanna'ta

¹ Te'pa' o'ch noterriserr po'poñ. Ñaña o' ne'mare'tas atto sapa' chocmo' setmantannena ñerra'm esempo erroť seřannena, ñaña ama't ñeñteso' pueyochresha' o' perrsoñ Parets. Eso'mare't chocma soteñña añcha'taret ñeñt ama ame'ñetso o'ch a'poctatonas ñeñt atto se'moñe'tannena. Socoppa' añña pocte' o'ch soch puesheñarr ñeñt e'ñe parrocmá same'ñena ñetcha'ña a'poctate' ñeñt atet seřannena.

² Ama't señoñe ya ñeñtey o' pueyochresha' perrey Paretspa' yach añcha'tareťtertsa allohuen acheñeneshacop arr patsro esempohuañen. Ñehua, ñerra'm po'ñoč yeñoñeñ o'ch ya'ñcha'tareťterra allohuen acheñeneshacop arr patsro esempohuañenpa' eso'mare'tña ama señoñeñe o'ch sa'poctat ñoñets e'ñe sañeña ñeñt ama torrapahuoyaye.

³ Ñaña ama't señoñeñe esempohuañenpa' yach añcha'tareťtertsa ama't Yompor po'millañoñeñanesharecop.

Ñeñto'marña te'pa' notenes e'ñe pocte' o'ch ya'pocdatanna'ta ya yeñoñ ñeñt atet yeychena te' arr.

4 Ñerra'm esempo esocop setmantannenapa' eso'mare'tña o'ch sene' puesheñarr ñeñt ama cohuenaye' enteno ñeñt ame'ñetsa, ñach a'pocdate' señoñ socop.

5 E'ñe nepencna'ntateño'es sapa' ñeñto'marña atet notenes: Seshopa' ¿ama'tña eñalleña ama't puesheñarra ñeñt ame'ñetsa ñeñt eñotene' o'ch a'pocdatan ñoñets? Ñeñt eñotene'pa' e'ñe pocte' ñach a'pocdatene' señoñ ñeñtes parro same'ñena.

6 Tarraña te'pa' ama atteye' sepeno. Chocmo' setmantannena ama't ñeñteso' parro same'ñenañ. Sapa' ahuo'chcho' ahues tomantanna'ttsa a'yo allo'tsen acheñ ñeñt ama ame'ñetso, ñapa' ahuo'chcho' a'pocdatonas señoñ socop.

7 Tarraña ñeñtpa' ama pocteyaye ama't mamesha o'ch setmantannena. Tarro'mar ñerra'm chocma yetmantannenapa' ñeñtpa' ama añeye' yepeno atet muenen Yompor. Añña ñerra'm esempo erroť ponas po'psheñeñpa' eso'mare'tña amaña alla sa'huantannenoña ñeñt atto erroť es seřanna'tyena. Ñaña ñerra'm esempo es puerratañpensetpa' eso'mare'tña amaña alla sa'huantenaneto. Añ poctetsa o'ch alla ya'huantenanet alla.

8 Tarraña sañapa' ama atteye'ña sepeno. Añña sapa' chocmo' erroť seřannena, ñaña chocmo' es seprratañpsannena ama't e'ñe sagattsa ñeñtes ame'ñetsañ.

9 Ama't señoñeña ñeñt ama cohuen es petsopa' amach es o'paterroña all añcha'tarettena Yompor. Amach semnatatsche po'psheñeñ o'ch atta shecare'tas. Po'ñoč atet notenes, ñeñt cañoresha'tetspa' amach es o'paterro all añcha'tarettena Yompor. Ñaña ñeñt po'yomporer pa'yene' ayečcateretpa' ñetpa'cho'ña amach es o'patatareťterretoña all añcha'tarettena Yompor, ñaña ama't ñeñt apretets taporets, ñaña yacmanesha' ñeñt agapannetsa e'ñe ñagattset.

10 Alloťpa' ñaña ñeñt etyets ñaña ñeñt atarr es ye'chapretyetsa, ñaña ñeñt posa'tare'tyets, ñeñt atet pa'yetsapa' amach es o'patatareťterreto all añcha'tarettena Yompor. Alloťpa' ñaña ñeñt achñare'tets ñaña ñeñt puerratañpesyets ñetpa'cho'ña amach es o'patatareťterreto all añcha'tarettena Yompor.

11 Sapa'cho'ña puesheña'ttsos attecma sepe't samña ahuaña. Tarraña te'pa' o' e'shohuareťterra so'chñar, attoña o' sa'cohuentatareťterra Partsocop. E'ñe seyemteñoť Yepartseshar Jesucristo te'ña Pomporpa' o' pocte' enterres. Ñaña e'ñe puechorreñoťes Yompor Puecamquēñpa' o' pocte' enterres Yompor.

Añ pocte' o'ch e'ñe yecuen cohuen yechets tarro'mar ñeñtara yechetspa' po'chets peñ ñaña Cristo

12 Te'pa' o'ch noterrser po'poñ. Ñehua, napa' neñotenes puesheña'ttsospa' atet sotatse'tyen, "e'ño' pocte' ye'pa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es ye'pa'yesatsto, ñeñfo'marña "e'ñe poctetñ allohuenpa' o'ch es ye'pa'yeneñ." Tarraña ama't e'ñe poctetñ o'ch atet es ye'pa'yeneñ allohuenpa' tarraña ñerra'm ñeñtpa' ama añecpayaye alloch yeyenpueñ yamo'ts attoch e'ñe huomenc ye'pannena yeyo'cher Yomporcoppa' ñehua, ñeñte'pñapa' amach atet ye'patsto. Ñaña ama't poctetñ allohuenpa' o'ch es ye'pa'yespa', tarraña ama pocteyaye o'ch nanac es yayom'atse'tyesa tarro'mar ñerra'm es nanac yayomenapa' ñeññaña pomnaren pene'ña yechets.

13 Ñaña neñotenes puesheña'ttsospa' atet sotatse'tyen, e'ño' pocte' sentetñ o'ch señmatat sechets e'ñe sa secañoresha'teñoñ tarro'mar ñeñtecpo' yechquënaña sechets o'ch atet se'pateñ. Ñeñfo'marña atet setma'ntatenaña sechets ñerra'mrrate' allempo sachporrena choch serra' serrar attochña e'ñe señmatat sat e'ñe ora sechtsohuen tarro'mar satpa' ñeñtecpo' yechquëna. Tarraña te' napa' o'ch notas, ama't poctetñ o'ch yeñmatateneñ ya't arr patsropa' chapcha' esempohuañen allempopa' o'huañcha' yemna' ya't ñaña yerrar, tarro'mar atet ne' Yompor. Tarraña ama't poctetñ o'ch yeñmatateneñ ya'tpa' tarraña ama pocteyaye o'ch e'ñe yeñmataten yechets yecañoresha'teñoñ tarro'mar ama añecpaye' aye'chcatareteña yechets attoch yecañoresha'ten. Yechetspa' añecopña aye'chcataret attoch yetorra'yesa Yepartsesharecop. Ñaña ñapa' ñach yecuan'pene'ña yechets.

14 Ñeñfo'mar Yomporpa' o' tantaterran Puechemer ñeñt Yepartseshar yepen ya. Ñeñfo'marña yeñoteñ yapa'cho'ña esempohuañenpa' tantaterrnaycha' yaña yechets. E'ñe po'huamenco'tpa' tantatuerreycha'.

15 Ama't seño'teñeña e'ñe yeparrocmateñoñ Cristopa' ñeñt ya yechetspa' po'ño'chpa' ñeñtara po'chets pen ñaña Cristo. Ñeñfo'marña notenes, atto ñeñt po'chets pen Cristo ñeñtara ya yechetspa' eso'mare'tña e'ñe pocte' sentetña e'ñe ya yechtso'tpa' o'ch yecañoresha'tach Cristo. Amaca'ye pocteyaye o'ch yetsetach Cristo po'chets epuet yecañoresha'.

16 Ñehua, ama't seño'teñeña ñerra'm esempo yo'chña't epay ottatsña'tpa' epsheño'marey o'ch e'ñe yeparrocmatat yechtso. Po'ño'ch atet enteney Yompor atet oteney po'ño'ñoñ ñeñt anuaret ahuatoteñ, añmapa' ñeñt atet oten: "ñeñt epsheño'maretpa' e'ñech pa'trra po'chets penet."

17 Tarro'mar e'ñe yeparrocmateñoť Yepartsesharpa' epsheño'mareypa' e'ñech patrpa yoctape'chen yeyoĉhro ñeñť yecamquëñecop.

18 Ñeñťo'marña notenes añ pocte' o'ch sa'ypo'ñer cañoresha'teñets. Po'poñeĉhno ñeñť yeĉpa'yen soseypa' ñeñťpa' ama yechtsoye' ya'sosyateno. Tarraña añña cañoresha'teñetspa' ñeñťpa' e'ñe ya yechets ya'sosyaten.

19 Ama't señoťeñeña ye'narpa' ñeñťara pa'paquëll pen Parets Puecamquëñ ñeñť chorratenya Yompor. Ñeñťo'mar yeñoteñ yechetspa' ama yoyaye, ñeñťpa' Yomporo tarro'mar

20 ñapa' ahuo't rañterrya. Atto rañterryapa' nanac mueročhta Puechemer attoch tsa'tuerrnaya yo'ĉñar. Ñeñťo'marña notenes, ama't atto yocrrena yechtsoťpa' Yomporepa'ĉña yecohuentaten e'ñe yecamquëñohuen tarro'mar ñeñť epo'marpa' Yomporo.

7

Atetcha' yeĉpa ñerra'm yemneñ o'ch yesna'ta

1 Te'pa' o'ch neserrpare'tatas ñeñť atet sa'pťo'ten ahuaña se-cartoť. Ahuo't sa'pťo'ten pocte'te' o'ch yesna'ta. Ñehua, ñanom o'ch notas atet, e'ñe pocteñ amate' yeyoratsche coyanesha' ñeñťĉha' yetapor yeĉpa'.

2 Tarraña ellopa' añ pocte' ñaña allohueney yacmaneshay o'ch yeyore puesheñarr coyanesha' ñeñťĉha' yetapor yeĉpa'. Coyanesha'pa'ĉho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama ĉho seyoro puesheñarr ñeñťĉha' setapor seĉpa'pa' attate' allo'na se-cañoresha'tnen.

3 E'ñe pocte' epas setaporpa' sagapanna'tepa'ĉh.

4 Tarro'mar coyanesha' ñeñť arrollareťpa' ama e'ñe ñapťayaye po'ĉhets, ñeñťpa' puerrollaro'nach. Ñaña yacmapa'ĉho'ña amach ñapťayaye po'ĉhets, ñeñťpa' pueťaporo'nach.

5 E'ñe pocte' ĉhocmach sagapannena. Tarraña ñerra'm erroteno esempo pocte' senteñ epsheño'mares o'ch sa'pocťat ñoñets e'ñe sañeña amach sagapanna'terro allponmat attoch añach sema'yoĉhra ma'yochatsa. Tarraña ñerra'm o' met allponmat allempo o' sa'pocťatuepa' pocte' o'ch alla sagapan-nerra. Tarro'mar ñerra'm ama ahuen sagapannerropa' ĉhate' oneñeťpa' topatas amate' sa'huanto.

6 Tarraña ama notenso ñeñťĉh paterr pocťetsa o'ch yesna'ta, añpa' atta notenes ñerra'm semneñ o'ch sesna'tapa' pocte' sena'tepa'.

7 Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayayye. Tarro'mar Yomporpa' ahuo't apa'yese yellocma atetcha' yesherbe' e'ñe cohuen.

8 Ñaña o'ch notas, ñeñtes ama ataporetosopa' e'ñe pocten amate' sesna'tatsto. Ñaña ñeñtes rretorraneshaspa' e'ñe pocten ñaña amate' sesome'terro. E'ñe pocten o'te' socrañ e'ñe atta atet nepena na.

9 Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocteyaye o'ch atta nanac yemneñ coyanesha'. Añña pocte' yesna'tepa'. Tarraña añña nanac cohuen ñaña amach yesna'to.

10 Te'pa' o'ch notas ñeñtes arrollaretes ñeñtcha' atet sepa. Ñehua, po'ñoch ama naye' otetso, añña Yepartsesharña otets. Añ pocte' amach sesatstere serrollar.

11 Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas samña ñeñtes ataporetos, amach sesatstere setapor.

12 Te'pa' o'ch notas ñeñt atet pocte' nenten na. Ama't Yepartsesharpa' ama otenñe ñeñt poctetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer.

13 Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añña pocte' amach satsterrano puerrollar ñerra'm puerrollarpa' ama mueno o'ch ser.

14 Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemeresha'pa' amach es eñoterro Partsocop. Tarraña ñerra'm ama sesannerropa' sacñeñarnesha'ñapa' o'ch so'patacha ñaña Parets.

15 Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso puerrollarecop. Ñaña Yomporpa' ama mueno ellopa' o'ch allo'na ye'moñe'tanna'tnena yerrollarecop. Attecma ñerra'm puesheñarr coyanesha' ñeñt ama ame'ñetso,

* 7:7 Ñehua, Pablopa' ama eñalle puetapor.

ñerra'm mueneñ o'ch serran puerrollar ñeñt ame'ñetsa, ñehua, pocte' serepa'.

16 Ateť notenes sesannerrepa' tarro'mar ñeñtes arrollaretespa' po'ñočpa' amach erroteno señoche ñato' sa'queshpachcha' serrollar, ñato' amate'. Ñaña ñeñtes ataporetspa' amach erroteno señoche ñato' sa'queshpachcha' setapor, ñato' amate'.

17 Ñeñto'mar te'pa' o'ch noterrser, erroteno'tseneste' ama't allempo errte' same'ñera Yepartsesharpa' atterasepa'ch. Ñaña ateť muenatyeney Yomporpa' atepa'ch yepena puesheña'ttsoy. Ñeñtpa' attecmač neyčhatyes ama't ñaña ora allohuen ñeñt pame'ñeñoťet apčha'yetsa allemeñ anetso'mar.

18 Ateť ñaña ñerra'm puesheñarr yacma allempo errte' ame'ñerrtset, ñerra'm allempopa' o' atsorretetuet ateť yeche't judionesha'pa' te'pa' ama pallteno o'ch a'huañerran all tsorret ahuať. Attecma ñaña po'psheñeñ allempo errte' ame'ñerrtset, ñerra'm ñetpa' ama atsorreteteto, te'pa' ama pallteno o'ch atsorrettet ateť yečhena judionesha'.

19 Ama't ya'tsorrettatstapa' ñeñtpa' ama es sherbeno. Ñaña ama't ama ya'tsorrettatstopa' ñeñtpa'čo'ña ama es sherbeno. Añña nanac sherbets o'ch yeđa ñeñt atet oteney Yompor.

20 Ñeñtpa' o'ch alla noterrser, añ pocte', ama't erroteno'tseneste' allempo errte' same'ñerrapa' atterasepa'ch.

21 Ama't allempo errte' pame'ñerra, ama't añepte' ñeñt ataruasatareť e'ñe atapa' e'ñe pocte', amach pellcatsto. Atterach petaruasen pepatronarecop, tarraña ñerra'm errotenoť o'ch pa'rroyaterra pepatronareshoťpa' e'ñech pocte' a'rroyerrpetepa' alloť taruasatenpet e'ñe atfa.

22 Ñato' o'ch netma'ntacha atet: Eñall puesheñarr yacma ñeñt ataruasatareť e'ñe atfa, tarraña o' čhap allempo agapan Yepartseshar ñeñtča' Pamo'mte' perr. Allempopa' ama't attera taruasateñeñ ñeñt po'patronar pen arr pat-sopa' tarraña te'ña Cristopa' a'rroyatamper po'chñar ñeñt nanac taruasataye't ahuaña. Te'pa' añcha'ña taruasaterre' Cristo ñeñt Yepartseshar yepen. Ñaña eñall puesheñarr yacma ñeñtñapa' cohueno'tsen ñeñt ama ataruasatareťeyaye. Ñapa'čo'ña o' čhap allempoch aguerran Yepartseshar Cristo ñeñtča' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt ahuañapa' ama ataruasatareťe e'ñe atfa.

23 Cristopa' o' rañterrya. Atto rañterryapa' nanac mue-ročhta attoch tsa'tuerrnaya yo'chñar. Ñeñto'marña notenes,

amach acheña ñapueť samo'mte' seřatsto, añña e'ñe po'ñočh Yamo'mte' yepen Cristo.

24 Ñeñto'marña masheñeshacha' ñaña nočhaneshacha' o'ch noterrser alla, ama't erroteno'tseneste' allempo errete' same'ñera Cristopa' pocte' atterasepa'ch. Tarraña Yomporepa'chña seyempue'.

25 Te'pa' o'ch noterrser po'poñ. Añpa' ñeñť atet sa'pťoten ahuaña ñato' pocto'te' ahuo'ch some'ta ñeñť shopsheshare'. Ñehua, napa' o'ch notas, Yepartsesharpa' ama otenyeñe ñeñťcha' atet yepe' shopshesharecop, tarraña napa' o'ch neñotatas ñeñť pocte' nenten e'ñe na, tarro'mar Yepartseshar puemuereñoťpa' ahuo't eñotañ p'a'n attoch sapa' seyemuetna.

26 Ñehua, ñanompa' o'ch notas: Ama't te'pa' čhocma huenaya shonte' esocmañen ñeñť echarr yentyen ñeñto'marña pocte' nenteñ amate' sesome'to, ñaña amate' sesna'to. Añña poctetsa atťate' yocrra.

27 Tarraña ñerra'm o' seyore coyanesha'pa' e'ñe pocte'; te'pa' amach sesatstere. Atteña ñerra'm ama seyoreña' coyanesha'pa' pocte' ñaña; te'pa' amach seyoratsche.

28 Tarraña ñerra'm esempo semne' o'ch sesna'tapa' e'ñe pocte'. Ñaña ñerra'm esempo coyanesha'pa' mueneñ o'ch some'ta, ñeñťpa'čo'ña e'ñe pocte', tarro'mar ñeñťpa' ama ochña'teñťsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coyanesha'pa' o'ch some'ta ñaña, allempopa' o'ch echan shonte' ñeñťcha' llecatyese' attoch corret arr patsro. Ñeñto'marña notenes amach sesna'tatsto, coyanesha'pa'čo'ña amach some'tatsto, tarro'mar napa' ama nemno o'ch sechen shonte' ñeñťcha' sellcatyene'.

29 Ñeñto'marña masheñeshacha' ñaña nočhaneshacha' nemneñ o'ch alla noterrser. Te'pa' ama atonaye' pallteno char attoch yetorrena Yomporecop. Ñeñto'marña o'ch notas ñeñťes o' setapore't, ama't o' setapore'tpa' añña poctetsa e'ñe tayoteñ amach patrra sellcatsto ñeñť setaporecpa. Añeapa'nachña setorrena Yomporecop.

30 Ñaña ñerra'm esempo huaponasa llequēñetspa' amach ñeñťota yequečpatsterro atto yetorrena Yomporecop. Ñaña ama't esempo es nanac yocshatene'pa' amach ñeñťota yep-satstere Yompor. Ñaña ñerra'm esempo yapa' esocmañen yechenpa' tarraña amach ñeñťota yep-satstere Yompor.

31 Ñaña ñerra'm esempo es yeřa'yen ñeñť patso'marecpapa' amach e'ñe ñeñťa yocshatsto ñeñť patso'marecpa. Tarro'mar ñeñť atet yeychen añ patso'marpa' ñeñťpa' huañerrcha' esempo.

32 Ñeñto'marña notenes añechno, tarro'mar nemneñ sapa' amach eñalletatsto po'poñ ñeñtcha' nanac sellcate'. Atef pena yacma ñeñt ama ataporetepa' añach e'ne llequëna ñeñt Yomporecop. E'ñech ma'yoçhrenaana attoch coshatenan Yepartseshar.

33 Tarraña yacmaña ñeñt ataporetepa' añach e'ne llequëna ñeñt atto yocrrena añe patsro. Ñaña añach ma'yoçhrena attoch coshatenan puetapor.

34 Ñeñto'marña amach errotenot patrra ma'yoçhreno ñeñt Yomporecop. Attecma pena ñaña coyanesha' ñeñt ama arrollarete. Añach ma'yoçhrena ñeñt Yomporecop. E'ne po'chtsohuenpa' mueneñcha' o'ch a'rroya Partsocop. Ñaña ama't ora poctapñohuenpa' o'ch ma'yoçhrena Partsocop. Tarraña coyanesha' ñeñt arrollaretepa' añach lleca ñeñt atto yocrrena añe patsro, ñaña añach lleca attoch coshatan puerrollar.

35 Ñeñt notenespa' ama añecpayaye attoch o'ch nompa'tas amach sesna'tatsto. Añecopña atef notenes attoch napa' neyenpas, attoch chocma cohuenare' es sorratyen. Ñaña chocmach socsheñsha'pa' o'ch sema'yoçhrena Yomporecop, amach eñalletatsto ñeñtcha' sepatene'.

36 Te'pa' o'ch noterrser serr po'poñ: Ñerra'm eseshas echene' seseñ ñeñt o' po'natuena, ñaña ñerra'm pocte' senteñ o'ch some'tapa' ñehua, pocte' some'tepa'. E'ne pocte' o'ch semnach some'tepa' tarro'mar ñeñt'pa' ama ochña'teñtsoyaye Yomporecop.

37 Tarraña ñerra'm erra'tsenotespa' sechen seseñ, ñaña ñerra'm ama semno o'ch some'ta, ñaña ñerra'm seseñpa' e'ne pocte' enteñ amach some'tatstopa' ñehua, pocte' ñaña amach sesome'tatatsche. Ñerra'm po'ñoçh seño'teñ seyoçhro añpa' e'ne pocte' atef, ñehua, amach sesome'tatatsche. Elloña ñeñt'pa' nanac cohuen.

38 Ñeñto'marña te'pa' o' notas: Ñerra'm erra'tsenotes muate' seseñ o'ch some'tapa' ñeñt'pa' pocte'. Tarraña ñerra'm erra'tsenotes ama some'tataye seseñpa' elloña ñeñt'pa' nanac cohuen.

39 Te'pa' o'ch noterrser serr po'poñ. Ama't esempapa' ama pocteyaye coyanesha'pa' o'ch serran puerrollar. Ama't erponmatcha' correna puerrollarpa' amach satstere. Tarraña ñerra'm esempo rroma puerrollar, allempopa' e'ne pocte' o'ch some'terra ello, tarraña ñerra'm erra'tsencha' muenerr ñeñtcha' yorerre' ñeñt'pa' ame'ñenach ñaña.

40 Tarraña ama't o' notuaseñ e'ne pocte' o'ch some'terra rretorrnanesha', elloña napa' noctape'cheñ ñerra'm o'ch

some'terra, ñato' allempopa' cosherrañcha' mame'. Tarraña ñerra'm amach some'terro, napa' noctape'cheñ ñato' allempopa' ellochña nanaccha' cosherra ñapuef. Napa' noten Yompor Puecamquẽñoñ neñoten atef.

8

Arrpa' allcotape'chatan corinto'marnesha' añecop ñeñt amt-saref ayeçcataretecop

¹ Te'pa' o'ch neserrpare'tatas po'poñ ñeñt atef sa'p̄to'tenen ahuaña, ñeñtpa' atef sotenen: Ñeñtey ame'ñenaya Cristopa' ñato' ¿poc̄to'te' o'ch serra' po'chets ñeñt muetsenet ayeçcataretecop? Napa' neñotenes puesheña'ttsospa' sotyen sapa' señoteno' ñeñt cohuentetsa Yomporecop. Ñehua, po'ñoçh allohueneypa' yeñoteñ ñeñt cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeñt cohuentetsa Yomporecop", ñerra'm e'ñe yommo'cheñoña yotenpa' ñeñtpa' e'ñech orrena atef yoten. Yommo'cheñoñpa' amach çhoýe' yeyenpannenno attoch huomenc yeþa' yeyoçher Yomporecop. Yemorrentanna'teñoñpa' çhochña yeyenpanna'ta.

² Tarro'mar ñerra'm esempopa' çhach yotenapañ o'te' e'ñe es yeñotua poc̄tacma, tarraña yeñoteñ po'ñoçhpa' çhocma yepalltena o'ch e'ñe yeñotua poc̄tacma ñeñt cohuentetsa.

³ Tarraña e'ñe yemorrenteñoñ Yomporpa' ñapa' eñoteny yapa'çho'ña yeñoteñ ñeñt cohuentetsa ñocop.

⁴ Te'pa' o' notuas atef te'ñapa' o'ch neserrpare'tatas ñeñt cohuentetsa Yomporecop. Ñeñtey ame'ñenaya Cristopa' poc̄te'te' o'ch yerren po'chets ñeñt amtsaref ayeçcataretecop, ñato' amafe' poc̄teyaye. Ñehua, yeñoteñ ñeñt ayeçcataref ñeñt toma'ntatenet ñetpa' po'ñoçhpa' ama eñalle Yompor ñeñt atef. Yapa' yeñoteñ Yomporpa' e'ñe pa'rra.

⁵ Po'ñoçhpa' ñetpa' pa'namen po'yomporer pa'yenet ama't atef ñerra'm ñeñt ento'tsa'yen, ñaña ama't ñeñt añe pat-sro'tsa'yen. Ñetpa' pa'namen po'yomporer pa'yenet, ñaña pa'namen po'partseshar pa'yenet.

⁶ Tarraña ya yocoppa' yeñoteñ Yompor Apapa' e'ñe pa'rra, ñeñt Yompor ñeñt yeçcateue' allohuen ñeñt yentyen, ñaña yapa' ahuo't yeçcatey e'ñe ñocop. Ñaña yeñoteñ Yepartse-sharpa' e'ñe pa'rra ñeñtara Jesucristo ñeñt yeçcate' allohuen ñeñt yentyen. Te' yapa'çho'ña apueneý atto yocrrena.

⁷ Tarraña acheñenesha'pa' ama allohuenacmaye' yoctape'chueno atef. Ñeñto'marña puesheña'tetspa' ahuañoteñ yeçhete't o'ch nenet es po'chets ayeçcataretecop.

Ñeñto'marña ñerra'm esempo rrenet ñeñt po'chets ñeñt muetsenet ayečcataretecoppa' e'ñech atta rreñet po'tomña. E'ñe po'tomña'pa' otenet ñato' ama pocteyaye o'ch yerren po'chets ñeñt nenet ayečcataretecop. Ñetpa' atta enteñet ama arrapahuoyaye ñeñt Yomporecop. Tarro'mar ama čhenaneto pueyočhro atto ñeñt e'ñe poctetsa Yomporecop.

8 Ñehua, yapa' yeñoteñ ñeñt yerrenpa' ama añecpayaye attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteney Yompor.

9 Tarraña e'ñech señoa: E'ñech acoña es sepa'yes. Ama't yapa' yeñoteñ Yomporpa' e'ñe pocte' enteñeñ o'ch yerren po'chets ñeñt anaret ayečcataretecoppa' tarraña ñato' yerreñoñ añečhnopa' čhate' alla ya'puerratatuer ñeñt ama tama huomenc penaye pueyočher Yomporecop.

10 Tarro'mar ñato' sapa' atette' sepene. Ñato' o'ch ahuenes puerahuo allo'tsen ayečcataret, allña'pa' ñato' o'chčo' serros po'chets ñeñt amsaret ayečcataretecop. Ñaña ñato' sapa' e'ñech socsheñsha' serreñ tarro'mar sapa' señoa'yeñ ñeñtpa' ama esoye' enteñe Yompor. Tarraña ñato' e'ñe allempoña serreña'pa' ñato' o'ch entas po'psheñeñ ñeñt parro same'ñena. Tarraña ñapa' ñato' ama pocteye' enteñe o'ch yerren po'chets ñeñt amsaret ayečcataretecop. Ñato' o'ch peye'chateña ñaña pemo'nasheñ o'ch rreñ ñaña ñato' ama't ñapa' ama pocteye' enteñe.

11 Tarraña ñerra'm ñapa' o'ch rrenan po'chets ñeñt anaret ayečcataretecoppa' ñapa' o'ch enteñ atetpa' ochña'teñets Yomporecop. Atteña'pa' ñato' o'ch alla puesuerran Yompor. Ñeñto'marña notenes, ñato' e'ñe yeñoteñoñ ñeñt cohuentetsa Yomporecoppa' o'te' ya'chencatach yemo'nasheñ ñeñtecop Jesús'pa' rroma ñaña.

12 Ñerra'm esempo atet ye'papa' čhate' yeyora yo'chñar yemo'nasheñecop tarro'mar o' yeye'chatera o'ch perra ñeñt ama pocteye' enteno ña. Ñehua, ñerra'm esempo yeyora yo'chñar yemo'nasheñecoppa' e'ñe ño'pa' o'ch yo'chña't ñaña Cristocop.

13 Ñeñto'marña te'pa' o'ch notas atet, ñerra'm esempo yerren po'chets ñeñt anaret ayečcataretecop, ñerra'm yerreño'pa' ñato' ya'puerratater yemo'nasheña'pa' e'ñe pocteñ amach yerratsto ñeñt po'chets. Ñeñto'marña napa' ama't esempapa' amach nerratsto ñeñt po'chets te'ta' neyoren no'chñar nemo'nasheñecop attočha' na'puerratater.

Atto e'ñe pocten ñeñt torretsa Yomporecoppa' o'ch esyesherebeñ

¹ Te'pa' o'ch neñotatas po'poñ ñeñt atet nepena na. Napa' e'ñe pocten o'ch ne'pa'yese e'ñe erra'tsencha' nemnen na tarro'mar sapa' señotenen atto napa' ama eñalle ñeñt neyechare'tenaya na, tarro'mar napa' allsensareten Yomproeshot. Ñaña señotenen napa' o' orrterrana Yepartseshar Jesús, ñaña señotenen ña ahuamencat nepene' tarro'mar e'ñe na netorreñoñ ñocop attoña same'ñerra saña.

² Ñehua, ama't po'potantañpa' otyenetañ napa' amo' allsensareteyayno tarraña sapa' señotenen po'ño'ch napa' allsensaretenca'ye tarro'mar napa' ñeñten same'ñaterraya saña. Atto sapa' e'ñe cohuen same'ñera Yompor, attoña señotateñña allohuen po'ño'ch napa' Yomproeshot allsensareten. Ñeñto'marña e'ñe pocten o'ch ne'pa'yese e'ñe erra'tsencha' nemnen na ñeñten allsensareten, tarraña ñeñtpa' ama atteye' nepeno tarro'mar napa' ama nemno e'ñe atet nepeñoñ o'ch nepatare't cohuen ñoñets alloch Cristopa' a'queshpaterres.

³ Ñeñto'marña te'pa' o'ch notas ñeñtcha' atet nanapanet ñerra'm esempo a'p'to'tare'tnet, pocto'te' ñeñt atet ne'pa'yena.

⁴ Po'ño'chpa' e'ñe pocten nocop o'ch serratallme'chennoñ allempe neserrpare'tatenes. Ñaña pocten sapa' o'ch sapnoñ ñeñtcha' norryen.

⁵ Ñaña nocop e'ñe pocten ñerra'm eñalleñ netapor o'ch nanemñ ñeñt parro yame'ñena all nechopeñe'chyen. Atet pena po'potantañ allsensaretnesha', ñaña atet pena Yepartseshar pa'mo'nasheñnesha', ñaña ñeñt atet pena Pedro.

⁶ Ñaña sapa' ñato' chate' soten e'ñe pocte' e'ñe epsheño'marey epan masheñ Bernabé yaptach yetaruasen attoch yechen ñeñtcha' yerren. Po'ño'chpa' po'potantañe'chno ñeñt torra'yetsa Yomporecoppa' ñetñapa' arratarettenet e'ñe atta.

⁷ Po'ño'chpa' ñeñt atet pena solltarnesha'pa' ñetpa' e'ñe atta aparettenet ñeñt palltenet, amach es tsa'teneto. Ñaña atet pena ñeñt nare'tene' narmets. Ñetpa' e'ñe puenare'teño'pa' chocmach tsomueññañet puenaremñ pue'mer. Ñaña atet pena ñeñt po'taruas pene' o'ch cohuanñipenan carrnero ñaña cabra. Ñetñapa' chocmach orreññañet puemomos.

⁸ Sapa' chate' sotenapañ ñeñt atet notenes, ñeñtpa' e'ñete' nañeña noctapñoñ atet notyenes ñeñt atet yoctape'chyen ya allohueney ñeñtey arromña'tey. Tarraña ñeñtpa' amaca'ye atteyaye tarro'mar ñeñtpa' ñeñtara ñoñets ñeñt atet anaret ahuatoteñ.

⁹ Tarro'mar Moisés po'ñoñ ñeñt atet anuaret ahuatoteñ, ñeñtpa' atet oten: "Ñerra'm esempo satmama'tateñ huaquësh attoch es serrocllome'chach pa'tcoñ allempopa' amach sempanma'tatsche attoch ñapa'cho' rranepa'ña ñeñt serrocllome'chateñ." Ñehua, yapa' yeñoteñ Yomporpa' ama e'ñe ñaptecpa huacshecop eñose'te.

¹⁰ Po'ñoçhpa' yocpa'naña eñose't ñeñtey torra'yetsa ñocop. Tarro'mar e'ñe puemorrenteñoŕey yapa' Yomporpa' e'ñe pocte' enteñ arratareycha' yaña all yetorra'yena ñocop. O'ch netma'ntacha atet: Ñerra'm cho yetamuenpa' chocmach yeyemtena ñeñtcha' yenare't all, o'ch choppa' ñeñtcha'ña yetsomuerr. Ñaña ñerra'm cho es yerrocllome'chenpa' chocmach yeyemtena ñeñt yerrocllome'chen, tarro'mar yapa' yeñoteñ chocmach apuerryet allpon.

¹¹ Ñehua, o'ch alla netma'ntatererr po'poñ. Allempo yeserrpare'tatenes Yompor po'ñoñ ñeñtpa' attecma ñerra'm cho yenare'ten narmets pue'llomer sesho. Ñeñt atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñt sherbets errponohuañen yecamquëñecoppa' ama'tña pocte' senteñeña sapa' o'ch sapuenyeyñ ama't coñe'ta ñeñt yepalltena alloch yocrra añe patsro.

¹² Po'ñoçhpa' po'potantañeçhno ñeñt seserrpare'tatene', ñetpa' enamuset o'ch sapanet ñeñt alloch correnet. Ñehua, ñeñtpa' e'ñe pocte'. Atto ñetpa' es enamusetpa' elloña yocoppa'cho'ña e'ñe pocte' o'ch es yenamas yaña.

Tarraña ama't e'ñe pocteñ o'ch es yenamaseñpa' po'ñoçhpa' ama't coñe'ta ama es yenamuenso. Chocma ya'huanteñ ñeñt echarr yenten yocop. Ama't e'ñe pocteñ o'ch es yenamuenespa' tarraña amaña es yenamuenso tarro'mar ñerra'm ama pocteye' señchepa' yeñoteñ amate' se'mñoto Yompor po'ñoñ ñeñt atet yeserrpare'tatenes. Yapa' ama yemno o'ch yepatare't cohuen ñoñets alloch Cristopa' a'queshpaterres.

¹³ Elloña sapa' señoteñ ñeñt torretsa Parets pa'paclopa' e'ñe allara Parets pa'paclopa' chocmach entenet puerrar. Ñaña añ cornesha' ñeñt muetsene' huaquësh amapa' carrnero Yomporecoppa' ñetpa'cho'ña e'ñe allotpa' rrenet ñeñt amtsare't Yomporecop.

¹⁴ Attecma ñaña Yepartsesharpa' nan po'ñoñ. Ñeñtpa' atet ot: Ñeñt serrpare'tene' cohuen ñoñets alloch sequeshpapa' e'ñe pocte' pueserrpare'teñot ñeñt e'mñotene'pa' pocte' o'ch apueñet ñeñt palltena alloch corra.

¹⁵ Ñehua, ama't e'ñe pocteñ o'ch sapuennyoyñ ñeñt nepallte-

napa' tarraña napa' ama't ahuatapa' ama es notase'te o'ch es sapuen. Ama't te'pa' ama ñeñtecpaye' nequellquënnaso atet. Tarro'mar ama nemno o'ch huañ atto neserrpare'tatenes e'ñe atta. E'ñechña nocsheñsha' neserrpare'tatenes e'ñe atta. Ñerra'm o'ch huañ atto neserrpare'tatenes e'ñe attapa' añate' pocte' nenten o'ch nerroma. Tarro'mar napa' ama nemno ama't eseshapa' o'ch puerratanñpsenña ñeñt' allo e'ñe nocshena.

16 Ñaña e'ñe neserrpare'teñoť cohuen ñoñets napa' amate' errotenoť e'ñe atta nommo'cho, tarro'mar napa' e'ñe atet eyechareten. Ñerra'm ama atet neřopa' napa' nanacte' llequëñtso'tsenen.

17 Ñerra'm e'ñe na nemneññoťa neserrpare'teneñpa' ñehua, pocteñ o'ch tsa'tenna Yompor attoch coshaterren. Tarraña ñerra'm atet otenen Yomporpa' ñeñtpa' ama nañeña nemneññoťeye' neserrpare'teno. Po'ñočhpa' allsensareten ñeñto'marña neserrpare'taterña acheñenesha'.

18 Ñeñt' ellonet apuenen Yompor ñeñtcha' atarr nocshate' na, ñeñtpa' attoť neserrpare'tatenes cohuen ñoñets e'ñe atta. Ama't e'ñe pocteñ o'ch setsa'tnapa' tarraña napa' ama nemnoña atet.

19 Ñaña ama't ama eñalle puesheñarr ñeñtcha' neyechayapa' po'ñočhpa' añña nanac neťorratenaya allohuen acheñenesha' tarro'mar na atet muenets. Ñaña tarro'mar neťorrana ñocpuet attoch name'ñacha shonte' acheñenesha'.

20 Ñaña allempo allo'tsenen parro epan namo'tsesha' judionesha'pa' napa' o'ch nepena atet yečhenet ñet. Allochñapa' ñetpa' o'ch e'mñoterrnet; e'ñe pue'mñoteñoťetpa' ñato'rraña o'ch name'ñatera namo'tsesha' judionesha'. Ñerra'm esempo allo'tsenen parro epan ñeñt' cotene' Moisés po'ñoñ ñeñt' atet anaretpa' napa' ama'tcha' ama nocteno ñeñt' atet cotape'chenet ñetpa' tarraña napa' amach nachmare'taneto ñeñt' atet penet ñet, allochñapa' ñato' attoťpa' o'ch name'ñatanet ñamet.

21 Ñaña ñerra'm allempo allo'tsenen parro epan ñeñt' ama cotape'chenaye ñoñets ñeñt' atet anaret Partsocop, napa'cho'ña o'ch nepena atet ñerra'mrrate' ama nocteno ñoñets ñeñt' atet anaret Partsocop. Ñehua, po'ñočhpa' nocteneñña ñeñt' ñoñets ñeñt' atet anaret Partsocop tarro'mar añcha'ña e'ñe nocten Cristo po'ñoñ. Atetcha' nepeñña ñeñt' ama es cotape'chetso Partsocop allochñapa' attoťcha' name'ñaterranet ñamet Cristo ama't ñeñt' ama es cotape'cheno Partsocop ama't mamesha.

22 Ñaña ñerra'm esempo allo'tsenen parro epan ñeñt ama huomenc penaye pueyoçher Yomporecoppa' napa'cho'ña o'ch nepena atet ñerra'mrrate' ama huomencayaye ñaña neyoçher Yomporecop, allochñapa' attoch noctape'chach cohuen ñeñt ama huomenc penaye pueyoçher Yomporecop. Ñaña ama't erra'tsena acheñ errotencho' cotape'chenpa' napa'cho'ña allempo allo'tsenen parro epan atetcha' nepena ñaña atet pocte' entenet ñet, allochñapa' attoch ama't errotenette' attochña na'queshpatteranetcha' ama't patanta'ttsa.

23 Atetcha' nepena attoch name'ñatanet ñerra'm esempo neserrpare'tatanet cohuen ñoñets atto Cristopa' ñach ya'queshpattere'. Attoch napa'cho'ña e'ñe name'ñeñoñ Cristopa' nocshapretanetcha' ñerra'm ame'ñeret ñamet Cristo.

24 Te'pa' o'ch noterrser po'poñ, ñato' o'ch netma'ntacha atet. Ñehua, po'ñoçh sapa' señoñeñ ñerra'm esempo o'ch eñoçhet esesha'te' nanac matetsapa' shonte'ch acheñ matatsa. Allohuenetpa' mueneñetcha' o'ch meshe'tuet po'poñeçhno acheñ attoch ganet premio. Tarraña ama'tcha' shonte' matatsapa' eñallachña puesheñarr ñeñtcha' ganatanuaya allohuen ñeñt parro mataçha'tet. Ñeño'marña te'pa' añ poctetsa o'ch yetorrena yaña e'ñe cohuen Yomporecop attoch yegana ñeñt o'patatenya ña.

25 Ñaña yeñoñeñ allohuen ñeñt po'taruas pene' johueñetspa' ñetpa' o'ch pohuanmuet ora ñeñt atet poctetsa attoch echet po'huamenc esheccha' ganet. Ñeño'marña ñetpa' o'ch queçhpa'huet ñeñt ayorampsañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñt atet penet ñet attoch ganet copa, ama't ñeñt copapa' ahuañaña, ñeñtepñapa' yapa' o'ch yetorra yaña Yomporecop attoch yegana ñeñt o'patatenya ñeñt ama ahuañaño.

26 Atet pena ñeñt matetsapa' e'ñech paçharr matena. Ñehua, napa'cho'ña e'ñech patrra nema'yoçhra Yomporecop. Atet ñaña ñerra'm esempo yeçhotna'tena, ñerra'm atta ya'ntapechpa' amach errotenot yegano. Ñeñtepñapa' napa' amach atta na'ntapechatsto ñeñt Yomporecop.

27 Chochña neunat ñañoña nechets. E'ñe nach taruasate' nechets Yomporecop. Atetcha' nepa tarro'mar ama't na serrpare'tate' po'psheññeçhnopa' ñato'rraña ellopa' te't alla ahupore'tareñ ñañoña tarro'mar ama netsotoñe ñeñt muenen Yompor.

* 9:25 Po'ñoçh aña' oten choyo'mets tarro'mar ñeñt po'premio pete't ahuañ.

10

*Arrpa' all yerpatanet ñeññ atet p̄atse'tyese't ahuat israe-
lena'tarnesha'*

¹ Ñeñño'mar te'pa' masheñneshacha' ñaña nochaneshacha' o'ch noterrser po'poñ. Nemneñ o'ch neñotatas ñeññ atet pe't ahuat yatañneshañ. Allempo chopeñe'chyesete't amaretarero'marpa' añ anmahuete't os ñeññ cohuam̄psatanete't Yompor e'ñe allohuenet. Ñaña Yomporpa' ellopa'tetstatan sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeññ otenet Sa'p Tsasasen.

² Ñaña ahuo' na'nmet Moisés ñeññcha' pa'm̄cha'tareter pet. Ñaña e'ñe pame'ñeñotet Moisés allohuenetpa' ahuo't a'natenanet os. Ñato' o'ch netma'ntacha atet, ñetpa' allohuenet apatarettet oñof ñaña osof e'ñe pueyemteñotet Moisés.

³ Ñaña allohuenet Paretspa' apanete't puerrar ñeññ rrete't allohuenet ñeññ mueñanete't entot.

⁴ Ñaña allohuenetpa' chocmo' apanete't Parets ñeññ orrete't allohuenet. Tarro'mar ahuat allempo potanet oñ e'ñe mapuetot allot orretpa' ñeññña mapue'pa' toma'ntenana Cristo ñeññ Partso'tets ñaña. Po'ño'ch Cristo ñeññ onahuete't ñaña ñeññtara ñapa' ña cota'nmahuete't.

⁵ Ama't Yomporpa' nanaco' a'natanetañe'tpa' tarraña ñapa' amo' pocteye' entane'te atto ñetpa' atpare'tyese'te't. Ñeñño'marña ahuo' a'cllatuanet e'ñe alla amarato. Puesheña'ttso' pocte' ente't Yompor ñeññ e'ñe cohuen cotape'chyestse't.

⁶ Ñaña ñeññ atet p̄atse't ñeññ ama pocteyayepa' añ ye'chateney yaña amach yeye'chapretatsto yaña atet.

⁷ Ñaña amach yeyomporer ye'patsche ñeññ aye'chcataret ñeññ ma'yochyesete't ñet patanta'tets. Yapa' yeñoteñ añecop atet pete't, tarro'mar atet anuaret Yompor po'ñoñ, ñeññpa' atet oten: "Acheñenesha'pa' o' anorrcha'tet, o'ña anorrcha'tuetpa' o' rrallme'chapretet. Allotpa' orryeset ñaña. Allempoña o' rrallme'chapretuetpa' o' tantrra'terret o'cho' alla coshame'tam̄perret pueye'chcatar."

⁸ Ñaña ama pocteyaye o'ch yecañoresha'ten atet pete't ñet patanta'tets. Ñeñño'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pamtarrocma.

⁹ Ñaña ama pocteyaye e'ñe po'tomñapa' o'ch ya'llocchame'ch Yompor. Ñeññ atet pe't patanta'tets

acheñenesha'pa' ñeñto'maro'ña shonte' acheñenesha' ñeñt' achanatyes shecheppa' e'ñe colla'huet.

10 Ñaña ama pocteyaye o'ch yetanmare'cha Yompor. Ñeñt' atet pe't ñaña patanta'tets acheñenesha'pa' ñeñto'maro'ña amñarettet ñeñt' amtsañpa' o' a'cclatuanet.

11 Tarro'mar ñetpa' atet huapyesanete't pa'namen allochña yapa'cho'ña o'ch yeñoch yaña ama pocteyaye o'ch atet yeña yaña. Ñeñto'marña ama't ahua'tpa' atet quellquët atet pete't allempo, ñeñtpa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt' atet yechateney yaña amach ye'patsto atet pete't ñet.

12 Ñeñto'marña te'pa' o'ch notas, e'ñech seño'ta. Amach sota'psa'tatsto, napa' amach ne'po ñeñt' atet pete't ahua't. Tarro'mar ñerra'm esempo yot atetpa' ñato'rraña machayo'ta alla atet yeperra yaña ñeñt' ama pocteyaye.

13 Tarro'mar allohueneypa' chocmach huaponaya topateñets, ñeñtara topateñets ñeñt' ye'chenoya allohueney ñeñtey arromña'tey. Tarraña Yomporpa' chocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch çhaponaya topateñetspa' ñapa' chocmach orrtatonay attoch ya'huante' attoch amach metanonay yehuamenc.

14 Ñeñto'marña masheñeshacha' ñaña no'chaneshacha' notenes, e'ñe pocte' o'ch sa'ypo'ña'huerr ñeñt' aye'chcatarete'chno ñeñt' po'yomporer penet ñet.

15 Sapa' seño'tueñ ñeñt' cohuentetsa Yomporecop. Ñeñto'marña o'ch notas, ¿ama't pocte' sente'ne ñeñt' o' notuas?

16 Ñeñto'marña allempo yorreññañ ñeñt' toma'ntenaya Cristo po'rراس ñeñt' atet anare't Yomporecoppa', çhoch ñanom yema'yocha'ñpesya attoch yeparasyoso'ch Yompor. Allempo yorreñ allohueneypa' e'ñech yeyemteño' Cristo ñeñt' rromats yocop po'ño'chpa' o'ch yeparrocmatua allohueney ama't ñaña Cristo. Ñaña attec'mach yepena ñerra'm esempo yerren pan ñeñt' toma'ntenaya Cristo po'chets. Allempo yeshota'ten pan, o'ch yerreñ parro allohueneypa' e'ñech yeyemteño' Cristo ñeñt' a'rroye' po'chets yocop po'ño'ch allempopa' e'ñe yeparrocmatuen allohueney ama't ñaña Cristo.

17 Ñaña ama'tcha' shonteypa' e'ñech patrra pan yeshota't ñeñt'cha' yerra'yes ama't allohueney. Ñeñto'marña yeñoteñ ama't shonteypa' e'ñe yeparrocmateño' Cristopa' e'ñe patrra enteney allohueney, ñaña ñeñt'ara e'ñech po'chets peney.

18 Ñehua, o'ch yoc'tape'ch ñaña ñeñt' atet pe't israelena'tarnesha'. Ñetpa' o'ch muetset huaquësh

amapa' carrnero Yomporecop. Alotñapa' o'ch rrenet ñeñt puecha'yetsa. Allempo rreñetpa' po'ño'ch e'ñech pueyemteño'et Yomporpa' o'ch parrocmatet epuet Parets.

19-20 Ñehua, po'ño'chpa' ama notenso ñerra'm esempo serren po'chets ñeñt amtsaret aye'chcataretecoppa' o'ch separrocmat epas, tarro'mar ama't toma'ntateñetañ Paretspa' ama Partsoyaye. Añña notenes ñerra'm esempo ñeñt ama ame'ñenayo Cristopa' o'ch es muetset aye'chcataretecop, tarraña po'ño'chpa' añecpa muetseñet oneñe'fecop, ama añecpaye' muetseñeto Yomporecop. Ñeñto'marña napa' notenes ñato' amach serratsche tarro'mar ama nemno e'ñe serreño'tpa' te't separrocmaten epas oneñe't.

21 Po'ño'chpa' amate' erroteno't yeparrocmatoña epay Yepartseshar Cristo ñerra'm cha yeparrocmaten epay oneñe't. Ñeñto'marña notenes amate' erroteno't e'ñe yeyemteño' Cristopa' o'ch yorr ñeñt ñocop, ñaña ñerra'm aña yetsoten ñeñt oneñe'fecop. Ñaña amate' erroteno yerroña parro ñeñt anaret Yepartsesharecop, ñaña ñerra'm aña yetsoten ñeñt oneñe'fecop.

22 Ñerra'm atet ye'papa' chate' ya'llocchame'ch Yompor ñaña e'ñe puempa'teño'teypa' chate' ya'tsrre'mach. Chate' yotta ñerra'm yapa' nanac ahuamencatey, ñaña'apa' amate' ahuamencateye' yenteñe.

Atto ama't e'ñe pocten o'ch es ye'pa'yeseñpa' tarraña amach ye'patsto

23 Ñeñto'mar te'pa' o'ch alla noterrser, e'ñe pocten o'ch yerreneñ po'chets ñeñt amtsaret aye'chcataretecop, tarro'mar Yompor po'ño'ñpa' ama otenñe amach ye'patsto atet. Tarraña ama't eñalleñ pa'namen ñeñt e'ñe pocten o'ch ye'papa' tarraña ñerra'm ñeñtpa' ama añecpayaye alloch huomenc ye'pa' yeyo'cher Yomporecoppa' ñehua, ñeñte'pñapa' amach atet ye'patsto. Ama't eñalleñ pa'namen ñeñt e'ñe pocten o'ch ye'papa' tarraña ñerra'm ñeñtpa' ama añecpayaye alloch yeyenpue' po'psheñeñ attoch huomenc pan pueyo'cher Yomporecoppa' ñehua, ñeñte'pñapa' amach atet ye'patsto.

24 Añcha'ña o'ch yepena attoch yeyenpue' yamo'ts attoch o'ch huomenc pet pueyo'cher. Amachña aña yellcatsto ñeñt e'ñe yocpa.

25 Ñaña o'ch notas ñeñt'cha' atet se'pa: Ñerra'm esempo seta allecma vendenet po'chetspa' amach sa'p'to'tatsche ñeñt vendets, amach sotatsche atet: "Añ po'chetspa' ¿añe't ñeñt amtsaret aye'chcataretecop?" Amach sa'p'to'tatsto allochñapa' esheccha' serre' e'ñe cohuen.

26 E'ñe pocte' o'ch yerren ama't erra'tsente' po'chets tarro'mar allohuen es yentyen arr patsro ñeñtpa' Yomporo pueyečcatuar. Ñaña ama't ora patspa' e'ñe ñocma.

27 Te'pa' o'ch notas po'poñ ñeñtcha' atet sepa. Ñerra'm esempo ñeñt ama ame'ñenaye Cristopa' o'ch hua'ñas o'ch serallme'chapreña' ñaña ñerra'm sapa' sesechapa', e'ñe pocte' o'ch ahues ñaña o'ch serra' ama't erra'tsencha' po'chets apaset. Po'tomña amach sotatsto atet: "Ta', ¿pocte'te' o'ch yerren añ po'chets? Ñato' ñeñtara añ po'chets ñeñtē' amsaret ayečcataretcop."

28-29 Tarraña o'ch notas po'poñonet: Ñerra'm allo'tsen puesheñarr ñeñt ama pocteye' entenaye o'ch yerren po'chets ñeñt amsaret ayečcataretcoppa' ñerra'm ñapa' o'ch otas: "Añ po'chetspa' ñeñt amsaret ayečcataretcop", ñehua, allempopa' añ pocte' amach serratsche. Amach yerratsche tarro'mar añ pocte' amach yeřatsto ñeñt ama pocteye' enteno po'psheñeñ, ñato' ama't yapa' e'ñe pocte' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' pocte' yapa' o'ch yeřa ñeñt atet pocte' enten po'psheñeñ? ¿Eso'marte'ña ama pocteyaye o'ch yeřa ñeñt atet pocte' yenten ya?"

30 Ñaña ñato' o'ch sot atet: "Ñerra'm po'ñočh neparasyoso'teñořpa' nerren nerrarpa' ¿eso'marte'ña otenet ama pocteyaye o'ch nerra' ñeñt o' neparasyoso'tamřpesua?"

31 Ñeño'mar te'pa' o'ch notas: Ama't erra'tsena es yeřa'yenpa' añ pocte' o'ch yorrtena e'ñe cohuen, attoch acheñenesha' o'ch aye'chočhtateññañet ñamet Yompor. Ama't allempo es yerra'yen, ñaña ama't allempo es yorryenpa' añ pocte' o'ch yorrtaten e'ñe cohuen Yomporecop.

32 Añ pocte' amach yeřatsto ñeñt ama pocteye' enteno judionesha'. Ñaña añ pocte' amach yeřatsto ñeñt ama pocteye' enteno ñeñt ama judioneshayaye. Ñaña amach yeřatsto ñeñt ama pocteye' enteno allohuen acheñenesha' ñeñt ame'ñenaya Yompor. Tarro'mar ñerra'm atet yeřa ñeñt ama pocteye' entenetopa' čhaťe' ya'psataterranet Yompor.

33 Ñeño'marña napa' ama't erra'tsena neřa'yenpa' añña nemneñ o'ch nocshach allohuen acheñ ñeñt atet pocte' entenet ñet. Tarro'mar napa' ama ne'nen ñeñt e'ñe nocpa, añña ne'nen ñeñt sherbets allohuen acheñenesšacop. Tarro'marña napa' čhocma ne'nen atet, allochñapa' attoch na'qeshřaterranet.

11

1 Ñeño'marña napa' notenes: Atet sentenen ñeñt atet nepena napa' ñeñtpa' e'ñe pocte' ñeñtcha' atet sepa saña,

tarro'mar napa' añ nepena ñeñt atet pena ñaña Cristo.

Ñeñt poctetsa ñeñtcha' atet pa coyaneshachno allempo yapchena Parets pa'paclo

² Te'pa' o'ch masheñneshacha' ñaña nochaneshacha' notas po'poñ. Napa' e'ñe pocte' nentenes atto sapa' ama sepseno ñeñt atet neychatuanmas ñeñtcha' atet sepa, ñaña atto chocma seyerpuenna.

³ Te'ña añmapa' ñeñt nemneñ o'ch seño ch saña, atto ya allohueney ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoñapa' añ pomnaren pene' Pompor.

⁴ Ñeñto'marña yoten ama pocteyaye ya ñeñtey asheñorreypa' o'ch yeca'matamño'ta allempo yema'yochena, amapa' allempo ya'poteññañ Yompor po'ñoñ. Tarro'mar ñerra'm esempo yeca'matamño'tenapa' chach yottena ñerra'mrrate' po'psheñña acheñ pomnaren yepene', amach añeye' pomnaren yepenaye Cristo. Atteñapa' o'ch cha yepencna'ntach Cristo ñeñt po'ño'ch pomnaren yepene'.

⁵ Yapa' añña yoten coyanesha'pa' e'ñe pocte' o'ch ca'matamño'ta ñerra'm esempo ma'yochena, amapa' ñerra'm allempo a'potenan Yompor po'ñoñ. Tarro'mar ñerra'm ama ca'matamño'topa' chach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama choye' ca'matamño'teno. Ñerra'm ama ca'matamño'topa' añ poctetsa penquëpa' tarro'mar cha ottena atette'ña ñerra'm ashopena'taret.

⁶ Atteña ñerra'm coyanesha' ama mueno o'ch ca'matamño'tapa' ñehua, ama'tpa' shopena'tatepa'. Attochña ñerra'm o'ch cha pencana atto shopena'tenapa' ñehua, ama'tpa' ca'matamño'tepa'. Ñaña ñerra'm puetsorrmo'tateño'pa' o'ch pencapa' ñehua, ama'tpa' ca'matamño'tepa' ñaña.

⁷ Yocopña ama pocteyaye ñeñtey asheñorreypa' o'ch yeca'matamño'ta, allempo yeserrpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' chocma po'cohuenña peney. Tarraña coyanesha'pa' añña po'cohuenña pene' puerrollar.

⁸ Ñehua, tarro'mar ahuañ Yomporpa' asheñorroñ yeçcatan coyanesha'. Asheñorrpa' ama coyaneshoteye' yeçcache.

⁹ Ñaña yeñoteñ asheñorrpa' ama añecpaye' yeçcache coyanesacop. Añecopña yeçcatan coyanesha' attoch o'ch yenpa'y ya ñeñtey asheñorrey.

10 Ñeñto'marña añ pocte' coyanesha'pa' o'ch ca'mataño'tena attoch ama't Yompor po'mllaño'eñnanesharpa' o'ch eñochet añ po'ño'ch pomnaren pene' puerrollar.

11 Tarraña e'ñe yame'ñeño'f Yepartsesharpa' añ pocte' ya ñeñtey asheñorreypa' o'ch yeyenpueñ yaña coyanesha'. Coyanesha'pa'cho'ña pocte' o'ch yenpueney ya ñeñtey asheñorrey.

12 Ñeñto'marña yeñoteñ ahuat Yomporpa' asheñorro'f ye'hcatan coyanesha'. Ñaña e'ñe allempoteñ ama't ya ñeñtey asheñorreypa' ahuo't eñalletateney coyanesha'. Tarraña po'ño'chpa' yeñoteñ ñeñtpa' e'ñe Yomporeshotecma huena.

13 Ñehua, o'ch na'pto'tas: Ñeñt atet sey'chena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'mataño'teno?

14 Ñeñt atet yey'chena yapa' ñeñtpa' añ yeñotatene' ñerra'm ya ñeñtey asheñorreypa' esempo atesha'ta yechpa' o'ch penateney.

15 Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñtpa' alloch ca'mataño'tenet, tarro'mar ñetpa' atet ye'hcatanet Yompor.

16 Ñehua, ñerra'm eseshas ama pocteye' entaye ñeñt atet o' notuaspá' ñehua, pocte' o'ch alla noterrser; tarro'mar ñeñt atet o' notuaspá' ñeñtpa' atet'cha' sepa tarro'mar ama eñalle po'poñ ñeñt pocte' yenten. Ama't ñaña allohuen ñeñt pame'ñeño'fet Yompor ñeñt ap'cha'yetsapa' ñetpa'cho'ña pocte' enteñet ñeñt atet o' notuas.

Añpa' ñeñt ama a'papahuo allempo yorren ñeñt toma'ntenaya Cristo po'rras

17-18 Te'pa' o'ch notas po'poñ ñeñt'cha' atet sepa allempocma sap'chena. Tarraña ñanompa' o'ch notas, ama pocteye' nentenso ñeñt atet sepena te' allempocma sap'chena. Tarro'mar ñeñt atet sepenapa' ama añe'cpayaye attoch seyennannena e'ñe cohuen, elloña ñeñtpa' cha epatenes. Tarro'mar napa' o' ne'mare'tas ñeñt atet sepena. Ñerra'm esempo sap'chena e'ñe same'ñeño'fpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ño'ch'ete' atet sepena.

19 Po'ño'ch ñeñtey ame'ñetsapa' chocmach eñall ñeñt'cha' ama pa'charroye' ame'ñatso, ñeñto'marña ya allempopa' o'ch yeñoch ñeñt e'ñe pa'charr cotape'chets, ñaña o'ch yeñoch ñeñt'cha' ama pa'charroye' cotape'chatso.

20 Ñaña ñerra'm esempo sapchenapa' eñe seyerpueñoť Yepartsesharpa' ahuo'ch serrallme'chen, tarraña po'ñočpa' ama Yepartsesharecpaye' serrallme'cheno.

21 Tarro'mar puesheña'tets eñe pa'chporrñoťtpa' ahuo'chčo' rrenet ñanmacma, amo'chña parrocmaye' serrallme'cheno. Ñeñto'marña ñato' puesheña'tetspa' ahuo'ch atta nanac cheporrena, ñato' po'psheñeñña' ahuo'ch čha posa'tyes.

22 Ñeñť atet sepenapa' ama pocteyaye tarro'mar sapa' sechenca'yeña sepaquell allcha' serren ñaña allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquell. Allña'pa' o'ch atta sepencateñ ñaña ñeñť ama es echetso. Te'ña po'ñoč napa' o'ch notas, amaca'ye nocshapretensoña sa ñeñť atet sepena.

Atet pa Jesús allempo ñanom toma'ntatana po'rras orrpapo' (Mt. 26.26-29; Mr. 14.22-25; Lc. 22.14-20)

23 Añmapa' ñeñña atet yečhatnerrey Yepartseshar ñeñčha' attoch yeyerpueña. Ñeñtara ñoñets sapa' o' neñotatuas ahuañacma. Ñeñtpa' atet oten: Ñeñte tsaprocma allempo Judaspa' pomuerran Yepartseshar Jesús, ñaña'pa' chetan pan. Chetan panpa'

24 parasyoso'tampes allotña'pa' shota'chpa' atet otanet: "Añmapa' ñeñť toma'ntenaya nechets ñeñčha' atserrpareťterrtsa socop. Añmapa' ñeñčha' atet sepa. Ñerra'm esempo serren pan atetpa' e'ñech seyerpueñoťen napa' o'ch serre'."

25 Allempoña o' rrohuetpa' attecma pa o' chetan ñaña orramets allocma orrete'tpa' atet otanet: "Añ ñeñčha' sorrrpa' ñeñť toma'ntenaya nerras ñeñčha' etserra anaret allochña'pa' attoch ařretna'huareťterra so'chñar. Añmapa' ñeñčha' atet sepa: Ñerra'm esempoch sorren ñeñť toma'ntenaya nerraspa' e'ñech seyerpueñoťen napa' sorreñcha'." Añpa' allohua ñeñť atet otnerrey Yepartseshar.

26 Ñeñto'marña te'pa' ñerra'm esempo yerren añ pan, ñaña yorren añ orrpapo'pa' čhocmach yeñotach acheñenesha' atto rroma Yepartseshar yocop. Ñeñtpa' e'ñech tayoteñ atet yepa tarrempohuach esempohuañencha' huerra.

Añpa' ñeñčha' atet yepa allempo yorren ñeñť toma'ntenaya Cristo po'rras

27 Tarraña ñerra'm yapa' ama yeyerpueñoťeye' eñe ña yerreno pan, ñaña o'ch yorr ñeñť toma'ntatana Yepartseshar po'rraspa' yapa' čate' yeyora yo'chñar eñe ya'llocchame'teñoť Yepartseshar po'chets ñaña po'rras.

28 Ñeñto'marña te'pa' o'ch notas, amach sorreña'pa' o'ch soctape'ch ñanom, o'ch señota sañeña ñeñt atet o' sepo'hua.

29 Tarraña ñerra'm atfa ama es yep'cheno rre', ama yoctape'cho ñanom ñeñt toma'ntatana Yepartseshar po'chetspa' ñerra'm atfa yerre' ñaña atfa yorppa' e'ñe yerreñoñ ñaña yorreño'pa' atsa'tatareteycha'.

30 Ñeñto'marña seshopa' shonte' acheñenesha' ñeñt ama a'ñshe'mtetso, ñaña po'potantañpa' cha atsna'tyeset, po'potantaññapa' o' rromayeset.

31 Tarraña ñerra'm cho ñanom yoctape'ch e'ñe cohuen, o'ch yeñota yañeña ñanompa' allempoña po'ño'chpa' amach atsa'tatareteye.

32 Tarraña ñeñt'cha' atet tsa'tatya te' Yomporpa' ñeñt'pa' añecop attoch cotape'chaterrey e'ñe cohuen attoch esempo-huañenpa' amach a'coñchatareteye epay ñeñt ama ame'ñetso arr patsro.

33 Ñeñto'marña masheñeshacha' ñaña no'chaneshacha' te'pa' o'ch noterrser: Ñerra'm esempo sap'cha allohuenes o'ch serra' ñeñt anaret Yepartsesharecoppa' añ pocte' choch ñanom secuanna'ta attoch o'ch serreñ e'ñe parrocmá.

34 Tarraña ñerra'm eseshas cheporratsapa' e'ñe pocte' o'ch serrerra' sepaclo. Tarro'mar ama pocteyaye e'ñe sap'cheño'pa' o'ch secoñchatanna'ta. Ñaña po'poñe'chno ñeñt palltetsapa' allach neserrpare'tatoses ñerra'm esempoch ne'chap sesho.

12

Atto Parets Puecamquëñpa' apa'yeney po'poñe'ttsocma attoch yetorra'yesa Yomporecop

1 Te'pa' masheñeshacha' ñaña no'chaneshacha' o'ch yeserrpare't ñaña atto Parets Puecamquëñpa' ñach ahuamencat yepa'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch seño'ch ñeñt e'ñe atet pennay Parets Puecamquëñ.

2 Ama't sapa' seño'teñ ahuañmo'cha allempo ama same'ñerra'pa' atfa sema'yochatse'tyese't aye'chcatarete'chno. Ñaña aye'chcatarete'chnopa' ama't ama eñorenopa' atfa nanac ame'ñatasete't, ama't all seta'yese't.

3 Tarraña ñerra'm machaya esesha' eñoratsa, napa' nemneñ chochña e'ñe seño'ch ñato' po'ño'chte' añ eñoratene' Parets Puecamquëñ, ñato' amate'. Ñeñto'marña o'ch neñotatas atet attoch sapa' seño'ch: Ñerra'm esesha' achmare'tene' Jesús'pa' ñeñtña sapa' o'ch seño'ch ama aye'e' eñoratenaye Yompor Puecamquëñ. Tarraña ñerra'm esesha'ña otets: "Jesús'pa' ñeñt

po'ñoçh Yepartseshar yepen", ñeñtña po'ñoçhpa' o'ch señoçh añ eñoratene' Parets Puecamquëñ.

4 Ñaña Yomporpa' ama't e'ñe patrra Puecamquëñpa' tarraña ñapa' o'ch ahuamencat pa'yese y attoch yetorra'yesa e'ñe po'poñe'ttsocma Yomporecop.

5 Ama'tcha' po'poñe'ttsocma yetorra'yesañpa' tarraña ñeñtarach paterr Yepartseshar yeshërba'huen allohueney.

6 Ñaña ama't eñalleñ po'poñe'ttsocma atto ahuamencat pohueney allohueney tarraña e'ñe patrra Yompor ñeñt ahuamencat yepene' allohueney.

7 Ñaña allohueney Parets Puecamquëñpa' ahuo't apa'yese y attoch yorrtatyeseñ Yompor po'huamenc. Ñeñtpa' añecop aparetey attoch yeyenpanna'ta alloch huomenc yepa'yes yeyoçher Yomporecop.

8 Atef ñerra'm ñato' puesheñarr Parets Puecamquëñoñpa' o'ch aþ attoch e'ñe eñotan ñeñt cohuentetsa Yomporecop, attoch ñapa' o'ch co'tape'chatan pamo'tsesha'. Ñato' po'psheñeñ añ Parets Puecamquëñpa' o'ch nanac çhapatoñ pueyoçhro ñeñt cohuentetsa Yomporecop, attoch ñapa'çho'ña o'ch yenpan pamo'tsesha'. Tarraña ñeñtara Parets Puecamquëñ ñeñtña eñotatenahuet.

9 Ñato' po'psheñeñpa' nanaccha' yemtenana Yompor. Ñeñtara Parets Puecamquëñpa' o'ch aþ attoch yemcha nanac. Ñato' po'psheñeñpa' o'ch aþ po'huamenc attoch a'crratyesan atsnañeteçhno. Tarraña ñeñtara Parets Puecamquëñ ñeñtña apuene' attoch a'crratyese.

10 Ñato' po'psheñeñpa' o'ch aþ attoch orrtatyesan Yompor po'partsoña. Ñato' po'psheñeñpa' nanaccha' cohuen a'potan Yompor po'ñoñ. Ñato' po'psheñeñpa' o'ch eñotyese pa'namen co'tapñats, attoch ñapa' o'ch eñoçh erro'tte' huena ñeñt co'tapñats, ñato' Parets Puecamquëñoñ amapa' oneñetate' poçtaþña. Ñato' po'psheñeñpa' Parets Puecamquëñcha' eñotatene' eñosyese'ts po'poñ ñoñtso. Amapa' ñato' po'psheñeñpa' o'ch a'mñtan ñoñets atef eñenet po'poñ ñoñtso.

11 Tarraña allohueneypa' e'ñe patrra Parets Puecamquëñ ñeñtcha' yeñotatene' ñeñtara ñeñtcha' yapa'yese' puesheña'ttsoy erra'tsencha' muena' ña attoch yetorra'yesa pa'namen ñocop.

Ama't e'ñe po'poñe'ttsocma yetorra'yena Yomporecoppa' tarraña ñapa' e'ñe attecma cohuen enteney

12 Ñato' o'ch netma'ntacha ñeñt atef yeçhquëna yechets. Ñehua, allemeñ yechetspa' ama'tcha' ellopa'tetstenañpa'

tarraña allohuenpa' e'ñe pa'rra yechtsot. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua allohueney.

13 Tarro'mar allempo o' yapataretetuapa' Parets Puecamquēñpa' o'ch parrocmataturrey allohueney. Ama't ñaña po'poñe'ttsocmay acheñey atet ñerra'm patanta'ttsoypa' judioneshay, ñato' po'potantañpa' amach judioneshayaye. Tarraña allohueney e'ñe puechorreñoñey Parets Puecamquēñpa' e'ñe allempoteñpa' o'ch yeparrocmatua allohueney. Ama't ñaña acheñ ñeñt ataruasataret e'ñe atta ñeñt ama esoye' enteñeto ñaña acheñ ñeñt e'ñe cohueno'tsen. Tarraña e'ñe puechorreñoñey Parets Puecamquēñ ñeñt e'ñe pa'rrapa' e'ñe allempoteñpa' o'ch yeparrocmatua allohueney.

14 O'ch alla netma'ntatererr ñeñt atet yeçhquēna yechets. Ñehua, atet ñerra'm allemeñ yechetspa' ama pa'rraye' yeçhquētso, shonte'ca'ye yeçhquētsa. Tarraña ama't shonte' yeçhquēñañ yechetspa' e'ñe pa'rra yechets ottetsa. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua.

15 Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeñto'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñtpa' ama atteyaye, çhocma parrocmaten.

16 Amapa' ñato' atet ñerra'm yetpa' o'ch ot: "Napa' ama es nesherbena atet sherben quēllo'yets ñeñto'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñtpa' ama atteyaye, çhocma parrocmaten ñaña.

17 Ñerra'm yechetspa' e'ñe yeçlloyochayapa' amate' erroteno ye'mueno. Ñaña ñerra'm yechetspa' e'ñe yetochayapa' amate' erroteno es yemosyeno.

18 Tarraña po'ñoçhpa' ama atteye' yeçhcatye Yompor. Ñapa' ahuo't ne' attoch yeçhca'yesa allemeñ yechets ñeñt atet pocte' ent ña. Ñeñto'marña yeñoteñ ama't errotençho' yetorra'yesa Yomporecop puesheña'ttsoypa' ñeñtpa' çhocma sherba'yen.

19 Po'ñoçhpa' ñerra'm yechetspa' aña yeçhcatsa paterr atet ñerra'm e'ñe yeçlloyochayapa' amate' erroteno orrtoña e'ñe cohuen ora yechets.

20 Tarraña po'ñoçhpa' ama atteye' ayeçhcatareteye. Aña çhocma eñalleteyesa allemeñ yechets. Tarraña ama't ellopa'tetstenañpa' e'ñe pa'rra yechets ottetsa. Ñeñtpa' attecma

yepena yamã allohueney ñeñfey ame'ña'yenaya Cristo. Ama't po'poñe'ttsocma yetorra'yesa Yomporecoppa' tarraña e'ñe yame'ñeñoñ Cristopa' o'ch yeparrocmatuahua allohueney.

21 Ñato' o'ch netma'ntatererr po'poñ: Atet ñerra'm yecle'pa' ama pocteyaye o'ch otan yot: "Napa' ama nepallteno ñeñt atet pesherven ña." Ñaña yoñpa' ama pocteyaye o'ch otan yetac: "Napa' ama nepallteno ñeñt atet pesherven ña."

22 Ñeño'marña ama pocteyaye o'ch yocape'chyes atet, tarro'mar ora allohuen yechetspa' e'ñe sherba'huen. Ñato' yapa' chach yotenapañ ñato' erra'tsen yechetspa' amate' es sherbeno. Tarraña ñato' ñeñfara yechetspa' ello metana'tuenan atto sherben po'poñe'chno yechets. Attecma yepena yamã allohueney ñeñfey ame'ña'yenaya Cristo. Ñato' yapa' chach yotenapañ ñato' erra'tsen acheñpa' amate' es sherbeno. Tarraña ñato' ñeñña acheñpa' ello metana'tuenan atto sherben po'poñe'chno acheñ.

23 Ñaña ñerra'm erra'tsen yechets ama tama cohuenaye' yentenopa' ñato' o'ch yehorrataña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñt yepencatene'pa' ñato' o'ch ya'nach e'ñe cohuen.

24 Tarraña ñeñt e'ñe cohuen yechetspa' amach yemno o'ch ya'nach, añña chochña yorrtañ. Atet ye'chcatonay Yompor yechets attoch ama't ñeñt ama tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen.

25 Allempoña allemeñ yechetspa' o'ch parrocmattet e'ñe cohuen, ñaña allempopa' o'ch e'ñe cohuen yenpannet.

26 Ñeño'marña ñerra'm esempo paterr yechetspa' atserrena allohuen yechetspa'cho' o'ch atsotapretannet. Ñaña ñerra'm paterr yechetspa' o'ch orrta e'ñe cohuen allohuen yechetspa'cho' o'ch coshapretannet. Attecma yepena yamã ñeñfey ame'ña'yenaya Cristo. E'ñe yeparrocmatanna'teñoñ ñerra'm puesheñarr yamo'ts cha llequëna ñeñt parro yame'ñenapa' allohueney ñeñfey ame'ñetsapa' o'ch yellcapretannena. Amapa' ñerra'm puesheñarrofeypa' nanac yocshenapa' allohueneypa'cho'ña o'ch yocshapretannena.

27 Ñehua, añ yechets ñeñt o' notuapa' añ toma'ntena ya allohueney ñeñfey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epay Cristo. Ñaña ama't shonteyeñ e'ñe po'poñe'ttsocmaypa' tarraña e'ñe yeparrocmateñoñpa' o' atet yeperra atet ñerra'm Cristo po'chtsoy.

28 Ñaña allohueney e'ñe yame'ñeñoñ Yomporpa' e'ñe po'poñe'ttsocma yetorra'yena Yomporecop. Tarro'mar

Yomporpa' atto na'yesonay pa'namen attoch yetorra'yesa ñocop. Ñanompa' ahuo't nan puesheña'tets allsensaretnesha'. Allotpa' ahuo't nan po'poñechno ñeñtcha' a'pote' po'ñoñ. Allotpa' ahuo't nan ñaña po'potantañ ñeñtcha' yechatenahuet Yompor po'ñoñ. Allotpa' ahuo't nan po'potantañ ñeñtcha' orrtate' po'partsoña. Allotpa' ahuo't nan po'potantañ ñeñtcha' torratsa attoch a'crratyaset ñeñt atсна'tyets. Po'potantaññapa' ahuo't ne' ñeñtcha' torratsa yenpue' allohuen acheñenesha'. Po'potantaññapa' ahuo't ne' ñeñtcha' yechenahuet allohuenet. Po'potantaññapa' ahuo't ne' ñeñtcha' eñosysets pa'namen ñoñtso.

²⁹ Po'ñoçhpa' ama allohuenacmaye' allsensareteye. Ñaña ama allohuenacmaye' ya'potheno Yompor po'ñoñ. Ñaña ama allohuenacmaye' yeychateno. Ñaña ama allohuenacmaye' yorrtateññañe Yompor po'partsoña.

³⁰ Ñaña ama allohuenacmaye' ya'crratyene atснаñeñechno. Ñaña ama allohuenacmaye' yeñosyeno po'poñ ñoñtso. Ñaña ama allohuenacmaye' ya'mteno ñoñets ñeñt eñets po'poñ ñoñtso.

³¹ Tarraña ama't ama allohuenacma atteyepa' e'ñe pocte' o'ch yeye'chena ñeñtcha' yetorra'yena e'ñe cohuen puesheña'ttsoy Yomporecop. Tarraña ellopa' o'ch neñotatas po'poñ ñeñt nanac sherbets Yomporecop.

13

Eñall paterr ñeñt nanac sherbets, ñeñtpa' añ: atto amorrentanna'tpahuepa'ch allohueny

¹ Ama't yeñosysets e'ñe cohuen pa'namen acheñ po'ñoñetoña' ñerra'm ama yemorreñcho yamo'tspa' e'ñe yeñosyeño'tpa' añña Yomporpa' attach enteney atet ñerra'mrrate' con ñeñt atta ama'toçhtetsa. Tarro'mar ama yemorrenteño'teye' yeñosyeno pa'namen ñoñets. Ñato' ama't yapa' yeñosatsyets e'ñe cohuen atet ñerra'm Yompor po'mllaño'teñnanesharña' ñerra'mña ama yamo'ts yemorrentenopa' e'ñe yeñosyeño't Yomporpa' attach enteney atet ñerra'mrrate' patashtalla challachallatspenet. Tarro'mar ama yemorrenteño'teye' yeñeno.

² Ñaña ama't yapa' yeñotatset a'mte' Yompor po'ñoñ, tarraña ñerra'm ama yemorreñcho yamo'ts, atetpa' amach esoye' entenye. Ñaña ama't yeñotatset o'ch ya'po'ta ñeñt ñap'ta eñoten Yompor tarraña ñerra'm ama yemorreñcho yamo'tspa' ñeñtpa'çho'ña amach esoye' entenye Yompor. Ñaña ama't yeñotatset ora allpon ñeñt eñall, tarraña ñerra'm ama yemorreñcho yamo'ts, ñeñtpa'çho'ña amach esoye' entenye Yompor.

Ñaña ñato' nanac yeyemteñoŧ Yomporpa' aphueney allohuen ñeñŧ yenamueñ, ama't ñeñŧ echarr yentyen. Ñato' o'ch netma'ntacha atet: Ñato' o'ch yoch Yompor, añ aspenetpa' chenquëpa'. Ñato' e'ñe yeyemteñoŧ Yomporpa' o'ch'cho' chenca. Tarraña ama't yeyemteñoŧ Yomporpa' o' yeŧohua atet, tarraña ñerra'm ama yemorrencho yamo'tspa' attecma enteney Yompor, ama esoyayye.

³ Ñaña ama't es yapa'yestatsech huocchañnesha' ora allohuen ñeñŧ yechyenña', ñerra'm ama yemorrenteñoŧeye' es yapa'yenanetopa' ama't atet yeŧatstapa' Yomporpa' amach cohuenaye' entenye. Ñaña ama't e'ñe yame'ñeñoŧ pocte' yentatsech pue'moñe'teñoŧetay o'ch chamayet ora betnatoteypa' tarraña ñerra'm ama yemorrenteño yamo'ts, ama't atet yeŧatstapa' Yomporpa' atterach amach cohuenaye' entenye.

⁴ Tarraña ñerra'm esempo po'ñočh čho yemorrenteña yamo'tspa' e'ñech acoŧa es yeŧa'yenanet, attach ya'huantenanet ñaña čochña ya'muerañtena. Ñaña amach čha es yeye'chapretyenaneto, ñaña amach čha yommo'chana'tatstaneto.

⁵ Ñaña amach yañeña entatstatso e'ñe cohueney. Ñaña ñerra'm esempo po'ñočh čho yemorrenteña yamo'tspa' e'ñechña pocte' es yeŧa'yenanet, ñaña amach aña ye'natsto ñeñŧ e'ñe atet yemnen ya. Añcha'ña ye'nen ñeñŧ atet muenen po'psheñeñ. Ñaña ñerra'm esempo po'ñočh čho yemorrenteña yamo'tspa' amach čha ye'moñe'tyenaneto, ñaña amach čha atsrre'močen yentuenaneto.

⁶ Ñaña ñerra'm esempo es ŧohua po'psheñeñ ñeñŧ ama pocteye' enteno Yomporpa' ñerra'm po'ñočh amuerañaypa' yapa' amach čha yocshatsto. Añcha'ña yocshapretena ñerra'm esempo e'ñe cohuenare' es penet.

⁷ Ñerra'm po'ñočh čho yemorrenteña yamo'tspa' ama't čho erroŧ ŧonaypa' yapa' čhocmach ya'huantoñ. Ñaña ñerra'm po'ñočh čho yemorrenteña yamo'tspa' čhocmach yeyemcha ñeñŧ atet pena amapa' ñeñŧ atet oten. Ñaña ñerra'm po'ñočh čho yemorrenteña yamo'tspa' e'ñe yeyemteñoŧanet čhocmach yeyenpuenanet attoch huomenc pet pueyočher ñamet Yomporecop. Ñaña ñerra'm po'ñočh čho yemorrenteña yamo'tspa' čhocmach ya'huanta'hanom pa'namen topateñtsočhno.

⁸ Atto yemorrentannenapa' ñeñŧpa' amach ahuañañatto ama't errponaña. Ñaña te'pa' ama't ya'poteññañeñ Yompor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñtsopa'

ñeñtpa'cho'ña esempohuañenpa' huañcha'. Ñaña ama't atto yeñotañtena te'pa' ñeñtpa'cho'ña esempohuañenpa' huañerrcha'.

⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ Yompor po'ñoñ ñeñtpa'cho'ña ama e'ñe yeñotueñe poctacma.

¹⁰ Tarraña ñerra'm esempoch huerra Cristo ñeñt e'ñe eñotañtetsa poctacmapa' allempoña yapa' o'ch e'ñe es yeñotuahua yaña.

¹¹ Ñehua, ñato' o'ch netma'ntacha atet: Napa' allempo cheshenna'pa' atta neñosatse'tyese't atet eñen cheshatollesha'. Ñaña allempopa' atta noctape'chatse'tyese't atet cotape'chyen cheshaneshas'. Ñaña añach cohuen nentapretyese't atet cohuen entyen cheshatollesha'. Tarraña te'pa' o' nepo'npa' o'huañ noctape'chatse'tyes atet pena cheshatollesha'.

¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' cha yottena atet ñerra'mrrate' rerpatoña yecueñ Yompor, amach tama yechme'teñe. Tarraña esempohuañenpa' yentercha' e'ñe alame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañtuerra atet pena te' Yomporpa' e'ñe eñotueney ñeñt atet yepena.

¹³ Ñeñto'mar te'pa' yeñoteñ eñall ma'pa ñeñtcha' ama ahuañañañtatso ñeñtpa' añ: atto yeyemteña Yompor, ñaña atto yeyemteñoñ yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yochrena attoch yemorrentanna'ta e'ñe poctacma. Ñaña añ pocte' o'ch yeye'chaprecha Yompor attoch o'ch apa'yese'y e'ñe Puecamquëñoñ attoch yetorra'yesa ñocop. Añña e'ñe pocte' o'ch yeye'chaprecha nanac attoch apuey o'ch ya'potoñ po'ñoñ e'ñe eñotochen.

² Tarro'mar ñeñt eñets po'poñ ñoñtsopa' añecpa sherben attoch eñora epuet Yompor, tarro'mar añña acheñenesha' ñeñt e'mñnotenahuetañpa' amach esesha' eñotenaye ñeñt atet oten. Ama't añ ye'ñoratate Parets Puecamquëñ ñeñt ama

eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompora ñapueñ e'muene'.

³ Tarraña ñerra'm esempo ya'potoñ Yompor po'ñoñ e'ñe eñotochenpa' ñeñtpa' po'ñoñ choch es yeñotatenanet attoch huomenc penet pueyoçher Yomporecop. Ñaña choch yeñotatanet ñeñt atet oteney Yompor po'ñoñ ñeñtcha' atet yeña e'ñe cohuen. Ñaña choch yeñotatanet Yompor po'ñoñ attoch ñetpa' coshenet Yomporecop.

⁴ Tarraña ñeñt eñets po'poñ ñoñtsopa' ñeñtpa' amach atteye' peno. Añecpach eñen e'ñe ñocpa attoch huomenc pan pueyoçher e'ñe ñañaña. Tarraña ñerra'm esempoña ya'poteññañ Yompor po'ñoñ e'ñe eñotochenpa' ñeñtpa' choch po'ñoñ es yeñotateñ allohuen ñeñt ame'ñetsa attoch huomenc penet pueyoçher Yomporecop.

⁵ Ñehua, po'ñoñhpa' pocte' nenteñ o'ch seños po'poñ ñoñtso allohuenes, tarraña ñeñt nanac nemnen o'ch señospa' ñeñtpa' añ: o'ch sa'potoñ Yompor po'ñoñ e'ñe eñotochen ñeñt allo yeñen. Tarro'mar ñerra'm esempo ya'potoñ Yompor po'ñoñ e'ñe eñotochenpa' nanaccha' yesherven Yomporecop. Tarraña ñerra'm esempoña yeñen po'poñ ñoñtsopa' amach tama yesherbena. Ñehua, pocte' enteñ Yompor ñerra'm po'ñoñ eñall puesheñarr ñeñt a'mtene' ñoñets e'ñe ya yeñoño, attoch allohueney ñeñtey ame'ñetsapa' o'ch çhaponaya Yompor po'ñoñ yeyoçhro attoch huomenc yeña yeyoçher.

⁶ O'ch notas masheñeshacha' ñaña noçhaneshacha' ama't napa' ñerra'm machayota neçhap seshopa' ñerra'm nañapa' aña neserrpare'tatoses po'poñ ñoñtso ñeñt ama yeñenopa' errotenotuate'ñaca'yeña señoçh tarro'mar amaca'ye se'muenoña ñeñt ñoñtsor ñeñt atet notenes attoch e'ñe cohuen neyenpas. Tarraña aña pocte' socop napa' çhocmach na'potonas e'ñe eñotochen ama't coñeña'ttsa ñeñt atet eñotatenen Yompor. Ñaña napa' elloña çhocña es neñotatyesas po'poñ ñeñt ama señoteno sa. Ñaña napa' çhocña na'potonas mamesha'tets Yompor po'ñoñ, ñaña çhocña es neyçhatas ñeñt cohuentetsa.

⁷ Ñato' o'ch netma'ntacha ñeñt atet pena pencoll, ama't pencollpa' ama acheñeyaye. Atet ñerra'm napa' esempo nepenclla'tenña' ñerra'm ama cohuenaye' na'poche'teno nepencollpa' amach esesha' eñotaye errotenente' neçchateñ. Amapa' atet ñerra'm napa' esempo netoca'yetarra,* ñerra' ama atteye' netoco atet toquëñetpa' amach esesha' eñotaye errotenente' neçchateñ.

* 14:7 Po'ñoñ aña' oten arpa.

⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellaratsapa' čhoch ñanom puesheñarr solltarpa' o'ch corrneta't quellareñtsorečo, attoch solltarnesha'pa' o'ch eñoch o' chap allempoch ahuanmuet quellaratset. Tarraña ñerra'm solltarpa' ama cohuen a'poche'tano po'cornetpa' añña solltarnesha'pa' amach eñocheto ñato' añecopfe' a'toreñet attoch ahuanmuet quellaratset.

⁹ Attecma pena ñaña yocop ñerra'm esempo yeserrpare'ten po'poñ ñoñtso ñeñt ama allo eñeno acheñenesha', ñetpa' amach errotenot čhapaneto pueyočhreto ñeñt atet yotenanet. Atetpa' čhach yottena atette'ña ama eñalle acheñenesha' ñeñt ye'mñotene'.

¹⁰ Po'ñočpa' eñalleñcha' shonte' po'poñe'ttsocma ñoñets ñeñt atet yeñosyen añ patsro. Ñaña po'poñe'ttsocmay acheñey ñeñtey eñotyene' ñeñt e'ñe yeñoñ allo yeñosyen.

¹¹ Tarraña ñerra'm po'psheñeñpa' o'ch serrpare'tatey e'ñe ña po'ñoño ñeñt ama allo yeñeno yapa', ñeñtpa' amach yeñoche errotenete' oteney ña po'ñoño. Yapa' attach ye'mueñ ñerra'mrrate' atfa otatsen. Ñaña attecma yama ñerra'm yapa' o'ch yeserrpare'tach ñeñt ama eñetso yeñoñopa' amach eñoche errotenete' yoteñ yeñoño. Ñapa'čo'ña attach e'mueney ñerra'mrrate' atfa yotatsen.

¹² Napa' tarro'mar atet notenes tarro'mar sapa' čhocma seye'chyena atfo Parets Puecamquëña' o'ch patyesas ñeñt atet semna'yen sa. Tarraña napa' añcha'ña o'ch notas, añña pocte' o'ch seye'chena attoch señot e'ñe cohuen alloch huomenc sepoñ pueyočher allohuen ñeñt ame'ñetsa.

¹³ Ñeño'mar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mtan ñoñets e'ñe eñotočen añ ñeñtara ñoñtso.

¹⁴ Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquëñ yema'yochatate'pa' tarraña allempo po'ñočpa' amach añeye'yocape'cheno attoch yeyenpue' yamo'ts.

¹⁵ Ñehua, ñeño'marña te'pa' o'ch notas ñeñtcha' atet ye'pa'yesa e'ñe cohuen. Po'ñočpa' e'ñe pocte' o'ch ma'yochatey Parets Puecamquëñ po'poñ ñoñtso, tarraña añ e'ñe pocte' ñaña o'ch yema'yochena e'ñe eñotočen. Ñaña attecma e'ñe pocte' Parets Puecamquëño'tpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen.

¹⁶ Tarro'mar ñerra'm po'poñ ñoñtsa ya'ye'chočhtateññañ Yompor atet eñoratey Puecamquëñ, tarraña ñerra'm

allo'tsa'yen po'poñechno acheñenesha' ñeñt e'ñe errte' e'mñotetspa' amach errotent pocte' entapretyeto atfo ya'ye'chochtateññañ Yompor, tarro'mar ama e'muennayeto yeñoñ.

17 Ñaña ama't e'ñe cohuen yeparasyoso'teñeñ Yomporpa' tarraña ñerra'm po'poñ ñoñtsa yema'yochena, ñeñtpa' ama añecpayaye alloch huomenc yeñoñ po'psheñeñ pueyoçher, tarro'mar ama eñoteñeto errofente' yoten.

18 Napa' atarr neparasyoso'teñ Yompor, tarro'mar ama't napa'cho' neñoteñ eñosets po'poñ ñoñtso. Ñato' ñeñtpa' ello metanennas allohuenes atfo señosyen po'poñ ñoñtso.

19 Tarraña allempo yapçhena allohueney ñeñtey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt eñotoçhen atfoch e'ñe yeñotue. Añña ama tama cohuenaye' nenteno ama'tcha' neserrpare'ten shonte' ñoñets, tarraña ñerra'm po'poñ ñoñtsa neñenpa' ñeñtpa' amach çoye' neyenpueñe namo'ts.

20 Ñeñto'marña masheñeshacha' ñaña noçhaneshacha' amach soctape'chatsto atet cotape'chen cheshanesh'a' ñeñt ama eñotenaye ñeñt atet cohuentetsa. Ñehua, po'ñoçh ñerra'm esempo yoctape'chyen sosya'tsañ allempoña pocte' o'ch yoctape'chen ñeñt atet cotape'chen cheshatoll, tarro'mar cheshatollpa' ama tama cotape'cheneta' sosya'tsañ. Tarraña allempo yoctape'chen ñeñt cohuentetsa Yomporecoppa' allempoña po'ñoçhpa' o'ch yoctape'chen atet cotape'chen po'nanesh'a' ñeñt atarr es eñotets.

21 Añpa' ñeñt Yompor po'ñoñ ñeñt atet anaret ahuatoteñ allempo Yomporpa' atet otane't israelena'tarnesha'. Ñeñtpa' atet otanete't: "O'ch noñmatas po'poñ acheñ ñeñtcha' seserrpare'tatene' e'ñe ñet po'ñoñeto tarraña ama'tcha' atet neponaspa' amach esesha' name'ñerraye tarro'mar amach eseshaye' eñotaye ñeñt atet aserrpare'tatarettenet." Ñeñtpa' Yompor atet otahuete't ahuat.

22 Ñeñto'marña te'pa' atet notenes ama't yeserrpare'tatset po'poñ ñoñtsopa' ñeñtpa' ama añecpayaye atfoch yame'ñacha ñeñt ama ame'ñetso tarro'mar añ ñoñets ñeñt ahuatoteñ anaret ñeñtña yeñotatene'ña ama'tcha' yeserrpare'tatatset po'poñ ñoñtso amach esesha' yame'ñerrayo. Ñeñtcha'ña yeñotate'ña erra'tsente' po'ñoçh ñeñt ama ame'ñetso. Tarraña ñerra'm esempo ya'poteññañ Yompor po'ñoñ e'ñe ya yeñoño ñeñt atarr eñotoçhen, añña ñeñt ame'ñetsa ñetñapa' e'ñech cohuen e'mñoteñet allochña huomenc yepenamet pueyoçhret Yomporecop. Ñeñtcha'ña yeñotate'ña ñetpa' po'ñoçh ame'ñenet tarro'mar ñeñt po'ñoçh ama ame'ñetso,

ñetpa' amach mueneñeto o'ch e'mñotet ama't ñeñt atarr eñotochen ñoñets.

²³ Ñaña o'ch notas, ñerra'm esempo sapçhena allohuenes ñeñtes ame'ñetsa, ñerra'm allohuenespa' atta señosyen po'poñe'ttsoema ñoñtsopa' ñerra'mña machaya huapa ñaña ñeñt ama ame'ñetso amapa' ñeñt errte' e'mñotetspa' ñetpa' ama'tte'ña çha otaseto çho'te' semospuena.

²⁴ Tarraña ñerra'm esempoña sa'poten allohuenes Yompor po'ñoñ e'ñe eñotochen ñerra'm allempoña huapa ñeñt ama ame'ñetso amapa' ñeñt errte' e'mñotetspa' ñeñtña atet seserpare'ten Yompor po'ñoñpa' ñato' allohuenetpa' o'ch çhapanet pueyoçhro, o'ch eñotet ñañeñeta ñeñt atet cotape'chyenet ñetpa' ñeñtpa' ama pocteyaye Yomporecop.

²⁵ Allempoñapa' ñato' o'ch yore'tanet po'chñaret ñeñt cotape'chatyenahuet pueyoçhro e'ñe a'nahua ñato' puellquẽnotetpa' o'ch concorpuet ñato' o'ch aguëret ñamet Yompor. Tarro'mar ñato' allempopa' o'ch ot: "Po'ñoçhepa't Yompor se'ñoratyene'."

Parets pa'paclopa' ama aserrpare'tpahuo e'ñe parroçma

²⁶ Ñehua, masheñneshacha' ñaña noçhaneshacha' ñeñtcha' atet sepa cohuen ñeñtpa' atet: Sapa' allempo sapçhenapa' ñato' puesheña'ttsospa' o'ch semorreçhena, ñato' po'psheñeñpa' o'ch yeçhatenet, ñato' po'psheñeñpa' o'ch a'potan ñeñt atet eñotateñ Yompor, ñato' po'psheñeñpa' o'ch eños po'poñ ñoñtso, ñato' po'psheñeñpa' o'chçho' a'mitan añ ñoñets. Tarraña ñeñtpa' añecopcha' atet sepa attoch huomenc sepoñ po'psheñeñ pueyoçher.

²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñtch. Ñaña añ pocte' ñeñtcha' eñosetspa' ñap'tepa'tetscha' eñoset. Tarraña añ pocte' ñaña eñallcha' ñeñtcha' eñotatenahuet ñoñets ñeñt atet eñenet.

²⁸ Tarraña ñerra'm ama eñalle ñeñtcha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'chetepa' Yompor e'ñe ñap'teto e'ñe pueyoçhreto.

²⁹ Ñaña añ pocte' e'ñech epsheña, amapa' ma'psheña ñeñtcha' a'pote' Yompor po'ñoñ. Po'poñeçhno acheñenesha'pa' añ pocte' çoch e'mñochet, ñaña çoch cotape'chet po'ñoçhte' atet oteney Yompor.

³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquẽñpa' añ pocte' allempopa' amach serrpare'tatsto ñeñt ñanom serrpare'tets.

31 Attochña o'ch sa'potuon allohuenes Yompor po'ñoñ e'ñe saptepa'tets, ñaña attoch allohuenespa' o'ch e'ñe señoçh, ñaña attoch allo'na coshatnenes Yompor po'ñoñ.

32 Tarro'mar ñeñfey a'potene' Yompor po'ñoñpa' çhocmach eñall attoch yeunata yañeña ñanom attoch çhocma yemnatanena.

33 Yomporpa' ama mueno o'ch atta yano'tatse'ten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apçha'yetsa ñeñt pueyochresha' pen Parets. Ñaña allempo sapçhena allohuenes ñeñtes ame'ñetsapa'

34 coyaneshaçhnopa' amach serrpare'tatsteto, tarro'mar ñeñtpa' ama pocteyaye. Añña pocte' çhoch ame'nyet ñeñt añcha'tarettetsa, ñeñtpa' atet oteneý ñoñets ñeñt atet anaret ahuatoteñ.

35 Ñehua, ñerra'm mueñenet o'ch es eñotetpa' a'p'to'chetepa' puerrollaret allempo çherret pa'paclo, tarro'mar ama pocteyaye coyanesha'pa' o'ch serrpare't allempo yapçhena ñeñfey ame'ñetsa.

36 Ñehua, ñerra'm ama pocteye' senteñe ñeñt atet o' notu-aspaspa' ñehua, o'ch notas atet: Yompor po'ñoñpa' ama e'ñe sa soçta'pño'teye' hueno, ñaña ama e'ñe saptecpa hueno.

37 Ñaña ñerra'm esesha' otats, "napa'çho'ña na'poteññañ Yompor po'ñoñ", ñehua, eñotanepa' ñeñt atet noten necartotpa' ñeñtpa' po'ñoçh atet oteneý Yepartseshar ñeñtcha' atet ye'pa. Ñaña ñerra'm esesha' otats, "napa'çho'ña chorrenna Parets Puecamquëñ", ñehua, ñapa'çho'ña eñotanepa' ñeñt atet noten necartot ñeñtpa' po'ñoçh atet oteneý Yompor ñeñtcha' atet ye'pa.

38 Tarraña ñerra'm esesha' ama name'ñayo ñeñt atet o' notu-aspaspa' ñehua, ñapa' amach se'mñotatsche.

39 Ñeñto'marña te' masheñeshacha' ñaña noçhaneshacha' o'ch noterrser: Añ pocte' o'ch sema'yochrena a'pote' Yompor po'ñoñ e'ñe eñotoçhen ñoñtso, tarraña pocte' o'ch semnatanet eñosetepa' po'poñ ñoñtso.

40 Tarraña ama't erra'tsencha' se'pa'yespa' e'ñech cohuen sesen ñeñt poçtetsa, ñaña çhocmach semnatanna'ta o'ch es se'pa'yes e'ñe saptepa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñeshacha' ñaña noçhaneshacha' notas po'poñ. Napa' nemneñ ellopa' o'ch alla neyerpaterrser e'ñe

errotente'ña ñeñt e'ñe atet pena cohuen ñoñets ñeñt neser-
rpare'tatuanmas, ama't ahuatoteñ. Ñeñtpa' ñeñtara cohuen
ñoñets ñeñt o' same'ñerra, ñaña ñeñtara ñoñets ñeñt allo o'
huomenc seperr seyocher.

² Ñaña ñeñtara ñoñets allo o' sa'queshpataretterra ñerra'm
amach sequechpuere, tarraña ñato' po'ñoçhpa' ama çhoye'
same'ñeno.

³ Ñaña ñeñt neserrpare'tatas ama't ahuatoteñpa' ñeñtara
cotapñats ñeñt atet eñotatennet naña, ñeñt nanac sherbets,
ñaña ñeñtara ñoñets ñeñt atet anuaret Yompor po'ñoño ama't
ahuatoteñ. Ñeñtpa' atet o' neserrpare'tatuas: Cristopa' rroma
yo'chñarecop,

⁴ allotpa' apamparetta, tarraña poma'pamtañopa' alla tan-
terra. Ñeñtpa' attecma oten ñaña ñeñt atet anuaret ahuatoteñ
Yompor po'ñoño.

⁵ Allempo tanterrapa' ñanempa' orrterrana Pedro, allotpa'
orrterrana allohuen pueyochresha'.

⁶ Allotpa' orrterrana ñaña shonte' acheñenesha' ñeñt
ame'ñetsa. Ñato' metanenante' quinientos acheñenesha'
ñeñt enterre' allempo e'ñe parrocmuet. Ñeñt enterre'
allempopa' ama't teme'ttsen shontet corra'yenet. Tarraña
puesheña'tetspa' o' colla'huenet.

⁷ Allostñapa' orrterrana ñaña Jacobo, allotpa' orrterrana
ñaña allohuen po'poñeçhno ñeñt allsensaretnesha'.

⁸ E'ñe chenta'ñapa' orrtona naña, ama't napa' ama esoy-
ayno. Atta nentena ñerra'mrrate' sapeñtsoma'tota ne'ñallettera
Yomporecop.

⁹ Po'poñeçhno allsensaretnesha'pa' ñetpa' nanac sherbenet,
tarraña napa' ama't allsensareteneñpa' ama tama nesher-
beno. Ñaña napa' pocte' nenteñ amach otatsetneto allsen-
sareten, tarro'mar napa' nanac na'mueroçhtache't ñeñt
ame'ñenaya Yompor.

¹⁰ Tarraña ama't atet nepe'tpa' Yomporpa' atarr mor-
rentna. E'ñe puemuereño'tpa' attoña a'pnaserren ñeñt
nanac sherbets ñocop. Tarraña ama orrena morrentno
Yompor, tarro'mar te'pa' nanac netorrana Yomporecop.
Po'potantañ allsensaretnesha'pa' ama't torra'yenet Yompore-
coppa' tarraña napa' ello nanac netorrana atet torrenet
ñet. Ñehua, ama't noteneñ napa' netorrana Yomporecop,
po'ñoçhpa' ama naye'torretso, añña Yompor puemuereño'tpa'
ñeñtña torretsa na nechtsot.

¹¹ Ñehua, amach yoto ñeñtey nanac sherbets, ñato' na
amapa' po'poñeçhno allsensaretnesha'. Añcha'ña yot ñerra'm

ya po'ñoçh yeserrpare'teñoť o' same'ña'huerrapa' ñeñña nanac sherbets.

Atto esempohuañenpa' yetantuerrach rromot

12 Ñehua, ñerra'm po'ñoçh o' same'ñerra ñeññ atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach errotenot yetanterro. Po'ñoçh ñeñtpa' atet oten puesheña'tets ñeññ sesho'tsen.

13 Ñehua, ñerra'm po'ñoçh ama eñalle attoch yetanterra yapa', Cristopa'cho'ña amate' tanterrañe ama't teme'ttsen.

14 Ñerra'm po'ñoçh Cristopa' teme'ttsen rromueneña' ñeññ atet yeserrpare'tatenes te'pa' amate' es sherbenñe. Ñaña ñerra'm po'ñoçh ama tanterrañe Cristopa' te'pa' e'ñeťe' orrena yeyemteñañ.

15 Ñaña ñerra'm po'ñoçh ama tanterrañe Cristopa' yapa' attate' yeshquënsoñ atto' pena po'ñoçh Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ñoçh ama eñallñe attoch yetanterra rromotpa' ñeñña atet o' yeserrpare'tatuas atto Yomporpa' o' tantaterran Puechemer Cristo, ñeñtpa' amate' po'ñoçhoyayñe.

16 Po'ñoçhpa' ñerra'm amach yetanterro yapa', Cristopa'cho'ña teme'ttsente' ama tanterrañe.

17 Ñaña ñerra'm po'ñoçh teme'ttsen amach tanterrañe Cristopa' e'ñeťe' orrena seyemteñañ, ñaña so'chñarpa' amate' apretnareteñe teme'ttsen.

18 Ñaña allohuen ñeññ o' colla'huena ñeññ ame'ña'nmaya Cristopa' ñetpa' o'ťe' e'ñe poctacma chenca'huerretañ.

19 Ñaña ñerra'm añecpa yeyemteñañ Cristo allempo huomchenya', ñaña ñerra'm po'ñoçh amach yetanterro, ñerra'm atteña' nanacte' llequëntso'tsenyeñ. Ñeññ llequëñetspa' ellote' metanenanenñ ñeññ atet yelcatyene' añe patsro.

20 Tarraña ñeñtpa' ama atteyaye, tarro'mar po'ñoçh Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueney ñeññey ame'ña'nmaya Cristopa' yapa'cho'ña attecmaçh yetanterra.

21 Atet pa' ñaña ahuat Adán e'ñe ña po'chñaroť o' anaretta attoch yerroma, ama't e'ñe puesheñarroťa. Te'pa'cho'ña e'ñe puesheñarroťpa' o' orrterra attoch yetanterra ama't esempoch yerroma.

22 Tarro'mar e'ñe po'chñaroť Adán ñeññey pamo'tsna'tareypa' yocoppa'cho'ña o' anaretta attoch yerroma yaña allohueney. Tarraña te'pa' e'ñe

yeparrocmateñoť Cristopa' elloch alla yocrra'huerra allohueney.

23 Tarraña ñeñťpa' atetcha' perra: Cristo ñanom o' tanterra allochñapa' ñerra'm esempoch huerra, yapa'cho'ña ñeñťey ame'ñenayapa' attec mach yocrra'huerra allohueney.

24-28 Allempoña Cristopa' o'ch puerratañpesuan po'huamenc allohuen ñeñť amcha'taretetyetsa, ama't ñaña ñeñť amcha'nochetetsa, ñaña ñeñť ahuamencaťetyetsa. Tarro'mar añ poctetsa Cristopa' ñach amcha'taretterrtsa e'ñe ñapueť esempohuañencha' yoramñpesuan po'huamenc allohuen ñeñť e'moñe'tene'. Ñaña esempohuañen e'ñe chenta'pa' o'ch a'huañamperrey rromueñets ñeñť o'patatarey te' allohueney. Tarro'mar Cristopa' o' aphue Pompopor po'huamenc attoch pomnaren penan allohuen esocmañen. Nehua, ama't oteneñ Yompor po'ñoñ Cristopa' pomnaren penano' allohuen esocmañenpa' tarraña yeñoteñ amach pomnaren pano Pompopor, tarro'mar Pomporpora' ña apuene' po'huamenc. Esemphuañencha'ña pomnaren pohuan allohuen esocmañen allempoña Cristopa' o'ch aphuerran Pompopor ñeñť nanac Parets atto amcha'tarettena. Allempoña Pomporpora' o'ch alla pomnaren perran Cristo ñeñťara Pompopor ñeñť o' ahuamencať o' pohue. Allempoña Pomporpora' ñach amcha'taretterrtsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

29 Te'pa' o'ch alla noterrser po'poñ. Ñerra'm po'ñoch ama eñalle attoch yetanterra esempohuañenpa' eso'mare'tña puesheña'tets acheñpa' apatarettenaña añecop ñeñť o' rroma. Po'ñoch ñerra'm amach errotenoť tanterro ñeñť o' rromapa' eso'mare'tña apatarettenetña ñeñťecop.

30 Ñaña ñerra'm po'ñoch amach errotenoť yetanterropa' eso'mare'tña pocte' nenteñ e'ñe name'ñeñoťpa' ama't chocma nemueročhtena ñocoppa' e'ñe pocte' nenteñ.

31 Napa' atet noten tarro'mar pate'tets yetpa' e'ñe na'llpuepñoťa ama muetsayenneto. Nehua, neñoteñ ñeñťpa' attec mach pa'net. Tarraña masheñeshacha' ñaña nočhaneshacha' errponcha' nemueročhtapa' allponcha' nocshapretensa saña, tarro'mar e'ñe yeparrocmateñoť epay Yepartseshar Jesucristo.

32 Ñaña arr Efesopa' e'ñe na'llpuepñoťa a'queshpatnet atet ñerra'mrate' cho norrotena epan ma'yarr. Tarraña ñerra'm amach errotenoť yetanterropa' ñeñťña atto na'llpuepñoťa a'queshpatyennetpa' amach es sherba'no, tarro'mar ñeñť patso'marecpapa' ama sherbeno. Po'ñochpa'

ñerra'm amach eñallñe attoch yetanterraña' e'ñe pocte' o'ch yoteneñ: "Te'pa' acsha'yespahuepa'ch, ñaña o'ch yotanna'ta arrallme'chapretyespahuepa'ch, ñaña o'ch yotanna'ta orrare'tyespahuepa'ch tayepa'tñapa' huomñchay. Tsapañoneña o'ch yerromapa' amach allo'na atet yepa'нено."

33 Tarraña amach sotaḡsa'tatso atet, tarro'mar yeñoteñ "ñerra'm esempo yeyemteña ñeññ atta coḡape'chatse'tyets ñeññ ama cohuenayaye Yomporecop yapa'cho'ña ḡchach shequēnyet tarro'mar tsapañoneḡpa' ñato' o'ch alla atet yeperra yaña atet ḡa'yenet ñet, ama't te' yapa' e'ñe cohuen yoḡape'chen Yomporecop."

34 Añña pocte' o'ch soḡape'cherr ello, ñaña o'ch sequeḡpuerr ñeññ atet seḡa'yese't ñeññ ama pocteyaye Yomporecop. Te'pa' sepenquēpa' tarro'mar ñato' po'ñoḡ ama señoteñe Yompor allohuenes.

Atetcha' yepo'poñet allempoch yetanterra rromot

35 Te'pa' o'ch notas po'poñ. Ñehua, ñato' puesheñarroḡespa' atet sotenen: "Amaḡe' erroḡenot yetanterroña rromot. Ñerra'm po'ñoḡ atanterraḡo' rromot, yechetsña allempopa' ḡerroḡena'tcha'ña orrterra?"

36 Sapa' are'tña es señoḡeno. Ñehua, ñato' o'ch netma'ntacha atet: Yeñoteñ ñerra'm es yenare't pue'llomerpa' amach ahuen chopo. Choch ñanom puetsa' pa'tall esheccha'ña chopo.

37 Ñaña ama añeye' yenare'teno narmets ora ñeññ e'ñe atet chopuets. Atet ñerra'm ḡhop* yenare'tpa' pue'llonḡrach yenare'teññañ.

38 Ñaña ñeññpa' Yomporcha' a'chpate', tarraña ñeññcha'ña chopatspa' o'ch po'poñet ñeññ atet orrtena ahuaña pue'llomer. Ñeññpa'cho' Yompor a'po'poñetatene' tarro'mar atet muenen ña. Ñaña ñerra'm po'poñe'ttsoḡma es yenare't pue'llomerpa' e'ñech po'poñe'ttsoḡma chopyes ñaña narmets ñeññ e'ñe atet anare't.

39 Añpa'cho' chetsotspa' e'ñe po'poñe'ttsoḡma chetsots, ama e'ñe attecmayaye. Atet ñerra'm ya acheñeypa' po'poñcho' yechets yechen. Ñaña es berroḡnopa' po'poñcho' po'chets pen. Ñaña oḡeḡnopa'cho' po'poñ po'chets pen ñaña. Ca-caḡnopa'cho'ña po'poñcho' po'chets pen ñaña.

40 Ñaña ñeññ allpon ento'marnesha' ama e'ñe attecmayayeto ñerra'm patso'marnesha'. Tarraña ñeññ ento'tsa'yenpa' ellonetcho' coḡhnesha'tyenet tarro'mar

* 15:37 Po'ñoḡ añpa' oten trigo.

atet anaretet. Ñeñt patso'tsa'yenpa'cho'ña ellonetcho' cohuenetyenet ñamet tarro'mar ñetpa'cho'ña atet anaretet.

41 Ñaña atet cohuentena atsne'pa' ñeñtpa' po'poñ poptena tarro'mar atet anaret ñaña. Arrorrpa'cho'ña po'poñonetcho' cohuentena tarro'mar atet anaret. Rantochnopa'cho'ña po'poñonetcho' cohuenetyenet. Ñaña pate'tets rantopa' po'poñe'ttsocma cohuenetyenet ñamet tarro'mar atet anaretet.

42 Attecmach yeperra yaña ñerra'm esempohuañencha' yetanterra. Ñeñt atet orrtena te' yechetspa' allempoch yetanterra' amach atteraye' yorrterro. Te'pa' arromñañayapa' chocmach yerroma allotpa' o'chcho' pampa'yet allcha' puetsohuerr yechets. Tarraña esempoch yetanterra' amach alla ya'rromñañterre'te.

43 Ñaña te' yechetspa' atarr pencna'ntateney tarro'mar chocmach yatsna'ten. Ñerra'm yatsna'tpa' o'chcho' yerroma, allotñapa' o'chcho' pampa'yet. Tarraña ñerra'm esempoch yetanterra' allempo yechetspa' amach alla pencna'ntaterrye'te. Allempopa' e'ñech cohuen yorreyena. Ñaña te'pa' ama ahuamencateye ñeñto'marña chocma yerromuen, allotñapa' o'chcho' pampa'yet. Tarraña ñerra'm esempoch yetanterra' allempopa' nanaccha' ahuamencatey.

44 Atet yeyeçquëna te' arr patso'marpa' ñeñtpa' chocmach yerroma, allotñapa' o'chcho' pampa'yet. Tarraña ñerra'm esempoch yetanterra' allempopa' camuecñetsofach yorrterra. Po'ñoç yeñoteñ atet yorrtena te' yechtso'tpa' yeñoteñ ñaña yecamquëño'tpa'cho'ña yorrterrach esempohuañen.

45 Ñeñto'marña ama't Yompör po'ñoño atet anuaret ahuatoteñ, ñeñtpa' atet oten: "Allempo Adánpa' yeçcach Yompör allempoñapa' ahuo't aþ po'rerrrña attoch corra e'ñe po'chtso't. Ñeñto'mar Adánpa' ñeñt ñanom acheñetats." Tarraña chenta'ñapa' acheñetos ñaña Cristo attoch ñach yapuerre' ello o'ch alla yocrra'huerra yecamquëño't.

46 Tarro'mar Yompörpa' atet na'y. Ñanompä' o'ch yocrra e'ñe yechtso't, esempohuañenñapa' o'ch alla yocrra'huerra ñaña yecamquëño't.

47 Tarro'mar ñeñt ñanom acheñ ñeñtara Adánpa' patsa ayeçcataret, ñeñto'marña ñapa' atta patso'marneshat. Tarraña puepañ ñeñt acheñetosets ñeñtara Yepartseshar Jesucristo ñeñtpa' ento't huapa.

48 Ñaña ñeñtey arromñañeneshaypa' yapa'cho'ña attaya ñerra'mrate' Adán ñeñt ayeçcataret pats. Tarraña ñeñtey ameñenaya Cristo ñeñt huaptsa ento'tpa' yapa'cho'ña

yocrra'huerrach yecamquëñoť ento atet ñerra'mrrate' Cristo ñeñť huaptsa entot.

49 Atteña te'pa' atta yeyečquëna yechtsot atet ñerra'mrrate' Adán ñeñť ñanom ayečcataret pats tarraña esempohuañenpa' yeyečquërrach ello atet ñerra'mrrate' Cristo ñeñť huaptsa entot.

50 Ñeñto'marña masheñneshacha' ñaña nočhaneshacha' notenes: E'ñe yechtsotpa' amach es yo'pato all amicha'tarettena Yompor. Tarro'mar allempo arromñaťayapa' amate' errotenot es yo'patoña ñeñť ama ahuañaño.

51 Ñehua, o'ch neñotatas ñeñťcha' atet perra esempo, ñeñť ñapťa eñoteñ te' Yompor. Po'ñočhpa' amach e'ñe allohueney yerromhuo. Tarro'mar ñeñťey orameñ corretsa allempoch huerra Cristopa' amach yerromo. Allempopa' attach yepo'poñet

52 e'ñech machayoťa e'ñe allempocma esempoch e'morrterra Yompor po'pocor e'ñe allohuanen. Ñehua, ñeñťpa' atetcha' perra allempo. Ñanompa' o'ch e'morrterra Yompor po'pocor. Allempoñapa' o'ch tanrra'tuena ñeñť colla'huatsa ahuaťoteñ. Allempochña tanterretpa' amach alla arromñaťterrete'te. Yaña ñeñťey orameñ corretsapa' yapa'čho'ña o'ch yepo'poñet e'ñe allempocma.

53 Tarro'mar yechets ñeñť aptsañapa' añ palltetsa o'ch puenasa ñeñť ama aptsaño. Tarro'mar ñeñťey arromñaťeyypa' añ palltetsa o'ch yepnasa ñeñť ama arromñaťeyaye.

54 Ñerra'm esempo yechets ñeñť aptsañapa' ñerra'm o'ch puenasa ñeñť ama aptsaño, ñaña ñerra'm esempoch ñeñťey arromñaťeyypa' o'ch yepnasa ñeñť ama arromñaťeyayepa' e'ñe allempopa' o'ch e'ñe etsotua ñoñets ñeñť atet anaret ahuaťoteñ, ñeñťpa' atet oten: "Allempo o'ch huañerrña ñeñť atto o'patenya rromueñets.

55 Ñeñto'marña allempopa' amach yerromuerre'te, tarro'mar amach eñalleterre'teña ñeñťcha' alla ya'tserrperrayerr ama't yerromñoťa."

56 Tarro'mar te'pa' yo'chñaroť o'patenyaña rromueñets, tarraña allempopa' amach eñalle yo'chñar. Ñaña yaťpare'teñoť ñoñets ñeñť atet anareťpa' ñeñťña yo'patataye'tña rromueñets allempo nanac yeyore't yo'chñar.

57 Ñeñto'marña te'pa' yeparasyoso'chepa'ch Yompor tarro'mar atto apuey Puechemer ñeñťara Yepartseshar Jesucristo ñeñťcha' chocma ya'pocstatene' allohuen pa'namen ñeñť yocop.

58 Ñeñto'mar e'ñe nemorrenteño'tpa' o'ch masheñneshacha' ñaña no'chaneshacha' noterrser: Te'pa' huomenquëpa'ch se'pa' seyo'cher, amach seque'chpatstere. Ñaña 'chocmuepa'ch setorrena Yomporecop. Ñaña sapa' seño'chepa'ch ñeñ't atto yetorrena Yomporecoppa' ama orrena yetorreno.

16

Añ quellepa' ñeñ't apete't huocchañneshachno

1 Te'pa' o'ch notas po'poñ. Añ allpon quelle ñeñ't 'chocma senen huocchañneshachnocop ñeñ't ame'ñetsa, ñeñ'tpa' attec'mach se'pa. Tarro'mar ñeñ't ame'ñetsa Galaciopa' o' neñotatuanet ñeñ'tcha' atet pet, ñeñto'marña sapa'cho'ña atet'cha' se'pa saña.

2 Ñeñ'tpa' atet'cha' se'pa: Pate'tets temencpa' añ pocte' 'chocmach sena'yes ellopa'tets errponcha' semna'yes o'ch sena'yes Yomporecop. Ñaña errponte'ña sechyen ñeñ'tcha' sena'yes Yomporecop, ñato' aton amapa' ñato' coñe't. Ñeñ'tpa' o'ch sañño'tue e'ñe ellocma attotach o'ch satontatyes. Alloch'ña'pa' ñerra'm esempoch ne'chap seshopa' amach pallteno e'ñe allempopa' o'ch taya sena'yes.

3 Ñaña ñerra'm esempoch ne'chap seshopa' o'ch nequellca' carta ñeñ'tcha' nemña Jerusaléño. Ñaña o'ch nemñe acheñ ñeñ'tcha' anmue' quelle, ama't erra'tsena acheñ ñeñ'tcha' pocte' senten sa.

4 Ñaña ñerra'm pocte' senteñ o'ch ahuen namapa' e'ñe pocte' o'ch yahuanena e'ñe parro.

Allempo sechena Pablo o'ch ahuo' po'poñ anetso'mar

5 Ñaña ñerra'm esempoch ahuen arro't attoch ne'chap se'shopa' napa' noctape'cheñ arrcha' noñem Macedonio'mar.

6-7 Añ atarr nemnen ñerra'm Yompore muenatspa' allate' na'llponmat sesho, ñato' allate' nechara'pena. Tarro'mar napa' ama nemno o'ch atta nepomuetnom sesho, añña napa' nemneñ ñerra'm Yompore muenatspa' allate' natomat. Ñaña ñato' e'ñe allotpa' o'te' sanemyesen errach'cho' neshecha allempo.

8-9 Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yompore po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña 'chocma eñall ñaña shonte' ñeñ'tcha' nepatare'tene'. Tarraña o'ch 'chap Pentecostepopa' o'ch ahuerren arro't.

Atet otanet Timoteocop

10 Ñaña o'ch notas, ñerra'm esempoch chap masheñ Timoteopa' o'ch sagap e'ñe cohuen, allochñapa' amach cha llecoso sesho. Tarro'mar ñapa'cho'ña nanac torrena Yomporecop atet ñerra'm na.

11 Ñaña ñerra'm esempoch chap seshopa' añ pocte' chocmach se'mñoch e'ñe cohuen. Ñaña e'ñech cohuen seyempue' allochñapa' ñerra'm esempo puerrerra allotpa' e'ñech pocsheñsha' cherr nesho. Tarro'mar napa' chocma necueñ masheñ Timoteo epan po'poñechno masheñnesha'chno.

12 Ñaña masheñ Apolospa' nanac nemñare'teñ o'ch emo'tensa' epuet po'poñechno masheñnesha'pa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'cartot

13 E'ñe allohuanenpa' o'ch noterrser: Te'pa' e'ñech señota, tarro'mar chocma eñall ñeñtcha' ya'psaterre' Yompor. Ñaña e'ñe same'ñeño'pa' huomenquëpa'ch sepa' seyo'cher. Ñaña amach semcha'tatsto, chochña seumencta Yomporecop.

14 Ñaña ora allpon ñeñt sepa'yenpa' e'ñepa'ch semorentanna'teño' es sepa'yen.

15 Te'pa' o'ch masheñneshacha' ñaña no'chaneshacha' notas po'poñ. Sapa' seño'teñ ñaña atto masheñ Estéfanaspá' ña ñanom ame'ñerrtsa ahua't all Acayo. Ñaña ahuo't ame'ñerret epuet pamo'tsesha'. E'ñe allempoteñ ñetpa' ahuo't torra'yenet añecop attoch yenpuet allohuen ñeñt pueyochresha' o' perr'te' Parets.

16 Ñeñto'mar te'pa' o'ch notas: E'ñe pocte' o'ch se'mñoch Estéfnas, ñaña ama't allohuen po'poñechno acheñ ñeñt chocma torrapretetsa Yomporecop.

17 Napa' te'pa' atarr nocshena tarro'mar o' huapa arr nesho masheñ Estéfnas ñaña Fortunato ñaña Acaico. Tarro'mar sapa' ama't ama sehuapopa' ñetpa' o' huapuet.

18 Ñetpa' atarr coshatosnet neyo'chrocmañen. Ñato' sapa'cho'ña o'te' coshataset. Cohuenepa'ch señch acheñ ñeñt atet petsa.

19 Ñaña allohuen ñeñt ame'ña'yetsa arr Asio'marpa' mueneñet o'ch huom'cha'taset ñamet añ necartot. Masheñ Aquilapa'cho'ña mueneñ o'ch huom'cha'tas epuet puetapor Priscila. Ñaña allohuen masheñnesha' ñaña no'chaneshachno ñeñt pame'ñeño'fet ap'chetset Aquilapahuo mueneñet o'ch huom'cha'taset ñamet. Tarro'mar e'ñe yeparrocmateño' epay Yepartsesharpa' o' huom'cha'taset añ necartot.

20 Ñaña allohuen masheñneshachno ñaña no'chaneshachno ñeñt arro'tsa'yenpa' mueneñet o'ch huom'cha'taset ñamet.

E'ñe semorrentanna'teñoŧpa' atetcha' sehuomŧcha'tanna'tena ñeñŧ atet poctetsa Partsocop.*

²¹ Añ coñe'tpa' o'ch nequellca' naña e'ñe na notot, attoch o'ch nehuomŧcha'tas naña.

²² Ñerra'm esesha' ama morrentenaye Yepartseshar Jesucristo ñeñŧña atet petsa a'coñchatareŧtepa'ch. Te'pa' ñeñŧach notas, huerrnayepa'te' ñeñŧ Yepartseshar yepen.

²³ Yepartsesharepa'chña Jesucristo sa'natenaya allohuenes.

²⁴ E'ñe name'ñeñoŧ Cristo Jesús atarr nemorrentensa. Te'pa' ñeñŧach notas, ñeñŧpa' attetepa'chña Nompore. Allohua.

Pablo

* **16:20** Po'ñoch oteneŧ, "E'ñe semorrentanna'teñoŧ ŧhoch setso'ttsa'pa'tannena ñerra'm esempo sehuomŧcha'tanna'tena ñeñŧ atet poctetsa Partsocop." Ñeñŧpa' atet yeçhete't ahuat.

AÑ PUEPAÑ SAN PABLO PO' CARTA ÑEÑÑ QUELLQUËRRANERR CORINTO MARNESHA' 2 CORINTIOS

Atto Pablopa' alla quellquërranerr carta añecop ñeññ ame'ñetsa anetso Corinto

¹ Masheñeshacha' ñaña noçhaneshacha' ñeññes allohuenes ame'ñenaya Yompor ñaña e'ñe same'ñeñot çhocma sapçhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeññ o' pueyochresha' perranet Parets ñeññ apçha'yetsa allemeñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeññen Jesucristo puellsensaren tarro'mar atet muenen Yompor.

² Te'pa' e'ñe nehuomçha'teñoñes sa napa' o'ch notas: Yomporepa'chña sebensare'tañpene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Yomporpa' ñachña çhocma yocshatene' allempo es yehuenoya

³ Aye'choçhtaterrapo'ch Yompor, ñeññara ñeññ Pompor pen Yepartseshar Jesucristo. Ñeññara Yompor ñeññ atarr amueraña, ñeññcha' çhocma yocshaterre' allempo es yellcatene' yeyoçhro.

⁴ Ñerra'm esempo huennaya pa'namen ñeññ amue-roçhtatañtetsa ñapa' ñachña çhocma yocshaterre'. Tarro'mar o' coshaterrey Yompor, allochña yapa'çho'ña attoch yeñoteñ o'ch yocshater yaña masheñnesha' ñerra'm esempo huapanet ñamet ñeññcha' mueroçhtatahuet. Añ poçtetsa o'ch yocshaterranet ñet atto Yomporpa' o' coshaterrey yaña.

⁵ Atto nanac yemueroçhtapreteña Cristo tarraña ñachña ello atarr yocshaterre'.

⁶ Ñeñño'marña te'pa' o'ch notas, ñerra'm esempo nemue-roçhtena na, ñeññpa' e'ñe po'ñoçh socop, tarro'mar ñerra'm esempo nemueroçhtena napa' ñeññpa' alloch socsherra saña attotçha'ña sequeshperra. Ñaña ñerra'm esempo coshaterren Yompor ñeññpa'çho'ña alloch nocshaterres saña. Allochñapa' e'ñe socsheñeshocmañen çhocmach sa'huanten allohuen mueroçhteñets ñeññ atet nepena na.

⁷ Ñeñño'mar napa' neñnotenes çhocmach sa'huanta' ñeññ echarr senten. Tarro'mar napa' neñnoteñ ñerra'm allpon

semueročhtapretna, elloña allempopa' o'ch alla e'ñe socshapreterrna atto Yomporpa' ñachña chocma yocshatterre'.

⁸ Ñehua, te'pa' nemneñ o'ch masheñeshacha' señoten ñeñt atet nemueročhtosa ahuaña all anetso Asia. Allempopa' napa' atarr nanac nellquëna. Napa' notapañ chach nerroma, amach erroť nepe o'ch na'queshpata nañeña.

⁹ Po'ñočh napa' neñoteñ neyočhro te'pa' o' chapona ñeñt nocop allempoch nerroma. Tarraña añeçpa huapona echarreñets atet, allochñapa' attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencoť ama't arromña'pa' chocmach tantater.

¹⁰ Tarraña ama't muene' nerromañ Yomporpa' allorocma tantaterren po'huamencoť attoch ama nerromo. Ñeñto'marña napa' neñoteñ Yomporpa' chocmach a'queshpaterrey. Ñeñto'marña te'pa' ñachña chocma neyemtena. Neñoteñ allo'na sen na'queshpateñe' ñerra'm esempo es nohuerroyerr ñeñt atarr echarr.

¹¹ Ñaña añ poctetsa o'ch sema'yochamipenna attoch seyempa'n. Ñaña shonte' acheñenesha' ñerra'm esempo eñotennet atto Yomporpa' chocma a'natenna e'ñe puema'yocheñoťet ñet, allempopa' chocmach parasyoso'teñet Yompor atto a'natenna.

Atto Pablopa' ama eñotenano pueshquëñ

¹² Ñehua, te'pa' o'ch notas po'poñ ñeñt atet noctape'chen. Napa' ñeñtña atarr nocshatene' nanac. Napa' neñotena neyočhro po'ñočh arr patsropa' chocma noctape'chen ñeñt atet pocte' enten Parets. E'ñe name'ñeñoť Yompor, napa' ama nemno o'ch esesha' neshca'y es ama't mamesha. Elloña sapa' ama nemno o'ch neshcas ama't e'ñe mamesha. Ama ñaña neyemteno ñeñt atet yoctape'chen ya acheñey arr patsro, añcha'ña neyemteñoť Yompor attoch ñach neyenpuene'. E'ñe puemuereñoť ñachña neñotatene' ñeñt cohuen enten ña.

¹³ Ñehua, sapa' chate' sotapañ napa' attate' neshquënes ñeñt notenes necartoť. Tarraña ñeñt allpon notenes necartoťpa', o'ch selleye' allochñapa' esheccha' señočh ñeñt'pa' e'ñe po'ñočh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señočh ñeñt atet notenes necartoť ñeñt'pa' e'ñe po'ñočh atet. Napa' ama choye' neshquënsa.

¹⁴ Ama't te'pa' ama e'ñe poctacmayer seyemtenno, tarraña ñerra'm seyemtenna e'ñe poctacma, allempoñapa' ñerra'm esempoçh huerra Yepartseshar Jesús'pa' atto socshenna na, napa'cho'ña allempopa' nocsherrsach saña.

Atto Pablopa' sechenañ o'ch emo'tenana' cor-into'marnesha'

15-16 Napa' notenapañ chocmate' seyemtenna, tarro'mar napa' ama choye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonio'tpa' o'ch alla nemo'tnerrser. Attoch puepocheño o'ch nocshaterres, ñaña attoch seyepna'n samã o'ch alla ahuerren Judeo.

17 Tarraña ama't atet noctape'cheneñ o'ch nemo'terrsañpa' tarraña ama neseno o'ch nabcherrsa'; ñeñto'marña sapa' chate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es puechena arr patsro. Ama'tcha' otenan acheñenesha' ñeñtcha' atet pa, tarraña pueyo'chroñapa' cotape'chenayach po'poñ.

18 Tarraña napa' ama atteye' noctape'cheno. Ñerra'm es notenes ñeñtcha' atet ne'papa' neyo'chroñapa' ama esoye' noctape'cheno po'poñ. Tarro'mar Yompor ñerra'm es oteney ñeñtcha' atet ponaypa' atetcha'cho' pennay tarro'mar ñapa' ama puenesho po'ñoñ.

19 Ñaña Yompor Puechemer ñeñtara Cristo Jesús ñerra'm es oteney ñeñtcha' atet ponaypa' atetcha'cho' pennay, chocmach orrtateñ e'ñe po'ño'ch, tarro'mar ñapa'cho'ña ama puenesho po'ñoñ. Ñeñtara Jesucristo ñeñt chocma yeserrpare'tatenes epan masheñ Silvano ñaña masheñ Timoteo.

20 Tarro'mar allohuen ñeñt allpon atet oteney Yompor ñeñtcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompore po'ñoñ yocop. Allochñapa' attoch e'ñe cohuen ya'ye'chochtateññañ Yompor.

21 Ñeñtara Yompor ñeñt ahuañencat pene' allohueney yeyo'cher e'ñe yame'ñeñot Puechemer Cristo. Ñeñtara Yompor ñeñt yellsensene' attoch yetorra'yesa ñocop.

22 Ñaña ñapa' ahuo't apuerrey attoch yeñoter o' puechemer perrey ña. Ñeñt'pa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquëñ ñeñtcha' yecherrtsa yeyo'chro ñeñt'pa' ñeñtcha'ña yeñotatene' orameñ shonte' ñeñt o'patatenya Yompor.

23 Te'pa' o'ch neñotaterrser ñeñt atet noctape'chen ñeñto'marña ama nemo'terrso ahuaña. Yomporpa' eñotenen ñeñtcha' atet notas ñeñt'pa' e'ñe po'ño'ch atet.

E'ñe nemorrenteñoŧes sapa' ama neçherro all seyçhena Corinto. Tarro'mar ama neto, ñerra'm netañ o'ch neçhap seshopa' çhate' muene' neche'ptare'tyesoses e'ñe sa satpare'teñoŧen. Ñerra'm atetpa' çhate' alla nellcaterres. Ñeñto'mar te'pa' o'ch notas e'ñe nemorrenteñoŧes sapa' attotña ama neçherro sesho. Ñerra'm po'ñoçhte' ama atteye' notensopa' Yomporepa'chña na'chencaterre'.

²⁴ Ama añecpaye' notenso attoch sapa' o'ch sa'micha'tareter seperren na, ñeñtes ame'ñenaya Yompor. Añcha'ña netorrapretasa attoch neyenpas. Ama't atto o' huomenc same'ñeñañ Yompor, napa' çhocmach netorrena socop allochñapa' attoch señañeshocmañen socter Yompor e'ñe poctacma.

2

¹ Ñehua, ama'tcha' nemneñeñ o'ch alla neçherrerr sesho tarraña napa' ahuo't alla noctape'cherr ello neyoçhro, noten amach neto tarro'mar ama nemno o'ch neçhap nellquëñesha' sesho te't sapa' o'te' alla nellcaterrerserr saña.

² Tarro'mar noten ñerra'm ne'ñotare'teñoŧes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'.

³ Ñeñto'marña ama neçherro sesho ahuaña, aña nequellconas carta ñeñtcha' soctape'chaterre' e'ñe cohuen. Allochñapa' ñerra'm machayota neçherr sesho ñerra'm o'ch alla soctape'cherr cohuen, ñeñtcha'ña atarr nocshapretuerrsa. Allochñapa' amach tama nellquënso tarro'mar añ poctetsa socop çhocmachña e'ñe socshatterren. Ñaña neñotenes ñerra'm esempo nocshena na sapa'çho'ña allohuenespa' o'ch e'ñe socsherra.

⁴ Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyoçhro ama't mamesha, e'ñe ñeñta nenen neyoçhro. Elloñapa' e'ñe neya'chpeñesha' nequellquënnas ñeñt carta. Napa' ama añecpaye' nequellquënnaso carta attoch nellcatas sa; añecpaña nequellquënnas attoch sapa' o'ch señoçh atarr nanac nemorentensa.

Arrpa' all cotape'chatanet attoch peretnet atparñat

⁵ Ñaña añ acheñer ñeñt atpare'tetsa seshopa' ama naptayaya llecatenno na, añañña ama't sapa'çho'ña allohuenespa' çhocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atfa atarr natontaten ñoñets ñeñt ama atteyaye po'ñoçh.

⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte'

entenayēñ o'ch secoñchatererr ñeñt atparñañ, tarraña te'pa' ñeñtach.

⁷ Te'pa' añña poctetsa o'ch alla sepretner, allochñapa' attoch socshater, te't atta nanac llequēna, puellquēño'tpa' o'te' alla quechpuerran Yompor.

⁸ Ñeñto'mar te'pa' notenes añ poctetsa o'ch sorrtratoñ cohuen ñocop attoch eñoter po'ño'chpa' atarr semorrenteña.

⁹ Ñeñtecpaña noctape'chatas ahuaña necartot ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ño'chte' e'ñe same'ñena ñeñt poctetsa Yomporecop, ama't erro'teno'tsensa.

¹⁰ Ñaña o'ch noterrerr, ñerra'm esesha' sepretner sa, napa'cho'ña e'ñech pocte' nenteñ ñaña a'pretnare'tterrepa'ch. Ñeñt chocma natpare'tene' ahuaña te'ña ñapa' o' nepretner, ñeñtpa' e'ñe socop. Ama't Cristopa' e'ñe entenen.

¹¹ Ñaña añ e'ñe poctetsa o'ch ye'pretnannena. Allochñapa' ama't oneñe'pa' amach alla a'psaterreye Yompor. Tarro'mar ñapa' yeñoteñ chocma e'nenan attoch shequēney.

Atto Pablopa' atarr llequēnana corinto'marnesha' allempo ama huerra' Tito Corintot

¹² Te'pa' o'ch neñotatererr ñeñt atet ne'pa' ahuaña. Ahuaña allempo ne'cherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ,

¹³ tarraña napa' ama't mamesha ama neñmateno neyo'chro tarro'mar allpa' ama nentose masheñ Tito. Ñeñto'mar ama na'po all, atta neso'tnerranet, o'ch ne'cherr all anetso Macedonia.

Yomporpa' chocma moñenya allempo es yehuenoya

¹⁴ Yeparasyoso'chepa'ch Yompor tarro'mar ñapa' chocma moñenya allempo es yehuenoya. Ñaña e'ñe yeyenteñot Puechemer Cristo Jesús'pa' chapaterreycha' cosheñtso. Ama't yapa' o' muenaterrey attoch ya'poterrñañ po'ñoñ erraparen, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrrate' ñeñt atarr es eñmosa'ttetsa, chach epa'hua e'ñe cohuen erracmañen pue'ñmosa'tteña.

¹⁵ Tarro'mar ñeñtey a'potene' Cristo, Pomporñapa' e'ñe atet enteney ñerra'mrrate' ñeñt eñmosa'ttetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeño'tetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'.

16 Acheñenesha' ñeñtcha' chenquërrtsapa' e'ñech atet enteññañet Yompor po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosañ ñeñtcha'ña ya'crraterre' erponohuañen. Eseshahuachñaca' pocte' enterrña Yompor ñeñtcha' serrpare'terre' po'ñoñ.

17 Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama çhoye' yetseteno Yompor po'ñoñ acheñ poctaño ñeñt atet pena shonte' po'potantañ acheñenesha'. Netpa' atet penet attoch pocshateñoñ acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atet llesenseney Yompor. Ñapa' enteney ñeñt atet ye'ñorena ñocop e'ñe yeyemteñoñ Puechemer Cristo.

3

Atto Pablopa' ama pallteno o'ch quellcoñet carta attoch cohuen enteñ acheñenesha'

1 Sapa' çhate' sotenapañ napa' o' alla neñerrerr e'ñe cohuen, ñato' nocpate', ñato' çhate' nommo'chena. Tarraña ñeñtpa' ama atteyaye. Amapa' ñato' sapa' çhate' sotenapañ añte' nepalltena carta ñeñtcha' señotate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaña çhate' sotenapañ añte' nepalltena carta ñeñtcha' sequellcon sa alloch señotach po'potantañ acheñ atto e'ñe cohuen sentenen na, atet pena po'psheñneçhno ñeñt serrpare'tets attoch cohuen enteñ acheñenesha' e'ñe ñañaña.

2 Tarraña napa' ama nepallteno ñeñt po'poñ carta ñeñtcha' eñotate' po'potantañ acheñenesha' ñeñt atto netorrena na Yomporecoppa' ñeñña atarr sherbets. Tarro'mar sapa' saña e'ñe sherbets atet ñerra'mrrate' necarta nepenes. Tarro'mar allempo acheñenesha' eñotenset sa atto te'pa' o' soctape'cherr cohuen Yomporecop, ñeñtcha'ña eñotatenahuet ñeñt atto netorrena na, ñeñtpa' ñeñña e'ñe sherbets Yomporecop. Ñato' o'ch netma'ntacha atet: Na necarta ñeñña eñotatenahuet ñeñtpa' all aquellcaret e'ñe neyoçhro ñeñtcha' lleyen allohuen acheñenesha' ñeñtcha'ña eñotatenahuet.

3 Ñaña sa atto te'pa' sorrtaten ñeñt e'ñe cohuentetsa, acheñenesha'ñapa' o'ch eñotapretaset ñeñtpa' po'ñoçh Cristo po'taruas pene'. Ñato' o'ch netma'ntacha atet: Sapa' atet sesherven ñerra'mrrate' yecarta ñeñtcha' eñotatenahuet,

ñeñt cartapa' o' quellca'huonay Cristo e'ñe ña. Añ cartapa' ahuo't aquellca'huareta ahuañmo'choteñ allempo yapa' yeçhapatonas Yompor po'ñoñ ñeñt same'ñatate' Yompor. Tarraña añ cartapa' ama aňoye' aquellcaretto tinto, añaña Yompor Puecamquëñoñ anareta, ñeñfara Yompor ñeñt ama arromñañeshayaye. Tarraña añ cartapa' ama arreye' aquellcarete mapyettallo. Añpa' arrña aquellcaret e'ñe ya yeyoçhro ama't ñeñtey arromñañey.

Atto Yomporpa' a'pocataerray e'ñe etserra

4-5 Napa' neñoteñ ama nepallteno po'poñ carta ñeñtcha' eñotatenahuet. Saña ñeñtes e'ñe necarta nepenes. Ama notenso e'ñe nañeña nohuamencoñ es neña'yen. Añaña e'ñe neyemteñoñ Cristo napa' netorrena Pomporecop. Ora allohuen es neña'yen Yomporña ahuañmencañ nepene'.

6 Ñeñfara Yompor ñeñt ahuañmencañ yepene' allochña'pa' attoch yeserrpare'terrñañ pocapña ñeñt atet a'pocataerray e'ñe etserra. Añpa' ama atteyaye atet pa' ahuañ Yompor allempo apan Moisés po'ñoñ ñeñt anarettatset' ñeñtcha' e'ñe yetotuañ esheccha' a'queshpateney Yompor. Ñeñt ama etsotaye'te, ñocpuetpa' o' anarettet romuetcha', chenquërretcha'. Tarraña ñeñt atto a'pocatuerray Yompor etserra, ñeñtpa' atto apueney Puecamquëñ alloch yocrra'huerra, tayoteñ erponohuañen.

7 Añ ñoñets ñeñt aquellcarettatsa mapyettallo, ñeñt ama etsotenaye, ñocpuetpa' o' anarettet romuetcha', chenquërretcha'. Ñaña ahuañ allempo Yomporpa' apan Moisés po'ñoñ atet, e'ñe po'cohuenteñoñ apan Moisés. Moiséspa' atet orrta pa'clloyot'cha' poptena, atarr a'rrechatañ. Ama't israelnesha'pa' ama eshcaye' cohuacle'cheto. Tarraña ama't atet pañpa' acopoteñ maya'huanerr ñeñt atto poptena.

8-9 Ama't añ coñapñatser ñeñtcha' ya'chencaterrayeñpa' tarraña Yomporpa' atarr cohuenoñ orrtach allempo. Te'ña e'ñe ellonetpa' o' alla orrtaterrayerr ña pocapña attoch e'ñe pocte' entuerrey. Ñeñtpa' e'ñe Parets Puecamquëñoñ orrtatuerray ñeñto'marña ñapa' ello cohuentena nanac.

10 Ñeñt atet popta ahuañ Moisés pa'clloyot allempo ap' Yompor po'ñoñ, te'ña ñeñtpa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñt atarr cohuen yenten, ello metanenan atto cohuentet' Moisés po'ñoñ.

11 Tarro'mar ñeñt atet cohuentet' Moisés ñeñtpa' acopoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñtpa' amach ahuañañatterro, ñeñto'marña ñeñtpa' ello metanenan Moisés po'cohuenña.

Atto Cristo po'cohuenña ñeñtpa' amach ahuañañaãterro

¹² Yapa' o' yeñoterrñañ Cristo po'cohuenña ñeñtpa' amach ahuañañaãterro. Ñeñto'marña yapa' ama yepenquẽñofoye' yeserrpare'teññañe po'ñoñ.

¹³ Yapa' ama atteye' yepeno atet pa ahuañ Moisés. Ñapa' cha huañerr atto popta pa'clloyotpa' ahuo't ca'macлле'cha allochña israelneshapa' amach eñcheto pa'clloyot o' huañerr atto poptena.

¹⁴ Israelneshapa' ama chapaneto pueyoçhreto attoch cotape'cherret cohuen Yomporecop. Ama't teme'ttsen ñerra'm esempo lleyeññañet ñeñt a'poclat Yompor ahuañ attaretach amach chapaneto pueyoçhro ñeñt atet muenen Yompor. Po'ñoçhpa' añoçha'ña chaponaya yeyoçhro ñeñt atet muenen Yompor e'ne yeyemteño Puechemer ñeñt Cristo. Israelneshapa' ama cohuenaye' enteñeto Cristo ñeñto'mar noten ñetpa' teme'ttsen atet penet ñerra'mrrate' cho ca'macлле'chenet.

¹⁵ Po'ñoçh ama't teme'ttsen ñerra'm esempo e'mñnotenet all lleyeññañet Moisés po'ñoñ amach es eñnoteneto. Chach ottenet ñerra'mrrate' cha es a'npuenahuet attoch amach eñotoñeto Yompor poclaña.

¹⁶ Tarraña ama't puesheñarrofoya ñeñtey erra'tseney acheñrey, allempoteñ yaguër Yepartseshar Cristo, allempoteñcha'ña chaponaya yeyoçhro ñeñt atet muenen Yompor; Cristopa' ñachña yehuapore'tañpse'ña ñeñt ya'npuenayeñ.

¹⁷ Ñeñt yoten Parets Puecamquẽñ, ñeñfara Yepartseshar Cristo Puecamquẽñ. Ñaña atarr cosheñto'tseney ñerra'm esempoch chaponaya Cristo Puecamquẽñ yeyoçhro. O'huañcha' yemueroçhtame'ta attoch puechemer perrey Yompor, e'ñech yocsheñsha' yocter Yompor.

¹⁸ Allohueny ñeñtey ame'ñenaya Yepartseshar Cristo, ña Puecamquẽñpa' ñachña ya'po'poñeterre', allochñapa' allo'nach yesen cohuentapretaya Cristo. Yapa' ama atteyaye ñerra'mrrate' ñeñt a'natacлле'charet attoch amach enteññañeto Cristo po'cohuenña. Yapa' e'ne yecueñoñ Cristo po'cohuenña, yapa'cho'ña o'ch yecohuentapreteña yañ, atet ñerra'mrrate' rerep poptetsa ñerra'm cho yecuach atsrretonet.

4

Atto Pablopa' atarr cohuen yeçhatenanet Yompor po'ñoñ

¹ Yomporpa' e'ne puemuerenoñ muenatenen o'ch netorreññaña ñeñt nanac sherbets ñocop. Ñeñto'marña napa' ama nellquẽñofoye' neserrpare'teññañe po'ñoñ.

2 Ñeñt a'nahua es ña'yenet ñeñt apencochen yenten yocop ya ñeñtey torretsa Yomporecoppa' ñeñña napa' o' na'ypo'ñañper. Ñaña napa' ama es neshquëñoñ neña'yeno masheñneshacop. Ñaña napa' allempo neserrpare'tateñ acheñenesha' ama çhoye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñoçh ñeñt atet oten po'ñoñ. Yomporpa' entenen ñeñt atet notenes ñeñtpa' e'ñe po'ñoçh atet. Ñaña ama't erra'tsena acheñer ñeñt eñotene' ñeñt e'ñe pocte' entenet ñet pueyoçhretopa' ñetpa'çho'ña e'ñech cohuen entapretennet.

3 Atto yeserrpare'teññañ Yompor po'ñoñ ñeñt po'ñoçh alloch yequeshperra tarraña patantarr acheñenesha'pa' amach çhapaneto pueyoçhreto ñeñt alloch yequeshperra. Ñeñt atet petsapa' allo'na senet allcha' chenca'huerret.

4 Ñeñfara acheñenesha' ñeñt ama ame'ñetso, ñetpa' añña po'yomporer penet arr patsro ñeñt oneñeñt, ñeñña ama muenatenaneto o'ch çhapanet pueyoçhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñfara yoten cohuen ñoñets alloch yequeshperra. Ñato' o'ch netma'ntacha atto oneñeñpa' a'natacle'chenanet attoçhña amach eshcaye' cohuen enteññañeto Cristo po'puetarenña.

5 Tarro'mar ñeñtey e'ñe yeñmañeshocmañen seserrpare'tatene'pa' ñeñtpa' ama añecpaye' atet yepeno attoch senteney ya ñerra'mrrate' samo'mte' sepeney. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yetorrena socop e'ñe yemorrenteñoñ Jesús.

6 Ñehua, yapa' yeñoteñ atet ot ahuat Yompor, ñeñtpa' atet ot: "Eñalletepa'ch puetare' allochñapa' o'huañcha' checmet." Ñeñfara Yompor te'ñapa' o' a'puetarsañperrnay yaña yeyoçher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemteñoñ Yomporpa' ñapa' çhocmach ahuamencat peney

7 Ñeñtpa' atto Yomporpa' ahuo't chorrerrya yeyoçhro po'cohuenña, ama't yapa' arromñañaya, ama esoshe'mayayye. Añecopña o' chorrerrya ya ama't ñeñtey ama esoshe'mayayye, allochñapa' attoch eñochet ñeñt atto atarr ahuamencat yentenapa' ñeñtpa' ama yoyaye yehuomenc, ñeñtpa' Yomporshot huena. Ñato' o'ch netma'ntacha atet ñerra'm ahuat po'poñ acheñ ñerra'm

esempo atarr es morrentenetpa' o'ch esha'teñet patsrrogo ama't ñeñt coyenmpa' ama e'ñe cohuenayaye.

⁸ Ñehua, ama't allemateñcha' huaponaya ñeñtcha' atarr ya'llpatate', tarraña čhocmach eñall attoch yesuanemñ. Ñaña ama'tcha' atarr yellquënañ nanacpa' tarraña čhocmach eñall attoch yesuanemñ allohuen ñeñt allcatañtetsa.

⁹ Ñehua, ama'tcha' cotare'teney ñeñt ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' čhocmach alla yetanterra.

¹⁰ Chocmach muene' yerromañ atet pete't Jesús. Tarraña atto Jesús pa' o' alla tanterra yapa'cho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra.

¹¹ Atto allponmat yocrrena añe patsro yapa' čhocmach pomatatenyet yerromuepa'to'. E'ñe yemorrenteñoñ Jesús atet penyet. Tarraña atto Jesús pa' o' alla tanterra, yapa'cho'ña attoña a'queshpaterrey allempo es yehuenoya ama't yapa' arromñañeneshaya. Attochña yeñotach acheñenesha' atto Jesús te'pa' o' betterra.

¹² E'ñe netorreñoñ Cristocop čhocmach nanac nemueročhetuanena autsanča' rromuets. Tarraña ñeñtpa' atarr cohuen socop tarro'mar ñeñtpa' alloch e'ñe sequeshpa'huerra saña.

¹³ Añmapa' ñeñt atet oten Yompor po'ñoñ ñeñt atet anuařet ahuařoteñ ñeñtpa' atet oten ñeñt quellquë' libro Salmos, "Napa' atarr neyemteña Yompor ñeñto'mar atet ne'ñorena ñocop." Yapa'cho'ña e'ñe attecma yoctape'chen yaña. E'ñe attecma yeyemteña Yompor, ñeñto'mar yapa'cho'ña attecma ye'ñorena yaña.

¹⁴ Yapa' yeñoteñ Yomporpa' ahuo't tantaterran Puechemer ñeñtara Yepartseshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet pan Puechemer Jesús, allochñapa' ama't sapa' o'ch čhapatuerres allohuenes e'ñe parro ñesho.

¹⁵ Ñeñto'marña napa' Yomporña nemnate' o'ch nemue-ročhtame'ta; ñeñtpa' e'ñe socop, allochñapa' attotcha' Yompor puemuerena čhapča' shonte' acheñeneshesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chočhtateññañ Yompor.

¹⁶ Ñeñto'marña napa' ama nellquëñořeye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëññapa' allo'na sen huomencatnomuets e'ñe pate'tets yeť.

¹⁷ Tarro'mar ñeñt atto allpon yemueročhtame'tyena añe

patsro, ñeñtpa' ama esoyaye, e'ñe mamecpa. Ñeñtpa' añe CPAña huennaya allochñapa' attoch huapatuerrnay ñeñt atarr nanac cosheñets ñeñt ama ahuañaño ama't errponaña, ñeñt ello nanac atarr coçhnesha'tetsa, ñeñt atarr nanac co-huen.

¹⁸ Tarro'mar yapa' ama aye' yeyemteno ñeñt allpon coçhnesha' yentyen arr patsro, tarro'mar añeçhno ñeñt allpon yentyenpa' huañerrcha'. Yapa' añña yeyemtena añeçhno ñeñt cohuentetsa Yomporecop ñeñtpa' ama ent-pahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr all pue'ntaño

¹ Yapa' yeñoteñ ñeñtey arromñañey, yechetspa' çhocmach huañerr. E'ñe mamecpa sherbeney añe patsro, atet ñerra'mrrate' yequërpachet ñeñt pocollashe'm all yemanatena. Ñeñt pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena añe patsro ñeñt yepacllashe'm yepen. Tarraña yapa' o' yeñoter ñerra'm esempoch yerroma, Yomporpa' o' añño'terrnay ñeñtcha' yepaquëll yeperr all pue'ntaño allcha' yeycha'huerra, ñeñtpa' amach ahuañañañterro. Ñeñtcha' yepaquëll yeperr allpa' ama arromñañeshaye' yeçhcatenaye, Yomporña yeçhcatene'.

² Po'ñoçh arr patsro yechets ñeñt yepaquëll yepenpa' çhocmach es e'mnatatuene'. Ñeñto'marña yapa' atarr yemneñ o'ch yechorrerra ñeñtcha' yepaquëll yeperr Yompor pue'ntaño.

³ Tarro'mar yemneñ yecamquëñpa' o'ch chorrerrana ñeñtcha' pa'shtam perr Yompor pue'ntaño, allochñapa' yecamquëñpa' amach atta huocchapoterro çhocmach eñall ñeñtcha' chorrena.

⁴ Tarraña atet ñerra'm te' orameñ yechets ñeñt yepaquëll yepen atto yocrrena arr patsro, çhocmach eñall ñeñtcha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñeterrnay Yompor tayoteñ ama't esempo huerra, ñeñtcha'ña pa'shtam perr yecamquëñ. Allochñapa' attoch yocrerra etserra correñets ñeñt amach ahuañañañterro, ñeñtcha'ña a'huañaterre'ña ñeñt atto ya'rromñañte't. Ñato' o'ch netma'ntacha atet ñerra'mrrate' o'ch yechorra shetamuets ñeñt e'ñe etserra emarr ñeñtcha' yena' enot o'ch yepmata. Allochñapa' ñeñtcha' yena' enot, ñeñtcha'ña a'natie'ña mellashañ ñeñt

yechorre't ahuaño'teñ. Allochñapa' attoch eñall ñeñtcha' yechorratenaya.

⁵ Ñeñt yemnatene' e'ñe atet ñeñt'pa' Yompor ña atet yepatene', tarro'mar ñapa' chorrenya Puecamquëñ ñeñtña yeñotatene' orameñ eñall cohuenñats ñeñt o'patatenya ñeñtcha' aphuerrey Yompor.

⁶ Ñeñto'marña e'ñe yeyemteño't Yompor chocmach yecueñ ñeñtcha' atet perrnay esempo. Yeñoteñ yechets yepaquëll yepenmeñ arr patsro alla'paro'tsenmeñey attoch yeycha'huerra Yepartsesharesho.

⁷ E'ñe yeyemteño't Yomporpa' allo'nach yesen eñotnomue' ñeñtcha' atet perrnay ña, ama añeye' es yeñotatenaye ñeñt yentyen arr patsro.

⁸ E'ñe yeyemteño't Yompor chocmach yecuen ñeñtcha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt yepaquëll yepen arr attoch ye'chap allcha' yocrra'huerra Yepartsesharesho.

⁹ Yapa' ñeñtach paterr yema'yo'chrena chocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerrroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntaño.

¹⁰ Tarro'mar o' anare'tta allohuenacpay yehuapuepa'to' Cristesho allcha' eñotatare'tey e'ñe puesheña'ttsoy. Allochñapa' allcha'ña atet pa'yese'y errotentcha' entapretuerrey, ñato' e'ñech cohuen entapretuerrey atto e'ñe cohuen es yepa'yen e'ñe yechtso't allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

¹¹ Ñeñt'pa' ama't atarr yoro'chen yenteñeñña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt atet nepena. Te'pa' aña palltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch seño'ter saña e'ñe seyo'chro atto e'ñe neñmañesha' cohuen es ne'pa'yen.

¹² Ñeñt atet notenes te'pa' ñeñt'pa' ama añecpayaye o'ch alla neñerrerr cohuen ñeñt e'ñe nocpa. Añecopña o' alla neñerrerr atet allochñapa' o'ch alla socshapreterna, allochñapa' attoch seño'ch ote' ñeñt e'ñe ñañeña cohuen entetsa e'ñe pocta'pño'mara. Ama añeye' eñoteno pueyo'chro ñeñt cohuentetsa Yomporecop.

13 Ñehua, sapa' čhate' sotenen napa' čho' muene' nemo-spuena. Ñerra'm po'ñočh čha nemospuenapa' ñeñtpa' e'ñe pocte' Yomporecop. Ñaña ñerra'm ama čhoye' nemospueno atto e'ñe cohuenare' es noctape'chen ñeñtpa'čho'ña e'ñe pocte' allo nesherbeneš sa.

14-15 Ñaña atto Cristopa' atarr morrentenya ñeñña ama yemnatenaye o'ch allo'na yesen corratsa e'ñe yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñtpa' ñeñfara yoten o' yerromaprecha Cristo, allohueney ñeñfey ame'ñenaya. Añcha'ña atet yocrrena e'ñe ñocop, ñeñ rromats yocop, elloñapa' alla tanterra yocop.

16 Ñeñto'marña napa' ama't puesheñarrapa' o'huañcha' cohuen nenteñ ñeñ e'ñe cohuen enten po'potantañ acheñenesha' arr patsro e'ñe ñet poctapño'maret, ñeñtpa' arromñaña poctapña. Tarraña ama't na ahuatpa' cohuen nentapretanete't poctapña. Ñeñto'marña napa'čho'ña tsena'tatnete't Cristo allempo, tarraña te'pa' o'huañ atet neñch Cristo.

17 Ñeñto'marña ñeñfey o' yeyemtera Cristo, Yomporpa' o' etserrataterrnay yocapña e'ñe poctacma. Ñeñ atet yoctape'che't ahuať, ñeñtpa' o' huañerr, te'ñapa' o' e'ñe yoctape'cherr ñeñ e'ñe cohuenare' etserra.

18 Ñeñña o' atet perrnay Yompor ñeñ muenatan Puechemer Cristo, ñachña yamo'tstaterre' Pomproesho. Ñeñfara Yompor ama't napa' ahuo't llesensa'n attoch neñotach acheñenesha' allochñapa' ñetpa'čho'ña o'ch amo'tsterranet ñamet Yompor.

19 Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomproesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'čho'ña attoch e'ñe amo'tsterranet Yompor.

20 Ñeñto'marña yapa' allsensaretey ñeñfcha' yetaruas yeperr ñeñfeycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' hua'ñerres o'ch same'ñera, tarraña ñeñtpa' e'ñe ya yeserrpare'tateñošes o' hua'ñerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma.

21 Añ ñeñfara Cristo ñapa' ama't parrochapa' ama pano ñeñ ama pocteye' enteno Pompor Parets, tarraña Pomporña'pa'

ahuo't muenateñ o'ch atet aḡaretta ñerra'mrrate' acheñ ñeñt̃ atarr ochñať. Tarraña ñeñt̃ atto aḡarettapa' ñeñt̃pa' e'ñe yocop. Allochñaapa' e'ñe yeyemteñoť Puechemer Cristo, Pomporña yapuerre' alloch e'ñe poctet' enterrey.

6

Ñeñt̃ torretsa Yomporecoppa' añ poctetsa ñocop ḡhocmach orrtatenan ñeñt̃ e'ñe poctet' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puemuerena.

² Ñehua, ñeñt̃pa' atet oteney Yompor po'ñon ñeñt̃ anuaret ahuatoteñ, ñeñt̃pa' Yompor atet otets:

Allempo seḡhore'tenen napa' e'ñe ne'mñotenes ñeñt̃ atet soten, tarro'mar allempopa' o' ḡhap ñeñt̃ poctetsa o'ch saguērren. Nañaapa' o'ch naguērres saña. Attoña napa' ahuo't neyenpas tarro'mar allempopa' o' ḡhap ñeñt̃ poctetsa attoch na'qeshḡaterres.

Ñeñto'marña na te'pa' o'ch notas, o' e'ñe ḡhap allempo ñeñt̃ poctetsa o'ch saguēr Yompor, tarro'mar te'pa' o' ḡhap allempoch a'qeshḡaterrey.

³ Ñehua, yapa' yeñoteñ ñeñt̃ey ame'ñetsa ñerra'm o'ch yeḡa'yen ñeñt̃ ama pocteyaye Yomporecop ñeñt̃ña ama ame'ñetsopa' ḡchach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra allochñaapa' attoch ame'ñeret ñamet Yompor. Naña ya atto yetorrena Yomporecoppa' ama yemno o'ch atet entapretyet ñeñt̃ ama cohuenayaye. Allochñaapa' amach achm̃are'teññañeto Yompor po'taruas e'ñe ya atet yeḡatse'tyeñoť.

⁴ Yapa' añña yemnen ama't erroteno'tsenya ḡhocmach yemneñ o'ch yeñotach acheñenesha' po'ñoḡh e'ñe cohuen yetorrena Yomporecop ñeñt̃ atet poctetsa yocop ñeñt̃ey torretsa Yomporecop. Ñeñt̃pa' añeḡhno ñeñt̃cha'ña eñotaterrahuet: allpon es yehuapoyapa' ḡhocmach ya'huanteñ e'ñe cohuen, ama't allpon atto yemuroḡhtame'tyena, ama't allpon ñeñt̃ yepallta'yena, ḡhocmach ya'huanteñ allohuen. Ama't ora allohuen ñeñt̃ allpon ñeñt̃ allcatañtetsa, tarraña ñeñt̃pa' ḡhocmach ya'huanteñ.

⁵ Naña atto ashta'yenyet, atto yottam̃penyet, atto ama'toḡhtana'tenyet pa'tsrre'mueñoťet, atto atarr nanac yetaruasen, atto yarepen torratsa Yomporecop, atto yemuroḡhtena yachporrñoť, ñeñt̃ña eñotatene'ña allohuen acheñenesha' atto yapa' e'ñe cohuen yetorrena Yomporecop.

6 Ñaña atto yeñmañesha' yocrena, ama sosya'tsañeye' yocape'chyeno, ñaña atto yeñoten ñeñt e'ñe po'ñoçh Yompor po'ñoñ ñeñt ama shequëntsoyaye, ñaña atto es ya'huanta'yen, amachña çha atsrre'matenye, ñaña attochña e'ñe ya'muerañtena, ñaña atto chorrenya Parets Puecamquëñ, ñaña atto e'ñe cohuen yemorrenteña allohuen masheñneshachno, ñeñtpa'cho'ña ñeñtña eñotatene'ña acheñnesha' atto yapa' e'ñe cohuen yetorrena Yomporecop.

7 Ñaña atto ye'ñorena ñeñtpa' e'ñe po'ñoçh atet. Yomporña po'huamenc ñeñt ahuamencat yepene'. Ñaña ñeñt e'ñe pocte' enten Yompor, ñeñtpa' ñeñtña allo çhocma es ye'pa'yen, alloña yeçllarena Yomporecop, ñeñtpa' alloña yemoñeññaña Yompor pocta'ña.

8 Erroteno e'ñech cohuen entapretenyet, tarraña errotenoñapa' amach cohuenaye' entapretenyeto; erroteno e'ñech cohuen eñosyenet yocop, errotenoñapa' çhach sasare'tenyet. Errotenopa' attach entenyet ñerra'mrrate' atta yeshquëñ, ama't amach çhoye' yeshquëno.

9 Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, tarraña çhocmach allo'na yesen huonçhetsa. Erroteno ama'tcha' a'coñchatare'ey, yañapa' corretsayach.

10 Ñaña erroteno ama'tcha' yellquëñaña' tarraña çhocmach alla yocsherra. Ñaña ama't e'ñe huocchañeypa' shonte'ch coçhnesha' co'apñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomproshot.

Atto Pablopa' e'ñe pueyoçhrocmañen morrentenana allohuen ñeñt ame'ñenaya Yompor

11 Te'pa' masheñneshacha' corinto'marnesha o' neñotatuas ora allpon ñeñt atet noctape'chen neyoçhro. E'ñe neyoçhrocmañen nemorrentensa.

12 Nocoppa' ama palltenmeñe ama't mamesha attoch nemorrentersa e'ñe poctacma. Añña sapa' çhocmate' sepa'lltena attoch semorrenterrna naña.

13 Napa' e'ñe nechemerasha' nepenes. Ñeñto'marña o'ch nenamas, o'ch notas, atto napa' e'ñe neyoçhrocmañen nemorrentensa sa, sapa'cho'ña añ poctetsa e'ñe seyoçhrocmañenpa' o'ch semorrenterrna naña.

Atto ama ayemuetpahuo ñeñt ama ame'ñetso

14 Te'pa' o'ch noterserr po'poñ, amach e'ñe seyemtatsche ñeñt ama ame'ñetso, tarro'mar amach pa'rraye' soctape'chueno. Acheñ ñeñt e'ñe pocte' es pa'yetspa' amate' errotenot yemtanoña acheñ ñeñt ama cohuenaye'

es p̄a'yetsō, tarro'mar ama attecmaye' es p̄a'yeneto. Ñato' o'ch netma'ntacha atet ñerra'mrrate' checmete'pa' amate' errotenoť alla epteto parro epuet puetare'.

15 Ñeñť atet pena Cristo ñaña oneñeť amate' errotenoť cohuen amo'tstanna'teto. Attecma ñaña ñeñť ame'ñetsapa' amach patrraye' cotape'chueneto epuet ñeñť ama ame'ñetso.

Atto yapa' pa'paquell peney Yompor

16 Ñaña ñeñť pa'paquell pen Yomporpa' ama atteyaye ñerra'mrrate' ñeñť ayečcataret ñeñť po'yomporer p̄a'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquell peney Yompor ñeñť ama arromñateshayaye. Añpa' ñeñť atet oten Yompor:

Napa' čhocmach neyčhena e'ñe ñesheto parro allcha' nechopeñe'chen. Napa' Po'yomporer pennet, ñetpa'čo'ña e'ñe neyochrenesha' nepenanet.

17 Ñeñťo'marña Yomporpa' oteney:

Añ poctetsa o'ch sesuanemñ ñeñť ama ame'ñetso, allochñapa' o'ch sellopa'tetstatua soctapña. Amach seyčhapretatsto sosya'tsañ ñeñť orrtatyenet. Allochñapa' attochña napa' o'ch naguërres e'ñe nocsheñesha'.

18 Allochña sapa' attochña e'ñe Sompor seperren na, napa'čo'ña o'ch nechemerasha' nepohuerres ama't ñaña allohuen nesñenesohuen. Ñeñťpa' atet ot Yompor ñeñť nanac partsotets.

7

1 Ñehua, e'ñe nemorrenteñotes, masheñeshacha' ñaña nočhaneshacha' o' notuas atet oteney Yompor ñeñťcha' atet perrnay. Ñeñťo'marña te'pa' añ poctetsa yocop yapa' o'ch yesuanem ora allohuen ñeñť čhocma a'sosyatene' yechets ñaña ñeñť čhocma a'sosyatene' ama't yecamquëñ. Añña e'ñe yenčha'na'teñoť Yomporpa' añcha'ña yema'yočhrena ñeñť pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

2 Napa' atarr nemneñ, masheñeshacha' o'ch alla semorrenterrna e'ñe seyočhrocmañen. Napa' ama't puesheñarroťesapa' ama čho erroť ne'paso, ñaña ama't puesheñarroťesa ama añeye' neyčhataso ñeñť ama cohuenayaye, ñaña ama't puesheñarroťesapa' ama čhoje' neshcare'taso ama't e'ñe mamesha.

³ Ñeñtpa' ama añecpaye' notenso o'ch neyohuare'tasa. Añecopña o' alla noterrser e'ñe nemorrenteñoñes ñeññ atet o' notuanmas. Po'ñoçhpa' atarr nemorrentensa e'ñe neyoçhrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerroma.

⁴ Napa' neñotenes sapa' çhocmach sepa'yen ñeññ cohuentetsa Yomporecop. Ñeñto'marña napa' atarr nocshapretensa. Ama't nellquëñañ nemueroçhteñoçpa' elloña o' alla nanac socshaterren.

⁵ Ama't allempo neçherr Macedoniopa' çhocma atarr nellca'huerrerr alla. Allpa'çho'ña çhocma es nehuapoya pa'namen ñeñña ama't mameshapa' ama eshcaye' neñmatataye neyoçhro attoch e'ñe cohuen nellapsos muechet.

⁶ Atteñapa' o' çherr masheñ Tito. Atto çherr masheñ Titopa' allempoña Yomporpa' alla coshaterren neyoçhro, ñeñtara Yompor ñeññ çhocmayocshatene' allempo es yellcatene'.

⁷ Ama e'ñe aña nocshataye atto çherr Tito, aña atarr nocshatene' ñeññ atto e'ñe cohuen entapretensa', ñapa'çho'ña atarr socshater. Ñehua, ñapa' eñotatuerrren atto sapa' atarr o' seyerpuenna, ñaña o' eñotatuerrren atto sellquëñoç sapa' o' alla same'ñerra e'ñe cohuen, ñaña o' eñotatuerrren atto o' alla sellcapreterrna ñeññ atto sellcatenen na. Ñeññ allpon serpare'tatuerrren, napa' ñeñña ello atarr nanac nocshaterre'.

⁸ Carta ñeññ nequellconas ahuaña, ñeñtpa' çha llecatas. Ñeñto'marña allempo napa'çho'ña çha muene' llecatna naña tarro'mar o' nemñonas atet carta. Ama't te'pa' neñoteñ añ necarta çha llecatenes tarraña ñeñtpa' e'ñe mamecpa, ñeññ e'ñe pocte' nenteñ.

⁹ Attoña te' napa' e'ñe cohuen nocshena. Ñeñtpa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëñoç o' alla same'ñerra e'ñe cohuen. Tarraña atto sellquëna sapa' ñeñtpa' atet senteñ ñerra'm Yompor sellcatene' ñeñtcha'ña same'ñaterraya e'ñe cohuen ñocop. Ñeñto'marña ñeññ atet neponas, ñeñtpa' e'ñe cohuen socop, ñeññ allopa' ama çhoye' errotten nepenso ñeññ ama pocteyaye ama't mamesha.

¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'çherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñtpa' ñeñña allo'na aneney rromueñtso, allcha' yechenquërra poctacma.

¹¹ Sa sellquëñapa' e'ñe atet senteñ ñerra'm Yompor e'ñe

sellcatene'. Ñeñto'marña allempoteñ yoroçhen senten sa so'chñar ñeñto'marña sapa' semneñ o'ch alla cohuen nentapreterres. Ñaña ñeñtpa' apencoçhen senteñ ñeñt atarr atparñať. Ñeñto'marña semchañoťpa' atarr semneñ o'ch alla senterren, attoch e'ñe cohuen na'pocatonas. Ñaña allempoteñña e'ñe pocte' senteñ o'ch secoñchach ñeñt atparñaťtetsa. Ñeñto'marña te'pa' atet o' seřohuerra ñeñt e'ñe pocte' nenten, allochñapa' amach allo'na sa'yohuaretteno.

¹² Ñaña o'ch notas, ahuaña allempo nequellquërrnaserr añ necartapa' ama atparñaťecpaye' nequellquërrnaserro ñaña ama nocpaye' nequellquërrnaserro ñeñten atarr atpare'tenet. Añeçpa'ñaña nequellquërrnaserr carta allochñapa' attoch çhaponasa seyoçhro po'ñoçh sapa' atarr semorrentenna. Ama't Yomporpa' eñotenes.

¹³ Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra.

¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ñya. Allempoña çhap seshopa' e'ñe atet same'ñya ñeñt atet noch. Ñeñto'marña napa' ama't mameshapa' amach errotenoť sepenatno, ama atta nommo'chenso. E'ñe po'ñoçh atet seřohuena ñeñt atet noch Tito. Ñaña ñeñt ora allpon atet notas, ñeñtpa' e'ñe po'ñoçh atet.

¹⁵ Ñaña e'ñe semcha'na'teñoťpa' ahuo't sagař Tito e'ñe cohuen. Ñaña ñeñt ora allpon coťape'chatas Tito sapa' ahuo't e'ñe cohuen ame'ñaterrsa. Ñeñto'marña te' Titopa' e'ñe pueyerpueñoťes, ñapa' atarr morrentensa nanac.

¹⁶ Ñeñto'marña napa' atarr nocshena țarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporcop

¹ Ñehua, te' masheñeshacha' ñaña noçhaneshacha' o'ch neñotaterrsserr atto Yomporpa' orrtaterranet puemuereña allohuenacop ñeñt pame'ñeñoťet çhocma apçha'yenet all anetso Macedonio'mar.

² Ñehua, macedonio'marnesha'pa' ama't shonte' pa'namen huenanet ñeñt atarr topatenahuet, țarraña ñetpa' çhocma atarr coshenet. Ñaña ama't atarr huocchañetyenet, țarraña

ñetpa' chocma apa'yeñet po'potantañ ñeññ atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom.

³ Napa' neñotenanet ñetpa' ahuo't pomyenet ñeññ allpon muena'yenet ñet puesheña'ttset. Ama't ñocpuetpa' palltenetañ tarraña ellonetñapa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puenenñotet atet penet.

⁴ Ñetpa' chocma a'p̄to'tennet pocte'te' o'ch notanet attoch yenpuet ñamet ñeññ masheñeshachño huocchañeshachño.

⁵ Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetñapa' ñanmacmuet o' e'ñe pomhuerret Yomporecop, allotpa' ñaña yocop ñeññ atet muenateney Yompor allohueney.

⁶ Atet nenteñ macedonio'marnesha' atarr es pomuenet Yomporecop, ñeñño'marña te'pa' o' alla notererr masheñ Tito o'ch alla ahuererr sesho, allochñapa' attoch allo'nach señotnen e'ñe cohuen pomuene' Yomporecop, ñeññ allpon yechatensa' ahuaña Tito.

⁷ Ñaña sapa' atarr setsoteññañ allohuen ñeññ cohuen enten Yompor. Ñanompa' atarr seyemteña Yompor, ñaña atarr cohuen seserrpare'teññañ po'ñoñ, pa'namen esocmañen es señotyen, ñaña e'ñe socsheñesha' es sepa'yen Yomporecop, ñaña e'ñe cohuen semorrentenya. Ñaña e'ñe setsotuen ñeññ atet cohuentetsa Yomporecop. Ñeñño'marña te'pa' aña sepa'lltena paterr attoch o'ch setsota eñote' apa'yese' po'potantañ ñeññ es pallta'yetsa.

⁸ Napa' ama neyechare'teñoñeye' notenso atet, añña nenen o'ch neñotatas ñeññ atet pena po'potantañ ñeññ e'ñe pocsheñeshocmañen es apa'yeñet ñeññ es pallta'yetsa. Allochña ñerra'm ñeññ señot, napa' neñotenes atetcha' sephuerra saña. Attoña neñotenes e'ñe po'ñoñ semueranna'tuena allohuenes.

⁹ Ñehua, sapa' o' señoter ñeññ atet pa Yepartseshar Jesucristo. Ñapa' atarr amuerañtosa, ñapa' esocmañen echeneñ Pomprosho, tarraña e'ñe pueorrenteñoñey ya, ñañaapa' atta huocchañetos. Allochña e'ñe puehuocchañeteñoñ yocop, yañapa' shonte'ch esocmañen yecherr Yomproshot.

¹⁰⁻¹² Ñehua, sa ahuaña charopa' atarr semneñ o'ch es sapa'yeh acheñenesha' ñeññ es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñño'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yeshahuet, e'ñe allpon semna'yen

puesheña'ttsos, e'ñech allpon sapa'yesanet. Tarro'mar ñerra'm e'ñe yemneññoť es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamye aton ñerra'm ama yecheñe. Allochñapa' o'ch senue e'ñe poctacma. Attotcha'ña setsotua allohuen ñeñť atet poctetsa Yomporecop.

13 Napa' ama notenso tarrecopcha' es sapa'yen allochñapa' o'ch atta atarr es sepalltena sa.

14 Añecopña notenes o'ch sattecmatua. Atet ñerra'm te'pa' shonte' sechen, socoppa' añ poctetsa o'ch sapa'yen ñeñť es pallta'yetsa te'. Allochñapa' ñerra'm esempo es sepalltena samapa' añ poctetsa o'ch apuerrset ñamet, allochñapa' attochña e'ñech sattecmaten.

15 Ñeñťpa' atet oteney Yompor po'ñoñ ñeñť atet anuaret ahuatoteñ, ñeñťpa' atet oten: "Ñeñť echene' shonte'pa' amach es a'pchateno. Ama't ñaña ñeñť echene' coñe'tpa' amach es pallteno."

Atto Titopa' alla ahuerrerr po'pocheño Corinto

16 Napa' chocma neparasyoso'teñ Yompor tarro'mar añ nenan masheñ Tito pueyočhro atto ñapa'cho'ña chocma llecapretensa atet ñerra'm na.

17 Ñeñťo'marña allempo noteñ o'ch ahuerr sesho, ñapa' e'ñe pocte' enteñ. Elloña ñapa' e'ñe puemneññoť atarr sechena o'ch alla ahuerrerr o'ch abcherrsa'.

18 Ñaña yapa' o'ch yemñererr masheñ Tito epuet ñaña po'psheñeñ masheñ. Nehua, añ masheñerpa' allohuen ñeñť apcha'yetsa pame'ñeñotetpa' atarr cohuen enteñet atto serpare'tatenanet añ cohuen ñoñets ñeñť alloch yequeshperra.

19 Elloña ñeñť masheñerpa' allohuen ñeñť apcha'yetsa pame'ñeñotetpa' o' net o'ch yechopeñe'ch parro attoch ñach yeyenpuene' ñeñť atto yetorrena o'ch yeyenpuen po'potantañ. Ñeñťpa' añecop sherben attoch aye'chochtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpanna e'ñe cohuen.

20 Ñeñťo'marña o' net ñaña po'psheñeñ masheñ allochñapa' atto yapchaten quellepa' amach cha sasare'tenyeto quellayo'mara.

21 Tarro'mar yapa' añña yema'yočhrena o'ch yorrtat ñeñť e'ñe cohuen enten Yompor, ama't ñaña ñeñť cohuen enten acheñenesha'.

22 Nehua, te'pa' o'ch yemñonas po'poñ masheñ ñeñťcha' tatsa, ma'psheña. Ñeñť po'psheñeñ masheñpa' napa' neñoteñ ñapa' e'ñe pocsheñeshocmañen atarr cohuen es

ma'yoçhra'yena ñeñt' cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatsa e'ñe cohuen Yomporecop.

23 Ñaña ñerra'm esesha' sa'p'to'tene' o'ch otaset, "¿ama't se'mare'teñe masheñ Tito, erro'tsente'?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'p'to'taset ñaña añ po'psheñeñ masheñecop, sañapa' o'ch señotatanet ñetpa' arroñ amñareñtenet all apçhena allohuen masheñneshachno ñeñt' ame'ñetsa all Macedonio. Ñetpa' e'ñe cohuen orrtatenet Cristo po'cohuenña.

24 Ñeñto'marña te'pa' o'ch notas e'ñech cohuen sagañ añ masheñnesha', allochña ñetpa' esheccha' eñotaset sapa' po'ñoçh atarr semuerenanet, attochña eñotas ñaña allohuen masheñnesha' ñeñt' pame'ñeñoñtet apçha'yetsa allot amñareñtenet. Allochñapa' o'ch eñotaset po'ñoçh e'ñe cohuen same'ñena ñeñt' atet notenanet socop.

9

Yomporpa' añ atarr morrentena ñeñt' e'ñe pocsheñeshocmañen es apa'yets ñocop

1 Ñaña ñeñt'cha' sapçhen alloch seyenpue' masheñnesha' ñeñt' atarr es pallta'yetsa Jerusaléño, napa' neñotenes ama sepallteno o'ch alla noctape'chaterrser necartot' ñeñt'cha' atet seña.

2 Tarro'mar napa' neñotenes ñeñt'pa' atet atarr semnen sa. Ñeñto'marña arr Macedonio çhocma noteñ macedonio'marnesha' sapa' çhocma semneñ o'ch es sapa'y es añecop ñeñt' atarr es pallta'yetsa. Ñeñto'marña napa' e'ñe nocsheñeshocmañen neñotateñ macedonio'marnesha' ñeñt' atet sepena sa ñeñtes acayo'marneshas ñeñtarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'p'octat attoch es sapa'y es ñeñt' atarr es pallta'yetsa. Atto sapa' atarr semneñ o'ch seyenpue' ñeñt' atarr es pallta'yetsa, ñeñto'marña all Macedoniotpa'çho'ña te'pa' eñall shonte' ñeñt' muenets o'ch es apa'yenet ñamet.

3 Tarraña ama't napa' neñotenes atarr semneñeñ o'ch seyenpue' ñeñt' atarr es pallta'yetsa, ñeñto'marña napa' o'ch nemñonas añ masheñnesha' ñeñt'cha' otatsa. Ñetpa' o'ch yeposset attoch sapçha' añecop ñeñt' es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt' e'ñe cohuen notenanet socop, ñeñt'pa' e'ñe po'ñoçh atet seño'huen.

4 Allochñapa' ñerra'm esempo nečhap naña sesho epan ñaña masheñneshačhno macedonio'marnesha' ñerra'm yentoses ama sapčhatueña', allempoña yapa' čhate' parrocmá yepencna'ntatanna'ta. Allempoña e'ñete' orrena neyemtensa.

5 Ñeñto'marña napa' añ pocte' nenten o'ch noch po'psheññ masheñnesha' ñetpa' otetepa' ñanmacmuet, ñeñtcha' sabcherraya' attoch ñetpa' o'ch yenposset attoch e'ñe sapčha'hua ñeñt semnen sa o'ch e'ñe saphue ñeñt es pallta'yetsa Jerusaléño, ñeñt atet sot ahuaťoteñ. Tarro'mar napa' e'ñe pocte' nenteñ sa e'ñe semneññoť e'ñech señmañesha' es sapa'yés ñeñt atarr es pallta'yetsa. Amachña čha es enamare'tyenseto attoch es sapuenanet.

6 Chocmach seyerpuena añ ñoñets, ñeñtpa' atet oten: Ñerra'm ya atarr coñe't es yapa'yen Yomporecop, yapa'čho'ña o'ch alla yaguërr ñeñt atarr coñe't. Ñerra'm atarr aton es yapa'yen Yomporecop, yapa'čho'ña o'ch alla yaguërr ñeñt atarr aton. Ñehua, ñato' o'ch netma'ntacha atet ñerra'mrate' čho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapačherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapačherr ñerra'm esempo po'nen.

7 Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt pocte' yentyen e'ñe ya yeyočhro. Amachña yempañoťa es yapa'yeno ñaña amachña puenamare'teñoťeta es yapuenaneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets.

8 Ñaña Yomporpa' shonte' esocmañen echen ñeñtcha' apuerres allochñapa' attoch čhocma sechencha' shonte' ñeñt atarr cohuen socop, ñaña sechencha' shonte' attoch seyepuen pa'namenot ñeñt cohuentetsa Yomporecop.

9 Añpa' ñeñt atet oten Yompor po'ñoñ ñeñt anuařet ahuaťoteñ, ñeñtpa' atet oten:

Ñeñt atarr es apuene' huocchañnesha' ama't ahuaťapa' amach apsaretterro ñeñt atto e'ñe cohuen es pen.

10 Yomporpa' apuenescha' shonte' esocmañen allochñapa' attoch čhocma sechencha' shonte' attoch seyepuenanet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot ñeñt cohuentetsa Yomporecop. Ñeñtpa' ñerra'm netma'ntacha ñato' o'ch not: Ñeñťara Yompor ñeñt yapuene' puerets ñeñtcha' yenare'ten o'ch čhap allempo po'nenpa' allempochña yeyoren ñeñtcha' yerrar

yepen, ñeñtpa' Yomporña a'torene' attoch ya'yapa'cheñ o'ch yeshonteñ.

¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeñ ñeñ es pa'namen pallta'yetsa. Ñerra'mña atet seřapa' yañapa' yach apuerrahuet attochña ñetpa' chore'teñet Yompor o'ch ochet "Parasyos Nompore, řa yapuene' ora allohuen."

¹² Ñerra'm atetcha' sepene es apa'yese' masheñnesha' ñeñ ame'ñetsa, ama e'ñe añecpa sherbeno attoch es sapuenanet ñeñ palltenet. Añecpa'naña sherben attoch ñetpa'cho'ña atarrcha' chore'chet Yompor o'ch ochet: "Parasyos Nompore, řa yapatene' ñeñ allpon yepalltena."

¹³ Ñaña attoña ñetpa' aye'chochtateññañetcha' Yompor, tarro'mar o'ch eñotenset sapa' po'ño'ch attera same'ñeññaña Cristo po'ñoñ. Tarro'mare'naña ñetpa' aye'chochtateññañetcha' Yompor, atto sapa' sapuenanet pa'namen ñeñ allpon palltenet ñet, ñaña po'potantañecop.

¹⁴ E'ñech pueyerpueño'tetas sapa' ñetpa' atarrcha' nanac chore'tatonaset Yompor, tarro'mar sapa' o'ch sorrtatanet Yompor puemuereña allo atarr muerenya.

¹⁵ Yeparasyoso'chepa'ch Yompor tarro'mar ña yapuene' Puechemer, ñeshoña huena ora muereñets ñeñ atarr co'chneshare'. Ama't yemneñeñ o'ch ya'ye'chochtatue e'ñe poctacma, tarraña ya arromña'teypa' amach erro't yepe, ñaña ama yeno yeñoñ attoch ya'ye'chochtatuoñ e'ñe poctacma ñeñ atet yocshena yeyo'chro.

10

Atto Pablopa' eñotatan corinto'marnesha' ñapa' e'ñe po'ño'ch allsensaret Yomporeshot

¹⁻² Ñehua, te'pa' na Pablon o'ch alla noctape'chaterriserr e'ñe nemuereño'tes atten ñerra'm Cristo ñeñ, nanac amuerañtostsa. Puemuereño'tey ya ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsospa' attach sentenen ama erro't notenso atsrre'mo'chen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquënnas cartapa' allempoña sapa' atet sentenen ñerra'mrrate' ama choye' neñcha'tenso ama't e'ñe mamesha, e'ñech eche'charr notenes necartot. Tarraña ñeñtpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñe'e' eche'charr ne'ñorennasa. Ñeñto'marña te'pa' e'ñe neyo'chrocmañen o'ch notas, soctape'cherr cohuen e'ñe tayecma allochñapa' ñerra'm esempoch ne'cherr seshopa'

amach čha se'ñoratno eche'čharr. Tarro'mar ñerra'm ama soctape'cherro cohuen, po'ñočh ñerra'm esempo ne'cherr seshopa' čhach se'ñoraten eche'čharr; ñeñtes notene' napa' e'ño' nañeña noctap'ñoč atet es ne'patse'tyen ñeñč atet pa'yena acheñenesha' arr patsro, ñeñčpa' e'ñe ñocueta sherben. Tarraña napa' ama atteye' nepeno.

3 Ñehua, ama't napa' nocrrena arr patsro atet yocrrena allohueney acheñey tarraña ñeñč atet nema'yočhrena Yomporecop, ñeñčpa' ama atteyaye ñeñč atet ma'yočhrena acheñenesha' arr patsro.

4 Tarro'mar ñeñč atet yema'yočhrena Yomporecoppa' ñeñčpa' ama añeyaye ñeñč atet yoctape'chen ya acheñey arr patsro. Añña atto yema'yočhrena ñocop, e'ñe ña po'huamencot atet yepena. Attochña yehuapore'toñ allohuen ñeñč epatare'tene' Yompore'počap'ña.

5 Ñaña allohuen serrpar'ñatsočhno ñeñčña epatare'tene' Yompore' po'ñoñ ñeñčha'ña yehuapore'tua. Ñaña allohuen cočap'ñatsočhno atto nanac ommo'chenet, ñeñčña ama muenatenahueto attoch enteret Yompore', ñeñčpa'čho'ña Yompore'ha'ña po'huamencot o'ch yehuapore'tue. Ñaña ñeñč allpon yoctape'chyen arr patsro ñeñčña atpare'tatene' Yompore' počap'ña, ñeñčha'ña ya'meta'huerr Cristesho, allochñapa' attochña Cristopa' o'ch ame'ñatera.

6 Ñaña ñerra'm o' alla name'ñatuerrsa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeñč atet atpare'tetsa.

7 Sapa' aña cohuen senten ñeñč allpon sentyen secloyot. Ñerra'm esesha' entetsa atet ñapa' Cristo mueñene', ñeñč acheñerpa' eñoche'pa' napa'čho'ña Cristoña nemñene'.

8 Ama't atarr natontaten neñoñ atto alla noterrser napa' Cristo puellsensaren, tarraña napa' ama čhoye' neyllateno neñoñ attoch nepenca. Tarro'mar atto llesensa'n Yepart-seshar Cristopa' ñeñčpa' añecop'ña attoch neyenpas attoch allo'na sesen huomenc pa'nmue' seyočher Yomporecop. Ñeñčpa' ama añecpayaye alloch na'puerrataterres ñeñč atto same'ñena.

9 Napa' ama nemno o'ch añcha'nočhen sentenen e'ñe necartota.

10 Tarro'mar patanta'ttsos atet sentennan necarta ñerra'mrate' atarr eche'charrot es notenes ñeñč atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' sentenno ama't mamesha, ñaña atto neserrpare'tatenespa' ama't e'ñe mameshapa' ama asherbenaye' senteñe.

11 Tarraña acheñenesha' ñeñt atet otetspa' eñochetepa'ch ñerra'm errot notas necartot ama't atarr allaparo'tsenen atetcha'cho' po'ñoch nepennas ñerra'm esempoch necherr sesho.

Atto Yomporpa' ama pocteye' entenano acheñenesha' o'ch cohuen enteret e'ñe ñañeñeta

12 Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocpueta. Napa' ama nemno o'ch not napa' e'ñe atfecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta pocta'ñetpa' coshapretannenet e'ñe ñagattseta. E'ñe ñañeñeta pocta'ñetpa' cohuen entapretanna'tyenet, ñeñtpa' atta otatse'tyenet.

13 Tarro'mar yapa' ama yoyaye yoc'ta'ña ñeñt atarr yocshapretannena. Aña Yompor pocta'ña ñeñtpa' allohua onañchare't yocop ñeñtcha' e'ñe cohuen yocshapretannena. Ñaña Yompor pocta'ña ñeñt atet onañchennaypa' ñeñtpa' añecpa'ñaña sherben attoch ye'chapatonas Yompor po'ñoñ e'ñe seshohuen ñeñtes corinto'marneshas.

14 Ñeñto'marña yapa' ama cho yatontateññañe Yompor pocta'ña tarro'mar ñeñt allpon onañchennay, ñeñtpa' e'ñech allohua yetorrena ñocop. Ñeñtpa' añecpa'ñaña sherben attoch ye'chapat Yompor po'ñoñ ama't seshohuen. Ñeñto'marña ya ahua'tpa' yanom chapate' Yompor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoña Cristo.

15 Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratta all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho.

16 Attochña ama't allpon anetso'chno ñeñt allemeñ allo'tsa'yen ellonet seshotpa' allña nesechena ñaña allcha'ña neserrpare'tatyesosonet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tataretteneta' allochña'pa' amach cha nommo'choñe po'psheñeñ po'taruas ñeñt ñanom serrpare'tats all.

17 Ñerra'm esesha' muenetseñ o'ch e'ñe cohuen eños puesheñarrocop tarraña ñeñtpa' Yomporecopcha'ña e'ñe cohuen eñe.

18 Tarro'mar añ acheñer ñeñt eñoretza e'ñe cohuen ñocpapa' ñeñtpa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñña e'ñe pocte' enten ña.

11

Atto ommoñatēnesha'pa' ahuo't shequēnan cor-into'marnesha' ñetpa' allsensareteto'

¹ Napa' atarr nemneñ o'ch se'mñoton atto čha muene' atta es notatse'tyen. Po'ñočh o'ch notas, se'mñoton ñeñt atet es notatse'tyen, allochñapa' attoch neñotatas ñeñt atet noctape'chen.

² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patatare'tes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñe't. Po'seññapa' o'ch o'patacha puesheñarr yacma ñeñt'cha' puerrollar pa'. Ñapa' o'ch cohuañpenan po'señ e'ñe cohuen tarrempohuach esempočh huapa ñeñt o'patenaya allempochña pomanña po'señ ñeñt ama a'p'llare'teyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñt'cha' e'ñe serrollar sepa' ñapue't.

³ Tarraña napa' čha sellcatenen. Napa' noten sapa' o'te' čha semnatena o'ch shecaset saña, atet pa' ahua't shechep' allempo shecan Eva tarro'mar ñeñt shecheppa' atarr etsotenan shequēñets. Ñerra'm sapa'čho'ña puehquēño'tetaspa' añach yečhatenset ñeñt ama cohuenayaye co'tapñats, ñeñto'marña o'huañcha' allo'na sesen ame'ñenaya Cristo ñapue't ñeñt e'ñe cohuen.

⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñt'pa' ama atteyaye ñeñt atet yeyčhatuas ya ahuañmo'cha, sañapa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ co'tapñats ñeñt'pa' ama añeyaye Yompor poctapñña, sañapa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ ñoñets alloch sequeshperrañ, ñeñt'pa' ama añeyaye ñeñt e'ñe cohuen ñoñets ñeñt same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets.

⁵ Ñaña ñetpa' atta ommo'chenet allsensareteto' Yompore-sho't, ñetpa' atarro' sherbenet. Tarraña napa' elloña atarr asherben nentena.

⁶ Ama't napa' ama ayčhatare'teno attoch neserrpare't cočheshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt atet notenes ñeñt'pa' e'ñe po'ñočh atet tarro'mar shonte' pa'namen norrtatyen erracmañen ñeñtña e'ñe señotatene'.

7 Ñehua, sapa' amate' pocteye' sentenno tarro'mar ama't ahuañmo'chapa' ama choye' necobraso atto neserrpare'tatensa' Yompor po'ñoñ ñeñt̃ alloch yequeshperra. Ñato' amate' asherbenaye' sentenno atto ama necobraso. Tarraña ñeñt̃pa' añecop sherben attoch sapa' o'ch tantaterres Yompor sosya'tsañoñ allochñapa' o'ch puechemer perres samãa.

8 Ñehua, po'poñ anetso all apcha'yenet pame'ñeñoñet Yompor, na errotenopa' chocma naguënanet ñeñt̃ allpon muenenet o'ch tsa'tnet e'ñe ñet poctaþñoñet. Ñeñto'marña ama pallteno o'ch setsa'tna samãa atto neserrpare'tatenes. Ñeñt̃ napa' atet nenteñ ñerra'mrrate' po'poñ anetso all apcha'yenet pame'ñeñoñet Yompor, napa' ahuo't neprratamþsanet ñet attoch nesherþas sa.

9 Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarrotesapa' ama na'tsrre'moçhtana'taso es senamare'te' ñeñt̃ nepalltena. Tarraña allempo atarr es nepalltenapa' o' huacha'ta masheñnesha' Macedonioñ, ñetñapa' o' aposnet allpon ñeñt̃ atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'moçhtana'tasa ama't e'ñe puesheñarrotesa. Ñaña napa' chocmach atet nepena.

10 Napa' neñotena Cristopa' entenen e'ñe po'ñoñch cohuen ñeñt̃ atet nepena, ñeñto'marña napa' ama't eseshapa' amate' errotenot quechpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñt̃ allo atarr nocshena, ama't erraþaren nesen Acayo'mar.

11 ¿Eso'marte'ña atet notenes? ¿Ama't señoñe? Chate' sote-napañ amate' nemorrentenso. Tarraña ñeñt̃pa' ama atteyaye. Yomporña nentene' atarrca'ye nemorrentensa.

12 Napa' chocmach atet nepena amach necobrenso ñeñt̃ atet pena po'potantañ ñeñt̃ pommo'cheñoñeta serrpare'tatyenset. Allochña ñetpa' amach errotenot otneto napa'cho'ña ahuo' na'tsrre'moçhtana'ch namãa acheñnesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporecop.

13 Tarro'mar ñeñt̃ atet acheñpa' ama Yomporeye' llesense-naye, ñetpa' aña po'taruas penet shequëñets attoch ganenet e'ñe atta. Atta mueneñet o'ch po'poñet et ahuo'ch orrtet atet ñerra'm Cristo puellsensar.

14-15 Ñehua, yapa' yeñoñeñ oneñeñpa' chocma atet pena ñaña o'ch po'poñet attotcha' shequëney. Oneñeñpa' chocma orrtatennay ñeñt̃cha' cohuen yenten ya, o'ch orrtatennay

atef ñerra'mrrate' ñapa' Yompor po'puetarenñoť amñaret' ñeñť atarr cohuen. Ñeñťo'marña yeñoteñ oneñeť pueyochresha' ñeñť torretsa ñocoppa' ñetpa'cho'ña atarrcha' ashcañareret, mueneñet o'ch po'poñetet attoťcha' orrtenet atef ñerra'm añ acheñer ñeñť e'ñe po'ñoť torretsa Yomporecop. Tarraña ñeñť atef petsapa' añ o'patenahuet coñcheñets ñeñť poctetsa añecop ñeñť atef p̄atse'tyetsa.

Atto Pablopa' pa'namenot mueroťhtateñet e'ñe pame'ñeñot Cristo

16 Ñehua, te'pa' o'ch alla noterrser. Amach sentatsetno napa' attate' notatse'tyen. Ñehua, ama't sentenen atef ñerra'm otatsñaatenpa' notatse'teñoťña' se'mñoten. Tarro'mar napa'cho'ña o'ch e'ñe cohuen neños ñeñť e'ñe nocpa atef ñerra'mrrate' cho nommo'chena mame'.

17 Ñehua, ñeñť atef notenes te'pa' ama cohuenayaye tarro'mar ama añecpaye'llesensa'noña Yepartseshar o'ch e'ñe cohuen neñen ñeñť e'ñe nocpa. Te'pa' e'ñe na notatse'teñoť e'ñe cohuen neñen ñeñť e'ñe nocpa atef ñerra'mrrate' cho nommo'chena. Tarraña ñeñť atef notenes neñoteñ ñeñťpa' e'ñe po'noť netsotueñ.

18 Atto shonte' po'potantañ ommo'chyenet ñeñť atef etsotenet ñet arr patsro, napa'cho'ña o'ch neñosatse'tapretyesamet atef ñerra'mrrate' cho nommo'chapretyenamet.

19 Sapa' e'ñe atef sentena sañeña atarro' es señoten ñeñťo'marña e'ñe pocte' senteñ o'ch se'mñoteññañ ama't otatsñať ñeñť atto ommo'chena.

20 Ama't ñet atto pomnaren penset, sañapa' e'ñech pocte' senteñ. Ama't es puerratan̄psaset ñeñť allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teñoťetaspa' sañapa' e'ñech pomnaren sepatena. Ñerra'm esempo ama't cho tacllapechenset, sañapa' e'ñech pocte' senteñ atto atarr pencna'ntatenset.

21 Napa' ama nepenquēñoťeye' notenso, napa' ama nemno nehuamencoťpa' o'ch pomnaren nepenes, atef penes po'potantañ.

Ñehua, tarraña ama't errotenote' ommo'chyenetpa' napa'cho'ña o'ch atef neñosatse'tapretyesamet. Notatse'teñoťpa' chach nottena atef ñerra'mrrate' cho nommo'chapreteña ommoñaatenesha'.

22 Ñetpa' pommo'cheñoťetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan naña. Ñetpa' pommo'cheñoťet otenet israelena'tareto'. Ñehua,

napa'cho'ña o'ch notas israelena'taren namña. Ñaña ñetpa' otenet po'mrenñaneto' yatañ Abraham. Ñehua, napa'cho'ña po'mrenñen yatañ Abraham.

23 Ñetpa' pommo'cheño'tet otenet ñetpa' atarro' torrenet Cristocop. Ñehua, napa'cho'ña elloña atarr nanac ne'torrena Cristocop. Ama't e'ñe notatse'teño'fa noten, ñeñtpa' e'ñe po'ño'ch atet. Ama't allpon torrenet ñet, elloña napa' atarr nanac ne'torrena na. Ñaña ama't allpon amuero'chtataretetyenet ñet elloña napa' atarr nanac amuero'chtatareten. Allpon ayottam'psare'ten all coñchatennet, ñeñtpa'cho'ña nanac atonoche'tats. Ñaña allpon ashtennetpa' ñeñtpa'cho'ña atarr nanac atonoche'tats. Ñaña ñeñt allpon autsan'cha' rromuetseñ, ñeñtpa'cho'ña atarr nanac atonoche'tats.

24 Ñaña judionesha' e'ñe pue'moñe'teño'tetan napa' atet ashtennet e'ñe amnaroche'tats. Allempoña ashtennetpa' ma'poch čharra' puechena escon ñeñt atto pacapacatspenet.

25 Ñaña ellonetpa' o'ch'cho' alla nallerrneterr ñaña tsach'po, e'ñe ma'poche'ttsocma nallennet. Po'pocheñopa'cho'ña parrochpa' o'cho' alla rrolle'terrneterr. Po'pocheñopa'cho'ña allempo nesen noñto sapo'marpa' alla nepotam'perrerr ma'poche'ttsocma. Allempopa' alla narepen alla nellapen oño enopa'rrtatsa.

26 Napa' chocma nechopeñe'chyen ella'par allo'tsa'yen pa'namen ñeñt atarr am'cha'no'chenare', atet ñerra'm allempo netam'pena noñto oño'mar, ñaña allempo ne'chap all am'cha'no'chtana eñe'fe'čno, ñaña allempo am'cha'no'chtana'tenen namo'tsesha' ñaña po'poñ acheñ ñeñt ama judioneshayaye. Ñaña ñeñt am'cha'no'chetyetsa all anetso'mar, ñaña ñeñt am'cha'no'chetyetsa all puetsato'mar, ñaña ñeñt am'cha'no'chetyetsa all oño'mar. Ñaña ñeñt atto am'cha'no'chtana po'potantañ ama't otenetañ masheñpa' tarraña ama masheñeyayeto, ñetpa' ama ame'ñeñeto Yompor.

27 Elloña chocma atarr netaruasen, ñaña shonte' ñeñt atarr echarr nentyen. Ñaña atonoche'tats atarr nanac na'huanten nemoñ torratsa Yomporcop. Ñaña epaye' nemuero'chtana nachporrño't, ñaña no'ñpaño't tarro'mar ama eñalle ñeñt'cha' nerren ñaña ñeñt'cha' norren. Ñaña epaye' muero'chtatenen senet tarro'mar ama eñalle neshtam ñeñt'cha' nechorra, o' e'ñe ne'psapesua.

28 Ñaña ellonet napa' chocma nellquëña ñeñt pame'ñeño'tet allem'eñ ap'cha'yetsa. Napa' añe'naña chocma nellcatene' ñeñt atarr torrapo' nentyen pa'namen.

29 Ama't erra'tsena acheñer ñerra'm ama huomencaye' penano pueyoçher Yomporecop, nañapa' atarrcha' nellcapreteña. Ñeñña atet nellcapreteña nañapa' o'ch atet ne'muen neyoçhro ñerra'mrrate' o'huañ huomenc neña' neyoçher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñt ama pocteye' enteno Yompore, ñaña nepencapreteño'pa' ama't mameshapa' amach pocteye' nenteñe.

30 Ñato' te'pa' o'ch noterrser po'poñonef cotapñats. Sapa' po'ñoçh señosatse'tatyenen cohuen ñeñt e'ñe nocpa. Añña cohuen nenten attoch neños cohuen ñeñt e'ñe nocpa, ñeñtpa' atto ama ahuañenatoyenaye' entenno acheñenesha'.

31 Yomporpa' eñotenen ñeñt atet notenes, ñeñtpa' ama shequëntsoyaye. Ñeñtara Yompore ñeñt Pompor pen ñaña Yepartseshar Jesucristo ñeñtcha'ña ya'ye'choçhtaterr tayoteñ errponohuañen.

32 Ñehua, napa' o'ch neyerpatasa atet a'pareten ahuañmo'cha allempo Damasco'tsenen. Ñehua, ñeñt añcha'tarettatse't all Damasco, ñeñtpa' ñeñtara añcha'taret Aretas pueyoçhresha'. Ñeñña nene'ña guardianesha' ñeñt camretsa allemeñ yetarrof. Ñetpa' añecop camrenet attoch rroma'netañpa' o'ch yottam'pesnetañ allcha' coñchatnetañ.

33 Tarraña napa' arr esha'tnet cañtro attoña çha'nmaterrnet ventanof allotña a'suatam'perrnet conçhtof. Attoña e'ñe cohuen nequeshperra, ñeñto'marña ama eshcaye' rroma'ñoña guardia.

12

Atto Pablopa' a'tapataretta Yompore pue'ntaño ñeñt e'ñe poma'ptaño'hua

1 Ñeñt atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neser-rpare'taterrser atto Yepartseshar ñaña es negatyene' ñeñña es neñotatyene'.

2-3 Ñehua, napa' neñoteñ na puesheñarrana ñeñten ame'ñenaya Cristo te'pa' o' met çharrá puechena pa'tats char, allempoña napa' a'tapaten Yompore pue'ntaño ñeñt e'ñe poma'ptaño'hua. Napa' ama neñoteñe, ñato' orate' nechtso a'tapatareten, amapa' ñato' necamquëño'fate' a'tapatnet. Ñeñtpa' Yomporña eñotene'. Napa' e'ñe neñoteñ po'ñoçh a'tapatareten Yompore pue'ntaño all atarr nanac cosheñtso'tsa'yenet.

4 Ñoñets ñeñt ne'muena' allpa' ama aserrpare'teno tarro'mar ya arromñaŕey ama pocteyaye o'ch yeserrpare't allo.

5 Ñeñt atet aŕareteneñ allempo, ñeñtŕpa' e'ñe poctey o'ch cohuen neñoseñ e'ñe nocpa, tarraña amach atet neŕatsto, añachña nocshena atto ama ahuamencatoyenaye' entenno acheñenesha'.

6 Ñehua, ñeñt atet aŕareteneñ allempo ñeñtŕpa' e'ñe poctey o'ch cohuen neñoseñ e'ñe nocop, ñeñtŕpa' ama çhoye' notatse'teno, tarro'mar ñeñtŕpa' e'ñe po'ñoçh atet aŕareten. Tarraña napa' ama nemno o'ch cohuen neños e'ñe nocpa. Añachña nemnen ñeñtcha' cohuen entapretennet ñeñt e'ñe allpona entapretennet ñeñt atet es neŕa'yen cohuen ñaña ñeñt e'ñe allpona e'mñotapretennet ñeñt atet e'ñe cohuen neserrpare'ten.

7 Atto Yepartseshar ñaña es negatyene' ñeñtña es neñotatyene' ñeñtŕpa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñtña atarr nemueroçhtatame'tene' nanac. Ñeñt atto nanac nemueroçhtena, napa' atet nenteñ ñerra'mrrate' aj nechtsotamŕpena ñeñtŕpa' oneñeŕeshoñña huennana ñeñtña atarr atserr nepene'. Attoña Yomporpa' ama muenatenno o'ch nocshena e'ñe nañeña.

8 Napa' o' ma'poche'tats nenamueñ Yompor a'huañaamŕperrnepa' ñeñt atarr nemueroçhtatene'.

9 Tarraña ñapa' ahuo't otenen: "Amach na'huañaamŕpsatsterrpe, tarraña napa' atta çhocma atarr nemuerenŕa, ŕapa' ñeñtña pepalltena. Tarro'mar ñeñt ama eñalle e'ñe ña po'huamencpa' ñeñtcha'ña orrtatene' na nehuamenc." Ñeñtŕpa' atet otenen Yompor. Ñeñto'marña atto napa' ama eñalle e'ñe na nehuamenc, ñeñtŕpa' ñeñtña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt nechorrenaya; ñeñtña norrtatenpa', ama noyaye nehuamenc, ñeñtŕpa' Cristo.

10 Ñeñto'marña napa' añ atarr nocshatene' atto napa' ama ahuamencatoyenayayno ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt allpon atarr echarrare' nentyen, ñaña atto çhocmach cotare'tennet, ñaña ama't allpon ñeñt nehuenoya ñeñtña atarr nocshatene'. E'ñe pocte' nenteñ o'ch nemueroçhta Cristocop. Tarro'mar neñoteñ ñerra'm esempo ama ahuamencatoyenaye' yenteno e'ñe ya, allempoña Cristopa' ahuamencat peney.

Atto Pablopa' atarr llequënana corinto'marnesha' ñeñt

ame'netsa

¹¹ Sapa' atto señosatse'tatyenen e'ñe cohuen ñeñt e'ñe nocpa, tarraña ama't atteñpa' napa' e'ñe po'ñoçh notatse'tyen, tarro'mar napa' ama nepallteno o'ch neños e'ñe cohuen ñeñt e'ñe nocpa. Añña palltetsa sa o'ch señosapreten cohuen ñeñt e'ñe nocpa. Tarro'mar sapa' señotenen atarr asherboyenen. Ama't po'potantañ ñeñt atarr se'mñotatene' atarr ommo'chenetañ, ñetpa' allsensareteto' Yomporeshot, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno.

¹² Tarro'mar ahuañmo'cha allempo na'puena sesho, napa' allña norrtatyesonas Yompor po'huamenc ñeñt atarr echarrare' ñeñt sapa' ama't ahuatapa' ama sentare ñeñtcha'ña señotate' ñeñt'pa' Parets po'huamenc ñaña ñeñt'cha' señotate' napa' po'ñoçh Yomporña nellsensene'. Ñeñto'marña e'ñe cohuen na'huantennas ñeñt atarr torrapo' sentyen.

¹³ Attecma es norrtatyennas ñeñt atet ne'pa' yes po'potantañ ñeñt pame'ñeñotet ap'cha'yetsa allemeñ anetso'mar. Añña ama na'tsrre'moçhtana'taso es senamare'tyese'. Tarraña ñerra'm ama pocteye' sentono ñeñt cohuenare' neponaspa', ñehua, ñato' o'ch se'pretnerren.

¹⁴ Te'pa' poma'pocheñopa' o'ch ahuerrierr sesho. Attecmach nepohuerrerr; amach na'tsrre'moçhtana'taso es senamare'te' ñeñt nepalltena na. Tarro'mar napa' ama añeye' ne'nen ñeñt'cha' es sapuen na; napa' añña nemnen o'ch sepomhua sañeña Cristesho. Tarro'mar napa' atet nentenes ñerra'mrate' po'ñoçh e'ñe nechemer nepenes. Ñehua, cheshaneshapa' ama añeye' pallteneto o'ch es a'yapaçhet ñeñt'cha' añño'tet pamo'mtayecop. Añña nanac palltetsa, pamo'mte'chña es a'yapaçhets ñeñt puechemereshacop.

¹⁵ Ñeñto'marña e'ñe nocsheñesha' o'ch nepomhua e'ñe nañeña ñeñt'pa' e'ñech socop. Allochñapa' attoch sequestherra saña. Ñaña allpon nechyen, e'ñe nocsheñesha'pa' o'ch nepomyeñ e'ñe socop. Ama't napa' elloña atarr nemorentensa sañapa' o'huañ e'ñeye' semorrentenna na.

¹⁶ Sapa' señotenen napa' ama na'tsrre'moçhtana'taso es senamare'te' ñeñt e'ñe nocop. Tarraña sapa' çhate' sotenapañ napa' atarrte' neñoteñ attoch neshcare'tas ñeñt e'ñe po'poñe'ttsoçma shecare'teñets.

¹⁷ Ñeñt nemña ahuañmo'cha epsheña sesho, çhate' sotenapañ ñeñt'pa' tarrecpate' attoch shecare'taset.

¹⁸ Ñehua, na te'pa' o' nesechach masheñ Tito ñeñt'cha' tatsa sesho, epuet po'psheñeñ masheñ o' nemñanet epsheño'maret sesho. Sapa' çhate' sotenapañ masheñ Titopa' o'ch

shecare'tensa'. Ama't seño'teña yapa' attecma cohuen yoc'tape'chen yeyochro epan masheñ Tito ñaña attecma es yepa'yennas e'ñe cohuen.

¹⁹ Sapa' chate' sotenapañ añecpa'e' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteño'es masheñeshacha' ñaña no'chaneshacha' o'ch notas, ñeñtpa' ama nocpayaye. Añecopña notenes ñeñt e'ñe socop allochñapa' o'ch alla huomenc seperr seyo'cher Yomporecop. Napa' e'ñe neyemteño' Cristo, Yomporñapa' entenen ñeñt atet notenes.

²⁰ Tarro'mar e'ñe nellquëño'es sa noten, ñato' esempoch ne'cherr sesho, ñerra'm attera nentyesuerrser ñeñt atet se'patse'tyena, napa' ñeñtcha'ña atarr nellcatuerrayerr sesho. Attoña ñerra'm sentapuerren nellquëñesha' ne'cherr seshopa' ñeñtcha'ña sellcate' samã. Ñato' o'ch nentuerrser attera se'moñe'tannena, attera es seye'chapretannena, attera sa'tsrre'mare'tatannena sañeña attoch o'ch sa'mcha'tare'tta; ñato' attera sesasare'tanna'tyena, attera sa'metare'tam'psannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teño'tpa' seche'chame'tanna'tyena.

²¹ Ñaña napa' nellquëño'es sa noten, ñerra'm esempo ne'cherrerr sesho po'pocheño'pa' ñato'rraña o'te' alla pencna'ntaterrnerr Yompor e'ñe so'mara. Tarro'mar ñato' patanta'ttsos ama seque'chpueno ñeñt ama pocteye' enteno Yompor ñeñt atet sey'cha'yen sa sosya'tsañe'chno, ñaña atto se'chta'yen coyanesha'chno ñeñt ama setaporeyaye, ñaña coyanesha'pa'cho'ña aguënan yacma ñeñt ama puerrollareyaye, ñaña atto sayom'atse'tyena ñeñt po'ño'ch ama atet a'papahuoyaye. Ñato' attera se'patse'tyena atet sepe't ahua't ama llecatensoña so'chñar attoch soc'tape'cherr etserra cohuen. Ñeño'marña ñerra'm esempo ne'cherrerr sesho ñerra'm attera nentuerrser, nellquëño'tpa' chate' neya'na'tuerres.

13

E'ñe allohuanen atet cotape'chatyesnerranet pa'namen esocmañen

¹ Ñato' poma'pocheño o'ch alla ahuer'nerr sesho. Ñaña o'ch notas po'poñ, ñeñt otteñe'chare'ttetsa, ñerra'm epsheña a'metare'tam'pene' amapa' ma'psheña, allempopa' pocte' o'ch ye'mño'ch ñato' po'ño'chte' atet patse'tyena.

² Ahuañmo'cha allempo puepocheño ne'cherr sesho, ñeñt attera patse'tyetsa ñeñt ama pocteyaye, napa' o' notuanet allempo ñeñtcha' atet a'parettet ñerra'm atteretach. Ñehua,

te'pa' necartotpa' o'ch alla noterraneterr ñet, ama't e'ñe allohuenes o'ch notas, ñerra'm esempo necherrerr po'pocheñopa' o'ch ne'ñotare'tuerres allohuenes ñeñtes attera p'atse'tyetsa.

³ Allochñapa' sapa' e'ñech señotuenen po'ñoçh nach eñorosta ñeñt atet muenatenen Cristo. Ñehua, ñeñtpa' tarro'mar sapa' çhocma senamuenen o'ch norrtatennasa' attoch señoten napa' po'ñoçh Cristo ne'ñoratene'. Ñaña Cristopa' e'ñe po'huamencotña çhocmach erroten es p'a'yennas, ñaña atarr ahuamencat penes.

⁴ Ñehua, po'ñoçh yeñoteñ allempo corso'tam'pset Cristopa' ama ahuamencateye' enteñeto tarraña Pomporña e'ñe po'huamencot alla tantater. Yapa'cho'ña attecma yeñotena ama ahuamencateye' yenteno ñerra'm ña, tarraña te'ña yapa' o' yocrrerra po'huamencot Yompor attey ñerra'm ña. Attoña po'huamencot Yompor e'ñe cohuen yesherbene.

⁵ Te'pa' o'ch noterrser, socoppa' añ poctetsa o'ch señota sañeña, ¿po'ñoçhte' same'ñena? O'ch señota esheccha' señoçh po'ñoçhte' sapa' same'ñena. Ama't señoteñe Jesucristoña sechorrenaya. Ñehua, ñerra'm po'ñoçh ama same'ñeño, amachña errotenot chorraso.

⁶ Tarraña napa' çhocma necuenes o'ch çhaponasa seyoçhro attoçhña señoten po'ñoçh napa' añ nellsensene' Yompor.

⁷ Napa' nema'yocheño'tpa' çhocma nenamuennas Yompor socop attoch amach allo'na atet sepatsto ñeñt ama cohuenayaye Yomporcop. Ñeñtpa' ama añecpayaye attoch sapa' o'ch señotenen napa' po'ñoçh allsensareten Yomporshot. Añecopña nenamuennas Yompor socop attoch sapa' çhocmach sepa'yen ñeñt cohuen enten Yompor, tarro'mar ñeñtpa' ñeñtña e'ñe cohuentetsa Yomporcop. Ñeñtpa' atetña nemnen socop ama't napa' atet sentennoñ atet ñerra'mrrate' ama allsensareteno Yomporshot.

⁸ Tarro'mar napa' ama nemno o'ch nepatare't ñeñt e'ñe po'ñoçh cohuentetsa Yomporcop. Napa' añña atarr nemnen o'ch nepatuahuoñ ñeñt e'ñe po'ñoçh cohuentetsa ñocop.

⁹ Ñerra'm soctape'cherr cohuen attoçhña huomenc seperr seyoçher Yomporcop amach nepallteno o'ch norrtatonas nehuamenc atto allsensareten Yomporshot. Tarraña atetpa' e'ñe pocte'. Ama't napa' ama ahuamencatoyenaye' sentenno, tarraña ñerra'm sapa' ahuamencat perres Yompor, ñeñtpa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc p'a'nmue' seyoçher Yomporcop.

¹⁰ Ama't ella'paro'tsenen o'ch nequellquërrnaserr necarta, ama't ama nesena' sesho, allochñapa' o'ch alla soctape'cherr

cohuen Yomporecop. Attochña ñerra'm esempo neçherr se-shopa' amach cha muene' neche'chame'tyesuerrso attoch señoton ñeñĩ atet llesensenen Yepartseshar. Tarro'mar atet allsensarefen, ñeñĩpa' ama añecpaye' sherbeno alloch na'puerratatuerres, ñeñĩpa' añecopña sherben attoch neyen-pas huomenc pa'nmue' seyoçher Yomporecop.

Arrpa' all e'ñe poctacma so'tnerranet po'cartot

¹¹ Te' masheñeshacha' ñaña noçhaneshacha' allohuach notas añ necartot. E'ñe neso'teñotespa' o'ch notas, Yomporepa'chña sa'nataya. Te'pa' ñeñĩtach noterrsserr mame'. Allo'nepa'chña sesen cotape'chnomue' ñeñĩ e'ñe cohuentetsa Yomporecop. Ñeñĩ atto o' noctape'chaterrsserr añ necartot, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñĩtara Yompor ñeñĩ atarr amorrentña ñeñĩña atarr yocshatene' yeyoçhro.

¹² E'ñe semorrentanna'teñoĩpa' atetcha' se-huomĩcha'tanna'tena ñeñĩ atet poctetsa Partsocop.*

¹³ Ñaña arrpa' allohuen ñeñĩ o' pueyochresha' perr Parets, ñetpa' mueneñet o'ch huomĩcha'taset ñamet arr necartot.

¹⁴ Yepartsesharepa'chña Jesucristo sebensare'tamĩpene' allohuenes, ñaña Yomporepa'chña semorrentaya attoch semorrentannena saña, ñaña Puecamquẽñepa'chña sechorrenaya attoch e'ñe separrocmatuahua allohuenes epas Cristo. Te'pa' ñeñĩtach notas, ñeñĩpa' atetepa'chña Nompore. Allo-hua.

Pablo

* **13:12** Po'ñoçh oteneý, "E'ñe semorrentanna'teñoĩ ðhocch setso'ttsa'pa'tannena ñerra'm esempo sehuomĩcha'tanna'tena ñeñĩ atet poctetsa Partsocop." Ñeñĩpa' atet yeçhete't ahuat.

AÑ SAN PABLO PO' CARTA ÑEÑT QUELLCAN GALACIO MARNESHA, GÁLATAS

Atto Pablopa' quellcan carta añecop ñeñt ame'ñetsa anetso Galacio

¹⁻² Masheñneshacha' ñaña nochaneshacha' ñeñtes allohuenes same'ñeñot apcha'yetsa allemeñ anetso Galacio'mar. Na Pablon sequellquêne'ña añ carta ñeñten Jesucristo puellsensaren. Napa' ama acheñeye' nellsensenaye, Jesucristoña nellsensene' epuet Pompor Parets ñeñt tantaterre' Puechemer rromot. Ñaña allohuen masheñneshachno ñeñt parro arro'tsenen, ñetpa'cho'ña mueneñet o'ch huom'cha'taset ñamet añ necartot.

³ Te'pa' e'ñe nehuom'cha'teñotes o'ch notas: Yomporepa'chña sebensare'tam'pene' ñeñt atarr Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes.

⁴ Ñeñtara Jesucristo ñeñt e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ pat-sropa' sosya'tsaño'tsenya, tarro'mar ñeñtpa' atet pocte' e'ñch Pompor ñeñtara Yompor ñeñt nanac Parets.

⁵ Ñeñtara Paretspa' aye'cho'chtaterrapo'ch e'ñe tayoteñ erponohuañen. Ñeñtpa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' cha semneñ o'ch seque'chpuer Yompor ñeñt o' hua'ñerres o'ch same'ñerrñaña Puechemer Cristo ñeñt rromats attoch sequeshperra. Tarraña sañapa' cha semneñ o'ch alla soctape'cherr po'poñ ñeñto'ch sa'queshpaterrayeñ.

⁷ Po'ño'chpa' ama't ama eñalle po'poñ alloch yequeshper-rapa' añña ñeñt huapyetsa seshopa' ñetpa' cha mueneñet o'ch alla moññe'taterrset soctapña. Ñaña ñetpa' mueneñet o'ch a'po'poñetonaset soctapña ñeñt cotapñats po'ño'ch alloch yequeshperra e'ñe yame'ñeño'fa Cristo.

⁸⁻⁹ Tarraña napa' o'ch notas: Ama't erra'tsencha' seser-rpare'tate' po'poñ cotapñats ñeñt ama ñeñtarayaye ñeñt atet o' same'ñerra ahuañapa' ñeñt acheñerpa' amuepa'ch yen-pueñe Yompor. Ama't yapa'cho'ña ñerra'm o'ch alla yeser-rpare'taterrser ello ñeñt ama ñeñtarayaye ñeñt atet o' ne-serrpare'tatuas ahuaña ñeñt po'ño'ch alloch yequeshperra

yapa'cho'ña amuepa'ch allo'na yenpa'nenye Yompor. Ñaña ama't añ atet patsa ñeñt Yompor po'millañoñer entotpa' ama't ñapa'cho'ña amuepa'ch yenpueñe Yompor. Ama't ñeñtpa' o' notuaseñ ahuatoteña' tarraña te'pa' o'ch alla noterrser, amuepa'ch yenpueñe Yompor ñeñt atet patsa.

10 Te' sapa' señotenen napa' ama añeçpaye' notenso attoch cohuen entenen acheñ, añña nemnen o'ch cohuen entenen Yompor. Ñaña ama acheñeneschaye' nemneno o'ch nocshach tarro'mar ñerra'm añña orameñ nemneñ o'ch nocshach acheña' ñeñtepa' amate' erroteno noto napa' pueyocher penen Cristo.

Atet pa Pablo allempo errte' allsensaretterra

11 Napa' nemneñ masheñneshacha' ñaña noçhaneshacha' o'ch señoçh ñeñt atet neserrpare'tatas ahuañapa' ñeñtpa' ama acheñoyaye poçtaña alloch yequeshperra.

12 Napa' ama acheña neñotatenaye atet, ñaña napa' ama essha' neyçhatenaye. Añña e'ñe Jesucristo ñaña e'ñe neñotatene' atet.

13 Sapa' o' se'mare'tuan atet nepe't ahuañmo'cha allempo noctoñe't judionesha' poçtaña. Napa' allempo nanac noctare'che't ñeñt ame'ñenaya Yompor. Napa' atarrcha' nemne't o'ch na'cllaturanet.

14 Napa' e'ñe netsotoñe't judionesha' poçtaña. Napa' ello nemtana'tue't shonte' nacmanesha' judionesha' ñeñt parro neyemte't. Napa' nanac nema'yoçhroñe't judionesha' poçtaña ñeñt atet yeche't ahuatnaneshañ, ñaña ñeñtara atet yeçhatyesete't ñaña puechemereshañ.

15-16 Tarraña Yomporpa' ahuo't acrerren ahuatoteñ ama't allempo ama ne'ñalletena'. Tarro'mar allempo çhap allempoch eñotaterrenpa' o' yemtaterrna Puechemer ñeñtara Jesús. E'ñe puemuereñoen nanacpa' o' çhore'terren attoch nach serrpare'te' po'ñoñ allo'tsa'yen ñeñt ama judioneschayaye. Ñaña allempo e'ñe poçte' enteñ Yompor o'ch eñotaten atetpa' napa' ama essha' na'p'to'to ama't puesheñarra.

17 Ñaña ama't Jerusaléñapa' ama neto o'ch nenteña' ñeñt allsensaretnesha' ahuatoteñ. Elloña napa' arra ahuen alloteñet Arabia, allpa' ama acheñempañooyaye. Allña' all na'llponmatena' e'ñe alla; alloñña' alla nepuerrerra Damasco.

18 O'ña met ma'pa char allempañapa' ahuen Jerusaléño o'ch nenteña' masheñ Pedro.* Allña' alla na'pa ñesho çharramat puechena amnarmat.

19 Tarraña allempo allo'tsenenpa' ama nenteño po'psheñneçhno ñeñt allsensaretnesha', ñapña nenteña'

* 1:18 Añ Pedropa' ñeñtara otenet Cefas.

masheñ Jacobo† ñeñtara ñeñt pa'mo'nasheñ pen Yepartseshar Jesús.

²⁰ Po'ñoçhpa' ama't Yomporpa' eñotenen ñeñt atet notenespa' ñeñtpa' e'ñe po'ñoçh atet.

²¹ Allempoña nerr, arr nasuanerr Sirio'mar ñaña Cilio'mar.

²² Tarraña ama't allempo ñeñt ame'ñenaya Cristo all Judeo'marpa' ñetñapa' ama eseshaye' nechme'tenaye.

²³ Tarraña ahuo't e'mare'chet ñeñt cotare'tahuete't ahuaña te'ñapa' o' serrpare'terran attoch yame'ñerra ñeñtara cotapñats ñeñt chocma mueneñ ahuaña o'ch huapore'tater.

²⁴ Ñeñto'marña te'pa' e'ñe no'marpa' nanac aye'chochtateññañet Yompor.

2

Atto po'psheññeçhno allsensaretnesha' e'ñe pocte' eñchet Pablo

¹ Allempoña o' meterrerr çharra' char puechena pa'tatspa' o' alla ahuernerr Jerusaléño epan ñaña masheñ Bernabé. Ñaña o' nanemñ masheñ Tito.

² Napa' ahuernerr alla tarro'mar atet oten Yompor. Allempoña nechap Jerusaléñopa' neserrpare'tatosanet ora allohuen ñeñt atet o' neserrpare'tatue ñeñt ama judioneshayaye. Neñotach ñaña jerusaléño'marnesha' ñeñt atet neserrpare'tatyen acheñenesha' e'ñe yame'ñeñoña Cristopa' o'ch yequeshperra. Ñehua, ñanompa' neserrpare'tach ñeñt añcha'taretetyetsa Jerusaléño e'ñe ñap'teto. Napa' tarro'mar notanet atet allochñapa' attoch neñoçh ñato'pocte'ch entapret-net ñeñt atet nepena, allochñapa' atto neserrpare'tatyenpa' amate' e'ñe orrena neserrpare'tyeno.

³ Allempoña neserrpare'tatuanet atetpa' e'ñe pocte' eñchet ñeñt atet neserrpare'tyen. Ñeñto'marña ama't allo'tsen masheñ Tito ñeñt ama judioneshayayepa' ama't e'ñe puesheñarrofetapa' amaña eseshaye' notaye netsorrachepa'to' masheñ Tito tarro'mar ñapa' ama judioneshayaye.*

⁴ Tarraña ama't allempopa' ama eñallñeña ñeñt torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña

† **1:19** Jacobopa' ñeñtara ñeñt sochenet Santiago. * **2:3** Añ ñoñets "atsorretet", añ ñeñt otets atet yethe't judionesha'. Ñeñtpa' atet: Ñerra'm allempo eñalletena asheñorrofollesha' ñeñt e'ñe judionesha'pa' añña pomporpa' o'ch tsorrateñet po'chtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret asheñorrofollla' all e'ñech poteretollo e'ñe poñot pa'rmatollo.

e'ñe a'nahuapa' mueneñetañ ahuo'ch nonayet ñoñets ñeñt nanac torrapo' yenten. Ñetpa' añeçpa huapuet a'nahua o'ch e'monayet atto yapa' yoten e'ñe yame'ñeñoña Cristo Jesúsapa' o'ch yequeshperra. Tarraña ñetpa' añe mueneñetañ o'ch alla nerrnayet judionesha' poçtañña ñeñt nanac torrapo' yenten.

⁵ Tarraña yapa' ama yemnataneto ama't e'ñe mamesha, tarro'mar yapa' ama yemno o'ch alla ya'po'poñetañperres ñeñt cohuen ñoñets ñeñt e'ñe po'ñoçh alloch yequeshperra.

⁶ Allempoña neñotach añcha'tareñnesha' ñeñt Jerusaléño'tsa'yen ñeñt atet o' nepohuapa' tarraña amaña erroç otneto ñeñto' nepalltena ñeñtcha' atet neña. Ñehua, po'ñoçh napa' ama nepallteno o'ch e'mñotaten añcha'tareñ tarro'mar ama ñapña añcha'tareñ poçte' entenoña Yompor. Ñeñto'marña ñeñt pa'mñcha'tareñneshar penet ñeñt ame'ñetsa amaña erroç otneto ñeñto' nepalltenmeñ ñeñtcha' atet neña.

⁷ Añña ñetpa' e'ñe poçte' entnet, tarro'mar o' e'ñoçet napa' po'ñoçh allsensareten o'ch neserrpare'tach acheñenesha' cohuen ñoñets, ama't ñeñt ama judioneshayaye. Atteçma ñaña masheñ Pedro allsensareñ o'ch serrpare'tan cohuen ñoñets judioneshacop, napa'cho'ña atteçma allsensareten o'ch neserrpare't cohuen ñoñets añecop ñeñt ama judioneshayaye.

⁸ Tarro'mar ñeñtara Yompor ñeñt llesense' Pedro o'ch serrpare'tatan judionesha', napa'cho'ña ñeñtara Yompor ñeñt nellense' naña o'ch neserrpare'tach ñeñt ama judioneshayaye.

⁹ Ñeñto'marña ñeñt añcha'tareñetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe e'ñoçet po'ñoçh napa' Yompor o' yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueñoçetaypa' orratyet pot po'cohuenroç attoch yeñotanna'ta e'ñe atteçma yoçtape'chen Yomporecop. Allempoña ñetpa' e'ñe poçte' entyet yeserrpare'tachepa'to' ñeñt ama judioneshayaye, atet ñerra'm ñetpa' o'ch serrpare'tachet ñeñt judionesha'.

¹⁰ Ñetpa' añe pa'terr otyet, es yapa'yeseapa'to' huocchañneshachno; ñeñtña ama't napa' e'ñe poçte' neñch naña.

Allempo Pablopa' muene' che'ptare'tan Pedro

¹¹ Tarraña allempo çhap ñaña masheñ Pedro Antioquíopa' napa' çha muene' neche'ptare'ch allempo yeserrpare'ten parro, tarro'mar allempo ñapa' añ ãa ñeñt ama poçteyaye. Ñeñtpa' atet ãa,

¹² allempo e'ñe errte' çhets masheñ Pedro Antioquíopa' ñapa' allenta rrallme'chapretosan ñeñt ama judioneshayaye.

Tarraña allempoña čhača't ñaña puesheña'tets ñeñt huetsa masheñ Jacobueshotpa' allempoña masheñ Pedropa' o'huañ rrallme'chapretan ñeñt ama judioneshayaye, tarro'mar ñapa' añ mecha'ten ñeñt cotene' judionesha' poctaṗña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet.

13 Añpa'čo'ña judionesha' ñeñt ame'ñetsapa' ñetpa'čo'ña o' atet ṗa'yeset ñamet ñeñt atet pena masheñ Pedro. Ñeñto'marña allempopa' ama't masheñ Bernabépa' o' ṗachet ñaña ñeñt atet penet ñet. Po'ñočpa' ama't eñoteñetañ ama atet aṗapahuo.

14 Tarraña allempo nentanet ama e'ñe pačharroye' peneto ñeñt cohuen ñoñets ñeñt po'ñočh Yompor po'ñoñ allempoña napa' atet noch masheñ Pedro e'ñe allo'tsa'yen allohuen acheñenesha', ñeñtpa' atet noch: "Papa' ama't judioneshapeñpa' tarraña o' peṗohua ñeñt atet pena ñeñt ama judioneshayaye, te'ñapa' eso'mare'tña ṗañapa' pemneñ o'ch penoñña ñeñt ama judioneshayaye añ ñoñets ñeñt atet anareṗ judioneshacop ñeñt ama't ṗapa' ama atteye' pepeno atet anareṗ añ ñoñets."

Ama't judionesha'pa' e'ñech attecma a'quesṗataretterret ñerra'm ame'ñeretcha' Jesús

15 Yapa' e'ñe judiona'tareshoṗ e'ñalletñay. Tarraña yapa' ama atteyaye ñerra'm ñeñt ama judioneshayaye ñeñt nanac ochñañ.

16 Tarro'mar ya ama't judioneshaypa' yeñoteñ e'ñe yame'ñeñoṗa Jesucristopa' o'ch pocte' enterrey Yompor, ñeñtpa' ama añoṗeyaye o'ch e'ñe yeṗohua ñeñt atet anareṗ judioneshacop. Añña e'ñe yame'ñeñoṗa Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoteñoṗa ñeñt atet anareṗ judioneshacoppa' amach pocte' enterrye Yompor ama't puesheñarroṗeya.

17 Ñaña te' yapa' e'ñe yame'ñeñoṗa Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' čhocmach yentena yapa' ochñaṗey. Ñeñto'marña sapa' čhate' sotenapañ Cristopa' ñeñt'e'ña ochña'tatañtetsa. Tarraña ñeñtpa' amaca'ye atteyaye.

18 Tarraña ñerra'm o'ch alla yoctape'cherrerr ora allohuen ñoñets ñeñt atet anareṗ judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñaṗey.

19 Tarro'mar ñeñt ñoñets ñeñt atet anareṗ judioneshacop ahuaṗpa' te' napa' neñoteñ ñeñtpa' ama añeṗpayaye attoch o'ch

ya'qushpatterra yañeña. Ñeñto'marña ya ñeñtey o' yame'ñera Cristo yapa' o' ya'ypo'ñamper attochña te'pa' o'ch yocrrerra cohuen Yomporecop e'ñe yeyochrohuen.

²⁰ Ñeñto'marña yapa' o' yequechpa'huerr atet muenatse'tatiesye't yechets. Ñeñto'marña o' e'ñe atet yeperra ñerra'mrrate' o' corso'tam'perryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt' yechorrenayapa' ñeñtña corretsa te' yechtso. Te'pa' e'ñe yeyemteño't Yompor Puechemerpa' yocrrena e'ñe cohuen arr patsro, tarro'mar ña yemorrenterraya, ñaña ña rromats yocop.

²¹ Ñeñto'mar te'pa' ama yemno o'ch yehuapore'terrñañ Yompor puemuereña atto apuey Puechemer alloch yequeshperra. Tarro'mar ñerra'm eñalleñ attoch yequeshperrañ e'ñe yetso'teño'ta ñoñets ñeñt' atet anaretpa' ñeñtepñapa' atto rroma Cristopa' amate' es sherbeno.

3

E'ñe yame'ñeño'ta Cristopa' o' yequeshperra, ama añ yetso'teño'te ñoñets ñeñt' atet anaret judioneshacop

¹ Sapa' nanac galacio'marneshacha' sepanteñ. Po'ño'ch sa o'ca'ye cha shecaset attoña te' sapa' o'huañ same'ñenaña ñeñt' e'ñe po'ño'ch alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ño'ch Jesucristopa' o' acorso'tam'psare'tta e'ñe yocop. Ñeñtña po'ño'ch same'ñaña sa allempo.

² Ñeñto'marña te'pa' nemneñ o'ch neñotatas ama't añ paterr ñoñets: Sapa' e'ñe seyemteño't ñeñt' Cristo po'ño'ñ attoña chorrasaña Parets Puecamquëñ. Amaña año'feye' chorraso e'ñe setsoteño't añ ñoñets ñeñt' atet anaret judioneshacop.

³ Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquëñ ñeñt' ahua'mencat' a'pañpa' eso'mare'tña te'ñapa' o'ch alla seyemterrerr e'ñe sañeña setso'tateñ.

⁴ E'ñehuachñaca' orrena atarr semuero'chetyesa. Po'ño'ch ñato' ñeñt'pa' amate' e'ñe orrenayaye ñerra'm o'ch alla soctape'cherr cohuen.

⁵ Ñaña allempo Yomporpa' chorrata'sa Puecamquëñpa' ñapa' añ orrtatonas partsoteñets e'ñe sesho. Ñehua, ñeñt'pa' amaca'ye año'feye' orrto e'ñe sa setsoteño't ñeñt' atet anaret judioneshacop, ñeñt'pa' año'tca'yeña orrta e'ñe same'ñeño'ta ñeñt' atet yeserrpare'tatuas.

Abrahampa' e'ñe pueyemteño't Yomporpa' o' pocte' eñch Yompor

6 Ñehua, Abrahampa' nanac yemtane't ñeñt atet och Yompor, ñeñto'marña Yomporpa' e'ñe pocte' eñche't.

7 Ñeñto'marña yeñoteñ ñeñt nanac yemtenaya ñeñt atet oten Yompor ñeñtña Yomporpa' e'ñe pocte' enteñ atet ñerra'm puechemereshanet Abraham.

8 Yomporpa' e'ñe eñotue't ahuatoteñ ama't ñeñt ama judioneshayayepa' o'ch ame'ñeret esempo, ñaña e'ñe pame'ñeñotetpa' pocte'ch enterranet. Ñeñto'marña ama't ahuatoteñpa' e'ñe anuaret po'ñoño. Yomporpa' atet otan Abraham: "E'ñe peshotpa' o'ch nebensare'tam'pes allohuen pa'namen acheñ." Ñeñto'marña yeñoteñ ama't ahuatoteñ Yomporpa' serrpare'tatane't Abraham ñeñt cohuen ñoñets alloch yequeshperra.

9 Ñeñto'marña yeñoteñ te'pa' allohuen ñeñt ame'ñenaya Cristopa' e'ñe attecma cohueno'tsenacma atet ñerra'm Abraham ñeñt nanac ame'ñaye't Yompor ahuat.

10 Tarraña allohuen ñeñt yemtenaya ñoñets ñeñt atet anaret judioneshacop o'ch e'ñe etsotuet ñetñapa' o' anaret tet allohuenetpa' a'coñchatare'tetcha' tarro'mar atet anuaret Yompor po'ñoño ama't ahuatoteñ, ñeñt'pa' atet oten: "Allohuen ñeñt ama etsotuenaye e'ñe poctacma allohuen allpon ñoñets ñeñt atet anaret quellco, ñaña ñerra'm ama ñohueto allohuen ñeñt atet anaretpa' a'coñchatare'tetepa'ch."

11 Ñeñto'marña yeñoteñ amach pocteye' enterrye Yompor e'ñe yemneñño'a o'ch yetsotua añ ñoñets ñeñt atet anaret, tarro'mar amach errotenot yetsotuo ora allpon ñeñt atet anaret. Ñeñto'marña ama't puesheñarro'teyapa' amach pocteye' enterrye Yompor. Ñeñto'mar ama't Yompor po'ñoñopa' atet anuaret ahuatoteñ, ñeñt'pa' atet oten: "E'ñe yeyemteño'a Yompor ñapa' o'ch pocte' enterrey attoch ello yocrrerra erponohuañen."

12 Tarraña ñeñt ñoñets ñeñt atet anaret judioneshacoppa' ama atteye' oteno, ñeñt'pa' atet oten: "Ñerra'm yeñohuencha' e'ñe poctacma ñeñt atet anaretpa' esheccha' ello yocrrerra erponohuañen."

Cristopa' e'ñe pocte' eñch attoch ñach arrnomarettatsa yocop

13 Ñoñtsopa' ama't o'patatenyañ coñcheñets tarraña Cristopa' ñaña coñcherrtsa e'ñe yocop attochña yapa' amach yecoñcherro. Ñeñt'pa' yeñoteñ tarro'mar ama't ahuatoteñpa' atet anuaret Yompor po'ñoño, ñeñt'pa' atet oten: "Ama't erra'tsena acheñer puepencateñme'chatset cho echañchet tsachopa' ñeñt'pa' a'coñchatare'cha' entyes acheñenesha'."

14 Ñeñto'marña yeñoteñ e'ñe pame'ñeñotet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñotpa' attoña eñall attoch chorrerrya allohueney Parets Puecamquëñ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñtcha' atet poñ

15 Ñehua, masheñeshacha' ñaña no'chaneshacha' te'pa' o'ch alla neñotaterrerr po'poñ. Ñehua, ñato' o'ch netma'ntacha ñeñt atet yocrrena añ patsro. Ate't ñerra'm puesheñarr yacmapa' o'ch a'pochtachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach errotenot esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Ate't yepena yaña ama't acheñaya atet petsa ellohuate'ñaca' Yomporpa' ama pueno po'ñoñ.

16 Yompor ahuatpa' atet otan Abraham ñeñtcha' atet poñ e'ñe puesheñarro't po'mrenño't. Tarraña ama allohuenaye' po'mrenñecop atet och, e'ñe puesheñarrocpa atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ.

17 Añmapa' ñeñtña atet ney'chatenes. Ñehua, yapa' yeñotueñ atto Yomporpa' a'pochtachet ama't ahuatoteñ epuet Abraham. Allotñapa' allempo o' met cuatrocientos treinta charpa' allempoñapa' chap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'pochtata Yompor epuet Abraham ama't ahuatoteñ, tarro'mar Yomporpa' ama puenesho po'ñoñ.

18 Ñaña ñerra'm eñalleñ attoch yequeshperrañ e'ñe yetsoteño'a añ ñoñets ñeñt atet quellca' ahuat Moiséspa' ñeñtepñapa' amate' palltenañe attoch Yomporpa' otan ahuat Abraham o'ch eñalleta e'ñe ña po'mrenño't puesheñarr ñeñtcha' ya'queshpaterre' e'ñe yame'ñeño'a ñeñt atet oteney.

19 Añ ñoñets ñeñt atet net allempopa' ñeñtpa' atet pa: Yomporpa' ahuo't mueñan po'mllaño'teññaneshar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarrempohua sherba' allempo huapa Cristo atet Yompor otan ahuat Abraham. E'ñe po'ño'ch yame'ñeño't a'queshpaterreycha'. Te' ellonetpa' o'ch neñotatas ñeñtecop nanña ellonet Moisés po'ñoñ. Ñehua, ñeñtpa' añecpa anaretta attoch yeño'ch ñeñt

allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yeṑohua ñeñt ama pocteye' enteno Yompor.

20 Tarraña allempo Yomporpa' eñorana'tana Abraham ñeñtcha' atet ṑoñpa' allempopa' e'ñe ña ote' allame'tets. Allempo Yomporpa' ama esesha' oto po'psheñeñ ñeñtcha' a'mtahuat añ ñoñets.

Añ ñoñets ñeñt atet anaret ahuatoteñ judioneshacop añecopña sherben ñeñtcha' yame'ñaterraya Cristo

21 Ñehua, ñato' sapa' o'ch soten, ñeñtepñapa' añ ñoñets ñeñt atet quellcanet Moiséspa' ta', ḥote' epatenan Yompor po'ñoñ ñeñt atet otan ahuat Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoña ñeñt atet anaret o'ch etserrataterrnayeñ cohuen yeyoḥer Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoña ñeñt atet anaretpa' o'ch pocte' enterreyeñ Yompor, tarraña ñeñtpa' ama atteyaye.

22 Tarro'mar Yompor po'ñoñ ñeñt anuaret ahuatoteñpa' oteney, allohueneypa' e'ñe yo'chña'tuen, amach errotenoḥ e'ñe yetsoṑoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequeshperra. Añña e'ñe yame'ñeñoña Jesucristopa' o'ch yequeshperra, ñeñtara Cristo ñeñt atet Yomporpa' otan ahuat Abraham.

23 Ahuat allempo ama huena' Cristo ñeñtcha' yame'ñerrapa' amach errotenoḥ ya'ypo'ñerro añ ñoñets ñeñt atet anaret. Atta yepe't tarremphua allempo huapa Cristo attoña e'ñe yame'ñeñoña ñapa' o'huañcha' allo'na añcha'noḥta ñoñets yocop.

24 Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuanṑsaye't ahuat. Ñeñtpa' tarremphua atet ṑa allempo huapa Cristo, ñaña añ ñoñetspa' añecpa sherba' attoch ame'ñaterraya Cristo, allochñapa' e'ñe yame'ñeñoña ñapa' o'ch pocte' enterrey Yompor.

25 Tarraña te'ña o' yame'ñera Cristopa' ama yepallteno ñeñtcha' allo'na yecuanṑse'.

E'ñe yame'ñeñoña atetcha' enterrey Yompor ñerra'mrrate' e'ñe puechemery Abraham

26 Tarro'mar te'pa' e'ñe yeparrocmateñoḥ Cristo Jesúsapa' o'ch puechemer perrey allohueney Pompor, tarro'mar e'ñe yame'ñeñoñ Puechemer.

27 Ñaña allohuenes ñeñtes o' sapataretterra e'ñe same'ñeñoñ Cristopa' o' chorrerrsa Cristo.

28 Ñaña te'pa' e'ñe yeparrocmateñoť epay Cristo, Yomporpa' ama po'poñe'ttsocmaye' entenye, e'ñe attecma enteney allohueney, ama't judionesha', amapa' ñeñť ama judioneshayaye, amapa' ñeñť ataruasatareť e'ñe atťa, amapa' ñeñť ama ataruasatareťeye e'ñe atťa. E'ñe attecma enteney allohueney ama't asheñorrey, ama't ñaña coyanesha'. Tarraña Yomporpa' e'ñe attecma enteney. Tarro'mar e'ñe yeparrocmateñoť epay Cristo Jesús e'ñe puesheña'ttsoypa' o'ch e'ñe yeparrocmatua allohueney e'ñe parro.

29 Ñaña ñerra'm yapa' Cristona'tareypa' añña Yomporpa' e'ñe atet enteney ñerra'mrrate' po'mireneñ peney Abraham. Ñeñťo'marña yapa' o'ch yagapapreter ñeñť atet Yomporpa' otan ahuat Abraham ñeñťcha' atet a'nacha.

4

Atto Cristopa' a'huañaamperran acheñenesha' atto añcha'nochtanete't ahuat ñoñets ñeñť atet anaret

1-2 Ñeñť notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allemPOCH o'paterrana ora allpon echen pompor. Ñehua, ama't yeñoteñ ñapa' o'ch o'paterrana ora allpon echen pomporpa' tarraña allemPO ama po'nenapa' amach es o'patena' ama't coñe'ta. Ñaña allemPO ama po'nenapa' amach errotenoť es pa'yesoña e'ñe ñoña, tarro'mar allemPOpa' chocma eñall puesheñarr ñeñť cohuañpene', ñaña allemPOpa' chocmach es tsa'teññañet ñeñť cheshar. AllemPOña atet penapa' chach ottena ñerra'mrrate' atťa ñañreteñet, ama't ora allpon echeneñ pomporpa' ñocpañ. Tarraña esempoña chap pompor ponañcho allemPOCH po'n puechemerpa' allemPOña'pa' o'ch agapan ora allpon echen pompor.

3 Ñeñťpa' atet yepe't yaña ahuat. AllemPOpa' atet yepe't ñerra'mrrate' cheshaneshas'. Ñaña allemPOpa' añña yame'ñataye't ñeñť pocta'ña pa'yese't ahuatñaneshas' arr patsro.

4 Tarraña allemPOña o' etsota allemPO onañche' ahuat Yomporpa' o' mueñonay Puechemer arr patsro. Arrña'pa' eñalletach puesheñarr coyanesha' ñeñť judiona'tar. Añña ñoñets ñeñť atet anaret judioneshacoppa' nanac añcha'nochte't allemPO ama't ñocop.

5 Tarraña Cristopa' añecop eñalleta attoch a'huañaamperry atto añcha'nochtana añ ñoñets yocop. Ñeñťpa' añecop atet pa' attoch puechemer perrey Yompor.

6 Te'ña Yomporpa' o' puechemer perrey ñeñťo'mar o' mueñerrnay Puecamquëñ ñeñťcha' yeçherrtsa yeyoçhro.

Ñeñtña Puechemer Puecamquëñpa' ñeñtcha' yeñotatene' ñerra'm esempo yeçhore'ch ama't Paretspa' e'ñe pocte' o'ch yoch, "Apa."

⁷ Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ñoçh o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt atet anaret judioneshacoppa' ñeñtpa' e'ñech orrena nanac yetorrerra

⁸ Ahuat allempo ama señoterra' ñeñt e'ñe po'ñoçh Yomporpa' aña seyomporer sepe't ñeñt po'ñoçh ama Yomporeyaye. Sañapa' ñeñta nanac ame'ñatasete't.

⁹ Tarraña te'pa' o' senterr ñeñt e'ñe po'ñoçh Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepurrerra, o'ch alla same'ñerra añ co'tapñats ñeñt ama es sherbeno sañapa' allo'ch po'noçh sequeshperra. Eso'mare't semneñña o'ch alla setorrerrerr nanac ñeñt e'ñe orrena.

¹⁰ Ñaña sapa' çhocma sona'ña'yaen yet ñeñtcha' atet setsotayen atto'ch sequeshperrañ—puema'tets arorr, ñaña pate'tets char, amapa' allempo çhocma coshena judionesha'.

¹¹ Ñeñto'marña nellquëño'tpa' atet noten, ñeñt atto netorrrena ahuaña socoppa' ñato' amach es sherberro.

Arrpa' allyerpatanet atto ñetpa' e'ñe cohuen agapet allempo ñanom asena' Galacio

¹² Te'pa' o'ch masheñeshacha' ñaña noçhaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' poctapña. Te'pa' o' noctape'cherr ñeñt atet sepe't ahuat sa, allempo ama soctape'cherrñaña' judionesha' poctapña. Ahuañmo'cha allempo allo'tsenen seshopa' e'ñe cohuen semuera'ne't.

¹³ Sapa' seño'tuenen atto napa' allempo ñanom neçhap seshopa' napa' çha natsna'tos ñeñto'mar allempopa' eñall attoch neserrpare'tatas añ ñoñets alloch yequeshperra.

¹⁴ Ñaña ama't añ atsnañtsorpa' nanac sosey nenteñpa' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen atette'ña ñerra'm Yompor po'millaño'teñer huetsa sesho, ñaña e'ñe atet sagapuen ñerra'mrrate' naña Jesucristotets.

¹⁵ Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'chçho' sapuen, ñaña ama't aña'

nepalltañe't neclle'pa' napa' neñotenes ñerra'm erroteno't serrotañ seclle'pa' ama't ñeñtpa' ñeñtte' sapnoñe't.

16 Ñato' sapa' čha'te' sotenapañ čhote' o' ne'moñe'tas, tarro'mar napa' o' neserrpare'tatas ñeñt e'ñe po'ñočh atet noten.

17 Po'potantañ ñeñt seyčhatene' judionesha' poctapñapa' ama't nanac ma'yočhretenañ socoppa' tarraña ñeñtpa' ama añecpayaye attoch yenpaset e'ñe po'ñočh. Ñetpa' añecpa mopa'tenset attoch o'ch socshapretanet nanac e'ñe ñañeñeta.

18 Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ñočh añecop yema'yočhrena attoch yeyenpanet e'ñe po'ñočh. Atet napa'čho'ña nemeñ čhocmach socshapretna ama't allempo ama allo'tsenye parro.

19 E'ñe nemorrenteño'tes atet nentenes ñerra'mrrate' nechemereshas, ñaña te'pa' alla nemueročhterrerr socop. Atet nanen atserr atette'ña coyanesha' atsotenaya pue'mar. Tarraña napa' čhocmach nemueročhta esempohuach e'ñe chorrasa Cristo, attoch ñach soctape'chaterre' e'ñe poctacma cohuen.

20 Esuaca' alla nene' tayecma sesho attote' neserrpare'tatas e'ñe cohuen, allochñapa' amate' čha muene' neche'ptare'taso. Tarraña ñeñtpa' amach erroteno't, po'ñočhpa' čhocma sellcatenen.

Te'pa' e'ñe yame'ñeño't Cristopa' o'huañcha' yeyemta añ ñoñets ñeñt atet anaret; ñeñtpa' añ toma'ntena Agar ñaña Sara

21 Ñehua, te'pa' o'ch se'mñnoten sa ñeñtes muenets o'ch alla seyemterra añ ñoñets ñeñt atet anaret ahuatoteñ. Sapa' ama't seño'teñe ñeñt atet oten añ ñoñets ñeñt atet anaret.

22 Ñehua, te'pa' o'ch neñotatas ñeñt atet oten ñoñets ñeñt atet anaret Yompor po'ñoño ahuatoteñ. Ñeñtpa' atet oten: Abrahampa' eñall epsheña puechemer. Puesheñarrpa' arro't chemere't pueñañresho't ñeñt pa'taruasañer pe't. Ñeñt coyanesha'pa' añ sochena Agar. Po'psheñeññapa' e'ñe puetaporesho't chemere't ñeñt ama pa'taruasañreyaye.

23 Ñeñt puechemer ñeñt eñalletatsa pueñañresho'tpa' atet eñalleta ñeñt e'ñe attecma yeyečquëna allohueney acheñey. Tarraña po'poñ puechemer ñeñt eñalletatsa puetaporesho't ñeñt ama pa'taruasañreyaye ñeñtpa' añecop eñalleta attoch etsota Yompor po'ñoñ ñeñt atet otan ahuatoteñ Abraham.

24 Ñeñt atet papa' ñeñtpa' añ yečhateney tarro'mar añ epsheño'mar coyanesha'pa' añ toma'ntena atto Yomporpa' epsheño't a'poctatonay. Ñeñt Agarpa' añ toma'ntena atto Yomporpa' eñorana'tanet ahua't Sinaí'pno. Allempo'teñ anaretta añ ñoñets ñeñtcha' atet etsotetañ. Ñeñtña ñoñetspa'

añ toma'ntena Agar, tarro'mar ña puechoyoresha'pa' añ
amcha'nochtana'tenahuet añ ñoñets ñeñt atet anaret.

²⁵ Agarpa' po'ñoçh shallchenana aspenet Sinaipen ñeñt
Arabio'tsen. Ñaña ñeñtara Agarpa' toma'ntenana judione-
sha' ñeñt pa'netser pene' Jerusalén. Tarro'mar allohuen
judiona'tarpa' teme'ttsen añ amcha'nochtana'tenahuet añ
ñoñets ñeñt atet anaret ahuatoteñ.

²⁶ Tarraña ñeñtey ame'ñenaya Cristopa' añ ñoñets ñeñt
atet anaret ahuatoteñpa' ama amcha'nochtano yocop. E'ñe
yame'ñeñoña allohueney Cristopa' e'ñe cohueno'tseney. Ñaña
ñeñtapa' e'ñe cohuen yenteñ atet ñerra'mrrate' yachor. Ñaña
ñeñtapa' atetcha' netma'ntatererr atet: E'ñe yeparrocmateño
allohueney epay Cristopa' e'ñe attey ñerra'm Yompor
pa'netser etserra Jerusalén, ñaña ñeñtapa' e'ñe atet yenteñ
ñerra'mrrate' yachor.

²⁷ Ñeño'marña atet anuaret Yompor po'ñoñ ahuatoteñ,
ñeñtapa' atet oten toma'nteñtso:

Coshepa' coyanesha' muechoj ñeñt ama achyore'tño, ñaña
pocsheñesho'pa' rranare'tepa' ñeñt ama't ahuatapa'
ama patsotarano pue'mar, tarro'mar ama't añ coy-
anesha' ñeñt aquechparet mame' (ñeñtara Sarapa')
shonte'ch acheñenesha' pachor perre'. Elloch metan-
erran allpon puechoyor echen ñeñt agapue' puerrollar
(ñeñtara Agar).

Ñeñt ñoñetspa' añ toma'ntena atto te'pa' yame'ñeñoñ Cristo
ñeñtña nanac sherbets attoch atonterra acheñ ñeñtcha' puey-
ochresha' perr Yompor. Tarraña ñoñets ñeñt atet anaret
ahuatoteñpa' ñeñtapa' ama tama sherbeno attoch atonterra
ñeñtcha' pueyochresha' perr Yompor.

²⁸ Ñehua, o'ch notas masheñeshacha' ñaña nochaneshacha',
allohueney ñeñtey ame'ñenaya Cristo, yapa' attey ñerra'm
Abraham puechemer ñeñt Isaac ñeñt eñalletatsa attoch etsota
Yompor po'ñoñ ñeñt atet otoñ pompor Abraham. Tarro'mar
yapa'cho'ña attoña ye'ñalleterra ello attoch etsota Yompor
po'ñoñ ñeñt atet ote't ama't ahuatoteñ.

²⁹ Tarraña ñeñt eñalletatsa ahuat ñeñt e'ñe attecma
yeyeçhquèna allohueney acheñey (ñeñt sochet Ismael) ñapa'
çocma e'moñe'tane't ñeñt eñalletatsa atto etsota Yompor
po'ñoñ. Attecmach perra ñaña te'. Ñeñtcha' eñalleterrtsa ñeñt
e'ñe attecma yeyeçhquèna allohueney acheñey ñeñtara ñeñt
muenene' o'ch etsotan judionesha' poçapña ñetpa' çocmach
e'moñe'tenyet ñeñtey eñalleterrtsa Yompor Puecamquèñoñ.

³⁰ Ñehua, ama't señoñeña ñeñt atet oteney Yompor po'ñoñ
ñeñt anuaret ahuatoteñ. Po'ñoçh oteney atto Yomporpa'

otan ahuat Abraham ñeñt'pa' atet och: "O'ch pehuapore'ch peñañra epuet puechoyor, tarro'mar ña puechoyorpa' amach es o'patapreta'po, amach atteye' po puechoyor ñeñt' eñalletatsa pe'aporesho' ñeñt' ama pa'taruasañreyaye."

³¹ Ñeñto'marña te' masheñneshacha' ñaña nochaneshacha' o'ch alla noterrerr: Ama pallteno o'ch yame'ña judionesha' pocta'pña. Ñato' o'ch netma'ntacha atet: Ama puechoyoreyaye Abraham pueñañra ñeñt' pa'taruasañer e'ñe atta. Añña puechoyorey Abraham puetapor ñeñt' ama pa'taruasañreyaye. Ñeñtara ñeñt' yoten e'ñe yame'ñeñoña Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yeque'hpastere

¹ Cristopa' o' a'poc'aterrnay attoch e'ñe yame'ñeño'tpa' cohueno'tseneycha'. Attoch yocoppa' amach añcha'no'chtano ñoñets ñeñt' atet anaret' judioneshacop. Ñeñto'mar te'pa' amach allo'na same'ñatsterrerro judionesha' pocta'pña ñeñt' nanac amuero'chtatañ. E'ñepa'chña huomenc se'pa' seyo'cher Cristocop.

² Ñehua, te'pa' o'ch se'mñoten na ñeñten allsensareten ñeñt'cha' atet notas: Ñeñt' atet seyemtenañ atto'ch seque'sh-perra e'ñe setsorranna'teño'tapa' tarraña ñeñto't Cristopa' amach erro'teno't yenpaso.*

³ Tarraña te'pa' o'ch alla noterrerr, ñeñt' muenets o'ch atsorrare'tapa' ñehua, po'ño'ch añ palltetsa ñaña o'ch e'ñe etsotuan ama't ñaña allohuen ñoñets ñeñt' atet anaret' judioneshacop.

⁴ Ñeñtes muenets o'ch pocte' entas Yompor e'ñe setsoteño't ñoñets ñeñt' atet anaret'pa' sañapa' o' alla seque'hpuerña Cristo. Ñeñto'marña te'pa' amach erro'teno't muererrso Yompor.

⁵ Tarraña yapa' e'ñe yeyemteño't Cristopa' e'ñe yocsheñesha' yecuen esempohuañencha' ye'chacherr Yompore'sho tarro'mar yeñoteñ o' pocte' entuerrey Yompor. Ñaña e'ñe ña Puecamquëño't te'pa' o' ya'poc'ataret'terra.

⁶ Ñerra'm o' yeparrocmaterr epay Cristo Jesús'pa' ama sherbeno atto yetsorranna'tena, ñaña ama't ama atsorrare'teyepa' ñeñt'pa'cho'ña ama sherbeno Yomporecop. Aña ñapuet' sherbets e'ñe yame'ñeño't Cristopa' o'ch yemorrentanna'ta.

* 5:2 O'ch secue' nota 2.3.

⁷ Sa ahuañmo'chapa' e'ñe cohuen same'ñye't Cristo. Te'ñapa' po'ño'chca'ye o'cha a'psaterrsetña añ ñoñets ñeñt e'ñe po'ño'ch Yompor po'ñoñ.

⁸ Ñeñtpa' ama Yomporeye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo.

⁹ Ama't seño'teñe ama't puesheñarra ye'chatats po'poñ ñeñt ama po'ño'choyayepa' mameshapa' o'ch epa'hua erracmañen ñeñt atet ye'chaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa.

¹⁰ Tarraña ñeñt semoññe'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteño't Yepartsesharpa' neñotenes te'pa' o'ch alla seque'chpuerr ñeñt atet ye'chatenes po'psheñeñ, o'ch alla same'ñerra ñeñt ney'chatenes.

¹¹ Ñato' napa'cho'ña 'chate' otyennet año' neserrpare'taten o'ch yetsorranna'ta attoch yequeshperra. Ñehua, masheñneshacha' ñaña no'chaneshacha' ñerra'm po'ño'ch ñeñtara neserrpare'tateneñ atetpa' amate' erro'teno't e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ño'chpa' ama atteye' neserrpare'tateno. Añña neserrpare'taten atto Cristopa' rroma corsocho yocop atto tsa'tuernaya yo'chñiar, allochñapa' e'ñe yame'ñeño'ña ñapa' o'ch yequeshperra. Ñeñtña atet neserrpare'teño't añña ñeñt serrpare'tene' o'ch yetsorranna'tapa' ñetñapa' ñeñtña nanac atsrre'matenahuat. Ñerra'm o'huañcha' atet neserrpare'tañpa' o'huañte' e'moñe'tnetañ.

¹² Napa' atarr nemneñ ñeñt 'hocma semoññe'tatene'pa' o'te' alla que'chpa'nerres.

E'ñe yemorrenteño't yamo'tspa' o'ch e'ñe yetsotua allohuen ñoñets ñeñt atet anaret Yomporeshot

¹³ Tarro'mar sa masheñneshacha' ñaña no'chaneshacha' o' hua'ñerres Yompor attoch cohueno'tsenescha'. Ñapa' ama mueno o'ch añcha'no'chtana socop ñoñets ñeñt atet anaret. Tarraña ama't o' hua'ñerrey Yompor attoch cohueno'tseneypa' ñeñtpa' ama añcepayaye o'ch ye'pa'yesa nanac sosey ñeñt atet muenateney yechets. Ñapa' mueneñ e'ñe yemorrentanna'teño'tpa' o'ch yeyenpanna'ta, tarro'mar yapa' cohueno'tseney.

¹⁴ Ñerra'm 'cho yemorreñcha yamo'tspa' ñeñtpa' attoch ama't e'ñe parrotapa' o'ch yetsotua ora allohuen ñoñets ñeñt atet anaret ahuatoteñ Yomporeshot, tarro'mar Yompor

po'ñoñpa' oteneý: "Atarrepa'ch semorreñcha samo'ts e'ñe atet atarr semorrentena sañeña."

15 Tarro'mar ñerra'm sapa' chocma se'moñe'teñ samo'ts, amapa' cha amtsen senteñ samo'ts, ñeñtpa' ama pocteyaye atet sepena, tarro'mar ñerra'm atet sepenapa' señochepa'ch attocha'ña chach sa'chencatannerra e'ñe sagattsa.

Ñeñt atet cotape'chateney Parets Puecamquëñ, ñaña ñeñt atet muenateney yechets

16 Tarraña napa' o'ch notas ñeñt poctetsa ñeñtcha' atet sepa. E'ñepa'chña cohuen socrrena Partsocop ñeñt atet cotape'chatenes Parets Puecamquëñ. Allochñapa' amach allo'na sepa'yesneno ñeñt atet muenatyenes sechets.

17 Tarro'mar ñeñt atet muenatse'tateney yechetspa' ñeñtpa' ama yemtenano ñeñt atet cotape'chatyeney Parets Puecamquëñ. Añpa'cho'ña Parets Puecamquëñpa' ama yemtenano ñeñt atet muenatse'tateney yechets. Ñeñto'marña amach errotenot yocape'cho e'ñe patrra cotapñats, tarro'mar ñetpa' cha e'moñe'tannenet.

18 Tarraña ñerra'm po'ñoçh yeþa atet cotape'chateney Parets Puecamquëñpa' allempopa' amach errotenot añcha'noçhto yocop añ ñoñets ñeñt atet anaret ahuatoteñ, tarro'mar ñapa' añcha' þateney ñeñt atet muenen Yompor.

19 Ñehua, yapa' o' yeñotuer ñeñt atet muenatse'tateney yechets. Ñeñt allpon yemnatse'tyenpa' ñeñtpa' atet ñerra'mrrate' erra'tsente' cheta'yene' coyanesha' ñeñt amach pueþaporeyaye, atet ñaña erra'tsente' coyaneshar ñeñt cheta'yene' yacma ñeñt ama puerrollareyaye, ñaña atet ñerra'mrrate' ñeñt nanac cotape'chyene' sosya'tsañ, ñaña ñeñt nanac yomenaya ottatsñats.

20 Ñaña ñeñt po'yomporer þa'yene' po'poñeçhno ñeñt ama po'ñoçh Yomporeyaye, ñaña atet pena achyo'tañeçhno, amapa' ñeñt atet pena pa'llerrnanesha' ñaña ñeñt atet pena amase'ñeñt. Ñaña po'poñ ñeñt atet muenatse'tyen yechetspa' ñeñtpa' atet ñerra'mrrate' e'moñe'tanna'teñets, ñaña orroteñets, ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptanneñets atto amach e'ñe amo'tstanneneto, ñaña atet pena ñeñt cotape'chyene' po'poñ cotapñats ñeñt ama po'ñoçhoyaye.

21 Ñaña po'poñeçhno ñeñt atet muenatse'tyen yechetspa' atet ñerra'm ye'chapreteñets, ñaña muetsanna'teñets, ñaña posa'tarñats, ñaña arepsarñats porrare'teñoñ, ñaña eñallmeñ po'poñeçhno shonte' attema't ñeñt atet o' notua. Te'pa' o' alla noctape'chaterrserr ñeñtara atet notuanmas ama't ahuaña,

ñeñt atet petsapa' amach es o'patatereto all añcha'tareñtena Yompor.

²² Tarraña ñeñt pene' cohuen ñeñt atet yeçhateñ Parets Puecamquëñpa' ñeñtpa' atetcha' pena, o'ch morrentenana pamo'ts, ñaña e'ñech cosha'huen pueyoçhro Yomporecop, ñaña amach es llecatenaye ama't e'ñe mamesha, e'ñech ahuinta'huenan allohuen ñeñt echarr entyen. Ñaña ñeñt pene' cohuen ñeñt atet yeçhateñ Parets Puecamquëñpa' o'ch amuerañtena, ñaña o'ch yenpa'yenan pamo'tsesha', ñaña erro't o'pa' atetcha'çho' pena.

²³ Ñaña amach atsre'ma'peno ñaña e'ñech puetpara es pa'yen. Ñerra'm ñeñña atet o' yeçhohuapa' o'ch yetsotua allohuen ñoñets ñeñt atet anaret Yomporeho't.

²⁴ Ñaña ñeñt po'ñoçh o' pueyochresha' perr Cristo Jesús pa' o' hueneran ñeñt atet muenatse'tyen yechets ñeñt atto es yeye'chyena ya acheñey. Ñeñtpa' e'ñech atet yentena ñerra'm acorso'tamñsaretey.

²⁵ Atto Parets Puecamquëñpa' o' apuerrey attoch yocrrerra e'ñe cohuen Yomporecop, te'pa' añ pocte' o'ch yeça'yena e'ñe cohuen ñeñt atet co'tape'chateney Parets Puecamquëñ.

²⁶ Amachña çha yommo'chueno, ñaña amach çha es yotnare'tanna'tyeno, ñaña amach çha yeye'chapretanneno.

6

Añ pocte' çhocmach yeyenpanna'ta attoch yemesha allohuen topateñets

¹ Ñaña o'ch masheñneshacha' ñaña noçhaneshacha' notas, ñerra'm esempo seño'teñ po'psheñeñ o' pòhua ñeñt ama pocteye' enteno Yomporpa' sa ñeñtes o' co'tape'chaterres cohuen Yompor Puecamquëñpa' sach alla co'tape'chatterahuet cohuen attoch alla tanterret Yomporecop. Tarraña e'ñe semuereño'tpa' e'ñech acopa so'tape'chatanet cohuen. Tarraña sapa'çho'ña e'ñech seño'ta, te't sapa'çho'ña attecma sepa samña ñerra'm esempo topatenes oneñet o'ch patenes ñeñt ama pocteye' enteno Yompor.

² Ñaña añ poctetsa çhocmach yeyenpanna'ta attoch ya'huinta'hua allohuen topateñets. Ñerra'm atetña yeçhohuapa' o'ch yetsotuoñ Cristo po'ñoñ ñeñt atet oteney o'ch yemorrentanna'ta.

³ Ñerra'm esesha' pommo'cheño't oten, "napa' ama çho es neyeçhcateno Yomporecop ñeñt ama pocteyaye", ñeñtpa' ñañañach shequëtsa, tarro'mar po'ñoçh ñeñt atet acheñpa' amach es sherbeno Yomporecop.

4 Tarro'mar puesheña'ttsoypa' čhoch ñanom yeñota errofente'ña yocrrena. Ñerra'm yeñotena e'ñe po'ñoč cohuen yoctape'chen yeyočhropa' ñeñtña nanac acsha'po'. Tarro'mar ama acsha'pahuo ñerra'm esempo yeñch po'psheñeñpa' o' pōhua ñeñt ama pocteye' enteno Yompor.

5 Ñaña añ pocte' e'ñe puesheña'ttsoy o'ch ya'huanten topateñets ñeñt yehuenoya.

6 Ñaña te'pa' o'ch notas po'poñ: Ñeñt e'mñotene' Yompor po'ñoñpa' añ pocte' o'ch es cohuen apa'yeset ñeñt yečhatenahuet Yompor po'ñoñ.

7 Amach sepantatsche, o'ch señoč po'ñoč Yomporpa' ama allocchame'tpahuo. Tarro'mar ñerra'm yeyečcaten ñeñt cohuentetsa Yomporecop arr partsropa' ñach yapuerre' ñeñtcha' yocshaterre' tsapaonet. Tarraña ñerra'm yeṑa'yes ñeñt ama cohuenayaye, ñeñtṑa'čo'ña ñach yetsa'taterraya esempohuañen. Ñato' o'ch netma'ntacha atet. Ñerra'm es yenare'tpa' ñeñtcha'čo' emere'tats tsapaonet.

8 Attecma ñaña ñerra'm ñaña yeṑatse'tyen ñeñt atet muenatse'tyen yechetspa' ñeñtara ñeñt yeṑa'yenapa' a'chencataterreycha'. Tarraña ñerra'm añ yoctape'chen cohuen ñeñt atet co'tape'chateney Parets Puecamquēñpa' ñeñtara Puecamquēñoṑpa' yocrrerrach esempohuañen. Ñato' o'ch netma'ntatererr atet: Ñerra'm te'pa' e'ñe cohuen yenare'ten, tsapaonetpa' nanaccha' coshaterrey. Tarraña ñerra'm te'pa' ama cohuenaye' yenare'teno, tsapaonetñapa' nanaccha' llecaterrey.

9 Ñaña amach yemuenme'chatsche ṑa'yese' ñeñt cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñtcha' yocshaterre' ñerra'm amach čha yequečhpue. Ñato' o'ch netma'ntatererr atet: Ñerra'm te'pa' ama yemuenme'cheñe nare'tatspa' tsapaonetñapa' nanaccha' shonte' me'tarsats.

10 Ñeñtō'marña te'pa' o'ch notas: Chocmach yeyenpa'yes allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm čho yeyenpueñ yamo'ts ñeñt parro o' yame'ñera Cristo.

Arrpa' all so'terranet añ cartot

11 Te'pa' e'ñe na nototpa' o'ch nequellconas mame'. Sapa' o'ch sent ñeñt ateshaclo'yerr quellecpa' ñeñtṑa' na quel-lquēne'.

12 O'ch alla noterrser: Ñeñt muenene' o'ch tsorrataspa' añecpa mueneñet attoch judionesha'pa' o'ch cohuen entanet.

Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch serrpare'tet atto e'ñe yame'ñeñoŧa Cristo ñeñt' rromats yocop o'ch yequeshpapa' añña judionesha'pa' o'ch e'moñe'tanetpa' o'ch cotare'tanet.

13 Tarraña ama't ñeñt' o' atorrareŧetuapa' ama ame'ña'hueneto allohuen ñoñets ñeñt' atet anareŧ judioneshacop. Ñetpa' añña muenenet e'ñe same'ñeñoŧ ñetpa' o'ch tsorreatenset attoch ñetpa' o'ch ommo'chuernaset judioneshesho sechets.

14 Tarraña napa' ama't ahuatapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepartseshar Jesucristo ñeñt' rromats corsocho yocop. Ñeñtña name'ñeñoŧ o' neunerr ñeñt' atet nemnatse'tyese't ahuañmo'cha ñeñt' patso'marecpa. Te'pa' o'huañ nommo'cha ñeñt' patso'marecpa. Napa' atet nentena ñerra'm acorso'tamŧsareŧen.

15 Ama't ya'tsorrareŧtatstapa' ñeñt'pa' ama es sherbeno. Ñaña ama't ama ya'tsorrareŧtatstopa' ñeñt'pa'cho'ña ama es sherbeno. Añña nanac sherbets Yomporecop, o'ch yetser-rataterr yocŧaŧña, o'ch yeyeŧquerra etserra Yomporecop.

16 Yomporepa'chña sa'nataya allohuenes ñeñtes atet petsa ñeñt' atet o' notuas ñeñt' cohuentetsa Yomporecop. Ñaña Yomporepa'chña semueraya allohuenes ñeñtes po'ñoŧh Yomporena'tares.

17 Te'pa' ama pocteyaye ama't puesheñarrapa' o'ch alla orrtaternnanerr ñeñt' atarr echarr nenten nocop tarro'mar ñeñt' atet neyŧchatenpa' ñeñtña po'ñoŧh Yompor poctapña. Tarro'mar teme'ttsen orretyena nechets all mareŧa'yena all atserrŧatse'tyesnet ahuañmo'cha. Te'pa' ñeñtña eñotatyenuet po'ñoŧh napa' neŧorraena Jesúsocop ñeñt' Yepartseshar yepen.

18 Te'pa' ñeñt'ach masheñneshacha' ñaña noŧhaneshacha' notas, Yepartsesharepa'chña sa'nataya, ñeñt'ara Jesucristopa' ñepa'chña semueraya. Ñeñt'pa' attetepa'chña Nompore. Allo-hua.

Pablo

AÑ SAN PABLO PO' CARTA ÑEÑT QUELLCAN EFESO MARNESHA' EFESIOS

Atto Pablopa' quellcan carta añecop ñeñt ame'ñetsa anetso Efeso

¹ Masheñneshacha' ñaña nochaneshacha' ñeñtes allohuenes pueyochresha' o' perres Parets ñeñtes ame'ñenaya Cristo Jesús all anetso Efeso. Na Pablon sequellquëne'ña añ carta ñeñten Jesucristo puellsensaren tarro'mar ñeñtpa' atet muenen Yompor.

² Te'pa' e'ñe nehuomñcha'teñoñes sa, napa' o'ch notas: Yomporepa'chña sebensare'tañpene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyoçhro allohuenes.

Atto Yomporpa' e'ñe pa'nateñoñey çhocma apueney ñeñt atarr cohuen sherbets yecamquëñecop

³ Te'pa' aye'choçhtatpahuëpa'ch Yompor ñeñt Pompor pen Yepartseshar Jesucristo. E'ñe yeparrocmateñoñ epay Cristo, Pomporñapa' e'ñe pa'nateñoñey çhocma cotape'chateney ora allpon ñeñt esocmañen coçhnesha'tetsa all pue'ntaño ñeñt atarr sherbets yecamquëñecop.

⁴ Atet ahuañ pa'motroteñ allempo ama ayeçhcatarettena' añe patserpa' Yomporñapa' allempoteñña acrañperrey parro epay Puechemer Cristo attoch yapa' a'parrocmataterreycha' epay Puechemer. Tarro'mar añecop acrañperrey Puechemereshoñ allochña yapa' añach e'ñe yema'yoçhrena ñeñt cohuentetsa Partsocop. Allochñapa' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha.

⁵ Ñapa' atarr morrentenya; e'ñe puemorrenteñoñeyapa' o' e'ñe a'pocatonay yocop ama't ahuañoteñ. Ñeñtpa' attochña e'ñe puechemer perrey. Ñeñtpa' añña e'ñe etsotatuierre' Puechemer Jesucristo. Yomporpa' e'ñe atet a'pocatuonay tarro'mar ñeñt atto morrentya ñapa' atetña muenen.

⁶⁻⁷ Aye'choçhtatpahuëpa'ch Yompor atto ñapa' atarr nanac cohuen muerenya. Atto ñapa' ahuo't mueñonay Puechemer Cristo ñeñt rromosets yocop. Atto ashataretta po'rras ñeñtpa' alloña tsa'tuerrnaya yo'chñar. Te'ña ya e'ñe yeyemteñoñ Puechemer, Pomporñapa' attoña o' e'shohuerrnay ñeñt yo'chñar yepe't. Ñeñto'marña yapa' yeñoteñ ñapa' atarr morrentenya. Atto atarr morrentenana Puechemer

Jesúspa' yapa'cho'ña attecma atarr morrentenya e'ñe yeparrocmateñoť Yompor Puechemer.

⁸⁻¹⁰ Yapa' yeñoteñ Yomporpa' atarr morrentenya tarro'mar ña te'pa' o' eñotatuerrey e'ñe ora ñeñť atet cotape'chen ña ama't ñeñť ama eñotpahuo ahuatoteñ. Ñapa' o' e'ñe eñotaterrey yeyo'chro ñeñť atet muenen ña. Ñeñťpa' añña atet muenen ña: Ñerra'm esempoch chap allempoch etsoterra allempo onañche' ahuat Yomporpa', allempoña Cristo ñach etsotatuerrey' allohuen ñeñť allpon eñall, ama't ora allpon ñeñť pue'ntaño'tsa'yen ama't ñaña ora allpon ñeñť añe pat-sro'tsa'yen. E'ñech Cristesho a'yapa'cha'huerret allcha'ña e'ñe yeparrocmatuerr allohueney.

¹¹ Yomporpa' atarr co'chnesha' o'patatenana Puechemer Cristo. Ya'ñaña e'ñe o'patatena atto e'ñe yeparrocmateñoť Cristo. Ñehua, ñeñťpa' atet cotape'che't Yompor ahuat yocop. Ñeñťo'marña te'pa' atetña o' perrnay ñeñť atet cotape'che't ña ñeñť e'ñe pocte' ente't e'ñe ña pomnenñoť. Tarro'mar Yomporpa' ama puenesho po'ñoñ, 'chocmach e'ñe etsotuerra ñeñť allpon atet onañchen ña.

¹² Ñeñťpa' atet e'ñe cohuen ponay Yompor allochñapa' attochña ya'ye'cho'chtaterrñañ ora allohuen ñeñť po'cohuenña pen ña, allohueney ya ñeñťey yanom o' yeyemterrñaña Puechemer ñeñťara Cristo.

¹³ Sapa'cho'ña te'pa' o' se'muerrñañ Yompor po'ñoñ ñeñť ñoñets e'ñe po'ño'ch alloch sequeshperra saña. Attoña sapa'cho'ña o' same'ñera Cristo. E'ñe seyemteñoťa sa, Yomporñapa' o' chorraterrsa Puecamquëñ ñeñťcha' seño'tate' po'ño'ch o' puechemer perres. Ñehua, ñeñťpa' ñeñťara Parets Puecamquëñ ñeñť atet ote't ahuat Yompor ñeñťcha' apuerrey esempo.

¹⁴ Ñeñťara Puecamquëñ ñeñť apueney ñanom ñeñťpa' ñeñťcha'ña yeño'tate' orameñ ñeñť o'patatenya Yompor. Attochña ñerra'm esempo a'queshpaterrey poctacma ñeñťey o'patatena, allempochña yaguërr ñeñť allpon orameñ o'patatenya. Ñeñťo'marña añ poctetsa ya'ye'cho'chtatoñepa'ch ora allohuen ñeñť po'cohuenña pen ña.

Arrpa' atto ma'yocham'penanet Pablo

¹⁵ Ñeñťo'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñťes pueyochresha' perres Parets.

16 Ñeñto'marña napa' chocma neparasyoso'teñ Yompor allempo nema'yochamþensa.

17 Ñaña nenamuennas Yompor ñeñt Pompom pen Jesucristo, ñeñtara Yompor ñeñt atarr cohuen Partsoets. Añ nenamuennas, Yompor Puecamqueño'tpa' eñotatasepa'ch ñeñt e'ñe atet pena ña poctaþña. Attochña sapa' esheccha' señoterrña ñeñt atarr cohuen sherbets ñocop ñeñt ama't ahuata sapa' ama seño'teñe.

18 Ñaña ñapa' chapatonascha' seyoçhro attochña señoterrñañ ora allpon ñeñt po'cohuenña ñeñt yecuen ñeñtcha' aphuerrey Yompor esempo tarro'mar yapa' ñeñtecopña chore'terrey ahuatoteñ. Ñaña o'ch seño'ch atarr nanac cohuen ñeñtcha' aphuerrey Yompor, ñeñtpa' alloch yapa' corretsayach errponañohuen allohueney ñeñtey pueyochresha' pen.

19-20 Ñaña te'pa' o'ch señoterrñañ Yompor po'huamenc atarr nanac huomenc ama atpa'huapahuo ñeñt atet ahua-mencat peney allohueney ñeñtey ame'ñenaya ña. Ñeñtpa' ñeñtara po'huamenc ñeñt atarr huomenc orrtatan allo tantaterran Puechemer Cristo allempo rroma. O' tantater ñeñtara po'huamencot attoña chapater ñesho allña' anorruerr Pompom po'cohuenrot all pue'ntaño allña e'ñe partso'tuerr epuet Pompom.

21 Ña te'pa' atarr amcha'tarettena nanac. Atto amcha'tarettena ñapa' ñeñtpa' e'ñe metana'tuenan ora allpon allohuen ñeñt amcha'taretetyetsa ñaña ora allpon allohuen allsensaretetyetsa ñaña ora allpon allohuen ñeñt ahua-mencatetyetsa ñaña ora allpon allohuen ñeñt ayochreshatetyetsa ñaña ora allpon allohuen ñeñt cohuen entyetsa ama't allohuen so'chñetsoçhno. Cristoña po'huamencot e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña errponañohuencha' atet pena.

22 Ñaña Yomporpa' o' nan Puechemer Cristo allochña' ñach pomnaren pene' ora allpon ñeñt esocmañen eñall. Ñaña allohuen allpon ñeñt ame'ñenaya, Yomporpa' attoña apanet Puechemer allochña' ñach yochresha'tenahuet allohuenet.

23 Ñato' o'ch netma'ntacha atet: Allohueney allponey ñeñtey ame'ña'yenaya Cristo, Cristoña' e'ñe yeyoçher* yepohueñ allohueney, yañapa' Cristo po'chets yepene' allohueney. Ñeñto'mar ñeñtey ame'ñenaya Cristo e'ñe allohueney e'ñe parrocmay, Cristoña' e'ñe ña

* 1:23 Ñehua, po'ño'ch Cristopa' arr atma'ntaret atet ñerra'mrrate' ñeñt yoñ yepen.

yechorra'huenaya, tarro'mar ñapa' e'ñe po'chets ñohueney allohueney.

2

Atto Yomporpa' e'ñe puemuerenõtey ya o' a'queshpaterrey

1 Ama't atet ñerra'm sa. Sapa'cho'ña ahuaṭpa' aña soctape'chyese't ñeñt ama cohuenaye' enteno Yompor.

2 Aña seyche't ñeñt atet p̄atse'tyena acheñenesha' arr patsro ñeñt ama ame'ñetso. Allempo sapa' aña same'ñataye't oneñeñ ñeñt pa'mcha'tareter pen allohuen ñeñt erracmañen añcha'noçhetyetsa entot ñeñt ama entpahuoyaye. Ñeñtña oneñeñ poctaṭñapa' ñeñt atarr coshatene' allohuen acheñenesha' ñeñt atparñatetsa te' arr patsro.

3 Ñehua, ama't allohueney ahuaṭpa' e'ñe attecma yeyche't. Aña yoctape'chyese't ñeñt e'ñe atet yemnatse'tyen ya, ñeñt atet muenatse'tateney ya yechets ñaña ñeñt cohuen yente't e'ñe yañeña yoctaṭñoñ. E'ñe ya yoctaṭñoñ ñeñt atet yeyche'tpa' ñeñtña e'ñe yoctape'chatse'tatyesaye't. Ñeñto'marña Yomporpa' aña o'patatye't attoch coñchaterrey. Ñehua, ama't allohuen po'potantañ acheñenesha' ñeñt atet p̄atse'tyesete'tpa' Yomporñapa' e'ñe attecma o'patatanete't ñeñtara coñcheñets. Ñerra'm allempocmach yerromañpa' e'ñech yechenca'huerrañ,

4 tarraña Yomporñapa' atarr nanac amorrentña, atarr muerenya. E'ñe ña puemuerenõteypa' o' a'queshpaterrey.

5-6 Ñato' o'ch netma'ntacha atet ñerra'm o' yerroma yo'chñaroñ tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'ñaña tantaterr tarro'mar e'ñe yeparrocmaten epay Cristo. Ñaña atto çapaterran Po'cristor pue'ntaño allcha' atarr cosheñtso'tsen, ya'ñaña o' çapaterr allcha' atarr cosheñtso'tseney yañña tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yeçhap Yompor pue'ntaño allcha' yecohuentapretera Cristo.

7 Attoña Yomporpa' çocmach orrtatennay puemuerena ama't errponañohuen. Attoña o' çaphuonaya yeyoçhro Yomporpa' atarr muerenya nanac. Atto atarr muerenana Po'cristor ya'ñaña atarr muerena tarro'mar yapa' yeparrocmaterrñaña Po'cristor ñeñtara Jesús.

8 Tarro'mar po'ñoçh e'ñe puemuerenõtey Yomporñapa' a'queshpaterrey e'ñe yeyemteñoña ña. Ama añoteye'ña a'queshpaterreye atto e'ñe cohuenare' es yepa'yen ya. Yomporpa' e'ñe atta a'queshpaterrey.

9 Ñaña ama yetorreñoŕe'ye' ñocop a'qeshpaterryeña Yompor attoch tsa'terrya ñeñt allpon yetorra ñocop. Tarro'mar ñerra'm e'ñe yetorreñoŕa ya'qeshpaterñañ, yañapa' chate' atarr cohuen yentena yañeña ñeñt atto ya'qeshpaterña. Allempoña Yomporpa' amate' a'qeshpaterña'ye' yenteñe.

10 Tarraña Yomporpa' o' etserrataterrnay yocpañña allochña'pa' attoch e'ñe cohuen es yeŕa'yen. Po'ñoŕh e'ñe yeparrocmateñoŕt Cristo, Yomporña'pa' o' etserra yeŕhcaterrey. Tarro'mar ñapa' ama't ahuaŕoŕeña'pa' atet coŕape'che't yocop attochña yapa' e'ñepa'chña cohuenare' es yeŕa'yen.

Cristopa' e'ñe cohuen amo'tstatanna'tña allohuenacop

11 Ñehua, te'pa' o'ch alla seyerpuerra ñeñt atet sepe't ahuaŕ. Allempopa' atarr allaŕaro'tsa'yenes Yomporeshoŕ. Ñehua, sapa' atet eñalletñas ama judioneshayayso. Añña ñeñt atet eñalletena judionesha' ñetpa' aña yeŕchenet o'ch tsor-rannenet. Ñeñŕo'marña ñetpa' otarettenet atsorrareñnesha'. Ñeñŕo'mar ñet sañapa' atta sochatse'tenset sapa' año' atsorrareñneshayayso año' puechemereyayso Yompor.

12 Po'ñoŕh allempo sapa' atarr allaŕaro'tsa'yenes Cristeshoŕ tarro'mar ama separrocmaterra' epas. Ñaña ama't israelena'tarnesha' ñeñt otenet Yompor pueyochresha', sañapa' ama parro'marneshayayso. Ñaña atto Yompor a'pocŕatan israelena'tar allempo otanete't ñeñtcha' atet yenpuerranet esempo, saña allempopa' ama't mameshapa' ama se'mare'tpera'. Ama es secueno ama't mamesha ñeñtcha' sa'qeshpaterre' tarro'mar allempo sapa' ama eñalle Seyomporer ñeñtcha' po'ñoŕh seyemtena samña arr patsroŕ.

13 Tarraña te' sapa' o' señoŕer Cristo Jesús ñeñt rromats ñaña socpa'na. Ashatareŕta po'rراس ama't samña so'chñarecpa'na. Ñeñŕo'marña yoten e'ñe po'rراسoŕ attoña o' chapaterres samña Yomporesho ama't sa ñeñŕes ahuaŕ atarr allaŕaro'tsa'yenes Yomporeshoŕ.

14 Tarro'mar Cristopa' atarr amo'tstatanna'tña allohuenacop. Ama't ya ñeñŕey judioneshay ñaña sa ñeñŕes ama judioneshayayso, Cristoña'pa' ahuaŕt parro'marneshatatey allohueney. Ñaña ñeñt atto atsrre'moŕhen yentanna'tyese't ahuaŕ ñaña'pa' o' huapore'tamŕesyeney ñeñt yellopa'tetstatyese't ahuaŕ.

15 Ñeñŕpa' atet pōnay Cristo allempo rroma yocop. E'ñe ña po'chtsoŕpa' o' a'huañamŕeney atto añcha'noŕhen yenten añ ñoñets ñeñt atet anareŕ ahuaŕ judioneshacop, ñeñŕara

pa'namen a'pocstateñtsoñ ñeñt atet anarettetañ ñocpuet ñeñtcha' atet p̄ohuetañ. Attoña allempoteñpa' o' e'ñe patrra yoctape'chen ñeñt atet cotape'chateney Cristo. Allempoteñña amach alla atsrre'mo'chen yentanna'tyerre'te. Ñato' o'ch yot atto ahuat allohuen acheñenesha' ellopa'tetstete't e'ñe ñet p̄octa'p̄ño'mareta, Cristoñapa' o' a'huañam̄psanet attoña e'ñe parrocmataturrey, e'ñe cohuen yamo'tstanna'tuerra allohueney.

16 Attoña epotanto'marey e'ñe yeparrocmateño't, Cristoñapa' e'ñe cohuen amo'tstaterrya ñaña Pomporesho. E'ñe puerromño't corsochopa' ñaña'apa' o' a'pocatonay Pomporesho. Atto ñapa' o' a'huañam̄perrey ñeñt ahuat atto çhocma ye'mo'ñe'tanna'tyese't.

17 Ñeñto'marña Cristopa' huapa. Ñach yeserrpare'tatose' cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr alla'p̄aro'tsa'yenes atet entyenesña Yompor. Attecma serrpare'tatosey ama't yanña ñeñtey judioneshay ñeñtey e'ñe allame'ttsa entyeny Yompor.

18 Attoña allohueney ama't ñeñtey judioneshatets ñaña ñeñt ama judioneshayaye e'ñe Cristeshotecma e'mñotenyña Yompor tarro'mar Puecamquẽña'çho'ña e'ñe patrra ñeñt yechorrenaya allohueney.

19 Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay entenyña Yompor, ama't allohuen ñeñt pueyochresha' pen Parets, tarro'mar allohueney e'ñe puechemerasha' peney Yompor. Ñeñto'marña te' sa ama atteye' entenso atet ñerra'mrrate' ñeñt ama puentare ña, o'huañ atteye' entenes ñerra'mrrate' ñeñt atta huetsa po'poñ anetsot.

20-22 Ñeñt atet entenes te'pa' ñato' o'ch netma'ntacha ñeñt atto yatōmaten pocoll. Ñehua, atto cohuen torra'yese't allohuen ñeñt allpon Yompor puellsensarnesha' epuet ñaña allohuen ñeñt allpon a'n̄ta'yese't po'ñoñ, ñetpa' añ toma'ntete't ñeñt ñanom yatōmaten allo echarr yepen yepaquẽll. Ñaña Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmatera Yepartseshar Cristo, pueconer penes ñaña pueyop̄acher penes allohuenes ñeñtes e'ñe huomenc rremuene' pocoll. Attoña e'ñe cohuen sa'yechcataretterra puepahuarr pocoll, ñeñtes pa'paquẽll o' perres Parets, attoña o' yecherra Puecamquẽñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

¹ Ñeñto'marña napa' chocma nema'yochena socop. Nesperpare'tateñotes sa Cristo Jesús ñeñtes ama judioneshayayso ñeñto'marña na te'pa' yottam̄pennet.

² Ñehua, sapa' o'te'se'mare'tuan atto Yomporpa' o'llesenserren e'ñe puemuereñoten, nach a'potene' po'ñoñ socop sa ñeñtes ama judioneshayayso.

³ Señoteñte' ñaña atto gaterren Yompor atto te'pa' o'neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necartot.

⁴ Ñerra'm esempoch selleyon ñeñt nequellquënnas allem-pochña señoçh napa' po'ñoçh o' çhapona neyoçhro e'ñe ora ñeñt atet sherbeney Cristo, ñeñt ama't ahuatoteñ ama eñotpahuoyaye.

⁵ Tarro'mar ahuaŋpa' ama çhena' allempo pocte' enteñ Parets o'ch eñotatey ya ñeñtey arromñaateneshay ama't ñeñt corretsa allempo. Ñeñto'marña allempopa' ama e'ñeye' eñotatuanete'te atet ñerra'm te'pa' e'ñe Puecamquëñoŋ e'ñe eñotatuenan allohuen ñeñt pueyochresha' pen ña atet ñerra'm ñeñt puellsensarnesha' pen ñaña ñeñt a'mtene' po'ñoñ.

⁶ Ñeñt eñotateney te'pa' ñeñtpa' atto ama't ñeñt ama judioneshayaye, ñetpa'çho'ña o'patapreteretcha' Yompor ñeñtcha' apuerranet attecma o'patatenya yamã ñeñtey judioneshay. Te'pa' e'ñe separrocmateñoŋ Cristo, te'ña sapa' e'ñe po'çhets penes atet ñerra'm ya ñeñtey judioneshay. Attoña o' e'ñe yeparrocmatuahuerr allohueney. Ñaña atet ote't Yompor ahuaŋ ñeñtcha' atet cohuen perrnay esempo e'ñe Cristeshot attoch a'queshpaterreypa' ñeñtpa' añeçpa'ñaña ñeñt ama judioneshayaye. Ñehua, ñet añoŋ a'queshpataretterret atto e'ñe pame'ñeñotet añ cohuen ñoñets ñeñt alloch yequeshperra allohueney.

⁷ Ñeñto'marña napa' o' naparetterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto naparetterra amaña añoŋeye' o' naparetterro atto e'ñe cohuen es nepa'yen ñeñt e'ñe nocpa. Ñapa' e'ñe puemuereñoten o' ahuamencat perren,

⁸ ama't napa' ama esoyayno ama't mamesha, atarr coñe'tot nesherven. Ora allohuen allpon ñeñt pueyochresha' pen Parets ñeñt sherbene' ña, ñaña ellonetpa' e'ñe atet nentena ñerra'mrrate' atarr coñe'tot nesherbeñ Parets. Tarraña ama't ama esoyaynopa' Yomporña puemuereñoŋ o' muenaterren

nach serrpare'tatyese' ñeñt̃ ama judioneshayaye. Attochña nach eñotatyenahuet atto Cristopa' shonte' esocmañen echyen pa'namen ñeñña yo'patapreteña ñeñtey yemtenaya ña. Ama't ya arromñañaya amate' errotenoñ e'ñe çhaphuonayo yeyoçhro ñeñt̃ ora allpon o'patatarey e'ñe yeyemteñoñ Cristo.

⁹ Ñaña nach eñotatyene' ama't allohuen acheñenesha' ñeñt̃ atet cotape'chennay Yompor. Tarro'mar ñeñtpa' ahuatoteñ ama eñotpahuoyaye tarro'mar ama çhena' allempoch a'poterrnay Yompor, ñeñtara Yompor ñeñt̃ e'ñe yeçcatuahue' ora allpon ñeñt̃ yentyen.

¹⁰ Allochñapa' allohuen ñeñt̃cha' allpon ame'ñerrtsapa' ñetñapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñt̃ amcha'taretetyetsa ñaña allohuen ñeñt̃ allsensaretetyetsa all ento, ñetpa'çho'ña eñotueñet atto Yomporpa' atarr esocmañen es eñoten ñeñt̃ nanac sherbets yocop.

¹¹ Ñeñtpa' atet cotape'che't Yompor ahuat pueyochreshacop ñeñt̃cha' sherbats allempoteñ e'ñe errponañohuen. Ñaña añ onañche't ñeñt̃cha' etsoterre' poçtañña ñeñtpa' añ Cristo Jesús ñeñtara Yepartseshar yepen.

¹² Ñeñto'marña yapa' e'ñe yame'ñeñoñ Cristo e'ñech yeñmañesha' yeçhore'teñ Yompor. Amach yemcha'nañoçeye' yeçhore'teñ tarro'mar añ yeyemteññaña Puechemer Cristo ñeñt̃ o' a'poçtaterrey Pomporesho.

¹³ Ñeñto'marña napa' o'ch notas, atto señotenen napa' atarr nemueroçhtena socop, sapa' amach sellquëñoña se'charrtatatsto seyoçher. E'ñepa'chña cohuen socshapretenna.

Atto Cristopa' atarr morrentenya

¹⁴ Ñeñto'marña napa' çhocma neconcorpuena Yomporeshonet allot nema'yochañpensa.

¹⁵ Ñeñtara Yompor allot huena ora allpon pa'namen acheñenesha' ñeñt̃ e'ñe pamo'tsna'tarecma ãannenet ama't ñeñt̃ pue'ntaño'tsa'yen ama't ñaña allpon ñeñt̃ patso'tsa'yen.

¹⁶ Atto Yomporpa' shonte' esocmañen echyen ñeñt̃ atarr nanac cohuenñatsotets Puecamquëñoïpa' ñepa'chña atarr ahuamencat sepene' e'ñe seyoçhro. Nema'yocheñoïpa' atet nenamuennas Yompor.

¹⁷ Ñaña çhocmuepa'ch yeçhena Cristo e'ñe seyoçhro e'ñe seyemteñoñ ña. Allochñapa' attochña e'ñe sagapoñ Yompor puemorrenteña attoch e'ñe huomenc sepa' seyoçher Yomporecop. Atet ñerra'mrrate' tsach ñeñt̃ atarr erçhat e'ñech

huomenc orrena patso, allochña pue'chorpa' e'ñech cohuen ten.

18-19 Allochñapa' attochña atarrcha' huomenc çhaponasa seyoçhro atto Cristopa' atarr nanac morrentenya. Ñeñt allpon atto atarr morrentenyapa' ñeñtpa' ama ahuañaño. Ñato' o'ch netma'ntacha atto yechope'chen patso. O'ch ahuey tenonet, ama'tcha' yeçhap ßachayo amach yemtanhuoñeña ñeñt atto morrentenya Cristo. Attecma ñaña toponet ama'tcha' yeçhap ßachayo amach yemtanhuoñeña ñeñt atto morrentenya Cristo. Attecma ñaña onnatonet ama'tcha' yeçhap ßachayo amach yemtanhuoñeña ñeñt atto morrentenya Cristo. Attecma ñaña enonet ñaña o'pononet, ama'tcha' yeçhap atarr allaparpa' amach yemtanhuoñeña ñeñt atto morrentenya Cristo. Ama't ñaña allohuen ñeñt allpon ñeñt ame'ñenayapa' eñoçhetepa'ch ñamet atto atarr morrentenya Cristo. Tarraña ama't ama e'ñeye' eñotpahuoyaye ora allpon ñeñt atet pena Cristo pueomorrenteña yocop, tarraña sapa' señoçhepa'ch ama't e'ne allpona. Ñeñtpa' atet nena-matennas Yompor. Allochñapa' attochña e'ne poctacma chorrrsa Yompor.

Aye'choçhtatpahuëpa'ch Yompor allohueney e'ne yame'ñeñoç

20-21 Te'ñapa' aye'choçhtatpahuëpa'ch yenteñ Yompor tarro'mar ña ahuamencat yepene'. Ña po'huamencotpa' atetcha' pãtonay ya ñeñt allpon yenamueñ, elloña ñapa' atetcha' pennay elloch metana'tuonay ñeñt allpon yenamueñ. Ñaña elloña metana'tuennay ñeñt allpon yoctape'chyen. Elloña nanacocmañen e'ne cohuen es pennay e'ne po'huamencot ña. Ya'ye'choçhtatoñepa'ch Yompor allohueney ñeñtey yame'ñeñoç çhocma yapçha'yena ñocop. Aye'choçhtatpahuëpa'ch tayoteñ ama't ñaña errponañohuen tarro'mar ña yapuerre' Puechemer ñeñt Cristo Jesús. Ñeñtpa' atetepa'ch Yompor yocop.

4

Attoch e'ne yeparrocmatuen allohueney ñeñtey ame'ñenaya Cristo

1 Ñeñto'marña te'pa' añ notenes ama't na ñeñten ayotamãpsareten e'ne netorreñoç serrpare'te' Yepartseshar Cristo. Te'pa' o'ch notas: E'ñech cohuen es sorrtyen ñeñt atet poctetsa añecop ñeñt o' hua'ñerr Yompor ñeñtcha' pueyochre-sha' perr atet ñerra'm sa.

2 Ama't mameshapa' amach sañeña entatstatso ñeñteso' atarr nanac sherbets. E'ne semorrentanna'teñoç e'ñech acoça

es seřanna'tyena. Chocmuepa'ch sa'huantannena ñerra'm erroť penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes.

³ Añepa'chña se'nen attoch sepaterrtat soctařña allohuenes ñeñť e'ñe atet paterr cotape'chatenes Parets Puecamquẽñ. Allochñapa' e'ñe separrocmateñoť, e'ñech cohuen sentannena, amachña čha po'poñ sentanna'tueno.

⁴ Tarro'mar po'ñočhpa' e'ñe yeparrocmatuen allohueney ñeñťey ame'ñenaya Cristo ñaña ñeñťara paterr Parets Puecamquẽñ ñeñť yechorra'yenaya allohueney. Ñaña ama't pa'nameney shontey ñeñťey o' chore'terrey Yompor tarraña e'ñe ñeñťara yeyemteñoť yecuen allohueney ñeñť o'patatenya Yompor ñeñťcha' apa'yesserrey.

⁵ Po'ñočhpa' e'ñe patrra Yepartseshar Cristo ñaña ñeñťara patrra poctařña ñeñť yame'ña'huenta allohueney, ñaña e'ñe allohueney attecma yapatareťta e'ñe yame'ñeñoť Cristo.

⁶ Ñaña e'ñe patrra Parets ñeñť Yeyomporer yeřohuen allohueney, ñeñťara ñeñť ya'mčha'tareter yeřohuen allohueney. Ñaña ñeñťara Yompor ñeñť yetorratyenaya pa'namen allohueney ñaña ñeñťara Yompor ñeñť yechorra'yenaya yeyočhro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttsocma

⁷ Ñaña Cristopa' apa'yeney allohueney e'ñe po'poñe'ttsocma attoch yetorra'yesa Yomporcop e'ñe pa'namenot. Puesheña'ttsoypa' o'ch apa'yeseý errponte' pocte' enten ña.

⁸ Ñehua, ñeñťpa' atet oteney Yompor po'ñoñ ñeñť aque-lca'huařet ahuaťoteñ, ñeñťpa' atet oten Cristocop:

Allempo a'terr pue'ntaño'pa' ahuanerran allohuen ñeñť e'moñe'tene' attoña a'mchechuahuanerret. Allempoñapa' e'ñe pocsheñeshoť shonte' es apa'yesnerran acheñenesha'.

⁹ Ñehua, all oten "a'terr pue'ntaño." Ñeñťo'marña yeñoteñ allempo ama a'terra'pa' ñapa' entoť asuaña, čhap ama't allohuanen patso o'pono.

¹⁰ Ñeñťara ñeñť sohuatsa entoť ñeñťpa' ñeñťara ñeñť a'terrets ama't e'ñe allohuanen ento. Attoña e'ñe erracmañen epa'huenta Cristo.

¹¹ Ñaña ñeñť atet oten ñoñets ñeñť anareť ahuaťoteñ atto shonte' es apa'yenan acheñenesha' ñeñťpa' añ oten ñeñť atto ñapa' e'ñe po'huanencoť es apa'yeney attoch yetorra'yesa po'poñe'ttsocma ñocop. Patantarr acheñpa' atet apareťtet o'ch torrenet atet ñerra'm ñeñť allsensareťtetsa

Yomporecop; po'potantaññapa' añcha' torrenet o'ch a'mteññañet Yompor po'ñoñ; po'potantaññapa' añcha' torrenet o'ch serrpare'tatoñet po'ñoñ acheñeneshesho'mar; po'potantaññapa' añcha' torrenet o'ch cohuañpenan allohuen ñeñt ame'ñetsa ñeñtara ñeñtcha' yeçhatenahuet Yompor po'ñoñ.

12 Attoña ahuamencat pa'yeney allochñapa' ñach po'huamencaro yetorra'yesa po'poñe'ttsoema e'ñe puesheña'ttsoemay ñeñtey pueyochresha' o' perrey Parets. Attochña e'ñe cohuen yeyenpanneño'tpa' o'ch huomenc yeñanna'ta yeyoçher Yomporecop allohueney ñeñtey ame'ñenaya Cristo.

13 Attochña e'ñe yeparrocmatuen e'ñe yame'ñeño't Yompor Puechemer ñeñt Cristo tarro'mar allohueneypa' o'ch yeño'tuerr ñeñt e'ñe cohuenare' ñeñt atet yeçhateney Yompor Puechemer. Attochña o'ch e'ñe atet yeñohuen yaña ora allpon ñeñt cohuentetsa ñeñt atet pena Cristo ñeñt yechorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop.

14 Ya te'pa' ama atteye ñerra'm cheshaneshash' ñeñt ama es eñotetso ñeñt epuoye' cotape'chene' cohuen. Ñehua, atet ñerra'm cheshaneshash' te'pa' ñato' po'poñcha' cotape'chyenet, ñato' tsapatñapa' o'ch'cho' cotape'chyeneterr po'poñ. Yapa'cho'ña atet yepena yaña allempo ama yepo'nena' Cristocop. Yaña ñeñtey ama epuoye' yoçteñe Cristopa' amach errotenot ye'mñocheña ya ashcañ attoch ame'ñatya ña poçtañña, attoch o'ch pantatey.

15 Yapa' añachña e'ñech patrra yoçtape'chen ñeñt e'ñe po'ño'ch alloch yequeshperra ñeñt atet oteney Yompor po'ñoñ. E'ñech yemorrentanna'teño't es yeña'yen. Attochña e'ñe yeñohuen allohuen ñeñt atet cotape'chateney Cristo. Attochña yapa' e'ñech ora yoçtape'chen e'ñe atet cotape'chen Cristo. Ñeñto'marña esheccha'ña yeparrocmat epay Cristo, ñeñtña Cristopa' yeyoçher* yepeñ ñeñt çhocma yoçtape'chatene' cohuen Yomporecop.

16 Ñato' o'ch netma'ntacha ñeñt atet pena yechets. Ñehua, yechetspa' amach errotenot ellopa'tetsteno. Ama't allemeñ meyna'ten yechets çhocma parrocmaten atto rremannenet e'ñe cohuen attoña yenpannenet. Ñaña yapa' yame'ñeño't Cristo e'ñe po'chets pohueney allohueney ama't pa'namen acheñrey. Attoña Cristopa' e'ñe parrocmateney ñeñto'marña e'ñe yemorrentanna'teño't o'ch yeyenpannena e'ñe cohuen. Attochña allo'nach yesen atontatnomue' ñeñt

* 4:15 O'ch secue' nota 1.23.

atet eñotateney Yompor o'ch yemorrentannerra allohueney.

Atto Yomporpa' o' etserrataterrnay yoctapña ñeñt atet muenen ña

17 Ñeñto'marña te'pa' o'ch notas ñeñt po'ñoçh sherbets Yepartsesharecop. Sapa' amach allo'na atet sepa'yesneno ñeñt atet patse'tyena ñeñt ama ame'ñenayo Yompor. Tarro'mar ñeñt atet cotape'chatse'tyenet ñetpa' ñeñtpa' e'ñe orrena ama't mameshapa' ama es sherbeno.

18 Ñetpa' ama çhenaneto pueyoçhreto ñeñt Cristo poctapña. Ñetpa' cha ottenet ñerra'mrrate' atarr checmeto'tsenet. Tarro'mar ñetpa' atarr echarrtenet pueyoçhret attoch coteret Yompor. Ñeñto'marña amach enterreto correñets ñeñt huetsa Yomporeshot tarro'mar ama eñoteñeto Yompor.

19 Ñet po'chñaret ama't mamesha o'huañcha' apencoçhen eñchet. Ñetñapa' e'ñech pocsheñsha' pomuenet po'çhets attochña e'ñe ñeñta yoma'yenet ñeñt pa'namen sosya'tsañeçhno ñeñt ama apapahuoyaye ama't mamesha.

20 Tarraña sapa' amaña atteye' seyçheno. Sapa' añña seyçhen ñeñt atet yeçhateney Cristo.

21 Tarro'mar napa' neñotenes sapa' o' se'mñoterrñañ Cristo po'ñoñ allempo yeyçhatas ñeñt e'ñe po'ñoçh attoch yeyemtera Jesús.

22 Sa ahuatpa' atta soctape'chatse'tyese't te'ña ñeñtpa' o'ch sa'ypo'ñamper. Sapa' ñeñtaña atarr seshcare'taye't attoña añach e'ñe semnatse'tyese't ñeñt ama cohuenayaye ama't mamesha.

23 Te'ña sapa' añepa'chña setserrataterre' Yompor e'ñe ora ñeñt atet soctape'chyen seyoçhro.

24 Añepa'chña chorraterra Yompor ñeñtcha' soctape'chaterre' cohuen e'ñe etserra. Ñeñtpa' attochña etserrataterrnas Yompor soctapña e'ñe atet cotape'chen ña. Allochñapa' attoch e'ñe pocte' es sepa'yen arr patsro ñeñt e'ñe po'ñoçh cohuen enten Parets.

Arrpa' all cotape'chatyenanet pa'namen ñeñt atarr sherbets

25 Ñeñto'marña te'pa' añ poctetsa socop amach allo'na se-shcare'tanna'tyesneno. E'ñe puesheña'tsos erroten sotanena, e'ñepa'ch po'ñoçh sa'poctaten señoñ samo'tseshacop. Tarro'mar e'ñe yame'ñeñoçh Cristo e'ñe yeparrocmatuen.

26 Ñaña ñerra'm esempo sa'tsrre'mapa' amach alla señotatoña' o'ch sorrtrat ñeñt ama cohuenayaye. Ñaña çhocmach sema'cha'nerr e'ñe mamecma amachña ñeñtaña sellapsateno.

27 Allochñapa' attoch amach yemnatatsche oneñeñ o'ch atarr topateney, tarro'mar yocop ama pocteyaye o'ch yemnach oneñeñ o'ch atarr ahuamencat peney.

28 Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeññ acheñerpa' taruasepa'ña e'ñe ña potot. Ama't erra'tsena ñeññcha' po'taruas pa'pa' ñeññ taruaspas' e'ñe cohuen ama apencochenayaye. Allochñapa' attocha' echenan shonte' attoch apa'yesan ñaña po'potantañ ñeññ atarr es pallta'yetsa.

29 Amach yeñosatse'tyesatsto ñeññ ama cohuenayaye ama't mamesha. Añcha'ña yeñosyen ñeññ e'ñe cohuen entuen allohuen acheñenesha' ñeññcha' yenpuene' ñeññ e'mñotets. Attochña ñetpa' o'ch huomenc pet pueyoçher Yomporecop.

30 Attochña amach cha yellcateññañe Yompor Puecamquëñ ñeññ yechetsa yeyoçhro ñeññara ñeññ Puecamquëñ pen ñeññ atarr cohuen Parets. Tarro'mar puechorreñotey ya, Parets Puecamquëñ ñeññpa' ñeññña yeñotatene' yapa' puechemer peney Yompor tayoteñ ñaña esempohuañencha' allempoch ya'qeshpataretterra.

31 Amach atsrre'moçhen sentanna'tatsto ama't seyoçhra. Allochñapa' attoch amach cha sa'tsrre'mare'tatanneno, attochña amach seche'çhame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto.

32 Añcha'ña e'ñech cohuen yentannena ñaña e'ñech cohuen yemuerannena. Ñaña añña poctetsa çhocmach yepretnannena atto Yomporpa' o' peretnerrey yaña. Ñeññpa' añoñ peretnerrey atto rroma Puechemer Cristo yocop.

5

Ñeñtey puechemer pen Yomporpa' o'ch yorrtaten ñeññ atet muenen ña

1 Yomporpa' atarr morrentenya, attoña e'ñe puechemer peney. Ñeñño'marña yocoppa'çho'ña añ poctetsa o'ch yorrtateññañ ñeññ atet cohuenare' es pa'yen ña ñeññ Yeyomporer yepen.

2 Elloña Cristopa' atarr morrentenya. Ñeñño'marña e'ñe pocte' eñch attoña poma ñañañña atto rroma yocop atet pete't ahuat allempo muetsete't carrnero Yomporecop. Ñeññña e'ñe cohuen ente't Yompor e'ñe atet ñerra'mrrate' ñeññ allo atarr eñmosañtampsachete't ahuat ña. Atto atarr morrentenya Cristo, yocoppa'çho'ña añ poctetsa e'ñech cohuen yemorrentanna'tuena.

³ Ñaña amach yeḡa'yesatsto ñeñt ama pocteye' enteno ña. Ama't parrocha amach yechtatsche ñeñt ama yeḡaporeyaye, ñaña coyanesha'pa' amach agapatstano ñeñt ama puerrol-lareyaye. Ñaña ama't mameshapa' amach yeḡatsto ñeñt atarr sosya'tsañetyets ñaña ama es aye'chapretanna'tpahuo. Ñeñt atet poctetsa allohuenacpay ñeñtey pueyochresha' o' perrey Parets. Allochñapa' ama't parrochapa' amach erotenot otyeto' yapa' atto yepena.

⁴ Ñaña serrpare'tatse'teñets sosya'tsañ ñeñt ama aserrpare'tpahuoyaye ñeñto'marña yapa' amach atet yeḡatsto ama't mamesha. Ñaña otatse'teñets ñeñtpa' ama sherbeno Yomporecop ñeñto'marña yapa' amach atet yeḡatsto. Ñaña allocchame'tanneñets ñeñt ama ayellsheñe'chpahuoyaye allo, ñeñtpa'cho'ña amach atet yeḡatsto. Añcha'ña yapa' Yomporepa'chña yeparasyoso'ten.

⁵ Sapa' señoteñ ñeñt cañoresha'tetspa' amach es o'paterroña Yomporesho ama't e'ñe esempaña allcha' añcha'taretterra Cristo epuet Pompor. Ñaña allohuen ñeñt eñotene' pa'namen sosya'tsañ, ñeñtpa'cho'ña amach es o'patatarettertsoña all añcha'tarettena Yompor. Ñaña ñeñt atarr es ye'chapretetsa añña po'yomporer pen ñeñt atarr es ye'chatse'tatene'. Ñeñto'marña ñapa'cho'ña amach es o'patateñoña Yompor all añcha'tarettena.

⁶ Amach se'mñotatsche acheñ ñeñt muenene' o'ch shecare'tas o'ch otas ñeñtcha' atet seḡatse'ta saña ñeñtpa' e'ñe pocte' Yomporecop. Tarraña napa' o'ch notas, ñeñtpa' ama po'ñoçhoyaye, tarro'mar Yomporpa' çhocmach coñchatuerran allohuen ñeñt atet atpare'tetsa, ñeñtpa' o' e'ñe notuanmas.

⁷ Ñeñto'marña te'pa' o'ch notas, sapa' amach socshapretatstaneto ñeñt atet ḡatse'tyenet.

Ñeñt atet yorrtatyen allempo o' yocrrerra e'ñe cohuen puetaro

⁸ Nehua, sapa' ahuatpa' po'ñoçh e'ñe atet socshapretatse'tyese't allempo sapa' checmeta socra'yese't. Tarraña te' e'ñe seyemteñoç Yepartseshar o' çhapatonas seyoçhro ñeñt cohuen enten ña. Ñeñto'marña te' socoppa' añ poctetsa o'ch sorrtrateññañ ñeñt cohuen enten ña, atto sapa' o' socrrerra puetaro.

⁹ Nehua, ñerra'm puetaroch yocrrrena, ñeñtpa' atetcha' yorrtatyen. E'ñech cohuenacma es yeḡanna'tyena ñeñt e'ñe pocte' enten Yompor ñaña ñeñtpa' ama shequëñtsoyaye ama't mamesha.

¹⁰ Ñaña socoppa' añ poctetsa o'ch sema'yoçhra eñotnomue' ñeñtcha' atarr cohuen entapretenes Yepartseshar.

11 Ñaña te'pa' o'ch alla noterrser; amach socshapretatsche ñeñt atet p̄atse'tyenet, ñeñtpa' ama es sherbeno ama't e'ñe mamesha. Tarro'mar ñetpa' checmeta correnet. Sapa' añcha'ña sorratyen ñeñt e'ñe cohuenare' allochñapa' attoch eñochet ñeñt atet p̄atse'tyenet ñet, ñeñt ama't mameshapa' ama cohuenaye' enteñe Yompor. Ñeñtpa' ñato' yapa' o'ch yot, yapa' o' ya'puetarsam̄psanet ñet ñeñt atet p̄atse'tyenet checmeto.

12 Ñehua, sapa' señooteñ ñeñt atet p̄atse'tyenet a'nahua. Ñerra'm ya'mete'pa' ñeñtpa' atarr apenco'chen.

13 Ñaña ñerra'm ya'puetarsam̄psanet ñet ñeñt p̄atse'tyenet ñeñt ama cohuenayaye, attoña ñetpa' o'ch çhapanet pueyoçhro ñeñt atet penet ñetpa' po'ñoçh ama cohuenayaye.

14 Ñeñto'marña socoppa' atet açhotenes añ ñoñets:

Papa' ñeñtep̄ atet p̄atse'tyetsa e'ñe attep̄ ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach p̄a'puetarsam̄perre'.

15 Ñeñto'marña te'pa' o'ch notas: Señota e'ñe errotoñe' sepa'yen, ñato' cohuenta' ñato' amate' cohuenayaye. Amach atet sepatsto atet ñerra'mrrate' ñeñt ama es eñotetso. Añcha'ña atet sepa'yes atet ñerra'm ñeñt atarr es eñotets ñeñt cohuentetsa Yomporecop.

16 Te'pa' arosña atfa es pueçhatstatsa çhochña yetorra Yomporecop tarro'mar te' acheñenesha' atarr sosey yeçcatyenet arr patsro.

17 Ñeñto'marña notenes amach atfa es sepçhatsto ñeñt atet pena ñeñt ama es eñotetso. Sapa' añcha'ña o'ch señooteñ ñeñt atet muenen Yepartseshar ñeñtcha' atet yeça ñeñt cohuen enten ña.

18 Ñaña o'ch notas, amach seposa'tatsto; ñeñtpa' çhach cotape'chatenes sosya'tsañeçhno attoch a'puerrataterres. Amach seposa'tatsto, añepa'chña sechorrenaya ñeñtcha' socshatene' ñeñtara Parets Puecamquëñ.

19 Añepa'chña e'ñe socshapretannena ñeñt atet saçhoteñ Yepartseshar. E'ñepa'chña socsheñesha' seyoçhrocmañen semorrechena allo ya'ye'choçhtateññañ Parets, ñaña allohuen morreñtsoçhno ñeñt Partsocop.

20 E'ñe yeyerpueñoñ Yepartseshar Jesucristo çhocmuepa'ch yeparasyoso'teññañ Pompor allohuenacop pa'namenacop.

21 E'ñe semorrenteñoñ Cristopa' e'ñepa'chña cohuen same'ñannena. Attochña yecohuentateññañ Cristo.

Arrpa' all cotape'chatan yacma epuet puetapor

22 Ñeñtes arrollaretes o'ch notas, añ pocte' serrollarpa' ñachña e'ñe same'ñena atet yepen ñaña Yepartseshar Cristopa' ñachña e'ñe same'ñena.

23 Tarro'mar serrollarpa' añ poctetsa atetcha' senteñ ñerra'mrate' samo'mte' sepeñ. Attecma yepena yaña allohueney ñeñtey ame'ñetsa, añ Yamo'mte' yepen Cristo ñeñt yecuanpene'. Tarro'mar ñapa' o' a'queshpaterrey ñeñtey o' po'chets perrey.

24 Ñeñto'mar añ pocte' serrollarpa' ñach pomnaren sepene' allohuenacop, attecma yaña ñeñtey ame'ñetsapa' añcha' pomnaren yepene' Cristo.

25 Te'pa' o'ch notas samña ñeñtes ataporetes, añ poctetsa e'ñech cohuen semorreñcha setapor. O'ch semuerya nanac atet peney Cristo atarr muerenya yaña ñeñtey ame'ñenaya ña. Ñeñto'marña puemorrenteño'tey ya ñapa' e'ñe pocte' eñch o'ch rroma yocop.

26 Allochñapa' attochña e'ñe e'shohuerrnay allohuen yo'chñar o'ch a'cohuentaterrey Partsocop. Ñehua, ñeñt toma'ntena allempo yapataretterra Yomporecop. Ñaña po'ñoñpa' ñeñtña e'ñe ya'cohuentaterre'.

27 Allempoña o' ya'cohuentataretterrappa' ñapa' mueneñ o'ch aguërrey allohueney ñeñtey ame'ñenaya ña. Ñaña ya atto o' ya'cohuentataretterrappa' amach alla eñalleterre'te ama't mamesha ñeñtcha' ya'sosyaterreyerr. Amach alla enterrye'te atto ama cohuenaye' yorrteno ama't erro'tena. E'ñechña ya'cohuentataretterra Partsocop.

28 Po'ñoçhpa' ñeñtes ataporetespa' añ poctetsa socop e'ñepa'ch cohuen semuerya setapor e'ñe atet atarr semorrentena sañeña. Tarro'mar ñerra'm atarr yemorrenteña yetapor ya'ñaña atarr morrentetsa, tarro'mar yetaporpa' ñeñtara yechets yepen.

29 Ñehua, yapa' yeñoteñ ama't e'ñe puesheñarroteya ama yetsena'tenoña e'ñe ya yechets. Chochña e'ñe cohuen yerren esheccha' e'ñe huomencna'ntateney. E'ñech cohuen yecuen e'ñe ya yechets. Attecma peney ñaña Cristo atarrcha' cohuamñpeney ya allohueney ñeñtey ame'ñenaya ña.

30 Tarro'mar ñapa' ña e'ñe po'ñoçh po'chets pohueney ya. Pa'namenot po'chets pa'yeney allohueney ñeñtey ame'ñenaya ña.

31 Ñehua, Yompor po'ñoñ ñeñt aquellcaret ahuatoteñ ñeñtpa' atet oten: "Ñeñto'marña ñerra'm esempo yesna'ta amapa' coyanesha'pa' o'ch echan puerrollar, añ pocte' o'huañcha' tama yeyemteña yachor ñaña yompor. Allochñapa' attoch e'ñe yeparrocmaten epay yetapor. Attoña e'ñe epsheño'mareypa' e'ñech patrra yechets yepen."

32 Ñeñtpa' ahuatoteñ ama eñotpahuoyaye ñeñt toma'ntatenya añ cotapñats. Tarraña te'pa' napa' noten añ yetma'ntenaya ñeñt atarr cohuen ñeñt atto e'ñe yeparrocmaten epay Cristo allohueney ñeñtey ame'ñenaya ña, ñeñtara ñeñt po'chets yepene' allohueney.

33 Ñeñto'marña o'ch alla noterrser, e'ñe puesheña'ttsospa' e'ñepa'ch cohuen semuerya setapor atet atarr semorrentena e'ñe sañeña. Ñaña ñeñtes coyaneshaspa' o'ch notas, añ poctetsa ñaña socop semorrenteño'tpa' same'ñyach serrollar, ñaña e'ñech cohuen senteñ.

6

Arrpa' all cotape'chatan cheshaneshá' epuet pamo'mte'

1 Te' cheshaneshacha' o'ch notas ñeñt poctetsa socop ñeñtcha' atet sepa. E'ñe same'ñeño't Yepartseshar Cristo chocmuepa'ch e'ñe cohuen same'ñeña sompor ñaña sachor, tarro'mar ñeñt poctetsa socop.

2 “Ñaña e'ñe semorrenteño't somporpa' chocmuepa'ch señcha'na'ch ñaña sachor” tarro'mar ñeñtpa' ñeñt e'ñe ñanom atet ot Yompor ñeñtcha' atet yepen yamo'mte' allochñapa' attoch e'ñe cohuen a'natenya Yompor.

3 “Attoch pa'nateño'tes e'ñe cohuenpa' atomatcha' socrena arr patsro.”

4 Te'pa' o'ch notas samña ñeñtes pamo'mte' pen cheshaneshá', se'moñe'teño'tpa' amach sa'tsrre'mare'tatatsche sacñetarnesha'. E'ñechña añetolloteñ e'ñe secuanpeño't cohuenpa' o'ch seychatyenamet e'ñe cohuen attoch ñetpa'cho'ña o'ch ame'ñeret ñamet Yepartseshar Cristo. Ñaña amach semnatastaneto o'ch atta atarr atpare'taset.

Arrpa' all cotape'chatan ataruasañ epuet po'patronar

5 Te'pa' o'ch notas samña ñeñtes ataruasataretes ñeñt poctetsa socop. Chocmach same'ñya ñeñt setaruasatene' arr patsro. Ama't erra'tsena apuenset ñeñtcha' setaruas sepa' e'ñechña señcha'na'teño't setaruasen e'ñe cohuen seyo'chrocmañen. Ama't acheñe'cpa setaruasenpa' atetcha' setaruasen ñerra'mrrate' Cristocop setaruasen.

6 Amachña e'ñe puecuampeño'tesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñe'cpa setaruasenpa' e'ñechña atet sesherbeñ cohuen ñerra'mrrate' Cristo sesherben. E'ñechña seyo'chrocmañen sepena cohuen ñeñt atet muenen Yompor.

7 E'ñe semneññoṭpa' e'ñech cohuen socsheñeshocmañen setaruasen tarro'mar ama ñapṭa acheñecop setaruaseno, Yomporecpa'naña setaruasen.

8 Te' sapa' e'ñe señoṭeñ ama't erra'tsente' cohuen es yeṭa'yen, Yepartsesharñapa' ḥocmach alla aphuerrey e'ñe puesheña'ttsoy ñeñṭcha' atarr cohuen yocshaterre' ama't añ acheñer ñeñṭ ataruasatareṭ amapa' añ acheñer ñeñṭ e'ñe cohueno'tsen, attecmach apa'yesuerranet ñeñṭcha' atarr cohuen coshaterrahuet ñet.

9 Ñaña te'pa' o'ch notas ñeñṭes taruasatets. Sapa'cho'ña atetcha' sepoñ sa'taruasañer ñeñṭ atet poctetsa, amachña ḥa sechemama'tyenaneto. Señoche'pa'ch sapa'cho'ña sechen Samo'mte' Cristo ñeñṭ pue'ntaño'tsen. Ñeñṭara ñeñṭ Pamo'mte' pen allohuen sa'taruasañrenesha'. Ñaña ñapa' ama puesheña'tsa morrenteno.

Ñeñṭ apueney Yompor ñeñṭcha' yemoñenaya attoch amach alla a'puerrataterrye oneñeṭ

10 Allohuanen arr necartot o'ch masheñeshacha' ñaña noḥaneshacha' notas, ahuamencatepa'ch pas Yepartseshar tarro'mar ñapa' ña atarr ahuamencattetsa.

11 Ñeñṭo'marña añ poctetsa yocop o'ch yaguërrñañ ora allpon ñeñṭ apueney Yompor allochñapa' ñeñṭcha'ña yemoñenaya attoch amach alla a'puerrataterrye oneñeṭ. Tarro'mar yeñoṭeñ oneñeṭpa' ḥocma e'nenan attoch shecare'teney.

12 Tarro'mar po'ñoḥpa' ama acheñeye' yeḥllareno ñeñṭ entpo' po'chets. Yapa' añña yeḥllaren oneñeṭeḥno ñeñṭ ama erroṭ aṭapahuo e'ñe ya yotoṭ tarro'mar ñeñṭpa' ama entpahuoyaye po'chets erroṭente'ña. Tarraña ñeñṭpa' atarr añcha'noḥetyena ñaña atarr ahuamencateḥno. Attoña pomnaren penan allohuen acheñenesha' arr patsro ñeñṭ ṭatse'tyene' ñeñṭ ama cohuenayaye ñeñṭ checmeto'tsena. Ñeñṭara oneñeṭeḥno ñeñṭ ama cohuenaye' yeḥcatetso ñeñṭ erracmañen añcha'noḥetyetsa entoṭ.

13 Ñeñṭo'marña notenes, o'ch saguërrñañ allohuen allpon ora ñeñṭ apueney Yompor allochñapa' ñeñṭcha'ña allo yemoñena attoch amach alla a'puerrataterrye oneñeṭ ñerra'm esempo atarr nanac topateney. Tarraña ama't allempo pa'namenot atarr topateney yañapa' amach erroṭenoṭ a'puerrataterrye.

14 Te'pa' o'ch neñotatas ñeñṭ apueney Yompor ñeñṭña yemoñenaya attoch ama a'puerrataterrye oneñeṭ allempo topateney. Ñato' o'ch netma'ntacha ñeñṭ atet pa'namen

chorra'yena solltarnesha' allempo quellarenet.* Ñeñt ñanam ñeñtpa' Yompor po'ñoñ ñeñt e'ñe po'noch ama shequëñtsoyaye ama't mamesha. Ñeñto'marña yapa' e'ñech yeñmañesha' es yeþa'yen, amach yeshcare'tanna'tyesatsto. Ñato' o'ch netma'ntacha ñeñtpa' ñeñtña yechanar yepen ñeñtcha' ahua-menca't yepe' atet ñerra'm solltar apueñet chanarets alloch chanena ñeñt quellaraten. Elloñapa' e'ñepa'ch cohuen es yeþanna'tyesnoma ñeñt atet e'ñe pocte' enten Yompor. Ñeñtpa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena.

15 Te'ñapa' o'ch se'shpo'cha e'ñe socsheñesha' o'ch ahues allcha' seserrpare'tyena' atto Yomporpa' o' amo'tsterrya attochña e'ñe cohuen a'queshþaterrey. Ñeñtpa' añ toma'ntena atet pena solltar o'ch nan po'sapatpa' o'ch ahuo' allcha' quellarosa.

16 Elloña ñeñt nanac sherbets ñeñtpa' añ, chocmuepa'ch e'ñe cohuen yeyemteña Yompor ñeñt atet oteney. Ñeñtpa' añ toma'ntena solltar pue'scudo allo a'natena allochñapa' attoch ama etaretteneto. Ñehua, atto huomenc topateney oneñet ñato' o'ch netma'ntacha ñerra'mrrate' ñapa' cho sanapecheney po'chopaþo ñeñt huoretnets. Tarraña ya e'ñe yeyemteño't Yompor ñeñtpa' ñeñtña ye'scudo yepen ñeñtcha' chocma emayene' oneñet po'chopaþ ñeñt huoretnets allo sanapecheney.

17 Ñaña yapa' yeñoteñ Yomporpa' te'pa' o' a'queshþaterrey, ñeñtña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyo'chro ñeñt atet eñotateney ña Puecamquëño't; ñeñtpa' ñeñtña yepanmet yepen alloña yeçllareñña oneñet.

18 Ñaña sapa' chocmuepa'ch sema'yochena ama't erroteno'tsensa. Añcha'ña seyenpuene' Parets Puecamquëñ. Allochñapa' attochña chocma sema'yochrena ma'yochatsa. O'ch senamñ Yompor ora allpon ñeñt sepalltena, ñaña chocmuepa'chña e'ñe sema'yochamñpesueña allohuen ñeñt pueyochresha' pen Parets.

19 Napa'cho'ña chocmuepa'chña sema'yochamñenna. O'ch senamon Yompor nocop allochñapa' ñachña ne'ñoratene' attoch amach nemcha'naño'ta neserrpare'teññañe po'ñoñ. Allochñapa' attochña neñotatyesanet cohuen ñoñets ñeñt alloch e'ñe yequeshþa'huerra allohueney; ñeñtpa' ama eñotpahuoyaye, ama't ahuatoteñ.

* 6:14 Ñehua, ñeñtpa' atet chorra'yese't ahuat solltarnesha' allempo quellarete't.

20 Napa' allsensareten ñeñten eñsyets e'ñe cohuen Yomporecop. E'ñe neñosyeñoñ Yomporecop ñeñto'marña te'pa' yottañpennet. Ñeñto'marña nemneñ o'ch sema'yochañpenna attoch amach nemcha'nañoña neserrpare'teno ñeñt e'ñe cohuen ñoñets alloch yequeshpa'huerra. Attochña e'ñe nocsheñeshocmañen neserrpare'ten tarro'mar ñeñt e'ñe cohuen atet poctetsa nocop.

Arrpa' all so'tnerranet e'ñe po'cartot

21-22 Te'ñapa' o'ch notas, o'ch nemñonas masheñ Tíquico ñeñt atarr nemorrentena. Ñapa'cho'ña chocma atarr cohuen torrena Yepartsesharecop. Ñapa' ñeñto'marña o' nemñe se-sho allochñapa' ñach señotaturre' ñeñt atet yepena ya arr. Attochña atarr coshatuerres seyo'chro.

23 Te'ña masheñeshacha' ñaña nochaneshacha', Yomporepa'chña semorrentanna'tataya e'ñe same'ñeñoñ, ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' seyo'chro.

24 Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñt atto semorrenteñapa' amach ahuañaña'atterro ama't e'ñe ahuaña. Ñeñtach notas, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN FILIPOSOMARNESHA' FILIPENSES

Pablo pa' quellcan carta all ayottam̄psarettena; añecop quellquë' ñeñt ame'ñetsa anetso Filipino

1 Masheñeshacha' ñaña nochaneshacha' ñeñtes allohuenes o' pueyochresha' perres Parets e'ñe separrocmateñoť Cristo Jesús all anetso Filipino, ama't ñaña sa'm̄cha'tareterneshohuen ñaña ñeñtes diáconochnos ñeñtes sherbets all puerahuo. Na Pablon epan masheñ Timoteo ñeñten sequellquëne'ña añ carta.

2 Te'pa' e'ñe nehuom̄cha'teñoťes sa, napa' o'ch notas: Yomporepa'chña sebensare'tam̄pene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyočhro allohuenes.

Arrpa' atet ma'yocham̄penanet Pablo

3-4 Te'pa' o'ch notas, allempo nema'yocheña Yompor ñeñt neyemtena na, neyerpueñoťespa' čhocma nocshensa Yomporeshoť. Ñeñto'marña allempo es nenamuennas Yomporpa' čhocma nocshensa Yomporeshoť allohuenes.

5 Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E'ñe same'ñeñoťpa' attoña sellcapretna attoch erroťenoťpa' o'te' epa'huerra erracmañen añ cohuen ñoñets alloch yequeshperra.

6 Ñaña napa' neñotenes atto Yomporpa' o' ame'ñatasa ahuaña, te'ñapa' ñepa'chña allo'na ahuamencat sepa'nmue' e'ñe ñocop, tayoteñ ama't esempohuañencha' huerra Jesucristo pue'ntañoť.

7 Ñeñt atet nentapretenespa' ñeñtpa' e'ñe pocte' tarro'mar atarr nemorrentensa e'ñe neyočhrocmañen. Ñeñto'marña yellcanna'teñoťpa' yeñoteñ Yompor e'ñe puemuereñoťpa' amach a'ypo'ñerrno na ama't ñaña sa. Atet napa' ama't cárcelo'tsenen Yompor puemuereñoťenpa' amach a'ypo'ñerrno. Ñaña ñerra'm allempo achm̄are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yompor puemuereñoťenpa' čhocma ahuamencat penen. Ñaña allempo name'ñateña acheñenesha' añ cohuen ñoñets alloch yequeshperra, Yompor puemuereñoťpa' čhocma ahuamencat penen.

⁸ Ñeñto'marña te' Yomporpa' eñotenen po'ñoçh te'pa' nanac neyerpuensa. E'ñe atet nanac nemorrentensa ñerra'm atet morrentenya Jesucristo e'ñe cohuen.

⁹ Atet nenamuennas Yompor socoppa' atet noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeñt nanac sherbets yamo'tseshacop. Allochñapa' attoch çhocma yorrtaten yemorrenteña e'ñe po'ñoçh.

¹⁰ Attochña señoçh erra'tsente'ña nanac cohuen sherbets Yomporecop. Allochñapa' e'ñe señoñeñotpa' añepa'chña atet sepa'yen ñeñt e'ñe cohuenare'. Allochñapa' amach çha sa'yohuaretterro ñerra'm esempohuañencha' huerra Cristo.

¹¹ Ora atet nenamuennas Yompor socoppa' atet noten, e'ñe same'ñeñoñ Jesucristo poctacmapa' añepa'chña cohuen atet sepa'yen ñeñt nanac sherbets Yomporecop. Ñerra'm atet yepenapa' attochña e'ñe cohuen ya'cshapretarettena Yompor po'cohuenña.

Atto epatuan allohuenacop Yompor po'ñoñ e'ñe cárcelot

¹² Ñeñto'marña masheñeshacha' ñaña noçhaneshacha' o'ch neñotatas, ama't atto ayottam̄psareten cárcelo ñeñtpa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe attotpa' allo'nach sen epa'huatsa Yompor po'ñoñ.

¹³ Ñeñto'marña te'pa' allohuen guardianesha' ñeñt cohuam̄pene' am̄cha'taretepo' ñetpa'çho'ña o' e'ñe eñotuanet atto ayottam̄psareten cárcelopa' añoñña e'ñe name'ñeñoñ Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemueroçhtena.

¹⁴ Ñeñto'marña te'pa' shonte' masheñesha' e'ñe allo'na senet yemuetnomuet Yepartseshar Cristo poctacma, tarro'mar ñetpa' atet entennet e'ñe name'ñeñoña Cristo nemueroçhtena cárcelo. Ñeñto'marña ñetpa'çho'ña o'huañ mecha'na'tet serrpare'tet Yompor po'ñoñ.

¹⁵ Nehua, po'ñoçhpa' eñall puesheña'tets tarrecpach serrpare'tenet Cristo e'ñe pue'matare'teñoñetan na. Tarraña po'psheñeñchnopa' e'ñech pocsheñeshocmañen a'poteññañet Yompor po'ñoñ.

¹⁶⁻¹⁷ Añpa' e'ñe puemorrenteñoñetan atet penet tarro'mar ñetpa' eñotennet napa' anareten atto nach moñenaya añ cohuen ñoñets alloch yequeshperra ñerra'm esempo achm̄are'teñet. Tarraña ñeñtña serrpare'tene' Cristo po'ñoñ e'ñe ñocpuetapa' amach pueñmañeshacmaye' serrpare'teneto. Ñetpa' çhate' otenapuetañ allo'nach atsrre'moçhen entatnennet ama't cárcelo'tsenen.

18-19 Ñehua, ama't atetpa' nocoppa' e'ñe pocte'. Ama't erroteno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't puehquẽñme'chatsa serrpare'tenet Cristo, ama't ñaña pueñmañesho'cha' serrpare'tenetpa' napa' ñeñtcha'ña nanac nocshatene'. Ñeñto'marña napa' chocmach nocshena tarro'mar napa' neñotenes sapa' chocma sema'yochamñenna ñaña neñotena Jesucristo Puecamquẽñpa' ñeñtña ahuamencat nepene'. Ñeñto'marña neñoteñ añ muerochteñets tsapatonetpa' a'pochtataretcha' e'ñe cohuen nocop.

Atto Pablo' ora allpon corre't arr patsropa' ñeñtpa' e'ñe ora Cristocop

20 Ñeñto'marña e'ñe nocsheñsha' necueñ tarro'mar neñoteñ amach apencatare'teno ama't mamesha. Ñaña amach nemcha'nañofayaya ne'ñoreno e'ñe cohuen Cristocop. Attochña napa' acshapretpo' entapretennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Atet ahuatoteñpa' te'pa'cho'ña attecmuepa'ch pena.

21 Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't cho nerromapa' ñeñtpa' elloña nanac cohuen nocop.

22 Ñaña ñerra'm allempo nocrenmeñpa' torrenayanach Yompor po'taruas tarro'mar attotcha'ña allo'nach nesherbatneññañ Yompor po'ñoñ. Ñeñto'marña ñeñtcha' nanac nemna' te'pa' ama neñoteñe erra'tsente'ña ñeñt nanac sherbets, ñato' o'ch nerroma tayecma amapa' ñato' corretsanach.

23 Ñeñt nanac torrapo' nenten o'ch notas ñeñt atarr cohuen nenten, ñato' o'ch nerroma amapa' corretsanach. Napa' nemneñ o'huañcha' nocrra añe patsro allochñapa' o'ch nechap tecma Cristesho, tarro'mar ñeñtpa' elloña nanac cohuen nocop.

24 Tarraña ñerra'm amach nerromopa' ñeñtcha'ña nanac sherbats socop.

25 Ñeñto'marña napa' neñoteñ amach nerromo, amach nesa'nerrso, allochñapa' allo'nach nesen seychatnomue' allohuenes atto ñerra'm allo'na yesen yemtaya Cristopa' chocmachña yocshena.

26 Allochñapa' ñerra'm esempo necherr seshopa' allempochña alla neñotaterrser nanac, attoch allo'na sesen nanacocmañen coshaya Cristo.

Chocmuepa'ch yocrena e'ñe cohuen ñeñt atet otene' Yompor po'ñoñot

27 Te'pa' añach notas, ÷hocmuepa'ch socrra e'ñe cohuen ñeñt atet yorrtaten ñeñtey ame'ñenaya Cristo po'ñoñ. Allochñapa' ñerra'm machayota nabcherrsa' amapa' ñerra'm ama'tcha' ama yaßchannerropa' e'ñepa'chña cohuen ne'mare'tenes atto e'ñe huomenc sepen seyoçher attoch e'ñe pa'rra soctape'chen. Ñaña o'ch ne'mare'tas atto sapa' sema'yochrena allohuenes parro attoch semoñena añ cohuen ñoñets alloch yequeshperra.

28 Ñaña amuepa'chña añña seyo're'tatstaye ama't mamesha ñeñt se'moñe'tene' tarro'mar ñetpa' ñeñtcha'ña eñotatahuet po'ñoçh ñetpa' amach queshperreto. Tarraña yocopñapa' ñeñtña yeñotatene' po'ñoçhpa' yequeshpa'huerrach. Añeçhnopa' Yomporo poctapña.

29 Ama pa'rrayaya muenatenye Yompor atto o' yame'ñera Cristo. Añña e'ñe puemuereño'tey muenateney ñaña e'ñe yame'ñeño'tpa' ÷choçña yemuerochta ñocop.

30 Ñeñto'marña sapa'cho'ña e'ñe pocte' o'ch sa'mueroçhtataretta Cristocop e'ñe atet sentenen na ahua'otoñ ama't teme'ttsenpa' se'mare'tenen napa' allo'tsenarana all nemueroçhtena e'ñe name'ñeño't Cristo.

2

Atetcha' yentena yañeña e'ñe puesheña'ttsoy atet ente't Cristo e'ñe ñañeña

1-2 Te'pa' o'ch notas ñaña po'poñ. Ñerra'm po'ñoçh yame'ñeño't Cristo e'ñech yocshatannena allempoña po'ñoçh sapa' socshaterrencha' ñaña. Añña ñeñtcha' nocshatene' e'ñe poctacma ñerra'm e'ñech pa'rra soctape'chuen allohuenes. Ñaña ñerra'm po'ñoçh e'ñe yemorrentanna'teño't e'ñech yeyemtanna'tuenapa' ñehua, te'ñapa' ÷hocmuepa'ch semorrentannena ama't e'ñe sagattsa ñeñtes e'ñe parro'marneshacmas. Ñaña ñerra'm allohueney po'ñoçh chorra'huenya ñeñtara Parets Puecamquëñpa' ñeñto'tcha'ña e'ñepa'ch sepatrratuen soctapño't allohuenes. Ñaña ñerra'm po'ñoçh e'ñe socsheñesha' semuerannenapa' ñeñto'tcha'ña amach po'poñ sentanna'tuatsto.

3-4 Ñaña amach añña atarr sellcatsto ñeñt e'ñe socpa. Añcha'ña puesheña'ttsospa' sellcapreta ñeñt llecatyene' samo'ts. Ñaña amach sañeña entatstatsto atet ñerra'mrrate' ñeñtes nanac sherbets. Añcha'ña atet sent samo'ts atet ñerra'mrrate' ñetña nanac sherbetset, pañapa' amach es asherbenaye' penteno.

5 Añña pocte' o'ch senta sañeña atet ente't Cristo Jesús e'ñe ñañeña allempo huapa añe patsro.

6 Ñehua, ñapa' ama't nanac Paretspa' ama ommo'chane'te po'partsoña.

7-8 Ñapa' e'ñe pocte' enche't o'ch atet enteñ acheñenesha' ñerra'mrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñt' e'ñech pauner a'parettena. Tarraña añecop atet pe't attotcha' sherbenan Pompor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñtey arromña'tey. Ñaña' allo'na sen pauner entatatsa attotña e'ñe pue'mñoteño' Pomporpa' e'ñe pocte' eñch o'ch rroma corsocho ñeñt' nanac apenco'chen entete't ñerra'm esesha' rromats atet corsocho.

9 Ñeñto'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñt' nanac cohuen sherbets. Ñeñtña so'chñetspa' ello metana'tuanenan allohuen po'poñe'chno so'chñetso'chno.

10-11 Ñeñto'marña esempohuañenpa' allohuenet po'yorño'tetpa' a'meta'hueretcha' e'ñe poctacma, Jesucristepa'tña ñeñt' nanac partsotets. Allochñapa' atto e'ñe pame'ña'rrteño'tet Jesús pa'so'chñopa' concorpa'rretueretcha' allohuenet ñeñt' allpon eñall ama't allohuen ñeñt' ento'marnesha' ñaña allohuen patso'marnesha' ñaña allohuen o'pono'tsenesha'chno ñeñt' patso'tsen. Attochña allempopa' aye'chochtataretterra Yompor ñeñt' nanac Parets.

Añach yema'yochrena attoch allo'nach yesen ama't aco'pa etsotyenomue' ñeñt' poctetsa Cristocop

12 Te'pa' e'ñe nemorrenteño'tes masheñnesha ñaña no'chanesha o'ch notenes, ahuañmo'chapa' chocma se'mñotne't ñeñt' atet notase't allempo sesho'tsenen. Te'pa'cho'ña attec'mach se'mñoten ñeñt'cha' atet noterserr ama't te'pa' nanac ñachayo'tsenen sesho't. Te'pa' añach notas ñeñt'cha' atet se'pa. Chocmuepa'ch sema'yochra attoch allo'nach sesen etsotnomue' ñeñt' cohuen enten Yompor, tarro'mar ñapa' ñeñt'ecopña o' a'queshpaterres. Tarraña e'ñech se'm'cha'na'teño't seyomcha Yompor tarro'mar yeño'teñ yoro'cheno'tsenya ñerra'm ama Yompor po'huamenco yeyemto.

13 Tarro'mar Yompora e'ñe yemnatene' e'ñe yeyochro ñeñt' cohuen enten ña. Ñaña ñapa' ñach ahua'menca't yepene' attoch yetsotoñ ama't ora erra'tsencha' coshatene' ña.

14 O'ch noterserr ellone't te'pa' ñeñt' ama atteye' es sepeno. Ama't eseshacpa amach epuoye' es atet sepeno, señoseñesho'pa' amach es sotnare'tanna'tatsto.

15 Allochñapa' ñerra'm ama atet yepenopa' e'ñech cohuen entyeny allohuen acheñenesha', amach eñalle attoch esesha'pa' o'ch eñosyenet yocop año' pocteye' es yeña'yeno, tarro'mar e'ñech cohuen es yoctape'chyen attoch yorrtaten atet penaña ñeñt po'ñoçh o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporecop añe patsro. E'ñech cohuen yorrtena acheñenesha'cop ama't ñeñt ama ame'ñetso ñeñt atarr nanac sosey co'tape'chenet. Cohuencha' yorreyena atet ñerra'mrrate' rantoçhno ñeñt a'puetarene' checmete' tsapo.

16 Attoch sa'puetarsañpsanetpa' çhoch seño'taterranet ñoñets ñeñt huetsa Yomporeshot alloch yocrrena e'ñe cohuen. Allochñapa' ñerra'm esempohuañencha' huerra Cristopa' socshatterrencha', tarro'mar neñotercha' ama e'ñe orrena nanac netorrerro socop.

17 Ñaña ama'tcha' machayota muetsataterret arr atto napa' o' name'ñatasa, napa' atarr nocshena ñaña te'pa'çho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrrate' ñeñt amsarettetsa ñocop. Ñaña nerraspa' ñeñtcha' orrtatsa ñerra'mrrate' ñeñtcha' ashatarettatsa all ñeñtcha' o'patateñet Yompor.

18 Ñeñto'marña napa' nemneñ sapa' amach çha sellcatsto, çhochña socshapreterra ñeñt atet o' notuas.

Timoteopa' nanac cohuen llecapretane't pamo'tsesha'

19 Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuerra' errotente' seña'yena, allochñapa' attoch socshatterren ñerra'm cohueno'tseneste'.

20-21 Añcha' nemñonas masheñ Timoteo tarro'mar ama eñalle ama't puesheñarra ñeñt co'tape'chene' cohuen atet ñerra'm ña ñeñtcha' e'ñe po'ñoçh sellcapretenaya ñeñt echarr sentyen. Tarro'mar ama't eñalleñ ñeñt parro yetorrrena, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocpueta. Amachña añeye' llecapreteneto attoch torrenet ñeñt nanac sherbets Jesucristocop.

22 Ñaña sapa' e'ñe seño'tueñ atet masheñ Timoteopa' e'ñe cohuen pa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueney yetaruas.

23 Ñehua, esempoch e'ñe neñoch ñato' errotente' poctetsa nocoppa' napa' noctape'cheñ o'ch nemñonas masheñ Timoteo.

24 Na te'pa' aña necuen Yepartseshar Cristo ñerra'm ñach muenats, napa'cho'ña nabcherrsa'ch amach atarr natomatatatsche.

Atto Epafroditopa' yenpa'yesosan Pablo all cárcelo

25 Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'pa' nanac yetorre't Yomporecop. Ñeñtara masheñ Epafroditopa' ñeñt semñon ahuaña ñach neyenpa'yesose' all es nepalltena ñeñtcha' neyenpose' arr.

26 Napa' e'ñe pocte' nenteñ te'pa' o'ch alla ahuer sesho, tarro'mar ñapa' nanac yerpuesa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha atsna'tos arr.

27 Ñehua, po'ño'ch ahuañapa' cha atsna'tos cha muene' rromañ, tarraña Yompor e'ñe puemuereño'teypa' o' alla a'crrater atto ñerra'm rromañpa' ellote' na'na llecatañ arr cárcelo.

28 Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch cherr e'ñe sesho. Allochñapa' amach ña'na allo'na nellcatnenaye.

29 E'ñech separasyoso'teñsha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, chocmuepa'ch semorrenteña ama't erra'tsena acheñer ñeñt e'ñe atet senten ñerra'm ña.

30 Atto ñapa' e'ñe puemneñño't o'ch torra Cristocop cha atsna't ama't cha muene' rromañ. Atarr yoreretso't correrra arr, tarraña ñapa' ama ñeñtayaya mecha'to attoch ñapa' o'ch yenposen, ñeñt sapa' amate' errot sepe attoch sehua'cha'ta ba'chayot e'ñe puesheña'ttsos attoch seyenpuenna' arr.

3

Arrpa' all eñotatyesanet ñeñt e'ñe po'ño'ch sherbets Yomporecop ñaña ñeñt e'ñe orrena cotapñats

1 Ellonetpa' o'ch alla masheñnesha ñaña no'chanesha noterrserr po'pocheño, e'ñe same'ñeñot Yepartseshar Cristopa' chocmuepa'ch socshena. Ama't te'pa' o'ch alla noterrserr atet tarro'mar amach nemuenme'che sotare'te' atet, tarro'mar ñeñt'pa' ñeñtcha' nanac seyemta sa.

2 Ñaña te'pa' o'ch notas po'poñone't. Señota'tach ñato'tña seyemteña' ñeñt acheñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ño'ch yequeshperra. Ñetpa' e'ñe atet nentenanet ñerra'mrrate' o'chec ñeñt nanac atsena'tare't. Ñeñt judionesha' ñeñt o' notuanmaspa' añach ma'yo'chrenet cotapñats attoch tsorrannenet atto'ch puechemer perranetañ Yompor.

3 Tarraña yapa' yaña e'ñe po'ñočh puechemer o' enterrey Yompor, tarro'mar yapa' e'ñe yeñoteñ ama yet-sorranna'teñoŕeye' puechemer penye Yompor. Po'ñočh puechemer perrey tarro'mar yapa' e'ñe yocsheñoŕ Parets ñeñtpa' e'ñe Puecamquëñoŕ huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añeye' yeyemteno ñeñt atet yetsotaten e'ñe yañeña, ñeñt e'ñech yechtsochaya.

4 Ñehua, ñerra'm esesha' ñetpa' čhate' otenapuetañ añte' poctetsa o'ch yeyemtena ñeñt allo es yepenañ alloch yequeshperra e'ñe yototapa' nocoppa'čho' eñalleñ shonte' ñeñt neyemtenañ, tarro'mar ñeñt allpon o' netsotatuena' ello metana'tuenan allohuen po'psheñečhno namo'tseshachno puetsotateñ.

5 Tarro'mar napa' o' e'ñe allpon netsotueññañ judionesha' poctaŕña: Ama't po'psocmatñoŕeñ allempo ne'ñalletuapa' napa' atorrataŕolle'tareten* ñeñt atet anuaret allohuen asheñorroŕolleshacop ñeñtey judioneshay, tarro'mar e'ñe israelena'tareshoŕ ñeñt e'ñe judiomŕeyoŕ eñalletñan. Ellonetpa' ñaña napa' Benjamín po'mrenñen. Ñaña napa' e'ñe hebreoneshan tarro'mar ach ñaña apapa' e'ñe judioneshet poctacma ñeñt eñets e'ñe ya yeñoño ñeñtara hebreachó. Alŕopa' ñaña na ahuatpa' e'ñe fariseoneshan ñeñten nanac ma'yočhraye't attoch netsotua ora allpon ñoñets ñeñt aque-lca'huaret judioneshacop.

6 Nanac netsote't judionesha' poctaŕña. E'ñe nemoñseñoŕ yoctaŕña napa' ne'moñe'che't allohuen ñeñt o' ame'ñerrana Cristo. Ñeñto'marña epaye'ch ne'name'tanete't attoch errotenotpa' o'te' erroŕ neŕatanet. Ñaña ora atet oteney ñoñets ñeñt atet anaret judioneshacop napa' čhocma e'ñe atet neŕohuahue't. Ñeñto'marña ama eñalle'te ama't patrra ñeñt nepalltena attoch ello po'psheñeñpa' o'ch otnet ñeñto' nepalltenmeñ.

7 Allempo atet netsotrrote't ñeñtecop nañapa' ñeñta notenapañ ñeñtte'ña nanac sherbets nocop. Tarraña te'ñapa' e'ñe nemorrenteñoŕ Cristopa' o' neñoter ñeñt allpon o' neŕohuahupa' amach es sherberro nocop ama't coñe'ta.

8 Ama't ellonet allohuen po'poñečhno ñeñt nente't ñeñto'ch sherbatseñ nocoppa' te'ña e'ñe neyemteñoŕ Cristopa' ama asherbenaye' nente'ne, ama't coñe'ta, tarro'mar te'pa' o' neyemtera Yepartseshar Cristo Jesús ñeñt nanac sherbets. Ñapa' ello metana'tuenan allohuen po'poñečhno ñeñt atet

* 3:5 O'ch secue' nota San Lucas 1.59.

nente't na ñeñto'ña nanac sherbets. Ñeñto'marña nemor-
renteño't Cristo te'pa' o' nepuesuerr ora po'poñechno, no-
cop te'ñapa' ama esoye' nenteñe esheccha' te'pa' e'ñech noc-
sheñsha' nocter Cristo.

⁹ Allochñapa' e'ñe yeparrocmateño't Cristo, Pomporpa'
e'ñech pocte' enteney tarro'mar amach año'teye'
a'queshpatterrye e'ñe yotota ama't yetsotatsetuahua ñoñets
ñeñ't atet anaret judioneshacop. Año'tcha'ña te'pa' e'ñech
pocte' enterrey e'ñe yeyemteño'ta ñeñ't Puechemer pen
ñeñ'tpa' Cristo.

¹⁰ Atto e'ñe yeparrocmateño't Cristopa' o'ch yaguërrñañ
po'huamenc atto ñapa' nanac ahuamencattena allempoteñ
tanterra puerromño't. Ñaña e'ñe yeyemteño't Cristopa' e'ñech
pocte' yeñch ama't e'ñe erroteno'tpa' o'ch yemuerochta e'ñe
ño'mara atto ñapa' nanac amuerochtatarette't. Ñaña ama't
yemuerochetuaneno't Cristocopcha' yerromapa' ñeñ'tpa'
e'ñepa'ch pocte' yeñch tarro'mar atetcha' yerromaprecha
Cristo.

¹¹ Attochña yapa'cho'ña yetantuerrach esempohuañen.

Ñeñtach e'ñe paterr llequë't Pablo

¹² Ñehua, napa' ama noteno napa' o' e'ñe poctacma netsotu-
ahuen ora allpon ñeñ't pocte' enten Cristo. Ñaña po'ño'chpa'
ama noteno napa' e'ñe es co'chneshare' noctape'chuen.
Tarraña ama't atet neñotenapa' elloña te'pa' allo'ñaña nesen
ama't aco'pa o'ch netsotnom ñeñ't pocte' enten Cristo Jesús,
tarro'mar ñapa' ñeñ'tecop o' pueyochresha' perren.

¹³ Napa' masheñnesha ñaña no'chanesha neñotena
po'ño'chpa' ama atteye' ne'pohueno ora allpon ñeñ't
cohuentetsa Cristocop. Tarraña ama't atetpa' amach
ñeñ'ta neyerpuerre'te, chochña nepuesuanom ñeñ't atet
ne'patse'tyese't ahuatoteñ. Te'ñapa' añach nema'yo'chrena
attoch allo'nach nesen ama't aco'pa etsotayesnomue' ñeñ't
poctetsa Cristocop.

¹⁴ Tarro'mar ñeñ'tecop o' chore'terrey Yompor pue'ntañ'o't
attoch e'ñe yeparrocmateño't epay Puechemer ñeñ't Cristo
Jesús, esempopa' ye'pohuerrach ora errponte' e'ñe pocte' en-
ten ña. Allochñapa' aphuerreycha' ñeñ't o'patatenya ñeñ'tcha'
nanac yocshatuerre' allohueney ñeñ'tey o' yame'ñera.

¹⁵ Ñaña o'ch notas ñeñ'tes po'ño'ch o' same'ña'huera Cristo
ahuañmo'choteñ, te'pa' ñeñ'tña o' notuanmas e'ñepa'ch
seyo'chre'cha. Ñaña ñerra'm erra'tsente' soctape'chyen ñeñ't
ama atteye' poctetso Yomporecoppa' ñeñ'tpa'cho'ña e'ñe ña
Puecamquëño'tpa' ñach e'ñe seño'tatuerre'.

16 Añcha'ña e'ñe pocte' o'ch yeḡohuena ñeñt' allpon o' chapatuonay Yompor e'ñe yeyoçhro ñeñt' yeñoten erra'tsente' e'ñe pocte' enten ña.

E'ñech cohuen yocrrena atet corre't Pablo

17 Ñaña o'ch masheñneshacha' ñaña noçhaneshacha' o'ch notas, ñeñt' atet sentenen atet nocrrena napa' sapa'çho'ña atetcha' socrra saña allohuenes. Ñaña añcha'ña secua' ñeñt' señoten erra'tsente' ñeñt' e'ñe atet corretsa cohuen ñeñt' atet entenyet ya.

18 Tarro'mar añ patsropa' eñall shonte' acheñnesha' ñeñt' atet penetpa' yapa' yeñoteñ ama ayemuetpahuoye' enteñeto atto Cristopa' rroma corsocho attotcha' yequeshperra. Ama't ñeñtpa' shontoch o' notuanmas ahuañapa' te'pa'çho'ña e'ñe nanac nellquēñesha'pa' o' alla noterrserr.

19 Ñetpa' aña o'patenahuet attoch allohuenetpa' e'ñech chenca'huerrret. Añach yomña'yenet attoch rra'yenet amapa' orrare'tyenet. Ñeñt' atet yomñatse'tyenetpa' ñeñtpa' atet ñerra'mrrate' ñeñta po'yomporer penet. Ama't ñeñt'cha' pencatahuetaña' tarraña ñetñapa' ñeñtach atarr coshate-nahuet. Ñaña añach e'ñe nenet pueyoçhro ñeñt'cha' atet coshatse'tatyenahuet arr patsro.

20 Tarraña yapa' o'huañ atteye' yoctape'ch tarro'mar añ patsropa' ama't all yeyçhenaña' tarraña po'ñoçhpa' ama ya'netsreyaye. Tarro'mar ya'netsro allcha' yeyçherra ya errponohuañenpa' ñeñtpa' all Yompor pue'ntaño. Ñeñt'ara pue'ntaño'tpa' yecueñ allot esempohuañencha' huerra Yepart-seshar Jesucristo ñeñt' Ya'queshpatañer yepen.

21 Ñerra'm o'ch huerra aña patsropa' ya ñeñt'ey arromña'teypa' ñapa' o'ch a'po'poñetuerrnay yechets, allochñapa' yapa'çho'ña yorrterrach e'ñech attey ñerra'm ña po'partsoteño'tpa' nanac cohuentena. E'ñech ña po'huamenco't a'po'poñetuerrey ñeñt'ara po'huamenco'tpa' e'ñech pomnaren ḡohuerran allohuen allpon ñeñt' eñall.

4

1 Ñeñto'marña masheñneshacha' ñaña noçhaneshacha' e'ñe nemorrenteñotespa' o'ch notas, çhocmuepa'ch huomenc sepa'nem seyocher Cristocop ñeñt' Yepartseshar yepen. Añpa' atet notenes tarro'mar sapa' çhocma neyerpuensa ñaña çhocma socshatenen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeñt' o' naguërr e'ñe netorreño't Yomporecop e'ñe so'mar. Atarr nanac nemorrentensa.

2 Ñaña o'ch noteñ noçhanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe

yame'ñeñoť Yepartseshar Cristopa' e'ñech cohuen yemuera-nena.

³ Ñaña o'ch notas, ama't erra'tsenotesa ñeñtes po'ñočh nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocmma nanac yema'yočhre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeñť parrocmma nanac yetorre't ahuañmo'cha. Ñet pa'so'chñečhnopa' o' aquellca'huaretterret attochña ñetpa' corretsetach.

E'ñe yame'ñeñoť Yomporpa' čhocmuepa'ch yocshena

⁴ Te'ñapa' o'ch noterrser atet, e'ñe same'ñeñoť Yepartse-shar Cristopa' čhocmuepa'ch socshena. O'ch alla noterrser, čhocmuepa'ch socshena.

⁵ Eñotuasepa'ch allohuen acheñenesha' atto sapa' e'ñe cohuen acheñres, amach čha po'poñ es sentatatsetuenaye, ama't erroteno'tsenes. Tarro'mar yeñoteñ po'ñočhpa' alla'tsena Yepartseshar Cristo.

⁶ Amach es sellcatsto ama't e'ñe mamesha. Añcha'ña ama't erroteno'tsenes e'ñe sema'yocheñoťpa' čhocmuepa'ch sotue Yompor ñeñť sellcatyene' ñaña e'ñe socsheñoť Yomporpa' čhocmuepa'ch senamyeni ñaña ñeñť sepallta'yena.

⁷ Ñerra'm atetcha' čhocma sepena, Yomporpa' ñachña ama semnatenaye o'ch es sena'yen seyočhro ama't coñe'ta. Attoch eñmataterrnay Yompor yeyočerpa' ya acheñey e'ñe yocta'ñoťapa' amate' errotenoť e'ñe yoťapa' yeñmataterro atet. Ñeñto'marña e'ñe yeparrocmateñoť epay Cristo Jesús, Pomporñapa' cohuañpennaycha' yeyočer attoch amach allo'na yena'nenno yeyočhro ñeñť allcatañtetsa.

Añcha'ña e'ñe cohuen yoctape'ch ñeñť e'ñe cohuen entuen allohuen acheñenesha'

⁸ Te'ña masheñnesha ñaña nočhanesha e'ñe allohuanenpa' o'ch noterres, añcha'ña soctape'chyes ora erra'tsente' señoten ñeñť e'ñe cohuenetyetsa ñaña ñeñť ora cohuen entuapotetsa. Ñeñťcha'ña soctape'chyes ora erra'tsente' ñeñť ama shequēñtsoyaye, alloťpa' ñaña ora erra'tsente' asherben entpahuotets, alloťpa' ñaña ora erra'tsente' ñeñť poctetsa, alloťpa' ñaña ora erra'tsente' ñeñť ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeñť e'ñe cohuen aserrpare'tpahuotets. Ora allpon añečhnopa' ñeñťcha'ña atet soctape'chyes.

⁹ Ñaña o'ch noterrser po'poñ ñeñťcha' atet sepa. Allpon o' neyčhatuas, ñaña allpon o' nečhapatuonas seyočhro, ñaña allpon o' neñotatyesas, ñaña allpon sentenen ñeñť

atet es nepa'yena napa' sapa'cho'ña te'ñapa' e'ñepa'chña atet es sepa'yen samña. Allochñapa' Yompör ñeñt acshatañtetsa yeyochropa' ñachña parro'tsenes allohuenes.

Atto filiposo'marnesha'pa' es apueñet Pablo ñeñt pallta'yena

¹⁰ Ñaña o'ch notas, e'ñe neyemteñoñ Yepartseshar Cristo, napa' atarr nocshena tarro'mar sapa' o' alla seyerpuerrna. Ñehua, napa' ama notenso o'te' sepuesuerren, añña noten sapa' ama't erroñ sepeñe attoch seyenpa'n.

¹¹ Ama cho es nemnapreteñoñeye' notenso atet, tarro'mar na te'pa' o' chapona neyo'chro ñeñt atet cohuentetsa, ñeñto'marña te'pa' o' attañña ney'cha ama't erroteno'tsenanapa' tarraña attachña chocma nocshena neyo'chro.

¹² Ñehua, napa' neñotena errotenopa' nanaccha' es nepallta'yese't atto yocrrena añe patsro, elloneña errotenopa' esocmañencha' nechyses't. Tarraña ama't erroteno'tsenenpa' na te'pa' o' neñoch o'ch attañña ney'cha; ñerra'm es nepalltena errotenopa' amach cha llecatenno, ama't cho esocmañen es nechyes errotenopa' amach cha nommo'cheño. Ñaña attecmañ nocshena ama't esempo eñall shonte' nerrar ñeñt'cha' neyetena, amapa' esempo ama eñalle ñeñt'cha' nerren, amach es ne'nenno.

¹³ Ñeñto'marña napa' e'ñe neñoteñ, yapa' ama't erroteno'tsenyapa' chocmach ahuañencatey tarro'mar Cristopa' ñach nanac ahuañencat yepene'.

¹⁴ Tarraña ama't o' notuanmas atet'pa' e'ñe pocte' nenteñ atto sapa' sellcapretenna ñeñt nemuero'chtatene' arr.

¹⁵ Ñaña sa ñeñtes filiposo'marneshas e'ñe señoñtueñ allempo ñanom neserrpare'tnom cohuen ñoñets alloch yequeshperra, allempo non Macedonioñ, allempopa' ama't allemeñ anetso'marpa' ama eñalle acheñenesha' ñeñt atet ap'cherrtsa Yomporecop ñeñt'cha' nellcapretenaya attoch e'ñe parrocmá es yapanna'ta. Sapa' saña e'ñe sapta ñeñtes es napuene' ñeñt allpon nepalltena.

¹⁶ Napa' ama't ahuañmo'cha allempo Tesalónico'tsenenpa' ama parrocho'tayaya sapa' chocma soñmaten ñeñt sapuenen añecop ñeñt nepallta'yena all.

¹⁷ Ñehua, napa' ama nocpaye' nemnapretenso o'ch es sapuenen. Añña nemnen ñaña allochñapa' socoppa'cho'ña el-lopa' o'ch atonetnoma attoch coshatuerres Yompör.

¹⁸ Te'pa' o' aposen masheñ Epafrodito ñeñt allpon soñmaten nocop. Ñeñt allpon o' nagaponaspa' te'pa' ama es nepallteno

ama't coñe'ta, elloña čha metanuosan allpon ñeñt nepall-tena. Ñeñt allpon sapuanpa' napa' e'ñe attecóptar nenteñ ñerra'mrrate' ñeñt apuenet Yomporecop ñeñt eñmosañtetsa ñeñt'cha' e'ñe pocte' enten, ñaña ñeñt'cha' nanac coshatene' ña.

¹⁹ Ñaña Yompor ñeñt e'ñe neyemtena napa' ñachña sapuerre' saña ama't ora ñeñt allpon sepallta'yena sa, tarro'mar e'ñe yeparrocmateñoť epay Puechemer ñeñt Cristo Jesús ñeñt e'ñe esocmañen es echyetspa' nanacocmañencha' esocmañen apuerrey yaña.

²⁰ Aye'chočhtatareťtepa'ch Yompor ñeñt atarr Parets. Ñeñt'pa' atteťtepa'ch ama't tayoteñ errponohuañen.

Arrpa' all so'tnerranet e'ñe po'cartot

²¹ Ñaña o'ch notas, o'ch sehuoñcha'ch allohuen ñeñt pueyochresha' o' perr Cristo Jesús. Ñaña allohuen masheñnesha' ñeñt e'ñe parro'tseneypa' ñetpa'čo'ña mueneñet o'ch huoñcha'taset ñamet arr necartot.

²² Ñaña allohuen ñeñt pueyochresha' o' perranet Parets arr Romopa' ñetpa'čo'ña mueneñet o'ch huoñcha'taset ñamet necartot. Ñeñt nanac muenets atetpa' ñeñt'pa' ñeñt parro yečhena ñeñt atarr añcha'tareťtetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allohuenes. Te'pa' ñeñtach notas, ñeñt'pa' atteťtepa'chña Nompore. Allohua.

Pablo

AÑ SAN PABLO PO' CARTA ÑEÑT QUELLCAN COLOSASO MARNESHA' COLOSENSES

Atto Pablopá' quellcan carta añecop ñeñt ame'ñetsa anetso Colosaso

¹⁻² Masheñeshacha' ñaña nochaneshacha' ñeñtes o' pueyochresha' perres Parets e'ñe seyemteñoñ Cristo, sa ñeñtes yeçheta all anetso Colosaso. Na Pablón sequellqueneña añ carta epan masheñ Timoteo. Napa' ñeñten Cristo Jesús puellsensaren tarro'mar atet muenatenen Yompor. E'ñe nehuomcha'teñoñes sa napa' o'ch notas: Yomporepa'ch Parets sebensare'tam'pene' ñepa'chña socshatene' e'ñe sa seyoçhro allohuenes.

Arrpa' all parasyoso'teñet Yompor ñocpuet

³ Yapa' allempo yema'yocham'pensapa' çhocma yeparasyoso'teñ Yompor, ñeñtara Yepartseshar Jesucristo Pompor.

⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeñt pueyochresha' pen Parets.

⁵ Ñeñtpa' tarro'marña sapa' atet atarr seyemteña sapa' e'ñe same'ñeñoñ Cristopa' sapa' añ atarr seyemtena ñeñt o'patatensa all pue'ntaño. Ñeñtña sapa' ahuañoñ se'mñotenña cohuen ñoñets ñeñt e'ñe po'ñoçh Yompor po'ñoñ alloch yequeshperra.

⁶ Ñeñtña cohuen ñoñets ñeñt çhapats sesho ñeñtña te'pa' allemeñ çhapyen, allpa'çho'ña nanac ame'ñatenana shonte' acheñenesha'. Allpa' allo'na senet orrtatyaset ñeñt e'ñe cohuen enten Yompor. Ñetpa' e'ñe atet penet atet sepene saña. Sa po'ñoçh allempo errtes e'muerre' Yompor po'ñoñ atto ñapa' atarr morrentenya, sañapa' e'ñe allempoteñ çhaponasa seyoçhro ñeñtña ñoñetspa' e'ñe po'ñoçh Yomporo po'ñoñ. Allempoteña sapa'çho'ña allo'na sesen orrtatyenomue' ñeñt e'ñe cohuen enten Yompor.

⁷ Ñeñtara cohuen ñoñets ñeñt ñanom yeçhatas masheñ Epafra. Ñapa' ñeñt e'ñe parroçma yetorrena Yomporecop, atarr yemuerannena. Ñapa' çhocma atarr cohuen torrena Cristocop ñeñtña' e'ñe socop.

⁸ Ñapa' e'ñe cohuen eñotauerrey atto sapa' atarr semorentannena e'ñe same'ñeñoñ Cristo.

Arrpa' all ma'yocham̄peñet colosaso'marnesha'

⁹ Ñeñto'marña allempo ye'mare'tas allempoteñ yapa' ama yequechpueno sema'yocham̄psaya Yompor. Yapa' añ yenamuenas Yompor: Sapa' chocmuepa'chña eñotatenes ñeñt atet muenen ña ñeñtcha' atet sepa'yes e'ñe cohuen ñocop. Ñaña chaponasepa'ch seyo'chro ora allohuen ñeñt atarr cohuentetsa yecamquēñecop.

¹⁰ Allochñapa' o'ch e'ñe sey'cherr ñeñt atet poctetsa allohuenacop ñeñfey pueyochresha' pen Yepartseshar. Allochñapa' attochña e'ñe socshateñ. E'ñe atto es cohuen sortatyenpa' nanaccha' cohuenot sesherbeñ. Allo'nepa'chña sesen eñotnomue' ñeñt atet penaña Parets.

¹¹ Ñaña añ yenamuenas Yompor: Po'partsoteña ñeñt cohuenñatsotetspa' e'ñepa'chña ahuamencat pa'yesas e'ñe poc-tacma allochñapa' amach cha sequechpatstere. E'ñechña socsheñesha' sa'huanta'huanomña allohuen ñeñt atarr echarr sentyen.

¹² Ñaña sapa' chocmuepa'ch separasyoso'ch Yompor tarro'mar ñapa' a'poctaterrnay attoch yagapapreter yaña ñeñt o'patatenana allohuen pueyochreshachno. Ñeñtñapa' ñeñt po'cohuenña pen ñeñt atarr cohuentetsa allñapa' puetaretsa.

¹³ Tarro'mar te' Yomporpa' o' cheterrey checmetot all am̄cha'no'chtēna oneñet. Te'ña yapa' o' chapaterrey po'cohuenño all ayochreshattēna e'ñe ña Puechemer ñeñt Jesucristo ñeñt atarr morrentēna ña.

¹⁴ Ñeñtña Jesucristo ñeñtña rromats yocop ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'queshpaterrey Yompor.

Allempo ashataretta Cristo po'rras corsocho, ñeñtña e'ñe a'mchechatue'ña allohuen esocmañen

¹⁵ Yompor Paretspa' ama entpahuo, tarraña Cristoña ama't entpo'pa' ñapa' e'ñe parro attecma ñerra'm Pompor Parets ñeñt ama entpahuoyaye. Ora allohuen allpon eñalletyestsas, Cristoñapa' e'ñe ñanom eñall ñeñtcha' pomnaren penahuet allohuenet.

¹⁶ Allohuen ñeñt allpon aye'chcataretetyestsas ña e'ñe ye'chcatuahuet, ama't ora allpon ñeñt ento'tsa'yen ñeñt ama entpahuoyaye ñaña allohuen ñeñt yentyen arr patsro, e'ñe ñocma pueye'chcatuar. Ñaña allohuen ñeñt allpon am̄cha'taretetyestsas, ñaña allohuen ñeñt allpon ayochreshatetyestsas, ñaña allohuen ñeñt allpon am̄cha'no'chetetyestsas erracmañen, ama't ñaña allohuen

ñeñt allpon huomenc entyesta, ora allohuenet ñeñtet ayečcataretet e'ñe ñocma pueyečcatuaranet. E'ñe ñocpacma ayečcataretetyesuahuet.

17 Ora allpon ñeñt esocmañen eñallpa' ñaña' e'ñe ñanom eñall. Ora allpon ñeñt esocmañen eñallpa' ñapa' ña orratyehuet.

18 Cristoñapa' yeyočer* yepohueñ allohueney ñeñtey parrocmatenaya e'ñe yame'ñeñoť ña, tarro'mar ñapa' ña yoctape'chatene' e'ñe cohuen allohueney ya ñeñtey e'ñe po'chets pohueney. Ñeño'mar Cristopa' pomnaren peney allohueney ñeñtey ame'ñenaya ña. Ñapa' e'ñe ñanom orrtatene' allochña yapa' corretsayach allohueney ñeñtey e'ñe po'chets pohueney e'ñe yeparrocmateñoť epay ña. Ñaña ñapa' ñanom tanterrtsa rromot, ñeñtñapa' ellochña nanac sherberr. Ñeñtpa' tarro'mar atet pa allochñapa' ora ñeñt esocmañen allpon eñall, ñetñapa' Cristochña e'ñe ñanom nanac cohuen entyenet.

19 Pompor Parets e'ñe pocte' enteñ o'ch e'ñe cohuen chorateña ora allohuen po'partsoña.

20 Ñaña' e'ñe alla parrocmaten Pomporesho e'ñe parrocma allohuen esocmañen, ama't ñeñt patso'tsa'yen, ama't ñeñt ento'tsa'yen. Allempo ashataretta Cristo po'rras corsocho, ñeñtña e'ñe a'mchechatue'ña allohuen esocmañen.

21 Ama't sa ahuatpa' atarr ellařaro'tsa'yenes Yomporeshot. E'ñe se'moñe'teñoť Yompor seyočhro sañapa' aña seyečcatyese't ñeñt ama cohuenayaye.

22 Tarraña te'ña Yomporpa' o' e'ñe parrocmaterres e'ñe ñesho. Ñehua, allempo amuročhtataretta Cristo e'ñe ña po'chtso atto rroma, ñeñtpa' attochña e'ñe parrocmaterres saña. O' e'ñe parrocmaterres attotña sapa'cho'ña o' sa'cohuentatare'tterra Partsocop, ñaña attoch amach sa'tanmare'tterro, amach eñalle attoch sotteñe'chare'tterra. Te'pa' atetca'ye enterresña Yompor.

23 Ñerra'm po'ñočh čhocmach same'ñera Cristo, ñerra'm e'ñech huomenc seperr seyočer attochña sapa' amach sepurrerro. Cohuen ñoñets ñeñt o' se'mhua alloch yequeshperra ñerra'm amach čha sa'ypo'ñañpere ñeñt o' seyemterra Yomporñapa' enterrescha' o' e'ñe sa'cohuentatare'tterra. Añ cohuen ñoñets ñeñt o' se'mare'tua sa, te'ñapa' aserrpare'tatare'tterrach ñaña allohuen ñeñt corra'yetsa aña patsro. Ñeño'marña na ñeñten Pablon nach sherberrets te'ñapa' nach serrpare'taterrahuet.

* 1:18 Ñehua, po'ñočh Cristopa' arr atma'ntatare't atet ñerra'mrrate' ñeñt yoñ yepen.

Atto Pablo a'potan ñeñt ahuatoteñ ama eñotpahuo

24 Te'ña na e'ñe nemuerochteñoñ socoppa' atarr nocshena. E'ñe nemuerochteñoñ nechtsopa' ñeñtpa' attoña netsotatenas allpon ñeñt palltetsa attoch nemuerochtaprecha Cristo allohuenacop ñeñt ame'ñenaya ña ñeñt e'ñe po'chets pen Cristo ñeñt e'ñe a'parrocmataten.

25 Ñeñto'marña te'pa' nach sherberre' allohuen ñeñt ame'ñenaya Cristo. Atet llesensenen Parets e'ñe socop, attochña napa' o'ch e'ñe na'potuerrñañ ora Yompor po'ñoñ.

26 Añcha' na'poterr ñeñt ama't ahuatapa' ama eseshaye' eñotaye'te e'ñe yatañneshapoteñ tarro'mar allempopa' ama čhena' allempoch eñotaterranet Yompor. Tarraña te'ñapa' e'ñe eñotaterrey Yompor allohueney ya ñeñtey pueyochresha' pen Parets.

27 Te'ña Yomporpa' atarr mueneñ o'ch eñotaterrey ñeñt atarr cochneshare' ñeñt po'cohuenña e'ñe ahuatoteñpa' ama eseshaye' eñotaye'te. Te'ña ñeñt po'cohuenña' o' e'ñe ortataretterra añecop ama't ñeñt ama judioneshayaye. Ñeñtña ama eñotete'te ahuatpa', ñeñtña' añepa't Cristo ñeñt chorrenaya yeyoçher. Attoña e'ñe yeyemteñoñ ña yañapa' o'ch yecohuentapretera.

28 Ñeñto'marña Cristopa' čhocmach ya'poteñ. E'ñechña cohuen yoctape'chatyeñ allohuen ama't erra'tsena acheñer. Ñaña e'ñech cohuen yeychatyeñña allohuen ama't erra'tsena acheñer attochña ñetpa'čo'ña e'ñech eñotyenet ñeñt atet pena Cristo. Attoña e'ñe pueyemteñoñet Cristopa' o'ch ame'ñeñet e'ñe poctacma.

29 Ñeñto'marña napa' nanac netorrena ñocop. E'ñe po'huamenco ñeñt atarr ahuamencat nepene' attoña napa' čhocma atarr netorra'yena ñocop.

2

1 Napa' nemneñ o'ch señoçh atto napa' e'ñe nellquëñoñes sa atarr nanac netorrena socop. E'ñe attecma netorrena ñaña laodiceo'marneshacop, ama't ñaña allohuenacop ñeñt ama puentarno.

2 Allochñapa' attochña e'ñe socsherra seyoçhrohuen atto e'ñe semorrentanna'teñoñpa' o'ch e'ñe separrocmaterr. Attochña čhaponasa seyoçhro attoch atarr es señoçyerr. O'ch señoçterr ñeñt ama eñotete'te ahuatoteñ, ñeñtpa' ñapñaña Yompor eñotene'. Ñeñtpa' e'ñepa'tca'ye Cristesho'tsenña

3 allohuen pa'namen eñoteñets ñeñt nanac cochneshare' yentyen. Ñeñtpa' e'ñe yeyemteñoña Cristo esheccha' yeñoterrña ñeñt ama't ahuatapa' ama eñotpahuo.

4 Ñeñto'marña napa' atet notenes allochñapa' sapa' amach esesha' seshquërraye ama'tcha' cotape'chatyesaset ñeñt atarr cohuen ñoñets sentyerreñ.

5 Ama'tcha' ama allo'tsenno e'ñe na tarraña neyerpueñoñes neyoçhropa' e'ñe parro'tsa'yenacmay. Sapa' e'ñech nocsheñesha' nentyenes atto e'ñe cohuenare' es sorratyen. Ñaña nentenes atto e'ñe same'ñeñoñ Cristo o' e'ñe huomenc sepa'yen seyoçher ñocop.

6 Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmatats epas.

7 Attochña sapa' e'ñech huomenc serrmuerrñañ po'ñoñ atet ñerra'mrrate' tsachreçh atarr huomenc rromuenan pats, e'ñe separrocmateñoñ epaspa' allo'nepa'chña atonetnomaña ñeñt atto same'ñena. E'ñe same'ñeñoñpa' huomenquëpa'chña sepa'yesnom seyoçher. Atterepa'chña allo'na sesen ñeñt atet yeçhatyenes. Ñaña çhocmupa'chña separasyoso'chña Yompor.

E'ñe yame'ñeñoñ Cristopa' o'ch yesuanomña atet muenatyese't yechets

8 Señota'tach allochña sapa' amach esesha' seshquërraye. Ñato'rraña po'poñ cotapñatsoñpa' çhate' shequërrset. Ñeñt cotapñatserpa' e'ñe orrena tarro'mar ñeñtpa' atta shequënsset. Ñeñtpa' arromñaña a'mtene'ña poçtapña ñeñt atto shecare'tyenet. Ñeñtpa' patso'marnesha, ñeñtñapa' ama poctenanoña Cristo poçtapña.

9 Tarro'mar Cristo atto acheñetos ñepa'tña chorrenayaña allohuen Yompor po'partsoña.

10 Sapa' e'ñe separrocmateñoñ Cristo sa'naña chorraprete-nayaña Parets. Ñeñt allohuen allpon añcha'taretetyests, Cristoñapa' e'ñe ñapña atarr sherben. Ñaña allohuen ñeñt allsensaretetyests, ñañaapa' e'ñe ñapña atarr sherben.

11 Sapa' e'ñe separrocmateñoñ Cristo te'pa' sesuanom atet muenatyese't sa sechets. Ñeñtpa' ama añoñeye' hueno o'ch setsorratannena e'ñe sañeña sechets ñeñt atet yeçhena judionesha'. Ñeñtpa' Cristeshoñña huena e'ñe seyemteñoñ ña. Ñeñto'marña e'ñe separrocmateñoñ Cristopa' te'ña sapa' o' seyomporena'tarterra e'ñe po'ñoçh.

12 Tarro'mar allempo sapataretta Yomporecop sapa' añ setma'ntena ñerra'mrrate' çho sepampapreteña Cristo. El-loña e'ñe sa same'ñeñoñpa' attoña o' setantapreteña Cristo. Tarro'mar sapa' añ same'ñate' atto Yomporpa' orrtatan po'partsoteña allo tantaterran Puechemer allempo rroma.

13 Ahuat sapa' so'chñarotña ama es soctape'chperra' seyo'chro ama't e'ñe mamesha ñeñt' cohuentetsa Yomporecop. E'ñe atet sepe't ñerra'm po'poñ acheñ ñeñt' ama Yomporena'tareyaye. Ñeñto'marña sapa' cha sottet' ñerra'mrrate' secamquēñpa' cha rromuen. Tarraña te'ña Yomporpa' o' apuerres attoch sapa'cho'ña corretsasach e'ñe atet pena Cristo, tarro'mar ñapa' o' peretna'huernas allohuen so'chñar.

14 Tarro'mar ñapa' o' e'ñe e'shohuerrnay ñoñets ñeñt' o' quella'huetañ alloch yotteñe'charetterrañ ya, atet oten ñoñets ñeñt' atet anaret' ahuatoteñ. Ñeñt' ñoñets Paretsñapa' alla a'huañatañperrey atet ñerra'mrrate' ñeñt' apatarettetsa corsocho.

15 Ñeñtña am'cha'no'chetsetsa añe patsro ama't ñaña ñeñt' huomenc entyetsapa' Cristoñapa' e'ñe puerratañpesuerranet allo am'cha'no'chetset. Atto rroma corsocho allotña e'ñe a'mtsoññetuerranet. Allempoñapa' orrtatanet allohuenet acheñeneshesho attoch ñetpa' eñochet ñeñt'pa' o' aprrataterra po'huamenc.

16 Ñato't same'ñeña'ña ama't erra'tsena acheñer ñeñt'cha' sote' sa amo' pocteyaye ñeñt' atto es serra'yen ama't ñaña atto es sorryen. Ñaña amach same'ñatsche ñeñt'cha' sotene' sapa' amo' setsotenoña añ yetñatser ñeñt' allpon ana'yese't judioneshacop, ama't allempoch cherrerr pate'tets char, ama't ñaña allempoch e'ñe errte' orrterrtsa pueña'tets arrorr. Ñaña amach same'ñatsche ñeñt'cha' sotene' sapa' año' set-sotenoña ñeñt' yetñatser ñeñt' anaret' allempocma yamesen.

17 Ñeñt'pa' pa'choyeshe'maca'ye peña ñeñt' huapatsa. Ñeñt' huapatsapa' po'ño'chpa' ñeñt'ca'yeña Cristo ñeñt' atarr sherbets.

18 Ñaña amach same'ñatsche ñeñt'cha' soterre' sapa' año'ch sagu'erroña attoch coshaterres Yompor tarro'mar sapa' año' atteye' sepeno ñeñt' atet penet ñet. Ñeñt' acheñer atet, ñetpa' añ co'tape'chyenet o'ch muero'chtatenet e'ñe ñañeñeta, tarraña ñetpa' pommo'cheñoña atet penet ñeñt' po'ño'chpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'mllaño'teñer. Ñaña ñetpa' añ nanac yemtenet ñeñt' entpesa'tyenetañ. Poctapño'tet ñeñt' e'ñe ñeta po'chtsetet huena, ñetpa' ñeñt' atarr ommo'chenet, ñeñto'marña ñeñt'pa' e'ñe orrena atet penet.

19 Ñetpa' ama parrocmateñeto Cristo ñeñto'marña ama pueyo'chreye' peñetoña Cristo. Ñehua, yapa' yoten yeyo'cher* ñeñtña atarr sherbets tarro'mar ñeñt' atarrtatene'ña ora

* 2:19 O'ch secue' nota 1.18.

yechets. Ateř pena yelloquẽm ñaãa yechtsorech ñeñña or-rene'ña yechets ñeñto'marña e'ñe parrocmatateñ attoña ora yechetspa' atarrtena. Ateř penaña Cristo ateř ñerra'm po'ñoçh ñeññ yeyoçher yepen. Allohueney ñeñtey ame'ña'yenaya Cristo e'ñe parrocmatateney, allochña yapa' allo'nach yesen orrtatyesnomue' ñeññ atarr sherbets Yomporecop țarro'mar yapa' ateř muenateney Yompor.

²⁰ Sa atto o' serromapretera Cristo ñeñto'marña añ coțapñatser arr patsro ñeññ arromñañenesha poçtapña, ñeñtpa' amaca'ye socpayaye. Sa atto o' serromapretera Cristo ñeñtpa' añecop attoch sequeçpuerrñañ arromñañenesha' poçtapña. Te'ñapa' eso'mare'tcha'ña alla same'ñerrerrña patso'mar coțapñats. Ñato'tña same'ñena'ña ñerra'm esempo otenset:

²¹ “Amach es sa'pllatsetyesatsto, amach es ser-ratse'tyesatsto, amach es sehta'yestatsto.” Tarraña ñeñtpa' e'ñech orrena ateř otenset,

²² țarro'mar ñeññ allohuen ñeññ añe patsro'tsen ñeñtpa' e'ñeca'ye e'nuapo'. Ñerra'm ye'nuapa' o'ch e'ñe huañ. Ñeñto'marña ñeñtcha' ateř sotyese' ñeñtpa' arromñañaca'ye poçtapña yeçhatenset.

²³ Ñetpa' po'ñoçhpa' orrtenetañ ateř ñerra'm esocmañen eñtoñenetañ ñeññ cohuentetsañ țarro'mar puema'yoçhreñotetpa' muechatse'tyenet, ñaãa ñetpa' e'ñe ñañeñeta mueroçttatset po'çhets, țarraña e'ñe pommo'cheñoteta ateř penet. Tarraña ñeññ ateř penet ñeñtpa' amaña aye'ña ateř peneto alloch huenaterret ñeññ ateř muenatse'tatyenanet po'çhets pa'namen sosya'tsañeçhno.

3

Añach soctape'chen ñeññ ateř muenen Cristo ñeññ pue'ntaño'tsen

¹ Atto po'ñoçh o' setantapretera Cristo, te'ñapa' añach soctape'chen ñeññ ateř muenen Cristo ñeññ pue'ntaño'tsen. Ñapa' allña atarr partsoten e'ñe Parets po'cohuenroř.

² Ento'marecopcha'ña sema'yoçhra. Sapa' amachña aña sema'yoçhratsto ñeññ patso'marecpa

³ țarro'mar sapa' o'huañcha' socshenaña ñeññ patso'marecpa. Te'ña sapa' e'ñe attes ñerra'mrrate' puesheñarr ñeññ rromuets o'huañcha' allo'na cosha'nenana ñeññ patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeññña yocshatene' ñeññ ora allpon atarr cohuen enten Cristo. Te'pa' atto yocrrerra ello e'ñe yeparrocmateñoř Cristo ñeññ parrocmatene' Pompor

Parets, ya'naña o' yeparrocmaterr epay Parets ama't ñeñt'pa' ama entpahuoyaye.

4 Ñeñto'marña ñerra'm esempoch orrterra Cristo ñeñt' allo e'ñe yocrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñt' mellashañ cotapñats ñeñt' ama pocteye' enteno Yompor

5 Ñeñto'marña socoppa' añ poctetsa: Ama't erra'tsena sechets ñeñt' soctape'chatene' patso'marpa' chosaña a'mchechatterre', ñeñt' atto sechta'yeyñ ñeñt' ama setaporeyaye, ñaña pa'namen sosya'tsañechno ñeñt' atet muenatse'tatyeney yechets, ñaña allpon yemnatse'tyen ñeñt'pa' ama cohuenaye' entapretenye Yompor, ñaña atto es atarr yeye'chapretanna'tyena, ñeñt'pa' ñeñtaña yeyomporer yepen.

6 Ñeñto'marcha'ña Yomporpa' entaterranetcha' po'yorochenña ama't allohuen ñeñt' atpare'tene'.

7 Sapa'cho'ña ahuatpa' e'ñe attecma soctape'chyese't allempo sapa' sosya'tsañeepa socrre't.

8 Tarraña te'ña ñeñt'pa' chosaña a'ypo'ñañperre', ama't ora allohuen e'moñe'tanna'teñets, atsrre'mueñets, o'patarñats, achñare'tanna'teñets, ama't allohuen eñosatse'teñtsochno ñeñt' atarr sosya'tsañechno.

9 Ñaña amach seshcare'tanna'tatsto tarro'mar te'pa' o' sesuanemñ ñeñt' mellashañ ñeñt' atet soctape'chatyesaye't seyochro. Ñeñt' atet sepa'yese't ahuat ñeñt' ama pocteye' enteno Yompor ñeñt'pa'cho'ña o' sesuanemñ.

10 Sapa' añcha'ña sechorrerraya ñeñt' etserra ñeñt'cha'ña soctape'chatterre' ello etserra allochña setserrataterrña soctapña. Attoña e'ñe setserrateño'tpa' o'ch soctape'cherr e'ñe cohuen ñeñt' atet cotape'chen Yompor ñeñt' seye'chcate'. Attochña sapa' allo'nach sesen eñotnene' ñeñt' atet cotape'chen ña.

11 Atto yetserrataterr yocapña Cristocop, yaña allohueneypa' e'ñechca'ye attecma puechemer pohueneyña Yompor. Ñeñto'marña yocoppa' ama eñalleña attoch yotaretta yapa' po'poño' acheñrey, yapa' ellopa'tetstatareyeyo' año' judioneshayayye, año' atsorrareteyayye, ñaña po'poño' acheñrey ñeñt' ahupña po'poñ anetsot ñaña ñeñteyo' yapa' año' es yeñoteno ñaña ñeñt' acheñrey ñeñteyo' ataruasatareyey e'ñe atta ñaña ñeñt' acheñrey e'ñe cohueno'tseney, tarro'mar Cristopa' ñeñt'ca'yeña e'ñe allohuenacpay, ñapa' ña e'ñe yechorra'huenaya allohueney pa'namen acheñrey ñeñt' parrocmatenaya.

12 Yomporña puemorrenteñoses sapa' o' acrerres ñeñtescha' a'cohuentatarettertsa Partsocop. Atto acrerrespa' e'ñepa'chña seyçhen attoch e'ñe cohuen semuerannena, e'ñepa'chña cohuen es sorratyen po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña aña se'natsto ñeñt e'ñe socpa ñeñt atet soctape'chen sa tarro'mar sapa' ñeñtes alleshoncatets. Ñeñto'marña sapa' e'ñepa'chña sa'huanta'huanomña ñeñt atarr echarrare' sentyen.

13 Ñaña e'ñepa'chña cohuen es sa'huantannena ñerra'm esempoch señch po'psheñeñ ñeñt ama pocteye' orrtateno socop, sapa' e'ñechña cohuen sepretnannena. Atto Yepartse-shar Cristopa' o' peretna'huerres sa, sapa'cho'ña çhocmachña sepretnannena samña.

14 Ñeñt atarr nanac sherbets o'ch seyçherr attoch semor-rentannena e'ñe cohuen. Tarro'mar ñerra'm po'ñoçh yemor-rentannenapa' amate' errotenoñ ya'ypo'ñerroña po'poñeçhno ñeñt cohuenteyetsa ñeñt atet yeña'yen. Attochña allo'nachña yesen etsotnomue'ña parrocmateñets.

15 Atto Yompor o' e'ñe coshaterres seyoçhro, ñeñtcha'ña soctape'chaterre'ña e'ñe cohuen, tarro'mar ñeñtecopña o' çhore'terreyña Yompor attoch e'ñe yeparrocmatuerr allohueney ñeñtey ame'ñenaya. Ñaña o'ch notas: Sapa' çhocmuepa'chña separasyoso'teñ Yompor.

16 Cristo po'ñoñpa' çhocmuepa'chña e'ñe cohuen soctape'cheñ sa seyoçhro, attochña e'ñe ora señoñeñohuenpa' çhocmuepa'ch seyçhatannena attoch e'ñe cohuen socshatannena. Ñaña separasyoso'teñoñpa' semor-rechepa'ch allohuen morreñtsoçhno ñeñt Partsocop attoch sa'ye'choçhtatoñ atto saçhoteñ. Socsheñeshohuenña seyoçhropa' separasyoso'chepa'ch Yompor.

17 Ama't esa ñeñt atet es seña'yen ama't esa ñeñt atet señosyen, e'ñechña seyemteñoñ Yepartseshar Jesús attochña sapa' es seña'yes. Ñeñto'marña sapa' çhocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepaclo'tsa'yen

18 Te'pa' o'ch notas samña ñeñtes arrollaretes: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñtey ame'ñenaya Yepartseshar Jesucristo.

19 Ñaña sa ñeñtes ataporetespa' o'ch notas saña: E'ñech cohuen semuerya setapor; amachña cha muene' erroñuanen sepeña setapor.

20 Ñaña sa cheshaneshacha' o'ch notas saña: Chocmach same'ña sompor ñaña sachor amachña cha satpare'tatsto. Ñerra'm atetcha' sepa' e'ñech cohuen coshensa ama't Yompor Parets.

21 Ñaña o'ch notas saña ñeñtes achemereshatneshas: Amachña cha sa'tsrre'mare'tatatscheña sechemerasha', te't cha nanac sellcatyenanet. E'ñe puellquëño'tetpa' chach atarr quellañsotyaset, amach e'ñe cohuenaye' ame'ñenseto.

22 Ñaña sapa' o'ch notas saña ñeñtes ataruasataretes e'ñe atta: Chocmachña e'ñe cohuen same'ñaña ñeñt samo'mte' sepen aña patsro. Amachña puecuampeño'tesaña sema'yoreñ setaruasatsto, ñeñtpa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyoçhrocmañen e'ñech cohuen setaruasen. E'ñechña señcha'na'teño't Yompor setaruasen e'ñe cohuen.

23 Ama't erra'tsena ñeñt setaruas sepa'yen e'ñechña seyoçhrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristocop setaruasen.

24 Sapa' e'ñe seño'teñ ñapa' añ o'patatensa ñeñtcha' atarr socshaterre'tarro'mar sapa' po'ño'ch añ sesherben Cristo ñeñt e'ñe po'ño'ch Yamo'mte' yepen.

25 Tarraña allohuen ñeñt atet pa'yene' ñeñt ama pocteye' enteno Yompor; ñetña' atsa'tataretterretcha' ñeñt allpon pa'yesaye't ñeñt ama pocteyaye. Ñeño'marña ama't puesheñarro'teta ñocpuetpa' amach eñalleña attoch pocte' enterranet Yompor.

4

1 Ñaña sapa' o'ch notas saña ñeñtes pamo'mte' pen ñeñt setaruasaten. Sapa' atetcha' sepeña sa'taruasañer ñeñt e'ñe pocte' entenet ñet. Ñaña sapa' seño'chepa'ch sapa'cho'ña sechenca'yeña Samo'mte' ñeñt pue'ntaño'tsen.

2 Ñaña te' allohuenespa' o'ch notas saña: Chocmuepa'chña sema'yoçhrenaña ma'yochatsa, amach seçllaño'ta sema'yocheño'ña Yompor. E'ñechña separasyoso'teñesha' sema'yocheña.

3 Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ño'ñ, allcha' e'ñe ya'potua ñeñt ahuatoteñ ñeñt ama't puesheñarrapa' ama eseshaye' eñotenaye ñeñt atet penaña Cristo. Ñeño'marña na te'pa' ayottam̄psareten cárcel.

4 Ñaña añcha' senamon Yompor allochña napa' o'ch e'ñe neñotaterranet e'ñe eñotochen ñeñt atet poctetsa nocop o'ch e'ñe na'potuer allohuen.

5 Ñaña añecop ñeñt ama ame'ñetso sapa' seño'tepa'chña ñeñt cohuentetsa ñeñt'cha' atet sepanet. Ama't taya sapa' arosña atta es puechatstatsa.

6 E'ñe semuereño'tpa' chocmuepa'chña e'ñe cohuen se'ñorana'tyenanet, allochña ñetpa' e'ñech cohuen entonaset ñeñt atet señen. Allochña sapa' seño'chcha' eñorana'tyesahuet attoch e'ñe cohuen sanapyesanet e'ñe puesheña'ttso'c'muet.

Arrpa' all so'terranet po'cartot

7 Ñaña te'pa' o'ch notas, masheñ Tíquico ñach seño'tatenaya' allohuen ñeñt atet nepena na arr. Ñapa' atarr yemuerannena, ñapa' chocma e'ñe cohuen yenpuenen atto yetorrena Yepart-sesharecop.

8 Ñeño'tmarña napa' ñeñt'ecopña nemñeñña sesho ñach seño'tatenaya' ñeñt atet yepena ya arr. Ñaña ñach socshatose' e'ñe seyo'chrohuen.

9 O'ch nemñe epuet masheñ Onésimo. Ñapa'cho'ña chocma atarr cohuen yenpuenen, nanac yemuerannena. Ñapa' e'ñe parro'marneshas. Ñet'cha'ña seño'tatose'ña allohuen ñeñt atet yepena ya arr.

10 Ñaña masheñ Aristarcopa'cho'ña mueneñ o'ch huom'cha'tas añ necartot. Ñapa'cho'ña e'ñe parro'cma ayottam'psaretey. Allo'tpa' o'ch huom'cha'tas ñaña masheñ Marcos ñeñt'ara añ pa'terr necartot. Ñapa' Bernabé puepa'ñer. Napa' o' notuas atet'cha' sepe' masheñ Marcos. Ñerra'm esempoch chap seshopa' e'ñech cohuen sagañ.

11 Ñaña masheñ Jesús ñeñt'ara sochetsa Justo, ñapa'cho'ña mueneñ o'ch huom'cha'tas añ necartot. Ñetpa' ñeñt'et ñapue't judioneshet ñeñt ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'.

12 Ñaña masheñ Epafra's ñeñt parro'marneshas, ñapa'cho'ña mueneñ o'ch huom'cha'tas ñaña. Ñapa'cho'ña nanac torrena Cristocop. E'ñe puema'yocheño't huomencpa' atarr torrena socop. Puema'yocheño'tpa' chocma enamatennas Yomporeshot attoch e'ñe huomenc sepa'nom seyo'cher Yomporecop. Ñaña añ enamuennas attoch e'ñech poctacma chaponasa seyo'chro ora allohuen ñeñt atet muenen Yompor.

¹³ Ñocoppa' o' e'ñe neñotatuas ñeñt atet nanac torrena socop ña'ña añecop ñeñt Laodiceo'tsa'yen, ña'ña ñeñt Hierápoliso'tsa'yen.

¹⁴ Ña'ña masheñ Lucas ñeñt apartañtetsa, nanac yemuerannena, ñapa'cho'ña mueneñ o'ch huom'cha'tas añ necartot. Masheñ Demaspa'cho'ña mueneñ o'ch huom'cha'tas ña'ña.

¹⁵ Te'ña sapa' o'ch sehuom'cha'ch sa'ña nocop masheñneshachno ña'ña nochaneshachno ñeñt Laodiceo'tsa'yen. O'ch sehuom'cha'ch ña'ña Ninfas, sehuom'cha'ch ña'ña allohuen ñeñt chocma ap'chetsa ña pa'paclo e'ñe pame'ñeñotet Cristo.

¹⁶ Esemposh lleva'huet añ carta sesho allotpa' o'ch sell-eyach ña'ña laodiceo'marnesha' ñeñt pame'ñeñotet Cristopa' chocma ap'chenet ñamet. Ña'ña po'poñ necarta ñeñt nemñen Laodiceo sapa'cho'ña selleye'ch ñerra'm esempoch huapateret Laodiceot o'ch cherr sesho.

¹⁷ Ña'ña o'ch soch masheñ Arquipo ñeñt atet noten na, po'ño'chpa' etsotanepa'ña ñeñt atet yecheña Yepartseshar ñeñtcha' po'taruas pa' ñocop.

¹⁸ Na ñeñten Pablón arrpa' nequellquëño' e'ñe na notopa' o'ch nehuom'cha'tnerres. Te'pa' o'ch seyepa'na napa' ayottam'psareten. Te'pa' ñeñtach notas, Yomporepa'chña sa'nataya. Ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT QUELLCAN TESALÓNICO'MARNESHA' 1 TESALONICENSES

*Atto Pablopá' quellcan carta añecop ñeñt ame'ñetsa anetso
Tesalónico epuet Silvano ñaña Timoteo*

¹ Masheñeshacha' ñaña nochaneshacha' ñeñtes allohuenes apchetsa all anetso Tesalónico e'ñe seyemteñoť Yompor Parets epuet ñaña Puechemer Jesucristo ñeñt Yepartseshar yepen. Na Pablón sequellquene'ña añ carta epan masheñ Silvano ñaña masheñ Timoteo. E'ñe nehuom'cha'teñoťes sa napa' o'ch notas: Yomporepa'ch sebensare'tampene' ñeñfara Parets epuet Puechemer Jesúsristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes.

Atto ame'ñena ñeñt apchetsa Tesalónico

² Yapa' yema'yocham'peñoťes sa chocma yeparasyoso'teñ Yompor socop allohuenacpas.

³ Tarro'mar allempo yema'yochaña Yompor chocma yeyerpensa atto sapa' e'ñe seyemteñoť Yompor atarr setorra'yena ñocop ñaña e'ñe semorrentanna'teñoťpa' atarr seyenpan-nena. Ñaña e'ñe seyemteñoť Yepartseshar Jesucristo sapa' o' huomenc sepa'nom seyo'cher e'ñe ñocop.

⁴ Masheñeshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuatoteñ acrerres sa ñeñtescha' ame'ñerraya.

⁵ Tarro'mar añ cohuen ñoñets ñeñt yeserrpare'tatoses ahuaña, ñeñtpa' ama ñoñtsenochayayo, yapa' añña ahuamen-cat yepene' Parets Puecamquëñ allochñapa' atto sapa' o' chaponasa seyo'chro ñeñt ñoñetspa' e'ñepa't po'ño'ch ñeñtpa' ama shequëñtsoyaye. Sapa' e'ñe señoťeney ñeñt atet e'ñe cohuen yorrtatyesonas allempo allo'tseney sesho.

⁶ E'ñe atet sentey ya ñeñt atet yepena, sapa'cho'ña te'pa' e'ñech atet sepena saña, ñaña e'ñe atet cohuen orrtatyen Yepartseshar Jesucristo sapa'cho'ña te'pa' ñeñfara sorrtatyen saña. Atto sagapoñ Yompor po'ñoñ e'ñe socsheñesha' Paretsña Puecamquëñ socshate'ña e'ñe sa seyo'chro. E'ñe same'ñeñoť ama't atarr sa'muero'chtatareťetyena țarraña sapa' chocma atarr socshena.

⁷ Ñeñto'marña allohuen ñeñt ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'cho'ña te'pa' e'ñe attecma orrtatyenet ñamet Yomporecop.

⁸ Te'ña e'ñe seshot o' epa'hua Yompor po'ñoñ all serppare'tyeñet. Ama allayayo Macedonio ñaña Acayo, oraña o' e'ñe epa'hua errañaren allemeñ. Errañaren o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello.

⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soctape'cherr ello cohuen Yomporecop o' sequechpa'huerr ñeñt semchatse'tyese't ayeçhcataref. Te'ña ñeñtpa' o' sequechpa'huer e'ñe poctacma attoña allempoteñ e'ñe cohuen sesherber Yompor ñeñt ama arromñafeshayaye ñeñt e'ñe po'ñoçh Yompor.

¹⁰ Ñaña serrpare'tyeñet atto sapa' e'ñe seyemteño't atarr secueññañ Yompor Puechemer esempohuañencha' huerra pue'ntaño't ñeñtara Puechemer ñeñt tantaterr allempo rroma, ñeñtara Jesús ñeñtcha' ya'queshpaterre' ñerra'm esempoch yoroçhtatuer Yompor.

2

Atet pa Pablo allempo Tesalónico'tsen

¹ O'ch masheñeshacha' ñaña noçhaneshacha' notas: Saña po'ñoçhpa' e'ñe seño'teñ ahuañmo'cha e'ñe cohuen sagapapuey, ama orrena yemo'tenso.

² Ellonetpa' e'ñe seño'teñ ama't epaye' mueroçhtatyete't Filiposo, ama't erro'tuanen pa'yetañe't, tarraña Yomporña atarr ahuañmenca't pa'ye't atto yapa' e'ñe yeyemteño't ña yeserrpare'tatas samña añ cohuen ñoñets ñeñt huetsa Yomporeshot. Ama't allo'tsa'yen ñaña ñeñt nanac epatarña'tetyetsa, yañapa' çhocmaña yeserrpare'tatase't.

³ Ñeñtpa' ama panteñtso'teye' yoctape'chataso, ñaña ama sosya'tsañeye' yoctape'chataso, ñaña ama e'ñe ya yeshquëño't yoctape'chataso.

⁴ Elloña ya Yomporpa' e'ñe pocte' enteney ñeñto'mar llesensa'y yach a'po'terre' po'ñoñ ñeñt e'ñe po'ñoçh cohuen ñoñets alloch a'queshpaterrey. Ñeñt atet ye'ñorenapa' ama añecpayaye o'ch e'ñe orrena yocshach acheñenesha', yapa' añecopña ye'ñorena attoch yocshateñ Yompor ñeñt e'ñe yentuene' ñeñt atet yoctape'chyen yeyoçhro.

⁵ Ñeñto'marña sapa' seño'teney ya ama't ahuatapa' ama e'ñe ya yeño'ño't yocshatenso attoch e'ñe cohuen sentueny. Ñaña ama't ahuatapa' ama erra yeshquënso attoch sapa' o'ch sapuey ñeñt yemnapretenes. Ñeñtpa' ama't Yomporpa' e'ñe pocte' entapreteney ñeñt atet yepenes.

⁶ Ñaña ama't ahuata ama añeye' yellquëno attoch sapa' o'ch secohuentatennay ama't ñaña allohuen po'potantañechno. Ñaña yapa' ama't Cristo yellsensenayeñ ñeñto'marña yocoppa' e'ñe pocteyñ o'ch atet yepennaseñ ñeñt atet pena añcha'taret, tarraña yapa' amaña yemno o'ch atet yepennasa.

⁷ Tarro'mar yapa' yemuereñotes sapa' e'ñe cohuen es yorrtatyennas. E'ñe atet yentenes ñerra'mrrate' cheshatollesha' e'ñech cohuen muereña pachor.

⁸ Atarr nanac yemorrentensa ñeñto'marña ama e'ñe ñapña cohuen ñoñets yapuenso ñeñt Yompor po'ñoñ. Elloña yocoppa'cho'ña pocte' yenteñ o'ch yesuanom ñeñt e'ñe yocpa attoch yeyenpas saña tarro'mar sapa' atarr yemorrentensa.

⁹ Ñeñt atet yepena ya, amate' masheñneshacha' cha sepsenye atto nanac yetaruase't yeto e'ñe tsapome'tets allempo allo'tseney sesho. Ñeñtpa' añecop atarr yetaruase't allochñapa' attoch sa ama't puesheñarrofesapa' amach cha ya'tsrre'moçhtana'taso allempo yeserrpare'tatase't cohuen ñoñets ñeñt Yompor po'ñoñ.

¹⁰ Sapa' e'ñe sentye't, Yomporpa'cho'ña e'ñe enteney atto yapa' e'ñe cohuen yorrtatyenes socop ñeñtes ame'ñetsa all. Ñeñtpa' e'ñe cohuen yorrtatyen Partsocop ñeñt e'ñe pocte' enten ña allochñapa' attoch amach errotent otentyeto "ama pocteyaye ñeñt atet sepena."

¹¹ Sapa' señoteñ yapa' e'ñe atet yentenes ñerra'mrrate' e'ñe yechemerasha' yepohuenes. Ñeñto'marña e'ñe cohuen yoctape'chatase't e'ñe puesheña'ttsos. E'ñe cohuen yocshaterres, e'ñe cohuen yoctape'chatase't

¹² po'ñoçh sapa' e'ñepa'chña cohuen sorrtatyen ñeñt atet poctetsa añecop ñeñt po'ñoçh ame'ñenaya Yompor tarro'mar ñapa' o' hua'ñerres o'ch so'patapretera all añcha'tarettena ña, attochña secohuentapretera saña.

¹³ Ñeñto'marña añecop çhocma yeparasyoso'teyñ Yompor ñaña atto sapa' allempo ye'mñotaterres Yompor po'ñoñ saña' e'ñe cohuen saguërrñañ po'ñoñ. Ama't ya seserrpare'tatosayeñ ama acheña po'ñoñ senteñe, ñeñtpa' Yomporoña po'ñoñ sentña allempo. Ñehua, ñeñtpa' e'ñe po'ñoçh Yompor po'ñoñ. Te'ña sa ñeñtes o' same'ñerra, Yomporña po'ñoñ o' cotape'chaterres e'ñe cohuen seyoçhro o' e'ñe huenaterres ñeñt atet çhocma sepatse'tyese't ahuat; te'ña sapa' añ sorrtatyen ñeñt e'ñe cohuen enten Yompor.

¹⁴ Sapa'cho'ña masheñneshacha' e'ñe atet sa'mueroçhtatarettena Yomporecop e'ñe atet pe't ñeñt ñanom apçhatsa Yomporecop ñeñt Judeo'tsa'yen. Ñetpa'

e'ñe pueyemteño'tet Cristo Jesús, judionesha'ña ñeñt e'ñe pamo'ts penetpa' atarr mueroçhtatenanet. Sapa'çho'ña e'ñe seyemteño' Cristo atarr mueroçhtatenes sam'a samo'tsesha'.

15 Ñeñtara judionesha' ñeñt muetse' Yepartseshar Jesús ñaña ñet muetsanate't ñeñt a'mta'yesaye't ahuat Yompor po'ñoñ. Ama't te' yapa'çho'ña pue'moñe'teño'tetay o' cotare'terryeterr yaña. Ñeño'marña Yomporpa' ama't e'ñe mameshapa' ama cohuenaye' entenaneto tarro'mar ñetpa' añe'na e'moñe'tenet allohuen pa'namen acheñenesha'.

16 Ñetpa' atarr epatare'tenyet attoch yeserrpare'tach po'poñ acheñ ñeñt ama judioneshayaye attoch ñetpa'çho'ña o'ch a'qushpataretterret. Attoña ñetpa' atarr nanac yorenet po'chñaret. Tarraña te'ña Yomporpa' o' entatuerrmochanet po'yoroçhenña.

Secherra Pablo o'ch a'bherraneta'

17-18 Ñaña o'ch masheñeshacha' ñaña noçhaneshacha' notas: Yaña po'ñoçh allempo çha'nmataterryet seshot allempoteña ama't esempapa' ama yabçhanna'terro e'ñe teme'ttsen. Chemerrña te' yapa' o' e'ñe yaptamerra. Tarraña ama't ama allame'ttsa yabçhannenopa' yeyoçhroñapa' e'ñe parrocmatetsey. Yapa' çhocma yesechenañ o'ch yabçherra' ama't napa' allponoche'tats nesechenañ. Tarraña oneñeñapa' çhocma epatare'teney.

19-20 Tarro'mar sapa' saña ñeñtes atarr yocshatene'. Ama't allempoch huerra Yepartseshar Jesucristo sapa' saña ñeñtescha' atarr yeyemterra, ñeñtescha' atarr yocshaterre' allempo, tarro'mar sapa' ñeñtescha' yapataterre' ñeñtcha' atarr yocshatene'ña ya allempo.

3

1 Allempoña na o'huañ na'huanta' ñeñt atto nellquënsa ñato' erro'teno'tseneste', ñeño'marña napa' e'ñe pocte' neñch o'ch alla na'pa napuet Atenso

2 attoch nemñonas masheñ Timoteo ñach semo'terraya', ñach seserrpare'tatose' attoch e'ñe huomenc sepa' seyoçher ñeñt atto same'ñena. Ñach socshaterre' ello ñeñt atto same'ñena. Tarro'mar masheñ Timoteo ñapa'çho'ña atarr cohuen yetorrena parro Yomporecop. Atarr serrpare'tatyenanet cohuen ñoñets atto Cristopa' ña a'qushpatañtetsa.

3 Ñach soctape'chaterre' e'ñe cohuen Yomporecop allochñapa' ama't atto atarr amuroçhtataretes, amachña ñeñtota sepueerratsterro ama't puesheñarrotesa. Nehua, sapa' e'ñe seño'teñ çhocmach huaponaya ñeñt amuroçhtatañ yenten.

4 Allempo e'ñe allo'tsa'yenacmay allohueney e'ñe parro allempo yapa' atet o' yotuas chocmach huaponaya mue-rochteñets. Ñeñtña te'pa' atetcho' o' pñonasa, te'pa' e'ñete' señoñeñ e'ñe po'ñoçh atet.

5 Ñeñto'marña ahuaña allempo o'huañ na'huanta' ñeñt atto nellquënsa naña allempo nemñe masheñ Timoteo attoch neñotas sapa' erroteneñe'ña sa, ñato' atterate' sesen ame'ñaya Yompor. Napa' nellquëño'tpa' atet noten ñato'rraña oneñe't puetpateño'es o'te' cha queçhpaterres Yompor. Ñerra'm atet seperra napa' atet noten ñeñt atto netorrena e'ñe socoppa' ñato'rraña ñeñt'pa' e'ñete' orrena.

6 Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña ser-ppare'tatuerrey atto sapa' chocma seyerpunya socsheñesha' ñaña atarr semneñ o'ch yabchannerra parro. Yapa'cho'ña e'ñe attecma atarr yemneñ yaña.

7 Ñeñto'marña masheñneshacha' ñaña noçhaneshacha' yapa' ama't allohuen es yehuenoya ñaña ama'tcha' atarr yemueroçhetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñtña atarr yocshaterre'.

8 Atto sapa' e'ñe cohuen huomenc sepen seyoçher Yepart-sesharecop, napa' ñeñtña e'ñe cohuen nocshatene' atto nocrena arr patsro.

9 Ñeñto'marña atarr nanac yeparasyoso'teñ Yompor socop. E'ñe yeyoçhropa' chocma yocshensa Yomporesho ñeñto'marña chocma yeparasyoso'teñ Yompor socop.

10 Chocma yenamueñ Yompor ye'to ama't ñaña tsapo attoch yabchannerra. Atarr yemneñ o'ch yoctape'chaterrsa' erra'tsente'ña sepalltena attoch same'ñera e'ñe poctacma.

11 Yompor Parets ñaña Yepartseshar Jesús ñetepa'chña yeçhapaterre'ña sesho.

12 Yepartsesharepa'chña atontaterre'ña semorrenteña allochñapa' allo'nach nanac sesen morrentanna'tsa e'ñe sagattsa attochña allo'nach sesen morrentenaya allohuen acheñenesha', e'ñe atet yepena ya sapa' nanac yemorrentensa.

13 E'ñe semorrentanna'teño't seyoçherñapa' e'ñech huomenc pennas Yepartseshar Cristo. Ñerra'm atetcha' sepa' allempo' amach erroteno't otteñe'chuerrsoña Yompor tarro'mar sapa' e'ñech cohuen es sorratyen Partsocop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Esemppo po'ñoçhpa' huerrach epuet allohuen ñeñt pueyochresha'çhno pen ñeñt e'ñe pocte' enten Parets.

4

Allo'nepa'chña cohuen yesen orrtatyesnene' ñeñt atet e'ñe pocte' enten Yompor

¹ Te'ña masheñneshacha' ñaña nochaneshacha' napa' o'ch notas, e'ñe yame'ñeñoť Yepartseshar Jesús, sapa' allo'nepa'chña cohuen sesen orrtatyesnene' ñeñt atet e'ñe pocte' enten Yompor ñeñt yeychatuas ahuañmo'choťeñ.

² Sapa' po'ñočpa' o' señoťer ñeñt atet yeychatuas e'ñe yame'ñeñoť Yepartseshar Jesús attochña sapa'cho'ña o'ch sordatyen ñeñt cohuen enten ña.

³ Po'ñoč ñeñtpa' Yomporña muene'ña atet, sapa' o'ch sa'cohuentataretterra ñocop attochña ama't puesheñarrotapa' amach sechtatscheña ñeñt ama setaporeyaye.

⁴ E'ñe puesheña'ttsospa' chochña e'ñe señoť attoch e'ñe cohuen seyore coyanesha' ñeñtcha' e'ñe ñapueť setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen senteñña setapor.

⁵ Amachña e'ñe añečpa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor.

⁶ Ama't puesheñarrotēsapa' amach so'chña'tam̄psatscheña semo'nasheñ, amach sechtapretatsche puetapor. Allohuen ñeñt atet ye'pa'pa' chočmach tsa'taterrya Yompor esempo. Ñeñtpa' ahuañmo'choťeñ e'ñe po'ñoč o' yotuas.

⁷ Yomporpa' ama añečpaye' chore'tenye o'ch aña atet ye'pa'yes ñeñt atarr sosey, añečopña chore'tenye o'ch e'ñe ya'cohuentataretterra ñocop.

⁸ Ñerra'm esesha'ch atpare'tene' ñeñt atet neychatenes ñetpa' ama acheñeye' po'ñoñ atpare'teneto, ñeñtpa' Yomporña po'ñoñ atpare'tenet ñeñtara Yompor ñeñt yapuene' Puecamquēñ ñeñtcha' ya'cohuentatene' e'ñe ñocop.

⁹ Atto semorrenteña allohuen masheñneshachnopa' te'ña sapa' ama sepallteno o'ch alla noterrser necartoť, sapa' o' eñotaterres Yompor attoch semorrentannerra allohuenes.

¹⁰ Po'ñoč e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepenañpa' ellopa' o'ch masheñneshacha' ñaña nochaneshacha' alla noterrser: Allo'nepa'ch sesen morrentanna'tnomtsa e'ñe cohuen.

¹¹ Sapa' añcha'ña se'nen attoch e'ñe cohuen muechet seyčhena sa'netsro, amachña aña sordtatsetyeso attoch se'moñe'tannena. Ñaña o'ch alla noterrser e'ñe sa sotoťpa' chočmachña setaruasa'yes ñeñt atet o' notuas.

12 Cohuencha' setaruasa'y'es allochñapa' e'ñech cohuen entenes ama't ñeññ ama ame'ñetso. Ñaña sapa' añecopcha'ña setaruasa'y'es attoch amach čha es sepallteno.

Attoch tantuerra ñeññ arromñainsha' allempoch huerra Jesús

13 Masheñneshacha' ñaña nočhaneshacha' yapa' yemneñ o'ch e'ñe señoter erroteno'tsa'yente'ña ñeññ pame'ñeñoť rromuets. Allochñapa' amach atta atarr sellquēnaneto ñeññ atet pena po'potantañ, ñetpa' ama es yemteneto.

14 Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attec mach tantatuerrey allohueney ñeñteycha' e'ñe yame'ñeñoť Jesucristo yerroma.

15 Ñeñño'marña te' sapa' o'ch neñotatas ñeññ atet eñotaterrey Yepartseshar Jesucristo, ñeñtpa' atet yečhatey: Allohueney ñeñteycha' orameñ corretsa allempoch huerra ña ñeñteycha' ama rromhuetsa' allempo, yañapa' amach yotam̄pesyoña yanom ñeññ o' rromhua, añcha' ñanom oterrtsa ñeññ o' rromhua allotñapa' yaña ñeñtey orameñ corretsa, tarro'mar allempopa' atetča' perra.

16 Partsesha'pa' ñachña eñerrets huomenc ñaña ñeññ pa'mcha'tareter pen allohuen mellañoťeñnasha' ñachña rrana'nerrtsa, e'ñech allempocma e'morrterra ñaña Yompor po'pocor. Attochña ñapa' sohua'nerra pue'ntañoť. Ñeññña rromuets ñeññ ameña'nmaya Cristo ñetña allempopa' ñanmuetča' tantrra'tuerret.

17 Allotñapa' yaña ñeñtey orameñ corretsa arr patsro a'tapatareteycha' yaña oso e'ñe parro epay ñeññ o' tantrra'tuena rromot attochña e'ñech parrocmayepocor Yepartseshar eno. Attochña e'ñe allohueneypa' parro'tseneycha' epay Yepartseshar e'ñe allempoteñ erponañohuen.

18 Ñeñño'marña sapa' čhocmach seyerpatannena añ cohuen ñoñets attoch e'ñe cohuen socshatannena.

5

1 Te'ña masheñneshacha' ñaña nočhaneshacha' socoppa' ama pallteno o'ch alla noterrserañ necartot e'ñech esempo etsoterra allempoch huerraña Yepartseshar.

2 Tarro'mar sapa'čo'ña o' e'ñe señoter čherrcha' paterr yet allempoch huerra Yepartseshar Jesús. Allempopa' e'ñech machayotā huerra e'ñe atet ñerra'm esempo huennaya eñet tsapo e'ñech machoyotā huapa.

3 Allempo amach čhena' ñeññ yeter allempoch huerra Yepartseshar acheñenesha'ña arr patsro ñetñapa' atetča'

otyerret allempo: “Teña yapa’ eñe cohuen muechet yeychena arr patsro. Yocoppa’ ama’t ahuatapa’ amach eñalleterroña ñeñtcha’ yeyore’tame’terre.” Tarraña eñech allorocma machayotach huerranet ñeñtcha’ eñe a’cllatuerrahuet. Allempo ama’t puesheñarrapa’ amach eñalleña attoch yeterret. Eñech atet cherranet ñerra’mrrate’ allempo atsotenana coyanesha’ pue’mar amach eñalleña attoch yetam̄psana atto atserrpeñ pue’mar attoch amach atserrpe.

4 Tarraña saña po’ñoçh masheñeshacha’ ñaña noçhaneshacha’ sapa’ ama checmeto’tsenayayso ñeñt atet pena acheñenesha’ ñeñt ama ame’ñetso. Sapa’ eñe señoteñ ñeñto’marña ama’tcha’ machayota huerra eñe atet machayota huennaya eñe, sañapa’ amach cha seyorenatsto.

5 Tarro’mar sapa’ eñe same’ñeñoñ Cristo eñe señoteññañ po’cohuenña ñeñto’marña napa’ o’ch netma’ntatasa sapa’ puetarenana’tarneshas ñaña yetena’tarneshas. Po’ñoçh yapa’ ama tsapo’marneshayayye ñaña ama checmeto’marneshayayye tarro’mar yapa’ ama añeye’ yeḡa’yeno ñeñt atet p̄atse’tyen ñeñt ama ame’ñetso.

6 Ñeñto’marña o’ch notas: Yapa’ amach cha yeçllatsto Yomporecop, tarro’mar ñerra’m atet yeḡapa’ chach yottena ñerra’m cha yemuen Yomporecop atet pena po’potantañ ñeñt at̄ta es puecha’yetsa. Yapa’ amachña cha yemanrra’tatsto çhochña eñe yeñotena attochña yeñose’re’tyesuena.

7 Ñehua, yeñoteñ ñeñt manrretspa’ tsapoch manrrenet ñaña ñeñt posa’tare’tyetspa’ tsapoch posa’tare’tyenet.

8 Tarraña yapa’ yeto’marneshay ñeñto’mar çhocmuepa’ch eñe yeñoteñoñ yeñose’re’tyesuena. Eñe yame’ñeñoñ Yompor ñaña yemorrentanna’teñoñ ñeñtña cohuan̄pene’ña yeyoçher Yomporecop attoch amach aña yoc̄tape’chatsto ñeñt ama pocteye’ enteno Yompor. Ñeñtpa’ añ toma’ntena asrom atet ñerra’mrrate’ ñeñt chorrena solltar ñeñt a’natene’ puesomap allempo quellarena attoch ama etare’tteneto. Ñaña yapa’ yeyemteñoñ Cristo te’ñapa’ eñe a’qeshp̄atare’tey ñeñtpa’cho’ña ñeñtña yemoñenaya. Ñeñtpa’ añ toma’ntena atet pena solltar o’ch na’nman asret poño attoch ama etto’tare’tteto.

9 Tarro’mar Yompor po’ñoçhpa’ ama añeye’ o’patatenyo attoch coñchatuerrey; yapa’ aña o’patatenya attoch eñe cohuen a’qeshp̄atuerrey allohueney eñe yame’ñeñoña Yepart-seshar Jesucristo

10 ñeñt rromats yocop, attochña ama’tcha’ o’ yoclla’huenañ allempoch huerra amapa’ ñato’ orameñ yocrenmeñ allempoch huerra atterayach yañapa’ corretsayach epay ña eñe

parro.

11 Ñeñto'marña te'pa' notenes, sapa' čhocmuepa'ch socshatannena Yomporecop. Chocmuepa'chña huomenc sepanna'ta seyočher Yomporecop e'ñech atet sepa tayoteñ.

Pablopa' e'ñe cohuen cotape'chatyesanet

12 O'ch masheñneshacha' ñaña nočhaneshacha' notas po'poñ, señcha'na'teño'tpa' e'ñepa'ch cohuen semorrenteña allohuen ñeñt' torra'yetsa Yomporecop sesho tarro'mar ñetpa' e'ñe Partsesheshoť anarettenet ñeñt'cha' añcha'tarettatsa socop, ñetcha'ña soctape'chatene'ña e'ñe cohuen.

13 Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentannena attoch e'ñe cohuen seyčhena e'ñe señmañesha'.

14 Ñaña o'ch masheñneshacha' alla noterrserr ñeñt'cha' atet sepa: Ñeñt' atarr quellañtsotyets sesho sachña cotape'chaterrahuet cohuen attoch amach allo'na quellañtsoteneto. Ñaña ñeñt' ama coshetso sachña e'ñe cohuen coshaterrahuet ñaña ñeñt' ama huomencaye' penaye pueyočher Yomporecop, sachña e'ñe cohuen coshatyerrahuet attoch e'ñe huomenc perret ñamet pueyočher Yomporecop. E'ñe allohuenet saña e'ñe semorrenteñoťanet ñetpa' čhocmuepa'chña e'ñe cohuen sa'huantenanet.

15 Ñaña sapa' čhocmuepa'ch e'ñe cohuen señotena allochñapa' ñerra'm po'psheñeñ erroť ponaspa' sapa' ama't e'ñe puešeñarrotesa amach setsa'tatatsche ama't coñe'ta. Añcha'ña e'ñechña cohuen sepeñ samo'ts ama't ñaña allohuen po'potantañ acheñenesha'.

16 Ñaña sapa' čhocmuepa'ch e'ñe cohuen socshena.

17 Ñaña čhocmuepa'chña sema'yochena.

18 Ñaña ama't erroťeno'tsensa čhocmuepa'ch separasyoso'teñ Yompor tarro'mar ñeñt'pa' atet muenen e'ñe yocop allohuenacpay ñeñtey yemtenoya Puechemer ñeñt' Cristo Jesús.

19 Ñaña amach satpare'tatsche ñeñt' atet cotape'chatenes Parets Puecamquëñ e'ñe seyočhro, tarro'mar ñerra'm atet seřapa' čhate' sa'huañaterrñañ ñeñt' atet eñotatyenes Yompor Puecamquëñoť. Ñeñt'pa' e'ñe atet ñerra'mrrate' o' semayerrñañ Yompor po'urare.

20 Ñaña amach atet sentatsche ñeñt' atet eñoraten Parets Puecamquëñoť ñerra'm ama asherbenaye' senteñe.

21 Allohuen ama't erra'tsena čhochña ñanom señoč ñato' e'ñe'e' cohuen ñato'pa' amate' cohuenayaye. Ñeñt' allohuen erra'tsencha' e'ñe cohuen sentyes ñeñt'ña' amach sequečpatstere ama't ahuata.

22 Tarraña allohuen erra'tsencha' ama cohuenaye' sentyeso ñeñt'ña' čhosaña a'ypo'ñerre'.

23 Yompor ñeñt' e'ñe yocshatene' yeyočhro, ñepa'chña e'ñe sa'cohuentaterre' e'ñe cohuen Partsocop. Chocmuepa'ch allo'na sesen e'ñe cohuen allochña' ñerra'm esempoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëñohuen, ama't seyočhrohuen, ama't ñaña sechtsohuen.

24 Tarro'mar Yompor ñeñt' o' chore'terres ñapa' ña atarr ayemuetpotetsa, ñachña setsotatue'ña e'ñe ora allohuen ñeñt' e'ñe cohuentetsa ñocop.

Arrpa' all so'terranet po'cartot

25 O'ch masheñneshacha' ñaña nočhaneshacha' notas, čhocmach sema'yochañpesya yaña.

26 Ñaña te'pa' nemneñ o'ch nehuomñcha'tas allohuenes ñeñtes ame'ñetsa.*

27 Ñaña te'pa' o'ch notas, e'ñe yemñcha'na'teñoč Yepartseshar Cristo añ cartapa' o'ch selleyach allohuen masheñneshachno ñaña nočhaneshachno.

28 Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñt'pa' attetepa'ch Nompore. Allohua.

Pablo

* 5:26 Po'ñoč oteneý. "Choch setso'ttsa'pa'tannena ñerra'm esempo sehuomñcha'tanna'tena ñeñt' atet poctetsa Partsocop." Ñeñt'pa' atet yečhete't ahuat.

AÑ PUEPAÑ SAN PABLO PO' CARTA ÑEÑÑ QUELLQUËRRANERR TESALÓNICO' MARNESHA' 2 TESALONICENSES

Atto Pablopa' quellquërranerr carta añecop ñeññ ame'ñetsa anetso Tesalónico epuet Silvano ñaña Timoteo

¹ Masheñneshacha' ñaña nochaneshacha' ñeññtes allohuenes apçhetsa all anetso Tesalónico e'ñe seyemteñoŧ Yompor Parets epuet ñaña Puechemer Jesucristo ñeññ Yepartseshar yepen. Na Pablon o'ch alla nequellquërrnaserr po'poñ carta epan masheñ Silvano ñaña masheñ Timoteo.

² E'ñe nehuoncha'teñotes sa napa' o'ch notas: Yomporepa'chña sebensare'tam̄pene' ñeññtara Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Allempoch huerra Cristopa' a'coñchatarë'terrach allohuen ñeññ ama eñotaye'te Yompor

³ O'ch masheñneshacha' ñaña nochaneshacha' notas, e'ñe pocte' çhocmach yeparasyoso'teñ Yompor socop tarro'mar sapa' po'ñoçh allo'na sesen ame'ña'nmaya Yompor ñaña allohuenes e'ñe puesheña'ttsospa' allo'na sesen morrentanna'tyesnomtsa.

⁴ Ñeñño'marña yañapa' atarr yocshensa. E'ñe yocsheñoŧpa' atarr cohuen yeñosyen socop all allampaño'mar all apçha'yenet Yomporecop. Ñetpa' çhocma yeñotatyenanet atet sepena sa, ama't ñeññ se'moñe'tene' ñeññ çhocma soctare'tene' atto mueroçhtatenset, tarraña sañapa' çhocma atarr sa'huantenanet e'ñe same'ñeñoŧ Yompor.

⁵ Ñehua, yapa' yeñoteñ Yomporpa' e'ñe pocte' es pa'yen. Ñeñño'marña yeñoteñ sapa' e'ñe same'ñeñoŧ ña, ñaña' e'ñeca'ye pocte' entenes allochñapa' attoch seçherr all añcha'tare'ttena ña, sapa' ñeññtecopña atarr sa'mueroçhtatare'ttenaña te'.

⁶ Tarraña Yomporpa' e'ñe pocte' enteñ ñach tsa'taterraya mueroçhteñtso allohuen ñeññ semueroçhtatene' sa te'.

⁷ Ñeññ atto atarr semueroçhtena te' e'ñe ñocop, Yomporña' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeññcha'ña atarr yocshaterre' ñerra'm esempoch orretuerra Yepartseshar Jesús allempoch huerra pue'ntañoŧ. Ña po'ñoçhpa' orretuer-rach epuet po'mllañoŧeññaneshar ñeññ atarr ahuamencatesha'

pa'yen. Ñapa' e'ñech po'yorochenñoñ huerra atet ñerra'mrrate' tso' huoretnets.

⁸ Allempoch huerrapa' coñchatuerrancha' allohuen ñeññ ama eñotaye'te Yompor ñeññ ama ame'ña'poye' entaye'te cohuen ñoñets ñeññ Yepartsesharecop Jesucristo.

⁹ Ñetñapa' attoch a'coñchatareñterretpa' chenca'huerretcha' errponañohuen. Attoch ñetpa' o'ch ellopa'tetstatareñterret amach entereto Yepartseshar, amach enterrñañeto po'cohuenña all nanac partsotena.

¹⁰ Ñapa' tarro'marcha' huerra attoch allohueney ñeññey pueyochresha' pen Parets, yañapa' yecohuentatapuerrñañcha'. Allohueney ñeññey ame'ñaye't atarrcha' yecuanrrortapuer. Sa'nachña cohuentatapuerre' tarro'mar sapa'cho'ña same'ñena cohuen ñoñets ñeññ yeñotatenes.

¹¹ Ñeñño'marña yapa' chocma yema'yochamñensa allochñapa' attoch Yomporpa' e'ñe pocte' entenes atto ñapa' o' chore'terres o'ch pueyochresha' perres samña. Ñaña yapa' añ yenamuennas Yompor e'ñepa'chña po'huamenco't etsotatonasña allohuen ñeññ atet soctape'chyen cohuen ñocop ñaña ora ñeññ allpon setorra'yena e'ñe same'ñeñoñ ña.

¹² Attochña sapa' e'ñech cohuen secohuentaterrñañ Yepartseshar Jesús, ñaña'cohuentaterrescha' samña. Ñeññpa' e'ñe Yompor puemuereño'tey ñaña Yepartseshar Jesucristo.

2

Allempoch orrterra puesheñarr acheñ ñeññ atarr atparñaitetsa

¹ Te'pa' o'ch masheññeshacha' ñaña noçhaneshacha' neñotatas po'poñ ñeññpa' añ allempoch huerra Yepartseshar Jesucristo attoch ñapa' o'ch apçhatuerrey allohueney e'ñe ñesho.

² Te'pa' ñeñño'marña notenes: Ama't puesheñarroñesapa' ñato't cha yore'tensa'ña po'poñ coñapñats. Sapa' amach cha seyorenatsto ama'tcha' se'mare'ter o' çherr allempoch huerra Yepartseshar. Ama'tcha' otasetañ ñetpa' e'ño' Parets Puecamquëñ eñoratenahuet, sañapa' ñato'tña cha seyorena'. Ama'tcha' pueserrparño'tet atet otaset, sañapa' amach seyorenatsto. Ama'tcha' atet otasetañ te'pa' o' çhap carta ñeññ mueñen Pablo ñeññpa' atet oten carta, te'pa' o' çherr allempoch huerra Yepartseshar, saña e'ñe seyorno'tpa' ñato'tña ñeññaña same'ñena'.

³ Ama't puesheñarroñesa sapa' amach se'mñnotatstaneto ama't e'ñe errotencha' otyesaset, tarro'mar ñetpa' atetcha' shecare'tasetañ. Ñeñño'marña napa' o'ch notas, allempopa'

amaca'ye cherra' ñeñteño po ñeñte yetñatsroch huerra Yepartseshar, ato'tña atarr atonterra' ñeñtcha' quechpuerre' Yompor. Ñaña allempopa' orrtarrach puesheñarr acheñ ñeñt atarr atparñatetsa, ñeñtpa' chenquënts o'patenaya. Ñaña'pa' Yomporach atarr e'moñe'terr ñaña allohuen acheñenesha' ñeñt muechatse'tyene' pa'namen ñeñt po'yomporer pa'yenet ñachña e'ñe tanterrahuet.

4 Ñaña ñeñtña atparñatpa' e'ñe pommo'cheño'tpa' atetcha' oterran acheñenesha' ñapa' ño'ña e'ñe Yomporeretets. Attochña ama't Parets pa'paclopa' o'ch anorruerr, o'ch e'ñe atet perra ñerra'mrrate' ña po'ño'ch Yomporeretets.

5 Sapa' ama't seyerpuenoña allempo allo'tsenmeñen sesho na ama't ñeñtpa' e'ñe notuase't.

6 Sapa' seño'teñte' ñeñt onare'tatene'ña ña atto' amo' huerro tarraña chocmach orrtarra allempoch cherr e'ñe atet onañchare'ñocop.

7 Ama't e'ñe tayoteñ atto atpare'tenet ñoñets ñeñt atet anare'tpa' ñetña e'ñe a'nahuapa' chocma atet penet. Tarraña te'pa' eñall ñeñt onare'tatene' ñeñt acheñer ñeñtcha' atarr atparñaterrtsa, ñeñtña'pa' chocmach atet pena tarremphuach esempoch aprratam'psaretterra ñeñt onare'tatene'te'.

8 O'ch aprratam'psaretterrappa' ñeñtña acheñer ñeñtcha' atparñaterrtsa allempochña orrtataretterra. Tarraña allempoch huerra Yepartseshar Jesús ñachña e'ñe puenamo't po'rrerrño'tpa' ñeñtcha' muetserre'ña ñeñt atarr atparñatetsa. Attoch orrtarra Jesús e'ñe ña po'partsoteño't ñeñtcha'ña e'ñe a'mchechaterre'ña ñeñt atparñatetsa.

9 Ñehua, ñeñt acheñerpa' oneñe' atarr ahuamenca't pene' attoch orrtarra. Ñeñto'marña pa'namencha' orrtaterr ñeñt po'partsoña pen ña ñeñt ama't ahuata acheñenesha' arr patsropa' ama't puesheñarro'tetapa' ama puentareto. Tarraña ñeñt po'partsoteña pen ñapa' ñeñtpa' ama Yomporaye' apuenaye, ñeñtpa' oneñeña apuene' atto shecare'tyenan acheñenesha'.

10 Attach e'ñe pa'namenot atarr shecare'tyerran acheñenesha' ñeñt ama't mameshapa' ama pocteyaye. Añcha' ashcatterrtsa allohuen ñeñt ama ame'ñetso ñeñt o'patena chenquëñets. Tarro'mar ñetpa' ahuatoteñ ama ame'ña'poye' enteññañetoña Yompor po'ño'ñ ñeñt e'ñe po'ño'ch alloch a'queshpataretterretañ.

11 Ñeñto'marña Yomporpa' muenaterranetcha' o'ch atarr ashcatterret, attochña ñetpa' e'ñech aña ame'ñerret shequëñets ñeñt ama po'ño'chayaye ama't mamesha.

12 Attochña allohuen ñeñt ama ame'ña'poye' entaye'te Yompor po'ñoñ ñeñt e'ñe po'ñoçh queshpeñets, ñetpa' aña coshete't ñeñt ama pocteye' enteno Yompor, ñeñto'marña ñetpa' a'coñchatare'terretcha' allempo.

Yapa' e'ñe ahuatoteñ acrerrey Yompor attoch a'queshpaterrey

13 Tarraña saña masheñnesha ñaña noçhaneshacha', yapa' çhocma yeparasyoso'teñ Yompor socop ñeñtes atarr muerena Yepartseshar. Tarro'mar Yomporpa' ahuatoteñ acrerres sa attoch a'queshpaterres e'ñe cohuen. Ñeñtpa' añcha' sa'queshpaterre' atto Parets Puecamquẽña' e'ñe a'cohuentatenes ñocop atto sapa' e'ñe cohuen same'ñerrñaña po'ñoñ ñeñt e'ñe po'ñoçh alloch yequeshperra.

14 Sapa' ñeñtecopña çhore'terresña Yompor allempo yeser-ppare'tatase't cohuen ñoñets alloch a'queshpaterrey Yompor. Attochña sapa'çho'ña secohuentapreterach Yepartseshar Jesucristo esempohuañen.

15 Ñeñto'marña o'ch masheñneshacha' ñaña noçhaneshacha' noterrser: Sapa' e'ñepa'chña huomenc sepa'nom seyoçher Yomporcop. Ñaña ora allpon ñeñt yeyçhatyesase't e'ñe ya yenamot yeserppare'tatase't ama't ñaña yecartot ñeñtña' e'ñepa'ch huomenc seyoçhre'cha.

16-17 Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ñe cohuen socshaterre'ña sa seyoçhro, ñetepa'chña ahua mencat sepa'yese' allochña'pa' attochña sapa' çhocmach señosyen ñeñt e'ñe cohuen ñoñets ñaña e'ñechña cohuenare' es sorrtatyen. Tarro'mar Yomporpa' ñeñtña atarr yemorrentenaya, ñapa' ña ñeñt çhocma yocshatene' yeyoçhro. Ñeñtña cosheñetspa' amach ahuañaña'terro ama't errponaña. Ña e'ñe puemuereño'tpa' çhocma eñotateney e'ñe cohuen ñeñt atarr yeyemtena.

3

Atto Pablopa' otanet çhocmach ma'yochampeñet

1 Masheñneshacha' ñaña noçhaneshacha' te'ña e'ñe allohuapa' o'ch notas: Sapa' çhocmach sema'yochamipesya yaña. O'ch senamueñ Yompor attoch epa'huerra tecma Yepartseshar po'ñoñ erraparen, cohuenepa'ch entyeññañet po'ñoñ e'ñe atet atarr cohuen señch samã allempo çhap sesho.

2 Tarro'mar acheñenesha'pa' ama allohuenacmaye' ame'ñeneto, shonte' ñeñt atpare'tene' Yompor ñaña shonte' atsre'mñañnesha' ñeñt ama cohuenayaye. Ñeñto'marña sapa' añcha' senamueñ Yompor amuepa'chña çha epatare'tatsetyeto.

³ Tarraña Yepartsesharpa' ñachña atarr yeyemtena, ñachña ahuamencaŧ sepene', ñach secuamŧpene', ñach sa'nataya, amach muenatano o'ch čhaponasa ñeñŧ ama cohuenayaye.

⁴ Ñaña yapa' e'ñe yeyemteñoŧ Yepartseshar sapa' e'ñe yeñotenes ñeñŧ atet yotenes sañapa' e'ñech atet sepena te' ama't ñaña tsapatoneŧ čhocmachña atet sepena.

⁵ Yepartsesharepa'chña Jesús e'ñe cohuen señoŧatene'ña seyočhro atto Yomporpa' atarr morrentensa, attochña e'ñech cohuen sa'huanŧhuanom allohuen topateñets e'ñe atet pe't Cristo.

Yocoppa' añ poctetsa čhocmach yetaruasen

⁶ Te'ñapa' masheñneshacha' o'ch notas e'ñe Ya'mŧcha'tareŧer Jesucristo pa'so'chño, sapa' ñato't seyemteña'ña ñeñŧ atarr quellañets ñeñŧ amach mueno taruasa'. Ñeñŧ atet petsapa' ama mueno o'ch ame'ñanaña ñeñŧ atet yeyčhatenes.

⁷ Sapa' e'ñe señoŧeñ añ poctetsa socop o'ch atet sepena saña e'ñe atet senteney ya. Yapa' allempo allo'tseney parro yapa' čhocma yetaruasen.

⁸ Yapa' ama't erroŧena ama't puesheñarrapa' ama yerraprecheña puerrar e'ñe atta. Ñamche'ña yapa' čhocma yetaruasen yeto e'ñe tsapome'tets attot yentña ya yerrar allempo allo'tseney sesho. Yapa' ama čhoye' ya'tsrre'močhtana'taso ama't puesheñarroŧesa.

⁹ Ama't e'ñe pocteñ o'ch serratapyeñ e'ñe atta, tarraña yapa' ama yemno tarro'mar yapa'čo'ña yemneñ o'ch yetaruasos yaña allochñapa' attoch yorrtatonas ñeñŧ e'ñe cohuentetsa socop allochñapa' atetcha' sepa saña.

¹⁰ Allempo allo'tseney seshopa' atet yotas, ñerra'm esesha'ch atarr quelledspa' arepa'ña rratstats, rranepa' po'čllañ.

¹¹ Yapa' ye'mare'tenes puesheña'ttsos sapa' sečllañoŧpa' atta sellapene't, ama čhoye' setaruaseno ama't mamesha, añaña e'ñe seŧorra'yena sa ñeñŧ ama es sherbeno.

¹² Allohuenes ñeñŧes atarr quellañsarerespa' te'pa' o'ch notas e'ñe Ya'mŧcha'tareŧer Jesucristo pa'so'chño, sapa' čhoñaca'yena setaruasa'ña e'ñe cohuen señañesha' attotcha' sechen allpon ñeñŧ sepallta'yena arr patsro.

¹³ Ñaña sa masheñneshacha' ñaña nočhaneshacha', sapa' ñato'tña čha semuenme'chena'ña orrtatyese' cohuen ñeñŧ attecma sepa'yena.

¹⁴ Ñerra'm esesha'ch ama e'mñoŧtaye atet yotenes añ yecarotot, ñeñŧña aचेñerpa' o'ch se'ñotorrtach ñapa' čhocma atet pena. Sañapa' ñato'tña seyemteña'ña ñeñŧ atet petsa, allochñapa' attotcha' penquerra.

15 Tarraña amach atet sentatsche ñerra'mrrate' cho se'moñe'teñ. Sapa' chochña e'ñe cohuen soctape'chater atet e'ñe cohuen yoctape'chateñ yemo'nasheñ.

Arrpa' all so'terranet po'cartot

16 Yepartseshar ñeñt e'ñe yocshatene' yeyochro ñepa'chña socshaterre' sa seyo'chro ama'tcha' erro'teno'tsenes. Yepartsesharpa' e'ñepa'chña parro allo'tsenes allohuenes.

17 Na ñeñten Pablon arrpa' nequellquëñoñ e'ñe na nototpa' o'ch nehuom'cha'tnerres. Sapa' ñeñtcha'ña señotate' añmapa' e'ñe no necarta. Allohuen ñeñt e'ñe no necartapa' attecma nequellquëñ.

18 Yepartsesharepa'chña Jesucristo sa'natenaya e'ñe allohuenes. Ñeñfach notas, ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT QUELLCAN TIMOTEO 1 TIMOTEO

Atto Pablopa' quellcan carta Timoteocop

1-2 Masheñe Timoteo ñeñteḡ e'ñe yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten Jesucristo puellsensaren, tarro'mar ñeñtpa' atet llesenserren Yompor Parets epuet Puechemer Jesucristo ñeñtcha' nanac yeyemterra. Ñeñtpa' ñeñtara Yompor ñeñt Ya'queshpatañer yepen, ñaña ñeñtara Puechemer Jesucristo ñeñt Yepartseshar yepen. Te'pa' e'ñe nehuomcha'teñoḡeppa' o'ch notaḡ, Yomporepa'chña pebensare'tamḡpene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Timoteopa' ña cotape'chaterrahuet cohuen all anetso Efeso all ayḡhatareḡtenet po'poñ cotapñats

3 Ñaña te'pa' o'ch notaḡ, ahuañmo'cha allempo nesechena o'ch ahuen Macedoniopa' atet notnomueḡ, ḡapa' allach ḡa'pa Efeso attoch ḡach cotape'chatyese' ñeñt yeḡhatyets po'poñ cotapñats, attoch ñetpa' amach allo'na yeḡchatneneto ñet poctapñet ñeñt ama po'ñoḡhoyaye. Te'pa' ñeñtecopña nequellquennaḡ añ carta allochñapa' o'ch alla neyerpaterrperr.

4 Ñaña te'pa' ḡach otyesahuet attoch amach allo'na cotape'chatyesneneto e'ñe ñet pueserrparñet ñeñt ama po'ñoḡhoyaye. Ñaña ḡach otyesahuet attoch amach allo'na cotape'chatyesneneto ñeñt atet serrpare'tatyesanete't pa'tañneshañ. Tarro'mar ñeñt serrparñatspa' atta nanac moññe'tateñet acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḡ alloch yesherber Parets ñeñt atet muenen ña. Añña e'ñe yame'ñeñoḡa Cristopa' o'ch yeñoter.

5 Yomporpa' añña muenen o'ch yeyḡhach acheñenesha' amorrentanna'tpahuepa'ch allohueney. Tarro'mar e'ñe yame'ñeñoḡ Cristo poctacma arrña yeyoḡhropa' e'ñech cohuenare' yoctape'chyen Yomporecop. Ñaña e'ñech yeñmañesha' yoctape'chen cohuen.

6 Tarraña puesheña'tets acheñenesha'pa' ahuo't alla queḡhpa'huerret ñeñt atet muenen Yompor. Ñeññña atet

serrpare'tatenet po'poñ cotapñats, ñeññapa' ama es sherbeno ama't mamesha Yomporecop.

⁷ Ñetpa' aña muenenet ahuo'ch orrtet atet ñerra'mrrate' nanac etsotenet añ ñoñets ñeññ atet anaret judioneshacop ahuat. Tarraña ama't atet penetaña' amaña eñoteñeto este'ña yeçhateneyña añ ñoñets ñeññ chocma serrpare'tenet. Ama'tcha' ñeñña nanac torrenetaña' amachña çhenaneto pueyoçhro ñeññ po'ñoçh atet yeçhateney ñeññ ñoñets.

Attoch yeñoçh eseshacopte' sherben añ ñoñets ñeññ atet anaret

⁸ Ñehua, allohueneypa' e'ñe yeñotueñ, ama't erra'tsena ñoñets ñeññ atet anaret ñeññcha' atet yeçapa' chocma sherben ñerra'm añecop yesherbaten añ ñoñets ñeññ atet muenen Yompor.

⁹ Ñaña allohueneypa' e'ñe yeñotueñ añ ñoñets ñeññ atet anaret ñeññcha' atet yeçapa' ama añecpaye' anarete acheñeneshacop ñeññ cohuenare' es pa'yets, tarro'mar ñetpa' o' yeçha'hueñet e'ñe poctacma. Ñeñtpa' añecpa anaret añ acheñrecop ñeññ ama es otapespahuo, ñaña ñeññ nanac atpare'tetsa, ñaña ñeññ ama es çhenoyo pueyoçhro ñeññ cohuentetsa Yomporecop, ñaña ñeññ nanac ochña'tare'tets, ñaña ñeññ ama añcha'na'tpo' entenaye Yompor po'ñoñ, ñaña ñeññ ama't Paretspa' achmãre'teñcha'. Ñaña añecpa anaret añ ñoñets añ acheñrecop ñeññ amtsañtetsa, ñaña ñeññ muetsene' pompor, ama't ñaña pachor.

¹⁰ Ñaña añecpa anaret añ ñoñets añ acheñrecop ñeññ cañoresha'tets, ñaña ñeññ aguëne' pacma, ñaña ñeññ a'yetyene' acheñ, ñaña ñeññ atta toma'tyets, ñaña ñeññ shecare'tyets ama'tcha' atarr huomenc nenaneñña po'ñoñ Yompor pa'so'chño, ñaña ama't erra'tsente' acheñer ñeññ atpare'tene' ñeññ atet cohuen yeçhateney Yompor po'ñoñ.

¹¹ Ñaña ñeññ atet yeçhateney Yompor po'ñoñ ñeñtpa' ñeññtara cohuen ñoñets ñeññ alloch a'queshpaterrey Yompor e'ñe po'cohuenño, ñeññtara Yompor ñeññ nellsenserre' na o'ch neserrpare'toñ po'ñoñ, ñaña ñeññtara Yompor ñeññ atarr ya'ye'choçhtatyen allohueney.

Atto Pablopa' atarr parasyoso'ten atto atarr ahuamencat per Yompor

¹² Tarraña ama't ña nellsenserrayeñpa' napa' nanac neparasyoso'teñ Yepartseshar Jesucristo tarro'mar atto nanac ahuamencat pa'n. Ñaña nanac neparasyoso'teñ Yompor, tarro'mar ñapa' e'ñe pocte' enterren o'ch nesherber

13 ama't na ahuatpa' nanac nachmāre'che't Cristo, ñaña nanac noctare'che't ñeñt ame'ñaye't ña, ñaña nanac na'tserrpa'yasanete't. Tarraña ama't atet nepe'tpa' Yomporpa' ama coñe'ta morrenterrno tarro'mar allempopa' ama es nechenoyo neyo'chro, ñaña allempopa' ama name'ñe'te.

14 Tarraña Yomporpa' ama coñe'ta morrenterrno, ñeñto'marña ame'ñataterna attotña te'pa' e'ñe neyemteño't ñapa' nemorrentera allohuen acheñenesha'.

15 Ñeñto'mar te'pa' o' neñoter añepa'tña ñoñets ñeñt e'ñe po'ño'ch: Cristo Jesús'pa' añecopña huapa añ patso attoch a'queshpātosan allohuen ochñāfenesha'. Ñeñto'marña te' napa' neñotena, allohuen ñeñt ochñāfenesha'pa' na ello metana'tuenahuet po'chñaret. Ñeñto'mar te'pa' aña poctetsa o'ch yame'ña'huerra ñeñtara añ ñoñets.

16 Ñeñto'mar Yomporpa' attotña peretnerren na, ama't napa' nanac ochñāfen, allochñapa' attoch eñochet ama't erra'tsente' acheñer ñeñt nanac ochñātpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen.

17 Ñeñto'marña te'pa' nanac nocsheño't noten, amorrent-pahuepa'ch Yompor ñeñt partsetets e'ñe ñapue't ahuatoteñ errponohuañen, ñeñtara ñeñt ama arromñāfeshayaye ama't ahuata, ñeñt ama't eseshapa' ama puentare, ñeñtara ñeñt e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñtpa' attetepa'ch Nompore.

Añpa' ñeñt atet otan Timoteo ñeñtcha' atet pa

18-20 Te' masheñe Timoteo ellopa' o'ch alla noterrperr po'pocheño ñeñtcha' atet pe'pa, tarro'mar atet nentene'p atet ñerra'mrrate' e'ñe nechemer nepene'p. Te'pa' e'ñech peyo'chrocmañen petorra Yomporecop atet ñerra'mrrate' cho yeçllarena. E'ñe pame'ñeño't Cristo e'ñech peñmañeshocmañen es porrtatyen. Napa' añ noctape'chen ñeñt atet eños e'ñe cohuen pōcop ahuañmo'cha ñeñt a'mtene' ñoñets Yomporesho't. Ama't p'apa' chocmuepa'ch peyerpa ñeñt atet a'poc'at pōcop, tarro'mar ñeñt atet eños pōcoppa' ñeñtcha' allo'na ahuamen-cat pepene'. Ñaña chocmach pame'ñya Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yocteñe Cristopa' ñato' aco'ponetpa' o'huañcha' yame'ñera Cristo. Ñeñt atet pa' ahuaña epsheña yacma ñeñt pa'so'cheñ Himeneo ñaña Alejandro, ñaña po'po'ne'ch'no acheñ ñeñt atet petsa. Ñeñto'marña napa' napuenanet oneñe't ñeñtara

epsheña yacma attoch ñapa' o'ch muerochtatanet allochñapa' o'ch eñochet ama achmãare'tpahuo Yompor.

2

Atto e'ñe pocte' o'ch yema'yocham̄pesya ñaña ama't am̄cha'taretečno

1 Te'pa' o'ch notap̄ po'poñ ñeñtcha' atet̄ p̄octape'chatyes acheñenesha' ñeñtcha' atet̄ pet. Ñanompa' ma'yocham̄pesyetepa'ch allohuen acheñenesha', ñaña enamatoñetepa'ch acheñenesha' Yompor; ñaña parasyoso'chetepa'ch Yompor.

2 Ñaña ma'yocham̄pesyetepa'ch allohuen am̄cha'taretečno ama't ñaña gobierno'. Allochñapa' attoch Yomporpa' cotape'chatanet e'ñe cohuen attoch am̄cha'tarettet e'ñe cohuen, allochñapa' attoch yocrrena yaña e'ñe cohuen muechet. Ñerra'm atet̄ penetpa' attochña eñall ñaña yocop attoch yema'yochrena e'ñe cohuen Yomporecop, ñaña attoch e'ñe cohuen yentannena.

3 Ñerra'm atet̄ña yepenapa' e'ñech cohuen enteney Yompor ñeñt̄ Ya'qushp̄atañer yepen.

4 Tarro'mar ñapa' mueneñ allohuen acheñenesha'pa' o'ch a'qushp̄aterranet, ñaña mueneñ o'ch eñotatuerranet añ ñoñets ñeñt̄ e'ñe po'ñoçh Yompor po'ñoñ.

5 Tarro'mar yapa' yeñoteñ Yomporpa' e'ñe pa'rra. Ñaña yeñoteñ e'ñe puesheñarra ñeñt̄ çhocma eñets yocop Yomporesho, ñeñtara Yompor Puechemer ñeñt̄ Jesucristo ñeñt̄ acheñetosets arr patsro.

6 Ñaña ñeñtara ñeñt̄ a'rroyatsa e'ñe ñañaña attoch puerromueñoñ ñapa' o'ch tsa'tuonaya yo'chñar e'ñe allohueney ñeñtey acheñey. Ñeñt̄pa', atet̄ orrtatonay Pompor allochñapa' attoch yeñoçh ñeñt̄ atet̄ cotape'chen ña. Allempoña çhap allempo e'ñe pocte' enteñ Pompor o'ch çhap añ patsropa' allempoña e'ñe eñotatey ñeñt̄epa't atet̄ cotape'chen Pompor.

7 Ñeñto'marña napa' na allsensaret atto nach chopeñe'chats erracmañen atto e'ñe na neserrpare'tateño'tpa' o'ch name'ñatyesanet ñeñt̄ e'ñe po'ñoçh Yompor po'ñoñ, ama't ñeñt̄ ama judioneshayaye. Ñeñt̄ atet̄ noten e'ñe name'ñeñoñ Cristo ñeñt̄pa' e'ñe po'ñoçh tarro'mar ñeñt̄pa' ama shequëñtsoyaye.

Añ poctetsa e'ñech yeñmañesha' yema'yochena

8 Ñaña napa' nemneñ ora ama't errate' apçha'yenet Yomporecoppa' añ yacmanesha' allempo echantenet pot puema'yocheno'tetpa' e'ñepa'ch pueñmañesha' ma'yochenet,

amachña čha po'poñ entueneto pueyočhro, ñaña amach čha atsrre'močhen entueneto.

⁹⁻¹⁰ Ateř ñaña coyaneshačhno'pa' chorretepa' atet chorra'yena po'potantañ pacmanesha' ñeñť po'nanesha'. Amachña aña chorra'yestatseto attoch aye'charettenet e'ñe ñet po'llchapořa. Ñaña pue'chetpa' e'shorretepa' atet e'shorra'yena po'potantañ. Añña ama pocteyaye o'ch aña ma'yočhret attoch añño'tet e'ñe cohuen pue'ch. Añño'epa'chña orrtet e'ñe cohuen atto amuerañtenet, ñaña atto cohuenare' es pa'yenet. Amachña aña cohuen orrtatenahueto atto na'yenet oro, amapa' seretsma't ñeñť nanac tsa'te', ñaña atto es chorra'yenet ñeñť nanac cočhnesha' ñeñť nanaccha' tsa'te'. Añepa'chña atet penet ñeñť e'ñe cohuentetsa Yomporecop, ñeñť poctetsa coyanesha'cop ñeñť otets ñapa' o' ame'ñerrana Yompor.

¹¹ Ñaña allempo sapčhena Yomporecoppa' añ coyaneshačhno'pa' e'mñnotetepa' e'ñe muetsoññen attoch es eñotet. Amachña čha atpare'teneto ama't mamesha.

¹² Ñaña allempo sapčhena Yomporecoppa' napa' ama pocteye' nenteñe coyanesha'pa' o'ch yečhaten all chorren allohuen yacmanesha', ñaña amach pomnaren patstano yacma. E'ñepa'chña mamtetenet allempo sapčhena Yomporecop.

¹³ Tarro'mar Adánpa' ñanom ayečhcataret' ačeñ, allotpa' ñaña Eva ñeñťcha' puetapor pa' Adán.

¹⁴ Ñaña Adánpa' ama esesha' shecaye. Aña shecoñet puetapor Eva, allot orrta atparñats Yomporecop.

¹⁵ Ñeñto'marña te' allempo cheyore'ten coyanesha'pa' e'ñech pa'llpuepñořa cheyore'ten. Tarraña ama't atteñpa' Yomporñapa' chocmach yenpueñ attoch chocma queshpenet e'ñe cohuen, ñerra'm po'ñočh chocma ame'ñenet, ñaña ñerra'm chocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen yečhenet.

3

Attoch yeñoch erra'tsente' pocte' ñeñťcha' yena' amčha'taret puerahuo

¹ Te'pa' o'ch notap' po'poñ ñeñť e'ñe po'ñočh atet. Ñerra'm esesha' muenats o'ch amčha'tareřta allohuenacop ñeñť ame'ñetsa ñeñť atarr muenene' o'ch torrena Yomporecop ñeñťpa' e'ñe poctet' ñeñť atarr mueneneñ tarraña eñochepa'chña atarr torrapo' attoch e'ñe cohuen orrtatyesan ñeñť atarr sherbets.

² Tarro'mar ñeñť muenets o'ch amčha'tareřta allohuena-cop ñeñť ame'ñetsapa' añcha' se'n ñeñť etsotuene' añečhno.

Ñeñtcha' sena' amcha'taretpa' añcha' se'n ñeñt e'ñe co-huenare' es pets. Ñeñt ama't ahuatapa' amach eñalle attoch tanmare'cha acheñenesha' ama't mamesha. Ñaña ñeñtcha' pa'mcha'tareter pa'yes allohuen ñeñt ame'ñetsapa' añcha' sena'yes erra'tsente' senten e'ñe patrra puetapor pen (ñerra'm ataporet), ñaña ñeñt nanac ma'yoçhrenaya ñeñt cohuentetsa Yomporecop, ñaña ñeñt e'ñe eñotuene' ñeñt cohuentetsa, ñaña ñeñt amcha'na'tpo' entuen allohuen acheñenesha'. Ñaña añ e'ñe pocte' o'ch amcha'taretta ñeñt e'ñe cohuen aguene' acheñenesha' pa'paclo, ñaña ñeñt e'ñe cohuen yeçhatene' acheñenesha' Yompor po'ñoñ.

3 Ñaña añcha' se'n ñeñt ama posa'tare'tetso, ñaña ñeñt amach orroñañeyaye. Ñaña añcha'ña se'n ñeñt e'ñe cohuen muerenana pamo'ts, ñaña ñeñt ama atsrre'mñañeyaye, ñaña ñeñt ama nanac ye'chapretetso quelle ñeñt apencoçhenot o'ch gana.

4 Ñaña ñeñtcha' amcha'tarettatsapa' añcha' se'n ñeñt e'ñech cohuen ame'ñatuenana puechemeresha', ñaña ñeñt e'ñech mecha'na'tueñ allohuen ama't ñeñt parro yeçhena.

5 Tarro'mar ñerra'm ama eñotenano attoch e'ñe cohuen ame'ñatuana ñeñt parro yeçhenapa' amachca'ye cohuenaye' amcha'tarettoña allohuenacop ñeñt ame'ñenaya Yompor.

6 Ñaña ñeñtcha' amcha'tarettatsapa' amach aña senatsto ñeñt errte' ame'ñetsa, tarro'mar ñerra'm aña sena' amcha'taret ñeñt errte' ame'ñetsapa' ñeñtapa' amach e'ñe eñotuenano ñeñt cohuentetsa Yomporecop, allempopa' e'ñe ña pa'mcha'taretteño'tpa' çate' atarr ommo'cha. Tarro'mar ñerra'm çha yommo'chapa' ñeñtapa' ama pocteye' enteñe Yompor. Çate' ahupore'taretey atet pet ahuat oneñeñ e'ñe pommo'cheño'tpa' ahuo't huapore'çhet.

7 Ñaña ñeñtcha' amcha'tarettatsapa' añcha' sena' ñeñt ama't ñeñt ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'teñ ñeñt ama ame'ñetso, e'ñe puesasare'teño'tetpa' ñato'rraña çate' oneñetpa' nanac topachpa' ellopa' o'te' alla nanac atpare'terran Yompor.

Attoch yeñoçh ñaña erra'tsente' pocte' ñeñtcha' yena' diácono

8 Attecmach pa' ñaña ñeñtcha' sherbets Yompor pa'paclo, ñeñt otenet diácono. Ñeñtcha' sherbatspa' añcha' se'n ñeñt amcha'na'tpo' entuen allohuen acheñenesha', ñaña ñerra'm erro't o'tpa' amach shequëno, ñaña ñeñt ama posa'tare'tetso, ñaña ñeñt ama nanac ye'chapretetso quelle ñeñt apencoçhenot o'ch gana.

9 Ñaña ñeñtcha' sherbats Yompor pa'paclopa' añcha' se'n ñeñt e'ñech pueñmañesha' ma'yochrenaya ora ñeñt atet yame'ñera Cristo ñeñt e'ñe po'ñoçh cohuen.

10 Ñeñto'marña añ pocte' çhoch ñanom secue' ñeñtcha' sena' diácono. Ñerra'm atette' pena ñeñt atet o' notuapa' ñehua, pocte' o'ch sene' ñeñtcha' sherbats Yompor pa'paclo.

11 Attecmach ñaña coyaneshaçhnopa' añcha'na'tpo'ch enteñ allohuen acheñenesha', ñaña amachña atta nanac puetomañenteneto, ñaña ñeñt nanac ma'yochrenaya ñeñt cohuentetsa Yomporecop, ñaña e'ñech cohuen cotape'chenet Partscop.

12 Ñaña ñeñtcha' sena' diáconopa' añcha' sena' erra'tsente' senten e'ñe patrpa puetapor pen (ñerra'm ataporet), ñaña erra'tsente' senten ñeñt e'ñe cohuen ame'ñatuenaya puechemerasha' ñaña ñeñt e'ñe cohuen ame'ñatuenaya ñeñt parro yeçhena pa'paclo.

13 Tarro'mar ñeñt e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' poncha'nañoçayaya serrpare't ama't e'ñe mamesha atto atarr ame'ñenana Cristo Jesús.

Ñeñt atet cotape'chateney Yompor attoch yame'ñerapa' ñeñtapa' nanac coçhnesha' ama't ahuatoteñpa' ama eseshaye' eñotenaye

14 Te'pa' o'ch notap po'poñ. Napa' nesechenañ o'ch nabcherrpa'.

15 Tarraña ñerra'm ama nehuapopa' amach sepallteno sapa' o'ch señoçh ñeñtcha' atet sepa, tarro'mar o' notuap añ necartot ñeñtcha' atet sepa ñeñtes parro same'ñeña Yompor, ñerra'm esempo sapçhena Yomporecop, ñeñtara Yompor ñeñt ama arromñañeshayaye. Ñaña ñeñtara Yompor ñeñt e'ñe yame'ñeñoç allohueneypa' çhochña yorrtatyen ñeñt e'ñe po'ñoçh Yompor po'ñoñ amachña çha ya' nasoteño.

16 Ñaña yapa' yeñoteñ ñeñt atet cotape'chateney Yompor atto yame'ñerapa' ñeñtapa' nanac coçhnesha' ama't ahuatoteñpa' ama eseshaye' eñotenaye. Añpa' ñeñt atet ya'çhoteñ Cristo:

Ama't Paretspa' o' acheñetos añe patsro, tarraña Yompor Puecamqueñoña nanac ahuaamencattosa ñeñt eñotateneña acheñenesha' ñapa' e'ñe po'ñoçh cohuen. Ama't allohuen mellañoñeñnanesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' çhocma a'potet Cristo erracmañen arr patsro ama't all ama judioneshayaye. Ñaña shonte' acheñ ame'ñerraya

Cristo, allotña Yompor po'cohuenñoŕpa' o' alla aguër pue'ntaño.

4

Atto esempohuañenpa' puerruerrach patantarr ama't ñeñt ame'ñetsa te'

¹ Te'pa' o'ch notapŕ po'poñ. E'ñe po'ñoçh atet eñotateney Parets Puecamquëñoŕ. O'ch mellapoterrmochapa' pueruerrach patantarr acheñ ama't ñeñt ame'ñetsa te'. Allem-popa' o'ch alla ame'ñeret ñeñt ashcañtetsa, ñaña o'ch aña ma'yoçhrerret oneñet poctapña.

² Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es çhenoyo pueyoçhro ama't mame-sha ama't allempo o' achmãare'tuan Yompor.

³ Ñaña ñeñtara añ acheñpa' o'ch otyenan acheñenesha', ama pocteyaye o'ch sesna'ta. Ñaña ama pocteyaye o'ch es serratse'tyes. Tarraña allohuen ñeñt yerrenpa' e'ñe pocte' o'ch yerreñ, ñeñto'mar yeçhcach Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñoçh Yompor po'ñoñ, ñaña ñeñtey ame'ñetsapa' e'ñe pocte' o'ch yerren e'ñe yema'yocheñoŕ Yompor.

⁴ Tarro'mar allohuen ñeñt yeçhcatua Yompor ñeñtcha' yerrenpa' e'ñe cohuenacma, ñeñto'marña amach errotenoŕ yoto ama pocteyaye o'ch yerre'. Añña pocte' çhocmach es yerren e'ñe yeparasyoso'teñoŕ Yompor.

⁵ Yema'yoçhampeñoŕ yerrarpa' e'ñe pocte' Partsocop o'ch yerreñ, tarro'mar ñeñtpa' atet oteney Yompor.

Atto Timoteo atarr cohuen sherbenan Jesucristo

⁶ Te'pa' o'ch masheñe Timoteo notapŕ po'poñ. Ñerra'm atetcha' peyçhatyes acheñenesha' ñeñt ame'ñetsa ñeñt atet o' notuaŕpa' allempoña po'ñoçhpa' e'ñech cohuen pesherbeñ Yepartseshar Jesucristo. Tarro'mar atto poctape'cheññan Yompor po'ñoñpa' ñeñtcha'ña allo'na ahua mencat pepene'. Ñaña atto poctape'chen e'ñe cohuen Yomporecoppa' ñeñtcha'ña allo'na ahua mencat pepene'.

⁷ Ñaña amach pe'mñotatsto serrparñats ñeñt ama aneyaye ñeñt atet yeçhateney Yompor po'ñoñ attoŕ yame'ñera Cristo, tarro'mar ñeñtpa' ama es sherbeno. Añcha'ña pema'yoçhra ñeñt atet yeçhateney Yompor po'ñoñ.

⁸ Ñaña añcha'ña o'ch pema'yoçhra attoch huomenc peŕa' peyoçher Yomporecop. Atet pena po'potantañ acheñenesha' ma'yoçhraya attoch huomenctatet e'ñe ñañeñeta po'chets, ama't ñeñtpa' ama tama es sherbeno. Tarraña pãpa' añcha'ña

pema'yočhra attoch huomenc peḡa' peyočher Yomporecop, tarro'mar ñeñṭpa' ello nanac sherben attoch yocrra cohuen añe patsro, ñaṃa sherben attoch ello yocrra'huerra cohuen esempohuañen.

9 Ñeñṭ atet noteneḡpa' e'ñe po'ñočh atet, ñeñṭo'marña añ pocte' o'ch ame'ñyet allohuenet.

10 Ñeñṭo'marña te'pa' ama't e'ñe yemuerochteñoṭpa' čhocma yectorrena Yomporecop, tarro'mar ñapa' ñach yeyemterra e'ñe poctacma, ñeñṭ Yompor ñeñṭ ama arromñafeshayaye, ñaṃa ñeñṭara Yompor ñeñṭ Ya'qushḡatañer yepen allohueney añecop ñeñṭey ame'ñenaya.

11 Te'pa' ñeñṭ atet o' notuaḡpa' ñeñṭcha' atet ḡotyes acheñenesha' ñeñṭcha' atet pet, ñaṃa e'ñech cohuenacma peyčhatyesanet.

12 Ñaṃa čhocmach ḡorrta e'ñe cohuen acheñenesha'cop, attoch ñetpa' e'mñnotapet ama't ḡapa' nanac huepueshaḡ. Ñaṃa čhocmach ḡorrta cohuen ama't atet pe'ñorena, ñaṃa ama't allempo es peḡa'yen. Ñaṃa čhocmach pemuereña acheñenesha', ñaṃa čhocmach ḡame'ñya e'ñe cohuen Yompor, ñaṃa ama't peyočhropa' čhocmach ḡoctape'ch e'ñe cohuen ñeñṭ atet pena ñeñṭ e'ñe po'ñočh Cristona'tartetsa. Allochñapa' e'ñe peshoṭ añña acheñenesha' ñeñṭ ame'ñetsapa' o'ch čhapanet pueyočhreto ñeñṭ atet cohuentetsa Yomporecop.

13 Ñaṃa te'pa' ama't ama nečhena' napa', čhocmach pelleyatanet Yompor po'ñoñ allempo čhocma sapčhena allohuenes. Ñaṃa čhocmach peserrpare'tatanet, ñaṃa e'ñech cohuen peyčhatenanet.

14 Ñaṃa čhocmach peyerpa atto ahuañmo'cha Yomporpa' ahua mencat ḡaḡ allempo ñeñṭ pompornesha' pen ñeñṭ ame'ñetsapa' ñetpa' net pot pesho. Ñaṃa atto eñoratanet Yompor ñetña allempopa' e'ñe cohuen eñosyeset ḡocop. Ñeñṭo'marña te'pa' añ poctetsa čhocmach petorra Yomporecop.

15 Chocmach pema'yočhra ñeñṭ cohuentetsa Yomporecop, ñaṃa čhoch ḡayomñya, attoch acheñenesha'pa' entonapet ñeñṭ atet petsoten Yomporecop.

16 Ñaṃa čhocmach peñota ḡañeña, ñato' cohunte' ḡoctape'chen, ñato' amate'. Ñaṃa čhocmach peñota ḡañeña ñato' e'ñete' atet peyčhaten. Ñaṃa čhocmach peyčhat cohuen e'ñe atet otene' Yompor po'ñoñ attoch pequeshperra ḡa, ñaṃa allohuen ñeñṭ pe'mñnotene'.

5

Añpa' ñeñtcha' atet yepannena ñeñtey ame'ñetsa

1 Masheñe Timoteo, te'pa' o'ch noterrperr po'poñ. Amach peche'ptare'tatsche ñeñt po'nare' yacma ñerra'm esempo pantenet. Elloña chóchña pöctape'chaterranet cohuen e'ñe acoṗa. Atetcha' pentanet ñerra'mrrate' e'ñe ṗompor pepenanet. Añña allohuen hueparneshachnopa' atetcha' pentanet ñerra'mrrate' e'ñe pemo'nasheñ pepenanet pöctacma.

2 Ñaña coyaneshachno ñeñt po'nare'pa' atetcha' pentanet ñerra'mrrate' e'ñe ṗachor pepenanet pöctacma. Añña ñeñt shopshare'pa' atetcha' pentanet ñerra'mrrate' e'ñe ṗöch pepenanet pöctacma. Amachña cha muene' ṗa'llocchame'tyenaneto ama't mamesha.

3 Ñaña añ pöctetsa chócmach seyenpue' rretorrnaneshar ñerra'm esempo ama eñallete ñeñtcha' yenpahuat.

4 Tarraña ñerra'm erra'tsen rretorrnaneshar echene' puechoyoresha' amapa' pue'ñaresha', ñeñtpa' aña pöcte' ñetach cohuanṗset pachor. Tarro'mar añ pöcte' e'ñe ñet o'ch eñochet ñanomcha' añ yecuanṗes yamo'ts attochña yesherber Yompor ñaña attoch yesherbeñ yamo'mte' atto ñetpa' cohuanṗesyet yaña ahuañ. Tarro'mar ñerra'm atet yepapa' e'ñech yocshateñ ama't Yompor.

5 Añpa' attoch señoche erra'tsente' rretorrnaneshar palltetsa o'ch seyenpue': Añcha' seyenpa' ñeñt rratotetsa e'ñe ñaṗña ñeñt ama echenaye puechoyoresha', ñaña ñeñt e'ñe yemtenaya Yompor, ñaña ñeñt chócmma ma'yochenaya Yompor pañetets yet, ñaña ama't tsapo.

6 Tarraña erra'tsen rretorrnaneshar ñeñt atta coshatse'tyetsapa' chach ottena ñerra'mrrate' o' rroma, ama't allempo correnmeñ.

7 Te'pa' o'ch ṗotanet ñeñtcha' atet pet attoch ama eñalle ama't eseshapa' o'ch sasare'tanet.

8 Ñerra'm esesha' ama muenenaye o'ch cohuanṗsan pamo'ts ama't ñeñt parro yeçhena ñeñtña acheñ atetpa' amaca'ye po'ñoçhaye' ame'ñenano ñeñt atet oteney Yompor. Ñaña ñeñt atet acheñpa' amach pöcteye' enteñe Yompor ama't mamesha. Ñeñtpa' elloch metaneñ ama't ñeñt ama ame'ñetso.

9 Ñaña po'poñ attoch señoche erra'tsente' rretorrnaneshar ñeñt pöcte' ñeñtcha' seyenpa', ñeñtpa' erra'tsente' po'nmeneshar ñeñt echene' pechapoch çharra' po'charña, ñaña ñeñt patrach puerrollar pe't.

10 Ñaña erra'tsente' senten ñeñt e'ñe cohuenare' es pets, ñeñt e'ñe cohuen cohuanmpene' puechoyoresha', ñaña ñeñt nanac amueraña, ñaña ñeñt e'ñe cohuen aguene' puemo'to', ñaña ñeñt e'ñe pueñmañesha' sherbene' allohuen ñeñt ame'ñetsa, ñaña ñeñt nanac yenpuene' ama't ñeñt muerochtetsa, ñaña ñeñt nanac pa'yene' po'poñechno ñeñt cohuentetsa.

11 Tarraña ñeñt rretornaneshar attera shopsheshameñ ñeñt ama echenana' pechapoch charra' po'charñapa' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra,

12 chate' tanmare'cha acheñenesha' tarro'mar amach et-sotano ñeñt atet otan Cristo ahuañmo'cha.

13 Ñaña ñato' o'ch atta nanac quella', ñato' po'çllaño'pa' ñato' o'ch atta ta'yesa po'poñ pocollo'mar serrpare'tatsetyesets pa'namen ñoñets, ñaña ñato' o'ch atta a'metare'tyesan ñeñt atet pa'yena po'psheñnechno ama't ñeñt ama otenayaye.

14 Ñeño'marña napa' e'ñe pocte' nenteñ ñeñt shopshe-shameña' some'terrepapa' ñaña cheyore'terrepapa' attoch añach ma'yochrena ñeñt pa'pacllacop. Ñerra'm atet penetpa' attochña amach eñalle ama't ñeñt ye'moñe'tene'pa' amach sasare'tye.

15 Tarro'mar puesheña'tets rretornaneshapa' o' alla puerret o' alla coteret oneñeñ.

16 Te' ellopa' o'ch notap po'poñoneñ. Ñerra'm eñall ama't coyanesha' ñeñt ame'ñetsa, ñaña ñerra'm ña pamo'ts rratotatsapa' e'ñe pocte' ñañeñach cohuanmpse' pamo'ts. Allochñapa' amach pallteno allohuen ñeñt ame'ñetsapa' o'ch apueñet ñeñt pallta'yena. Allochñapa' attoch añcha'ña yenpuenet po'poñechno rretornaneshapa' ñeñt ama echenaye pamo'ts ñeñtcha' yenpuene'.

Añ poctetsa ñeñtcha' atet yepen ñeñt nanac torretsa Yomporecop

17 Te'pa' o'ch notap po'poñ. Ñeñt pompornesha' pen ñeñt ame'ñetsapa' ñerra'm e'ñe cohuen añcha'tarettenetpa' e'ñe pocte' acheñenesha'pa' cohuencha' cosheñet, ñaña ellopa' añ pocte' o'ch es apueñet ñeñt palltena. Ñeñtpa' ñeñtcha' atet sepeñ erra'tsencha' ñeñta po'taruas pe' atto serrpare'ten, ñaña ñeñt e'ñe ma'yochrenaya yechatets Yompor po'ñoñ.

18 Tarro'mar ama't Yompor po'ñoñ ñeñt anuaret ahuañtoñpa' atet toma'ntateney, ñeñtpa' atet oten: "Ñerra'm esempo sañmama'tateñ huaquesh attoch es serrocllome'chach pa'tcot, allempopa' amach sempanma'tatsche. E'ñe pocte' rranepa' ñaña ñeñt

serrocllome'chateñ." Ñaña ñeñt atet oten po'poñ Yompor po'ñoñ: "Ñeñt ataruasañpa' e'ñe pocte' chocmach agapan po'tsa' atto taruasen."

19 Ñaña ñerra'm eñall puesheñarr ñeñt a'metare'tamipene' ñeñt pompor pen ñeñt ame'ñetsapa' sapa' amach same'ñatscho. Añña ñerra'm epsheña a'metare'tamipene' amapa' ma'psheña, allempopa' pocte' o'ch se'mñocho, tarro'mar allempopa' o'ch señocho ñato' po'ñochte' atet.

20 Atteña ñerra'm po'ñochte' atet pena, allempo allo'tsa'yen allohuen acheñenesha'pa' añ poctetsa o'ch soch ñeñt atetpa' ama aña'pahuo. Allochñapa' po'potantañpa'cho'ña esheccha' mecha'na'tenet.

21 Añpa' chocmach atet peña ñeñt atet o' notuañ ama't errotente' o' pohua ñeñt parro nanac peyemtena ahuaña. Tarro'mar Yomporpa' enteneñ epuet Puechemer Jesucristo ñeñtara Yepartseshar yepen, ñaña epuet po'mllaño'teñaneshar ñeñt epuet yemtena ña. Allohuenetpa' e'ñe entuenpet ñeñto'marña te'pa' añ pocte' o'ch pepena ñeñt atet o' notuañ.

22 Te'pa' o'ch noctape'chaterrperr po'poñ ñeñtcha' atet seña. Ñerra'm esempo semneñ o'ch sena'yes ñeñtcha' añcha'taretterrtsa Yomporecop, amach ahuen senatstere ñeñtcha' añcha'taretterrtsa, chochña secua'yes erra'tsente' acheñer ñeñt e'ñe cohuen es pa'yets. Tarro'mar ñerra'm aña sena'yes ñeñt ama cohuen es petsopa' te't e'ñe ña po'chñarotpa' atet sepena samã. Ñeñto'marña te'pa' chocmach pa'ypo'ñamipes ñeñt ama cohuenayaye ama't mamesha.

23 Te'pa' o'ch notañ po'poñ. Atto papa' chocma patsna'tame'ten, ñaña atto atserrpare'teneñ patopa' añ pocte' amach porratsterrerro e'ñe ñapueñ oñ, añcha'ña epuet porr coñe't vino.

24 Ñaña te'pa' o'ch notañ po'poñ attoch peñocho. Eñall puesheña'tets acheñ ñerra'm esempo pena ñeñt ama cohuenayaye Yomporecoppa' yapa'cho'ña o'ch yeñotanet allorocma. Allempoña yapa' o'ch yot, po'ñocho añpa' ama pocteyaye. Tarraña eñall ñaña po'poñechno acheñ ama't esempo pet ñeñt ama cohuenayaye Yomporecoppa' ñeñtpa' amach essha' eñotaye ama't puesheñarroña. Tarraña esempohuañenpa' orrtatuare'terrach.

25 Attecma pena ñaña ñerra'm esempo yepena e'ñe cohuen, acheñenesha'pa' o'ch entuenyet e'ñe cohuen. Tarraña errotenopa' ama't e'ñe cohuen enteny Yomporpa' acheñenesha'pa' amach e'ñe cohuenaye' entenyeto. Tarraña esempohuañenpa' cherranetcha' pueyocho.

6

Añpa' ñeñt' poctetsa ñeñt'cha' atet' pa' ñeñt' ataruasataret' e'ñe' atta

¹ Te'pa' o'ch notap' po'poñ ñeñt' poctetsa ñeñt'cha' atet' pa' ñeñt' ataruasataret' e'ñe' atta ñeñt'ara ñeñt' o' ame'ñerrana Cristo. Añ pocte' ñetpa' cohuencha' eñchet' po'patronar, attoch e'ñe' ñofo'tetpa' amach erro'teno't eñalle attoch achm'are'tachet Yompor, ña'ña ñeñt' atet' yey'chaten Cristocop.

² Ña'ña ñeñt' ataruasataret' e'ñe' atta, ñerra'm po'patronarpa' ame'ñenet' ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe' pame'ñeño'tet Yompor. Amach ota'psa'tatsteto "te'pa' ama'tcha' ama e'ñe' name'ñyo nepatronarña' o' ame'ñerrapa' amach erro't pa'no." Elloña te'pa' e'ñech yemorren'teñesha' yesh'erbeñ yemo'nasheñ e'ñe' cohuen. Masheñe Timoteo, añpa' ch'ocmach pey'chatanet, ña'ña o'ch potanet ñeñt'cha' atet' pet.

Cota'pñats' ñeñt' ama po'ño'ch'oyaye

³ Ñerra'm esesha' ye'chatats' po'poñ cota'pñats' ñeñt' ama atteyaye atet' ye'chataney Yepartseshar Jesucristo ñeñt' po'ño'ch' atet' muenen Yomporpa'

⁴ ñeñt' acheñ atetpa' attach om'mo'chena, po'ño'ch' ñeñt'pa' ama ch'oye' es eñoteno. Ñeñt' atet' acheñerpa' añecpach atet' pena attoch es otnare'tyesan acheñenesha' e'ñe' po'poñ cota'pñatso'mara. E'ñe' potnare'tanna'teño'tetpa' o'ch atta at-srre'mare'tet, ña'ña o'ch atta e'moñe'tanna'tet, ña'ña o'ch atta sasare'tanna'tyeset, ña'ña allempopa' o'huañ'cha' eñoranna'tet.

⁵ Po'ño'ch' añ acheñ ñeñt' atta cota'pe'chatse'tets e'ñe' ña'ñaña pocta'pñotpa' po'ño'ch'pa' amach cota'pe'chenano ama't mamesha ñeñt' cohuentetsa ña'ña amach eñotenano ñeñt' po'ño'ch' alloch yequeshperra. Ñetpa' attach ch'ocma mueneñet o'ch es otnare'tanna'tyeset. Ña'ña ñetpa' añecpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt' atet' acheñpa' amach peyemtatscho.

⁶ Ñehua, po'ño'ch' yapa' yeñoteñ e'ñe' yame'ñeño't Cristopa' shonte' yechen esocmañen. Ñeñto'marña yapa' ñeñt'ach nanac yocshena.

⁷ Tarro'mar allempo ye'ñalleta ahuatpa' atta ye'ñalleta muelle'mco't. Te'pa'cho'ña ñerra'm esempo yerromuenpa' amach erro'teno't yahuanmo yechecom.

⁸ Ñeñto'mar yapa' amach es yellcatsto. Ñerra'm yechen ñeñt'cha' yerra' ña'ña ñeñt'cha' yechorrappa' ñeñt'ach yocshena.

9 Tarro'mar ñeñt muenets o'ch echan esocmañenpa' amach errotenoť ahuantano atto topatyeny oneñeť. Attach pa'namen ye'chatse'tyenet ñeñt ama es sherbetso. Elloña ñeñt'pa' ñeñt'cha' anmahuet chenquēntso esempohuañen.

10 Tarro'mar e'ñe yeye'chapreteñoť quellepa' alloť huenaña esocmañen sosya'tsañ. Tarro'mar puesheña'tets ñeñt nanac muenets o'ch ganet shonte' quellepa' atteñapa' o'huañcha' ame'ñyet Yompör. Ñeñto'marña acořoneťpa' o'ch huapanet shonte' ñeñt'cha' nanac llecatahuet.

Añach paťerr yema'yočhra ñeñt cohuentetsa Yomporecop

11 Tarraña řapa' amach atet peřatsto tarro'mar řapa' anareteř Yomporecop. Ñeñto'marña řapa' añach pema'yočhra ñeñt cohuentetsa Yomporecop, ñaña čhocmach peyerepya Yompör, ñaña čhocmach řame'ñya cohuen, ñaña čhocmach pemorrencha řamo'ts, ñaña čhocmach řa'huinta'huanom ñeñt atarr echarr pentyen amach řa'ñeña e'ñe cohuen entatstatso.

12 Ñaña čhocmach řame'ñya cohuen Yompör atet ñerra'm čho pečllarena Yomporecop. Allochñapa' esheccha' peñoč řapa' corretsapach tayoteñ e'ñe errponañohuen. Ñeñto'mar Yompörpa' čhore'tař ahuaña allempo peñotach allohuen acheñenesha' atto řapa' o' řame'ñerra.

13-14 Te'pa' o'ch masheñe noterrperr po'poñ ñeñt'cha' atet peřa. Čhocmach petsotua ora ñeñt atet oteneř Yompör. Amach řoctape'chatsto po'poñoneť attoč amach eñalle attoč tanmare'tařa acheñenesha'. Añpa' atet'cha' peřa tarremphua esempohuañencha' huerra Yepartseshar Jesucristo. Tarro'mar ama't te' Yompörpa' enteneř, ñeñtara Yompör ñeñt yapuene' yocreña teme'ttsen, ñaña allohuen ñeñt yentyen. Ñaña Puechemer Jesucristopa'čho'ña enteneř, añ ñeñtara Cristo ñeñt eñosets e'ñe cohuen allempo a'řto'tare'teñ Poncio Pilato.

15 Esemphuañencha'ña pocte' enter Yompörpa' allempochña mueñerranerr alla Puechemer arr patsro, ñeñtara Yompör ñeñt e'ñe patra, ñaña ñeñtara ñeñt atarr ya'ye'chočhtatyen allohueny, ñaña ñeñtara ñeñt nanac ahuamencat, ñeñt Pompör pen ama't allohuen ñeñt añcha'tareťetyetsa, ñaña allohuen ñeñt ayochreshaťetyetsa.

16 Ñaña ñeñtara Yompör ñeñt ñapueť ama aromñaťeshayaye, ñeñtara Yompör ñeñt yečhetsa allo'tsen puetare' ñeñt nanac a'rechatañ all amach errotenoť yečhapo. Ama't puesheñarra acheñpa' ama puentare all, tarro'mar amate' errotenoť yečhapo. Ñeñto'marña

ya'ye'chochtatoñepa'ch Yompor, ñaña ahuamencatepa'ch tayoteñ errponohuañen. Ñeñtpa' attetepa'ch Nompore.

Arrpa' all cotape' chatan ñeñt nanac eçllayoret

17 Te'pa' o'ch notap̃ po'poñ. Ñeñt nanac ehecmañtetsa añ patsropa' o'ch p̃otanet amach ommo'chatsteto e'ñe po'checmot, ñaña amach cotape'chatsteto ñato' poçllayoroṭpa' amach es pallterreto, tarro'mar ñeñtpa' huañerrcha' esempohuañen. Añña yemchetepa' Yompor ñeñt ama arromñateshayaye ñaña ñeñt yapuene' shonte' esocmañen ñeñtcha' çhocma yocshatene'.

18 Ñaña o'ch p̃otanet petepa' e'ñe cohuen Yomporecop, ñaña es apa'yesetepa' ñeñt es palltetsa, ñaña amuerañtetepa'.

19 Ñerra'm atetcha' petpa' eñallcha' shonte' alloch coshaterranet tsapatonet Yompor. Ellopa' o'ch apanet ñaña attochña ñetpa' corretsetach pocsheñeshocmañen tayoteñ e'ñe errponañohuen.

Ñeñt atet otan Timoteo e'ñe allohuanen

20 E'ñe allohuanenpa' o'ch masheñe Timoteo noterrperr alla: Chocmach petsotua ora ñeñt atet oteneṭ Yompor. Amach pe'mñnotatsche ñeñt çhocma muenets o'ch es otnare'tanna'tyesa. Ñeñtpa' ama sherbeno ama't mamesha Yomporecop. Ama't ñetpa' otenetañ po'ñocho' es eñotenetpa' tarraña yapa' yeñoteñ ñeñtpa' ama po'ñoçhoyaye.

21 Tarro'mar puesheña'tets ñeñt cotene' atetpa' ama çhenaneto pueyoçhro ñeñt atet yame'ñeña Cristo.

Te'pa' Yomporepa'ch p̃a'nataya. Ñeñtach notap̃, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑÑ QUELLQUËRRANERR TIMOTEO 2 TIMOTEO

Atto Pablopa' alla quellquërranerr carta Timoteocop

1-2 Masheñe Timoteo, ñeñteḡ nanac nemuerena tarro'mar atet nenteneḡ ñerra'mrrate' e'ñe nechemer nepeneḡ. Na Pablon o'ch alla nequellquërrnaperr po'poñ carta, ñeñten Jesucristo puellsensaren tarro'mar atet muenen Yompor attoch nach eñotatyese' allohuen acheñenesha' ñeñt atet oteney Yompor: E'ñe yeyemteñoñ Puechemer Cristo Jesús pa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuomicha'teñoḡeḡpa' o'ch notaḡ: Yomporepa'chña pebensare'tamḡene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Atto Timoteo e'ñe cohuen ame'ñena

3 E'ñe neyerpueñoḡeḡpa' napa' ḡhocma neparasyoso'teñ Yompor ḡocop, yeḡo ama't ñaña tsapo allempo ḡhocma nema'yocheña Yompor ḡocop. Ñeñtara Yompor ñeñt ḡhocma neñmañesha' nesherven, atet sherbe't ñaña ahuat natañneshañ.

4 Ñaña napa' ḡhocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenohuaca' yentannerra attote' ḡocshatterren.

5 Ñaña ḡhocma neyerpuenḡa atto ḡapa' e'ñe cohuen ḡame'ñena, ñaña atet ame'ñena ñaña ḡacnor Loida ñaña ḡachor Eunice. Ñeñto'marña napa' neñoteñ ḡapa'ḡho'ña ḡhocmate' ḡame'ñena e'ñe cohuen.

Atto ama apenca'pahuo e'ñe yeserrpare'teñoñ Yompor po'ñoñ

6 Ñeñto'mar napa' nemneñ o'ch alla neyerpaterrperr atto ahuañmo'cha Yomporpa' ahuañencat ḡaḡ allempo nena' ñaña not pesho. Ñeñto'marña te'pa' amach pemuenme'chatstoñe ñeñt atet otaḡ Yompor.

7 Tarro'mar Yomporpa' ama añeḡpaye' chorratenyoña Puecamquëñ attoch yapa' o'ch ḡha yeñcha't, añeḡḡña chorratenya attoch ahuañencat ḡa'y, ñaña attoch yemorrentanna'ta allohueney, ñaña attoch e'ñe cohuen yorrtatyen ñeñt atet muenen Yompor.

8 Ñeñto'marña te'pa' amach pepencatsto atto peserrpare'teññañ ñeññ atet pena Yepartseshar Cristo. Ñaña amach pepencatsto e'ñe no'mar atto napa' o' cárcele'terrnet e'ñe name'ñeñoñ Cristo. Elloña chochña pocte' peñch pama o'ch pemuerochtapretna e'ñe peserrpare'teñoñ Cristo po'ñoñ tarro'mar Yomporpa' attoña ahuamencat peneñ.

9 Ñeñtara ñeññ o' a'queshpaterrey, attoña o' chore'terrey attoch yema'yochra ñeññ cohuentetsa Partsocop. Tarraña añmapa' ama añoñeyaye atto e'ñe cohuen es yeñayese't ahuat, añmapa' tarro'mar atet muenen ña. Yomporpa' nanac morrentye't ñeñto'mar ama't ahuatoteñpa' ahuo't o'patatya Puechemer Cristo Jesús.

10 Ñeññ huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeññ Ya'queshpatañer yepen, tarro'mar ñach ya'queshpaterre'yerrromñoñ attoch elloch yocrra'huerra, allempopa' amach alla ya'rromña'terre'te. Ñeñto'marña yoten te'ña yapa' o' a'huañañperrey Cristo atto o'patye't rromueñets. Te'pa' o' yeñoter tarro'mar atet yechateney cohuen ñoñets ñeññ huetsa Yomporeshot.

11 Ñeñña añ cohuen ñoñetspa' ñeññecop allsensareten attoch nach a'pote' allemeñ acheñeneshesho'mar ama't ñaña ñeññ ama judioneshayaye, ñaña attoch nach yechatyesahuet ñeñtara añ ñoñets.

12 Ñeñto'marña te'pa' e'ñe neserrpare'teñoñ añ ñoñetspa' muerochtatennet, tarraña napa' ama nepenquëno tarro'mar napa' neñoteñ Yompor ñeññ neyemtenapa' nanac ahuamencat. Ñeñto'marña neñoteñ e'ñe po'huamencotpa' o'ch cohuamñpson ora all ne'torra'yese't ñocop ñeññ atet yechenna ama't tayoteñ esempohuañencha' huerra.

13 Papa' chocmach poctape'ch ñeññ atet o' neychatuanmañ, ñeñtara ñoñets ñeññ e'ñe pa'charr cotapññats. Ñaña peparrocmateñoñ Cristo Jesús'pa' chocmach pame'ñya cohuen, ñaña chocmach pa'mueraña.

14 Ñaña chocmach peñota, amach pa'po'poñetatstoñe Yompor poctapña ñeññ atet yechenpa Yompor. E'ñe po'huamencot Paret's Puecamquëñ ñeññ yeçhetsy yeyochro ñepa'chña peyenpue'.

Atto puesheña'tetspa' a'ypo'ña'huaneret Pablo

15 Napa' o' notañ atet tarro'mar ama't papa' peñoteñte' shonte' acheñ ñeññ ye'cha'yetsa Asio'marpa' o' sohuanerrnet, atet ñerra'm Figelo ñaña Hermógenes.

¹⁶ Te'pa' aña čhocma nocshatene' Onesíforo tarro'mar ñapa' ama penquënno ama't napa' cárcelo'tsenen. Ñeñto'marña Yomporpa' a'natanepa' Onesíforo pamo'tsesha'.

¹⁷ Ahuañmo'cha allempo chap Onesíforo arr Romopa' ñapa' nanac e' name'terren atto't enterren.

¹⁸ Ama't papa' nanac peñoteñ, ahuañmo'cha Efesopa' ñapa' nanac yenpa'y. Ñeñto'marña Yomporpa' muera'huerepa'ch esempohuañencha' huerra po'yorochenñoť.

2

Ñeñtcha' atet yetorra e'ñe cohuen Jesucristocop

¹ Nechemere Timoteo, e'ñe peparrocmateñoť Cristo Jesús pa' huomenquëpa'ch pepa' peyočher tarro'mar ñapa' čhocmach yenpař.

² Allpon pe'mone't ñeñť atet neserrpare'tache't shonte' acheñenesha'pa' papa'čo'ña te'pa' attec mach peychach po'poñečno ñeñť ame'ñetsa attoch ñetpa'čo'ña eñochet yečhatet allohuen pamo'tsesha'.

³ Ñaña o'ch notap po'poñ. Papa' amach peñcha'tatsto attoch pemueročhtapretya. Chochña pocte' peñch o'ch pemueročhta atet ñerra'mrrate' čo pečllarena e'ñe cohuen Jesucristocop.

⁴ Ñato' o'ch netma'ntacha ñeñť atet pena solltarnesha'. Solltar ñeñť ejército'tsenpa' amach es cotape'cheno po'poñoneť ñeñť atet pena ñeñť ama ejército'tseno. Añach paterr cotape'chen attoch coshatan ñeñť mandene'. Añ toma'ntena yapa'čo'ña añach paterr yocape'chen attoch yocshach Jesucristo ñeñť yeyechenaya yaña.

⁵ Ñato' o'ch netma'ntatererr po'poñ ñeñť atet pena ñeñť atarr jueguëtsa. Ñeñť atarr cohuen jueguëtsa čhocmach jueguënet e'ñe cohuen e'ñe atet anarettenet ñocpuet attoch e'ñe cohuen ganet. Ñerra'm ama e'ñe atet jueguëto e'ñe atet anarettenet ñocpuet, amach errotenoť aparetteñoña ñeñtcha' coshatahuet ñeñtecop atarr jueguënet. Ñeñtpa' añ toma'ntena yapa'čo'ña ñerra'm amach atet yeperro ñeñť atet anaret Yompor po'ñoñ yocop, amach errotenoť apuerrye ñeñtcha' nanac yocshaterre'.

⁶ O'ch netma'ntatererr po'poñ. Ñeñť nanac taruaset pa'mropa' ñapa' ñanomcha' rre' ñeñť nare'ten. Ñeñtpa' añ toma'ntena ñeñť nanac torretsa Yomporecop ñapa'čo'ña nanaccha' coshateñ po'taruas ñeñť atet torrena Yomporecop.

⁷ Nehua, pöctape'ch ñeñť atet noteneř tarro'mar Yepartse-sharpa' chapatonapcha' peyočhro ora ñeñť atet toma'ntena añečno.

Añ pocte' chocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mreneñ David, ñaña ñeñtara Cristo ñeñt chocma neserrpare'ten attoch yequeshperra.

⁹ Ñeñto'marña napa' attotña huanca'net atto te'pa' nanac nemueroçhtena atet ñerra'mrrate' amtsañen. Tarraña Yompor po'ñoñpa' amach errotenoñ huanqueto.

¹⁰ Ñeñto'marña napa' chocma na'huanten atto nemueroçhtena, allochñapa' ñerra'm erra'tsencha' acerr Yompor ñeñtcha' ame'ñerrayapa' queshperretcha' e'ñe pame'ñeñoñet Cristo Jesús. Ñaña all Yompor po'cohuenñopa' correrretcha' errponohuañen.

¹¹ Añ ñoñets allo chocma ya'çhoteñ Yomporpa' e'ñe po'ñoñ atet: Ñerra'm e'ñe yame'ñeñoñ Cristo yerromapa' yeyçherrach parro epay Cristo.

¹² Ñaña ñerra'm cho yemueroçhtaprecha Cristopa' ya'mcha'tarettapreterach esempohuañen. Tarraña ñerra'm cha ya'nasoteñaapa', ñapa'cho'ña a'nasoterryach esempohuañen.

¹³ Ama't allempo yapa' ama yeyemteño, tarraña po'ñoñ ñeñt atet otenpa' chocma po'ñoñ atet, tarro'mar amach errotenoñ alla a'po'poñeterrano ñañeña po'ñoñ.

Atto Yomporpa' e'ñech cohuen pa'taruasañer peney

¹⁴ O'ch alla noterrperr po'poñ: Chocmach peyerpacha acheñenesha' ñeñt atet o' notuañ, ñaña o'ch potanet e'ñe Yompor po'huamencot amach allo'na otnare'tanna'tyesneneto e'ñe ñañeñeta poctañño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteñaapa' o'ch alla puerruerra allohuen acheñenesha' ñeñt e'mñotenahuet.

¹⁵ Tarraña papa' añcha'ña pema'yochra ñeñt cohuentetsa Yomporcop attoch ñapa' entañ e'ñe cohuen ataruasañep. Amach eñalle ñeñtcha' pepencate' all petorra'yena ñocop. Attochña chocmach pesherbatoñ po'ñoñ ñeñt e'ñe po'ñoñ ama shequëñtsoyaye.

¹⁶ Ñaña papa' amach pa'na otnare'tatstahueto ñerra'm esempo es otnare'tanna'tyenet. Tarro'mar ñeñt atet serrpare'tatyenetpa' ama añeyaye alloch huomenc yeña' yeyoçher Yomporcop. Ñaña ñeñt atet petsapa' atteñaapa' o'ch allo'na senet puesuanmuet ñeñt atet yeçhateney Yompor.

¹⁷ Ñaña ñerra'm allo'nach yeçhatnenet ñeñt ama es sherbetsopa', atteñaapa' ñerra'm o'chña epa'hua orapa' allo'nach senet puesuanmuet ñeñt atet muenen Yompor. Ñato' o'ch

netma'ntacha ñeñt atet pena atsnañets ñeñt otenet cáncer ñeñtpa' mamesha o'ch epa'hua ora yechtso o'ch muetsay. Ñeñtpa' atet pa epsheña ñeñt pa'so'cheñ Himeneo ñaña Fileto, tarro'mar ñetpa' aña yeçhatenet po'poñ coṭaṭñats.

18 Ñetpa' atta ayçha' natateññañet Yompör po'ñoñ all oteney esempopa' yetanerrach. Ñetpa' ahuo't serrpare'tatyaset acheñenesha' atet: "All oteney Yompör attoch yetanterra esempopa' ñeñtpa' toma'nteñtsa. Ñeñtpa' aña toma'ntena atto yapataretta ahuaña oño." Ñeñto'marña patanta'tets ñeñt ame'ñetsapa' alla queçhpa'hueret atto ame'ñeñet Yompör.

19 Ama't atet pañ patantarrpa' tarraña Yompör po'ñoçhpa' ama pueno po'ñoñ. Ama't Yompör po'ñoñ ñeñt aquellcareṭ ahuaṭoteña' atet eñotateney eñallach pate'tets acheñ ñeñt po'ñoçh ame'ñenaya. Ñeñtpa' atet oten: "Yompörpa' cheme'tenan ñeñt po'ñoçh ame'ñenaya." Añpa' arr eñotateney po'poñ Yompör po'ñoñ ñeñt aquellcareṭ ahuaṭoteñ, ñeñtpa' atet oten: "Allohueney ñeñtey cotene' Cristopa' yequeçhpa'huerrepa' allohuen sosya'tsañ."

O'ch netma'ntacha ñeñt atet pena pocoll

20-21 Po'ñoçhpa' çoch yesuanom allohuen sosya'tsañ, allochña'pa' attoch añach yema'yoçhra attoch yesherbe' e'ñe cohuen Yompör. Tarro'mar allohueney ñeñtey ame'ñetsapa' ama e'ñe attecma'ye' yesherbe'ne Yompör. Ñato' puesheña'tetspa' nanaccha' cohuen sherbeñet Yompör, ñato' po'potantañña'pa' amach. Ñato' o'ch netma'ntacha ñeñt atet pena pocoll. Ñeñt acheñ eçllayoreṭpa' arrña pa'paclopa' shonte'ch eñall pa'namen coymeçhno. Ñato' patantarrpa' ororro'ch ñato' po'potantañña'pa' asrerro'ch, ñato' po'potantañña'pa' tsachrro'ch, ñato' po'potantañña'pa' patsrro'ch. Tarraña allohuenpa' amach e'ñe attecma'ye' sherbenano pamo'mte'. Atet ñerra'm ñeñt ororro'pa' nanaccha' coçhneshoṭ sherbenan pamo'mte', tarraña atet ñerra'm patsrro'pa' amach tama coçhneshoteye' sherbenano pamo'mte'. Ñeñto'marña yapa'çho'ña ñerra'm yemneñ o'ch yesherbe' e'ñe coçhneshoṭ Yamo'mte' Cristopa' añ palltetsa çoch ñanom yesuanom allohuen sosya'tsañ attoch añach yema'yoçhrena ñeñt cohuentetsa Yamo'mtayecop. Allochña'pa' ama't erra'tsena es yeṭa'yenpa' e'ñech cohuenacma yocshateñ Yamo'mte' Cristo.

22 Ñeñto'marña papa' noteneṭ o'ch pesuanom allohuen sosya'tsañ ñeñt atet muenatse'tyen huepaneshaçhno ñeñt ama po'ñoçhaye' sherbenaye Yompör, allochña' papa' añach pema'yoçhrena ñeñt cohuentetsa Yomporecop, ñaña çoch

ɸame'ñya Yompor e'ñe peñmañesha', ñaña ɸhocmach pe-muerya allohuen ɸamo'tsesha'. Allochñapa' attoch pepar-rocmat epaɸ allohuen ñeñt e'ñe cohuen pueyoɸher pene' Yepartsesharecop.

²³ Ñaña ñerra'm esempo es otnare'tanna'tyenetpa' ɸapa' amach pe'mñotatstaneto, tarro'mar ñeñt atet otatse'tyetspa' e'ñe orrena atet penet. Ama't ɸapa' peñoteñ ñerra'm ɸho es yotnare'tanna'tapa' allot huena shonte' atsrre'mueñets.

²⁴ Tarro'mar ñeñt torretsa Yepartsesharecoppa' ama pocteyaye o'ch atta atsrre'mare'tyesa allemeñ. Elloña ɸochña ya'mueraña allohuenacop. Ñaña ɸochña yeyɸatyes e'ñe cohuen acheñenesha' ñeñt atet cohuen enten Yompor. Ñaña ama't ñetpa' errof ɸa'yetpa' yapa' e'ñe yemorrenteñoɸpa' o'ch ya'huantoñ.

²⁵ Ñaña añ pocte' o'ch alla yoctape'chater cohuen ñeñt ye'moñe'tene'. Tarraña e'ñech acopa yoctape'chatyerranet e'ñe cohuen. Ñaña o'ch yecuenanet e'ñe acopa esempo-huañencha' ɸapanet pueyoɸhro ñeñt e'ñe po'ñoɸ cohuen enten Yompor. Ñaña o'ch yecuenanet esempohuañencha' cotape'cherret ello e'ñe cohuen Yomporecop.

²⁶ Ñerra'm atet yeɸapa' ñato' attotpa' o'ch a'royerranet oneñet atto huanquēnanet atto te'pa' ɸa'yenet sosya'tsañ ñeñt atet muenatenanet ña.

3

Ñeñtcha' atet perra esempoch mellapoterrmocha

¹ Ñehua, te'pa' o'ch neñotataɸ po'poñ ñeñtcha' atet perra esempoch mellapoterrmocha. Allempopa' nanaccha' echarr attoch yocte' Cristo.

² Tarro'mar allempopa' atetcha' perra acheñenesha'. Allempo acheñpa' nanaccha' moparrareret, ñaña añach paterr cotape'chenet ñeñt atet muenenet e'ñe ñocpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeñt echyenet, atarrcha' cohuen entyerret e'ñe ñañeñeta, po'potantañña' amach esoye' asherben entyereto. Ñaña allempopa' nanaccha' achmare'teret Yompor, ñaña allempopa' o'huañcha' ame'ñyet ama't ñeñt pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeñt anaret Partsocop.

³ Ñaña allempopa' o'huañcha' esesha' mueranna'terrtsa, ñaña o'huañcha' muenet o'ch amo'tstanna'terret. Ñaña

allempopa' nanaccha' toma'tam̄psanna'tyerret ñaña allempopa' errotencho' muenetpa' atetcha' p̄atse'tyenet, ñaña allempopa' nanaccha' muerochtatanna'tyerret attoch nanac coshenet, ñaña nanaccha' tsena'terret ñeñt̄ cohuentetsa.

4 Ñaña nanaccha' apomatatañterret, ñaña allempopa' amach es yepuer entyerreto, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloch nanac coshenet, amachña añeye' e'neneto atet muenen Yompor.

5 Ñaña allempopa' ama'tcha' ottenetañ ñerra'mrrate' ame'ñenetpa', tarraña amach po'ñoçhaye' ame'ñeneto. Tarro'mar ñetpa' amach po'ñoçhaye' mueneñeto o'ch çhapanet pueyoçhro ñeñt̄ cohuentetsa Yomporecop attoch huomenc p̄a'nmuet pueyoçher e'ñe po'ñoçh.

Ñeñt̄ atet acheñpa' amach pecua'psatsche.

6 Tarro'mar ñeñt̄ acheñ atetpa' attach mueneñ o'ch sheca'yesan acheñenesha'. Ñato' o'ch ahuanmuet po'ppauño'marpa' ñerra'm be'toset a'nahua pocollopa' añña coyaneshaçhno ñeñt̄ ama es eñotopa' o'ch at̄ta ame'ñateñet e'ñe ñet poçta'p̄ñet. Tarro'mar ñeñt̄ coyaneshaçhnopa' nanaccha' yorateñet po'chñar. Ñaña ñetpa' añach e'nenet pa'namen ñeñt̄cha' coshatenahuet.

7 Ñeñto'marña añ coyaneshaçhnopa' pa'namencha' topatyenetañ cotap̄ñats. Tarraña ama't ahuatapa' amach errotenot enterreto ñeñt̄ po'ñoçh Yompor poçta'p̄ña.

8 Yacma ñeñt̄cha' atet shequërre' acheñenesha'pa' ñeñt̄pa' añña muenen o'ch epatare'tan añ cotap̄ñats ñeñt̄ e'ñe po'ñoçh Yompor poçta'p̄ña. Atet p̄a ñaña ahuat̄ Janes epuet Jambres ñeñt̄ muenatseñ o'ch epatare'tan Moisés. Ñeñt̄ yacma ñeñt̄ atet shequëne' acheñenesha'pa' amach cotape'chenano ñeñt̄ cohuentetsa ama't mamesha. Ñetpa' çhach a'po'poñetenet ñeñt̄ atet yame'ñena.

9 Tarraña ñet poçta'p̄ñetpa' amach allohuenacmaye' anetso'mar epuerro tarro'mar esempopa' ñato' allohuen acheñenesha'pa' o'ch eñotuet ñeñt̄ atet otatse'tyenetpa' ñeñt̄pa' shequëñtsa. Ñato' atetcha' p̄a atet p̄a ahuat̄ epsheña yacma ñeñt̄ muenatseñ o'ch epatare'taneñ Moisés.

Arrpa' all cotape'chatan e'ñe cohuen Timoteo

10 Tarraña p̄apa' ama at̄teye' pepeno. Tarro'mar p̄apa' añ poçta'nen ñeñt̄ atet nepena na. Ñaña p̄apa' peñotuennan ñeñt̄ atet neyçhatyen Yomporecop, ñaña ñeñt̄ atet nocrrena e'ñe cohuen Yomporecop, ñaña atto e'ñe patr̄ra nema'yoçhrena ñeñt̄ cohuentetsa. Ñaña p̄apa' peñotueñ ñeñt̄ atet nanac

neyemteña Yompor ñaña atto nanac na'huanten allohuen ñeñt echarr nentyen, ñaña atto nanac nemorrenteña allohuen acheñenesha', ñaña atto ama't nemuerochteñoŕpa' čhocma nocteñ Cristo.

¹¹ Ñaña peñotueñ atto pue'moñe'teñoŕetanpa' čhocma cotare'tnete't atto mueročhtatyenesete't. Ñaña ama't p̄apa' peñotueñ ñeñt atet mueročhtatyeneset a'yo anetso ñeñt pa'so'cheñ Antioquío, ñaña Iconio, allotpa' ñaña Listro. Tarraña ama't atet p̄a'yesnete'tpa' Yomporñapa' čhocma a'quesp̄atyeneset allot.

¹² Ñehua, yapa' yeñoteñ erra'tsencha' muenats o'ch coñan e'ñe cohuen Cristo Jesúspa' čhocmach mueročhtatanet ñeñt e'moñe'tenahuet.

¹³ Tarraña ñeñt ama cohuenayaye acheñpa' allo'nach senet p̄atse'tnomuet sosya'tsañ. Ñaña ñeñt atta sheca'yetspa' allo'nach senet shecanna'tatset.

¹⁴ Tarraña p̄apa' čhocmach p̄octape'ch ñeñt atet ayčhataretep̄, ñeñtara ñeñt ama't p̄apa' o' peñoter ñeñt e'ñe po'ñoč cohuen coñap̄ñats. Tarro'mar p̄apa' peyemtenya ñeñfey peyčate' ahuatoteñ.

¹⁵ Ñaña p̄apa' e'ñe cheshoteñ ayčhataretep̄ Parets po'ñoñ ñeñtara añ ñoñets ñeñt peñotaterre' atto e'ñe yame'ñeñoña Cristo Jesúspa' o'ch yequeshperra.

¹⁶ Allohuen Yompor po'ñoñ ñeñt aquellcaretpa' e'ñe Part-seshotecma anaret. Ñeñto'mar añ ñoñetspa' nanac sherben ñeñtcha' yeyčate' ñeñt atet muenen Yompor, ñaña ñeñtcha' alla yoctape'chaterre' cohuen ñerra'm esempo es yepanten, ñaña ñeñtcha' yeñotatene' e'ñe cohuen ñeñt atet p̄octetsa Yomporecop.

¹⁷ Allochñapa' attoch ñeñfey o' puechemer perrey Yomporpa' e'ñech yeñotuen allohuen ñeñt cohuentetsa Yomporecop, ñaña attoch huomenc yeŕpa' yeyočer allohuenacop ñeñt cohuentetsa Yomporecop.

4

Añ pocte' čhocmach yeserrpare'toñ Yompor po'ñoñ ama't erroteno'tsenya

¹⁻² Te'pa' o'ch alla noterrperr ñeñtcha' atet peŕpa: Chocmach peserrpare'toñ Yompor po'ñoñ ama't esempo erroteno'tsenŕa. Tarro'mar Yomporpa' enteney epuet Puechemer Jesucristo, ñeñtara ñeñt Yepartseshar yepen, ñaña ñeñtarach huerrtsa ama't esempohuañen, ñaña ñeñtarach añcha'taretetuerrtsa esempohuañen, ñeñtcha' acrerre' allohuen acheñenesha' ñeñt e'ñe cohuenare', ñaña

ama't ñeñt ama cohuenayaye. Atetcha' ñan allohuen ñeñt corretsmeñ allempo, ñaña ama't ñeñt o' colla'huenta. Ñaña te' papa' o'ch peñotatyes acheñenesha' ñerra'm esempo ñetpa' ama pocteye' es peneto. Pañapa' ñach otyesahuet amach atet yeñatsto, allo'tpa' o'ch poctape'chatyerranet e'ñe peñmañesha'. Ñaña ñhocmach peyñatyesanet ñeñt poctetsa Yomporecop.

³ Tarro'mar esempohuañenpa' ñhapcha' allempo acheñenesha'pa' o'huañcha' muenet o'ch ame'ñet ñeñt e'ñe pañharr cotaññats, ñeñt atet yeñateney Yompore po'ñoñ. Allempopa' añach e'nyerret erra'tsente' serrpare'tene' cotaññatser ñeñt e'ñe cohuen entenet ñet attotcha'ña atonterraña ñeñtcha' yeñaterrahuet ñeñt e'ñe ñet poctaññet.

⁴ Allempopa' amach esesha' muenerraye o'ch e'mñotet cotaññats ñeñt e'ñe po'ñoñ. Atteñapa' o'ch añe e'ñe cotape'cherret ñeñt e'ñe ñet pueserrpañet.

⁵ Tarraña papa' añach pañerr poctape'ch ñeñt cohuentetsa Yomporecop, ñaña ñhocmach pa'huenta' ñerra'm huaponaña mueroñteñets, ñaña añach pañerr pema'yochra serrpare'tatyesets cohuen ñoñets alloch yequeshperra. Ñaña ñhocmach petorra ñeñt atet petaruas apañ Yompore.

Allempo o' muetsamochet Pablo

⁶ Napa' amach erroñ nepere'te tarro'mar o' ñhapmoch allempoch na'mtsareña Yomporecop. Te'pa' neñotena napa' o' muetsamochnet.

⁷ Tarraña napa' o' epaye' netorra'nma Yomporecop atet ñerra'mrate' ño neñllarena Yomporecop. Ñaña napa' o' net-sotua ora ñeñt atet otterren Yompore. Ñato' o'ch netma'ntacha ñeñt atet nepena: Ñerra'm ño erra yesechapa' ñhocmach yeñhap all yesechena. Ñaña napa' ama't mameshapa' ama nequeñpue'te atto name'ñeña Yompore.

⁸ Te'ña napa' añe necuen esempoch nagap ñeñt o'patatenna Yompore ñeñtcha' nanac nocshaterre', tarro'mar napa' añ neña'yese't ñeñt atet muene't Yompore. Ñeñto'marña te' esempoch huerra Yepartseshar Cristopa' allempo napa' aphuerrencha' ñeñt o'patatenna. Tarraña amach nañta aphuer-rno ñeñt o'patatenya. Añe'nachña aphuer ñaña allohuen ñeñt ñhocma cohume'tene' te' Cristo o'ch huerra. Ñeñtara Yepartseshar Cristo ñeñtcha' yeñotaterre' ñeñt po'ñoñ atet yeña'yena te'.

Arrpa' all otyesan Timoteo ñeñt atet apanetena

⁹ Te'pa' o'ch notañ ñaña ñerra'm erroteno'tpa' o'te' ñon arr tayecma.

10 Tarro'mar arr masheñ Demaspa' o' a'ypo'ña'nerren arr napuet, ñapa' o' ahuerr Tesalónico, tarro'mar ñapa' aña nanac morrentena ñeñt patso'marecpa. Añpa'cho'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio.

11 Te' arrpa' aña arro'tsen masheñ Lucas. Ñaña o'ch pa'sech masheñ Marcos ñeñtcha' epaḗ ḗon arr, tarro'mar ñato' ñapa' o'ch yenpa'n arr.

12 Masheñ Tíquicopa' o' nemñe a'yo anetso Efeso.

13 Ñaña o'ch notaḗ ñerra'm ḗoncha' arrpa' ḗanmoncha' necapa ñeñt nena'nom Troaso e'ñe Carpo pa'paclo. Ñaña ḗanmoncha' allohuen nelibro'chno, ñaña nepaḗllechno. Ñeñtara añ nepaḗllechnopa' ñeñt nanac nemnen.

14 Alejandro ñeñt po'taruas pene' asre'chnopa' ñapa' atta nanac a'metare'tamḗsen. Tarraña Yomporpa' tsa'taterach ñeñt atet ḗa'n.

15 Ñeñto'mar ḗapa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt atet yeserrpare'ten.

16 Ñaña o'ch notaḗ. Ama't ahuañmo'cha allempo ñanom na'pocstat neñoñ am'cha'tare'teshopa' ama't puesheñarrapa' ama esesha' neñosapretaye. Elloña ñeñtapa' cha a'ypo'ña' huanet. Tarraña ama't atet ḗa'netaña' napa' ama nemno Yomporpa' o'ch tsa'taterranet.

17 Tarraña Yepartseshar Cristopa' ama a'ypo'ña'no, elloña nanac ahuañmencat ḗa'n. Ñeñto'marña o' alla neserrpare'terrerr Yompor po'ñoñ attoch e'mare'ch allohuen acheñenesha' ama't ñeñt ama judioneshayaye ñeñt alloch yequeshperra. Atto nequeshperra allempo all atarr amue-ro'chtatare'ten, napa' atet nenteñ ñerra'mrrate' Yepartse-sharpa' o' a'queshḗaterren e'ñe ma'yarr puenamot.

18 Ñeñto'marña te'pa' neñoteñ Yepartsesharpa' chocmach a'queshḗaterren arrot all ama cohuenayaye, ñaña napa' neñoteñ chocmach cohuanḗpenen, attochña chapaterren all am'cha'tare'tena ña pue'ntaño. Ñeñto'marña chocmuepa'ch ya'ye'cho'chtatoñ erpronohuañen. Ñeñtḗpa' attetepa'ch.

Arrpa' all huom'cha'tyesnerranet po'cartot

19 Ñaña añ necartotpa' nemneñ o'ch nehuom'cha'ch noch Prisca epuet puerrollar Aquila, ñaña o'ch nehuom'cha'ch Onesíforo pamo'tsesha'.

20 Ñaña masheñ Erastopa' alla a'pa anetso Corinto, ñaña masheñ Trófimopa' alla nesa'neñ patsnañoñ Mileto.

21 Ñaña ḗapa' ñerra'm errotentopa' chocmate' pehuapa allempo ama huapuenta'. Ñaña añ necartotpa' mueneñ o'ch

huom̃cha'taṣ masheñ Eubulo, ñaña Pudente, alloṭpa' ñaña Lino, ñaña noḥ Claudia ñaña allohuen masheñneshachno ñeñṭey ame'ñetsa arr Romo.

²² E'ñe allohuanenpa' o'ch notaṣ, Yepartseshar Jesucristopa' ḥocmuepa'chña e'ñe parro'tseneṣ. Ñaña Yomporepa'ch sa'natenaya allohuenes. Ñeñṭpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN TITO TITO

Atto Pablopa' quellcan carta Titocop

1-4 Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquëne'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt acre't Yompor ahuaḡoteñ attochña ñetpa' o'ch ame'ñeret. Ñaña añecop llesensa'n attoch nach eñotaterrahuet ñeñt e'ñe po'ñoḡ atet poctetsa Partsocop, ñaña nach eñotaterrahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñtpa' atet oteney Yompor ama't ahuaḡoteñ ñeñtcha' atet ḡonay, ñaña yapa' yeñoteñ Yomporpa' ama puenesho po'ñoñ. Ñeñto'marña te'pa' o' ḡherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompor ñeñt Ya'queshḡatañer yepen, nach serrpare'terre' po'ñoñ ñeñt atet otenen. Te'pa' e'ñe nehuomtcha'teñoḡeḡpa' o'ch notaḡ: Yomporepa'chña pebensare'tamḡene' ñeñt atarr Parets epuet Puechemer Jesucristo ñeñt Yepartseshar yepen ñeñtara Ya'queshḡatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Ñeñt po'taruas ḡa' Tito Yomporecop all anetso Creto

5 Te'pa' o'ch notaḡ, napa' atto nena'nmaḡ ahuaña Creto attoch ḡach a'poctatyese' ñeñt pallta'yetsa, ñaña ḡach acra'yese' puesheña'tets ñeñtcha' pena'yes allemeñ anetso'mar ñeñtcha' pompornesha' ḡa'yes ñeñt ame'ñetsa. Añmapa' ñeñtña atet notnomueḡ ahuañmo'cha.

6 Ñeñtcha' pompornesha' ḡa'yasetpa' añcha' pena'yes acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha'. Ñaña ñeñtcha' pompornesha' ḡa'yasetpa' añcha' pena'yes erra'tsente' penten e'ñe patrra puetapor pen (ñerra'm ataporet), ñaña erra'tsente' penten ama't puechemereshapa' e'ñech ame'ña'huenet, ñaña puechemereshetpa' amach atteye' enteñe acheñenesha' atet ḡa'yena po'poñeḡhno acheñenesha' ñeñt atta coshatse'tyenet, ñaña ñeñt ama atpare'tetso puechemereshapa'.

7 Tarro'mar ñeñtcha' pa'mcha'tareter ña' ñeñt ame'ñetsapa' añcha' pena'yeshcheñ ñeñt e'ñe cohuenare' es ña'yets, ñeñt amach eñalle attoch tanmare'teña achenesha', tarro'mar ñapa' anaret ñach a'pocatyene' pa'namen ñeñt pocetsa Yomporecop. Ñaña ñeñtcha' pa'mcha'tareter ña'yeshcheñ ame'ñetsapa' amach añeyaye achenesha' ñeñt añach pocte' enten o'ch chocma patanet ñeñt atet muenen e'ñe ña, ñaña amach cha atsrre'mo'chen entueno, ñaña ñeñt ama posa'tare'tetso, ñaña ñeñt amach orroña'eyaye, ñaña ñeñt ama nanac ye'chapretetso quelle ñeñt apenco'chenot o'ch gana.

8 Aña e'ñe pocte' o'ch amcha'taretta ñeñt e'ñe cohuen aguene' achenesha' pa'paclo, ñaña ñeñt nanac muenene' o'ch e'ñe cohuenare' es ña'yeshcheñ, ñaña ñeñt e'ñe eñotene' ñeñt cohuentetsa, ñaña ñeñt e'ñe pocte' es ña'yeshcheñ acheneshacop ñaña Partocop, ñaña ñeñt e'ñe ch puetpara es ña'yeshcheñ.

9 Ñaña ñeñtcha' pa'mcha'tareter ña'yeshcheñ ame'ñetsapa' e'ñe ch yemtenana pocacma añ ñoñets ñeñt e'ñe po'ño'ch Yompor po'ño'ñ ñeñt atet yechateñet. Allochñapa' ñapa'cho'ña e'ñe ch attecma yechatan ñaña po'potantañe'cho'ño'ñ ñeñt e'ñe pacharr cotapñats, ñaña ñeñt eñotene' attoch anapuenan e'ñe cohuenacma ñeñt achmare'tene' Yompor po'ño'ñ attoch ñetpa' amach erro'tenet anapeto.

10 Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ño'ch ñeñt'pa' atet pena shonte' judionesha'.

11 Ñeñto'marña añ palltetsa o'huañcha' yechatyetnet po'poñe'ttso'cma cotapñats. Tarro'mar ñetpa' atta nanac moñe'tateñet achenesha' pocapña; ama puesheña'tsayaya atet petso ama't allohuen ñeñt parro ye'cha'yenet. Ñetpa'cho'ña añ yechatenet ñeñt ama poc'teyaye. Ñaña añe'c'pa yechatenet attoch ganet quelle, tarraña ñeñt'pa' apenco'chena.

Ñeñt atet pena creto'marnesha'

12 Puesheñarr creto'marnesha' ñeñt nanac etsotene' e'ñe ñañeñeta pocapñetpa' ñeñtña achenesha' ama poc'teye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' chocma nanac toma'tam'peñet pamo'tsesha', ñaña ñetpa' nanac atsrre'mña'et e'ñe atet ñerra'mrrate' berr ñeñt nanac bellac, ñaña nanac quellañsareret, atarr araquet ama ayetña'feto."

13 Ñeñt atet a'metam'penan pamo'ts ñeñt'pa' e'ñe po'ño'ch atet. Ñeñto'marña o'ch notap, te'pa' pach otahuet, "te'pa'

amach allo'na atet seřanna'tneno." Allochñapa' attoch allo'na ame'ña'nmuet añ cotapñats ñeñt e'ñe pačharr,

¹⁴ ñaña allochñapa' amach allo'na e'mñotneññañeto ñeñt pueserrparña pe't ahuatnanashañ judionesha', ñaña allochñapa' amach allo'na e'mñotneñe acheñenesha' ñeñt atet yečhatyenanet ñeñtcha' atet pet, tarro'mar ñetpa' čhach atpare'tenet ñoñets ñeñt e'ñe po'ñočh Yompor po'ñoñ.

¹⁵ Ñaña o'ch señočh: Ñeñt acheñer e'ñe cohuenare' es cotape'chen pueyočhro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey cotape'chets pueyočhro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poctapñetpa' atarr sosey. Ñeñto'marña ñetpa' amach čhapaneto pueyočhro ama't esempo o' pohuet ñeñt ama pocteye' enteno Yompor.

¹⁶ Ñeñt atet acheñpa' ama't otenetañ eñoteñeto' Yomporpa' tarraña ñeñt atet p̄atse'tyenetpa' yeñoteñ ñeñt̄pa' ama atteyaye. Ñeñt Yomporpa' ama pocteye' entapretenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe pačharr cotapñats Yomporecop

¹ Tarraña p̄ocoppa' añña poctetsa o'ch peyčhateñ acheñenesha' ñeñt e'ñe pačharr cotapñats Yomporecop.

² Ñaña ñeñt po'nmeneshačhno yacmapa' o'ch peyčhatanet atet: Amach orrare'tatsteto attoch čhocma cotape'chenet e'ñe cohuen, allochñapa' pamo'tsesha'pa' am̄cha'na'tpo'ch enteñ, ñaña attoch nanac eñotenet ñeñtcha' atet p̄a'yeset ñeñt cohuentetsa Yomporecop. Ñaña o'ch p̄otanet e'ñe cohuenacma, ame'ñetepa' ñeñt e'ñe pačharr cotapñats Yomporecop, ñaña morrentanna'tetepa' ñaña ahuanta'huetepa'ch allohuen topateñets.

³ Attecmach peyčhach ñaña po'nmeneshačhno coyanesha' ñetpa' añepa'ch orrtatyenet ñeñt e'ñe pocte' enten Parets ñaña ama't allohuen acheñenesha'. Amachña čhaña atomañefteneto, ñaña ñetpa'čho'ña amach orrare'tatsteto. Añña pocte' o'ch yečhachet pacmanesha' ñeñt cohuen enten Yompor.

⁴ Ñetpa' yečhachetepa' pacmaneshačhno ñeñt shopshare' ñeñt o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechoyoreshet,

⁵ ñaña attoch ñetpa' eñotenet nanac ñeñtcha' atet p̄a'yeset ñeñt poctetsa ñaña attoch muechettenet, ñaña attoch amach

muenme'cheneto ñeñt po'taruas penet pa'pacletto, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñeshoŕetpa' amach errotenoŕ acheñenesha'pa' achm̄are'toñeto Yompor po'ñoñ.

6 Attecmach peyčhach ñaña yacmanesha' ñeñt huepaneshameñ attoch ñetpa'cho'ña o'ch eñochet ñeñtcha' atet pa'yeset ñeñt poctetsa.

7 Papa'cho'ña e'ñech cohuenare' es pepa'yes paña, allochñapa' attoch entap̄ acheñenesha' ñeñt cohuen enten Yompor. Ñaña allpon peyčhatenanetpa' e'ñepa'chña pačharr peyčhatenanet, amachña čha muene' peyellsheñoŕa peyčhatenaneto attoch añcha'na'tpo' entoñet Yompor po'ñoñ.

8 Tarro'mar e'ñe peyčhateñoŕ Yompor po'ñoñ ñeñt e'ñe pačharrpa' amach errotenoŕ ama't eseshapa' oto aña' ama atteyaye. Ñaña ama't ñeñt pe'moñe'tyene' ñerra'm e'ñe peyčhateñoŕ e'ñe cohuenpa' allempoña ñetpa' o'ch penquēt, tarro'mar e'ñe peyčhateñoŕ cohuen pačharr. Allempoña ñetpa' amach errotenoŕ alla sasare'terrpeterro.

9 Ñaña e'ñech cohuen poctape'chatyes acheñenesha' ñeñt ataruasatarettetsa e'ñe atŕa. O'ch poŕtanet ame'ñyetepa' e'ñe cohuen ñeñt po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña čha anapare'teñeto.

10 Ñaña amachña čha etyeneto attoch po'patronaretpa' e'ñech yemtenanet poctacma. Allochñapa' e'ñe pame'ñeñoŕtet cohuen po'patronaretpa' añña acheñenesha'pa' e'ñech cohuen entapretenet Yompor poctap̄ña, ñeñtara ñeñt Ya'qeshpatañer yepen.

Atto Yomporpa' orrtatan puemuereña allohuenacpay

11 Yomporpa' orrtaterrnay pomuereña e'ñe allohuenacpay pa'namen acheñeneshacop attoch yequeshperra.

12 Ñaña ñeñt ama cohuen enteno Yomporpa' añ pocte' o'ch ya'ypo'ña'huer, ñaña ñeñt allpon yemnatse'tyen arr pat-sropa' añ pocte' ñaña o'ch ya'ypo'ña'huer, tarro'mar puemor-renteñoŕ Yomporpa' ñeñto'mar yečhatey atet. Añña pocte' ama't añe patsropa' o'ch yepena ñeñt cohuentetsa, ñaña o'ch yepena ñeñt atet pocte' enten Yompor, ñaña ñeñt atet muenen o'ch yetsotoñ.

13 Aña' attoch yecuame'teñ e'ñe yocsheñesha' esempo-huañencha' huerra po'cohuenño Jesucristo ñeñt nanac Parets ñeñt Ya'qeshpatañer yepen.

14 Tarro'mar ñapa' ña pocte' ente' o'ch rroma yocop attoch o'huañcha' allo'na yepatse'tnena sosya'tsañ. Ñaña ñapa' attoña e'shohuerrnay allohuen ñeñt ama pocteyaye. Allochñapa' attoch pueyochresha' perrey, ñaña attoch yapa'yema'yoçhrena ñeñt cohuentetsa.

15 Allohuen ñeñt atet o' notuap̄ papa' ñeñtcha'ña peyçhatyesanet. Ñaña o'ch p̄octape'chatyesanet e'ñe cohuen, ñaña ñerra'm pa'yenet ñeñt ama pocteyayepa' o'ch p̄otanet, amach p̄atsteto atet, tarro'mar papa' ñeñtecop anaretep̄. Ñaña ñeñt ama pocteyayepa' amach atet pepatsto, te't acheñenesha'pa' amate' acua'psenaye' entenpeto.

3

Ñeñt atet poctetsa allohuenacop ñeñtey ame'ñetsa

1 Ñaña o'ch peyerpacha acheñenesha' añ pocte' o'ch ame'ñeñet ñeñt nenet nanac amcha'tare't, ñaña allohuen po'psheñneçhno ñeñt amcha'taretetyetsapa' añ poctetsa o'ch ame'ñeñet. Ñaña añepa'chña pocsheñesha' çhocma torra'yenet erra'tsente' cohuen enten acheñenesha'.

2 Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch aco'pa es penet po'psheñtecop ñaña e'ñepa'ch cohuen amuerañtenet allohuenacop.

3 Ñeñtpa' e'ñe pocte' atetcha' p̄annenet tarro'mar yapa'cho'ña yeñoteñ ahuatpa' aña yepatse'tyese't ñeñt ama pocteyaye. Yapa'cho'ña attach ama es yepche'te allempo nanac yepatse'tyese't sosya'tsañ. Ñaña nanac yatpare'te't ahuat, ñaña aña yeçhatyesyete't ñeñt ama po'ñoçhoyaye co'tap̄ñats. Yechetspa' aña nanac muenatse'tatyete't ñeñt ama cohuenayaye ñaña allempopa' aña nanac yocshe't pa'namen sosya'tsañeçhno. Ñaña allempopa' nanac atsrre'moçhen yentanna'tyese't ñaña nanac es yeye'chapretanna'tyese't. Ñaña allempopa' ñerra'm esesha' ye'moñe'te'pa' yapa'cho'ña o'chçho' ye'moñe'chçho' yaña.

4 Tarraña allempoña Yomporpa' eñotatey e'ñe ña puemuereño'tpa' mueneñ o'ch yenpa'y, e'ñe allempocma yapa' attoña a'queshp̄aterrey, ñeñto'marña Yomporpa' ñeñt Ya'queshp̄atañer yepen.

5 Ñeñtpa' ama año'teyaye atto e'ñe cohuen es yepa'yen, añña e'ñe puemuereño'teya ñapa' a'queshp̄aterrey. Attoña e'shohuerrnayña yo'chñar attochña ellopa' o'ch yoctape'cherr e'ñe cohuen etserra ñocop, ñaña Puecamquẽño'tpa' o' e'ñe etserrataterrnay yoctap̄ña.

6 Ñeñto'marña Puechemer Jesucristopa' attoña a'pocatuonay yocop attoch Pomporpa' chorraterrya Puecamquëñ e'ñe pocacma. Jesucristopa' ñeñña Ya'queshpatañer yepen.

7 Ñeñto'marña te'pa' yeñoteñ e'ñe puemuereñoŧey Yomporpa' o' pocte' entuerrey allohueney, ñeñto'marña te'pa' e'ñe yeyemteñoŧ chocma yecuame'ten ñeñŧ o'patatenya, ñeñtpa' attochña yapa' corretsayach yocsheñeshocmañen tayoteñ e'ñe errponañohuen.

8 Ñeñŧ atet notenpa' e'ñe po'ñoçh. Ñeñto'marña napa' atarr nemneñ o'ch p̄octape'chatanet e'ñe huomenco atet, allochñapa' ñeñŧ ame'ñenaya Yomporpa' e'ñech aña ma'yoçhretenet o'ch penet ñeñŧ cohuen enten ña. Ñeñŧ o' notuapa' ñeñña cohuentetsa ñaña ñeñña nanac sherbets allohuenacop.

9 Ñaña o'ch notaŋ, amach p̄a'na anapare'tatstahueto ñerra'm esempo anapare'tanna'tyena acheñenesha' e'ñe ñet p̄octaŋño'maret. Ñaña amach p̄a'na anapare'tatstahueto ñerra'm esempo anapare'tanna'tyenet atet p̄a'yesete't pa'tañneshañet. Ñaña amach p̄a'na otnare'tatstahueto ñerra'm esempo pueserrparñoŧetpa' es otnare'tanna'tyenet. Ñaña amach p̄a'na anapare'tatstahueto ñerra'm esempo anapare'tanna'tyenet e'ñe Moisés po'ñoño'mar. Tarro'mar atto yanapare'tannenapa' ñeñtpa' ama es sherbeno, ñaña ñeñtpa' e'ñe orrena.

10 Ñaña ñerra'm esesha' ñeñŧ muenets o'ch atta e'moñe'tatyesan acheñenesha'pa' ñeñtpa' atetcha' pepe', o'ch peñotach atetpa' ama aŋapahuo. Ñerra'm ama huenano ñeñŧ atet penapa' ñato' o'ch alla p̄otererr po'pocheño. Ñerra'm allempoña ama huenererropa' añ pocte' o'ch sa'ypo'ñe'.

11 Tarro'mar ñeñŧ atet acheñpa' yeñoteñ ñeñtpa' po'chñarõŧcha' nanac es panten. Ama't ñapa' eñoteñeñ ñeñŧ atet pena ñeñtpa' ochña'teñets.

12 Ñehua, o'ch noterrperr po'poñ. Ñerra'm esempoch çhap pesho masheñ Artemas amapa' masheñ Tíquico ñeñŧcha' nemña peshopa' ñerra'm erroŧenoŧpa' çhocmate' p̄on, o'ch peçhap Nicópoliso, tarro'mar napa' noctape'cheñ ñato' allcha' nechara'perra.

13 Ñaña çhocmach peyenpue' masheñ Zenas ñaña masheñ Apolos attoch ñetpa' çhapuet all sechenet, ñaña attoch amach es pallteto. Zenaspa' ñeñŧ nanac etsotene' ñoñets ñeñŧ atet anaret.

14 Allochñapa' ñeñŧ parro yame'ñena allpa' añ pocte' o'ch p̄a'yenet ñamet ñeñŧ atet cohuentetsa, ñaña attoch

ñetpa' yēnpueñet ñaña ñeñt̃ nanac es paltetsa. Allochñapa' ñetpa' cho'ña o'ch sherbeñet pamo'ts.

Arrpa' all huom̃cha'tyesnerranet po'cartoť

¹⁵ Allohuenet ñeñt̃ parro'tsenenpa' mueneñet o'ch huom̃cha'tapet ñamet añ necartoť. Ñaña o'ch pehuom̃cha'ch allohuen ñeñt̃ pame'ñeñoťetpa' chocma morrentenyet. Yomporepa'chña sa'nataya allohuenes. Te'pa' ñeñtach notař, ñeñt̃pa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN FILEMÓN FILEMÓN

Atto Pablopa' quellcan carta Filemónacop

¹ O'ch masheñe Filemóna nequellconap añ carta, na Pablon epan masheñ Timoteo. Napa' o' yottam̄pennet e'ñe ne-serrpare'teñoñ Cristo Jesús po'ñoñ. Te'pa' o'ch masheñe yehuom̄cha'tap̄ pa ñeñteḡ atarr yemorrentena ñeñteḡ atarr yetorrapretenaya Yomporecop.

² O'ch yehuom̄cha'teñ ñaña allohuen ñeñt pame'ñeñoḡet ḡhocma apchenet pepaclo. Ñaña o'ch yehuom̄cha'teñ yoḡh Apia ñaña masheñ Arquipo ñeñt nanac yetorrapretenaya ñaña Yomporecop.

³ E'ñe nehuom̄cha'teñoḡes sapa' napa' o'ch notas: Yomporepa'ch sebensare'tam̄pene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyoḡhro allohuenes.

Atto Filemón e'ñe pame'ñeñoḡan Cristo atarr morrentenana allohuen ñeñt ame'ñetsa

⁴⁻⁵ Ñaña te'pa' o'ch notap̄ masheñe. Napa' atet ne'mare'teneḡ pa'pa' nanac peyemteña Yepartseshar Jesús ñaña atarro' pemorrenteña allohuen Yompor pueyochreshaḡhno. Ñeñto'marña na atet ne'mare'teneḡpa' ḡhocma neparasyoso'teñ Yompor allempo nema'yocham̄penpa.

⁶ Ñaña o'ch notap̄, añ nenamueñ Yompor p̄ocop, ñeñt allpon p̄ame'ñatena e'ñe p̄ame'ñeñoḡ Yompor, ñetpa'ḡho'ña ḡhapanetepa'ña pueyoḡhreto atto nanac shonte' e'ñe cohuen bensare'tam̄peney Yompor e'ñe yame'ñeñoḡ Puechemer ñeñt Cristo Jesús.

⁷ Ñehua, masheñe atarr nocshena atto pa'pa' atarr pemorrenteña allohuen ñeñt pueyochresha' pen Parets. Atto atarr pemuerenanetpa' ñeñto'marña na'ñaña atarr p̄ocshaten neyoḡhrohuen.

Atto Pablopa' otenan Filemón e'ñech cohuen aguërran pa'taruasañer Onésimo

⁸ Ñeñto'marña te'pa' o'ch noterrperr po'poñ: Napa' ñeñten Cristo puellsensaren ñeñto'marña p̄ocoppa' e'ñe pocteñ o'te' atet notapeñ e'ñe ne'mueñocma ñeñt poctetsa atetcha' peḡa.

9 Tarraña neñoteneþ þapa' atarr amuerañaþ ñeñto'marña te'pa' o'ch notap e'ñe þa pemuereñoť atetñaca'yeña peþa. Ñehua, na Pablon ñeñten atet þotene' napa' po'nmoťa o' yotamþerrnet e'ñe neserrpare'teñoťa Cristo Jesús po'ñoñ.

10 Tarro'mar na þotene' añecop ñeñť atet nenteñ ñerra'mrrate' nechemer. Ñehua, ñapa' o' name'ñacha arr all ayottamþsareten ñeñto'marña te'pa' e'ñe nechemer nepeñ. Ñeñťpa' añ pa'so'cheñ Onésimo ñeñť þa'taruasañer pepeť allempo ama yetamþenþa'.

11 Ña ahuatpa' ama es asherben peñche'te allempo petaruasache't e'ñe atťa. Te'ñapa' nanaccha' asherben penter e'ñe atet atarr asherben nenteñ naña.

12 Te'pa' o' alla nemñer pesho, e'ñepa'chña cohuenacma alla þaguēr, e'ñech atet peþapuer ñerra'mrrate' e'ñe no nechemer þaguēn, tarro'mar ñapa' e'ñe neyočhrocmañen atarr nemorrenteña.

13 Napa' atarrčo' nemneñeñ o'ch na'pacheñ arr ñeñťcha' epan atto ñapa' ñate' nesherbenayeñ. Ñehua, napa' neñoteñ ñerra'm þa arro'tsenpeñcha'pa' þate'ña nesherbenayeñ arr all ayottamþsareten e'ñe neserrpare'teñoť Cristo po'ñoñ. Tarraña þapa' amaña arro'tsenayaype ñeñto'marña napa' nemneñeñ o'ch na'patonapeñ þa'cheñer ñeñťcha' nesherbe-nayeñ.

14 Napa' ama't atarr nemneñeñ o'ch atet nepeñ, tarraña ama nemno o'ch atet neþa ñerra'm ama þa atet notaye, atťoña e'ñe þa poctapñoťpa' añcha'ña þorrtatonay pemuereña. Ama nemno o'ch e'ñe na ne'mueñocmapa' o'ch notap atetcha'ña peþa'y, ñeñto'marña te'pa' o'ch alla nemñer masheñ Onésimo pesho.

15 Naña o'ch notap ñato' tarrecpate' yetamþsaþa mame' atťoch e'ñe parrocmaterreþ e'ñe tayoteñ errponañohuen.

16 Te'pa' o'huañcha' atet peñch ñerra'mrrate' þa'taruasaña pepeñ ñeñť ama esoye' pente'te. Te'pa' e'ñechña atet penter ñerra'mrrate' e'ñe pemo'nasheñ ñeñť atarr pemorrentena. Napa' atarr nemuereña elloña þapa' o'ch atarr pemuerya nanac tarro'mar ñapa' ama e'ñe atťa pemo'nasheñ pepeñe atet yeþannena allohueney acheñey, te'ñapa' e'ñe yame'ñeñoť Yompor o'ch e'ñe pemo'nasheñtera e'ñe poctacma.

17 Ñerra'm po'ñočh atette' pentenen na ñeñťey parro attecmay yeyemtannena, ñeñťepñapa' e'ñechca'ye cohuen þaguērña yemo'nasheñ Onésimo atet ñerra'mrrate' na e'ñe cohuen þaguēn.

18 Ñerra'm čhoťe' erroť pennap ñeñť ama cohuenayaye amapa' ñerra'm čhoťe' tebeneþ, te'ñapa' nach petsa'terraya.

19 Na Pablonpa' te'pa' o'ch nequellconañ e'ñe na notot attoch e'ñe cohuen neñotatañ nach petsa'terraya. Tarraña ñato' o'ch neyerpataña atto na pame'ñaterraya attoch pa'queshpataretterra, ñeñto'marña pocoppa' añ poctetsa te'pa' o'ch alla pocshaterren namã.

20 Po'ñoçh masheñe, napa' añ e'ñe nemnen te'pa' o'ch alla pocshaterren namã e'ñe pame'ñeñot Yepartseshar Jesucristo. Allochñapa' napa'cho'ña attoch e'ñe cohuen nocsherra neyoçhro e'ñe name'ñeñot namã Cristo.

21 Napa' neñoteneñ papa' çhocmach pe'mñoten ñeñto'marña nequellquënnañ añ carta. Neñoteneñ amach ñeñtayaya atet peño ñeñt o' notuañ, papa' ellochña atarrcha' cohuen pepa'yesh allohuen ñeñt atarr cohuentetsa.

22 Te'pa' o'ch noterrperr po'poñ: pañño'toncha' ñamã nocop allcha' neçhap ñerra'm esempoch a'rroyernnet. Sema'yochañpeñoñen Yomporpa' napa' añ atarr necuen ñato' esempopa' a'rroyernnetcha'. Allempopa' eshecte' neta sesho o'ch nemo'terra'.

Arrpa' atto so'tner po'cartot

23 Arr necartot all huomñcha'teneñ ñamã masheñ Epafrañ ñeñt parro yottañpenyet e'ñe yeserrpare'teñoñ Cristo Jesús po'ñoñ.

24 Huomñcha'teneñ ñamã masheñ Marcos ñamã masheñ Aristarco ñamã masheñ Demas ñamã masheñ Lucas. Ñetpa' çhocma torrapretennet Jesucristocop.

25 Te'ñapa' ñeñtach notañ masheñe. Yepartsesharepa'chña Jesucristo sa'nataya allohuenes. Ñeñtpa' attetepa'ch Nom-pore. Allohua.

Pablo

AÑ CARTA ÑEÑÑ HEBREONESHACOP HEBREOS

Te'ña Yompor Puechemerpa' ña e'ñe ye'ñorana'terraya ñeññ atet oteñ Pompor yocop

¹ E'ñe ahuatoteñ Yomporñapa' chocma eñorana'tyesane't ñeññ pueyochresha' pe't ñeññcha' a'mta'yesaye't po'ñoñ ñeññara profetanesha'. E'ñe pa'namenot eñotatyesanete't. Ñeññapa' o'ch eñotatenneyet yatañneshañ judionesha' ñeññ atet otenanet Yompor.

² Tarraña te'ña yapa' e'ñe ña Puechemer o' eñorana'terrya ñeññ atet eñoreññaña Yompor yocop. Ñehua, ñeññpa' ñeññara Puechemer ñeññ Jesucristotets ñeññ ne't Pompor ahuatoteñ, ñach o'patenaya allohuen ñeññ ora allpon eñall, tarro'mar ña ye'chcataprete' ahua't Pompor añ patser ñaña allohuen ñeññ esocmañen pa'namen eñalletyests.

³ Ñeññara Cristo atto atarr cohuentena ña pa'tsnomueño't, ñeññpa' Pomporña orrtaten po'partsoña. Ñeññ atet cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoño'ña orrtatuan ora esocmañen ñeññ allpon pa'namen eñall tarro'mar ña po'ñoñpa' atarr huomenc. Ñeññara ñeññ rromats attoch e'ñe e'sham'pesuerrey yo'chñar. Allempoña o' orrtatuan atto e'sham'perrey yo'chñar allempoñapa' o' alla anorruerr Pompor Parets po'cohuenrot allña atarr partsotapretuerrana Pompor po'conaño e'ñe all pue'ntaño.

Ñeññ Yompor Puechemerpa' ña metana'tuene' allohuen mellaño'teññanesha' atto atarr sherben ña

⁴ Ñeñño'marña te'ña ñapa' atarr am'cha'tare'ttena, ello metana'tuenan allohuen mellaño'teññanesha', tarro'mar ñapa' ñeññ otenet ñapa' e'ñe Parets Puechemer. Ñeññña mellaño'teññanesha' ñetpa' ama atteye' otare'tteneto.

⁵ Ñaña ye'ñoteñ ñapa' ña e'ñe metana'tuenahuet tarro'mar mellaño'teññanesha' ama't puesheñarro'tetapa' ama otaneto ñeññ atet otan Puechemer, ñeññpa' atet ot Puechemerecop:

Papa' pa' ñeññep e'ñe Nechemerep, te'ñapa' o'ch e'ñe neñotach
acheñenesha' po'ño'ch pa'pa' e'ñe Nechemer nepenep.

Po'pocheñoñapa' atet oterrerr Puechemerecop:

Napa' na ñeññen Pomporen, ñapa' no Nechemer.

⁶ Po'pocheñoña allempo chapatan Puechemer po'moter ñeññ atarr nanac sherbets añe patsro atet eñora ñocop, ñeññpa' atet ot:

Te'pa' concorpana'teñepa'ch allohuen nemllañoñoteñnaneshar.
 7 Po'mllañoñoteñnaneshar ñetpa' añecpa anarettenet ñetcha' sher-
 benet Yompor. Ñeñto'marña atet eñorena ñocpuet:

Ñerra'm erra nemñayenanet e'ñech poma'yorñecma erra senet
 e'ñe atet penet ñerra'm mōrr. Atarr cohuen sherbennet
 atet ñerra'mrrate' tso' ñeñt atarr cohuen huoretyets.

8 Tarraña Puechemerecoppa' ama atteye' oteno. Ñocoppa' atet
 eñora:

Papa' atarr Partsoḡ, ñeñteḡcha' ḡhocma añcha'tarettetsa
 peconañño ñeñt errponaññohuen. Ñaña ñeñt atto
 ḡpa'mñcha'tarettena ḡpapa' e'ñe pocte' es peḡa'yenanet.

9 Ñaña ñeñt e'ñe pocte' nenten napa' ñeñtña atarr
 ḡocshatene'. Ñaña ñeñt ama pocteye' nenteno
 napa', ḡpapa'ḡho'ña ñeñt atarr petsena'ten. Ñeñto'mar
 napa' ñeñten Peyomporer pepenen, ahuo't atarr
 nanac nocshatterreḡ. Atto atarr ḡocshena ḡpapa'
 ello peñtana'tueñ allohuen po'potantañ ñeñt
 nesherḡba'yene' ñamet.

10 Yomporpa' alla eñorerrerr Puechemerecop, ñeñtḡpa' atet
 otererr:

Partseshacha' ḡpa yeḡcḡcatue' ahuaḡ pats, e'ñe echarr ḡorratue.
 Eñetḡpa'ḡho'ña e'ñe pehuamencoteḡcma peyeḡcḡcatue.

11 Ñeñt e'ñe peyeḡcḡcatuapa' ñeñtḡpa' huañerrcha' e'ñech
 chenca'huerra esempo, tarraña ḡpapa' ama
 arromñañeshayaype ama't e'ñe errponaña. Allohuen
 ñeñt peyeḡcḡcatua ñeñtḡpa' e'ñech mellasha'tua e'ñech
 atet pena ñerra'mrrate' shetamuets ñeñt atarr
 añllasha'tña.

12 Atetcha' peperr peyeḡcḡcatar atet ñerra'mrrate'
 shetamtsoshe'm ñeñt o' mellasha't. O'ch a'metatse'chet
 o'ch huapore'chet allempo chorrenet po'poñ ñeñt
 atarr cohuen emarr. Tarraña ḡpapa' atterapach
 errponaññohuen. Atto ḡocrrena ḡpapa' ama't ahuaḡtapa'
 amach ahuañañañterro.

13 Po'pocheño Yomporpa' alla oterranerr Puechemer, ñeñtḡpa'
 atet och:

Te'pa' o'ch alla ḡanorruerr arr necohuenrot allcha' pepart-
 sotapretuerrna. Esemphuañencha' allohuen ñeñt
 pe'moñe'tene' o'ch e'ñe na'mchechuerranet attochña
 pomnaren peḡohuerranet.

Tarraña mellañoñoteñnaneshañapa' ama atteye' oche ñeñt
 atet otan Puechemer. (Ñeñto'mar yeñoteñ Yompor
 Puechemer ña atarr sherbets, ello metana'tuanan allohuen
 mellañoñoteñnaneshañ.)

14 Yeñoteñ allohuen mellañoñnanasha'pa' añecpa allsen-sarettenet atet ñerra'm Yompor Puecamquëñ, ñetcha' sher-benet Yompor. Attochña ñetcha' yenpuenet allohuen ñeñcha' a'qeshpatarettertsa.

2

Amach atta es yepchatsto esheccha' ya'qeshpataretterra

1 Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloch yema'yochrerra o'ch ye'mñoter e'ñe poctacma ñeñt' atto o' ye'muerrñañ po'ñoñ. Ye'mñoterrepa'chña e'ñe cohuen te't acopoteñpa' ñato'rraña o'te' alla yepserrñañ ñeñt' atet o' yeçhaterrey Yompor Puechemer.

2 Tarro'mar yeñoteñ Yomporpa' ama puenesho po'ñoñ ñeñt' atto eñorana'tanet ahuať. Tarro'mar allempo ñeñt' ama e'mñotaye ñeñt' atta atpare'te'pa' e'ñe tsa'tatuanete't allohuen ñeñt' allpon e'ñe pocte' ent ña. Ama't añ ñoñets ñeñt' orrtat po'mllañoñeñrenasha' çhocma tsa'tatanete't ñerra'm esempo atpare'tenet ñeñt' ñoñets.

3 Ñeñto'marña yapa' yeñoteñ ñerra'm ama ye'mñoterrñañe e'ñe ña Puechemer, yañapa' errotenuachñaca'yeña yeqeshperrate'ña ñerra'm atta ama es yepcheno; e'ñe atta eñalleñca'yeña attoch ya'qeshpataretterrañ e'ñe cohuen. Ñehua, ñenmaťpa' Yepartseshar Jesúsña serrpare'tatahuet attoch ya'qeshpataretterra. Allempoña ñeñt' e'muene' atet otanet Yepartseshar Jesús, ñetñapa' o' serrpare'tatyet yama attoch yeñoçh ñeñt' e'ñe po'noçh ña a'qeshpatañtetsa.

4 Ñama Pomporñapa' ñaña yeñotate' Puechemer po'ñoñ ñeñt' atet oteneypa' e'ñe po'noçh. Ñapa' orrtatyesanet po'partsoña ñaña po'huamenc ñeñt' acheñenasha'pa' ama puentareto. Ñama ña Puecamquëñoťpa' o' apa'yeseý e'ñe puesheña'ttsoý errotench'a' muenateý ña ñeñt'cha' atet yetorra'yesa ñocop.

Atto Jesucristopa' e'ñe poctacma acheñetos arr patsro attoña e'ñe pa'mo'nasheñ pohuerrey

5 Te'pa' o'ch noterrserr po'poñoneť añ patser ñeñt'cha' huerrtsa tsapatoneť. Ñeñťpa' ama mellañoñeñneshaye' noña Yompor ñeñt'cha' pomnaren perre'. Ñapa' aña na' acheñ ñeñťpa' arromñatenasha'.

6 Tarro'mar atet anaret Yompor po'ñoñ ahuaťoteñ allempo puesheñarrpa' atet otan Yompor:

Ama't acheñaya ama't mamesha ama esoyayye, țarraña pã Nomporepa' atarrepa't peyerpuenya. Ama't ya ñeñteý

arromñañena'taraya tarraña ña Nomporepa' atarrepa't pemuerenya.

7 Ñeñt arromñañenesha'pa' ama tama ahuamencateyayeto atet atarr sherben mellañoñeñnanesha'. Tarraña ñeñtpa' mamecpa atet pemnach. Tarraña ama't atteñpa' elloña o'ch alla pecohuentater atet ñerra'mrrate' esempo o'ch net ñeñtcha' añcha'tare'ttertsa, allempopa' o'ch nachtet po'choyo'mñ ñeñt atarr cohuen.

8 Ñeñtpa' tarro'marña atet pene' arromñañena'tar allochñapa' attoch e'ñe pomnaren penan allohuen ñeñt allpon es peyeçhcatua. Arrpa' allohua atet oten ñoñets ñeñt ahuañoteñ anaret.

Ñehua, ñeñt ñoñets all oten arromñañena'tar ñeñtcha' e'ñe pomnaren perre' allohuen, ñeñtpa' añca'yeña oteney allohuenacop ñeñt errañaren eñall; amach eñalleña ama't e'ñe patrra ñeñtcha' ama pomnaren perreto. Tarraña ama't atet oteneñ ñeñtpa' amaña yentera' allempoch pomnaren es perr arromñañena'tar, tarro'mar ama çherra' allempoch etsoterra ñeñtecop anaret.

9 Tarraña e'ñe yeñoteñ puesheñarr ñeñt arromñañecoptartosta ñeñt atet postsa ñeñtca'yeña Jesús. Allempo acheñetos arr patsro Pomporña muenate' amach tama ahuamencattoso atet atarr ahuamencattena mellañoñeñnanesha'. Tarraña ñeñtpa' mamecpa atet muenach attoch e'ñe arromñañecoptartosa arr patsro. Ñeñtpa' añecopña atet ña attoch mueroçhtosa o'ch rromos allohuenacpay ñeñtey arromñañenesha'. Yompor e'ñe puemuereñoñey ya attoña muenatan Puechemer o'ch rroma yocop. Ñeñto'marña Pomporpa' o' alla atarr cohuentaterran Puechemer allempo o' alla ner ñeñtcha' atarr añcha'tare'ttertsa.

10 Ñehua, Yomporpa' yeçhcatan allohuen ñeñt eñalletyetsa. Ñaña allohuenpa' tarro'mar yeçhcatue attoch cohuentateññañet ña. Ñaña ñapa' añ muenen shonte' ñeñtcha' e'ñe puechemerasha' perr ñeñtcha' cohuentapreterrera ña. Yomporpa' e'ñe pocte' enteñ o'ch muenatan Puechemer attoch mueroçhtateñ acheñenesha'. Attochña e'ñe etsotatoñ Puechemer esheccha' a'queshpaterran allohuen ñeñtcha' puechemerasha' perr; attochña e'ñe ahuanerranet allcha' cohuentapreterrñañet Pompor.

11 Ñehua, Puechemer ñeñt Jesús, ñapa' a'cohuentatan acheñenesha' Partsocop, attoña e'ñe e'shampesuanet po'chñar. Te'ña ñeñtey a'cohuentatuaretey ñaña ñeñt ya'cohuentaterre' ñeñtpa' ñeñtña e'ñe ñeñtena'tarecmay

tarro'mar ñeñtara Yompor yepen ñeñt Pompor pen ña. Ñeñto'marña Jesús pa' ama puepencñoŕeye' pa'mo'nasheñ penye.

12 Yeñoteñ ama penquënyo tarro'mar Yompor po'ñoñ ñeñt anareŕ ahuatoteñ ñeñtpa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es pepa'yen pa. E'ñe nachoteñoŕeŕ papa' chocmach na'ye'choçhtatonapŕ all apçhena allohuen masheñneshaçhno.

13 Yompor po'ñoñ ñeñt aquellcaretpa' atet oterrerr ñerra'mrrate' Cristo o' alla oterrerr:

Napa'çho'ña neyemteña Yompor.

Ñaña atet oterrerr Cristo:

Te' arro'tsenen epan Nompor puechemeresha' ñeñt cohuanŕpsatenen ña.

14 Ñehua, allohuen ñeñt e'ñe pa'mo'nasheñecmuet pannelsa, ñetpa' e'ñe ñeñtena'tarecmuet. Ñeñto'marña Jesús pa' e'ñe acheñetos attoch pa'mo'nasheñ pŕosey. E'ñe arromñaŕena'tartosa e'ñe atet ñerra'mrrate' ya. Ñapa' tarro'marña atet pŕosa allochña pa' attoch rromos. Tarro'mar allempo rromapa' attoña puerratañpesuan oneñeŕ po'huamenc atto atarr añcha'noçhtana'teney allempo yerromuen.

15 Ñeñtpa' Jesúsña a'huañatañpesuose' ñeñt ama't cheshoteñ chocmach yençha'ten atto yerromuen, ñeñtpa' atarr añcha'noçhen yenteñ.

16 Ñehua, yeñoteñ ama mellañoŕeñnaneshaye' llequënoña Jesús ñeñtcha' yenpos arr patsro. Yaña llecosa ñeñtey arromñaŕeneshay ñeñtey e'ñe po'ñoçh po'ñrenñey pen Abraham; ñeñto'marña ñapa' mueneñ o'ch yenpŕosey.

17 Ñeñto'marña ñocoppa' e'ñe poçtoña o'ch acheñetos, o'ch e'ñe attetos ñerra'm ya ñeñtey pa'mo'nasheñnesha' pen. Allochña pa' e'ñe puellcapreteñoŕey ya ñeñtey e'ñe pamo'ts penpa' e'ñech cohuen a'poçtaterrey Partsesho. Attoña ñapa' chocma e'ñe cohuen sherbenan Pompor atet ñerra'mrrate' ñeñt corneshatyets Partsocop. Ñapa' e'ñe po'ñoçh Pa'mçha'tareter peñ allohuen ñeñt cornaneshatyets Partsocop. Ñeñto'marña ñapa' e'ñe ña tsa'tuerraya allohueney acheñeneshay yo'chñar allempo ashataretta e'ñe ña po'rras. Attoña e'ñe a'poçtaterrnay yo'chñar Yomporesho.

18 Ñapa' atarr mueroçhtosa allempo huapoñe't topateñets; ñeñtpa' attoch a'ypo'ñereñ Pompor. Ñeñto'marña te'pa' e'ñe puellcapreteñoŕey ya ñapa' e'ñe eñoteñ o'ch yenpa'y attoch ahuamencat pŕonay yeyoçher allochña pa' amach

alla a'puerrataterrye topateñets ñeñtcha' allpon yehuapoya yama.

3

Jesús ñeñt Yompor Puechemer ña metanene' ama't Moisés atto atarr sherben ña

1-2 Ñehua, masheñneshacha' ñaña noçhaneshacha' sapa' ñeñtes o' sa'cohuentataretterra Partsocop ñeñtes o' chore'terres Yompor o'ch çhapaterres all pue'ntaño. Te'pa' o'ch notas, o'ch soctape'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompom. Ñaña ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pompom acheñeneshacop atet pe't ñaña Moisés ñapa'çho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquëll penanet Yompor.

3 Ñehua, yeñoteñ ñerra'm eñall puepahuarr pocoll ñeñt tomatenet e'ñe cohuen aña'ña atarr cohuen yenten ñeñt tomatene'. Amachña aña cohuen yenteno pocoll tarro'mar pocollpa' ama ñofaye' cohuenteno; eñallca'yeña pamo'mte' ñeñt a'cohuentatene'. Attecmach yeñch ñaña Jesús atarr cohuen tarro'mar ñapa' atto ame'ñatana shonte' ñeñtcha' pueyochrenesha' pa' Pompom attoña tomatosan ñaña pocoll ñeñt atarr cohuen ñeñtcha' pa'paquëll pen Pompom. Moiséspa' amachña ñañeña atarr cohuen yenteno tarro'mar ñapa' ama ñaye' tomataye ñeñtcha' pa'paquëll perr Yompor.

4 Ñehua, yeñoteñ allohuen pocollpa' ama ñofaye' yeçhquëno; çhocmaca'yeña eñall ñeñt yeçhcatene'. Ñeñt yeçhcate' esocmañen ñeñt eñalleyetsa ñeñtpa' Yomporña yeçhcatuahue'.

5 Aña Moiséspa' e'ñe cohuen etsotan ñeñt atet yechya Yompor; ñeñtpa' o'ch es eñotatyesan acheñenesha' tarraña ñeñtpa' toma'nteñtsa. Tsapatoneña Yomporpa' o'ch eñotaterranet ñeñt e'ñe eñotoçhen. Ama't e'ñe cohuen etsotenaneñ Moisés allohuenacop ñeñt pa'paquëll pen Yompor allempo, tarraña ñeñt atto sherbenan Yompor pa'paclopa' ñapa' atta pueñañra peñ Yompor. Amaña Puechemereye'ña peñe.

6 Ñapa' aña'yeña Puechemer pen Cristo ñeñtcha' sherberrets tsapatonet allohuenacop ñeñtcha' e'ñe pa'paquëll perr Pompom. Ñapa' e'ñe cohuen etsoterran ñeñt e'ñe Pomporecop. Allohueneypa' e'ñe pa'paquëll pohueney

Yompor allcha' yeçhena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñĩ o'patatena.

Yomporpa' e'ñech cohuen amesaterran pueyochreshachno ñeñĩcha' e'ñe cohuen ame'ñerraya attoch e'ñe cohuen cosherret

7 Ñeñto'marña Parets Puecamquẽñoõpa' atet oten all aque-llcaret Yompor po'ñoño ñeñõpa' atet oten:

Ñerra'm se'mueñ Yompor atto çhore'tenes te',

8 sañapa' çhochña se'mñoch, amachña çha se'charrtatatsto seyoçher. Amach çha satpare'tatsche atet pe't israelne-sha' ahuaat allempo chopeñe'chyesete't amayo. Allñapa' epaye' atsrre'moçhtana'tyesnete't.

9 All amayo satañneshaññapa' atarr topatnete't atto'ch eñotnet po'ñoçho'te' atsa'tatañen. Ñetpa' atet pa'yesnete't ama't çhocma entyesonete't ñeñĩ norrtatyesanete't. Pa'tatsoch çharra' charohua entyesonete't ñeñĩ çhocma negatyesanete't.

10 Ñeñto'marña napa' atsrre'moçhen nentyesanet, napa' atet not: "Ñeñĩ atet cotape'chenet pueyoçhro ñeñĩ ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeñĩ cohuen nenten na."

11 Atarr atsrre'moçhen nentanete't. Ñeñto'marña atet not ñocpuet: "Ñetña po'ñoçh ama't ahuaatapa' amach neçapaterraneto allcha' pocsheñeshoõpa' o'te' amesapreterrnetañ." Ñeñto'marña ñocpuetpa' atet nena' neñoñ e'ñe na neso'chño.

12 Ñeñto'marña masheñeshacha' ñaña noçhaneshacha' te'pa' o'ch notas saña, e'ñech señota seyoçhro atet soctape'chyen e'ñe puesheña'ttsos, ñato'pa' amate' cohuenaye' soctape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñoçh atet sepenapa' ñeñõpa' ñeñĩtach sequeçpaterre' Yompor ama't ñeñĩ Yomporer ñeñĩ ama arromñaeshayaye.

13 Sapa' e'ñepa'chña cohuen soctape'chatanna'tnoma pate'tets yet tayepa'tñapa' orameñ yet allempoteñ o' çhore'terrey Yompor. Attochña so'chñarpa' amach errotenot alla shequẽrrserro. Attoch amach çha se'charrteno seyoçhro allochñapa' amach alla satpare'tere Yompor, ama't e'ñe puesheñarrotesa.

14 Allo'nepa'chña e'ñe huomenc yeõa'nom yeyoçher. E'ñepa'chña yeyoçhrocmañen yeyemteña Cristo atet yeõa' allempo e'ñe errtey ame'ñenaya. Ñerra'm atetcha' yeyemuetnonña allempopa' yagapapretercha' Cristo ñeñĩ o'patateña Pompor.

15 Ñeñto'marña o'ch alla neyerpaterrserri ñeñt atet oten Yompor po'ñoñ ñeñt aquellcaret ahuatoteñ, ñeñtpa' atet oteney:

Ñerra'm se'mueñ Yompor atto chore'tenes te' sañapa' chochña se'mñooh, amachña cha se'charrtatatsto seyo'cher. Amach cha satpare'tatsche ñeñt atet pe't israelnesha' ahuat allempo chopeñe'chyesete't amayo.

16 Ñaña te'pa' o'ch neyerpaterrserri ñeñt atpare'tyesaye't Yompor allempo puechore'teño'tpa' eñorana'tanete't, ñetpa' ñeñtareta ñeñtet cha'nma'cha'taterr Moisés Egipto't.

17 Ñaña o'ch neyerpaterrserri, ñeñt atarr atsrre'mo'chen entyese't Yompor ahuat ama't pa'tatsoch charra' charohua, ñetpa' ñeñtareta ñeñtet atarr ochña'tare'tatsete't. Ñeñto'marña ñet allempopa' e'ñe alla colla'huet amayo.

18 Ñaña o'ch neyerpaterrserri, ñeñt otarettatsa allempo ñetpa' ama't ahuatapa' amach amnataretterreto attoch pocsheñesho'tetpa' o'te' amesapreteretañ Yompor, ñeñtpa' ñeñtara ñeñtet atarr atparña'tatsete't. Ñeñt atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ.

19 Attoña yeñotenanet ñetpa' ama't puesheñarro'tetapa' amach eshcaye' chapueto allcha' ye'cha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

1 Ñehua, Yomporpa' po'ño'ch oteney ye'chapcha' allcha' yamesapretera allcha' e'ñe cohuen yocsha'huera Yompor ñerra'm po'ño'chcha' yame'ñera yaña. Tayepa'tña'pa' orameñ atet oteney yaña e'ñe yem'cha'naño'tpa' yame'ñyepa'ch te't puesheña'tso'tespa' amate' se'cherro saña all.

2 Tarro'mar ñeñt atpare'taye't all amayopa' aser-rpare'tatarettetaña cohuen ñoñets Yomporesho't tarraña ama huenetoña patparñet tarro'mar ama't e'metaña'pa' ama eseshaye' ame'ña'pahuoye' entaye. Yapa'cho'ña o' serrpare'taterryet yaña cohuen ñoñets Yomporesho't.

3 Ñeñtey'cha' e'ñe po'ño'ch ame'ñerraya Yompor ñeñtey'cha'ña cherrets allcha' yamesapretera allcha' e'ñe cohuen yocsha'huera Yompor. Ñeñtña' ama ame'ñetsopa' ñetpa' amach esesha' cherretso allcha' coshapreteret Yompor. Ñeñtpa' e'ñe attecma ñeñt atet otare'tta ahuat ñeñt ama ame'ñatso. E'ñe atet oteney Yompor po'ñoñ all aquellcaret, ñeñtpa' atet oten Yompor:

Atarr atsrre'mo'chen nentanete't ñeñto'marña atet nena' neñoñ ñocpuet: "Ñet po'ño'ch ama't ahuatapa' amach ne'chapatteraneto allcha' amesapreterrnet allcha' e'ñe cohuen cosha'huerrnetañ."

Attoña ñetpa' amach eseshaye' çhertso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allempoteñ ye'chcatuahuan pats ñaña enet. Ñeñña ameseñetspa' atarr coshateney yeyo'chrocmañen.

⁴ Tarro'mar all po'ñoño yeñoteñ atet aquellcare't, ñeñtpa' atet oten:

O' ye'chcatuan Yompor allohuen ñeñt allpon ye'chcatyesua, po'can'cherrmatñoña' o' ames Yompor.

⁵ Tarraña po'pocheño all oterrerr Yompor po'ñoñ ñeñt aquellcare't, ñeñtpa' atet oten:

Ñeñt ama name'ñenayopa' amach eseshaye' çhertso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeñoteñ ñeñt e'mayeñ ahuat cohuen ñoñets ñetpa' amach eseshaye' çhertso allcha' amesaterranet Yompor attoch e'ñe cohuen pueyo'chrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ño'ch ame'ña'po' enterre', attochña ñetpa' çherretcha' allcha' e'ñe cohuen cosherret.

⁷ Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' çhap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esepoch se'mueñ Yompor atto çhore'tenes sañapa' çhochña se'mño'ch tayepa'tña orameñ yet allempo o' çhore'terres Yompor, amachña cha se'charrtatatsto seyocher.

⁸ Ñehua, yeñoteñ Josué ahuatpa' e'ñe çhapatan israelnesha' puechemereshachno all patso ñeñt all sechete't ahuatoteñ allcha' ye'choset. Tarraña ama't çhapatanetañ allpa' ama eseshaye' pocsheñesho' pueyo'chrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyo'chrohuen.

⁹ Ñeñto'marña yeñoteñ te'pa' eñallmeñ ñeñt o'patatenya Yompor ñeñtey pueyochresha' pen allcha' e'ñe yoc-

sheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cançherrmatño.

¹⁰ Tarro'mar allohuen erra'tsencha' çherrets allcha' amesaterranet Yomporpa' ñetñapa' amach alla es llecater-rahuetete; e'ñe pameseño'tet cohuenpa' e'ñech eñmattered pueyoçrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames.

¹¹ Yapa'cho'ña añepa'chña ye'nen attoch yeçherr yamã allcha' amesaterrey Yompor attochña e'ñe yocsherra yeyoçhro. Te'ñapa' ama't puesheñarrofeyapa' amuepa'ch alla yatpare'terre'te te't ama yeçherro yamã all.

¹² Yompor erro't oteney, po'ñoñpa' atarr ahuaamencat ñeñtpa' ama ahuañañafe. Ñeñt po'ñoñpa' e'ñe atet etsotenan ñeñt atet muenen ña. Po'ñoñpa' allo çhocma ñerra'mrrate' cochell ñeñt atarr etsotañtare't emoto'mar. O'ch es yepata' allopa' e'ñech be'tosua ora, e'ñech pecha'tañpesuoñ ama't posapohuen. Atetca'ye penaña Yompor po'ñoñ e'ñech çhaponaya e'ñe yeyoçhro ama't e'ñe yecamquëñohuen, ñeñtcha'ña e'ñe yeñotatterre' ñeñt yeyoçhro'tsen ama't ñeñt allpon yoctape'chyen ora esocmañen.

¹³ Ama't puesheñarrofeya amach erro'teno't ye'potañpesyoña Yompor ñeñt yeyeçhcate'. Amate' erro'teno't ya'nasotañpesyoña, ñapa' e'ñeca'ye entuennayña yeyoçher ñeñt ora allpon es yoctape'chyen. Ñapa' ñach ya'metatatuerre' allohuen ñeñt allpon yoctape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

¹⁴ Ñehua, yeñoteñ eñall ñeñt Yecorneshar yepen ñeñt atarr Partseshatets, ñeñtpa' ñeñtara Jesús ñeñt Yompor Puechemer. Ñaña'pa' o' alla çherr allohuanen pue'ntaño e'ñe all Pomporesho, allña e'ñe cohuen a'poctatennay yocop. Ñeñto'marña yapa'cho'ña allo'nepa'ch yeyemuetneña. Amuepa'chña yequeçhpatstere.

¹⁵ Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'cho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ñano ñeñt ama pocteye' enteno Pompor.

¹⁶ Ñeñto'marepa'chña e'ñe yeyemteño't Yompor Puechemer, amach yemcha'naño'teye' yeçhore'teñe Yompor ama't ñeñt atarr partsotets po'conaño. E'ñe puemuereno'tey e'ñech cohuen e'mñoteny, çhocmach yenpueny. Ñaña

ñerra'm esempo huennaya ñeñtcha' yelcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt pa'nicha'tareter pen ñeñt corneshatyets judioneshacop, ñeñtpa' acheña, arromñaña. Ñapa' añecop acraretta ñach anarettatsa attoch eñen acheñenesacop Yomporesho. Allempo es apueñet Yomporpa' ñach anene' o'pono Yompor pa'paclo. Allempo muetsenet payara ñeñt allo sherbeñet Yomporpa' ñach nene' eyarra po'rras allo tsa'tenana pueyochresha'chno po'chñar.

²⁻³ Ñapa'cho'ña ama huomencaye' enteno pueyo'chro tarro'mar ñapa' arromñaña ñeñto'marña ama e'ñe pueyochreshacpayaya nenanoña eyarra po'rras; ñeñtpa' ñocpa'ñaña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyo'chro ñeñto'marña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo ye'chcatenet ñeñt sosey enten Yompor tarro'mar amaña e'ñe ñeñña neneto pueyo'chreto; 'chocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañeña attoch corneshat Partsocop. Ñeñtpa' Yomporña 'chore'tene' ama't erra'tsena puesheñarr ñeñtcha'ña corneshatats. Atet pa' ñaña Aarón, ñapa' Yomporña ne' atto corneshate't Partsocop.

⁵ Cristopa'cho'ña attecma pa' ñaña ama ñaye' otatso, "napa' nach corneshatats." Pomporña ne' ñeñtcha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt aquellcaret ahuat ñeñtpa' atet oten:

Papa' Nechemerep, te'ñapa' o'ch neñotach acheñenesha' po'ño'ch pa' Nechemer nepene'p tarro'mar te'pa' o'ch nena'p pa'ch añcha'tare'ttertsa.

⁶ Po'poñ aquellcare'topa' all otererr:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatate't ahuat.

⁷ Allempo allo'tsenmeñ Cristo arr patsropa' ma'yocham'psa ñañeña. Ma'yocham'psa e'ñe huomenc puellquëñesha'. Pueya'chpeñesha' enaman Pompor ñeñt atarr ahuamencatesha' attoch a'queshpach puerromueño'. E'ñe pon'cha'na'teñoñan Pomporpa' atet och: "Amach añeye'

atet peṣatstono ñeñt nemnen na; añcha'ña atet peṣon ñeñt pemnen ṣa." Ñeñto'marña Pomporpora' e'ñe e'mñoch.

⁸ Ñehua, Cristo ama't e'ñe Yompor Puechemerpa' ñapa'cho'ña atarr mueroçhta, attoña e'ñe yeçhan attoch e'ñe cohuen e'mñnotenán Pompopor.

⁹ Atto yeçhan pue'mñnoteñpa' ñeñto'marña e'ñe etsotuan ora attoch a'queshṣatañta, allochñapa' attoch a'queshṣaterran e'ñe poctacma allohuen erra'tsencha' e'mñnoterre' ña.

¹⁰ Ñeñto'marña Pomporpora' ne' ñach corneshaterrets Partso-cop e'ñe atet corneshate't ahuat Melquisedec.

Ñeñt ama huomencaye' penaye pueyoçher Yomporecop çha ottena ñerra'm ematoll

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseñpa' atarr torrapo' o'ch neçhapatonas seyoçhro tarro'mar te'pa' o'huañ tama semne' ama't erra'tsenapa' o'ch se'mñnoteñ.

¹² Sapa' ahuatoteñ same'ñenañ ñeñto'marña te'pa' so-coppa' añ poctetsañ o'ch seyçhatyeseñ po'potantañeçhno ñeñt allpon shonte' señotyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yeçhaterrseterr Yompor po'ñoñ ñeñt yeçhatuaset e'ñe ñenmañ ama't ñeñtpa' ama torrapahuoyaye yocop o'ch yeñoch. Sapa' ama huomencaye' sepeno seyoçher tarro'mar sapa' çha sottena ñerra'mrrate' ematoll ñeñt añach orren pachor pomosos ñeñt ama etsotenana' o'ch rran rreñets ñeñt yerren ya.

¹³⁻¹⁴ Ñaña yeñoteñ allohuen ñeñt añach pocrrañ pen pomosos, ñeñtpa' ematolla ama eñnotenana' o'ch e'nan rreñets ñeñt çhocma yerren. Ñaña ñeñt ottetsa ñerra'mrrate' ematollpa' ama eñnotenanoña Yompor po'ñoñ attoch pocte' eñch Yompor. Tarraña ñeñt po'ñoçh atet enten Yompor ñerra'mrrate' po'nanesha' ñetpa' e'ñech eñnotenet ñeñt pocte' enten Pomporet ñaña ñeñt ama pocteye' enteno; tarro'mar ñetpa' ahuatoteñ ame'ñeret Pomporet. Ñeñto'marña ñetpa' allo'na senet etsotnomuet Yompor po'ñoñ ama't ñeñt atarr echarr ñeñtña e'ñe pocrrañ penet.

6

¹⁻³ Allo'nepa'ch yesen e'ñe yeçha'nmue' Yompor poctañña ama't ñeñt atarr echarr. Allochñapa' yepeñoç atet muenen ñapa' e'ñech po'n enteneyña Yompor. Ñehua, sapa' o' e'ñe seyçherr ñeñt ñenmañ yeçhataset Cristocop, attoch sequeçpa'huerrña ñeñt atet seyeçcatyeseñ ñeñt ama a'queshṣatañeyaye. Añca'yeña o' ello soctape'çherr cohuen

Yomporecop čhoca'yeña o' same'ñera. O' señoterr ñaña ñeñt atet yapatarettena Yomporecop, ñaña atto čhocma yenen yot ñesheto ñeñt ame'ñatsa. Ñaña o' sa'yčhataretterra attoch yetanterra ñaña attoch esempohuañenpa' ya'craretterrach allohueney errotencha' entyesuerrey Yompor, ñato' cohuenta' yeþa'yen, ñato' amate' cohuenaye'yepeno. Ñeñt o' yečhatuanmaset ahuañoñeñ Cristocoppa' amachña ñeñtaña alla seserrpare'tame'terre'te. Añcha'ña allo'nepa'chña yesen eñotnomue' po'poñečno Yompor počtaþña ñerra'm Yomporcha'yemnate'.

4-6 Tarro'mar yeñoteñ ñerra'm esesha' o' čhapoña pueyočhro ñeñt cohuen enten Yompor ñaña ñerra'm o' agapan Yompor ñeñt apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquēñ ñaña ñerra'm čho yomenana Yompor po'ñoñ ñaña ñerra'm eñotuanman Yompor po'huamenc ñeñt ama ahuañañafeyaye, tarraña ñerra'm o'ch alla puerrerret, ñetpa' amach errotenot alla yotape'chaterranete'te attoch cotape'cherret etserra cohuen Yomporecop. Tarro'mar ñeñt acheñerpa' añ toma'ntena ñeñt atarr muenene' o'ch alla corso'tamþerranerr po'pocheño Yompor Puechemer; attoña o' alla achñare'tererr allo'tsa'yen shonte' acheñenesha'.

7 Ñeñt atet petsapa' o'ch netma'ntacha ñeñt atet pena pats. Ñehua, allempo e'ñe cohuen huapotamþsatenan Yompor pats ñerra'm o'ch chepares pa'namen narmetsočno ñeñtcha' coshatene' pamo'mte' ñeñt nare'tene', Yomporña čhocma a'torene' ñeñt pats esheccha' pa'namen yečquętsa all.

8 Tarraña ñerra'm aña cheparsats pa'namen ajačno ñeñt ama cohuenayaye, ñeñtña patspa' amach es sherbeno. Yomporeshotpa' arrnomaretterrach attoch a'poyaretterra.

Atto e'ñe yeyemteñoñ Yompor čhocmach yecuen ñeñt o'patatyenya

9 Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña neñotenes sapa' o'ch alla sorrtatyerr e'ñe cohuenare' ñeñt atet orrtatyen allohuen ñeñtcha' qeshperrtsa.

10 Tarro'mar Yomporpa' e'ñe pocte' es pennay. Ñapa' čhocma po'ñočh entenes ñeñt atet setorra'yena ñocop ñaña atto semorrenteññaña allohuen ñeñt pueyochresha' pen Parets. Ñeñto'marña e'ñe same'ñeñoñ ñapa' e'ñe cohuen seyenpa'yen allohuen masheñneshachno ñeñt pueyochresha' pen ña, ama't teme'ttsen attecma sepena.

11 Añña atarr nemnen ama't allohuenespa' allo'nepa'chña sesen orrtatyesnomue' ñeñt cohuen enten Yompor, e'ñechña

socsheñeshocmañen sorratyesuanom allohuen ñeñt cohuen enten Yompor e'ñe atet socsheñoť chocma seyempa'yeñ ñeñt pueyochresha' pen Parets. Attoña e'ñe seyemteñoť Yompor secuen ñeñt o'patatenya.

12 Attochña amach čha sečllatsto Yomporecop, ańcha'ña sepena samña ñeñt atet řa'yena po'potantañečno ñeñt pame'ñeñoťet Yomporpa' ama't erroťuaneno'tsa'yenet řetpa' čhocma ahuanta'huaneñet. Attochña e'ñe o'patueññañet Yompor ñeñt oteney Yompor ñeñtcha' aphuerrey.

13 Tarro'mar yapa' yeñoteñ čhocmach aphuerrey ñeñt atet oteney. Nehua, yeñoteñ Yompor ahuatpa' atet otane't Abraham ñeñtcha' atet perrñañ tsapaťonet po'mrenñecop. E'ñe ñañaña pa'so'chño atet otan Abraham tarro'mar ama eñalle po'poñ ñeñt atarr ahuamencatesha' atet ñerra'm ña allcha' a'pocťatan po'ñoñ.

14 Ñeñto'mar e'ñe ña pa'so'chño atet otan Abraham: "Na po'ñočhpá' atarrcha' nebensare'tamřsař attochña na'mraterrnař ñeñtcha' pemřeneñ peperr."

15 Ñeñto'marña Abrahampa' e'ñe pueyemteñoť Yompor po'ñoñ atet oteñ ñapa' ama quečhpueñe, čhocma cohueñan ñeñt atet oteñ Yompor. Ñeñto'marña Abrahampa' po'ñoč agapater Yompor ñeñt atet oche't ahuatoteñ.

16 Nehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ñočh, řetpa' o'ch otenet e'ñe añ pa'so'chño ñeñt atarr ahuamencatesha'. Ñerra'm atet penetpa' attoña eñoteñet ñeñt ñoñetspa' o' anareťta, o'huańcha' allo'na otnare'tanna'tnenet po'ñoño'maret.

17 Yomporpa'čho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñeta'mřerryeña po'ñoñ, allohueney ñeñtey o'patatena ñeñt atet oteney o'ch apuerrey.

18 Ñeñto'mar yeñoteñ Yomporpa' e'ñe epoch eñotateney e'ñe po'ñočh atetcha' perrnay, ñaña Yompor po'ñoñpa' ama čhoje' shequēnye. Ñeñto'marña e'ñe yeyemteñoť ñapa' yeñoteñ po'ñočhpá' a'quesřpatuerreycha' ñeñt atet oteney. Ñeñto'marña yecueñ ama't allohueney ñeñtey e'nene' ña ñachña ya'quesřpatuerre'.

19 Ñeñto'marña yeñoteñ ñeñt yecuen ya o'ch a'quesřpatuerrey Yompor ñeñtpa' e'ñe po'ñočh, ñeñt ama ahuañañayaye. Ñeñto'marña yeñoteñ e'ñe yeyemteñoť ña yecamquēñña' e'ñe cohueno'tsen amach erroťenoť chenquērro. Yeyemteñoť Yompor ñeñtpa' añ toma'ntena ñeñt orrene' barco oño ñeñt otenet ancla. Allochña barcopa'

amach errotentō chenco. Ñeñt atto yeyemteña Yompor ñeñtña anclatetsña yecamquēñecop ñaña ñeñtpa' e'ñe po'ñoçh allo e'ñe huomenc orrena yecamquēñ tarro'mar ñeñtpa' Yomproshot anaret e'ñe allohuanen ñeñt allo'tsen Parets pa'paclo pue'ntaño, e'ñe allohuanen allo'tsen besom allo yottampeññañet Parets po'poner. Allca'yeña anarettenaña ñeñt toma'ntenaya ancla atto ya yeyemteña Yompor.

²⁰ Tarro'mar e'ñe all Partshopa' allña o' çherrña Jesús ñeñt o' otamperrya allcha' a'pocatosnay e'ñe cohuen yocop Pomprosho. Allñapa' o' corneshatuerr Partsho. Atto o' corneshatuerr ñeñtpa' amach huañerro ama't errponaña. E'ñe atet o' allsensare'tterra o'ch corneshatuerr ñerra'mrrate' atet corneshate't ahuat Melquisedec.

7

Jesúspa' atarr cohuen corneshatos Partsocop atet corneshate't ñaña Melquisedec Partsocop ahuat

¹ Ñehua, te'pa' o'ch alla neyerpaterrsa ñeñt atet pe't ñeñt corneshatate't ahuat ñeñtpa' añ pa'so'cheñ Melquisedec. Ñapa' ñeñt corneshatate't Partsocop ñeñt atarr partsotets. Ñaña ñapa' ñeñt amcha'tarettate't all anetso ñeñt pa'so'cheñ Salem. Allempopa' correna ñaña yatañ Abraham. Parrochña Abrahampa' ahuo' allcha' quellarenana' po'potantañeçhno ñeñt amcha'tare'tetyetsa allo'mar. E'ñe a'mchechuahuananeta'pa' huerra. Allempo err, toñopa' all poctapueñ cornesha' Melquisedec. Allña pocteñpa' allenta bensare'tam'psapuenan Abraham.

² Ora ñeñt allpon yoram'psan ñeñt o' quellara'huenapa' allempoña Abrahampa' aphuenan cornesha' Melquisedec allpon ñeñt Partsocop. Allpon aphueñpa' ñeñtpa' ñeñt allpon otenet la décima parte. Ñeñtpa' atet ñerra'm es eñall ñeñt yechen çharrapa'ttsoçma, pate'tetsña'pa' o'ch yeneñ e'ñe Partsocop. Ñehua, ñeñt so'chñetser Melquisedecpa' añ otenet "ñeñt pompor pen allohuen amcha'tareteçhno ñeñt e'ñe pocte' enten Parets." Allo'tpa' ñaña ñapa' arr amcha'tarettena anetso añ pa'so'cheñ Salem. Ñeñt anetser pa'so'cheñ añ otenet "muecheteteñtsompañño" tarro'mar all amcha'tarettena ñapa' ña orrtatene' e'ñe cohuen morrentanna'teñets attoña yechenet e'ñe cohuen muechet.

³ Ñeñt Melquisedecpa' ama eñotpahuoyayeña ñeñt pompor pe't ñaña ñeñt pachor pe't tarro'mar ama aquellcareteyaye ñeñt pa'so'cheñ. Ñaña ñeñt pa'tañneshañ pe't ñeñtpa'çho'ña ama eñotpahuoyaye. Ama't ñaña allempoteñ eñalleta Melquisedec ama't ñaña allempo rroma ñeñtpa'çho'ña

ama eñotpahuoyaye. Ñapa' tarro'mar atet pe't añ toma'ntena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errponaña.

⁴ Señoche'ch cornesha' Melquisedec ñapa' atarr sherben. Ama't yatañ Abrahampa' chocma es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yorampsan ñeñt o' quellara'huenta'. Allpon aphueñ ñeñt atet ñerra'm cho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttso'cma, pate'tetsña'pa' o'ch yeneñ e'ñe Partsocop.

⁵ Ñehua, yeñoteñ levína'tarnesha'pa' ñeñt'ena'tarña anarettatset' judioneshacop ñeñt'cha' corneshatets Partsocop. Ñocpuetña nanña Moisés po'ñoñ, ñeñt'ña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttso'cma, pate'tetsña'pa' o'ch yeneñ e'ñe Partsocop (ñeñt'ara otenet diezmo). Ñeñto'marña chocma cobreñetña pamo'tsesha' ama't e'ñe ñeñt'ena'tarecmuet, tarro'mar Abrahampa' ñeñt'ara pa'to' pohueñet allohuenet.

⁶ Tarraña Melquisedec ama't ñapa' ama levína'tarneshayaye ñaña'pa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñt'cha' ap' Partsocop. Elloña bensare'tam'penan Abraham ama't Abrahampa' o' otue Yompor ñach bensare'tam'pse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.)

⁷ Ñehua, yeñoteñ po'ño'ch ñeñt atarr nanac am'cha'tarettetsa ñapa' ñachña bensare'tam'pene' po'potantañe'chno ñeñt ama tama am'cha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't am'cha'taret Abrahampa' ñapa' ello bensare'tam'peñ.

⁸ Ñeñt yenten arr patsro ñeñt corneshatets Partsocop, ñetpa' arromña'ot'a atet penet. Tarraña ama't arromña'ot'a atet penet chocma aguëññañet acheñenesha' ñeñt apa'yenet Partsocop. Melquisedecpa'cho' ñaña agapaye't ñeñt apa'yese't Partsocop. Tarraña Melquisedec ñeñt atet anaret Yompor po'ñoño ñocop ñeñt'pa' atet oten ñerra'mrrate' ñapa' ama arromña'eshayaye.

⁹⁻¹⁰ Ñehua, ñato' o'ch yot Leví ama't allohuen pue'ñareshohuen, ñeta'naña agapam'psanet Melquisedec ñeñt allpon apueñet Partsocop e'ñe allem'pocma agapan ñeñt ap' Abraham Partsocop. Ama't ama eñalletena' Leví allem'popa'te'pa' o'ch yot ñapa' e'ñe pa'to' Abraham po'chtso'tsen

allempto, allempto pocten Melquisedec. Ñeñto'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partsocop, ñeta'netepa'tña cobra'ña allempto Melquisedec. Ñeñto'marña yeñoteñ Melquisedecpa' atarr sherben, ello metana'tuenan levína'tarnesha' ñeñt corneshatyets Partsocop.

11 Ñehua, yeñoteñ ahuat allempto aparetta israelnesha' ñoñets ñeñt atet anaret, ñeñtpa' añ orrtate' levínesha' ñeñt corneshatyestset ahuat Partsocop. Tarraña añ ñoñets ñeñt orrtat cornaneshachno ñeñtara levínesha'pa' ñeñtpa' amach errotenot a'cohuentaterranetoña Yomporecop. Ñerra'm po'ño'chcha' a'cohuentatenyeñ amate' eso'mar huapoña Cristo ñeñtcha' corneshatosets ello ñeñt atet corneshate't Melquisedec, ñeñtpa' ama atteye' corneshatoso ñeñt atet corneshaten Aarón ñeñtara levína'tarnesha'.

12 Ñehua, yeñoteñ ñerra'm esempo Yomporpa' orrtaterran po'psheñeñ ñeñtcha' corneshaterrets po'poñone't, yeñoteñ añ ñoñets ñeñt atet anaret ñeñt orrtat cornaneshá levína'tarnesha' ñeñt ñoñtsorpa'cho'ña o'ch cha po'poñetuerr.

13-14 Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoro't eñalleta, ñeñt po'poñ mereñtsor ñeñtara israelena'tar. Ñetpa' ama anaretēyayeto o'ch corneshatet Partsocop ñeñt atet anaretta levína'tarneshacop. Moiséspa' ama esoye' sochaneto ñocpuet ama't puesheñarroña attoch corneshatet. Ñaña ñetpa' ama't puesheñarroñeta ama eseshaye' tetso altaro allotecma sherbeñet Parets.

15 Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempto orrta Cristo, ñach corneshaterrets atet anarette't Melquisedec. Ñapa' ama atteyaye ñerra'mrate' atet anarette't levína'tarnesha'.

16 Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anarettenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñatēshayaye ama't errponaña.

17 E'ñe Cristocop eñotateney añ ñoñets ñeñt atet anaret Yompor po'ñoño, ñeñtpa' atet oteñ Pompor:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatset ahuat.

18-19 Ñeñt ahuatoteñ ñoñets ñeñt atet nonaye't Moisés ñeñtcha' atet ye'pohueneñ ñeñtña te'pa' o'huañcha'

ye'cua'per tarro'mar ñeñt'pa' ama eñalle po'huamenc attoch ñeñt'cha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrterranya po'poñ ñeñt'ñapa' ello atarr sherben ñeñt'cha' ya'cohuentaterre' Yomporecop esheccha' ye'cherr Yomporecho ñeñt'cha'ña atarr yeyemterraña te'.

20 Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen.

21 Po'potantañe'chno ñeñt' corneshatyets ñeñt'ara levína'tarnesha' allempo acornesha'tare'tetyeset ñetpa' ama Yomporeye' nahueto pa'so'chño attoch corneshatyestet. Tarraña Cristo allempo allsensaretta attoch corneshatos, ñeñt' eñoraten Yompor Cristocoppa' ñeñt'ñapa' atet oten:

Yompor o' nan po'ñoñ e'ñe ña pa'so'chño ñeñt'o'mar amach errotenot a'po'poñetuerrano po'ñoñ; (ñeñt'pa' atet ot Cristocop): "Papa' attoch pecorneshaterrpa' ñeñt'pa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt' corneshatate't ahuat'."

22 Ñeñt'o'marña Jesús'pa' eñotochtaterrnay po'ño'ch atto Yomporpa' a'pocataterrnay etserra ñeñt'ña atarr sherbets, ello o' metana'tuerran ñeñt' atet a'pocatonaye't ahuat'.

23 Ñeñt' ahuatoteñ cornaneshachno ñeñt'ara levína'tarnesha', ñetpa' epaye' shonta'nmuet tarro'mar chocmach rromayesete't attoña o'huañcha' allo'na corneshatyenesenet. Ellopa' o'ch'cho' huapa po'psheñeñ ñeñt'ara levína'tar ñeñt'cha' alla corneshaterrets. Ñeñt'o'mar epaye'shonta'nma ñeñt' corneshatyenesnomtse't ahuatoteñ.

24 Tarraña Cristopa' errponañohuencha' corneshaterr tarro'mar ñapa' ama arromñat'eshayaye.

25 Ñeñt'o'mar Cristopa' ña eñotene' attoch chocma a'queshp'atenan allohuen ñeñt' e'nene' Yompor ñerra'm e'ñe pueyemteño'tet ña, tarro'mar ñapa' chocma allo'tsen Pomporesho allecma a'pocatatennay ñeñt' e'ñe cohuen yocop.

26 Ñeñt'pa' e'ñeca'ye pocte'ña yocop o'ch yechen Yecorneshar ñeñt' Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñt'cha' a'sosyatene'. Ñapa' o' so'huanerran allohuen ñeñt' cotene' sosya'tsañ o' alla cherr allohuanen Yompor pue'ntañño allña partsotapretenan Pompor.

27 Ñapa' ama atteye' p'oso ñerra'm po'potantañ cornaneshachno ñeñt' ahuatoteñ. Ñet pate'tets yetpa' epaye' muetsete't payara'chno; ñeñt' eyarra po'r'raspa' alloña peretnatane'tña cornaneshachno po'chñar. Ellonetpa' o'ch peretnateñet ñaña allohuen acheñenesha' po'chñar

ñeñtara eyarra po'rraso. Tarraña Cristo ñapa' e'ñe parrocha shatan e'ñe ñañeña po'rras allohuenacop ochñartsocop allempo rroma yocop e'ñe ña puemnenñot; ñeñtpa' attoña tsa'tuernaya yo'chñar Pomporesho.

²⁸ Moisés ñeñt atet nan ñoñets ahuatpa' ñeñtpa' acheña na'yesh ñeñtcha' corneshatysets atteta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es pa'yets Partsocop; ñeñtpa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúspa' ña a'pocatañtertsa e'ñe etserra yocop

¹ Ora allpon ñeñt o' notuanmas ñeñtpa' e'ñe po'ñoñ atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenrot all anen po'conaño all pue'ntaño. Allñapa' o' alla partsotuerr ñaña.

² Allñapa' o' atarr sherba'huerr e'ñe allohuanen Parets po'prahuo all e'ñe po'ñoñ allo'tsen Yompor. Ñeñtpa' ama atteyaye ñerra'm patso'mar puerahua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntaño.

³ Yeñoteñ allohuen ñeñt corneshatets Partsocop, ñetpa' añecopña anarettenet attoch ñetcha' es apuenet Yompor ñaña ñetpa' o'ch muetsenet payaraçhno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñtpa' añe apuerran Pompor e'ñe ñañeña po'chets attoch rroma yocop.)

⁴ Ñehua, ñerra'm ñapa' allo'tsenaraña añe patsropa' ama't mamesha amate' pocteye' enteññeña ñeñt cornaneshatyets añe patsro, tarro'mar ñetpa' añach e'ñe cohuen entenet o'ch es apueñet Yompor ñeñt e'ñe atet nanete't Moisés po'ñoñ.

⁵ Ñeñto'marña yeñoteñ ñeñt atet sherbenet ñet ñeñtpa' atta toma'nteñet ñeñt atto po'ñoñ Cristo e'ñe cohuen sherben Parets po'prahuo ñeñt pue'ntaño'tsen. Añach sherbenet ñeñt attema'ttetsa ñeñt e'ñe po'ñoñ atet muenen Yompor. Yeñoteñ ñeñtecma sherbete't tarro'mar ahuat allempo Moiséspa' ahuo'ch tomataneñ ñeñtcha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntaño'tsen. Allempoñapa' atet otan Moisés: "Po'ñoñcha' e'ñech atet peyeçhcaton ñeñtcha'

neprahua' neṣa' añ patsro allcha' yeḥhena Necamquēñ." Arrpa' allohua atet otan Yompor Moisés.

⁶ Tarraña Cornesha' Cristo te' atto sherberr all pue'ntaño, ñeñtpa' e'ñe po'ñoḥ poctacma cohuen. Ello metana'tuenan ñeñt atet sherba'yese't ahuatoteñ cornaneshachno arr patsro. Tarro'mar te' ñeñt atet o' a'poctaterrnay Pomporeshopa' ñeñña e'ñe poctacma cohuen yocop, tarro'mar añ a'poctateñetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'poctatyeñe't ñeñt ñenmañ allempopa' amach palltenañe o'ch alla a'poctaterryeterr e'ñe ello etserra.

⁸ Yeñoteñ ñeñt ahuat a'poctateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelneshā'. Tarro'mar po'ñoñpa' atet oten ñeñt aque-lcare't ñeñtpa' atet ot Yompor:

Chapcha' allempoch nenerrerr po'poñ neñoñ israe-lena'tarneshacop ñaña judána'tarneshacop, ñeñtpa' allochña na'poctaterranet e'ñe cohuen etserra.

⁹ Ñeñtpa' amach atteyaye ñerra'm ñeñt atet na'poctatanet ñenmañ pa'tañneshañ allempo nerraneta' Egipto't e'ñe co-huen na nehuamenco't. Tarro'mar allempo ñetpa' ama atteye' pōneto ñeñt atet nenanet ñeñtcha' a'poctatahuetañ. Ñeñto'mar napa'cho'ña atta na'ypo'ñanet. Ñeñtpa' atet ot Yompor allempo.

¹⁰ Allempoñapa' o' alla oterrerr Yompor ñeñtara:

Esempohuañenpa' o'ch alla na'poctatererr po'poñ ñeñt israelena'tarneshacop. Ñeñtpa' atetcha' neperranet allempo esheccha'ña neḥapaterranet neñoñ e'ñe ñet pueyoḥreto, ñeñtpa' ñato' o'ch netma'ntacha atto neñoñpa' o' aquellcare'tterret e'ñe ñet pueyoḥreto ñeñtcha' cotape'chaterrahuetña e'ñe cohuen. Allempoña po'ñoḥpa' e'ñech Po'yomporer perrnet, napa'cho'ña e'ñech neyochrenesha' neperranet ñamet.

¹¹ Ñaña allempo allohuenetpa' e'ñech eñotuernanet ñeñtcha' atet noctape'chaterranet cohuen pueyoḥreto. Allohuenetpa' e'ñech attecma eñoternnet pomporneshohuenet ama't ñaña añeñolleshohuen ama't ñeñt atarr sherbets ama't ñaña ñeñt ama esoye' enteñeto. Ñeñto'marña allempo ñeñt añcha'na'tpo' entetsapa' ama pallteno o'ch yeḥhatan po'potantañ pamo'ts ama't ñaña pa'mo'nasheñ. Amach esesha' oterrahuete'te te'pa' añ poctetsa o'ch seño'ter Yompor, tarro'mar allempopa' o'ch e'ñe eñotuernnet.

12 Ñaña napa' e'ñe nemuereñoñanetpa' nepretnerranetcha' po'chñaret, amach alla neyerpuerranete'te po'chñaret. Arrpa' allohua atet ot Yompor ahuat'.

13 Ñeñto'marña yeñoteñ ñeñt' atto Yomporpa' all oten e'ñe etserra o'ch a'pocaterrey, ñeñtpa' tarro'mar ñapa' o' a'ypo'ñerran ñeñt' attoch ñanom a'pocatyey. Ñaña ñeñt' ahuatoteñ a'po'tateñets te'pa' o' a'ypoeñare'tterra, ñeñtpa' huañerrcha'.

9

Ñeñt' patso'mar Yompor po'prahua'pa' añ toma'ntateññañet ñeñt' e'ñe ña pue'ntaño'tsen po'prahua'

1 Ñehua, yeñoteñ ñeñt' atet a'pocatanetañ ahuat' Yompor ñeñtpa' echenan ñoñets anaret' ñeñt'cha' atet sherba'yeset Parets. Ñaña arrcha' e'ñe etsotetña ñeñt' Yomporecop e'ñe ña po'prahuo, ñeñt' puerahua'pa' ama't acheña tomatene' arr patsró.

2 Ñehua, ñeñt' puerahuatase't ahuat' ñeñtpa' shetamtsopo'. Ñeñt' tomatenet ñehuapo'tpa' ñeñt' otenet Partsopahuesho allo'tsen all orratenet huerare ñaña allo'tsen mesa allecma nenet pan Partsocop.

3 Allohuanen allohua ayottam'psaret' besmo po'ppahueñ shetamtsopo' ñeñt' otenet, E'ñe Partsopahuesho Po'ponro.

4 Allña'pa' allo'tsen altar, eno'tña'pa' allecma a'crratenet tsach puese' ñeñt' atarr eñmosa'ttetsa Partsocop; ñeñt'ña altar eno'marpa' e'ñe cohuen orotattena. Ñaña allohuanen po'ppauño allo'tsen tsapot; ñeñtpa'cho'ña eno'marpa' orotaten. Allña añño'tenet mapuettall allo aquellcayet' Yompor po'ñoñ ñeñt' a'pocatat Yompor ahuat' acheñenesacop. All añño'tenet ñaña pajo' orotaten, allña esha'taret' coñe't maná ñaña tsapoto allo'tsen Aarón po'carr ñeñt' tapa'llatse't ahuat'.

5 Tsapoto enot' all ten epsheña mellaño'teñma't ñeñt' aye'chcayet' ñeñt' otenet querubín ñeñt' toma'ntenaya Parets po'partsoña ñeñt' chorrets all. Querubín pa'pa'yopa' alloña ca'matenan tsapot enot' allot' e'tam'penet tsapot. Allña'pa' allecma peretnanete't Yompor po'chñaret. Ñehua, te'pa' o'ch noterrser po'poñe'chno ñeñt' pa'namen atma'ntaret' all.

6 Allpa' pa'namen añño'taretetyetsa ñeñt' all puerahuo. Ñaña ñeñt' cornaneshatyets Partsocoppa' chocmach be'tosyenet ñeñt' all puerahuo ñehuapo't, allcha'ña etsotayenet ñeñt' atet anaret' Partsocop.

7 Tarraña ñeñt' allohuanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr

cornesha' ñeñt pa'mcha'tareter pen po'potantañ corneshachno. Ama't ñapa' paterr charpa' e'ñech parrocha be'ten. Ñaña chocmach anman eyarra po'rras alloch peretnenanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarecpuet.

8 Ama't ñeñt ñehuapo'e'tsen puerahua' allecma sherba'yen corneshachno ñeñt atet anaret Partsocop, tarraña e'ñe allohuanen Parets po'ponro añach be'tets ñeñt nanac corne-shatets e'ñe ñapue't. Ñeñto'marña te'pa' Parets Puecamquëña yeñotatene' atto ama atoram'psareteyayye allohuenacpay attoch ye'chapanipeña Yompor all partsoten.

9 Ñeñt allempopa' aña toma'ntena ñeñtcha' atet cohuen p'osa tsapa'onet Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ pocta'pña ñeñt atet sherbenayeñ Yompor.

10 Tarro'mar ora atet anarettet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yese't Part-socop. Ñeñt orapa' añecpa sherbe't attoch a'pocpatenet po'chets Partsocop. Ñaña ñeñtpa' mamecpa anare'tta es-empohuañeña Yomporpa' orrtaterrnaycha' po'poñ ñeñtcha' ello nanac yesherberre'.

11 Ñeñtpa' e'ñe tarremphua e'ñe etsoterra allempo huapa Cristo, ñeñtña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeñtña ello nanac sherbets Partsocop. Ñapa' e'ñe metana'tuerran ñeñt sherba'yestse't ahua't puerahuo Partsocop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñtpa' ama aña patsroye' atomatarefeyaye.

12 Ñaña Cristo allempo be'tosuerr allohuanen Partsopahuesho ñeñtpa' e'ñe parrocha be'tosuerr all pue'ntaño. Ñaña ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen acheñenesha'cop po'chñarecop. Attoña e'ñe cohuen a'pocpatonay attotcha' a'queshpaterrey, ñaña ñeñtpa' amach ahuañaña'tterro ama't errponaña.

13 Ñehua, yeñoteñ ñeñt atto shellcapechyesane't cornesha'

acheñenesha' cabra po'rraso amapa' huaquësh po'rraso amapa' huacshetoll po'tsapñero ñeñt' a'poyenet altaro, ñeñtpa' attoña a'pocstatenan ama't erra'tsena acheñer po'chets Partsocop, ama't erroteno a'sosyatena Partsocop.

14 Tarraña ñeñtpa' e'ñe po'chtsochaya a'pocstatarettenet Partsocop. Tarraña allempo ashataretta Cristo po'rras, ñeñtpa' ellonet añecopña nanac sherbos attoch a'pocstaterrnay ama't ñeñt' atet yoctape'chyen yeyochro. Ñeñto'marña allempoteña' amach alla yeyemterroro ñeñt' atet yeyeçhcatyen arr patsro ñeñt' ama a'queshpatañeyaye. Añchaña e'ñe cohuen yesherven Yompor ñeñt' ama arromñaeshayaye. Cristopa' ñeñto'marña ello atarr sherbeney atto pomuerra ñañeña o'ch rroma yocop ama't ñapa' ama eñalle po'chñar ama't e'ñe mamesha. Ñeñtpa' e'ñe Yompor Puecamquëño't atet p̄osa; ñeñtña Camuecñetserpa' ama ahuañaño.

15 Atto Jesucristopa' ña eñosets yocop attoch a'pocstatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt' o' allpon yepohuen ahuatoteñ allempoteñ yocta'nom ñeñt' ñanom a'pocatañtatsañ. Allochñapa' allohueney ñeñtey o' ya'hua'ñare'terra o'ch yame'ñera, ñapa' aphuerreycha' ñeñt' o'patatenya ñeñt' atet oteney attochña yapa' corretsayach errponohuañen.

16-17 Ñehua, yeñoteñ arr patsro çhocma eñall puesheña'tets acheñ ñeñt' atet petsa o'ch quellca'nman ñoñets all oten ñeñtcha' allpon puechatsreçhno apa'nman pamo'tsesha' ñerra'm esempoch rroma. Tarraña allempo orameñ correna ñeñt' quellquëne' e'ñe ña po'ñoñ, añña ñeñt' o'patatyenapa' amach erroteno't amnataretto o'ch yoret e'ñe allempocma. Tarraña ñerra'm esempoch eñoteñet po'ñoçh o' rromuen ñeñt' o'patatenahuet, allempoña' apare'tetyesetcha' ñeñt' allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt' allpon o'patatyenya yama ñeñtpa'çho'ña e'ñe yocma.)

18 Ñeñto'marña ahua't allempo ñenma't a'poctatete't Partsocop, ama't allempopa'çho'ña o'ch muetset eyarra, po'rrasoña' allochña shellcata'tyeset. Ñeñtpa' attoña e'ñe a'poctatete'tña po'ñoñ.

19 Ñehua, Moiséspa' atet p̄a allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran carrnero pue'ch ñeñt' e'çhomare't tsama'to ñeñtña' huanquë' hisopoch puetacro,

alotñapa' yoran ñaña huacshetoll po'rras ñaña cabra po'rras, tsech epuet oñ. Allña e'choman carrnero pue'ch ñeñt huanquën tsachpo allemponapa' shellcata'tan allo libro ñeñt all anaret Yompor po'ñoñ, attoña shellcana'tampesuan ñaña allohuen acheñenesha'.

²⁰ Allemponapa' atet otan acheñenesha': "Añ po'rras ñeñtpa' alloña Yomporpa' a'pocstatennas ñeñt atet nenan po'ñoñ socop ñeñtcha' atet sepa."

²¹ Ñaña attecma ñan ñaña puerahua' ñeñt shetamtsopo' o' shellcapo'ch ñeñtara errasatso. Ñaña ora allpon coymechno ñeñt allo'tsa'yen allecma sherbeñet Parets, ñeñtpa'cho'ña e'ñe shellca'ta'tue.

²² Nehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' apretnaretsetso po'chñaret.

Atto amtsaretta Cristo yo'chñarecoppa' attoña e'shohuerrnay yo'chñar

²³ Ñeñto'marña yeñoteñ añe patsro puerahua'pa' eyarra po'rrasña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'tena Parets po'prahua' ñeñt pue'ntaño'tsen, ñeñtpa'cho'ña attecma errasatso a'cohuentatarettena allohuen ñeñt allpon allo'tsa'yen. Tarraña ñeñt rromats Parets po'prahuacop ñeñt pue'ntaño'tsen ñeñtpa' añ muenen errasats ñeñt ello atarr cohuen sherbets.

²⁴ Ñeñto'marña Cristopa' ñeñtecopña rroma. Tarro'mar Cristopa' ama arreye' be'tosuerro ñeñt patso'mar puerahua' ñeñt ye'chcaten acheñ ñeñt atta toma'tenaya Yompor po'prahua' ñeñt pue'ntaño'tsen. Allña be'tosuerrña Cristo Parets po'prahuo ñeñt pue'ntaño'tsen ñeñto'marña te' ñapa' allo'tsen e'ñe allohuanen Yomporesho allña torra'huerra cohuen yocop.

²⁵ Ñaña Cristopa' ama atteye' p̄oso atet pena cornaneshachno ahuañ. Ñetpa' chocma be'tosete't allohuanen Parets po'ponro e'ñe pate'tets char. Ñaña errasats ñeñtcha' anenet o'pono ñeñtpa' ama ñetoyaye po'rraset.

²⁶ Tarraña Cristopa' e'ñe parrochecpa anaret o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoteñ allempoteñ e'ñe errte'

ayečcatarettsa pats. Tarraña ñeñt̃pa' ama atteye' p̃o. Ñapa' añecopña huapa attoch eñech parrocha amtsaretta allohueney yo'chñarecop attoch ñachña yahuanmanperre' yo'chñar. Ñeñto'marña huapa allempohuach çherr yet allempoch mellapoterrmocha.

²⁷ Yeñoteñ ama't allohueney acheñey çhocmach yerromuen. Tarraña eñech parrocha yerroma allempoñapa' o'ch huerrnaya attoch Yomporpa' eñotatyesuerrey e'ñe errotencha' entyesuerrey — ñato' eñech cohuen entyesuerrey amapa' ñato' amach cohuenaye' entyesuerrye.

²⁸ Attecma pa ñaña Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanmanperrey shontey allohueney yo'chñar. Ama't amtsarettañ ochñartsocop, tarraña Cristopa' allach orrterra po'pocheño. Allempoch huerra po'pocheño' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'qeshp̃atuerran allohuen ñeñt̃ çhocma cohuenes' ña.

10

¹ Ñeñto'marña yeñoteñ Moisés po'ñoñ ñeñt̃ atet anaret̃ ahuat̃ judioneshacop, ñeñt̃pa' ama e'ñeye' cohuenteno ñeñt̃ atet cohuentena te' ñeñt̃ orrtatosnay Cristo. Añ ñoñets ñeñt̃ atet anaret̃ ahuat̃ ñeñt̃pa' aña toma'ntena ñeñt̃cha' e'ñe po'ñoç cohuenetuerrtsa ñeñt̃cha' orrterrtsa tsapatonet̃. Ñeñto'marña añ ñoñets ñeñt̃ atet anaret̃ ahuat̃ ñeñt̃pa' amach errotenot̃ a'cohuentatanoña acheñenesha' ama't puesheñarra ñeñt̃ muenenayeñ o'ch yemtenanañ Yompor. Ama't çhocma muetsa'yesetañe't̃ eyarraçhno po'chñarecop e'ñe atet oteneñ añ ñoñets ñeñt̃ atet anaret̃, ñeñt̃pa' amach errotenot̃ e'ñe a'cohuentatanoña acheñenesha'. Ama't pate'tets char çhocma muetsa'yesetañe't̃ ñeñt̃ Yomporecop, ñeñt̃pa' ama e'ñeye' a'cohuentatane'teña acheñenesha' Yomporecop ama't puesheñarra ñeñt̃ muenenayeñ o'ch yemtenanañ Yompor.

² Ñerra'm e'ñe po'ñoç a'cohuentatenaneña acheñenesha' eso'marte'ña o'ch alla muetsereterrña po'poñeçhno shonte' eyarra. Ñerra'm po'ñoç a'cohuentatenaneñ acheñenesha' ñeñt̃ atet cotape'chyene' sosya'tsañ pueyoçhreto, eso'marte'ña alla yerpapa'taterranete'tña po'chñaret̃ ñeñt̃ pueyoçhro'tsa'yenet̃.

³ Tarraña po'ñoç epaye' yerpapa'taterranete'tña po'chñaret̃. E'ñe pate'tets char allempopa' o'ch alla muetserreterr eyarraçhno añecop ñeñt̃ atto yerpapa'taterraneterr po'chñaret̃.

4 Ñeñto'marña yeñoteñ eyarra po'rraspa' amate' errotenot ahuanmanperryeña yo'chñar ama't toro po'rras amapa' cabra po'rras.

5 Ñeñto'marña Cristopa' atet otosan pompopor allempo acheñetos arr patsro ñeñtpa' atet ot:

Pa te'pa' ama añeye' pemneno eyarra ñeñt amtsarettetsa p̄ocop ñeñtcha' atarr p̄ocshatene'. Ama't ñaña ñeñt es apa'yenet p̄ocop. Ñeñto'marña nocop te'pa' o' peyeçcatuerrnan nechets añ patsrecop ñeñt e'ñe atet pemnen p̄a, e'ñech nechtsot nesherbosep̄ attoch e'ñe cohuen nocshatenep̄.

6 Po'ñoçh te'pa' ama añeye' atarr p̄ocshatenaye atto chamuenet eyarra p̄ocop amapa' allempo muetsanatenet eyarra ñeñt po'chñarecpuet.

7 Ñeñto'marña Nompore te' napa' o'ch notaþ: "Napa' añecopña nohuapa arr patsro attoch netsotosnaþ ñeñt atet pemnen p̄a, ñeñt e'ñe atet anaret peñoño nocop." Arrpa' allohua atet otan Cristo pompopor.

8 Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateñet ña. Ama't ñaña ñeñt es apa'yenet ñocop ñeñtpa'cho'ña ama ñeñteye' e'nenno ñeñtcha' coshatene' ama't ñeñt achamaret ñocop ama't ñaña ñeñt amtsarettetsa ochñartsocop. Ñeñt ora añeçhno ñeñt atet nane't Moisés po'ñoñ atetcha' es apueñet Yompor, te'ña ñeñtpa' ama coshatenano Yompor; atet oten Cristo.

9 Elloña ñapa' atet oten, "Napa' añecopña nehuapa Nompore, o'ch netsotosnaþ ñeñt atet pemnen p̄a." Ñeñtpa' añ eñotatosey, ña a'huañatose' ñeñt ahuatoteñ atto muetsete't eyarra po'chñarecop. Attoña ñapa' nosan po'ñoñ ñach rromosets yo'chñarecop.

10 Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt atet muenen Pompopor yañapa' e'ñe a'cohuentaterrey Partsocop.

11 Ñaña ñeñt cornaneshatyets judioneshacop ñet pate'tets yetpa' çhocma tenet all altaro allotecma sherbeñet Yompor allecma muetsanaterretañe't eyarraçhno ñeñt ochñartsocop. Tarraña ama't amtsarettenañpa' amach errotenot ahuanmanoña ochñarets.

12 Tarraña Jesucristopa' e'ñe parrocha pomuerra e'ñe ñañeña ñach amtsaretttertsa ochñartsocop. Ama't parrocha rroma

ñeñtpa' allohuenacop e'ñech errponohuañenacop. Allem-poñapa' o' alla anorruerr Pompopor po'cohuenrot allña part-sotuerr.

¹³ Allotña cohuenan allohuen ñeñt e'moñe'tene' esempo-huañenpa' a'mchechatuerranetcha'.

¹⁴ Jesucristo allempo pomuerra ñañeña, ñapa' e'ñe etsotatuerr-nay attoch e'ñe a'cohuentaterrey Partsocop. Ama't parrocharrroma ñeñtpa' e'ñe allohuenacop ama't ahuatoteñ errponohuañenacop añecop ñeñt pueyochresha' pen Parets.

¹⁵⁻¹⁶ Ama't Yompopor Puecamquëñ ñeñtpa'cho'ña eñotochtatennay tarro'mar ñapa' añ eñotatyë't ñeñt atet otyë't Yompopor, ñeñtpa' atet ot:

Esempohuañenpa' napa' o'ch na'pocatterranet po'pocheño.

Ñeñtpa' atetcha' neperranet. Allempo esheccha'ña nechapaterranet neñoñ e'ñe pueyochreto. Ñeñtpa' ñato' o'ch netma'ntacha atto neñoñpa' o' aquell-caretterret e'ñe ñet pueyochreto ñeñtcha'ca'yeña cotape'chaterrahuetña e'ñe cohuen.

¹⁷ Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa' amachña ñeñta' alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es pallteto yocop attoch e'ñe cohuen ye'ñorana'tera Yompopor Parets

¹⁹ Ñeñto'marña masheñeshacha' ñaña nochaneshacha'te'pa' yeñoteñ e'ñe pocte' yocop e'ñe ya yeçhore'teño't Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'ntena ñerra'mrrate' o' yebe'terr e'ñe allohuanen Parets po'ponro all po'prahuo atet pe't ahuat cornaneshas' ñeñt be'tostse't ñapue't ñeñt anmaye't eyarra po'rras all, tarro'mar te'ña atto o' rroma Jesucristo yocop, po'rrasña ñeñña e'ñe ya'pocatterre'ña ya attoch ye'ñorana'tera ama't ñeñt atarr Parets.

²⁰ Po'ño'ch Jesucristo e'ñe ña po'chtsot orrtaterrnay po'poñ etserra attoch yapa'cho'ña o'ch yeçhapanpera Yompopor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ño'ch. Ñeñtpa' añ toma'ntena ñerra'mrrate' Cristopa' o' çhapterrey allohua yottampeññañet besmo Parets po'ponro all po'prahuo.

²¹ Jesús te'pa' yeñoteñ ñeñña atarr Yecorneshar yepen ñeñt çhets Yompopor pa'pacillo, ñapa' allña amcha'taretetuerra

Yomporepahuo añecop allohuen ñeñt̃ pueyochreshachno pen Parets.

22 Ñeñto'marña e'ñe yeyemteñoṭpa' amach yench'a'nañotayaya yeçhore'teñe. E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rrasoña o' a'cohuentaterrnay yeyoçher atto te'pa' o' e'ñe cohuen yoctape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atto yapa' e'ñe cohuen apataretey oño ñeñt̃ poctetsa Partsocop.

23 Chocmuepa'chña yecueñña ñeñt̃ yeyemtena allochñapa' a'queshpaterreycha', amuepa'chña cha ye'charrtatatstenoña yeyoçher tarro'mar Yompor ñapa' çhocmach a'poctaterrnay po'ñoñ ñeñt̃ atet oteneý.

24 Ñaña añepa'chña e'ñe cohuen ye'nen attoch yeyenpan-nena allohueney allochñapa' attoch e'ñe cohuen yeychen morrentanna'teñets ñaña e'ñech cohuen es yeyenpannena.

25 Ñaña çhocmuepa'ch yesen all çhocma yapçhena e'ñe yame'ñeñot̃ Cristo. Amachña atta yeṭatsto ñeñt̃ atet pena po'potantañ ñeñt̃ ama huetso allecma yapçhena. Añcha'ña atet yepena allempo yapçhena e'ñech cohuen yoctape'chatannena Yomporecop. Elloña te'pa' çhocmach yapçhena ñeñt̃ nanac cohuentetsa yocop tarro'mar yeñoteñ te'pa' o' çherrmoch allempoch huerra Yepartseshar Cristo.

26 Tarro'mar ñerra'm o' yeñoter po'ñoçh Cristo rromats yocop attoch a'queshpaterrey ñaña ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneññoṭpa' allempopa' amach eñalleña ñeñt̃cha' rromuerttserr po'pocheño ñeñt̃cha' yetsa'terroyerr ello yo'chñar.

27 Ñeñt̃ allo'na sets ochña'tare'tnomuets añach o'paterrahuet coñcheñets ñeñt̃ atarr añcha'noçhtetsa ñeñt̃ara Yompor po'yoroçhenña ñeñt̃ tso'pa' e'ñech e'nuerran allohuen ñeñt̃ e'moñe'tene' Yompor.

28 Ñehua, ahuaṭ ñerra'm eñall ama't puesheñarra ñeñt̃ atpare'tayeṭ Moisés po'ñoñ, ñerra'm eñall epsheña amapa' ma'psheña ñeñt̃cha' a'metam̃pene' ñeñt̃ña atparñaṭpa' ahuo'ch muetse allohuen acheñenesha'. Ama't puesheñarrapa' amach eñalleña ñeñt̃cha' morrentaya.

29 Elloña ñeñt̃ ama esoye' entenaye Yompor Puechemerpa' atarrcha' nanac a'coñchatareṭterret. Elloña po'rras ñeñt̃cha' a'cohuentaterrahuetañ Partsocop ñeñt̃pa'cho'ña ama esoye' enteñeto ama't ñeñt̃ errasatser ñeñt̃ etserra a'poctatañtetsa. Elloña ama't Yompor Puecamquëñ ñeñt̃pa'cho'ña çhach sasare'teññañet ñeñt̃ara Puecamquëñ

ñeñtcha' morrenterrahuetañ attoch chorrerranetañ. Ama't señoñeña elloña atarrcha' nanac acoñchatare'terra ñeñt atet atarr tsena'tene' Yompor Puechemer.

30 Tarro'mar yapa' yeñoñeñ Yomporña atet otets: "Napa' ñeñfencha' coñchatterahuet, napa' ñeñfencha' tsatatterahuet." Elloñapa' atet oten Yompor: "Napa' ñeñfencha' otteñe'cherrahuet attochña necoñchatteranet ama't ñeñt neyochresha'chno nepeneñ."

31 Ñeñto'marña yeñoñeñ atarr yoro'cheno'tsen ama't allohuen ñeñt aña o'patenaya ñeñt po'yoro'chenña pen Yompor ñeñt ama arromña'ateshayaye.

32 Tarraña te'pa' o'ch notas, o'ch alla seyerpuerra atet sepa ahuañmo'cha allempo e'ñe errtes eñoterre' po'ño'ch Cristepa'tña a'queshpatañ. Ñeñtpa' allempo ñanom a'puetarsam'psare'tta seyo'chro soctapña. Allempopa' ama't atarr amuro'chtatare'teseñ sañapa' e'ñe sa'huanta'huanom pa'namen topateñtso'chno ñeñt setantyesoya; ñeñtpa' e'ñe atet ñerra'mrrate' sapa' cho atarr se'cllarena.

33 Patanta'ttsospa' atarrca'ye che'tatsetasete't e'ñe allo'tsa'yen allohuen acheñenesha'. All atarr sa'muero'chtatare'tta. Elloña ñerra'm esempo muero'chtateñet po'potantañ samo'tsesha' sapa'cho'ña chocmach semuero'chtapretanete't.

34 Po'ño'ch ñeñt armanatare'ttase't o'ch ayottam'psare'ttet, sañapa' e'ñe sellcapreteño'fanetpa' chocmach e'ñe cohuen seyenpuenanet. Ama't allempo puerrata'm'psatsre'tase't ñeñt se'moñe'tyesaye't, sañapa' e'ñech socsheñesha' sa'huantenanet. Tarro'mar sapa' señoñeñ o' secherr ento ñeñt atarr sherbets ñeñt ello metana'tuene' atto sherbenes sechatser, tarro'mar ñeñtpa' ama aptsaño.

35 Ñeñto'marña masheñneshacha' o'ch alla noterrser, amach alla seque'chpatsterrñañe ñeñt atto atarr seyemteña Cristo tarro'mar Yomporpa' ñachña atarr cohuen setsa'terraya.

36 Te' sapa' aña sepalltena attoch e'ñe aco'pa sa'huanta'huanom ñeñt atarr echarr sentyen, attochña allo'nach sesen pa'yesnomue' ñeñt atet muenen Yompor, attochña Yomporpa' apuerrescha' ñeñt e'ñe atet otenes.

37 Tarro'mar yeñoñeñ Yompor po'ñoñ ñeñt aquellcare't ahua'toteñ ñeñtpa' Cristocop atet oten:

O' mameshamerra o'ch orretuerra ñeñtcha' huerrtsa, te'pa' amach alla atomato pue'ntaño.

38 Tarraña Yomporpa' atet oten:

Ñeñt e'ñe pocte' nenten na ama't erra'tsena acheñer tarro'mar e'ñe pueyemteño'ien na, ñeñtña' corretsach. Tarraña

ñerra'm esesha' nepuerram̄perraya ñapa' o'huañcha' allo'na coshatenen.

39 Tarraña yapa' ama atteyayye ñerra'mrrate' ñeñtcha' puerram̄perraya Yompor ñeñtcha' chenquërtsa. Yapa' añeyca'yeña ñeñteycha' chocma yemterraya Yompor ñeñteycha' a'queshpatarettertsa e'ñe yecamquëñohuen.

11

E'ñe yeyemteñot̄ Yomporpa' e'ñech cohuen es yetsotayen ñocop

¹ Ñehua, allempo po'ñoçh yeyemteña Yompor e'ñe yeñoteñ chocmach apuerrey ama't esempo ñeñt̄ atarr yecuen te' e'ñe yenamueñot̄. Ama't ama yenteña' e'ñe yeyoçhroña yeñoteñ ñeñt̄ yecuen te' po'ñoçhpa' apuerreycha' ama't esempo.

² Yatañneshañ ahuatpa' atarr yemuetyesete't̄ Yompor. Ñeñt̄ atto yemuetyesyete't̄ Yomporñapa' e'ñe pocte' entyesanete't̄.

³ Ñaña ya e'ñe yeyemteñot̄ Yompor te'ñapa' o' yeñoter allpon ñeñt̄ yentyen arr patsro ñeñtpa' e'ñe po'ñoñoña yeçhca'hua. Allempopa' ama't coñe'ta ama es orrtetso ñeñtcha' pa'namen yeçhcatyes ñeñt̄ atet̄ yentyen te'.

⁴ Ñaña Abel ahuat̄ atto yemtane't̄ Yompor, ñapa' apan Yompor ñeñt̄ atarr coshate'. Pa'mo'nasheñña Caín ama't apaneñ ñaña Yompor, ñeñt̄ñapa' ama coshatano Yompor. Ñeñto'mar Yomporpa' e'ñe cohuen agapan ñeñt̄ aþ Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromañpa' atto atarr yemtane't̄ Yompor, ñeñtpa' e'ñe teme'ttsen eñotateney ñeñt̄ cohuen enten Yompor. Ñeñtpa' attema't̄ ñerra'mrrate' Abelpa' teme'ttsen serrpare'tateney cohuen.

⁵ Ñaña ahuat̄ Enoc ñeñt̄ atarr cohuen yemtaye't̄ Yompor, ñapa' e'ñe ora aner Yompor pue'ntañño e'ñe beñatot̄. Ñapa' ama çhoye' rromo arr patsro. E'ñe atfa a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntañño ñapa' atarr cohuen coshatane't̄ Yompor allempo añe patsro'tsen, tarro'mar ñeñtpa' atet̄ oten Yompor po'ñoñ ñeñt̄ aquellcare't̄.

⁶ Ñerra'm ama yeyemteñe Yompor amach errotenot̄ yocshateñe ama't e'ñe mamesha. Tarraña ñerra'm esesha' muenene' o'ch yemteret̄ ñamet Yompor añ poctetsa o'ch otet̄ po'ñoçhpa' Yomporpa' eñall, ñaña eñoteretepa'chña Yomporpa' chocmach coshaterran allohuen ñeñt̄ e'nene' ña.

7 Ñaña ahuat Yomporpa' eñotatan Noé ñeñtcha' atet e'chofan oñ tsapatonet. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñaña'pa' ye'chcatuan po'compuer allochñapa' attoch a'queshpatan pamo'tsesha'. Atto ye'chcatan po'compuer e'ñe ñapuet e'ñe pueyemteñoť Yomporpa' eñotataneña allohuen po'potantañe'chno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñoť, Yomporñapa' e'ñe pocte' entenan Noé.

8 Ñaña ahuat Abrahampa' allempo chore'ch Yompor o'ch mueñe allañar allcha' apuer pats, ñaña'pa' e'ñe pueyemteñoť Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen.

9 Allempo chap anetso all oteñ Yompor ñeñtcha' apuer esempohuañen, allñapa' all ye'chosa e'ñe pueyemteñoť Yompor. Tarraña ña allpa' atta ye'chosa atet ñerra'm ahupña. Ama't ñeñt patspa' ñeñt o'patateña Yompor ñeñtcha' apuer, tarraña allempopa' ama apueña' Yompor ñeñt atet oteñ. Ñeñto'mar ñapa' atta shetamtsopo'tos all manatoset. Ñaña ama't ñeñtcha' po'mireneñ perr Isaac ñaña Jacob ñetpa'cho'ña attera ye'cherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñt patser e'ñe atet otenanet ñamet.

10 Abraham po'ño'chpa' aña cohuen ñeñt Yompor pa'netser ñeñt e'ñe echarr a'paret tarro'mar Yompor ye'chcatene' e'ñe echarr peñ.

11 Pue'tapor Sarapa'cho'ña e'ñe pueyemteñoť Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñoťa Yomporpa' ña ahuaменcať pe' attoch cheyore't. Tarro'mar ñapa' atarr ayemuetpo' entenan Yompor atet oteñ.

12 Attoña, e'ñe Abrahamoťa atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mireneñ pohuenahuet ñeñt allpon shonte' nanac atet ñerra'mrrate' ora allohuen ranto'chno ñeñt ento'tsa'yen ñaña atet yenteññañ sa'p po'mñer ñeñt ama e'ñotuapahuoyaye.

13 Ñeñtet allponet atarr yemuetnomuet Yompor ama't allempo Yomporpa' ama apuenaneta' ñeñt patser ñeñt o'patatanete't. Tarraña ama't ama apare'tterreta' ñeñt patser ñeñt o'patatanete't Yompor, ñetñapa' pueyemuetneñoťet Yompor eñoteñet ñetpa' apare'tterretcha' ñeñtcha' po'ño'ch pa'netser perret. Ñeñtcha' atarr coshaterrahuet.

Tarro'marña ñetpa' eñoteñet añ patser po'ñoçh ama pa'netsreye' peñeto. Ñetpa' ahupañanesheta entenet arr patsro.

14 Ñehua, yeñoteñ acheñ ñeñt atet entetsa ñerra'm ahupañanesheta ñetpa' añña e'nenet ñeñtcha' e'ñe pa'netser perret po'ñoçh.

15 Ñaña ama añeye' pa'netser peneto allot onet tarro'mar ñerra'm ñeñta e'nenetañpa' po'ñoçhpa' o'ch alla puerrerretañ allot onet tarraña ñetpa' ama ñeñteye'ña e'name'teneto.

16 Ñetpa' añña e'nete't ñeñtcha' e'ñe pa'netser perret po'ñoçh ñeñt atarr nanac cohuen, ñeñtpa' añepa't Yompor pa'netser ñeñt pue'ntaño'tsen. Ñeñto'marña Yomporpa' e'ñe pocte' entenanet ama penquënaneto atto Po'yomporer peñet. Ñaña'pa' o'patatenanet ñeñtcha' e'ñe po'ñoçh pa'netser perret all pue'ntaño.

17 Ñaña allempo Yomporpa' atarr topatan Abraham; ñeñtpa' atet otan Abraham: "Te'pa' o'ch pemtser pechemer Isaac e'ñe atet ñerra'm ñeñt muetsenet nocop." E'ñe pueyemteño't Yompor Abrahamña'pa' e'ñe pocte' eñch o'ch poman puechemer Isaac o'ch muetse Yomporcop. Ñehua, Yomporpa' atet o' otuan Abraham ahuatoteñ:

18 "E'ñe pechemeresho't Isaacpa' mererrach shonte' acheñenesha' ñeñtcha' e'ñe pemreneñ peperr." Tarraña ama't atet oteñeñ Yompor; ñaña'pa' e'ñe pueyemteño't Yomporpa' e'ñe pocte' eñch ahuo'ch muetsan po'patrorr allempo atet otererr Yompor.

19 Tarro'mar ñapa' atet oten, Yomporpa' atarr ahuaencatesha' ñach tantatuerre' ama't ñeñtcha' rromats. Ñeñtpa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

20 Isaacpa'cho'ña allempo po'n e'ñe pueyemteño't Yomporpa' enaman puechemereshacop Yompor pa'nateña añecop Jacob ñaña Esaú; ñeñtcha' atet bensare'tamperranet tsapa'onet.

21 Jacobpa'cho'ña allempo rromamoch e'ñe pueyemteño't Yomporpa' enamatnoman Yompor pa'nateña pue'ñarefolleshacop ñeñt puechemer José puechemerfollesha' puepo'nmeño'tpa' po'carra quellpuena allña ma'yochenanaña Yompor.

22 Josépa'cho'ña e'ñe pueyemteño't Yompor allempoch rroma allapar all anetso Egipto, ñapa' atet otnoman pamo'tsesha': "Po'ñoçhpa' chocmach chap allempoch allohuenes israelena'tarneshas secha'nerrcha' arro't Egipto't, o'ch sahanerra allo'tsen pats ñeñt o'patatye't ahuatoteñ

Yompor ñeñtcha' apuerrey. Ñaña ñerra'm esempoch ahuerres arrotpa' sanerrnancha' nenpa'ts."

23 Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoŕet Yomporpa' o' e'pochet. Ama mecha'teññañeto añcha'taret po'ñoñ ñeñt atet nen attoch chocma muetsanachet allohuen asheñorroŕollesha' ñeñt eñalletyetsa. E'ñe ma'pñia arrorr alla e'poteñet.

24 Tarraña Moisés allempo o' po'n ñapa'cho'ña e'ñe pueyemteñoŕa Yomporpa' ama mueno o'ch oteñet ño' pue'ñar penña añcha'taret, tarro'mar ñapa' atŕa ñañreteña añcha'taret po'señ ñeñt egipto'marnesha'.

25 Ñapa' añña e'ñe pocte' ent o'ch muerochtapretana israelnesha' ñeñt e'ñe pamo'tsesha' pen ñeñtara ñeñt pueyochreshačno pen Yompor. Ama pocteye' entano o'ch coshapretana egipto'marnesha' ñeñt atet yechenet ñeñt ama pocteye' enteno Yompor tarro'mar ñapa' eñoteñ ñeñtŕpa' e'ñe mamecpa atet coshenet.

26 Ñapa' atŕa ahuantenan atto atarr sasare'teñet israelnesha'. Tarro'mar ñapa' añ pocte' enten o'ch muerochta Cristocop. Ñapa' ñeñtña atarr cohuen enten, ello metana'tuenan ñeñt atet sherben allohuen ñeñt esocmañen ñeñt atarr morrentena egipto'marnesha'. Tarro'mar ñapa' añña cohuen ñeñtcha' apuer Yompor ñeñtcha'ña atarr coshaterre'.

27-28 Ñeñto'marña Moisés e'ñe pueyemteñoŕ Yomporpa' atet otan allohuen israelena'tar ñeñt Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñtña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoŕeñ ñeñt amñareŕ ñeñtcha' muetsanatuenaya' allohuen egipto'marnesha' po'moternesha' attochña sa ñeñtes israelena'tarneshaspa' ama't puesheñarroŕesapa' amach muetsenso." Ñaña Moisés e'ñe pueyemteñoŕ Yomporpa' sa'nerran anets Egipto, ama mecha'tnomano ñeñt añcha'tarettetsa all Egipto ñeñt atarr atsrre'mñaŕ. Moiséspa' atŕa ahuinta'huanman allohuen ñeñt atarr echarr entyen tarro'mar ñapa' añ e'ñe yemtena Yompor ñeñt ama't ama entpahuoyaye.

29 Ñaña allempo onacherr allohuen israelena'tarnesha' Egiptoŕ allempo chača'tet atarr sa'po ñeñt otenet Sa'p Tsasasen, israelena'tarnesha' e'ñe pueyemteñoŕet Yomporpa' e'ñe atŕa ahuanmoset all chope'chnomuet atet ñerra'mrrate' e'ñe porrare' patso chope'chenet. Egipto'marnesha'ña ñeñt

coťahuetañpa' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuoksetña all oño.

30 Ñaña allempo čhača'tet all anetso Jericó ñeñña allo'marnesha'pa' ama mueneñeto o'ch abe'tosam̄psarettet. Tarraña israelena'tarnesha' e'ñe pueyemteñoťet Yomporpa' cančherrmatoset; o' cančhroch puetesam̄psame'toset ñeññ anetser Jericó ñeññ atet otanet Yompor. Allempoña e'ñe pueyemteñoťet Yomporpa' ñeñña conchet allo aconča'tam̄psareť ñeññ anetser all puetesme'tet cančhroch e'ñepa'tcha' ñoña mata'nom.

31 Ñaña Rahab ama't ñeññ atarr ecañoreshaťtatse't ahuatpa' atto atarr yemterrana ñaña Yompor, ñeññ coyanesharpa' ama rromo allempo a'cllataretta allohuen pamo'tsesha' ñeññara jerico'marnesha' ñeññ atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeññ ñanom amñareťtatsa all anetso ñeññcha' eñotenaya' erroťente'ña ñeññ anetser ñaña ñeññ yečhetsa all, ñato' ahuamencatarerette' ñato'pa' amate'.

32 Po'potantañečhnopa' shontemeñ ñeññcha' alla neyerpa-terrsañerr ñeññ atarr yemtaye't Yompor ahuať. Tarraña ama eñalle allponmat yet attoch alla neyerpatuerrsa allohuen ñeññ atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jeťté, ñaña David, ñaña Samuel ñaña allohuen ñeññ a'mta'yesaye't Yompor po'ñoñ ahuať.

33 Tarraña allohuenet e'ñe pueyemteñoťet Yomporpa' pa'namen etsotayenet ñeññ atet muenatenanet Yompor. Puesheña'ttsetpa' e'ñe a'mchechueñet po'potantañ añcha'tareťneshačhno ñeññ e'moñe'tenahuet. Po'potantañapa' e'ñe pueyemteñoťet Yompor e'ñe cohuen añcha'tareťtenet. E'ñe pueyemteñoťet Yompor ñapa' alla yenpuerranet ñeññ atet otanete't. Ama't po'psheñeñpa' e'ñe pueyemteñoť Yompor ama muenatano ma'yarr o'ch erroť pe'.

34 Ñaña ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteñoť Yompor ñapa' a'qeshpach attoch ama muetseto espado. Po'potantañpa' ama't ama eñalleto po'huamenc, e'ñe pueyemteñoťet Yompor atarr ahuamencat panet. Ñeñña huomencñatserpa' alloña quellarenet. Atto e'ñe a'mchechuet ñeññ e'moñe'tenahuet.

35 Ama't po'potantañ coyaneshačhno ñetpa'cho'ña e'ñe pueyemteñoťet Yompor, o' alla atantatareťterret pamo'ts ñeññ rromuets.

Po'potantañ ama't atarr atserrpatse'tareťtenet, ñetpa'cho'ña e'ñe pueyemteñoťet Yompor ama mueneñeto

o'ch quechpuet Yompor attoch a'rroyaretetyerret. E'ñe pocte' enteñet o'ch rromuet pueyemteño'et Yompor tarro'mar ñetpa' eñoteñet allach tanterret ello ñeñ' atarr nanac cohuentetsa.

³⁶ Po'potantañechno ñetpa'cho'ña e'ñe pueyemteño'et Yompor ahuanta'yenet pa'namen atto atarr at-serrpatse'tare'tetyesete't — attoña atarr ache'tatsetare'ttete't, all ashtare'ttete't, ehuancanatare'ttete't, ayot-tam'psare'tetyesete't.

³⁷ Po'potantañ amtsanatare'ttete't atto arrol-lapechare'ttete't. Po'potantañpa' asheshare'tetyesete't e'ñe puerro'chreto atto amtsanatare'tetyesete't, atarr huomenc huapanete't topateñets. Po'potantañ espado amtsanatare'tetyesete't. Po'potantañ atta chopeñe'chyesete't, aña chorra'yese'te't carrnerorrom, ñaña cabrarrom. Atarr huocchañetyesete't attaña atarr amueroch'tatare'ttete't atto atserr'pa'yese'ttete't.

³⁸ Atta chopeñe'chyesete't amayo'mar, aspen'to'mar. Esho'tyesete't arroroto'mar, mapuetpono'mar a'ne patsro. Allohuenet ñet ñeñ' atto atarr amueroch'tatare'ttete't, Yomporña'pa' atarr cohuen entanete't. Ello metana'tueñet ora allohuen acheñenesha' arr patsro.

³⁹ Allohuenet ñeñ'et atarr yem'tete't Yompor ahuat, Yomporña'pa' e'ñe cohuen entanete't, tarraña ñetpa' amaña enterretoña ora allpon ñeñ' atet otanete't Yompor ahuat ñeñ'cha' atet apuerranet.

⁴⁰ Tarro'mar Yomporpa' ama't ahuatoteñ añ co'tape'chen ñeñ' ello nanac cohuen enten ña. Ñeñ'pa' yocpa'na allohuenacpay. Ñapa' añ muenen allohueney parro o'ch etsotaterrnay ñeñ' o'patatenya ñeñ'cha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñeñ'to'marña yeñoteñ shonte' acheñ ñeñ' orrtatyesaye't ahuatoteñ; e'ñe pueyemteño'et Yompor e'ñe etsotayese'te't Yomporecop ñeñ' atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohupreterryet yaña o'ch entyesyet erro'tencha' yetsota yaña ñeñ' atet muenateney Yompor. Ñeñ'to'marña yocoppa' añ poctetsa o'ch e'ñe yesuanom ama't erra'tsena ñeñ' yepatare'tene' ama't ñaña yo'chñar ñeñ' atarr yetpatyene'. Ñaña e'ñepa'ch ya'huanta'huanom allohuen ñeñ' echarr yentyen. Allochña'pa' attoch e'ñe cohuen yetsoteññañ ñeñ' atet muenateney Yompor. Ñeñ'pa' e'ñe atet ñerra'mrrate' ñeñ'

matetsa ñetpa' chocmach chapuet allohua onañchareñtenet ñocpuet.

² Añcha'ña chocmuepa'chña e'ñe yeyemuetneña Jesús ñeñt orrtaterre' attoch yeyemtera ñaña ñeñtcha' yetsotaterre' ñeñt atto atarr yeyemuetneña. Tarro'mar ñapa' e'ñe pocte' eñche't o'ch ahuanta'huan allohuen ñeñt echarr ente't ama't atto rroma corsocho. Ama't ñeñt atarr apencochen entyenet, ñapa' e'ñe poctacma ahuanta'huanemñ. Tarro'mar e'ñe pueyemteñoña Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenrot all anen po'conaño allña partsotuerr ñaña.

³ Ñehua, te' sapa' o'ch alla seyerpuera Jesús atto ñapa' atarr muerochtater ñeñt atarr ochñañenesha' ñeñt atarr e'moñe'taye't. Tarraña ñapa' allohuen muerochteñetspa' e'ñe ahuanta'huanemñ. Allochñapa' sapa'cho'ña amach cha semuenme'chatsche ñeñtcha' atarr echarr sehuapoya, attochña amach cha llecatenso.

⁴ Tarraña saña ama't atarr satpare'tyeñeñ atto atarr topatase't so'chñar amaña choye' muetsenseto ñeñt atet aparetta Jesús, ashataretta po'rras ochñartsocop.

⁵ Ñaña sapa' o'te' cha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet oteneý po'ñoñ:

Nechemere, ñerra'm esempo cotape'chaterres cohuen Yompor amachña atta sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñtoña cha muene' sequechpatstere.

⁶ Tarro'mar allohueney ñeñtey morrentena Yompor ñeñteycha'ña cotape'chaterr cohuen. Ñaña allohueney ñeñtey puechemerasha' pen ñeñteycha'ña coñchatyes mamesha'tets attoch o'ch alla yoctape'cherr cohuen ñocop.

⁷ E'ñepa'chña ya'huanata'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñt achemereshat errottenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer.

⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoñ ama puechemereye' peñe; ñeñtpa' cha ottena ñerra'm ellapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoñ amaca'ye puechemereye' penso.

9 Elloña yeñoteñ allempo cheshenya' ñeñt yompor yepen arr patsro atto e'ñe cohuen cotape'chatyesye't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñtara Yompor ñeñt pue'ntaño'tsen ñeñt pamo'mte' pen yecamquëñ attoña yapa' corretsayach.

10 Ñehua, ñeñt yamo'mte' yepen arr patsro ñetpa' e'ñe allponmata cotape'chatyesyete't allempo yapa' cheshenya'. Ñetpa' chocma coñchatyesyete't allpon pocte' entyesete't ñet. Ñaña Yompor atto allpon coñchatyeny mamesha'tets ñeñtpa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen.

11 Ñaña yapa' yeñoteñ ñerra'm esesha' yecoñchatene' ñeñtpa' ama cohuenaye' yenteñe e'ñe allempo coñchatenyet, tarro'mar ñeñtpa' chocmach llecatenyet. Tarraña puecoñchateño'tetaypa' o'ch yeñoterr ñeñt atarr cohuen enten Yompor. Allochñapa' attochña e'ñech yocsheñesha' yeychena cohuen muechet.

Ñato'tña atta es sepchamipena'ña ñeñt atet anaret Partseshot socop te'tña ama secherro ñesho

12 Ñeñto'marña te'pa' o'ch notas, o'ch alla setanterra o'ch alla sa'huamencaterra Yomporecop. Atetcha' netma'ntatasa atet ñerra'mrrate' o' alla ahuamencat seperr sot ñeñt cha yoncota'ten ñaña atto seyonllocme'chenpa' o'ch alla ahuamencat seperr selloquëñ.

13 E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyocher Yomporecop, sañapa' amach aña sorrtateno ñeñtcha' a'puerrataterrahuet. Añcha'ña sorrtateññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen pa'charr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepo'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

14 Añepa'chña sema'yo'chrena attoch e'ñe cohuen samo'tstannena, e'ñech muechet seychena epas allohuen samo'tseshachno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yocape'cheno ñeñt cohuenare' enten Paretspa' amach errotent yentereña Yompor.

15 Ñaña señotanna'tnomuepa'ch, ñato' eseshaspa' ama añeye' e'нено Yompor ñeñtcha' yenpue'. Ñaña señotanna'tepa'ch ñato'tña ama't e'ñe mameshapa' sorratena'ña attoch se'moñe'tanna'ta. Ñerra'm atet sepenapa' acopoteñpa' o'ch e'ñe epa'huapa' chach orrtatan atsre'mo'chen. Attoña ñerra'm shonte' acheñenesha'pa' chach a'sosyatuanet; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen.

16 Ñaña señotanna'tnomuepa'ch ñato'tña esesha' chetena'ña ñeñt ama pue'taporeyaye. Amapa' ñato'tña atta es sep'cham'pena'ña ñaña ñeñt atarr sherbets Partsocop, ñeñt atet pa' ahua't Esaú. Ñapa' e'ñe pa'chporrño'ta pomhuan ñeñt anaret ñocop Partseshot. Ñeñtpa' ñeñt o'patacha pompor ñeñt metana'tuene' ñeñtcha' allpon apa'nman po'poñ puechemerasha'tarro'mar ñapa' ñeñt e'ñe po'moter pen pompor. Tarraña Esaúpa' ama esoye' enteñe ñeñt anaret ñocop Partseshot ñeñto'mar e'ñe pomhuan ñeñt o'patacha pompor ama't e'ñe parrocha rrachet.

17 Tarraña e'ñe allponmatapa' yeñoteñ o' alla muenerran ñeñt anaret ñocop Partseshot, tarraña allempopa' amach errotent' alla apuereterro. Ama't pueya'chpeñesha' enamuerreñ allempopa' amate' errotent' a'po'poñeterretoña ñeñt atet o' pohuet ñenma't.

18 Ñehua, yeñoteñ ahua't allempo Yomporpa' eñotatan israelena'tarnesha' attoch a'pocatanetañ Parets all aspen'to Sinaí'pno, ñeñtpa' atarr yoro'chen. Allña aspen'to ñerra'm esesha' chapats ama't pa'rrpapa' allorocmach errottoset all. Ñeñtña aspen'terpa' all huorten tso' ñaña ama machecmeto, añcha'no'chtana, huomenquëshaten.

19 All e'morrtena ñaña poctor atarr yoro'chen. Atto eñorana'tanet Paretspa' atarr añcha'no'chen enteñet. Ñeñto'marña acheñenesha' ñeñt e'mñotene' atto eñorena Parets, ñetñapa' atet otyenet. "Ñeñtepa'ta amach allo'na eñorana'tnenye Parets."

20 Ama eshcaye' ahuantenaye' enteñeto ñeñt atet otarettenet: "Ñerra'm esesha' chapats ñeñt aspen'tero ama't pa'rrpapa' amsaret'tetepa' — arrolle'taret'tetepa'ch amapa' enapecharet'tetepa' panmeto. Ama't ñaña eyarra muetsetepa'."

21 Ama't Moiséspa'cho'ña atarr yoro'chen enteñ, ama't ñapa' atet otanet: "Ama't napa' nem'cha'na'teño'tpa' cha neyonshema'ten."

22 Tarraña sapa' ama sentare aspen't all añcha'no'chtana

Parets. Sapa' aña senterr ñeñt Siónapen ñeñt toma'ntenaya all yeçhena Yompor ñeñt ama arromñaťeshayaye. Ñaña aña senterr Jerusaléñ ñeñt toma'ntenaya Yompor pa'netser ñeñt pue'ntaño'tsen. Allña'apa' shonte' coshame'tampeña melañoteñnesha' shonte' nanac. Ñeñt allpon allo'tsa'yenpa' ama e'ñotuapahuoyaye.

23 Ñaña sapa' aña senterr allohuen ñeñt puechemerasha' o' perr Parets ñeñt apçhetsa pame'ñeñotet ña. Ñetña allohuenetpa' ñeñtet aquellcayetet pa'so'chñeçhno Yompor pue'ntaño. Ñaña sa te'pa' o' senter Yompor ñeñtcha' yeñotaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuero. Ñaña allo'tsa'yen allohuen acheñenesha' puecamquēñeçhno ñeñt e'ñe pocte' enten Yompor; ñeñtña'pa' o' e'ñe etsotatuanet all pue'ntaño.

24 Ñaña te' o' senter ñaña Jesús ñeñt eñosets yocop Yomporesho attoch e'ñe cohuen a'pocatonay etserra. Ñaña o' señoterrñañ po'rras ñeñt ashatarettatsa alloña o' ap'retnaretterraña yo'chñar. Ñeñt'pa' elloña e'ñe cohuen yenpuerrey. Ñeñt'pa' ama atteyaye ñerra'm Abel po'rras ñeñt ashatarettatsa ahuat.

25 Ñeñto'marña te'pa' o'ch notas, se'mñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'mñotaye'te Yompor allempo eñorana'tanete't arr patsro, ñetña'pa' ama eseshaye' qeshp'atso. Ñeñto'marña yeñoteñ ñerra'm yapa' amach ye'mñotere yaña Yompor ñeñt ye'ñorana'tenaya te' pue'ntaño't, elloña yapa'cho'ña ama't puesheñarrotēyapa' amach eseshay qeshperrtso.

26 Ahuat allempo eñorana'tanet aspentot, po'ñoñña'pa' cha pelle'llchatenan pats. Ñaña te'pa' elloña o' alla atet oterrerr Yompor ñeñtcha' atet perrerr; ñeñt'pa' atet oten: "Elloña esempohuañen po'pocheño'pa' o'ch alla nepelle'llchatterrerr pats, tarraña amach ñap'tayaya pats nepelle'llchatterro, enta'nachña nepelle'llchatterr."

27 Ñeñtña po'ñoñer all oten "po'pocheño" ñeñtña yeñotatene' esempohuañenpa' ahupore'taretterrach allohuen ñeñt ayeçhcataret ñeñt apelle'llchatpo'. Allempopa' añach a'puerrtsa ñeñt ama apelle'llchatpahuoyaye.

28 Ñaña atto amcha'tarettena Yompor, ñeñt'pa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt o'patatenyapa' ama ahua-pore'tpahuoyaye. E'ñe yemcha'na'teño'tpa' e'ñepa'chña

cohuen yesherbeñ Yompor ñeñtcha' e'ñe coshatene' ña.

²⁹ Tarro'mar yeñoteñ ñeñt Yeyomporer yepen ñapa' atarr Parets e'ñe atet ñerra'm tso' ñeñt e'nuene' ama't erra'tsena ñeñt ama errot apen yenteno.

13

Atetcha' yepa attoch e'ñe cohuen yocshach Yompor

¹ Atterepa'ch chocma semorrentannena allohuenes atet ñerra'm e'ñe semo'nasheñ sepanna'tuena.

² Ñaña amach sepsatsto attoch e'ñe cohuen sagaḡ allohuen ama't esesha ñeñt huapyetsa sepaclo. Tarro'mar ama señotanna'tuena; ñato'rraña añ saguën ñeñt mueñen Yompor atet pena po'potantañ ñetpa' añepa't agapuet mellañoḡeñ.

³ Ñaña chocmuepa'chña seyerepya ñeñt ayotamḡsaretetyetsa. E'ñech cohuen sellcapretenanet atet ñerra'mrrate' sapa'cho'ña ayottamḡsaretes e'ñe parro. Ñaña ñeñt amuerochtataretetyetsa e'ñepa'ch cohuen sellcapretenanet ñamet tarro'mar sapa'cho'ña señoḡeñ attecma errotenopa' chocmach semuerochtена saña e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas setapor e'ñepa'ch cohuen sentña ñeñt atto seyorannena. Ama't parrochapa' amuepa'chña se'namḡsanna'tatsto. Yacmapa' amach chetatstano coyanesha' ñeñt ama puetaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñt chetene' ñeñt ama puetaporeyaye ama't ñaña ñeñt aguëne' ñeñt ama puerrollareyaye.

⁵ Ñaña te'pa' o'ch noterrser po'poñ: Amuepa'chña añña atarr seye'chapretatsetyesatsto quelle. E'ñepa'chña añña socshena ñeñt e'ñe allpona sechyen. Tarro'mar Yomporpa' atet otene: "Napa' ama't ahuatapa' amach nequechpuerso, amach na'ypo'ñerrso ama't ahuata."

⁶ Ñeñto'marña yeyemteñoḡ Yompor e'ñech yocsheñeshoḡ chocmuepa'ch atet yoten:

Yomporpa' ñeñtña yeyenpuene' ñeñto'marña amach es yemcha'tatsto. Ama't errotuanen muene' peney po'potantañ Yomporpa' ñach yecuanḡpene'.

⁷ Ñaña seyerpueñoḡ chocmuepa'ch cohuen senteñ ñeñt a'potene' Yompor po'ñoñ socop, ñeñtcha' señotatnomue' cohuen. Ñaña o'ch soctape'ch ñeñt atarr cohuenare' ortatyesnomuet sesho, atto ñetpa' e'ñe cohuen yemteñet

Yompor, sapa'cho'ña atetcha' sepa samña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñfach attera ayemuetpotena.

⁹ Ñeñto'marña amach seyemtatstoña ñeñt po'poñechno yeçhateñets ñeñt ama atteye' ayçhatareteso ahuañmo'choteñ. Tarro'mar añña poctetsa o'ch huomenc yeþa' yeyoçher e'ñe Yompor pueморrenteñoŕey atto atarr yenpueney e'ñe atfa. Ama añoŕeye' huomenc yepenoña yeyoçher atto es yerra'yen amapa' atto es yetore'tyena. Tarro'mar ñeñt cotene' añ yeçhateñets rreñtsocpa'na, ñeñt yeçhateñtsorpa' ama yenpuenaneto attoch huomenc þa'nmuet pueyoçher Yomporcop.

¹⁰⁻¹¹ Ñehua, yeñoteñ ñeñt corneshatets judioneshacop ñerra'm esempo muetsenet eyarra all altaro ñeñt po'chñarecpuet, ñeñtña eyarra po'rraspa' ñeñtpa' o'ch anem cornesha' e'ñe allohuanen Parets po'ponro ñeñt ochñartsocpatets. Tarraña ñeñtña eyarra po'chetspa' amach esesha' rrenaye. Ñeñtña po'chetspa' o'ch anmet a'yo all ama acheñempañoŕyaye, allcha' chamoset. Tarraña te'ña yocop ñeñt amtsare'tterrtsa yo'chñarecop ñeñtpa' Cristo. Yapa' ñeñt po'ñoñ pocrrañ pen yecamquẽñ allohueney ñeñtey yemtenaya ña. Tarraña ñeñt attera corneshatets judionesha' poctapñacop all po'prahuo peñet, ñetpa' amach errotenoŕ pocrrañ petoña Cristo.

¹² Ñaña atto anenan judionesha' eyarra po'chets a'yo all ama acheñempañoŕyaye, ñeñtpa' añ toma'ntena atto Cristopa'cho'ña anmet a'yo all ama acheñempañoŕyaye allcha' e'ñe pueмуeroçhtateñoŕetpa' o'ch rroma. Attoña e'ñe ña po'rroso a'cohuentaterrey Partsocop.

¹³ Ñeñto'marña te'pa' e'ñepa'chña yesuanom ñeñt ahuat yoctapña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemueroçhtapretosya yaña all atarr otnare'tyeñet.

¹⁴ Tarro'mar añe patserpa' ama añeyaye ñeñt po'ñoçh ya'netser yepen tarro'mar ñeñtpa' huañerrcha'. Yapa' añña ye'nen ñeñtcha' ya'netser yeperr ñeñtcha' yenterr Yompor pue'ntaño ñeñt ama ahuañaño ama't e'ñe errponaña.

¹⁵ E'ñe yeyemteñoŕ Jesucristo çhocmuepa'chña ya'ye'choçhtateññañ Yompor. Atto çhocma ya'ye'choçhtateññañ ñeñtpa' añ toma'ntena ñeñtcha' yapueñ Yompor atet pete't ahuat o'ch muetset eyarra ñocop. E'ñepa'chña ya yenamoŕ ya'ye'choçhtateññañ pa'so'cheñ

attochña e'ñech yocshateñ.

16 Ñaña chocmuepa'chña e'ñe cohuen seyenpanna ñaña e'ñech cohuen sa'muerañtena. Tarro'mar te'pa' ñeñña atto es yapueñ Yompor ñeñcha' atarr coshatene' ña.

17 Ñaña ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anarettenet ñetcha' cohuanmpenet secamquẽñ Yomporcop. Ñaña Yomporpa' eñotatuerranetcha' ñeñt atet pa'yenet, ñato' e'ñe'e' cohuen cohuanmpenset ñato'pa' amate' cohuenaye' cohuanmpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach errotenot coshaterrsetoña saña.

18 Ñaña te'pa' o'ch notas, chocmach sema'yochampenya. Yapa' yeñotena yeyochro ama eñalle attoch po'poñ yentanena. Yapa' añña yemnen chocmach yorrtatyen ñeñt atarr cohuen enten Yompor.

19 Ellopa' o'ch alla noterrser chocmach sema'yochampesna allochñapa' amach atarr atomatatstopa' o'ch alla necherrerr sesho.

Arrpa' all so'tnerranet po'cartot

20-21 Te'ñapa' Yomporpa'chña e'ñe ahuaencat sepene' ama't allohuen pa'namenacop ñeñt atarr sherbets ñocop. E'ñe yame'ñeñot Puechemer ñeñt Jesucristo ñachña ya'cohuentatene'ña ora yocpaña ñeñt atet yocape'chyen yeyochro allochñapa' attochña e'ñe cohuen yocape'cherr ora allohuen ñeñt cohuen enten ña. Attochña e'ñech cohuenare' sorrtatyen ñeñt e'ñe atet muenen ña. Ñeñtpa' ñeñtara Yompor ñeñt e'ñe yocshatene' yeyochro ñaña ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñña atarr cohuen yecuanmpene' atet ñerra'mrrate' ñeñt atarr cohuen cohuanmpene' po'carrneror. E'ñe po'rrasoña alloña a'poctatonay ñeñt e'ñe etserra ñeñña a'poctateñetspa' ama't errponañapa' amach huañerro. Te'ña e'ñe tayoteñpa' yecohuentatoñepa'ch Cristo ama't errponohuañen. Ñeñtpa' atetepa'ch Nompore yocop.

22 E'ñe allohuanen masheñeshacha' ñaña nochaneshacha' o'ch alla noterrser, e'ñepa'ch cohuen se'mñoton neñoñ ñeñt allpon o'ch alla noctape'chatterres tarro'mar ama atonaye' ñoñets nequellquẽnaso.

23 Ñaña o'ch eñotatas masheñ Timoteopa' o'ch alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuomicha'ch necartot allohuen ñeñt sa'micha'tareternesha' sepa'yen, ñaña allohuen masheñneshačno ñeñt pueyochresha' pen Parets all sesho. Ñaña italio'marnesha' ñeñt ame'ñetsapa' ñetpa'cho'ña mueneñet o'ch huomicha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñtach notas, ñeñtpa' attetepa'ch Nompore. Allohua.

AÑ SANTIAGO PO' CARTA SANTIAGO

*Atto Santiago quellcan carta allohuenacop ñeñt' atta par-
ratse'tyets allemeñ*

¹ Masheñneshacha' ñaña noçhaneshacha' ñeñtes Israel puechemerasha' po'mrenñes, ñeñt' çharrasheña puechena epsheña ñeñtña po'mreneñ sepene'ña sa, ñeñtes atta parratse'tyets allemeñ anetso'mar. Na Santiagon sequellquene'ña añ carta ñeñten torretsa Yomporecop ama't ñaña Puechemerecop Jesucristo ñeñt' Yepartseshar yepen. Te'pa' o'ch nehuonñcha'tas allohuenes añ necartot.

Attoch ya' huanten allohuen topateñets

² Ñaña te'pa' o'ch masheñneshacha' ñaña noçhaneshacha' notas, ñerra'm esempo huaponasa pa'namen topateñetspa' sapa' socshepa'ch nanac.

³ Tarro'mar sapa' señoñeñ ñerra'm çho huaponaya topateñets, ñeñtpa' añecopcha' huapa attoch topatenya' ñerra'm po'ñoçhte' yame'ñena. Allochñapa' attoch çhocma es ya' huanten.

⁴ E'ñe pocte' allo'nepa'ch sesen ahuantahuanmue' allohuen topateñets, allochñapa' attoch poctacma huomenc sepa' seyoçher Yomporecop, ñaña attoch amach es sepallteno ama't mamesha atto same'ñeña Yompor.

Yomporpa' çhocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeñt' cohuen enten Yomporpa' sapa' añcha'ña senam Yompor, ñapa' çhocmach es eñotatey, tarro'mar ñapa' e'ñech pocsheñesha' es apueney allohueney, amachña ñeñtapa' cha che'ptare'tye.

⁶ Tarraña ñerra'm esempo es senamueñ Yomporpa' e'ñech seyemteñoñ es sanañ. Amach cha se'çharrtatsto seyoçhro ama't mamesha. Tarro'mar ñeñt' çhocma eçharrtetsa pueyoçhropa' amach e'ñeye' yemtenano Yompor ñeñto'marña ñeñt' atet petsapa'çhach ottena ñerra'mrrate' oñ pue'mo'yer ñeñt' allemateñ anen mōrr.

⁷⁻⁸ Ñeñt' atet petsapa' eñoçhetepa' po'ñoçhpa' amach es ape Yompor, tarro'mar ñeñt' atet petsapa' amach patrraye' cotape'cheno. Atet ñerra'm te'pa' ñato' po'poñcha' cotape'chen, ñato' tsapatñapa' o'chçho' cotape'chenan po'poñ. Ñeñt' acheñerpa' çhocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar

allempo Yomporpa' atetcha' entenes ñerra'mrrate' ñeñtes nanac sherbets.

¹⁰ Ñaña añ masheñer ñeñt echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñt eçllayoret ñeñtpa' mamecpa atet pena ñerra'mrrate' ta'te' puerorer ñeñt nanac auyaña.

¹¹ Tarro'mar ñeñt ror atetpa' ñerra'm o'ch huapa'muena atsne', ñerra'm o'ch atserrtapa' çhach a'uyatoñña pue'chor, añña puerorerñapa' o'ch shorna'tua; ñeñtña atto cohuentenapa' o'ch huañ. E'ñe atet penaña ñeñt eçllayoret. E'ñe puechecma'teño'tpa' huañerrcha' ñaña.

E'ñe yañeña yemnenño't topateney oneñt

¹² Nanac cosheñtso'tsen allohuen ñeñt ahuantene' ora pa'namen topateñets, tarro'mar ñerra'm esempo ahuinta'huan ora topateñetspa' nanaccha' cohuen entuer Yompor. Allempopa' aphuercha' Yompor ñeñtcha' atarr coshaterre' alloch ñapa' corretsach tayoteñ ama't errponañohuen. Ñeñtpa' añña o'patatena allohuen ñeñt morrentenaya ña.

¹³ Ñaña te'pa' o'ch notas, ñerra'm esempo e'ñe sañeña semneñño't o'ch sepa ñeñt ama cohuenayayepa' amach sotatsto, "añpa' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa ñaña ñeñt ama cohuenayaye. Ñeñto'marña ñapa'çho' amach erro'teno't topatye yaña.

¹⁴ Elloña añmapa' e'ñe sañeña semneñño't attoch huaponasa topateñets o'ch sepa ñeñt ama cohuenayaye.

¹⁵ Tarro'mar ñerra'm esempo es yemnatse'tyen yeyoçhro, ñerra'm o'chçho' ye'pa atetpa', ñeñtpa' ñeñtña yo'chñar yepen. Ñaña ñerra'm çhocma allo'na yesen pa'nmue' ñeñt ama cohuenayayepa' e'ñe yo'chñarotpa' o'ch yechenquerra.

¹⁶ Masheññeshacha' ñaña noçhaneshacha' e'ñe nemorreneteñetspa' o'ch alla noterrser, amach sepantatsche sañeña. Po'ñoçhpa' ama Yomporeye' yetpatenaye attoch ye'pa' ñeñt ama cohuenayaye.

¹⁷ Yomporpa' e'ñe cohuenare' es apueney ñeñtcha' allo'na yeyenpuene' ñeñtara ñeñt mueñennay pue'ntaño't. Ñaña ñeñtara Yompor ñeñt yeçhcate' allohuen ñeñt yeçhoyo'tam'pene' pue'ntaño't. Tarraña erro'teno e'ñe puechop'e'cheño'tpa' amach tama çhoyo'tam'penye. Tarraña Paretspa' ama atteye' peno. Ñapa' amach ellopa' alla a'po'poñeta'm'perrye ñeñt atet muenateney.

18 Allempo yame'ñerrñaña po'ñoñ ñeñt e'ñe po'ñoçh atet oteneý ñeshoñña'pa' ye'ñallettera atet ñerra'mrrate' e'ñe puechemerey ñeñt e'ñe po'moter pen ñeñt anaret e'ñe ñocop. Tarro'mar ñeñt'pa' atet muenen ña.

Añpa' ñeñt'cha' atet yesherbe' Yompor e'ñe cohuen

19 Ñeñto'marña masheñneshacha' ñaña noçhaneshacha' e'ñe nemorrenteñotespa' o'ch neñotaterrser po'poñ. Sa allohuenes añ poctetsa çhocmach pocte' señch o'ch se'mñoch cohuen ama't erra'tsena ñeñt'cha' serrpare'tatets. Añcha'ña çhocmach serrmuen señoñ. Ñaña amach e'ñe atto'a sa'tsrre'ma'yeno, çhochña ñanom es soctape'ch ñato' atsrre'moçhente' ñeñt atet otenset, ñato' amate'.

20 Tarro'mar e'ñe ya'tsrre'mueño'tpa' amach erroteno't yet-sotoña ñeñt atet pocte' enten Yompor.

21 Ñeñto'marña sapa' o'ch sequeçhpa'huerr sosya'tsañ ora allohuen ñeñt shonte' sepa'yen ñeñt ama pocteyaye Yomporcop. Añcha'ña sapa' o'ch sagapoñ Yompor po'ñoñ e'ñe señmañesha'. Tarro'mar ñerra'm o'ch çhaponaya Yompor po'ñoñ e'ñe yeyoçhropa' ñeñt'pa' ñeñt'cha' ya'queshpaterre' esempohuañen yecamquëño't.

22 Ñaña sapa' amach e'ñe orrena se'matstoñe Yompor po'ñoñ, çhochña sorrtatyesa ñeñt atet oteneý. Tarro'mar ñeñt e'ñe orrena e'muene' Yompor po'ñoñpa' ñeñt'pa' ñañeñach shequëtsa tarro'mar çhate' otenapañ ñato' ñeñtate' poctetsa ñocop attoch qeshperra.

23 Ñaña ñeñt atet petsapa' çhach ottena ñerra'mrrate' ñeñt atta cohuetsa rerpo.

24 Añeçpach cohuenta o'ch entan erroten'te' orrtena pa'clloyo't. O'chña entuan ñeñt atet orrtenapa' allempoñapa' o'ch ahuerr. Allempoña çherr a'yopa' o'ch alla puesuerran ñeñt atet orrtena pa'clloyo't.

25 Tarraña ñeñt'ña e'ñe pomnenño't ma'yochrenaya Yompor po'ñoñ ñeñt e'ñe cohuen atet oteneypa' ñeñt'ña'pa' ama atteye' peno ñeñt atet pena ñeñt e'ñe orrena e'muene' Yompor po'ñoñ ñeñt atta puesene' ñeñt atet oteneý Yompor. Añcha'ña çhocmach orrtatyenan ñeñt atet oten Yompor po'ñoñ. Elloña ñeñt atet petsapa' nanaccha' cosheñtso'tsen.

26 Ñerra'm esesha' otets ñapa' nanaco' cohuen sherbenan Yompor, tarraña ñerra'm ña ama anenano po'ñoñpa' ñeñt'pa' ñañeñach shequëtsa. Tarro'mar ñerra'm atterach yeñosatse'tyenpa' amach po'ñoçhaye' yesherbeñe Yompor.

27 Añña e'ñe pocte' enten Yompor Apa ñeñtcha' atet yesherbeñ ña e'ñe cohuen: O'ch yeyenpueñ huocchane-shachno, ñaña rretorrnanasha' ñerra'm esempo es mue-rochtatenahuet. Ñaña yapa' amach ya'sosyatatsto yechets ñeñt atet p̄atse'tyena ñeñt ama ame'ñetso arr patsro.

2

Atto amach puesheña'ttsa cohuen yentatsto

1 Masheñneshacha' ñaña nochaneshacha' te'pa' o'ch noterrser po'poñ. Sa e'ñe same'ñeñoñ Yepartseshar Jesucristo ñeñt e'ñe cochneshare' orrtatetspa' amach puesheña'ttsa e'ñe cohuen sentatsto. Sapa' e'ñech cohuen senteñ allohuen acheñenesha'.

2-3 Ñato' sa errotenopa' o'ch sapčhena allohuenes Yompor pa'paclo. Allempoña sapčhenapa' ñato' o'ch huapa puesheñarr ñeñt chorrenaya ñeñt nanac cohuen, ñeñt nene' anillo orotlullen. Ñato' ñapa' e'ñech cohuen sagaḡ o'chcho' sotaḡ: "Panorros arr allame'tets e'ñe cohueno." Ñato' e'ñech allempocma o'ch huapa ñaña ñeñt atarr huocchañ ñeñt čha shetsre'she'muen pa'shtam. Ñato' ñeñtñapa' čhach sotaḡ: "Papa' alla p̄atomos tarronet, amapa' alla p̄anorros patso."

4 Tarraña ñerra'm atet sepenapa' ñeñtpa' amach allo-huenacmaye' cohuen sentanneno. Ñaña čhach sottena ñerra'mrate' sañeña eñotene' ñeñt acheñer nanac sherbets. Tarraña ñerra'm atet yepenapa' ñeñtpa' amach cohuenaye' yoctape'cheno.

5 Masheñneshacha' ñaña nochaneshacha' e'ñe nemorrenteñotes te'pa' nemneñ o'ch se'mñnoten ñeñtcha' atet notas. Elloña Yomporpa' añña nanac muenen o'ch acerrran allohuen ñeñt nanac huocchañetets añ patsro, attoch e'ñe pame'ñeñoñtet ñetpa' echerretcha' esocmañen Yomporeshot. Esempohuañenñapa' o'ch aguërret ñaña ñeñt o'patatenanet Yompor all añcha'tarettena pue'ntaño. Ñaña ñeñt o'patatenya allohueney ñeñtey morrentenaya ña.

6 Tarraña sañapa' čhaña semneñ o'ch sepencach ñeñt huocchañetets. Sapa' ama't señoñeña ñeñt nanac ečllayoreḡpa' ñeñtña es aprratam̄psañ, amapa' o'ch temantas añcha'taretesho.

7 Ñaña ama't señoñeña ñeñt nanac ečllayoreḡpa' ñeñtña nanac achm̄are'tene' Cristo pa'so'cheñ ñeñtara ñeñt nanac añcha'na'tpo' yenten ya ñeñtey Cristona'tarey.

8 Ñerra'm čhocma semorrentannenapa' allempopa' o'ch set-sotua añ ñoñets ñeñt atet anaret Yompor po'ñoño ahuatoteñ, ñeñtpa' atet oten: "O'ch atarr cohuen pemuerya p̄amo'ts e'ñe

atet atarr pemorrentena ñañeña.” Añ ñoñets ñeñña nanac sherbets, ello metana'tuenan po'poñečno. Ñerra'm atetcha' seřapa' allempopa' amach es sepallteno Yomporecop.

⁹ Tarraña ñerra'm sapa' e'ñe puesheña'ttsa semorrentenapa' ñeñtpa' allotña chocma yo'chña'ten. Ñaña ñerra'm atet yepenapa' nanaccha' yeyoren yo'chñar, tarro'mar ama atet yepeno ñeñt atet otene yomporecop po'ñoñ ñeñt atet anaret.

¹⁰ Ñaña ama't e'ñe yeychatset allohuen Yomporecop po'ñoñ ñeñt atet anareña', ñerra'm paterrñapa' ama atteye' yepeñepa' Yomporeña' o'ch entene y ñerra'mrrate' o' ora yepanta'huoñ.

¹¹ Añ Yomporecop ñeñt yotene' “amach sechtapretatsto taporets” ñeñtara Yomporecop ñeñt yotene' ñaña “amach semtsanna'tatsto.” Ñeñto'marña ama't ama yechtapretatsto taporetsña' ñerra'm errotenopa' machayo'a yemtse acheñ Yomporeña' o'ch entene y ñerra'mrrate' o' ora yatpare'tuoñ po'ñoñ ñeñt atet anaret.

¹² Ñeñto'marña sapa' chocmach seyerpa atto esempohuañen Yomporecop e'ñotatyesuerrecha' e'ñe errotencha' entyesuerrey. Tarro'mar ñato' yepena ama't ñeñt atet otene te' Cristo po'ñoñ ñeñt atet anaret ñeñt ama amuerochtatañeyaye. Ñeñto'marña sapa' e'ñe señoñeño atetpa' ama't errotena seña' e'ñepa'chña cohuenare' señoñen. Ñaña e'ñe señoñeño atetpa' e'ñepa'ch cohuenare' es sorrtatyen.

¹³ Ñaña sapa' señoche'pa'ch ñeñt ama morrentenayo te' pamo'tspa' ñapa'cho'ña esempohuañen allempoch e'ñotatyesuerrey Yomporecop e'ñe errotencha' entyesuerrey, ñapa'cho'ña allempopa' amach eseshaye' morrenterrayo. Añña ñeñt morrentenaya te' pamo'tspa' esempohuañeña allempoch e'ñotatyesuerrey Yomporecop e'ñe errotencha' entyesuerrey, allempoña ñapa' nanaccha' amuerare'terra.

Ñerra'm po'ño'ch yame'ñenapa' choch yorrtat ñaña ñeñt cohuentetsa ñocop

¹⁴ Masheñeshacha' ñaña nochaneshacha' te'pa' o'ch notas. Po'ño'ch ama sherbenoña añ acheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñña acheñer atetpa' amach po'ño'chaye' ame'ñeno. Amachca'ye a'queshpaterena ñeñt atto oten e'ñe orrena ñapa' ame'ñeno'.

¹⁵ Ñehua, ñato' o'ch netma'ntacha atet. Ñerra'm puesheñarr masheñ, amapa' yo'ch palltenet ñeñtcha' chorret, amapa' ñeñtcha' rret allempo,

16 tarraña ñerra'm sapa' atfa sotypeñ: "Ahua'ta, Yomporepa'chña pã'nataya. Eñalletepa' ñeñtcha' pechorra, ñaña ñeñtcha' perra'." Tarraña ñerra'm amaña es sape ñeñt palltenapa' atetpa' amaca'ye choye' es sesherbena.

17 Ñeñtpa' atet pena ñaña ñerra'm esempo atfa yoten, "napa' name'ñena", tarraña ñerra'm ama yorrtateno ñeñt cohuentetsa Yomporecoppa', ñeñtña atfo yoten, napa' name'ñenapa' amach es sherbena. Chach yottena ñerra'mrrate' o' huañerr atfo yame'ñena.

18 Ñato' o'ch netma'ntacha atet. Ñato' puesheñarrpa' o'ch otan po'psheñeñ: "Papa' e'ño' peyemteññaña ñeñt atet oteney Yompor po'ñoñ, tarraña amaña porrtatyenoña ñeñt atet oteney Yompor po'ñoñ. Tarraña napa' e'ñe nepohuen ñeñt cohuentetsa Yomporecop. Ñehua, ¿erra'tsenoteyte'ña e'ñe pocte' enten Yompor?" Ñehua, te'pa' o'ch notap ñeñtep atet otets: Po'ñoñch ñerra'm ama yepeno ñeñt cohuentetsa Yomporecoppa' amach errotenot yeñotache po'psheñeñ ñato' po'ñoñchte' yeyemteññaña Yompor po'ñoñ. Tarro'mar ñerra'm po'ñoñch yame'ñenapa' chocmach yorrtat ñaña ñeñt cohuentetsa Yomporecop.

19 Ñaña papa' peyemteño'tpa' peñoteñ Yomporpa' e'ñe patrra. Ñehua, ñeñtpa' e'ñe pocte' atet, tarraña oneñetpa'cho'ña eñotenan ñaña atet. Tarraña ñapa' ama't eñotenaneña Yomporpa' ama't e'ñe patrra, tarraña po'yorñoñach eñoteñ, tarro'mar ñapa' eñotena amach qeshperro.

20 Te' papa' amate' peñoteña'. Chote' pemneñ o'ch neñotatap atfo ñerra'm ama yepeno ñeñt cohuentetsa Yomporecoppa' ama't yoteneñ yame'ñena e'ñech orrena atet yoten.

21 Ñehua, Yomporpa' e'ñe pocte' entan ahua't yatañ Abraham allempo muene' muetsaneñ puechemer Isaac Yomporecop,* tarro'mar ñapa' añ orrtaten ñeñt cohuen enten Yompor.

22 Ñapa' e'ñe pocte' entan Abraham tarro'mar e'ñe pueyemteño'tpa' orrtatuan ora ñeñt atet och Yompor. Ñeñto'marña yeñoteñ Abrahampa' e'ñe poctacma ame'ñane't Yompor.

23 Allempo atet pe'tpa' atfoña e'ñe etsotuan Yompor po'ñoñ ñeñt atet aquellcare't ahua'toteñ Génesis, ñeñtpa' atet oten: "Abrahampa' nanac yemtana Yompor, ñeñto'marña e'ñe pueyemteño'ta Yomporña' e'ñe pocte' eñche't. Ñeñto'mar

* 2:21 Ñehua, ahua't Yomporpa' ahua't otan Abraham muetsanepa'to' puechemer ñocop. Tarraña ñapa' añecpa atet och attoch topach ñato' po'ñoñchte' ame'ñeña. Ñeñto'marña Abrahampa' autsa muetsayeñ puechemer Yomporecop, tarraña ellopa' ama muenache Yompor.

Abrahampa' atet ochete't, añmapa' ñeñt e'ñe parro yemtena epuet Yompor."

²⁴ Ñeñto'mar yeñoteñ Yomporpa' e'ñech pocte' enteney ñerra'm esempo yorrtatyeññañ ñeñt cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama ye'pohueno ñeñt atet muenen ñapa' amach errotenot pocte' entyeña Yompor.

²⁵ Tarro'mar ama't Yomporpa' e'ñe pocte' entan ahuat coyanesha' ñeñt pa'so'cheñ Rahab, ama't ñapa' allempo pa ñeñt e'ñe pocte' ent Yompor ñocop. Ama't ñeñt coyanesha'pa' nanac ecañoreshat, tarraña ñapa' e'ñe añoña pocte' eñch Yompor atto ñapa' agapan e'ñe cohuen pa'paclo ñeñt mueña ahuat Josué ñeñtcha' entenaya' ñanom pats. Allotpa' ñaña ahuo't gaterranet po'poñ toñ allcha' oñerret attoch ama rromuerraneto allo'marnesha' ñeñt e'moñe'tenahuet. E'ñe atet puepeñoña Yomporña' e'ñe pocte' eñch e'ñe attecma ñerra'm Abraham.

²⁶ Ñeñto'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeñt poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'neñ puecamqueñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teñoña nanac yochña'ten Yomporecop

¹ Masheñeshacha' ñaña nochaneshacha' te'pa' o'ch notas po'poñ. Ama pocteyaye o'ch sechen shonte' ñeñt muenets o'ch cotape'chaten ñeñt cohuentetsa Yomporecop. Tarro'mar señoñeñ ñeñtey cotape'chatets cohuen Yomporecoppa' ello nanaccha' yoro'cheno'tseney ñerra'm esempo yepena ñeñt ama cohuenayaye tarro'mar Yomporpa' amach pocteye' entenye ama't e'ñe mamesha.

² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teñoña' ñeñtña po'ño'chpa' e'ñech cohuen cotape'chen, ñaña ñeñt atet acheña' e'ñech eñoteñ attoch huenatan ora ñeñt atet muenatse'tyen yechets.

³ Atet pena ñaña cahuall. Ñerra'm echenan attoch yame'ñacha, E'ñe puenamo'tpa' esheccha' yanemñ all yesechateñ. E'ñe puenamo'tpa' o'ch yame'ñacha ora pue'mocrohuen.

4 Ñato' o'ch netma'ntacha ña'ña ñeñt' atet pena bote ñeñt' chope'chets oño. Ñehua, botepa' ama'tcha' nanac añecmuen noñtpa' e'ñe puepopa'pōtpa' o'ch aneñet all sechateñ pamo'mte'. Ña'ña ama'tcha' puepopa'p'pa' añetollpach, ña'ña ama't mōrrpa' mueneñeñcha' o'ch anem' a'yenet allenet ama yesechateñe, e'ñe puepopa'pōtpa' o'ch e'ñe cohuen aneñet allenet sechateñ pamo'mte'.

5-6 Atet pena ña'ña yenam. Yenampa' ama't añetolla yechetspa' atarrcha' pa'namen esocmañen yeñosyen allot. Ña'ña ñeñt' atto yeñosatse'ten sosey e'ñe yenamōtpa' ñeñtpa' atet pena ñerra'mrrate' tso'. Ñehua, tso'pa' ama'tcha' añetolla ya'torapa' mameshapa' o'ch epa'hua erracmañen puetsato'mar, allotpa' o'ch a'poyuonay ama't ora ñeñt' nanac yemorrentena. Ñeñtpa' atet pena ña'ña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoñapa' o'ch cha a'huañerran ñeñt' cohuentetsa Yomporecop. Tarro'mar ñeñt' atto yeñosatse'tyenpa' allot huena esocmañen sosya'tsañechno ñeñt' añe patsro'tsen. Ña'ña ñeñtpa' a'sosyatennay ora allohuen yocpa'ña. Ña'ña allohuen eñosatse'teñetspa' arrot huena e'ñe oneñet pa'netsrot, allara coñcha'puetso all parraren tso' erraparen. Ñeñt'cha' a'sosyatene' ora allohuen ñeñt' atet yocrena arr patsro.

7 Ñehua, allohueney acheñeypa' e'ñe pomnaren ye'pohueñ allohuen berrochno, ña'ña otechno, ña'ña allohuen shechpechno, ña'ña ama't ñeñt' ye'cha'yetsa oño'mar. Ora añechnopa' e'ñe pomnaren ye'pohueñ.

8 Tarraña atto yeñosatse'tyen yenamōtpa' ama esesha' pomnaren penaye. Tarro'mar atto yeñosatse'tenpa' amate' errotenot yeunache, ñeñto'marña chocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' sheche'p ñeñt' nanac amtsañ. Sheche'p amtsañpa' ñerra'm cho a'chay mameshapa' o'ch muetsay.

9 Ña'ña añ ñeñt'ara yenamōtpa' ñato' errotenopa' o'ch ya'ye'chochtatoñ Yompōr ñeñt' Yepartseshar yepen. Tarraña errotenopa' ñeñt'ara añ yenamōtpa' ñato' o'ch yesasare'ch yamo'ts ñeñt'ara ñeñt' ye'chcat Yompōr ñeñt' puetma'ntatara atet ñerra'm ña.

10 Ñeñto'marña masheñeshacha' ña'ña no'chaneshacha' sapa' amach atet se'patsto tarro'mar ama pocteyaye e'ñe yenamōtpa' allot yenamateññañ yamo'ts Yompōr pa'nateña, ñato' elloñapa' o'chcho' alla yesasare'ter yamo'ts ñeñt'ara añ yenamot. Sapa' amach atet se'patsto tarro'mar po'poñ Yompōr pueye'chcatar, ñeñtpa' ama atteye' p'anneneto.

11 Ñato' o'ch netma'ntacha atet: Ama't sapa' señoñeñ ñerra'm erroť poten oñ e'ñe cohuenpa' amach erroťeno poto ñaña all oñ ñeñť čha rreno'sen.

12 Ñaña masheñeshacha' ñaña nočhaneshacha' ama't sapa' e'ñe señoñeñ, ñerra'm yenare't poporrpa' amach pue'mer p̄anoña ñaña parte allempo me'ten, amapa' ñerra'm yenare't ompa' amach pue'mer p̄anoña ñaña poporr.* Ñaña ellopa' e'ñe señoñeñ, ñerra'm erroť poten oñ e'ñe cohuenpa' amach erroťenoť poto ñaña all oñ ñeñť čha poserrsastena. Ñeñťo'marña yeñoñeñ yocoppa' ama pocteyaye o'ch yorrtat ñeñť epa ñeñťara yenamoť. Ñeñť paťerrpa' atto ya'ye'chočhtateññañ Yompor, po'poñña'pa' o'chčho' alla yeñosatse'terr allohuen pa'namen sosya'tsañ ñeñťara yenamoť.

Añpa' ñeñť atet pena eñoteñets ñeñť huetsa e'ñe yañeña yocťapñoť

13 Ñehua, te'pa' o'ch noterrserr po'poñ. Ñerra'm eñall se-sho ñeñť otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñť e'ñe cohuen achen' attoch acheneshapa' eñochet po'ñočhepa't eñotuenan ñeñť cohuentetsa Yomporecop. Tarraña ellopa' amachña čha ommo'chatsteto atto e'ñe cohuenare' es p̄a'yenet. Tarro'mar ñerra'm po'ñočh es yeñotenpa' o'ch yeñočh ñaña ñeñť atto es ye'pa'yen e'ñe cohuenpa' ama ommo'chpahuoyaye.

14 Tarraña ñerra'm sapa' attera nanac sa'tsrre'muena seyočhro e'ñe sesope'chapreteñoť samo'ts ñaña ñerra'm aña sema'yočhrena ñeñť e'ñe socpa ñeñťepñapa' ama pocteyaye o'ch sommo'chena atto es señoñeñ mamesha'tets. Tarro'mar ñerra'm ñeñťa atarr yommo'chatene'pa' ñeñťpa' attaca'yeña yeshquën.

15 Tarro'mar ñeñť atet eñoteñetspa' ama arroteye' hueno Yomporeshoť. Ñeñťpa' arrota huena e'ñe ya yocťapñoť ñeñť patso'marecpa. Ñaña ñeñť atet eñoteñetspa' arrota huena e'ñe oneñeñ poctapñoť.

16 Tarro'mar ñerra'm čhocma ya'tsrre'muena yesope'chapreteñoť yamo'ts amapa' ñerra'm aña yema'yočhrena ñeñť e'ñe yocpa, ñeñťpa' alloť huenaña e'moñe'tanna'teñets, ñaña allohuen sosya'tsañečno.

Atet pena eñoteñets ñeñť huetsa Yomporeshoť

* **3:12** Po'ñočh arrpa' añ toma'ntatanet higočh ñaña uva ñaña aceituna tarro'mar ñeñť chopuets Palestino. Ñeñťpa' atet oten: "Ñerra'm yenare't higočhpa' amach pue'mer p̄anoña ñaña aceituna, amapa' ñerra'm yenare't uvachpa' amach pue'mer p̄anoña ñaña higo."

17 Tarraña ñerra'm po'ñoçh Yompor eñotañ yepene'pa' ñeñtpa' atetcha' yepena: Ñanompa' o'ch yesuanom allohuen sosya'tsañeçhno ñeñt ama pocteye' enteno Yompor, ñaña amach allo'na atarr atsre'moçhen yenteno, ñaña e'ñech cohuen yentueñ allohuen yamo'tsesha', amachña çha po'poñ yentueno. Ñaña ñerra'm po'ñoçh Yompor eñotañ yepene'pa' çhochña ya'muerañtena, ñaña e'ñech cohuenare' es yorrtatyen yamo'tseshacop, ñaña ñerra'm erroten yotenpa' e'ñech po'ñoçh atet yepena, amachña çha yeshcare'tanneno.

18 Ñeñtña ma'yoçhrenaya attoch e'ñe cohuen yentannenapa' ñeñtpa' añ muenen o'ch etsotan attoch allohueneypa' o'ch yeçohuerra ñeñt atet pocte' enten Yompor.

4

Ñeñt coshatse'tyenaya ñeñt patso'marecpapa' ñeñtña e'moñe'tene' ñeñt cohuentetsa Yomporecop

1 Ñehua, te'pa' o'ch yoctape'ch po'poñ attoch señoch errofte' huenaña e'moñe'tanna'teñets ñaña orroteñets ñeñt çhocma orrtatyenet sesho. Ñehua, ñeñtpa' arrot huena e'ñe sa seye'chapretanna'teñoñ pa'namen ñeñtña quellara'yetsaña seyochro.

2 Tarro'mar ñerra'm erroteno nanac es yeye'chapretena, ñerra'm yapa' ama yecheñepa' o'chçho' ñeñto'mara yemt-sanna'ta. Ñaña ñerra'm esempo es yesope'chapreten, ñerra'm yapa' ama yecheñepa' o'chçho' ñeñto'mara yorrotta, amapa' o'chçho' ñeñto'mara yeçllaranna'ta. Ñehua, yapa' añoñ ama yecheno ñeñt nanac yemna'yen, tarro'mar ama añ yenamueno Yompor.

3 Ñato' ama'tcha' es yenampa' amach yagape, tarro'mar ñato' añeçpach es yenamueñ ñeñt ama pocteyaye ñocop. Tarro'mar ñato' añeçpach es yenamueñ attoch yañapa' o'ch nanac es yocshatse'tyena allo.

4 Ñehua, ahuañapa' soten ahuo'ch same'ñera Cristo, tarraña te'ñapa' añña socshatse'tyena po'poñ. Ama't señoteñe ñeñt coshatse'tyenaya ñeñt patso'marecpapa' ñeñtña e'moñe'tene' ñeñt cohuentetsa Yomporecop. Ñeñto'marña ñerra'm yapa'çho' o'ch alla yocshatse'terra ñeñt patso'marecpapa' o'chçho' alla ye'moñe'ter yaña Yompor.

5 Ñeñtpa' ama orrena oteno Yompor po'ñoñ ñeñt aquell-careñ ahuatoteñ, ñeñtpa' atet oten. "Yompor Puecamquëñ ñeñt chorratenya ñapa' e'ñe puemorrenteñoçeypa' nanac mopa'teney."

6 Ñeñto'marña Yomporpa' chocmach mueneñ o'ch ahua-
mencať p̄a'y attoch amach alla yepsere ña. Ñeñto'mar ama't
Yompor po'ñoñopa' e'ñe anuaret ahuatoteñ ñeñtpa' atet oten:
"Yomporpa' amach errotenot yenpano ñeñt e'ñe cohuen en-
tetsa ñañeña, amachña Yomporeye' ame'ñeno. Ñeñto'marña
Yomporpa' añach nanac yenpuen ñeñt e'ñe pueñmañesha'
ame'ñenaya ña."

7 Ñeñto'marña sapa' chocmach e'ñe cohuen same'ñeña
Yompor. Añcha'ña satpare't oneñet tarro'mar ñerra'm atetcha'
seřapa', oneñetpa' quechpa'nerrescha'.

8 Ñeñto'marña o'ch alla separrocmaterr epas Yompor.
Tarro'mar ñapa' chocmach alla aguerres. Te'pa' ama't o'te'
seřohua ñeñt ama cohuenayaye Yomporecoppa' te'pa' añ
pocetsa o'ch alla soctape'cherr cohuen attoch Yomporpa'
o'ch alla enterres e'ñe cohuen. Tarro'mar sapa' ama't sem-
neñeñ o'ch semorrentera Yomporpa', tarraña chocma semor-
rentena ñaña ñeñt patso'marecpa. Ñeñto'marña te'pa' añ
pocetsa o'ch sa'ypo'ña'huerr sosya'tsañ ñeñt seyo'chro'tsen.

9 E'ñe satpare'teñoť Yomporpa' chosa llequerrtsa.
E'ñe sellquëñoťpa' seyahuēpa'ch. Ñaña amach allo'na
seche'tatsetneno, chocña seyahua. Ñaña amach allo'na
nanac es socshatse'tneno, chocña sellca.

10 Ñaña o'ch sa'meterr so'chñar Yomporesho attoch
Yomporpa' o'ch alla tantaterres.

Atto ama atopare'tpahuo yamo'ts

11 Masheñeshacha' ñaña nochaneshacha' amach
sesasare'tanna'tatsto. Tarro'mar ñerra'm esesha' sasare'tene'
pamo'ts, amapa' ñeñt tompare'tene' pamo'tspa' po'ño'chpa'
o' achmare'tan ñaña Yompor po'ñoñ ñeñt atet anaret.
(Tarro'mar Yompor po'ñoñ ñeñt atet anaretpa' atet oten,
yemorrentanna'tepa'ch allohuēney.) Tarro'mar ñetpa' chach
otenapuetañ Yompor po'ñoñ ñeñt atet anaretpa' ñato' amate'
es sherbeno. Tarraña ñerra'm esempo atet yepenapa' chach
yottena ñerra'mrate' yañeña e'ñe es eñotuets. Tarraña ñeñtpa'
ama atteyaye. Añña pocte' chocmach yame'ñya Yompor
po'ñoñ ñeñt atet anuaret.

12 Tarraña yapa' yeñoteñ e'ñe puesheñarra ñeñt nene' añ
ñoñets ñeñtara Yompor ñeñt e'ñe po'ño'ch es eñotets. Ñeñtara
Yompor ñeñt eñotene' ñeñtcha' allpon a'queshpaterr, ñaña
ñeñtcha' allpon chenquerrtsa. Eso'mare'tña sañapa' chate'
sotenapañ ñato' e'ñech sañeña eñote' ñeñt ama cohuenayaye
acheñ.

Atto ama eñotpahuo ñeñtcha' yetantoya tsapatonet

¹³ Te'pa' o'ch notas ñaña po'poñonet. O'ch se'mñoten ñeñtes atet otets: "Te'ch amapa' ñato' tsapa'tcha' o'ch ahuen ñachayo po'poñ anetso, allcha' netaruasena' paterr char attoch negana shonte' quelle."

¹⁴ Tarraña ama't atet soteneñpa' amaña señoñeña ñato' escha' setantoya tsapatonet. Tarro'mar añ patsropa' e'ñe mamecpa yocrena. Atto yocrena arr mame' añ patsropa' e'ñe attey ñerra'mrrate' os ñeñt yenta'muene't ahuatecma chach rrema'chen e'ñe patso. O'chña enome'ta'muen at-sne'pa' o'ch huañerr.

¹⁵ Ñeñto'mar aña pocte' o'ch soten atet: "Ñerra'm Yomporcha' muenatspa' a'natnepa' attoch ne'pa'yes ñeñt atet noctape'chen."

¹⁶ Tarraña sapa' ama atteye'ña sepeno. Ñeñtapa' attachña pa'namen sotyen e'ñe sommo'cheño't. Tarraña ñeñt atto yommo'chyenapa' ñeñtapa' ama cohuenayaye.

¹⁷ Ñeñto'marña ellopa' o'ch alla noterrser: Ñerra'm esempo yeñoteñ yeyo'chro ñeñt cohuentetsa Yomporecop, ñerra'm amaña atet ye'papa' ñeñtapa' ñeñtña yo'chñar yepen.

5

Ñeñt atet otan eçllayoreñsha'

¹ Te'pa' o'ch se'mñoten ñeñtes nanac eçllayoretes. Te'pa' e'ñe seya'chpeñsha'pa' serranare'ta tarro'mar po'ño'ch çhocma eñall ñeñtcha' sehuapoya esempo ñeñtcha' semueroçhtate'.

² Ama't te'pa' o' atta puetsana'tuen sechecom. Sapa' ñeñtña atarr semorrentena. Ñaña ñeñt nanac coçhnesha' ñeñt sechorra'yenapa' o' atta pompere'chua.

³ Ñaña ama't te' seçllayorpa' o' atta chomatlle'chuen. Te'pa' ama es sherbeno. Yeñoteñ e'ñe puechmatlle'cheño't seçllayorpa' ñeñtcha'ña se'nuerre' saña sechets esempo-huañen atet ñerra'mrrate' achamaretes tso. Te'ña ama't o' mellapoterrmochapa' sañapa' allo'na seshonta'huanen seçllayor.

⁴ Ñaña te' ñeñt atta setaruasatyese't ñeñt ama setsa'tyese'tepa' te'ña ñetpa' puellquëño'tetpa' nanac eñenet socop. Ñeñto'marña te' Yompor ñeñt nanac Paretspa' e'muenanet ñeñt atet pueya'chpeñsha' çhocma eñenet socop.

⁵ Ñaña sa aña patsropa' esocmañen sechen ama es sepa-llteno ama't mamesha. Ñeñto'marña ñerra'm errotençho' nanac cohuen sentenpa' atetcha'çho' sepena. Chach sottena ñerra'mrrate' chañcho ñeñt nanac errataret attoch nanac ota'. Ñerra'm o'chña nanac esoya'tpa' allempoñapa' o'ch muetset.

Sapa'cho'ña atetcha' perres samña Yompor esempohuañencha' huerra.

⁶ Tarro'mar sapa' chocma semuerochtatyeñ acheñ ñeñt ama es yeçcatetso attachña sapa' semtsatyenanet. Ñaña ñetpa' amach errotenot a'qeshpateto ñañeñeta allempo sapa' soteñe'chenanet.

Atto ama amuenme'chpahuo cohume'te' Cristo

⁷ Ñeñto'marña masheñeshacha' ñaña nochaneshacha' o'ch notas, chocmach e'ñe sa'huinta'huanom ñeñt echarr sentyen, attoch secuame'ch Yepartseshar Cristo esempohuañencha' huerra. Atetcha' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' chocmach ñanom yecuen esempohuañencha' huapotyena esheccha' e'ñech cohuen es yeçcatsa ñeñt nanac yemorrentyena.

⁸ Ñeñto'marña sapa'cho'ña chocmach es sa'huinten. Amach semuenme'chatsche tarro'mar o' mameshamerrapa' o'ch huerra Yepartseshar.

⁹ Masheñeshacha' ñaña nochaneshacha' amach setanmare'tanna'tatsto, attoch Yompor ñeñt e'ñe es eñotetspa' amach otteñe'chuerrso samña ñerra'm esempoch huerra. Tarro'mar Yomporpa' o' allanerrmoch.

¹⁰ O'ch masheñeshacha' ñaña nochaneshacha' soctape'ch ñeñt atet pa'yese't ahuat ñeñt a'mta'yesaye't Yompor po'ñoñ. Tarro'mar ñetpa' nanac ahuantete't atto nanac amuerochtataretete't. Ñeñto'marña sapa'cho'ña atetcha' sepa samña.

¹¹ Po'ñoçhpa' yeñoteñ ñeñt nanac ahuantene' muerochteñetspa' ñeñtpa' nanaccha' cosheñtso'tsen. Ama't sapa' seño tueñ ñeñt atet pa' ahuat Job. Ñapa' nanac ahuantan topateñets. Ñaña sapa' e'ñe seño tueñ ñeñt atet poñ Yompor. Allempo mueroçhetua Job Yomporñapa' alla apuer esocmañen attoch eñoch Yomporpa' nanac amueraña.

¹² Ñeñto'marña sa masheñeshacha' ñaña nochaneshacha' añ pocte' sapa'cho'ña añcha' ñanom sequeçhpa'hua. Ama't e'ñe erra'tsena pa'so'chño'pa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Atette'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allotpa' ñeñfach. Allochñapa' amach eñalle attoch otteñe'chuerres Yompor.

Añ pocte' chocmach yema'yocham̄psannena

13 Añña ñeñt̃ poctetsa ñeñt̃cha' atet sepa. Ñerra'm erra'tsenotes muerochtatsapa' čhochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'chochtateñ Yompor.

14 Ñaña ñerra'm eseshas atsna'tetspa' añ pocte' o'ch sago-tach ñeñt̃ pompornesha' pen ñeñt̃ ame'ñetsa, attochña ñetcha' ma'yocham̃pset atsnañeñt̃. Allotpa' e'ñe puečhore'teñoŕet Yomporpa' noñetepa' coñe't̃ es puese' atsnañeñesho.

15 Ñerra'm e'ñe pueyemteñoŕet Yompor ma'yochetpa' at-snañeñt̃apa' correrrach. Tarro'mar Yomporpa' ñach ahua-mencat perre'. Ñaña ñerra'm añ o' p̃ohua ñeñt̃ ama pocteyayepa' allempo Yomporpa' o'ch alla peretnerrñañ po'chñar.

16 Ñeñto'marña añ pocte' o'ch sa'meta'huerr allohuenes so'chñar. Allochñapa' čhocmach sema'yocham̃psannena attoch socrrerra e'ñe cohuen. Ñaña ama't erra'tsena acheñer ñerra'm e'ñe cohuen cotape'chen Yomporecop ñaña ñerra'm e'ñe pueyočhrocmañen ma'yochetpa' atetña e'mñotenña Yompor.

17 Atet pa' ahuat Elías ñeñt̃ a'mtaye't̃ Yompor po'ñoñ. Ñeñt̃ña Elías ama't atta ñerra'm ya ñeñtey arromñatey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huateno.

18 Allempoñapa' o' alla ma'yocherrerr attoch enamuerran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetsočno.

19 Masheñeshacha' ñaña nočhanesha ñerra'm sa puesheñarrotes o'ch alla sepurrerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chatterre' e'ñe cohuenpa'

20 sapa' señoche'pa'ch ñeñt̃ atet cotape'chatets e'ñe co-huenpa' čhoch a'queshp̃atenan pamo'ts puecamquẽñ ñeñt̃ atarr ochñañ ñaña čhoch peretnateññañ allohuen shonte' po'chñar. Te'pa' ñeñt̃ach notas. Allohua.

Santiago

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñĩ ame'ñetsa ñeñĩ atta a'parratse'tataret

¹⁻² Masheñeshacha' ñaña nochaneshacha' ñeñĩes a'yetaten ñeñĩ sa'muerochtatene'. O' e'ñe sesuanom seney o' atta a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñĩes ahuatoteñ nase't Yompor Parets e'ñe ñocop. Ñapa' e'ñe eñotuase't sach a'cohuentatarettertsa Partsocop. E'ñe ña Puecamquëña' ñeñĩña sa'cohuentaterre'ña sa attoña e'ñe same'ña'hueraña Jesucristo. Attoña ña po'rraspa' ñeñĩña o' e'shohuerrnasña so'chñar. Na Pedron sequellquëne'ña añ carta, napa' ñeñĩten Jesucristo puellsensaren. E'ñe nehuom'cha'teñotes sa napa' o'ch notas: Yomporpa'chña atarr sebensare'tañpene', ñepa'chña socshatene'ña e'ñe sa seyo'chro allohuenes.

E'ñe yeyemteñot Yepartseshar Jesucristo chocmach yecuame'ten ñeñĩ o'patatare'tey

³ Te'ñapa' aye'chochtaterrapo'ch Yompor Parets ñeñĩ Yepartseshar Jesucristo Pompor ñeñĩtara ñeñĩ Po'yomporer pen, tarro'mar o' ye'ñallettera etserra e'ñe ña nanac puemuereñotey. Allempoteñña ya e'ñe yeyemteñot ña chocmach yecuame'teñ esempohuañen tarrempohua allempoch ama ya'rromña'terro. Atto Jesucristopa' o' tanterra, ñeñĩo'marña yapa'cho'ña yecuen yaña attoch amach ya'rromña'terro.

⁴ Ñaña yeyemteñot chocmach yecuame'ten ñeñĩ o'patatare'tey pue'ntañot tarro'mar allpa' allña añño'tare'ttenaña alloch yequeshperra. Ñeñĩña queshpeñetspa' amach ahuañaña'terro, ñaña ama asoyatño, ñaña ama añllasha'tño.

⁵ Sapa' e'ñe seyemteñotña Cristo Yomporpa' a'natasepa'ch. A'natasepa'ch chocma attoch sequeshpa'huerra esempohuañencha' mellapoterra. Yompor po'huamencopa' a'natasepa'ch attoch e'ñe seño'uerr po'ño'ch e'ñech sequeshpa'huerra.

⁶ Ñeñĩo'marña te'pa' allohuenespa' socshepa'ch. Ama't te'ña atto semuerochtenapa' ñeñĩpa' e'ñe mamecpa. Tarraña ama't o' chaponasa pa'namen topateñetspa' sapa' chocmuepa'ch socsheña Yompor.

7 Tarro'mar nanac huomenc echarr yenteñ, tarraña Yomporpa' eñochcha' ñerra'm po'ñooh e'ñe yame'ñeña ña. Atet ñerra'm oropa' choch ñanom atserrtachet huomenc allochñapa' o'ch eñochet ñerra'm po'ñooh ñeñtpa' e'ñete' oroche'. Ñeñtña ama't oropa' huañerrcha' esempo. Ama't nanac tsa'te' oro, tarraña atto po'ñooh yame'ñera Cristo, ñeñtña ello nanac sherbets. Ñerra'm po'ñooh yeyemteña ña, yeyemteñoñ ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'micha'tarettapretera.

8 Jesucristo ama't ama sentarñepa' te'ñapa' o' semorrentera. Ama't ama senteñe, te'ñapa' o' same'ñera. E'ñe socsheñeshocmañen o' same'ñeña, ñeñtña cosheñetspa' atarr nanac cohuen. Te'pa' amach erra yenerre'te yeñoñ ñeñtcha' atet yoterrerr.

9 Attoña e'ñe same'ñeñoñ Cristopa' sa'queshpaterrrcha' se-camquëñ.

10 Ñaña o'ch notas, ama't ñeñt a'mta'yesaye't Yompor po'ñoñ ahuatpa' ñeñtña serrpare'tete't allempo attoch orrtaterrnay Yompor puemuereña alloch yequeshperra. Tarraña ñetpa' ama e'ñeye' eñochete'te erro'tente'ña alloch yequeshperra. (Ñehua, allempopa' amaca'ye orrtena' Cristo arr patsro.) Ñetpa' ñeñtña nanac e'netañe't erro'tente'ña ñeñtcha' a'queshpatañterrtsa. Ñetpa' nanac a'p'to'tanna'tyesete't e'ñe ñagattseta erro'tente'ca'yeña Yompor puemuereña alloch e'ñe yequeshperra.

11 Ñetpa'cho'ña e'ñe Cristo Puecamquëñña chorrahuete't ñeñtña eñotatahuete't o'ch orrterra ñeñtcha' Cristoterrets arr patsro. O'ch chap añe patsropa' elloñapa' o'ch muerochtateret. O'ch amuerochtataretetuapa' allempochña orrtaterranña po'cohuenña. Tarraña ñeñt a'mta'yesaye't Yompor po'ñoñ ahuatpa' o' alla a'p'to'tanna'tyerreterr, ta', ¿eseshachña Cristoterrets? ¿Esem-po'tcha'ña orrterra?

12 Yomporpa' eñotatanet ñeñtpa' amachca'ye ahuenaye' etsoterro; shonte'ch char allempochña etsoterra atet eñotatanet Yompor. Tarraña ñeñt eñotat allempopa' ñeñtpa' ama ñocpuetayaye, ñeñtpa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñtña seño'tatene' e'ñe cohuen ñeñt atet penaña ñeñt cotapñats. Parets Puecamquëñ ñeñt huetsa pue'ntañotpa' ñeñtña eñotatenahueteña attoch serrpare'tataset samña añ cohuen ñoñets. Ama't Parets po'millañoñeñnashar ñetpa'cho'ña atarr mueneñet o'ch eñochet ñamet ñeñt o' seño'tuerr sa.

Añ poctetsa o'ch yepomhuerra yañeña e'ñe Partsocop

13 Ñeñto'marña te'pa' añ poctetsa e'ñe sa señoteñoŕpa' e'ñech cohuen soctape'chen. E'ñe seyemteñoŕ ñapa' o'ch secuame'teñ esempoch huerra Jesucristo. Allempopa' ellochña nanac muera'huerrsa, cohuencha' es aphuerres.

14 Se'mñoch Yompor atet ñerra'm ñapa' puechemerasha'ch perres. Amach aña seychatsto atet ñerra'm ahuat allempo ama señoteña'; allempopa' aña semnatse'tyese't ñeñt ama cohuenayaye.

15 Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atet ñapa' e'ñe cohuenare' es pen, yapa'cho'ña añ poctetsa o'ch yeŕa' atet es pen ña.

16 Atet oteneŕ Yompor po'ñoñoŕ ñeñt anuaret ahuatoteñ: "Atet nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

17 Yomporpa' ñach tsa'taterrahuet allpon yeŕcatyese'te't ñeñt ama cohuenayaye. Amach eñalleña ama't puesheñarra ñeñtcha' qeshŕatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñteŕña'pa' te'pa' añcha'na'tpo'ch Yompor. Ama't allponmat socrena arr patsro ñeñt'pa' ama sa'netsreyaye, e'ñech ŕayoteñ señcha'na'tnomŕ Yompor.

18 Sapa' satañneshañpa' apa'nmaset poctapña atet pete't e'ñe orrena. Te'ña sapa' o' señoter Yomporpa' o' tsa'tuonasa attoch sesuanom ñeñt ahuatnaneshañ poctapña. Ama quellayoye' tsa'tonaye. Quella'pa' ahuañaña.

19 Añña atto tsa'tonaya po'rraso Puechemer ñeñt Cristo. Po'rraspa' ñeñt nanac sherbets atet ñerra'm carrnerotollpa' e'ñech coŕhnesha' muetsete't Partsocop.

20 Ama't ama ayeŕcatareŕtena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anare'tpa' tarraña ama orrteno aña patsro. Te'ña'pa' orrta e'ñe yocop, tarro'mar te'pa' o' mellapoterrmocha.

21 Yame'ñeñoŕ Cristopa' o'ch yeyemterrñaña Pompor, tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñt o'patatenya.

22 Sapa' o' same'ña'hua ñoñets ñeñt e'ñe po'ñoch Yompor po'ñoñ. Ñeñto'marña e'ñe Parets po'huamencoŕ o' sesuanom allpon sosya'tsañ ñeñt seyoŕhro'tsen, attotcha' e'ñe semor-rentanna'ta. Te'ña'pa' semorrentanna'tepa'ch poctacma e'ñe seyoŕhrocmañen.

23 E'ñe yame'ñeñoĩ Yompor po'ñoñpa' o' ye'ñallettera etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñtpa' huañerrcha'. Añña Yompor po'ñoñoñña ye'ñallettera ñeñtpa' amach ahuañañañterro ama't errponaña.

24 Tarro'mar Yompor po'ñoñ ñeñĩ anuaret ahuatoteñ ñeñtpa' atet oten:

Allohueney ñeñtey arromñañteypa' attey ñerra'mrrate' ta'te' tarro'mar mamecpa yocrrena. Ñaña ñeñĩ cohuen yentyen ya, ñeñtpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't co'hnesha'tenañpa' shorcha'tuach.

25 Tarraña ñeñĩ Parets po'ñoñpa' amach ahuañañañto ama't errponaña.

Ñeñĩ po'ñoñpa' ñeñtara cohuen ñoñets ñeñĩ o' serrpare'tatuaset saña.

2

1 Te'ñapa' añ poctetsa o'ch sesuanem allohuen ñeñĩ ama cohuenaye' enteno Yompor. Atto ora allpon allo seshcanna'tenapa' o'ch sequechpa'huer. Añ shecaneñets ñeñĩ attoch entenes po'psheñeñ e'ñe cohuenpa' ñeñtpa'cho'ña añ palltetsa te'pa' o'ch sequechpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer.

2 Añña poctetsa atarrcha' yeye'cheññaña Yompor po'ñoñ e'ñe atet pena ematollpa' nanaccha' ye'chenana puemos. Yapa'cho'ña añ poctetsa o'ch yeye'chya atet ñerra'm ñeñĩ yemomos yepen, tarraña ñeñtpa' ñeñtara Yompor po'ñoñ. Yompor po'ñoñpa' nanac cohuenare' alloch yocshaten yecamquẽñ, attotcha' allo'na yesen eñotnomue' ñeñĩ poctetsa Yomporecop attochña a'queshpatareteycha'.

3 Sapa' o' señothuerrñañ Yompor puemuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'choña po'ñoñ.

Atto Cristo atma'ntataretta mapue'; elloña ñapa' nanac sherben alloch e'ñe yocrrerra

4 Añ poctetsa o'ch separrocmaterr epas Cristo. Cristo ñeñĩ atarr sherbets atet ñerra'm mapue' ñeñĩ nenet quellpach pa'rrpõt allo orratenet pocoll ñeñĩ nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ño'ch. Ama't acheñenesha' ama't ama cohuenaye' enteñeto Cristopa'

Pomporñapa' e'ñe pocte' enteñ. Pomporñapa' ña acre' ñeñtcha' nanac sherbats ñocop atet ñerra'm mapue' ñeñt nanac cohuen allochña tomatenan pa'paquëll.

⁵ Yomporpa' pa'paquëll penan allohuen ñeñt ame'ñenaya ña. Yapa'cho'ña attey ñerra'mrrate' mapue' alloch tomatenan pa'paquëll. Tarraña yapa' atteyey ñerra'mrrate' mapue'pa' tarraña yapa' ñeñtey o'rrerrña'otof yocrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñapa' yesherberrcha' Partsocop. Yecamquëño'tpa' o'ch yepomhuerra e'ñe yeyochrohuen yepomuerra attoch Parets pa' coshena. Yame'ñeño' Jesucristopa' o'ch yesherber errotench'a' muenateney Parets.

⁶ Tarro'mar atet oteney Yompor po'ñoñ ñeñt anuaret ahuatoteñ, ñeñtpa' atet oten Yompor Cristocop:

All anetso Sión ñeñtara Jerusaléñ o'ch nemñanet puesheñarr ñeñt atarr sherbets ñeñt atet ñerra'mrrate' mapue' ñeñt acrare't ñeñt nanac sherbets ñeñt alloch natomat nepaquëll. Ñerra'm esesha' ame'ñenaya ñapa', ñetñapa' amach alla e'nerrete'te po'psheñeñ.

⁷ Ñeñtey ame'ñenaya Cristopa' e'ñech yocsheñeshocmañen yenteñ. Añña ñeñt atpare'tene' Yomporpa' atetcha' enteñet Cristo ñerra'mrrate' mapue' ñeñt huapore'ten ñeñt tomatene' pocoll tarro'mar atet enteñet Cristo ñerra'mrrate' ama es sherbeno. Ñeñto'marña Yompor po'ñoñpa' atet oterryerr:

Añ mapue' ñeñt huapore'ten ñeñt tomatene' pocoll, ñeñtña mapue'pa' Yompor nene' ñeñtcha' nanac sherbets.

⁸ Añ ñeñtara Cristo ñeñt toma'ntenaya

Mapue' allcha' epoto'tena ñeñt ama ame'ñetso ñeñtcha'ña a'shoratahuet chenquëñtso.

Añ epoto'teñetspa' añ toma'ntena atto atpare'teññañet Cristo po'ñoñ. Ñeñto'marña atet anaret, ñerra'm ama yame'ñyopa' e'ñech yechenca'huerra.

Ya ahuatpa' ama esona'tareyaye, te'ñapa' e'ñe Yomporena'tarey

⁹ Tarraña sapa' ama añeyayso ñeñt atpare'tene' Yompor. Ya ñeñtey ame'ñenaya Yomporpa' atetcha' enteney ñeñtey acrare'tterrtsa ñocop. Ñaña atetcha' enteney ñeñteycha' sherberrets Partsocop, ñeñteycha' anare'tterrtsa ñocop. Ñaña e'ñech Yomporena'tar enteney. Ñeñto'marña yocoppa' añ poctetsa o'ch yorrtatyesoñ po'cohuenña. O'ch yeserrpare'toñ atto ñapa' cheterrey checmetot all sosya'tsaño', te'ñapa' o' chapaterrey e'ñe ña po'puetarenño all e'ñe cohuentena ña.

10 Ahuatpa' ama esona'tareyayye, te'ñapa' Yomporena'tarey. Ahuatpa' ama amuerare'teyayye, te'ñapa' o'ya'muerare'tterra.

Atto cohuen es yepen attochña e'ñe cohuen yesherbeñ Yompor

11 O'ch masheñneshacha' ñaña nochaneshacha' e'ñe nemorenteñotes o'ch notas: Sapa' ama't seyçhenañ añe pat-sro ñeñtpa' ama sa'netsreyaye. Ñeñto'marña añ poctetsa o'ch sa'ypo'ñañpes ñeñt muenatse'tyese't sechets. Atet muena'yen yechetspa' ñeñtña quellarene'ña yecamquëñ; mueneñ o'ch a'chencatonay yecamquëñ.

12 Ñeñt ama ame'ñetso seshopa' añ poctetsa o'ch sorrta-toñ ñeñt atet e'ñe cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch eñotaturrey ñeñt atet ye'pa'yena, ñetpa'cho'ña o'ch aye'choçhtaterrñañet Yompor.

13 Te'pa' o'ch notas ñaña, allpon ñoñets ñeñt nen añcha'taret añ patsropa' añ poctetsa o'ch same'ñya. Yame'ñeño't Yepartseshar Cristopa' añ palltetsa o'ch yame'ñera ñaña allpon ñoñets ñeñt nen ñeñt atarr añcha'taretetsa arr patsro.

14 O'ch same'ñera ñaña ñeñt mueñen añcha'taret ñeñtcha' a'coñchatuene' allohuen ñeñt ama pocteye' es petso, ñaña ñeñtara ñeñtcha' coshapretene' allohuen ñeñt e'ñe cohuenare' es pets.

15 Tarro'mar atet muenen Yompor: çocmach yorrtaten atet e'ñe cohuenare' es yepen. Ñato' yorrtateño't e'ñe cohuenpa' o'ch queçhpa'huerret atto eñosatse'tyenet. Ñetpa' patpare'teño'tet eñosatse'tyenet tarro'mar ama es eñoteneto. Ñato' yorrtateño't e'ñe cohuenpa' o'ch yequeçhpatuerranet atto eñosatse'tyenet.

16 Ñaña e'ñech same'ña cohuen ama't Yompor po'ñoñpa' ama añcha'noçhenaye' senteñe socop. Tarraña ama't ama añcha'noçhteno po'ñoñ yocoppa' amach allo'na ye'pa'yesneno ñeñt sosya'tsañ. Añcha'ña o'ch atet yame'ña atto pueyochresha' perrey Yompor.

17 Añ poctetsa o'ch sem'cha'na'ch allohuen acheñ. O'ch semorrentanna'ta allohuenes ñeñtes ame'ñetsa. O'ch sem'cha'na'ch ñaña Yompor. O'ch same'ñya ñaña ñeñt añcha'taretetyetsa arr patsro.

Añ poctetsa o'ch yemuerochtaprecha Cristo

18 Ñeñtes ataruasataretspa' o'ch notas, añ poctetsa socop. Sem'cha'na'teño'tpa' o'ch same'ñya samo'mte'. O'ch same'ñya

samo'mte' ñeñt amueraña. Alloṭpa' o'ch same'ñya ñaña ñeñt ama't ama amueraño.

¹⁹ Ñaña ama't po'psheñeñ mueročhtateneý ama't allempo yepen ñeñt cohuenare', e'ñe yame'ñeñoŧ Yomporpa' amach ya'tsrre'matsto, ñeñtpa' e'ñech pocte' enteneý Yompor.

²⁰ Ñerra'm esempo čho erroṭ yepeñ po'psheñeñ ñerra'm coñchatuerrey, ñeñtpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' enteneý Yompor, tarro'mar ñeñtpa' čhocma mueneñ o'ch yecoñcha. Tarraña ñerra'm esempo ama't yepena ñeñt cohuenare' ñato' ama't mueročhtateý po'psheñeñpa' ñerra'm ama ya'tsrre'mopa' ñeñtpa' e'ñech pocte' enteneý Yompor.

²¹ Ñeñto'marña te'pa' yapa' o' hua'ñerrey Cristo attoch yame'ña'huera, allochñapa' o'ch yemueročhtaprecha ña. Ñapa' ña ñanom mueročhtatsa, tarraña ñapa' yečhatnerrey attoch añ poctetsa o'ch yemueročhtapretera ña.

²² Ñapa' ama eñalletatane'te po'chñar ama't coñe'ta. Ñapa' ama sheca'ye'te ama't parrocha.

²³ Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo mueročhtachete'tpa' ñapa' amach ellopa' o'terraneto o'ch nemueročhtaterres saña. Ñapa' aña e'ñe yemte't Pompor, tarro'mar eñoteñ Pomporpa' a'poctaterrñañcha', tarro'mar ñapa' ña e'ñe pocte' es pets.

²⁴ Ñapa' ña yecoñchaterr e'ñe ya yo'chñarof allempo mueročhta all corsocho. Allempoña rroma e'ñe ña po'chtsoṭpa' o' ahuanmañperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeñt atet poctetsa Partsocop. Atto atarr atserrparetterra ahuañ ñeñtpa' attoña a'quespaterrey ya.

²⁵ "Yapa' ahuaṭpa' atteý ñerra'm carrnero. Ya'ypo'ña'uye't ñeñt yecuañpene'." Tarraña te'ñapa' o' alla yocape'cherr e'ñe cohuen, o' yeyemtera Cristo ñeñt yecuañpene', ñeñtara ñeñt Pamo'mte' pen ñaña yecamquëñ.

3

Arrpa' all cotape'chatan ñeñt arrollaretnesha'

¹⁻² Sapa'čho'ña ñeñtes arrollaretes, o'ch notas saña. Añ poctetsa o'ch same'ñya serrollar. Chocmach same'ñya serrollar ama't serrollarpa' ama ame'ñenano Yompor po'ñoñ. E'ñe cohuen same'ñeñoŧ serrollarpa' ama't ama erroten es soteno ñato' attotpa' o'te' ame'ñerra ñaña serrollar. Ñetpa'čho'ña o'ch cotape'cherret e'ñe cohuen ñerra'm esempo entennaset atet e'ñe cohuenare' es sepen.

³ Amach e'ñe pa'rra sema'yo'chratsto atto secohuentena e'ñe orrena. Atet ñerra'm sechpa' amach ñeñta sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñtpa' e'ñe orrena. Ñaña amach e'ñe pa'rra sema'yo'chratsto attoch sech alloch secohuenta atet ñerra'm oro, tarraña ñeñtpa'cho'ña e'ñe orrena. Amach sema'yo'chratsto ñaña attoch sechorra'yesa e'ñe co'chnesha'. Añ añño'teñets ñeñt yentapretannena e'ñe yechtsopa' ñeñtpa' e'ñe orrena orrtateney e'ñe cohuen.

⁴ Añcha'ña yema'yo'chra o'ch yecohuentena yeyo'chro attoch Yomporpa' entapretey e'ñe cohuen. Añ cohuentañets yeyo'chro ñeñtpa' ama entpahuoyaye tarraña ñeñtpa' amach ahuañañat'erro. Atet ñerra'm muereñets ñeñtpa' e'ñech cohuen entapreteney Yompor. Ñerra'm ama atsrre'mña'eyaye ñeñtpa'cho'ña e'ñech cohuen entapreteney Yompor. Ñerra'm e'ñe cohuen yoctape'chen, Yomporpa' entapreteney yoctapña atet ñerra'm ñeñt nanac sherbets, ñaña ñeñt nanac co'chnesha'.

⁵ Atet pa'yese't ahua't coyanesha'chno ñeñt e'ñe cohuenare' es pa'yestse't Partsocop. Ñetpa' e'ñe pueyemteño'tet Yomporpa' e'ñe cohuen ame'ñyete't puerrollaret. Ñetña pueyo'chretpa' e'ñe a'cohuenchete't Yomporecop.

⁶ Atet pe't ñaña ahua't Sara. Ñapa' e'ñe cohuen ame'ñane't puerrollar Abraham. Ñapa' e'ñe atet entane't puerrollar ñerra'mrrate' ñeñt pamo'mte' pen, nanac ame'ñyete't. Sapa'cho'ña te'pa' sachorcha' seper Sara ñerra'm ama señchaño'ña es pocte' sepa'yeno saña.

Attecma cotape'chatan ñaña ñeñt ataporetnesha'

⁷ Attecmach notas saña ñeñtes ataporettes. O'ch semuerya setapor e'ñe cohuen. Sapa' o'ch senteñ saña setapor e'ñe cohuen, tarro'mar coyanesha' ama tama ahua'mencate. Añcha'ña o'ch sagaphuer parro ñeñtcha' apas Yompor. E'ñe puemuereño'tes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seycha e'ñe cohuen epas setapor, attotcha' Yomporpa' e'mñnotas ñerra'm esempo sema'yochya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe pa'rra ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueney ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso.

9 Ñerra'm po'psheñeñ erroť p̄aspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atet muenen Yompor atetcha' yeřa. Allochñapa' ñerra'm atet yeřapa' ñapa' o'ch a'natenya yaña.

10 Tarro'mar atet oteneŷ Yompor po'ñoñ:

Ñerra'm yemneñ o'ch yeycha e'ñe cohuen, ñaña ñerra'm yemneñ o'ch yocsherrapa' ñeñtpa' añ poctetsa, amach yesasare'tatsto, ñaña añ poctetsa, amach yeshcare'tatsto.

11 Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohuenaye' enteno Yompor. Ñeñt e'ñe atet muenen Yomporpa' ñeñtcha'ña atet yeřa. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

12 Yomporñapa' e'ñech cohuanpeney ñeñteŷ e'ñe pocte' es pets. Ñapa' e'mñoteneŷ allempo es yenamueñ e'ñe ñesho. Añña ñeñt petsa ñeñt ama pocteyayepa' Yomporñapa' amach cohuenaye' enteñe ama't mamesha.

Ñerra'm esempo e'ñe attota muerochtatenyet yapa' atarrcha' cosheñtso'tseney

13 Ñerra'm sapa' chocma sema'yoçhrena ñeñt cohuentetsa Yomporecop, allempoñapa' amach esesha' erroťenoť semue-roçhtataye.

14 Tarraña ñato' erroťenopa' o'ch muerochtataset ama't añ sema'yoçhrena ñeñt cohuentetsa Yomporecop. Tarraña ñerra'm e'ñe attota muerochtatasetpa' sañapa' atarrcha' cosheñtso'tsenes. Amach señcha'tatstaneto ñaña amach sellcatsto.

15 Añcha'ña o'ch seyemcha Cristo e'ñe seyoçhrohuen. O'ch senteñ Cristo atarr cohuen Parets ñeñt Yepartseshar yepen. Ñerra'm esempo esesha'pa' o'ch a'p̄to'tas ¿eso'marte'ña atarr same'ñeñaña Cristo? sapa' chocmuepa'chña e'ñe cohuen señoñeña atetcha' sanap e'ñe cohuen. E'ñe semuereñoť e'ñech acopa sanapanet e'ñe cohuen e'ñe señcha'na'teñoñanet.

16 Chocmach e'ñe señmañesha' seyoçhro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeñtña atto e'ñe pocte' es yeřa'yen Cristocoppa' ñeñtpa' ñeñtcha'ña pencatahuet.

17 Añ pocte' ama't yemuerdohta atto ama't e'ñe cohuenare' es yepen. Ñerra'm atef muenen Yomporpa' pocte' o'ch yemuerdohta. Añña ñerra'm e'ñe yo'chñaro'pa' o'ch yemuerdohta, ñeñ'pa' orrenach yemuerdohta.

18 Ama't Cristopa'cho'ña ahuatpa' atarr muerdochtachete't. Ñapa' ña rromats e'ñe parrocha allohuenacpay attotña tsa'tuerrnaya yo'chñar. Cristo ama't ña ñeñ't e'ñe pocte' es petspa' attotña rroma yocop ñeñ'tey ama pocteye' es petso. Tarro'mar rroma yocop attotcha' yeparrocmaterr epay Yompor. Ña ama't rroma po'chtso'tpa' puecamquëñ'ñapa' ama rromo.

19 E'ñe puecamquëñ'o'pa' arr ahuo' allo'tsa'yen ahuatnaneshañ puecamquëñ'nesha' ñeñ't alla ayottam'psaret, ñeñ't ama cha'netso. Ñaña puecamquëñ all'ñapa' serrpare'tatosanet.

20 Ñehua, añ puecamquëñ ñeñ't ahuatnaneshañ ñeñ't nanac atpare'taye't Yompor po'ñoñ allempo corre't Noé. Allempopa' Yompor nanac cohuname'tanetañe't o'ch ame'ñyet. Allempoteñ Noépa' ye'chcatane't po'compuer, Yomporpa' cohuname'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeñ't ame'ñatsa. Añ posocsheña ñeñ't ame'ñaya Yomporpa' ñeñ'tara posocsheña ama esesha' ño'sha'tso, ñetpa' qeshpet oño't.

21 Tarro'mar yapa'cho'ña te' ñerra'm yapatare'tta oño't Partsocop e'ñe atef pena ñerra'm ahuat Noépa' o' qesh'pa e'ñe oño't. Ñeñ'to'marña yapa'cho'ña ñerra'm yame'ñeñ'o't o' yapatare'tta Partsocop e'ñe oño'tpa' yeñoteñ o' yeqesh'pa. Ñehua, ñeñ't apatareteñetspa' ama añecpayaye o'ch yapa oño attoch huañ yepatser. Añcha'ña ñeñ't alloch yeqesh'pa. Atto yapatare'tta Partsocop o'ch yenañ Yompor etserratater-rnayepa' yocpa'ña e'ñe cohuen. Atto yapatare'tta Partso-coppa' yeñoteñ o' yeqesh'pa tarro'mar Jesucristo atto tan-terra ama't rromhua.

22 Allempo tanterra Cristopa' o' ahuerr pue'ntaño. Te'ñapa' allo'tsen epuet Pompopor e'ñe po'cohuenro't, all'ñapa' all part-soten. Ama't allohuen ñeñ't Pompopor po'mllaño'teñ'nanesharpa' ñetpa'cho'ña te'pa' e'ñe cohuen ame'ñeñet ñamet. Ñaña ama't allohuen ñeñ't am'cha'taretetyetsa pue'ntañopa' ñetpa'cho'ña ello ame'ña'hueñet ñamet. Ama't allohuen ñeñ't ahuamen-cate'chnopa'cho'ña ello ame'ña'hueñet.

4

Atto e'ñe yemuerdochteñ'o'pa' o'ch huomenc ye'pa' yeyo'cher Yomporcop

1 Cristo allempo añe patsro'tsenpa' ñapa' e'ñe pocte' enteñ attoch mueroçhtateñet nanac. Ñeñto'marña sapa'cho' e'ñepa'chña pocte' senteñ o'ch semueroçhta e'ñe ñocop. E'ñe yemueroçhteño'pa' o'ch huomenc ye'pa' yeyo'cher. Yemueroçhteño'f yechtsopa' o'ch yequeçhpa'huerr ñeñt ama pocteyaye Yomporecop.

2 Allochñapa' amach allo'na ye'pa'nenno atet muenatyesyeyt yechets ahuat. Yocoppa' añ poctetsa o'ch yoctape'chen ñeñt atet muenen Yompor.

3 Te'ñapa' ñeñtेशा'ñach atet se'pa atet se'pa'yese't ahuatoteñ ñeñt atet pena te' ñeñt ama ame'ñetso. Ñetpa' añ pa'namen pa'yenet ñeñt atarr sosya'tsañe'chno ñeñt allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñt ama't mameshapa' ama pocteye' enteñe Yompor. Te'ñapa' ñeñtेशा'ñach atet se'pa' ñeñt semnatse'tyen sa.

4 Ñeñt peyemte't ahuat ñeñt epa'p porrare'te'tpa' te'ñapa' amach çhapaneto pueyo'chro eso'marte' o'huañ porrare'tapretanet. Attoña ñetpa' mueneñetcha' o'ch achm'are'taset.

5 Tarraña te'pa' o'ch notas, ama't ñeñt ama ame'ñetso, esempohuañenpa' a'metatuerranetcha' Yompor. Po'ño'ch ñapa' ñach tsa'taya ñeñt ame'ñetsa. Ñaña ama't ñeñt ama ame'ñatsopa'cho' ñach tsa'tatuerrahuet, ora allohuenet, ama't ñeñt corretsa, ñaña ama't ñeñt o' colla'huena.

6 Ñeñto'marña ama't ñeñt arromña'tnesha' o' aserrpare'tatuare'ttet cohuen ñoñets. Allochñapa' ama'tcha' a'coñchatare'ttetañ po'chtso'tet atet pena allohuen arromña'tenesha', puecamquëño'tetñapa' corra'huerretcha' e'ñe atet correna Yompor.

7 Te'ñapa' o' mellapoterrmocha. Ñeñto'marña añ poctetsa, e'ñe yeñotateño'pa' o'ch yema'yochera Yompor. E'ñech yetpara es yepen atto'cha' amach yepseñe Yompor ma'yochaya.

8 Añpa' ñeñtña ñanom nanac sherbets: o'ch yemorrentanna'ta nanac e'ñe yeyo'chrocmañen. Yemorrentanneño'pa' o'ch yep'retnanna'ta atto erro'ten ye'pannena.

9 Ñaña e'ñech socsheñesha' o'ch sagapannena e'ñe sepa'cillo.

10 Yompor puemuereño'pa' o' e'ñe apa'yemas attoch setorra'yesa e'ñe ñocop. Te'ñapa' o'ch notas, o'ch seyenpanna'ta año ñeñt apuenes Yompor. Attochña sesherb'atyeseñaña Yompor puemuereña.

11 Ñeñt'pa' atet ñerra'm eseshas serrpare'tatspa' Yomporepa'chña po'ño'ñ seserrpare'ten. Ñerra'm eseshas yenpuene' po'psheñe'ña' Yomporepa'chña po'huamencot

seyenpannena. Allochñapa' yeparrocmateñoť epay
 Jesucristopa' o'ch ya'ye'chočhtatuerrñañ Yompor.
 Yomporepa'chña aye'chočhtatuapo' allohueney.
 Añcha'na'tpahuepa'ch po'partsoña tayoteñ errponohuañen.
 Ñeñtpa' attepa'chña Nompore.

*Ñerra'm esempo sasare'tenyet atto yapa' yecristona'tarterra
 yañapa' atarrcha' cosheñtso'tseney*

¹² Amach masheñneshacha' ñaña nočhaneshacha'
 seyorenatsto ñerra'm huaponasa topateñets nanac huomenc;
 tarro'marcha' huaponasa o'ch topatensa'. Amach
 seyorenatsto atet sepena ñerra'm esempo huaponasa
 ñeñť ama sentare. Attecma ama't masheñnesha' ñeñťo'
 ame'ña'huapa' attecma o' topatuanet.

¹³ Allempoteñ o' semueročhtaprecha Cristo, e'ñe semue-
 ročhteñoťpa' socshepa'ch. Allochñapa' ñerra'm esempoch or-
 rterra po'cohuenñapa' sapa'cho'ña socshapreterach e'ñe co-
 huen.

¹⁴ Ñerra'm čho sasare'tenset atto o' secristona'tarterra,
 sañapa' atarrcha' cosheñtso'tsenes, tarro'mar e'ñe allempoteñ
 Yompor Puecamquēñ ñeñť cohuenñatsotetspa' čhaponasa se-
 sho. Po'ñočh ñetpa' Cristo'na sasare'tenet tarraña sapa' e'ñe
 cohuen secohuentateññañ Cristo.

¹⁵ Añña ama cohueno o'ch yemueročhta yemtseñoť
 acheñ, ama't ñaña yeteñoť, ama't ñaña yepeñoť ñeñť
 ama cohuenayaye, ama't ñaña ya'metañpeñoť attochcha'
 ye'moñe'tanna'ta. Ñerra'm attoťña yemueročhtapa' ñeñťpa'
 e'ñech orrena yemueročhta.

¹⁶ Añña ñerra'm añecop yemueročhta tarro'mar
 o' yecristona'tarta, amach yepencatsto. Chocmach
 yecohuentatoñ Yompor tarro'mar o' yanerrñañ pa'so'cheñ.

¹⁷ O' čhappoch allempoch Yomporpa' acranatuerrey
 allohueney ya. Yapa' yanomcha' a'meterr atet enteney
 ama't ñeñťey puechemereshay o' perrey Yompor. Ñerra'm
 yapa' yanomcha' a'metañperr ama't ñeñťey ame'ñatsapa',
 allempopa' erroťenoťuachca' queshperrate' ñeñť nanac
 atpare'tene' cohuen ñoñets ñeñť Yompor po'ñoñ.

¹⁸ Ama't ñeñťey e'ñe pocte' es petspa' e'ñech yemu-
 erochenñoťa yequeshperra, allempopa' erroťenoťuachca'
 čhappña ñeñť ochñañenesha' ñeñť atarr atpare'tene' Yompor.

¹⁹ Ñeñťo'marña ñerra'm esempo yemueročhta e'ñe Yompor
 puemneññoťpa' allempopa' amach yellcatsto. Añña poctetsa
 o'ch alla yeyemtera Yompor e'ñe yocsheñeshocmañen
 yeyočhro, tarro'mar ñapa' ña ñeñť yeyečcate'. Ñapa'
 ña ñeñť e'ñe pocte' es pets, ñapa' e'ñech a'poctatonay.

Añcha'ña allo'nepa'ch yesen cotape'cherre' ñeñt' cohuentetsa Yomporecop.

5

Atto cotape'chatan allohuen ñeñt' pompornesha' pen ñeñt' ame'ñetsa

¹ Te'pa' o'ch notas saña ñeñtes pompor pen ñeñt' ame'ñetsa sesho. Napa'cho'ña nach pompor pen ñeñt' ame'ñetsa nesho. Napa' neñche't atet muerochte't Cristo. Tarraña ñerra'm esempo huerra po'cohuenño'pa' yapa' o'ch yecohuentapretera yaña.

² Napa' te'pa' o'ch notas sa ñeñtes pompor pen ñeñt' ame'ñetsa. Atet pena ñeñt' cohuanpene' po'carrneror, sapa'cho'ña secuanpescha' e'ñe cohuen ñeñt' ame'ñetsa sesho, tarro'mar ñetpa'cho' po'carrneror penanet Yompor. Amachña seçllañoña secuanpsatstaneto atet sepeñ ñeñt' ama tama cohuenaye' senteno. E'ñechña socsheñesha' secuanpenanet atet muenen Yompor. Tarraña amach sagapueñoña quelle secuanpsatstaneto. Ñerra'm quellayecop yecuanpeña' o'ch yepenca. Añcha'ña e'ñech yocsheñesha' yecuanpsanet.

³ Amach cha sa'mcha'nochteño'feye' secuanpenaneto, ñeñtes atet anaretes sach cohuanpenahuet. Añcha'ña chocmach yentatanet atet e'ñe cohuen es yepen. E'ñe yotape'chateño' cohuenpa' o'ch yeychatenanet allohuen ñeñt' e'ñe po'carrneror pen Yompor.

⁴ Cristoña'pa' ñeñt' yecuanpene' allohueney atet ñerra'm po'carrnerorey. Ñerra'm esempo huerra, allempopa' yapa'cho' atsa'tareteycha'. Atsa'tareteycha' po'cohuenño ñeñt'cha' atarr nanac yocshatterre' ñeñt'pa' ama ahuañaño ama't errponaña.

⁵ Ñeñtes huepaneshas, te'pa' napa' o'ch notas saña. Añ poctetsa o'ch same'ñeña ñeñt' po'n yacma ñeñt' sompor sepen. Po'ño'ch o'ch notas allohuenes, e'ñech cohuen same'ñannena amach sañeña e'ñe cohuen entatstatso tarro'mar:

Yomporpa' ama pocteye' entenano ñeñt' atet ommo'chetsa.

Añña ñeñt' ama esoye' entetso ñeñt'ña atarr muerenaña Yompor.

⁶ Yapa' yeñoteñ Yomporpa' nanac ahua'menca't. Yapa' ama ya yehuamencoteye' yommo'cheno. Ñeñto'marña yeñoteñ Yomporpa' ama cohuenaye' entenano ommo'cheñets. Amach yeyemtastso e'ñe yañeña, tarro'mar yapa' ama es yesherbena. Añcha'ña e'ñe cohuen yeyemtana Yompor, allochña'pa' ñerra'm esempo ña muenats, ñachña yocshatuerre'ña e'ñe cohuen.

⁷ Ora allpon ñeñt yellcatene' añ poctetsa o'ch yotue Yompor. Tarro'mar ñapa' po'ñoçh çhocma llecapretenya ñeñt yellcatene'. Allochñapa' ñachña ya'metuerre' yellquëña attoch yocsha'huerra e'ñe cohuen.

⁸ E'ñe señotateño'pa' señota'tach, tarro'mar oneñeñt ñeñt se'moñe'tene'pa' çhocma chopeñe'chen erra'paren atet ñerra'm ma'yarr, çhach añcha'noçhetnena e'nyese' ñeñtcha' a'chencat.

⁹ Añcha'ña satpare't oneñeñt. E'ñe yame'ñeño' Cristo o'ch huomenc ye'pa' yeyo'cher. O'ch señoch attec mach mueroçhtatuan allohuen masheñnesha' ama't ñeñt o' ame'ña'huerra ora erra'paren añe patsro.

¹⁰ Ama't mueroçhtatyasesetcha' mame' tarraña Yomporpa' nanac amueraña. Ñapa' ñachña a'poctatuerre'ña socop, attoch huomenc perrnas seyo'cher. Allochñapa' amach alla sepuesuere. Atetcha' p'atonay Yompor, ñeñt'ey muenene' o'ch yecohuentaprecha po'cohuenño. E'ñe yame'ñeño' Cristo yecohuentapreterach po'cohuenña ñeñtcha' ama ahuañña'aterrtso.

¹¹ Yomporepa'chña aye'choçhtatuapo' allohueney. Añcha'na'tpahuepa'ch po'partsoña tayoteñ errponohuañen. Ñeñt'pa' atetepa'chña Nompore.

Arrpa' all so'tnerranet po'cartot

¹² Te'ñapa' ñeñt'ach e'ñe notas necartot. Te'pa' o' notuas o'ch same'ña'huera e'ñe po'ñoçhocmañen. Ñaña o' notuas añpa' ñeñt'ña e'ñe po'ñoçh Yompor pue muereña alloch atarr bensare'tañpeney. Te'ñapa' o'ch alla noterrserri, po'ñoçhpa' o'ch seyemtoña Yompor pue muereña. Ñeñt masheñ Silvanopa' ña nequellcaten attoch neserrpare'tatas mame' añ necartot. Atet nenteñ masheñ Silvano, ñapa' nanac cohuen ame'ñenana Yompor.

¹³ Ñaña ñeñt ame'ñetsa arr Babilonia* mueneñet o'ch huom'cha'taset ñamet añ necartot. Ñetpa'çho'ña o' acerrranet Yompor e'ñe atet ñerra'm sa. Ñaña neyo'cher Marcospa'çho'ña mueneñ o'ch huom'cha'tas ñaña necartot.

¹⁴ E'ñe semorrentanna'teño' o'ch sehuom'cha'tanna'ta.† E'ñe seyemteño' Jesucristo, Yomporepa'chña socshatene'ña e'ñe cohuen seyo'chro. Te'pa' ñeñt'ach notas, ñeñt'pa' atetepa'chña Nompore. Allohua.

Pedro

* 5:13 Anets ñeñt pa'so'cheñ Roma te'ñapa' añ toma'ntateñet anets Babilonia.

† 5:14 Po'ñoçh oteneý, "E'ñe semorrentanna'teño' thoç setso'ttsa'pa'tannena ñerra'm esempo sehuom'cha'tanna'tena." Ñeñt'pa' atet yeçhete't ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñneshacha' ñaïña noçhaneshacha' allohuenes ñeñtes e'ñe attecma cohuen same'ñena atet yame'ñena yaïña, tarro'mar allohueneypa' e'ñe ñapïa Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñtña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristocop, ña puellsensaren.

² E'ñe nehuomïcha'teñoñes sa napa' o'ch notas: Yomporepa'chña atarr sebensare'tamïpene'; ñepa'chña socshatene'ña e'ñe sa seyoçhro allohuenes e'ñe seyemteñoñ Yompor ñaïña Puechemer Jesús ñeñt Yepartseshar yepen.

Atetcha' yepa'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoñ Yompor ñapa' çhocma apueney allohuen ñeñt allpon yepalltena alloch yocrrena e'ñe cohuen ñocop. Ñaïña apueney attoch yoctape'cherr ñeñt e'ñe pocte' enten ña. Ñeñtïpa' e'ñe ña po'partsoteñoñ apueney. Ñapa' añ muenen o'ch yecohuentapretera ña. Ñaïña añ atarr muenen o'ch yorrtatapreter po'cohuenña.

⁴ E'ñe po'cohuenñoñ ñapa' atet otnerrey ñeñtcha' apuerrey ñeñtcha' nanac cohuen yenterr, ñaïña ñeñtcha' atarr nanac sherberrets yocop. Añ apuerrey po'huamenc attoch amach aña atarr yemna'yeno ñeñt yentyen arr patsro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoñ Paretspa' o'ch yaguërrñañ ñeñt e'ñe atet pena ña.

⁵ Ñeñto'marña añ poctetsa, ñanomcha'ña Cristo yeyemta. Allotpa' ñaïña o'ch yorrtaten atto e'ñe pocte' es yepen. Allotpa' ñaïña añ poctetsa, o'ch yeñotua e'ñe ora atet muenen Yompor.

⁶ Allotpa' ñaïña o'ch yepuesuanom ñeñt atet yemnatse'tyen ya. Allotpa' ñaïña e'ñech ya'huinta'huanom allohuen ñeñt atarr echarr yentyen, alloteñña'pa' o'ch yoctape'ch ñeñt poctetsa Partsocop.

⁷ Allotpa' ñaïña o'ch yemorrentanna'ta, e'ñech yemo'nasheñsha' yepannena. Allotpa' ñaïña e'ñech yemuerrannena.

⁸ Ñerra'm atetcha' sepa añechno atet ñeñt o' notuaspa', allempoñapa' allo'nach sesen parrocmatats epas Yepartseshar Jesucristo. Allochñapa' amach e'ñe orrena señotere, añcha'ña e'ñe sorratyen ñeñt atet muenen Yompor. Allempoñapa' nanaccha' sesherberr Cristocop.

⁹ Ñerra'm ama allo'na yeyemuetneño Cristopa' yapa' amach e'ñe es cohuenaye' yeñotueno. Chach yottena ñerra'mrrate' puesheñarr ñeñt ama cheme'tetso a'yo. Añach cheme'ten ñeñt alla'tsena. Amapa' chach yottena ñerra'mrrate' puesheñarr aporo'yet ñeñt ama entetso, ama't e'ñe mamesha. Tarro'mar ñapa' o' cha puesuerran atto Cristopa' e'ñe e'sshohuerrñañeñ po'chñar.

¹⁰ Ñeñto'marña masheñeshacha' ñaña nochaneshacha' te'pa' o'ch alla noterrser. Allo'nepa'ch sesen yemuetnomaya Cristo atto ñapa' o' hua'ñerres attoch same'ñeño'tpa' o'ch sequeshperra. Ñerra'm atetcha' se'papa' ama't ahua'tapa' amach sepsere, ñaña amach alla sepueerrerro atarr toñoneñ.

¹¹ Allochña sapa' se'cherrcha' all añcha'tare'ttena Yepartseshar Jesucristo ñeñt Ya'queshpatañer yepen. Allñapa' o'ch aguërres e'ñe pocsheñeshocmañen all partsoten. Ña po'partsoñapa' ñeñt'pa' amach ahuañañat'erro ama't e'ñe erponaña.

¹² Ñeñto'marña napa' noten, chocmach neyerpatasa atet noctape'chen. Ama't sapa' o' señotue añechno, napa' o'ch alla noterrser. Ama't o' chaponasa seyo'chro ñeñt ñoñets po'ño'chpa' napa' nemneñ allo'nach neyerpatnensa.

¹³ Napa' noten, te'pa' orameñ nocrrena e'ñe pocte' o'ch neyerpatnomsa attoch o'ch setorroña Yompor po'ñoñ.

¹⁴ Napa' neñoteñ o' mañamenapa' o'ch nerromuen, tarro'mar atet otne't Yepartseshar Jesucristo.

¹⁵ Allochñapa' amach nemnatenso o'ch sepuesuer ama't errponaña. Ama't allempoch o' nerromuenpa' sapa' allo'nach seyerpuerra ñeñt atet o' notuanmas.

Pedropa' e'ñe entane't Cristo allempo orrtatyesanete't po'partsoña

¹⁶ Ya te'pa' o' e'ñe yeñotatas atto Yepartseshar Jesucristo ña partsotets, ñapa' ñach huerrtsa po'pocheño. Añ ñoñets po'ño'chpa' ama shequëñtsoyaye ñoñets ñeñt o' yotuas. Ñeñt'pa' ama yaye' yoc'apña yotenso, ñaña ama ahua'tnaneshañeyaye pueserrpareñ. Ya po'ño'chpa' e'ñeca'ye allame'ttsa yeñche'tña Yepartseshar Cristo. Yapa' e'ñe yentuoñe'tña po'partsoña.

¹⁷⁻¹⁸ Tarro'mar yapa' e'ñe parro allo'tseney all aspeno allempo Yompor Parets gatey Puechemer po'cohuenña. Yapa' allempopa' e'ñe ye'mhuaña ñoñets ñeñt ye'morrtoya entot.

Yompor ñeñt nanac partsetets pue'ntañ, po'cohuenñopa' atet cohuentatenan Puechemer, ñeñtpa' atet oten: "Añmapa' ñeñt Nechemer ñeñt nanac nemorrentena, ñapa' ña nanac nocshatene'." Ñeñtpa' attoña aye'chochtatenan Puechemer.

¹⁹ Te'ña ñeñt otyese't ahuat ñeñt a'mta'yesaye't Yompor po'ñoñpa' te'ña e'ñe po'ñoçhpa' o' e'ñe etsotierra. Ñeñto'marña yapa' attoña yeñoteñ ñapa' e'ñe po'ñoçh otye't po'ñoño't. Ñeñto'marña yocoppa' añ poctetsa o'ch yame'ña ñaña ñeñt a'mta'yesaye't ahuat Yompor po'ñoñ. Ñeñtña ñoñetspa' a'puetarsam'pennay yoc'apña atet ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñtcha'ña a'puetarerre' yanña yeyoçher. Yapa' atarr cohuen yenteñ Cristo atet ñerra'm ranto atarremñ.

²⁰⁻²¹ Ñaña señoche'pa'chña ñeñt a'mta'yesaye't ahuat Yompor po'ñoñ ñetpa' ama añaye' orrtatete'te ñeñt atet cotape'chete't ñet. Atto ñet ma'yoçhrete't Partsocop, Paretsña Puecamquëñña eñotatahuete't atetcha' serrpare'toñet Yompor po'ñoñ. Ñeñto'marña señoche'pa'ch ama pocteyaye e'ñe yañeña yoc'apño't o'ch ye'nachata'teñña po'ñoñ.

2

Ñeñt ashcañtetsa amach Yomporeye' po'ñoñ serrpare'teno (Jud 4-13)

¹ Te'pa' o'ch notas ñaña po'poñ. Ahuatpa' orrte't ashcañ ñeñt ama Yomporeye' po'ñoñ orrtatete'te, ñeñtpa' atta shecane't israelena'tarnesha'. Sapa'cho'ña attec'mach orrtonasa ñeñt amach Yomporeye' po'ñoñ a'poteno. E'ñe a'nahuapa' o'ch yeçhatas po'poñ poctapña. Tarro'marcha' ñetpa' atet pet attotcha' a'chencatatuertes. O'ch a'nasotam'psasa atto Yepartseshar Cristopa' ñeñtña tsa'terroyaña yo'chñar. Tarraña ñetpa' machayotach a'chencatatuerrret ñañeñeta.

² Esem'poch orrta, shonte'ch acheñ ñeñtcha' ame'ñaya atetcha' yeçhatanet. Ashcañpa' e'ñech pocte' entan ama't ñeñt atarr yeçhene' sosya'tsañ. Ñeñto'marña e'ñe ño'to't acheñenesha'pa' o'ch achm'are'teññañet Cristo po'ñoñ ñeñt po'ñoçh Yompor po'ñoñ.

³ E'ñe pueye'cheño'tpa' o'ch shecaset attoch yoram'pesuas seçllayor. E'ñe poctapño'tpa' shecasetcha'. Tarraña ama't ahua'toteñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet oten, atetcha' pa. Ñeñt ama Yomporeye' po'ñoñ yeçhatetsopa' chenca'huerretcha'.

4 Tarro'mar ahuatpa' ama't Yompor po'millañoñeñaneshar allempo atpare'chete'tpa' ama esesha' queshpatsete. Yomporpa' allempoña huaporetanete't o'pono coñcha'puetso, allña'pa' all ehuncarettenet checmeto. Allo'tpa' amach cha'nerreto, allo'tña esempohuañenpa' a'coñchatare'terrach.

5 Ñaña acheñenesha' ahuatpa' ama esesha' queshpatso allempo nanac atpare'chete't Yompor. Ñaña'pa' e'cho'pañpsanet oñ, ora erraparen patso. Ñap'ta Noé a'queshpat epuet cancherrsheña ñeñ't pamo'tsesha'. Tarro'mar Noé'pa' serrpare'te't ñeñ't atet poctetsa Yomporecop.

6 Ñaña ahuatpa' ñeñ't ye'chatsete't anetso ñeñ't pa'so'cheñ Sodomá ñaña Gomorra, Yomporpa' etoman'psanet pa'netser. Atto etoman'pesuerranet pa'netserpa' allohuenetpa' e'ñe poctacma poyuerret. Ora e'ñe tsapñere'tuet, o' a'chencatuerranet e'ñe poctacma. Atto te'pa' eñotatenan po'psheñe'chno ñerra'm o'ch atpare'te'ñet Yomporpa' attec'mach perraneterr. Ñeñ'to'marña ye'ñoteñ erra'tsencha' orrtatene' ñeñ't ama Yomporeye' po'ñoñ a'poteno, ñetpa'cho'ña attec'mach chenca'huerret ñamet.

7 Tarraña Yomporpa' a'queshpatan puesheñarr ñeñ't pa'so'cheñ Lot ñeñ't e'ñe pocte' es patsete't. Ñaña'pa' epaye' entenan pamo'tsesha' atto' pa'yesete't ñeñ't nanac sosey enten Yompor. Ñapa' epaye' llecachete't.

8 Ñapa' e'ñe cohuen cotape'che't. Pamo'tsesha'ña'pa' nanac pa'yesete't ñeñ't ama cohuenayaye. Ñaña'pa' epaye' entapretanete't ñeñ't cotape'chete't ñet, ñaña epaye' e'mapretanete't atto eñosatsetyesete't. Ñaña'pa' epaye' llecanete't tarro'mar ñapa' e'ñe cohuen cotape'che't pueyo'chro.

9 Ñeñ'to'marña Yomporpa' eñoteñ attoch a'queshpatan ñeñ't e'ñe pocte' es pets, ñerra'm esempo o' huapanet topateñets huomenc. Ñaña eñoteñ attoch muero'chtatan ñeñ't ama pocteye' es petso. Allo'nach muero'chtatnenanet esempo-huañencha' acrar'etetuerra allohuen acheñenesha'. Allempo'pa' mueñuerranetcha' coñcha'puetso.

10 Po'ño'chpa' coñchatancha' ñeñ't aña ma'yo'chrenaya ñeñ't atta muenatsetyets e'ñe po'chtso't, atto nanaccha' sosyare' ye'cha'yenet, añach e'ñe yomenet ñeñ't e'ñe ñet pocta'pñet. Ñeñ'to'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeñ't ahuamencatetyetsapa'cho'ña e'ñe ach'mare'tueñet. Amach añcha'na'tpahuoye' enteñeto.

11 Tarraña Yompor po'millañoñeñaneshar ama't nanac

ahuamenca'tet, ñaña ama't nanac añcha'taretet, ñetñapa' ama't Yomporesho'tsenet, ama sasare'teñetoña ñeñt' ahuamenca'ttetsa.

¹² Tarro'mar ñeñt' ama Yomporeye' po'ñoñ ye'chatetso ñetñapa' sasare'tenet tarro'mar ama es eñoteneto, e'ñe atfet ñerra'm es berr ñeñt' ama es eñotetso. Atef muena'yenetpa' atetcha' penet. Ñeñt' atef eñalletetsa atef ñerra'm es berr; tsapatonetpa' o'ch rromueñet. O'ch rromuetpa' o'ch muetset. Ñeñt' ama Yomporeye' po'ñoñ ye'chatetsopa' ñetpa'cho'ña es-empohuañen atfecmach a'cllatuaretterret.

¹³ Tarro'mar attoch atsa'tatuaretterret¹³ allohuen po'chñaret. Tarro'mar e'ñech ellapenete't coshatse'tatset ñeñt' ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñesha' mueneñet o'ch shecaset.

¹⁴ Ñeñt' ama Yomporeye' po'ñoñ ye'chatetsopa' chocmach mueneñ o'ch cohua'yesan coyanesha' attoch nanac cañoresha'tenet. Amach huañeno atto cotape'chenet sosey. Nanaccha' shequëñet coyanesha' ñeñt' ama tama es eñoto attoch aguëñet. Añach ye'chenet atto es ye'chatse'tyenet. Tarraña ñeñt' atef petsapa' o'patataretetcha' coñcheñets.

¹⁵ Tarro'mar ñetpa' o' puesuerret ñeñt' poctetsa. O' sa'nmet Yompor nanac ella'par. Ñetpa' cota'neñet atef pe't Balaam ñeñt' Beor puechemer. Ñapa' ahuatpa' añach cohuen ente't o'ch pa'yesa ñeñt' ama pocteyaye alloña gane't shonte' quelle.

¹⁶ Allempoña atef pe't Balaam ñeñt' ama pocteyaye, pashanorñapa' o' che'ptare'ch, atto' eños atef ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamñapa' allempoteñña o'huañ atef pa'yesan sosey.

¹⁷ Ñeñt' ama Yomporeye' po'ñoñ ye'chatenetopa' ñetñapa' amach es sherbertso. Ñetpa' ama't attetañ ñerra'mrrate' oñ allot potenpa' te'ñapa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach m'orr a'yopa', amach huato. Tarraña ñeñt' atef petsapa' o'patataretcha' all ama machecmeto o'pono.

¹⁸ Ñaña nanaccha' ommo'chenet atto pa'yenet ñeñt' nanac sosyare'. Ñaña o'ch a'secheñet po'psheñeñ attoch o'ch pachet ñeñt' nanac muenenet po'chets attotcha' a'psataretterret, allempoñapa' o'chcho' alla puerrerret. Shonte' acheñ ñeñt' e'ñe etserra puesuanmue' ñeñt' atef ye'cha'yese'te't ñeñt' nanac sosyare', tarraña allempoñapa' o'ch alla muenereterr ñeñt' o' puesuanmuetañ ahuat pocta'pñet.

¹⁹ Ñeñt' ama Yomporeye' po'ñoñ ye'chatetsopa' o'ch alla oteraneterr: "Ama palltenoña o'ch es yesuanom. Yapa' e'ñe co-

hueno'tseney. Yocoppa' ama eñalleña ñeñtcha' yeyore'terre'." Ama't atet oteneñ ñeñt atpare'tetspa' tarraña napa' o'ch notas, ñeñt atetpa' aña yeçhenet e'ñe ñet poçtaþña ñeñt nanac sosyare'. Tarro'mar ñerra'm erra'tsen es yeyçhatene' ñeñtþa' ñeñtaña pomnaren yepene'.

²⁰ Attecma ñerra'm ya. O' yeñotuer Yepartseshar Jesucristo, ñeñtara Ya'qushþatañer yepen. Yeparrocmateñoñ Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompor po'ñoñpa' yañapa' elloña nanaccha' yoroçheno'tseney.

²¹ Ahuatpa' yoroçheno'tseney tarro'mar ama yentare ñeñt poçtetsa Partsocop. Te'ñapa' o' yenter ñeñt poçtetsa. Tarraña ñerra'm te'pa' o'ch alla yepuerrerra ñaña o'ch alla yepuesuerrñañ po'ñoñ atet oteneñ Parets, te'ñapa' yañapa' elloña nanaccha' yoroçheno'tseney.

²² Yapa' po'ñoçh ñerra'm o'ch alla yepuerrerra çha yottena ñerra'mrrate' ochec. Yapa' o'ch alla yepuerrerra "atet ñerra'm ochec o'ch a'tatsta; o'ch a'tatsetuapa' tematenpa' o'ch alla puerrerra allo'tsen pa'tatsña." Amapa' çha yottena ñerra'm atet pena ñaña chañcho. "Chañchopa' o'ch apa; o'chña apuapa' o'chçho' alla puerrerra atstso allcha' e'yapna'tuerra o'ch alla atsotseñe'chuerr." Ama't ahuatoteñ atet otete't atet pena ochec, ñaña atet pena chañcho.

3

Esempoch huerrmocha Cristopa' orrterrach ñeñtcha' achmãre'terre' Yompor

¹ Te'ñapa' masheñneshacha' ñaña noçhaneshacha' o'ch notas, po'pocheño o' alla nequellquërrnaserr carta. Tarro'mar añecop nemneñ o'ch alla noctape'chaterrserr; o'ch alla neyerpaterrserr soçtaþña e'ñe cohuen.

² Ñaña o'ch alla noterrserr; añ poçtetsa amach sepsatsche ñeñt otye't ñeñt a'mta'yesaye't Parets po'ñoñ. Atet otye'tpa' atetcha' etsoterra esempohuañen. Ñaña amach sepsatsche atet o' otuas ñeñt Yompor puellsensarnesha'. Ñetpa' o' yeçhatuaset Yepartseshar Cristo po'ñoñ ñeñtþa' atetcha' seþa, ñeñtara Cristo Ya'qushþatañer yepen.

³ Ñanom o'ch señoçh añ, ñerra'm esempoch o' huerrmocha Cristopa' huapach ñeñtcha' achmãre'tene' Yompor poçtaþña. Ñeñtþa' attach coçape'chen atet muenatse'tyenet ñeñt cohuen entenent po'çhets.

⁴ Pachmãre'teñoþpa' o'ch otet: "Cristopa' otrerr esempopa' ahuo'ch huerra. Te'ñapa' ¿eso'marte' amo' huerro'? Ama't yatañneshañpa' o' colla'huenet; teme'ttsen yenten ora

errapařen e'ñe atter a tet orrte't ahuatoteñ allempo errte' ayečcataret pats."

⁵ Ñetpa' mueneñet o'ch puesuerret atto ahuat Yompor e'ñe po'ñoñoña o' yečcatuan enet. Patspa'cho'ña e'ñe po'ñoñoña yečca'hua. Ñaña e'ñe oño'pa' yečca añ pats.

⁶ Ahuatpa'cho'ña e'ñe puechopeño' oña' chenca'hua pats allempo e'ñe chorra oñ errapařen.

⁷ Ñaña Yompor po'ñoño'pa' te'pa' ama't patspa' esempo-huañenpa' poyuerrcha'. Enetpa'cho'ña attec mach poyuerrcha' ñaña. Aña cohuen esempohuañencha' acrareretuerra allohuen acheñenesha'. Allempochña mellapoterra. Ñeñña ama ame'ñenaye ñapa' o'ch mueñanet coñcheñsto.

⁸ Tarraña te'ña masheñeshacha' ñaña nočhaneshacha' amach atta es sepčhatsto. Añcha'ña o'ch seño; Yomporpa' entenan ama't mil char atet ñerra'm pamtarra. Ama't ñeññ ñapa' pamtarr enten, yocopñapa' yenteñ atet ñerra'm mil char.

⁹ Puesheña'tets acheñpa' otenet o' meten shonte' char amo' huerro. Tarraña yapa' yeñoteñ Yepartseshar čocmach a'pocatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yocape'chuerr ello cohuen Yomporcop allohueney. Ñapa' nanac muerenya ama mueno ama't eseshapa' o'ch chenquerra.

¹⁰ Tarraña ama't amo' huerro, esempopa' machayotach huerra. Atet ñerra'm eñet amach es yepčhenopa' machayotach huapa tsapo. E'ñech atet perraña ñaña Yepartseshar Cristo, e'ñech machayota huerra. Allempopa' huañerrcha' enet. E'ñe puepotrarenño'pa' huañcha'. Huañcha' ora ñeññ orreyetsa ñaña ama't ora allpon eñall, pañna'tuerrcha' ñaña e'yohuach. Tso'ñapa' ñach e'ñe e'yatuerre' allohuen ñeññ eñall. Patspa'cho'ña ñaña ora ñeññ ayečcataret arr patsropa' poyuach.

¹¹ O'ch poyuapa' o'ch e'yohua ora esocmañen. Ñeñto'marña sapa' añ pocetsa socop. O'ch soctape'cherr e'ñe cohuen Partsocop, ñaña o'ch sepomhuerra sañeña e'ñe Yomporcop.

¹² Ñaña añ pocetsa o'ch secuame'teñ esempoch yoročhtatuer Yompor. Sapa' o'ch setorreññaña attochña mameshapa' o'ch huerra. Esemppoch yoročhtatuer allempopa' ñachña a'crratuerrre' enet. O'ch a'crratuerran enetpa' allempochña pottle'chuerr e'ñe pocacma. Ñaña ora ñeññ orreyetsa entopa' ñeñtpa'cho'ña e'ñech poyuahuerre. O'ch poyuahuerrepa' o'ch e'yohuerra pocacma. Tso'ñapa' ñach e'ñe e'yatuahuerre' ora allohuen ñeññ eñall.

¹³ Tarraña yapa' yecueñ o'ch etsoterra atet otnerrey. Ñapa' ña yotnerre', eñalleterro'ch po'poñ enet etserrare',

Patspa'cho'ña o'ch eñallettera etserra. Allñapa' añach orrtatsa ñeñt e'ñe cohuenare' es p̄a'yets.

¹⁴ Ñehua, masheñeshacha' ñaña noçhaneshacha' o'ch secuame'teñ. Secuame'teñoŋpa' o'ch sema'yoçhrena attoch entuerres Yompor e'ñe pocte', attoch amach eñalle ñeñtcha' sependate'. O'ch cohuen sentannena epas samo'tsesha'.

¹⁵ Ñaña o'ch señoçh e'ñe eso'marte' amo' huerro Yepartse-shar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoch yequeshp̄a'huerra allohueney. Ñeñtara o' quellconas ñaña masheñ Pablo po'cartot. E'ñe Yompor pueñotateñoŋey atet quellconas ñaña. Yapa' nanac yemuerannena.

¹⁶ Ora allpon Pablo po'cartotpa' o' eñotatey atetcha' perra es-empo. Paŋe'tets ñoñets ñeñt quellquë't Pablopa' nanac echarr yenteñ o'ch yeñoçh e'ñe atet oteneŋ. Puesheña'tets acheñ ñeñt ama tama es eñotopa' atarr moñne'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeñto'marña çhocmach mueneñet o'ch e'nachaterrñañet atet oteneŋ Pablo po'cartot. Ñaña po'poñ Yompor po'ñoñ ñetpa' çhocma mueneñet o'ch e'nachaterrñañet atet oteneŋ. Ñetpa' attotcha' a'chencatatuerreret ñetañeña.

¹⁷ Ñeñto'marña masheñeshacha' ñaña noçhaneshacha' te' napa' o' notuas necartot ama't ama etsotena' atet notenes, attoçhña señoçh. Te'ñapa' señoŋa'tach allochñapa' amach she-caseto atto es panten ñeñt atpare'tets. Saña te'pa' amach sequeçpatsterrñañe Yompor po'ñoñ atet atarr same'ñena te'.

¹⁸ Añcha'ña e'ñe Yompor pemuereñoŋpa' allo'nepa'ch sesen cotape'chnomue' e'ñe cohuen, ñaña allo'nepa'ch sesen yemuetnomaya Yepartseshar Jesucristo ñeñtara Ya'queshp̄atañer yepen. Ya'ye'choçhtatoñepa'ch tayoteñ e'ñe errponohuañen. Te'pa' ñeñtach notas, ñeñtpa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt po'ñoñ pen Yompor; yañapa' allochña e'ñe yocrrerra

¹ Te'pa' o'ch neserrpare'tatas arr nequellcot ñeñt atet pena Jesucristo; ñapa' chocma eñall ama't ahuatoteñ ama't allempo ama ayeçhcatarettena' pats. Ñeñña yapa' e'ñe ye'me't atet serrpare'tatyese't allempo orrtosa arr patsro, ama't ya yecloyotpa' e'ñe yeñche't e'ñe allame'tets, ama't e'ñe ya yototpa' ya'plla'yese't. Ñeñña Jesucristo ñapa' ñeñña po'ñoñ penña Pompor Parets tarro'mar ñach e'ñe eñotaterre'ña acheñenesha' atet oten Pompor Parets. Ñeñña ña po'ñoñpa' po'ñoçh yapa' allochña corretsayach.

² Ñeñña Jesucristo allempo acheñetos arr patsro yañapa' e'ñe yeñche't. Ñeñto'marña te' yapa'cho'ña chocma yeñotatenes samã. Ñeñto'marña yeserrpare'tatenes ñeñña Cristopa' ñeñt alloch yocrrena ama't tayoteñ e'ñe errponañohuen. Ña ahuatpa' e'ñe parro'tsen epuet Pompor Parets. Te'ña atto orrtosnaya arr patsro yapa' e'ñe yeñche't e'ñe ye'me't atet serrpare'tatyese't. Ñeñto'marña te' ya ñeñt atet yentyese't, ñeñt atet ye'myesoñe't, te'ñapa' o'ch yeserrpare'tatas samã.

³ Allochñapa' attoch allohueney yeparrocmaterr epay Yompor Parets ñaña Puechemer ñeñt Jesucristo.

⁴ Ñeñto'marña nequellquënnas ñeñt e'ñe po'ñoçh yeñoten attochña sapa'cho'ña o'ch e'ñe socsherra samã.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt ye'mapretyese't Jesucristo, te'ñapa' o'ch yeserrpare'tatas. Ñeñtpa' atet eñotateney: Yomporpa' ña e'ñe cohuenare' es pa'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtate-nanoña ñeñt ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'.

⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt ama cohuenaye' enteno ña, yañapa' atta yeshquën. Ñeñto'marña chach yottena ñerra'm checmeta yechope'chen tarro'mar ama e'ñe yeyçhena' ñeñt e'ñe po'ñoçh cohuen enten Yompor.

⁷ Tarraña ñerra'm e'ñe cohuenare' es yorrtatyen atet pena Yompor, ñeñtña' e'ñe atet yepena ñerra'mrrate' arr yechope'chen puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt Jesucristo ña po'rrasoña chocma e'shennayña allohuen yo'chñar.

⁸ Tarraña ñerra'm cha yoten, "napa' amaca'ye eñalle no'chñar", ñeñtña' yañeñaca'ye shequëtsa tarro'mar Yompor poctapña ñeñt e'ñe po'ñoç cohuenpa' amaca'ye çhennayoña yeyoçhro.

⁹ Tarraña ñerra'm cho ya'meten yo'chñar, Yomporña' e'ñech peretna'huerrnay allohuen yo'chñar, e'ñech e'shohuerrnay allohuen ñeñt ama pocteye' entapretenye tarro'mar ñapa' ama puenesho po'ñoñ, ñapa' e'ñe pocte' es pen, ñeñto'marña ñapa' chocmach peretnerrey.

¹⁰ Ñaña ñerra'm cha yoten, "napa' ama no'chña'tpeno", Yomporña' cha yottatateñ ñerra'mrrate' ñapa' atarr ashcañ tarro'mar po'ñoñpa' atet oteney ya allohueneypa' e'ñe yo'chña'tuen. Ñeñtña po'ñoñpa' yañapa' ama't e'ñe mameshapa' ama çhappennayoña yeyoçhro.

2

Jesucristo ñeñt e'ñe cohuen eñets yocop Yomporesho

¹ Nechemerneshacha' te' socoppa' o'ch nequellconas attoch amach allo'na sepa'nenno ñeñt ama't mameshapa' ama pocteye' enteno Yompor. Tarraña ñerra'm esesha' orrtatene' ñeñt ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñtcha' eñosets Apuesho. Ñeñtña' añ Jesucristo ñeñt e'ñe pocte' es pa'yets.

² Ñapa' ña aparet attoch tsa'tuerrnaya yo'chñar. Ñeñtña' ama e'ñe yaptecpayaye, añeçpa'ñaña allohueney ñeñtey añe patsro'tsa'yeney.

³ Ñerra'm e'ñe po'ñoç yame'ñerrñaña Yompor po'ñoñ ñeñt atet oteney allempoñapa' e'ñech po'ñoç yeñoter ñeñt atet pena ña.

⁴ Ñeñt otets, ñapa' e'ño' eñoteñ atet pena Yompor, ñerra'm attera atpare'tenan Yompor po'ñoñ ñeñt atet oteney, ñeñtña atet otetspa' ñapa' atfaca'ye shequën. Ama't e'ñe mameshapa' ama cheññañoña Yompor po'ñoñ pueyoçhro ñeñt e'ñe po'ñoç atet oteney.

⁵ Tarraña ñerra'm esesha' e'ñe po'ñoç ame'ñerraya Yompor po'ñoñ ñeñt atet oteney, ña po'ñoçhpa' o' morrenterrana

Yompor e'ñe pueyoçhrocmañen. Ñeñtpa' attoña yeñoteñ po'ñoçhpa' o' yeparrocmaterr epay Yompor.

⁶ Ñerra'm esesha' otets, ñapa' e'ño' parrocmaten epuet Yompor, ñeñtepnapa' orrtatyesanepa'ña ñeñt atet pa'yese't Yompor Puechemer ñeñt Jesucristo.

Cristopa' ña orrtaterre' etserra morrentanna'teñets attochña e'ñe cohuen yemorrentannerra

⁷ O'ch masheñneshacha' ñaña noçhaneshacha' notas, ñeñt atet notenes nequellco't te' amorrentanna'tpahuepa'ch sentannena allohuenes ñeñtpa' ama añeyaye ñoñets ñeñt ama se'mare. Ama't allempoteñ e'ñe erрте' same'ñerrapa' allempoteñ se'muerrña ñeñt ñoñets ñeñtcha' atet sepa e'ñe cohuen ñeñtara Yompor po'ñoñ ñeñt e'ñe erertes e'muene' allempo.

⁸ Tarraña morrentanna'teñets ñeñt atet nequellquënnas te' ñeñtpa' e'ñe atet ñerra'mrrate' o' tayoy orrtatonasetña atet morrentanna'teñets, tarro'mar Cristo e'ñe po'ñoçh orrtatonayña e'ñe etserra attoch e'ñe cohuen yemorrentanna'terra, ñeñto'marña sapa'cho'ña te'pa' o' e'ñe etserra sorrtaterrña saña attoch semorrentannerra. Morrentanna'teñets po'ñoçhpa' ñeñtña atarr sherbets tarro'mar ora allohuen ñeñt ama cohuenaye' enteno Yompor, ñeñtñapa' allo'na sen huañuanmats. Ñeñtpa' e'ñe atet pena ñerra'mrrate' checmete'pa' allo'na sen metuanmats. Allohuen ñeñt e'ñe po'ñoçh cohuen enten Yompor, ñeñtpa' atet ñerra'mrrate' puetare', ñeñtña po'ñoçh o' a'puetarsamperres.

⁹ Ñeñtña otets ñapa'cho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'cho' orameñ checmeto'tsena.

¹⁰ Tarraña ñeñt e'ñe po'ñoçh muerenaya pamo'tsesha', ñeñtñapa' e'ñe Yompor po'puetarenño yeçhena. Allñapa' ama eñalleña ñeñtcha' paterrayerr ñeñt ama pocteye' enteno Yompor.

¹¹ Ñeñtña e'moñe'tyene' pamo'ts ñapa' orameñ checmeto'tsen. Ñaña'pa' atet pena ñerra'mrrate' puesheñarr ñeñt checmetch chopeñe'chyen, ama eñoteñe errene'te'ña sen tarro'mar checmete'pa' ñeñt a'nataclle'chene'.

¹² Nechemerneshacha' sa so'chñarpa' o' a'pretna'huareterra Cristesho't, ñeñto'marña te'pa' atet nequellquënnas.

¹³ Ñaña te'pa' o'ch notas saña allohuenes ñeñtes e'ñe pompornesha' penset. Sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama ayeçhcatarettena' pats; ñeñto'marña te'pa' atet nequellquënnas saña. Ñaña te'pa' o'ch notas saña allohuenes ñeñtes huepueshares, sapa'

o' e'ñe satpare'ter oneñeñ; ñeñto'marña socop te'pa' atet nequellquënnas samãa.

Ñamã sa nechemerneshacha'te' sapa' o' e'ñe señoter atet penaña Yompor Parets; ñeñto'marña te'pa' atet nequellquënnas e'ñe socop.

14 Ñamã sa ñeñtes pompornesha' e'ñe penset, sa te'pa' o' señoter Cristo ñeñ e'ñe ahuatoteñ eñall ama't e'ñe allem-poteñ ama ayeçhcatarettena' pats; ñeñto'marña te'pa' atet nequellquënnas. Ñamã sa ñeñtes huepueshares, sapa' atarr ahuamencates tarro'mar Yompor po'ñoñpa' o' e'ñe çhaponasa seyochro ñeñto'marña sapa' o' atarr satpare'ter oneñeñ; ñeñto'marña te'pa' atet nequellquënnas.

15 Amachña aña atarr semorrentatsto allohuen ñeñ yentyen aña patsro tarro'mar ñerra'm aña atarr yemorrentena ñeñ aña patsro'tsenpa' Yomporña Parets po'ñoçhpa' amach yemorrenteño, (ñeñto'marña amach errotentot çhaponayoña yeyochro ñeñ atet muenen ña).

16 Allohuen ñeñ eñall aña patsro, atet ñerra'm ñeñ atet muenatyenyey yechets, ñamã ñeñ yeye'chapretyena e'ñe ya yecueñoñ, ñamã ñeñ e'ñe yemnen ya o'ch e'ñe cohuen entapretyet, ñeñña allohuenpa' ama Yomporeshoteye' hueno, ñeñpa' aña patsro'marnesha poçtañña.

17 Allohuen ñeñ yentyen aña patsropa' ñeñpa' atarr ahuañaña, ñamã ñeñ yemnatse'tyen aña patsro ñeñpa'çho'ña atarr ahuañaña. Tarraña ñeñ atet petsa ñeñ e'ñe atet muenen Yomporpa' ñeñña' amach huañerro ama't errponaña.

Atet pena cotañats ñeñ e'ñe po'ñoçh Yompor poçtañña ñamã atet pena po'poñ cotañats ñeñ shequëntsa

18 Te' nechemerneshacha' o'ch huañerr allempochña mellapoterra. Atet se'myen te' ñeñpa' allempochña orrterra ñeñcha' atarr e'moñe'terre' Cristo pueyochreshohuen. O' e'ñe tayoteñ orretyesa shonte' ñeñ çhocma e'moñe'tene' Cristo. Ñeñto'marña te'pa' yeñoteñ o' mellapoterrmocha.

19 Ama't ahuañmo'cha e'ñe parrocmã yapçhañe't ñetña te'pa' o' ahuanmuet ellonet o' sohuanerryet tarro'mar po'ñoçhpa' ama allohuenacmaye' yeparrocmaterro. Ñerra'm po'ñoçhcha' allohuenacmay yeparrocmaterreñ allempona ñetpa' allo'tsa'yenetaña'te' ñamet yesho. Tarraña te'ña ñetpa' o' ahuanerret ellonet attoña o' yeñoterranet po'ñoçhpa' ama allohuenacmaye' yeparrocmaterro.

20-21 Tarraña te'ña sapa' Cristoña sechorratenayaña Parets Puecamquëñ. Attoña allohuenes o' e'ñe señotuer. Sapa' o' e'ñe señotuerr ñoñets ñeñ po'ñoçh, ñeñpa' ama shequëntsoyaye.

Te' sapa' ama e'ñe sepallteñoŕeye' nequellquënnaso ñeñt' atet poctetsa socop. Tarro'mar sapa' señoŕeñ ñeñt' ñoñets shequëñetspa' ama Yomporeshoteye' hueno tarro'mar ñeñt' Yompor po'ñoñpa' ñeñt'ña e'ñe po'ñoçh ama shequëñtsoyaye.

²² Te'ña sapa' señocheŕa'ch ñeñt' atarr nanac ashcañtetsapa' ñeñt'ca'yeña otets Jesúspa' año' Cristoyaye ñeñt' atarr yecuen ya ahuaŕoteñ ñeñt'cha' llesenserr Yompor. Ñeño'marña ñetpa' çha e'moñe'teñetña Cristo, ama çhoye' ame'ñeñeto, Pompore'naña ama ame'ñeññañeto, çha a'nasoteñet.

²³ Allohuen ñeñt' a'nasotenaya Yompor Puechemer, ñetpa' Pompore'naña ama aguëññañeto. Tarraña allohuen ñeñt' otets, Jesúspa' Yomporo Puechemer ñeñt' Cristotets, ñetñaŕa' e'ñe aguëññañet Yompor.

²⁴ Ñeño'marña o'ch notas, Yompor po'cohuenña ñeñt' se'muerr ahuañmo'çoteñ, te'ña sa atto o' e'ñe señoŕer seyoçhro allo'nepa'ch sesen ame'ña'nmata allochñaŕa' attoch e'ñe cohuen separrocmaterr epas Yompor Puechemer ñaña epas Yompor Parets.

²⁵ Jesucristopa' atet oŕnerrey o'ch apuerrey e'ñe po'ñoçh attochña yapa' corretsayach yocsheñeshocmañen tayoteñ e'ñe errponañohuen.

²⁶ Ñeñt' notenes añ nequellcoŕ ñeñt'pa' añecpa nequellquënnas attoch sapa' e'ñech señoŕer allochñaŕa' attoch ama sa'shcaretterro.

²⁷ Tarro'mar Jesucristo o' chorraterra Parets Puecamquëñ, ñeño'marña sapa' ama sepallteno o'ch esesha' yeçhatas tarro'mar ñapa' eñotatascha' allohuen. Ñaña ñeñt'cha' atet yeçhaterres ñapa' e'ñeca'ye po'ñoçh atet, ñeñt'pa' ama shequëñtsoyaye. Ñeñt' atet yeçhatenes sapa' allo'nepa'ch sesen parrocmatenaya Cristo.

²⁸ Te'ña nechemerneshacha' allo'nepa'ch sesen parrocmatenaya Cristo allochñaŕa' ñerra'm esempoch huerra ñapa' ñachña e'ñe seyemtapuerra attoch sapa' amach çha sepenca-puero ñerra'm esempoch huerra.

²⁹ Ñehua, sa te'pa' o' e'ñe señoŕer Jesucristo ñapa' e'ñe pocte' es pa'yen. Ñeño'marña señocheŕa'ch ñaña allohuen ñeñt' e'ñe pocte' es orrtatyets ñeñt'ñaŕa' e'ñe po'ñoçh puechemer peñ Yompor.

3

Yomporpa' e'ñe puechemerasha' peney

¹ Te' sapa' çhosaña e'ñe cotape'cherre', Yomporpa' atar-rcay'e nanac morrentenya. Ña e'ñe puemorrenenteñoŕe ñapa' e'ñe puechemer peney, ñeño'marña yapa' e'ñe po'ñoçh

Yomporena'tarey. Ñeñto'marña acheñenesha' arr patsro ñeñt' ama ame'ñetso ñetñapa' ama eseshaye' eñotenayeña ñeñt' atet yoctape'chyen Yomporecop tarro'mar Yomporpa'cho'ña ama eseshaye' eñotenaye ñeñt' atet cotape'chen ña.

² O'ch masheñeshacha' ñaña nochaneshacha' o'ch alla noterrser, te'ña yapa' e'ñe po'ño'ch puechemer peney Yompor. Ama't ama e'ñe eñotatenya' erroteneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt' atet atarr cohuentena ña.

³ Allohuen ñeñt' atet ame'ñetsa, ñetña e'ñe pueyemteñotet cohume'teñet, attoña ñetpa' e'ñech cohuen a'cohuentataretterret ñamet e'ñech attet ñerra'm Jesucristo ñeñt' e'ñe cohuenare' es orrtatyets.

⁴ Allohuen erra'tsen ochña'tetspa' ñeñt'ña' cha atpare'tenan Yompor po'ñoñ ñeñt' atet anaret. Tarro'mar ñerra'm esempo yatpare'ten ñoñets ñeñt' atet anaret, ñeñt'ña yapa' chach yeyoren yo'chñar.

⁵ Sapa' e'ñe señoteñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama eñalle po'chñar ama't coñe'ta.

⁶ Ñeñto'marña allohuen esesha'ch parrocmaterre' Cristo, ñetñapa' ama choye' ochña'tare'teneto. Tarro'mar ñeñt' atarr ochña'tare'tetspa' ñeñt'ña' ama puentaranoña Cristo, ama cheññañoña pueyo'chro ñeñt' atet pena Cristo.

⁷ Nechemerneshacha' sapa' señoche'pa'ch ñeñt'cha' atet noterrser te', allochñapa' attoch amach esesha' seshquërraye. Po'ño'ch ñeñt' orrtatyene' ñeñt' e'ñe pocte' enten Yompor, ñeñt'ña po'ño'chpa' e'ñe cohuen acheñer, e'ñech atet pena ñerra'm Cristo ñeñt' e'ñe pocte' es pa'yets.

⁸ Tarraña ñeñt' chocma orrtatyene' ñeñt' ama pocteye' enteno Yompor, ñeñt'ña acheñerpa' po'ño'ch oneñetena'tar, tarro'mar oneñetpa' e'ñe ahuatoteñ ñapa' aña orrtatyets ñeñt' ama't mameshapa' ama pocteye' enteno Yompor. Ñeñto'marña Yompor Puechemerpa' huapa, allochñapa' ñach e'nuerre' atet patse'tyena oneñe't.

⁹ Allohueney ñeñtey po'ño'ch eñalletertsa Yomporotpa' amach allo'na yo'chña'tare'tneno tarro'mar yapa' o' yeycherrñañ ñeñt' atet pena Yompor Parets. Yapa' po'ño'chpa' o' ye'ñalletterra Yomporot ñeñto'marña amach errotenot' alla yo'chña'tare'terre'te.

¹⁰ Arrpa' attoña yeñoteñña ñeñt' Yomporena'tar ñaña ñeñt' oneñetena'tar. Allohuen ñeñt' ama pocteye' es orrtatyetso

ñeñt ama morrentenaye pamo'tsesha', ñetñapa' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueney

11 Añ ñoñetspa' e'ñe ahuatoteñ eñotatasete't amorrentanna'tpahuepa'ch e'ñe allohueney.

12 Amach atet ye'patsto atet pa' ahuat Caín, ñapa' oneñe'fena'tara. Ñaña'pa' pa'mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheña Abel ñeñt muetsa, ñaña'pa' e'ñe cohuen cotape'che't Yomporecop.

13 Ñeñto'marña masheñeshacha' ñaña' no'chaneshacha' e'ñepa'ch se'ñota sapa' ñeñto'marcha'ña e'moñe'tasña acheñenesha' añ patsro ñeñt ama ame'ñetso.

14 Tarraña ya e'ñe yemorreneteño' yamo'tspa' e'ñe yeñoteñ yapa' o' yeñtanerrña allcha' e'ñe poctacma yerromuerreñ. Yapa' o' ye'cherr allña yapa' corretsayach. Ñeñtña ama muerenayo pamo'ts ñetñapa' allo'tsenareta allcha' e'ñe rromuerret e'ñe poctacma.

15 Allohuen ñeñt cha e'moñe'tyenan pamo'tspa' ñeñt po'ño'chpa' amtsaña enteñña Yompore. Ama't e'ñe sapa'cho'ña se'ñoteñ ñeñt amtsaña' pueyo'chropa' ama eñalleña attoch ñapa'cho'ña corretsach tayoteñ e'ñe errponañohuen.

16 Arrpa' attoña e'ñe yeñoteñña ñeñt atet penaña e'ñe po'ño'ch morrenteñets, attoña Jesucristopa' a'rroya ñaña'ña attoch rroma yocop. Yapa'cho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop.

17 Tarraña yaña ñerra'm yechyen attoch e'ñe cohuen yocrena arr patsro, allempo yenteñ yamo'ts cha atarr es pallta'yenet yañapa' ama yemorreneteño, Yomporpa'cho'ña ama't e'ñe mameshapa' amaca'ye yemorreneteñoña yeyo'chro.

18 Amach nechemerneshacha' e'ñe yeño'ño'chaya yotanna'tatsto atarr yemorrentannena. Chochña yorrtatyesña yemorreneteña e'ñe po'ño'ch atet es ye'pa'yen po'psheñecop e'ñe cohuen.

Attoch e'ñe cohuen yeyemtera Yompore

19 Alloña yapa' e'ñech yeñotena yapa' e'ñe po'ño'chey ñeñtey atet petsa e'ñe cohuen. Ñeñto'marña yapa' e'ñech yeñmataten yeyo'cher Yomporeshone't.

20 Tarro'mar ñerra'm ama e'ñe yeñmañeshocmaye' es ye'pa'yeno Yomporecop, Yomporña'pa' elloña e'ñe po'ño'ch atet eñoteney tarro'mar ñapa'ña atarr eñotañesha'.

21 Tarraña nechemerneshacha' ñerra'm e'ñe yeñmañeshocmañen es ye'pa'yen Yomporecop ñeñte'pña'pa' Yomporcha'ña e'ñe cohuen yeyemtena.

22 Atto yame'ñerrñaña po'ñoñ ñeñt atet oteneý, ñapa' atarr coshenya; ñeñto'marña ñerra'm es yenamueñ, ñapa' chocmach e'ñe po'ñoç apueneý.

23 Yompor po'ñoñoç atet oteneý o'ch e'ñe cohuen yame'ñerrñaña Puechemer ñeñt Jesucristo. Ñaña oteneý amueranna'terrapo'ch allohueneý, atet oteneýña ña.

24 Erra'tsencha' e'ñe cohuen ame'ñenaya Yompor po'ñoñ ñeñt atet oteneý, ñetña' e'ñe parrocmatenet epuet Yompor. Ñeñto'marña yeñoteñ yeparrocmaten, Parets Puecamquëñoç ñeñt chorratenya ñeñtña yeñotatene'ña e'ñe yeparrocmateña Yompor.

4

Attoch yeñoç erra'tsente'ña ñeñt e'ñe po'ñoç eñoraten Yompor Puecamquëñ; attoch yeñoç ñaña ñeñt epatare'tene' Yompor poçtañña

1 Ñaña te'pa' o'ch masheñneshacha' ñaña noçhaneshacha' noterrser, sapa' ñato't same'ñena'ña allohuen pa'namen coçaññats tarro'mar ñetpa' ama't otenetañ Partso' Puecamquëñ eñoratenahuet, sapa' chocña señoysesña ñeñt pa'namen coçaññatser attochña sapa' e'ñe señoç erra'tsente'ña ñeñt e'ñe po'ñoç huetsa Yomporeshot. Tarro'mar shonteñ ñeñt otetseñ ñetpa' Yomporo' po'ñoñ a'mtenet tarraña ñeñtpa' ama Yomporeyaye po'ñoñ. Ñeñtpa' errañaren o' orreyesa añ patsro.

2 Arr sapa' alloch señoç erra'tsente'ña e'ñe po'ñoç eñoratenña Parets Puecamquëñ: Erra'tsencha' otats Jesucristopa' ña po'ñoç partsoç acheñetos arr patsro, ñeñtña coçaññatserpa' e'ñe po'ñoç Parets Puecamquëñ eñoratene'.

3 Erra'tsencha' ñeñt amach atteye' otetso Jesúsocop, ñeñtña coçaññatserpa' ama po'ñoç Parets Puecamquëñ eñoratenahuet. Ñeñtpa' ñeñtña po'ñoç e'moñe'tene'ña Cristo ñeñt atet se'mare'tyese't o'ch huapa. Te'ñapa' o' orrtonaya añ patsro.

4 Saña po'ñoç nechemerneshacha' e'ñe po'ñoç Yomporena'tares tarro'mar sapa' ama aña se'mñoteno atto pa'namenot shecare'tyensetañ. Yompor Puecamquëñ ñeñt sechorrenayapa' ñeñtña sapa' atarr ahuamencattatenes. Ñeñtña chorrenaya añ patso'marnesha'pa' ñapa' ama e'ñeye' ahuamencattatenaneto.

5 Ñeñtña shecare'tyets e'ñe ñet poçtaññotet po'ñoçpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt patso'marecpa. Ñeñto'marña ñetpa' patso'marneshach e'mñotenahuet.

⁶ Yaña po'ñoçhpa' Yomporena'tarey. Ñeñt po'ñoçh eñotene' Yompor, ñetñapa' e'ñech cohuen e'mñotenyet ya. Ñeñña ama Yomporena'tareyaye, ñetñapa' amach e'mñotenyeto. Yapa' alloña yeñotenña cotapñats ñeñt po'ñoçh huetsa Yomporeshot attoña yeñotenña ñaña cotapñats ñeñt shequëñets.

Atto Yomporpa' ña atarr amorrentañtetsa

⁷ Masheñneshacha' ñaña noçhaneshacha' amuer-anna'tpahuepa'ch allohueney tarro'mar ñeñtpa' Yomporeshot huena. Allohuen amorrentñapa' ñetpa' o' eñalletteret Yomporot, po'ñoçh o' eñoteret ñeñt atet pena Yompor.

⁸ Ñeñña ama amorrentñopa' ñocpuetpa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa.

⁹ Añpa' Yompor orrtate' yocop allochñapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñt po'patrro pen attochña yapa' corretsayach e'ñe ñeshot.

¹⁰ Arrpa' all orrtatonay Yompor ñeñt e'ñe po'ñoçh morrenteñets: Allempo ya ama't mameshapa' ama yemorrentpeño Yompor, ñaña' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

¹¹ Ñeñto'mar masheñneshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueney.

¹² Yomporpa' ama esesha' puentare. Tarraña ñerra'm e'ñe yemorrentannena allohueney, po'ñoçhpa' e'ñe yeparrocmaten epay Yompor. Ña puemorrenteña' e'ñech chorrenya poctacma.

¹³ Ña atto apuerrey e'ñe ña Puecamquëñ ñeñtña yeñotatene'ña yapa' e'ñe yeparrocmaten epay Yompor.

¹⁴ Ñaña yapa' e'ñe yentuoñet Yompor Puechemer ñeñto'marña ya te'pa' o' ya'potonas saña atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñtey yeçha'yetsa añ patsro.

¹⁵ Ñeñt ame'ñenaya Jesús ñapa' po'ñoçh e'ñe Yomporo Puechemer, ñetñapa' e'ñe parrocmatenet epuet Yompor.

¹⁶ Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor.

¹⁷ Attoña yapa' e'ñech cohuen yemorrenteña Yompor e'ñe poctacma, allochñapa' yapa' amach yeñcha'nañotayaya

yeyemtero Yompor ñerra'm esempohuañen eñotatyesserrey e'ñe errotencha' entyesserrey. Tarro'mar e'ñe atet pena Jesucristo, yapa'cho'ña e'ñech atet yepena yama arr patsro.

18 Ñerra'm po'ñočh yemorrenteña Yomporpa' amachña čha yemicha'teñe. Tarro'mar atto e'ñe poctacma cohuen yemorrentannena epay Yompor, ñeñña po'ñočh yehuapore'tam'pene'ña yemicha'ñ. Ñerra'm esempo čha es yemicha'tenpa' attoña e'ñe yañeña coñchatetsa. Ñama ñerra'm orameñ yemicha'ten amaca'ye e'ñe yeyčhena'ña attoch e'ñe cohuen yemorrentannena e'ñe poctacma.

19 Yomporpa' o' e'ñe morrenterrya yanom, ñeñto'marña yapa'cho'ña te'pa' o'ch e'ñe yemorrentera yama.

20 Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm čha e'moñe'tyenan pamo'ts, ñeñña atet otetspa' attaca'ye shequën. Atto ama morrentenano pamo'ts ama't ñeñtpa' e'ñe enteñ, amach errotenoť morrentanoña ñama Yomporña' tarro'mar ñeñtpa' amaca'ye čhoye' enteñe.

21 Yompor po'ñoñ ñeñť yotene': Ñerra'm po'ñočh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñoť Cristo čhocmach pomnaren yepen allohuen ñeñť ama pocteye' enteno Yompor arr patsro

1 Allohueney erra'tseneycha' ame'ñerraya Jesús'pa' ña Cristotats ñeñteyña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña puesheñarr acheñ ñeñť achemerashať, puechemerasha'naña e'ñe yemorrentuena.

2 Ñeñto'marña yeñoteñ ñama ñerra'm esempo yemorrenteña Yompor ñama yame'ñerrñaña po'ñoñ atet oteneý, aña'naña e'ñe yemorrentuena ñeñť puechemerasha' pen Yompor.

3 Atto yemorrenteña Yompor čhoch yame'ñerrñaña po'ñoñ ñeñť atet oteneý. O'ch e'ñe yepena ñeñť atet oteneý, ñeñtpa' ama torrapahuoyaye.

4 Tarro'mar allohueney ñeñtey puechemer pen Yompor, yañapa' e'ñe yeyemteñoť Jesús čhocma pomnaren yepen allohuen ñeñť ama pocteye' entyeno Yompor arr patsro.

5 Allohuen ñeñť ame'ñenaya Jesús ñapa' Yomporo' Puechemer, ñetña e'ñe ñapťet pomnaren penetña allohuen ñeñť ama pocteye' entyeno Yompor arr patsro.

Allpon ñeñť yeñotaterre' Jesucristopa' e'ñe po'ñočh Yompore-shot huapa

6 Ñeñta Jesucristo allempo huapa arr patsro eñall ñeñt yeñotaterre'ña ñapa' e'ñe po'ñoçh Yomporeshot huapa. Ñeñt ñanompa' allempo atto apatareta Yomporecop oño. Tarraña ama e'ñe ñapña oña yeñotataye ñapa' e'ñe po'ñoçh Yompor Puechemer. Po'rraso'naña yeñotate'ña allempo acorso'tam̃psaretterra; ñapa' e'ñe po'ñoçh Yompor Puechemer. Ñaña Parets Puecamquëñ ñeñtpa'cho'ña ña yeñotaterre'ña Jesúsapa' e'ñe po'ñoçh Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñoçh atet.

7 Ñaña eñall ma'pa ñeñt pue'ntaño'tsen ñeñtña yeñotateney'ña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrra atet petsa.

8 Ñaña arr patsro eñall ma'pa ñeñtña yeñotateney' Jesúsapa' ña po'ñoçh Yompor Puechemer. Ñeñtpa' Parets Puecamquëñ, allotpa' oñ allempo apatareta Yomporecop allotpa' ñaña po'rras atto acorso'tam̃psaretterra. Ñetpa' ama't ma'po'maret eñotateney, e'ñe patrra eñotateney ñeñt Jesús ñapa' e'ñe po'ñoçh Yomporo Puechemer.

9 Ñehua, arr patsro chocma e'ñe pocte' yenteñ ñeñt atet eñotateney achen tarro'mar ñeñtpa' chocma sherbeney. Ñaña ñeñt atet eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemerecop eñotateney Jesúsapa' Yomporo Puechemer.

10 Ñerra'm esesha'ch ame'ñerraya Yompor Puechemer, ñeñtña' echerrancha' e'ñe ña pueyoçhro ñeñtcha' eñotaterre' e'ñe pocte' o'ch e'ñe yemterrana Jesucristo ñeñt e'ñe po'ñoçh Yompor Puechemer. Ñeñtña ama ame'ñenayo Yomporpa' cha ottatateñ ñerra'mrrate' ñapa' atarr ashcañ tarro'mar ñeñt achenepa' ama ame'ñenano Yompor ñeñt atet eñotateney Puechemerecop.

11 Yomporpa' atet eñotateney atto yapa' apuey Puechemer, e'ñe ñeshoñña yapa' corretsayach yocsheñeshocmañen tayoteñ e'ñe errponañohuen.

12 Ñeñtña aguërre' Yompor Puechemer aña'naña o' aguërret attochña ñetpa' corretsetach tayoteñ e'ñe errponañohuen. Aña ñeñt ama aguërraye Yompor Puechemer, ñetña' amach esesha' aguërraye alloch correrret.

All pa'namen cotape'chatnerranet e'ñe allohuanen allempo so'tnerranet po'cartot

13 Ñeñt allpon o' nequellconas sa ñeñtes ame'ñenaya Yompor Puechemer, sapa' ñeñtcha'ña señotaterre' po'ñoçh

sapa' corretsasach socsheñeshocmañen e'ñe tayoteñ errponañohuen.

14 Yapa' e'ñe yeyenteñoñ Yompor ñeñto'marña yeñoteñ es yenamñ ñeñt pocte' enten ña, yapa' chocmach e'mñoteny.

15 Ñaña atto yeñoteñ ñapa' chocma e'mñoteny ñerra'm es yenamñ ñeñto'marña yeñoteñ e'ñe allorocma o' yo'patataretta ñerra'm escha' yenamueñ.

16 Ñerra'm eseshascha' eñote' samo'ts ñeñt atet pene' ñeñt ama pocteye' enteno Yompor, ñeñtña po'chñarpa' ñerra'm ama añecpayaye alloch rromuerr attoch chenquërra e'ñe poctacma, sañapa' añcha' senamoñ Yompor attoch ñach a'crraterre' e'ñe puecamquëñoñ. Yomporpa' o'ch a'crrater ñerra'm po'chñarpa' ama añecpayaye alloch rromuerr attoch chenquërra e'ñe poctacma. Po'ñoçhpa' eñall yo'chñar alloch yerromuerr attoch yechenquërra e'ñe poctacma. Ñeñto'marña napa' ama añecpaye' notenso sapa' chocmach sema'yochañpeña ñeñtcha' chenquërrtsa e'ñe ña patpare'teñoñ.

17 Ñehua, yeñoteñ allohuen ñeñt ama pocteye' enteno Yompor ñeñtpa' ochña'teñets enteñ Yompor. Tarraña eñall ñaña ochñarets ñeñtpa' ama añeyaye ñeñt alloch yerromuerr attoch yechenquërra e'ñe poctacma.

18 Yeñoteñ allohueney ñeñtey po'ñoçh eñalletertsa Yomporotpa' amach allo'na ye'pa'нено ñeñt ochñarets enten Yompor. Tarro'mar Yompor Puechemerpa' chocma cohuanñpeney ñeñto'marña oneñetpa' ama't e'ñe mameshapa' amach alla errot perrye'te.

19 Te'ña yapa' yeñoteñ o' yeyomporena'tarterra ya. Po'potantañña acheñenesha' arr patsro ñeñt ama ame'ñetso, ñetñapa' aña yochresha'tenahuet oneñeñ.

20 Yañapa' yeñoteñ ñeñt Puechemer pen Yomporpa' ñaña'apa' o' huapa. Ñaña yeçhapterre'ña yeyoçhro attochña yapa' o'ch yeñoter Yompor ñeñt e'ñe po'ñoçh Parets. Ñeñto'marña yeñoteñ o' yeparrocmaterr epay ñeñt e'ñe po'ñoçh Yompor Puechemer ñeñtpa' Jesucristo. Attoña yapa' o' e'ñe yeñoter Yompor ñeñt e'ñe po'ñoçh Parets, ñeñtña yapa' allochña e'ñe corretsayach yocsheñeshocmañen tayoteñ e'ñe errponañohuen.

21 Te'ña nechemerneshacha' sapa' e'ñech señotnoma, ñato'tña seyomporer sepeña'ña po'poñ ñeñt ama po'ñoçh Partsoyaye. Te'pa' ñeñtach notas, ñeñtpa' attetepa'ch Nompore. Allohua.

Juan

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoçh atet oteneý Yompor po'ñoñ

¹ Napa' na ñeññen pompor pen allohuen ñeññ ame'ñenaya Yompor, te'pa' o'ch nequellconas añ carta. O'ch nequellconañ ãa ñeññeþ e'ñe noçhesha' nepeneþ, ãa ñeññeþ o'acrerr Yompor. O'ch nequellconañ ñaãa ora pechoyoreshohuen ñeññ e'ñe pachor pepene'. Napa' e'ñe po'ñoçh atarr nemorrentensa, ama e'ñe naptã nemorrentenso, elloña po'potantañeçhno ñeññ o' enterran ñeññ e'ñe po'ñoçh Yompor po'ñoñ, ñetpa'çho'ña e'ñe morrentuenset.

² Tarro'marña sapa' atarr yemorrentensa atto yapa' o' e'ñe çherrnaya ya yeyoçhro ñeññ e'ñe po'ñoçh Yompor po'ñoñ. Ñeññtpa' allach e'ñe a'puena yeyoçhro errponañohuen.

³ E'ñe nehuomícha'teñoñes sa napa' o'ch notas: Yomporepa'ch sebensare'tamþene' ñeññara Parets epuet Puechemer Jesucristo ñeññ Yepartseshar yepen. Ñetepa'chña semuerenaya attochña sapa' e'ñeçh cohuen socshena seyoçhro. Ñeññtpa' añecop attochña sapa' señoñterñañ ñeññ e'ñe po'ñoçh Yompor po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notañ, ãa ñeññeþ e'ñe noçhesha' nepeneþ na atto nentennaþ puesheña'tets ñeññ pechoyoresha' yepen, ñetpa' çhocma e'ñe cohuen coþape'cheññañet Yompor Parets po'ñoñ ñeññ e'ñe po'ñoçh atet oteneý, napa' ñeññña atarr nocshatene'.

⁵ O'ch noçheshacha' neyerpataþa, allo'nepa'ch amorrentanna'tpo' sentannena allohuenes. Ñeññ atet noteneþ arr nequellcoþpa' ñeññtpa' ama añeyaye ñoñets ñeññ ama se'mare. Ama't allempoteñ e'ñe errete' same'ñerrapa' allempoteñ se'muerrña ñeññ ñoñets.

⁶ Ñerra'm yemneñ yemorrentanna'tapa' añcha'ña atet yeþohuerra ñeññ atet oteneý Yompor. Ñerra'm añ yemneñ o'ch e'ñe atet yeþohuerra ñeññ atet oteneý Yomporpa' çhochña e'ñe cohuen yemorrentannerra allohueney. Ñeññtpa' e'ñe ahuañoteñ atet serrpare'tatyesasete'ñ.

Atet pena ashcañnesha' ñeññ çhocma e'moñe'tene' Cristo

⁷ Ñeñto'marña te'pa' atet notenes tarro'mar ñeñt shequëne' acheñpa' o' epa'hua añ patsro. Shonte'ch ñeñtcha' shequëne' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñtña po'ñoçh ashcaña ñeñtña e'moñe'tene' Cristo.

⁸ Sapa' e'ñech señota allochñapa' amach shecaso. Ñerra'm shecas allempopa' e'ñeñe' orrena setorrerra Yomporecop. Añcha'ña setorrrena attochña sapa' e'ñech sagaphuerr ora allpon ñeñt alloch tsa'tuerrsa ña.

⁹ Ñerra'm erra'tsencha' ama attecmaye' yeçhatatso ñeñt atet yeçhateney Cristo, ñerra'm çha a'po'poñeteññañ po'ñoñ, ñeñt atet petsapa' amach Yomporeye' yemteno. Añcha'ña erra'tseneyte' allo'na cotene' Cristo po'ñoñ yapa' e'ñe po'ñoçh yeyemteña Yompor Parets e'ñe Puechemere'na.

¹⁰ Ñerra'm esesha'ch huapatsa sesho ñapa' atetcha' otos ñapa'cho' año' yeçhaten Yompor po'ñoñ tarraña ñapa' ñerra'm ama atteye' yeçhateno atet yeçhaten Cristopa' ñehua, amach sagapatsche sepaçllo. Ama't sehuomñcha'teñoçapa' amach sotatsche, "Yompore't pa'natenaya."

¹¹ Amach sehuomñcha'tatsche tarro'mar ñerra'm sehuomñcha'teñ, sapa' ñeñtate' seyçhaprech ñeñt ama po'ñoçhoyaye.

Atto so'terranet po'cartot

¹² Shontemeñ po'poñeçhno ñeñtcha' notaseñ tarraña ama nemno o'ch e'ñe notuas arr necartot. Tarro'mar napa' neseçhena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

¹³ Añ pemo'nerr puechoyoresha'pa' ñetpa' huomñcha'tenpet ñamet arr necartot. Ñetpa'cho'ña ñeñtet o' acerrranet Yompor. Te'pa' ñeñtach notas, Yomporepa'ch sa'nataya. Ñeñtpa' attetepa'ch Nompore. Allohua.

Juan

AÑ POMA'PAÑ SAN JUAN PO' CARTA 3 SAN JUAN

Atto Juanpa' eñnoten Gayopa' e'ñe cohuen ame'ñena

¹ O'ch masheñe Gayo nequellconañ añ carta, napa' na ñeñten pompor pen allohuen ñeñt ame'ñenaya Yompor. O'ch notañ, napa' e'ñe po'ñoçh atarr nemuerenpa.

² Ñehua, masheñe çhocma nema'yochampenpa allochñapa' Yomporpa' e'ñech a'natenpa. E'ñepa'ch cohuen pehuomçhena, tarro'mar napa' neñoteneñ e'ñe pecamquëñoïpa' e'ñe cohuen poçtape'chen Yomporcop.

³ O'ch notañ, napa' atarr nocsha allempo huerra masheñnesha' peshot. Ñetpa' atet serrpare'tatuerrnet papa' e'ño' po'ñoçh cohuen pame'ñena, e'ño' cohuen poçtape'cheññañ Yompor po'ñoñ ñeñt e'ñe po'ñoçh atet oteneý.

⁴ Allempo ne'mare'tas atto sapa' e'ñe cohuen soçtape'chen ñeñt e'ñe po'ñoçh atet oteneý Yompor po'ñoñ, napa' ñeññañ atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrrate' nechemeres ñeñto'marña napa' atarr nocshensa.

⁵ Ñehua, masheñe o'ch notañ, papa' e'ñe poçte' atet pepena ñeñt atto paguëñ e'ñe cohuen pepaclo masheñnesha' ñeñt huapyetsa po'poñ anetsot.

⁶ Ahuaña allempo yapçhena allohueneý ñeñteý ame'ñetsa, ñetñapa' atet serrpare'tatuerryet atto papa' e'ñe cohuen pemuerapanet. Ñaña o'ch notañ, çhocmach peyenpuenanet, papanetcha' ñeñt palltenet attoch anerret Yompor po'ñoñ po'poñ anetso. Ñerra'm atet pepenapa' ñeñtpa' e'ñech poçte' enteneñ Yompor tarro'mar ñetpa' Yompor sherbenet.

⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso.

⁸ Ñeñto'marña yapa' e'ñe poçte' o'ch es yapapanet tarro'mar ñeñtpa' attoña yetorrapretenanetña Yompor po'ñoñ.

Atto Diótrfespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all pa'netsro. O' notuanet ora allpon atet notuap arr necartot, tarraña Diótrfespa' çha achñare'tey. Ñapa' e'ñe pommo'cheñot e'ñe ñañeñapa'

aña muenen o'ch pomnaren p̄a'yenan acheñenesha' ñeñt̄ o' ame'ñerrana Yompor, ñeñt̄o'marña ama e'mñnotenye.

¹⁰ Ñeñt̄o'marña esempoch nečhap peshopa' o'ch neyerpatosanet ñeñt̄ atet̄ pena Diótrefes. Ñapa' čhocma toma'tam̄peney at̄tach eñosatse'tyen yocop. Ama ñeñtayaya atet̄ peno, elloña ama aguēnana masheñneshačhno ñeñt̄ anene' Yompor po'ñoñ. Ama aguēnaneto ñaña ama muenatenano acheñenesha' o'ch aguēñet̄ ñamet masheñneshačhno. Ñerra'm esesha'ña aguēnahueta'p̄ ñaña' o'chčo' muevo'terranet̄ arro't all sapčhena.

¹¹ Ñehua, masheñe p̄apa' amach peyčhapretatsto ñeñt̄ atet̄ pentapreten ñeñt̄ ama pocteyaye. Papa' añcha'ña peyčha' ñeñt̄ pentapreten atto e'ñe pocte' es p̄a'yenet. Ñeñt̄o'marña atet̄ noteneṣ tarro'mar erra'tsen ñeñt̄ e'ñe pocte' es petspa' ñeñt̄ca'yeña Yompor pueyochresha'; ñeñt̄ña ama pocteye' es p̄a'yetso ñeñt̄ña ama't mameshapa' ama eñnotenanoña Yompor.

Atto e'ñe cohuen orrtaten Demetrio

¹² Ñehua, o'ch notap̄ ñaña po'psheññecop ñeñt̄pa' añ pa'so'cheñ Demetrio. Ñaña po'ñočhpa' e'ñe cohuen enteñ allohuen acheñenesha'. Ñapa' e'ñe atet̄ pena atet̄ oten Yompor po'ñoñ ñeñt̄ e'ñe po'ñočh cohuen. Ñeñt̄o'marña yapa'čo'ña yeñoteñ ñapa' e'ñe cohuen acheñer. Ñehua, p̄apa' e'ñe peñoteny ñerra'm erroten yoten, ñeñt̄pa' e'ñech po'ñočh atet̄.

¹³ Shontemeñ ñeñt̄cha' notapeñpa' tarraña amach e'ñe notuape añ necartoť.

¹⁴ Tarro'mar napa' atarr nemneñ ahuenepoña nečhap pesho. Ñerra'm esempoch nečhappa' allempochña e'ñe yeser-rpare'tatanna'ta parro.

¹⁵ Ñeñt̄ arro'tsa'yen masheñnesha' ñetpa'čo'ña huom̄cha'tenpet ñeñt̄ara añ necartoť. Pañapa' o'ch pehuom̄cha'tyesanet e'ñe puesheña'ttsoema masheñnesha' ñeñt̄ parro'tseneṣ. Te'pa' ñeñt̄ach notap̄ masheñe, Yomporepa'chña p̄a'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yompor

¹ Masheñneshacha' ñaña nochaneshacha', allohuenes ñeñtes o' hua'ñerres Yompor Parets attoch pueyochresha' perres, ñeñtes o' sa'cohuentataretterra Partsocop, ñeñtes e'ñe cohuanpen Yompor e'ñe separrocmateñoť Jesucristo. Ñeñto'marña napa' nequellquënnas añ carta na Judason ñeñten torretsa Jesucristocop.

² E'ñe nehuomicha'teñoťes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyochro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheñneshacha' ñaña nochaneshacha' napa' atarr nemneñ o'te' nequellconas attoch neñotatas ñeñt e'ñe errotenotcha'ña a'qeshpataretey e'ñe allohueney ñeñtey ame'ñenaya Jesucristo. Tarraña te'pa' añ nenten ñeñt atarr paltetsa o'ch notas, nanquëpa'ch sema'yočhra añ ñeñt atto yame'ñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yame'ñeña Jesucristo.

⁴ Añecopña notenes tarro'mar chocma orretyena acheñenesha' ñeñt ashcañtetsa ñeñt ama Yomporeye' po'ñoñ cotape'cheneto. Ñet pueshquëñoťespa' ñato'rraña čhate' a'po'poñeternayet ñeñt atto po'ñočh yame'ñerrñaña Yompor po'ñoñ. Ñetpa' atetcha' otyeset, e'ñeca'ye pocte' o'ch sosya'tsañečhna yeychen tarro'mar Yomporpa' chocma peretnened, ñapa' atarr amueraña ñeñto'mar amach coñchaterrye. Ñetpa' po'ñočh ama pamo'mtayeye' peñeto Yompor ñeñt ñapueť Yamo'mte' yepen ya. Ñaña ñetpa' ama po'partseshareye' peñetoña Jesucristo. Tarraña sapa' señoche'pa'ch e'ñe ahuatoteñ anuaretta ñeñt atet petsapa' ñeñtña o'patatenetña coñcheñets.

⁵ Ñehua, sapa' po'ñočh e'ñe señoťeñ ñeñt atet pa' ahuat, tarraña te'pa' o'ch alla neyerpaterrsa atto Yomporpa' čha coñchatuerran ñeñt alla quečhpuerre' ñeñt e'ñe atet oteney Yompor. Ñeñtpa' atet pa' allempo a'qeshpaterran israelnesha' allempo erraneta' Egiptot all atarr

amuerochtatarettete't. Tarraña ama't a'queshp̄aterranetañ allempto, elloña tsapatonetpa' o' alla a'cllatuerran allohuen ñeñt̄ ama cohuenaye' ame'ñaye'te. E'ñech attecma perran allohuen ama't te' ñeñt̄ ama ame'ñetso.

⁶ Te'pa' o'ch alla neyerpaterr̄serr po'poñ ñeñt̄ atet p̄a ñaña patanta'tets mellañoñeñnesha'. Ñetpa' anaretetañ ñetcha' sherbenet Yompor, tarraña ama't atet anaretetañpa' ñetña ellopa' o' a'ypo'ña'nmuert pue'ntañ e'ñe patpare'teñoñet Yompor. Ñeñto'marña Yomporpa' alla huancanet cadeno ñeñt̄ ama apyapahuoyaye ama't errponaña alla huapore'tanet nanac checmeto. Ñetña'pa' alletach tarrempohua esempoch melapoterra allempochña mueñerranet ñaña coñcha'puetso.

⁷ Te'pa' o'ch alla neyerpaterr̄serr ñaña ñeñt̄ atet pe't sodomomarnesha' ñaña gomorro'marnesha' ñaña allohuen ñeñt̄ allampaño'marnesha' all. Ñetpa' e'ñe atet pete't atet p̄a patantarr mellañoñeñnesha' atto nanac ye'chcatenet ñeñt̄ nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñt̄pa' amaca'ye atteye' anareteye. Ñeñto'marña Yompor allpa' attoña coñchatanet o' etomam̄psanet attoch e'ñe a'poyatuerranet tso' ñeñt̄ ama emaya'pahuoyaye. Ñeñto'marña yeñoteñ allohueney eñall coñcheñets ñeñt̄ ama ahuañaño.

⁸ E'ñe attecma p̄atse'tyena ñaña ashcañnesha' ñeñt̄ orreyetsa te'. Ñaña ñetpa' po'poñonta es cotape'chyenet ñeñt̄ ama po'ño'ch atteyaye. Attoña ñetpa' a'sosyatenet po'chets e'ñe ñañeñeta. Ñeñto'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeñt̄ ahuamencatetyetsapa'cho'ña e'ñe achm̄are'tueñet.

⁹ Tarraña ama achm̄are'tpahuoyaye ama't Yepartseshar ama't ñaña allohuen ñeñt̄ ahuamencatetyetsa. Ñehua, ama't Miguel ñeñt̄ pa'm̄cha'tareter pen mellañoñeñnesha' ñapa' ama achm̄are'tapanoña oneñet̄. Allempo rroma Moisés oneñet̄ña'pa' huapa, ñapa' añ atarr mueneñ o'ch enana' arromñat, tarraña Miguelña'pa' ama muenache o'ch aner. Ama't muene' es otnare'tanna'tetañpa' Miguelña'pa' amaca'ye achm̄are'tanoña oneñet̄. Ñeñt̄pa' atta och: "Ñehua, ñeñt̄ atet pepena te' Yomporpa' ñach p̄otteñe'che'."

¹⁰ Tarraña ñeñt̄ña ashcañnesha' ñeñt̄ orreyetsa te'pa' ñetña'pa' chocma achm̄are'teñet ama't ñeñt̄ atarr ahuamencatesha' tarro'mar ñetpa' ama eñoteññañeto po'huamenc. Añach e'ñe paterr̄ eñotenet ñeñt̄ e'ñe patso'marecpa. Ñetpa' e'ñe atet penet ñerra'mrrate' berr ñeñt̄ añach p̄a'yen ñeñt̄ atet muenatyenanet po'chets, ama

es cotape'chpenayeña o'ch eñotet erra'tsente'ña ñeñt' po'ñoçh cohuentetsa. Ñeñto'marña ñetpa' a'chencataterretcha' e'ñe ñañeñeta.

¹¹ Atarr yoroçheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenquerretcha' tarro'mar e'ñe atet penet ñeñt' atet pe't Coré ñeñt' amsarettatsa ahuat e'ñe ña patpare'teñoç.

¹² Ñeñtña ashcañnesha'pa' sapa' ñeñtña sepencna'ntatene' allempo sapçhena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teñoç, tarraña ñetpa' attach nanac rratse'tyenet amach ayetñaateneto amach cohua'peñetoña ñaña po'psheñeñ ñeñt' cheporretsa ñeñt' muenets o'ch rra' ñaña. Ñetpa' e'ñe atet penetañ ñerra'mrrate' ñeñt' cohuanpenayeñ carrnero ñeñt'cha' rratenayeñ tarraña amachña carrneroye'ña rrateno, ñeñtapa' ñañeñetach atarr rretset. Ñetpa' ama es sherbeneto e'ñe atta penet atet ñerra'mrrate' os ñeñt' ama huatetso attach matateñ mōrr. Ñaña e'ñe attet ñerra'mrrate' narmetsoch ñeñt' ama ame'tño, ama'tcha' çhen pueme'teñporopa' amach me'teno. Ñaña ñeñtña narmetsocherpa' e'ñech atet pena ñerra'mrrate' rromuech o'ch ya'mare ora puerçhohuenpa' o'ch e'ñe puetsohua o'ch huañ. Ñeñtña ama't mameshapa' amach es sherberrye.

¹³ Amach pueñmañeshoñeye' es orrtatyenet e'ñech pommo'cheñoñeta es orrtatyenet. E'ñe atet penet ñerra'mrrate' oñ apelleche' puemo'yer. Ama't mameshapa' amach muechecheno. Ñeñtña emo'ypa' çhach huapore'tenan sosyare' topña'so all pa'so'ten. Ñeñtapa' e'ñe atet penaña ashcañnesha' amach pasayaya orrtatenetoña apencoçhen. Ñetpa' e'ñe attet ñerra'mrrate' shepraño' ñeñt' yenten o'ch shora'nom o'ch ahuo' patso ñeñtapa' ama es sherbeno. Yomporpa' o'patenanet o'ch mueñanet coñcha'puetso all atarr nanac checmete', alloña ñetpa' amach cha'nerreto ama't errponaña.

¹⁴ Ñaña te'pa' o'ch notas, ahuatpa' eñall puesheñarr yacma añ pa'so'cheñ Enoc ñeñt' Adán po'mñreneñ po'cançhroñoñhua. Ñaña'pa' ñeñt' a'mñtaye't Yompor po'ñoñ. Ñapa' eñotatan acheñenesha' atetcha' a'paretterra ama't ñeñt' ashcañnesha'. Ñocpueta'ñaña atet ote't: "Huerrach Partsesha' e'ñe puey-ochreshaçhnohuen ñeñt' nanac po'nnacaren patsopueñ.

15 Huerrach allochñapa' o'ch entuerran allohuen acheñenesha' ñato' cohuenette' ñato' amate' cohuenayayeto. Allohuen ñeñtcha' ama cohuenaye' entuerro Yompor, ñetñapa' amñareñterretcha' coñcheñtso. Attochña tsa'tatuerrana allohuen ochñañenesha' ora allpon p̄atse'tyesete't ñeñt ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachñare'teño'tet." Arrpa' allohua huañ ñeñt atet eñose't Enoc ahuat.

16 Ñaña ñeñt ashcañnesha'pa' atarrcha' tanmare'tyeñet, çhach po'poñ entuenet. Añach cotape'chyenet ñeñt muena'yenet e'ñe ñocueta. Cho'nate' ñetpa' atarrcha' ommoñatet. Ñaña ñerra'm esempo e'ñe cohuen eñosyenet acheñenesha'cop, ñetpa' añecpach e'ñe cohuen eñosyenet attoch es apuenanet acheñenesha'.

Atto pa'namen cotape'chatenan allohuen ñeñt ame'ñetsa

17 Tarraña sa masheñneshacha' ñaña noçhaneshacha' amachña ñeñta same'ñatsto. Sapa' añcha'ña seyepa ñeñt atet otyese't Yepartseshar Jesucristo puellsensarnesha'. Ñetpa' ahuatoteñ atet otete't ñeñtcha' orreyerrtsa tsapatonet.

18 Ñeñtapa' atet otyete't: "Allempoch mellapoterrmochapa' orrterrach ñeñtcha' achñare'terre' Parets. Añach yeçhenet ñeñt muenatse'tyenet ñañeñeta, ñeñtapa' ama't mameshapa' ama cohuenaye' enteñe Parets."

19 Ñeñt ashcañnesha'pa' çhocmach mueneñet o'ch ellopa'tetstateret ñeñt ame'ñenaya Yompor. Ñeñtara ashcañnesha'pa' añach cotape'chenet ñeñt atet muenatenanet ñet po'chets; ñetpa' ama chorrenaneto Parets Puecamquëñ.

20 Tarraña sa masheñneshacha' ñaña noçhaneshacha' e'ñe nemuereñotespa' o'ch notas, amach seyçhatstaneto ñeñt atet penet ñet. Sapa' e'ñechña same'ñeño't Yompor huomenquëpa'ch sepa' seyoçher tarro'mar ñeñt same'ñena sapa' e'ñeca'ye Partseshotecma huena. Chocmach sema'yochena. Sapa' amach sotaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt atarr ahuamencatesha'.

21 Atetcha' sepaña sa allochñapa' çhocmach seño'teñ atto atarr morrentenya Yompor, amach sepurratsterro. Socsheñnesha'pa' çhocmach seyemteña Yepartseshar Jesucristo; ña e'ñe puemuereño'tey esempohuañen a'queshpaterreycha', attochña yañapa' corretsayach yocsheñeshocmañen errponañohuen.

22 Ñehua, o'ch notas ñaña atetcha' sepe' po'potantañeçhno. Patanta'tets acheñpa' atarr echarr enteñet o'ch ame'ñerrñañet

Yompor po'ñoñ. Ñetpa' čhoch soctape'chaterranet e'ñe cohuen attoch ame'ñerret ñeñt e'ñe po'ñočh Yompor po'ñoñ,

23 atarr yoročheno'tsenet po'chñarotet. Ñeñto'marña sapa' o'ch sa'queshpataaterranet, ñeñtpa' e'ñech atet sepenanet ñerra'mrrate' chesha'toll ya'queshpaten o'ch yechter all poyapen pocoll. Po'potantañečhno ñeñt yečhene' atarr sosya'tsañečhno, ñetpa' čhochña semuerenanet tarraña ama'tcha' semuerenanetañpa' amach socshapretatstanetoña ñeñt atet yečhenet sosya'tsañ. Sapa' čhochña setsena'tapretanet ñeñt atet pa'yenet sosey, te't sa'naña a'shoratatenet.

E'ñe yame'ñeñot Yepartseshar Jesucristo aye'chočhtaterrapo'ch Yompor

24-25 Te'ña Yompor ñeñt e'ñe ñapueť partsotets, ñeñt allohuen es eñotyets, ñaña ñeñt Ya'queshpatañer yepen, ñaña'pa' atarr ahuamencatesha', ñachña ahuamencat sepene' allochña'pa' amach alla seshora'nerro. Attochña sapa' čchapatuerrescha' e'ñe ñesho all atarr cohuentena ña. E'ñech socsheñeshocmañen sečhačherr, amach eñalle ama't coñe'ta ñeñtcha' entapreterres ñeñt ama pocteye' enteno ña. Te'pa' e'ñe yame'ñeñot Yepartseshar Jesucristo aye'chočhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapueť Yepartseshar yepeñ, čhocmuepa'ch amčha'tareťtena e'ñe tayoteñ errponañohuen ñeñt atet pa'ahuatoteñ. Te'pa' ñeñtach notas, ñeñtpa' attetepa'ch Nompore. Allohua.

Judas

ATTO SAN JUANPA' EÑOTATER YOMPOR ÑEÑTCHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñt'pa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt' torra'yetsa Yomporecop. Ñeñtcha' eñotatanetpa' ñeñt'pa' ñeñtcha' ahuen atet perra ama't esempo. Atto eñotaten na, ñapa' ahuo't mueñon po'millañoñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt' torra'yetsa Yomporecop.

² Tarro'mar napa' nach eñotatahuet allohuenet ñeñt' e'ñe po'ñoçh ñeñt' atet eñotatenen Yompor po'ñoñ ñaña ora ñeñt' allpon eñotatenen Jesucristo ama't ñaña ñeñt' ora allpon gatyennet.

³ Atarrcha' cosheñtso'tsen ñeñtcha' lleyatene' acheñenesha' añ ñoñets ñeñt' huetsa Yomporeshot ñeñt' yeñotatene' ñeñtcha' atet perra esempo. Atarrcha' cosheñtso'tsa'yen ñaña allohuen ñeñtcha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt' aquellcaret arr. Tarro'mar o' çhampoch allemPOCH etsotuerra añ ñoñets.

Atto Juanpa' quellcan cançherr ñeñt' anetser all apçha'yena allohuen ñeñt' ame'ñenaya Cristo

⁴⁻⁵ Napa' o'ch nequellconas carta allohuenacpas ñeñtes apçha'yetsa e'ñe same'ñeñoç Yompor all ñeñt' po'poñe'ttsocma anets ñeñt' cançherr ñeñt' Asio'tsa'yen. E'ñe nehuomçha'teñoçespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt' Jesucristo. Ñetepa'chña sebensare'tam'pene'. Añ ñeñtara Yompor ñeñt' çhocma eñall, ama't ahuatoteñ çhocma eñall ñaña ñeñtara ñeñtcha' huerrtsa po'pocheño. Ñaña Puecamquëñ ñeñt'pa' ñeñtara cançherr ñeñt' sherba'yets e'ñe all po'conaño e'ñe po'poñe'ttsocma sherbenet. Ñaña ñeñtara Jesucristo ñeñt' atarr ayemuetpo' yenten ñeñt' ora allpon ñeñt' eñotateney; ñaña ñeñtara Jesucristo ñeñt' ñanom tanterrtsa puerromñoç ñapa' amach alla rromuerre'te. Attoña pa'mçha'tareter peñ allohuen ama't allohuen amçha'tareteçhno a'ne patsro. Ya'ye'choçhtatoñepa'ch ñeñtara Jesucristo ñeñt' atarr amorrentña, e'ñe ña

puemorrenteñoŕteypa' attoña rroma yocop allochñapa' attoch ashatareŕtta po'rras e'ñe yocop allochñapa' attoch e'ñe e'sshouareŕterra yo'chñar.

6 Ñaŕna ñapa' attoña e'ñe cohuen aguëney attochña ya'micha'tareŕtapretera attochña yesherbapreŕreñañ Pompore ñeñŕ atarr Parets, attey ñerra'mrrate' ñeñŕ corneshatets Partocop. A'cohuentaterrapo'ch Jesucristo, añcha'tareŕtepa'ch tayoteñ ama't errponohuañen. Ñeñŕpa' atŕtepa'ch Yompore.

7 O'ch secueñ huerrach Cristo, oscha' a'suatamperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñŕ pata'te'pa' entuapueretcha' ñamet. Allempoña ñeñŕ shonte' pa'namen acheñenesha' ñeñŕ yeŕcha'yetsa arr patsropa' ya'na'tapueretcha' e'ñe puellquëñoŕtet. Ñeñŕpa' e'ñech atet perra.

8 Yompore ñeñŕ nanac Parets ñeñŕ Yepartseshar yepen ñapa' chocma eñall, ama't ahuaŕtoŕteñ chocma eñall, ñeñŕpa' ñeñŕtara ñeñŕtcha' huerrtsa po'pocheño. Ñapa' atetña ot: "Napa' e'ñe pa'motroŕteñ eñallen atten ñerra'mrrate' quellec A ñeñŕ pa'moter pen alfabeto. Allempoteñña napa' chocma eñallen esempohuañencha' huañerr ñeñŕ allpon eñall, napa' atten ñerra'mrrate' quellec Z ñeñŕ all puen alfabeto." Añpa' allohua ñeñŕ atet toma'ntatena Cristo.

Atto Cristopa' orrtana Juan e'ñe po'cohuentañoŕ

9 Te' napa' ñeñŕten sochetsa Juan o'ch alla noterrserre. Napa' ñeñŕten e'ñe semo'nasheñ seŕpohuenen sa. Napa' ñeñŕten semueroŕhtapreŕtenaya e'ñe yame'ñeñoŕ Jesús. Ñaŕna e'ñe yeyemteñoŕ ñapa' e'ñech acoŕpa es ya'huanten esheccha' ya'micha'tareŕtapretera. Ñehua, napa' o'ch neñotatas ñeñŕ atet nepena na arr. Ahuañmo'cha napa' e'ñe neserrpare'teñoŕ Yompore po'ñoñ ñeñŕ atet eñotatenen Yepartseshar Jesucristo, añña ñeñŕ ne'moñe'tene'pa' o' huapore'tenneta' arr atarr allapar all rroŕchpe'chañetollo ñeñŕ otenet Patmos.

10 Pamtarr allempo chapa'muen aña yetro allempo chocma yeyerpueña Yompore napa' neyerpueñoŕ ñapa' e'ñe machayota chorratna huomenc Yompore Puecamquëñ. Allempoñapa' machayota ne'm ñoñets huapa necha'ñoŕ. Atarr huomenc eñen atet ñerra'mrrate' poctor e'morrtsa huomenc. Ñeñŕpa' atet oten añ ñoñets:

11 –Napa' ñeñŕten ñanom eñallen, allempoteñña napa' chocma eñallen ama't esempohuañencha' huañerr ora allpon ñeñŕ eñall, napa' atten ñerra'mrrate' quellec A ñeñŕ ñanom huetsa alfabeto, arrohua all huañen alfabeto ñeñŕ yoten Z. Te' napa' o'ch notap ñeñŕ ora allpon ñeñŕtcha' negatyesaŕ añ

pocetsa o'ch pequellca'yes pepa'pillo allotpa' o'ch pemñe all anetso'chno ñeñt cancherr ñeñt ap'cha'yetsa all pa'namen anetso ñeñt ame'ñetsa. Ñeñt ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñaña Sardis, ñaña Filadelfia, allotpa' ñaña Laodicea. Ora añe'chno anetspa' ñeñt Asio'tsen.

12 Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allñapa' nent cancherr ñeñt all orratenet huerare allo 'choyo'tenet ñeñtpa' oro aye'chcataret.

13 E'ñe rro'cho ñeñt cancherr all orratenet huerare all orrtena puesheñarr yacma ñeñtpa' Jesucristo ñeñtara Ñeñt Acheñetosets. Ashtama't, pa'shtampa' e'ñe 'chen pa'tcohua. Achanaret, po'chanarpa' orotommuen ñeñt allo chanena puesomapo.

14 Poño't pue'chpa' e'ñe ora atarr huallama't atet ñerra'mrrate' carrnero pue'ch ñeñt e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt otenet nieve ñeñt atarr huallama't. Pa'clle'pa' atarr poptena atet ñerra'mrrate' tso' po'huorter nanac a'rrechatañ.

15 Pa'tacpa'cho'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten.

16 Pot po'cohuenro'tpa' orrenan cancherr ranto. Puen-amotpa'cho'ña all orrtena cochell ñeñt emoshen'to'mar et-sotañtare't. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

17 Allempo neñchpa' e'ñe neñcha'na'teño'tpa' nañapa' o' nerrmosa patso e'ñe pa'tco. Neyorño'tpa' ama nepelleno ama't mamesha, 'cha nottena ñerra'mrrate' 'cho nerromuen. Tarraña ña potot po'cohuenro't a'p'lla'n, oten:

—Amach pem'cha'tatsto, napa' ñeñten ñanom eñallen, allempoteñña napa' 'chocma eñallen ama't esempohuañencha' huañerr ora allpon ñeñt eñall.

18 Napa' ñeñten ama arromña'feshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahua'ta. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguërre' allohuen ñeñt rromuets.

19 Te' p'ocoppa' añ pocetsa o'ch pequellca'yes ora ñeñt allpon o' negatyese'p ñaña allpon ñeñtcha' negatyerrperr ñeñtcha' atet perrtsa esempohuañen.

20 Ñehua, te'pa' o'ch neñotata'p ñeñt atet toma'ntena añ cancherr ranto ñeñt penten e'ñe notot necohuenro't ñeñt ama eñotenaye' penteno. Ñeñt cancherr rantopa' añ toma'ntena

ñeñt cohuanĩpesyenahuet ora allohuen ñeñt name'ña'yenaya allemeñ ñeñt cančherr anetso ñeñt apčha'yetsa all. Ñaña ñeñt atet pent ñeñt ayečhcataret oroch all orratenet huerare, ñeñtpa' añ toma'ntena ora allpon ñeñt apčha'yetsa allemeñ anetso ñeñt cančherr ñeñt name'ña'yenaya.

2

Atto Juanpa' quellcan carta añecop ñeñt ame'ñetsa anetso Efeso

¹ Ñeñt neserrpare'tatene' ñapa' alla oterrerr, ñapa' atet oten:

—An poctetsa o'ch pequellca' carta añecop ñeñt cohuanĩpene' allohuen ñeñt ame'ñetsa all anetso Efeso, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrene' cančherr ranto e'ñe all pota po'cohuenrot, ñeñtara Cristo ñeñt chope'chets rrocho e'ñe allo'tsen ñeñt ayečhcataret oroch all orratenet huerare.

² Ñaña'apa' atet otenes: ‘Napa' neñotuennas ñeñt ora allpon atet sepa'yena all. Napa' e'ñe nentuennas ñeñt allpon nanac setorra'yena ñaña allpon ñeñt e'ñe cohuen acoḗa es sa'huanta'huanen. Ñaña napa' e'ñe nentuenes sapa' ama saguēñe ñeñt ama cohuenaye' es pa'yetso. Sapa' atto setpatyeñ ñeñt otetseñ ñetpa' allsensareteto' tarraña ñetpa' atta shecare'tenet. Attoña setpateño' o' señotanet ñetpa' atta shecare'tenset.

³ Ñaña napa' neñotuenes ñeñt allpon semueročhtena nocop ñaña atto e'ñe cohuen sa'huanta'huen mueročhteñets, ama semuenme'cheñe allo setorrena.

⁴ Tarraña ama't atteñpa' nentuennas paterr ñeñt ama cohuenaye' nentapretenso. Ñeñtpa' añ atto sapa' o'huañ e'ñe semorrentna ñeñt atet sepa' ahuañ allempo e'ñe errte' same'ñerrna.

⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñt atet sepa' allempo e'ñe ñenmañ same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratamĩperres ñeñt atma'ntataret socop ñeñtara ñeñt all orratenet huerare.

⁶ Tarraña ama't atteñpa' napa' añña e'ñe cohuen nentuenas atto sapa' ama pocteye' senteno ñeñt atet patse'tyen acheñenesha' ñeñt cotene' Nicolás poctapña. Napa'cho'ña ama pocteye' nenteno ñeñt atet patse'tyenet sosya'tsañ.

⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoť, ora allohuen ñeñt pame'ñeñoťet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerram̄perrayo, ñetñapa' naphuerranetcha' ñeñt no'patatenanet ñeñtcha' atarr yoma'huerret e'ñe poctacma Nomporešo, allpa' e'ñech cosheñtso'tsenet. Ñeñtña napa' o'ch not, napa' o'ch nemnaterranet attoch o'ch tsohmuerret añ tsach pue'mer alloch corra'huerret e'ñe poctacma amach alla rromuerrete'te ama't ahuata.' " Arrpa' allohua huañ atet ot efeso'marneshacop.

Atto Juanpa' quellcan carta añecop ñeñt ame'ñetsa anetso Esmirno

⁸ Allempoña ñeñt neserrpare'tatene' ñapa' alla oterrerr:
 –Te'pa' o'ch pequellquërrerr carta añecop ñeñt cohuañpene' ñeñt ame'ñetsa all anetso Esmirna, o'ch pōtanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ñanom eñall, allempoteñña ñapa' çhocma eñall ama't esempohuañencha' huañerr ora allpon ñeñt eñall. Jesucristo ñapa' ñeñt rromhuats tarraña te'pa' o' alla betterra.

⁹ Ña te'pa' atet otenes: 'Napa' neñotuennas ora allpon ñeñt atet sepa'yena. Neñotuennas ñaña atto atarr sa'mueroçhtatarettena, ñaña atto atarr huocchañes. Ñehua, ama't huocchañsoñpa' Yomporešoť shonte' esocmañen ñeñt sechyen. Ñaña ñeñt se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa' ama Yomporeye' pueyoçhresha' penahueto; ñetpa' aña pueyoçhresha' penahuet oneñeť ama't allohuenet.

¹⁰ Amach yore'tatstaso mueroçhteñets ñeñtcha' ahuen sehuapoya. Tarro'mar ñeñtcha' seyottam̄pse' patanta'ttsos, ñeñtpa' oneñeťeshoť huena añecopña attoch topatuas ñerra'm po'ñoçhte' same'ñena. Puesheña'ttsos mueroçhtatasetcha' e'ñe çharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñt no'patatensa alloch socrra'huerra e'ñe socsheñeshocmañen. Ñeñtpa' ñeñtara noten po'poñ ñoñtso naphuerrescha' seprenio ñeñtcha' socshatuerre' e'ñe poctacma.

¹¹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoť ora allohuen ñeñt pame'ñeñoťet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerram̄perrayo, ñetpa' ama't

puesheñarrofetapa' amach amñaretterreto coñcheñtso ama't ahuata. Ñetpa' amach alla rromuerreterro po'pocheño.' " Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene', ñapa' alla oterrerr:

—Te'pa' o'ch pequellquerrerr carta añecop ñeñt cohuanpene' ñeñt ame'ñetsa all anetso Pérgamo, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt orrtatene' cochell puenamot, po'cchellpa' ñeñt emoshemto'mar etsotañtareñ.

¹³ Ñapa' te'pa' otenes: 'Napa' neñotuennas ora allpon ñeñt atet sepa'yena. Napa' neñotenes all seyçhena ñeñtpa' all atarr añcha'noçhtena oneñet. Tarraña ama't atteñpa' sapa' ama sequeçhpueno atto same'ñenna, ñaña çhocma sa'meñen atto same'ñenna, ama't e'ñe allempo muetsennanet ñeñt name'ñenaya ñeñtara Antipas ñeñt çhocma neserrpare'tene' neñoñ sesho, allara ñeñt pa'netser peñ oneñet.

¹⁴ Tarraña ama't atteñpa' napa' nentuennas coñet ñeñt ama pocteye' nentapretenso ñeñt atet sepatse'tena. E'ñe all Pérgamo patanta'ttsos ama semno o'ch sequèchpa' ñeñt pueyçhateñ pe't atet yeçhate't Balaam ahuat. Balaam ahuatpa' atet cotape'chatane't Balac attoch shecare'tane't israelena'tarnesha' allochñapa' attoch ñetpa' o'ch patse'tyenet ñeñt ama pocteye' enteno Yompor. Ñeñt atet patse'tyenet ñeñtpa' atet pete't o'ch rrallme'chapretan po'poñ acheñ ñeñt po'yomporer pene' ñeñt ayeçhcatare't, ñerra'm esempo rrenet po'chets ñeñt muetsenet allo sherbeñet pueyèchcatar. Elloña allempo ñetpa' e'ñe pocshapreteño'fetpa' o'ch agapanna'tet ama't ñeñt ama puetaporeyaye, allñapa' o'ch cañoresha'tenet.

¹⁵ E'ñe attecma seshopa'çho'ña patanta'ttsos atarr ash-caretes ñeñtes puesheña'ttsos ñeñtes ama semno o'ch sequeçhpoñ Nicolás poctapña ñeñt atet yeçhatenes ñeñt ama pocteye' nenteno.

¹⁶ Tarraña napa' o'ch notas, sequèchpa' ñeñt añ cotapñatser, o'ch alla soctape'cherr e'ñe cohuen. Ñerra'm amach ello soctape'cherr cohuen, napa' e'ñe tayecma o'ch ahuen o'ch neçllarenaneta' nocchello't ñeñt nenamo'tsen.

¹⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëño't ora allohuen ñeñt pame'ñeño'tet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerrañperrayo ñetñapa'

napanetcha' maná ñeñtcha' pocrram̃ perret ñeñt ama entpahuesho. Ñaña o'ch napanet mapyetoll ñeñt atarr huallamemen allo aquellcarettena so'chñets e'ñe etserra. Ñeñtcha' agapue' ñeñt'pa' ñap̃ta eñotenan añ so'chñets ñeñt aquellcaret all.' ” Arrpa' allohua huañ atet ot pérgamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

¹⁸ Allempoña añ ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta ñaña añecop ñeñt cohuañpene' ñeñt ame'ñetsa all anetso Tiatira, o'ch p̃otanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñtara ñeñt pa'c̃lle'pa' atarr a'rrechatañ atet ñerra'mrrate' tso' po'huorter, ñaña ñeñtara pa'tacpa' atarr poptena atet ñerra'm aser ñeñt bronce ñeñt atarr cohuen poptetsa.

¹⁹ Ñapa' te'pa' atet otenes: 'Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyenpannena, ñaña atto e'ñe cohuen sa'huanta'huen ñeñt atarr echarr senten. Ñaña elloña allo'na sesen atet p̃a'nmue' ñeñt atarr cohuen enten Yompor.

²⁰ Tarraña ama't atteñpa' eñall paterr ñeñt ama pocteye' nentapretenso. Ñeñt'pa' atto sapa' semnateñ coyanesha' ñeñt sochetsa Jezabel atto ñapa' añ yeçhaten ñeñt ama cohue-naye' nenteno na. Ama't ñapa' oteneñ ño' a'm̃tene' Yompor po'ñoñ tarraña ama atteyaye, ñapa' at̃ta shecare'tenes ñeñtes torretsañ nocop. Ñaña ñapa' añ yeçhatenes ñeñt atto se-cañoresha'ten, ñapa' otenes ñeñt'pa' e'ñe pocte' enteñ Yompor. Ñaña añ yeçhatenes ñeñt atto serrapreten po'chets ñeñt muetsenet ayeçcataret̃ecop, ñapa' otenes ñeñt'pa'çho'ña e'ñe pocte' enteñ Yompor. Tarraña Yomporñapa' ama't mame-shapa' ama pocteye' enteñe.

²¹ Napa' at̃ta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' añ atarr cohuen enten atto cañoresha'ten.

²² Ñeñto'mar te' napa' o'ch nemnach o'ch atsna'ten attoch amach çha'nerro po'mayoť. Ñaña ñeñt epuet atet penet ñerra'm ama cotape'cherreto cohuen attoch queçpuenet ñeñt atet yeçhatenanet ña, ñetpa'çho'ña o'ch necoñchatanet nanac.

²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñoťet

apcha'yetsa allemeñ anetso o'ch eñochet ñeñt atetpa' ama ařapahuo. Napa' e'ñe nentuennas ama't ñeñt atet soctape'chen seyoçhro. Napa' ñeñtencha' saphuerre' allpon ñeñt poctetsa e'ñe puesheña'ttsocpas, ñeñt allpon atet seřa'yen.

²⁴ Tarraña po'potantañes ñeñtes tiatiro'marneshas sapa' ama socteññañe ñeñt atet yeçhaten coyanesha'. Ama't ñaña ñeñt otenet oneñet poctapña ñeñt ama eñotpahuoyaye, puesheña'ttsa e'ñe etsotene' — ñeñtpa'çho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten.

²⁵ Añña notenes, amach sequeçhpatsche ñeñt atto soctape'chen cohuen Yomporecop, ama't tayoteñ ñaña esempohuañen allempoch nohuerra.

²⁶⁻²⁷ Ñeñt metana'tue' allohuen pa'namen topateñtsoçhno, ñeñt ama nepuerramřperrayo, ñeñt allo'na sets řa'nmue' ñeñt pocte' nenten na, ñetpa' naphuerranetcha' attoch ańcha'taret entenanet allohuen pa'namen acheñenesha' ñeñt yeçha'yetsa añe patsro. Ñeñtpa' atet Nompor apuenen naña. Neyoroçhenñoch ańcha'noçhtapreterrnetcha'. E'ñe po'huamencotet ñerra'm ñet muenats atarrcha' mueroçhtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrate' ñeñt echene' po'carr asreř, ñerra'm allo aso'tet patsro'pa' çhach a'mllo'tstach e'ñe poctacma.

²⁸ Ñeñt metana'tue' allohuen pa'namen topateñtsoçhno elloña ñetpa' napanetcha' ranto ñeñt atarr ateshamerr.

²⁹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoť, ora allohuen ñeñt pame'ñeñoťet çhocma apcha'yenet allemeñ anetso'mar.' " Arrpa' allohua ñeñt atet ot tiatiro'marneshacop.

3

Atto Juanpa' quellcan carta añecop ñeñt ame'ñetsa anetso Sardiso

¹ Allempoña ñeñt neserrpare'tatene' ñapa' alla oterrerr: —Te'pa' o'ch pequellquerrerr carta añecop ñeñt cohuanřpene' ñeñt ame'ñetsa all anetso Sardis, o'ch řotanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt e'ñe chorratena Yompor Puecamquëñ cançherr ñeñtara cançherr ñeñt sherřa'yets. Ñetpa' po'poñe'ttsocma sherbenet. Ñaña ñeñtara Cristo ñeñt orrene' cançherr ranto. Ñapa' te'pa' atet otenes: 'Napa'

neñotuennas ora allpon ñeñt sepa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrrena Yomporecop. Tarraña ñeñtpa' ama atteye' sepeno čhaña sottena ñerra'mrrate' čho serromuen, amaña es sesherbenaña Yomporecop.

² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama setsotenoña ñeñt e'ñe pocte' enten Nompör. Te'pa' o'ch notas, e'ñechña señaota, o'ch alla setanterra Yomporecop.

³ Chocmachña seyerpueña ñeñt atto aserrpare'tataretes ahuañmo'choteñ. Amach sepsatsche añ ñoñets ñeñt same'ñataya. Ñeño'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuerrnasa atet ñerra'mrrate' eñetpa' amach señaoteñe esempopa' machayotach huaponasa.

⁴ Tarraña ama't atteñpa' all anetso Sardiso e'ñe puesheña'ttsaña ñeñt ama yečhenaye sosya'tsañ ñeñt ama pocteye' enteno Yompör. Ñetpa' atet atma'ntatarettenet ama't pa'shtamuetpa' ama a'sosyateñeto. Ñeño'mar ñetpa' e'ñe pocte' nentenanet ñaña attochña nemnaterranet o'ch yechope'cherr e'ñe parro tarro'mar ñet ñeñt neshtamtatenanetpa' ama a'sosyateñeto, e'ñe cohuenarer orrtenet e'ñe huallama'tareret.

⁵ Ñeñt metana'tue' allohuen pa'namen topateñets ñeñt ama nepuerranmperrayo, ñetpa' neshtamtaterranet shetamuets ñeñt atarr huallama't. Ñetpa' amach ne'sherraneto pa'so'cheñ all aquellcarettenet Yompör po'libro attochña ñetpa' corretsetach. Ñetñapa' nechme'taterranetcha' ñeñt na Nompör ñaña allohuen po'millañoñeñnashar.

⁶ Ñeñt e'mñotene' añ ñoñets čhapanetepa'ch pueyočhreto ñeñt atet neñotatenanet na Necamquëñoñ ora allohuen ñeñt pame'ñeñoñet čhocma apčha'yenet allemeñ anetso'mar.' " Arrpa' allohua ñeñt atet ot sardiso'marneshacop.

Atto Juanpa' quellcan carta añecop ñeñt ame'ñetsa anetso Filadelfio

⁷ Ñeñt neserrpare'tatene' ñapa' alla oterrner:

—Te'pa' o'ch pequellquërrer carta añecop ñeñt cohuanmpene' ñeñt ame'ñetsa all anetso Filadelfia, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt e'ñe Parets ñeñt e'ñe po'ñoč allohuen es oten. Ñeñtara Cristo ñeñt allsensareñ ñach amčha'taretttertsa e'ñe atet amčha'tarettet David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toranmpenanet attoch čhapanet

Yompor po'cohuenña ama't eseshapa' amach errotenoť alla epatare'terraneto. Ñaña ñerra'm ñach yottamperre' ama't eseshapa' amach errotenoť torampereto.

⁸ Cristopa' te'pa' atet otenes sa: 'Napa' e'ñe neñotuennas ñeñť atet cohuen es sepa'yen. Ama't ama tama ahuamencateso Yomporecop, tarraña ama't coñe'ta sehuamenc sepen chocma same'ñennana neñoñ ñaña chocma sa'meten atto same'ñenna ama sa'nasotenko. Neñto'mar napa' o'ch netoram̄psonas allcha' sa'potennan neñoñ, ñaña ama't eseshapa' amach errotenoť alla yottam̄perrnaso.

⁹ Ñaña añña ñeñť otetseñ ñetpa' judionesheto' — ñehua, ñetpa' ama Yomporeye' pueyochresha' penahueto tarro'mar ñetpa' añña pueyochresha' penahuet oneñeť, ñetpa' atta shecare'tenset. Tarraña ñetña te'pa' o'ch name'ñatanet allochñapa' o'ch chapanet pueyočhreto sapa' ñeñtes atarr nemorrentena. Neñto'marña ñetpa' o'ch huapuet sesho o'ch concorposet allo'tsenes.

¹⁰ Sapa' e'ñe cohuen acořa setsoton allpon neñoñ, ama sa'ypo'ñenko na, ñeñto'marña napa'cho'ña amach na'ypo'ñaso. O'ch necuam̄perres tarremphua allempoch mueročhteñsopoterra ñeñťcha' topaterre' ora allohuen acheneshesha' ñeñť yečha'yetsa añe patsro.

¹¹ O'ch e'ñe mamerrerra' o'ch nohuernasa. Ñeñť atto allpon same'ñena o'ch e'ñe señoťuanem amach sequečhpatsche. Allochñapa' ama't eseshapa' amach errotenoť puerratañpsaso ñeñť no'patatensa ñeñťcha' atarr socshaterre'.

¹² Ñeñť metana'tue' allohuen pa'namen topateñťsočhno ñeñť ama nepuerram̄perrayo ñetpa' amate' errotenoť ahua-pore'tareťterreto allot, ñetpa' e'ñe attet ñerra'mrrate' all orratenet pocoll ñeñť pa'paquell pen Nompor ñeñť e'ñe huomenc echarr apareť. Ama't eseshapa' amate' errotenoť huapore'che. Ñaña e'ñe ñesheto napa' o'ch nequellcoñ Nompor pa'so'cheñ, allotpa' o'ch nequellcoñ ñaña Nompor pa'netser e'ñe allara ñesheto, ñeñťara pa'netser ñeñť sochetsa Jerusaléñ, ñeñťcha' sohuerrtsa entoť e'ñe etserrare'. Allotpa' o'ch nequellca' ñaña neso'cheñ all e'ñe ñesheto ñeñť e'ñe etserrare' neso'cheñ.

¹³ Ñeñť e'mñotene' añ ñoñets chapanetepa'ch pueyočhreto ñeñť atet neñotatenanet na Necamquëñoť ora allohuen ñeñť pame'ñeñoťet apčha'yenet allemeñ anetso'mar.' " Arrpa' allohua ñeñť atet ot filadelfio'marneshacop.

Atto Juanpa' quellcan carta añecop ñeñť ame'ñetsa anetso Laodiceo

14 Ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñt cohuanmpene' ñeñt ame'ñetsa all anetso Laodicea, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pomporecop ñeñtpa' atetcha' perrnay, ñaña ñeñt allpon oten, ñeñtpa' e'ñe po'ñoñ atet, ñaña ñeñtara Cristo ñeñt ñanom eñall, allotña Pomporpa' yeñcatyesan allohuen ñeñt allpon eñall.

15-16 Cristoña te'pa' atet otenes: 'Napa' e'ñe neñotuennas ñeñt ora allpon atet sepa'yen. Tarraña sapa' seçllañoftetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllañoftetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate' oñ ñeñt atarr sose', ñaña ama atteyayso ñerra'mrrate' oñ ñeñt atarr atserrrasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt cha aya'pesatañtena. Ñerra'm yorppa' çhach ya'pesatey o'ch ya'tatstera. Ñeñto'marña sapa' e'ñe atet nentenes çhach nemneñ o'ch nehuapore'tamperres.

17 Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac atsena'taret, atarrcha' amuroçhtatarettena ñeñt e'ñe huocchañ ñaña aporo'yet attach muelle'mquën.

18 Ñeñto'marña na te'pa' o'ch noctape'chatterres sa o'ch notas sapa' ñeñt sepalltena. O'ch senamuen nesho ñeñt po'ñoñ nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñoñ sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayaña ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' sepa, o'ch serañta nesho shetamuets ñeñt atarr hual-lama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañtena ñaña quëllo'yeñtsopar alloch separterr seclle' allochñapa' attoch sechuerr o'ch senterra e'ñe cohuen.

19 Ñehua, allohuen ñeñt po'ñoñ atarr nemorrentenapa' çhocmach e'ñe cohuen noctape'chatterranet ñerra'm esempo

atpare'tennet. Ñaña erroteno allohuen ñeñt nemorrentena o'ch necoñchach mame', tarraña ñeñtpa' e'ñe ñocueta allochñapa' attoch o'ch alla cotape'cherret cohuen nocop, o'ch alla ame'ñernnet huomenc.

²⁰ Señohepa'ch ñeñtcha' atet netma'ntaterrsa. Napa' atetcha' nepena ñerra'mrrate' esesha' ñeñt chocma chore'tets yetarroť. Ñerra'm eseshas se'mapuerrnan neñoñ ñaña ñerra'm setorampenen, nañapa' o'ch nebe'tos all, allñapa' o'ch yerrallme'chen parro.

²¹ Ñeñt metana'tue' allohuen pa'namen topateñtsočno ñeñt ama nepuerrampperraye, ñetñapa' nemnatanetcha' o'ch añcha'tarettapreterrnet e'ñe all neconaño. E'ñech atet ñerra'mrrate' na, napa' e'ñe nemtana'tua allohuen pa'namen topateñtsočno. Ñeño'marña napa' na'mcha'tarettapreteña Nompör e'ñe all po'conaño.

²² Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet apçha'yenet allemeñ anetso'mar.' " Arrpa' allohua ñeñt atet ot laodiceo'marneshacop.

4

Atto Juanpa' entan Yompör po'conaño e'ñe alla pue'ntañö

¹ Allempoñapa' alla gatyerrnerr po'poñ. Necuerrerr, allñapa' nentos yetarr atoraret allcha' nebe'tos o'ch neçhap ento. Alla ne'muerrerr ñoñets ñeñt atet e'morrtetsa ñorra' atarr huomenc atet ñerra'mrrate' poctor atarr huomenc eñen. Ñeñtña ñoñetspa' atet oten:

—Apon arr, o'ch pebe'tosampesna o'ch negatyesañ allohuen ñeñtcha' atet perrtsa tsapatonet.

² Allempoña Yompör Puecamquëñ e'ñe chorrenna, atto neçhap ento all nentos puesheñarr alla anen po'conaño.

³ Ñeñt anets all po'conañoapa' atarr nanac cohuen aspanamcoquëno poptamco'tena atet ñerra'mrrate' mapue' ñeñt atarr cohuen poptetsa ñeñt otenet jaspe. Ellonetpa' po'poñoñto atarr nanac cohuen tsamcoquëno poptamco'tena atet ñerra'mrrate' mapue' ñeñt otenet cornalina. Ñaña allo arca'tampenapa' ñeñtpa'çho'ña atet ñerra'mrrate' ayon tarraña ñeñtpa' atarr nanac cohuen aspano shemashro poptena; e'ñe atet poptena ñerra'mrrate' mapue' ñeñt otenet esmeralda.

⁴ Ñaña topño'mar ñeñt rroçhtamipene' all shonte' po'poñ conañeçhno. Ñeñt conañeçhno topño'tsa'yen ñeñt rroçhtamipene' allo'tsen epoch çharra' puechena pa'tats. Ñaña ñeñt anorrçhets allohuen conañeçhno ñeñtpa'çho'ña

allo'tsen epoch çharrasheña puechena pa'tats ñeñt sherbene' Yompor all pue'ntaño. Coñneshareret pa'shtam atarr huallama'tarer, po'choyo'met oro ayeçhcataret ñeñt choyo'mtenet.

⁵ E'ñe rroçh conaño'pa' allot huena meratste', allot huena ñaña tatste'. Allpa' atarr huomenc ma'moreten. E'ñe alla allame'tets po'conaño ñehuapo't allot'sen cançherr huerare ñeñt huoretyets all. Ñeñt'pa' ñeñt toma'ntenaya Yompor Puecamquëñ ñeñt cançherr ñeñt sherba'yets e'ñe po'poñe'ttsoema.

⁶ E'ñe alla a'yenet po'conaño't all orrtena erracmañen atet ñerra'mrrate' ñeñt añecmuen rerpat ñeñt e'ñe orrtatuene' ora ñeñt allpon eñall all.

Allo'tsen po'conañ e'ñe pa'tatsshent'o'marot all tomçhen pa'tats ñeñt berrma'ttetsa. Ñeñt'ña'pa' shonte' pa'c'llo'yeçhno emota cohua'yen. Pa'chco'tago'tpa'cho' shonte' pa'c'le' allot cohuen.

⁷ Ñeñt ñanom ñeñt berrma'ttetsa all, ñeñt'pa' e'ñe atet ñerra'mrrate' ma'ñor. Po'poñ'pa' allot'sen ñaña atet ñerra'mrrate' toro, po'poñ pa'tsa'pot pa'c'lloyo'tpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeñt otenet contor ñerra'm esempo anena.

⁸ Ñeñt pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttsocmuet pa'pue'penet. Pa'pa'yo't eno'tpa' e'ñe ac'llo'yetarerochet, puelleca'no'tpa'cho'ña ac'llo'yetareret emoto'mar allot cohua'yenet. E'ñe ellapenete't arepenete't all açhoteñet Yompor, ama't mameshapa' ama ameseneto atfo açhoteñet Yompor. Ñeñt'pa' atet otenet:

Parets, parets, parets ñeñt'ara Yompor ñeñt atarr ahuamenca't nanac ñeñt Yepartseshar yepen ñeñt çhocma eñall. Ama't ahuatoteñ eñall ñaña ñeñt'ara ñeñt'cha' ello huer'tsa po'pocheño.

⁹ Ñaña ñeñt berrma'ttetsa allpa' cohuentateññañet Yompor ñeñt anets all po'conaño, atarr añcha'na'tpo' enteñet, ñaña çhocma puema'yocheño'tet parasyoso'teñet Parets ñeñt ama arromña'teshayaye ama't ahuata.

¹⁰ Ñetpa' ñerra'm esempo aye'choçhtateñet Parets, añña ñeñt epoch çharrasheña ñeñt puechetsa pa'tats ñeñt sherbene' Yompor allpa' ñetpa'cho'ña o'chçho' concorpa'rretenet e'ñe all ñesho, o'chçho' ma'yocheñet ñamet Yompor ñeñt ama arromña'teshayaye ama't errponaña. Allotpa' o'ch a'meyet po'choyo'm o'chçho' net e'ñe Yomproshonet ñeñt anets all

po'conaño. O'chcho' aye'chochtateñet Yompor ñamet, ñeñt'pa' atet otenet:

¹¹ Yompore, ñeñteḡ Yepartseshareḡ, ñeñteḡ nanac Partsoḡ, ya añ poctetsa o'ch yecohuentatonaḡ ñeñteḡ añcha'na'tpahueḡ ñaḡa atarr ahua mencateḡ. Tarro'mar ḡa yeḡhcatyene' ora allpon ñeñt' eñall, e'ñe ḡa pemneññoḡ ahuo't eñalletyese, e'ñe ḡa peñoñoḡ ahuo't yeḡhca'yena ñeñt' allpon eñall.

5

Atto Juanpa' entan Cristo ñeñt' atma'ntatareḡ Carrnero, e'ñe ñapa'ta toran Yompor po'libro

¹ Allempoñapa' alla necuererr ñeñt' anets all po'conaño. Potot' po'cohuenrot'pa' all nent all orrenan libro apco'nottatareḡ, e'ñe emoto'mar aquellca'huaret o'ponot' ñaḡa enot'. Echenan canḡherr ñeñt' allo ayomrrareḡ atto e'ñe echarr aḡpareḡ.

² Ñaḡa all nent puesheñarr mellañoḡeñ ñeñt' atarr ahua mencat'. Ñaḡapa' rrana huomenc, ñeñt'pa' atet oten:

—Esha'huaca' e'ñe cohuenare' cotape'chetsña Yomporecop ñeñt'cha' tore' añ Yompor po'libro allo echarr aḡpareḡttena.

³ Tarraña ama't puesheñarrapa' ama eñalle ñeñt'cha' tore' Yompor po'libro. Ama't puesheñarra ñeñt' ento'tsen ñaḡa ama't ñeñt' patso'tsen ñaḡa ama't ñeñt' o'pono'tsen patso, ama eñalle ñeñt'cha' muenatet ñeñt'cha' tore' Yompor po'libro attoch eñorachet.

⁴ Napa' ñeñt'ña atarr neyarre' atto ama't puesheñarrapa' ama neñche ñeñt' e'ñe cohuenare' es cotape'chets Yomporecop ñeñt'cha' muenatet o'ch toran Yompor po'libro ñeñt'cha' eñorate'.

⁵ Allempoña ñeñt' epoch ḡharrasheña ñeñt' puechetsa pa'tats ñeñt' sherbene' Yompor, puesheñarrña'pa' oten:

—Amach peyahuatsto, tarro'mar eñall puesheñarr ñeñt' e'ñe pocte' ñeñt'cha' tore' Yompor po'libro ñeñt' canḡherr allo echarr aḡpareḡttena, tarro'mar ñapa' ñeñt' metana'tue' allohuen pa'namen topateñtsoḡhno, ñeñt'ña'pa' añepa't Cristo ñeñt'ara atma'ntatareḡ Ma'ñor. Ñeñt'pa' judámerena'tar ñeñt'ara David po'mreñeñ.

⁶ Necuererr, allña'pa' nent Cristo ñeñt' toma'ntenaya Carrnero. All ten e'ñe rroḡcho allo'tsa'yen Parets po'conañ ñaḡa añ pa'tatso'mar ñeñt' berrma'ttetsa ñaḡa e'ñe allo'tsa'yen ñeñt' sherbene' Yompor. E'ñe rroḡcho all ten Cristo ñeñt' atma'ntatareḡ Carrnero. Orrtena aḡet ñerra'mrrate' carrnero ñeñt' amsarettetsa ochñartsocop. Ñeñt' carrneropa' canḡherr po'ucor, echenan ñaḡa canḡherr pa'c'le'. Ñeñt' canḡherr pa'c'le'pa' ñeñt'pa' añ Yompor Puecamquēñ ñeñt'ara canḡherr

ñeñtcha' sherba'yesets e'ñe po'poñe'ttsocma ora erracmañen añe patsro allcha' amñareñtetyerret.

⁷ Allempoña añ Carrneropa' o' huapa o' çhap allo'tsen Yompor ñeñt anets all po'conaño. Ñañaapa' chetsosan Yompor po'libro ñeñt orren po'cohuenrot.

⁸ O' chetan libropa' allempoña añ ñeñt pa'tatso'mar berrma't ñaña ñeñt epoch çharrasheña ñeñt puechetsa pa'tats ñeñt sherbene' Yompor, allohuenetñaapa' concorpa'rrteñet Cristo ñeñt atma'ntataret Carrnero. Puesheña'ttsetpa' orrenet arpa ñaña pajo' ñeñt orotaten all anaret ñeñt atarr eñmosañtetsa Yomporecop. Ñehua, añ ñeñt eñmosañtetsa añ toma'ntena ñeñt atto ma'yochena ñeñt pueyochresha' pen Parets.

⁹ Añña ñeñt concorpa'rrtetsapa' ñetñaapa' morrechenet ñeñt etserra morreñets ñeñtapa' atet açhoteñet Cristo ñeñt atma'ntataret Carrnero:

Papa' e'ñe cohuenare' es pepa'yen ñeñto'mar e'ñe pocte' p'ach chete' Yompor po'libro, e'ñe pocte' p'ach tore' allo echarr a'parettena tarro'mar papa' pa' amsarettatsa, perrasoña papa' allo petsa'tuonaya yo'chñar allochñaapa' attoch e'ñe puechemer perrey Yompor ama't allohueney ñeñtey pa'namen acheñey, ama't erra'tsena mereñtsorey allot yehuena, ama't ñaña erra'tsena ñoñtsor allo yeñosyen e'ñe po'poñe'ttsocma, ama't ñaña pa'namenana'tarey allohuen errohuanen ñeñt e'ñe ya'netser ye'pa'yen.

¹⁰ Ñeñtey allohueneypa' pa' yemnatene' o'ch ya'ñcha'tarettapreta'pa' attochña yesherbapretene'p' Yompor ñeñt atarr Parets. Attoña yecorneshaten Partsocop. Ñaña attoch ya'ñcha'tarettterra añe patsro.

¹¹ Allempoña alla necuererr o' ne'muererr mellañoñeñnesha' atet eñosyenet. Shontet nanac che'muechenet all rroçhtañpeñet a'yohuen errañaren. Ñaña ñeñt berrma'ttetsa all ñaña ñeñt sherbene' Yompor ñeñt allohuenet ma'potanto'maretpa' ñeñt e'ñe rroçhtañpene' Yompor ñeñt anets all po'conaño.

¹² Ñeñt mellañoñeñnesha' ñetñaapa' e'morrtenet huomenc all açhoteñet Cristo ñeñt atma'ntataret Carrnero. Ñeñtapa' atet otenet:

Cristo ñeñt toma'ntenaya Carrnero ñeñt amsarettatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahuamencattena, agapanepa' shonte' esocmañen ñaña e'ñe pocte' eñotañtepa'ch, ñaña e'ñe pocte' partsotepa'ch, ñaña e'ñe pocte'

añcha'na'tpahuo tepa'ch. Ñaña e'ñe pocte' ya yecohuentateño't ya'ye'chochtatoñepa'ch.

13 Allempoña ne'muerrerr atet ama't allohuen ñeñt Yompor pueye'chcatar aye'chochtateññañet Yompor ama't ñeñt ento'tsa'yen ñaña ama't allohuen ñeñt patso'tsa'yen, ñaña allohuen ñeñt o'pono'tsen patso ñaña oño. Ama't e'ñe allohuen pueye'chcatar ñeñt allo'tsa'yen allohuenet aye'chochtateññañet Yompor, atet otenet:

Ya'ye'chochtatoñepa'ch Yompor ñeñt anets po'conañño ñaña Puechemer Cristo ñeñt atma'ntataret Carrnero. Añcha'na'tpahuepa'ch yenteñ, yecohuentatoñepa'ch tarro'mar ñetpa' atarr ahua mencatet tayoteñ ama't errponañohuen.

14 Ñaña ñeñt berrma'ttetsa pa'tatso'mar all ñetñapa' otenet:
—Ñeñtpa' attetepa'ch.

Ñaña añña ñeñt sherbene' Yompor ñeñt epoch charrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromñañeshayaye.

6

Atto Cristopa' toran ñeñt cancherr allo echarr aḡarettena Yompor po'libro

1 Allempoñapa' nent Cristo ñeñt toma'ntenaya Carrnero attoch ñach tore' ñeñt cancherr allo echarr aḡarettena Yompor po'libro. Allempoña ñapa' o' tore paterr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' cho tatstena. Ñeñtpa' atet oten:

—¡Aḡon, pecue'!

2 Naña necue'pa' nent paterr cahual atarr huallaḡnanen. Ñeñtña montenayapa' echenan paterr po'ca'not ñeñt orra'nen potot. Allñapa' apet paterr choyo'mets ñeñtcha' choyo'metnoma. Ñañaapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

3 Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorrerr. Ñeñtpa'cho'ña ñeñtara atet oterrerr:

—¡Aḡon, pecue'!

⁴ Allempoñapa' čha'nerrerr po'poñ cahuall, ñeñtñaapa' atarr tsaņnanen. Ñeñtña montenaya allñapa' apet paterr espada atarr allpocha'p. Ñañaapa' o' muenateñet o'ch quellaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yečhenet arr patsro.

⁵ Allempo torerranerr ñeñt puema'pañ allo ayomraret Yompor po'libro nañapa' alla ne'muererr ñeñt puema'pañ berrma'tpa' o' alla eñorererr. Ñeñtpa'čo'ña ñeñtara atet oterrerr:

—¡Aņon, pecue'!

Naña necuererrpa' nenterrerr po'poñ cahuall ñeñtñaapa' atarr quellueņnanen. Ñeñt montenayapa' orra'nenan paterr pesamets.

⁶ Allo'tsa'yen ñeñt berrma'ttetsapa' e'ñe all rročho'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Paterr kilo trigopa' nanquēpa'ch tsa'teterr ama't ñeñt paterr denario*, ñaña ma'pa kilo cebadapa' nanquēpa'ch tsa'terra. Tsa'terrepa'ch ñaña paterr denario. Tarraña olivose' ñaña vinospa' chocmuepa'ch eñall, amach seprratamņsatsetye.

⁷ Allempo torerranerr ñeñt puepa'tatseñ allo ayomraret Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorererr. Ñeñtpa'čo'ña ñeñtara atet oterrerr:

—¡Aņon, pecue'!

⁸ Naña necuererrpa' nenterrerr ñeñt paterr cahuall atarr shemashreņnaneno puerrama'ņnen. Ñeñt montenayapa' añ pa'so'cheñ Rromueñets. Ñeñt co'tene' chenta'pa' añ toma'ntena ñeñtcha' aguēne' allohuen ñeñtcha' rromuets. Ñeñtpa' aparet llesens añecop attoch a'cclatatan shonte' acheñenesha' arr patso. Ama't pasheņarr pats, allpon otenet un cuarto, allponcha' a'cclatatuerran acheñenesha'. Ñeñtpa' atetcha' a'cclatatanet, quellareñtsoterrcha', chaporrñatsoterrcha', atснаñtsoterrcha', orrterrach berr ñeñt atarr atsrre'mñañ ñeñt atarr bellac arr patsro.

⁹ Allempoñapa' o' torerranerr ñeñt pa'mnareñ allo ayomraret Yompor po'libro, naña necuererrpa' allñapa' nenterrerr altar ñeñt allecma a'crratete't ñeñt eñmosa'ttetsa Yomporecop. E'ñe all patso't altaro all nent shonte' camuecñetsočhno ñeñt amtsanatarettatse't all e'ñe pueserrpare'teño'fet Yompor po'ñoñ atto a'metete't ñaña atto ame'ñeñet Cristo.

* 6:6 Denariopa' quelle ñeñt allpon tsa'tenet pamtarr ñeñt taruasetts all pa'nyo.

10 Añña ñeñt camuecñetsochnopa' ñetñapa' rrannartenetpa' oteñet Yompor:

—Yompor pa atarr Partsoñ, atarr ayemuetpo' atet poteney. Esemphuachca' pecoñchatuerña acheñenesha' all patsro, esempohuachca' petsa'tateraña ñeñt acheñer yemtsanataye't ñeñt patso'tsen. Añpa' allohua atet ot camuecñetsnesha'.

11 Ñetña puesheña'ttsetpa' aparettenet pa'shtam atarr huallama'tarer. Ñaña ñetñapa' otarettet ato't e'ñe ameseta'. “O' mameshamã o'ch etsotua allpon po'potantañecop semo'nasheñ ñeñtcha' amtsanataretterrtserr ñeñtes e'ñe attecma sesherbeñ Cristo.”

12 Allempo torerranerr ñeñt po'pechapueñ allo ayomr-raret Yompor po'libro ñaña o' alla necuererrpa' nent ñaña cha puetalle'chena pats huomenc. Atsne'ñapa' o' checmet atet ñerra'mrrate' shetamuets ñeñt atarr quellue ñeñt chorrena ñeñt atarr llequëtsa. Arrorrñapa' o' cha tsama'tta atet ñerra'mrrate' errasats.

13 Rantochno ñaña ñeñt ento'tsa'yen allohuenpa' o'cha shorcha'tua o' cha'cha't patso. O'ch netma'ntacha atet ñerra'mrrate' parte ñeñt e'meret o'ch huomenquëshatpa' pue'merñapa' o'ch a'shore'tañpesue huomenquëshã, ama't atarr emeñ pue'mer.†

14 Enetpa'cho'ña o' e'ñe chenca'hua atet ñerra'm papell eparetpa' o'huañcha' orrta. Ama't ora allpon aspentarerpa'cho'ña o' e'ñe rrote'tyesuahua ñopa'tets. Ñaña ora allohuen oñechno ñeñt rrochpe'chañechno ñeñtpa'cho'ña o' e'ñe rrote'tyesuahua.

15 Allempoñapa' allohuen acheñenesha' ñeñt ye'cha'yetsa añe patsropa' o' e'ñe e'potrra'tuet arroroto'mar ñaña mapuetpono'mar ñeñt aspentarero'tsa'yen. Ama't allohuen añcha'taretnesha'chno o' e'ñe e'potrra'tuet, ñaña allohuen ñeñt atarr sherba'yets, ñaña ñeñt ec'llayoretechno, ñaña ñeñt pa'mcha'tareter pen solltar, ñaña ñeñt atarr ahuamencat entyetsa, ñaña ama't allohuen acheñ ñeñt ama esoye' enteneto ñeñt ataruasataret e'ñe atta, ama't ñaña allohuen ñeñt ama ataruasareteyaye ñeñt e'ñe cohueno'tsen, allohuenet e'ñe e'potrra'tuenet.

16 Allohuenetpa' chore'teñet aspenet ñaña mapueta'chno atet otenet:

—Te'ñapa' yeñgatañperrepa' attotcha' e'poterrey attoch amach enterrye Parets ñeñt anets all po'conañño allochñapa' amach erroteno't coñchaterrye Cristo ñeñt toma'ntenaya Carnero.

† 6:13 Ñehua, Juanpa' añ toma'ntatena higo ñeñt puenarem penet all pa'nyo.

17 Tarro'mar te'pa' o' chap añ yetro allempoch yoroçhterra allempoch atsa'tatare'tterra allohuen acheñenesha'. Ama't eseshapa' amach erroteno't ahuantofeto Yompor po'yoroçhenña.

7

Atto Israel po'mireneñ ñeñtcha' ayato'ma'tare'teyetsa

1 Allempoña napa' nent mellaño'teñnesha' pa'tatssheña. E'ñe allohuanen pats, ñeñt pa'tats po'to'pñaro'mar allña'pa' all tomyen puesheña'tets mellaño'teñ ñeñt pa'tatssheña. Ñeñt pa'tatssheña ñetña'pa' ñet epatare'tenet mōrr pa'tatssheño'marot allot huapyena mōrr. Allochña'pa' attoch amach atarr mōrrarsañpeno añ patser, ama't ñaña oñeçhno, ñaña ama't patrra tsachpa' amach mōrrarsañpeno.

2 Allempoña napa' o' alla nenterrerr po'psheñeñ mellaño'teñ, arr orrtena allot huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompor ñeñt ama arromñate'shayaye ama't ahuaata. Ñaña'pa' rrana huomencpa' otan mellaño'teñnesha' ñeñt pa'tatssheño'mar ñeñt añecop ahuaamencattenet attoch ñetcha' pomnaren pet pats ñaña oñeçhno.

3 Ñeñt'pa' atet otanet:

—Amach erro't se'patsto añ pats ama't oñ ama't tsach ato'tña yeyato'ma'tueya' allohuen ñeñt torra'yetsa Yomporcop.

4 Allempoña ne'muerrerr ñeñt atet oteñet ñeñt'cha' allpon ayato'ma'tare'ttatsa. Ciento cuarenta cuatro mil ñeñt'pa' allpon otenet. Ñeñt ciento cuarenta cuatro mil acheñenesha' ñetpa' e'ñe po'poñe'ttsoçmuet mereñtsoret. E'ñe ñeñta mereñtsoreçmuet ñeñt çharrasheña puechena epa ñeñt pa'tañ pene' Israel ñeñt corratse't ahuat.

5 Ñehua, pate'tets mereñtsorpa' allponsheña ñeñt'cha' ayato'ma'tare'ttatsa: Judána'tarpa' allo'tsencha' çharra' puechena epa mil acheñenesha'; Rubénna'tarpa'çho'ña allo'tsencha' çharra' puechena epa mil acheñenesha'; Gadna'tarpa'çho'ña allo'tsencha' çharra' puechena epa mil acheñenesha';

6 Aserna'tarpa'çho'ña allo'tsencha' çharra' puechena epa mil acheñenesha'; Neftalína'tarpa'çho'ña çharra' puechena epa mil acheñenesha'; Manasésna'tarpa'çho'ña çharra' puechena epa mil;

7 Simeónna'tarpa'çho'ña çharra' puechena epa mil; Levína'tarpa'çho'ña çharra' puechena epa mil; Isacarna'tarpa'çho'ña çharra' puechena epa mil;

8 Zabulónna'tarpa'cho'ña charra' puechena epa mil; Joséna'tarpa'cho'ña charra' puechena epa mil; Benjamínna'tarpa'cho'ña charra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

9 Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñt allpon allo'tsen. Shonte' pa'namen acheñenesha'. Ñeñtpa' pa'namen anetsot huacha'tyenet, shonte' pa'namen mereñtsoret ñeñt huachetsa all, shonte' pa'namen ñoñets e'ñe po'poñe'ttsoema eñosyenet. Ñetñapa' all tomchenet e'ñe ñehuapoñ allo'tsen Yompor po'conaño allo'tsen ñaña Cristo ñeñt toma'ntenaya Carrnero. Ñetpa' e'ñe huallama'tarerochet pa'shtam. Pototetñapa' añ orra'yenet atet ñerra'm shequëpan.

10 Allohuenetpa' rranenet, otenet:

Yompor ñeñt po'conaño'tsen ñapa' o' a'queshpaterrey epuet ñaña Puechemer ñeñt toma'ntenaya Carrnero.

11 Ñeñt berrma'ttetsa pa'tatso'mar ñaña ñeñt sherbene' Yompor all, ñaña allohuen mellañoñeñnesha' ñeñt tomchets a'yohuen erraparen, ñetña allohuenetpa' e'ñe rrochtam pesueñet Yompor ñeñt po'conaño'tsen. Ñeñt mellañoñeñnesha' all rrema'rrartenet Yompor po'conaño atet ma'yocheñet Yompor.

12 Ñeñtpa' atet aye'chochtateññañet Yompor, ñeñtpa' atet otenet:

Attetepa'ch yocop ya'ye'chochtatoñepa'ch, yeco-huentatoñepa'ch, amuepa'ch ahuañaño atto eñotañtena Yompor; yeparasyoso'chepa'ch, añcha'na'tpahuepa'ch yenteñ, amuepa'ch ahuañañaño ñeñt atto ahuamencattena Yompor; añcha'tarettepa'ch tayoteñ errponohuañen. Ñeñtpa' attetepa'ch.

13 Allempoña puesheñarr ñeñt sherbene' Yompor, ñañaapa' a'p'to'ten, atet oten:

—Papa' ¿ama't peñoteñeña esesha'chnote'ña ñeñt chorrenaya huallama'tarer, ñaña ama't peñoteñe erroñte'ña huaçhenet?

14 Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñañaapa' o' alla oterren:

—Añenesha' ñeñt chorrenaya huallama'tarer ñetña ahuanterret allempo orrterra pa'namen mueroçhteñtsoçhno. Ñaña ñetpa' atto e'shohuarettet po'chñaret e'ñe Cristo po'rraso,

ñeñña ottetsa atet ñerra'mrrate' ñetpa' o' atsama'tarettet pa'shtam attoch e'ñe cohuen a'huallama'ttarettet pa'shtamuet e'ñe cohuen.

15 Ñeñño'marña ñetpa' allo'tsa'yenet Yompor po'conaño. All chocma sherbeñet Yompor — ellapenete't, arepenete't sherbatset all Yompor pa'paclo. Yomporña ñeñt anets all po'conaño, ñachña e'ñe a'natenahuet e'ñe ñesho.

16 Ñetpa' amach muerochterrete'te pa'chporrñoñ ama't po'ñpañoñ. Ñaña ñetpa' amach errotenot chemuerranete'te atsne' ñaña amach a'mñechaterranete'te ñaña huerate'.

17 Tarro'mar Cristo ñeñt atma'ntataret Carrero ñeñt allo'tsen all Yompor po'conaño, ñachña cohuanñpenahuet e'ñe atet ñerra'mrrate' carrero e'ñech cohuanñpeñ pamo'mte'. Ñapa' chapatanetcha' all poten oñ ñeñtcha' apahuet attoch correnet errponañohuen. Yomporña ñach a'huañañpsahuet puellquëña ama't ahuaŕapa' amach yahuerrete'te.

8

*Allempo Cristopa' toruan po'cançhrroñ ñeñt allo ayomr-
rarettena Yompor po'libro allempoñapa' orra ñaña puesheñarr
mellañoñeñ ñeñt orrene' po'pajo' orotaten*

1 Allempoña Cristo ñeñt toma'ntenaya Carrero, ñapa' allempo e'ñe toruan po'cançhrroñ ñeñt allo ayomrretet Yompor po'libro, e'ñe muetsoñeñtua poctacma pue'ntaño tematuanen.

2 Allempoña napa' alla nenterrerr mellañoñeñnesha' ñeñt cançherrsheña ñeñt tomçhets e'ñe all Yomporesho. Ñetña puesheña'ttset allpa' aparettet poctor.

3 Allempoña o' huapa po'psheñeñ mellañoñeñ. Huapapa' o' tomos all altaro. Añ altarpa' allecma a'crratenet tsach puese' ñeñña atarr amostetsa all. Pamosoñña' ñeñt atarr eñmosa'ttetsa Yomporecop. Ñeñt mellañoñeñpa' añ orren pajo' orotaten allcha' nenan ñeñtcha' eñmosa'ttetsa. Ñeñt mellañoñeñpa' allña apet shonte' eñmosa't ñeñtcha' eñmosa'ttate' ñeñt atto ma'yochena Parets pueyochresha'. Ñeñña eñmosa'ttetsapa' ñeñtcha' net altaro ñeñt ayeçhcataret oro ñeñt e'ñe ñehuapo'tsen Yompor po'conaño.

4 Ñeñt orranñpen mellañoñeñ eñmosa'tpa' cha amosoñe'chñen enonet allo'tsen Yompor, ñeñña eñmosa'ttatene' ñeñt atto ma'yochena Parets pueyochresha'.

5 Allempoña mellañoñeñpa' cheterran pajo'pa' o' esha'tan tso' puecallañshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrtosa huomenc, pellatan pats.

Atto Juanpa' entan cancherrsheña mellañoñeñ ñeñt poc-torets

⁶ Allempoña mellañoñeñ ñeñt cancherrsheña ñeñt epoc-toretarar puesheña'ttsetpa' o' echantyeset po'pocor o'ch a'toret.

⁷ Allempoña ñeñt ñanom mellañoñeña' o' poctora', poctora'huatsapa' orrta ñeñt ma'po'mar ñeñtcha' ahuapore'tarettatsa patso. Ñeñtpa' añ hue' allo'tpa' ñaña tso' ñeñt tsetetsa errasatso. Atto ahuapore'tarettatsa patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' errañaren e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

⁸ Allempoña po'psheñeñ mellañoñeñ ñeñt puepañpa' o' poc-torrerrr. Poctora'huerrtserrpa' orrtorrerrr atet ñerra'm ñeñt nanac atarr aspenet. Ñeñtñapa' cha huorten. Ñeñt aspenetpa' ahuapore'tarettatsa sa'po. O'ña chap oñopa' errañarenña oñpa' puenasa errasats allohuanen oñ ñeñt allpon otenet la tercera parte.

⁹ Ñaña ñeñt allpon yeçhetsa all oño errañaren, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño errañaren e'ñe chenca'huet, allpon chenca'huatsa ñeñt otenet la tercera parte.

¹⁰⁻¹¹ Allempoña po'psheñeñ mellañoñeñ ñeñt poema'pañpa' o' poc-torrerrr. Poctora'huerrtserrpa' orrtorrerrr ranto ento ñeñt añecmuen atarren. Shora'nerrerrr cha huerarere'tnena. Chap allo'tsa'yen po'ñesočno ñaña allot potayen oñečno errañaren arr patsro. Ñeñtpa' arrohua chap ñeñt allpon otenet la tercera parte. Ñeñt rantopa' añ pa'so'cheñ Peshrrem. Chap allo'tsa'yen oñečno ñeñtpa' cha a'peshherretuosan oñečno errañaren arr patsro. Ñeñtpa' allponohua a'pesherrtatan oñečno ñeñt allpon otenet la tercera parte. Oñ po'peshrroña ñeñtña a'cllatue'ña shonte'acheñenesha' all.

¹² Allempoña po'psheñeñ mellañoñeñ ñeñt puepa'tatseñ o' poc-torrerrr. Poctora'huerrtserrpa' allempocma çhote'errotetyesa atsne' ñaña arorr ñaña rantočno, o' attañ checmetyeset. Ñetpa' allpon checmetyesets ñeñt allpon otenet la tercera parte. Ñeñt atto çhoyo'tenet ye'to ñaña tsapopa' o'huañ atsnomyeset. Ñeñt allpon o'huañ çhoyo'tyeset ye'to ñaña tsapo ñeñtpa' allpon otenet la tercera parte.

¹³ Allempoña napa' o' alla necuererrpa' allñapa' nenterrerrr po'psheñeñ mellañoñeñ ñapuet all anoma'mtena ento

allpononet. Allñapa' ne'muerrerr ñeñt atet eñosnom huomenc. Panoma'mteñotpa' atet oten:

—Llequēñtsa-bee ñeñt allohuenacop ñeñt yecha'yetsa añe patsro. O' mameshaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeñticha' poctorerrt-serr e'ñe allohuanen

¹ Allempoña po'psheñeñ mellañoñeñ ñeñt pa'mnareñpa' o' poctorerrerr. Poctora'huerrterrpa' nañapa' all nenterrerr ranto atarren ñeñt shora'nmats ento' o' e'ñe chap patso e'ñe atet orrtosa ñerra'm mellañoñeñ. Ñeñtña mellañoñeñ allñapa' apet paterr llave alloch toran allo e'tamñpsaret arrotot ñeñt atarr o'pononet arrototena pats.

² Ñaña' o' toramñpsan arrotot. Ñeñtña arrotot allotña cha'nom amos shonte' atet ñerra'mrrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos.

³ Atto atarr chepoten amospa' cha'nma'cha'tatan ñaña al- lot ahuañchenclla nanac shonte', pam'cha'tyesa erracmañen patso. Ñehua, ñeñt ahuañchencllapa' o' apet attoch epotaña atet pena ñerra'mrrate' yellas ñeñt atarr epotañ.

⁴ Ahuañchencllaña' atet otare'tta amach erro't patstano ta'te' ñeñt patso'tsen, amach erro't patstano ñaña tsach. Ama't ñaña allohuen ñeñt pa'namen chopyets añe patsro amach erro't patsche. Añcha'ña erro't pa' acheñ ñeñt ama ayato'ma'tare'teyaye Yompor pueyotsaparo.

⁵ Ama muenacheto o'ch muetsan ama't patrra acheñ allempo. Ñeñt ahuañchencllapa' ña oteñet o'ch muero'chtatan acheñ amnaña arrot. Ñeñt'pa' atet'cha' atserrpanet atet atserrtena yellas ñerra'm cho epota'y.

⁶ Allempoña acheneshapa' e'netcha' attoch rromuet tarraña amach erro'tenot rromueto. Ama'tcha' atarr ya'ñametare'tenetañpa' amach rromueto.

⁷ Ñeñt ahuañchenclla atet orrtena ñerra'mrrate' cahuallempo o'ch natyeñet attoch quellarachet. Poñpa' e'ñe atet orrtena ñerra'm choyo'mets ñeñt orrotaten. Pa'clloyotpa' e'ñe atet orrtena ñerra'mrrate' acheñ.

⁸ Echet, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras.

⁹ Pa'tallpa' e'ñe atet orrtena ñerra'mrrate' asertall ñeñt'cha' moñenaya, amach etsoto allo saneñet. Ñaña ahuañchenclla ñerra'm esempo anom'chenapa' e'ñech atet e'morrtena

ñerra'mrrate' shonte' carro ma'moretets allempo matateñ cahuall huomenc attoch chapuet allcha' quellaroset.

10 Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llotsen puepotañer allot atserrpenan acheñenesha'. E'ñech amnarnia arorr muerochtatenanet.

11 Ñeñt ahuañchencla ñetpa'cho'ña añ pa'micha'tareter penet mellañoñeñ ñeñt añcha'tarettetsa all allotsen arrorot ñeñt atarr arrorot o'pononet pats. Mellañoñeñ ñeñt pa'micha'tareter pen ahuañchencla, hebreaçhopa' añ socheñet Abadón; griegaçhoñapa' añ socheñet Apolión. Ñeñt epo'mar so'chñets ya yeñoño ñeñt yoten amsanatañ.

12 Allempopa' met ñeñt ñanom ñeñt allcatañtetsa, tarraña señoche'pa'ch palltena po'poñ epa ñeñtcha' allcatañterrtterr.

13 Allempoña po'psheñeñ mellañoñeñ ñeñt po'pechapueñ o' poctorerrerr. Poctora'huerrtserrpa' ñaña allpa' ne'muerrerr ñoñets ñeñt e'morrtetsa altar pa'tatso'marot po'ucoroñ. Añ altar ñeñt ayeçhcatareñ oro, ñeñt'pa' e'ñe ñehuapoñe'tsen Yompor po'conaño.

14 Ñeñtña ñoñetspa' atet otenan mellañoñeñ ñeñt po'pechapueñ ñeñtara ñeñt o' poctora'huerrerr. Ñeñtña ñoñetspa' atet otenan mellañoñeñ:

—Te'pa' o'ch pepyamper mellañoñeñnesha' pa'tatssheño'mar ñeñt ehucarettsa all ñeñt atarr po'ñeso ñeñt pa'so'cheñ Eufrates.

15 Ñehua, ñeñt mellañoñeñ pa'tatssheño'maretpa' añecop añño'tarettenet all atomat o'ch chap allempo onañchareñ allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt yeçha'yetsa arr pat-sro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañchareñ ñeñt hora, ñaña ñeñt yetro, ñaña ñeñt arorr-ro ñaña ñeñt chararo. Allempoña ñeñt mellañoñeñ pa'tatssheño'marpa' o' a'rroyareñterret.

16 Ñeñt mellañoñeñ pa'tatssheño'mar ñetñapa' ahuanmet po'solltarer ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allo'tsa'yen. Ñeñt'pa' atarr aton shonte'. Ñeñt che'muechets all, allotsen doscientos millones solltarnesha'.

17 Ñeñt atet gatennet all nent ñaña cahualleçhno, ñaña nent ñeñt atet orrtena ñeñt montenaya. Puesomapoñpa' añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet

shemashremamuenare'. Ñaña cahuallečno poñpa' atet orretyena ñerra'mrrate' ma'yarroto'. Puenamotñapa' allot cha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre.

18 Añña ñeñt cha'nets puenamot atsetaren ma'po'marpa' ñeñtpa' ñeñtña amtsañtetsa ñeñtcha' a'cllatuerre' shonte' acheñenesha' ñeñt allpon otenet la tercera parte.

19 Ña po'huamenc allo muetsenan acheñenesha' ama puenamotayaya atet peno, añña ama't pa'sme'llotpa'cho'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñtpa' alloña atserrpenan acheñenesha'.

20 Allpon acheñenesha' ñeñt queshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama cotape'cherreto cohuen attoch quechpuet ñeñt atet patse'tyenet sosya'tsañ. Ñetpa' attera mueneñet o'ch ma'yochyet oneñeñečno ñeñt ama cohuenayaye. Ñaña ñetpa' attera mueneñet o'ch yeçcatatse'tyeset pa'namen ñeñtcha' ma'yochenet atet ñerra'm oro ñaña quellema't, ñaña bronze, ñaña mapue', ñaña tsach. Allohuenet ñeñt yeçcatyenet ñeñtaña po'yomporer penet, ñeñta ma'yochenet ama't ama enteno, ama't ama e'mueno, ama't ama chope'cheno.

21 Ñaña ama quechpueneto ñeñt atto muetsanna'tenet ñaña atto tsamñannenet ñaña atto nanac cañoresha'tenet ñaña atto etatsre'tanna'tyenet. Ora añechnopa' alloña ama cohuenaye' cotape'cheneto.

10

Atto Juanpa' entan puesheñarr mellañoteñ ñeñt orrene' po'librotoll

1 Allempoña napa' o' alla nenterrerr po'psheñeñ mellañoteñ ñeñt atarr ahuamencattetsa. Ñaña'pa' sohua'nena entot, e'ñe osot sohuamñpena. Poñoñapa' añ arca'tamñpesnene' ayon. Pa'cloyotñapa' e'ñe atet poptena ñerra'mrrate' at-sne' choyo'tetsa. Pa'tac pa'chepohuen ora atet orrtena ñerra'mrrate' tso' huortets enonet.

2 Sohua'nenapa' orra'nenan po'librotoll. Ñeñtña librotollpa' e'ñe cohuen atorare't ñeñt rremuen potot. O' chap patsopa' pa'tacña po'cohuenrotpa' tomos oño, po'ptecañña ñeñt pue'chcoferotpa' tomos patso.

3 Allempoña tomospa' rranosa huomenc. Po'ñoñapa' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena ñerra'mrrate'tecore' anapuene' ñeñt cançhroche'tats tecorena.

⁴ Allempoña e'morrta ñeñt cancherr tecore' napa' nem-neñ o'ch nequellcañ ñeñt atet ne'm tecore', tarraña na allempopa' ne'muerrerr ñoñets all e'morrtena ento. Ñeñña ñoñetspa' atet otenen:

—Amach pequellcatsche ñeñt atet pe'mueñ tecore' chochña pa'nasocha.

⁵ Allempoña añ mellañoñeñ ñeñt tomosets oño ñaña patso, ñañaapa' echantosán pot enonet po'cohuenrot.

⁶ Allña eñosospa' e'ñe huomenc nosan po'ñoñ Yompor pa'so'chño, ñeñtpa' atet otos:

—Yompor ñeñt ama arromñañeshayaye ñeñt yeçcate' enet ñaña ora allpon ñeñt allo'tsa'yen pue'ntañ, ñaña ñeñt yeçcate' pats ñaña ora allpon ñeñt allo'tsa'yen po'patsño, ñaña ñeñt yeçcate' oñeçhno ñaña ora allpon ñeñt allo'tsa'yen pueyeçcatareso, ñañaapa' entenen ñeñt atet noten te' ñeñtpa' e'ñech po'ñoçh atet perra. Te'pa' amach alla yecuame'tere'te atomatuanen.

⁷ Ñerra'm esempoch poctorerrerr po'psheñeñ mellañoñeñ ñeñt po'cançhroñpa' allempochña e'ñe etsotuerra Yompor poçtaña ñeñt ama e'ñeye' eñotpahuoyaye ama't ahuatoteñ ama't allempo ñanom eñotatyese'ñt ñeñtcha' a'mta'yese'ñt po'ñoñ ñeñtara ñeñt nanac torra'yestse'ñt ñocop. Allohua ñeñt atet eños mellañoñeñ.

⁸ Allempoña napa' o' alla ne'muerrerr ñoñets ñeñtara ñeñt atet ne'm ñorra' ñeñt e'morrtetsa pue'ntañot, alla oterrerr:

—Te'pa' o'ch peponemya mellañoñeñ ñeñt tets oño ñaña patso o'ch pechtosñañ potot po'libro ñeñt e'ñe cohuen atoraret.

⁹ Nañapa' ahuen allo'tsen mellañoñeñ, neçhap ñeshopa' notos:

—Te'pa' o'ch paupen pelibrotoll.

Ñañaapa' atet oten:

—Añca'ye peyore o'ch perre'. Penamo'tpa' atarrcha' nanac puetsarr pe'm atet ñerra'm pets po'moñ, tarraña ñerra'm o'ch çhap pa'topa' atarrcha' pesherr pe'm.

¹⁰ Allempoña napa' o' nechtosñañ po'libro pototpa' o' nerre'. Allempo nerruepa' nenamoña atarr puetsarr ne'm atet ñerra'm pets po'moñ tarraña allempo çhap na'topa' atarr pesherr ne'm.

¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñtcha' atet etsotaterr Yompor esempohuañen. Añcha' peserrpare'tyes ñeñtcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsoreçhno ñeñt eñosyets

po'poñe'ttsocma ñoñtso ñaña atetcha' perra pa'namen añcha'taretečno.

11

Atto epsheña ñeñt pueyochresha' pen Paretspa' ñetcha'ña eñerrtset Yomporecop

¹ Allempoña napa' apnet tepapets ñeñt atarr allpocha' p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquell allo, ñaña altar ñeñt allo'tsen. Ñaña o'ch pe'ñotena' errosheña'e' ñeñt ma'yochetsa all.

² Tarraña amach petpamñsatscheña ñeñt a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt ama ame'ñetso. Ñetñapa' atmama'terretcha' all anetso ñeñt anaret Partsocop. Pa'tatsoch çharramña puechena epña arrorr allponmatcha' a'sosyateñet all ñeñt anarettetsa Partso-cop.

³ Ñaña allempopa' o'ch nemñe epsheña ñeñt neyochresha' nepen. Nach ahuamencat pahuet attoch a'potet ñeñtcha' atet perra esempohuañen. Mil doscientos sesenta yet allpon-matcha' serrpare'tennanet neñoñ. Puellquëñotet chorretcha' pa'shtamashe'm. Arrpa' allohua ñeñt atet otnet all Yompor pue'ntaño.

⁴ Ñehua, añ epsheño'mar ñeñtcha' eñerrets Yomporecop ñetpa' atma'ntatarettenet epcha olivoch ñaña epa all or-ratenet huerare ñeñt e'ñe tomçhets all Yomproesho, ñeñtara Yompor ñeñt pomnaren pohuene' allohuen acheñenesha' arr patsro.

⁵ Ñaña añ epsheña ñeñtcha' eñerrets Yomporecop, ñerra'm ama't esesha ñeñt muenene' o'ch errof pet añ epsheña, ñetñapa' puenamoŋpa' o'ch çha'nmatet tso' huorte' ñeñtcha' e'nue' ñeñt e'moñe'tenahuet. Ñeño'mar yeñoteñ ñerra'm esesha' e'moñe'tenahuet, ñetñapa' e'ñech rromhuet poctacma.

⁶ Ñaña añ epsheña ñeñtcha' eñerrets Yomporecop, ñetpa' atarrcha' ahuamencatet. E'ñe ñet po'huamencot epatare'teñet o' entot attoŋtcha' ama huateno e'ñech allponmat eñorenet Yomporecop. Ñaña e'ñe ñet po'huamencot oññapa' o'ch a'pnaseret errasats. Ñaña e'ñe ñet po'huamencotet o'ch çhapaterret añ arr patsro pa'namen ñeñtcha' amtsañterrtsa. Ama't esempo allempo atet muenenet ñet, allempocmach atet pet.

⁷ Tarraña ñerra'm esempoch e'ñe e'nuet ñeñtcha' allpon eñoret arr patsro, allempoñapa' o'ch çha'nom ñaña ñeñt berrma'ttetsa ñeñt atarr bellac. Arrotcha' çha'nom arrorotot

ñeñt atarr o'pononet arrorottena pats. O'chña cha'nompa' o'ch quellaros an ñeñt epsheña ñeñtcha' eñerrets Yomporecop. Ñeñt berrma'ttetsa ñachña ganatsa o'ch muetsan añ ñeñt epsheña.

⁸⁻⁹ Añña epsheña ñeñt amtsaretpa' attach o'shshe'muet toño allecma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñtara anetser Jerusalén all corso'tam̄pset Yepartseshar Jesucristo ahuat. Ñeñtña anetserpa' ñato' o'ch netma'ntacha ñerra'mrrate' ñeñt atet pete't anetso Sodoma ñaña anetso Egipto. Añña epsheña ñeñt amtsaret attach o'shshe'muet all amach esesha' muenateto o'ch pampuet. Allñapa' allcha' huaçhena shonte' pa'namen acheñenesha' ñeñtcha' cohuanrrortene', shonte' pa'namen mereñtsoreçhno ñeñt eñosyets po'poñe'ttsocma ñoñtso. Shonte' pa'namen anetsoçhno allot huaçhena.

¹⁰ Acheñenesha' ñeñt yeçha'yetsa erraparen arr patsro ñetñapa' o'ch coshame'tam̄pesyet añ epsheña arromñañ. Atarrcha' nanac cosherret. Pocsheñeshoñetña ñetpa' o'ch es apanna'tyeset e'ñe atta. Ñetpa' añecopcha'ña atarr coshenet tarro'mar o' rroma añ epsheña ñeñt atsrre'moçhen entenet ñeñt yore'tatenahuet po'chñaret e'ñe pueserrpare'teñoñet Yompor po'ñoñ.

¹¹ Allempoña o'ch met ma'pamuet ñaña po'poñ pueshmet yet, añña ñeñt epsheña machayotepa'tcha' alla tanterret tarro'mar Yomporña alla tantatterre'. Allohuen acheñenesha' ñeñt cohuanrrortene'pa' atarrepap'tcha' nanac yorenet.

¹² Allempoña tanterret epsheño'maret, e'muet ñoñets ñeñt e'morrtetsa atarr huomenc entoñ. Ñoñetsñapa' atet otenanet:
—Sa'tap arr ento.

Ñetñapa' o'çho' a'tapuet, ospa' ñeñtña anmahuet ento.

¹³ Cohuanrrortets ñeñt e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cançherr mil acheñenesha' ñeñt allpon colla'huatsa. Ñeñtña allpon queshpatsapa' atarr yorenet. Pueyorñoñetpa' e'ñe allempocma añcha'na'tpo' eñchet Yompor ñeñt pue'ntaño'tsen. Allñapa' cohuentatoñet.

¹⁴ Allempopa' o' metuaña ñeñt puepañ ñeñt allcatañtetsa, tarraña señochepa'ch palltena po'poñ paterr ñeñtcha' tecma allcatañtatsa ñeñtcha' puema'pañ.

Allempoch poctora'huerr mellañoñeñ e'ñe allohuanen allempochña añcha'taretetuerra Yompor arr patsro

15 Allempoña po'psheñeñ mellañoñeñ ñeñt po'cançhroñpa' o' poctorerrerr ñaña. Poctora'huerrtserrpa' entoñapa' atarr huomenc e'morrterrerr ñeñt eñoretsa all ento. Ñeñtpa' atet otenet:

Ñeñt allpon añcha'taretetyetsa arr patsro te'ñapa' o'huañcha' allo'na añcha'taretetnetet tarro'mar ñeñt atto añcha'taretetyenetpa' ñeñtpa' allochña añcha'taretterra Yompor epuet ñaña Puechemer ñeñt Cristo. Ñeñtcha' atto añcha'taretterra Yomporpa' ñeñtpa' amach ahuañañañterro ama't errponaña.

16 Allempoña añ ñeñt epoch çharrasheña ñeñt puechetsa pa'tats ñeñt anorrçhets all e'ñe ñet po'conañeto allot sherbeñet Yompor all pue'ntaño, ñetñapa' rrema'rrartenet Yomporeshonet atet ma'yocheñet Yompor.

17 Ñetñapa' atet otenet:

Pa Yompor ñeñteþ atarr nanac Partsoþ ñeñteþ Yepartse-shar yepeneþ, ñeñteþ çhocma eñalleþ ama't ahuatoteñ ñaña ñeñteþcha' alla huerrtserr po'pocheño añe patsro, yañapa' atarr yeparasyoso'teneþ tarro'mar te'pa' o'ch alla po'paterra þa pehuamenc attotcha' o'ch alla atarr þa'mcha'taretterra.

18 Shonte' pa'namen acheñenesha', pa'namen anets allo'tsa'yenet, ñet pa'tsre'mueñoñtetpa' e'ñe e'moñe'tuenpet, tarraña te'pa' o' çhap allempoch pecoñchatuerranet. Ñaña te'pa' o' çhap allempo onañchareñ añecop ñeñt colla'huetsa ahuatoteñ allempoch peñotatuerranet ñeñt atet þa'yesete't. Añña ñeñt torra'yestse't atto a'mtonapete't peñoñ ñeñt e'ñe peyochresha' pepe't, te'ñapa' o' çhap allempoch petsa'tuerranet. Ama't allohuen ñeñt þame'ñaye't þa ama't ñeñt atarr asherben entyesete't ñaña ñeñt ama asherben entete'te, te'ñapa' o' çhap allempoch petsa'tuerranet allohuenet ñeñt þame'ñenaya þa. Ñaña te'pa' o' çhap allempoch e'ñe þa'chencatuer allohuen ñeñt a'chencatañtetsa añe patsro.

19 Allempoña añ Yompor pa'paquell ñeñt ento'tsenpa' e'ñe cohuen atorarettena. O'ponoña all nentoñ Yompor po'tsapot all çhocma añño'tenet ñeñt aquellcareñ ñeñt a'poctat Yompor yocop. Allñapa' meratstena, tatsllaren ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñt emaret, pue'maretollpa' ñeñtara Cristo, añyaññapa' mueneñeñ o'ch

añyañpes pue'maretoll

1 Allempoña all pue'ntañopa' all orrtena ñeñt ama't ahuata ama't puesheñarroteyapa' ama yentare. Ñeñtpa' ñeñtcha'ña yeñotaterre' ñeñtcha' atet perra esempohuañen. Allñapa' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arrorr. Poñotñapa' echoyo'met. Po'choyo'mopa' all orrtena çharra' ranto puechena epa.

2 Ñeñtña coyanesharpa' açhomen, o' çhen allempoch eñalletatan pue'mar. Atto atsotenana pue'marpa' çharanare'tena, atarr allpatateñ pue'mar.

3 Allempoña all pue'ntaño all orrtena po'poñ ñaña ñeñt ama't ahuatapa' ama yentare. Ñeñtpa' añ orrtetsa añyañ ñeñt atarr añcha'noçhen. Ñeñt añyañpa' atarr añecmuen ñaña atarr tsama't orrtena. Poñpa' cançherrmaga. Cançherrmago'mar poñpa' e'ñe echoyo'metareroche'. Ñaña po'ucorpa' allo'tsen çharra'.

4 Pa'sme'll ñeñt chetare'tnen alloña tarra'huanenanña shonte' rantoçhno e'ñe a'shore'tuaneñ patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñtña añyañpa' alla tomos e'ñe coyaneshesho ñeñt atsotenaya pue'mar all cohueñ ñerra'm o'ch eñalletatan pue'marpa' ñach añyañpse'.

5 Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorrofollpa' e'ñe allempocma a'tapachet Yompor po'conaño tarro'mar ñapa' ñach anarettertsa ñeñtcha' añcha'tarettertsa allohuen pa'namen acheñeneshacop. E'ñech po'yoroçhenño añcha'taretterranet, atet ñerra'mrrate' ñapa' a'sreperet o'ch añcha'noçhtana'terranet.

6 Allempoña coyanesha'pa' allorocma o'yeta o' çhap allap̄ar all amaraño. Allña Yomporpa' e'ñe cohuen añño'tatoñ allcha' cohuanmpeñet allcha' rrateñet allponmat yet ñeñt otenet mil doscientos sesenta yet.

Atto quellarenet Yompor pue'ntaño

7 Allempoña quellarenet Yompor pue'ntaño. Ñeñt pa'mcha'tareter pen allohuen ñeñt e'ñe cohuen mellañoñeñnesha'pa' añ pa'so'cheñ Miguel.

8-9 Miguelñapa' all quellara po'mllañoñeñnesharohuen. Quellareñet añyañ, añyaññapa' o' quellara ñaña pueyochreshohuen. Miguelpa' chetanna'tet parro epuet añyañ all Yompor pue'ntaño. Ñehua, ñeñt pueyochresha' pen añyañ ñeñtpa'cho'ña mellañoñeñnesha' tarraña ñeñt mellañoñerpa' ama cohuenayaye. Tarraña añyañ atto

quellaran Miguelpa' ñapa' ama gano. Ñeñto'marña añaña' huapore'chet entot pueyochreshohuen a'shorare'tterret patso. Attoña ahupore'tare'ttaña añaña' ama't atarr nanac añcha'no'cheneñ. Ñehua, añaña'pa' ñeñt shechep' ahuatoteñ ñeñtara yoten oneñe't ñaña ñeñt otenet Satanás ñeñt atarr ashcañtetsa ora errap'aren a'ne patsro.

10 Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ño'ch o' chap allempoch queshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poctacma o'ch alla añcha'tare'tterra ñapue't epuet Puechemer ñeñt Cristo ñeñt nen ña ñeñt'cha' añcha'tare'ttapretenaya. Añ oneñe't ñeñt chocma atta toma'tam'pesyene' masheñneshach'no all Yomporesho ye'to ama't ñaña tsapome'tets ñeñt'ñapa' o' ahupore'tare'tta.

11 Ñeñt masheñneshach'nor ñeñt ame'ñenaya Yompor, ñet'ñapa' o' e'ñe a'mchechueret oneñe't ñeñt toma'tam'pesyenuhuet e'ñe atta. Añ a'mchechatterre' ñeñt atto Cristo rroma, ashatare'tta po'r'ras ñeñt toma'ntenaya Carrnero ñeñt muetsete't och'ñartsocop. Ñaña añ a'mchechatterre' ñeñt atto masheñneshach'no chocma eñosyenet e'ñe cohuen ñeñt atet pena Cristo po'cohuenña. Ama't amuerochtatare'tetyenetpa' ñetpa' ama que'chpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñotet Cristo.

12 Atarr cosheñets Yompor pue'ntaño allohuenacop ñeñt allo'tsa'yen. Tarraña atarr llequëñets allohuenacop ñeñt ye'cha'yetsa a'ne patsro ama't ñaña ñeñt oño'tsa'yen. Tarro'mar oneñe'tpa' o' sohuan'perranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahupore'tare'tterrerr.

Atto añaña'pa' attera cotare'tenan coyanesha' ñeñt o' eñalletatuan puechoyor

13 Allempoña añ añaña' ñeñtara oneñe't o' eñota ñapa' o' ahupore'tare'tta entot, ña pa'tsrre'mueño'tpa' o' alla cotare'terranerr coyanesha' ñeñt o' eñalletatuan puechoyor asheñorro'toll.

14 Tarraña coyanesha'pa' allempo cotare'terrerr añaña'pa' ñeñt'ña coyanesha'pa' o' apet eppa'ya pa'pue' ñeñt atesha' contor pa'pue'. Ñeñt'pa' alloch anomam'psana po'yallop ñeñtara añaña' o'ch sa'ne'm o'ch chap ba'chayo all amarato

all añño'teññañet ñocop e'ñe cohuen allcha' cohuanpeñet. E'ñech ma'pa char ñaña po'poñerrerr puehmet char, ñeñtpa' allponmatcha' rrachet all.

¹⁵ Allempoña añ po'yalloppa' e'ñe puenamot' cha'nmatan shonte' oñ atet ñerra'mrrate' po'ñes apellchetsa. Ñapa' cha ota-pañ ñeñtcha' rremuerraya' coyanesha' ñeñt cotare'ten attoch a'ño'shach. Tarraña ñeñtpa' ama attetache.

¹⁶ Ama't patspa' yenpan coyanesha', attoña tara'nom all esha'tañña oñ e'ñe masohua ñeñt allpon cha'nmat po'yallop puenamot'.

¹⁷⁻¹⁸ Ñeñña atarr atsrre'mate'ña añyañ, ello alla atarr e'moñe'terranerr coyanesha'. Allempoñapa' ahuo' allo'tsa'yen po'potantañ coyanesha' puechoyoesha' o'ch quellarosanet ñamet. Tarro'mar ñetpa'cho'ña chocma ame'ñeñet Yompor po'ñoñ ñeñt atet anaret ñaña chocma coteññañet Jesucristo pocta'ña.

13

Atto Juanpa' entan berrma't ñeñt atarr añcha'nochen ñeñt cha'nets oñot

¹ Allempoña napa' natomos sa'patopño, allñapa' nenterrerr berrma't atarr añcha'nochen ñeñt cha'nmatas oñot. Poñpa' cancherrmaga, po'ucorpa' charra'. Pate'tets po'ucorpa' e'ñe echoyo'metoche'. Puenmaga'ttso all aquellcare't sochatse'teñets ñeñt pa'namen sosya'tsañ allo achmare'teñet Yompor.

² Ñeñña berrma't pue'moquèr e'ñe atet ñerra'mrrate' ma'yarr tarraña pa'tacñapa' e'ñe atet ñerra'mrrate' orranatec. Puenampa' e'ñe atet ñerra'm ma'ñorenam. Añyaññapa' ñeñt apue' po'huamenc, a'p ñaña llesens attoch añcha'nochtaprecha all po'conaño.

³ Puenagarr poñpa' all orrtena cha atserrpena nanac huomenc cha mettaguèn ñeñtcha' muetsayen tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet cha otapuetañ ñato' chach rroma, tarraña ama rromo. Ñeñt atto ama rromopa' acheñenesha'ña arr patsro ñeñña ame'ñatenahuet. Ñetpa' otenapuetañ ñato' ñeñfte'ña Parets.

⁴ Ñeñto'marña acheñenesha' ma'yocheñet ma'yarma't. Ñetpa' atet otanna'tyeset:

—Ama eñalle po'poñ ñeñt nanac ahuamencat atet ñerra'm añ ma'yarma't ñeñt yenten. Ama't e'ñe eseshapa' amate' errotent a'mchachetoña añ ñeñt atarr ahuamencat.

Ama't añaña'pa'cho'ña ñeñt ma'yochena acheñenesha' tarro'mar añaña'pa' ña ahuamenca't pe' ma'yarrma't.

⁵ Añaña'pa' muenatenan ma'yarrma't o'ch ommo'chatse'tyesa. Pommo'chatse'teño'pa' o'ch achmāre'tenan Yompor. Ñaña muenatan ma'yarrma't o'ch añcha'tare'tta pa'tatsoch çharrañña ñaña puechena epña arorr.

⁶ Ate't pa' ma'yarrma't achmāre'tenan Yompor, sochatse'teññañ pa'so'cheñ. Ñaña Yompor pa'paquell ñaña allohuen ñeñt allpon allo'tsa'yen pue'ntaño e'ñe achmāre'tueñ.

⁷ Ñaña muenateñ o'ch quellaran ñeñt pueyochresha' pen Parets. Ñaña muenateñ o'ch ganana Yompor pueyochresha'. Ñaña muenateñ o'ch añcha'tare'tta allohuenacop ñeñt pa'namen acheñenesha', allpon ñeñt pa'namen mereñtsor ñeñt e'ñe eñosyets po'poñe'ttsocma ñoñtso ñeñt ora allpon allemeñ anetso'mar.

⁸ Ora allohuen acheñenesha' ñeñt aña patsro'tsa'yen añach ma'yochenet ma'yarrma't tarro'mar ñeñt acheñenesha'pa' ama aquellcare'teyayeto pa'so'cheñ Cristo po'libro all aquellcare'ttena allohuen ñeñt corretsetach ñeñt ame'ñenaya Cristo ñeñt amtsarettatsa ochñartsocop ate't ñerra'm carrnero. Ahua't allempo errte' ayeçcatare'tta pats, Cristoña po'libropa' all aquellcare't so'chñetso'chno attochña ñetpa' corretsetach.

⁹ Ñerra'm esesha' e'mñotene' añ ñoñets, çhaponēpa'ch pueyoçhro ñeñt ate't yeçhateney añ ñoñets. Ñeñt ñoñetspa' ate't oten:

¹⁰ Ñerra'm esesha' rromanatene' po'potantañ attoch yottam̄psatanet, ñetpa'cho'ña ayottam̄psare'tterretcha'. Ñaña ñerra'm esesha' muetsanatene' po'potantañ espado, ñetpa'cho'ña amtsare'tterretcha' espado. Ñeñto'mar añ ñeñt poctetsa yocop e'ñe yeyemteño' Yompor o'ch ya'huanten aco'po'teñ ñerra'm es yehuapoya, allohueney ñeñtey o' pueyochresha' perrey Parets.

Atto Juanpa' entan po'poñ berrma't ñeñt çha'nets o'ponot patsot

¹¹ Allempoña na allpa' nenterrerr po'poñ ñeñt berrma'ttetsa. Ñeñtpa' arro't çha'nom o'ponot patsot. Ñeñtñapa' e'ñe epa po'ucor ate't ñerra'm carrnero po'ucor, tarraña ñeñtpa' atarr añcha'noçhen eñen e'ñe ate't eñen ñerra'mrate' añañ eñoretsa.

12-13 Ñapa'cho'ña atarr añcha'tare'tta e'ñe ate't añcha'tare'ttena ma'yarrma't ñeñt ñanom nent ñeñt çha'nmats oño'. Allñapa' añcha'tare'ttapretenana ñeñt

ma'yarrma'ttetsa all. Ñeñt' cha'nmats o'ponot patsot ñeñt'ña'pa' muenatenan allohuen acheñenesha' ñeñt' añe patsro'tsa'yen o'ch ma'yochyet ñeñt' ma'yarrma't. Ñeñtara ma'yarrma't ñeñt' correrrtsa e'ñe mamecma allempo mettaguën. Ñeñt' atto mettaguën ñeñt'cha' muetsayen tarraña ñapa' ama rromo. Añ berrma't ñeñt' cha'nmats o'ponot patsotpa' ñerra'm esempo allo'tsen parro epuet ma'yarrma't ñaña'pa' eñall attoch orrtatenan acheñenesha'cop pa'namen ñeñt' ama puentareto ama't ahuata. Attoña a'shoran entot huorte' tso' ñeñt'ña tso' huorte'pa' o' e'ñe chap patso allña'pa' cohuanrrortatan shonte' acheñenesha'.

14 Ñeñt'ña'pa' allo shequënan shonte' acheñenesha' ñeñt' añe patsro'tsen. Ñeñto'marña ñerra'm allempo otenan acheñenesha', o'ch seyeçhcat ma'yarrma't, ñet'ña'pa' e'ñeç pocte' enteñet. Añ ñeñtara ma'yarrma't ñeñt' metto'ten espada tarraña ñapa' e'ñe mamecma o' alla correrra.

15 Añña berrma't ñeñt' cha'nmats o'ponot patsot ñeñt'ña'pa' muenateñet o'ch o'rrerratan ayeçhcataret' ñeñt' toma'ntatenet ma'yarrma't. Allochña'pa' attoch eñorana'tanet pueyeçhcatar. Ñaña ma'yarrma'tpa' atet nanet po'ñoñ, ñeñt'pa' atet oten: Ñerra'm esesha' ama ma'yochenaye ayeçhcataret' muetsanachetepa'ch.

16-17 Elloña'pa' o'terranerr acheñenesha':

—Te'pa' o'ch seyaco'mta'tyesa soto' secohuenrot amapa' arr seto'mo'mar. Allcha' sena'yeson neso'cheñ amapa' sena'yeson ñeñt' nenúmero nepen. Atet p'atan allohuen acheñenesha' ama't ñeñt' ama esoshe'mayaye acheñ, ama't ñaña ñeñt' atarr sherbets, ama't ñaña acheñ ñeñt' atarr eçllayoret', ama't ñaña ñeñt' atarr huocchañetets, ama't ñaña acheñ ñeñt' e'ñe cohueno'tsen, ama't añ acheñer ñeñt' ataruasataret' e'ñe atta. Allohuen acheñenesha' ñeñt' ama ayaco'mta'tarete all neññañet ma'yarrma't pa'so'cheñ amapa' ñeñt' po'número pen ma'yarrma't, ñet'ña'pa' amach errotenot es pomueneto ñaña amach errotenot es rañteneto ñeñt' muenenet ñet.

18 Ñehua, ñeñt' allpon po'número pen ma'yarrma'tpa' ñeñt'pa' allo'tsen seiscientos sesenta seis. Ñeñt' número añ toma'ntena puesheñarr acheñ pa'so'cheñ ñeñt'cha' ñanom orrterrtsa tsapa'one't. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt' atma'ntataret' añ número.

14

Allempo Juanpa' entan Cristo ñeñt' atma'ntataret Carrero, all ten Sióna'ño epuet ñaña shonte' acheñenesha'

¹ Allempoña na cohuerrtsanerrpa' alla nentererr Cristo all ten Siónaño. All orrtena e'ñe atet orrtena ñerra'm Carrnero. All tomchen ñaña shonte' acheñenesha'. Ñeñt'acheñenesha'pa' allo'tsen ciento cuarenta cuatro mil acheñenesha' ñeñt' emchorrenaya Cristo. Ñeñña acheñenesha'pa' e'ñe ayato'ma'taretoche'. Pueto'muetopa' all na'yeññañet Cristo pa'so'cheñ ñeñt' atma'ntataret Carrnero, ñaña Pompor pa'so'cheñ ñeñt'ara ya Yeyomporer.

² Allña'ne'muen ñeñt' huomenc e'morrtetsa, arroñ huena entoñ. Atarr huomenc e'morrtena atet ñerra'm all et-sase'tena shonte' oñechno ñeñt' atarr huomenc ma'moretets. Po'ma'moreteña'pa' atarr huomenc e'morrtena čha ottena ñerra'm čho tecor-rraren huomenc ñeñt' yoten tatsllare'. Ñeñt' ma'moretets all añepa't ma'moretets ñeñt' shontetsa acheñenesha' all añepa't a'ma'moretenet arpa.

³ Allña'cohuentatenet morreñets ñeñt' e'ñe etserra morreñets all Yompor po'conaño. Allo'tsen ñaña pa'tatso'mar ñeñt' berrma'ttetsa, ñaña allo'tsa'yen ñeñt' sherbene' Yompor ñeñt' epoch čharra' ñeñt' puechetsa pa'tatssheña. Ama't e'ñe puesheñarrapa' ama eseshaye' yečhenayeña añ morreñets ñeñt' etserra. Añña eñotene' ñeñt' ciento cuarenta cuatro mil acheñenesha' ñeñt' a'queshpatarettsa añe patsroñ.

⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen cotenet Cristo ñeñt' toma'ntenaya Carrnero. All ama't erra muene' sen Cristo, ñetña'pa' e'ñech coña'neñet cohuen. Ñetpa' e'ñe ñanom a'queshpatarettet attoña ñetpa' anarettenet atet ñerra'mrrate' ñeñt' ñanom yapueñ Yompor ñeñt' atarr cohuen, ñeñt'ara o'patena ñaña Cristo ñeñt' atma'ntataret Carrnero.

⁵ Ama't puesheñarroñetapa' ama shequēneto ama't e'ñe mamesha. Ñetpa' e'ñe cohuen orretyenet amach errotenoñ otteñe'charetterreto ama't ahuaña all Yompor po'conaño.

Allempo Juanpa' enterranerr ma'psheña mellañoñeñ ñeñt' eñosyetsnets anoma'matoñ

⁶ Allempoña napa' alla nenterrerr po'poñ mellañoñeñ all anoma'mtena allpononet enonet. Ñapa' ñeñt'ña serrpare'tatenahuet cohuen ñoñets ñeñt' ama ahuañaño ñeñt' alloch yequeshperra. Añ cohuen ñoñets ñeñt'cha' serrpare'tatan allohuen pa'namen acheñenesha' ñeñt' yečha'yetsa añe patsro, ama't ora allemeñ pa'namen anetsočhno ñeñt' pa'namen mereñtsorečhno ñeñt' eñosyets e'ñe po'poñe'ttsocma ñoñtso.

⁷ Ñeñt' atto anoma'mtena all, eñosnen, atarr huomenc e'morrtena, ñeñt'pa' atet otnen:

—Semcha'na'chepa'ch Yompor, chochña secohuentatoñ tarro'mar te'pa' o' chap allempoch entyesas e'ñe puesheña'ttsos errotente' sepa'yena. Te'pa' ñachña sema'yocha ñeñt ye'hcate' enet ñaña ñeñt ye'hcate' pats, ñaña oñe'chno ama't allot potayen oñ.

8 Allempoñapa' alla cota'nererr po'poñ mellaño'teñ ñeñt puepañ mellaño'teñ. Ñapa'cho'ña eñosnerrerr, ñeñtñapa' atet otnóm:

—Te'pa' o' ahupore'taretta añ anets ñeñt atma'ntataret Babilonia ñeñt nanac atarr anets. Tarro'mar ñeñt'pa' aña ye'chatyenan ora allpon po'poñe'chno anetso'chno ñeñt atarr sosya'tsañe'chno ñeñt atet muenatse'tatyenanet ñet po'chets.

9 Allempoñapa' alla cota'huererr po'poñ mellaño'teñ ñeñt puema'pañ. Ñapa'cho'ña eñosnerrerr, po'ñoñpa' atarr huomenc e'morrtena, ñeñtñapa' atet otrerrerr:

—Ñerra'm esesha' ma'yochenaya ma'yarrma't amapa' aye'hcataret ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'taretta,

10 ñetñapa' a'coñchatarefterretcha', tarro'mar Yomporña e'ñe po'yoro'chenño'tpa' ñachña e'ñe coñchatuerrahuet e'ñe poc-tacma. Tso'pa' ñeñt'cha'ña mueroc'htatuerrahuet ñaña ñeñt epuet huorten tso'pa' ñeñt'pa' atarr shemasher ñeñt otenet azufre. Allcha' a'coñchatarefterret, allotcha'ña cohueretña allohuen mellaño'teññaneshachno ñeñt pueyochresha' pen Parets. Cohueretcha' ñaña Cristo ñeñt atma'ntataret Carnero.

11 Attoch achamarefterret, tso'ñapa' chepoten pamosoñ enonet ñeñtñapa' amach ahuañaña'at'erro ama't errponaña. Amach huañerro ama't mamesha ñeñt atto a'coñchatareftenet ama't yeto ama't ñaña tsapo. Tarro'mar ñetpa' aña ma'yochenet ma'yarrma't ñaña aye'hcataret ñeñt toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeñt atet ot mellaño'teñ ñeñt anoma'mtetsa eno'mar.

12 Ñeñto'marña allohueney ñeñtey e'ñe pueyochresha' peney Parets ñeñtey ame'ñenaya Yompor po'ñoñ ñeñt atet oteney ñeñtey e'ñe yemtenaya Jesús, yocopñapa' añ poc'tetsa o'ch ya'huanta'huen e'ñe aco'pa ñeñt allpon pa'namen es yehuenoya.

13 Allempoña na allpa' ne'muerrerr ñoñets arro't huena entot, ñeñt'pa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeñt'cha' rromayets e'ñe

pame'ñeñotet Yepartseshar Jesucristo." Po'ñoch atet oten Yompor Puecamquëñ, ñetpa' amesataretterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñtpa' e'ñe eñotuaref all Yompor pue'ntaño.

Attoch cherr ñeñteñpo allempoch apcherret narmets ñeñt o' pomella'huen

¹⁴ Allempoña na cohuerrtsanerrpa' nenterrerr os atarr huallama't. Ñeñña ospa' all anen puesheñarr ñeñtpa' añepa't Jesús ñeñtara Ñeñt Acheñetosets arr patsro. Ñeñtña' echoyo'met, ñeñtña po'choyo'mpa' oro ñeñt choyo'mtena. Pototñapa' orrenan cochell ñeñt atore'gorroñ ñeñt atarr nanac etsotañ ñeñt otenet hoz.

¹⁵ Allempoña Yompor pa'paclotpa' cha'nom po'psheñeñ mellañoñeñ. Ñaña'pa' otosan ñeñt anets oso. Po'ñoñña'pa' atarr huomenc e'morrtena, ñeñtpa' atet otenan ñeñt anets oso:

—Pamat pöcchello ñeñt pomellets allochña'pa' o'ch pa'yapache' tarro'mar o' chap ñeñteñpo allempo yapchen ñeñt o' pomella'hua yenarenñ.

¹⁶ Allempoña ñeñt anets oso, ñaña'pa' o'cho' amatan ñeñt o' pomella'huen ora errañaren añe patsro. Ñaña'pa' o' a'yapachan allemateñ ñeñt pomellets añe patsro.

¹⁷ Allempoña cha'nerrerr po'psheñeñ mellañoñeñ Yompor pa'pacloñ ñeñt ento'tsen. Ñapa'cho'ña orrenan po'cchell ñeñt atarr nanac etsotañ.

¹⁸ Allempoña'pa' cha'nerrerr po'psheñeñ mellañoñeñ. Ñapa' arroñ huapa allo'tsen altar. Ñaña'pa' ñeñt ahuamencattetsa attoch pomnaren penan tso'. Ñaña'pa' otan ñeñt occhellet. Po'ñoñña'pa' atarr huomenc e'morrtena, ñeñtpa' atet oten:

—Te'pa' o'ch pamat pöcchello ñeñt atarr nanac etsotañ o'ch pa'pcha' allo puechña'tets uva ñeñt añe patsro'tsen tarro'mar o' atarr nanac yena.

¹⁹ Ñeñtña mellañoñeñ atet oteñetpa' atetcho' pa. Allempoña amatan po'cchello uva ñeñt añe patsro'tsen o'cho' a'yapachach. A'yapachatuepa' o' shontanña uva allcha' atmama'chet attoch cha'nmatoñet po'ñer. Ñeñtña'pa' añ toma'ntena atto Yompor po'yorochenño'tpa' atarrcha' coñchaterran acheñenesha'.

²⁰ All atmama'teñet uva, pocollo'tpa' tama a'yente'tsen. Ñeñt atto cha'nen uva po'ñer ñeñtpa' añ toma'ntena o'ch chorerr errasats arr patsro a'yohuen ñeñt allohuanen trescientos kilómetros ñaña enonet chapcha' e'ñe cahuall po'frenohua ñeñt chets e'ñe yelleca'nohua.

15

Allempo Juanpa' enterranerr cancherrsheña mellañoñeñ, ñetpa' o'ch orrtaterret ñeñtcha' amuerochtatañterrtsa

1 Allempoña all ento napa' o' nenterrerr po'poñ ñeñt atarr yorochen ñeñt ama yentare ñeñtcha' yeñotaterre' ñeñtcha' atet perra esempo. Nenterrerr mellañoñeñnesha' cancherrsheña. Ñetñapa' allsensarettenet attoch orrtaterret ñeñtcha' amuerochtatañterrtsa. Puesheña'ttsetpa' orrtaterretcha' ñeñtcha' amuerochtatañterrtsa e'ñe po'poñe'ttsoema cancherrsheño'maret. Allempochña etsotuerra allohuen ñeñtcha' atto Yomporpa' yorochtater.

2 Allña napa' nenterrerr ñeñt atet orrtetsa erracmañen atet ñerra'mrrate' ñeñt añecmuen rerpat e'ñe atet huorten atet ñerra'm tso' huortets all. Allñapa' all tomchen allohuen acheñenesha' ñeñt e'ñe metana'tue' ora allpon ñeñt atet topatyenanet ma'yarrma't ñaña ñeñt pueyeçhcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomchenet e'ñe arpa'tochet ñeñt'pa' Yompor apuenahuet.

3 Ñetña puenñtana'tueñoñet allohuen topateñets morrechenet Moisés puemorreo ñeñt Moisés ñeñt atarr torratset Yomporecop. Pa'queshpatareteñoñet morrechenet ñaña Cristo puemorreo ñeñt toma'ntenaya Carrnero. Ñeñt'pa' atet açhoteñet Yompor:

Yompore, ñeñtep nanac Partsoþ þa ñeñteþ Yepartseshar yepen, atarr echarr es petsotatyen, atarr coçhneshare' es peþa'yen. Pa ñeñteþ Pa'mcha'tareter pen allohuen pa'namen acheñenesha' ñeñteþ e'ñe pocte' es peþa'yen. Ñaña e'ñe po'ñoçh atet ñeñt allpon es þotyen.

4 Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeñt ama añcha'na'tpahuoye' pentenaye, Yompore. Allohuen acheñenesha'pa' e'ñe þapta cohuentatennapet, tarro'mar e'ñe þapta þa ñeñteþ atarr Partsoþ. Tarro'mar allohuen acheñenesha' ñeñt pa'namen anetsot huaçha'tetcha' pesho attoch ma'yochapet þa e'ñe þapuet tarro'mar ñetpa' o' taya çapanet pueyoçhro atto þapa' e'ñe cohuen pocte' es peþa'yen.

5 Allempoña napa' cohuerrtsanerr nenterrñañerr Yompor pa'paquell ñeñt pue'ntaño'tsen. Ñeñtña pocoll popellrrarpa' e'ñe cohuen atoraret. O'ponoñapa' allo'tsen all añño'tenet mapuettall ñeñt allo aquellcaret Yompor po'ñoñ ñeñt atet anaret ama't ahuatoteñ.

6 O'ponotña Yompor pa'paclo'tpa' čha'nmačherrerr ñeñt cančherrsheña mellaño'teñnesha'. Puesheña'ttset orrtaterretcha' ñeñtcha' amuerochtatañterrtsa e'ñe po'poñe'ttsočma cančherrsheño'maret. Añ chorra'yenet ñeñt atarr nanac cohuen ñeñt otenet lino ñeñt ama asosyatño ama't e'ñe mamesha. E'ñe cohuen poptama'tyena. Achanaretareret, po'chanaretpa' orotommuenare' ñeñt allo chana'yenet puesomapo.

7 Allempoña añ ñeñt pa'tatso'mar berrma't, pa'terrña'pa' apa'yesan mellaño'teñnesha' cančherrsheño'mar pajo'. Apa'yesanet puesheña'ttset po'pajo' ñeñt orotaten. Ñeñtña pajo'pa' all e'chorrayesare't alloch coñchaterran Yompor pa'namen acheñenesha' ñeñt añe patsro'tsen, ñeñtara Yompor ñeñt ama arromña'teshayaye ama't errponaña ama't ahuata.

8 Allña Yompor pa'paclo e'ñe chorren amos. Ñeñtña amospa' añepa't ottetsa Yompor po'cohuenña ñaña po'partsoña. Allña'pa' ama't puesheñarrapa' ama muenateñeto o'ch be'toset all Yompor pa'paclo tarrempohuach esempoch orrtatan ñeñt cančherrsheña mellaño'teñnesha' muerochtets. Allempoña be'toscherret all Yompor pa'paclo.

16

Allempo Juanpa' enterranerr cančherrsheña mellaño'teñ ñeñt echene' po'pajotollesha' all na'yenet ñeñtcha' amuerochtatañterrtsa pa'namenot

1 Allempoña napa' alla ne'muerrerr ñoñets ñeñt e'morrtetsa huomenc Yompor pa'paclo. Ñeñtña ñoñetspa' atet otenan mellaño'teñnesha' ñeñt cančherrsheña, atet otenanet:

—Te'pa' o'ch sahuanna allcha' seyo'panat errařaren patso ñeñt sena'yen sepajotollesho ñeñt cančhro'mar attoch sortatoñ Yompor po'yoročhenña.

2 Allempoña puesheñarr ñanom mellaño'teñpa' o'čo' ahuo'. Allña'pa' yo'posan ñeñt po'pajotollo'tsen patso. Allempo čhap patsopa' ñeñtña'pa' orrtatan puetsarñats ñeñt ama amapočhatatañe ñeñt'pa' ama eñalle pa'par alloch partet attoch metuerranet. Ñeñt'pa' aña a'ptsarsat ñeñt ayato'ma'taretetyetsa ma'yarrma't pueyotsaparo ñaña ñeñt ma'yochenaya ayečcataret ñeñt toma'ntatenet ma'yarrma't.

3 Allempoña po'psheñeñ ñeñt puepañ mellaño'teñpa' o'čo' ahuererr o'ch yo'puenana' oño ñeñt po'pajotollo'tsen. Allempo yo'pos oño all atarr sa'po, oñña'pa' čha errassastach, e'ñe atet orrta ñerra'mrrate' arromña't po'rras. Ñeñtña'pa' e'ñe a'cllatuosan allohuen ñeñt allpon yečhetsa all oño'mar.

4 Allempoña ñeñt puema'pañ mellaño'teñpa' o' ahuererr ñaña o'ch yo'puenana' ontapo ñeñt po'pajotollo'tsen ñaña

allot potayen oñ. Ñeñña allempo ayo'paretta oño cha a'pnasatosan oñ errasats.

⁵ Allempoña napa' ne'muen ñeññ atet otenan mellañoñeñ Yompor. Ñehua, ñeñña mellañoñeñpa' atarr ahuamencat attoch pomnaren penan ora allohuen oñechno. Ñeñña mellañoñeñpa' atet otenan Yompor:

—E'ñe pocte' Nompore ñeññ atet pecoñchatyenonet, pa ñeññeḡ chocma eñalleḡ ama't ahuatoteñpa' ñeññeḡ atarr nanac Partsoḡ.

⁶ Tarro'mar acheñenesha' ñeññ pe'moñe'tene'pa' chocma muetsanatennapet ñeññ peyochresha' pepen ñaña ñeññ a'mta'yene' peñoñ, chocma shatyehñañet po'rras. Te'ña ḡapa' o' ḡonerranet errasats. Ñeñtpa' e'ñe pocte' tarro'mar ñetpa' añ o' ḡohuet ñeññ ama pocteye' penteno ḡa.

⁷ Allempoña e'morrterrerr ñoñets arr e'morrta altarot, ñeññapa' atet oten:

—Attesha' Yompore, ḡa ñeññeḡ atarr nanac Partsoḡ ñeññeḡ Yepartseshar yepen. Ñeññ atto pentyenanet ñeñtpa' e'ñe po'ñoḡ atet, e'ñe pocte' ñeññ atet o' pecoñchatteranet.

⁸ Allempoña po'psheñeñ mellañoñeñ ñeññ puepa'tatseñ o' yo'puerranerr ñeññ po'pajotollo'tsen. E'ñe arr yo'pue' allo'tsen ñeññ yeḡhoyo'tamḡpene'. Ñeññcha' ahuamencat pe'atsne' attoch chemuerran acheñenesha' atet ñerra'm tso'.

⁹ Acheñenesha' ama't atarr etomuenanetañña atsne'pa' tarraña ama es queḡhpuenayeña ñeññ atet correnet sosya'tsañechno. Ama eseshaye' cotape'cherraye cohuen Yomporecop attoch cohuentateññañet Yompor. Elloña ñetñapa' atarr nanac achmāre'teññañet Yompor pa'so'cheñ ama't ñeññ atarr ahuamencattetsa atto ḡapat Janet ñeññcha' mueroḡhtaterrahuet.

¹⁰ Allempoña po'psheñeñ mellañoñeñ ñeññ pa'mnareñ, ñapa'cho'ña o' yo'puerranerr ñeññ po'pajotollo'tsen. E'ñe arr yo'pue' ma'yarrma't po'conaño all añcha'tarettena. Ñeñña all añcha'tarettēnapa' cha a'cheḡmetue. Acheñenesha'ña allpa' epaye' mueroḡhtatanet pa'namen atserrpeñets. Ñeññ atserrpeñetspa' cha muellatstame'tatyesanet, aḡhañeñe'chatyesanet atserr.

¹¹ Tarraña ñetpa' ama't atet o' aḡparettetañpa' ama queḡhpuenetoña ñeññ atet ḡatse'tyenet sosya'tsañechno. Elloña ñetpa' allo'na achmāre'tneñet Yompor ñeññ ento'tsen ñeññ atto atserrpenanet puetsarñats.

¹² Allempoña ñeññ po'pechapueñ mellañoñeñ, ñapa'cho'ña o' yo'puerranerr ñeññ po'pajotollo'tsen. Arr yo'pue' po'ñeso ñeññ añecmuen atarres ñeññ po'ñes añ pa'so'cheñ Eufrates.

Yo'pose'pa' cha emasa'huosañña po'ñes ama't atarr añecmuen. Ñeñña allot masohuapa' ñeñña toñeterrets ñeñña pa'teṣ perret allcha' oñem añcha'taretečno ñeñña' huach'a'ttsa allot huena atsne'.

¹³ Allempoña napa' nenterrerr añyañ epuet ma'yarrma't epuet ñaña ñeññ a'ñtene' ma'yarrma't po'ñoñ añe patsro tarraña ñeñña' ashcaña. Ñetña e'ñe puenamotetpa' cha'nmatyeset puesheña'tets oneñet ñeññ ama mapocho. Ñeññ oneñetpa' ma'psheña. Ñetña' e'ñe atet orretyenet ñerra'mrrate' rrehuancrro.

¹⁴⁻¹⁶ Tarraña ñeñña' oneñetca'ye ñeñña' orrtaterre' ñeññ ama puentare allohuen acheñenesha' ñeñña' cohuanr-rortaterrahuet. Ñetpa' o'ch chopeñe'chyerret erracmañen attoch apcheret allohuen ñeññ añcha'taretetyetsa añe patsro. Allochña' attoch quellareret Yompor ñeññ atarr ahuamencat, attoch quellaret allempoch cherr ponañcho ñeñte yetroch yoroçhtater Yompor. Allohuen añcha'taretnesha' ñeñña' quellarerre' Yompor, arrcha' apchataretterret anets ñeññ pa'so'cheñ Armagedón, allotcha' quellareret Yompor. Añ Armagedónpa' ñeñña' hebreonesha' sochene' añ ñeññ anetser. Ñehua, o'ch neyerpatasa ñeññ atet ote't Yepartseshar Jesús, ñapa' atet ote't: "Señoche'pa'ch napa' e'ñech machayota nohuerra atet ñerra'mrrate' eñet amach esesha' eñotenaye esempoch huapa. Tarraña atarr cosheñtso'tsa'yen ñeññ chocma neñose'rttenaya ñeñto'marña ñetpa' e'ñe cohuen añño'tenet pa'shtam ñeñña' chorra'nmuert allochña' amach muelle'mcota cha'nmueto amach cha apencoçhterreto."

¹⁷ Allempoña po'psheñeñ mellañoñeñ ñeññ pocançhroñ, ñapa'cho'ña o' yo'puerranerr ñeññ po'pajotollo'tsen. E'ñe arr yo'pue' mörresho. Allempocma e'morrta ñoñets ñeññ huetsa Yompor po'conañoñ ñeññ pa'paclo'tsen all pue'ntañ. Ñeñña ñoñetspa' atarr huomenc e'morrtena, ñeñña' atet oten:

—Te'ña po'ñoçhpa' o' etsotuerra, huañerrcha' ñeññ ahuatoteñ.

¹⁸ Allempoña' meramerta o' tatsllares, e'morrta ñaña ñeññ ma'moretets, atarr huomenc e'morrtena. Puetalle'cha ñaña pats nanac huomenc ñeññ ama't ahuatapa' ama atet pueṣaro allempoteñ e'ñe pa'motroteñ eñalleta acheñenesha' arr patsro.

¹⁹ Añ ñeññ atarr anets ñeññ atma'ntataret anets Babiloniapa' ñeñña anetserpa' o' rrara'pes ma'psheñta. Ama't ora allpon pa'namen anetsoçhno añe patsro all shonta'yena pa'namen acheñenesha', ñetpa'cho'ña e'ñe ñegatañpesuahuet. Yomporpa' añcha' yerpaterranet ñeññ

allohuen allpon p̄atse'tyenet ñeñt̄ atarr sosya'tsañ all atarr anetso ñeñt̄ atma'ntatareṭ Babilonia. Ñeñt̄ allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoročhenño.

²⁰ Allempoña ama't ñeñt̄ rročhpe'chañečno ñaña aspenṭečno o' e'ñe chenca'huerra.

²¹ Shora'nom ñaña entoṭ hue' ñeñt̄ atarr añecmuesheñ ateshamerr. Pate'tetspa' eñerrtena cuarenta kilo. Ñeñt̄ña e'ñe a'tpetse'tuose' allohuen acheñenesha'. Allempoña ñetpa' atarr achm̄are'teñet Yompor tarro'mar o' coñchatterranet atarr huomenc.

17

Attoch a'coñchatarēterra coyanesha' ecañoreshaṭ ñeñt̄ toma'ntenaya anets Babilonia all ama esesha' yerpa'penayo Yompor

¹ Allempoña mellañoṭeñ ñeñt̄ cančherrsheña ñeñt̄ echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p̄octa'n o'ch negatenp̄a' allcha' a'coñchatareṭta añ coyanesha' ñeñt̄ atarr ecañoreshaṭ ñeñt̄ ame'ñatenaya pa'namen añcha'tareṭnesha' ñeñt̄ pa'namen anetso'tsa'yen e'ñe allohuanen čhen oñečno añe patsro. Ñapa' po'conañ penan oñečno all anen.

² Ñeñt̄ añcha'tareṭetyetsa añe patsropa' pame'ñeñoṭet ñetpa' e'ñe po'cañoreshacma peñet ñeñt̄ coyanesha'. Allohuen ñeñt̄ añe patsro'tsen acheñenesha' e'ñe a'posa'tuenanet tarro'mar ñeñt̄ atto cañoresha'tenanet ñeñt̄pa' čhochña a'posa'tenanet attoch e'ñe cohuen ame'ñeñet.

³ Allempoña ñeñt̄ mellañoṭeñpa' arr anmuen amarato, e'ñe Yompor puecamquēñoṭ anmuenet. Allñapa' nentos puesheñarr coyanesha' ñeñt̄ anets berrma't pa'che'ño. Ñeñt̄ berrma'tpa' atarr añcha'nočhen, atarr tsaṭnanen. Poñpa' cančherrm̄aga, po'ucorñapa' čharra'. Ora pue'mocro'marpa' e'ñe aquella'huareṭ allemeñ. Ñeñt̄ña quellecpa' allo sochatse'teñet Yompor.

⁴ Ñeñt̄ña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeñt̄pa' atet ñerra'm orollmemen ñeñt̄ atarr cohuen, ñaña mapyellmetollesha' ñeñt̄ nanac poptallme'chyetsa ñeñt̄ nanac tsa'te' ñaña po'ser ñeñt̄ atarr cohuen orrtatene' ña. Potoṭ orrenan po'pajo' orotaten. Ñeñt̄ pajo'pa' e'ñe e'chorrenan pa'namen sosya'tsañečno ñeñt̄ atarr yetsena'ten ñeñt̄ atto nanac cañoresha'ten.

⁵ Pueto'mpa' aquellcato'ma'taret. Añ so'chñets ñeñt quelquenet allpa' ñeñtpa' attoch eñotatanet ñeñt ama e'ñeye' eñotpahuo, ñeñtpa' atet oten: "Añpa' ñeñt toma'ntenaya anets Babilonia ñeñt nanac atarr anets ñeñtara pachor pen ñaña allohuen ñeñt atarr ecañoresha' ñaña pa'namen sosya'tsañechno ñeñt atarr yetsena'tyen arr patsro."

⁶ Allempoña ñeñt coyanesha'pa' neñoch atarr posa'ten. Ñaña'pa' añ posa'tena errasats ñeñt po'rras ñeñt muetsanatete't ñeñt pueyochresha' pen Parets tarro'mar ñapa' atarr cohuen entenan o'ch muetsachet ñeñt serrpare'tene' atto ame'ñeñet Jesús. Allempo neñch ñaña'pa' atta necuana'ch ñeñt coyanesha'.

⁷ Naña allempo mellañoñeña'pa' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeñt toma'ntena añ coyanesha' ñaña ñeñt toma'ntena añ berrma't ñeñt allo anen ñeñt cancherrmaga poñ, po'ucorñapa' charra'.

⁸ Añ berrma't ñeñt penten, ñeñtpa' añ toma'ntena ñeñt corratse't ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch cha'nerr arro-roto. Tarraña ñeñtpa' mamecpach atet perra, ellochña o'ch alla rromuerrerr. Allempochña o'ch chenca e'ñe poc-tacma. Acheñenesha' ñeñt ye'cha'yetsa añe patsro ñeñt ama ame'ñetso ñetñapa' atarrcha' cohuanrrorteret añ berrma't tarro'mar ama puentareto ñeñt atet pena añ berrma't. Ama't ñeñt corratse't arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñto'marña acheñenesha'pa' atarr cohuanrrortene't. Ñehua, ñeñt cohuanrrortene'pa' ama aquellcareteyaye pa'so'cheñ Yompor po'libro all aquellcarettena pa'so'chñechno ñeñt pueyochresha' pen Yompor; ñetñapa' corretsetach errponañohuen. Ñeñt ama ame'ñetso ama aquellcareteyayeto pa'so'cheñ ahuañtoñ allempoteñ e'ñe errte' aye'chcatarettsa pats.

⁹ Te' ñeñtcha' neñotata'ppa' o'ch poctape'ch e'ñe cohuen esheccha' peñot ñeñt atet toma'ntena añ berrma't poñechno. Ñeñt penten cancherrmaga poñ, ñeñtpa' añ toma'ntena cancherrpena aspenet all ye'chena añ coyanesha'.

¹⁰ Toma'ntenana ñaña cancherrsheña ñeñt añcha'tarettetsa añe patsro. Tarraña amnarsheña'pa' o'huañ añcha'taretta. Te'pa' o' puesheñarraña añcha'tarettetsa. Tarraña puesheñarrmeñ palltena ama orrtena'. Tarraña esempoch orrtapa' amach atarr atomat añcha'taretto.

¹¹ Ñaña añ berrma't ñeñt toma'ntenaya puesheñarr añcha'taret ñeñt corratse't ahuañmo'cha te'pa' o' rroma. Ama't o' rromañpa' tarraña ñeñtara o'ch alla orrterra

o'ch alla añcha'taretterrerr ñeñtcha' posocsheñterre' ñeñt cancherrsheña añcha'taret ñeñt o' colla'hua. Tarraña ñapa'cho'ña chocmach rromuerrerr allempoch chenca e'ñe poctacma. Ñehua, ñapa' ñeñtara ñeñt añcha'taretatset' ñaña ahuañmo'cha allempo cancherrsheñtete'.

12 'Ñaña añ berrma't ñeñt çharra' po'ucor ñeñt penten, ñeñtpa' añ toma'ntena çharrasheña añcha'taretnesha', tarraña ñetpa' ama añcha'taretteneta' tarro'mar ama orrteneta'. Tarraña esempoch orrterret allempochña añcha'tarettapreteret berrma't e'ñe mame'.

13 Ñetpa' e'ñech patrra cotape'chenet ñeñt atet cotape'chen berrma't, o'ch neñet berrma't ñeñtcha' pa'm'cha'tareter perret. Ñeñtpa' atto yenpueñet attoch ahuaменca't peñet berrma't.

14 Ñetñapa' pue'moñe'teño'tet Cristo ñeñt toma'ntenaya Carrnero quellareretcha'. Tarraña Cristo ñeñt toma'ntenaya Carrnero ñach a'mchechuerrahuet tarro'mar ñapa' atarr ahuaменca't. Ama't ora allpon ñeñt ayochreshatetyetsa, Cristoñapa' e'ñe Pa'yochreshater pohueñet allohuenet, ñaña ama't ora allpon ñeñt añcha'taretetyetsa, ñetpa'cho'ña e'ñe Pa'm'cha'tareter pohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt çhore'ten ña ñeñt atarr yemtenaya ña.

15 Allempoña añ mellaño'teñ alla oterrerr, ñeñtpa' atet oten:

—Ñaña añ oñeçhno ñeñt penten ñeñt allo anen coyanesha' ñeñt atarr ecañoresha't, ñeñtpa' añ toma'ntena shonte' pa'namen acheñenesha' ñaña pa'namen anetsoçhno all yeçha'yenet ñaña po'poñe'ttsocma ñoñets ñeñt allo eñosyenet.

16 Ñaña añ berrma't ñeñt penten çharra' po'ucor ñeñt toma'ntenaya çharrasheña añcha'taretnesha', ñetñapa' tsena'chetcha' ñeñt coyanesha', a'ypo'ñeretcha' e'ñe muelle'mco't. E'nuerrñañetcha' e'ñe ña po'çhets allempochña chamueret tso.

17 Yomporpa' ña nene' allohuen añcha'taretnesha' pueyoçhreto attoch ñetpa' e'ñech patrra cotape'chenet ñeñt atet cotape'chen berrma't, attoch yenpueñet esheccha' ahuaменca't peñet berrma't. Allochñapa' attoch etsotateññañet Yompor po'ñoñ ñeñt atet oten.

18 Ñaña añ coyanesha' ñeñt penten ñapa' añ toma'ntena ñeñt atarr nanac anets ñeñt pomnaren pene' allohuen ñeñt añcha'taretetyetsa allemeñ anetso'mar ñeñt añe patsro.

18

Atto allohuen eçllayoretenesha'pa' ya'na'teretcha' ñeñt

anetser Babilonia o' ahuañpore'tare'terra

1 Allempoña o' alla nenterrerr po'psheñeñ mellañoñeñ ñeñt sohua'netsa entoñ, ñeñtñapa' atarr ahuamencat. O' e'ñe chap patsopa' a'puetarsam̄psosan pats e'ñe ña po'popteñoñ.

2 Ñaña' rranosa huomenc, ñeñtpa' atet otos:

—Te'ñapa' o' a'ypo'ñare'terra añ anetser ñeñt atma'ntataret Babilonia ñeñt atarr añecmuen anets. Te'pa' añecpach sherberr allcha' shonterra pa'namen oneñe'te'chno ñeñt atarr apo'chenare' ñaña allcha' shonterra pa'namen o'te'chno ñeñt atarr yetsena'tyen.

3 Tarro'mar añ coyanesha' ñeñt toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt am̄cha'taretetyetsa añe patsro. Allohuen ñeñt añe patsro'tsen acheñenesha' e'ñe a'posa'tuanete't tarro'mar ñeñt atto cañoresha'tanete't ñeñtpa' choch a'posa'tanete't. Ñaña allohuen ñeñt allpon pomatsre'tyestse't, ñaña atarr e'çllayorettatahuete't tarro'mar ñapa' shonte' esocmañen muenatse'tyese't.

4 Allempoña o' alla ne'muerrerr po'poñ ñoñets ñeñt e'morrtetsa entoñ, ñeñtpa' atet oten:

—Ñeñtes neyochresha' nepen, te'pa' o'ch sesa'nem̄ añ anets ñeñt atma'ntataret coyanesha'. Amach socshapretatsche ña po'chñar te't sa'na muero'chtapretenaya.

5 Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeñt allpon pa'yese't.

6 Te'pa' atsa'tataretterrepa'ch allpon ñeñt atto erro't pa'yesane't po'potantañ. Ñehua, ama't epoche'tats atsa'tataretterrepa'ch allpon ñeñt atto es patse'tyese't. Ñeñt atto allpon llecatyesane't po'potantañ, ñapa' epoche'tatsepa'ch atsa'tataretterra llequëñtso.

7 Ñeñt allpon coshatse'tyese't, te'ñapa' ñeñtapa'chña allpon llecaterrayerr. Ñeñt allpon echyese't, te'ñapa' ñeñtapa'chña allpon muero'chtaterre'. Tarro'mar ña ahuañmo'chpa' pommo'cheñoñ atet ote't pueyo'chro: “Napa' atto nanen na neconaño'pa' atarr na'm̄cha'tare'tena. Napa' ama añeyayno ñeñt rre'torrnanesha'. Na ama't ahua'tapa' amach nellquërro tarro'mar amach es nemuero'chtaterraye.”

8 Tarraña ama't atet ommo'chenañpa' mamerrerrpa' o'ch chapoña ñeñtcha' muero'chtaterre' pa'namen muero'chteñets — rromueñets, llequëñets ñaña mue'cheñets. Ñapa' a'poyataturetcha' tso. Tarro'mar Yompor ñeñt Yepartseshar yepen ñapa' ñeñt atarr Parets ñachña coñchaterre'.

9 Ñeñt añcha'taretečno ora errañaren añe patsro, ñetña e'ñe puellquëñoŕetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'taretnesha' ñeñt e'ñe po'cañoreshacma pe't ahuañmo'cha ñeñt parrocmá epuet atarr coshete't.

10 Ñetpa' pueyorñofetpa' cohuanrrorteretcha' a'yot tarro'mar atarrcha' yorenent ñeñt atto o' a'coñchatare'tterra. Ñet puellquëñoŕetpa' atetcha' otet:

—Atarr llequëñets-bee, ama't ñeñt atarr añecmuen anetser ñeñt atarr ahuañmenca't, machayo'ta o' çherrñaña ñeñtcha' coñchaterre'.

11 Ñaña allpon ñeñt pomatsre'tyetsa errañaren añe patsro, ñetpa'cho'ña e'ñe puellquëñoŕet ya'na'teñet, tarro'mar te'pa' ama eñalle ñeñtcha' rañta'yeshahuet ñeñt pomyenet.

12 Tarro'mar ñet ñeñt po'checom penetpa' shonte' esocmañen pa'namen — oro, ñaña asrečno ñaña mapyetollesha' ñeñt poptame'te' nanac tsa'te', ñaña serets ñeñt otenet perla, ñaña shetamtsočno ñeñt atarr coçhnesharer — yetsñorromamuenare', tsamamuenarer, sedamamuen. Shonte' ñaña pa'namen tsachečno ñeñt atarr eñmosatečno, ñaña marfil ñeñt elefantas ñeñt allo't yeçhcatyenet pa'namen, ñaña pa'namen ñeñt yeçhcatyenet tsachot ñeñt atarr nanac tsa'te', ñaña ñeñt yeçhcatyenet bronso't ñaña hierro't ñaña mapyo't ñeñt otenet mármol.

13 Ñaña ñeñt pa'namen po'checom penet atet ñerra'm ñeñt otenet canela ñaña pa'namen aspanatollesha' ñeñt eñmosañare' ñaña tsachese' ñeñt pa'cho'ña eñmosañare' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Allo'tpa' po'poñečno checmañatsočno ñeñt pa' añ vinos, olivose', harina ñeñt atarr cohuen ñaña trigo. Ñaña po'poñečno ñeñt pomyenet ñeñt pa' añ huacshečno, carneročno, cahuallečno ñaña carrotollesha' ñeñt matatyen cahuallečno. Ñaña allpa' ama't acheñ pomueñet ñeñtcha' taruasatenet e'ñe atta. Ñeñt acheñerpa' allña pomueññañet pocreña ñeñt atto correna arr patsro.

14 Ñeñt pomatsre'tyetsa allpa' ñetñapa' serrpare'tenet, çha ottenet ñerra'mrrate' çho es oteñet ñeñt anetser, ñeñt pa' atet oteñet:

—Ñeñt allpon atarr pa'yoma'yese't atet ñerra'm puetsarr ñeñt atarr ayoma'po' te'ñapa' ama eñalle o' huañerr. Ñaña ñeñt allpon nanac cohuen pentyese't ñeñt nanac coçhnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeñt atet oteñet ñeñt anetser.

15 Ñeñt̄ allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñotet attach tomcha'tet a'yoť allotcha' cohuerret ñeñt̄ atet o' a'coñchatareťterra. Ñetñapa' epaye' ya'na'teñet e'ñe puellquẽñoťetpa'

16 atet otenet:

—Llequẽntsa-bee añ atarr anets tarro'mar ñapa' o' atet perrate' ñeñt̄ atarr añecmuen anetser ñeñt̄ atet ñerra'mrrate' puesheñarr coyanesha' ñeñt̄ nanac cohuen añño'tetsa. Añcha' chorrena ñeñt̄ atarr coçhnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshmať ñeñt̄ atarr coçhnesha' poptallme'chyetsa ñaña nenan coçhnesha' seretsoçhno.

17 Te'ñapa' e'ñe mamecmapa' o' e'ñe huañerr ñeñt̄ atto atarr nanac esocmañen echyeseť. Arrpa' allohua ñeñt̄ atet ot ñeñt̄ pomatsre'tetsa all.

Allempoña allohuen ñeñt̄ po'taruas pene' bote ñeñt̄ anmatsetene' checmañats all ñeñt̄ anetsro, ñetpa'cho'ña o' alla tomcha'tet a'yoť — atet ñerra'm ñeñt̄ pamo'mte' pen bote ñaña ñeñt̄ achopeñaťnesha' ñaña marineronesha' ñeñt̄ taruaset all boto.

18 Ñetpa'cho'ña allohuenet all tomchenetpa' rrannartenet allempo enterrñañet pamosoñ ñeñt̄ atto poyen ñeñt̄ anetser. E'ñe puellquẽñoťetpa' atet otenet:

—Ama eñalle po'poñ anetser ñeñt̄ atarr cohuen atet ñerra'm añ anetser.

19 Allñapa' atarr yahuanrrortenet. Puellquẽñoťetpa' pampato'tyeset patso. Rrannaretyesetpa' atet otyeset:

—Llequẽntsa-bee añ atarr anetser tarro'mar allohueney ñeñtey echyene' yebote ñeñt̄ chocma yanene' oñopa' shonte' quelle ganatyeť tarro'mar ñeñt̄ anetserpa' shonte' echaneť quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt̄ pueyochresha' pen Parets

20 Te'ña sapa' socshepa'ch ñeñtes pue'ntaño'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'ñtene' Yompor po'ñoñ tarro'mar ñeñt̄ atto Yompor o' coñchatteran ñeñt̄ anetser, ñeñt̄pa' attoña o' chemnaterrsa sa.

21 Allempoña mellañoťeñ ñeñt̄ atarr ahuamencatpa' ñañaapa' chetan mapue' ñeñt̄ atarr añecmuenmen atet ñerra'mrrate' ñeñt̄ allocma es puetse'tenet ñeñt̄ñapa' huapore'ch sa'po cha chencostsa poctacma. Allempoña ñeñt̄ mellañoťeñpa' atet ot:

—Attecmach ahuapore'tare'terra añ atarr anetser ñeñtara ñeñt atma'ntatare't Babilonia. Amach orrterre'te ama't ahuata.

²² Te'ña allpa' amach es e'morrterrtse'te ñeñt atto toquënet arpa ñaña atto penclla'tenet ñaña ñeñt atto poc-torare'tyenet po'pocctoro. Ñaña ñeñt po'taruas paye't ñeñt es ye'chcatyesaye't pa'namen esocmañen all, te'ña ama't ahuata amach orrterre'te. Ñaña atto e'morrte't allempo es puetse'tete't allpa' te'ñapa' amach alla e'morrterre'te. E'ñe muetsoñeñtuerra.

²³ Ñaña ñeñt allo 'choyo'tam'psete't, te'ñapa' amach alla 'choyo'tam'perranete'te. Ñaña ñeñt coshame'tam'psaye't ñeñt sena'tetsa ñaña coyanesha', te'ñapa' amach alla e'morrterre'te pocshañña. Ñaña allpon ñeñt pomatsre'tyesatse't all ñeñt atarr anetsro, ñetpa' atarr asherben entete't. Ora erraparen añe patsropa' ama eñalle ñeñt atet sherbets. Ama't atarr asherben entyesetañe't tarraña 'chocma shecare'tyesete't allohuen pa'namen acheñenesha' ora erraparen añ patsro. E'ñe atet es ame'ñatena amase'ñe'pa' e'ñe attecma shecare'tenanet ñeñt anetser.

²⁴ Ñaña all anetsro, ñeñtpa' all amtsanatarette't ñeñt a'mtaye't Yompor po'ñoñ ñaña allohuen ñeñt pueyochresha' pen Parets. Allña ashatarettete't po'r ras ñaña ama't allohuen ñeñt amtsanatarettatse't ora erraparen añe patsro, ñeñtara anetsrot allotña amtsanatarettete't.

19

¹ Allempoña o' alla ne'muerrerr ñeñt e'morrretsa huomenc-ento, shonte' acheñenesha' e'ñe parrocmá rrannartenet, ñeñtñapa' atet otenet:

¡Aleluya! Aye'cho'chtatpo'ch Yompor tarro'mar ñapa' ña ñapue't a'quesh'patañtetsa, acohuentatpo'ch Yompor ñeñt ñapue't atarr ahuamencatesha'.

² Ñaña ñeñt pocte' enten Yompor ñeñtpa' e'ñe pocte' attecma, ñaña allpon ñeñt atet oten ña, ñeñtpa' e'ñe po'ño'ch attecma. Tarro'mar ñapa' o' coñchaterran coyane-sha' ñeñt atarr ecañoreshañtetsa tarro'mar e'ñe ña po'chñarotpa' atarr a'sosyatenan acheñenesha' ora al-lohuen ñeñt ye'cha'yetsa añe patsro. Te'ña Yomporpa' o' e'ñe tsa'tatuera ñeñt allpon muetsanatoñe't ñeñt torra'yestse't ñocop.

³ Po'pocheñoñapa' alla oterreterr:

—¡Aleluya! Aye'cho'chtatpo'ch Yompor tarro'mar te'pa' Yompor o' amosoñe'chatteran ñeñt atpare'taye't. Attoña o'

chepoterr pamosoñ enonet; ñeñtpa' ama't ahuatapa' amach huañerro.

⁴ Allempoña añ epoch çharra' ñeñt puechetsa pa'tatssheña ñeñt sherbene' Yompor po'conaño, ñetñapa' concorpa'rrtenet epuet ñaña pa'tats ñeñt berrma'ttetsa. Allohuenet concorpa'rrtenet all Yomporesho. Allohuenetpa' ma'yocheñet Yompor all anen po'conaño. Ñetñapa' atet oteñet:

—Aye'choçhtatpauepa'ch Yompore, atetepa'ch p̄ocop erponohuañen.

⁵ Allempoña all Yompor po'conaño'pa' allotña e'morrterrerr po'poñ ñoñets, ñeñtpa' atet oten:

Sa'ye'choçhtatoñepa'ch Yompor, allohuenes ñeñtes torra'yetsa ñocop, ama't sa ñeñtes atarr sherbets ama't samã ñeñtes ama tama sherbetso. Ama't allohuenes erra'tseneste' ñeñtes atarr am̄cha'na'tpo' entene' Yomporpa' te'ñapa' sa'ye'choçhtatoñepa'chña.

Atto Cristopa' e'ñe cohuen aguërran allohuen ñeñt ame'ñenaya ña ñeñt atma'ntataret atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteññapa' çha ottena ñerra'mrrate' çho tecorrraren. Acheñenesha'ña ñeñt rrannartetsapa' ñetñapa' atet otenet:

Aye'choçhtatpo'ch Yompor tarro'mar te'pa' o' çhap allempoch am̄cha'taretterra ña e'ñe ñapueñ ñeñtara Yepartse-shar ñeñt atarr ahuaменcatesha'.

⁷ Te'ñapa' yocsherrepa'ch, yocshame'tam̄perepa'ch, yeco-huentaterrñañepa'ch tarro'mar te'pa' o' çhap allempoch yocshame'tam̄pesya Cristo ñeñt atma'ntataret Carrnero. Te'ñapa' o' çhap allempoch sena'ta. Ñaña ñeñt coyanesha' ñeñtcha' puetapor p̄a', ñaña'pa' o' e'ñe añño'taretta.

⁸ Ñaña'pa' o' apet ñaña ñeñtcha' chorra ñeñt atarr cohuen huallama't atarr coçhnesha' shetamuets ñeñt otenet lino ñeñt ama asosyatño ama't e'ñe mamesha, atterach poptame'tena.

Ñehua, añ shetamuets ñeñt otenet lino ñeñt ama a'sosyatpahuoyaye ama't e'ñe mamesha, ñeñtpa' añ toma'ntena ñeñt atto e'ñe cohuenare' es p̄a'yen ñeñt pueyochresha' pen Parets. Ñetñapa' añ toma'ntenet Cristo puetapor penahuet.

⁹ Allempoña mellaño'teñpa' alla oterrerr:

—Te'pa' o'ch pequellquërrerr añ ñoñets ñeñt noteneḡ, ñeñtpa' atet ot: “Atarr cosheñtso'tsen allohuen ñeñt ahua'ñareñtetsa o'ch rrallme'chaprechet allcha' coshame'tampeñet Cristo ñeñt atma'ntataret Carrnero ñeñt sena'tatsa.”

Mellañoñeñapa' alla oterrerr:

—Ora allpon ñeñt atet oteney Yompor arrpa' ñeñtpa' e'ñe po'ñoñ atet.

¹⁰ Nañapa' neconcorposa mellañoñeñ pa'rrpo ñeñt neserpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñten petorrapretenaya Yomporecop ñaña allohuen pemo'nasheñneshachno ñeñt serrpare'tene' atto ame'ñeñet Jesús. Papa' añcha'ña pema'yocha Yompor ñapuēt.

Tarro'mar allohuen ñeñt a'mtene' Yompor po'ñoñ, e'ñe ña Puecamquëñoḡpa' añ serrpare'tenet ñeñt atto yame'ñeña Jesús.

Cristo ñeñt montenaya cahuall ñeñt atarr huallaḡnanen

¹¹ Allempoña po'pocheñopa' alla nenterrerr atorareñ enet. Allñapa' allo'tsen cahuall ñeñt atarr huallaḡnanen. Ñeñt montenaya cahualpa' añ socheñet, Ñeñt atarr Ayemuetpotetsa ñaña ñeñt e'ñe Po'ñoñ Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñtña ñocoppa' e'ñe pocte'. Ñaña ñerra'm ña quellaratahuet ñeñtpa'cho'ña e'ñe pocte' ñocop.

¹² Pa'clloyotñapa' atarr nanac a'rrechatañ atet ñerra'mrrate'tso' po'huorter. Poñoñapa' shonte' po'choyo'm ñeñt choyo'mtena. Allñapa' anareñ ñaña pa'so'cheñ ñeñtpa' e'ñe ñapfa eñoteñ.

¹³ Pa'shtampa' año e'chomareñ errasatso. Ñaña añ socheñet Yompor Po'ñoñ.

¹⁴ Ñaña ñeñt allpon pa'çllarañneshar pen all pue'ntaño, ñetñapa' coteñet chenta' monta'yesnenet ñamet puecahualoro ñeñt atarr huallaḡnarren. Ñetpa'cho'ña ñeñt pa'shtam penet atarr huallama'tarer. Ñeñt shetamuetspa' atarr cohuen ñeñt otenet lino ñeñt ama sosyatetso ama't mamesha.

¹⁵ Ñeñt anenahuet, e'ñe puenamoñ all orrtena cochell ñeñt atarr etsotañtareñ. Ñeñt cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yoroçhenñoḡpa' o'ch añcha'tareñterranet atet ñerra'mrrate' ñapa' a'sreperet o'ch añcha'noçhtana'terranet. Ñaña ñach coñchaterrahuet. O'ch netma'ntacha atet ñerra'mrrate' ñach aḡmama'te' uva esheccha' cha'nom po'ñer.

Ñeñt atet atmama'teñet uvapa' añ toma'ntena atto Yompor ñeñt atarr ahuamencat e'ñe ña po'yorochenño'tpa' atarrcha' coñchaterran acheñenesha' ñeñt atpare'tetsa.

16 Ñaña pa'shtamo e'ñe pa'tapacoptaro allñapa' all aquell-careñ ñoñets ñeñtcha' atet enteñet Cristo, ñeñtpa' atet oten ñoñets: "Allohuen ñeñt amcha'taretečno añmapa' ñeñtña e'ñe Pa'mcha'tareter pohueñet allohuenet. Ñaña allohuen ñeñt ayochreshatečno añmapa' ñeñtña e'ñe Pa'yochreshater pohuenet allohuenet."

17 Allempoña napa' o' alla nenterrerr mellaño'teñ ñeñt tets all ñeñt yeçhoyo'tamipene'. Ñaña' atarr huomenc eñen, çhore'tenan allohuen tse'mačno ñeñt anomcha'tyetsa eno. Ñeñtña' atet otenanet:

—Sehuaçha'ta allohuenes o'ch sapçha arr o'ch serren po'çhets ñeñt atarr aton rratenes Yompor.

18 Attoch serroñ po'chtsoçhno shonte' acheñenesha' ñeñt amcha'tareteyetsa, ñaña shonte' ñeñt capitanatyets, ñaña shonte' ñeñt atarr ahuamencat entyenet. Serroñ ñaña shonte' cahuallečno po'çhets ñaña añ po'çhets ñeñt montenaya. Ama't shonte' pa'namen acheñenesha' o'ch serroñ po'çhets ama't ñeñt acheñer ñeñt atarr sherbets ñaña ama't ñeñt ama sherbetso, ama't ñeñt e'ñe cohueno'tsen acheñ, ama't ñaña ñeñt ataruasatareñ e'ñe atfa — o'ch e'ñe serruanet po'çhets allohuenet.

19 Allempoña napa' o' alla nenterrerr ma'yarrma't epuet ñaña allohuen amcha'taretečno ora errañaren ñeñt añe patsro'tsen epuet ñaña allohuen ñeñt pa'çllarañneshar pen. Ñetpa' añecop apçhenet allochñapa' o'ch quellareñet ñeñt montenaya puecahuallor ñeñt atarr huallañnanen ñaña epuet ora allpon ñeñt pa'çllarañneshar pen ña.

20 Allempoña quellaranna'tet ma'yarrma'tñapa' çha rremuet epuet ñaña ñeñt a'mtene' e'ñe ña po'ñoñ tarraña ñeñtpa' ashcaña. Añ ñeñt ashcañerpa' e'ñe ma'yarrma't po'huamenco't gatenan acheñenesha' ñeñt ama puentareto. Ñeñtpa' alloña shequënan acheñenesha' attoch ame'ñeñet. Ñeñtña acheñenesha'pa' o' e'ñe yato'matuanet ma'yarrma't pueyotsaparo. Ñetñapa' añ ma'yochenet ayeçhcatareñ ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'mtene' po'ñoñ allempoñapa' ahupore'tarettet epsheño'maret e'ñe befareret all parraren tso' errañaren. Ñeñt tso'pa' atarr shemasher huorten.

21 Po'potantañeçhnoña ñeñt epuet quellarañ ma'yarrma't ñetpa'çho'ña o' e'ñe amtsanatareñtuet. Año amtsanatareñt

cochillo ñeñt puenamo'tsen ñeñt montenaya puecahuallor ñeñt atarr huallaþnanen. Allempoña ñeñt allohuen tse'machno epaye' ochare'ch po'chets allempo rret añ po'chets ñeñt o' e'ñe amtsanataretetua.

20

Attoch çherr allempoch mellapoterra

1 Allempoña o' alla nenterrerr po'psheñeñ mellañoñeñ ñeñt sohua'netsa entot. Ñaña pototpa' añ orren llave alloch toramþsan arrorot ñeñt atarr o'pononet arrorotena pats. Pototñapa' orrenan ñaña cadena ñeñt atarr añecmuen cadena.

2 Ñeñtña mellañoñeña' rremosan añaña. Añaña' ñeñtara shecheþ ñeñt ahuatoteñ ñeñtara yoten oneñeñ ñaña ñeñt otenet Satanás. Atto rremue'pa' allempoñapa' huanque'. Ñeñt atto ehuncarettapa' e'ñech errponañohuen char ñeñt otenet mil char, atterach ehuncarettena.

3 Allempo huanca'huepa' o' huapore'ch o'pono arroroto. Allña yottamþes o' noñ alloch e'ñe echarr þamþes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch çhap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñtapa' mamecpach a'rroyeretterra.

4 Allempoña o' alla nenterrerr ñeñt anorrçha'tyets po'conaño'mar. Ñetñapa' allsensarettet attoch ñetpa' o'ch añcha'taretetyenet. Ñaña napa' o' e'ñe nentuerrñañ puecamqueñeçhno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompör po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetpa' ama ma'yochyete'te ma'yarrma't ama't ayeçhcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetña allpa' corretseta all añcha'tarettapreteñet Cristo shonte' char allpon ñeñt otenet mil char.

5 Ñetñapa' ñanmuetcha' atantataretterret. Tarraña po'potantañeçhno arromñañnesha' ñetña allpa' ama allo'tseneto tarro'mar ñetpa' ama atantataretteyayeto tarrempohuach allempoch çherr mil char.

6 Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantataretterret. Tarro'mar ñetpa' amach alla rromuerrete'te po'pocheño

ñeñtcha' atet rromuerr po'potantañ ñeñtcha' chenquërrtsa e'ñe pöctacma. Tarro'mar ñeñtcha' tanterrtsa ñanompa' ñetpa' amach errotenot o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, añcha'tarettapreteretcha' nanac aton shonte' char ñeñt mil char.

Atto Juanpa' entan oneñet o' ahupore'taretta all parraren tso' errañaren

7 Allempoch metua añ mil charpa' allempochña a'rroyeret oneñet all ayottañpsarettena mil charohua.

8 Ñaña'pa' o'ch auyes ora errañaren pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaraterranet. Ñeñt atet yenteññañ ontap po'mñer atetcha' shonterran ñaña pa'namen acheñenesha' arr patsro, ñeñt ama e'ñotuapahuoyaye.

9 Atet nentanet ñetpa' ahuanmuet mopñarero'mar o'ch parratse'tet errañaren allcha' orretyeset. Ñetpa' arrentach ahuanenet Yompor pa'netronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotañpesuoyet attoch rremanatoñet Yompor pueyochresha'. Tarraña Yompor pue'ntañotpa' e'ñe allempocma a'shoranet tso' attoch e'ñe a'poyatatuanet.

10 Allempoña oneñet ñeñt shecare'tenahuetpa' o' huapore'teret ñaña all parraren tso' errañaren ñeñt huortets shemasher. Allo'tsa'yen ñaña ma'yarrma't epuet ñaña ñeñt a'mtene' po'ñoñ. Allña'pa' allempoteñ a'coñchataretetuerret e'ñe parrocmá, yetome'tets, tsapome'tets ama't ahuaña ñeñt'pa' amach ahuañañañterro ama't errponaña.

Ñeñt atto allohuen arromñañnesha'pa' tomçherretcha' Yompor po'conañño allña'pa' allcha' entyesaretterret errotenet' ñeñt atet pa'yese't e'ñe puesheña'ttset

11 Allempoña o' nenterrerr atarr añecmuen conañ ñeñt atarr huallama't ñaña ñeñt anets all. Ñaña e'ñe po'partsoteñoñ a'chencatuan añ pats ñaña enet, o' e'ñe chenca'huerra poc-tacma. Ñocpuet ama eñalle allcha' a'puet ama't e'ñe coñe'ta.

12-13 Nent ñaña allohuen arromñañnesha' all tomçhenet Yompor po'conañño. Ama't allohuen arromñañnesha' allo'tsa'yenet ama't ñeñt atarr sherba'yestse't ama't ñaña ñeñt ama asherboyenaye' entete'te. Ama't allpon omarrñaieçhno ñeñt omarrcha'tyestse't ahua'tpa' ñetña

ama't oñto'pa' o' alla tantrra'tuerret. Ama't allohuen arromñañesha' ama't o' chapuet all o'patenamet rromueñets, alloña o' alla tantrra'tuerret allohuenet. Ñeñto'mar ñet te'pa' e'ñe Yompor po'conaño tomcha'tuenet allohuenet. Allempoña allpa' tore'tet shonte' libro, ñeñña librorpa' all aquellca'huare't ñeñcha' yerpaterrahuet ñeñ allpon atet patse'tyesete't e'ñe puesheña'ttset. Allempoña Yomporpa' all entan ñeñt libro all aquellcare't ñeñt ama cohuenaye' es petso. Ñeñto'marña ñapa' attoña otteñe'cherranet o'ch mueñanet coñcheñtso. Alloña'pa' tore'tet po'poñ libro ñeñt libropa' all aquellcare't añ pa'so'chñechno attochña ñetpa' corretsetach.

¹⁴⁻¹⁵ Allohuen ñeñt ama enteññañeto pa'so'cheñ libro all aquellcare't añ pa'so'chñechno ñeñt corretsetach, ñetña'pa' asarrrotare'ttet o'pono all parraren tso' errañaren. Ñeñtpa' attochña rromuerreterr po'pocheño ñeñt puepocheñ rromueñets ñeñt e'ñe poctacma chenquëñets. Ñaña añ rromueñets ñeñt o'patenaya arromñañechno ñeñtara pa'netser pen rromueñets, ñeñtpa'cho'ña ahupore'taretta o'pono all parraren tso' errañaren.

21

Atto Juanpa' entan po'poñ enet ñeñt e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñt e'ñe etserra, patspa'cho'ña o' etserraterr. Tarro'mar ñeñt atet yenten enet te' ñaña pats, ñeñtpa' o' e'ñe chenca'huerra o' huañerr. Ñeñt etserra patspa' allña ama't sa'p ñeñt yenten añecmuen ama eñalle.

² Nenterrerr ñaña Parets pa'netser ñeñtara Jerusalén ñeñt o' etserraterr. Ñeñtña'pa' ento't a'suataretterra e'ñe Yomporshot. Ñeñtña'pa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch añño'tena e'ñe cochneshot attochña puerrollarpa' atarrcha' cohuen enteñ.

³ Allempoña napa' o' alla ne'muerrerr all e'morrtena ñoñets ñeñt huetsa ento't e'ñe Yompor po'conaño't. Ñeñtña'pa' atet oten:

—Te'pa' señoche'pa'ch, o' cherr allempoch ye'cherra Parets e'ñe parro epuet acheñenesha'. Ñeñtcha' e'ñe parro ye'cherra ñetpa' e'ñe pueyochreshoche' penanet Yompor. Ña ama't atarr Parets'pa' ye'cherrach epuet acheñenesha' ñeñt e'ñe Po'yomporer penet.

4 Te'ña Yomporpa' o' a'huañañperrnay yellquëña, te'ña ama't ahuatapa' amach alla yeyahuerre'te. Te' ama't ahuatapa' amach yerromuerre'te amach yellquërre'te. Te' ama't ahuatapa' amach eñallettere'te yahueñets ama't ñaña atserrpeñets amach eñalle. Tarro'mar añechno ñeñt allpon yellcatyesaye't te'ñapa' o' e'ñe huañerr.

5 Allempoña Yompor ñeñt anets po'conañopa' alla eñorana'terrnerr, ñeñtpa' atet oten:

—Te'ñapa' o'ch señoçh, napa' o' netserrataterr ñeñt allohuen esocmañen eñall.

Allempoñapa' alla oterrerr:

—Te' pöcoppa' añ pocte' o'ch alla pequellquërrerr ora allohuen añechno tarro'mar añ ñoñets ñeñtcha' atarr seyemtena ñeñtpa' e'ñe po'ñoçh atet.

6 Allempoña ñapa' alla oterrerr:

—Te'ña po'ñoçhpa' o' e'ñe etsotuerra, o' huañerr ñeñt sentyese't ahuatoteñ. Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' çhocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto. Te'pa' allohuen ñeñt ama e'ñeye' coshetso pueyoçhro ñeñt çhocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheñeto çha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tetspa' napuerrescha' oñ ñeñt ama ahuañañaate ñeñt çhocma potets all. Ñeñtña oñ alloña sapa' corretsasach. Tarraña ñeñtñapa' ama't coñe'tapa' amach setsa'tero. E'ñe atta napuenes.

7 Allohuen ñeñt metana'tue' pa'namen topateñtsoçhnopa' ñetñapa' no'pataterranet ora añechno a'nateñets. Attoçhña ñetpa' e'ñech Po'yomporer pennet, nañapa' e'ñech nechemeresha' nepohuenanet allohuenet.

8 Tarraña allohuen ñeñt ama name'ñenayo ñeñt echartetsa pueyoçhro, ñetñapa' aña o'patenahuet all parraren tso' errañaren, ñaña allohuen ñeñt etsotene' sosya'tsañechno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'çho'ña allohuenetpa' aña o'patenahuet all parraren tso' errañaren. Ñaña ñeñt amase'ñeteçhno ñaña ñeñt po'yomporer pa'yene' ayeçhcatareteçhno ñaña allohuen ashcarñaeteçhno, ñetpa'çho'ña aña o'patenahuet all parraren tso' errañaren ñeñt huortets shemasher. Ñeñtpa' allcha' puepocheño rromuerret.

Atto Juanpa' entan Yompor pa'netser ñeñt so'hua'netsa entot ñeñtara ñeñt sochetsa Jerusalén

9 Allempoña ñeñt cancherrsheña mellañoñeñnesha' ñeñt echyesaye't po'pajotollesha' all e'chorrayesarette't ñeñt allot e'ñe orrtatuerret allohuanen muerochteñets, puesheñarrña mellañoñepa' o' huapapa' otosen:

—Apon o'ch pōcta'n o'ch negatenpa' ñeñtcha' puetapor perr Cristo ñeñt atma'ntataret Carrnero.

10 Allempoña napa' o' alla chorraternerr Yompor Puecamquēñ ñeñtña nanmue' a'yo allo'tsen ñeñt atarr añecmuen aspenet. Allostña napa' nentapoñ Parets pa'netser ñeñt sohua'netsa entot e'ñe Yomporeshot ñeñtara ñeñt Jerusalén.

11 Ñeñtña anetserpa' cha popuetnena atarr cochnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentaret. Ñeñtpa' e'ñe ora orrtatuenan allohuen ñeñt allo'tsa'yen e'ñe all.

12 Ñeñt anetserpa' e'ñe aconcha'tam̄psaret a'yohuen. Ñeñt allo aconcha'tam̄psaretpa' atarr añecmuen enonet. Ñaña allo'tsen charra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoñeñ ñeñt cohuañpene' yetarr. Pate'tets yetarropa' all aquellca'yesaret añ pa'so'chñechno Israel po'ñreneñ ñeñt charrasheña puechena epa.

13 Ñeñt conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenotenita'npa'cho'ña allo'tsen ma'pa yetarr. Topotenita'npa'cho'ña allo'tsen ma'pa yetarr.

14 Ñeñt conchtar allo echarr aparettena pa'rrpōpa' e'ñe allohuenpa' allo'tsen charra' puechena epa mapue' ñeñt allo echarrtateñet. Ñaña pate'tets mapue' allo echartateñet conchetpa' all aquellca'yesaret añ pa'so'chñechno ñeñt charrasheña puechena epa ñeñtpa' ñeñt puellsensarnea' Cristo ñeñt atma'ntataret Carrnero.

15 Mellañoñeñ ñeñt neserrpare'tatene' ñaña'pa' echenan tepapets ñeñt oropepen allo tepuenan Parets pa'netser ñaña allo aconcha'tam̄psaret ñaña pueyottarohuen.

16 Mellañoñeñ atto tepuenan Yompor pa'netser e'ñe allponeshacma tepa'hue allenñateñ — onnatonet ñaña pa'llpocha'peronet ñaña enonet e'ñe allponeshacma cha'nmach — dos mil doscientos kilómetro allenñateñ.

17 Allempoña tepan ñaña conchet po'bateña ñeñtña' allo'tsen sesenta cuatro metro. Ñehua, mellañoñe e'ñe atet es tepa'yen atet es yetpa'yen yamía ñeñtey arromña'ey.

18 Ñaña añ conchetpa' añ aye'chcataret mapue' ñeñt atarr cohuen aspanamemeno poptame'tyena ñeñt otenet jaspe. Pa'netserña'pa' añ aye'chcataret oro — ora allohuenpa' e'ñe oroche'. Añ oropa' atarr nanac cohuen ñeñt'pa' e'ñe orrtatuenan pa'namen ñeñt allpon allo'tsa'yen. E'ñe atet ñerra'mrrate' rerpap ñeñt atarr cohuen e'ñech orrtatuenan allohuen pa'namen ñeñt allo'tsa'yen.

19 Ñehua, añ econach allo orratenet conchet, ñeñt econach puecllo'ya'tetspa' atsetareno poptena ñeñt allo a'cohuentateñet. Ñeñt ñanom econach puecllo'yarr allña'pa' añ ana'yese'at atarr cohuen poptame'te' aspanamemenatollesha' ñeñt otenet jaspe. Ñeñt puepuecllo'yañ econach allña'pa' añ ana'yese'at atarr cohuen poptame'te' asollememenaretollesha' ñeñt otenet zafiro. Ñeñt econach puema'puecllo'yañ allña'pa' añ ana'yese'at atarr cohuen poptame'te' huallamemenatollesha' ñeñt otenet ágata. Ñeñt puepa'tatseclo'yañ econach allña'pa' añ ana'yese'at atarr cohuen poptame'te' aspanamemenatollesha' ñeñt otenet esmeralda.

20 Ñeñt econach pa'mnarecllo'yañ allña'pa' añ ana'yese'at ñeñt atarr cohuen pa'namenot poptame'tyena ñeñt otenet ónice. Ñeñt po'pechapuecllo'yañ econach allña'pa' añ ana'yese'at atarr cohuen poptame'te' tsamemenatollesha' ñeñt otenet cornalina. Ñeñt econach po'cancherrecllo'yañ allña'pa' añ ana'yese'at atarr cohuen poptame'te' shemashrememenatollesha' ñeñt otenet crisólito. Ñeñt econach po'psoclo'yañ allña'pa' añ ana'yese'at atarr cohuen poptame'te' aspanamemenatollesho asolleten ñeñt otenet berilo. Ñeñt econach pue'sconecllo'yañ allña'pa' añ ana'yese'at atarr cohuen poptame'te' e'ñe shemashrememenatollesha' ñeñt otenet topacio. Ñeñt econach po'charraclo'yañ allña'pa' añ ana'yese'at atarr cohuen poptame'te' ama e'ñeye' aspanamemenaretolleshayaye ñeñt otenet crisoprasa. Ñeñt econach po'charraclo'yañ puechena puecllo'yarr allña'pa' añ ana'yese'at atarr cohuen poptame'te' asollememenma'tetollesha' ñeñt otenet jacinto. Ñeñt econach po'charraclo'yañ puechena epuecllo'ya allña'pa' añ ana'yese'at atarr cohuen poptame'te' yetsñorromemenatollesha' ñeñt otenet amatista.

21 Allohuen yetarro'chno ñeñt 'charra' puechena epa e'ñe cohuen huallatrren atet ñerra'm chempeshtall o'ponotpa'

atarrcha' huallatllellen ñeñt otenet perla. Pate'tets yetarr e'ñe patrra perla ayečcataret. Ñaña añ calle ñeñt all chopeñe'chenet ñeñtpa' e'ñe oroché' ayečcataret atet ñerra'm rerpap ñeñt e'ñe orrtatuene' ora ñeñt allpon allo'tsa'yen all.

22 All Parets pa'netsro ama't patrra pocoll ama neñche ñeñt all ma'yocheñet Yompor. Tarro'mar allpa' ama pall-teno pocoll allcha' ma'yocheñet Yompor, tarro'mar ñeñt nanac Parets ñeñt Yepartseshar yepen ñapa' e'ñe allo'tsen all ñeñtcha' ma'yochena allohuen acheñenesha' epuet ñaña Puechemer Cristo ñeñt atma'ntaret Carrnero.

23 Ñaña Parets pa'netsro allpa' ama muenenano atsne' ama't arrorra ama mueneñeto ñeñtcha' čhoyo'tetsa all. Tarro'mar Yompor ñeñt atto poptena pa'tsnomueño'tpa' ñeñtña čhoyo'tetsa all epuet ñaña Puechemer Cristo ñeñtña lamparñetets. Ñeñtara Cristo ñeñt atma'ntataret Carrnero.

24 Ñeñt atto poptena Yompor pa'tsnomueño'tpa' ñeñtña a'puetarsam'pene' erracmañen allohuen pa'namen acheñenesha' attoña correnet e'ñe cohuen. Allohuen am'cha'taretnesha' ñeñt atto cohuentenet añe patsro, huapatueretcha' Parets pa'netsro alloch cohuentateññañet ñamet Parets pa'netser.

25 Ñeñt Parets pa'netser ñeñt pueyottar pen allo't be'tenet, amach yottam'perre'te e'ñech ellapene't atoraret. Allpa' ama't checmetapa' ama eñalle.

26 Allohuen pa'namen acheñenesha' ñeñt am'cha'na'tpotyetsa añe patsro ñeñt atto cohuenetyenet, huapatueretcha' Parets pa'netsro alloch cohuentateññañet ñamet Parets pa'netser.

27 Allpa' ama't ahuatapa' amach orrtateto ñeñt sosya'tsañečno tarro'mar allpa' ama't puesheñarrapa' ama be'teno ñeñt cotape'chene' sosya'tsañečno ñeñt atarr tsena'ten Yompor ñeñt atet ñerra'm ashcarña't. Allpa' añe be'tets ñeñt aquellcayet pa'so'chñečno Cristo po'libro attochña ñetpa' corretsetach.

22

1 Allempoña mellaño'teñpa' o' alla gaterrnerr po'ñes. Ñeñtpa' arrot huena conañot allo'tsen Yompor epuet ñaña Puechemer Cristo ñeñt atma'ntataret Carrnero. Ñeñt oñpa' atarr cohuen, atarr llancasaseno poptaso'tena. Oñ ñeñt atarr cohuen añ toma'ntena atto apuene'y Yompor attochña yapa' corretsayach e'ñe yocsheñeshocmañen errponohuañen.

2 Ñeñt Parets pa'netsro e'ñe rrocho allecma chopeñe'chenet, allñapa' all oñen oñ. Ñeñt oñ emoto'mar popame'tar-ro all chopyen tsach. Ñeñtña tsachpa' atarr nanac me'ten, pueña'tets arrorrpa' chocma me'ten. Paterr charpa' charroch me'ten puechena epa. Ñeñt pue'mer ñeñtcha' apuerrey Yompor añ toma'ntena alloch yocrerra errponañohuen ñeñt ama ahuañaño ama't ahuata. Ñaña pasopanerpa' añecop sherben ñeñtcha' a'crraterre' allohuen pa'namen acheñenesha' e'ñe puecamquẽñohuenet.

3 Parets pa'netsropa' amach eñalleterro ama't patrra ñeñtcha' a'cmarettertsa. Tarro'mar Yompor epuet ñaña Puechemer Cristo ñeñt atma'ntatareñ Carrnero, ñetña partsotetset all po'conañeto. Ñaña allohueney ñeñtey torretsa Yomporecop e'ñech cohuen yesherberr yaña all.

4 Yentercha' Parets yecuacle'channerrach parro epay Yompor. Yeto'moña yapa' quellquerrancha' e'ñe ña pa'so'cheñ.

5 Allñapa' amach eñalleterro checmete'. Ñeñteycha' yeçherrtsa allpa' amach yemnerro ñeñtcha' yeçhoyo'tamñse'. Atto te'pa' chocma yemnen lampareñ alloch yeçhoyo'tamñpena. Allempopa' amach yemnerro ñaña o'ch çhoyo'tamñpeney atsne', tarro'mar Yompor ñeñt Yepartseshar yepen, ñapa' ñaña pa'tsnomueña ñeñtcha' yeçhoyo'tamñperre' all. Ñaña yapa' ya'ncha'tarettapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

6 Allempoña mellañoñeña' o' alla oterrerr, ñeñtpa' atet oterrerr:

—Ora allohuen añ ñoñetspa' e'ñech seyemcha tarro'mar ñeñtpa' e'ñech po'ñoçh atet perra. Ñaña Yompor ñeñt Yepartseshar yepen ñaña'pa' chocma eñotatenan ñeñtcha' a'mtene' po'ñoñ. Ñeñtara Yompor ama't te'pa' o' llesensan po'mllañoñeñer ñeñtcha' gatyene' ñeñt torretsa ñocop ñeñtcha' ahuen atet perra ama't esempo.

7 Ñaña Cristo ñapa' atet oten:

—Señoche'pa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcareñ all Yompor po'libro ñeñtcha' atet perra esempo. Arrpa' allohua huañ ñeñt atet eñotaten mellañoñeñ.

8 Na ñeñten Juananpa' ñaña e'muene' ñeñt ora allohuen añ ñoñets ñaña ñaña entene' ñeñt allpon gatyennet. Allempoña napa' neconcorposa e'ñe mellañoñeñ pa'rrpo ñeñt negatyene' ora allpon pa'namen esocmañen o'ch nema'yochyañ.

⁹ Ñaña'pa' oten:

—Amach pema'yochatsetno na, tarro'mar napa'cho'ña e'ñe parropa' atta netorrapretenpa Yomporecop ñaña allohuen ñeñt' pemo'nasheñeshačno pepen ñeñt' a'mta'yene' Yompor po'ñoñ, epuet ñaña allohuen ñeñt' atarr yemtenaya añ ñoñets ñeñt' atet aquellcaret añ libro. Papa' Yomporña pema'yocha.

¹⁰ Allempoña ñeñt' mellañoñeña' alla oterrerr:

—Ñato't cha pa'nasotena' añ ñeñt' allpon Yompor po'ñoñ ñeñt' o'pequellca'hua. Tarro'mar allpon ñeñt' o'pequellca'hua ñeñt'cha' atet perra esempo, te'ñapa' o' chapmoch allempoch attoch e'ñe etsotuerria esempohuañen.

¹¹ Tarraña e'ñe allempoteñ allohuen ñeñt' ama cohuenaye' es petso ñeñt'pa' allo'nepa'ch senet patse'tyeset ñeñt' ama cohuenaye' enteno Yompor. Allohuenet ñeñt' añach yeçhenet sosya'tsañečno, ñetpa' allo'nepa'ch senet yeçcatyesnomuet ñeñt' atarr sosya'tsañečno. Tarraña allohuen ñeñt' e'ñe ch cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt' ma'yochrenaya ñeñt' atto sherbeñet Parets, ñetpa'cho'ña allo'nepa'ch senet ma'yochrenet ñeñt' atarr cohuen enten Parets.

¹² Ñaña Cristo ñapa' atet oten:

—Te'pa' señohepa'ch napa' ahuencha' nohuerra. Nehuapaterrnascha' ñeñt' no'patatensa alloch netsa'tuerrsa e'ñe puesheña'ttsos sa erroñente' setorra'yese't. Tarraña o'ca'ye nehuapaterr ñaña alloch netsa'tatuera ñeñt' ama pocteye' es petso.

¹³ Napa' e'ñe pa'motroteñ eñallen, atten ñerra'mrrate' quellec A ñeñt' pa'moter pen alfabeto. Allempoteña napa' chocma eñallen esempohuañencha' huañerr ñeñt' allpon eñall, napa' atten ñerra'mrrate' quellec Z ñeñt' all puen alfabeto.

¹⁴ Atarr cosheñtso'tsen allohuen ñeñt' e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñt'pa' ñeñt'cha'ña e'ñe yoma'huerret ñesho. Ñehua, ñeñt' e'ñe pocte' enten Yompor ñeñt'pa' allohuen ñeñt' e'ñe e'shohuaretterra po'chñar e'ñe pame'ñeñoñet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' chapuet Yompor pa'netsro.

¹⁵ Tarraña allohuen ñeñt' ama ame'ñenayo Cristo ñetñapa' a'yote'tsa'yenetach Yompor pa'netsrot. Atet ñerra'm amase'ñetečno, ñaña ñeñt' ecañoreshatečno, ñaña ñeñt' amtsañečno ñaña allohuen ñeñt' po'yomporer pene' ayechcataret ñaña allohuen ñeñt' cohuen entene' allohuen

shequëñtsoçhno. Ñetpa' e'ñe ñeñña eñotenet o'ch shecare'chet acheñenesha'.

¹⁶ Allempoña Jesúsapa' alla oterrerr, ñeñtpa' atet ot:

—Napa' naña ñeñten llesensene' nemillañoñer ñeñt o' eñotaterres ora añeçhno, allohuenes ñeñtes e'ñe same'ñeñoñen na sapa' çhocma sapçha'yena allemeñ anetso'mar. Napa' ñeñten allot huapa añcha'taret David, elloñapa' o' alla po'mreneñ perrnerr naña. Ñaña napa' atten ñerra'mrrate' ranto ñeñt atarr atarrenñ ñeñt atarr huomenc atsnets o'ch puetarenmoch. Attoña na'puetarsampeñ allohuen acheñenesha'.

¹⁷ Allohuen ñeñt pueyochresha' pen Parets ñetpa' atma'ntatarettenet atet ñerra'mrrate' Cristo puetapor penahuet. Attoña ñet Parets Puecamquëñoñ oteñet Cristo:

—Apon.

Ñaña allohuenes ñeñtes e'mñotene' o'ch soch samña Cristo:

—Apon.

Ñaña allohuenet ñeñt oñpa'tets ñeñt ama eñmatetso pueyoçhreto ñeñt çhocma es e'nyenet, ñetpa'çho'ña huapuetepa'. Yoretepa' añ oñ, allochñapa' ñetpa'çho'ña corretsetach. Ñeñt oñpa' e'ñech atta aparettet, amach es tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt e'mñotene' añ ñoñets all oteney ñeñtcha' atet perra esempo. O'ch notanet: Ñerra'm esesha' atontatene' ñet poçtapñet ñeñt ama atteye' otenye añ ñoñets, Yomporñapa' o'ch atontatanet ñocpuet ñeñtcha' mueroçhtaterrahuet ñeñt atet o' aquellca'huareta añ libro.

¹⁹ Ñaña ñerra'm esesha' çha a'chencatenan ama't patrra ñoñets ñeñt allpon aquellca'huareta añ libro, Yomporñapa' amach muenataneto o'ch es o'patapreteret all aquellcarettena libro allpon ñeñtñapa' corretsetach. Ñaña ñetpa' amach be'tosapo'tampereto Parets pa'netsro ñeñt atet o' aquellca'huareta añ libro.

²⁰ Ñeñtara Jesús ñeñt yeñotatyene' ora añeçhno, ñañaapa' alla oterrerr:

—Napa' po'ñoçhcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñtpa' attetepa'ch yocop.

²¹ Yepartsesharepa'chña Jesucristo sa'natenaya e'ñe allohuenes. Ñeñtpa' attetepa'ch Nompore allohuenacpay. Arrpa' e'ñe allohua puen Yompor po'ñoñ.